


Nacom Pejume Diwesi po diwesi pena jume diwesi

xua Jesucristo yabara tinatsi



New Testament in Guambiano

Nacom Pejume Diwesi po diwesi pena jume diwesi xua Jesucristo yabara tinatsi New Testament in Guambiano

copyright © 2010 Wycliffe Bible Translators, Inc.

Language: Guambiano

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guambiano

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
7e6b2dfc-632e-5b6e-aeb4-3ed6877d71c9

Contents

GÉNESIS	1
San Mateo	66
San Marcos	114
San Lucas	144
San Juan	194
Los Hechos	231
Romanos	276
1 Corintios	297
2 Corintios	316
Gálatas	329
Efesios	336
Filipenses	343
Colosenses	348
1 Tesalonicenses	353
2 Tesalonicenses	357
1 Timoteo	360
2 Timoteo	366
Tito	370
Filemón	373
Hebreos	374
Santiago	390
1 San Pedro	395
2 San Pedro	401
1 San Juan	404
2 San Juan	409
3 San Juan	410
San Judas	411
El Apocalipsis	413

Génesis

Srøsrø Pølbasrig

¹ Ke srøtø chigucha chigaaben, Tiusbe srømbalameranba, pirøwanba marig køn. ² Pirøbe mumay kuinguen asamgaig chiguchagaig pasrøben, pimerabe purø trømbø løstiig pinøgasraig pasrabig køn. Inchen Tiuswei Espiritube pi palawan llirabig køn. ³ Tiusbe trenchibig køn: “Tør kønrrain” cha. Inchen tørbe misrøbig køn. ⁴ Incha Tiusbe tørwane tab kui asha, tørwane løstøyugurri nuingui mendamarøbig køn. ⁵ Tiusbe tørwane “kwaløm” cha wamappe, løstiigwane “yem” cha wamabig køn. Inchen maabenba løtsøba købig køn, tru srøsrø kwaløm.

⁶ Katø Tiusbe trenchibig køn: “Larrø lendiig chiguchagaig kønrrain cha, tru pimeran nuingui, nuingui tarømartrabig tøbøtag pasrønrrai.” ⁷ Incha Tiusbe tru larrø lendiig chiguchagaigwan marøbig køn, tru pimeran tarømarøbigwan. Tru pimera pala købelanba, umbu købelanba nuingui tarømarig kørrømisrtrai. ⁸ Incha Tiusbe tru larrø lendiig chiguchagaigwane “srømbala” cha wamabig køn. Inchen maabenba, løtsøba køben, pa kwaløm købig køn.

⁹ Katø Tiusbe trenchibig køn: “Srømbalamerai umbu pimera købeløbe kanbalatø misrtrain cha, pur kenamisrtrai.” Inchen treeg kuig køn. ¹⁰ Incha purwane Tiusbe “pirø” cha wamappe, pimera kanbalatø misrigwane “marmera” cha wamig køn. Incha Tiusbe tabig kui asig køn. ¹¹ Incha Tiusbe trenchibig køn: “Pirøbe misringarubash cha, pilli puzheelø chi kaumera køppe, treeg yellzheelø tøgar, mamig nigab tusrmera, chi tusr køppe, treeg yell truyu tøgar pirau tøgar keeg køn. Inchen treeg kuig køn. ¹² Inchen pirøbe pilli puzheelø chi kaumera køppe, treeg yellzhig nigar, mamig nigab tusrmera yellzheelø truyu nigar misrøbig køn, nø chi tusr køppe, treekke. Inchen Tiusbe tabig kui asig køn. ¹³ Inchen maaben misra, løtsøgualmaben, pøn kwaløm købig køn.

¹⁴ Tiusbe katø trenchibig køn: “Tru srømbala larrø lendiig chiguchagaigube pilabelø kønrrain cha, kwalømwana, yemwana tarømartrabelø, iiløbe chi utømera køben amrrubelan ashib kømig kønrrai, kwalømmerawan, pilamerawan.” ¹⁵ Incha truiløbe srømbalasrø larrø lendiig chiguchagaigu pilabelø kønrrain cha, pirøwan pilønrrabelø.” Inchen treeg kuig køn. ¹⁶ Tiusbe pagatø pilabelø nørreelan marig køn: tru pilabig larrø tørøibe kwaløm piløben, pilabig tre tør kømiibe yem piløben inchai, katø nøbe kønchabiimeragucha marig køn. ¹⁷ Tiusbe tru srømbalamera larrø lendiig chiguchagaigu ilan pønsrøppe, pirøwan pilønrrai pønsraig køn. ¹⁸ Kwalømwana lata, yemwana lata pilamburab pilabeløbe nøm pønrrønrrai marig køn, tørwanba, løstiigwanba tarømartrabelø. Incha Tiusbe tabig kui asig køn. ¹⁹ Inchen maaben misra, løtsøgualmaben pib kwaløm købig køn. ²⁰ Incha Tiusbe trenchibig køn: “Pimerabe chigurrimbunø øsiguelø tøgagøbash cha, katø illimera tru pirøbalawan llirabeløgucha kønrrain cha, tru larrø lendiig chiguchagaigu srømbalamerawan amøñibelø.” ²¹ Incha Tiusbe piyu ushamera kwaaramdø nørreelø marig køn. Chigurrimbunø øsiguelø kønab purrønrrabelanba, chitøgucha nøm chimera køppe, treelø kønrrai pimerabe treeg misringarug køn, katø chigurrimbunø kwaldzariimera tøgargucha nøm chi køppe, treeløtøwein kønrrai. Incha Tiusbe tabig kui asig køn. ²² Incha Tiusbe truilane mayanguen tabig kønrrai marabe, trenchibig køn: “Larrø nørø tøgagøb, larrø nørø larrøbitchigay cha, marmeryu netsab, katø illimeragucha larrø nørø larrøbitchigay” cha. ²³ Inchen maaben misra, løtsøgualmaben, truike tratrø kwaløm købig køn.

²⁴ Incha Tiusbe trenchibig køn: “Pirøbe øsiguelø misringarubash cha, kusreeg ushamera køben, namig ushamera køben, srala ambubelø køben, nøm chimera køppe, treelø kønrraugue.” Inchen treeg kuig køn. ²⁵ Tiusbe namig ushamera nøm chimera køppe, treelø kønrrai marøb, katø kusreeg ushamera nøm chimera køppe, treelø kønrrai marøb, maya ushamera pirau sralig ambubelø nøm chimera køppe, treelø kønrrai marøbig køn. Incha Tiusbe tabig kui asig køn.

²⁶ Incha Tiusbe trenchibig køn: “Møg misag margun cha, nam mailø køben ke tre lataitøwein køb, katø nam lataitøwei isub, marøbelø kønrrai. Incha maryu piyaumeran, srømbala amøñib illimera, kusreeg ushameran, namig ushameran, pirau sralig ambub ushameran, truiløn nør chinchaingaig, nø ashib tøga pasrønrrain” cha.

²⁷ Incha Tiusbe mowan marøppe nø maig køben ke tre lataitøwein kønrrai marig køn. Pøs nøbe tre lataitøwein kønrrai marig køn. Møg misag, ishug misag treeg marig køn.

²⁸ Incha Tiusbe mayanguen tabig nebulø kønrrigay chib, trenchibig køn: “Srøig larrøbitchabig yellmera tøgagøb, srøitø srøitø larrø nørø nemisrtrigay cha. Ñimbe pirøwan netsøgana, pirøwane ñim ashib tøga pønrramisra, chinchaingaig ñim ashib karunrrigay cha,

maryu piyaumeran, pala amõñib illimeran, katø maya ushamera pirau srala ambubelan købengue.”

²⁹ Incha Tiusbe trenchibig køn: “Asay cha, nabe ñimune pirau mamig nigab kauzheelø yellmera tøgartø kønrrai tranar cha. Katø maya tusrmera mamig nigabelø, yell tøgarmera tranar cha, iibe kerriguba ñim may kømig kønrrai.” ³⁰ Inchen pirau namig ushameranba, pala amõñib illimeranba, katø maya ushamera pirau srala ambubelanba, truilane pilli puzhigwan mab kømig tranar cha. Inchen treeg kuig køn.

³¹ Incha kerrigu Tius nø mariilan ashabe, truba truba tabig kui ashibig køn. Inchen maaben misra, løtsøgualmaben, trattrø y kan kwaløm købig køn.

2

¹ Inchen srømbalameranba, pirøwanba truyu kerriguh chi købelanba chab marig kørrømisrig køn.

² Incha Tiusbe kerrigu nui maramigwan yandø patsøga, trattrø y pa kwalømyube isrig køn nø kerrigu chi marigwan. ³ Incha Tiusbe tru trattrø y pa kwaløm kønrrabyugwane mayanguen tabig kønrrai mara, nuyasig kønrrai tarømara pasrøbig køn, kaguende nø chigurrimbunø mara pønsra tru kwalømbe nø isrig kua.

⁴ Srømbalawan køben, pirøwan køben mara pønsrailan øyeeg købig køn cha wamindig iig køn.

Møg Misag Ellmarin Tulyu Inchen Jehová Pirøwanba Srømbalameranba Marmøwatøbe

⁵ piraube ka nøtø kal-lab tusrmera chigucha kawei, chigucha kaumera kal-laig kawein købig køn, kaguende Jehová Tiusbe piraumay srewan pungarumø srø køben. Inchagucha kwallchabig mu møg mugawein køben. ⁶ Pibe piraugurri webarrub, pirø palawan kerrigu sømarøbig køn. ⁷ Inchen Jehová Tiusbe pirøyu usrøtøga møg misag mara, trugurrimbe øsiguig kønrrai kimyu urrøben, møøbe øsiguig misrig køn.

⁸ Incha Jehová Tiusbe Eden taisrø kan ellmarin tul mara pasrøbig køn, tru pørr neeshib-gatømayrsø. Incha tru nø mari mowan truyu kørrømarøbig køn. ⁹ Incha Jehová Tiusbe chi tusrkurrimbunø chull asamdø tab tusrmera pirau kal-langarubig køn, chull mamdø mamiimera nigabelø. Inchen tru tul tøbøtabe tru kwamø øsig køm tusrwanba, katø tru tabigwanba, kaigwanba nebua asam tusrwanba kal-langarubig køn.

¹⁰ Inchen tru Edenygurrimbe pi webarrubig køn tru tulwan sømarøb lulrrabig. Incha truyugurrimbe katø pippaløh pirisha webibig køn. ¹¹ Tru srøsrø pibe Pisón munchi købig køn, truipe tru Havila pirø muba kuimburab pøtøganwan pureb ibig køben, trusrømbe oro tøgaike.

¹² (Incha pirø muba kuimburab tru pirau orobe larrø tabig købig køn, katø truyube mayzhig irrabig bedelio køben, ónice køben tøgaike.) ¹³ Inchen tru wendau pibe Kihón taig, truipe tru Cus pirø muba kuimburab pureb ibig køn. ¹⁴ Inchen tru pøn kønrrabyu pibe Tigris taig køn, Asiria pirau pørr neeshibgatøwansrø pureb ibig. Inchen tru pib kønrrabyu pibe Eufrates køn.

¹⁵ Incha Jehová Tiusbe mowan pera arrua, tru Edén ellmarin tulyu kørrømarøbig køn, pirøwan kwallib ashib tsunrrai. ¹⁶ Incha Jehová Tiusbe tru møwane trencha karua pasrøbig køn:

—Tru tulyu chi tusryu mamiimerandøgucha ka manrrig cha. ¹⁷ Inchendø tru tabigwanba, kaigwanba nebua asamburab asam tusryu mamigwane manrrab kømø cha, kaguende tru tusryugwan ñi mab kwalømbe isa kømø, ñibe kwanrrabguen— cha.

¹⁸ Incha trugurrimbe Jehová Tiusbe trenchibig køn:

—Møg nøtø unamiibe chi tab kømøn cha, nun purugunrrabig nø maig palain køben, treegwan martrab— cha. ¹⁹ Incha Jehová Tiusbe maya ushameranba, illimeranba pirøwandøwei mara pønsra, møwei merrab pønsrøbig køn, chi munchi pønsramigwan nø asha pønsrønrrai. Inchen møg tru øsiguelan treeg munchi pønsra wamiiløbe tru munchin tøgar kørrømisrig køn.

²⁰ Inchen møøbe maya ushamera namiguelan, pala amõñibelø maya illimeran, katø tru kusreeg ushameran mayamba munchi pønsrøbig køn. Inchen køben mowan nø maig palain køben, treegwan purugunrrabiibe mugaabig køn.

²¹ Inchen Jehová Tiusbe mowan purø mur kingarua, nø kib tsumnebe kan tømbl tsut-sigwan wesrawa, tru tsutsig wesrub kurigwane katøle treetøweih kasrøbig køn. ²² Inchen Jehová Tiusbe tru tømbl tsutsig wesraigwane ishug misag mara, møweimay pera arrubig køn. ²³ Inchen møøbe trenchibig køn:

—Iibe sí, nain tsutsigugurrin tsutsig køb, katø nai asryugurri asr køb indan cha. “Ishug misag” cha wamig kønrrun chibig køn, kaguende nøbe møweinukkurri wesraig køn— cha. ²⁴ Treekkurri møøbe møskawan, usran tarømisra, sraimba kandø misra, kan asrtø kønrrun.

²⁵ Møøba, ishuubabe pailøba køsaateelø købig køn. Inchendø chi kørig kui inchimeeløgue.

3

Adamba Evaba Mørmuig

¹ Inchen tru ulbe maya ushamera lataguen kømø, chigøben maramigwane purø may isua marøbig købig køn, Jehová Tius nø mariiløyu. Incha tru ulbe ishuwane trenchibig køn:

—¿Kabe Tiusbe ñimungan tru ellmarin tulyuigwan ni mø tusryuigwanguen kerriguwan mamønrrain taig kuitarru?— cha.

² Inchen ishuube ulwane trenchibig køn:

—“Tulyu pønrrab tusryu mamiimerane ka manrrigay” taig køn cha. ³ Inchendø tru ellmarin tul tøbøtag pasrab tusryu mamigwane Tiusbe øyeeg taig køn cha: “Mamønrrigay cha, ni katøramøwei inchigay taig køn cha, kwamig kømønrrai”.—

⁴ Inchene ulbe ishuwane trenchibig køn: —Ñimbe kwamønrrabguen cha. ⁵ Tiusbe asha køn cha, ñim tru tusryuigwan mab kwalømbe, ¡katø! chinetø nebua asamigwan ñimui isubig kuren, ñimbe Tius lataitøwein kønrrabguen cha, kaigwanba, tabigwanba nebua ashibelø.—

⁶ Inchen ishuube tru tusryuigwan larrø chull mamdiig kui ashib, trurriгу tru tusryu mamibe larrø mayzhig kønrraptig kui ashib, katø chiwandøgucha larrø kusrebig kuinrrabna isumig purø chull kønrraptø tusr kui ashib inchibig køn. Incha tru tusryu mamigwan nemøøb, maptinchibig køn. Inchabe kewangucha srørren, truikkucha mabig køn. ⁷ Inchen mømbe tru pailanba, ¡katø! chinetø nebua asamigwan nømui isubiibe kurøptinchen, nømbe kōsaateelø kōbrain kui wetøgørra, nømbe higuera ishiimeran tsusha, sötøgasrailø marøbelø køn.

⁸ Inchen yandø mawab misrøb pishi isig ichibig webarruben, tru ellmarin tulyu Jehová Tiusbe llirab arri mōra, møøbe nui sraimba tusr utumerawansrø trubabelø køn Tius nø pasrainukkurri. ⁹ Treendingucha Jehová Tiusbe mōwan wamabe, payibig køn:

—¿Ñibe chu pasrøgu?— cha

¹⁰ Inchene møøbe trenchibig køn:

—Tru ellmarin tulyu ñi llirab arri nabe møøptindinaben, nane truba kørig kōtan cha, kaguende nabe kōsaatiig kōbrain kōbtinchen, treekkurri nabe trubar— cha.

¹¹ Inchene Tiusbe trencha payibig køn:

—¿Ñune kōsaatiig køn chabe, mu eshkata? cha. ¿Na mamønrrain taig tusryu mamigwan ñibe mappeendi?— cha.

¹² Inchen møøbe trenchibig køn:

—Tru ñi nan lincha pera uñchai trani ishug tru tusryu mamigwan nan srørren, nabe mar— cha.

¹³ Inchene Jehová Tiusbe ishuwane trenchibig køn:

—¿Øyeebe chi margu?— cha

Inchene Ishuube

—Tru ul nan purø may wamincha isøben, nabe mar cha— trenchibig køn.

¹⁴ Inchen Jehová Tiusbe tru ulwane trenchibig køn:

—Ñi øyeeg marikkurrindø maya ushamerai utu ñibe larrø trømbøig nebuig kønrrig cha, kusreeg ushamerai utu lata, namig ushamerai utu lata. Patsøtøgatø sraløb uña, ñi chugatig øsig tsuingatiibe pirøyu usrøwan manrrig cha. ¹⁵ Incha ishuuba ñibabe larrø ashig kømuintiyabelø kønrrai maramønrrun cha, ñuinukkurri amrrubeløba, katø ishuweinukkurri amrrubeløba. Incha tru ishug misagweinukkurri srøig srøig kurrab arrubiguig ñune turwan pusøbunøben, ñibe nune taluny tsatchun— cha.

¹⁶ Incha ishuwane trenchibig køn:

—Ñune unø tøgamisrøbyu pusrkwabigwan masken trømbøig pusrkwanrrai nemaramønrrun cha. Purø trømbøig pusrkwai incha, ñui ureemeran tøgamisrøbraguen cha. Inchen ñi ureg tøgagukkøb chull isuibe ñui kewein køben, ñui keebe ñune nø karub nø ashchabig køn— cha.

¹⁷ Incha mōwane trenchibig køn:

—Ñi ñui srawei wamwan manchitanmaptø møøb pasrøwa, na mamønrrig tain tusryu mamigwan ñibe tain køn cha. Ñigurrindø pirøbe larrø trømbøig nebuig pasrønrrun cha. Ñi chugatig øsig tsumnegatiibe ñibe ¡katø! isua mōra marøb megawabe, truyugurri manrrabguen cha. ¹⁸ Inchen pirøbe tsøshambah, kaldusrmerabatø misren, mappe, kau umbu tusrmerandø manrrigay cha. ¹⁹ Ñibe pōsra, pōsra mara mamig tøgagønrrig cha, ñi katøle pirøtøwei misramnegatikke, kaguendø ñibe pirøtøga mara pasrig køn cha. Ñibe pirø usrø kuig kōppe, katø ñibe usrøtøwei misrtrabig køn— cha.

²⁰ Inchen Adánbe nui srawane Eva munchi pasrøbig køn, kaguende Evabe maya misagwei usrin kønrrabig kuimba.

²¹ Jehová Tiusbe moweimba, nui sraweimba kemelø ushamerai kalusmeran mara, kennøbig køn. ²² Incha Jehová Tiusbe trenchibig køn: “Møøbe møyimbe kan møyig køben nam lataitøwei misra pasramisrin køn cha, tabigwanba, kaigwanba nebua ashibig. Pøs, nui tasigwan larrøbitchain kømøn, chibig køn, tru øsig køm tusryu mamigwangucha nemøra, truigwan ma, managatig øsig kønrrab.” ²³ Incha Jehovábe tru Edén tulyugurri nømun webusøbig køn. Incha pirøwan kwallchain pasrig køn, tru nun mara pasrin pirøwan. ²⁴ Incha møywan wambig wegucha, Edén tru tulyu pørr kal labgatømay querubinmera pønsra, katø kan espada naarabig amburab, iburab llirabig pasrøbig køn, managatig tru øsig køm tusryumay ambam maywan pumønrrai martrab.

4

Cainba Abelba

¹ Adanbe nui srai Evaba unø tøgagønrrab pailø waramisrøbelø køn. Incha Evabe kwanriig kørrømisra, Cain kal labene, trenchibig køn: “Na unø tøgagømig Jehová treeg kønrrain køben, kan møy-unø tøgaguinatan” cha. ² Incha katø wendøbe Cainwei nuneg Abelwan tøgamisrig køn. Abelbe ubisha ashibig køben, Cainbe pirøwan kwallibig kuig køn. ³ Inchen kan maya yana køsrøn puraiben, Cainbe Jehováwan ketamig nui kwaliiløygurri srua arrubig køn. ⁴ Inchen Abelgucha nui ubishamera ke srøsrø lluilan srua arrubig køn, sebowanba. Inchen Jehovábe Abelwanba tru nui kettrab srua arrigwanba truba tab kui ashibig køn. ⁵ Trune Cainwane tab kui ashmuig køn, tru nø keta tranigwan chigucha. Inchen Cainbe truba trømbøig namuben, nui maløbe ke minchiptinchibig køn.

⁶ Trenchene, Cainwane Jehovábe trenchibig køn:

—¿Chindimbarre namøgu? cha. ¿Chindimbarre ñui maløbe ke peg misrøptinnda? cha. ⁷ Ñi sølwan isua marig kuimbe, ñibe utsøbasrmø kurraasha pasrabsruinrrun cha. Inchendø ñi sølwan isua marmuikkurrimbeh, kaigwan matrai inchabiibe ñun megambunrrab ¡katø! muniitø pasran cha. Inchen køben ñibe tru kaig marmumigwane ñi kananrrabguen— cha.

⁸ Cainbe nui nuneg Abelwane trenchibig køn:

—Chugøben lliranrrab amun— cha. Indig yandø tru llirab amønaisrømbe Cainbe nui nuneg Abelwan namappe, kweechibig køn.

⁹ Inchene Jehovábe Cainwane trencha payibig køn:

—¿Ñui nuneg Abelbe chu unah?— cha. Inchen nøbe trencha løtabig køn:

—Chindindøbeh cha. ¿Nagan nai nunewan ke tru ashib wendaütø pasrabig kuitarru?— cha.

¹⁰ Inchene Jehovábe trenchibig køn:

—¿Chi margu? cha. Ñui nunewei animbe piraugurri trashib nan wamøtan cha. ¹¹ Ñibe larrø trømbøig nebuinanrrabig kørrømisrøb, tru ñui nuneg Abelwan ñi kweechen ani lusigwan muchib piraugurri ñune webya inrrai wegutsig kørrømisrøb inchabguen cha. ¹² Pirøwan kwallib megaingucha, yandø mamig misrmønrrabig køn cha. Inchen ñibe piraube punø panrrø, punø panrrø ka lliraitø, lliraitø chuguen tsub tsumibe chigaig kønrrabguen— cha.

¹³ Inchene Cainbe Jehováwan trenchibig køn:

—Nan øyeeg møra pasrønrrai mariibe purø nuig køtan cha, pasramguengaike. ¹⁴ Møi na tsuinukkurri yandø nan weguchen; ñui merrabgurrimbe møyimbe trubatø unamønrrun cha, pirø muba kuimburab lliraitø, lliraitø chuguen tsub tsumig chigaikke. Inchen mugøben nan ashibiibe nane kwetchautan— cha.

¹⁵ Inchene Jehovábe trenchibig køn:

—Møikkøben Cainwan kweechibiibe siete pijisken purab trømbøig nebuin pasrønrrun— cha. Incha Jehovábe Cainwane kan siñal asamdiig tøgagig kønrrai marøbig køn, mugøben ashagucha, nune kweechimønrrai. ¹⁶ Incha Cainbe Jehováwei merrabgurri yandø tarømisra ya, Nod tain pirau Edén pørr kalabgatømaysrø tsubig køn.

Cainweinukkurri Amrrub Misaamera

¹⁷ Cainbe nui sraimba unø tøgagønrrab pailøba waramisrøbelø køn. Inchen sraimbe kwanriig kørrømisra, unø tøgamisrig køn, tru Enocwan. Incha Cainbe kan ciuda mara pasrabe, truigwane tru nui nusrkai Enocwei munchin pasrøbig køn. ¹⁸ Incha Enocbe kan nusrkai Irad taig tøgaguig køn. Inchen tru Iradbe Mehujaelwei møskain køben, Mehujaelbe Metusaelwei møskain køben, Metusaelbe Lamecwei møskain kuig køn.

¹⁹ Incha Lamecbe nuyasig pagatø ishumburmera tøgaguig køn. Kan ishuwei munchibe Ada købene, katøgan ishuwei munchibe Zila købig køn. ²⁰ Adabe kan unø tøgamisrig køn, tru Jabalwan. Tru merrabsrø kølli misag Jabalweinukkurri pølbasa amrrub mendig kuig køn, carpa lasrua pønrrailøyu warab, katø nømbe ushamera karrøgøb inchibelø. ²¹ Jabalbe kan nuneg Jubal taig tøgagig køben, tru merrabsrø kølli misag Jubalweinukkurri

pølbásra amrrub mendig kuig køn, mayeelø arpa kønabeløba, lus urrabeløba. ²² Inchen Zilagucha Tubal-Cainwan tøgaguig køn. Truibe chigurrimbunø bronze tsandzøntøgaba, hierro tsandzøntøgaba larrø tabelø marøbig kuig køn. Katø Tubal-Cainwei nuchaabe Naama købig køn.

²³ Kan piji Lameche nui sralan trenchibig køn:

—Adaba, Zilaba, nai wamwan mørtray cha. Lamecwei sralø, nai wamwan tab mørtray cha. Nan kørrinchen, nabe kan møwan kweechib, nan mur kebachen, nabe kan matsinan kweechar cha. ²⁴ Cainwanma siete pijisken purab trømbøig nebunrrai pasrig kuibe, Lameche sietebatø setenta pijisken treetø treetø purab trømbøig nebuin pasrørrun” cha.

²⁵ Adánbe nui sraimba unø tøgagørrab pailøba waramisrøbelø køn.

Incha Evabe kan nusrkai tøgagua, trunune Set munchi pasrig køn. “Tiusbe nane katøgan nusrkai trandan cha, Cain Abelwan kweetsig købene truburø tøgagørrai.” ²⁶ Incha Setgucha kan nusrkai tøgagua, truigwane Enós munchi pasrig køn.

Indig truyugurrimbunø yandø møgueløbe Jehováwei munchiwan wamab miabelø køn.

5

Adanweinukkurri Amrrub Uremera

¹ Iig køn tru Adánweinukkurri amrrub misaameran munchin merrarrailø, Tius møwan nø mara pasrøb kwalømbe, møywane Tius lataitøwein kønrrai marig køn. ² Incha møøba ishuuba kønrrai Tiusbe treeg mara pønsra, katø mayanguen tabig nebuilø kønrrai mara, tru nø mara pønsrøb kwaløm “Adan” cha wamig køn.

³ Adanbe pilamera ciento treinta tøgagua kan nusrkai tøgaguig køn chiyutøgucha nø lataitøwei, treeg unø. Incha truigwane Set munchi pasrig køn. ⁴ Adanbe Setwan tøgaguinukurrimbunø pilamera ochocientos tøgag kua, nusrkalø køben, nimbasrmera køben tøgaguig køn. ⁵ Inchawei Adanbe pilamera novecientos treinta tøgagua, yandø kwaig køn.

⁶ Setbe pilamera ciento cinco tøgagua, nusrkai Enóswan tøgaguig køn. ⁷ Setbe Enóswan tøgaguinukurrimbunø pilamera ochocientos siete tøgag kua, nusrkalø køben, nimbasrmera køben tøgaguig køn. ⁸ Inchawei Set kerrigu øsig tsuin kwalømmerabe pilamera novecientos doce kuig køn. Inchen yandø kwaig køn.

⁹ Enósbe pilamera noventa tøgag kua, kan nusrkai tøgaguig køn, Cainán taig. ¹⁰ Enósbe Cainánwan tøgaguikurrimbunø pilamera ochocientos quince tøgag kua, nusrkalø køben, nimbasrmera køben tøgaguig køn. ¹¹ Inchawei kerrigu Enós øsig tsuin kwalømmerabe pilamera novecientos cinco køben, yandø kwaig køn.

¹² Cainánbe pilamera setenta tøgag kua, nusrkai Mahalaleelwan tøgaguig køn. ¹³ Cainánbe Mahalaleelwan tøgaguikurrimbunø pilamera ochocientos cuarenta tøgag tsua, nusrkalø køben, nimbasrmera køben tøgaguig køn. ¹⁴ Inchawei Cainán kerrigu øsig tsuin kwalømmerabe pilamera novecientos diez køben, yandø kwaig køn.

¹⁵ Mahalaleelbe pilamera setenta y cinco tøgag kua, nusrkai Jaredwan tøgaguig køn.

¹⁶ Incha Mahalaleelbe Jaredwan tøgaguikurrimbunø pilamera ochocientos treinta tøgag kua, nusrkalø køben, nimbasrmera køben tøgaguig køn. ¹⁷ Inchawei Mahalaleelbe kerrigu øsig tsuin kwalømmerabe pilamera ochocientos noventa y cinco køben, yandø kwaig køn.

¹⁸ Jaredbe pilamera ciento sesenta y dos tøgag kua, nusrkai Enócwan tøgaguig køn.

¹⁹ Jared Enocwan tøgaguinukurrimbunø pilamera ochocientos tøgag tsua, nusrkalø køben, nimbasrmera køben tøgaguig køn. ²⁰ Inchawei Jared kerrigu øsig tsuin kwalømmerabe pilamera novecientos sesenta y dos køben, yandø kwaig køn.

²¹ Enoche pilamera sesenta y cinco tøgag kua, nusrkai Matusalénwan tøgaguig køn.

²² Matusalénwan tøgaguinukurrimbunø Enoche Tiusba maig unamig køben, treeg uñibig kuig køn, pilamera trescientos tøgag. Incha nusrkalø køben, nimbasrmera køben tøgaguig køn.

²³ Inchawei Enoc kerrigu øsig tsuin kwalømmerabe pilamera trescientos sesenta y cinco tøgaguig køn. ²⁴ Enoche Tiusba maig unamigwan unig køn. Incha chindinguen asiimig pinaptindig kuig køn, kaguende Tius nune øsiibatø pera iben.

²⁵ Matusalénbe pilamera ciento ochenta y siete øsig tsua, nusrkai Lamecwan tøgaguig køn. ²⁶ Incha Matusalénbe nusrkai Lamecwan tøgaguinukurrimbunø pilamera setecientos ochenta y dos tøgag tsua, nusrkalø køben, nimbasrmera køben tøgaguig køn. ²⁷ Inchawei Matusalén kerrigu øsig tsuin kwalømmerabe pilamera novecientos sesenta y nueve køben, yandø kwaig køn.

²⁸ Lameche pilamera ciento ochenta y dos øsig tsua, kan nusrkai tøgaguig køn. ²⁹ Incha truigwane Noé cha wamig køn, kaguende nøbe trenchibig køn: “Jehová pirøwan larrø trømbøig nebunrrai mara pasrim pirau, nam chi mariløyu purø trømbøig murig pui melaigugurri namun i unøbe chairannrrun” chib. ³⁰ Incha Lameche nusrkai Noéwan tøgaguinukurrimbunø pilamera quinientos noventa y cinco tøgag tsua, nusrkalø køben,

nimbasmraer køben tøgaguig køn. ³¹ Inchawei Lamec kerrigu øsig tsuin kwalømmerabe pilamera setecientos setenta y siete køben, yandø kwaig køn.

³² Noébe pilamera quinientos tøgag kua, pøngatø nusrkalø tøgaguig køn: Semwanba, Camwanba, Jafetwanba.

6

Misaamera Larrø Kaig Marøb

¹ Inchen yandø møguelø pirau truøø larrøbichib menda, nømbe nimbasmraer tøgagøb mendig køn. ² Inchen Tiuswei nusrkaløbe, tru Tiuswan ashmø misaamerai nimbasmraerabe truba truba tabzheelø kua asha, tru utu mas tab ishumburmeran lawa, nømyasig sralø marøbelø køn. ³ Inchene Jehovåbe trenchibig køn: “Nai Espiritube misag øsig kønrrai nuinuube managatikkuha pasrønrraamøn cha, kaguende møøbe patsønrrabig ka treetø køn cha. Inchawei nøbe øsig tsumibe pilamera ciento veintebe tøgagønrrun” cha.

⁴ Tru kwalømmerawane purø nørøø møguelø warabig køn, larrø nørreelø. Inchen katø tru Tiuswei nusrkaløbe tru møguelai nimbasmraeraba kasharawa, ureg tøgaguig køn. Inchen tru i møgueløbe chish møguelø chiyugucha kørmeelø købig køn, truiløbe merrabsrøngurri numera kuilan nebua asi misaamera.

⁵ Inchen Jehovåbe ashibig køn pirau misaamera larrø trømbøig marøb amrruibe chi lamøtiig kømø, purø nuig kui, nømui manrraube chu uragucha kerrigu chi isuiløbe kaigwandø, kaigwandø isubelø kuikkurri. ⁶ Inchen Jehovåbe yeekkucha kuitamab isubig køn, pirau misagwan tsunrrai marigwan. Nui manrraube purø kørøø isub puskrwabig køn. ⁷ Incha Jehovåbe trenchibig køn: “Misagwan mara pønrrailan chigucha kaanrrai patsøgønrrab cha, misagwan lata, ushameran lata, srala amøñibelan lata, pala amøñib illimeran lata. Karrenguitamab isur cha, øsig kønrrai na mariilan.” ⁸ Inchen køben Noébe Jehovåwein kabyu nøbe tabig kui asig kuig køn.

Noé Arcan Marøb

⁹ Iig køn, Noéwan maig pureb arrigwan waminchibig:

Noébe sølgandø maig maramigwan marøb, nøbagnetøø nørøørawarmerai utu nøbe sølgandø maig maramigwan marøb, katø Noébe Tiusba maig unamig køben treeg uñibig købig køn. ¹⁰ Noébe pøngatø nusrkalø tøgaguig køn: Semwanba, Camwanba, Jafetwanba. ¹¹ Inchen piraube larrø trømbøig minchib, katø melambuyab kalø marig truitø netsain pasrabig køn Tiuswei merrab. ¹² Tiusbe pirøwan ashene, truyube larrø trømbøig mincha pasrabig køn, kaguende maya misaamerabe larrø trømbøig mincha pasrøben tru nømui amønainug. ¹³ Inchen Tiusbe Noéwane trenchibig køn:

—Maya misagwan øyandø kønrrai nabe treeg isur cha. Kaguende nømgurrindø pirøbe larrø trømbøitø netsaim pasran cha. Incha nømune pirøwanbañau pinishinrrab cha. ¹⁴ Incha ñibe gofer tsiitøga kan arca mar chibig køn. Incha truyube cuartomera mara, umbuwan lata, wambigwan lata, pi larraimønrrai brea srøllrig cha. ¹⁵ Incha marøppe, øyeeg martrig chibig køn: Yammaybe ciento cuarenta metrosig, lendømaybe veintitrés metros tøgag køben, palamaybe catorce metros tøgaikke. ¹⁶ Incha arcane pøn itønñisraig mara, pala patsabsrøngurri pinag cincuenta centimetrosyuh pendanarrab pasrtrig cha. Incha mumay malømay køben kan yaskab pasrtrig cha. ¹⁷ Kaguende nabe pirau pi pulab arrubig ørtrab kur cha, tru srømbala umbuwan chigurrimbunø øsig warabelan pinishinrrai. Inchawei pirau chigurrimbunø købiibe chishtø pinønrrun cha. ¹⁸ Inchendø nabe ñune øyamay pasramønrrun cha, ñibe ñui sraimba, ñui nørskaløba ñui nusrkalai sraløba tru arcayu kebamrrigay cha. ¹⁹ Incha chigurrimbunø øsig købigwan trumørig truilan parchig, parchig kebamringarunrrig cha, chi ushamerandøgucha, kan ishuuba, kan møøba, ñiba øsig kønrrai. ²⁰ Chi illimerandøgucha, chi ushamerandøgucha, sraløb amøñibelangucha trumørig parbatø øsig kønrrab ñiba kebamrrun cha. ²¹ Incha nøm chi mabelø køben, chi mamikkurrimbunø ñi tulisha, esegau cha, truilaimba, ñuimba mab kømig kønrrai. ²² Inchen Noébe Tius maig karuigwan kerriguh treeg marøbig køn.

7

Pirau Pi Pulab Netsab Arrubig

¹ Incha Jehovåbe Noéwan trenchibig køn: —Ñiba ñui yaeløba arcayu kebinrrø cha, kaguendø nai merrab ñundøwei sølgandø tabigwan marøbig kui ashar cha, møi misaamerai utu. ² Inchen chi ushameratøgucha tabig chishelane trattrø y pagatøbatø møg ushameraba, trattrø y pagatøbatø ishug ushameraba kertrig cha møøba ishuuba, møøba ishuuba. Inchen chi ushameratøgucha chishig komeelane, kan møøba, kan ishuuba, pagatø, pagatø kertrig cha. ³ Katø treetøwei pala illimerangucha, trattrø y pagatøbatø kertrig cha, møøba, ishuuba, pirau tru illimeran piniimig tøgagønrrab. ⁴ Kaguendø trattrø y pa kwalømyube yu pirau

kwalømmerna cuarenta, yemmera cuarenta purayamne sre pungarumønrurun cha. Na marilø chigurrimbunø øsig købigwane kerrigu chish paluuncha pinisamønrurun cha.

⁵ Inchen Noébe Jehová maig karuigwan kerriguh treeg marøbig køn.

⁶ Tru uras Noébe pilamera seiscientos tøgaig købig køn, tru pi pulab arrubig pirøwan chishtø kasrøb arrub uras. ⁷ Inchen Noébe nui srain køben, nusrkalø køben, yernamera køben arcayuy kebibig køn, tru pi pulab arrubigurrri kwamø, øsig webinrab. ⁸ Inchen chi ushameratøgucha tabig chishelø lata, chishig kømeeelø lata, pala amøfib illimera lata, katø pirau srala amøñibelø lata ⁹ Noéba arcayuy kebambubelø køn, parbatø, parbatø, møøba ishuuba, møøba ishuuba, Noéwan Tius mandø karuig, treekke. ¹⁰ Indig tru trattrø y pa kwalømyu tru pi pulab arrubiibe pirau chishtø kasrøb netsab arrub mendabig køn.

¹¹ Inchen Noéwei øsig tsuin pilamera seiscientos køben, tru pila kebyaig pa pølyu diecisiete kwalømh, tru marmerna mas purø nørreelø umbusrøngurri chab wesurrøben, tru srømbalarø pimeran katab pønrabelan truilangucha kuren, ¹² piraube yemmera cuarenta, kwalømmerna cuarenta purayamne sre arrubig køn.

¹³ Inchen tru kwalømh arcayuy kebambig køn Noé køben, nui nusrkalø Sem køben, Cam køben, Jafet køben, Noéwei srain køben, nusrkalai pøngatø sralø købengue. ¹⁴ Incha nømba kebambubelø køn, tru kau umbu namig ushamera trumørig, kusreeg ushamera trumørig, pirau srala ambul ushamera trumørig, katø illimera trumørikke, katø kwaldzariibarnera købendø pala ammeelø købengue. ¹⁵ Øyeeg kebambig køn arcayuy Noéba, chigurrimbunø øsig købeløbe parbatø, parbatøgue. ¹⁶ Inchen tru kebambubeløbe trumørig ishuuba, møøba kebambig køn, Tius maig karuig, treekke. Inchen Jehovábe yaskabwan yandø kasrøbig køn.

¹⁷ Inchen pirau tru pi pulab arrubiibe kwalømmerna cuarenta nemisramnegatig pulab iben; pimeru pulab menda, tru pimerabe arcane piraugurri pala kusruig køn. ¹⁸ Inchen pimerabe pirau nurabig nurab arruben, arcabe pi palawan uñibig køn. ¹⁹ Inchen pimerabe piraube truba truba pulab nebib iben, maya srømbalamerai umbu tunmera purø paleelø pønrabeløguen chishtøh pinøgasraig kørørmisøbelø køn. ²⁰ Inchen tru purø pala tunmerawan pimera chab pinøgasrainukkurri katøgucha pimerabe palabunø sietes metros purab neguchib pulabig køn. ²¹ Inchen chigurrimbunø pirau øsig warabeløbe kerriguh chab kwabig køn, illimera lata, ushamera kusreeg ushamera lata, namig ushamera patsøtøga srala ambubelø lata, trugurri maya misamera lata. ²² Inchen chitøgucha kimrrabmay israbig øsiguelø pirau warabeløbe mayambah chishtø kwaig køn. ²³ Øyamay chimeratøgucha pirau øsiguig warabeløbe chab pinisailø kuig køn. Misag lata, ushamera lata, patsøtøga srala ambubelø lata, katø pala amøñib illimera lata pinisaig kørørmisrig køn. Øsig kørørmisrøppe, Noébah tru arcayuy tru nøba kebambubeløtøwei øsig kørørmisrig køn. ²⁴ Inchen pimerabe tru pirø palawan kwalømmerna ciento cincuenta nemisramnegatig pi netsaig kørørmisrig køn.

8

¹ Tiusbe Noéwanba, truyu kusreeg ushameranba, namig ushameranba kerriguba tru arcayuy Noéba purrabelan isubig køn. Incha Tiusbe pirau kan isig ichibig arringaruben, pimerabe kørreb mendabig køn. ² Pimera pirø umbusrøngurri wesurrabeløbe kasrøben, tru srømbalarø pimeran katab pønrabelan kuriiløgucha kasrøben, srømbalarøngurri sre arrubiibe yandø mas pumøben inchibig køn. ³ Inchen pimerabe pirau lamøh, lamø kørreb ib mendøben, kwalømmerna ciento cincuenta puraiben pimerabe chab lamørabig køn. ⁴ Inchen trattrø y pa pøl misren, diecisiete kwalømh arcabe Ararat tunmerasø pasramisøbig køn. ⁵ Inchen pimerabe pa trattrø pølgatig kørreibeig kørreb arruben, tru pa trattrø pøl ke srøsrø kwalømyuh tru nørø tunmerain pala yuumerabe kenamisøbig køn.

⁶ Indig truyugurrimbunø kwalømmerna cuarenta nemisren, Noébe tru nø mari arcayuy pendanawan kura, ⁷ kan yalø illiwan øren, truiibe yaitø, arriitø inchib uñibig køn pimera pirau kølamnegatig. ⁸ Incha katø kan palomangucha inrrai ørøbig køn pirau pimera køliitashchab ashchab. ⁹ Inchen palomabe arcayumay katø arrubig køn, kaguende ni chugucha punamig chi kaaben. Pimerabe katøgucha pirø palawan kasraig srø køben. Inchen Noébe nui kwalwan yuula, paloman kemøra, katø umbu kesrubig køn. ¹⁰ Incha kan trune muniirawa, paloman arcayugurri katø inrrai ørøbig køn. ¹¹ Indig tru palomabe maaben misrøb køben arruppe, kan olivo ishiizhig kimsigu mutaig arruptinchen, Noébe pimera pirau yandø chab kølin kui wetøbeñibig køn. ¹² Incha trugurrimbunø katøgan trune muniirawa, katø paloman øriibe, yandø katøle truiibe nuimay arrumøtø, pinab pinabig køn.

¹³ Noé øsig tsuin pilamerabe seiscientosba kan pilaba køben, tru srøsrø pølyu ke pølbasøb kwalømyuh pimerabe pirau chishtø chab kølabig køn. Inchen Noébe tru arcayuy pala kasraigwan kusrua ashene, mømibe pirøbe yandø pur køptinchibig køn. ¹⁴ Inchen katø tru wendø pølyu tru veintisiete kwalømyube pirøbe yandø kerrigu pur købig køn. ¹⁵ Inchen Tiusbe Noéwane trenchibig køn:

¹⁶ —Arcayugurri ñiba, ñui sraimba, ñui nusrrkalai sraløba webambay cha. ¹⁷ Incha ushamera tru ñiba purrabelangucha mayamba chishtøh wer chibig køn; maya illimeran køben, ushameran køben, katø pirau srala amøñibelan køben, pirau ørøba truøø amrrain cha; pirau yellmera purø nørrø misrøb purø nu larrøbichib amrrain— cha.

¹⁸ Inchen Noébe nui nusrrkaløba, nui sraimba, nusrrkalai sraløba webarrubig køn. ¹⁹ Inchen kerrigu ushamera køben, srala amøñib ushamera køben, illimera køben, pirau chimera køben øsig købeløbe trumørig, trumørig arcayugurri webambubelø køn.

²⁰ Incha trugurrimbe Noébe Jehováweyasig kan altar mara, tabig chish ushameran møigwanguen palab kømø, kerriguba, katø chish illimeran møigwanguen palab kømø, kerriguba, altarbala chishtø parrøb Jehováwan keta tranøbig køn. ²¹ Inchen larrø mayzhig irrabig nuinug puben, Jehovábe trenchibig køn: “Misakkurrindø pirøwane managuen katølebe larrø trømbøig nebuim pasrønrrai marmumønrrun cha, kaguende møwei manrøbe shushkurrimbunø kaigwandø, kaigwandø martrab isubelø køn cha. Katø chigurrimbunø øsig købigwane katølebe kerriguba pinishimumønrrun cha, møi lataibe.

²² Pirøbe ka pasraingatiibe ellmariilø køb, ellmariilan tulisamelø køb, chu urastøgucha pachig købig køb, pishin købig køb inchun cha. Chu urastøgucha sre pølmera køb, kwarø pølmera køb, katø yemmera køb, kwalømmerra køb inchun” cha, trenchibig køn.

9

Tiusbe Noéba Øyamay Kønrrai Martrab Cha Kørrømisrig

¹ Tiusbe Noéwanba nui nusrrkalanba mayanguen tabig nebuilø kønrrai trana, nømune trenchibig køn:

—Ureemera nørrø tøgagøb pirøwan netsøganrrigay cha. ² Pirau chi ushameratøgucha ñimune larrø kørig kuinchib kwartrun cha. Pala illimeran lata, pirau chigurrimbunø øsig warabelan lata, maryu piyaemeran lata, ñim ashib tøgagønrrai nabe ñimui tasku pønrrar cha. ³ Chigurrimbunø kønabig øsiguelø købiiba, katø mamig tusrcheeløbabe ñim mab kømig kønrrun cha. Iguan kerrigu na ñimun tranar chibig køn. ⁴ Inchendø yau animbaigwan aniwan lusøskaimígwane mamønrrigay cha, kaguende øsig kømibe aniyuweim pasran cha. ⁵ Inchawei nabe tru ñimui øsig kui aniwane nabe ulø payamønrrun chibig køn. Ushamera pinisaig kui lata, kabe møguelai tasku pinisaig kui lata truigwane ulø payamønrrun cha. Nui mendaigwei øsig kuigwan pinishibigwane mu møwandøgucha ulø payamønrrun chibig køn.

⁶ Inchawei møikkøben misag aniwan lushibigwane nui aniwangucha katøgan møg lusig kønrrain køn cha, kaguende møøbe Tius maig køppe, treetøwein kønrrai marig kuig kua.

⁷ Trune ñimbe ureg nørrø tøgagøb, larrø nørrø larrøbitsay chibig køn, pirau purø nørrø misag karrab, pirau netsøganøb.—

⁸ Incha Tiusbe Noéwanba nui nusrrkalanba katø treekkucha taig køn:

⁹ —Nabe ñimba, katø ñuikkurri amrrub misaameraba øyamay kønrrai martrab cha kørrømaramønrrun cha, ¹⁰ katø tru chigurrimbunø øsig købelø ñimba pønrrabelø, kerrigu tru arcayugurri werrubelø: tru illimeraba, kusreeg ushameraba, namig ushameraba, pirau maya ushameraba. ¹¹ Nabe ñimba øyamay kønrrai martrab cha pasramønrrun cha, nabe kerrigu øsig warabelan pi pulab arrubiitøgabe katølebe chishtø pinishinrrab kømur cha. Ni katø pirøwan pinishinrrab pi pulab attrabig katølebe chigaanrrabig køn— cha.

¹² Incha katø trenchibig køn:

—Tru ñimba, katø trugurri tru chigurrimbunø chi øsig købeløba tru managatig na øyamay kønrrai martrab cha pasrigwan isunanøb eshkab pasrønrrabiibe iig køn cha:

¹³ Nai køshømbøtøn nabe wañiyu pasrar cha, iibe pirøba na øyamay kønrrai martrab cha pasrigwan treeg kuitamab ashib kømig kønrrai pasrønrrabig. ¹⁴ Inchawei wañiwan na pirau pibøndøzhiibaig arringarubene, tru køshømbøtøbe wañiyu kenamistrun cha. ¹⁵ Inchen nabe ñimba katø chigurrimbunø øsig købeløba tru na øyamay kønrrai martrab cha pasrigwan isumønrrun cha. Chigøben øsig købelan pinishinrrabig pi pulab arrubiibe katølebe kaanrrun cha. ¹⁶ Inchawei køshømbøtø wañiyu kenamisrimørig maya misaameraba, katø i pirau kerrigu øsig købeløba tru na managatig øyamay kønrrai martrab cha pasrigwan isumønrrun— chibig køn.

¹⁷ Incha Noéwan trendaig køn:

—Maya misaameraba, pirau chigøben øsig købeløba tru na øyamay kønrrai martrab cha pasrigwan treeg kuitamab asamiibe, iig køn— cha.

Noéwei Nusrrkalø

¹⁸ Noéwei nusrrkalø arcayugurri webambubeløbe Semba, Camba, Jafetba køn. Inchen Cambe Canaánwei møskain kuig køn. ¹⁹ I tru pøngatøbe Noéwei nusrrkalø kuig køn. I tru pønelainukkurri amrrub misaamerayugurri pirau muba kuimburab misag netsaig køn.

²⁰ Incha Noébe pirau kwallib menda kan uvas ellguain tra marøbig køn. ²¹ Indiibe kan piji Noébe vino mucha mutsiirawa, tru nui carpa yau kebya, peña tsumisrøppe, køsaatiig tsuben, ²² tru Canaánwei mōskai Cambe, mōskai køsaatiig tsui ashabe, nui pa nunelan wambiisrø eshkanrrab webyain købig køn. ²³ Inchen Semba, Jafetbabe kan itøtsinsramig pamisra, nōmui kildunyu pinøgucha, wendømaytø amba, mōskai køsaatiig tsuben, trutøga kasra rarrøbelø køn. Incha ashmønrrab wendømaytø amba, treeg køsaatiig tsuben nui asr køsagwan ashmuig køn.

²⁴ Incha Noébe tru mutsiguig kib tsua kiagasra, tru mas unø nusrkai treeg indigwan wammørabe, ²⁵ trenchibig køn:

Canaánbe larrø trømbøig nebuinanrrabig kønrrun cha. “Nunelø ka karuindiig megabig mas chigucha kømīg købash” cha. ²⁶ Incha katø trenchibig køn: “Jehová, Semwei Tiuswane maya nuguen tab indig kønrrain cha. Inchen Canaánbe Sem manchiben, ka karuindiig megabig kønrrain cha. ²⁷ Inchen Jafetwane purø nuig kønrrai Tius kusrua pasrig kønrrain cha. Incha Jafete Semwei carpa yamerayu tsubig kønrrain cha. Inchen Canaánbe Jafet manchiben, ka karuindiig megabig købash” cha.

²⁸ Indig Noébe tru pirau pi pulab arrubig arrinukkurrimbunø pilamera trescientos cincuentagatig tsuig købig køn. ²⁹ Inchen Noé kerrigu øsig tsuim pilamerabe novecientos cincuenta kuig køn. Inchen yandø kwaig køn.

10

Noéweinukkurri Amrrub Misaamera

¹ Iiløbe tru Noéwei nusrkalo Semweimba, Camweimba, Jafetweimba truilø nøm tøgagui nusrkalo køn, tru pirau pimera pulabig arrua puraiben tøgaguilø.

² Jafetwei nusrkalo iilø køn: Gomer køben, Magog køben, Maday køben, Javan køben, Tubal køben, Mesec køben, Tiras købengue.

³ Inchen tru Gomerwei nusrkalo iilø køn: Askenaz køben, Rifat køben, Togarma købengue.

⁴ Inchen Javanwei nusrkalo: Elisa køben, Tarsis køben, Kitim køben, Rodanim købengue.

⁵ Inchen truilainukkurri amrrub misaamerabe mar puluwan pirømerawansrø warabelø kuig køn. Truiløbe misag nørø sötømeramørig, katø mu mōskalo køben, yau misaamera trumørig nōmuin kui, nōmuin kui pirømera waramig tøgartø købig køn, katø nømbe trumørig nōmuin trigwan waminchibeløgue.

⁶ Inchen Camwei nusrkalo iilø køn: Cus køben, Mizraim køben, Fut køben, Canaán købengue.

⁷ Inchen Cuswei nusrkalo: Seba køben, Havila køben, Sabta køben, Raama køben, Sabteca købengue. Inchen tru Raamawei nusrkalo: Sebaba, Dedánba kuig køn.

⁸ Inchen Cusbe Nimrodwei mōskain kuig køn. Tru Nimrodbe pirau mugucha chinchain-gaig ke nø karub pølbasrig køn, yu pirau ke srøsrøzhiitø. ⁹ Truipe Jehováwei merrab kaambu ushameran pasraarøb kemøramibe ke piaig lataig købig køn. Inchawei misaabe treeg taig tøgar købig køn: “Jehováwei merrab kaambu ushameran pasraarøb kemøramigwan larrø may kemøramaybe, Nimrod lataig køn” cha. ¹⁰ Inchen nø karub tøgagui ciudadamera mas nørreeløbe iilø køn: Babel køben, Erec køben, Acad køben, Calne købengue, tru Sinar pirau. ¹¹ Incha Sinargurrimbe Nimrodbe Asursrømay webya, truyube Ninive ciudadameran mara pønsrøbig køn, tru Rehobot ciudadwanba, Cala ciudadwanba. ¹² Trugurrimbe tru Niniveba tru Calaba tru i pa ciudadmerai tøbøtag pasrabig tru Resen purø nu ciudadawan mara pasrig køn.

¹³ Inchen Mizraimweinukkurrimbe ludeos misaamera køben, anameos køben, lehabitamera køben, naftuhitamera køben, ¹⁴ patruseosmera køben, casluitas misaamera køben, cafortitasmera køben købig køn. Tru i cafortitasmerai misaamerayugurri tru filiteos misaamera amrruig købig køn.

¹⁵ Inchen Canaánbe tru nui mayur nusrkai Sidonweimba, Hetweimba mōskain købig køn. ¹⁶ Inchen tru i Canaánweinukkurri amrrub misaamerabe jebuseosmera køben, amorreosmera køben, gergeseosmera køben, ¹⁷ heveosmera køben, araceosmera køben, sineosmera køben, ¹⁸ arvadeosmera køben, zemareosmera køben, hamateosmera køben købig køn. ¹⁹ Inchen tru Canaánweinukkurri amrrub misaamerabe chu pirausrøn køben tru ørø, tru ørø chab ambubelø køn. Inchawei tru Canaán pirø muba kuimburab luløbiibe Sidongurri Gazasrøngatig larrøbichib luløbig køn, tru Gerarguebsrø. Incha trugurrimbe Lesasrøngatig luløbig køn, tru Sodomaba, Gomorraba, Admaba, Zeboimba truguebsrø.

²⁰ Iilø kuig køn, tru Camweinukkurri amrrub misaamera, truiløbe misag nørø sötømeramørig, katø mu mōskalo køben, yau misaamera trumørig nōmuin kui, nōmuin kui pirømera waramig tøgartø, katø nømbe trumørig nōmuin trigwane waminchibeløgue.

²¹ Inchen tru Sem Jafetwei mayur nuneg truikkucha nusrkalo tógaguig køn. Semweinukkurri amrrub misaamera kuig køn tru Heberwei maya nusrkalo.

²² Semwei nusrkalo be iilo køn: Elam køben, Asur køben, Arfaxad køben, Lud køben, Aram købengue.

²³ Inchen Aramwei nusrkalo be: Uz køben, Hul køben, Geter køben, Mash køben kuig køn.

²⁴ Inchen Arfaxad be Selajwei møskain køben, Selaj be Eberwei møskain kuig køn.

²⁵ Indig katø wendø Eber be pagatø nusrkalo tógaguig køn: tru srøsrøibe Peleg munchi købig køn, kaguende nø tsuin kwalømmerawan pirøwan pirisaig købig kua. Inchen kan nunebe Joctán taig købig køn.

²⁶ Inchen Joctán be Almodadwan køben, Shelefwan køben, Hazarmavetwan køben, Jeran køben, ²⁷ Hadoramwan køben, Uzalwan køben, Diklan køben, ²⁸ Obalwan køben, Abimaelwan køben, Sheban køben, ²⁹ Ofirwan køben, Havilan køben, Jobabwan køben tógaguig købig køn. Iilø be kerriguba tru Joctánwei nusrkalo kuig køn. ³⁰ Inchen tru nøm waraig pirømerabe Mesagurri ibiibe, Sefarburabsrø puraya, trugurrimbe tru nørø tunmera tōga pirømera tru pørr neeshibgatø wansrøngatig ibig køn,

³¹ Iilø kuig køn, tru Semweinukkurri amrrub misaamera, truilø be misag nørø sötømeramørig, katø mu møskalø køben, yau misaamera trumørig nømuiin kui, nømuiin kui pirømera waramig tōgartø, katø nømbe trumørig nømuiin trigwan waminchibelø.

³² Iilø køn tru Noēwei nusrkalainukkurri mu møskalø køben, yau misaamera numeratø købig kuig, katø mōigweinukkurri amrrub misaamera købig kuig, misag nørø sötømera møyuelø købig kuig, treekke. Inchawei tru pi pulabig chab pinisha puraiiben, truilø be ambuurab, iburab larrøbichib amba, yu pirø muba kuimburab misaamera nørø sötø misrig købig køn.

11

Babel Pirau Purø Pala Ya Marøb

¹ Tru urassrømbe misaamerabe pirø muba kuimburab kan wamdø waminchibelø købig køn. ² Incha tru pørr neeshibgatøsrøngurri webamba ambub kuabe, tru Sinar pirausrømbe kan purø tab chag pirø wetørrawa, yandø nømbe truyu waramisrøbelø køn. ³ Incha kan kwaløm nømbe kangurri, kangurri trenchibelø køn: “Naarillusmera margun cha. Incha nagu partrab” cha. Incha øyamay sruumeratøga marøbgunrriibe naarillutøga marig køben, chilliitøga marøbgunrriibe asfaltotøga maramig købig køn. ⁴ Incha trugurrimbe trenchibelø køn: “Kan ciuda margun cha, kan purø palaig marig tōgaig, trui be pala patsabsrømbe srømbalassrøngatig kachibikke. Treekkurrimbe mugui nebua asilø nørreelø misra, pirø muba kuimburab ke tru ørøtø amba waramig kaanrrun” cha.

⁵ Inchen Jehovå be kørøaarrubig køn, tru ciudawanba tru torrenba tru mōguelai nusrkalo marigwanba ashchab. ⁶ Incha Jehovå be trenchibig køn: “I misaamerabe kandø køb, wamgucha kandø waminchib, katø tru maramigwangucha yandø martrab pølbasa køn cha, trurrigu nøm martrab indigwane muguin katiassamørra cha. ⁷ Inchawei kørøaamun chibig køn, nømui wamindi wamwan ni chiwan wamindi mørøamgaig misrtrai martrab cha, mōikkurrindøgucha nømasiitø ni chi tainguen mørtrab kaimanrrai.”

⁸ Incha øyamay Jehovå be pirø muba kuimburab tru ørø larrøbichib amrrai maren, yandø tru ciudawan marmøtø, yandø lelachibelø køn. ⁹ Incha treekkurri Babel cha wamig køn, kaguende pirau muba kuimburab wamindi wamwan Jehovå truyuh nøm mandø kuinguen mørømnrrai marig købig kua. Incha trusrøngurri nømune pirau muba kuimburab tru ørø amba warønrrai marig køn.

Semweinukkurri Amrrub Misaamera

¹⁰ Iilø køn tru Semweinukkurri amrrub misaamera: Sembe pilamera cien tōgaig kua, Arfaxadwan tōgaig køn, tru pirau pi pulab arrubig purayaig pa pila køben. ¹¹ Incha Sembe tru Arfaxadwan tōgaigukkurribunø pilamera quinientos øsig tsua, nusrkalo køben, nimbasrømera køben tōgaig køn.

¹² Arfaxad be pilamera treinta y cinco tōgagua, Salan tōgaig køn. ¹³ Arfaxad be Salan tōgaigukkurribunø pilamera cuatrocientos treskatig øsig tsua, nusrkalo køben nimbasrømera køben tōgaig køn.

¹⁴ Salabe pilamera treinta tōgagua, Eberwan tōgaig køn. ¹⁵ Incha Salabe Eberwan tōgaigukkurribunø, pilamera cuatrocientos tres øsig tsua, nusrkalo køben, nimbasrømera køben tōgaig køn. ¹⁶ Eber be pilamera treinta y cuatro tōgagua, Pelegwan tōgaig køn. ¹⁷ Incha Eber be Pelegwan tōgaigukkurribunø pilamera cuatrocientos treinta tōgaig tsua, nusrkalo køben, nimbasrømera køben tōgaig køn.

¹⁸ Inchen Pelegbe pilamera treinta tógagua, Reuwan tógaguig kòn. ¹⁹ Incha Pelegbe Reuwan tógaguinukkurimbunø, pilamera doscientos nueve øsig tógag tsua, nusrkalo køben, nimbasrmera køben tógaguig kòn.

²⁰ Reube pilamera treinta y dos tógagua, Serugwan tógaguig kòn. ²¹ Inchen Reube Serugwan tógaguinukkurimbunø pilamera doscientos siete øsig tsua, nusrkalo køben, nimbasrmera køben tógaguig kòn.

²² Serugbe pilamera treinta tógag tsua, Nacorwan tógaguig kòn. ²³ Incha Serugbe Nacorwan tógaguinukkurimbunø pilamera doscientos tógag tsua, nusrkalo køben, nimbasrmera køben tógaguig kòn.

²⁴ Nacorbe pilamera veintinueve tógagua Térájan tógaguig kòn. ²⁵ Nacorbe Térájan tógaguinukkurimbunø pilamera ciento diecinueve tógagua nusrkalo køben, nimbasrmera køben, tógaguig kòn.

²⁶ Téráje pilamera setenta tógagua, Abramwan køben, Nacorwan køben, Haranwan køben tógaguig kòn.

Térájeinukkurri Amrrub Misaamera

²⁷ Ilø kòn tru Térájeinukkurri amrrub misaamera: Téráje Abramwan køben, Nacorwan køben, Haránwan køben tógaguig kòn. Inchen Haránbe tru Lotwan tógaguig kòn. ²⁸ Inchen nui møskai Téráje kwamøwatø, tru Haránbe Caldeosmeraim pirausrø, tru nø kal-laim pirau kwaig købig kòn. ²⁹ Inchen Abramba, Nacorbabe nòmuyasig sralø laig kòn. Tru Abramwei sraimbe Sarai købene, Nacorwei sraimbe Milca taig købig kòn, tru Haránwei nimbasr. Tru Haránbe Milcaimba, Iscaimba møskain kuig kòn. ³⁰ Inchen Saraiibe chi ureg tógagørrrabig kømíg kua, chi urekkaig købig kòn.

³¹ Inchen tru Tarébe tru nui nusrkai Abramwanba, katø Haránwei nusrkai nui awelu Lotwanba, nui yerna tru Abramwei srai Saraiwanba, pera webibig kòn, caldeosmerai pirau Ur tainukkurri tru Canaán pirausrømay inrrab. Inchendø tru Harán taig pirausrø puabe, truyu kørrømisrøbelø kòn. ³² Inchen tru Téráje øsig tsuin kwalømmmerabe pilamera doscientos cinco kuig kòn. Incha Téráje Harán pirausrø kwaig købig kòn.

12

Abramwan Wamig

¹ Jehovábe Abramwane trenchibig kòn:

—Ñuim piraugurrimba, ñui yau misaamerainukkurrimba, trugurri ñui møskawei yaugurrimba inrrø cha, na ñun eshkam pirausrømay. ² Nabe ñigurri purø nørrø misag sòtømera kønrai marøb, katø mayanguen tabig nebuig kønrai mara, ñui munchiwane mayeelø nebua asig kønrai maramønrrun cha, ñibe katøganelayasig maya nuguen tabig kønrai, ñibe treeg kønrrabguen cha. ³ Nabe ñun mayanguen tabig nebuig kønrai marøbelane, nòmungucha mayanguen tabig nebuilø kønrai maramønrrun cha. Ñun trømbøig neburrai marøbelane, nòmungucha trømbøig nebuilø kønrai maramønrrun cha. Incha pirau chi misaamera køben pirø muba kuimburab warabeløbe ñuinug mayanguen tabig nebuilø kønrai mariilø kønrrun— chibig kòn.

⁴ Inchen Abrambe Jehová maig chiben ibig kòn. Inchen nøbabe Lotgucha ibig kòn. Tru Harán piraugurri Abram webib urasbe nøbe pilamera setenta y cinco tógag kuig kòn. ⁵ Incha Abrambe nui srai Saraiwan køben, nui nunewei nusrkai Lotwan køben pera ibig kòn, katø chigurrimbunø nø chi tógaguilan køben, katø tru Harán pirau nui karuig mendig melab misaameran købengue. Nøbe Canaán pirausrø truiløba pubig kòn. ⁶ Incha Abrambe Canaánsrø puabe, tru pirau kerrigu pureb ya, tru Siquénsrø pubig kòn, tru Moré Tusr taig pasramnug. Inchen tru urassrø tru cananeo misaamerabe Canaan pirau warabelø købig kòn. ⁷ Inchen Jehovábe Abramwan kenamisrabe trenchibig kòn:

—Ñuinukkurri amrrub misaameran nabe truilan i pirowan trananmønrrun— cha. Inchen Abrambe kan altar kusrabig kòn tru Jehová nun kenamisrøbigweyasig. ⁸ Incha trugurrimbe tunmeragøba tógag pirømerasrømay ibig kòn, tru Betel pørr neeshibgatømayrsø. Incha tru nui carpa yawan truyuh lasrue pasrøbig kòn. Inchen Betelbe pørr pinebgatømay kørrømisrene, Haibe pørr neeshibgatømayrsø kørrømisrøbig kòn. Incha nøbe Jehováweyasig kan altar kusrue, nui munchiwan isub wamabig kòn. ⁹ Incha Abrambe truyugurri webya, ibig kòn, kørrømisrøb, kørrømisrøb tru Neguev pirausrøngatig.

Abram Egipto Pirausrø

¹⁰ Tru Neguev pirausrømbe parø arrum mendøben, Abrambe Egipto pirausrømay kørraarubig kòn truyu tsunrrab, kaguendø tru Neguev piraube purø trømbøig parø pasrøben. ¹¹ Incha Abrambe ke Egiptosrø chab pub ib pasrøwabe, nui srai Saraiwane trenchibig kòn:

—Na ashen ñibe purø tab ishug kòn cha. ¹² Egipto misaamera ñun ashippe, trenchinrun cha: “Ñui srain kòn” cha. Incha nane kweecha kuchippe, ñune øsig kònrai ka uñbashchun cha. ¹³ Inchawei tiusmanda ñibe naimbe nuchag kur chinrrig cha, ñigurri nan chigucha kòmø, tab kònraimba, katø nan kweechimønrraimba.—

¹⁴ Indiibe yandø Abram Egiptosrø kebibene, tru egipcio merabe tru ishuube larrø tabzhig kui ashibelø kòn. ¹⁵ Inchen tru Faraonwei merrab nørreelø pønrrabelø ashabe, truiløgucha Faraónwei merrab purø tab waminchib køben, tru ishuwane Faraón nø waig yaumay pera ambubelø kòn. ¹⁶ Incha tru Saraigurri tru Faraónbe Abramwan larrø tab inchib, ubishamera køben, waaramera køben, burrumera køben, karuindiig mendig melabelø møguelø køben ishumburmera køben, camellomera køben keta, tranøbig kòn. ¹⁷ Inchendø tru Abramwei srai Saraigurri Jehovábe tru Faraónwanba nui yau misaameranba murba kebatig kòn, purø trømbø kwanrrømeratøga. ¹⁸ Inchen Faraónbe Abramwan wama, trenchibig kòn:

—¿Nan øyeebe chi margu? cha. ¿Chindimbarre ñui srain kòn cha eshkamugu? cha. ¹⁹ Chindimba trenchigu cha: “Nai nuchag kòn” chabe. Nai srain kònrai na treeg marig kuimasr cha. Møimbe ñui sraimbe yu pasran cha. ¡Pereptsu!— chibig kòn. ²⁰ Incha Faraónbe nui karuig pønrrab møguelan ørøbig kòn ¡katø! webambi ashib pønrrønrraingue, Abramwanba nui srawanba nui chigurrimbunø købigwanbañau sruaamrai.

13

Abramba Lotba Mendamisrøb

¹ Incha Abrambe Egiptogurri nui sraimba katø nui chine tøgaguiløbañau Neguev pirausrømay katø arruben, nui kuchiunø Lotgucha nøba arrubig kòn. ² Abrambe ushamera tøga kuiløyu lata, an tøgaguiyu lata, oro tøgaguiyu lata purø pua møg købig kòn. ³ Incha Abrambe Neguevsrøngurri katøle arruppe kørømisrøb, kørømisrøb arrub tsubig kòn tru Betel misag sötømera waraisrøngatig, tru merrabwansrø nø tru carpa yawan lasrua tsuig købiisrø, tru Betelba, Haiba misaamera warabnug tru tøbøtag. ⁴ Truyu kuig kòn tru merrabsrø nø kan altar mara kusruinug. Incha truyu Abrambe Jehováwei munchiwan isub wamabig kòn.

⁵ Lot tru Abramba lincha ibikkucha ubishamera køben, waaramera køben, carpa yamera køben tøgagig købig kòn. ⁶ Incha pirøbe kanbalatø lincha waramibe truburab tre lendø kømifig kòn, kaguende nøm tøgaguiløbe purø nørø kua, trubalatøbe waramgaig købig kòn. ⁷ Indiibe kan kwaløm Abramwei ushameran ashibeløba, Lotwei ushameran ashibeløba aleguiab kurrabelø kòn. Inchagucha tru urasbe cananeosmeraba ferezeosmeraba truiløgucha truyu warabelø købig kòn. ⁸ Inchen Abrambe Lotwane trenchibig kòn:

—Nam pailainy lata, katø nai ubisha ashibeløba, ñui ubishameran ashibeløba truiløgucha chi kwayab kømig chi kaanrrain cha, kaguende nambe nunelø ker cha. ⁹ ¿Pirøbe asimburab kerriguba ñui merrab pasrøमितarru? cha. Tiusmanda nainukkurri tarømisrøtra cha, ñi atsimay ibene, nabe kursmay yamønrrun cha, ñi kursmay ibene, nabe atsimay inrrur— cha.

¹⁰ Inchen Lotbe ashib pasrøwabe, tru Jordan chaabe kerriguba Zoarsrøngatig pizheelø purø tøga pirømera kui ashibig kòn. Jehováwei ellmarin tul lata tabzhikke; kabe tru Egipto pirømera lataikke. Tru Jordanbe treeg kuig kòn, Jehová Sodoma ciudawanba Gomorra ciudawanba pinishimøwatøbe. ¹¹ Incha Lotbe kerrigu Jordan chagwan nø merrarrawa, Lotbe tru pørr neeshibguebwanstø ibig kòn. Incha øyamay Abramba, Lotba nørø misrig kòn. ¹² Abrambe Canaán pirau kørømisra tsuben, trune Lotbe tru Jordan chag pirø ciudamerasrø tsunrrab ibig kòn. Incha tru nui carpa yamerane Sodomasrøngatig lasrua pønrsøb ibig kòn. ¹³ Inchen tru Sodoma warab misaamerabe larrø kailø kua, larrø trømbøgølig marøbelø købig kòn, Jehováwan kalø marøb.

¹⁴ Inchen yandø Lotbe Abramwan tarømisringuen køben, Jehovábe Abramwane trenchibig kòn:

—Abram, kurrasha cha, ñi pasrainukkurri tab ash cha, waguebwansrø, walliguebwanstø, pørr neeshibgatøwansrø, pørr pinebgatøwansrø, ¹⁵ pirøwan muba kuimburab mayamba ñi nebua asigwan ñunba, ñuinukkurri amrrub misaameranba managatigweyasig na ñun tranamønrrun cha. ¹⁶ Ñuinukkurri amrrub misaamerabe nørø køptø kan pirau usrøtui lataig kònrai maramønrrun cha. Usrøwanma muguen mundamgaig kuig køppe, ñuinukkurri amrrub misaameragucha mundamgaig kønrrun cha. ¹⁷ Kurra, tru pirø yamay maya yab kuigwanba, lendømay mayan kuigwanba llirab inrrø chibig kòn, kaguende nabe ñun tranamig kòn— cha.

¹⁸ Incha Abrambe tru nui carpa yameran picha kusrua, Manre tainug nõrrø parøndzig encinas tusrmera pønrabbun tsunrrab ibig køn, tru Hebrønsrø. Incha truyube Jehováweyasig kan altar kusrubig køn.

14

Lotwan Wesrua Srua Amben Abram Kerrab

¹ Tru kwalømmerawan tru Amrafelbe Sinarsrø rey køben, Ariochbe Eleasarsrø rey køben, Quedorlaomerbe Elamsrø rey køben, Tidalbe Goyimsrø rey købig køn. ² Incha truiløbe kwayabrren købig køn, Sodomasrø rey Beraba køben, Gomorrasrø rey Birsaba køben, Admasrø rey Sinabpa køben, Zeboimsrø rey Semeberba køben, katø tru Belasrø reyba købengue, truike Zoargucha taig. ³ Incha tru i trattrøgatø reymerabe nõmui suldaumeraba tru Sidim chagu kanbalatø misrig køn kwayanrrab, tru Mar Trebi taisrø. ⁴ Tru rey Quedorlaomerbe nõmune pa trattrø y pa pila nõ karub tøgagøben, pa trattrø y pøn pilayube tru trattrøgatø reymerabe tru Quedorlaomerwan mas karuig mørøb melømønrrab mur pønrramisrøbelø køn.

⁵ Incha tru pa trattrø y pib pilayube Quedorlaomerbe tru reymera nuingatø pønrrabeløba Astarot Karnaim pirausrømay amba, truyube refaitasmeran kanawa kørømarøppe, Ham taisrømbe zuzitasmeran, Save Quiriataimsrømbe emitasmeran, ⁶ Seir tunmerawansrømbe horeosmeran kanawa kørømara, tru Paran chaamerasrøngatig ambubelø køn, tru misag waraimíig chi misrmø pirø puluwansrø. ⁷ Incha truiløbe katøle amrruabe, tru Gadessrø En-mispat taisrø pua, amalecitasmerai pirømerasrømbe kerriguh chi købigwan chishtø pinisha, katø tru Hazezon Tamar pirau amorreosmera warabelan treetøweih mara kørømarøbelø køn.

⁸ Inchen Sodoma rey køben, Gomorra rey køben, Adma rey køben, Zeboim rey køben, Bela rey køben, Zoarsrø rey køben werrua, Sidim chaasrø tru reymeraba kwayab mendabelø køn. ⁹ Tru Quedorlaomer Elamsrø reyba, Tidal Goyimsrø reyba, Amrafel Sinarsrø reyba, Arioc Eleasarsrø reyba truilø nõm pib reymera tru trattrøgatø reymeraba kwayabelø køn. ¹⁰ Inchen tru Sidim chaasrømbe asfaltos pisumera truba, truba tøgagug kuig køppe, tru Sodoma reyba Gomorra reyba tru kwayabygurri nui suldaumeraba wegørra lulen, mõiløbe truyu chab kegørrøben, kan reymerabe tunmerasrømay trubab chab luløbelø køn. ¹¹ Inchen tru pib reymera kanabeløbe Sodomaba, Gomorrraba ciudayu chigurrimbunø købigwan, mamiimeran nõmui mara wesrawabe, yandø truyugurri ambubelø køn. ¹² Inchen tru Abramwei nunewei nusrkai Lotgucha sodomasrø tsubig kuig køppe, nungucha merrarrawa, tøgä srua ambuptinchibelø køn, nui chi tøgamisrigwanbañaungue.

¹³ Inchen mõikkøsrøn truyugurri welula arrubiibe, tru hebreo Abramwan ígwan kerriguh eshkabig køn. Inchen Abrambe amorreo tru Mamre taigwei tru nõrrø parøndzig encinas tusrmera pønrrab puluwan tsubig kuig køn. Tru Mamrebe Escolweimba, Anerweimba nuneg køben, truiløbe Abramwanweingatø pønrrabelø treelø købig køn. ¹⁴ Incha Abrambe tru nui autøwei kal-lawarmeran trescientos dieciocho tru kwayamigweyasig kusrenani mõgueløba tulaamba, truiløba webya, tru pibgatø reymeran wetøgønrrab Dansrøngatig pasra ibig køn. ¹⁵ Incha yandø yem køben, Abrambe tru kwayamig kusrenni mõgueløba, pesan københ kwayanrrab kegørra, Hoba taisrøngatig pasra ambubelø køn, Damasco tru waguebgatømay pasrab ciudadsrø. ¹⁶ Treencha chigurrimbunø wesra srua ambiilan katøle chab kerrab, katø nui kasugunø Lotwan nui chigurrimbunø tøgamisriilanbañaau kerriguh chab kerrabig køn, katø ishumburmeranba, katøganelanba.

Melquisedec Abramwan Mayanguen Tabig Nebuig Kønrrun Chib

¹⁷ Abrambe Quedorlaomerwanba truigweingatø pønrrab reymeranba kanawa arruben, Sodoma reybe, tru Save taig chaasrø katønrrab webig køn, truike tru Reywein Chagu.

¹⁸ Inchen tru Salemsrø rey Melquisedecbe, Tius Mayeelain Pala Pasrabigwei sacerdotøbe pirrimba, vinoba wesrua, ¹⁹ Abramwan mayanguen tabig nebuig kønrrai marøbig køn, øyeeeg wammeratøga: “Tius Mayeelain Pala Pasrabig Srømbalameranba, Pirøwanba Marøbig ²⁰ Tius Mayeelain Pala Pasrabig Purø Nuigwan maya nuguen tabig wamindig kønrrain cha, tru ñun ashig kõmui inchibelan ñui tasku tranøbigwan. Inchen Abrambe chigurrimbunø katøle wetørrawa srua arrigwan cienyugurri diezwane wesrawa, Melquisedecwan tranøbig køn.

²¹ Inchene tru Sodomasrø reybe Abramwane trenchibig køn: —Misaamerane nan tranrra cha, chigurrimbunø købigwane ñi tøgä kørømisstrig— cha.

²² Inchene Abrambe tru Sodomasrø reywane trencha løtabig køn: —Tius Mayeelain Pala Pasrabig Srømbalameranba Pirøwanba Marøbig Jehováwan ¡katø! nabe treebe marmumønrrun cha, nabe trendaig kuig køn cha. ²³ Ni kan train pititøguen—, kabe nai alpargatis tsi-unøtøguen nabe ñuiwane chiwangucha nai marmumønrrun chibig

køn, ñi managuen øyeeg chimønrrai: “Abrambe nagurrinre pua misrig køn” cha. ²⁴ Tru na pera pasraig mōguelø mab mutsigwandø srørrri maig kørromistrain cha. Inchen tru naba amrrub mōguelø Anerba, Escolba, Mamreba truiløbe si, nōmuimburappe ka utønrrun—chibig køn.

15

Tius Abramwan Øyamay Kønrrai Martrab Cha Kørromisrøb

¹ Inchen øyeelø chab puraiben, kan piab lataigu Jehováweinukkurri wam Abramwan trenchibig køn:

—Abram, chi kørig kui inchimøta cha. Nabe ñun chi kømønrrai ashib tōga pasrabig truing kur cha. Ñun tranamibe purø nuig kønrrabig køn— cha.

² Inchendø Abrambe trenchibig køn:

—Jehová Tius ¿Ñi nan keta traniibe chi puruguimøriasamørra cha, na chi urekkaigwane? Inchen tru na chine tōgamisriilan merrarranrrabiibe tru Damascosrø Eliezer kōmuitarru?— cha. ³ Incha katø Abrambe trenchibig køn:

—Ñi nan kan nusrkai tranmuig kōbene, kan nai yautøwei kal-lawei nai kan karuindiig mendig megabig, truing nai chi tōgaguilan ketig utønrrabig køn— cha.

⁴ Inchen katø Jehovaweinukkurri wam trenchibig køn:

—Ñui chi kōbigwane truing ashchabig kōmøtø, truilane ñui nusrkai utønrrabig køn— cha.

⁵ Incha wambiisrø pera yabe, trenchibig køn:

—¡Au! srømbalaneb nesh cha, kønchabiimeran mundamdø kōtamørtrig— cha. Incha katø trenchibig køn:

—Ñuinukkurri katøburø ureemerabe øyeetøwein kønrrun— cha.

⁶ Inchen Abrambe Jehováwan kōreben, treekkurri nune Tiusbe chi kaig marmíig lataig, tabig treeg asha pasrig køn. ⁷ Inchene nōbe trenchibig køn:

—Nabe Jehová kur cha, caldeosmeraim pirau tru Ur taisrøngurri wesrabig i Canáan pirøwan na ñun keta tranrrab.—

⁸ Inchendø Abrambe trenchibig køn:

—Jehová Tius, ¿tru na truigwan nain kønrraitamappe nabe mandø incha asamerah?— cha.

⁹ Inchene Jehovábe trenchibig køn:

—Kan ishug waara-unøzhig pøn pilaiba, kan cabra pøn pilaiba, kan carnero pøn pilaiba, katø kan palomaba, kan paloma-unøzhiiba srua amø— cha.

¹⁰ Inchen Abrambe tru ushameran kerriguh srua arrua, truilan sølgørrab tab tōbøtag para, tru pariilan tru pinrøgue, tru pinrøgue warøbig køn. Inchendø tru illimerane tōbøtag parmuig køn. ¹¹ Inchen yau mab illimerabe tru usha kweetsiilø warabelaimbalawan kørørrub amrruben, Abrambe kwaarøsrøbig køn.

¹² Inchen yandø chab pilliraben, Abrambe truba mur kib tsubenba jmøimbe ke yalø løstøgølig nun itøgasrøptinchen! nōbe truba kørig kui inchibig køn. ¹³ Inchene Jehovábe trenchibig køn:

—Isa kōmøtø, ñuinukkurri amrrub misaamerabe, ka peguelaim pirautø warønrrabelø køn cha, nōmbe truilø karub sruaguindeelø meløwa, pilamera cuatrocientos nebumne larrø kaig indinab melønrrabelø køn cha. ¹⁴ Inchendø tru nu sōtø misaamera pasrabig nōmun ka karuptø srua kønrrabelangucha numune mōra melønrrai maramønrrun cha. Inchen trugurrimbunø tru ñuinukkurri amrrub misaamerabe yandø treeg melainukkurri wegørra ambuppe, purø tōga misaamera webamba amrrun chibig køn. ¹⁵ Trune ñibe ñui mōskaløba pishindø tab israb tsumisrtrabguen cha, larrø kōllizhig misra kwaben, sōrøben.

¹⁶ Inchen tru pimmaygatig srøig srøig misag kurrab amrrubeløbe katøle i pirautøweih amrrunrrab køn cha, kaguende truilø pumuatøbe tru amorreosmera larrø kaig marøb amrruibe ke awentamgaikkatiibe pumø srø kønrrun cha.

¹⁷ Inchen yandø pørr pinaiben, chab pilliraben, kan hornø naguish kuchibiiba kan nag tulun pilabiiba kenamisrøbig køn. Incha truiløbe tru ushameran kweecha tab tōbøtag pirisha ambumay, imay wari utøwan puraambubelø køn. ¹⁸ Tru kwaløm Jehovábe Abramba øyamay kønrrai martrab cha kørørrarabe, trenchibig køn:

—Ñuinukkurri amrrub misaamerane i pirøwan na tranamig køn cha, Egipto pirau piyugurrimbunø, Eufrates tru nu pisorøngatikke: ¹⁹ ceneosmeraim pirømeran kōben, cenezeosmeraim pirømeran kōben, cadmoneosmeraim pirømeran kōben, ²⁰ heteosmeraim pirømeran kōben, ferezeosmeraim pirømeran kōben, refaitasmeraim pirømeran kōben, ²¹ amorreosmeraim pirømeran kōben, cananeosmeraim pirømeran kōben, gergeseosmeraim pirømeran kōben, jebuseosmeraim pirømeran kōbengue.

16

Agarba Ismaelba

¹ Abramwei srai Saraibe ureg tógagønrrab kaimabig kuig køn. Inchende kan nui karuindiig megabig egipcia ishug Agar taig tógaig kua, ² Saraibe Abramwane trenchibig køn:

—Nane Jehovahé ureg chigaig kønrrai treeg martan cha. Inchendø tiusmanda tru namui karuindiig megabig tru Agarwan pera, ki chibig køn. Inchippa truiukurri na ureg tógaguinabgun— cha.

Inchen Abrambe Sarai taigwan mørøbig køn. ³ Inchen Saraibe tru karuindiig megabig Egiptosø Agarwan pera arrua, Abramwan srai lataig kønrrai tranøbig køn. Abram Canaán pirau pa tratrø pila tsuben, øyeeg purayaig køn. ⁴ Inchen Abrambe tru Agarba kib waramisren, tru ishuube kwanrriig misra, yandø unø tógamisrarmab isua, nun karub pera købig Saraiwane namig ashib kebibig køn. ⁵ Incha Saraibe Abramwane trenchibig køn:

—Ñigurrindø køn cha, nan mandøguen kømui isui uñchai marøbiibe. Ñune ñui srai lataig kønrrai nai karuindiig megabigwan na tranig køn cha. Incha mømibe nøbe unø tóga kønrrab køppe, nane namig ashib kebitan cha. Incha Jehovahá nø ashchun chibig køn, na kalø marig kuin kui, ñi kalø marig kuin kui.—

⁶ Inchen Abrambe Saraiwane trenchibig køn:

—Ñui ka karuindiig megabiibe ñuin tasku køn cha. Ñun maig marøg køben, treeg mar— chibig køn. Inchen Saraibe kaig inchib mendøben, Agarbe welula yam nebuig køn.

⁷ Indig Jehovaháwei ángelbe tru mu misag waraimø pirømerasø kan pigab menda Agarwane wetørrabig køn, Shursømay ambi maywansø. ⁸ Inchabe payibig køn:

—Agar, Saraiwei ka karuindiig megabig, ¿Chugurri arrugu? cha. ¿Chumay inrrab inchigu? — cha. Inchene nøbe trenchibig køn:

—Nan karub pera købig Saraiwan nabe trubab welula arrur— cha.

⁹ Inchen ángelbe trenchibig køn:

—Ñui karub pera købigweimay katøle llirawa ya, tammay mur kurrashmø, nø maig chiben nui tasku treeg mørøbig megau— cha.

¹⁰ Incha katø ángelbe trenchibig køn:

—Ñuinukurri amrrub misaameran purø nørø kønrrai maramønrrun cha, purø nørø køptø mundamguengaikke.—

¹¹ Incha ángelbe katø trenchibig køn:

—Ñibe kwanrriig køn cha. Ñibe kan nusrkai tógagønrrun cha. Incha Ismael munchi pasrtrig chibig køn, kaguendø ñi larrø isui miaben, Jehovahé mørig køn cha. ¹² Nøbe muguen kemalamgaig kønrrabig køn cha, kan kaambu mula-unø lataig. Incha nøbe mayeelan kwayam lanrrabig køben, katø nungurringucha mayeelø kwayam lanrrun chibig køn. Inchen nøbe nunelan, ka kwayam laptø, kwayam laptø tsunrrun— cha.

¹³ Incha Agarbe Jehovahába wamindig køppe, nøbe nune trencha wamabig køn:

—Ñibe tru nan ashib wab Tius køn— cha. Kaguene Agarbe trenchibig køn: “Øsig Wab, katø Nan Ashibigwan nabe ashar” cha.

¹⁴ Incha tru pisuwane treeg wamig købig køn: “Øsig Wab, Nan Ashib Inchibigwein Pisu” cha. Inchen tru i pisube Gadesba, Beredba tøbøtagu kørrømisrøbig køn.

¹⁵ Indig Agarbe Abramwei kan møg-unø tammisren, Abrambe Ismael munchi pasrøbig køn, tru unan.

¹⁶ Inchen tru Agar Ismaelwan tammisrøb uras Abrambe pilamera ochenta y seis tógaguig købig køn.

17

Tru Srøig Øyamay Kønrrai Martrab Cha Kørrømarigwanba Circuncision Marigwanba Caminchibig

¹ Abram pilamera noventa y nueve tógagøben Jehovahé kenamisra trenchibig køn:

—Nabe Maramburab Marøbig Purø Nuig tru Tius kur cha. Ñibe nai merrab sølgandø, mu mandamgaig uñ cha. ² Nabe ñiba øyamay kønrrai martrab cha kørrømarøb, katø ñui misaamera larrø nørø larrøbitchai marøb indamønrrun— cha.

³ Inchen Abrambe maløwan pirau kebatamne utsøbasren, Tiusbe nune trenchibig køn: ⁴ —Iig køn cha, tru na ñiba øyeeg maramønrrun cha kørrømariibe, ñibe tru purø nørø chi misag sötømeraindøgucha ñi møkain kønrrai. ⁵ Ñibe mas Abram munchi kømøtø, ñibe Abraham cha wamig kønrrun cha. Kaguende nabe ñune tru purø nørø chi misag sötømeraindøgucha ñibe nømui møkain kønrrai pasrar cha.

⁶ Ñuinukkurrimbe purø norrø misag nemisrtraí maramønrrun cha. Ñuinukkurrimbe misag sötømera norrø køb, ñuinukkurri katø reymera køb inchun cha. ⁷ Katø nabe, ñiba ñuinukkurri amrrub misaameraba øyeeq martrab cha kørømaramønrrun cha, katøle srøiq, srøiq misag kurrab amrruimørig katø øyeeq martrab cha mara pasramønrrun chibiq køn, managatig pasrønrrabiq, nabe ñuimba, ñuinukkurri amrrub misaameraimba nabe pasrabiq pasrøwa, managatig nòmuyasig Tius kømønrrun cha. ⁸ Ñunba, ñuinukkurri amrrub misaameranba tru ñi ka arruatig tsuin pirøwan tranamønrrun cha, Canaán pirøwan muba kuimburab managatig tøgagønrrai. Inchen nabe pasrabiq pasrøwa, managatig nòmuyasig Tius kømønrrun—chibiq køn.

⁹ Incha katø Tiusbe Abrahamwane trenchibiq køn:

—Tru na ñun øyeeq martrab cha kørømarigwane ñibe, maramiq køn cha, ñiba, ñuinukkurri katøle srøiq, srøiq kurrab amrrub misaameraba. ¹⁰ Iig køn cha, tru na ñiba øyeeq martrab cha kørømarig, katø ñiba tru wendø ñuinukkurri amrrub misaameraba. Inchen trunun maramiq køben, ñimui utube mu møøtøgucha circuncidaig kørørrun chibiq køn. ¹¹ Ñimbe circuncidanrrigay cha, naba, ñimba tru øyeeq martrab cha kørømarigwan treeg marigu asamig pasrønrrai. ¹² Trune kwalømyube mu møguelandøgucha circuncidanrrigay cha, katøle katøle ureemera kurrab amrruimørig, ñui yau kal-laweig kui lata, kabe amrrub misaameran peniilø kui lata. ¹³ Inchawei ñui yau kal-laweig kui lata, kabe kan anwei penig kui lata nømbe circuncidaig kørørrabelø køn cha. Inchen, tru asru siñalbe tru treeg martrab cha kørømarigwan managatigwein køn cha eshkabiq køn.

¹⁴ Inchen tru circuncidamigwane ñimui misag utugurrimbe wegutsig kørørrun chibiq køn, kaguende na øyeeq martrab cha kørømarigwan itøbunikkurri.—

¹⁵ Incha katø Tiusbe Abrahamwane trenchibiq køn:

—Ñui sraimbe Sarai cha wamig kømøtø, yandø Sara cha wamig kønrrun cha. ¹⁶ Nabe nune mayanguen tabiq nebuig kørørrai maren, nøbe ñui kan nusrkai tøgagønrrun cha. Nabe mayanguen tabiq nebuig kørørrai maren, nøbe norrø sötø misaamerai usrin kørørrabiq køben, katø nuinukkurrimbe misag sötømerai reymera werrunrrun—chibiq køn.

¹⁷ Inchen Abrahambe nui maløwan pirau kebatamne utsøbasrabe, nui manrrø umbutø intsab trenchibiq køn: “¿Kan møg pilamera cien tøgagig kua, unø tøga kørørrautah? cha. ¿Katø Saragucha pilamera noventa tøgagig kua, unø tøgagømdø kørørrautah?” cha. ¹⁸ Inchene Abrahambe Tiuswan trenchibiq køn: —Ñi treeg martrab cha kørørmisrigu Ismael truigwane nø tøga pasrønrrai tranø— cha.

¹⁹ Inchene Tiusbe trenchibiq køn:

—Isa kømø, Sara ñui sraimbe kan nusrkai tøgagønrrab køn cha, truigwane Isaac munchi partrig cha. Nabe tru øyeeq martrab cha kørømarigwan Isaacweinukkucha katøle treetøwei marig kørørmisrtraí indamønrrun cha. Inchawei na treeg marigwane wendø nuinukkurri amrrub misaameraba managatig tøga pasramønrrun chibiq køn.

²⁰ Inchen Ismaelweimburabgucha nabe ñun mørar cha, nungucha mayanguen tabiq nebuig kørørrai maramønrrun chibiq køn. Nøgucha ureemera larrø norrø tøgagønrrai marøb, purø norrø misag sötø larrøbitchai marøb indamønrrun chibiq køn. Ismaelbe karub ashib pørørrabelø doce nørreelai møkain kønrrun cha. ²¹ Inchendø na tru øyeeq martrab cha kørømarigwane Isaacba kørørrai mara pasramønrrun cha, tru Sara katø pila øyan kwalømmerawan tru tøgagønrrab kui unøyu.— ²² Incha Tiusbe Abrahamba chab waminchabe, nuinukkurri tarømisra ibiq køn.

²³ Inchen Abrahambe nui nusrkai Ismaelwan køben, tru nui karuig mendig melabelø nui yau kal-lawarmeran køben, anwei pena tøgaguilan køben, Abrahamwei yau mu møguelø purrabelane kerriguba wama, tru kwalømdøwei circuncidabiq køn, Tius maig karuig køben, trekke.

²⁴ Abraham tru circuncidab urasbe pilamera noventa y nueve tøgagig købig køn.

²⁵ Inchen nusrkai Ismaelbe tru circuncidab urasbe pilamera pa tratrø y pøn pilaig købig køn.

²⁶ Inchawei tru kwalømdø Abraham køben, nui nusrkai Ismael køben, ²⁷ mayeelø tru nui yau purrab møguelø køben, katø nui yau kal-lawar kui lata, katø amrrub misaameran peniilø kui lata, mayeeløbah circuncidaig kuig køn.

18

Isaac Kal-lanrrun Cha Kørørmisrig Købig

¹ Incha Jehovåbe Abrahamwan kenamisrøbig køn tru Mamre tainug norrø parøndzig encinas tusrmera pørørrab pulu, tru nui carpa yau yaskabu waben kwaløm tru mas purø mur pørørr asentab pasrøben. ² Incha møimbe nø kurraashene, pøngatø møguelø nuin pinrrøgue

pønrraptinchen, nøbe tru møguelan amrruy chinrrab yaskabugurri luløb ya, maløwan pirau kebatamne utsøbasrabe trenchibig køn:

³ —Nai kasuku, na ñui karui megabigwan ñi nan tab indamdiig kui asønaig købene, trube, ib imøtø, lincha kørrømisrtra cha. ⁴ Nabe pi srua amrrungarumønrrun cha, ñimui katsuimeran kwalamig. Trugurrimbe tusr umbu isrønrrigay cha. ⁵ Na ñi maig chiben puranunrraptøwei wabigwei yaburab puramruiig købene, nabe lamø mamig manrrai sruaarumønrrun chibig køn, ñimui ambamigwan chishtø ambamdø kønrrai.— Inchen nømbe trenchibelø køn:

—Ñi maig taigwan mar— cha.

⁶ Inchen Abrahambe tru Sara waig carpa yausrømay kørinatø lulabe, trenchibig køn:

—Petøzhiitø purø tab harinawan arroba y media menrra, nemøra, harinawan masawa, trutøga pirrimera naarrøsryu kar— cha.

⁷ Incha Abrahambe tru waara purrabsrømay luløb ya, kan truba tab waara-unøzhigwanh merrarrawa, nui karuig mendig megabigwan tranen, trube mamigweyasig ¡katø! petøzhiitø tamarøbig køn. ⁸ Incha queso køben, pitsø køben, tru waara kweecha tamarigwan køben, nømun manrrai pønrsøbig køn. Incha Abrahambe nøm mab kømne tru tusr umbu ashib pasrøben,

⁹ truiløbe payibelø køn:

—¿Ñui srai Sarabe chu wah?— cha.

Inchen Abrahambe:

—Yu carpa yau wainrrun— chiben, ¹⁰ kan møig køsrønbe trenchibig køn:

Nabe katø pila katø øyan kwalømmerawandøwei arrumønrrun cha. ¡Aul! Tru urasbe Sara ñui sraimbe kan nusrkai tøgagønrrun— chibig køn.

Inchen Sarabe, nømui wendau, tru carpa yau kebambi yaskabu tru wamindigwan mørøb pasrabig køn. ¹¹ Inchen Abrahambe Sarababe yandø mur køllireelø, Sarabe yandø pabøguen pinig købig køn. ¹² Inchen Sarabe intsaptinchibig køn, nui umbutø treeg isub: “¡Paare! kan na yan kølliibe, ke trengatikkuha kønrrai indamdiig kønrraitarru cha katø nai kekkucha yan kølligwein køben.”

¹³ Inchene Jehovahé Abrahamwane trenchibig køn:

—Sarabe trenchib intsan cha, ¿Kan isa kømø, treeg kønrrab kø chinder? chib. ‘Na yan køllig købendø, kan unø tøgagømig.’ ¹⁴ ¿Kabe Jehovahéweingan kaimamdiig chi købig kuitarru? cha. Inchawei katø pila arrubigu tru chu ura treeg kønrrun taiguh, na katø ashchab arrubene, tru urasbe Sarabe kan nusrkai tøgaguen wanrrun— chibig køn. ¹⁵ Inchen Sarabe kwaarøppa, trenchib isabig køn:

—Nabe intsømuig køn— cha.

Inchene Jehovahé trenchibig køn:

—Ñibe intsabwei indig køn— cha.

Abraham Sodomayasig Purøwaminchib

¹⁶ Incha tru møgueløbe kurra, Sodomaguebsrø ashabe yandø truguebsrø ambub mendøben, Abrahambe ungua chinrrab nømbe lincha ibig køn.

¹⁷ Inchen Jehovahé nuinøtø treeg isubig køn:

“¿Na chi martrab indigwan nagan Abrahamwan eshkamø maramuitarru? cha. ¹⁸ Nøbe purø nørøø misag sètømera, trurrigu mu chindamgaig murig, katø nøgurri chi misaameratøgucha pirø muba kuimburab warabeløbe mayanguen tabig nebulø treeg kønrrab køben. ¹⁹ Nabe nui ureemeranba nuinukkurri amrrub misaameranba kusrenrrai wesrawa pasrar cha, tru nø martrai karua pønrsraillan møra marøppe, tru tabig sølgandø mariguba, nø tabig kui asamig mariguba kønrrain cha, tru øyeeq mariiløgurri Abrahamwan Jehova maig martrab cha kørrømaribe kerrigu treeg nebunrrai”.

²⁰ Incha Jehovahé Abrahamwan trenchibig køn:

—Sodomaimburappa, Gomorramburappa, truyu misaamera yeeg kaig martan chib trashib eshka melaibe masken, masken køben, nømui kaig mariiløgucha masken, masken nuraben, purø trømbøig mindin køn cha. ²¹ Møimbe na kørraarumønrrun cha, tru nøm øyeeq, øyeeq køtan chib trashib melaig nainug pubig isa kømøtø, treeg købwei indiatashchab. Treeg kuin kuisruandøbe, trube, na asamønrrun— cha.

²² Inchen tru pailø møgueløbe nøøøø misra, Sodomaguebsrø amben, trune Abrahambe Jehovahá pasrabig køn. ²³ Inchen Abrahambe Jehovaháwan kemallabe, trencha payibig køn:

—¿Sølgandø tabig marøbigwanba, kaig marøbigwanba tøgatø pinishinrrapteh?— cha.

²⁴ Inchippa tru ciudayu sølgandø tabigwan marøbelø cincuenta købene, ¿tru ciudawan ka pinishinrrapteh? cha, tru ciudayu sølgandø tabigwan marøbelø tru cincuentaeløgurri ciudawan pinishimø, ¿ka købasamdiig kømuitarru? cha. ²⁵ Treekkatig maramibe chigaaguinrrun cha, tabigwanba, kaigwanba kanbalatø kwanrrai indamig, kan pailøba treetø kalø

marig kui lataig. ¡Ñibe mana treeg martrab kò! cha. Pirau muba kuimburab kerriguba maig kòrrabigwan ñi asha maròbig kòppe, ¿ñibe maig maramigwan sòlgandò tab asha marmòrraitirru?— cha

²⁶ Inchene Jehovahé trenchibig kòn:

—Sodoma ciudayu cincuenta sòlgandò tabigwan maròbelò wetòrrappe, truilan isua, truyube chinchimò, kagòbasamòrrun— cha.

²⁷ Inchene Abrahambe trenchibig kòn:

—Nabe nai Señorwan ke menrra inchib lata indinatan cha, nabe ka usrò tuindò kuin-abendò. ²⁸ Inchen cuarenta y cincotò kòbene, trube cincuenta kòmukurrindò ciudawan kerrigu pinishinrrapteh?— cha.

Inchene Jehovahé trenchibig kòn:

—Pinishimumòrrun cha, truyu na cuarenta y cinco sòlgandò tabigwan maròbelò wetòrrappe.—

²⁹ Inchen Abrahambe katògucha:

—¿Inchippa cuarenta wetòrrappe?— chiben, Jehovahé trenchibig kòn:

—Tru cuarenteelan isua, chinchimumòrrun— cha.

³⁰ Inchen Abrahambe katògucha payibig kòn:

—Nai Señor, na òyeeg chiben namòrrunrig cha. ¿Inchippa truyu treinta wetòrrabeneh?— cha.

—Tru treinteelan isua, kagòbasamòrrun— chibig kòn Jehovahé.

³¹ Inchen Abrahambe katògucha:

—Nabe nai Señorwan ke menrra indinatan cha, ¿truyu veinte wetòrraimbe maig kòbsruerah?— chiben,

—Veinteelan isua, nabe pinishimumòrrun— chibig kòn.

³² Incha katòle Abrahambe trenchibig kòn:

—¡Nai Señor, nan namòrrunrig cha, i piejindòh na ñun katòlò trenchibashibsumuguh cha: ¿Inchippa truyu pa trattrò wetòrraimbeh?— cha.

Inchene Jehovahé trenchibig kòn:

—Tru pa trattròn isuptò, pinishimumòrrun— cha.

³³ Incha Jehovahé Abrahamba òyeegwan chab waminchabe, yandò truyugurri iben, Abrahambe nui carpa yaumay katò arrubig kòn.

19

Sodomanba Gomorranba Pinishib

¹ Incha tru pagatò angelesmerabe tru Sodomasròmbè nòsig pineb iben, pubene, Lotbe tru Sodoma ciudayu kebambi yaskabsrò wabig kòn. Incha Lotbe truilan ashippe, amrruy chinrrab pasramisròptincha, malòwan pirausrò kebatamnegatig utsòbasròbig kòn. ² Inchabe trenchibig kòn:

—Nai kasukumera, na ñui karui megabigwei yausrò kòrròmisrtrab amrrurray cha. Incha ñimui katsiimeran kwallchigay cha. Incha srònabe lòtsò kurra ñimui ambamigwan amrrigay— cha.

Inchen nòmbè trenchibelò kòn:

—Kah cha, mò; yembe name yu umbu puinuutò, ka kòrròmisrtrab ker— cha.

³ Inchen Lotbe truba truba inchen, nòmbè nòba amba, nui yau kebamben, nòbe tab mamimera tamaròb, pirri chi levaduragailò karòb inchen, nòmbè mabelò kòn.

⁴ Inchen nòmbè kinrrabguen waramismòwatò, tru ciudayu mòguelòbe yawan kerrigu chab tulsrubelò kòn, maya misag matsòrelògurrimbunò kòlleelògatikke. ⁵ Incha Lotwane trenchib trashibelò kòn:

—Tru ñui yau kinrrab amrrub mòguelòbe chu purra? chib. ¡Wambig webetay! chib. Nabe nòmba ishumburmeraba lataitòwei maròg kuin pòrrer— chib.

⁶ Inchen Lotbe wambig webya, yaskabwan kasròb trenchibig kòn:

⁷ —Nai misaamera, tiusmanda òyeekkatig tròmbògòliibe martrab inchimòtay cha.

⁸ Nabe pagatò nimbasrmera tògaig kur cha, managuen kan mu mòòba kimeelò. Nabe truilane wertrur chibig kòn, ñim truilan maig maròg kòben martrigay cha. I mòguelane chigucha treebe marmòrrunrigay chibig kòn. Kaguende truilòbe nai yaambu mugòben kag martrab inchib kòrrrain kòmòtò, na ashìb tògaguilò purran— cha.

⁹ Inchene nòmbè trenchib lètabelò kòn:

—¡Yugurrimbe mendatsu!— cha. Inchabe treekkucha chibelò kòn:

—Ya peesriig namui utu ka tsunrrab arruatiig kòbendò, ipaare! ¿namune maig maramigwan ke ñi asha karunrrab indirru? cha. Mòimbe truilan lataguen kòmò, ñiune purò

trømbøikken martrumøn— chibelø køn. Inchabe Lotwan melambua, yaskabsrø kemalla, yaskabwan wesra kutchab inchibelø køn.

¹⁰ Inchen tru pailø møgueløbe yaambugurri taska kemørøppa Lotwane yaambumay kesrub, trugurrimbe yaskabwan kasrøptinchibelø køn. ¹¹ Incha tru møgueløbe tru yau yaskabu melambu amrrubelane kammeran ashmeelø misrtrai marøptinchibelø køn, mas unøttiugurrimbunø kølliwangatikke. Inchen nømbe yaskab lab ke mandøguen kømui inchib købig køn. ¹² Incha tru møguelø kørørmisrøbeløbe Lotwan trenchibelø køn:

—¿Ñigan ñui yaelø mas tøgagøtirru? cha. Ñui yernomeran køben, ñui nusrkalan køben, ñui nimbasrmeran køben, yugurri wesru chibig køn. ¹³ Kaguende nambe i ciudawan kerrigu pinisamig køn cha. Tru katøgan misamera yeeg kaig martan chib trashib eshka melaiibe Jehová nø waisrø puin køn cha. Inchagurri Jehovábe namune ciudawan pinishinrai ørig køn— cha.

¹⁴ Inchen Lotbe tru nui yerno kørnrabeløba waminchab webibig køn, tru nui nimbasrmeran kasharanrab misrarmera købeløba. Incha trenchibig køn:

—¡Mallatø webambay! cha, kaguen Jehovábe i ciudawan pinishinrrab køn— cha. Trune nui yerno kørnrabeløbe ka intsab trendaitamaptøh isubelø køn.

¹⁵ Inchen yandø tør— rrab arruben, ánglesmerabe Lotwan mallatø indingarub, trenchibelø køn:

—¡Mallatø inchi chiben! cha. Ñui srawanba, ñui pagatø nimbasrmeranba yu purrabelan pera inrrø chibig køn, ciudayu trømbøig nebunrrai marigu ñim pinømønrrappe.—

¹⁶ Inchen Lotbe ke peguen inchimuben, tru pagatø møgueløbe nunba, nui srawanba, nui pagatø nimbasrmeranba tasku kemøra, nømune ciudayugurri wambiisrø wesrubelø køn, Jehováwei lastima asiitøga. ¹⁷ Incha yandø ciudayugurri wambiisrø wesrawa pasrabe, kane trenchibig køn:

—¡Ñui øsig kuigwan ñi tøgønrrappe, welula inrrø! cha, wendømay keshmøwei, i chagu chu pasramismøweingue. Ñui øsig kuigwan tøgagønrrab tunsrømay lul cha, pinømønrrappe.—

¹⁸ Inchene Lotbe trenchibig køn:

—Kah, cha nai kasuku na ñim maig taigwan megabig tiusmanda, treebe kaimamønrrun cha. ¹⁹ Nabe ñimuin kabyu tab kui asig kuinaig købene, nai øsig kuigwan na tøgagømig kønrrai ñimbe nane purø nu lastima asig køn cha. Inchendø nabe tunsrømaybe lulrrab kaimamønrrun chibig køn, inchippa na trusrø pumuatø kaig attrabig nan wetøgøben, kwamig kømønrrai. ²⁰ Yu puluwandø kan lamø ciudagøllig køn cha, trusrømaybe lulamønrrun chibig køn nabe. Trusrømay ibashcha cha, pøs, truiibe lamø ciudagøllig kømuitarru cha— truyu na øsig kømigwan ka tøgagømig kønrrai.—

²¹ Inchen trenchibig køn:

—Ñi øyeeg miaigwangucha nabe mørar cha. Tru ñi wamindi ciudawane nabe pinishimumønrrun chibig køn. ²² Trube, øsig kug købene, mallatø trusrømay lul chibig køn. Kaguende ñi trusrø pumuatøbe, nabe chigucha martrab kaimamønrrun— cha. (Inchagurri tru ciudawane Zoar cha wamig kuig køn.)

²³ Inchen Lotbe Zoarsrø pubene, yandø pørrbe neeshib arrubig køn.

²⁴ Inchen yandø Jehovábe srømbalasarøngurri azufreba, naaba sre pubig ørøbig køn Sodomaimbabala, Gomorraimbabala. ²⁵ Incha tru ciudameranba, katø truyu warab misaameranba, tru chaameranba, katø tru pirau chi kal-lawa pønrrabelanbañau chishtøh pinisaig købig køn. ²⁶ Inchen Lotwei sraimbe mømbe wendømay keeshenba, nøbe maig kuimaytiig tre srug misra pasrambuig køn.

²⁷ Katø kwaløm Abrahambe løtsø kurra Jehovába tru nø waminchib pasraisrømay ya, ²⁸ Sodomaba, Gomorraba katø trusrø muba chag kuimburab truguebsrø ashene, naguishbe kan nu tra pachib lataig piraugurrimbe kurrab pasraptinchibig køn.

²⁹ Øyamay tru muba chag kuimburab ciudameran Tiusbe pinisaig køn. Inchendø Tiusbe Abrahamwane isua tøga pasrøwa, tru Lot tsuig ciudameran purø trømbøig pinishib arrubigurri Lotwane wesraig køn.

Lotba Nui Pagatø Nimbasrmeraba

³⁰ Inchen Lotwane Zoarsrø kørørmisra tsumibe kørig køben, nui pagatø nimbasrmeraba tunnera tøga pirømerasrø tsunrrab ya, nømbe pønreløba kan peña trab pasrabyu warønrrab kørørmisrøbelø køn. ³¹ Indiibe kan kwaløm køli nimbasrbe tru wendø numøsrwane trenchibig køn:

—Namui møskaimbe yandø køllizhig køben, yu nam warainuube namba kasharanrabelø muguen møgueløbe kaagøn cha, yu piraube mutøgucha trendø treeg kasharamig købig købene. ³² Namui møskawan vino mutsøsr mutsiirana, nøba kigun cha, trumay namui møskaweinukkurri amrrub misamera tøgagømig kønrrain— cha.

³³ Incha tru yem mōskawan mutsiirana, kōli nimbasrbe kebya, mōskaimba kibig kōn. Inchen mōskaimbe nune kinrrab tsumisren, mōrmōwei, ni katō kurra iben mōrmōwei indin kōbig kōn.

³⁴ Incha katō kwalōmbe tru kōli numōsraimbe wendō numōsrawane trenchibig kōn:

—Nabe marig yem nai mōskaimba kiaig kōn cha, katō mōi yemgucha mutsiirana, mōimbe ñi kebya kinrrig cha, trumay nam namui mōskaweinukkurri amrrub misaamera tōgagōmig kōnrrain— cha.

³⁵ Incha tru yem katō mōskawan vino mutsōsra mutsiirana, wendiibe kurra, katō mōskaimba kibig kōn. Inchen mōskaimbe chu uras nōba kinrrab tsumisri mōrmōwei, ni chu uras kurra, yai mōrmōwei inchibig kōn. ³⁶ Incha Lotwei pa mimbasrmerabe pailōba mōskawei kwanrreelō kōrrōmisra, ³⁷ kōli nimbasrbe kan nusrkai tōgamisra, truigwane Moab munchi pasrig kōn. Treekkurri truipe mōi ya moabitasmerai mōskain kōn. ³⁸ Inchen wendiikkucha kan nusrkai tōgamisra, truigwane Ben-ammi munchi pasrōbig kōn. Inchen truipe tru mōi ya amonitasmerai mōskain kōn.

20

¹ Incha Abrahambe tru nō tsuinukkurri Neguev pirausrōmay ya, truipe Gadesba tru Shur ciudameraba pōnrrabnug tru utu kōrrōmisrōbig kōn. Incha tru Gerarsrōmbe ka purainrrab arrubig lataitō tsuabe, ² trusrōmbe tru nui srai Sarane, “naimbe nōbe nuchag kōn” chibig kōn. Inchen Abimélec tru Gerarsrō reybe Sarane wamōnrrab ōra, nui srain kōnrrai isua kōrrōmarōbig kōn.

³ Inchen tru yem Abimélecbe kan piaig tōgaguiyu Tiusbe arrua, nune trenchibig kōn:

—Ñibe kwanrrabguen cha, kaguende ñi ñui srain kōnrrai ñi kōrrōmari ishuube kasharaweig kōn— cha.

⁴ Inchendō tru Abimélecbe tru ishuwane pera kib chi marmuig kua, nōbe trenchibig kōn: —Señor, ¿chi kalō marmígwangucha ñigan kwetchab indirru? cha. ⁵ Yamba Abraham nōtōwei ¿ōyah chimuig kuitarru? cha: “Naimbe nōbe nuchag kōn” cha. Inchen katō ishug misakkucha: “Naimbe nuchagwein kōn” cha trendaig kōn cha. Nabe nai manrrō umbugurri chi kaig isua kōmōtō, nai tasiimeran chishig tōga pasrab, iigwan ōyeeg marig kōn— cha.

⁶ Inchen Tiusbe piaigu trenchibig kōn:

—Nagucha asha pasrar cha, ñui manrrō umbugurri tabig isua marigwan. Incha nabe ñi nan kalō marmōnrrai na ñun kebachibashmuig kōn cha. ⁷ Inchawei ñi katōle nui keeba inrrai ibashmuisruandōbe ñibe isa kōmō, kwanrrabguen cha, ñui yau mutō purrabelō kōben truilōbañau. Kaguendō nōbe Tius maig karuigwan eshkabig kōn cha. Incha ñi ōsig kōnrrai ñuimburo purōwaminchun cha—

⁸ Indig katō lōtsōbe Abimélecbe lōtsō kurra, nui tru karub peraguilan wama, truilan mayeelan nun chi purayaigwan kerriguh eshkabig kōn. Inchen tru mōguelōbe purō kōrrō kōrig kui inchibelō kōn.

⁹ Inchen Abimélecbe Abrahamwan wama, trenchibig kōn:

—¿Ñibe namune chi mara pasrōgu? cha. ¿Pōs, nabe ñune chiyu kalō marta? cha. Ñibe naimbalaba, na misagwan karub tōga waimbalaba purō trōmbōig kalō maringarubsrutan cha. Ñibe nane chi maraamig mara pasrtan cha.— ¹⁰ Incha katō Abimélecbe Abrahamwane trenchibig kōn:

—¿Chi isuarre ñibe ōyeeg marig kō?— cha.

¹¹ Inchen Abrahambe trenchibig kōn:

—Nabe nainetō treeg isuig kōn cha: “Yusrōmbe Tiuswan kōrig tōgar muguen kaagua, nai srawan nōmui mara kōrrōmarōkkōptō nane kwetchaitamōb”. ¹² Inchendō chiwei isamō chibig kōn: “nōbe naimbe nuchagwein kōn” cha. Nai mōskaweimbe nōbe nimbasrwein kōn cha, usrimbe katōgan usrin kuindōgucha. Inchagurri nabe nune nai srain kōnrrai marig kōn cha. ¹³ Nai mōskawei yaugurri nan Tius ka truōtōt, truōtōt uñchai nan webingarub uras nabe Sarane trendaig kōn cha: Na ñui keg kuitamab isua ñi tōga pasrōwabe trube, ōyeeg chirrunrrig cha. Nam chu pub ambiisrōndōgucha ñibe ōyah chirrunrrig cha, “ñibe nai nuchag kur” — cha.

¹⁴ Inchen Abimelecbe Abrahamwane ubishamera kōben, waaramera kōben, katō nui karuig mendig melab mōguelan kōben, ishumburmeran kōben tranōbig kōn. Incha katōle nui srai Sarangucha tranōbig kōn. ¹⁵ Incha Abimelecbe trenchibig kōn:

—Nai pirōmerabe kerriguba ñui merrab pasran cha, ñun katōguchi tab tsumdōnug, truyu kōrrōmisra tsu— cha.

¹⁶ Incha Sarane trenchibig kōn:

—Nabe ñui nuchawane tsantsøn anmera mil tranar cha, tru anbe øyeeg purayaigwan truburø trani an køn cha, truipe ñi chi kalø marmig kuin kui ashchai maya misagwei malau kenamarig kønrrain cha. Trumaybe ñune mugucha kaig waminchippe kønrraamøn—cha.

¹⁷ Inchen Abrahambe Tiusba waminchen, Tiusbe Abimelecwanba, nui srawanba trugurri nui karuig mendig melab ishumburmeranba ureg tøgagønrrai tamarøbig køn. ¹⁸ Kaguende Jehovahbe Abrahamwei srai tru Saran øyeeg puraiben Abimelecwei yauelane ureg chigaanrrai mayeelai matrizwan kasraig kua.

21

Isaac Kal-laig

¹ Nø maig taig købigwan trumay martrab Jehovahbe Saran ashchab arrua, nune tru maig tranrrab køromisrigwan treeg marig købig køn. ² Inchen Sarabe kwanrriig kørrømisra, Abraham kølli misagwei kan nusrkai tøgaguig køn. Tius tru mana tøgagønrrun taig tru uraske. ³ Inchen tru Sara tøgaguig unø tru møg-unø kal-labigwane Abrahambe Isaac munchi pasrig køn. ⁴ Incha Abrahambe tru nui nusrkai Isaacwan trattrø y pøn kwalømyu circuncidaig køn, Tius maig karuig køben, treekke. ⁵ Nui nusrkai Isaac kal-laben, Abrahambe pilamera cien tøgag købig køn. ⁶ Incha Sarabe trenchibig køn: “Tiusbe nane ka intsøg kønrrai marig køn cha. Møikkøben na unø tøgaguin kui wammørøbeløbe naba ketøtø intsønrrun cha. ⁷ ¿Abrahamwane mugui trenchinrrautah cha, Sara ureg mutsørønrrun? chabe. Inchen køben, Abraham ya køllig køben nabe kan nusrkai tranar” chibig køn.

Agarwanba Ismaelwanba Abrahamwei Yaugurri Webusrilø

⁸ Inchen Isaacbe nurab iben, yandø pitsø kuchen, tru pitsø kuchib kwalømbe Abrahambe larrø tab mamiimera tamarøbig køn. ⁹ Inchen Sara ashene, mømibe tru Egiptørø Agarwei nusrkai tru Abrahamba tøgaguig unø Ismaelbe, nui nusrkai Isaacwane ke ka intsatø ashen, ¹⁰ Sarabe Abrahamwane trenchibig køn:

—Ñui tru karuindiig megab ishuwane nui nusrkawanba yugurri weguchi cha, kaguende tru ka karuindiig megab ishuwei nusrkaimbe nai nusrkai Isaacbabe chi tøgaguigwan keta tranamigube tøgatø ashchabig kømøn—cha.

¹¹ Inchen øyeeg wammerabe Abrahamwane purø murig pubig køn, kaguen nui trag unan øyeeg nebuben. ¹² Treeg kuindøgucha Tiusbe Abrahamwane trenchibig køn:

—Ñui karuindiig megab ishuweimburab lata unaimburab lata chi isumøta cha. Sara nø maig taigwan kerriguba ka møra, trunun treeg ka mar cha, kaguende ñuinukkurri amrrunrrab misaamerebe Isaackurri kønrrun cha. ¹³ Inchen tru ñui karuindiig megabig-wei nusrkaweinukkuringucha truba truba nørø sötø misaamera kønrrai nabe treeg maramønrrun cha, kaguende ñuinukkurri arrubig kuimba.—

¹⁴ Indig katø kwalømbe Abrahambe løtsøzhig kurra, Agarwane pirrin køben, pi niguin kalusyu pi køben trana, kildunyu mutøsa, Ismaelwane yandø ñi ashchig cha nun tranabe, ka amrrigay chibig køn. Inchen nøbe webya ya, Beerseba tru mu misag warab waraimøsrø chu pumikkaig llirab uñibig køn. ¹⁵ Inchen tru kalusyu niguin pibe patsaptinchen, unane kan lamø tusr umbusrø wanna, ¹⁶ usrimbe truyugurri kan maya yabgøsrøn ashib wanrrab tarømisrøbig køn. Kaguende nøbe treeg isubig køn: “Nai unan kwai ashig kømøtan” cha. Inchen usri wamisren, unøbe trashib kishibig køn.

¹⁷ Inchen Tiusbe unø trashib kisigwan møren, Tiuswei ángelbe Agarwan srømbalærøngurri wama trenchibig køn:

—¿Agar, chinnda? cha. Chi kørig isumøta cha. Kaguende unø nø wainukkurri kisigwan Tiusbe møren køn cha. ¹⁸ Kurra ya, unan tasku kemøra, srua pasramisr cha, kaguende nabe nuinukkurri misaamera purø nørø sötø kønrrai maramønrrun—cha.

¹⁹ Inchen tru uras Tiusbe Agarwan kammeran kurøptinchen, nøbe kan pisu waig ashipt-inchibig køn. Inchen Agarbe tru pi niguin kalusyu pi netsøgana, unan pizhig srørrøbig køn.

²⁰ Inchen Tiusbe unan lincha pasrøben, unøbe nurab ya, mu misag warab waraimøsrø tsua, nøbe arcotøga söl øramibe kan piaig lataig købig køn. ²¹ Incha nøbe Paran tru mu misag warab waraimø pirausrø tsubig kuig køn. Inchen usrimbe nune kan Egipto pirausrø ishueba kasharanig køn.

Abrahamba Abimelecba Øyamay Kønrrai martrab cha Kørrømarig

²² Tru kwalømmerawandøwei Abimelecba katø tru nui suldaumeran nø asha karubig Ficolba Abrahamwan trenchibelø køn:

—Ñi chi marøb arrigutøgucha Tiusbe ñiba pasran cha. ²³ Incha mõi yutøwei ñibe Tiusken ashen ¡katø! nabe treeg marmø kømø, maramønrrun taitøga kalø marmørrumøn chirra chibelø køn, tru nan lata, nai nusrkawan lata, nainukkurri amrrub misaameran lata. Incha

¡katø! treeg maramønrrun chirra chibig køn nanba, møi ñi yu tsuim pirau misaameranba tru purainrrab arruatiigwan tabelan tab inchib tøgagørrunrrig cha, tru ñun mandø tab indig køben tru tab indiitøga treetøwei tab inchib.—

²⁴ Inchen Abrahambe trenchibig køn:

—¡Katø! nabe treeg marmø kømø, maramønrrun— cha.

²⁵ Inchendø Abrahambe Abimelecwane 'ñibe nane øyeege kalø marig køn' cha trunun wesrabig køn, tru Abimelecwei karuig mendig melabelø Abraham tru pirø umbugurri pi wesraizhig købigwan nun kerraigwan. ²⁶ Inchen Abimelecbe trenchibig køn:

—Nabe øyeege wane murreendi mørmur cha. Katø ñigucha nan wammøsrøsrømwøwei inchene, nabe møinguen wammøsrøb pasrar— cha.

²⁷ Inchen Abrahambe ubishamera køben waaramera køben srua arrua, Abimelecwan tranøbig køn. Incha ambugurri, igurri øyamay kønrrab cha wamincha kørrømisrøbelø køn.

²⁸ Inchen Abrahambe nui ubisha søtømerayugurri ishug ubisha-ureezheelø trattrø y par, nuingui tarømarøbig køn. ²⁹ Inchene Abimelecbe trencha payibig køn:

—Iig tru ishug ubisha-ureezheelø trattrø y par tru ñi nuingui tarømarøiiløbe çmaig punrra-rbigwan eshkabig køh?— cha.

³⁰ Inchen Abrahambe trenchibig køn:

—Tru iig ishug ubisha-ureezheelø trattrø y par ilan na ñun tranen, ñi utiibe tru pirø umbugurri pizhigwane na lalla wesraig købigwan trunun eshka b pasrønrrabig køn— cha.

³¹ Incha treekkurri trusrømbe Beerseba cha wamig køn, kaguende tru pa møguelø truyu ambugurri, igurri øyamay kønrrab cha wamincha kørrømisrig kua.

³² Incha øyamay kønrrab cha kørrømisrøbelø køn tru Beersebasø. Incha Abimelecba katø tru suldaumeran nø asha karubig Ficolba katø filisteosmerai pirøsrømay katø ambubelø køn. ³³ Incha Abrahambe tru Beersebasø kan tamarisco tusr ellguawa pasrabe, Jehovah, tru Managurri Managatig Wabigwei munchiwan isub wamabig køn. ³⁴ Incha Abrahambe filisteosmeraim pirausrø purø yana tsuig køn.

22

Tiusweyag Isaacwan Kwetchai Abrahamwan Tius Karub

¹ Inchen kan maya yanagøsrøn puraiben, Tiusbe Abrahamwane nui isubigwan Tiusweinug tøga pasraibe maig køtashchab ashchab marøbig køn. Incha Abrahamwan trenchibig køn:

—Abraham— cha.

Inchen nøbe:

—Yu pasrar— chiben, ² Tiusbe trenchibig køn:

—Møimbe ñui kandø nusrkai ñi truba undaarraigwan pera, Møria h pirausrømay ya, truyu kweecha, nan keta tranrra chibig køn. Kan tunyu maramigwan na eshkarrumøn— cha.

³ Inchen Abrahambe katø kwalømbe løtsøzhig kurra, nui burrun tsølig pasra, trugurrimbe tru kweecha parramigweyag trar para, nui karuig mendig melabelø pailanba nui nusrkai Isaacwanba pera, Tius chumay inrrain taisrømay ibig køn. ⁴ Incha pøn kwalømyube Abrahambe kurraashabe yabgurrindø trusrø nebua ashibig køn. ⁵ Inchabe tru nui karub pera kuilane trenchibig køn:

—Ñimbe yutø burrun srua muniiranrrigay cha. Nabe unøbatø trusrøngatig amba, Tiuswan tabig waminchib kua, katøle ñi muimay amrrumønrrun— cha.

⁶ Incha Abrahambe tru kweetsigwan kerrigu parram trarwan tamara, nui nusrkai Isaacwan niisra, nøbe nagwanba, kuchillunba nemøra srua, pailøba ambub mendabelø køn. ⁷ Inchabe Isaacbe nui møskai Abrahamwane:

—Papá— chiben, møskaimbe:

—Nai nusrkai çchi chinrrab inchigu?— chiben, Isaacbe trenchibig køn:

—Nambe nagwanba, trarwanbabe tøgaguer cha. Inchendø tru kweecha keta tranam ubisha unøbe çchu pasrah?— cha.

⁸ Inchene Abrahambe trenchibig køn:

—Nai nusrkainzhig, tru keta tranam ubisha unane Tius nø ashchab kuinrrun— cha. Incha pailøba ambub købelø køn.

⁹ Incha Tius tru chu taisrø puabe, Abrahambe kan altar kusrua, tru pala trarwan tamara wara, nui nusrkawan lusra, tru pala trarrøbig køn. ¹⁰ Incha Abrahambe nui nusrkawan kwetchab kuchillun srua kwalwan kusrubene, ¹¹ mõimbe Jehovahwei kan ángel srømbalásrøngurri wamaptinchibig køn:

—¡Abraham! ¡Abraham!— chib.

Inchen nøbe:

—Yu pasrar— chiben, ¹² ángelbe trenchibig køn:

—Ñui tasigwan ñui nusrkaweimbala kusramøta cha. Chigucha marmøta cha. Ñibe Tiuswane korig tøgag maig købash inchimig kui ashar cha, kaguende ñui nusrkai kandi-gwan treebe marøg kømøtan chimøn— cha.

¹³ Incha Abraham ashene, nui wendaube kan carnero srar kwaliimerayu ilørka megapt- inchibig køn. Inchen Abrahambe tru carneron kemøra nui nusrkawaimburø, kweecha, kerrigu parrøb Tiuswan keta tranøbig køn. ¹⁴ Incha Abrahambe truyube “Jehová Chi Palabigwane Nø Ashibig Køn” cha munchi pasra wamig køn. Incha møin kwalømgatig trenchibelø køn: “Tru tunyube chi palabigwane Tius nø ashchun” cha.

¹⁵ Incha Jehovahéi ángel srømbalarøngurri Abrahamwan katøle wama, ¹⁶ trenchibig køn: —Na Jehovahéi mui katøganwei merrab kømø, nabe naasiitø marig kørrømisrtrai maramønrrun chib pasrar cha. Kaguende ñibe øyeeg maran cha, ñui kandø nusrkawan øyebe marøkkømøtan chib, nan trenchib pasrømøtø. ¹⁷ Inchawei nabe ñune mayanguen tabig nebuig kønrrai tranamønrrun cha. Ñuinukkurri amrrub misaamerane purø nørrø kønrrai maramønrrun cha, srømbalarø kønchabiimera pønrrabig lataig, mar menda pisrum lataig kønrrai nørrø køptø. Ñuinukkurri amrrub misaamerabe nømum ashig kømui inchibelai ciudameran nøm merrarrowa tøgga pønrramisrtrun cha. ¹⁸ Ñui yellyu misaameragurri chu pirausrøn køben misaamera nørrø sötø warabeløbe mayanguen tabig nebuig kønrrun chibig køn, nai wamwan ñi mørikkurri.—

¹⁹ Incha Abrahambe tru pailø nui karui melabelø munig kørrømisrøbelaisrømay katø ibig køn. Incha trugurrimbe ketøtø lincha Beersebasrømay ambubelø køn. Incha Abrahambe yandø trusrø tsumisrig købig køn.

²⁰ Indig wendøsrø Abrahamwane treeg wam pubig køn: “Tru nui nuneg Nacorwei srai Milcabe nusrkalø tøgagøn cha. ²¹ Ke srøsrø tøgagui nusrkaimbe Uz køben, tru wendaube Buz køben, trugurrimbe Kemuel køben købig køn. ²² Tru wendau kal-labeløbe Hazo køben, Pildas køben, Jidlaf køben, Betuel købengue. ²³ Inchen tru Betuelbe Rebecai møskain købig køn. Iilø køn Abrahamwei nuneg tru Nacorwei srai Milca tøgagui nusrkalø trattrø y pøngatøba. ²⁴ Katø Nacorbe nui linchaig Reumåba nusrkalø tøgagui købig køn. Truiløbe Teba taig køben, Gaham taig køben, Tahas taig køben, Maaca taig køben kuig køn.

23

Sara Kwaben Sorig

¹ Sarabe pilamera cientoveintisiete tøgag tsua, ² Canaan pirau Hebrón ciudayu Quiriat Arbasrø kwaig købig køn. Incha nøbe Sara kwaben kisha, truba isuin kørrømisrøbig køn.

³ Incha Abrahambe tru kwabig tsunukkurri webya ya, truyu hititasmeran trenchib waminchibig køn:

⁴ —Nabe ñimui utube ka peesrøngurri arruatiig kuinaindøgucha, nai srawan sòramigweyasig yanrra— chib.

⁵ Inchen hititasmerabe trenchibelø køn:

⁶ —Tiusmanda namui kølli misag namun mørtra cha: Ñibe namui utube chi maramigwan ñi asha karubig kønrrai Tius wesra pasrig møg køn cha. Ñui srawane namuyasig purø tabig tamarig pønrrabigu sørø chibelø køn. Namui utube møikkucha ñui srawan tru sora tramigwane ka chimønrrun— cha

⁷ Inchen Abrahambe kurra pasramisra, hititasmerai merrab utsøbasrøptinchabe trenchibig køn:

⁸ —Nai kwabigwan na yu sørønrrai ñimun tabig asønabene, Zoharwei nusrkai Efrónwan tiusmanda naimburø wamincha kettray cha, ⁹ tru Macpela tain pirau linderomerayu sòramig srug trab lalig pasrabigwan nan yanrrai. Mayaweyig kønrraptig køben treezhigwan ñim mayeelø ashen anwan na wartrab tan chirrunrrigay cha, trumay nai yau misaameran sòramig tøgagønrrab— cha.

¹⁰ Inchen tru Efrón hititabe nui misag utu wawabe, truilø mørøb, katø tru nui ciudayu yaskabwan mayeelø kebambubelø mørøb inchai Abrahamwane trenchibig køn:

¹¹ —Nai kølli misag, tiusmanda, pirøwane ka kettrumøn cha, katø tru sòramig srug trab lalig tru pirau pasrabigwanba. Nai misaamerabe nømbe asha kørrømisran cha. Na pirøwane ñune ketig køben, ñui srawane ka sørø— chibig køn.

¹² Inchen Abrahambe tru pirau maya misagwei merrab utsøbasra, ¹³ truyu warab misaamerai merrab tru Efronwan Abrahambe trenchibig køn:

—Ñi pirøwan nan yanrrab isuppe, tiusmanda mørtra cha. Tru pirø mayaweyig køn, chiben, nabe treegwan anwan wartrumøn cha. Trumay kørrømisrtra cha, treebe si, nai srawan na truyu sòramønrrun— cha.

¹⁴ Inchene Efrønbe Abrahamwane trenchibig køn:

—Nai kōlli—misag tiusmanda mōrtra cha. ¹⁵ Pirōbe tsandzōn an cuatrocientosweyig kōn cha. Inchendō anwan isumōtō tru kwabigwan ka sōrō— chibig kōn.

¹⁶ Inchen Abrahambe tru Efrōn trendaigwan trumay kōrrōmisra, Efrōn mayaweyig kōn cha eshkaigwan tru hititasmerai merrab Abrahambe cuatrocientos tsantsōn anwan mōi, mōi unaashibig kōn, tru penab, yanōb inchibelō maig marōbelō kōben treetōweingue.

¹⁷ Inchawei tru Efrōnweim pirō tru Mamre taisrō pōrr neeshibgatōmay Macpela taisrō pasrab pirōbe, tru sōramig tru srug trab lalig lata, tru pirau pōnrrab tusrmera lata, ¹⁸ yandō Abrahamwei kōrrōmisrig kōn, tru hititasmeraba, katō tru ciudayu yaskabwan kebambubelōba ashen. ¹⁹ Incha trugurri Abrahambe nui srai Saran tru Mamre pōrr neeshibgatōmay Macpela tain pirau sōramig tru srug trab lalig pasrabigu sōrabig kōn, tru Hebron Canaán pirausrō. ²⁰ Inchawei tru pirōba tru sōrig srug trab laliibabe yandō Abrahamweyasig yandō mu kōnōgamgaig kōrrōmisrig kōn, truike tru hititasmera Abrahamwan yanig sōrab tōgagōnrai.

24

Abraham Isaacwei Srain Kōnrrabigwan Lab

¹ Yandō Abrahambe kōlliizhig pilameragucha tsabōtō tōgaig, chiyutōgucha Jehová mayanguen tabig nebuig kōnrrai tranigwan tōgaig kōbig kōn. ² Incha kan piji Abrahambe tru nui karuig mendig megabig ke managurri peraguig nui chi kōbigwan nō asha marōb pasrabigwan wamabe, trenchibig kōn:

—Ñui tasigwan nai srōptsim umbu estsartra cha. ³ Incha tru srōmbalameranba, pirōwanba nō ashib pasrab Tiuswei merrab jkatō! treegwan marmō kōmō, nabe maramōnrrun chirra chibig kōn. Yu Canaán pirau na tsuinig ishuwan nai nusrkaweyasig srain kōnrrai lab pasaramig kōmōnrrain cha. ⁴ Treeg kōmōtō, naim pirausrōmay nai yau misaameraimay irrurrrig cha, nai nusrkai Isaácweyasig srain kōnrrabigwan lanrrab.—

⁵ Inchen tru karub peraguibe trenchibig kōn:

—¿Inchippa ishug unō i pirausrōmay naba arrumōnrrab misrene, trube, maig punrrerrah? cha. ¿Trube, ñui nusrkawan tru ñi webarrua arri pirausrōmay nabe pera yam punrrautah? — cha.

⁶ Inchen Abrahambe trenchibig kōn:

—Nai nusrkawene chiweinguen trusrōmaybe pera imōrrunrrig cha, ⁷ Jehová srōmbalamerai nō Tius, nai mōskawei yaugurrimba, nai yau misaamerai piraugurrimba nan wesrabiibe, jkatō! treegwan marmō kōmō, nabe maramōnrrun taitōga nan ōyah chib wamindig kōn cha: “Ñuinukkurri amrrub misaameran i pirōwan tranrrumōn” cha. Inchawei nōbe nui ángelwan ñui merrab ōrtrun cha, nai nusrkaweyasig srain kōnrrabigwan trusrōngurri ñi pera attrai. ⁸ Inchene ishug-unō yandō arrumubene, trube, tru jkatō! nabe treegwan maramōnrrun cha, ñi kōrrōmisriibe ñuimburappe yandō ñibe chi isumikkaig kōrrōmisrabguen chibig kōn. Inchendō nai nusrkawanesi trusrōmayguimbe pera imōrrunrrig— cha.

⁹ Inchen tru nui karub pera kuibe tru nui karubig Abrahamwei srōptsim umbu nui tasigwan estsarōbig kōn, tru chi martrab taigwan jkatō! nabe treeg maramōnrrun chib.

¹⁰ Incha nōbe tru nun karub pera kōbig Abrahamwei pa tratrō camellosmeran nemōra, tru nui karub pera kōbigwei purō tabelan chine ketamig srua, Nacorwei ciudasmay ibig kōn, tru Mesopotamiasrōmay. ¹¹ Incha ciudayu kōmōtō, wambiisrō camellosmeran kan pisu pulu tōmbōnsrōngarubig kōn isrōnrrai, yandō maaben kōben, tru srusralmera pi kalrrab werrum uras.

¹² Inchabe trenchib Tiusba waminchibig kōn:

—Nan karub peragōbig Abrahamwei Tius, mōin kwalōm na purō tab purayamig kōnrrai martra cha. Nan karub peragōbig Abrahamwan ñi purō tab indigwan nun kenamar cha. ¹³ Nabe yu pisu pulu pasrar cha, tru i ciudayu srusralmera pi wesranrrab amrrumne. ¹⁴ Incha na tru srusran ōyah taig truig kōnrrain cha: “Na lamō pi mutsamig kōnrrai tiusmanda ñui kōtsōn pinōsru” chiben, nōbe lōtappe: “Muchi cha. Katō ñui camellosmeran chigucha na pi mutsōramōnrrun” cha trenchibig, truig kōnrrain cha, tru ñi lawa wesruig, ñui karuig megabig Isaacweyasig. Ōyamay nabe wetōbenamōnrrun cha, ñi nan karub peragōbigwan purō tab indigwan.—

¹⁵ Inchen nō Tiusba chab waminchimōwatō, mōimbe kan srusrō nui kōtsōn kildunyu mutaig arruptinchibig kōn, truike Rebeca, Betuelwei nimbars. Tru Betuelbe Milcaimba, Nacorweimba nusrkain kōbig kōn, Abrahamwei nunewei. ¹⁶ Inchen tru srusrōbe truba tab ishug kōbig kōn, mu mōōbagucha kia kōmig kōbig kōn. Tru srusrōbe pisuyu kōrraarub, nui kōtsōn pi netsōganōb katō inrrab iben, ¹⁷ tru Abrahamwei karuig mendig megabiibe truigweimay lulabe, trenchibig kōn:

—Ñui kòtsøyu piwan kuchi srørrøbsrumuguh— cha.

¹⁸ Inchene nøbe:

—Nai kasuku, muchi— chibig kòn.

Incha mallatø kòtsøn pinøsrub, kòtsøn tasku muta pasramisra srørrøbig kòn. ¹⁹ Incha:

—Ñui camellosmeraingucha pi wesranrrab chibig kòn, mutsamburab mutchai. —
²⁰ Incha mallazhiitø tru kòtsøyu piwan tru pi kwarainug kwarã treetø, treetø yambiji pi wesrawa, mam camellos kuimba mutsamne kwarøbig kòn. ²¹ Inchen tru Abrahamwei karuig mendig megabiibe chigucha chimøtø, asig pasrabig kòn, kaguende nøbe ke tab wetøbefichab inchib pasraig kua, tru nø arriibe ka kauløtø kømø arrig kønrrai Jehovã nun puruguig kòtashig køb. ²² Inchen tru camellosmera piwan chab muchen, tru Abrahamwei karuig mendig megabiibe kan oro surtigas seis gramos tøgagwan kimyu mesrønrrai tranøb, katø kwalmerayu pagatø orotøga mariilan treetøwei pønrsøb inchibig kòn, kwatsiimaybe cien gramos menrraikke. Inchabe trencha payibig kòn:

²³ —¿Ñibe mui nimbasr kugu? cha. Tiusmanda eshkarra cha. Katø ¿ñui møskawei yaube naba, nan lincha amrrub møgueløba chu kørørmisramdiig kø chinderah?— cha.

²⁴ Inchen nøbe trenchibig kòn:

—Nabe Betelwei nimbasr kur cha, tru Milcaimba, Nacorweimba nusrkawei.— ²⁵ Incha katø trenchibig kòn:

—Namui yaube ñim kørørmisra kiamiitø kømø, katø camellosmerai pu køben, para kebusriilø menrraguen tøgaguer cha, katø ñimuyasig chigucha.—

²⁶ Inchen tru møøbe tømboñsra utsøbasrabe, Tiuswan trenchib tabig waminchibig kòn:

²⁷ “Jhovãbe maya nugucha, tabig kòn cha, nan karub peragøbig Abrahamwei Tius. Nøbe nan karub peragøbigwan, purø nu tab indigwanba managuen elachimumigwanba kenamarøb pasrain kòn cha. Incha nan karub peragøbigwei nømmissaamerai yausrø punrrai mariitan” cha.

²⁸ Inchen tru srusrøbe luløbig kòn, tru chi purayaigwan nui yauelan eshkanrrab. ²⁹ Inchen tru Rebeka kan nuchag Laban taig tøgaguibe, truipe tru mowan lanrrab pisusrøngatig luløbig kòn, ³⁰ kaguende Labanbe nuchawei tru surtigaswan køben, katø tru kwalyu pønrsraigwan køben ashib, katø ‘tru møg øyah, øyah chitan’ chib eshkaigwan mørøb indig kua. Incha Labanbe tru Abrahamwei karuig mendig megabigwein pulusrø kemallibig kòn, truipe nui camellosmeraba pisu pulusrø srø pasramne. ³¹ Incha Labanbe trusrø pua:

—Jhovã maya nuguen tabig nebuig kønrrai indi møg, amø chibig kòn. ¿Ñibe wambiitøbe chinchib pasrønrragu? cha. Nabe yawane ñuyasig chab tamarar cha, katø ñui camellosmerain chigucha.—

³² Inchen tru Abrahamwei karuig mendig megabiibe yamay arruben, nømbe camellosmeran niisrailan chab picha warabe, manrrai pønrsøbig kòn. Incha trugurrimbe pi srua arrubig kòn, tru Abrahamwei karuig mendig megabiiba, tru nui lincha amrrubeløba nømui srømmeran kwallchai. ³³ Incha manrrai mamiiamera pønrsøben, Abrahamwei mendig megabiibe trenchibig kòn:

—Nabe na chi wamindamigwan wammørøsrømøwatøbe uta manrrab kaimamønrrun— cha.

Inchen Labanbe:

—Trube, wammørøsrørra— chibene, ³⁴ Tru Abrahamwei mendig megabiibe trenchibig kòn:

—Nabe tru Abrahamwei mendig megab møg kur cha. ³⁵ Nan karub peragøbig Abrahamwane Jhovãbe mayanguen tabig nebuig kønrrai marig kòn cha. Nøbe larrø pua møg kòn cha. Nune ubishamera køben, waaramera køben, an køben, oro køben, karuindiig melab møguelø køben, ishumburmera køben, camellosmera køben, burrusmera køben tranig, treeg tøgagøn cha. ³⁶ Inchen, nan karub pera købigwei srai Sarabe, køllimbala nui kan nusrkai tøgamisrig kòn cha. Inchen nan karub peragøbiibe nui chi tøgaguilan kerriguba nui nusrkawayasig kørømaran cha. ³⁷ Nane nan karub peragøbiibe, ¡katø! nane øyeegwan marmø kømø, maramønrrun tingaru tan cha, øyah chib: “Nai nusrkaweimbe yu Canaán pirau tru na tsuinug ishumburmerai utu ishuvan srai lanrrain kømøn” cha. ³⁸ “Treeg kømøtø, nai møskawei yau misaameraimay ya, nai misagugurri amrrub ishumburmerai utu ishuvan nai nusrkawei srain kønrrai larrunrrig” cha.

³⁹ Inchene nabe nun trenchibig kur cha: “¿Inchippa ishug-unø nai mendig arrumønrrab incheneh?” cha.

⁴⁰ Inchen nøbe nane trenchibig kòn cha: “Jhova maig chiben nabe trumay uninabig køben, truig ñune nui ángelwan ñiba inrrai ørtrun cha, ñi webya yaibe mayanguen tab punrrai, tru nai yau misaamerai yau ishug-unan nai nusrkawei srain kønrrai lanrrai, tru nai møskawei yauelainug. ⁴¹ Inchen nai yauelø ishug unan tranøg kømüinchenequende ñi nan

¡katø! nabe treeg marmø kømø, maramønrrun taigwane trube, yandø ñibe chi isumikkaig kørømisrabguen chibig kòn.” cha.

⁴² Inchen na mõi pisuyu puabe, nabe Jehovahán òyah chib miaig kòn cha: “Nan karub pera tøgagøbig Abrahamwei ñi Tius, ñi na arrigwan nan tab webyamig kònrrain kuabe trube, ⁴³ na mõi pisu pulu pasrøben, òyeeg purainrrain cha, tru pi wesrawa sua inrrab arrub srusran: ‘Tiusmanda, ñui kòtsøyu piwan nan kuchi srørrøbsrumugu’ chiben, ⁴⁴ nan òyah cha løtabig truig kònrrain cha: nan ‘muchi’ cha srørrøb, ‘katø ñui camellosmerangucha pi wesrunrrur’ chibig, truig kònrrain cha, tru nan karub peragøbigwei nusrkawei srain kònrrai Jehovahá lawa wesruig ishug unø.”

⁴⁵ Inchen nabe nai umbutø Tiusba chab waminchimøwatø, mømibe Rebecabe pi mutin kòtsøn kildunyu mutaig, arruptindi ashibig kur cha. Incha pisuyu pi wesranrrab kørraiben, nabe trenchibig kur cha: “Tiusmanda, nan pi srøttra” cha.

⁴⁶ Inchen nøbe tru urastø kòtsøn pinøsrub, nan “muchi” cha srørrøb, “katø ñui camellosmerangucha pi mutsøsrønrrur” chiptinchibig kòn cha. Na muchib pasramne nøbe camellosmeran pi mutsøsrøbig kòn cha.

⁴⁷ Inchen nabe “¿Ñibe mui nimbasr kugu?” cha payene, nøbe nane trenchibig kòn: “Nabe Betuelwei nimbasr kur cha, tru Nacorweimba Milcaimba nusrkawei.” Inchen nabe nune kan surtigas kimyu mesrøb, kualmerayu pønraigwan pønrsøb inchibig kur. ⁴⁸ Incha nabe Jehovahán tabig waminchab tømboñsrøbig kur. Jehovahán mayanguen, tabig kòn chib, nan karub tøgá pasrabig Abrahamwei Tiuswan, nan tru muba arrum maywan pera arrimburø; tru nø nan karub peragøbig Abrahamwei nusrkawan nui trag yau misagwan srain kònrrai tranen. ⁴⁹ Inchawei nai karub tøgá pasrabigwan ñim yaelø kermab pessanameelø køb, larrø tammayelø køb treelø kuabe, nan eshkarray cha. Inchen treeg kònrrab kømubene, trube, trunungucha eshkarray cha. Trumaybe na mandø indamigwan na isumig kònrrautan— cha.

⁵⁰ Inchene Labánba, Betuelbabe trenchibelø kòn:

—Pøs, òyeebe chiguen kømøtø, Jehovahéinukkurri arriinrrun cha. Nambe søl kòn cha løtamig kømøwei, kabe kalø kòn cha løtamig kømøwein kòtan cha. ⁵¹ Rebecabe yu wan cha. Ñun karub peragøbigwei nusrkawei srain kònrrai trube pera inrrø chibig kòn, Jehovahá nø maig kònrrai isuig, trumay.—

⁵² Inchen Abrahamwei karuig mendig megabiibe òyeeg taigwan mørøppe, Jehovahéi merrab tømboñsra pirausrøngatig utsøbasrøbig kòn. ⁵³ Incha tabzheelø orotøga mariilø køben, andøga mariilø køben, kemelø køben, wesrawa Rebecan ketøbig kòn, Incha nuchawanba usranba truilangucha, chigøben ketøbig kòn. ⁵⁴ Incha tru Abrahamwei karuig mendig megabiibe tru nui lincha pera yailøba uta mab, uta muchib incha, truyu kørømisra kibelø kòn. Incha katø løtsø kurrabe, tru Abrahamwei karuig mendig megabiibe trenchibig kòn:

—Nan karub peragøbig Abrahamwei yausrømay ambashchay— cha.

⁵⁵ Treeg kuingucha Rebecai nuchaaba, usrimbabe trenchibelø kòn:

—Ishug unøbe kan pa tratrrø kwalømdøguen namba ka kørømisrrain cha. Trugurrimbe-guendø ka ibwei inchen— cha.

⁵⁶ Inchen tru Abrahamwei mendig megabiibe trenchibig kòn:

—Nan kørømisrrai inchemørrunrrigay cha, na arrigwan Tiusbe yangucha tab punrrai marig købene, trube, tru nan karub pera købigwei yamay katø ibashchunrrigay— cha.

⁵⁷ Inchen nømbe trenchibelø kòn:

—Trube, ishug unan wamønrrab cha, nø manchitashchab— cha.

⁵⁸ Incha nømbe Rebecan wama, payibelø kòn:

—¿I møøba inrraguh?— cha. Inchene nøbe:

—Øø, na lincha inrrur— chibig kòn.

⁵⁹ Inchen nømbe nuchag Rebecan ibashibelø kòn, katø Rebecan lamíkkurri ashib tøgagøb ishuanba. Abraham karub peraguiba, katø tru nø lincha pera arriiløba inrrai.

⁶⁰ Incha Rebecane mayanguen tabig nebuig kònrrai nømbe òyeeg chibelø kòn:

—Ñi, namui nuchag, misaamera purø nørø katøyg katøyg amrubelai usrin kònrrai isuer cha. Tru ñuinukkurri amrrub misaamerabe nømun ashig kømuintchibelai ciudadameran nøm merrarrawa tøgá pønrramistrun— cha.

⁶¹ Incha Rebecabe tru nui karub tøgagui srusralmeraba, yandø camellosmeran itøguana, tru Abrahamwei mendig megabigwei tru mendig ambubelø kòn. Òyamay tru Abrahamwei mendig megabiibe Rebecan pera ibig kòn, truyugurri.

⁶² Inchen Isaache tru “Øsig Wab, katø Nan Ashibig” cha wamim pisuyugurri katø arrin købig kòn, kaguende nøbe Néguev pirau tsubig kua. ⁶³ Isaache kan maaben wambig-wansrø lliranrrab webarrin købig kòn. Incha mømibe kurraashene, camellosmera pulu

lataurab amrruptinchibelø køn. ⁶⁴ Inchen Rebecagucha kurraasha, Isaacwan ashabe, camelloyugurri pinaarrua, ⁶⁵ tru Abrahamwei mendig megabigwan payibig køn:

—¿Mugøh? cha, ø møg namun katønrrab øsrø arrubiibe.—

Inchene nøbe:

—Øibe nan karub pera købig truig køn— chiben, Rebecabe tru malø kasraitøga pinab kasrøptinchibig køn.

⁶⁶ Inchen tru karuig mendig megabiibe nø maitø marigwan kerriguh Isaacwan waminchibig køn. ⁶⁷ Incha Isaacbe tru nui usri Sara tsui carpa ya købiisrømay Rebecan pera arrua, Rebecane nui srain kønrrai marøbig køn. Isaacbe Rebecane truba truba undaarawa, øyamay Isaacbe nui usrin kwabigwan truba pesrøgui uiniibe yandø tabgui

25

Abrahamweimba Srai Ceturaimba Ureemeragurri Amrrub Misaamera

¹ Abrahambe katøgan srai tøgaguig købig køn, truigwei munchibe Cetura taig. ² Truibe Zimramwan køben, Jocsánwan køben, Medánwan køben, Madiánwan køben, Isbcacwan køben, Súajwan køben tøgaguig køn. ³ Inchen Jocsanbe Sebanba, Dedánwanba tøgaguig køn. Inchen tru Dedánweinukkurri amrrub misaamerabe: asureosmera køben, letuseosmera køben, leomeusmera køben kuig køn. ⁴ Inchen tru Madiánwei nusrkaløbe: Efa køben, Efer køben, Janoc køben, Abida køben, Elda køben kuig køn, truiløbe mayamba Ceturainukkurri amrrub misaamera.

⁵ Abrahambe nø kerrigu chi tøgaguilane Isaacwan chishtøh kørømarig køn. ⁶ Inchen nui linchatø ishumburmeraba tøgagui ureemerane chigøben ketiilø trana, incha nø øsig wappatø nusrkai Isaacweinukkurri tarømara, truilane pørr neeshibgatømay pirømerasø warønrrai ørig køn.

Abraham Kwaigwanba, Sørigwanba Waminchib

⁷ Abraham øsig tsuibe pilamera ciento setenta y cinco kuig køn. ⁸ Larrø kølliizhig misra, kwaig købig køn, larrø yam pilamera øsig tsua. Incha nui kølli misaameraba tsunrrab yaig købig køn. ⁹ Inchen nui nusrkalø Isaacba, Ismaelba misra kusra sørabelø køn, tru Macpela tainug, søramig peñayu trab lalig pasrabigu tru Mamre taig pinrrøguewansø, tru Zohar hititai nusrkai Efrønweim pirau. ¹⁰ Iibe tru Abraham hititasmeran penin pirø købig kuig køn. Truyu Abrahamwan sørig købig køn, Sara sraweim pulutøwei. ¹¹ Inchen yandø Abraham kwaben, Tiusbe Isaac nui nusrkawane mayanguen tabig nebuig kønrrai inchen, Isaacbe tru 'Øsig Wab, katø Nan Ashibig' taisrø pisu puluwan kørømisra, tsuibig køn.

Ismaelweinukkurri Amrrub Misaamera

¹² Abrahamwei nusrkai Ismaelweinukkurri amrrub misaamerabe iilø køn, tru Sarai karuindiig megab ishug egipcia tru Agar Abrahamba tøgagui unai. ¹³ Iilø køn tru Ismaelwei nusrkalai munchimera, tru kerrigu mayur nusrkaimbe Nebayot køben, trugurrimbe Cedar køben, trugurrimbe Adbel køben, Mibsan køben, ¹⁴ trugurrimbe Misma køben, Duma køben, Masa køben, ¹⁵ Hadar køben, Tema køben, Jetur køben, Nafis køben, Cedema køben kuig køn. ¹⁶ Iilø køn tru Ismaelwei doce nusrkalø, tru nømui nørø misag søtmørig ashib pønrrabelai munchimera. Nømui pirømeraba nøm chu kørømisra warailøbabe tru munchimeratøgatøwei pønsra wamiilø. ¹⁷ Inchen Ismaelwei øsig kuin pilamerabe ciento treinta y siete kuig køn. Inchen nui israbig luchen, yandø kwaig køn. Incha nui kølli misaameraba tsunrrab yaig køn. ¹⁸ Incha ismaelitasmerabe Havilasøngurri Shur taisrøngatig waraig købig køn, Egipto pinrrøguewansø, tru Asiriamay ambi maywansø. Inchen nøbe nunelan, ka kwayam laptø, kwayam laptø tsubig køn cha.

Jacobpa Esauba Kal-laig

¹⁹ Iig køn tru Isaacweimburab chi pureb arrigwan wamindig, tru Abrahamwei nusrkawan. ²⁰ Isaacbe Rebecaba kasharab uras pilamera cuarenta tøgagig kuig køn, tru Rebecabe Betuelwei nimbasr Labanwei nuchag købig køn. Inchen Betuelba Labanbabe arameosmera Padan-aramsø warabelø kuig køn.

²¹ Rebecabe trendø ureg chigagønrrabig køben, Isaacbe nui sraweyasig Jehováwan miabig køn. Inchen Jehovábe nø miaigwan møren, Rebecabe kwanrriig kørømisrig køn. ²² Inchen tru pa ureemerabe nui patsautø kwayab purrøben, Rebecabe treeg isubig køn: "Øyeeg købene, ¿chiwein kui øsig uñibig unamøtah?" cha. Incha Jehováwan payrrab ibene, ²³ Jehovábe trenchibig køn:

—Ñui patsaube misaamera purø nørøbatø pa sətø køn cha. Misagwan ashib karub pønrrønrrabelø pailø nørreelø ñui patsau purraisrøngurri nørømisrøbguen purran cha. Kane katøgan lataguen kømø, mu chindamgaig kønrrabig køn cha.

Inchen mayur kal-labiibe wendiig nõ karuig megarrrabig kõn— cha.

²⁴Indig yandø kal-lamig ura pubene, nui patsaube møg ureezheelø par kuin kõptinchibig kõn. ²⁵Inchen tru srøsrø kal-labzhiibe ke pigø isig nabzhig kõbig kõn, trurriigu asr ørøba isikuzhikke. Treekkurri Esau munchi pasrig kõn. ²⁶Inchen tru wendau nuneebe Esauwei talunwan merrarroweig kal-laben, treekkurri Jacob munchi pasrig kõn. Inchen Isaache tru parcheelø kal-labene, pilamera sesenta tøgagig kuig kõn. Nø Mayur Kal-laig Nusrkain Kuimburø Nø Uta Tøgagømigwan Yanøb

²⁷Inchen ureemerabe nõrrørab amba, Esaube ushameran pasraara kemøramiibe ke kan kaisab lataig inchibig kõbig kõn, kaambumerawansrø unamig chull møg kua. Trune Jacobpe treeg maramigwane chi isumø ka nuimburab uñibig kõn, carpa yau kõrrømisra chigøben maramigwan chullig. ²⁸Incha Isaache Esaúwan mas undaarabig kõn, kaguen nõ chi kemøra srua arriilan srørrig mabig kua. Trune Rebecabe Jacobwanrre mas undaarabig kõn.

²⁹Indiibe kan kwaløm Jacobpe pigø mamig may tamariizhig nenøb wabene, Esaube wabigwansrø llirab uña, larrø muraaraig puabe, ³⁰Jacobwane trenchibig kõn:

—Ø pigø mamig may tamara ñi neniizhigwan tiusmanda srøttra cha, kaguende nabe larrø muraaraig war— cha. (Inchagurri Edom cha wamig kuig kõn.)

³¹Inchene Jacobpe trencha løtaptinchibig kõn:

—Ñi mayur nusrkain kuimburø uta tøgagømigwan mõin kwaløm, trube, yunømaryagun— cha.

³²Inchen Esaube:

—Pøs, nane parøgwabiitø ke kwamdø køtan cha. ¿Na mayur nusrkain kuimburø uta tøgaguatøbe chigui indamøtah?— chiben, ³³Jacobpe trenchiptinchibig kõn:

—Møin kwaløm jkatø! treegwan marmø kõmø, maramørrun chirra— cha.

Inchen nõbe: —jKatø! treegwan maramørrun— cha kõrrømisra, nõ mayur nusrkain kuimburø uta tøgaguigwan Jacobpa yunømaryabelø kõn.

³⁴Inchen Jacobpe nuimburappe, pirrin køben, tru lentejas tamari mamiizhigwan køben tranen; truiigwan uta mab muchib inchabe, truyugurri kurrab ibig kõn. Øyeeg mara, Esaube nõ mayur nusrkain kuimburø uta tøgagømigwan chiguen tabig kõmui lataig indig kõbig kõn.

26

Isaache Gerarsrø

¹Tru kwalømmerawan tru pirau parø purø trømbøig arrubig kõn, tru Abraham tsub urassrø parø arrub lataitøwei. Inchen Isaache Gerarsrømay ibig kõn, tru filisteosmerai rey Abimelec tsuisrømay. ²Incha truyu Jehovahø Isaacwan kenamisra, trenchibig kõn:

—Egiptosrømaybe imøta cha. Na chu tsunrrain chiben tru pirau kõrrømisra cha. ³I pirautø ka tsu cha, ka petø purainrrab arruatiig lataitøweingue. Nabe ñiba pasramørrun cha. Incha nabe ñun mayanguen tabig nebuig kõnrrai maramørrun cha; kaguen ñuinukkurri amrrub misaamerane i pirømeran kerriguh tranamørrun cha. Øyamay ñui mõskai Abrahamwan jkatø! nabe tru treegwan marmø kõmø, martrab taigwane maramørrun cha. ⁴Ñuinukkurri amrrub misaamerane kan srømbalarø kõnchabiimera lataig nõrrø kõnrrai mara, i pirømeran kerriguh tranamørrun. Incha chu pirausrøn køben misaamera nõrrø søtø warabeløbe mayanguen tabig nebuig kõnrrai marig kõnrrun cha tru ñui misaamera amrrubeløyugurri. ⁵Kaguende Abrahamte tru na maig taig wamwan nan mõra, treeg kõrrømisra marig kõn cha, tru øyeeg kõmig kõn cha na wamindigwanba, martrai na karua põnsrailanba, mandø kõmigwan eshkawa põnsrailanba, katø mu chindamgaig martrai karua põnsrailanba.—⁶Incha Isaache Gerar pirau kõrrømisra tsuig kõbig kõn.

⁷Inchen trusrø warab mõguelø nui sraweimburab payene, nõbe trenchibig kõn:

—Naimbe nuchag kõn— cha, kaguende nõbe kõrig kui inchibig kõn ‘nai srain kõn’ tamiibe. Nui srai Rebecan nõmui marøg kõptø trusrø mõgueløbe nun kwetchaitamab isubig kõn, kaguende nõbe purø tab ishug køben.

⁸Incha kan maya yana køsrøn Isaache trusrø tsuben, tru Abimelec filisteosmerai reybe kan pendanayu ashib pasrøbene, mõimbe Isaache nui srai Rebecane truba tabzhig undaarab pasrai ashtinchabe. ⁹Abimelecbe Isaacwan wamabe, trenchibig kõn:

—Chima øibe ñui srain kuirreh cha. Inchendø nane ¿chindimbarre, “naimbe nuchag kõn” chigu?— cha.

Inchene Isaache trenchibig kõn:

—Kaguende nun nõmui marøg kõptø nabe pinisaig kõmuitamab isua trendaig kõn— cha.

¹⁰Inchene Abimelecbe trenchibig kõn:

—Ñibe namune ¿chindimbarre øyee margu? cha. Katøguchimbe namui misagu møyg køben, ñui sraimba kaig marbø waramisrig kuimasrøtø cha. Incha treeg kaig mariitøga kangurrindø ñibe namune mayeelan kegørrøsrka pønsrøbsrutan— cha!

¹¹ Incha Abimelecbe maya misagwan trencha karua pasrøbig køn:

—Møikkøben i mowan kui, kabe nui srawan kui chigøben inchib kalø marøbiibe kwamig kønrrain— cha.

¹² Indiibe Isaac tru pirau ellmara, tru pilawan kan yellzhikkurrindø cien menrrabatø purø nørrø tulishibig køn, kaguende Jehová nun mayanguen tabig nebuig kønrrai inchen. ¹³ Incha nøbe maskken maskken pua misrøb, larrø nui misrøb ya, muguen treeg tøgagømuinrrunig puaig misrig køn. ¹⁴ Incha Isaacbe ubisha søtømera køben, waara søtømera køben, nun mara tranøbelø trurrigu nørrø tøgagøben filisteosmerabe pusrkwai ashib mendabelø køn. ¹⁵ Incha nui møkai Abraham øsig wab urassrø, Abrahamwei karuig mendig melabeløbe aljibesmera lalla, pi wesruilan, truilan filisteosmerabe pirøtøga netsø kasra pønsrøbelø køn.

¹⁶ Inchen Abimelecbe Isaacwane trenchibig køn:

—Ñibe namuinukkurrimbe tarømisra, inrrø cha, kaguende ñibe nam lataguen kømø mu chindamga nuig misrin køn— cha.

¹⁷ Inchen Isaacbe truyugurri ya, Gerar chag pirømerasrø tsumisrig køn. ¹⁸ Møkai øsig wab urassrø pisumera lalla, wesruilø købigwan, katøle kura wesrubig køn; møkai kwaimbala tru filisteosmera kasra pønsraig købelan. Incha tru pisumerane møkai chi munchi pønsraig købelan tru munchimeratøgatøwein pønsra wamabig køn.

¹⁹ Indig kan kwaløm Isaacwei karuig mendig melabeløbe tru chaasrø lallib kuabe, luløb pizheelø wetørrabelø køn. ²⁰ Inchen tru Gerar pirau ubisha ashib warabeløbe Isaacwei ubisha ashibeløba 'i pibe namuin køn' chib larrø mur aleguiyabelø køn. Incha treekkurri Isaabe tru pisuwane 'Esek', ('Aleguiyim Pi') cha munchi pasrig køn, kaguendø nømbe tru pigurri aleguiyaig kua. ²¹ Inchen katøgan pisu lalla wesruben, katø truiukurri treetøwei mur aleguiyabelø køn. Incha truigwane "Sitna" ('Ashig Kømui Indiyab Kørrømisrin Pi') cha munchi pasrig køn. ²² Inchen Isaacbe truyugurri nørrømisra ya, katøgan pisu lalla wesraben, yandø tru pisuwane "Rehobot" cha munchi pasrig køn ('Pishindø Tab Waramdiig Køn' chib). "Mømibe chigømø lirab waramig kønrrai Jehovåbe trandan cha nam i pirau merraptø webambamig kønrrai"

²³ Inchen Isaacbe truyugurri Beersebamay ibig køn. ²⁴ Inchen tru yem Jehovåbe Isaacwan kenamisra, trenchibig køn:

—Nabe ñui møkai Abrahamwei Tius kur cha. Chi kørig kui inchimøta cha. Nabe ñiba pasrar cha. Nai karuigwan marøb megabig Abrahamwan undag køptø nabe ñune mayanguen tabig nebuig kønrrai marøb, ñuinukkurri amrrub misaamerane purø nørrø kønrrai marøb indamønrnun— cha.

²⁵ Inchen Isaacbe truyu kan altar kusrua, Jehovåwei munchiwan wamab tabig waminchibig køn. Incha tru nui tsumig carpa yawan truyu tamara, pasrøbig køn. Inchen Isaacwei karuig mendig melabeløbe katø truyu lalla, pi wesrubelø køn.

²⁶ Inchen Abimelecbe Gerarsrøngurri Isaac tsuisrømay arrubig køn. Inchen tru Ajuzat tru nun trag lynchib wam purugubiiba, tru nui suldaumeran nø karub pera pasrabig Ficolba lincha amrrubelø køn. ²⁷ Inchen Isaacbe trenchibig køn:

—¿Ñimbe naimaybe chinchab amrrugue? cha. Ñimbe nane tsalø køptø, ñimui pirauguringuen nan wegucha pønrrøbendøbe?—

²⁸ Inchene nømbe trenchibelø køn:

—Nambe asha ker cha, Jehovåbe ñiba pasrain kui. Pøs nambe treeg isuer cha: "Ñiba namba øyamay martrab kandø isua kørrømisram kønrrab kui. Inchen treeg isuigwane ¡katø! marmø kømø nabe øyamay maramønrrun taitøga maramig kønrrain cha. Inchen tru øyamay kønrrai martrab cha kørrømariibe mømibe øyeeg kønrrun cha"

²⁹ Pøs ñibe namun chigucha kaig marmumig kønrrain cha. Pøs namma ñune chigucha chi kaig incha ashmøtø, nambe ñune tab tøgagua, ñune chigucha kømø tab webya inrrai marig kuig køn cha. Pøs mømibe ¡Jehová mayanguen tabig nebuig kønrrai indiibe ñi køn!— cha

³⁰ Inchen Isaacbe truilyasig truba truba tab mamiimera tamaren, nømbe mab, muchib inchibelø køn. ³¹ Incha katø kwalømbe løtsøzhig kurra møyngurrimbunøbe ambugurri igurri kwayab kømønrrab cha nømbe treeg kørrømisrøbelø køn, Inchen Isaacbe yandø ungua chiben, nømbe chi isumø, tab webamba ambubelø køn.

³² Inchen tru kwalømdøwei Isaacwei mendig melabeløbe tru nøm pi wesranrrab lallib kuigwan:

—¡Nambe pi wetørrer!— chib eshkaib amrruptinchibelø køn.

³³ Inchen Isaache i pisuwane “Seba” cha munchi pasrig køn trenchippe: ¡Katø! marmøgømo maramønrrun tain pisu cha. Inchawei tru ciudadwane møin kwalømgatig “Beerseba” cha wamig køn.

³⁴ Inchen Esaube pilamera cuarenta tøgagua, Judit taigwan nui srai marig køn, tru hitita Beeri taigwei nimbasrwan. Katø trugurri tru Basematwan srai marig køn, tru hitita Elónwei nimbasrwan. ³⁵ Inchen Isaacweimba, Rebecaimbabe tru i pagatø ishumburmerabe larrø trømbøig isuindø, isuindø melønrrai marøbelø købig køn.

27

Møskai Isaac Mayanguen Tabig Nebuig Kønrrai Tranigwan Jacob Utab

¹ Indig Isaac yandø larrø køllizhig misren, nui kammerabe yandø pilømuben, yandø ashchab kaimabig købig køn. Kan kwaløm nui mayur nusrkai Esauwan wamabe, trenchibig køn:

—Nai nusrkain— cha. Inchen nøbe:

—Nabe yu war— chiben, ² Isaache trenchibig køn:

—Nabe yandø køllig kur cha. Nabe chi kwaløm kwam kui mørmur cha. ³ Pøs, ñibe tru ñui usha kemørøb srua uniilan: tru ñui arconba ñui flechaswanba nemøra srua, wambigwansrø kan usha ørtrab inrrø chibig køn. ⁴ Trugurrimbe, na maig chullig kuaasha, kan mamig larrø mayzhig tamara, srua attra chibig køn, na manrrur cha. Trugurrimbe na kwamøwatø mayanguen tabig nebuig kønrrai ñuyasig na Tiuswan mianrrab— cha.

⁵ Inchen Rebecabe Isaac tru nui nusrkai Esaúwan waminchen, mørøb wabig køn. Inchen Esaúbe wambigwansrø ibig køn, møskaweyasig kan ushawan pasaraara, kweecha, sruattrab. ⁶ Inchen Rebecabe nui nusrkai Jacobwane trenchiptinchibig køn:

—¡Aui! nabe ñui møskai Isaache ñui nuneg Esaúba: “Kan usha kemøra larrø may mamiizhig tamara, srua attrig” chib øyeeg waminchen trunun mørar cha.

⁷ “Incha nø mamigwan ma, Jehovahæwei merrab mayanguen tabig nebuig kønrrai ñuyasig na Tiuswan mianrrab chitan cha, nø kwamøwatø.”

⁸ Inchawei nai nusrkai na mandø cha karuben, trunun tab mørtra chibig køn. ⁹ Møimbe ubishameraba cabrameraba purrabsrømay ya, pagatø purø tab cabro ureemeran sruattra cha. Pøs, nabe ñui møskai maig mabig kui asha truilan larrø may mamiizhig tamarønrrun cha.

¹⁰ Inchen ñibe nø manrrai srua inrrig cha, nø kwamøwatø, mayanguen tabig nebuig kønrrabigwan Tiuswan nuyasig miaben, trunun ñi utønrrig— cha.

¹¹ Inchene Jacobpe usri Rebecane trenchibig køn:

—Nai nuneg Esaúbe ya isiitø møg køben, nabe ya chigucha isikkaibe cha. ¹² Inchippa nai møskaimbe nan katørawa, nan mugui mørabe, nane isa purø may kebenøsrkøptiig kui martrautan cha. Trubeguende nane mayanguen tabig nebuig kønrrai nayasig Tiuswan miái urasbe nane masken larrø kaig nebuig pasramigwanguen miawa pasrtrautan— cha.

¹³ Inchene usrimbe trenchiptinchibig køn:

—Nai nusrkai, ñun trømbøig nebunrrabiibe nan nebunrrain cha. Na maig taigwan mørøptø møra, srua amø— chibig køn.

¹⁴ Inchen nøbe ya srua arrua, usran tranen, usrimbe møskai maig chullig kuaasha, treeg tamarøbig køn. ¹⁵ Incha trugurrimbe usrimbe mayur nusrkai Esaú kewa uniilø purø tabig yau purrabelan Jacob wendø nusrkawan kenanøbig køn. ¹⁶ Incha trugurrimbe tru usrimbe Jacobwane tasiguba, katø nukaburab chi isikkayube tru cabro ureezhelai kalusmeratøga pinøbula,

¹⁷ trugurrimbe tru may mamiizhig tamarigwanba, tru pirrin tamarigwanba Jacobwan tranøbig køn.

¹⁸ Inchen Jacobpe møskaweimbulu puabe, trenchibig køn:

—¡Nai Papá!— cha.

Inchene Isaache trenchibig køn:

—Nabe yu war cha, nai nusrkai. ¿Ñibe mø nusrkain kugu?— cha.

¹⁹ Inchene Jacobpe trenchiptinchibig køn:

—Nabe Esaú, ñui mayur nusrkain kur cha. Nabe ñi maig taigwan marar cha. Kurra, wamisra na kemøra srua arrigwan ma chibig køn. Tru mayanguen tabig nebuig kømigwan nayasig Tiuswan miaben na utønrrab— cha.

²⁰ Inchen Isaache nui nusrkawan trenchibig køn:

—Nai nusrkai, ¿Mandø incharre malla wetørragu?— cha.

Inchene Jacobpe trenchibig køn:

—Jehová ñui Tiusbe nan petø wetørramig purugutan— cha.

²¹ Inchen Isaache Jacobwan trenchibig køn:

—Nai nusrkai møyimbe kemall cha, na katøranrrumøen cha, isa kømø, nai nusrkai Esaú køtamøtrab cha kabe peg kuin kui.—

²² Inchen møykai Isaacwan Jacobpe kemallen, nøybe katørawabe, trenchibig køn: —Wambe Jacobwein købendø, tasiimerabe Esaúwein købwain inndan — cha. ²³ Pøs nøybe møyig kui møytrab kaimabig køn, kaguende tasiimerabe Esaúwei tasiimera lataig isiteelø køben. Incha mayanguen tabig nebuig kømigwan yandø ke trantrab inchabe,

²⁴ Isaacbe katøle payibig køn: —¿Ñigan isa kømø, nai nusrkai Esaú køtirru?— cha.

Inchen Jacobpe:

—Nabe truwein kur— chiben, ²⁵ Isaacbe trenchibig køn:

—Ñi kemøra srua arrigwan na manrrab srua attra cha, na ñun mayanguen tabig nebuig kømigwan tranrrumøen— cha. Inchen Jacobpe mamigwan srua kemallen, Isaacbe mabig køn. Incha katø vinogucha srua arruben, trunungucha muchibig køn. ²⁶ Inchen Isaacbe nusrkawan trenchibig køn:

—Nai nusrkai, møyimbe kemalla, nan mucharra— cha.

²⁷ Inchen Jacobpe kemalla, muchaben, Isaacbe tru nui nusrkai kewa pasrailan irrømøra, mayanguen tabig nebuig kømigwan tranø trenchibig køn:

—Nai nusrkaimbe wambigwansrø chi købigwan Jehová mayanguen tabig kønrrai mari lataig irrabig køtan cha. ²⁸ Tiusbe tru ellmariløyu srømbalarøngurri serenu peñibzhigwan tranrrun cha. Inchen pirøybe misrampurab misren, tirigumera misrøb, vinomeragucha nørrø weguchib inchun cha. ²⁹ Tru misag sötømera nørrø pønrrabeløbe ñun utsøbartrun cha. Inchen ñibe ñui nunelane ñi karubig kønrrig cha. Inchen truiløbe ñui merrab utsøbartrun cha. Ñun ‘trømbøyig nebunrrain’ chib pønrrabeløbe, nøm trømbøyig nebuilø kønrrun cha. Inchen ñun ‘tabig nebunrrain’ chib pønrrabeløbe, nøm tabig nebuilø kønrrun— chib.

³⁰ Inchen Isaac tru mayanguen tabig nebuig kømigwan Jacobwan chab tranen, Jacobpe møykaweinkurri webiben latatø, nuneg Esaúbe wambigwansrø usha kemøøb uña pupt-inchibig køn. ³¹ Incha nøygucha kan mamig mayzhig tamara, nui møykaweimay srua arruabe, trenchibig køn:

—Nai papá, wamisr cha. Na ñui nusrkai kemøra srua arrigwan manrrig cha, ñi nan mayanguen tabig nebuig kømigwan nayasig Tius nan tranrrai miarrunrrig — cha. ³² Inchene Isaac møykaimbe trenchiptinchibig køn:

—¿Trube, ñibe mugugu?— cha.

Inchen nøybe:

—Nabe tru Esaú ñui mayur nusrkain kur— chiben, ³³ Isaacbe itønab menda, purø kørrø kwaarig, trenchibig køn:

—¡Paare! ¿Trube muguig køh? cha, tru usha kemøra srua arrubiibe. Pøs, ñi arrumøwatø, srua arruben, nabe kerrig chab maig køn cha. Incha nabe mayanguen tabig nebuig kømigwan nun chab tranig køn cha. Pøs, tru mayanguen tabig nebuig kømigwan tranigwane nøybe tøga kørrømisrtrun— cha.

³⁴ Inchen Esaúbe møykai trendaig wamwan møyabe, truba mur wamab trashib, purø kørrø isui inchib ¡karren kønrrab! chib kishibig køn, trenchib:

—Nai møykai, tiusmanda nangucha tru mayanguen tabig nebuig kømigwan tranrra— cha.

³⁵ Inchen Isaacbe trenchibig køn:

—Ñui nunebe arrua, nane purø may isa, tru mayanguen tabig nebuig kømig ñuin kønrrabigwan nøy uta, tøga, yan— cha.

³⁶ Inchene Esaube trenchiptinchibig køn:

—Nune Jacob cha wamappe, trendambuawei trendaig kuin køn cha. Pamayguen køn cha, nan øyeeg isa kebenøsrøb arrig, srøtøbe na mayur nusrkain kuimburo na uta tøyagømigwan nøy kerraig køn cha. Møyimbe tru mayanguen tabig nebuig kømig naiwan katø nøywei uta tøga yain køn— cha.

Inchabe katø trenchibig køn:

—¿Nayasikkan tru mayanguen tabig nebuig kømigwan tranamig maitøguen tøyagømøtirru?— cha.

³⁷ Inchen Isaacbe trencha løytabig køn:

—Nabe ñune Jacob karub tøyagønrrai Tiuswan miar cha. Incha katø nui misaamerabe Jacob manchiben marøy melabelø kønrrai miar cha. Trurrigu nøybe tirigumera nørrø tøyagøb, vinomera tøyagøb inchai miar cha. Nai nusrkai, ¡Møyimbe yandø ñuyasiibe chi maramig kaatan!— cha.

³⁸ Inchen Esaúbe møykawan trenchibig køn:

—Nai mōskai, tru mayanguen tabig nebuig kōmigwan tranamiibe kabe ke kanzhiitō kuig kuitarru cha. Nai mōskai, nangucha tru tabig nebuig kōmigwan tranrra — cha. Incha srawa, srawaa kishibig kōn.

³⁹ Inchene Isaache trenchibig kōn:

—Ñibe misrōb pirōmerasrōngurri purō yabsrō tsunrrabguen cha, katō srōmbalasrōngurri serenu peñibig nebumōsrō.

⁴⁰ Ñibe ñui espadatōga kwayawatōwei ōsig tsunrrabguen cha. Incha ñibe ñui nuneg karuindiig megamig nebunrrun cha.

Inchendō ñun megamgaig misrōb arruben, ñibe truyugurri welulrrabguen— cha.

Jacob Esauwan Kōrab Lulamig Nebub

⁴¹ Indig truyugurrimbunō Esaube Jacobwan purō trōmbōig ashig kōmui inchibig kōn, nui mōskai tru mayanguen tabig nebuig kōmigwan nun tranikkurri. Incha nōasitōwei trenchibig kōn: “Maya yanayutō namui mōskai pinōben, larrō isuin pōnrram kwalōmmeragucha attrun cha. Yandō trugurrimbe si, pinisamōnrrun cha, nai nuneg Jacobwan.” ⁴² Inchen Rebecabe tru Esaū ōyeeg martrab isub unigwan wammōrabe, Jacobwan wamōnrrab ōra, trenchibig kōn:

—Ñui nuneg Esaube ñun nōgucha lata martrab ñune kwetchab tan cha. ⁴³ Inchawei nai nusrkai na maig taigwan mōra mar cha. Nai nuchag Laban Haran pirau tsuisrōmay trubab inrrō chibig kōn. ⁴⁴ Trusrō kan maya yana kōsrōn tsunrrig cha, ñui nunewan namig kōbig purayamne. ⁴⁵ Ñui nunewei namig kōbig yandō patsab, tru ñi nun chi mariilan nō pesannabene, ñibe katōle attrai, trube, eshkawa ōramōnrrun chibig kōn. Nai pagatō nusrkalan ke kan kwalōmyutō parba pini asha wag kōmōtan— cha.

⁴⁶ Incha Rebecabe Isaacwan trenchibig kōn:

—Nabe nai ōsig unigu larrō trōmbōig kui uñar cha, tru hititas ishumburmeragurrindō. Jacob yu Canaán pirau hititasmeraba kasharabene, chinchib ōsig tsumuinguen kōnrrautan— chibig kōn.

28

¹ Isaache Jacobwan wama, mayanguen tabig nebuig kōnrrai tranabe, trencha karubig kōn:

—Nui srain kōnrrai yu Canaán pirau ishumburmeran lanrrab kōmō cha. ² Kurra, Padan-Aram pirausrōmay inrrō cha, tru Betuel ñui usrai mōskai waisrōmay. Incha ñui kuchimōskai Labanwei kan nimbasrwan ñui srain kōnrrai lanrrig cha. ³ Inchen Maramburab Marōb Tiusbe ñune mayanguen tabig nebuig kōnrrai mara, ñune ureg larrō nōrrō tōgagōnrrai tranōb, ñuinukkurri purō nōrrō misag sōtōmera nemisramnegatig martrun cha. ⁴ Katō Abrahamwan tru mayanguen tabig nebuig kōnrrai tranrrab misrig kōbigwan ñunba, ñuinukkurri amrrub misaameranba ñun tranrrrain cha. Tru mōiya ñi peesrōngurri ka arruatō lataig tsuin pirōwan ñimui mara waramig kōnrrai, tru pirōwan Abrahamwein kōnrrai Tius nun keta tranrrabmisra kōrrōmisrig kōbigwan.—

⁵ Ōyamay Isaache Jacobwan Padan-Aramsrōmay inrrai ōrig kōbig kōn, tru Betuel arame-ōwei nusrkai tru Labanwei yausrōmay. Truibe Rebecaimbe nuchag kōbig kōn, Jacobweimba Esaūweimbabe usrin kōben.

⁶ Inchen Esaube wammōrōbig kōn, mōskai Isaache tru mayanguen tabig nebuig kōnrrai tranōb, sraingucha lappe, Padan-aramsrō lanrrai chiben. Incha tru mayanguen tabig nebuig kōmigwan mōskai tranabe, ōyeeg karua pasri ashibig kōn: “Yu Canaán ishumburmeran ñui srain kōnrrai marōb pasōnrrab kōmō” cha. ⁷ Inchen Jacobe mōskawanba usranba mōra, Padan-Aramsrōmay yai ashibig kōn Esaube. ⁸ Incha treekkurri nui mōskai Isaache tru Canaánsrō ishumburmerane chigucha tab kōmui ashibig kuin kui wetōbeña. ⁹ Esaube Abrahamwei nusrkai Ismael tsuisrōmay ya, tru katōgan sralō kōmnetō, trusrō Mahalatwan nui srain kōnrrai marōbig kōn, tru Abrahamwei nusrkai Ismaelwei nimbasrwan, tru Nebaiotwei nuchawan.

Tius Jacobwan Betelsrō Kenamistrō

¹⁰ Inchen Jacobe Beersebagurri webya, Haran pirausrōmay ibig kōn. ¹¹ Inchen yandō kanbalō puabe, pōrr pinaiben, truyu yem kōrrōmisrōbig kōn. Incha truyu kan srug tsubigwan kuña mara trarra, truyu kinrrab tsumisrōbig kōn. ¹² Inchen truyu nun piappe treeg piabig kōn: Kan escalera, srōmbalasrōngurri pirausrō punōsrkain pasrappe, tru kappe srōmbalasrō kebacha pasrōben, mōimbe truwane angelesmera nebambamba, kōrrōrumba inchib kōben, ¹³ Jehovábe palasrō pasrōwabe, trenchibashib:

—Nabe Jehová kur cha, Abraham ñui aweluwei Tius, Isaac ñui mōskawei Tius, ñi uyu kib tsuig pirōwane ñunba, ñuinukkurri amrrub misaameranba tranamōnrrun chib.

¹⁴ Ñuinukkurri amrrub misaamerabe purø norrø køptø, pirau kan usrø tui lataig kønrrun cha, pørr pinebgatømaywansrø, pørr neeshibgatømaywansrø, walligebwansrø, waguebwansrø, misag larrøbicha warønrrun cha. Ñui yellyugurri pirau muba kuimburab maya misaabe, ñigurri mayanguen tabig nebuilø kønrrun cha. ¹⁵ Nabe ñiba pasrar cha. Ñi chu yaindøgucha nabe ñun chi kømønrrai ashib tøga pasrøwa, katøle i piraumay nabe ñune pera arrumønrrun cha. Na ñun maig martrab taigwan na trunun maramnegatig nabe ñune elachimumønrrun— taig køn tru piabyube.

¹⁶ Inchen Jacob tru piab tsuigugurri kiagasrabe, trenchibig køn: “Isa kømø, Jehovahé yu pasrøben, nabe treeg kuitamappe isumubrain køn” cha. ¹⁷ Incha truba kørig kui inchabe, trenchibig køn: “Yube si, purø kørig kømdiig køtan cha. Chi peg kømøtø, Tiuswei yaba, srømbalasarø yaskappa køn” cha.

¹⁸ Inchen Jacobpe løtsøzhig kurrabe, tru nø kuña mari srugwan kusrua, kan pilar lataig øneb pasra, truyu øyeeg puigwan aschai trubala aceite itølushibig køn. ¹⁹ Incha truyube Betel cha wamabig køn, merrabsrømbe tru ciudadane Luz cha wamig købig kuindøgucha.

²⁰ Incha Jacobpe nuinetø øyeeg martrab cha kørrømisrøbig køn: “Tius naba lincha pasrab, na møi øyeeg inrrab yaigu nan chigucha kømønrrai ashib, nan mamig, mutsamig tranøb, pula pasramig tranøb, ²¹ katø na nai møskawei yausrø chigucha kømø, katøle pishindø tab ka puinabene, Jehovahé nai Tius kønrrun cha. ²² Inchen i srugwan kan pilar lataig ølgandø na kusrua pasribe, Tiuswei ya kønrrun cha. Inchen Tius nan chigurrimbunø tranigugurri nabe cienyu diezbatø, diezbatø nun tranamønrrun” chibig køn, Jacobpe.

29

Jacob Haran Pirausrø Puig

¹ Jacobpe nø chu yamsrømay ib ya, pørr kal-labgatømaywan misaamerain pirausrø pubig køn. ² Incha trusrø pua ashene, tru wambigwansrømbe kan pisu wabig køn. Inchen tru pisu pulube ubishamera pøn sötø israb warabelø køn, kaguen truiløbe tru piwan muchibelø kua. Inchen tru pisube larrø nõ srutøga kasraig pasrabig køn. ³ Inchen tru ubisha sötømera truyu mayamba tuluntsunøbene, ubishameran pi mutsøsrønrrab tru srugwan malsra, katø chab muchene, srugwan katøle kemalsra pisuwan kasrøbelø køn. ⁴ Inchen Jacobpe tru ubisha ashibelan:

—¡Nai nunelø! ¿Ñimbe chuelø køgue?— cha payene:

—Nambe Haransreelø ker— chiben,

⁵ Jacobpe katøle trencha payibig køn:

—¿Nacorwei awelu Labanwan ñimbe ashibelø kømøgueh?— cha.

Inchen nømbe:

—Truigwane nambe ashibeløwein ker— chibelø køn.

⁶ Inchen Jacobpe:

—¿Kwanrø kømø, tab ka tsubig kuitarru?— cha katøyug payibig køn.

Inchen tru ubisha ashibeløbe trenchibelø køn:

—Nøbe tab ka tsubig køn cha. Au, ñiguen ash cha, møskawei ubishameran merrana nimbasr Raquelbe uyu arrun— cha.

⁷ Inchene Jacobpe trenchibig køn:

—Kwalømdø srø køn cha. Ubishameran kanbalatø mara keramibe menrra tørbatø køn cha. Pi mutsøsrø, pu manrrai katø merranamdiig kømuita— cha.

⁸ Inchen truiløbe trenchibelø køn:

—Treeg maramgaig køn cha, maya ubisha sötømera kerrigu kanbalatø misramne, tru ubisha ashibelø, tru pisu pala srug trarrig tsubigwan malsramne. Malsrøbendøwei ubishameran nambe pi mutsøsrøbig køn— cha.

⁹ Inchen Jacob truiløba waminchib pasramne, Raquelbe møskawei ubishameran merrana, arruptinchibig køn, kaguende ubishameran nø ashibig kua.

¹⁰ Inchen Jacobpe tru nui usraimbe nuchag Labanwei nimbasr Raquelwanba, katø tru Labanwei ubishamera arri ashabe, kemalla, tru pisuyu srug kasraig tsubigwan malsra, nui kuchimøskai Labanwei ubishameran pi mutsøsrøbig køn. ¹¹ Incha trugurrimbe Raquelwan muchawabe, truba truba kishibig køn.

¹² Incha nøbe:

—Rebecai nusrkain kur’ cha. Labanweimbe kuchiunø kur— chib waminchen,

Raquelbe nui møskawan eshkanrrab luløbig køn. ¹³ Inchen Labanbe tru nui nuchawei nusrkai Jacobweimburab wamindi mørøppe, katønrrab luløb ya, ira, muchawa, nui yamay pera ibig køn. Inchen Jacobpe nun chitø purayaigwan kerriguh eshkabig køn. ¹⁴ Inchen Labanbe trenchibig køn:

—Ñibeguende nai anindøwein køn— cha.

Jacob Leaimba Raquelweimba Marøb Megaig

Inchen Jacobpe yandø Labanba pølguen tsuben,¹⁵ Labanbe nune trenchibig køn:

—Ñi nai yauig kuimburoø chi pagaramíig ka mara tranøptø megamig kømøn cha. ¿Mayanzhig pagaramø?— cha.

¹⁶ Inchen tru Labanbe nimbasrmera pagatø tøgag købig køn, mayurbe Lea købene, wendiibe Raquel. ¹⁷ Leabe kammera larrø tabzhig ashíbig købene, trune Raquelbe larrø tab malø pasraig, larrø tab ishuzhig købig køn. ¹⁸ Incha Jacobpe Raquelwan purø chull asha, nui kuchimøskawane trenchibig køn:

—Ñui wendø nimbasr Raquelwan nai srain kønrrai ñi tranamwei trattrø y pa pila ñuyasig mara tranøb megarrumøn— cha.

¹⁹ Inchene Labanbe trenchiptinchibig køn:

—Asiimíigwan tranøbgunrriibe ñi yauigwan tranrumøn cha. Trube, naba kørrømisr— cha.

²⁰ Øyamay Jacobpe trattrø y pabila Raquelwan tranamwei mara tranøb megabig køn. Nøbe Raquelwane purø chull asha, megaig køppe, nune ni kan maya yanaguen kømub lata inchibig køn. ²¹ Yandø Jacobpe pilamera trattrø y par nemisrene, Labanwane trenchibig køn:

—Maya yana mara tranøb meganrrain taigwan yandø nemaran cha. Møimbe nai srai kønrrai tranrra— cha.

²² Inchen Labanbe truyu maya misaameran tulamrrai wama larrø tab fiesta marøbig køn. ²³ Indiibe yandø yem misren Labanbe nui nimbasr Lean pera arrua, Jacobwane truigwan tranøptinchen, Jacobpe pera kibig køn. ²⁴ Inchagucha Labanbe kan karuig mendig megabig Zilpa taigwane Lean purugub meganrrai tranøbig køn.

²⁵ Indiibe løtsøbe, Jacoppe Leaba kib tsuptinchibrain kui ashíbig køn. Incha Jacobpe Labanwane trenchibig køn:

—¿Øyeebe nane ñibe chi margu? cha. ¿Yamba Raquelwan tranamwei nabe ñuyasig marøb megaig kømuitaru? cha. ¿Nane chindimbarre øyee isa kebenøsrkugu?— cha.

²⁶ Inchene Labanbe trenchibig køn:

—Nam waraim piraube kasharanrrai wendiigwanmerrig tranamig kømøn cha, mayur-guen ka tsumnetøbe. ²⁷ Leaba tru kasharabyu tabig mab kasrag waramigwan trune neigwan patsøgø chibig køn Labanbe. Trugurrimbe Raquelwangucha tranrumøn cha, trattrø y pa pila ñi nayasig katøle srøig marøb meganrrab købene.—

²⁸ Inchen Jacobpe treeg marøbig køn. Incha tru Leaba tru kasharabyu tabig mab kasrag waramigwan tru trune neig maramigwan chab nemarene, Labanbe Raquel nui nimbasrwan srain kønrrai tranøbig køn. ²⁹ Inchen Labanbe kan karuig mendig megabig Bilha taigwangucha Raquelwan purugub meganrrai tranøbig køn. ³⁰ Inchen Jacobpe Raquelbagucha kibig køn. Incha truigwane Lean lataguen kømø, masken undaarabig køn. Incha Labanweyasig katøgucha srøig trattrø y pa pila mara tranøb megaig købig køn.

Jacobwei Nusrkalø

³¹ Jehovahé Leane Jacobpe ke palabinø indi ashabe, truigwane ureg tøgagønrrai tranøbig køn. Trune Raquelbe urekkaig kønrrabig købig køn. ³² Incha Leabe kwanrriig kørrømisra, kan nusrkai tøgagua, truigwane Rubén munchi pasrøbig køn, kaguende nøbe trenchibig køn: “Na yeekkucha isui megaben, Jehovahá nan isua ashtan cha. Møimbeguende nai keebe nan undaarannrautan” cha.

³³ Incha katøle kwanrriig kørrømisra, katø kan møg unø tøgaguig køn. Inchabe trenchibig køn: “Jehovábe mörin køn cha, nan øyee undaaramuinab megaigwan. Inchagurri i nusrkawangucha nan trandan” cha. Treekkurri truigwane Simeón munchi pasrig køn.

³⁴ Incha katøle kwanrriig kørrømisra, katø kan nusrkai tøgagua trenchibig køn: “Møimbe nai keebe naba mas trakkandø linchautan cha, kaguen nabe nune chabguen pøn nusrkaløguen tranar” cha. Inchagurri truigwane Levi munchi pasrøbig køn.

³⁵ Incha Leabe katø kwanrriig kørrømisra, katø kan nusrkai tøgaguig køn. Inchabe trenchibig køn: “Møi iyube Jehovaháwan mayanguen tabig wamindamønrrun” cha. Inchagurri truigwane Judá munchi pasrøbig køn. Incha trugurrimbe yandø kan maya yana køsrøn mas ureg chigaa guig køn.

30

¹ Raquelbe Jacobwei ureg tøgagønrrab kaimappe, numøsrwane truba pusrkwai asha, Jacobwane trenchibig køn:

—Ureg tøgagønrrab tranrra cha, tren kømuisruandø nabe kwamønrrun— cha.

² Inchen Jacobpe truba nama, trenchibig køn:

—¿Nagan Tius kuitarru cha, ñun chi ureg chigaiig kønrrai marøbiibe?—

³ Inchene nøbe trenchibig køn:

—Bilha, nai karuig mendig megabigwan na ñun tranar cha. Truiba ki, chibig køn. Inchen truig ureg tøgamisren kal-laben, nai srøbchagu mutikkurrimbe na tōga misri lataitøweih køben, nabe nøgurri ureg tōgaig kømønrrun— cha.

⁴ Øyamay Raquelbe tru nui karui megabig Bilhan Jacobwan srai lataig kønrrai tranøbig køn. Inchen Jacobpe tru Bilhaba kibig køn. ⁵ Inchen Bilhabe kwanrriig kørrømisra, Jacobwei kan nusrkai tōgaguig køn. ⁶ Incha Raquelbe trenchibig køn: “Tiusbe naimburab maig maramigwan sølgandø martan cha. Incha nai miaigwan mōra, kan nusrkai trandan cha. Treekkurri Incha Raquelbe tru unane Dan munchi pasrig køn.

⁷ Tru Bilha Raquel karui mōrøb megabiibe, katø kwanrriig kørrømisra, Jacobwei katøgan nusrkai tōgamisrig køn. ⁸ Incha Raquelbe trenchibig køn: “Tius namun øyeeg kønrrain kuikkurri nabe nai numøsraimba purø murtø melambuyab megawa, na kanar” cha. Treekkurri Raquelbe tru unane Neftalí munchi pasrig køn.

⁹ Inchen Leagucha yandø mas ureg tōgagønrrab kaimappe, nui karuig mendig megabig Zilpan pera arrua, Jacobwan tranøbig køn, nui srain kønrrai. ¹⁰ Inchen tru Zilpa Leai karuig megab ishuube, Jacobwei kan unø tōgamisrøbig køn. ¹¹ Inchen Leabe trenchibig køn: “Yangucha tabig pub attrabigwan tōgaguinatan” cha. Incha treekkurri Gad munchi pasrøbig køn.

¹² Inchen Leai karuig mendig megabig tru Zilpabe Jacobwei katøgan nusrkai tōgaguig køn. ¹³ Incha katø Leabe trenchibig køn: “Nane larrø kasrag kōtan cha. Ishumburmerabe: ðkan yangucha tabgui unamigwan tōgaguital!” chinrrautan cha. Treekkurri tru unane Aser munchi pasrig køn.

¹⁴ Tirigu parøb kwalømmerawan Rubenbe wambigwansrø llirab yabe, mamig trulmera mandrágoras tailø wetørrawa usri Leayasig lurra, srua arrubig køn. Inchen Raquelbe Leane trenchibig køn:

—Tiusmanda, ñui nusrkai tru mandrágoras tailø srua arriilan srøttra— cha.

¹⁵ Inchene Leabe trencha løtabig køn:

—¿Ñibe nai kewan yeeg kerrawa pasraptōga ñungan chigucha kømui lataig mōrøraitarru? cha. ¿Møimbe nai nusrkai mandrágoras srua arriilangucha nan kerranrrab indirru?— cha. Inchene Raquelbe trenchiptinchibig køn:

—Tru ñui nusrkai mandrágoras srua arriilan na merranrrur cha, truburø mōi yem Jacobpa ñi ki pøs— cha.

¹⁶ Inchen yandø maaben køben, Jacob wambigwansrø uña katø arruben, Leabe katønrrab webyabe, trenchibig køn:

—Mōi yembe ñibe naba kiamig kønrrab køn cha, kaguen nai nusrkai mandrágoras srua arriitōga nabe Raquelwan pagarawa, truburø mōi yembe nabe ñiba kiamig køn— cha. Inchen tru yembe Jacobpe Leaba kibig køn.

¹⁷ Inchen tru Lea miab megaigwan Tius mōren, Leabe kwanrriig kørrømisra, trattrogatø kønrrabyu nusrkawan Jacobwei tōgaguig køn. ¹⁸ Incha Leabe trenchibig køn: “Tiusbe tru na pagaraikkurri nan keta trandan cha, kaguende nabe nai karuig mendig megabigwan nai kewan tranig kua” Incha treekkurri unane Isacar munchi pasrig køn. ¹⁹ Incha Leabe katø kwanrriig kørrømisra, Jacobwei katøgan nusrkai tōgaguig køn, truibe tru trattroy kanba kønrrabyu nusrkawan. ²⁰ Incha Leabe trenchibig køn:

“Tiusbe nane purø tabigwan keta trandan cha. Møimbe nai keebe naba kørrømisra uñchun cha, kaguende nabe trattroy kanba Jacobwan nusrkalø tranar” cha. Incha tru nusrkawane Zabolón munchi pasrig køn.

²¹ Incha trugurrimbe Leabe kan nimbasr tōgagua, truigwane Dina munchi pasrig køn.

²² Inchendø Tiusbe Raquelwan isub tōga wawa, nø miab megaigwan mōra, ureg kønrrai tranig køn. ²³ Incha nøbe kwanrriig kørrømisra, tru srøsrø nusrkawan tōgamisrabe trenchibig køn: “Na chi urekkaig tsaløbala indinab unig købigwan trunun mōimbe kerratan” cha.

²⁴ Incha treekkurri trunune José munchi pasrabe, trenchibig køn: “Jehová nan katøgan nusrkai tranrra chimubraitā” cha.

Jacob Puamisrøb

²⁵ Yandø Raquel Joséwan tōgamisren, Jacobpe Labanwan trenchibig køn:

—Na tsuig købig tru pirausrømay inrrab, ibashcha cha. ²⁶ Nai sralan tranrra cha, na truilaimburab mara tranøb megaïlan, nai nusrkalanba, nan yandø ibashcha chibig køn, kaguende nabe ñuyasig yeeg marøb megaigwan ñibe asha køn— cha.

²⁷ Inchen Labanbe trenchibig køn:

—Ñuin kabyu na tabig asønainabene tiusmanda naba ka kørrømisra cha. Pøs Jehová nan øyeeg tabig nebul attrai mariibe ñigurri øyeeg kuin kui nabe tōrgandø wetøbeña pasrar cha. ²⁸ Incha eshkarra chibig køn: ñi maya pagar utønrrab isuigwan, nabe treegwan pagaramønrrun— cha.

²⁹ Inchene Jacobpe trenchibig kòn:

—Ñibe ashibig kòn cha, nabe ñuyasig yeeg marøb megaigwan. Incha ñui ushameran nabe yeeg tab ashib tøgaguiwan. ³⁰ Kaguendø na yu marøb meganrrab arrumøwatøbe ñibe trengatig nõrrø tøga kømuiq købig, mømibe yeeg nõrrø nemisran cha, na yu puikkurri Jehovahbe ñune mayanguen tabiitø nebuig kònrrai maran cha. ÿInchendø nai ureemeraimbe nabe mana marøb pølbasmø?— cha. ³¹ Inchene Labanbe trencha payibig kòn:

—¿Ñun chi tranamø?— cha.

Inchen Jacobpe trenchibig kòn:

—Chigucha tranmørrunrig cha. Na ñun øyeeg martra taigwan ñi tregwan martrab misrene si, nabe ñui ubishameran ashibig asamønrrun cha. ³² Nan mõi ñui maya ubisha sötø utuwan pureb arruben, tsurø ubishameranba, rayas tøga ubishameranba, yalø ubisha— ureemeranba, katø maya cabra— ureezheelø tsureelanba rayas tøgarmenanba, ñi tarømarømarøb inrrig cha, Nai pagarbe truilø kønrrun cha. ³³ Pøs Srønna trumarsrø tru na kanab megaigwan ñi ashchab arruben, tab marigwan kenamartrabibe truiq kønrrun cha. Kabe kan ubisha kui, kabe kan cabra-unø kui rayas tøgar kømøwei, tsureelø kømøwei, kabe kan ubisha-unø yalig kømøwei, tru utu ñi treelø wetørrappe, trube, nabe ñuyelan nilab megaig kønrrun— cha.

³⁴ Inchene Labanbe trenchibig kòn:

—Ñi trendaig tab kòn— cha. Labanbe treeg kørrømisrøbig kòn.

³⁵ Inchen Labanbe tru kwalømdøwei møg cabramera sinda tøgarmenanba, tsureelanba, katø pullig tøgarmenanba chishtø, katø yalø ubisha-ureemeran kerriguba tarømara, nusrkalai tasku ashchai pønrsøbig kòn. ³⁶ Incha tru ubisha sötømerane Jacob tsuisrøngurri pøn kwaløm ambiisrø srua ambubelø kòn, nõm waraisrø. Trune Jacobpe nuimburappe Labanwei katøgan ubisha sötømeran ashib tsubig kòn.

³⁷ Incha Jacobpe alamo srarmeranba, almendro srarmeranba, palanda tusrwanba para, trugurrimbe kaluswan karrøbig kòn, pulø sindazhig kena kønrrai. ³⁸ Inchabe tru tsig karrilane tru ubishamera pi muchig kemalinug pønrsøbig kòn. Incha ubishamera wambi-imisar tru pi mutsinug pubene, ³⁹ tru carneromerabe ubishameran truyu nesraløbelø købig kòn. Incha tru tsig karra pønrsrainug nesralig kuig køppe, ubishamera lluiløbe rayas tøgarmena køben, tsureelø køben, pulig tøgar køben, llubelø kòn. ⁴⁰ Incha Jacobpe tru ubisha-ureemerane nõrømara, Labanwei ubishamerayu rayas tøgarmenanba yaleelanba Jacobpe ñui ubisha sötømerayu keerøb ibig kòn. Incha yandø nyuasig ubisha sötømera kønrrai marøb ibig kòn. Labanweimba kanbalatø kømøtø. ⁴¹ Incha tru mas werus asr tøga ubishamera wambiimisa pønrraimørig, Jacobpe tru tsig karrilan ubishamera pi muchib kemalinug pønrsøbig kòn, tru ushameran pinrøgue. Tru tsig karrig pønrsrainan ashib nesraliilø kønrrai. ⁴² Inchen tru tre asrka ushamera wambiimisa amrrubene, tru tsimeran pønrsømfig kòn. Inchagurri tru Labanweimbe tre asrkazheelø køben, tru mas werus asr tøgarmena larrø chisheløbe Jacobwein købig kòn. ⁴³ Incha Jacobpe larrø puaiq misrig kòn, ubisha sötømera lata, karuig mendig melab møguelø lata, ishumburmera lata, camellosmerna lata, burrusmera lata purø nõrrø tøgaiikke

31

¹ Jacobpe Labanwei nusrkalø øyeeg chib amønaigwan wam mørøbig kòn: “Jacobpe namui møkaweian kerriguba nõ tøgamisrøb kebya, truitøga mømibe larrø puaiq misrin kòn” chib kui. ² Inchagucha Jacob Labanwei maløwan ashene, maløbe ke mindiitø uñibig kòn, merrabwan lataig kømøtøgue. ³ Inchene Jehovahbe Jacobwane trenchiptinchibig kòn: —Merrabsrø ñui kølli misamerai pirausrømay katø inrrø cha. Ñui nammisaamera waraisrømay, nabe ñiba pasramønrrun— cha.

⁴ Inchen Jacobpe Raquelwanba, Leanba wamabig kòn, tru nõ ubishameran ashib tsisrømay amrrunrrai. ⁵ Inchabe nõmune trenchibig kòn:

—Ñui møkaimbe nan merrabwan lataig kømøtø, maløbe ke mindindø, mindindø uni ashar cha. Inchendø nai møkawei Tiusbe naba pasraig kòn chibig kòn. ⁶ Ñimbe ashibelø kòn cha, nabe ñimui møkawan na maya chish kuimbura chish kuitøga nabe mara tranøb megaig kòn cha.

⁷ Inchen køben ñui møkaimbe, treeg martrab chib treeg martrab chib marmuig kòn cha nai pagarwan ke pa tratrø piejes yunømarøb. Inchen køben Tiusbe na chi tøgaguiwan Laban kaig marmønrrai nan sötø pasraig kòn cha. ⁸ Nøbe, “Ñui pagarbe tsurø ubishamera kønrrun” chibeneh, trube, ubishamera lata, cabramera lata mayamba tsurø ureezheelø llubelø kòn cha. Inchen: “Ñui pagarbe sindaba ubishamera kønrrun” chibeneh, trube, ubishamera lata,

cabramera lata truiløgucha mayamba sindaba ureezheelø llubelø køn cha. ⁹ Øyamay Tiusbe ñimui møskawei ubishameran lata cabrameran lata nørøø kerrawa, nan tranig køn cha.

¹⁰ Indiiibe kan pijibe ubishamera lata cabramera lata wambiimisra pønrrøben, nan piappe, treeg piatan cha: tru møg cabrazheelø cabrameran nesraløbeløbe sindabar køben, tsureelø køben kagømønrraindø tsurøzheelø køben treelø købashib.

¹¹ Inchen tru piabyube Tiuswei ångelbe nane trenchitan cha: “Jacob” cha. Inchen nabe trendainatan cha: “Nabe yu war” cha. ¹² Inchen nøbe nane trenchitan cha: “Ñiguen tab ash cha, tru møg cabrazheelø cabrameran nesraløbeløbe, sindabar køben tsureelø køben, kagømønrraindø tsurøzheelø køben, treelø køn cha. Nabe ashibig kur cha, Labanbe ñune maitø marøb arrigwan. ¹³ Nabe ñi tru srugwan aceite itølusha katø ñi ñuinetø øyee martrab cha kørømisrinug tru Betelsrø kenamisrøb Tius kur cha. Møimbe kurra, i piraugurrimbe webya, ñi kal-lain pirausrømay katø inrrø” cha, nane trenchitan— cha.

¹⁴ Inchene Raquelba, Leababe trencha løtabelø køn:

—Nambe yandø namui møskaweinuube chi ketig utamibe chiga ker cha. ¹⁵ ¿Pøø, namune ka mendailø kui lataig indig kømuitarru? cha. ¿Namune nøbe yana, truburø mara tranøb megaigwane nø chishtø maig kømuitarru? cha. ¹⁶ Inchawei nø purø nørøø tøgaguilan Tius namui møskawan kerrawa ñun traniløbe, kerriguba namuimba, namui nusrkalaimba kuig købene, møimbeTius nø maig mar taigwane ñibe kerrigu treeg mar— chibelø køn.

Jacob Padan-Aramsømay Ib

¹⁷ Inchen Jacobpe tamarøb menda, nui nusrkalanba, nui sralanba camellosmerayu itøguanøøra, ¹⁸ nui ushameran kerrigu merranøbig køn, katø tru nø Padan Aramsrø chig-urrimbunø tøgamisriilanbañau. Incha Canaán pirausrømay ibig køn, katøle nui møskai Isaac tsui pirausrømay.

¹⁹ Inchen tru Labanbe nørøøsrø ubisha isig partrab yaig mugaabenbatø Raquelbe tru yau yau tøgagui tiusmeran søra wesrain købig køn. ²⁰ Øyamay Jacobpe tru Laban arameowane tru webya yamigwane chigucha mørø waminchmøtø, nilø purø may welula ibig køn. ²¹ Incha Jacobpe nø kerrigu chi tøgaguilan srua, ashmøwatø welula ya, Eufrates nu piyu chab larrayabe, trugurrimbe Galaad tun ureemeragøba pirømerawansrø inrrab ibig køn.

²² Indiiibe pøn kwalømyube Labanwane eshkaptinchibelø køn: “Jacobpe welula, yain køn” cha. ²³ Indig Labanbe nui nammisaameran lincha pera, Jacobwan wetøgønrrab pasreb mendabig køn. Indigbe trattrø y pa kwaløm puraiiben tru Gaalad pirau tunmerasrø chab wetøgøb ibig køn.

²⁴ Inchen tru yem tru Laban arameowane Tiusbe kan piabyu kenamisra, trenchibig køn: “Isuptø mar cha. Chigøben martrumøn chib tsag, tsag waminchab kømø.”

²⁵ Indig Labanbe Galaad tunmerasrø wetøgøbig køn, tru Jacob nui yaueløba kørøømisriisrø. Incha Labangucha trusrøndøwei nui nam misaameraba kørøømisrabe,

²⁶ Jacobwane trenchibig køn:

—¿Chi mara pasrøgu? cha. ¿Nane chindimbarre øyee may kebenøsrkøgu? cha. Kan ñigui nai nimbasrmerane kwayabyu kemøri ishumburmeran kui lataig srua yaitan cha.

²⁷ ¿Chindimbarre nane øyee kebenøsrkøb, trubatø nilø welula igu? cha. Nane chigucha eshkamøtøbe. Nan eshkaig kuimbeh, tab amrrigay cha, kantab, palø ichib, arpa kønab kasraatø ñimun treeg ungua cha ørøbsrubraig kuinrrun cha. ²⁸ Ñibe nai awelu ureemeran nai nimbasrmeran ungua cha muchanrrainguengaig maritan cha. Ñibe møimbe ni kan chuguinguen mørmiig lataig marin køn cha. ²⁹ Pøø nabe ñun chi marøg køben maramigwan tøgä pasrar cha. Inchendø ñui møskawei Tiusbe mira yem øyah chitan cha: “Jacobwane isuptø mar cha. Chigøben martrumøn chib tsag, tsag waminchab kømø”. ³⁰ Ñui møskawei yauwan truba isub pesrøgøben inrrab yabe, trube, ¿nai tiusmerane chinchab nila sruaigu? — chibig køn.

³¹ Inchene Jacobpe Labanwane trenchibig køn:

—Kaguen nane kørjig kuig køn cha, inchippa ñi ñui nimbasrmeran nan namiimay kebya kerraptinchaitamab. ³² Pøø tru ñui tiusmeran møig køben yu tøgä wabiibe kwanrrain chibig køn. Nai yauelø testigos kønrrai cha nai chi tøgaguigu, chitø ñuyelø køtashchab ñiashib lau,— chibig køn.

Inchendø Jacobpe Raquel nemøra srua arritamappe chiguen isumuig køn.

³³ Inchen Labanbe Jacobwei carpa yasrø kebya, trugurrimbe Leain carpa yasrø, katø tru pailø karui mørøb melab ishumburmeraisrø lab kebya, kalawa, tru Leai carpayugurri webarruabe, yandø Raquel waisrø lab kebig køn. ³⁴ Inchen Raquelbe tru tiusmeran nemøra kan camelloi tsølig umbu warøppa, trubala wamisrøppa wabig køn. Inchen Labanbe tru carpa yau kerriguh lawa, kalaben, ³⁵ Raquelbe møskawane trenchibig køn:

—Nai mōskai, na ñui merrab kurrōmubene, ñi nan namōmōrrunrig cha, kaguen nabe chillig misraig war cha. Inchen Labanbe tru taska marig tiusmeran wetōrranrab kaima lab uñen, ³⁶Jacobpe truba nama, oyeeg chib namab mendabig kōn:

—¿Nabe ñune chi kalø marta? cha. ¿Naimbe chi kalø mari pasra? cha, ñi nan ke chinchimmōrø inchib nan wendautø pasra attraimbe. ³⁷Ñibe nai chi kōbeløyu chishtø lawa, ¿ñui yau pōnrrabelan chi wetōrragu? cha. Inchawei ñi chi wetōrrawabe, yu nai yauelai merrappa, ñui yauelai merrappa pōnsrø chibig kōn, nam pailainug mōig sōl pasrai kui nōm ashchai.

³⁸Na mōi ya pib trattrø pilamera na ñuyasig marøb megaben, mana ñui ubishamera, ñui cabramera lutø llumuig kōn cha. Katø nabe ni managuen ñui ubisha sōtōmerayugurri carnero kandøguen ma kōmøwein kur cha. ³⁹Nabe managuen kan kaambu namig usha kwabasilanguen ñune srúa arrumig kur cha. Treeg kōmøtø, truburøbe naguen ñun pagaramig kōbig kōn cha. Kan trutø kōnrrab kuindø ¿kwaløm niligwan lata, yem niligwan lata ñibe nan, nan ulø payibig kōmøtirru? cha. ⁴⁰Kwalømbe nabe pachig kōbiitø kwamdiig kui megab, yemmerawane kōrrag kōbiitø kwamdø kui megainaben, kiguen pumig kōn cha. ⁴¹Pilamera pib trattrøh nabe ñui yau megaig kōn cha. Ñui pa nimbasmmeran nan tranamweimbe pilamera pa trattrø y pib pilaba mara tranøb megaig kōn cha. Inchen trattrø y kanbabe ñui ushameraimburø megaig kōbig kōn cha. Inchen nan pagaramigwane katø, katø peemayh, peemayh ñibe yunømarøbig kōn cha, pa trattrø piejes yunømarig kōn cha. ⁴²Nai mōskai Abrahamwei Tius, nai mōskai Isaac truba kōrig tōga pasrai Tius naba pasrømuig kuimbeh isa kōmøtø, ñibe nane chigucha chigaig inrai ørøbsruig kuitan cha. Inchen ñi nan yeeg kaig inchen isui megaig kōbigwanba, na mandø mara tranøb megaiwan kōbigwanba, Tiusbe trunun ashib wawa, ñune mira yem øyeebe kalø marmøta chib mur wamindiinrrun— cha.

Jacob Labanba Øyamay Kōnrrain Cha Kōrrømarig

⁴³Inchen Labanbe Jacobwan trenchibig kōn:

—I ishumburmerabe nai nimbasmmera kōben, nōm tøgaguig ureemerabe nai awelumera kōben, ubishamerabe nai ubishamera kōben, cabramerabe, nain cabramera kōben chigur-rimbunø yu kena kōbiibe nayelø kōn cha. Treeg kuindøgucha nabe nai nimbasmmeranba, katø nōm tøgagui nusrkalanbabe nabe katøle nayelø kōnrraimbe yandø chi maramgaig kōtan chibig kōn. ⁴⁴Incha mōimbe amø chibig kōn, naba ñiba øyamay kōnrrai mara kōrrømartrab cha. Tru treeg mariibe nainuuba, ñuinuuba øyah kōrrømarigwan isunanøb pasrōnrrain— cha.

⁴⁵Inchabe Jacobpe kan nu srugwan malsra, ølneb kusrua pasrabe, ⁴⁶tru nui yau misaamerane trenchibig kōn:

—Sruumera tulisay— cha.

Inchen truiløbe sruumera tulisha, tun pasrabe, tru tun pasrim puluh kanbalatø purramisra mabelø kōn. ⁴⁷Inchen Labanbe truyu nuin triimaybe ‘Jegar Sahaduta’ cha wamøbene, Jacobpe nui triimaybe ‘Galaad’ cha wamig kōn. ⁴⁸Inchene Labanbe trenchibig kōn:

—I srug tun pasriibe mōi naimba, ñuimba treeg kōrrømisrigwan eshka pasrōnrrabig kōrrømisran— cha. Inchagurri truyube Galaad taig kōbig kōn. ⁴⁹Incha katø Mizpagucha taig kōbig kōn, kaguen Labanbe trendaig kōbig kōn:

—Nam ñiba kanikkurri, kanikkurri yandø katøbe asiyamig nebumuben, nam maig inchi-belø kōtashchab Jehová nø ashib pasrōnrrain cha. ⁵⁰Inchippa nai nimbasmmeran ñi kaig inchib, maig kōbash inchib, kabe nai nimbasmmera kōmnetø ñi katøgan ishumburmeran pera arrin kui inchen, namune mu katøgan ashib pasrømuingucha, ñuimba, naimba øyah marig kōn chib, Tius nø eshka pasrōnrrun— chibig kōn.

⁵¹Incha katøgucha Labanbe Jacobwan trenchibig kōn:

—Ash cha, i tru srug tun pasrigwanba, katø tru srug ølneb pasrigwanba, na tru naimba, ñuimba tøbøtag pasrigwan. ⁵²Iig tru srug tunbasriiba, srugwan ølneb kusrua pasri-ibabe øyah marig kōn chib isunanøb pōnrrōnrrabelø kōn cha, nagurri ñuimay purøbunamig kōmønwei, katø ñigurri naimay purøbunamig kōmøwei kōnrrai. ⁵³Inchen ñui awelu Abrahamwei Tiusba, katø ñui awelu Nacorwei Tiusba maig maramigwan namun nø asha martrain— chibig kōn.

Inchen Jacobpe tru nui mōskai Isaac kōrig tōga pasraig Tiuswei merrab: “¡Katø! marmø kōmø, nabe treeg maramōnrrun” chibig kōn. ⁵⁴Incha Jacobpe tru tunbalasrø Tiuswan keta, tranrrai ushamera kweecha, tru nui yau misaameran mamiimeraba manrrab amrrunrrai wamabig kōn. Inchen truyu mayeeløba ma, tru tunyu kibelø kōn.

⁵⁵Incha katø lōtsø Labanbe kia kurra, nui awelu ureemeran, nui nimbasmmeran muchawa, trugurrimbe mayanguen tabig nebuilø kōnrrigay cha. Yandø nui pirausrømay katøle inrrab ibig kōn.

32

Jacob Esaúwan Katønrrab Inrrab Tamørøb

¹ Inchen Jacobpe nui yamigwan legucha iben, nune Tiuswei kan angelesmera katønrrab werruben, ² Jacobpe truilan ashabe, trenchibig kòn: “Yube Tius nui angeles sòtømeraba kòrrømisra pasrainug kòn” cha. Incha treekkurri tuyube Mahanaim cha wamabig kòn. ³ Incha Jacobpe tru Edom pirau tru Seirsromay wan sruar merrab amrrai ørøbig kòn, Esaúwan katønrrabelø tru nabe punrrab arrumønrrun cha, nui nuneg eshkanrrabelø.

⁴ Incha øyeege chinrrai karua ørøbig kòn:

—“Ñi nai mayur nuneg Esaúwan Jacob na ñi maig chiben megabiibe, trendan cha: ‘Nabe mõi øyangatig Labanba kòrrømisra tsua, ⁵ mõiimbe waaramera køben, burrumera køben, ubishamera køben, cabramera køben, karuig melabelø møguelø køben ishumburmera køben, tøgag kur’ tan chinrrai. Pøs ñi nai mayur nunewan nabe ñun øyeege eshkawa ørar cha, ñi nan truba tabig utig pasramig kònrrai.”—

⁶ Inchen tru wam srua ambubeløbe Jacobweimay katøle amrrua, trenchibelø kòn:

—Ñui nuneg Esaú waisrø ashchab amber cha. Nøgucha ñun katønrrab arrun cha, møguelø cuatrocientos lincha peraig.—

⁷ Inchen Jacob øyeege taigwan mørabe, truba kørig kui inchib, truba isuin kòrrømisra, nøbe tru nui misag lincha perayailan pa sòtø pirishibig kòn, tru ubishameran, cabramera køben, waarameran, camellomeran chigucha. ⁸ Pøs nøbe treeg isubig kòn: “Inchippa Esaú kan sòtøwan kwayanrrab megambuigucha, katøgan sòtøbe lulrrain” cha.

⁹ Incha Jacobpe Tiuswan trenchib miabig kòn:

—Nai møkai Abrahamwei Tius, nai møkai Isaacwei Tius: “Tru nai pirausrømay, nai yau misaamersømay katøle nan inrrø cha. Ñune truba truba tøgag misrøb inrrai maramønrrun” cha, ñi nan trendaig kuig kòn cha. ¹⁰ Na ñi karuigwan marøb megabiibe ñi larrø tab indigwanba, ñi trendø treeg tabig køppe treeg mariilanba na truigwan utab pasramibe nabe trengatig truburab kømuintan cha. Pøs, nabe i Jordan nu piyu larreb urasbe i pøtønain tsiizhiitø srua pasraig køben, trune mõiimbe nuingui, nuingui pa sòtø tarømara pasramig tøgä pasrar cha. ¹¹ Nai nuneg Esaúwei taskugurri chi kømønrrai marøbsrumuguh cha. Nane kørig kòtan cha, inchippa nanba, usralmeranba, ureemeranba kweecha petønrraitamab. ¹² Ñitøwei nane trendaig kòn cha: “Nane maya nuguen tabig nebuig kònrrai mara, nainukkurri amrub misaamerabe purø nørøø kòptø, mar menda kan pisrum lataig kònrrun cha, mundamguengaike.”—

¹³ Incha tru yembe Jacobpe truyu kia, nø truyu chi tøgaguigwan nui nuneg Esaúwan ketamig lawa wesrabig kòn. ¹⁴ Cabramera doscientas, pib tratrø turmøg cabramera, ubishamera doscientas, turmøg ubishamera pib tratrø, ¹⁵ Camellasma ureg perarcheelø treinta, waaramera cuarenta, toro-ureemera pa tratrø, asnasmera pib tratrø, pa tratrø burrusmera. ¹⁶ Incha tru nui karuig mendig melabelai tasku tru ushameran nuingui kan sòtø, kan sòtø pønrsra, tru nui mendig melabelane trenchibig kòn:

—Nai merrab ambay cha. Incha tru tarømarig sòtømerane kanguetøtø kømøtø, yabsrø, yabsrø merranrrigay— cha.

¹⁷ Incha Jacobpe tru ke srøsrø merrana ibigwane trencha karua ørøbig kòn:

—Nai nuneg Esaú ñun kata: “¿Ñibe muinukkurriig kugu chib, chumay inrrab arrugu? chib. ¿Ñi merrana yaig ushamerabe muielø kø?” chib payene, ¹⁸ ñibe øyah chib lètønrrig cha: “Ñun ketamig ñi nai ashib karubig ñi Esaúwein kòn cha, ilane ñi maig chiben marøb megabig, tru Jacob, keta trana øran cha, nui ushamerayugurri. Inchagucha nøbe namui wendau arrun” chinrrig— chibig kòn.

¹⁹ Incha tru srørigwei wendau ibigwan lata, pøn kònrrabyu ibigwan lata, tru wendau ambubelan møilandøgucha treetø, treetø chinrrai karua pasrig kòn. Esaúwan katabe, øyeetøh chinrrigay cha. ²⁰ Incha katø trenchinrrigay cha: “Ñui karuig megabig Jacobpe namui wendau arrun” cha. Kaguen Jacobpe treeg isubig kòn: ‘Tru na keta trana øriilanmerrig nun pungaruabe, tru nø namig kòrrømisrig købig yandø kuchi tammissren, trugurrimbe nui maløwan asamønrrun’ cha. ²¹ Inchen tru keta tranameløbe merrab chab amben, Jacobpe tru nui misaameraba, nui ushamerabañau kòrrømisra tsuinug kinrrab kòrrømisrøbig kòn.

Jacob Angelba Melambub Kemøriyab

²² Incha tru yemdøwei Jacobpe kurra, nui pagatø sralanba, nui pagatø linchatø melab ishumburmeranba, pa tratrø y kan tru nui nusrkalanba, Jaboc taig nu piyu larraambubelø kòn. ²³ Incha yandø truilan chab larrøørabe, katø chine købigwan kerrigu larrøørøbig kòn. ²⁴ Incha Jacobpe tru misaameraba, nui ushameraba kòrrømisra tsuinug nøtø kòrrømisra, kan møøba tømramnegatig kwayab tranrriyabelø kòn. ²⁵ Inchen tru

møøbe Jacobwane chinchaguen kullaaranamgaig kui ashabe, srøptsim merrarrab srølwan kebachen safabig køn, tru kemøriyab tranriyabyu. ²⁶ Inchen tru møøbe trenchibig køn:

—Yandø chab tør-rrab køn cha. ¡Elatcha!— cha.

Inchene Jacobpe trenchibig køn:

—Ñi nan maya nuguen tabig nebunrrabigwan tranmubene, nabe lelachimumønrrun— cha.

²⁷ Inchene tru møøbe:

—¿Ñibe chi munchi kugu?— cha payen,

Nøbe:

—Jacob munchi kur— chibig køn.

²⁸ Inchene tru møøbe trenchibig køn:

—Ñibe yandø Jacob cha wamig kønrrabig kømøtø, Israel cha wamig kønrrabig køn cha. Kaguende ñibe Tiusba, møgueløba truba melambuyab tranriyaigu, ñibe kullaaramøn— cha.

²⁹ Inchene Jacobpe trencha payibig køn:

—¿Ñibe chi munchi kugu?— cha.

Inchene tru møøbe trenchibig køn:

—¿Nai munchiwane nane chinchab paygu?— cha.

Inchen tru møøbe truyutøwei tru mayanguen tabig nebuig kønrrabigwan nune tranøbig køn.

³⁰ Incha Jacobpe truyube Peniel cha wamabig køn; kaguen nøbe trendaig køn: “Nabe Tiuswan malaugue ashendø, katøgucha ka øsig pasrainatan” cha. ³¹ Inchen Jacob Peniel-srøngurri purailben, pørrbe neeshib arrubig køn. Inchen nui pøytañig safaig pusrkwabben, Jacobpe kebeñiptø, kebeñib arrubig køn. ³² Incha treekkurri Israelweinkkurri amrrub misaamerabe møingati tru ushamerayu pøytañig kemøøb srølwane mameelø køn, kaguen Jacobwane tru srølyu kebatig kuig kua.

33

Jacobpa Esaúba Katøle Chi Kømui Lataig Tab Kørømisrøb

¹ Møimbe Jacob kurraashene, Esaúbe arruptinchibig køn, tru cuatrocientos møguelan pera. Inchen Jacobpe nui ureezheelan kanelane Leai merrab, kanelane Raquelwei merrab, kanelane pagatø nui tru karuig mendig melab ishumburmerai merrab øyamay pirisha merranøbig køn. ² Incha tru nui pagatø karub tøgagui ishumburmeran tru nømui ureemeran ke merrabsrø pønsra, tru wendaube Lean tru nui ureemeranba, tru wendaube Raquelwan tru nui Joséwanba pønsrøbig køn. ³ Incha Jacobpe kerrigu mayeelai merrabsrø puraya, pirausrøngatig trattrø y pagatøgatig utsøbasrøbig køn, nuneg waisrø pumnegatig. ⁴ Trune Esaúbe nunewan katønrrab luløb ya, naashiburab ira, muchabig køn. Incha pailøba kishibølø køn. ⁵ Incha møimbe Esaú kurraashabe ishumburmeranba, ureezheelanba ashabe, trenchibig køn:

—Iilø ñiba pønrrabeløbe ¿mumeragøh?— cha.

Inchene Jacobpe trenchibig køn:

—Na, ñi maig chiben marøb megabigwan, iiløbe Tius nan trani ureezheelø køn— cha.

⁶ Inchen tru pagatø karuig melab ishumburmera nømui ureezheeløba amrrua, utsøbasrøbelø køn. ⁷ Trugurrimbe Lea nui ureezheeløba utsøbasren, tru wendaube Raquel nui Joséba arrua, utsøbasrøbig køn. ⁸ Inchen Esaúbe trencha payibig køn:

—¿Tru na katab arrigu øyeeg nørø søtø, merrana amrruuløtøgabe nan chi chinrrab treenchigu?— cha.

Inchen Jacobpe trenchibig køn:

—Ñi nane kan chigucha inchimø, ñuin kabyu tab kui asig kønrrab øyeeg marar— cha.

⁹ Inchene Esaúbe trenchibig køn:

—Nai nuneg, nabe tsabøtø tøgagig kur cha. Ñuimbe ñuin kønrrain— cha.

¹⁰ Inchene Jacobpe trenchibig køn:

—Ñuin kabyu na tab kui asig kuinabene, tiusmanda na kettrab srua arrigwan utørra chibig køn. Na ñui maløwan asiibe Tiuswan asi lataig køtan cha. Ñibe nane kan yangucha tabig utøtan cha. ¹¹ Na ñuin ketamig srua arrigwan ka utørra cha. Tiusbe nane øyeeg nørø tøgagig kønrrai maren, nabe menrrazhikken tøgagur— cha.

Incha Jacobpe utønrrai truba inchen, Esaúbe tru ketiilan ka utabig køn. ¹² Incha Esaúbe trenchibig køn:

—Ambamigwan amun cha. Trube, naba lincha amun— cha.

¹³ Inchene Jacobpe trenchibig køn:

—Nai nuneg, ñibe asiinrrabguen cha, nai ureemerabe kullaguelø srø køn cha. Katø ubishamera køben, waaramera køben, ureezheelø perartø køn cha. Na menrra trømbøig malla merranene, nai ubishamerabe kan kwalømyutø kerriguba chab kwanrrun cha. ¹⁴Ñi, nai ashib karubiibe, ñi karuigwan marøb megabigwei merrabmisra ka ashirrunraguh cha. Nabe nai ubishameran køben, cabrameran køben, waarameran køben, merraniilø maig amben, nabe tsøndatø treeg arrumønrrun cha. Katø ureezheeløgucha nøm maig ambub meløben, tsøndatø treetø arrumønrrun cha, Seirsrø ñun wetøgamsrøngatig.—

¹⁵Inchen Esaube trenchibig køn:

—Trube, treeg ka amrrab cha. Inchendø tru naba lincha amrrub møguelan møilan køsrøn ñiba lincha amrrunrrai kørrømartrab— chibig køn.

Inchene Jacobpe trenchibig køn:

—Truburappe chi isumøta cha. Ñuin kabyu na tab kui asig kuinaig købene, truig mas purø nuig køtan— cha.

¹⁶Incha tru kwaløm Esaube Seirsrømay inrrab ibig køn. ¹⁷Inchen Jacobpe Sucotsrømay ya, trusrømbe nuyasig kan ya marøb, nui ushamerai ranchu-ureemera marøb inchibig køn. Incha treekkuri trusrømbe Sucot cha wamig kuig køn.

¹⁸Jacobpe Padan-Aramsøngurri chigucha kømø, katø tab ka pubig køn, Canaán pirau Siquén ciudadsrø. Incha tru ciuda pinrrøguesrø kørrømisra warøwa, ¹⁹kan tul penabig køn, tru Hamorwei nusrkalan. Incha trube Siquénwei møkawan, tsantsøn andøga mari monedamera sulu cien pagaraig køn. Incha truyu nui carpa yawan lasrwa tsumisra, ²⁰truyube kan altar mara, truigwane El Elohe Israel cha wamig køn.

34

Dinan Kan Møg Kemøra, Kaig Marøb

¹Jacob Leaba kan nimbasr Dina taig tøgaguibe tru pirau ishumbermeran ashib pub inrrab webya ibig køn. ²Inchen tru heveo truyu ashib karubig Hamorwei nusrkai Siquém ashabe, Dinane kemøra, kaig mara mindisha kørrømarøbig køn. ³Incha nøbe Dinan purø chull ashiptø, tabzhib waminchibig køn, Dina undaaraig kønrrab. ⁴Incha Siquémbe nui møkai Hamorwan trenchibig køn:

—I srusran nai srain kønrrai møkaloøba waminchay— cha.

⁵Inchen Jacobpe tru nui nimbasr Dinan Siquémbe kemøra, kaig mara mindisha kørrømarin kui wammøøbig køn. Inchen nui nusrkaloøbe tru purugubeloøba trusrø ushamera ashib warøben, tru nusrkaloø katøle pumne chigucha waminchimig køn.

⁶Incha pumøwatø, tru Siquémwei møkai Hamorbe nui nusrkai pa misrtrab isuigwan Jacobpa waminchab arrubig køn.

⁷Inchen tru Jacobwei nusrkaloøbe traugurri chab pua, tru treeg purayaigwan wammøøabe, karre øyeg maritamab isub, larrø namig kuig mørøbelø køn, kaguende Siquénbe Israelwei yau misagwan purø trømbøig mara pasren tru Jacobwei nimbsrwan kemøra, øyeg mindishib. Pøs øyeebe ni nanaguen maramig kømfigwan.

⁸Inchen Hamorbe tru møkawanba nusrkalanba trenchib waminchib køn:

—Nai nusrkai Siquémbe ñui nimbsrwan purø chull asan cha, ishug-unø nøba kasharanrrai treegwan isubsrømgue chinrrab inchar cha. ⁹Yau misamera misrkun chibig køn, ñimbe namui nimbsrmeran sralø maren, namueløbe ñimui nimbsrmeran sralø martrain cha. ¹⁰Trumaybe ñimbe namui utu warøben, yu nam waraig pirøbe ñim chu warag køben waramig pasrønrrun cha. Ñimbe truyu warab, penab, yanøb, katø pirømera penab inchigay— cha.

¹¹Inchen Siquémbe nuimburappe tru Dinai møkawanba, nuchalanba trenchibig køn:

—Na ñimuin kabyu tab asønainabene, ñim maig miabendø, nabe tranamønrrun cha. ¹²Tru srusran srain kønrrai tranamwei maya nu kuindøgucha, ñim maya miamigwan eshkab, maya ketig tranamelan eshkab inchay chibig køn. Inchendø tru srusrane naba ka kasharabashchunrrigay— cha.

¹³Inchen Jacobwei nusrkaloøbe tru møkai Hamorwanba Siquémwanba purø may kegørrøsrkønrrab isua løtabelø køn, kaguen nømui nuchag Dinan kaig kui lataig purø trømbøig marøb mindisha kørrømarikkurri. ¹⁴Incha nømbe trenchibelø køn:

—Name namui nuchawane kan møg circuncidamigwane tranrrab kaimamønrrun cha. Kaguen namuiwan purø trømbøig mindishib kørig marinab pønrramig køn cha. ¹⁵Pøs, nambe treeg punrrai martrab cha ñim øyamay martrab kørrømisrene, ñimui utu maya møgueløba circuncidawabe kønrrun cha, nam latailøwein kønrrab. ¹⁶Trumaybe si namui nimbsrmerabe ñimba kasharab, ñimui nimbsrmerabe namba kasharab, nambe ñimui utu warab, kan sötø misaameratø kønrrab cha. ¹⁷Inchen tru circuncidamigwan 'ka'

taingatiibe nambe namui nuchawane perøb, yu ñimui piraugurri ambuptindamønrrun—cha.

¹⁸ Inchene Hamorwanba Siquémwanba tru øyeeg margun taigwane truba tabig mørørai inchibelø køn. ¹⁹ Inchen tru matsinube mallatø circuncidabig køn, kaguen nøbe Jacobwei nimbasrwane purø chull asha kuig kua. Inchagucha Siquembe nui yaube mas nuig kuig asig møg købig køn. ²⁰ Incha Hamorba Siquémba nòmui ciudayu kebambi yaskabumay amba, truyu warab misaameran trenchibelø køn:

²¹—Tru møgueløbe kwa tammayelø køn cha, nømbe yu namuim pirau warønrrab amrrua warab, namuin pirau penab, yanøb inchib kønrrain cha, kaguen pirømerabe nøm kørrømisra waramig tsabøtø lendø køn cha. Nambe nòmui nimbasrmeran sralø maren, nømbe namui nimbasrmeran sralø martrun cha. ²² Inchendø namui utu nøm kørrømisra, kan misag sötøtø misra waramibe nam øyamay kønrrab købendøwein kønrrun cha, namui utu møgueløbe mayeeløba circuncidawar kønrrai, nøm mailø køben, nam treeløtøwingue. ²³ Inchawei nøm maig tailan ka lötøgun chibig køn, nøm namui utu warønrrab kørrømisrtrain cha, kaguende nøm chi tøgaguiløba, nòmui ushamerababe, namuin kønrrun—cha.

²⁴ Inchen tru chi maramigwan nøm ashibelø maya møguelø tru ciudayu kebambi yaskabu tuluntsunabeløbe tru Hamorba, tru nusrkai Siquémba treegwan martrab pønrramisrøbelø køn. ²⁵ Incha tru maya møgueløbe circuncidailø kørrømisrig køn.

²⁵ Indiibe pøn kwalømyu tru circuncidailøbe pusrkwalø purrøbenh, Jacobwei pagatø nusrkalø tru Dinai nuchaløbe Simeónba, Levíba nømbe espadan srua ambubelø køn, tru ciudayumay, truiløbe ni chigucha chi isumø køben, maya møguelan chishtø kweecha petabelø køn. ²⁶ Incha Hamorwanba nui nusrkai Siquémwanba espadatøga kweecha peta, Dinane Siquémwei yaugurri wesrawa, pera ambubelø køn. ²⁷ Incha tru Jacobwei katøgan nusrkaløbe amrrua, kwabelaim palawan itøbunab puraamba, ciudayu kegorra chi købigwan chishtø wesrabelø køn, tru nui nuchawan øyeeg trømbøig mara mindisha kørrømarigwan trunun ulø payib. ²⁸ Incha ubishameran køben, cabrameran køben, waarameran køben, burrumeran køben, srua ambubelø køn, ciudayuigwan lata, wambigwan chi købigwan lata. ²⁹ Incha yaambumerayu chi købelane chishtø wesrawa, katø chigurrimbunø chi tøgaguilan køben, møg-uregwan køben, ishumburmeran køben merrarrowa, srua ambubelø køn.

³⁰ Inchen Jacobpe Simeónwanba, Leviwanba trenchibig køn:

—Ñimbe nane purø nuigu mumaygwan kømíg meganrrai martan cha, cananeomeraba, ferezeomeraba i pirau misaamera namun larrø tsalø asiilø pønrramig kønrrai ñimbe treeg marøb. Nabe ya mamdø møguelø tøgagøben, nømbe kanbalatø lincha, namune kwayanrrab melambua, nanba nai yau misaameranba pinisha petønrrautan—cha.

³¹ Inchene nømbe trencha løtabelø køn:

—¿Nø isuppe, kabe namui nuchawane trømbøig martrab nui asrwan anwei yanøb ishug kui lataig mara kutchain kuitarru?—cha.

35

Tius Jacobwan Betelsrø Maya Nuguen Tabig Nebuig Kønrrai Marøb

¹ Tiusbe Jacobwane trenchibig køn:

—Kurrab, Betelsrø tsunrrab inrrø cha. Trusrømbe, tru ñui nuneg Esaúwan ñi trubab arruben kenamisrøb Tiuswan kan altar kusrunrig—cha.

² Inchen Jacobpe tru nui yaambuelanba, nun lincha amrrubelanba trenchibig køn:

—Tru katøgan peg tiusmera ñim tøgaguilan ñimbe chishtø webetab, ñimui kalø mariilan chish misrøb, ñimui kewaguilan yunømarøb inday cha. ³ Betelsrømay amun cha, tru nan chine kaig nebuinab arrubengurri purugub Tiusweyasig trusrø kan altar kusrunrrab cha, tru na chu unindøgucha nan lincha pasrabisgwan.—

⁴ Inchen nømbe tru taska marig peg tiusmera nøm tøgaguilan kerriguba Jacobwan tranøbelø køn, katø kaluyu kandunga melsraguilan chigucha. Inchen Jacobpe kan encina tusr keta truilan sørabig køn, tru Siquém pulu. ⁵ Inchen nøm truyugurri webamba ambene, tru puluwan warab misaamerabe mayeeløba purø trømbøig kørig kui inchai Tiusbe treeg marøbig køn. Inchagurri Jacobwei misaamerane nømbe chi kaig martrab inchimeelø køn.

⁶ Incha Jacobpe maya misaameraba Luz cha wamiisrø pubig køn, tru Betelsrø Canaán pirau. ⁷ Incha nøbe trusrø kan altar kusrua, El Betel cha wamig køn truyube, kaguende Tius trusrø kenamisrig kuig kua, tru nui nunewan trubab welula ib uras.

⁸ Inchen katø truyuh kwaig købig køn, Debora tru Rebeca lamíg køben asam purugubig købig. Truigwane kan encina tusr katsiizhigu sørig køn, Betel pulu. Incha Jacobpe truyube Elon Bacut cha wamig køn.

⁹ Incha Jacob Padan Aramsrøngurri katøle arrubene, Tiusbe nune katøle kenamisra, maya nuguen tabig nebuig kønrrai tranrrab misrøbig køn. ¹⁰ Incha Tiusbe trenchibig køn:

—Ñibe Jacob munchi kòn cha. Inchendø mømbe Jacob cha wamig kòmøtø, ñui munchibe Israel cha wamig kònrrabig kòn— cha. Incha Israel cha wamig kòn.

¹¹ Incha katø Tiusbe trenchibig kòn:

—Nabe tru Maramburab Marøb Tius kur cha. Misag purø norrø karrab, larrø norrø larrøbichig cha. Ñiuing kan larrø nu misag sötømera kal-lawa, ñuinukkurri misag larrø norrø sötømerabatø kurrab amrrunrun cha. Incha ñuinukkurri amrrub misaamerayugurrimbe reymera kurrønrrun cha. ¹² Incha Abrahamwanba, Isaacwanba tranin pirøwane ñun tranamønrrun cha. Incha ñuinukkurri amrrub misaameran tranamønrrun— chibig kòn. ¹³ Incha Tiusbe nuimbulugurri ibig kòn, tru nøba waminchib pasrainukkurri.

¹⁴ Inchen Jacobpe kan srug nemøra, ølneb pasrøbig kòn, Tius tru nun wamindinug. Incha trubalabe pi lusha, aceitetøga itølushibig kòn Tiuswan keta tranøb. ¹⁵ Incha Tius tru nun wamindinuube Betel cha wamabig kòn.

Raquel Kwaig

¹⁶ Incha Betelgurri amba, katøgucha Efratasrø pumibe yab paløben, mømbe Raquelbe unøzhigwan ke tammistrtrab kaimabsrua tammisrig kòn. ¹⁷ Inchen ke purø lastimazhig pusrkwai inchib megaben, tru patsø korrøørøbiibe trenchibig kòn:

—Chi kørig isumøta cha, ñibe katø møg-unøzhig tøgagønrrab kòn— cha.

¹⁸ Inchen nøbe yandø ke kwanrrab inchib ke srabe israb megawa, unøzhigwane Ben-Oni cha wamabig kòn. Inchendø møkai Jacobpe Benjamin munchi pasrig kòn. ¹⁹ Incha Raquelbe øyeeg kwamig nebuig kwaben, Efratamay amrrab ambi maysrø sørig kòn, tru Belén. ²⁰ Tru kwabigwan sørimbalabe kan srug nemøra ølneb pasrig kòn. Incha tru treeg tamara kusrua pasrig købiibe tru Raquelwan sørig købig kui ashchai pasran møingati.

²¹ Incha Israelbe tru nø yamigwane ibig ya, Migdal Edargurri mas yab yaisrø nui carpa yawan lasrua kørømisrøbig kòn. ²² Indiibe Israelbe tru pirausrø kørømisra tsubene, Rubénbe ya, Bilhaba kiain købig kòn, tru nui møkawan lincha tsub ishuuba. Inchen Israelbe øyeeg marigwan wammøøbig kòn.

Jacobwei Nusrkalø

Israelwei nuskaløbe pa tratrø y par købig kòn.

²³ Leai nusrkaløbe iilø kòn: Jacobwei mayur nusrkai Ruben, Simeón, Leví, Judá, Isacar, Zabulón.

²⁴ Raquelwei nusrkaløbe: Joséba, Benjaminba.

²⁵ Inchen Raquelwei tru karuig mendig megabig Bilhai nusrkaløbe iilø kòn: Danba, Neftaliba.

²⁶ Inchen Leai tru karuig mendig megabig Zilpai nusrkaløbe: Gadba, Azerba. Iilø kòn tru Jacobwei nusrkalø Padan Aramsrø kal-lawar.

Isaac Kwaig

²⁷ Incha Jacobpe Isaac nui møkawei yausrømay ibig kòn, Mamre taisrømay Kiriát Arba pulusrø, tru Hebrón cha wamiisrømay, Abrahamba, Isaacba tsuig købiisrømay. ²⁸ Isaacbe tru nø kwab uras pilamera ciento ochenta tøgagig købig kòn. ²⁹ Inchen Isaacbe yandø larrø køllizhig, larrø yana øsig tsua, yandø nui israbig luchen, nui nusrkalø Esaúba Jacobpa misra kusra sørøben, nui kølli misaameraba isrønrrab tsumisrøbig kòn.

36

Esaúweinukkurri Amrrub Misaamera

¹ Iilø kòn tru Esaúweinukkurri amrrub misaamera, tru Edomwei.

² Esaúbe Canaán ishumburmeraba kasharaig kòn. Tru Elon hititai nimbasr tru Adaba katø Aholibamababe Anai nimbasr køben, truiibe Zibeøn heveowei awela kuig kòn. ³ Katø Basematwangucha nui srain kønrrai marig kòn, truiibe Ismaelwei nimbasr Nebaiotwei nuchawan

⁴ Esaúbe i uremeran tøgaguig kòn: Adababe Elifazwan Basematbabe Reuelwan;

⁵ Aholibamababe Jeiswan køben, Jalánwan køben, Coréwan køben tøgaguig kòn. Iilø kuig kòn tru Esaú Canaán pirau tsub uras tøgagui ureemera.

⁶ Incha Esaúbe nui sralan køben, nusrkalan køben, nui nimbasrmeran køben katø tru nøba lincha warab misaameran køben pera, tru Jacob nui nuneeba tarømisrtrab katøgan paløsrømay ibig kòn. Incha ushameran kerriguba katø Canaán pirau nø chi tøgamisriilane chishtøh srua ibig kòn. ⁷ Jacobpa Esaúbabe purø norrø tøgamisrøptø, pailøba kanbalatøbe waramgaig købig kòn. Inchagucha tru nøm waraig pirøbe ushameran mannamig truburab tranmíg kòn. ⁸ Treekkurri Esaú tru Edom taiibe Seir pirau tunmeragøba tøgasrø tsunrrab yaig kòn.

⁹ Iilø køn tru Esaúweinukkurri amrrub misaamera: edomitasmerai møskai tru Seir tunmeragøba tøga pirømerasø warab misaamera.

¹⁰ Inchen tru nui nusrkalai munchimerabe iilø køn:

Esaúwei srai Adai nusrkai Elifaz køben Esaúwei srai Basematwei nusrkai Reuel købengue.

¹¹ Inchen Elifazwei nusrkaløbe Temán køben, Omar køben, Zefo køben, Gatan køben, Kenaz køben købig køn.

¹² Inchen Timná ka linchatø ishug tru Esaúwei nusrkai Elifazwei kan nusrkai tøgaguig køn, tru Amalecwan. Iiløbe kerriguba Esaúwei srai Adai awelumera kuin køn.

¹³ Inchen Reuelwei nusrkaløbe iilø kuig køn: Najat køben, Zera køben, Sama køben, Mizá købengue, truiløbe tru Esaúwei srai Basematwei awelumera købig køn.

¹⁴ Inchen tru Esaúwei katøgan srai Anai nimbasr tru Sibeónweimbe awela tru Aholibamai nusrkaløbe iilø kuig køn: Jeús køben, Jalán køben, Coré købengue tru Esaúwei nusrkalø.

¹⁵ Iilø kuig køn tru Esaúweinukkurri amrrub misaamera, nørreelø nøm asha karubelø, tru Esaúwei mayur nusrkai Elifazwei nusrkalø: Temán køben, Omar køben, Zefo køben, Kenaz køben, ¹⁶ Coré køben, Gatan køben, Amalec købengue. Iilø kuig køn tru Edom pirau Elifazweinukkurri amrrub misaamera nørreelø nøm asha karubelø, truiløbe kerriguba Adai awelumera.

¹⁷ Inchen Esaúwei nusrkai tru Reuelwei nusrkaløyu nørreelø nøm asha karubeløbe iilø kuig køn: Najat køben, Zera køben, Sama køben, Mizá købengue. Iilø kuig køn tru Edom pirau Reuelweinukkurri amrrub misaamera nørreelø nøm asha karubelø truiløbe kerriguba, Esaúwei srawei Basematwei awelumera.

¹⁸ Inchen tru Anai nimbasr tru Esaúwei srai Aholibamai nusrkalø nørreelø nøm asha karubeløbe iilø kuig køn: Jeús køben, Jalán køben, Coré købengue.

¹⁹ Iilø kuig køn tru Esaúweinukkurri amrrub misaamera, katø nune Edomgucha taigwei. Trumørig nømui nørro misag sötømera købelan nøm asha karubelø.

²⁰ Inchen tru horeo Seirweinukkurri amrrub misaamera tru pirausrø warabeløbe iilø kuig køn: Lotán køben, Sobal køben, Zibeón køben, Aná køben, ²¹ Disón køben, Ezer køben, Disán købengue. Iig tru Seirweinukkurri amrrub misaamera, Edom pirau horeosmeran nøm asha karubelø nørreelø købig køn.

²² Inchen Lotánwei nusrkaløbe iilø kuig køn: Horiba, Hománba. Inchen Timnabe Lotánwei nuchag købig køn.

²³ Inchen Sobalwei nusrkaløbe Alván køben, Manajat køben, Ebal køben, Sefó køben, Onam køben kuig køn.

²⁴ Inchen Zibeónwei nusrkaløbe iilø køn: Ayába, Anába. Tru Aná kuig køn, tru misag warab waraimø pirømerasø kuaalab pigammeran wetørrabig nui møskai Zibeónwei burrumeran ashib uña.

²⁵ Inchen Anábe kan nusrkai Disón taig tøgag købig køn, katø kan nimbasr Aholibama taikkucha.

²⁶ Inchen Disónwei nusrkaløbe iilø kuig køn: Hemdán køben, Esbán køben, Itrán køben, Kerán købengue.

²⁷ Inchen Ezerwei nusrkaløbe iilø køn: Bilán køben, Zaván køben, Acán købengue

²⁸ Inchen Disánwei nusrkaløbe iilø kuig køn: Uzba, Aránba.

²⁹ Inchen horeosmeran nøm asha karubeløbe iilø køn: Lotán køben, Sobal køben, Zibeón køben, Aná køben, ³⁰ Disón køben, Ezer køben, Disán købengue. Truiløbe nøm møitøgucha nømui nørro sötø misaameran nøm ashib karubelø treelø købig køn.

Edomsrø Reymera

³¹ Israelitasmara rey tøgagømøwatø, tru Edom pirau reymera nebamba karub purrabeløbe iilø kuig køn:

³² Beorwei nusrkai Belabe Edomsrø rey kuig køn, nøbe tru Dinába taig ciudayugurri arrubig.

³³ Inchen Bela kwabene, tru nuimburøbe Zerai nusrkai Jobab karunrrab nebyaig køn, Bosra pirausrig.

³⁴ Inchen Jobab kwabene, tru nuimburøbe Jusán karunrrab nebyaig køn, Temán pirausrig.

³⁵ Inchen Jusán kwabene, tru nuimburøbe Bedadwei nusrkai Hadad karub wanrrab nebyaig køn, truike tru Moab pirau madianitasmeran kanawa kørrømarøbig. Tru nø tsuig ciudabe Avit taig kuig køn.

³⁶ Inchen Hadad kwabene, tru nuimburøbe Masreca misag sötømera waraisriig Samla karub wanrrab nebyaig køn.

³⁷ Inchen Samla kwabene, tru nuimburøbe Rejobotsrø Saúl karunrrab nebyaig køn, tru Eufrates pi menda.

³⁸ Inchen Saúl kwabene, tru nuimburøbe Acoborwei nusrkai Baal-Janán karunrrab nebyaig køn.

³⁹ Inchen Acoborwei nusrkai Baal-Janán kwabene, tru nuimburøbe nusrkai Hadad karunrrab nebyaig køn, tru nø tšuiç ciudadabe Pau taig køben. Inchen tru Hadadwei sraimbe Mehitabel taig købig køn, Matredwei nimbasr, Mezabweimbe awela.

⁴⁰ Iilø køn tru Esaúwei karub pønrrab møguelai munchimera, mu møskalø køben, trumørig truilainukkurri amrrubelø, nøm waraigwan nømui munchitøgatøwei wamiilø: Timná køben, Alvá køben, Jetet køben, ⁴¹ Aholibama køben, Elá køben, Pinón køben, ⁴² Kenaz køben, Temán køben, Mibzar køben, ⁴³ Magdiel køben, Iram købengue. Iilø kuig køn tru Edom pirau nørreelø nøm asha karubelø, nøm chu waraig pirømerayu, nømui pønrrabigu.

Edombe Esaútøwein køn, tru edomitasmerai møskai.

37

Joséwei Piailø

¹ Jacobpe nui møskai kørrømisra tsui pirau truyu kørrømisra tsuiç købig køn, tru Canaán pirau. ² Iibe Jacobwanba nui yaambu misaameranba maig pureb arrigwan waminchibig truig køn:

Josébe pilamera diecisiete tøgag kua, ubishameranba, cabrameranba nui nuneløba ashib tøgagøbig køn, tru møskawei ishumburmera Bilhaimba Zilpaimba truiløbe nusrkalø køben. Incha Josébe tru nuneløbe søl kømøtiig marøbelø køn chib møskawane eshkabig køn.

³ Incha kerrigu maya nusrkalan lataguen kømøtø, tru Israel Jacob taig købiibe Joséwane truba undaguig købig køn, kaguende nø køllimbala tøgagui unø kuimba. Inchagurri pala itø kemig larrø tab tsurøzhig maringarubig køn. ⁴ Inchen nømbe nøm kerriguellan lataguen kømø, Joséwane mas undaarai ashabe, yandø tsalø ashib menda ni kan wamzhikken tammaybe wamømeelø køn.

⁵ Indiibe Josébe kan piji kan piaig tøgagua, nunelan waminchen, trugurrimbe nuneløbe masken tsalø ashibelø køn; ⁶ kaguen nøbe trenchib eshkabig køn:

—Nan piaigwan ñimun eshkanrrab inchar cha, mørtray cha: ⁷ Møimbe nam trausrø warøwa, tirigu lusrømera lusrøb købene, møimbe nai tirigu lusrøbe pasramisrøppe, ke ølgandøzhig pasramisrøptindan cha. Inchen ñimui tirigu lusrømerabe tru nai tirigu lusrø pøtøgatan pønrramisrøppa, purø tab inchib ke nai tirigu lusrømaygøba utsøbasrøptinchimøh—cha.

⁸ Inchene nuneløbe trencha kusrua løtabelø køn:

—¿Treekkan namui rey misra, namune ke ñi karub tøgä pasrønrrab inchib pasrøtirru?— cha. Incha masken ashig kømui inchibelø køn, tru piailan, nø waminchen.

⁹ Incha Josébe katøgän piaig tøgagua nunelan katø treeg eshkabig køn:

—Møimbe katø nan piappe, pørrba, pølba pa tratrø y kan kønchabiimeraba nan tab inchib utsøbasrøb piatan— cha.

¹⁰ Incha møskawanba, nunelanba treeg eshkabene, møskaimbe øyeebe chisun waminchab arrugu trenchiptinchibig køn:

—¿Tru ñi øyeeç piaig tøgaguitøgabe namune manchibrre inchigu? cha. ¿Ñui usrimba, ñui nuneløba, naba, kabe ñun piraugatig utsøbasrøtrain kønrrab kø chindah?— cha.

¹¹ Inchen nuneløbe larrø pusrkwai inchibelø køn. Trune møskaimbe øyeeç piaibe chiguer-mab wetøbeñimmørø chu uragucha isub sulu uñibig køn.

Joséwan Nunelø Yanig

¹² Indiibe yandø treeg purayai wendø Siquémsrø nui nuneløbe møskawei ubishameranba, cabrameranba pu lawa mannrrab amben, ¹³ Israelbe Joséwane trenchibig køn:

—Ñui nuneløbe Siquémsrø ubisha ashib waran cha. Amø cha, trusrømay inrrig— cha.

Inchen Josébe:

—Øø, inrrur— chibig køn.

¹⁴ Inchen Israelbe trenchibig køn:

—Ashchab ya, tru ubishameraba cabrameraba, ñui nuneløba maig warai ashabe, wamrua attrunrrig— cha. Incha Hebrón chaasrøngurri inrrai ørøbig køn.

Inchen Josébe ya, Siquémsrø pubig køn. ¹⁵ Indiibe Josébe trusrø pua, truba lab llirab uña, pella pasrøbene, kan møg katabe, payibig køn:

—¿Chi lagu?— cha.

¹⁶ Inchene Josébe:

—Nabe nai nunelan lab uñar cha. Chu ubisha ashib warai ñibe tiusmanda eshkabsrumuguh— chiben, ¹⁷ tru møøbe trenchibig køn:

—Yugurrimbe chab ambubguen indig køn cha. Inchendø: “Dotánsrømay amrrab” taig nabe mørig køn— cha.

Inchen Josébe nunelan lab ya, Dotán tru misag sətømera warainug kømøtø, wambig nøørøsrø wetørrabig køn. ¹⁸Inchen nømbe yabsrø arri ashabe, nømuimbulu pumøwatø, nømbe kwetchab waminchibelø køn. ¹⁹Incha kangurri kangurri trenchibelø køn:

—Ñimguen asay cha, tru piainabiibe øsrø arrun cha. ²⁰Møimbe amrrui chibelø køn, kweecha, kan aljibe laligu kegutchab cha. Incha: “kan namig usha kweecha, main køn chinrrab” cha. Er nui piailøbe maig indashchab— chibelø køn.

²¹Inchen Ruben iigwan møra, nømui taskabe chi marmørrai isua:

—Kweechimugun chibig køn. ²²Ñimbe ani lushmøtø, mu misag warab waraimønug aljibe lalig pasrabnug kegutsay chibig køn. Inchendø ñimui taskabe chi marmøtø— cha. Rubénbe øyeeg chippe, Joséwane katøle wesrawa, møskaweisrø pegutchab isuig køn.

²³Inchen José nunelaimbulusrø pubene, nømbe Joséwane tru nø pala itøguewa pasraig tab tsurøzhigwane kerrawa, ²⁴nune kemøra, tru pi wesramig trab lalig pasrabigu keguchibelø køn. Inchendø tru trab laliibe chi pigaig pur pasrabig køn.

²⁵Inchabe yandø nømbe manrrab purramisrøbelø køn. Inchen nøm ashene, Galaad-srøngurri kan sətø ismaelitasmera amrruptinchibelø køn, camellosmerayu niisrar larrø may irrabzheelø, balsamo køben, mirra køben tru Egiptosrømay.

²⁶Inchen Judábe nui nunelan trenchibig køn:

—Namui nunewan kweechabe, chi mariasamø cha, kweecha tre marigwan søratø tøgaguabe. ²⁷Trembe ismaelitasmeran yangun chibelø køn. Namui taskabe chi kaig marmørrab cha, kaguendø nøbe namui yaundøwei namui nuneg køn— cha. Inchen nuneløbe trumay kørømisrøbelø køn.

²⁸Inchen tru madianitasmera chine penab, yanøb inchibelø amrruben, Joséwei nuneløbe tru aljibe trab lalig pasrabigugurri wesrawa, pib tratrø an pitiswei yanøbelø køn. Øyamay Joséwane Egiptosrømay srua ambig købig køn.

²⁹Indig yanayu Rubénbe tru aljibe trabsrømay arrubene, møimbe Josébe yandø mugaagøptinchen, nøbe isuptø nui kewa pasraigwan kølsrøptinchibig køn. ³⁰Incha nunelan trenchinrrab ibig køn:

—Yandø matsinube mugaagøn cha. ¿Nabe møimbe chindamer?— cha.

³¹Incha nømbe kan cabro uno kweecha, José pala itøguewa unigwane tru aniyu kebisha, ³²tru Joséwei kewaguig tab tsurøzhigwane møskaweimay trana ørøppe, øyeeg cha ørøbelø køn:

—Nambe øyeeg wetørrer cha, ñui nusrkawein kui, ñui nusrkawein kømui muingøtashchab tab ashchig— cha.

³³Inchen Jacobpe trunun nebua ashippe:

—Nuiwein køn chibig køn. Kan namig usha webarrua kemøra, pitis mara, mainrrun— cha.

³⁴Incha Jacobpe nui kewa kuigwan kølsra, trøsrkølig kewa, nui uno pinigwan purø yanasrøngatig isub kørømisrig købig køn. ³⁵Inchen nusrkaløba, nimbasrmeraba isumønrrai maya, maya inchib melaingucha, nøbe trunune mørøg kømui inchibig køn. Incha nusrkawan isub, kishib trenchibig køn:

—Kwabelø israb waraisrø na nøba tsunrrab yamnegatig nai nusrkawane isub tøga kømønrrun— cha.

³⁶Inchen Egiptosrømbe tru madianitasmerabe tru Josewane Potifarwan yanøbelø køn, tru Faraon lutø tranigwan marøb pasrabig, tru suldaumera reywan chigøben kømønrrai ashib pønrrabelan nø asha karub pasrabigwan.

38

Judaba Tamarba

¹Tru urassrø Judábe nui nunelan mendamisra, kan Adulamsrø møwei yausrø tsunrrab ibig køn, Hira taigweisrø. ²Incha trusrømbe kan cananeo Súa taigwei nimbasrwan srain kønrrai kabgucha, truigwan nui srain mara, pailø kibelø køn. ³Inchen tru ishuube kwanrriig kørømisra, truigwei kan nusrkai tøgagua, truigwane Er cha wamig køn. ⁴Incha katø wendø kwanrriig kørømisra, katøgan nusrkai tøgamisra, truigwane Onán cha wamig køn. ⁵Incha katø maya yanayu køsrøn katøgan nusrkai tøgamisra, truigwane Sela cha wamig køn. Truipe tru unan tøgagøb urasbe Kezibsørø tsuig kuig køn.

⁶Indiibe Judábe tru nui mayur nusrkai Erweimbe srai labig køn, tru Tamar taigwan. ⁷Inchendø tru Er Judáwei mayur nusrkaimbe Jehováwein kabyu larrø kaig kuig køn. Inchen Jehovábe nui øsig unigwan kerraptindig køn.

⁸Inchene Judábe tru Onánwane trenchibig køn:

—Ñui nuneg kwabigwei srawan kasharamø kømø, kasharau cha, ñui nuneg kwabig ñigurri ureg tøgagøb kønrrain— cha.

⁹ Inchen Onánbe tru ureg kal-labeløbe nuin kuentailø kòmønrrab kui asha kua, nui nuneg kwabigwei sraimba kib waramisri morig, kwanrriig kòrròmismønrrai pirautø, pirautø lushibig køn, nuneg kwabigweyasig chi ureg kaanrrai. ¹⁰ Inchen Jehováwane treebe chigucha tabig asønamben, truigwangucha øsig kuigwan kerraptindig køn.

¹¹ Inchen Judábe tru nui yerna Tamarwane trenchibig køn:

—Ñui mōskawei yau kasharamø, ka tsunrrig cha, nai nusrkai Sela kølig misramne. — Inchenø Judabe treeg isubig køn: ‘Inchippa Selagucha nuneg kwabelø lataitøwei kwanrraitamab.’ Incha treekkurri Tamarbe nui mōskawei yausrø tsunrrab ibig køn.

¹² Indig yandø yana puraiben, tru Súai nimbasr tru Judáwei sraimbe kwabig køn. Inchen nøbe yandø tru isubig puraiben, Timnat pueblørømay ibig køn, tru nui ubisha isig parøbelø waraisrømay. Inchen tru adulamita Hira taig tru nuin linchibiibe nune lincha ibig køn.

¹³ Inchen Tamarbe tru nui sueeru Timnatsrø nui ubishameran isig partrab yan taig wammørabe, ¹⁴ tru piuda kòrròmistra pala keegwan wesrawa, incha muguiguen ashmønrrai maløwan pinøgasraitøga nøbe pinøgasra, Enaim kebambi yaskabu wamisrøbig køn, tru Timnatsrømay amrrab ambi mayuhke. Inchen nøbe øyeg marøppe, tru Selabe yandø kølig kui asha, treeg marig køn, inchen køben, nune tru Judábe nune tru nusrkaimba kasharanmuben.

¹⁵ Inchen Judá truigwan ashabe, nøbe kaig maramig asrwan anwei yanøb ishug kuitamab isubig køn, kaguen nøbe maløwan pinab kasraig waben. ¹⁶ Inchen nøbe tru nui yerna kuitamab isumøtø, may menda waben kemallabe, trenchibig køn:

—Ñiba kigun— cha. Inchen nøbe:

—Ñiba, naba treeg maramig, na, øn tamibe ¿chi tranrunrragu?— chibig køn.

Inchene nøbe trenchibig køn:

¹⁷ —Nai ubisha sètømerayugurri kan cabro-unøzhig trana øramønrrun— cha.

Inchene nøbe trenchibig køn:

—Kan chigøsrøn ñuiwan kòrrømartra cha, ñi tru tranrrab misrigwan na utamnégatig.—

¹⁸ Inchene Judábe trencha payibig køn:

—¿Chi kòrrømaramø?— cha.

Inchene nøbe trenchibig køn:

—Ñui sellon tru ilin tsiwanbañau, tru pøtøtain tsig ñui tasku srua pasraigwanba kòrrømartra— cha.

Inchen Judábe truilan tranabe, tru Tamarba kib waramisra treeg maren, nøbe kwanrriig kòrrømisrig køn. ¹⁹ Incha nøbe kurra, truyugurri yabe, tru malø kasraigwane pinøsrúa, tru keg kaig kòrrømisra kewa unigwan katø kebig køn.

²⁰ Incha mas wendø tru Judábe tru nui tab linchibig adulamitan tru cabro unan trana ørøbig køn, tru ishuwan tru nuyelan trana kòrrømariilan katøle utønrrai. Inchen nøbe tru ishuwane wetørranrrab kaimaptinchibig køn. ²¹ Inchen nøbe truyu warab misaameran trencha payibig køn:

—¿Peg møgueløba kaig marøb ishug tru Enaim may menda wabiibe chu wah?— cha

Inchen nømbe trenchibelø køn:

—Peg møgueløba kaig marøb ishuuma yube mumaganug køn— cha.

²² Inchen tru møøbe katøle Judá waisrømay yabe, trenchibig køn:

—Nabe truigwane wetørranrrab kaimar cha. Inchagucha truyu warab møgueløbe nane trenchitan cha: “Yube peg møgueløba kaig marøb ishuube mugaaguig køppeh”— cha.

²³ Inchen Judábe trenchibig køn:

—Kerriguba ka tøga kòrrømisrbashshu cha, namun ke chinetø chib indza asiinab pønrramig kòmønrraimbe. Inchenø tør kørnrain cha, nabe cabro unane tru ishuwan trana øren, tru ishuwane ñibe wetørramigwan— cha.

²⁴ Indiibe yandø pøn pøl puraibene, Judáwane trencha eshkaptinchibelø køn:

—Tamar ñui yernabe kaig marøb uña, treeg marøb unigu kwanrriig misrin køn cha, nui asrwan anwei yanøbig lataig misra waikkurrindø.—

Inchene Judábe trenchiptinchibig køn:

—Nune wesrawa, parray— cha.

²⁵ Inchen yandø tru møgueløbe nun pattrab wesranrrab amben, nøbe nui sueerune trencha ørøbig køn:

—Nabe kwanrriig misra pasrappe, tru na i srúa pasrailan nan tranøbigwei kwanrriig misra pasrar” cha. Inchabe katø trenchibig køn: “I sellon tru ilintsiwanbañau, i tsigwanba, muin køtashchab ash” cha.

²⁶ Inchene Judábe nuin kui ashabe, trenchibig køn:

—Nøbe sølgandø tabigwan maren, nagueen kalø marøbrain køn cha, nai nusrkai Selaba nabe nun kasharanmub.— Incha nøbe tru ishuuba katølebe kimuig købig køn.

²⁷ Indiibe yandø Tamarwan unø tøgamisramig puben, mømibe parchig tøgagig købrain kui wetøbeñibig køn. ²⁸ Inchen tru yandø kal-lanrrab inchen tru parcheeløyu kane tasiizhi-imerrig kal-laptinchen, patsø kørørøøbiibe unai tasiizhigu pigø tsiizhig lichiptinchibig køn trenchib: 'Imerrig webarrig køn' chib. ²⁹ Inchen unøbe tasiizhigwan katø kesruben, kanzhiimerrig kal-laptinchibig køn. Inchen tru patsø kørørøøbiibe trenchibig køn: '¡Mandø incharre puraarruh!' cha. Inchagurri unane Fares cha wamig køn.

³⁰ Inchen trugurrimbe tru nui nuneg tru tasiizhigu pigø tsi litsig kal-labig køn. Incha truigwane Zera cha wamig køn.

39

Joséba Potifarwei Sraimba

¹ Joséwane Egipptosrømay srua amben, kan egipcio Potifar taig ismaelitasmeran Joséwane penabig køn, trusrømay truilø srua amrruin køben. Inchen Potifarbe tru Faraon lutø tranigwan marøb pasrabig nuig, tru suldaumera reywan chigøben kømønrrai ashib pønrrabelan nø asha karub pasrabig køn.

² Jehovábe Joséwane tarømisrmø nøba pasrøben, chi mariiløtøgucha tabiitø, tabiitø pub iben, nøbe tru egipcio tru nun penabigwei yau wabig køn.

³ Incha tru nun karub pera pasrabiibe Jehová Joséwane chi mariiløyutøgucha merraptø webinrrai mari ashibig køn. ⁴ Øyamay tru Potifarbe Joséwane chi isumgaig larrø tabikkui asha, Putifar nø chi palai waben trunun ashib pasrønrraimba, katø nui yau chigurrimbunø tøgaguilan nø ashib pasrønrraimba treeg kørømarapa pasra, nø chigurrimbunø tøgaguilan kerriguba nø asha martraí kørømarøbig køn. ⁵ Inchen yawanba nø chigurrimbunø tøgaguilanba Joséwan ashchai pasrikkurrimbunø, Jehovábe tru egipcione Joségurri mayanguen tab inchen, Jehováwei maya nuguen tabiitø nebunrrai indiibe tru egipcio kerrigu chi tøgaguimbala pasrabig køn, yau lata, wambigwansrø chi købigu lata. ⁶ Inchagurri Potifarbe kerriguba Joséwei tasku ashchaim pasra, nune chi isumig chigaabig køn. Isumig køppe, nø mab mutsamigwan trunundøh isumig købig køn.

Inchen Josébe larrø tab asr tøgagig trurrigu larrø tab møg købig køn. ⁷ Indiibe kan maya yanayu køsrøn, tru nun pena karub tøgagøbig tru Potifarwei sraimbe Joséwane chull ashib menda, trenchibig køn:

—Naba waramisrkun— cha.

⁸ Inchen nøbe treegwane marmøtø, tru nun karub tøgagøbigwei srawane trenchibig køn: —Pøs, nai karubiibe yu yau chi købigwane nababe chi isumikkaig pasrøwa, treekkurri chi købigwan kerriguba nai tasku ashchai pønsraig køn cha. ⁹ I yaube natøwei mas nuig kur cha, chiwanguen ashmønrrai nane meriibe chigaagøn cha, ñundøh na chi asamig kømønrrai nøørø køn taig køn cha, kaguende ñibe nui srain kuimba. ¿Nabe nune øyeeg kaig marøb mandø pasramø cha, Tiuswan purø trømbøig marøb?—

¹⁰ Inchen ishuube kwalømmørig, kwalømmørig Joséwane 'naba waramisrkun' chib, nuimbulu lincha wanrrai inchib maya, maya treendingucha, Josébe treegwane kandø, kandø ka chib, webib, webig ibig køn.

¹¹ Indiibe José kan kwaløm yau nui chi maramigwan martrab kebibenba, truyube mugucha kaaben, ¹² ishuube nui kewa pasraigu kemørøppa trenchiptinchibig køn:

—Naba waramisrkun— cha.

Inchene Josébe tru nui kewa pasraigwane nui tasku srua pasrønrraindø yangurri weluløppa iptinchibig køn.

¹³ Inchen Josébe tru nui kewa pasraigwane nui tasku kørømisrtraindø welula yai ashippe, ¹⁴ yau tru karuig mendig melabelan wamabe, trenchibig køn:

—Au, ñinguen asay cha, tru nai keg kan hebreo pera arriibe namune ke kan chigucha kømeeleø kui lataig mara kørømartrab ka treetø arrin køn cha. Nainug kebarrua, nan kemørtrab inndan cha. Inchen nabe truba truba mur trashiben, ¹⁵ na truba mur trasai ashippe, nui kewaguigwan naimbulu tsumnetø, luløptindan— cha.

¹⁶ Incha tru ishuube tru José kewaguigwane nui keg yau pumnegatig trarra wawa, ¹⁷ kewangucha treetøweih chib eshkabig køn:

—Tru hebreo ñi karub tøgagømig pera arriibe nane kan larrø kaig kui lataig kemøra ka kaig martraptø arrin køn chib. ¹⁸ Inchen nabe truba mur trashiben, nui kewaguigwan naimbulu tsumnetø weluløptindan— cha.

¹⁹ Tru "ñi karub tøgagømig peniibe nan øyeeg martan" chib, sraimbe Potifarwan øyeeg chib eshkaben, nøbe truba trømbøig namabig køn. ²⁰ Inchen tru Joséwan penabiibe reyweimburab kalø marøbelan kemøra keeriilø purramnug, Joséwan truyu keera wannøbig køn.

Inchendø Tru Kailan Keeri Yaugucha

²¹ Jehovábe Joséba pasrøwa, nui lastima asigwane kenamarøbig kenamara, tru keerin pønrrabelan ashib pasrabikken nune chi isumgaig larrø tabikkui ashchai, Jehovábe treeg marøbig køn. ²² Inchen tru keeri pønrrabelan nø karubiibe, tru mayeelø keeriilø pønrrabelan José nø ashchai pasren, katø truyu chi asha maramelane kerriguba José nø asha marøbig køn. ²³ Inchen tru keerin pønrrabelan nø karubiibe chi isua asamikken palømiég køn, José nø asha marøb pasraigwane. Kaguende Jehovábe Joséba pasrøwa, nø chi mariilane merraptø, merraptø webinrrai marøbig køn.

40

Piailøbe Øyeeg Chib Køn Cha José Tørrarøb

¹ Indig øyeeg chab purayaig yandø yana køben, reywan mutchai srørrøb pasrabiiba, reywei pirri marøbiiba, nømui karubig Egipcio reywane namishibelø køn. ² Inchen Faraónbe tru i pagatø nørreelan nø lutø tranigwan marøb pønrrabelan namabig køn, tru vino srørrøb pønrrabelan nø asha karubigwanba, tru pirri marøbelan nø asha karubigwanba. ³ Incha tru suldaumera reywan chigøben kømønrrai ashib pønrrabelan nø asha karubigwei yau nømunne keera purrønnobig køn, tru Joséwan keera wanninuutøwei.

⁴ Inchen Faraónwan chigøben kømønrrai ashib suldaumerai nø karubiibe tru pagatø nørreelan keeriilane José nø asha purugub pasrøbig køn.

Inchen truiløbe kan maya yanagøsrøn truyu keeriilø purrøwabe, ⁵ tru pailø nørreelø tru lutø tranigwan marøb, katø tru reywan vino srørrøb pasrabiiba, tru pirri mara srørrøbiiba tru keerin purrabeløbe kan yem nøm kan kan piaig tøgagøbelø køn, tru piailøbe møitøgucha peg, peg eshkabig.

⁶ Inchen Josébe løtsø nømun ashchab ibene, nømbe truba truba isuilø purraptinchen, ⁷ nøbe trencha payibig køn:

—¿Ñimbe møimbe chindimbarre ke peg misriilø purrøgue?— cha.

⁸ Inchene nømbe trenchibelø køn:

—Nambe pailøba piailø tøgagøbendø, muguen kan øyeeg køn cha eshkanrabiibe mu-gaagøn— cha.

Inchene Josébe trenchibig køn:

—¿Piailan ‘øyeeg køn’ chinrabiibe Tius nø kømuitarru? cha. Er eshkarra pøs— chibig køn.

⁹ Inchen copamerayu srørrøbelan nø asha karubiibe trenchib eshkabig køn:

—Møimbe nane piappe, kan uvas tusr naim pinrrøgue pasrabiibe, ¹⁰ srarmera pøn kwailimera tøgag pasraptindan cha. ¹¹ Incha truiibe ishiižheelø wegucha, uzheelø niga tru lusrømerayube uvasmera srønna cha. Inchen nabe Faraónwei copan nai tasku muta, tru uvasmerane tru copayu sunna, trugurrimbe natøwei Faraónwei tasku tranøb pían— cha. ¹² Inchene Josébe trenchibig køn:

—Tru pøngatø srarmerabe pøn kwaløm køben, ¹³ pøn kwalømyube Faraónbe ñi chi kalø marigwan ulø paymøtø, katøle ñune ñui lutøyutøwei pasren, ñibe Faraónwan katøle vinon srøttrabguen cha, maramigwan maig marøbig købig kuig treetøwei. ¹⁴ Inchen ñun treg tab kørrømarene, trube, nan isurrunrrig chibig køn. Tiusmanda nan lastima tøgagua, Faraónwan waminchunrrig cha, nan yugurri wesranrrai. ¹⁵ Kaguende nane hebreosmerai pirausrøngurri nane namiimay merrarrawa, srua amrruig køn cha. Nabe yu Egipto pirau chigøben kalø mara kømur cha, na yu merrarrawa keerig wamig.—

¹⁶ Inchen tru pirri marøbelan asha karub pasrabiibe tru piaigwan ke chi isumgaig tabig øya kønrrun chib eshkain kui ashabe, trenchibig køn:

—Naimburappe nane treg pían cha: Nai turbalabe pøngatø tasin-ureemera chi pirrimera køben tøgag pønrrøbashib. ¹⁷ Inchen ke pala srabesø pasrab tasinyube, Faraónweyasig chine larrø may pirrimera sulu tøgag pasrøbendø, illimera tru nai turbala tasin pasrabiguigwan mabashib.—

¹⁸ Inchene Josébe trenchiptinchibig køn:

—Iibe øyeeg cha eshkabig køn cha: Pøngatø tasin ureemerabe pøn kwaløm køn cha. ¹⁹ Inchen pøn kwalømyube Faraónbe ñui turwan paringara, kan tusryu mesringaruben, ñui asrwane illimera amrrua, ñune manrrun— cha.

²⁰ Indiibe pøn kwalømyu Faraónbe nui tru kal-lain kwalømgurri mam pila nemisrigwan trunun isunrrab marøbig køn. Incha nø lutø tranigwan marøb pønrrabelayasis truba truba kasrag waramig mara, truilai merrab tru copasyu vino srørrøb pønrrabelan nø karub pasrabigwanba, tru pirri marøbelan nø karub pasrabigwanba tru keera purrøminukkurri wesrangarubig køn. ²¹ Inchen tru copayu srørrøb pønrrabelan asha karub pasrabigwane katøle nui lutøwan tøgag pasrønrrai tranen, nøbe srøsrø maig marøbig kuig katø treetøwei copan Faraónwan mutchai yuuløb pasrabig køn. ²² Inchen tru pirri marøbelan asha karub pasrabigwane José maig purainrrun taimbala naashigu tsibasra mesrøngaruig køn.

²³ Inchen køben, tru copayu srørrøb pønrrabelan ashibiibe Joséwane isumø, kerrigu pesan-naptindig køn.

41

Faraónwan Maig Piaigwan José Tørmarøb Eshkab

¹ Indig yandø katøle srørrøb pønrrørrai pønsrai pa ila puraiben, Faraónbe kan piaig tøgagøbig køn: Nune Nilo nu pi menda papsrøbshib. ² Møimbe tru piugurrimbe trattrø y parba larrø tabelø, tsal waaramera werruptincha, junco utuwan pu mab mendabelø køn. ³ Inchen møimbe katø tru wendaube trattrø y par treetøwei waaramera larrø trømbøilø, kalargøleelø piugurri werruabe, Nilo pi menda tru srøsrø werrub waarameraim pulu pønramisrøptincha, ⁴ tru larrø trømbøilø, kalar waaramerabe katø tru trattrø y par larrø tab waaramera tsalelane mabashibgue. Inchen tru treeg piab tsuppa, Faraónbe kasraptindinabig køn.

⁵ Incha nøbe katø kibene, katøgan piaig mørøbig køn: Møimbe tirigu turmera larrø tabelø, larrø may nigar, kan tsutsiizhigutø trattrø y par weguchar, treeg nørørailø pønrrøbshibgue. ⁶ Inchen tru wendaube tru tsutsigutøwei katøgan trattrø y par weguchibelø køn, larrø pøndøzhig, tru kurag isig arrubig tustam itsilø. ⁷ Inchen tru trattrø y par larrø pøndøzheeløbe tru trattrø y par larrø may nigazheelø, larrø tabelan piñiptinchibelø køn. Inchen Faraónbe kia kasraptindinaben, nøbe piabrre tsubrain kui wetøbeñibig køn.

⁸ Inchen nøbe løtsø kia kasrappe, larrø isuig kia kurra, tru Egiptosrø mayeelø magia kusrebelø mu mana mariimigwan marøbelanba, larrø kusrebelanba mærrunrrai wamabe nui piagwan eshkabig køn. Inchendø truiløbe tru piaigwane ni møikken 'øyeeg køn' cha Faraonwane eshkanrrab kaimabelø køn.

⁹ Inchen tru copayu vino srørrøb pønrrabelan nø karub pasrabiibe Faraonwane trenchibig køn:

—Møimbe si, na chigøsrøn eshkamig tøgaguigwan eshakamubrain kuin isuptinndan cha. ¹⁰ Pøs yanaguen køn cha nam ñui karui melabelan ñi namun nama, nanba tru pirri marøbelan ashib karub pasrabigwanba, tru suldaumeran nø karub ashibigwei yau, nø ashib tøgaguilø purrønrrai namune keeringaruig købig køn cha. ¹¹ Indiibe wendø kan piaig tøgaguig køn cha, truiigwanba nanba tru yemdøwei. Inchen tru piaibe kane peg peg eshkabig kuig køn cha. ¹² Inchen truyube kan hebreo matsinan merrarrawa keerig namba waig købig køn cha, tru suldaumeran nø karub tøgä pasrabigwei karuig megabig. Inchen nambe namui piailan nun eshkabene, nøbe namui piailan øyeeg kønrrabig køn cha eshkabig køn mø piatøgucha maig kønrrabigwan. ¹³ Incha nø maig kønrrun cha eshkaig købiibe trubalawei purayaig købig køn cha: nabe nai lutøyu katøle puinabene, kanune naashigu tsibasra mesraig kuig køn— cha.

¹⁴ Inchen Faraónbe Josewan attrai wamønrrab øren, tru urastø Joséwane kalø marøbelan merrarrawa keeriinukkurri wesraben, Josébe millisigwan mullih, kewagulan yunømarøb, Faraónweimay arrubig køn. ¹⁵ Incha Faraónbe Joséwane trenchibig køn:

—Nabe kan piaig tøgagøbendø, 'øyeeg køn' cha kelarrab eshkanrrabiibe muguen kaagøn cha. Inchendø nabe wammørar cha, ñibe piaigwan wamindi mørabe, 'øyeeg kønrrab' køn cha eshkabig kuin kui.—

¹⁶ Inchene Josébe Faraónwane trenchibig køn:

—Tru treeg maramibe nainug pasrømøn cha. Faraón chi isumø pishindø tab wanrrai wam tranøb løtønrrabiibe Tius nø køn cha.—

¹⁷ Inchen Faraónbe Joséwane trenchibig køn:

—Nan piappe, nabe Nilo nu pi menda pasrøbene, ¹⁸ tru piugurrimbe waaramera trattrø y par larrø tabelø, tsalelø werruptincha, tru juncos utu pu mab køben, ¹⁹ møimbe katø tru wendaube trattrø y par treetøwei waaramera larrø trømbøgøleelø, ke tsutsiiba, kalusba-teelø, jkatø! itapteelø piugurri werrubelø køn cha. Kan managuen Egipto pirau nabe øyeeg kalargølig trømbøgøleeløbe ashmuig køn cha. ²⁰ Inchen tru waaramera larrø trømbøgøleelø kalargøleeløbe tru srøtø trattrø y par tsal waaramera pønrrabelan maptinchibelø køn cha. ²¹ Inchendø truilan mappø, mabendø, kan chigucha mamøwa lataitøweih pønrrabelø køn cha. Kaguende maig købeløbe treeg trømbøig kalargøleetøweih pønrrabelø køn. Inchen nabe kasraptindinabig køn cha.

²² Inchen nan katø piappe: Møimbe tirigu turmera larrø tabelø, larrø may nigar, kan tsutsiizhigutø trattrø y par weguchar, treeg nørøwar pønrrøbshib piabig køn cha. ²³ Inchen tru wendaube tru tsutsigutøwei katøgan trattrø y par weguchibelø køn, larrø pøndøzhig, tru kurag isig arrubig tustam itsilø. ²⁴ Inchen tru larrø pøndø tirigube tru larrø tab tirigu turmeran kebinab, kebinab piñbshib piabig køn cha. Inchen nabe tru magia kusrebelø mu

mana mariimígwán marøbelan payen, muguen truiløbe tru piaibe øyeeg chibig køn chabe eshkamøtan— chibig køn.

²⁵ Inchen Josèbe Faraónwane trenchibig køn:

—Faraónwei tru pagatø piailøbe parba trunundøwei eshkabig køn cha. Tiusbe nø maig martrab pasraigwan tru piabyu kenamarin køn cha. ²⁶ Tru truba tab waaramera tratrø y par, katø tru larrø tab tìrigu turmera tru tratrø y parbabe pilamera tratrø y parwan eshkan cha. Tru piaibe trutøwei kandø eshkabig køn cha. ²⁷ Inchen tru waaramera larrø trømbøgøleelø kalargøleelø tru tab waaramerai wendau nerrubeløba, katø tru tìrigu turmera larrø pøndøzhig tru kurag isig arrubig tustam itsiløba, truiløbe pilamera tratrø y par køn cha. Inhendø truike pilamera tratrø y par larrø trømbøig parø attrabigwan eshkabig køn cha.

²⁸ Nabe ñi Faraónwan øyeeg eshkar cha, Tiusbe nø maig maramigwan ñune kenamarøb pasran cha. ²⁹ Pilamera tratrø y par Egipto pirau muba kuimburab mamig purø misrøb pilamera kønrrab køn cha. ³⁰ Inchen katø tru wendaube pilamera tratrø y par purø trømbøig parø attrabig køn cha, truba truba mamiimera misrig købelanguen chi misruiug kui lataig pesannawa kòmguè, kaguende tru parø arrubiibe tru Egipto pirøwane purø lastimaig mara kørrømartrun cha. ³¹ Inchawei parø purø trømbøig arruptø, tru merrabwan truba truba mamiimera misrig købeløbe ni kan kenaguen kønrraamøn cha, purø trømbøig køptø. ³² Pøs, ñi Faraónbe pamay treetø, treetø piaig mørig køn cha, kaguen Tiusbe iigwan ñi asha kønrrai ¡katø! martrab pasran cha, trurrigu chi srrømmøtø.

³³ Incha treekkurri ñi Faraónbe kan larrø kusreb møg, chigui asha tab marøb møg lanrrain cha, Egipto pirau kerrigu chi maramigwan nø karub ashib tøgá pasramisrrai.

³⁴ Incha nabe trendamønrrun cha, ñi faraónbe Egipto muba kuimburab tru ellmarig tulisailan ashib amrrabelø wesrawa pønsrø cha, Egipto pirau ellmarig tulisailan cien caryasyu veintene eseganrraingue tru tratrøba parba truba truba misrøb pilamerawan.

³⁵ Tru mamig misrøbig larrø tab pilamera amrruben, tru Faraón maig chiben trumay tru ellmarig misrigwan ashibeløbe mamigwan kanbalatø tulisha, ciudadamørig esegamig kønrrun, misaamerayasis mamig kønrrai. ³⁶ Inchawei tru i esegawa pønsrai mamiimerebe, tru Egipto pirau pilamera tratrø y par larrø trømbøig parø arrubigu purugunrrun cha, trumay misaamera parøgwab kwamønrrain— cha.

José Egipto Pirau Kubenadur

³⁷ Inchen tru øyeèbe Faraónwanba tru nø karuigwan marøbelanbabe truba tabig mørøraben, ³⁸ Faraónbe tru nui karuilane trenchibig køn:

—¿Tiuswei espíritu nuinug arrua pasrainabig, katøgan øyeeg møg wetørranrrautah?— cha.

³⁹ Incha Faraónbe Josèwane trenchibig køn:

—Ñi lataig kusrebig chigui asha tab martrabiibe mugucha katøgane kaagøn cha. Kaguende Tiusbe ñune kerrigu iigwan nebua asingaruin køn cha. ⁴⁰ Ñi kønrrabig køn cha, nai purø tab yau na mubøraptø nebua karub tøgaguigwan ashib karub wanrrabiibe, nai maya misaamerabe ñi maig chiben møramig kønrrun cha; ñuimbalabe natøh mas nuig kømønrrun cha, kaguende nabe rey kuikkurri.—

⁴¹ Incha Faraónbe Josèwane trenchibig køn:

—Nabe ñune Egipto pirau kerriguba ñi asha karub wanrrai neera wannar cha, naimburø ashib wanrrai.—

⁴² Incha Faraónbe surtigas sellobañauigwan nui taskugurri wesrawa, Josèwan pasrøbig køn. Incha trugurrimbe keilø linotøga marig purø tabig kenanøb, katø kan oro naashigu iløsrøb inchibig køn. ⁴³ Incha trugurrimbe tru Faraónwei wendau katøgan tru ashib karub wabig unin karruyu Josèwane nebingarua misagwan øyah chib trashinrrai karubig køn: “¡Tømbønrray! ¡Tømbønrray!” chib. Øyamay Josèbe Egipto pirau kerriguwan nø karub wanrrab nebyaig køn.

⁴⁴ Incha Faraónbe Josewane trenchibig køn:

—Nabe Faraón kur cha. Inhendø kerriguba Egipto pirauibe chi maramigwan ñi treeg martrig chimingatiibe, mugucha kønønrraamøn— cha. ⁴⁵ Incha Faraónbe Josèwane munchin yunømará Zafenat Panea cha wamababig køn. Incha Asenatwan nui srain kønrrai tranøbig køn, truike On ciudadrø sacerdote lataig Potifera taigwei nimbasrwan. Øyamay Josèbe Egipto pirøwan ashchab pasramisrig køn.

⁴⁶ Josèbe pilamera treinta tøgáig købig køn, Egipto rey Faraónwei merrab pera ambul uras. Incha Josebe rey Faraonwei merrabgurri webya, tru Egipto pirau pirø muba kuimburab ashib llirabig køn. ⁴⁷ Tru tratrø y par misrøb pilamerawane pirøbe truba truba misren, ⁴⁸ tru tratrø y pa pilamerawan Egipto pirau truba truba misrillan Josèbe tulisagarua, ciudaderasrø kan mayangøsrøn esegawa pønsrøbig køn, tru ciudadmørig tru pøtøgatanwan tìrigu trameran tulisailan truyu truyu esegab. ⁴⁹ Josèbe tìrigumera nørrø køptø kan maryu

pisrum lataig norrø tulishibig køn. Tirigu purø norrø køptø yandø mayan køn tamgaig køben, ka korrømarøbig køn, norrø køptø øyan køn chib eshkab tøgagømgagig kuikkurri.

⁵⁰ Tru parø attrab pila ke srøsrø pila pølbasmøwatø Josébe nui srai Asenat, tru Onsrø sacerdote Potiferai nimbasarba, pagatø ureezheelø tøgaguig køn. ⁵¹ Incha mayur nusrkawane Manasés munchi pasrig køn, kaguende nøbe trenchibig køn: “Nai møskawei yaugurri webya iben, chine chine nebuinab unig købigwan Tiusbe trunun isubguengaig pishindø unamig kønrrai martan” cha. ⁵² Incha tru wendau katøgan unane Efrain munchi pasrig køn; kaguendø i munchibe: “Na yeeg isuig tsuim pirausrø Tiusbe nane ureg tøgagønrrai marig køn” chibikkurri.

⁵³ Inchen tru Egipto pirau mamig larrø misrøb pilamera trattø y par chab puraiben, ⁵⁴ José maig eshkaimbala tru purø trømbøig parø attrabig tru trattø y pa pilamerabe yandø kebibig køn. Inchen chu pirausrøndøgucha parø arrub mendøben, trune Egipto piraube muba kuimburab mamig købig køn. ⁵⁵ Inchen Egipto pirau kerrigu misaabe parø arrub mendi mørabe, misaamerabe Faraónwan mamig kaatan cha, miab mendaptinchen, Faraónbe maya egipciosmeran trenchibig køn:

—Joséweimay amba, nø maig taigwan maray— cha.

⁵⁶ Inchen parøbe tru pirau muba kuimburab puim pasrøben, Josébe tirigu esegaig pønrrabelømørig kura, egipciosmeran yanøbig køn. Kaguende mamig kaagøb arrubiibe chu pirausrøndøgucha, masken, maskenig trømbøig misrøb arruben. ⁵⁷ Inchen chu pirausrø misaameratøgucha Joséwan tirigu penønrrab amrrubelø køn, kaguen tru parø arrubiibe yandø munaørøba arrub pasrøben.

42

Joséwei Nunelø Egiptosrø Mamig Lanrrab Ambub

¹ Inchen Jacobpe Egiptosrømbe mamiimera køn tai wammørabe, nui nusrkalane trenchibig køn:

—Mailø køh cha, kangurri kangurri asiyab purrønrrappe. ² Egiptosrømbe mamig køn tai wammørar cha. Trusrømay kørraamba, namuyasig mamig penay cha, kwamø, øsig waramig kønrraimbe.—

³ Inchen tru Joséwei nunelø tru pa trattøreløbe Egiptosrø mamig penønrrab kørraambubelø køn. ⁴ Inchendø Jacobpe tru Joséwei nuneg Benjaminwane ørmig køn, tru nui nuneløba: “Inchippa mayu chigøbendø nebugun” cha. ⁵ Inchen Israelwei nusrkaløbe mamig penønrrab ambubelø køn, tru katøganølø penønrrab ambubeløba, kaguende Canaán piraube parø purø trømbøig pasrøben.

⁶ Inchen Josébe tru pirau nø ashib karubig købig køn, katø chu pirausrøelan køben maya misaameran tirigu yanøbig. Inchen Joséwei nunelø trusrø puabe, nømui kappalømeran pirausrøngatig kebachib utsøbasrøbelø køn. ⁷ Inchen Josébe tru urastø nømmune nui nunelø kui møi møi nebua ashibig køn. Inchendøgucha ashmig misrøppa, nømmune purø tsag waminchib trencha payibig køn:

—¿Ñimbe chugurri amrruge?— cha.

Inchen nømbe:

—Canaán pirausrøngurri tirigu penønrrab amrruer— chibelø køn.

⁸ Inchen Josébe nui nunelø kui ashen, nømgurrimbe ashmeelø køn. ⁹ Inchen Josébe nun tru nømuimburab piaig købigwan isuptinchibig køn. Inchabe trenchibig køn:

—Ñimbe i pirau kwayanrrab mubørab mas may kegørramdiig køtashib ka larønrraptørre amrrun— cha.

¹⁰ Inchen nømbe trenchibelø køn:

—Ñi, namui karubig, chi treeg kømøn cha, nam ñui karuig melabeløbe tirigu penønrrab amrruig køn cha. ¹¹ Nambe mayeeløba kan møskaweindø nusrkalø ker cha, nambe chigøben kalø marøb pønrrømø misaamera, nam ñi karuig melabeløbe maisrøn køtashib kalø martrab larab amøñimø misaamera ker— cha.

¹² Inchene Josébe trenchibig køn:

—Kah cha, ñimbe i pirau kwayanrrab mubørab mas may kegørramdiig køtashib trunun ashchaptøwei amrruin køn— cha.

¹³ Inchen nømbe trenchibelø køn:

—Nam ñi maig chiben pønrrabelø pa trattø y par købelø kuig køn cha, nambe søteeløba kan møskaweindø nusrkalø Canaán pirau tsubigwei. Inchen mas unøbe namui møskaimba kørømmisren, kane yandø pinig mugaagøn— cha.

¹⁴ Inchen Josébe katøle trenchibig køn:

—Na maig taig ñimbe maisrøn køtashchab nilø ka larønrraptørre amrrun cha. ¹⁵ Incha isa kømø, ñimui wamindig cierto kuitashchab Faraónwei merrab, ¡katø! nabe øyegg

maramønrrun cha, trendamønrrun chibig køn, ñimui wendø nuneg-unan yumay pera amrrumuingatiibe ñimbe yugurrimbe webamrraamøn cha. ¹⁶ Ñim møigwan køben øray chibig køn, tru ñimui wendø nunewan pera attra. Inchen katøganelane keera purrønniilø purrønrrain cha, trumaybe asamdiig kønrrun cha ñim sölwan waminchibelø kuin kui.

Inchen ka isatø indin kuisruandøbe, ñimbe maisrøngøtashchab ka larønrraptørre amrruar køn cha, nabe Faraønwei munchiyu trendamønrrun— cha. ¹⁷ Incha tru nøm pa trattreelane Josèbe pøn kwaløm ørøba keerig purrønrrai marøbig køn.

¹⁸ Inchabe pøn kwaløm puraibene, trenchibig køn:

—Nabe Tiuswane larrø køriibala pasrabig kur cha. Øyamay maray chibig køn, ñim øsig webamrrappe: ¹⁹ Ñim isa kømø, chigøben kalø marøb pønrrømø misaamera kuabe, møikkøben ñimui kanunewan keera awannig kørørmisra wanrrain cha. Inchen kaneløbe ñim ñimui ya misaameran parø purørmønrrab mamiimera srua ambay cha. ²⁰ Incha ñimui wendø nuneg-unan pera amrrunrrigay cha. Trumaybe isa kømø ñimbe sölwan waminchibelø kui asha, ñimbe kwamig kømønrrun— cha.

Inchen nømbe treegwan martrab kørørmisrøbelø køn.

²¹ Inchabe kangurri kangurri trenchibelø køn:

—Isa kømø, nambe namui nuneweimburab larrø trømbøig kalø marig køn cha. Pøs øyeekkatiibe marmørunrrigay chib nø namun truba truba trenchib megaben, nambe trendaigwane ni mørøkkuinguen kømuin pønrraig købig køn cha, yeeg lastima isui indi ashatøgucha. Truburø mømibe øyeeg isuin pønrramig namuimbala itøarrin pønrrer— cha.

²² Inchine Rubénbe trenchibig køn:

—Unane chi kaig marmøtay chiben, ñimwei nan mørmuig køn cha. Møimbeguende namune nui animbe ulø payinab pønrramig kønrrab køn— cha. ²³ Inchen Josèbe nø wamindi wamwan nui nunelan katøburø lliska waminchabig katøgan pera pasrabig køn. Inchagurri nuneløbe nøm chi chib pønrrailane Josèbe mørøb pasraitamappe isumeelø køn.

²⁴ Inchen Jøsebe nømuim pulugurri tarømisra ya, truba kishababe, trugurri katøle nømuimay arrua, nømbe wamincha, Simeónwane nøøro mara, nøm ashib pønrramme lusringarubig køn.

²⁵ Incha trugurrimbe Josèbe nømui kustalmerayu tirigu netsøganingarua, katøle tru nømui tiriguburø pagarai anmerane kanun, kanun tru nømui tirigu kustalyu pusingarub, katø mayuwe ishìn tamara traningarub inchibig køn. Inchen treeg marig køn. ²⁶ Inchen nømbe nømui tirigumeran burumerayu niisra truyugurri ambubelø køn.

²⁷ Incha nømbe tru kørørmisra kiamsrø puabe, møikkøsrøn nui burrun tirigu manrrab kustalwan pichene, mømibe nui anbe kustalrrigu ka wai ashiptinchibig køn. ²⁸ Inchen nømbe nui nunelan trenchibig køn:

—Nai anwane nane katøle pusrin kømøh cha. Yu nai kustalyu ka purran— cha.

Inchine nømbe larrø kørøro kwariilø, nømui manrøbe ke webørsrab lata inchen, kangurri, kangurri trendiyabelø køn:

—¿Namun øyeeg nebuinab pønrramig kønrrai kabe Tius treeg mara chinderah?— cha.

²⁹ Inchen nømbe Canaán pirausrø møskai Jacob waisrø chab puabe, nømun kerrigu chi purayaigwan eshkb trenchibelø køn:

³⁰ —Tru pirausrø karub wab mømøbe namune purø tsag wamincha, nui pirøwan maig køtashib namune larab amrruig treeg kemesrøtan cha. ³¹ Inchen: “Nambe chigøben kalø marøb pønrrømø misaamera, managuen maig køtashib larab amøñimeelø ker cha, nambe trender cha. ³² Incha katø nambe nune trenchibelø ker cha: “Nambe pa trattro y pa nunelø, katø søteeløba kan møskaweindø nusrkalø, kane yandø pinig mugaaben, srabeibe ñiba Canaánsrø kørørmisran” cha.

³³ Inchine tru pirausrø karub wab mømøbe namune trenchitan cha: “Nabe ñimune øyamay marigu asamønrrun cha, ñim chigøben kalø marøb pønrrømø misaamera kuitashchab ashchab, møigwan køben, ñimui nunewan yu naba kørømaray cha, kaneløbe nømui yauelan parø puramønrrai tirigu niisra amrrai. ³⁴ Inchendø katø amrruppe, wendø nunewan pera amrrunrrigay chitan cha. Trumaybe ñim isa kømø chigøben kalø marøb pønrrømø misaamera, ka maig køtashchab ashib ka larønrraptø amrrumuin kui asamønrrun cha. Trugurrimbe ñui katøgan nunewan elachen, ñimbe i pirau mu chi taimíg yanøb, penab amønnamig kønrrun” chitan— cha.

³⁵ Inchen tru Josèwei nunelø tru kustalmeran kwarøb mendøbene, nømui kustalmørig kan talegu-unøzhigu nømui tru tiriguburø pagarai anbe ka purraptinchen, nøm lata, nui møskai lata tru an pusri talegu-unøzhigwan kura ashabe, purø kørig isubelø køn.

³⁶ Inchine møskai Jacobpe nømune trenchibig køn:

—Ñimbe nane yandø chi nusrkaløgaig kørromarøb amrrutan cha. Josébe yandø pinig mugaaben, Simeóngucha mugaaben, mømibe Benjaminwan pera amrrab indan cha. Iibe kerriguba naimbalatø pureb attan— cha.

³⁷ Inchen Rubénbe møskawan trenchibig køn:

—Benjaminwane na ashchur cha. Na Benjaminwan ñuimay katøle pera pumubene, nai pagatø nusrkalan kwetchig— cha.

³⁸ Inchene Jacobpe trenchibig køn:

—Nai nusrkaimbe ñimba inrraamøn cha. José nuneebe yandø kwaig mugaaben, mømibe nøtøwein kørromisra Megan cha. Mayu chigøben kaig nebubene, chi martrague cha, trube, ñimgurrindø kønrrun cha, køllig waacha isubigutø kuabene.—

43

Benjamínwan Pera Joséwei Nuneløbe Egiptomay Katø Ambub

¹ Inchen tru piraube parøbe masken trømbøig misrøb arrubene, ² tru Egiptogurri srua amrruin tirigube yandø chab patsøbene, møskaimbe trenchibig køn:

—Egiptomay katøle amba, namuyasig tirigu nubah penørrrigay— cha.

³ Inchene Judábe trenchibig køn:

—Tru møøbe namune ¡katø! ke kandø cha pasrig kuig køn cha: “Tru ñimui wendø nunewan ñim pera amrrumingatiibe trube, nan kuimbe kenamismørrunrigay” cha.

⁴ Ñi namui nunewan ka pera ambasheneh, trube, nambe ñuyasig mamig penørrrab kørraambamønrrun cha. ⁵ Inchen ñi namun nun pera ambashmubene, trube, nambe ambamig kømønrrun cha. Kaguende tru møøbe namune trendaig kuig køn cha: “Ñimui nunewan ñim pera amrrumingatiibe trube, kenamismørrunrigay”— cha.

⁶ Inchene Israelbe trenchibig køn:

—Ñimgui nane purø trømbøig kalø mariitan cha. ¿Tru møwane katøgan nuneg tøgaguer chabe, chinchabrre eshkainguaasamørra?— cha.

⁷ Inchene nømbe trenchibelø køn:

—Kaguende tru møøbe namuimburappa, namui yaelaimburappa ke chine tab, tab payibig køn cha. Inchabe trenchibig køn cha: “¿Ñimui møskaimbe ka øsig wabig køh? cha ¿Ñimbe katøgan nuneg tøgagøgueh?” cha. Pøs nambe, nø mancha payiilan ka lötamiitøwein kuig køn cha. “Ñimui nunewan pera amrrunrigay” chinrraitamappe, ¿kan nambe mu isua pønrraig køtah?— cha.

⁸ Inchene Judábe møskai Israelwane trenchibig køn:

—Matsinane na asamønrrun cha. Matsinane naba ka ingaru cha, nambe yandø ambamønrrun cha, ñi lata, nam lata, namui ureemera lata kwamønrrappe. ⁹ Chi kømønrrai nune na asamønrrun cha. Na yumay nun katøle pera arrumuinabene, trube, nagurrindø kønrrun cha, na chu uraskatig nai øsig tsuigu. ¹⁰ Inchawei namun øya srarrøbashmuig kuinguen, katøguen amba pubsruiinrrun— cha.

¹¹ Inchen møskai Israelbe trenchibig køn:

—Pøs mumay katøgan peemay maramdiig chigaaguig købene, trube øyamay ka maray cha: Ñimui kustalmerayu tru møwei ketamelø i pirau chigøben tabig misriilan srua ambay cha, kan lamø bálamo køben, lamø miel køben, mayzhig irrabelø køben, mirra køben, nucees køben, almendras købengue. ¹² Angucha srua ambuppe, maya srua ambig kømnetø katø treetøweih srua ambay cha. Ñimui tirigu kustalyu tru anmeran katøle pusrig købigwane tranrrab katøle srua ambay cha. Inchippa pella treenchib kuin købgun cha. ¹³ Incha ñimui wendø nunewan pera, tru Egipto pirau nø karub wabigweimay katø ambay chibig køn. ¹⁴ Maramburab Marøb Tiusbe tru møj ñimun lastima tøgagønrrai martrain cha. Inchen ñimui katøgan nunewan lelachen, Benjamíngucha katø ñimba ashibigwane trenchibig køn: Inchen nan nai nusrkalan trubisamig nebubene, chinchibig kui ¡ka treeg nebunrraita!— cha.

¹⁵ Inchen nømbe tru ketamelanba, katø angucha maya srua ambig kømnetø katø treetøweih srua, Benjamínwan pera, Egiptosrømay kørraamba, Joséwei merrab pubelø køn.

¹⁶ Inchen Josébe Benjamín nømba arrin kui ashabe, tru nui yau ashibigwane trenchibig køn: —I møguelan nai yamay pera ya, kan waara kweecha tamaray cha, kaguen i møgueløbe kwaløm tøbøtaabe naba manrrab køn— cha.

¹⁷ Inchen tru møøbe José maig taigwan mara, Joséwei yamay nømune pera ibig køn.

¹⁸ Inchen nømbe Joséwei yausrømay pera ambi mørabe, kørro køriimata trenchibelø køn: —Marig merrabwan namui kustalmerayu tru anwan katøle pusrikkurri namune pera ambiinrrun cha. Mømibe namune merrarrowa, chigøben maramba, namune øyeeg, øyeeg mara pønrran tamba, katø namune nømui karua srua kuilø kønrrai maramba inchantan cha, namui burrueranbañau.—

¹⁹ Incha yandø kebambi yaskabu puabe, tru Joséwei yawan ashibigwan nømbe waminchab kemallabe, ²⁰ trenchibelø køn:

—Tiusmanda, namui karubig, nambe tru srøtø kørørruppe tirigu penørraptø kørørruig køn cha. ²¹ Indiibe tru nam werrua amrrua, tru yem kørørramisramsø puabe, namui kustalmeran kura ashene, mømibe tru tirigu kustalmerayube møilaindøgucha namui anmerabe kerriguba ka purrattindin køn cha, maya anaasiibe, treekke. Mømibe nambe tru anwan tranrrab katøle srua amrruer cha. ²² Incha tirigu penamig anbe katø srøig sruamrruer cha. Inchendø nambe tru srøsrø srua amrrui anwane kustalmerayu mu kebusri mørmer— cha.

²³ Inchen tru Josewei yau chi købigwan nø ashibiibe trenchiptinchibig køn:

—Chi isumøtay cha. Chi korig isumøtay cha. Niumi Tius, katø niumi møkawe Tius nøbe niumi kustalmerayu tru anwan pusriinrrun cha. Nabe nium pagarai anwane utig kuig køn— cha. Incha tru Joséwei yau chitø tøgaguilan ashibiibe Simeónwan wesrawa, nøm purraisrømay pera arrua, ²⁴ trugurrimbe José waisrømay pera ya, nømui srømmeran kwalamig pi tranøb, burrumeran mannamig pønsrøb inchibig køn. ²⁵ Inchen nømbe ketamelan tamara, José israyu punnegatig muniirabelø køn, kaguen mamuibe truyu kønrrabig kui nømbe wammøra purrøwa.

²⁶ Inchen yandø José yau pubene, nømbe tru ketamelø srua amrruilan keta, nømbe Joséwei merrab pirausrøngatig maløwan trarrøb utsøbasrøbelø køn. ²⁷ Inchen Josébe payibig køn:

—¿Maig meløgue? cha, ¿Tru nium wamindig niumi møkai kølli misaazhikkan katøgucha ka øsig wabig kuitarru?— cha.

²⁸ Inchene nømbe trenchibelø køn:

—Tru namui møkai, nium maig chiben martrabiibe, chigucha kømø, tab ka wan cha. Ka øsig wabig køn— chabe, nune tab indig kønrrai utsøbasrøbelø køn.

²⁹ Inchen Josébe nuin pøtøgatan ashabe, tru kan møkaindø, kan usrindø kuikkurri nuimbe trag nuneg Benjamín pasrai ashabe, trenchibig køn:

—¿I tru niumi wendø nuneg kuitarru cha, tru nium nan wamindig?—

Inchabe trenchibig køn:

—Tius maya nuguen nium tab indig kønrrain cha, nai nusrkai.—

³⁰ Inchen nui nunewan ashene, kishig købiibe yandø pasramgaig køben, Josébe mallatø webya, nui kwartuyu kebya, kisamburab kishibig køn.

³¹ Incha yandø awentawa, nui maløwan kwalla, webarruabe, trenchibig køn:

—Mamiimera nøm manrrai pønsray— cha.

³² Inchen José mab wamisramibe nøørø køben, katø nunelane nøørø tamara purrønana, egipciosmera tru Joséba mabelane katø nøørø mab purramig tamarøbelø køn, kaguende egipciosmerabe nøm kørewa tøgaguigube hebreosmerababe trubalatø purramisra mamig kømfig kua, kaguen nømuiimbe treebe larrø trømbøig købig køben. ³³ Inchen Joséwei nuneløbe nui merrab purrabelø køn, José maig purramisringaruben, treekke. Kerrigu mayurmer- rig, trugurrimbe tru wendauig treetø, treetø nøm maya yanailø køben, trumay treg purrønøbig køn. Inchen nømbe truba kwaariilø purrabelø køn, nømbe jkatø! kangurri, kangurri asiyab. ³⁴ Incha Josébe tru nui mishatsigu chi mamiimera pønsraigwan tru mamiimeran nømun pirishibig køn. Inchen Benjamínweyasiibe trattreelaimburabigwan nuyasiitø pasrøbig køn, kanelan lataitøguen kømø. Incha nømbe Joséba kanbalatø mab, muchib truba truba kasraarabelø køn.

44

Josewei Copa

¹ Incha mas yanayu Josébe nui yawan ashibigwan trencha karubig køn:

—Tru møguelai kustalmerayu maya kemnegatig tirigun netsøganay cha. Incha nømui pagarai anmeran tirigu kustalmerayu trumørig pusrrig cha. ² Incha tru wendø nunewei tirigu kustal trigube nai copa andøga marigwan wayrrig cha tru tiriguburø nø an pagaraig-wanba kanbalatø.—

Inchen tru yau ashib wabiibe José maig karuigwan marøbig køn.

³ Inchen yandø ke chab tør-rrabendø tru møguelane Josebe ambasingarubig køn, nømui burrumeranba. ⁴ Inchen tru møgueløbe tru ciudadyugurrimbe ke tre yab ammø, srø køben, Josébe nui yau ashib wab møwane trenchiptinchibig køn:

—Tru møguelan wetøgønnrab møi møi malla inrrø cha. Incha wetøgøgabe, trenchinrrig cha: “Namgurrimbe yeeg tab inchen, niumbe chindimbarre kaig mara amgue? cha. ¿Andøga marin copan chindimbarre nila srua amgue? cha. ⁵ Nan karub pera pasrabig truyu

muchib, chi purainrrabigwan truyu nebua ashib indin copan. Ñimgui purø kalø marin køn”— cha.

⁶ Inchen tru yau ashib wab møøbe wetøgabe, José maig taigwan treetøweih chibig køn.
⁷ Inchene nømbe trencha løtabelø køn:

—¿Tru namun ashib karubiibe namune chindimbarre øyeeg chinetø tah? cha. ¡Kan! nambe managuen treekkøliibe mara kømer cha. ⁸ Yamba nambe Canaán pirausrøngurringuen tru namui tirigu kustalmerayu an wetørrailanguen katøle tranrrab srua amrruig køn cha. Ñui karubigwei yaugurrimbe mas mandø incha tru oro køben, an køben, nila srua amrrunrraitamah? cha. ⁹ Inchen nam ñui karuig melabelainug møygweinug køben, tru copan wetørrainabiibe, trube kwamig kønrrain cha. Inchen namguen ñui karuindiig melabelø kønrrab kørrømisramønrrun— chibelø køn.

¹⁰ Inchen tru yau chiwan køben nø ashib wabiibe trenchibig køn:

—Ñim maig taig treeg kønrrain cha. Tru copan wetørrainabiitøh na karub tøgagømig meganrrab kørrømisrtrun cha. Inchen ñim kaneløbe chi kalø mara pønrran tamiibe chigar kørrømisrtrun— cha.

¹¹ Inchen nømbe mallazhiitø niisraigwan chab pinøsrúa, møitøgucha kustalmeran piraú pønra tsusaigwan pichibelø køn. ¹² Inchen tru ya ashibiibe tru mayur nunewei kustalyugurri lab pølbasra, tru srabe nuneg Benjamínweisrøngatig lam mendøbene, mømimbe tru copane truigwein kustalyuh wetørraptinchibig køn. ¹³ Inchen nuneløbe nømui kewa pønrraigwan larrø isuin pønrrai ashchai kenamartrab kølsrøptinchibelø køn. Incha nøm møitøgucha nømui burrumeran katø niisra, ciudasrømay katøle chab llirabelø køn.

¹⁴ Inchen Judábe nui nuneløba Joséwei yausrø pubig køn, nøbe yau srø wamnetø. Inchen nømbe nui merrab maløwan pirausrø kebatamnegatig utsøbasrøbelø køn.

¹⁵ Inchene Josébe trenchibig køn:

—¿Ñimbe øyeebe mumay marøb pønrrøngue? cha. Kan møg chi chippe treegwan kønrrai inchibig na lataibe ñim chi kalø martrab indigwan kabe wetøbefimønrraitamagueh— cha.

¹⁶ Inchene Judábe trenchibig køn:

—Namui karubigwan, ñune ni chitamguen kømøtan cha. Mumaygucha kan treeg marmuig køn chib pønrramibe kaatan cha. Nam ñui karuig melabelainug trømbøig kalø marigwan Tiusbe kenamaran cha. Mømimbe nambe namui karubigwei karuindiig melabelø misramønrrun cha, katø tru copan wetørrainabig chigucha.—

¹⁷ Inchene Josébe trenchibig køn:

—Kan nabe treebe mana marøb pasramø cha. Tru copan nuinug wetørrainabiitøh nai karuindiig meganrrab kørrømisrtrun cha. Ñimbe chi isumø, ñimui møskaweisrømay ka ambay — chibig køn.

Judá Benjamínwan Purøwaminchib

¹⁸ Inchen Judábe Joséweimay kemallabe, trenchibig køn:

—Nai karubig, nan namumørrunrig cha. Ñundø na kan chigøsrøn chinrrab, nan tiusmanda utø ketøbsrumuguh cha, kaguende ñibe Faraón køb lataitøwei chi maramigwane martrain karubig køn cha. ¹⁹ Ñi namui karubiibe namune øyeeg chib payig købig køn cha: “¿Ñimbe katøgucha møskawan ka wannar køgueh, kabe katøgan nuneg kui tøgær køgueh?” chib. ²⁰ Inchen nambe ñi namui karubigwane øyeeg cha løtab pønrraig kuig køn cha: “Name namui møskai kølli misazhiiba, kan matsinø nuneg-unøba tøgær ker cha, trube namui møskai kølli misag køben kal-lawai. Inchagurri tru i srabeigwane møskaimbe purø undaguig køn” cha; kaguendo kan usraindø nusrkain kuikkurri kan nunebe yandø kwain kaaben, nøtø kørrømisra pasran cha.

²¹ Inchene ñi maig chiben nam treeg pønrrabelane ñibe trendaig kømøh cha: “Na ashchab tru wendø nunewane pera amrrunrigay” cha. ²² Inchen nambe namui karubigwan yamba trendaig køppeh cha: “Matsinøbe møskawane chinha elatchaamøn cha, kaguende nø elachene, møskaimbe kwanrrun” cha. ²³ Inchene nam ñui karuig melabelane ñibe trendaig køn cha: “Ñimui wendø nuneg ñimba arrumuingatiibe, trube, kenamisrørrunrigay” cha.

²⁴ Incha nambe namui møskai tru ñi maig chiben marøbigwei yausrø puabe, ñi namui karubig ñi maig taigwan nambe kerrigu eshkabelø ker cha.

²⁵ Inchene namui møskaimbe namune trenchibig køn: “Katøle amba, namuyasig tirigu nubah penønrrigay” cha. ²⁶ Inchen nambe namui møskawane trendaig køn cha: “Namui wendø nuneg arrumuingatiibe nambe chinha ambamgaig køn cha. Namun nø linchimubene, tru karubigwane asamig kaagøn” cha.

²⁷ Inchen nai møskai ñui karuig megabiibe trendaig køn cha: “Ñimbe ashibelø køn cha, nai sraimbe pagatø nai nusrkalø tøgæ misrigwan. ²⁸ Indig kane nainukkurri ya yandø

pinøben, katøbe managuen ashmur cha. Namig ushamera pitis marig kuitamab isur tan cha. ²⁹ Katø iigwangucha pera amben, katø chigøben koptinchene, na kellig waachawan isubiitøgatø kwamig kønrrai marøbeløbe ñim kønrrabguen” cha, nane trendaig køn cha.

³⁰ Nai mōskaimbe matsinø-unøbabe purø trag pønrrabelø kuig kōppe, nambe katøle amben, matsinø-unø namba arrumubene, ³¹ namui mōskaimbe nun ashmuppe, kwanrrun cha. Inchen nam kømønrrun cha, namui mōskai kōlli misagwan isubiitøgatø kwamig kønrrai marøbeløbe. ³² Incha na ñui karuig megabiibe matsinan na purøbasamisrøb na ashchab misrig køn cha, nai mōskawei merrab. Incha nabe nai mōskawane trendaig køn cha: “Na katøle ñuimay pera arrumuinabene, trube, nagurrindø kømønrrun cha, na chu uraskatig nai øsig tsuigu” cha.

³³ Inchawei tiusmanda, nabe ñun treeg marøbsrumu chinrrab cha, matsinaimburø na purøbasamisrtrur cha, na ñui karuindiig meganrrab, matsinø-unøbe nui nuneløba katø inrrai. ³⁴ ¿Nabe mandø yamø cha, matsinø-unø naba arrumubene? Trube, nane nai mōskawane larrø lastimazhig isui indi ashig kømøtan— chibig køn.

45

José Nui Nunelan Nø Muguigwan Eshkab

¹ Inchen Josébe nuim pøtøgatan pønrrabelai merrab yandø mas awentanrrab kaima, mur wamabig køn:

—¡Mayeelanba yu nai merrabgurri webbangingaruy! — chib. José nui nunelan nøbe ñimui nuneg kur cha eshkabene, nuim pulube ni mugucha mugaaguig køn. ² Incha nøbe trasha, trasha kishen, egipciosmerabe wammøren, katø Faraónwei yau misaameragucha wammøren inchibelø køn.

³ Incha Josébe nui nunelane trenchiptinchibig køn:

—Nabe José kur cha. ¿Nai mōskaingan tab ka wabig kuitarru?— cha.

Inchen nuneløbe larrø kørro kwaara, ni chigucha løtønrrab kaimaptinchibelø køn, nømbe nui merrab ni mumayguen kømuiø pønrrøwa.

⁴ Inchen Josébe:

—Naimay kemalay— chiben, nømbe kemallen, nøbe trenchiptinchibig køn:

—Nabe tru ñimui nuneg José kur cha, tru ñim nan Egiptosrømay yana ørig kōbig.

⁵ Inchendø ñimbe chi kullaarab isui inchimøtay cha. Ñim nan yusrømay yanig kōbigwan karrengucha øyeeg marøbraitamab isumøtay cha. Nane Tius ørig køn cha, manawei nanmerrig inrrai, misaameran kwamø ka øsig puramrrai martrab. ⁶ Kaguende pirau pa pilaguen parø arrub pasrøben, katøgucha tratrø pila palan cha, tru pilamerawane ellmartrab aramelø kønrrab kømøwei, ellmarig tulisamig kønrrab kømøwein kønrrabig køn cha. ⁷ Incha Tiusbe manawei nanmerrig ørig kōbig køn cha, ñim pirau ka øsig warøwa, larrø tab webamba pønrramig puben, trumay misamera larrøbichibig larrøbichib kønrrai.

⁸ Inchawei nane yusrømay ørøppe, Tius nø ørig køn cha, ñim kømøtø. Tru Faraónwan chi maramigu na isum purugubig kønrraimba, nui yau kerriguwan na ashib tōga wanrraimba, katø kerrigu Egipto pirau na karub wamig kønrraimba nø pasrig køn cha. ⁹ Inchawei ñimbe mallatø incha, nai mōskawei yamay amba, trenchinrrigay cha: “Ñui nusrkai Josébe øyah tan cha: ‘Tiusbe nane Egipto pirau kerriguba na karub wanrrai wandan’ cha. Incha ‘nan ashchab ‘pebatø’ amø’ tan chinrrigay cha. ¹⁰ ‘Ñibe nai puluwandø Gosøn pirau tsunrrig tan cha, ñui nusrkaløba, ñui awelu ureemeraba, katø ñui ubishamera køben, cabrasmera køben, ñui waaramera køben, katø ñui chigurrimbunø tøgaguiøbañau. ¹¹ Nabe ñun truyu ashib tøgagørrumøn cha, kaguen katøgucha tratrø pila ørøba tru parøbe arrubig attrab køn cha. Trengømuisruandøbe ñiba, ñui ureemeraba, ñui kerrigu chi tøgaguiøbañau larrø lastimailø misra kørromisrtrabguen’ cha.

¹² Inchagucha ñim lata, nai nuneg Benjamin lata, ñimashib asha pønrran’ cha, waminchipe na waminchib pasrai. ¹³ Nai papáwan eshkanrrigay cha Egipto pirau kerriguwan ashib na karub waigube chigurrimbunø køn cha katø ñim kerrigu chi asiilanba. ¡Ñimbe mallatø amba!, yusrømay nai papáwan pera amrrunrrigay— chibig køn.

¹⁴ Incha Josébe nui nuneg Benjaminwan ira pasramisra, kishen, katø Benjaminøgucha treetøwei nuneg Joséwan ira pasramisra, kishibig køn. ¹⁵ Incha Josébe nunelan muchawa, truba truba kishib irabig køn. Inchen nunelane wamindamig wam larraibig køn.

¹⁶ Inchen Faraón nø waig yausrømbe wam pubig køn: “Josewei nunelø chab puin køn” tan chib. Inchen Faraónba tru nui maramigwan marøb purrabelø nørreeløbabe kasraarabelø køn. ¹⁷ Incha Faraónbe Joséwane trenchibig køn:

—Ñui nunelan Canaán pirausrømay nømui ushamerayu niisra amrrai karu cha. ¹⁸ Incha ñui mōskawanba ñui yau misaameranba naimay pera amrrunrrai. Nabe yu Egipto purø tab

pirøwan tranamønrrun cha. Inchen nømbe i pirau purø tab mamiiamera misriilan manrrun cha.

¹⁹ Katø ñibe nømune treeg karunrrig cha: “Yu Egipto pirau carretillas nõrreelø weytøga sruilan srua ambingaru cha, nømui sralan køben, ureemeran køben ñui mōskawan køben pera amrrumig. ²⁰ Incha nõmui chi tøgaguilan lelacha, amrrumig chi isumønrray cha, kaguede yu Egipto pirau purø tabiibe nõmuin kønrrun”— cha.

²¹ Inchen Israelwei nusrkaløbe treeg marøbelø køn. Pōs Faraón maig karuben Josèbe carretillas nõrreelø weytøga sruilan pōnsrøb, mayuwei ishiimera tranøb inchibig køn. ²² Incha nõmun kanun, kanun kemelø srøizhig kan, kan keta trana, Benjamínwane tsantsøn anmera trescientosba, katø yunømarøb kemelø trattrøgatøba keta tranøbig køn. ²³ Incha nui mōskaweyasiibe iilan trana ørøbig køn: Egipto pirau purø tabelø tøgaguilan pa trattrø burrusmerayu niisra øriiløba, katø pa trattrø cargas burramerayu tirigu niisra øriiløba, katø pirrimera køben, mamiiamera køben niisra ørøbig køn, mōskai maywan mab arrumig. ²⁴ Incha yandø amrrai ørøbig køn. Incha yandø webamba ambene, Josèbe trenchibig køn:

—Mayube chinete, chinete tiyab, kwayab amrrab kømø— cha.

²⁵ Inchen nømbe Egipto piraugurri nebambub amba, Canaán pirausrø pubelø køn, nõmui mōskai Jacob waisrø. ²⁶ Incha trusrø puabe, trenchiptinchibelø køn:

—Josèbe ka øsig wan cha. Egipto pirau muba kuimburab nõ karub ashib wabig kuin kømøh— cha.

Inchen Jacobwei manrrøbe pasram kwarøptinchibig køn, kaguen nõbe køremuig kua.

²⁷ Inchen nømbe Josè mandø tailan, mandø tailan chishtøh eshkaben, katø nõmun pera ambanig carretillas nõrreelø weytøga sruilan trana øriilan ashib inchene, nune asrchüibe katøle chish misrøbig køn. ²⁸ Incha Israelbe trenchibig køn:

—Nai nusrkai Josè katøgucha øsig wabig kuin kui yandø tsabø ashar cha. Na kwamøwatø nabe ashchab yamønrrun— chibig køn.

46

Jacob Nui Ureemeraba Egipto Pirausrø

¹ Incha Jacobpe mayeelø nõba warabeløba nui chi tøgaguiløbañau webya, yandø Beersebasrø puabe, truyu Jacobpe ushamera kweecha Isaac nui mōskawei Tiuswan tranøbig køn.

² Inchen Tiusbe yem kan piab lataigu Israelwane trenchib waminchibig køn:

—Jacob, Jacob— cha

—Inchene nõbe:

—Yu pasrar— chiben,

³ Tiusbe trenchibig køn:

—Nabe Tius kur cha, tru ñui mōskawei. Tius. Egipto pirausrømay kørrayamig chi kørig isumøta cha. Nabe ñune ñigurri purø nõrrø misag sötømera kønrrai maramønrrun cha trusrø.

⁴ Nabe ñiba Egiptosrømay kørrarraua, katø natøwei Egiptogurri werrunrrai maramønrrun cha. Incha ñi kwabene, Josebe nõashib nui taska ñui kammeran kasrønrrun— chibig køn.

⁵ Incha yandø Jacob Beersebagurri webibene, Israelwei nusrkaløbe nõmui mōskai Jacobwan køben, nõmui ureemeran køben, nõmui sralan køben, tru Faraón amrrunrrai carretillas nõrreelø weytøga sruilø trana øriiløyu amrrab nebamingarubelø køn. ⁶ Incha katø Canaán pirau tøgamisriilø nõmui ushameran køben, chine købelan køben, tøga srua ambig købig køn. Øyamay Jacob kerrigu nui yaeløba Egipto pirausrømay yaig køn. ⁷ Nui nusrkalø køben, nui nimbasrmera køben, nui awelu ureemera køben, nui awela ureemera køben mayeelø nuinukkurri amrrub misamera nõba ambig køn.

⁸ Tru israelitasmera Egipto pirau kebambubelai munchimerabe iilø køn, tru Jacob nuinukkurri amrrub misameraba:

Rubén Jacobwei mayur nusrkai.

⁹ Katø trugurri Rubenwei nusrkaløbe iilø køn: Hanoc køben, Falu køben, Hezrón køben, Carmí købengue.

¹⁰ Inchen Simeónwei nusrkaløbe Jemuel køben, Jamin køben, Ohad køben, Jaquin køben, Zohar køben, katø kan Canaánsrø ishüwei nusrkai Saúl købengue.

¹¹ Inchen Leviwei nusrkaløbe iilø køn: Gersón køben, Coat køben, Merari købengue.

¹² Inchen Judáwei nusrkaløbe iilø køn: Er køben, Onán køben, Sela køben, Fares køben, Zera købengue. (Inchendø Erhåba Onánbabe Canaán pirausrøndø kwaig købig køn). Inchen Fareswei nusrkaløbe Ezrónba Hamulba kuig køn.

¹³ Inchen Isacarwei nusrkaløbe iilø kuig køn: Tola køben Fúva køben Job køben, Simrón købengue.

¹⁴ Inchen Zabulønwei nusrkaløbe iilø køn: Sered køben, Elón køben, Jahleel købengue.

¹⁵ Truilø kuig køn tru Padan-aramsrø warab uras Lea Jacobwei tøgagui nusrkalo, katø tru Dina nui nimbarsba. Inchawei truyugurri amrrub misaamera mөгuelan køben, ishum-burmeran køben munchene kerrigube treinta y tres kuig køn.

¹⁶ Inchen Gadwei nusrkalo be iilø køn: Zifión køben, Hagui køben, Ezbón køben, Suni køben, Eri køben, Arodi køben, Areli købengue.

¹⁷ Inchen Aserwei nusrkalo be iilø køn: Imna køben, Isva køben, Isvi køben, Beria køben, katø nømui nuchag Sera taikkuchague. Inchen tru Beriai nusrkalo be iilø køn: Heber køben, Malquiel købengue.

¹⁸ Iilø kuig køn tru Zilpa Jacobwei tøgagui nusrkalo. Tru Zilpabe karuindiig mendig megabig kuig køn, tru Laban nui nimbars Raquelwan keta trani ishug. Tru Zilpainukkurri amrrub ureemerabe kerrigube dieciséis kuig køn.

¹⁹ Inchen Jacobwei srai Raquelwei nusrkalo be iilø køn: Joséba, Benjamínba.

²⁰ Inchen Joséwei nusrkalo Azenatba tøgagui ureemerabe iilø køn: Manasésba, Efrainba Egipto pirau kal-lawar. Tru Azenatbe Onsrø sacerdoté Potiferai nimbars kuig køn.

²¹ Inchen Benjamínwei nusrkalo be iilø køn: Bela køben, Bequer køben, Asbel køben, Gera køben, Naamán køben, Ehi køben, Ros køben, Mupim køben, Hupim køben, Ard købengue.

²² Iilø køn tru Jacobweimba Raquelweinukkurrimba amrrub ureemera kerrigube atorcegue.

²³ Inchen Danwei nusrkaimbe Husin taig køn.

²⁴ Inchen Neftaliwei nusrkalo be iilø køn: Jahzeel køben, Guni køben, Jezer køben, Silem købengue.

²⁵ Iilø køn tru Bilha Jacobpa tøgagui ureemera. Tru Bilhabe karuindiig mendig megabig kuig køn, tru Laban nui nimbars Raquelwan keta trani ishug. Inchen tru Bilhainukkurri amrrub ureemerabe kerrigu trattro y par kuig køn.

²⁶ Inchen mayeelø Jacobpa Egipto pirau nuikkurri amrrub misaamerabe pubeløbe sesenta y seis kuig køn, nui aniyugurri ureemera nusrkalai sralan munchimuben.

²⁷ Inchen Joséwei ureemerabe pagatø kuig køn, Egipto pirau kal-lawar. Inchawei Jacobwei yau misaamerabe Egiptosrømbe setenta puig købig køn.

²⁸ Incha Jacobpe Judámerrig Joséweisrø merrab punrrai ørøbig køn, Joséwan eshkaben Gosénsrø nun katønrrab attrai. Incha Gosén pirausrø chab pubelø køn. ²⁹ Inchen Josébe nui møskawan utønrrab yamig niga luløb kaullimera sruigwan tamara, Israel nui møskawan Gosénsrø utønrrab webibig køn. Incha møskawan ashippe, naashiburab ira, pasramisra, truba truba yana kishibig køn.

³⁰ Inchen Israelbe Joséwane trenchibig køn:

—Møimbe ñun na ashib asha, ñi øsig ka wabig kuin kui wetørrawabe, nabe chi isumø, ka kwamønrrun— cha.

³¹ Incha Josébe nui nunelanba nui møskawei yau misaameranba trenchibig køn:

—Na Faraónwan ashchab inrrab inchar cha, nun wammøsrøsrønrrab: “Nai nuneløba, nai møskawei yau misaameraba Canaán pirausrø warabeløbe naba kørømisra warønrrab amrrun chinrrab”. ³² Pøs nømbe ubisha ashibelø waara karrøgøbelø treelø køn chinrrab. Incha nømui ubishameran køben, waarameran køben chigurrimbunø nøm tøgaguilan køben srua amrrun” cha.

³³ Inchawei Faraón ñimun wama: “¿Ñimbe chi marøbelø køgue?” cha payene, ³⁴ ñimbe øya lötønrrigay chibig køn: “Nam ñui karuiløbe matsøreg ureemera kurri møingatig nam lata, namui kølli misaamera lata waara karrøgøbelø ker” cha. Trumaybe ñimbe Gosén pirau warønrrabgwen chibig køn. kaguende egipcimerabe ubisha ashibelane purø trømbøig kui inchibelø køn cha.

47

¹ Inchen Josébe Faraónwan wammøsrøsrønrrab yabe, trenchibig køn:

—Nai møskaimba, nai nuneløba Canaán pirausrøngurri amrruin køn cha, nømui ubishamera køben, cabrasmera køben, nømui waaramera køben, nømui chi tøgaguilø kerriguba. Incha yandø Gosén pirausrø chab puaguen køn— cha.

² Incha Goséngurri attraptø trattroгатø nui nunelan lawa wesrua, Faraónwei merrab pera arrubig køn, ‘nai nunelø køn’ cha eshkanrrab.

³ Inchen Faraónbe trencha payibig køn:

—¿Ñimbe chi marøbelø køgue?— cha.

Inchen nømbe Faraónwan trenchibelø køn:

—Nam ñui karuig melabeløbe ubishamera køben cabrasmera køben karrøgøbelø treelø ker cha, namui merrabsrø møskalø lataitøwei.— ⁴ Incha katø trenchibelø køn:

—Nambe i pirau kan maya yanatø warønrrab amrruer cha, kaguende nam ñui karuig melabelai ubishameraimbe Canaán pirau nam waraisrømbe chi pu kaagøn cha. Trusrømbe

parøbe ni chindamguchagaig pasran cha. Inchagurri nam ñui karuig melabelan tiusmanda Gosén pirau namun warøbashibsrumøgue chinrrab inder— cha.

⁵ Inchine Faraónbe Joséwan trenchibig køn:

—Ñui mōskaimba, ñui nuneløba ñiba warønrrab amrruin køn cha. ⁶ Egipto pirøbe ñi asha maramig ñuin tasku pasran cha. Mas purø tab pirau warønrrai war chibig køn, tru Gosén pirau. Egipto pirau truipe purø tab pirø køn cha. Truyu warønrrab kørrømisrrain cha. Truilai utu purø tab asha martraptø mōguelø købene, truilan nai ushameran nøm ashib tøgagønrrai nømun pønrsø— chibig køn.

⁷ Trugurri Josébe nui mōskai Jacobwangucha pera ya, Faraónwan, ‘iibe nai mōskain køn’ cha eshkabig køn. Inchen Jacobpe Faraónwan ‘mayanguen tabig nebuig kønrrig’ chibig køn.

⁸ Inchen Faraónbe Jacobwan trencha payibig køn:

—¿Mam pila tōgaig kugu?— cha.

⁹ Inchen Jacobpe Faraónwan trenchibig køn:

—Na amburab, iburab lirab uniibe pilamera ciento treinta køn cha. Na øsig uniibe menrra yam pilamera kømøwei, katø murig kuig køn cha. Tru nai kølli misaamera nøm lirab amønain pilamerababe trugatig nebumum køtan. —cha.

¹⁰ Incha Jacobpe Faraónwan mayanguen tabig nebuig kønrrig chib, truyugurri ungua cha ibig køn.

¹¹ Inchen Josébe Egipto pirau purø tab pirømeran tranøbig køn, truyu warønrrai, Faraón maig karuig, treekke. Treekkurri nui mōskaimba nui nuneløba Ramesés pirau, pirømera tōgaguig købig køn. ¹² Incha katø Josébe nui mōskawanba, nui nunelanba, nui mōskawei yau misaameranba nui karuig peraguilanba mamiimera mab kømig pønrsøbig køn, nømun kanun, kanun maig paløben, treekke.

José Mandø Asha Maramig Køben Trumay Marøb

¹³ Yandø muba pirø kuimburab chigucha mamig chigaaben, trune parøbe chindamdiig køben, Egipto pirau lata, Canaán pirau lata parø arrubigu yandø misaamerabe kwamitø palabig køn. ¹⁴ Inchen Josébe tru Egipto pirau misaameraba, Canaánsreeløba tirigu penab pagarai anmeran kerrigu tulisha, tru anwane Faraónwei tab yau esegabig køn. ¹⁵ Inchen yandø Egipto pirau lata, Canaán pirau lata chigucha anga patsøben, maya egipcioimerabe Joséweimay amrrua trenchibelø køn:

—Namun ñi mamiimera pønrsørra cha. ¿Namgan ñui merrab kwamig kuitarru? cha, namun kerrigu an patsinukkurrindø.

¹⁶ Inchen Josébe trenchibig køn:

—Ñimun an chab patsøbene, ñimui ushameran tranay cha. Nabe tru ushameraba yunømarøb ñimune tirigu tranamønrrun cha. ¹⁷ Inchen egipciosmerabe nømui ushameran srua amrrubelø køn; kaullimera køben, ubishamera køben, cabrasmera køben, burrumera køben, waramera køben. Incha tru ushameraba yunømara, tru pilawan mamiimera tranøbig køn.

¹⁸ Inchen tru pila puraiben, wendø pilayu nømbe amrruabe, trenchibelø køn:

—Namune an patsøben, namune ni chinchaguen søramgaatan cha, kørrømisrmøtø, an patsøtan cha, ñun eshkaig køn cha. Yandø namui ushameragucha ñuindø misren, nambe chigøben tranamibe chigar misrer cha, namui pirømerabah, katø nambe ka pønrraiteelø pønrrer cha. ¹⁹ Namui pirømerabañau ¿ñigan nam kwanrrai kønrraindeh? cha. Ñi namunba, namui pirømeranba penørray cha, mamiiba yunømariilø kønrrai. Trumaybe nambe namui pirømerabañau nambe Faraónwei misra karuindeelø melamønrrun cha. Inchendø yellmera nam mamig køben, ellguamelø køben, tranrrra cha, nam øsig waramig kønrraimbe, katø pirømeragucha lelatsiilø pønrrømønrrai.—

²⁰ Inchen Josébe Egipto pirømeran kerrigu Faraónweyasig penabig køn, kaguende egipcioimerabe tru parø arrubikkurri nømui pirømeran yanen. Inchagurri pirømerabe kerriguba Faraónwei tasku purayaig købig køn. ²¹ Incha egipciosmerabe Egipto pirau muba kuimburab nømbe ka karuindeelø melønrrab melamisrig købig køn. ²² Inchen pirømera peniimeelø kørrømisrøppe, sacerdotemeraindøh peniimeelø, ka kørrømisrig køn, kaguende nømbe Faraónweinukkurri namig traniilø utabelø kuig kua. Inchagurri nømbe nømui pirømeran yanmuig købig køn, nømbe Faraón pønrsraigwan mabelø kua.

²³ Incha Josébe misaameran trenchibig køn:

—Møimbe ñimba ñimui pirømerababe Faraónweyelø køn cha, nabe nuyasig penig køn cha. Ñimbe yu yellmera tøgagøn cha, pirømeran ellmaray chibig køn. ²⁴ Incha yandø ellmarig tulisamig pubene, tru cienyugurri veinte tarømarøb tulisraigwane Faraónwan tranrrigay cha. Inchen truyugurri kørrømisrøbigwane tramerayu tsuramiba, katø ñimba, ñimui ure-emeraba, ñimui yau misaameraba, katø mayeelø ñimba warabeløba mab kømig kønrrain— cha.

²⁵ Inchen nømbe trenchibelø køn:

—Ñibe nam øsig warønrrai martan cha. Nø yangucha tab indigwan nambe uta tōga pønrrer cha. Nambe Faraón karuindø melabelø kømønrrun— chibelø køn.

²⁶ Incha Josebe øyeeg marøb kømig wesrawa pasrig køn, ellmarigu misriilan tru cien cargasygurri veintebato wesruigwane Faraonwein kønrrai treeg marig køn, tru mõi kwalømgaaig. Inchen Sacerdotesmerai pirømeratøh Faraonwei kørømisruig købig køn.

²⁷ Øyamay israelitasmerabe Egipto pirau warønrrab kørømisrig kuig køn, Gosén pirau. Incha nømbe truyu pirømera merrarrowa waramisra, nømbe truyube wereng nørro tōgagua, larrø nu misrig køn.

²⁸ Incha Jacobpe Egipto pirau pilamera diecisiete tsuig køn. Inchen kerrigu Jacob nø øsig tsuin kwalømmerabe pilamera ciento cuarenta y siete kuig køn. ²⁹ Israel øsig tsum kwalømmera yandø patsønrrab køben, nui nusrkai Joséwan wamønrrab ørabe, trenchibig køn:

—Na ñuin kabyu tabig asønaig kuinabene, tiusmanda ñui tasigwan nai srøptsim umbu estsar cha. Treeg marøppe na maig miaigwane trunone martrunrig cha undaatøga. Incha nan purø nu lastima ashib, martrab kørømisrigwane martrunrig chibig køn. Tiusmanda nane Egiptosrømbe sørømrørunrig chibig køn. ³⁰ Incha na nai møskaløba israb tsumisrene, Egiptogurrimbe srua ya, nømun esegawa wariinuutøwei wairunrig— chibig køn.

Inchen Josébe trenchibig køn:

—Ñi maig taigwan nabe treeg maramønrrun— cha.

³¹ Inchen Israelbe trenchibig køn:

—‘jKatø! Marmø kømø, maramønrrun’ chirra— cha.

Inchen Josébe:

—jKatø! Marmø kømø, maramønrrun— chibig køn.

Inchen Israelbe nui pøtønaig tsig pala utsøbasrøptinchibig køn.

48

Manaseswanba Efraínwanba Jacob Mayanguen Tabig Kønrrai Tranøb

¹ Indig kan maya yanayugøsrøn Joséwane trenchibelø køn:

—Ñui møskaimbe kwanrrø tsun— cha.

Inchen Josébe nui møskawan ashchab ippe, nui pagatø nuskalø Manaseswanba, Efraínwanba pera ibig køn.

² Inchen Jacobwane eshkabelø køn:

—Ñui nusrkai José ñun ashchab pun— cha. Inchen nøbe ke kaimatøzhig købendø, truba tranrra, camayu kurra, wamisra, ³ Joséwan trenchibig køn:

—Maramburab Marøb Tiusbe Canaán pirau Luz ciudadu kenamisra, nane mayanguen tabigwan trana, ⁴ øyeeg cha kørømisrig køn cha: “Nabe ñune ureg purø nørro tōgagønrrai marøb, misag sètømera purø nørro kønrrai maramønrrun cha. Incha nabe ñuinukkurri amrrub misaamerane i pirøwan tranen, managatig i pirøbe nømuiin kønrrun” taig køn cha.

⁵ Na ñiba tsunrrab arrumøwatø, ñui pagatø nusrkalo yu Egipto pirau kal-lawa uremera tru Efraínba, Manasesbabe nai uremera misran cha, Rubénba, Simeónba naielø køb lataitøwei. ⁶ Inchen ñi tru wendau uremera tōgagui nusrkaløbe ñuielø kønrrun cha. Incha nømbe Efraínweimba, Manasesweimba nunelø kuig køppe, truilai munchiyu pirø ketig utønrrun cha

⁷ Nabe Padan Aramgurri katøle arrub megaben, ñui usri Raquelbe kwaig købig køn cha, Efrata ciudadu pumig ke lamøtø paløben. Inchen nabe Efrata may menda sørig køn cha. Truibe tru Belén kuinrrø.—

⁸ Incha Israelbe Joséwei nusrkalan ashiptinchabe, payibig køn:

—¿ñiløbe mumera køh?— cha.

⁹ Inchene Josebe trenchibig køn:

—ñiløbe nai nusrkalø køn cha, nan yu Egipto pirau Tius keta traniilø.—

Inchen Israelbe trenchibig køn:

—Naimay kemalingaru cha, na purø tab indigwan tranrrab— cha.

¹⁰ Israelbe yandø purø kølliizhig kuig kua, yandø nui kabzheeløbe tør pilømuben, tab ashchab kaimabig købig køn. Inchen Josebe nui ureemeran nui møskaweim pulu kemal-srøben, nøbe muchab, irab inchibig køn.

¹¹ Inchabe Israelbe Joséwan trenchibig køn:

—Nabe ñun asamuitamappe isumuig køn cha. Inchendø Tiusbe nane ñui ureemeran-baugen asamig kønrrai martan— cha.

¹² Inchen Josébe uregwan nui møskawei srøb utøyugurri tarømarøppa, kappaløwan pirausrø kebatamnagatig utsøbasrøbig køn

¹³ Incha Josébe nui pa nusrkalan Efraínwane nui kusrmay tasiitøga, Manaseswane nui at-sitøga kemøra mōskawei pulu pōnsrøbig kōn. Tru øyamay Efraínbe Israelwei atsimaygatømay pasramisren, Manasesbe kusrmaygatømay pasramisrøbig kōn. ¹⁴ Treeg pōnsraindøgucha Israelbe nui kwalmeran ambumay imay yunømarøppa nui kusrmay tasigwane Efraínwei turbala estsarøbig kōn, wendø nusrkain kuindøgucha. Nui atsimay tasigwane Manaseswei turbala estsarøbig kōn, truihe mayur nusrkain kuindøgucha.

¹⁵ Incha Joséwane i wammeratøga maya nuguen tabiitø, tabiitø nebuig kōnrrai øyeeeg chib tranøbig kōn:

—Nai mōskalø Abrahamba, Isaacba nui merrab amønai Tius, tru nan kal-lainukkurri mōingatin nan chi kōmōnrrai ashib tøga pasrab, katø na muba yamigwan eshkab pasrab Tius, ¹⁶ tru nan chine kaig pubigugurri wesrub Ángel i pagatø matsøreg-ureemeran maya nuguen tabiitø nebuig kōnrrai martrunrrig chib. Incha iiløgurri nai munchiba, nai mōskalø Abrahamweimba Isaacweimba munchimerabe pōnrrabig pōnrrōnrrun cha. Nømbe pirau nōrrø karrab purø nōrrø larrøbitchai.

¹⁷ Inchen Josebe nui mōskaimbe nui kusrmay tasigwan Efraínwei turbala estsari ashabe, tab kōmui inchibig kōn. Incha mōskawei tasigwan Efraínwei turbalagurrimba Manaseswei turbalagurrimba yunømara, estsartrai inchibig kōn. ¹⁸ Incha Josébe mōskawane trenchibig kōn:

—Øyan kōmøtø cha, iig kōn cha, mayurbe iigweimbala ñui kusrmay tasigwan estsar— cha.

¹⁹ Inchen mōskaimbe treeg marmōnrrab trenchibig kōn:

—Ashar cha, nai nusrkai, ashar cha. Manaseskucha misag nōrrø larrøbitchabitøwein kōn cha, katø nøgucha larrø nuitøwein kōnrrabig kua. Inchendø wendø nuneebe nø lataikken sötømera kōnrrun— cha.

²⁰ Incha tru kwaløm Jacobpe mayanguen tabiitø nebuig kōmigwan øyah chib tranøbig kōn:

—Israel misaamera mayanguen tabig nebuig kōmigwan nøm tranøppe, ñimui munchiwan wamab tōga pōnrrōnrrun cha: “Efraínwanba, Manaseswanba lataitøwei, Tius ñimun treeg martrain”— chib. Incha Manaseswan wendau pasra, Efraínwan merrab pasrig kōn. ²¹ Incha trugurri Israelbe Joséwan trenchibig kōn:

—Nabe yandø kwanrrainchar cha. Inchendø Tiusbe ñimba pasrøwa, nøbe ñimune ñimui mōskalai pirømerasrømay katøle amrrai martrun chibig kōn.

²² Incha nabe ñui nunelan lataguen kōmø, ñibe purab nuig kuikkurri Siquén pirøwan, amorreosmeraba na truba truba nai espadatøgaba, nai arcotøgaba kwayawa tøgaguim pirøwan tranar— cha.

49

Jacob Nurskaleimburab Wendøsrø Maig Pub Attrabigw An Waminchib

¹ Jacobpe nui nusrkalan wama trenchibig kōn:

—Tulaambay cha. Nabe wendø kwalømmerawansrø ñimun maig purainrrabigwan eshkanrrab inchar cha.

² Kemalay cha, mōrtrab, Jacobwei nusrkalø. Møray cha, ñimui mōskai Israel wamindigwan.

³ Ñi, Ruben, nai mayur nusrkai, na unøtø misag larrø chishig kua ke srøtø tøgaguig unø, tabig kui asig kōmiguba, katø chi maramig nuig kōmiguba ñimerrig kōn cha.

⁴ Ñibe kan pimera kōramdiig latøgushib amrrubig lataig, nømimbe yandø ñi mayurbe maskucha nuibe kōmōnrrabguen cha. Kaguende nai kamayu nai sraimba trømbøig mara, ñui trag mōskawei kamawan, kaig kuig lataig mara kōrrømarig kōn cha.

⁵ Simeónba Levíba wendau nunelø køben, nømui espadamerabe ka kwayab misag kweechib tøgagømiitø kōn cha.

⁶ Nøm chigøben kaig martrab waminchib kuigu na truyu pasrōnrrab kōmøwei, nøm nōrrø tuliambinug na linchab kōmøwein kur, nai isubigwan na chishig tøgaguigwan mindisaig kōmōnrrab. Kaguende nømbe larrø namikkøleelø pōnrrøwa, misagwan kweecha petab, mōrøkkømbiitø ke kagatø, toromerai chambesrølmeran para petig kōn.

⁷ Larrø tsag inchib namig kurriiba, nømui namikkøbigu lastimagaig trømbøig mariibabe larrø trømbøig nebuig købash cha. Nabe Jacobwei piraugurrimbe ke nuinguindø misrtrai mara, Israel pirau ke trurø amba warōnrrai maramōnrrun.

⁸ Ñi Judábe ñui nunelø chi tamgaig, katø tabig wamindig kōnrrabguen. Ñui ashig kōmui inchibelane ñi kanawa tøgagōnrrun. Inchen ñui trag nuneløguen ñui merrappe utsøbasrrun.

⁹ Inchen ñi, nai nusrkai Judábe, kan matsinø leon lataig, nø kemørigwan chab mabe, kan køli leon lataig pirau purø mōg ashib tsumisrøptinchibig lataig kōn. ¿Nune mugui kebacha ashchautah?

¹⁰ Judáwane nui karub sraua wain Pørøtsigwane kerraig kørnramøn, katø nui karub tøgaguin pørøtsigwan lata tru nui srøb utøyugurri, tru cierton rey arrumnegatig. Truiwane yu pirau pirø muba kuimnburab maya misaaba nune mørig kørnrrabig køn.

¹¹ Judabe nui burrunne uvas tusryu lichippe, llug lamø burru unøzhigwane purø tab tusr srølyu licha pasran. Nui kewa kuigwane vintøga tsarøppe, nui pala itø kewa kuigwane uvas anim piyu tsaran.

¹² Nui kammerabe vino lataguen kømø, mas yaløbigøzheelø køn. Inchen nui trugulmerabe pitsø lataguen kømø, mas puløzheelø køn.

¹³ Inchen Zabolónweinukkurri amrrub misaamerabe mar mendawan warønrrabelø køben, truyube barcosmera chi isumgaig pub liramig kørnrrabig køn. Inchen nui linderosmerabe Sidonsrøngatig lulrrabelø køn.

¹⁴ Isacarbe kan burru larrø murig lataig køn, kan muba webya yamga tul— unøyu keerig pigaya tsub lataig.

¹⁵ Tru muba webya yamga tul-unøbe larrø tabig, pirøbe larrø chull asamdø pirø køb, katø pishindø tab tsumdiig køb køben, nøbe karga niga inrrab lligwan kegucha, ka karuindø megabig misrig køn.

¹⁶ Inchen Danbe nui misaameran maig kørnrrabigwan asha martrabig køn. Israelwei tru doce nusrkalai misag sötømerayu kan møikkørøn lataitøwei.

¹⁷ Danbe kan may menda tsub ul lataig køn, tsachippe kwetchab tsachib ul may menda tsubig lataig, kaullin chiñimerayu tsacha, itøguana wabigwan wendømay palasig kebinab kutsingarubig.”

¹⁸ “Jehová, ñi kaiyugurri wesraig kømigwan muniirar!”

¹⁹ Gadwane kaig marøb misag sötømera amrrua melambub kwayaindøgucha, nøbe wendautø pasraørøb ya, kwayanrrun.

²⁰ “Aserbe larrø may mamiimera mabig kørnrrun. Incha nøbe reywei mamiimera lataig manrrai pønsrønrrun.

²¹ Nefalibe kan ishug panzhig chi iløsrkaimíig uñibig lataig køn, larrø tab pan-ureezheelø peraig.

²² “Inchen Josébe kan larrø may utiguitsin tusr lataig køn, may utiguichib pi menda pasrab lataig. Tsiurøzheelø nebib ibiibe tru pirøbanrrimerasø nebib ib lataig.

²³ Nune arcostøga kwayabeløbe, lastimaguengaig flechasmeratøga søl ørøb, kwayam laben,

²⁴ nø srua pasrai arcone chigucha kullaaramø srua pasraig køn, tru Jacobwei maramburab marøb kwalmeragurri. ¡Mayanguen ungua ungua tru Jacobwei Mugucha Chindamga Tiuswan. Truikkurrin køn, tru Ubisha Ashibig, tru Israelwei kan peña lataig.

²⁵ ¡Mayanguen ungua ungua ñui møkawei Tius ñun purugubigwan! ¡Mayanguen ungua ungua Maramburab Marøb Tius ñun mayanguen tabig nebuig kørnrrai marøbigwan! ¡Mayanguen tabig nebuig kørnrrai Srømbalasarøngurri arrubiitøga! ¡Mayanguen tabig nebuig kørnrrai maryu purø umbusrøngurri arrubiitøga! Pitsø mutsørøb tøgagøb katø usrai patsau tøgagøb indingurri mayanguen tabig nebuig kørnrrai arrubiitøgaba. ²⁶ Ñui møkaimbe tru maya nuguen tabig nebuig kømigwan ñun tranøppe, nai møkalo tru maya nuguen tabig nebuig kømigwan nan trani lataitøguen kømø tranig køn; managatig tru pønrrab tunmerasrøngatig. Tru iig mayanguen tabig nebuig kørnrrai traniiløbe, Joséwei turbala kørnrrain køn, nui nunelai utugurri tru lawa wesruigweinug.

²⁷ Inchen Benjáminbe kan larrø namig lobo lataig køn, løtsøbe nui kemøra mamigwan ma, maabene unchibelan pirishibig.”

²⁸ Iilø køn tru Jacobwei doce nusrkaløgurri misag nørro sötø amrrubelø, tru nømunba, katø nuikkurri amrrub misaameranba wendøsrø nømum kanun kanun maig pub attrabigwan eshkawa pasrig kuig køn.

Jacob Kwaig

²⁹ Incha katø Jacobpe øya eshkawa pasrøbig køn:

—Nabe nai misaameraba tsunrrab yamig yandø lutau køtan cha, nai kølli misaameraimbulu sørørrunrrig chibig cha, tru heteo Efronwein pirau peña trab pasrabigu, ³⁰ tru Mamre pinrrøguesø Macpela pirau peña trab lalig pasrabigu Canaán pirausrø, Abraham tru Efron hititan peninug nui yau misaameran kwaben, sørab kømig nømui pasrønrrai. ³¹ Truyube Abrahamwanba, nui srai Saranba sørab, katø Isaacwanba nui srai Rebecanba sørab indig køn. Katø nagucha Lean truyu sorig kuig køn. ³² Pøs tru pirøwanba tru peña trab lalig pasrabigwanbabe, Hititasmeran penig kuig køn.—

³³ Incha Jacob mandø marøb kømigwan chab waminchabe, katøle kamayu tsumisra, neesrappe, kwaptinchibig køn. Incha merrabsrø nømui møkaloaba isrønrrab t sumisrig køn.

50

¹ Inchen Josébe nui mōskawei asrwan ira, kishib muchabig kōn. ² Incha Josébe tru mō marōbelō nun purugub pōnrrabelan nui mōskawei asrwan minchib irrōramōnrrai mō marōb tamarōngarubig kōn. Inchen tru mō marōbelōbe treeg marōbelō kōn. ³ Tru treeg tamarōb kōmibe kwalōmmera cuarenta nemisramne kōbig kōn. Inchen egipciosmerabe kwalōmmera setenta nemisramne isub kishibelō kōn.

⁴ Inchen yandō tru isub kisam kwalōmmera patsōben, Josébe Faraon karub wainug purrab misaameran trenchibig kōn:

—Ñim truyu purrabelai merrab ñim nan tab indamdiig kuinabene, tiusmanda Faráonwan trenchirrunrrigay cha: ⁵ “Nai mōskaimbe nō kwamōwatō, øyeegwan marmō kōmō, ¡katō! nane maramōnrrun tingaruig kōn cha: ‘Canaan pirausrō sōramig nō ashib tamarig pasrabigu, nun trusrō sōramig kōnrrai.’ Inchawei nai mōskawan trusrō sōrōnrrab ibashcha” tan chinrrigay cha, nabe katō arrunōnrrun— cha.

⁶ Inchene Faraónbe trenchibig kōn:

—Nui mōskai øyeegwan marmō kōmō, ¡katō! Martrunrrig cha trendaigwan ñi treeg martrab misrig kōbene, trube, sōrōnrrab inrrō— cha.

⁷ Inchen Josébe mōskawan sōrōnrrab nebiben, Faraonwan tru nō karub waigu purugub purabelō nōrrō kōlli misaameraba, katō Egipto pirau nōrrō kōlli misaameraba, nune linchibelō kōn. ⁸ Katō Joséwei yau misaamera mayamba, katō nui nunelō kōben, mōskawei yau misaamera kōben, nebambubelō kōn. Gosén piraube nōmui ureemeranbah, ubishameranbah, cabrameranba, waarameranbahtō kōrrōmara. ⁹ Incha nōbabe kaulli sruin karretillameray suldaumera kōben, suldaumera kaulli palar kōben tsimaytō lincha nebambubelō kōn, misag purō nōrrōkōn.

¹⁰ Incha Atat taigwei tirigu itsiisrō, tru Jordan pi pulusrō puabe, tsusrōmbe mayangucha nu isub kishib treeg marōbelō kōn. Trusrōmbe Josébe mōskainzhig yandō muga misren, trattō y pa kwalōm isuin inchib kishibig kōn. ¹¹ Inchen truigwan tru Canaán pirau warab misaamera ashabe, tru Atadwei tirigu chish marin tulyu truba truba isuig kishib kui ashabe, trenchibelō kōn:

—Egipciosmera øyeekkatig kishib kuibe purō nuig kōrren— cha. Inchagurri tru Jordan pi ambōgatōmaysrōmbe Abel Mizraim cha wamig kōn. (Trenchippe: “Egipciosmera purō isui inchib puraambinug kōn” chib.)

¹² Inchen Jacobwei nusrkalōbe nōmun maig martrai nō miaigwan treeg marōbelō kōn. ¹³ Nui nusrkalōbe Canaán pirausrōmay srua amba, Macpela pirau peñayu trab lalig pasrabigu sōrabelō kōn, tru Efron hititan Abraham pirōwanbañau peninug, nui yau misaameran sōrab tōgagōmig, tru Mamre pulusrō. ¹⁴ Yandō mōskawan chab sōrabe, Josébe Egiptomay katō nebarrubig kōn, nui nunelōba, katō maya misamera sōrōnrrab lincha amrrubelōba.

¹⁵ Inchen Joséwei nunelōbe mōskai kwaig yandō mugaabene, trunun isub mendabe, trenchibelō kōn:

—¿Josébe namune katōgucha namig isub srō unin kōnrrab kō chinderah cha, nam nun øyeeg kalō marigwan trunun isua?—

¹⁶ Inchabe José waisrōmay trencha karua ørōbelō kōn:

“Ñui mōskaimbe nō kwamōwatō, namune trencha karua pasrig kōn cha: ¹⁷ “Ñimbe Joséwan øyeeg chinrrigay cha: Ñui nunelō yeeg kaig marōb, ñun kalō marigwan Tiusmanda ulō paymō pesannarrunrrig cha” Inchawei mōimbe tiusmanda, nam ñui mōskawei Tius karuigwan marōb melabelōtōwein kuinaig kōbene tru trōmbōig kalō mariilane pesannarrunrrig” cha. Inchen øyeeg wamindigwan mōrabe, Josébe kishibig kōn.

¹⁸ Inchen nunelōgucha Joséwei merrab chab pua, utsōbasrabe, trenchibelō kōn:

—Nambe ñi ka karuindiig melabelō kōnrrer— cha.

¹⁹ Inchene Josébe trenchibig kōn:

—Chi kōrig kui inchimōtay cha. ¿Nagan Tius nō marigwan na pasramisra marōb pasramuitarru? cha. ²⁰ Ñimbe nane kaig martrab isua maren, trune Tiusbe tru kaig marigwane tabig punrrai yunōmaran cha, tru mōi nam ashib pōnrraigwan martrab, misag nōrrō pasrabigwan øsig tōgagōnrrab. ²¹ Inchawei ñimbe chi kōrig kui inchimōtay cha, nabe ñimunba, ñimui ureemeranba ashib tōgagōmōnrrun— cha. Øyamay nui manrraugurri undatōga, chi isui inchimōnrrai waminchibig kōn.

José Kwaig

²² Josébe nui mōskawei yau misaameraba Egipto pirau tsuig kōbig kōn. Nōbe pilamera ciento diezkatig øsig tsuig kōbig kōn. ²³ Incha Josébe Efrainwei katōburō awelu ureemeranguen nebua ashib, katō Manaséswei nusrkai tru Maquirwei ureemeranguen nai ureemeratōwein misran chib, srōbchagu mutab indig kuig kōn.

²⁴ Incha Josébe wendōsrō nui nunelan trenchibig kōn:

—Nane yandø kwamig lutau kətan cha. Inchendø Tiusbe ñimune ashchab arrua, purugunrrun cha, Abrahamwanba, Isaacwanba Jacobwanba, ¡Katø! nabe tranmø kəmə, tranamənrnun cha kərrəmisrin pirausrəmay ñimune i piraugurri pera inrrab kən cha.—

²⁵ Incha Josébe Israelwei nusrkalan, ‘¡Katø! nambe treeg maramənrnun’ tingarubig kən. Incha Josébe nəmun trenchibig kən:

—Isa kəmə, Tiusbe ñimun ashchab arrua, purugunrrun cha. Treeg pubene, ñimbe nai tsutsiimerane yugurri srua ambamig kən— cha.

²⁶ Incha Josébe kwaig kən pilamera ciento diez nemisren. Inchen nui asrwane minchib irrəmənrnai mə marəb tamara, kan talyu wayig kən Egipto pirau.

Fin

San Mateo

Jesucristoi merrab misaamera

(Lc 3.23-38)

¹ Iibe Jesucristoi merrabsrø misaamerai munchimera køn, tru Davidweinukkurrimba, Abrahamweinukkurrimba amrrub misag.

² Abrahambe Isaacwei møskain køben;

Isaacbe Jacobwei møskain køben;

Jacobpe Judába, nui nunelaimba møskain købig køn.

³ Judábe Faresweimba, Zaraimba møskain køben, tru uregwei usrimbe Tamar købig køn.

Faresbe Esromwei møskain køben;

Esrombe Aramwei møskain købig køn.

⁴ Arambe Aminadabwei møskain køben;

Aminadabpe Naasónwei møskain købig køn.

Inchen Naasónbe Salmónwei møskaingue.

⁵ Salmónbe Boozwei møskain køben, nui usrimbe Rahab købig køn.

Boozbe Obedwei møskain køben, nui usrimbe Rut købig køn.

Obedbe Isaíwei møskain køben;

⁶ Isaíbe Davidwei møskain købig køn.

Inchen rey Davidba, Uríaswei srain købiibabe Salomónwei møskalø købig køn.

⁷ Salomónbe Roboamwei møskain køben;

Roboambe Abíaswei møskain køben;

Abíasbe Asaiwei møskain købig køn.

⁸ Inchen Asabe Josafatwei møskain køben;

Josafatbe Joramwei møskain køben;

Jorambe Uzíaswei møskain købig køn.

⁹ Uzíasbe Jotamwei møskain køben;

Jotambe Acazwei møskain køben;

Acazbe Ezequíaswei møskain købig køn.

¹⁰ Ezequíasbe Manaséswei møskain køben;

Manasésbe Amonwei møskain køben;

Amonbe Josíaswei møskain købig køn.

¹¹ Inchen Josíasbe Jeconíasweimba, nunelaimba møskain købig køn, tru israelitasmeran Babiloniamay merrarrowa srúa ambub uras.

¹² Øyeech chab srúa amben, Jeconíasbe Salatielwei møskain køben;

Salatielbe Zorobabelwei møskain køben;

¹³ Zorobabelbe Abiudwei møskain køben;

Abiudbe Eliaquimwei møskain køben;

Eliaquimbe Azorwei møskain købig køn.

¹⁴ Azorbe Sadocewei møskain køben;

Sadoce Aquimwei møskain købig køn.

Inchen Aquimbe Eliudwei møskaingue.

¹⁵ Inchen Eliudbe Eleazarwei møskain køben;

Eleazarbe Matánwei møskain køben;

Matánbe Jacobwei møskain køben;

¹⁶ Jacobpe Joséwei møskain købig køn. Inchen tru Josébe Maríaí keg køben, tru María gurri Jesús kal-laig købig køn, tru Cristo taig.

¹⁷ Inchawei Abraham køb uraskurri merrabsrø kølli misaamerai ureemera katøle srøig, srøig kurrab arrubig David køb uraskatiibe catorce købig køn. Inchen David køb uraskurri tru israelitasmeran Babiloniamay merrarrowa srúa ambub uraskatig katøgan catorce treetøwei katøle srøig, srøig misaamera kurrab arrig købig køn. Incha tru israelitasmeran Babiloniamay srúa ambub uraskurri tru Cristo kal-lamnegatiibe misaamera katøgan catorce treetøwei kurrab arrig køn.

Jesucristo kal-laig

(Lc 2.1-7)

¹⁸ Jesucristo kal-laibe øyeeg kuig køn: María nui usrimbe Joséba kasharanrrab misra uñen, Josébe kasharanrrab permøwatø Mariabe Espíritu Santogurri kwanrriig kenamisrøptinchibig køn. ¹⁹ Inchen José tru nui keg kønrrabiibe sølgandø tabig kua, Mariane maya misagwei malau 'øyeeg kuin køn' chib kenamarmønrrab, nuinetø niløtø tarømisrøptinchab isubig køn. ²⁰ Nøbe treeg martrab chab isubguen inchen, Señorwei kan ángel piabyu kenamisrabe trenchibig køn:

—José, ñi Davidwei misagurri arrubig, Marían ñui srain kønrrai utamigwan kørig kui inchimøta cha. Kaguende tru unø tøgagømiibe Espíritu Santoin køn cha. ²¹ Nøbe kan møg-unø tøgagøben, truigwane Jesús munchi pasrtrig chibig køn. Nøbe øyeeg wamig kønrrun chibig køn, kaguende nui misagwan kaig mariiløyugurri wesranrrabig kuimba.—

²² Kerrigu øyeeg pureppe, Tius maig karuigwan eshkabigwan Señor truigwan øyah taig nebunrrai treeg kuig køn:

²³ “Kan srusrø mu møøbagucha kimíig kwanrriig kørrømisra, kan unø tøgagønrrun taig. Truibe Emanuel cha wamig kønrrun” cha, trenchibig køn.

(Tru Emanuel munchibe “Tiusbe namba pasran” taig.) ²⁴ Incha José tru piabyugurri kiagasrabe, Señorwei ángel maig karuig køben treeg mara, Mariane nui srain kønrrai kørrømarøbig køn. ²⁵ Incha Josébe Marían nui nusrkawan tøgagømmegatig keeba, sraimba lataig nømui asrtøga chi marmuig køn. Incha Josébe unane Jesús munchi pasrøbig køn.

2

Pørr kal-labgatøsræelø tru estrellameran ashib kusrebelø Jesúswan ashchab amrrub

¹ Jesúsbe Judea pirau Belén puebloyu kal-labig køn, Herodes tru pirau rey køb uras. Inchen tru uras pørr kal-labgatøsrø kusreb møguelø tru estrellameran ashib kusrebelø Jerusalén puabe, ² trenchib payibelø køn:

—¿Judíosmerai tru rey kal-labiibe chu tsuh? cha. Kaguende nambe nui estrellan webarri asha, køriibala nune tabig waminchab amrruer— cha.

³ Inchen rey Herodesbe trendaigwan mørape, ni mumaygucha kømui inchibig køn. Inchen katø Jerusalén misaamerangucha treetøweim pubig køn. ⁴ Inchen reybe sacerdotesteran karubelanba, tru Moisés pørigwan kusrenanøbelanba wama, payibig køn:

—¿Cristobe chu kal-lanrrabig kø?— cha.

⁵ Inchen nømbe trenchibelø køn:

—Judea pirau Belén cha. Kaguende Tius maig karuigwan eshkabig øyah pørig køn cha:

⁶ Judea pirau, ñi Belén pueblo-unøbe,
tru pirau purø wamindig ciudadmerai utu
ñibe chigucha kømøzhig lataig kønrrab kømø,
purø nuig køn cha.

Kaguende ñuinukkurrime misagwan ashib karunrrabig kan webattrun cha,
nai Israel misagwan nø pera marøb ashib pasrønrrabig.—

⁷ Inchen Herodesbe tru srømbalasarø estrellameran ashib kusrebelan mu ashmøwatø wama, estrellabe tappe chu uras kenamisrigwan payibig køn. ⁸ Incha nømune Belénmay ørape, trenchibig køn:

—Trusrømay amba, tru unaimburab tab payrrigay cha. Incha wetørrawabe, eshkarrunrigay cha, nagucha køriibala tabig waminchab inrrab— cha.

⁹ Tru kusrebeløbe rey øyeeg eshkailø ambubelø køn. Inchen estrella tru pørr kal-labgatøsrø asiibe nømui merraptø ya, yandø tru unø tsumi pala pasramisren, ¹⁰ tru kusreb møguelø estrellan ashabe, truba truba kasraarabelø køn. ¹¹ Incha yau kebambabe, unamba, usri Marianba ashabe, tømboñsra, køriibala tabig wamincha, nømui ketamelan kura, oro køben, incienso køben, mirra køben ketøbelø køn. ¹² Incha yandø nømune piabyu Herodesweimburab ammønrrain cha, eshkailø kua, nømui pirausrømaybe peg maywan ambubelø køn.

Egiptosrømay trubab ambub

¹³ Yandø tru kusreb møguelø chab amben, Señorwei kan ángel Joséwan piabyu kenamisrabe, trenchibig køn:

—Kurra, unan usranba perøb Egiptosrømay trubab inrrø cha. Incha trusrø na eshkamnegatig kørrømisrtrig cha. Kaguende Herodesbe unan kwetchab lanrrab køn— cha.

¹⁴ Inchen Josébe kurra, unan usranba pera, yem Egiptosrømay webya, ya, ¹⁵ trusrø tru Herodes kwamnegatig waraig købig køn. Øyeeg nebuppe, Tius maig karuigwan eshkabikkurri øyah taig, truig nebunrrain kuig køn: “Nai Nusrkawan Egiptogurri wamar” taig.

Herodes uregwan kwetchai karub

¹⁶ Inchen Herodes nun tru kusreb mōguelø isin kui mōrabe, truba truba nama, tru kusreb mōguelø tru ureg chu uras kal-laigwan eshkaigwan, trunun cuenta mara kal-laingurrimbunø pa pilagatiguelø Belén pōtōgatan warabelan kerriguba kwetchain karubig kōn. ¹⁷ Øyamay nebuig kōn Tius maig karuigwan eshkabig Jeremías øyah pørig:

¹⁸ Ramá pueblsørø kan wam mørig kōn cha.

Truibe kan truba truba isui wamab kishib, tru Raquel nui uregweimburab isua, kishibig kōn.

Incha 'kishmø, ka awentau' taingucha, awentanrrab kaimabig kōn cha, kaguende yandø ureemera chab kwaikken kōben.

Egiptogurri katø amrruig

¹⁹ Inchen yandø Herodes kwaben, Señorwei kan ángel Joséwan Egiptosørø piabyu ke-namisra, trenchibig kōn:

²⁰ —Kurra, unanba usranba pera, Israel pirausrømay katø inrrø cha. Kaguende unan kwetchab inchibeløbe yandø chab kwan— cha.

²¹ Inchen Josébe kurra, unanba usranba Israel pirausrømay pera, ibig kōn. ²² Inchen Herodeswein cuentabe nui nusrkai Arquelau Judea pirau truig karub wan taig mōrøppe, Josébe trusrømay yamig kōriimatøben, Tius piabyu Judeasrømay imōnrrai eshkaben, Galileasrømay ambig kōn. ²³ Incha Josébe trusrø puabe, Nazaret pueblsørø tsunrrab ibig kōn. Iig øyeeg nebuppe, Tius maig karuigwan eshkab mōguelø øyah taig nebunrrain kuig kōn: "Jesúsbe nazaretsriig cha wamig kōnrrun" taig.

3

Juan Bautista mu misag warab waraimønug eshkab kusrenanøb

(Mc 1.1-8; Lc 3.1-9, 15-17; Jn 1.19-28)

¹ Tru kwalømmawan Juan Bautista Judea pirau mu misag warab waraimønug ² trenchib eshkab kusrenanøb arrubig kōn:

—Kaig mariilan isua mōra, Tiusweimay lliray chib. Kaguende srømbalasarø Tius nø ashib karub waibe lutau pasran— cha.

³ Tru Tius maig karuigwan eshkabig Isaías øyah pørig Juanbe truig kuig kōn: Kan wam mu misag warab waraimønug trenchib trasan, taig: "Señorwei maywan tamarøb, nuyasig maymerane ølmarøb inday," chib.

⁴ Juan kewagüibe camello isiitøga marig købig kōn. Inchen nui pørønaibe kaluswan marig kōben, nui mamibe nørø chapullba kaambu mielba købig kōn. ⁵ Jerusalén misaameraba, mayeelø Judea pirau misaameraba, Jordán pi puluwaneløba nun mōrtrab werrubelø kōn. ⁶ Incha nømui kaig mariilan 'kaig marig kōn' chib eshkaben, Juanbe truilan Jordán piyu piu umbu ulsrøbig kōn.

⁷ Inchen Juanbe fariseosmera kōben, saduceosmera kōben, truba nørø nø piu umbu ulsrailø kōnrrab amrrui ashabe, trenchibig kōn:

—iÑimbe ul lataig inchib misaamera! ¿Ñimune mu eshkata cha, Tiuswei purø korig kōmdiig ñimuim pala attrabig pub pasrabigugurri wegørrønrraimbe? ⁸ Ñimui kaig mariilan isua mōra, Tiusweimay llirawar kuy, chibig kōn, tørgandø asamdiig kōnrrain cha. ⁹ Incha ñimbe ñimasiitø øyeeg chib mendømøtay cha: "Nambe Abrahamwei misaamera ker" chib. Kaguende nabe trendamōnrrun cha: Tiusbe i sruumeranguen Abrahamwei misaamera kōnrrai marøg kōbene, martrun cha. ¹⁰ Katø walømbe tusrmeran srølba para øramig chabguen srølyu pasringuen pasran cha. Chi tusrwandøgucha tab mamig ñimigwane para, nagu kegutsan cha. ¹¹ Nabe ñimune ciertonwei pi pinøbulrrai piu umbu ulsrar cha, kaig mariilan isua mōra, Tiusweimay llirain kōmmab asamdiig kōnrrai. Trune nai wendau arrubiibe si, Espiritu Santotøgaba, naatøgaba pinøbulrrun cha. Truibe si, na lataguen kōmø, maramburab marøbig kōben, nabe truburab kōmig kua, nui alpargatiswanguen srua inrrabgaig kur cha. ¹² Nøbe tirigun isig øra tarømartrab tru kala kutsamig tsig utigwan sruguen pasran cha. Incha truyu tru tirigu chishmari yabaløwan kerrigu chab chishmarabe, tirigune tirigu esegainug esegappe, shauwane mana kwamø nagu patrrun — chibig kōn Juanbe.

Jesúsuan piu umbu ulsrøb

(Mc 1.9-11; Lc 3.21-22)

¹³ Jesúsbe Galileasrøngurri Jordán piyumay arrubig kōn, tru Juan uninumay nun piu umbu ulsrønrrai. ¹⁴ Srøtøbe Juanbe nune piu umbu ulsrøg kōmui incha, trenchibig kōn:

—Nane ñiguen treeg marig kōmdiig købendø, ¿ñiguen nan attirru?— cha.

¹⁵ Inchen Jesúsbe trenchiptinchibig kōn:

—Møimbatøbe øyamay ka mar cha. Tius tru sølgandø tabig maramigwane nambe kutøgue øyamay maramig køn— cha.

Inchen Juanbe ka treeg marøbig køn. ¹⁶ Incha Juanbe Jesúswan piu umbu ulsrøben, piyugurri webibig køn. Inchen møimbe srømbalabe kurøptinchen, Jesúsbe Tiuswei Espiritu nuim pala kan paloma lataig kørraari ashibig køn. ¹⁷ Inchen srømbalarøngurri kan wam trenchib waminchibig køn:

—Iibe nai Nusrkai undaaraig køn cha. Nabe nuimburab truba tab kui war— cha.

4

Satanás Jesúswan chinchibig køtashchab inchib

(Mc 1.12-13; Lc 4.1-13)

¹ Inchen Espiritu Santøbe mu misag warab waraimøsrømay Jesúswan pera yaig køn, nugwaimandzig nun kebenøsrkønrrab inchai. ² Inchen cuarenta días yem kwaløm chigucha mamøwa, yandø parøgwai mørøbig køn. ³ Inchen tru kebenøsrkønrrab inchibiibe Jesúswan kemallabe, trenchibig køn:

—Isa kømø, tru ñi Tiuswei Nusrkain kuabe, i sruumeran pirri misringaru— cha.

⁴ Inchen Jesúsbe trencha løtabig køn:

—Tiuswei wamwan pørigube trenchibig køn cha: “Møøbe pirrindøgatø øsig tsumøtø, kerrigu Tiuswei wamdøgagucha tsumig køn”— cha.

⁵ Incha nugwaimandziibe Jesúswan Jerusalén tru Tiusweindø tarømari ciudadsrømay srua ya, tru Tiuswei yau purø palasrø pasrabe, ⁶ trenchibig køn:

—Isa kømø, tru ñi Tiuswei Nusrkain kuabe, pirausrø pørsrau cha. Kaguende Tiuswei wamyube trenchibig pørig pasran cha:

Tiusbe nui ángelesmeran ñun ashchai ørtrun chibig.

Incha ñui srøbwam sruugu srurrengwamønrrai nømui tasiimeratøga ñun kusranrrun— chibig.

⁷ Inchen Jesúsbe trenchibig køn:

—Katø Tiuswei wamwan pørigube treekkucha chibig køn cha: “Ñui Señor Tiuswane ke chinchibig køtashchab lataikkucha maramig kømøn”— cha.

⁸ Katøbe nugwaimandziibe kan truba pala tunsrømay srua yabe, yu pirau chutøgucha nørreelø tru nøm ashib karub purrailanba, katø nømui chigurrimbunø tabig tørig tøgagüigwanba kenamarabe, ⁹ trenchibig køn:

—Iigwan nabe kerriguba tranrrumøn cha, ñi nan srala, køriibala tabig waminchene.—

¹⁰ Inchene Jesúsbe trencha løtabig køn:

—¡Satanás, møi møi iptsu! cha. Kaguende Tiuswei wamwan pørigube trenchibig køn cha: “Señor ñui Tiuswandø køriibala tabig waminchib, nuyasiitø marøb megamig køn”— cha.

¹¹ Inchen nugwaimandziibe nuinukkurri tarømisren, ángelesmera amrrua, purugubelø køn Jesúswan.

Jesús tru nui maramigwan Galilea pølbasrøb

(Mc 1.14-15; Lc 4.14-15)

¹² Juan Bautistan kailan keeri yau keerin køn taig Jesús wammørabbe, Galileamay ibig køn. ¹³ Incha Nazaret puebløygurri webyabe, Capernaum puebløsrø pisu menda, Zabolønwei misag warainuuba, Neftaliwei misag warainuuba tru pirau tsunrrab ibig køn. ¹⁴ Øyeege nebuppe, Tius maig karuigwan eshkabig Isaiás øyah taig neburnrain kuig køn:

¹⁵ Zabolønwei misag warainuuba, Neftaliwei misag warainuuba tru pirau,

Jordán pi ambøgatø tru nu pisugatømaysrø,

Galilea tru judio kømeelø warainug,

¹⁶ misaamera løstøyu warabeløbe

kan truba tørig asan chib.

Kwamig nømumim pala itøgasraig lataig warabelø købelane

kan tørig kebilin køn, chib pørig.

¹⁷ Trugurrimbunø Jesúsbe eshkab kusrenanøb trenchibig køn:

—Kaig mariilan isua møra, Tiusweimay lliray cha. Srømbalarø Tius nø ashib karub waibe lutau pasran— cha.

Jesús pibgatø peskabelan wamab

(Mc 1.16-20; Lc 5.1-11)

¹⁸ Jesús Galilea nu pisu mendawan ib pasrøwabe, pa nunelan ashibig køn, kane Simón, truigwane katø Pedrogucha taig, kane Andrés taig. Truiløbe peskabelø kua, nømui atar-rayameran piyu keguchib warøben, ¹⁹ Jesúsbe trenchiptinchibig køn:

—Nai mendig amrruy cha. Nabe ñimune misaameran peskabelø kønrrai maramønrrun—
cha.

²⁰ Inchen tru urastø nømbe nømui atarrayasmeran warøb, nøba ambuptinchibelø køn.

²¹ Incha Jesúsbe katøguchi mas ambuurø yabe, katøgan pa nunelø warai ashibig køn, tru-
iløbe Zebedeowei nusrkalø, Santiagoba, Juanba. Nømbe nui mōskaimba barcoyu atarrayam-
era kōlsrailan tamarøb purrøbene, Jesúsbe tru nusrkalan wamabig køn. ²² Inchen nømbe tru
urastø barconba, nømui mōskawanba kōrrømarøppa, Jesúswei mendig ambuptinchibelø køn.

Misag truba nuwan Jesús kusrenanøb

(Lc 6.17-19)

²³ Jesúsbe Galilea pirau ørøba llirab ibig køn, judíosmera tulundzuni yamørig Tius nø
ashib karub pasrainuguig tabig srø wamwan eshkab kusrenanøb. Incha misaameran
chi kwanrreelan køben, chi pusrkwillan køben tamarøbig køn. ²⁴ Jesúswane Siria pirausrø
kerrigu wammøra kua, mayan kwanrreelan srua amrrubelø køn. Tru chi kwanrø
køben tøgarmen, katø ni mumayguen tab kōmui mørøb inçibelan, tru kwaimandziimera
tøgarmen køben, itønab pesannabig tøgarmen køben, kōnønrrab kaimabelan køben srua
amrrubelø køn. Inchen Jesúsbe tamarøbig køn.

²⁵ Inchen misamera galileasreelø køben, decápólissreelø køben, jerusalénsreelø køben,
judeasreelø køben, Jordán pi tru pørr kal-labgatøsrøelø køben Jesúswei mendig truba nu
ambubelø køn.

5

Jesús nu tunyu wamisra kusrenanøb wamindig

¹ Incha Jesúsbe misag truba truba nuwan ashabe, kan tun pala nebya wamisren, nui
kusrenanøb pera unilø kemallen, ² nøbe øyeeg chib kusrenanøb mendabig køn:

³ —Mayanguen tab kuilø køn cha, tru Tiusweimburabigwan ke kagømønrraindøzhig
tøgaguermab isua palai mørøbelaimbe.

Kaguende srømbalårø Tius nø ashib karub waibe nømuiwein køn cha.

⁴ Mayanguen tab kuilø køn cha, tru truba isuig kishibelaimbe.

Kaguende Tiusbe nømun chi isui inçimønrrai tab købigwan tranrrun cha.

⁵ Mayanguen tab kuilø køn cha, tru larrø tammayelø lata lata inçimeelaimbe.

Kaguende nømbe tru pirøwan Tius tranrrab misrigwan ketig utønrrun cha.

⁶ Mayanguen tab kuilø køn cha, tru sølgandø tabigwan kan parøgwaig mørøb lataig, pi
mulgwaig mørøb lataig inçibelaimbe.

Kaguende maig isua palai melaigwan Tiusbe nømun nørø traniilø kønrrun cha.

⁷ Mayanguen tab kuilø køn cha, katøganelan lastima ashibelaimbe.

Kaguende nømungucha Tiusbe treetøwei lastima ashib tøgagønrrun cha.

⁸ Mayanguen tab kuilø køn cha, chi kaig isumø manrømera chishig tøgaweimbe.

Kaguende nømbe Tiuswan ashchun cha.

⁹ Mayanguen tab kuilø køn cha, tru ambugurri igurri tab kōmigwan lab marøbelaimbe.

Kaguende truilane Tiusbe 'nai ureg køn' chinrrun cha.

¹⁰ Mayanguen tab kuilø køn cha, tru Tius mandø martrai miaigwan marikkurri kaig
martraindinab kaig nebui melabelaimbe.

Kaguende srømbalårø Tius nø ashib karub waibe nømui køn cha.

¹¹ Ñimbe mayanguen tab kuilø køn cha, nagurrindø misamera tsalø waminab, kaig
marinab, katø ñimun chine, chine isa wamindinab melabelaimbe. ¹² Pøsr truba kasraarab
tab kui møyay cha. Kaguende srømbalårømbe truba truba nuig ketig utamig tøgagønrrun
cha. Ñimuen kōmøwatøsrøwei tru Tius maig karuigwan eshkabelan øyeetøwei kaig marig
købig køn cha, trenchibig køn Jesúsbe.

Tiuswei ureebe yu pirau treba, tərba lataig køn

(Mc 9.50; Lc 14.34-35)

¹³ Ñimbe yu pirau tre latailø køn. Inçendø yandø tre larmüig misrabe, ¿katøbe chincha
kui larrøbig misriasamø? Yandø mas chiweingucha larmüig misrene, wambig petøben,
misaamerabe itøbanan, chibig køn.

¹⁴ Ñimbe yu pirauelayasig tər latailø køn. Kan ciudama tun palasrø pasrabiibe trubønrrab
kaiman cha. ¹⁵ Katø kan aceite lãmparan chigucha piløgøppe, kōtsø umbu pasrtrab
piløgømøn cha. Treeg kōmøtø, masken pala pasrene, mayeelan yau purrabelan pilan chibig
køn. ¹⁶ Øyeetøwei ñimungucha misaamerai merrab ñimui tər pilønrrai inçay chibig køn, ñimui
tabig mariilan asha, nømbe ñimui Mōskai srømbalårø wabigwan truba tabig waminchain
cha.

Maig maramigwan martrai Moisés pørigwan Jesús kusrenanøb

¹⁷ Nabe arruppe, maig maramigwan martrai Moisés pørigwanba, Tius maig karuigwan eshkabelø kusrenaniilanba na patsøgønrrab arritamab isumøtay chibig køn. Nabe tregg kømøtø, arruppe, tru Moisés pørigu maig chibig køben, trunun newan mara kørrømartrab arrig køn. ¹⁸ Pøs nabe ñimun cierton trendamønrrun: Srømbalaba, pirøba pønrrøbenbatøbe, tru maig maramigwan martrai Moisés pørigu maya lamøzhig pørig pønrrabeløguen pinappe, purainrraamøn cha, kerrigu tru pørigu maig taig nebumnegatig. ¹⁹ Inchawei møikkøben tru maig maramigwan martrai Moisés pøriiløyu karua pønrrailan møigu køben maya lamøzhigwandøguen kalø marøb, katø misagwan treetøwei kalø martrai kusrenanøbiibe srømbalasrø Tius nø ashib karub waisrømbe truipe purø lamíig kui asig køn taig kønrrun. Trune møikkøben martrai karua pønrrailan marøb, katø treetøwei martrai kusrenanøbiibe, truipe si, srømbalasrø Tius nø ashib karub waisrømbe nuig kui asig kønrrun cha.

²⁰ Inchawei nabe ñimune eshkar: Ñimui sølgandø marigwan tru Moisés pørigwan kusrenanøbeløba, fariseosmeraba marøb pønrrai lataitøguen kømø, katøguchi tabig marmuisruandøbe, srømbalasrø Tius nø ashib karub waisrømbe managuen kebamrraamøn cha.

*Trømbøig namiguølø kømumigwan Jesús kusrenanøb
(Lc 12.57-59)*

²¹ Ñimbe mørøbelø kuinrrun ñimui merrabsreelane trendaigwan: “Kweechimøta cha. Møikkøben kweechibiibe kaigyu pasrønrrai pasrig kønrrun” cha. ²² Trune nabe trendamønrrun: Møikkøben nui nunewan namig kørrømisrøbiibe kaigyu pasrønrrai pasrig kønrrun cha. Nunewan tsalø wamabigwane tru Setenteelø maig maramigwan asha marøbelø asha marig kønrrun cha. Inchen møikkøben nunewan trømbøig inchib: “Larrø kaig chugúi mørmíig køn” chib wamabiibe, tru kwamø nagu møra melamnug kegutsig kømigwan lab pasran cha.

²³ Inchawei ñi Tiuswei tranamigwan altaryumay srua arrua, ñui nunewan ñi chigøben kaig mara tøgagúigwan ñi isuptinchabe, ²⁴ tru ñi Tiuswan tranamigwan altaryu pasrøppa, ñui nuneeba tab kørrømisramigwanmerrig lanrrab yamig køn. Trugurrimbe si, altaryumay arrua, ñui tranamigwan tranø.

²⁵ Møikkøben ñun kejawa, juezweimay merranene, tru kejabiiba mayu ib pasrapatø, tammay kørrømisrøkun cha, petø wamindam lau, tru juezwei tasku tranmønrraimbe. Inchippa juezbe policiameran tranen, truiløbe ñun kailan keeri yau kegutsinamønrrappe. ²⁶ Pøs nabe ñimun cierton trendamønrrun: Truyugurri webinrrappe, maig pagaramigwan chishtø pagarawatøwei webinrrabguen cha.

Kasharawaig itølumumigwan Jesús waminchib

²⁷ Merrabsrø øyah taigwan ñimbe mørøbelø kuinrrun: “Møikkøben kasharawaig købendø, peg ishuuba itølulamig kømøn”, taigwan. ²⁸ Trune nabe trendamønrrun: Møikkøben kan ishuwan trømbøig martrab isub chull ashibiibe nui manrraube yandø chabguen itølulig lataig kørrømisran cha.

²⁹ Inchawei treekkurri ñui kusrmay kab kaig maringarua, kaigu ñun kebenøsrkøbene, wesrua, kuchi chibig køn. Trembe ñui asru kanbaløtø palab misrikken chi kømønrrun cha, tru møra melamnug asr ørøba kegutsig købgunrriibe. ³⁰ Ñui kusrmay tasig kaig maringarua, kaigu ñun kebenøsrkøbene, tasigwane para, kuchi, chibig køn. Trembe ñui asru kanbaløtø palabikken chi kømønrrun cha, tru møra melamnug asr ørøba kegutsig købgunrriibe.

*Kasharawar petiyamumigwan Jesús waminchib
(Mt 19.9; Mc 10.11-12; Lc 16.18)*

³¹ Katø merrabsrømbe trendaig købig køn: “Møikkøben nui srawan kucha, tarømisrøtrappe, kan kilga tarømisrøtrab chibig mara, nun purøøramig køn” cha. ³² Trune nabe trendamønrrun: Mu møøtøgucha nui srai, itølulumubendø, srawan kucha, tarømisrøbiibe, nui srawane itøluløb uñchai maran cha. Inchen mu møøtøgucha kan tarømisra ishuuba kasharabiibe nøgucha treetøwei itølulan cha.

Isa waminchimumigwan Jesús kusrenanøb

³³ Katø ñimbe møriinrrun ñimui merrabsreelan øyah tailan ‘Señorwei merrab, jkatø! marmø kømø, nabe maramønrrun’ cha kørrømisrigwane wamindiitø kømø, maramig køn taigwan. ³⁴ Inchendø nabe ñimun trendamønrrun: ‘jkatø! marmø kømø, nabe maramønrrun’ chib mumaygucha ke tregg chimøtay cha. Srømbalawei merrab pasramisra ‘jkatø! marmø kømø, nabe maramønrrun’ chimøtay cha. Kaguende srømbalabe Tius nø wamisra waig køn cha. ³⁵ Katø ñimbe pirøwei merrab pasramisra, ‘jkatø! marmø kømø, nabe maramønrrun’ chimøtay cha. Kaguende pirøbe Tius itøbuna waig køn cha. Ni katø Jerusalénwei merrab chigucha tregg maramig kømøn. Kaguende truipe Tius, tru purø nu Reywei ciuda køn. ³⁶ Ni katø ñimui turwan ‘jkatø! marmø kømø, nabe maramønrrun’ chimøtay chibig køn. Kaguende ñimbe pusrugwan ni kandøguen puliig martrab kaimabwei, ni kandøguen yaliig

martrab kaimabwei inchun cha. ³⁷ Inchen ñimbe martrappe: “Øø” tamig køn. Inchen marmørnrappe: “Ka” tamig køn. Pøs yandø i trendaigugurri mas nemarøb, ¡katø! marmø kømø, nabe maramørnrun’ taibe nugwaimandzigweinukkurri arrubig køn.

Kaig inchen lata marmumigwan Jesús kusrenanøb
(Lc 6.29-30)

³⁸ ‘Katø ñimbe merrabsrø trendaigwan mørøbelø kuinrrun: “Katøganui kabwan mindishibigwane nuin kabwangucha mindisamig køn”, taigwan. “Katøganui trugulwan lanchibigwane nuin trugulwangucha landamig køn”, taigwan. ³⁹ Trune nabe trendamørnrun: Møikkøben ñun kaig marene, lata inchimøta cha. Treeg kømøtø, møikkøben ñun kusrmay maløbøtø pashene, kandarømayigwangucha yul cha. ⁴⁰ Møikkøben kejawa kewagúigwan kerranrab inchene, turiwangucha srua ibasingaru cha. ⁴¹ Møikkøben ñun nama, kan kilómetro chigøben niguingarubene, trube, pa kilómetro nig cha. ⁴² Inchen møikkøben ñun chi miabigwane tranø cha. Møikkøben ‘pebrra’ cha, miabene, ‘ka’ chimø, peb cha.

Ashig kømui inchibelan undaaramigwan Jesús waminchib
(Lc 6.27-28, 32-36)

⁴³ ‘Ñimbe katø merrabsrø trendaigwan mörig kuinrrun: “Ñui tab linchibigwane isua, undaaramig køn chippe. Ñun tsaliigwane ashig kømui indamig køn”, taigwan. ⁴⁴ Trune nabe ñimun trendamørnrun: Ñimun ashig kømui inchibelane undaaray cha. Inchen ñimun kaig martrabgøba inchibelaimbe nømuyasig Tiusba wamindamig køn cha. ⁴⁵ Treeg marabe, ñimbe Møskai srømbalasrø wabigwei ureg kønrrabguen. Kaguende nøma nui nøsigwan kailaim pala lata, tabelaim pala lata pørr patingarub, katø sølgandø tabig marøbelaim pala lata, chi sølgandø tabig marmeelaim pala lata sre punrrai ørøb inchibig køn cha. ⁴⁶ Kaguende ñimun undaarabelandø undaarawabe, ¿truburøbe chigúui utønrrague? ¿Romasreelayasig an utabeløguen treetøweimbe marøbelø kømuitarru? ⁴⁷ Inchen ñimui nunelandø tab wabiibe, ¿chigúui srøig peg marig kønrrautah? Kaguende ¿Tiuswan ashmeelø tru judíos kømø misaamer-aguen treetøweimbe marøbelø kømuitarru? ⁴⁸ Ñimbe sølgandø newan tabelø kuy, ñimui Møskai srømbalasrø wabig newan tabig køb lataitøweingue.

6

Tabig maramigwan Jesús kusrenanøb

¹ Ñimui tabig mariilan misaamerali malu marmøtay, misaamera ka ashchaidø lataig. Ñim treeg marene, ñimui Møskai srømbalasrø wabiibe chigucha truburøbe tranrraamøn. ² Inchawei palai inchibelan ñi puruguppe, mayeelø wammørtraï waminchib kenamarmøta. Tru palatø tab inchibelø latawei judíosmera tulundzuni yamerayu, callesmerayu misaamera nømun tabig waminchai marøbelø lataig marmøta. Kaguende nabe ñimun cieron trendamørnrun: Yandø treeg marøbeløbe nømui truburø ketig utamigwane utabguen indan cha. ³ Inchen palai inchibelan ñi puruguppe, ñui kusrmay tasig marigwane atsimay tasig asha kønrrai marmøta. ⁴ Inchen ñi mun kenamarmøtø mariilan Tius ñui Møskai ashibiibe ñun truburø ketamigwan ketrun.

Tiusba mandø wamindamigwan Jesús kusrenanøb
(Lc 11.2-4)

⁵ ‘Ñim Tiusba waminchib pønrrappe, tru palatø tab inchibelø lataig kømøtay. Truiløma judíosmera tulundzuni yamerayu køben, plazayu ya tsøbmerasrøn køben pønrramisra, Tiusba wamindamig chullelø køn, misaamera ashchai. Nabe ñimun cieron trendamørnrun: Nømun misaamera tabig wamindiibe, truiibe truburø ketig chabguen utabguen indan cha. ⁶ Trune ñibe Tiusba waminchappe, ñui kwartuyu kebya, yaskabwan kasra, ñui Møskai Tiusba waminchi cha, mu asiimig truyu ñibatø pasrabigwan. Inchen ñi mun kenamarmøtø marigwan Tius ñui Møskai ashibiibe ñun truburø ketamigwan ketrun.

⁷ ‘Tiusba waminchib pasrappe, trunundø katøle, katøle ka yandø wama mørømøta, judíos kømeelø latawei. Kaguende truiløbe truba truba waminchene, Tiusbe katøguchinguen mørtraitamab isubelø køn. ⁸ Ñimbe nøm latailøwein kømøtay. Kaguende ñimui Møskai Tiusbe ñim miamøwatø ñimui chi palai indigwane chab ashaguen wan. ⁹ Ñimbe Tiusba waminchib pønrrappe, øyah chinrrigay:

Namui Møskai srømbalasrø wabig, ñui munchibe tabigweindø tarømara, newan tab indig kønrrun.

¹⁰ Ñi ashib karub pasraibe pirau larrøbitchab amø, srømbalasrø latawei yu piraugucha, ñi maig maramdiig køben, treegwei marig kønrrai.

11 Kwalømmørig nam mamig maig palabigwan mõi tranøb,

12 namui kaig mariilan ulø paymø, pesannarrunrig chib,
nam namun kaig marøbelan ulø paymø, pesannawa kørømisrøb lataitøwei.

13 Chigøben namun kegørrøkrønrriptig pønrrøbene, truwane namun ambashmørrunrig.
Masken tru kaigweinukkurrimbe tarømartra. Kaguende, tru ashib karub waiba,
maramburab mariiba, purø nuig, purø tabiibabe managatig ñuin køn chib.

14 'Kaguende katøganelø ñimun kaig maren, truilan ñim ulø paymø, ñim pesannabene,
ñimui Møskai srømbalasø wabikkucha ñimun ulø payamigwan paymørrun cha. 15 Inchen
katøganelan ñim pesannamø, ulø payene, ñimui Møskai srømbalasø wabikkucha pesannamø,
ñimui kaig mariilan ulø payrrun chibig køn Jesúsbe.

Ayunamigwan Jesús kusrenanø

16 'Ñim ayunappe, malømera kwa isuig lataig misrmøtay. Tru palatø tab inchibeløma
malømerabe kwa isuig latailø kenamarøbelø køn, misaamera nømbe ayunab kui ashchai.
Treeløwein kønrrab kømø. Pøs nabe ñimun cierton trendamørrun: Yandø nømun misaamera
tabig wamindiibe, truike truburø keti lataig chabguen utabguen indan cha. 17 Inchen ñibe
ayunappe, maløwan kwalla, pusrugwan tabig tamar cha, 18 misaamerabe ñun ayunab wain
kønmab ashmørrai. Ñinetø marigwan ñui Møskai ashib pasrabiibe trunun asha, nøbe ñune
truburø tranamigwan tranrrun chibig køn.

*Srømbalasø chigurrimbunø pønrrabig
(Lc 12.33-34)*

19 'Yu pirau chine, chine tulishimøtay, pullillamera mab, trerawa pinab, nileelø kebamba
nilab indinug. 20 Trembe srømbalasøwei tøgamisrøb tulisay, pullilla mamøwei, trerawa
pinømøwei, nileelø nilønrrab kebammøwei indinug. 21 Kaguende ñimui chi tøgagüilø chu
esegaig pønrrøbene, ñimui manrrøgucha ke truyutø isub pasrønrrun cha.

*Kabmerabe asrwei lámpara køn
(Lc 11.34-36)*

22 'Asru kappe kan lámpara køn cha. Inchawei ñui kab tabig købene, ñui asrube kerriguba
tørsulu kønrrun. 23 Inchen ñui kab kaig købene, ñui asrube kerriguba løstiiig kønrrun. Inchawei
tru tør ñuinug pasrabikken løstiiig købene, tru løstiibe mas maig løstøgølig kerah chibig køn
Jesúsbe.

*Møigwanmerrig mas isua tøgagømig
(Lc 16.13)*

24 'Nun karunrrabelø muguen pagatøbe tøgagønrrab kaimanrrun. Kaguende kanune
tsalø ashippe, kanune undaaranrrun cha. Kanune chiyugucha truba tab mørøb megappe,
kanune kaashib webinrrun cha. Inchawei Tiusweimburabigu marøb pasrønrrab isumba,
anweimburabigu marøb pasrønrrab isumba inchiibe martrab kaimanrrun cha, pa-
baløbabe.

*Tiusbe nui uregwan ashibig køn
(Lc 12.22-31)*

25 'Inchawei nabe ñimun trendamørrun: Øsig amønamiig, ñim mamigwanba, mut-
samigwanba, asru chi kemermab isumigwanba menrra isumøtay cha. Øsig amønamiikkan
kan mamig lataitø kuitarru cha. Kabe asrkan kan asru keelø lataitø kuitarru cha.
26 Pala amøñibelø illimeran asay chibig køn. Ellguamøwei, ellmarig tulishimøwei, ellmarig
tulisaiigwan esegainug esegamøwei inchibelanguen, truilanma ñimui Møskai srømbalasø
wabiibe manrrai mannøbig køn cha. ¿Ñimbe illimera lataguen kømø, maselø kømøtirru?
chibig køn. 27 ¿Ñim møiløgøben maya, maya incha katøgan tøbø metrotøguen nurabsruguh?
cha.

28 '¿Chindimbarre ñimbe asru keegwan truba truba isubelø køgue? cha. Wambig umer-
anma asay chibig køn. Kwallmøwei, kumøwei inchibelø købendø, tabig nørørran cha.
29 Inchendø nabe trendamørrun: Rey Salomónguen nui chine purø tabzhig tøgagua,
umera lata tabzhiibe kemuig køn cha. 30 Wambig kaumera, mõi ka pønrrøwa, srønabe
nagu parrig kønrrabigwanguen Tiusbe øyeeg tabzhig kenanøb lataig marøbiibe, ñimune
treetøguen kømøtø, masken marmønrraitarru cha, ñim ya ñimui isubigwan Tiusweinug pasra
ke kagømønrraindøzhig tøgarwan. 31 Inchawei øyeeg chib chi isumøtay chibig køn: "¿Chi
mamer?" chib; "¿Chi mutsamer?" chib; "¿Chi kemer?" chib. 32 Kaguende tru Tiuswan
ashmeelø judíos kømø misaamerabe iigwandø isub labelø køn. Inchen ñimui Møskai
srømbalasø wabiibe ñimui chi palabelan ashaguen wabig køn. 33 Inchawei Tius nø ashib
karub wainuguigwanba, katø tru sølgandø tabigwanba, truilanmerrig lab maramig køn.
Trumaybe tru katøgan chi palabelangucha ñimbe namarig kerrigu utønrrun. 34 Inchawei

srøna kwalømweyigwane chi isumøtay. Kaguende srøna kwalømweyigwane srøna isumig nøøro køn. Kaguende kwalømmørig chi pub arrubiitø tsabø køn isumibe.

7

Katøganelan 'øyeelø, øyeelø køn' chimøtay

(Lc 6.37-38, 41-42)

¹ Ñimbe katøganelan 'øyeeg, øyeeg marøbelø køn' chib waminchimøtay, ñimungucha 'øyeelø køn' tainamønrrappe. ² Ñim katøganelan 'øyeelø, øyeelø køn' chib wamindiibe, ñimungucha treetøwei martrun. Ñim kanelan maig unaasha traniibe, ñimungucha treetøwei unaasha tranrrun. ³ ¿Chindimbarre ñui nunewan kabyu shauzhig wabigwangøba ashku cha, tru ñuin kabyu nu tsig wabigwanguen ashmubendøbe? ⁴ Inchawei ñitøweinguen ñuin kabyu nu tsigwan ashmubendøbe, ñui nunewane chincha øyeeg chinrragu: "Nai nuneg, ¿ñuin kabyu shauzhig wabigwan wesrarruah?" cha. ⁵ Ñi, palatø tabig, ñuin kabyu nu tsig wabigwanmerrig wesru chibig køn. Trenchabe si, ñui nunewein kabyu shauzhig wabigwan wesrumig tab ashchabguen cha.

⁶ 'Chigøben Tiusweindø tarømarigwane werameran tranmøtay. Katø ñimui perlasmerane kuchimeran kebusrmøtay, inchipa truilan itølula, llirawa, amrrua, kurmillustøga kwanaguchib ñimun pitis marinamønrrappe.

Tiuswan miab, nun lab, katø yaskabu wamab inday

(Lc 11.9-13; 6.31)

⁷ 'Miabene, Tiusbe ñimune tranrrun. Lawabe, wetørranrrun. Yaskabu wamubene, ñimune kurtrun. ⁸ Kaguende mugucha miabiibe utøben, labiibe wetørraben, yaskabu wamabigwane kurtrun.

⁹ 'Kabe ñimma møikkøben ñui nusrkai pirri miabene, kabe, ¿kan pillisrugwan tranøbsruguh? ¹⁰ Kabe kan peskau miabene, ¿kan ulwan tranøbsruguh? ¹¹ Pøs ñimma ya kailø købenguen ñimui uregwane tabig keta tranøbelø køben, kan mas ñimui Møskai srømbalasø wabiibe nun miabelane, maig tabig tranrrer chibig køn.

¹² 'Inchawei ñimma katøganelø ñimuyasig tabig maramig palai inchibeløbe, ñimungucha katøganelan treetøwei maray chibig køn. Kaguende maig maramigwan martrai Moisés pørigu lata, Tius maig karuigwan eshkabelø pøriiløyu lata iigwanwei martrai karubig køn.

Trag yaskappa, lendø yaskappa

(Lc 13.24)

¹³ 'Trag yaskabwan kebambay chibig køn. Kaguende tru kan lendø yaskappa, tru lendø maybabe managuen werrumikkaig kegørra pønrramsrømay pera ibig køben, truwane si, møiløgøben truba nu keamban cha. ¹⁴ Inchen tru trag yaskappa, trag mayba managuen patsømø øsig purramsømay pera ibiibe, truiløbe traguelø, trurrigu murelø køben, trunun wetørrabeløbe mamdø køn chibig køn.

Tusrbe mamikkurri asamdiig køn

(Lc 6.43-44)

¹⁵ 'Tab asha kuy, chibig køn, "Tius maig karuigwan eshkabelø ker' chibelø isa waminchibelan, ñimuimay kan ubisha lataig amrrubendø, nømui umbube kan namig lobosmera latailø køn cha. ¹⁶ Trune ñimbe nømui maig mariiløyutøguen tsabø ashchun, tusryu mamig niguigwan latawei. Kaguende kal tusryugurrima uvas lurrmøwei, katø kaldø misrøb tusryugurri yashig lurrmøwei indan. ¹⁷ Inchawei kan tab tusrbe tab mamig nigen. Trune kan kaig tusrbe kaig mamitøwei nigan cha. ¹⁸ Inchawei kan tab tusrbe kaig mamig niirrab kaimabwei, katø kan kaig tusrbe tab mamig niirrab kaimabwei indan cha. ¹⁹ Inchawei chi tusrwandøgucha tab mamig niimigwane para, nagu kegutsan. ²⁰ Inchawei nømui mariiløyu ñimbe ashchabguen chibig køn.

Tius nø ashib karub waisrømbe mayeeløba kømøtø kebamrrun

(Lc 13.25-27)

²¹ 'Nan: "Señor, Señor" chibelø srømbalasø Tius nø ashib karub waisrømbe mayeeløba kømøtø kebamrrun. Treeg kømøtø, nai Møskai srømbalasø wabig maig maringaruben, trunun marøbeløtøwei kebamrrun. ²² Tru srabe kwalømbe nane møiløgøben truba nu trenchinrrun: "Señor, Señor, yamba nambe ñui munchiyu ñi maig karuigwan eshkab, ñui munchiyu kwaimandziimeran webetab, ñui munchiyu maramburab mariilan marig købig køn" cha. ²³ Inchene nabe trendamønrrun: "Managuen nabe ñimune ashmíg kur cha. Ñim larrø kaig marøbeløbe, nainukkurri tarømisray" cha.

Pailø ya marøbelan kemesra wamindig

(Mc 1.22; Lc 6.47-49)

²⁴ Møikkøben na wamindigwan mørøb, na maig taigwan møra marøbigwane kan møg tab isua marøbig lataig køn chinrrab. Nui yawan srug pala marøbig lataikke. ²⁵ Sre pub, pimera nurab, yawan isig megambub itsingucha, yabe peñmøn cha, kaguen srug pala marig pasrøwa. ²⁶ Inchen nan mørøppe, mørendø, na maig taigwan marmigwane, kan møg tab isua marmig lataig køn tamønrrun cha, nui yawan pisrum palatø marøbig lataikke. ²⁷ Sre puben, pimera nuraben, yawan isig megambub ichen, yabe peña, purø isumdiig mindisaig kørømisran— cha, trenchibig køn Jesúsbe.

²⁸ Inchen Jesús iilan kerrigu chab waminchen, maya misaaba kwaara asha kørømisrøbelø køn øyeeeg kusrenaniilan. ²⁹ Kaguende nøbe kusrenanøppe, nuiinukkurrindøwei mu mandamgaig kusrenanøbig køn, tru Moisés pørigwan nømui kusrenanøbelø lata kømø.

8

Asr trerab kwanrrø tøgagigwan Jesús tamarøb
(Mc 1.40-45; Lc 5.12-16)

¹ Yandø Jesús tun palasrøngurri kørøarruben, misag truba nu mendig amrrubelø køn. ² Inchene kan møg asr trerab kwanrrø, lepra taig, tøgagig kemallippa, Jesúswei merrab tømønnsrabe trenchibig køn:

—Señor, nan ñi tamaramdiig købene, tamartra— cha.

³ Inchen Jesúsbe tasigwan larrøbicha estsarabe, trenchibig køn:

—Tamarøg kőtan cha. Tamarig kørømisr— cha.

Inchen tru urastø nui trerab kwanrrøbe chishig kørømisren, ⁴ Jesúsbe trenchibig køn:

—Au, mungøben eshkawabesin cha. Inchendø ya, ñui asrwan sacerdotendø kenamara, katø Tiusweyasig tru Moisés tranrrig taigwane srua ya, tranrrig cha, mayeeløba ñui kwanrrøwan chishig kørømisrin kui ashchain— cha.

Suldau sətøwan nø karub pera pasrabigwei mendig megabigwan Jesús tamarøb
(Lc 7.1-10; Jn 4.43-54)

⁵ Yandø Jesús Capernaumsrø kebibene, romanosmerai suldau cienelan ashibig, kan centuriön taig, nuimay arruabe, nun purugurra chib, ⁶ trenchibig køn:

—Señor, nai mendig megabiibe yau kwanrrø tsun cha, truba truba pusrkwai inchib, kerrigu kønønrrab kaimaig.—

⁷ Inchene Jesúsbe trenchibig køn:

—Nabe arrua, tamaramønrrun— cha.

⁸ Inchen tru centuriönbe trenchibig køn:

—Señor, ñi nai yau kebattraimbe, nabe trengatig kømuintan cha. Tammisr cha, treetø chirra cha. Nai karuindiig megabiibe tammisrtrun cha. ⁹ Kaguende nagucha mas nørreelø karuig kur cha. Katø treeg køben na karub tøgagüilø suldameraga tøgagur cha. Truilanma na møigwan køben: “Inrrø” chibene, ib; katø na møigwan køben: “Amø” chibene, arrub; katø nai karuindiig megabigwan chigøben: “Mar” chibene, marøb inchibig køn— cha.

¹⁰ Jesús igigwan møra, kwaara asha kørømisrabe, nui mendig amrrubelan trenchibig køn:

—Nabe ñimun cierton trendamønrrun: Israelsrø møigweinukken isubigwan nainug pasra tøgagüig øyangatig nuig wetørramur cha, i møwei lataig. ¹¹ Incha nabe ñimune trendamønrrun chibig køn: Pørr kal-labgatøsrøngurrin køben, pørr kebiggatøsrøngurrin køben truba nu amrrua, Abrahamba, Isaacha, Jacobpa manrrab purramisrtrun cha, srømbalasrø Tius nø ashib karub waisrø. ¹² Trune Tius nø ashib karub waisrø purrønrrab ureemerabe wambig purø trømbø løstøyu webusriilø kønrrun cha. Truyube kishib, trugulmeran tsatsamig kønrrun— cha.

¹³ Incha Jesúsbe tru centuriönwan trenchibig køn:

—Yamay inrrø cha. Ñi maig kørøig treeg kønrrun— cha.

Inchen tru urastø tru mendig megabiibe tammisrig køn.

Jesús Pedroi sueeran tamarøb
(Mc 1.29-31; Lc 4.38-39)

¹⁴ Jesús Pedroi yamay arrua, kebyabe, Pedroi sueerabe camayu pachiiba tsui ashibig køn. ¹⁵ Incha Jesúsbe tru ishuwei tasigwan katørabene, pachiibe weetapinchen, nøbe kurra, tru pubelayasig chi maramigwan marøb mendabig køn.

Kwanrreelø truba nørøwan Jesús tamarøb
(Mc 1.32-34; Lc 4.40-41)

¹⁶ Yandø yem misren Jesúsweimay truba yamelan kwaimandzig tøgawarwan misaabe srua amrruben, kan wamitøgatø tru kwaimandziimeran webetab, katø chi kwanrrø køben

tøgarwan mayeeelan tamarøbig køn. ¹⁷ Øyeege pureppe, Tius maig karuigwan eshkabig Isaiás øyah taig nebunrrain kuig køn:

Nøtøwei namui pusrkwabelanba,
namui kwanrrømeranba kerran, taig.

Jesucristoi mendig ambamibe murig køn

(Lc 9.57-62)

¹⁸ Jesúsbe nuin pøtøgatan misaamera truba nu tulsrua kui ashabe, nui kusrenanøb pera uniilane pisu ambøgatømaysrø larramrrai karubig køn. ¹⁹ Inchen tru maig maramigwan martraí Moisés pørigwan kan kusrenanøbig kemallabe trenchibig køn:

—Kusrennøbig, ñi chu ibendø, nabe mendig arrumønrrun— cha.

²⁰ Inchene Jesúsbe trencha løtabig køn:

—Zorramerabe waramig trab tøgagøben, katø pala amøñib illimeragucha nømui lemera tøgar køn cha. Trune na, Møg Misra Arrubiibe ni nai turwan chu nerrarramikken chigaig kur— cha.

²¹ Inchen katøgan møikkøsrøn, Jesúswan mendig uñibiibe, trenchibig køn:

—Señor, nai møskawan sørønrrabmerrig ibashcha— cha.

²² Inchene Jesúsbe trenchibig køn:

—Ñibe nai wendau amø cha. Tiusweimburabigu kwaig latailøbe nømui kwailan sørøbash— cha.

Jesús isig ichibigwanba, pi latøgushibigwanba kønøbashmub

(Mc 4.35-41; Lc 8.22-25)

²³ Jesús yandø barcoyu nebiben, nui kusrenanøb pera uniiløbe nun lincha ambubelø køn.

²⁴ Inchene møimbe maryube truba trømbøig mur isig ichib kurra, pi welarmera barcoyu mas, mas negutsingucha, Jesúsbe kib tsubig køn. ²⁵ Inchen nui kusrenanøb pera uniiløbe kasrønannrab amba, trenchibelø køn:

—¡Señor, namun wesurra chib, chab asentab meler!— cha.

²⁶ Inchen nøbe trenchibig køn:

—¿Chindimbarre kørig køta? cha. Ñim kui ñimui isubigwan nainug ke kagømønrraindøzhig pasra tøgar— cha.

Incha kurrabe, isigwanba, marwanba kønømønrrai kandø wamuben, ¡katø! yandø kerrigu wasrønzhig kørrømisrøbig køn. ²⁷ Inchen nømbe kwaara asha kørrømisra, trenchibelø køn:

—¿Øyeebe chi møg kerah? cha. ¡isig ichibig lata, mar lata, iiløguen nun mørtrappe!—

Jesús Gadarasrø pailø kwaimandzig tøgarmen tamarøb

(Mc 5.1-20; Lc 8.26-39)

²⁸ Jesús pisu ambøgatø Gadara pirausrø larraibene, pailø kwaimandzig tøgarmen sørin trabmerayugurri werrua, Jesúswan kemallibelø køn. Truiløbe truba namiguelø køptø, tru maywane mugucha puramrrab kaimabelø køn. ²⁹ Inchabe trenchib trashibelø køn:

—Tiuswei Nusrkai, ¿namune chi martrab inchigu? cha. ¿Namun ¡katø! purø trømbøig møra melønrrai martrab attirru cha, tru treeg maramig pumøwatøbe?—

³⁰ Truyugurri maya yab køsrøn kuchimera truba nu lawa mab amøñibelø køn. ³¹ Inchen tru kwaimandziimerabe Jesúswan trenchib rugabelø køn:

—Namun webetappe, trube, tru kuchimerayu kebangingarurrnrrig— cha.

³² Inchene Jesúsbe trenchibig køn:

—Ambay pøs— cha.

Inchen tru kwaimandziimerabe møguelainukkurri webamba, kuchimerayu kebammen, tru urastø kuchimerabe luløb mendappe, truba trømbø lendeyu lula, chab pinøgørraptincha, larrø nu pisuyu kegørra, pi keesra, chab kwabelø køn.

³³ Inchen tru kuchi ashibeløbe chab lula, puebløsrø puabe, tru kwaimandzig tøgar købelan maig purayaigwan kerriguh waminchib mendabelø køn. ³⁴ Inchen puebloyu maya misaabe Jesúswan katønrrab webamba, nun ashabe, tru piraugurri 'irra' cha, truba rugabelø køn.

9

Jesús kan kønønrrab kaimabigwan tamarøb

(Mc 2.1-12; Lc 5.17-26)

¹ Inchen Jesúsbe kan barcoyu nebya, pisu ambøgatøsrø larraya, nui puebloyu pubig køn.

² Inchen truyube kan møg kønønrrab kaimabigwan kan tsigalyu muta amrruben, Jesúsbe nømui isubigwan ke nuinuutø pasra pønrrai ashabe, kwanrriigwane trenchibig køn:

—Nai nusrkai, kullaaramøta cha. Ñui kaig mariilan ulø payamig kømíig, pesannaig kørømisran— cha.

³ Inchen møiløgøsrøn tru Moisés pørigwan kusrenanøbeløbe treeg isubelø køn: “Nøbe Tiusweimburab purø trømbøig waman” chib. ⁴ Inchen Jesúsbe nøm chi isub kuilan ashabe, trencha payibig køn:

—¿Ñimbe ñimui manrraube chindimbarre øyeeg kaig isub køgue? cha. ⁵ ¿Møigwan mas kørømø trendandiig købsruerah? cha. Kabe: “Ñui kaig mariilan ulø payamig kømíig pesannaig kørømisran”, ¿tamiteh? Kabe: “Kurrab, inrrø”, ¿tamiteh? cha. ⁶ Pøs, na, Møg Misra Arrubiibe yu pirau kaig mariilan ulø payamig kømíig pesannaig kønrrai mu mandamgaig marøbig kui mømibe ñim ashchai kenamaramønrrun— chibig køn.

Inchabe tru kønønrab kaimabigwane trenchiptinchibig køn:

—¿Kurrø! cha. ¿Ñui tsigalwan mutab, ñui yamay inrrø!— cha.

⁷ Inchen kwanriibe kurra, nui yamay ibig køn. ⁸ Inchen misaamera iigwan ashabe, truba kørig kui inchibelø køn, Tiusbe møguelan øyeeg mu mandamgaig maramig tranitamab isua. Incha øyeeg marikurri Tiuswan truba tabig waminchibelø køn.

Jesús Mateowan wamab
(Mc 2.13-17; Lc 5.27-32)

⁹ Jesús truyugurri yabe, kan Mateo taig møwan romasreelayasig an utabelø purrainig wai ashabe, trenchibig køn:

—Nai mendig amø— cha.

Inchen nøbe kurrab, nui mendig ibig køn.

¹⁰ Indiibe Jesúsbe tru Mateowei yau mab wabene, truba yamelø romasreelayasig an utabelø køben, katøganelø kaig marøb misaamera køben puabe, Jesúsba, nui kusrenanøb pera uniiløba mishatsigu trubalatø purrøben, ¹¹ møiløgøsrøn fariseosmera trunun ashabe, nui kusrenanøb pera uniilan trencha payibelø køn:

—¿Ñimui kusrennøbiibe an utabeløba, kaig marøbeløba mab, muchib wappe, øyeebe maig marøb wah?— cha.

¹² Inchene Jesús trunun mørabe, trenchibig køn:

—Tabelø kwanrøgarbe mø marøbig palain kømøn cha. Kwanrreeløbeguende palain køn cha. ¹³ Amba, i pørigu chi chibig kuigwan kusrey cha, tru Tiuswei wamyu øyah chibigwan: “Animal kweecha, nan tranøb kømøtø, ñimbe lastima ashibelø kønrrai inchar” taigwan. Kaguende nabe sølgandø amøñibelan wamønrrab arrumøtø, kaig marøbelan wamønrrab arrig køn— chibig køn Jesúsbe.

Ayunamigweimburab Jesúswan payib
(Mc 2.18-22; Lc 5.33-39)

¹⁴ Juan Bautistai mendig amøñibelø Jesúswan kemallabe, trencha payibelø køn:

—Namba, fariseosmerababe ayunamigwan katø katø marer cha. ¿Inchen ñui kusrenanøb pera uniiløbe chindimbarre trunun marmeelø køh?— cha.

¹⁵ Inchene Jesúsbe trenchibig køn:

—¿Kan novios yaumay linchai eshkailanma novio nømbe wabengan isuin purrønrraitaru? cha. Inchendø yandø novion srua ambam kwalømmera punrrun cha. Inchen ayunabwei inchun cha.

¹⁶ Møguen kan køllin camisanma kølsraigu srø llensu søtíimíigwan waya, tsushimøn cha. Kaguende tru srø llensube kesruppa, kølli llensune kølsrøben, mas trømbøikken kølsraig kørømisrtrun cha. ¹⁷ Katø srø vinonma køllin kalusmerayu usrmøwei inchibelø køn cha. Kaguende treeg marene, kalusmerabe srurrøben, vinobe lusher, yandø kalusmerabe ka pinønrrun cha. Inchawei srø vinone srø kalusmeran marigu usramig køn cha. Trumaybe møigwandøgucha chi mindisaig kømønrrun— chibig køn Jesúsbe.

Jesús kan ishuwan kwanrøwan tamarøb
(Mc 5.21-43; Lc 8.40-56)

¹⁸ Jesús waminchib pasramne, judíosmeran chi maramigwan kan karubig puabe, nui merrab tømønnsra, trenchibig køn:

—Nai nimbasr ke møindø kwan cha. Øyeeg kuindøgucha, ñi arrua, tasigwan nuim pala estsarene, katø øsiiranrrun— cha.

¹⁹ Inchen Jesúsbe kurra iben, nui kusrenanøb pera uniilø nun lincha amben, nøbe tru møøba ibig køn. ²⁰ Indiibe kan ishug doce años ørøba ani ib kwanrø tøgäig chiguen tab kømui megawa, Jesúswan wendaugurri kemallippa, Jesús nø kewagüig urøzhigwandø katørabig køn. ²¹ Kaguende nøbe treeg isubig køn: “Nui kewagüigwan ka katøraitø tammissrig kørømisramønrrun” cha. ²² Inchen Jesúsbe keesha asha, tru ishuwan ashabe, trenchibig køn:

—Chi isumøta cha. Nimbasr, ñui isubigwan nainuutø pasra tøgagúikkurri tamarig kørømisran— cha.

Indiibe tru uraskurri yandø tammisrig kørømisrig køn.

Kan ishug-unan Jesús øsiiranøb

²³ Incha Jesús tru judíosmeran karubigwei yau pubene, lus urrabelø køben, katø misaam-era truba trashib kishib kui ashibig køn. ²⁴ Inchabe trenchibig køn:

—Yugurri webambay cha. Ishug-unøbø kwaig kømøtø, ka kiptø tsun— cha.

Inchen misaamerabe Jesúswane ka indzatø mørøbelø køn. ²⁵ Incha nømun webambingaruben, Jesúsbe kebya, ishug-unan tasigu kemørene, unøbø kurraptinchibig køn. ²⁶ Inchen tru piraube muba kuimburab treeg purayaigwan wammørig kørømisrig køn.

Pailø kabgailan Jesús tamarøb

²⁷ Jesús truyugurri webya ibene, pailø kabgailø trenchib trashib wendautø amrrubelø køn:

—¡Namun lastima ashcha chib, merrabsrø Davidwei Nusrkai!—

²⁸ Inchen Jesúsbe yau kebiben, tru kabgailø kemallene, nøbø trencha payibig køn:

—¿Ñimbe na øyeegwan martraitamab kørøguh?— cha.

Inchen nømbe:

—Señor, øø— cha, løtabelø køn.

²⁹ Inchene Jesúsbe nømui kabmeran katørawabe, trenchibig køn:

—Ñim ñimui isubigwan nainug maig tøgagúig treeg kønrrain— cha.

³⁰ Inchen nømui kabmerabe ashibelø misren, Jesúsbe trenchib karubig køn:

—Mun køben eshka kønrrab kømø cha, i marigwan.—

³¹ Trendaingucha nømbe webambuptø, Jesús nø chi marigwan tru pirau mayeelan waminchibelø køn.

Kwaimandzig tøgag waminchab kaimabigwan Jesús tamarøb

³² Inchen tru kabgailø købeløbø webambub kømnetø, møiløgøsrøn Jesúsweimay kan wamgaig kwaimandzig tøgagwan srúa amrrubelø køn. ³³ Inchen Jesús tru kwaimandzigwan weguchen latatø, tru wamgaibe waminchiptinchen, misaabe kwaara asha kørømisra, trenchibelø køn:

—¡Managuen nam Israel misaamerai utube øyeekkatiibe ashmer!— cha.

³⁴ Inchen fariseosmerabe trenchibelø køn:

—Kwaimandziimeran ke nøasha karub pasrabikkurri kwaimandziimeran nøbø webusrøbig køn cha.—

Jesús misagwan yeekkucha nebuig melaitamab lastima ashib

³⁵ Jesús maya pueblomasrø, yamera tsitsø pønrrabsrø, judíosmera tulundzuni yamørig kusrenanøb, tabig srø wam Tius nø ashib karub wainuguigwan eshka waminchib, chi kwanrrømeragurrimbunø tøgarwan puskrwabelan tamarøb llirab ibig køn. ³⁶ Incha truba nu sötø misagwan ashabe, lastima isui inchibig køn. Kaguende nømbe truba isuilø, chinchabguen kaimar, kan ubishamera mu ashchabig chigar latailø køben. ³⁷ Incha nui kusrenanøb pera uniilan trenchibig køn:

—Ellmarig tulisamibe truba nørrø køben, trune tulishinrrabeløbø mamdø køn cha.

³⁸ Inchawei tru ellmarig puai Tiuswan miay chibig køn, nui ellmarigwan tulishinrrabelø ørtrai.—

10

Jesús nøashib karua øramelø doce lawa wesrub

(Mc 3.13-19; Lc 6.12-16)

¹ Jesús nui doce kusrenanøb pera uniilan wamabe, mu mandamgaig maramig tøgagønrrai tranøbig køn, trømbøig maringarub kwaimandziimeran webusrøb, katø chine kwanrrømeranba, puskrwabelanba tamartrai.

² Iilø køn tru doce nøashib karua øriilai munchimera: Srøsrøibe Simón truigwane katø Pedrogucha taig, nui nuneg Andrésba, Zebedøwei nusrkai Santiagoba, nui nuneg Juanba, ³ Felipe køben, Bartolomé køben, Tomás køben, Mateo tru romasreelayasig an utabig køben, Alfeøwei nusrkai Santiago køben, Tadeo køben, ⁴ Simón tru Cananistameraingatiig køben, Judas Iscariote tru wendø Jesúswan ashig kømui inchibelaingatø misra tranøbig købengue.

Jesús tru doceelan kusrenanrrai ørøb

(Mc 6.7-13; Lc 9.1-6)

⁵ Jesús i doceelan øyah martrigay chib karua ørøbig køn:

—Judíos komeelø waraisrø ammøwei, samaritanosmerai pueblomerasrø kebammøwei inchigay cha. ⁶ Trembe tru Israel misaamerai utu tru ubisha trubiilø latalaimaytø amrrigay cha. ⁷ Trusrø ambabe, srømbalasrø Tius nø ashib karub waibe lutau pasran chib eshka kusrenanrrigay cha. ⁸ Kwanrreelane tamarøb, kwailan øsiranøb, asr trerab kwanrø tøgawwan tamarøb, kwaimandziimeran webetab inchigay cha ñimbe. Ñimun øyee g martrai tranigwan ñimma ka ketig utig køn cha, ñimgucha katø treegwei marøppe, anwei marmøtay cha.

⁹ Oro køben, an køben, cobre køben ñimui pørønailøyu pusra ammøwei, ¹⁰ katø mayuwei murraila ammøwei, turingucha yunømaramiba kømøtø, kandø tøga; alpargatiskucha keeta kømøwei; ni pøtønain tsikkucha srua ammøwei inday cha. Kaguende chigøben marøbiibe nui marimburobe nu chi chinrainga mamigwane utamig køn cha.

¹¹ Ñim kan puebloyu kui, ya tsitsø pønrrabyu kui puabe, kan misag chi isumgaig tabigwan lawa, truigwei yau kørømmistrigay ñim truyugurri ambamnegatig. ¹² Yau kebambuppe, 'ñimun chi isumgaig tab køn' chib wamønrrigay. ¹³ Tru yau misaamera truburab tabelø købene, tru ñimui tab købiibe nømuim pala treeg kønrrun. Inchen trengatig kønrrabgailø købene, ñimui tab købiibe ñimuinuutøwein kønrrun. ¹⁴ Inchen ñimun wamømwøwei, ñim wamindigwan mørmwøwei inchene, nømui yaugurrin kui, nømui puebloygurrin kui webambuppe, srøbyu usrøwan chishtø kørørga webamrrigay chibig køn. ¹⁵ Inchawei nabe ñimun cierton trendamønrrun: Srabe kwalømbe Sodomaimba, Gomorraimba pirau lataitøguen kømø, Tiuswei tru maig kønrrabigwan asha maram kwaløm attrabiibe mas purø trømbøig kønrrun cha.

Wendøsrø kaig indinab melamig attrabig

¹⁶ 'Au, nabe ñim ubishamera latalan lobosmerai utu ørar. Chiyugøben kegørømmønrrab ñimbe ul latalø kuy. Inchen chi kaig inchimeelømaybe palomamera latalø kømig køn. ¹⁷ Ashiptø kønrrigay misaameran. Kaguende nømbe ñimune karubelai tasku tranøb, katø judíosmera tulundzuni yamerayu ñimune ichabetab inchun. ¹⁸ Katø karubelø nørreelai merrab, reymerai merrab nagurrindø srua amrrun, trumay ñimbe nømunba, judío kømeealanba naimburabigwan wamindamig kønrrai. ¹⁹ Inchen tru karubelan ñimun tranene, ñimbe mandø løtamigwan chi isumøwei, mandamermab chi isumøwei inchigay. Kaguende tru wamindamig pubene, wamindamig tøgagønrrai Tius tranrrun, chibig køn. ²⁰ Kaguende ñim waminchain kømøtø, Tius ñimui Møskawei Espiritu ñimgurri waminchun.

²¹ 'Inchen nuneebe nømui nunewandøwei kwetchai tranen, møkaimbe nusrkawan tranen, ureemerabe møskalan namig kurra, kwetchai tranrrun cha. ²² Maya misaabe ñimune nagurrindø tsalø indiilø kønrrabguen cha. Inchen srabe kwalømgatig chigúingucha megabig megabiibe kebeñchabig kømíig kaigyugurri wesraig kønrrun chibig køn. ²³ Ñimun kan ciudayu chigøben kaig martrab inchene, katøgansrømay wegørra ambay. Pøs nabe ñimun cierton trendamønrrun: Møg Misra Arrubiibe Israel pirau ciudamerayu ñim kerrigu naimburab eshka llliramøwatø attrun cha.

²⁴ 'Kan kusreb mendig megabiibe nui kusrenanøbigwan purab nuig kømøn. Katø kan karuindiig megabiibe nui ya puagwan purab nuig kømøn. ²⁵ Kan kusreb mendig megabiibe nui kusrenanøbig lataitøwei misrabe, trutø tsabø kui møramig køn. Inchen tru karuindiig megabiibe tru ya puag lataitøwei misrabe, trutø tsabø kui møramig køn. Yau møkai ashib wabigwanguen kwaimandzig Beelzebú cha wamibe, mas nui yau purrabelane chitø tai asamø chibig køn.

Mun korig tøgagømig

(Lc 12.2-7)

²⁶ 'Inchawei misaameran korig kui inchimøtay. Pøs chitøgucha søriibe søriitø kørømmisrø, kenamisrrun. Katø kan sratø tøgagúibe sratø kørømarig kømø, wammørig kørømmisrrun. ²⁷ Na ñimun løstøyu wamindigwane ñimbe kwaløm tøryu waminday. Katø na ñimun nilø wamindigwane ñimbe yabalasrøngurri trasay. ²⁸ Asrwandø kweechibelane korig kui inchimøtay. Kaguende ñui møsigwane kwetchab kaimanrrun. Treeg kømøtø, asrwanba, møsigwanba managatig tru møra melamnug pinishinrrabigwan, tru Tiuswane si, korig tøgaguy, chibig køn.

²⁹ 'Pagatø illinzheelan kan centavozhigweindø yanøbelø kømuitarru? Treweindøzhigwanguen ñimui Møkai pirau kørørbashmubene, ni kanzhikken kørømmøn. ³⁰ Pøs, ñimuimburappe ñimui turyu pusruumeranguen kan kan mundziizheelø køn. ³¹ Inchawei ñimbe chi korig kui inchimøtay. Truba yam illimera lataitøguen kømø, ñimbe mas purø nuweyelø køn.

³² 'Møikkøben misaamerai merrab 'Jesúsweingatiig kur' chibigwane nagucha nai Møkai srømbalasrø wabigwei merrab treetøwei truigwane 'ningatiig kur' tamønrrun.

³³ Inchen misaamerai malau 'Jesúsweingatiig kòmur' chibigwane nagucha nune nai Mòskai sròmbalasrò wabigwei merrab 'nuingatiig kòmur' cha, trendamònrnun chibig kòn, Jesúsbe.

*Jesúskurri misaamera nòòròtò misròb
(Lc 12.51-53; 14.26-27)*

³⁴ Nabe piraumay arruppe, ambumay imay tab kòbigwan srua arritamab isumòtay. Nabe truigwan srua arrumòtò, kwayab kòmigwan srua arrur cha. ³⁵ Nabe arruppe, mòòbe mòskaimba namig kurròben, nimbasrbe usrimba namig kurròben, yernabe sueeraba namig kurrònrrai martrab arrur.

³⁶ Inchawei mòigwandògucha ashig kòmui inchibelòbe yaelòtòwein kònrnun.

³⁷ Mòikkòben mòskawan kui, kabe usran kui, nan lataguen kòmò, mas undaarabiibe truburab chincha nain kònrabbgaig kòn. Nui nusrkawan, kabe nui nimbasrwan, nan lataguen kòmò, mas undaarabiibe truburab chincha nain kònrabbgaig kòn. ³⁸ Inchen mòikkòben kuruswan mutab nai mendig arrumibe truburab chincha nain kònrabbgaig kòn. ³⁹ Inchen mòikkòben òsig kòmigwan wetòrrabiibe yandò pinab pinamig nebunrrun cha. Inchen nagurrindò kwabiibe managatiig òsig kòmigwan wetòrrawa tògagònrnun cha.

*Ketigwan utab
(Mc 9.41)*

⁴⁰ Mòikkòben ñimun tab wamab utabiibe nan utan. Inchen nan utabiibe nan karua òòbigwan utan. ⁴¹ Inchen mòikkòben Tius maig karuigwan eshkabig kui ashiptò nun tab wamab utabiibe, tru Tius maig karuigwan eshkabigwan ketigwandòwei nòbe Tius tranig utònrnun chibig kòn. Katò mòikkòben kan sòlgandò tabig maròbigwan, sòlgandò tabig maròbig kuimburò utabiibe, sòlgandò tabig maròb mòwan ketigwandòwei Tius tranig utònrnun cha. ⁴² Inchen mòikkòben nai mendig amòñibelò kui ashiptò trengatiig kòmòzheelan kan pi pishi pasuzhiitòguen sròrròbiibe, truburò nui ketig utamigwane utòmò kòmò, utònrnun cha, ñimun trendamònrnun.—

11

¹ Jesús yandò nui doce kusrenanòb pera uniilan òyeeg, òyeeg maròb amòñinrrigay cha, chab kusrenanabe, truyugurri ibig kòn, tru pirau katògan pueblomerasrò nui srò wam tabigwan kusrenanòb katò eshkab waminchib inchab.

*Juan Bautistai kusrenanòb pera uniilò
(Lc 7.18-35)*

² Juan Bautista kailan keeri yau keerig pasròwa, Cristo chi maròb uniilan wammòròbig kòn. Inchabe mòilan kòsròn nui mendig amòñibelan Jesúswan trencha payrrai òròbig kòn:

³—¿Tru Cristo attrabig kòbiibe ñi kuin kui, kabe nambe katòganun muniiramòh? chinrrai.

⁴ Inchene Jesúsbe nòmun lòtappe trenchibig kòn:

—Amba, ñim chi mòrigwan, ñim chi asigwan Juanwan eshkanrrigay cha. ⁵ Kabgailòbe ashen, cojosmerabe amben, asr trerab kwanrò tògarmerane nòmui kwanròwan tamara chishmariilò kòben, kalu mòrmeelòbe mòròbelò misren, kwailòbe òsiraben, waachamerane Tiuswei tabig srò wamwan eshkab kusrenaniilò kòn cha. ⁶ Mayanguen tab kuig kòn chibig kòn, nan peg kuitamab isumòtò, na kuitamab isubigweimbe.—

⁷ Inchen yandò nòm amben, Jesúsbe Juanweimburab misagwan trenchib waminchib pòlbasròbig kòn:

—¿Mu misag warab waraimòsròmbe ñimbe chi ashchab webamgue? cha. ¿Kan caña ambumay imay ka isig srua yainaptiigwandeh? cha. ⁸ Trube, ¿chi ashchab webamgue? cha. Kabe, ¿kan mòg truba tabig keweigwandeh? cha. Ñimbe ashibelò kòn, truba tabig kebelòbe reymerai yau purrabelò kui. ⁹ Trube, treeg kòbene, ¿chi ashchab webambig kò? Kabe, ¿Tius maig karuigwan kan eshkabigwandeh? Òò, nabe ñimun trendamònrnun cha: Treegwanwei ashchab webambig kòn cha, katò treetòguen kòmò, trurriigu Tius maig karuigwan eshkabigwan lataguen kòmò, mas purò nuigwan. ¹⁰ Juanbe tru Tiuswei wamwan pòrigu òyah taig truig kòn: Au, nabe nai wam srua inrrabigwan ñui merrab òrar cha, truike ñui maywan tamartrai ñui merrab.

¹¹ Nabe ñimun cierton trendamònrnun: Maya mòguelò kal-laelai utu Juan Bautista lata nuibe muguen kurròmuig kòn cha. Inchendò treeg kuindògucha, sròmbalasrò Tius nò ashib karub wainuube chigucha kòmíikken mas nuig kòn cha, Juan lataguen kòmò.

¹² Juan Bautista maròb pòlbasròb uraskurri mòingatiig sròmbalasrò Tius nò ashib karub waibe truba kaig indinab pasran. Inchen tru treeg kaig maròbelòbe treeg mara, trunun nòm kanammòrò indan. ¹³ Mayeelò Tius maig karuigwan eshkabelòba, tru maig maramigwan martrai Moisés pòriibabe Juan arrumnegatiig Tius maig karuigwan eshkaig

købig køn. ¹⁴ Ñim iigwan kørewa utønrrappe; Juanbe Tius maig karuigwan eshkabig Elías attrabig købig, truigwein køn. ¹⁵ ¡Møramig kalu pønraibe mør!

¹⁶ ¿Møin kwaløm misaamerane chi latailø køn chinrrab køh? chibig køn. Kan plazayu ureemera esheerrab purramisra, nømui linchibelan øyah chib trashib purrabelø latailø køn cha:

¹⁷ Nambe ñimuyasig luswan uringucha,
ñimbe pailamuig køn chib.

Cantailø isumdeelø cantaben,
ñimbe miirab kishmuig køn, chib.

¹⁸ Pøs Juan mamøwei, muchimøwei inchibig arrubene, nømbe: “Kwaimandzig tøgäig køn” chibelø køn cha. ¹⁹ Inchen Møg Misra Arrubig mab, muchib inchibig arrubene, trube, nømbe: “Menrra maptiig køn”, tamba: “Menrra muchiptiig køn”, tamba: “Romasree-layasig an utabeløba, kaig marøb misaameraba linchibig køn”, tamba inchibelø køn nømbe. Inchendø mu møkken nebua isumgaig Tius marøb pasraibe nui mariiløtøga treeg kuitamab ashchai törgandø kenamaran— chibig køn.

*Isua mømø misaameran isumdiig nebunrrabig
(Lc 10.13-15)*

²⁰ Incha Jesúsbe maramburab mariilan nø truba mari pueblomerasø namig waminchibig køn, kaguende tru pueblomerayu warab misaamerabe nømui kaig mariilan isua møra, Tiusweimay llliramuikkurri. Incha Jesúsbe trenchibig køn:

²¹ —¡Ay, ñi Corazín pueblo waacha! ¡Ay, ñi Betsaida pueblo waacha! Kaguende Tirosrø Sidónsrø tru maramburab mariilan na ñimui utu lataitøwei marig kuimbe, manawei truiløbe nømui kaig mariilan isua møra, Tiusweimay lllirabsruig kuinrrun cha. Incha kaig marmønrrab yandø isua mører chib kenamartrab, trøsrkøleelø keb, nagusrøwan itøbusrøb inchisruinrrun cha. ²² Pøs nabe trendamønrrun: Tiuswei tru maig kønrrabigwan asha maram kwalømbe Tiroba, Sidónba misaamera lataitøguen kømø, ñimbe mas purø trømbøigwan utønrrun cha. ²³ ¿Inchen ñi Capernaum pueblogan, purø tab incha srømbalasarøngatig kusruig kønrrumab isutirru? Treeg kømøtø, tru møra melamnug kegutsig kønrrabguen ñibe. Kaguende ñimui utu maramburab mariilan Sodomasrø na marig købig kuimbe, møingatig tru ciudadabe pinømubsruinrrun cha. ²⁴ Inchawei nabe ñimun trendamønrrun: Tiuswei tru maig kønrrabigwan asha maram kwaløm attrabiibe tru Sodoma pirausrø misaamerai lataitøguen kømø, ñimuimbe mas purø trømbøig kønrrun— cha.

*Naimay amrrua isray
(Lc 10.21-22)*

²⁵ Tru uras Jesús trenchibig køn:

—Nai Møskai, srømbalawanba, pirøwanba ashib karubig, ñun tabig waminchar cha, kaguende ñibe kusrebelø chigúi mørøbelan ashmønrrai tru sørig pønrrabelane tru chigucha kømeelø kusremeelan kenamarikkurri. ²⁶ Treegwein køn, nai Møskai, ñi treeg kønrrai maramig tab kuig kua.

²⁷ Nai Møskaimbe chiwandøgucha nan trandan. Mugucha na Nusrkawane mu ashmuben, Møskaindøwei asan. Mugucha Møskawane mu ashmuben, na Nusrkaimba, møiløgøben na kenamariilø truiløbatø asan. ²⁸ Ñim mayeeløba ñimui amønailøyu chine chine nebuig truba muraarailø, trurrigu kwatsig nigarbe naimay amrruy, nabe ñimun isramig tranrrumøn. ²⁹ Arau merrarrabig tru nai nukabala trarrigwan kashmø, uta, naba latatø srua amun chibig køn. Incha na maig køben nan treeg asha kusrey cha. Nama purø tammayig, manrraugurri newan tabig chish inchimig, nabe treeg kur cha. Øyamaybe ñimui møsimerayasig isramig wetørranrrun cha. ³⁰ Kaguende nuka pala trarrig arau merrarrab tsig naimbe kwatsiguig kømø, ka niga ambamdiig køn— chibig køn Jesúsbe.

12

*Jesúswei kusrenanøb pera uniilø isrin kwaløm tirigu tur lurrøb
(Mc 2.23-28; Lc 6.1-5)*

¹ Inchen tru uras kan isrin kwaløm Jesús tirigu ellmari utuwan pureb ibene, nui kusrenanøb pera uniiløbe parøgwaben, tirigu turwan lurra, trulwan mab mendabelø køn. ² Inchen fariseosmerabe asha, Jesúswan trenchibelø køn:

—Au, ñui kusrenanøb pera uniiløbe isrin kwaløm chigøben marmønrrai merigwan marøb køn— cha.

³ Inchene nøbe trencha løtabig køn:

—¿Ñimgan lemeelø kòtirru cha, mana køsrøn Davidwanba nui linchibelanba parøgwaben mandø indigwan? ⁴ Pøs truima Tiuswei carpa ya tabzhigu kebya, nøba nui linchibeløba

Tiusweyasiitø tarømarig pirrimeran maig købig køn tan cha, ni nun lata, nui linchibelan lata mamønrrai merigwan, tru sacerdotemeratø mamigwan. ⁵ ¿Kabe ñimgan tru maig maramigwan martrai Moisés pørigu lemeelø kætirru cha, isrin kwaløm kuindøgucha sacerdotemera Tiuswei yau marøb purrappe, isrin kwaløm kømui lataig, isrømø, marøb purrøben, truigwanma Tiusbe kalø kui asig kuitarru? cha.

⁶ Inchen køben nabe ñimne trenchar: Tiuswei ya lataitøguen kømøtø, mas purø nuikken kur cha, na yu pasrabiibe. ⁷ Ñimbe ni chi tainguen mømmin køn: “Animal kweecha, Tiuswan tranøb kømøtø, ñimbe lastima ashibelø kønrrai inchar” taigwan. Tru trendaigwan ñim mandø kui mørig kuimbe, kaig mara kømeeleane ‘øyeeg kaig marøbelø køn’ chimubsrinrrun cha. ⁸ Inchawei na, Møg Misra Arrubiibe isrin kwaløm nan nø karunrrain kømøtø, maramdiigwane marøb, maramgaigwane marmub, nabe na asha karubig kur— chibig køn, Jesúsbe.

*Kan møg tasig mul-laig
(Mc 3.1-6; Lc 6.6-11)*

⁹ Incha Jesúsbe truyugurri ya, judíosmera tulundzuni yau kebibene, ¹⁰ truyube kan møg tasig mul-laig wabig køn. Inchen kaguen møiløgøsrøn Jesúswan chigøben chi køptø, Jesúswane trencha payibelø køn:

—¿Isrin kwaløm kan kwanrriigwan ka tamartrain kø chindah?— cha.

¹¹ Inchene Jesúsbe trenchibig køn:

—¿Ñimma møikkøben kan ubisha tøgagua, isrin kwaløm trabyu kebeñene, ya, kemøra, wesramønrraguh? cha. ¹² Pøs kan møøbe kan ubisha lataitøguen kømø, purab nuikken køn cha. Inchawei treeg købene, isrin kwalømmerawangucha tabig maramigwane merømø, ka marbasamig køn— chibig køn.

¹³ Incha tru møwane trenchibig køn:

—Kwalwan larrøbichi— cha.

Inchen nøbe larrøbichene, kandarø kwal latawei tabig kørørmisrøptinchibig køn. ¹⁴ Inchen fariseosmerabe webamba, Jesúswan namig kurra, mandø incha pinisamigwan waminchib mendabelø køn.

Jesúsweimburab maig nebunrrabigwan wamindig

¹⁵ Inchen Jesús iigwan wammøra, truyugurri iben, misag truba nu mendig ambubelø køn. Inchen Jesúsbe mayan kwanrreelan tamarøbig køn. ¹⁶ Incha nune mu køn cha, mun køben misaameran mørø waminchimønrrain karubig køn. ¹⁷ Iibe tru Tius maig karuigwan eshkabig Isafaskurri øyeeg taig nebunrrain kuig køn:

¹⁸ Iibe tru nai karuig marøb megabig køn cha, tru na lawa wesruig,

na undaaraig, truigweimburappe nabe truba tab kui mørøb kasrag war taig.

Nabe nai Espiritun nuim pala pasren,

chu pirausreelø køben maya misaameran tru sølgandø tabigwan nø eshkab kusrenanrrun taig.

¹⁹ Nøbe kwayam lamøwei, trashimøwei,

callesmerayu nui wamwan wamindi mørømøwei indig kønrrun taig.

²⁰ Kan caña kegurisaigwan nøbe kebinab lanchimøwei,

katø mecha ke chab kwab pilab pasrabigwan kweechimøwei inchen taig,

tru sølgandø tabigwan kerrigu kanawa wesrawa pasramnegatig.

²¹ Inchen judíos kømø misaamerabe nui munchiyutø isua muniirab kønrrun, taig.

Jesúswan kwaimandzigwei maramburab mariitøga maran chib

(Mc 3.20-30; Lc 11.14-23; 12.10)

²² Inchen Jesúsweimay kan møg kabgaig, wamgaig kwaimandzig tøgagigwan srua amben, nøbe nun tamarene, tru wamgaibe waminchib, ashib inchibig køn. ²³ Inchene mayeeløba kwaara ashib trenchib payiyabelø køn:

—¿Iibe tru merrabsrø Davidwei Nusrkain køppeendi?— cha.

²⁴ Inchen fariseosmera iigwan mørabe, trenchibelø køn:

—Nugwaimandzig, Beelzebú, tru kwaimandziimeran ke nøasha karubig treeg martrai tranig kua, truikkurri kwaimandziimeran weeran— cha.

²⁵ Inchen Jesúsbe nøm chi isub pønrraigwan ashabe, trenchibig køn:

—Kan rey karub tøgaweim pirauma misag nømasiitø nørøtø misrøb kurrabe, pinønrrun cha. Katø kan ciuda lata, katø kan yaelø lata nømasiitø nørøtø misrøb kurrabe, warønrrab kaimanrrun cha. ²⁶ Øyeetøwei Satanáskucha Satanáswandøwei weguchabe, nømasiitø nørøtø misran cha. Inchen nø ashib karub waibe, trube, ¿chinha pasrabig pasrønrrab kø? cha. ²⁷ Tru kwaimandziimeran na webetappe, Beelzebúgurri webetig købene, trube, ¿ñimui

mendig amõñibeløbe kwaimandziimerane mu webetingaruitøgarre webetah? cha. Inchawei, treeg købene, maig kuigwan ñimun uyube nõm kusrenrrun chibig køn. ²⁸ Trune na Tiuswei Espiritutøga kwaimandziimeran webetøbene, Tius nõ ashib karub pasraibe ñimui utube puaguen pasran cha.

²⁹ 'Kabe kan mõikkøben kan mur mõwei yauma kebya, tru mur mõwan lusrøbmerrig lusrøwatøbe, ¿nui chi tøgagüigwan chinchá kerranrrab kø? cha. Lusra trarratøwei nui chi tøgagüilan kerranrrun chibig køn.

³⁰ 'Naingatø pasrømíibe, nan tsaleelaingatø maran. Inchen naba tulishimíibe truørøtø wiitan.

³¹ 'Inchawei nabe ñimun trendamønrrun: Misaamera kaig mariilan lata, chigøben Tiuswan purø trømbøig wamab wamindiilan lata Tiusbe kerriguh pesannawa ulø paymønrrun cha. Trune Espiritu Santon purø trømbøig wamab wamindiilane si, Tiusbe pesannamø, ulø payrrun chibig køn. ³² Møikkøben na, Møg Misra Arrubigwan chigøben kaig waminchibigwane Tiusbe ulø paymønrrab pesannanrrun. Trune mõikkøben Espiritu Santon kaig waminchibigwaneguende ni mõi yu lata, ni kansrø lata pesannamø, ulø payrrun cha.

*Tusrwane mamikkurri asan
(Lc 6.43-45)*

³³ 'Pøs kan tab tusrbe, tab mamitøwei niirrun. Inchen kan kaig tusrbe kaig mamitøwei niirrun. Kaguende kan tusrwane mamig niguinug asan. ³⁴ ¡Ul lataig inchib misaamera! ¿Ñim chinchá tabig waminchague, trendø kailøbe? Kaguende nui manrrau chine isua tøgagüilø pinøguchen, nui triibe treeg wamindan. ³⁵ Kan møg tabiibe tabig isuilan nui manrrau esegabig kua, truyugurrimbe tabig wesrub wamindan. Inchen kan møg kaibe kaig isuilan nui manrrau esegabig kua, truyugurrimbe kaig wesrub wamindan. ³⁶ Inchawei nabe trendamønrrun: Chigøben wamindamgainan misag ke ka waminchá mõriilan Tiuswei tru maig kønrrabigwan asha maram kwaløm mayeeløba tru urasbe kerriguh maig kuigwan eshkamig kønrrun cha. ³⁷ Pøs ñui wamindiitøgatøwei 'tabig køn' tain kui, kabe 'kaig køn' tain kui Tius treeg marig kørrømisrtrabguen.—

*Jesúswan mu køremgaig mana asiimíig martrai miab
(Mc 8.12; Lc 11.29-32)*

³⁸ Inchen mõiløgsrøn Moisés pørigwan kusrenanøbeløba, fariseosmeraba Jesúswan trenchibelø køn:

—Kusrennøbig, Tius ñiba pasrain kui nam asha kønrrab mar— cha.

³⁹ Inchene Jesúsbe trencha løtabig køn:

—Møin kwaløm kaig misaamera, kan kasharawar peebe itøluløpteelø lataitøwei Tiusbatø pønrrømø misaamera kailø, Tius naba pasrain kui ashchab maramig miatan cha. Inchendø asha kønrrai katøgan chigøben peg kenamara tranmøtø, Tius maig karuigwan eshkabig Jonásweiwandø eshkamønrrun cha. ⁴⁰ Tru Jonás truba nu peskau umbu pøn kwaløm, pøn yem wab lataitøwei Møg Misra Arrubikkucha pøn kwaløm, pøn yem pirø umbu wanrrab køn cha. ⁴¹ Tru Nínive ciudadrø misaamerabe Tiuswei tru maig kønrrabigwan asha maram kwalømbe kenamisrtrun cha, tru mõin kwaløm misaameran kaiyu pønrrab. Kaguende nínivesreeløbe Jonás eshkaigwan mõra, nõmui kaig mariilan isua mõra, Tiusweimay lliraig køn cha. Inchen yu pasrabiibe Jonás lataitø kømø, mas nuig kur cha.

⁴² 'Tru ambø umbu pirausrø reinagucha Tiuswei tru maig kønrrabigwan asha maram kwalømbe kurrønrrun cha. Incha nõbe tru mõin kwaløm misaamera ñimun mõra melønrrai maringarunrrun. Kaguende nõma purø yabsrøngurringuen pirau arrig købig køn, Salomón, tru purø kusrebig wamindigwan mõrtrab. Inchen yu pasrabiibe Salomón lataitø kømø, mas nuikken kur chibig køn.

*Kwaimandzig mõweinumay katøle arrub
(Lc 11.24-26)*

⁴³ 'Kan trømbøig maringarub kwaimandzig mõweinukkurri webippe, chugøben purmerasrø isramig lab uña, yandø wetørranrrab kaimappe, treeg isun: ⁴⁴ "Katø nai yamay inrrab cha, na chugurri webarrua arrinumaytøwei". Incha katø arruabe, tru mõwane kan yawan chiguchagaig chishtø paluuncha tamara pasrig lataig wetørranrrun cha. ⁴⁵ Incha ippe, katøgan kwaimandziimera, nõ lataguen kømø, mas larrø trømbøig marøbelan sieteba tulundzuna, søteeløba trubalatø tru mõweinug purrønrrab kebamrrun cha. Inchen tru mõøbe yandø srabebe mas purø kaikken kørrømisrtrun cha, tru srøsrø lataitøguen kømø. Inchawei i mõin kwaløm misaameran kailan treetøwei purainrrun—chibig køn Jesúsbe.

Jesúswei usrimba, nui nuneløba
(Mc 3.31-35; Lc 8.19-21)

⁴⁶ Jesús misaameran waminchib srø pasramne nui usrimba, nui nuneløba pua, nøba waminchig kui wambiitø pønrrabelø køn. ⁴⁷ Inchen møikkøsrøn Jesúswan eshkabig køn:

—Ñui usrimba, ñui nuneløba wambig pønrran cha, ñiba waminchab ñun payib.—

⁴⁸ Inchene Jesúsbe tru eshkabigwane trenchibig køn:

—¿Nai usri, nai nuneløbe mumera køh?— cha.

⁴⁹ Inchabe nui kusrenanøb pera uniilan kwaneshkab trenchibig køn:

—Nai usri, nai nuneløbe iilø køn cha. ⁵⁰ Kaguende møikkøben nai Møskai srømbalarø wabig maig martrai karuben, treeg marøbig, truibe sí, nai nuneg, nai nuchag, nai usrin køn— cha.

13

Kan ellmarøb kwallibigwan 'øyeeg lataitøwein køn' cha, kemesra wamindig
(Mc 4.1-9; Lc 8.4-8)

¹ Tru kwalømdøwei Jesús yaugurri webya, nu pisu menda wamisrøbig køn. ² Inchen misag truba nu tulundzunikkurri, Jesúsbe kan barcoyu kebya wamisren, maya misaabe tru pisu mendatø pønrrabelø køn. ³ Inchen nøbe waminchib pølbarsøbig køn 'øyeeg lataitøwein køn' chib wamindiiløtøga chineh kemesra kusrenanøb.

Incha trenchibig køn:

—Kan kwallibiima tsurøb kwallchab webyan cha. ⁴ Incha tsurøb ibene, kanbalø yellbe mayu kørøben, illimera amrrua, man cha. ⁵ Katøganbaløbe sruurrøldø pirau pirø tre chiganug kørøra, pirø palatiikkurri tru yellbe kal-lappe, petø kal-labendø, ⁶ pørr webarruabe, mergurangaruben, srøl tre chigaig kua, mul-laptindan cha. ⁷ Katøganbalø yellbe kal shau utu kørøben, kalmera nørørab mendappe, chab kasrøb tsibisan cha. ⁸ Inchen katøganbalø tab pirau kørøraibe si, tabig ellmarig misra, møiløbe kan yellgurrindø mamig trulzheelø cien niguen, møiløbe sesenta niguen, katøganløbe kan trulzhikkurrindø treinta nigan cha. ⁹ Kalu pønsraibe, mør!— chibig køn.

Mandøgurri 'iilan øyeeg lataig køn' cha Jesús wamindig
(Mc 4.10-12; Lc 8.9-10)

¹⁰ Inchen nui kusrenanøb pera uniiløbe Jesúswan kemalla, trenchib payibelø køn:

—'Øyeeg lataitøwein køn' chib, ¿misaamerane chindimba øyamay waminchigu?— cha.

¹¹ Inchene Jesúsbe trencha løtabig køn:

—Srømbalarø Tiusbe nø ashib karub wainug mu asiimig tøgagüilan ñimun ashchai tranan cha. Trune katøganelane treeg kømøn cha. ¹² Kaguende tøgagigwane masken tranen, uñchaguen tøgagørrun cha. Trune chigaigwane nui lamøtiig tøgagüiwanguen kerranrun cha. ¹³ Inchawei nabe 'øyeeg lataitøwein køn' chib wamindiiløtøga chineh kemesra waminchar chibig køn. Kaguende:

nømbe ashendø, ashmøn cha,

mørendø mørmøwei, ni katø chigüinguen mørmøwei indan cha.

¹⁴ Inchawei nømune øyeeg køben, Tius maig karuigwan eshkabig Isaías øyah wamindig ciertonwei nebun cha:

Maya, maya mørendø, ni chi tainguen mørmønrrun cha.

Ashippe, ashendø, chigüi ashmønrrun cha.

¹⁵ Kaguende i misaamerai manrrøbe larrø tranrreelø srug lataig misrin køn cha.

Kalumera, kabmera kasrailø tøgær køn cha,

ashmøwei, mørmøwei,

ni chi tainguen mørmøwei,

nuimay amrrumøwei inchai,

katø na tamarilø kømøwein kønrrain taig.

¹⁶ Trune ñimbe mayanguen tab kuilø køn, kaguende ñimui kabmera Tiusweimbura-bigwan ashib, kalumera nuimburabigwan chigüi mørøb inchibelø tøgærbe. ¹⁷ Inchawei nabe ñimun cierton trenchar: Tius maig karuigwan eshkabelø køben, sølgandø tabig marøb misaamera køben, truilø truba nu, i ñim asigwan asinrrabna kui inchendø, ashmuig køn cha. I ñim mørigwan mørinrrabna kui inchendø, mørmuig køn cha, trenchibig køn.

'Øyeeg lataig køn' cha, kemesra wamindigwan Jesús tab eshkab
(Mc 4.13-20; Lc 8.11-15)

¹⁸ 'Au, ñim møyay, tru kwallibigwan 'øyeeg lataitøwein køn' cha, kemesra wamincha pasrigwan na eshkanrrab. ¹⁹ Tiuswei tru srø wam srømbalarø karub waisriigwan mørendø, chigüinguen mørmeelane tru nugwaimandziibe arrua, tru manrrau ellgwaigwane kerran cha. Inchen truiløbe tru yell mayu kørøbelø latailø køn. ²⁰ Inchen tru sruurrøldø pirau

pirø tre chiganug kørrab yellbe tru misag Tiuswei wamwan tru urastøbe truba tab kui mørøb utabelan trunun eshkabig kòn. ²¹ Inhendø srøl tre umbu keetiimíg kua, maya yanaguen amøñimøn. Incha tru Tiuswei wamgurrindø chigøben puben, katø chigøben kaig nebub arruben, mõi møin kørnan. ²² Inchen tsuren, tru kal shau utu kørrab yellbe øyeeg misagwan eshkabig kòn: Tiuswei wamwan mørøppe, mørøndø, i pirau chine købigwan menrra isubiibah, nòmui chine palømø tøgagúilø purø tabig lataig asønaukkurrimatø, tru Tiuswei wamwan mørigwane kerrigu truitø kasrøben, chigucha nømbe ellmarig misrmøn cha. ²³ Inchen tru yell tab pirau tsuriiløbe tru misag Tiuswei wamwan møra, katø tab chigúu møra, trube sí, tab ellmarig misrigwan eshkabig kòn. Truiløbe tru kan yellgurrindø mamig trulzheelø cien, kaneløbe sesenta, kaneløbe treinta nigabelø latailø kòn— cha, trenchibig kòn Jesúsbe.

Tirigu utu arrucillu kal-labigwan kemesra wamindig

²⁴ Incha Jesús katøgan ‘øyeeg lataitøwein kòn’ cha eshkawa pasrøb trenchibig kòn:

—Srømbalasrø Tius nø ashib karub waibe kan møg nui trau tab yellwan tsuri lataig kòn cha. ²⁵ Inchen soteeløba kib waramne nun kan ashig kømui inchibig arrua, tirigu tsuri utu kaig yellwan wiitappa, yan cha. ²⁶ Inchen tirigu nørørawa, urø weetøbene, tru kaig kau arrucillugucha kenamisrøptindan cha. ²⁷ Inchen tru tra puagwei marøb melabeløbe nune trenchinrrab ambubelø kòn: “Señor, ñi trau tru tsurig yellbe tabig købendøbe, ¿tru kaig kaube chugurrin kal-lah?” cha. ²⁸ Inchene tru ellmarig puaiibe trenchibig kòn: “Mutø tsaliig øyeeg mariinrrun” cha. Inchen truyu marøb melabeløbe trencha payibelø kòn: “¿Kabe tru kaig kauwan nam kitønrrab ambamøh?” cha. ²⁹ Inchene nøbe trenchibig kòn: “Kagøbasay cha. Inchippa kaig kauwan kitønrrab incha, tirigungucha tōga kitabgun cha. ³⁰ Trembe paramnegatig trubaløtø ka nørørabasay chibig kòn. Tru uras tru tulishinrrabelan øra, tru kaig kauwanmerrig tulisha, lusrø mara, patrai karumønrrun cha. Incha tirigune nai tirigu esegainug keeringarumønrrun”, tan— cha, trenchibig kòn Jesúsbe.

Murtasa yellwan kemesra wamindig

(Mc 4.30-32; Lc 13.18-19)

³¹ Jesús katøgan ‘øyeeg lataitøwein kòn’ cha, kemesra waminchibig kòn:

—Srømbalasrø Tius nø ashib karub waibe kan murtasa yell lataig kòn cha, kan møg nui trau tsurig. ³² Maya yellmerai utu purø lamø yellzhig købendø, nurappe, tru ellmarig shush tusrmerai utu mas nuibe murtasa kòn cha. Yandø kan tusrburabig misren, nuig køptø, illimera pala amøñibeløguen amrrua, tru srarmerayu le marøbelø kòn— chibig kòn.

Levaduran ‘øyeeg lataitøwein kòn’ cha, kemesra wamindig

(Lc 13.20-21)

³³ Katø Jesúsbe katøgan ‘øyeeg lataitøwein kòn’ cha, kemesra waminchibig kòn:

—Srømbalasrø Tius nø ashib karub waibe levadura lataig kòn cha, kan ishuumu pa arruba harina sømara, levaduran pusren, maya sømarigwan trunun ørøba pulingarub lataig kòn— cha.

Mandøgurri ‘iilan øyeeg latailø kòn’ chib Jesús kemesra wamindig

(Mc 4.33-34)

³⁴ Jesúsbe misaamera nørø pasrabigwan kerrigu iigwan kusrenanøppe, ‘øyeeg lataitøwein kòn’ chib wamindiitøga eshkabsulu waminchibig kòn. ‘Øyeeg lataitøwein kòn’ cha, eshkawa pønsra kømuppe, waminchimíg kòn. ³⁵ Øyeeg nebuppe, tru Tius maig karuigwan eshkabig maig taig nebunrrain kuig kòn, tru øyah taig:

Waminchib kusrenanøppe, ‘øyeeg lataitøwein kòn’ chibgøba eshkab wamindamønrrun cha.

Tius pirøwan marøb uraskurri sørig pønrrabelan tørgandø eshkab wamindamønrrun cha.

Tirigu utu arrucillu kauwan kemesra wamindigwan ‘øyeeg lataitøwein kòn’ cha, Jesús tab eshkab

³⁶ Incha Jesús tru nu sətø misagwan unguwa cha, yau kebibene, nui kusrenanøb pera uniiiløbe kemallabe trenchibelø kòn:

—Tru ellmarinug kaig kauwan ‘øyeeg lataitøwein kòn’ cha, namun eshkab wamindigwan tab eshkarra— cha.

³⁷ Inchene Jesúsbe trenchibig kòn:

—Tru tab yellwan ellmarøbiibe Møg Misra Arrubigwan eshkabig kòn cha. ³⁸ Inchen tru ellmarig trabe yu pirau maya misagwan eshkabig køben, tru tab yellbe Tius nø ashib karub waigwei ureemeran eshkabig kòn cha. Inchen tru kaig kaube nugwaimandzigwei ureg kòn cha, eshkabig kòn. ³⁹ Inchen tru ashig kømui inchib tsaliig tru kaig kauwan ellguawa pasrøbiibe nugwaimandzigwan eshkabig kòn cha. Inchen tru ellmarig srønøbe srabe kwaløm patsønrrabigwan eshkabig køben, tru ellmarigwan tulishibeløbe ånglesmeran

eshkabig kòn cha. ⁴⁰ Tru kaig kauwan tulisha, nagu pattrai kebetab lataitøwei srabe kwaløm patsab uraskucha øyeeg punrrun chibig kòn. ⁴¹ Tru Møg Misra Arrubiibe tru katøganelan kaig maringarub pønrrabelanba, ke kaigwandø marøb pønrrabelanba nø ashib karub wainukkurri truillane mayamba nui ángelesmeran tulishinrrai ørrun cha. ⁴² Inchen nu nag naarabigu kebusren, truyube kishib, trugulmeran tsatsamig kønrrun cha. ⁴³ Inchen tru sølgandø tabig marøbeløbe nømui Møskai ashib karub waisrømbe kan nøsig pilab latailø pilønrrun cha. ¡Kalu pønrsraibe, mør! chibig kòn.

Purø tabig søra tøgagúigwan kemesra wamindig

⁴⁴ *Srømbalærø Tius nø ashib karub wainuguiibe kan chigøben truba tabzhigwan pirø umbu søra pasrig lataig kòn. Kan møg tru tabig sørig pasrabigwan wetørrawa, katøle truyutøwei søra pasran. Incha truba kasrag ya, nui chi tøgagúilan kerrigu yanabe, tru pirøwan penaptindan.

Tørguebilab sruuzheelø truba nuweyig lataitøwein kòn cha, kemesra wamindig

⁴⁵ *Katø tru srømbalærø Tius nø ashib karub wainuguiibe kan tørbilab sruuzheelan lawa, penab, yanøb inchibig lataig kòn cha. ⁴⁶ Incha kan tørbilab sruuzhig truba truba tabzhig nuweyig wetørrappe, ya, nui chi tøgagúigwan kerriguh yana, tru purø tab sruuzhigwan penan, chibig kòn.

Atarraya lataitøwein kòn cha, kemesra wamindig

⁴⁷ *Katø tru srømbalærø Tius nø ashib karub wainuguiibe kan atarrayan maryu keguchen, chi peskaugurrimbunø kemøøb lataig kòn cha. ⁴⁸ Incha atarrayayu peskau netsabene, tru peskabeløbe pi menda wesrua, peskaumeran lawa tarømartrab purramisran cha, tabelane tasinyu pusrøppe, kailane petaptø petan cha. ⁴⁹ Srabe kwaløm patsab uraskucha øyeetøweih purainrrun, chibig kòn. Inchen ángelesmera webamrrun cha, kailanba, sølgandø tabig marøbelanba nøørø tarømartrab. ⁵⁰ Incha kailane nu nag naarabigu kebetønrrun cha, truyube kishib, trugulmeran tsatsamig kønrrun— cha.

Kusrenaniilø kølliiba, srøiløba

⁵¹ Incha Jesúsbe trencha payibig kòn:

—¿Ñimbe iilan kerriguba chigúi mørgueh?— cha.

Inchene nømbe:

—Señor, øø— cha, løtabelø kòn.

⁵² Inchene Jesúsbe trenchibig kòn:

—Mutøgucha Moisés pørigwan kan kusrenanøbig srømbalærø Tius nø ashib karub wainuguigweimburab kusrebig misrabe, kan ya puag møskai latawei nui tabzheelø esegaig tøgagúinukkurri srøilø køben, kølleelø køben wesrub lataitøwei maran— cha.

Jesús Nazaretsrø

(Mc 6.1-6; Lc 4.16-30)

⁵³ Yandø Jesús tru 'øyeeg lataitøwein kòn' chib iilan eshkaab chab waminchabe, truyugurri webya ibig kòn. ⁵⁴ Incha nuim pirausrøndøwei puabe, tru judiosmera tulundzuni yau kusrenanø mendøbene, misaamerabe truba kwaara ashib trenchibelø kòn:

—¿I møøbe øyeeløbe churre øyeeg kusreh? cha. ¿Katø tru maramburab mariilan chincharre marerah? cha. ⁵⁵ ¿Iibe tru tsiimeratøga chine marøbigwei nusrkai, katø nui usrimbe María taig kømuitarru? cha. ¿Santiagoín køben, Joséwein køben, Simónwein køben, Judaswein køben nuneg kømuitarru? cha. ⁵⁶ ¿Yamba nui nuchaløgucha kerriguba namui ututøwei warabelø kømuitarru? cha. ¿Trube, kerrigu iigwane i møøbe chugurrinre øyeelø tøgaguerah?— cha.

⁵⁷ Treeg isua nune kaashibelø kòn. Inchen Jesúsbe trenchibig kòn:

—Chutøgucha Tius maig karuigwan kan eshkaabigwane tab indan cha. Inchendø nui piraueløba, nui yaueløba, truilløbe chi tab inchimøn— cha.

⁵⁸ Incha truyube maramburab mariilø tre marmíg kòn, kaguende truyu misaamerabe nømui isubigwan nuinug pasrmuikkurri.

14

Juan Bautista kwaig

(Mc 6.14-29; Lc 9.7-9)

¹ Tru kwalømmerawan Galilea pirau karubig Herodesbe Jesúsweimburabgøba wamindi mørabe, ² nui karuindiig melabelane trenchibig kòn:

—Truibe tru Juan Bautista kuinrrun cha, kwailai utugurri katø kurriinrrun cha. Incharre øyeeg maramburab maramig tøgagig kuinrrun— chibig kòn.

³ Kaguende Herodesbe tru Juanwan kemøringarua, lusra, kailan keeri yaumay kertrai srua ambingaruiḡ kōbig kōn, tru nui nuneḡ Felipei srai Herodiascurrindø. ⁴ Kaguende Juan Bautistabe Herodeswane trendaig kōbig kōn:

—Tru Herodiaswan ñui srai mara tōgagōmibe merig pasran— cha,

⁵ Herodesbe Juanwan kwetchab inchendø, misagwan kōriimatabig kōn, kaguende mayeelōba Juanbe Tius maig karuigwan eshkabig kui kōrewa kōben. ⁶ Inchen tru Herodeswei kal-lain kwalōmwān isub kasrag waram kwalōm, tru Herodiaswei nimbasrbe tru linchai eshkailø mayeelø purrabelai merrab pailaben, Herodeswane truba tabig asōnaptø, tru srusrane:

⁷—iKatø, tranmø kōmø! chi miabendø tranrrumøn— chibig kōn.

⁸ Inchen tru srusrøbe usri øyeeg chinrrig cha eshkaig kōppe, Herodeswane trenchiptinchibig kōn:

—Juan Bautistai turwan kan platilloyu tranrra— cha.

⁹ Inchen reybē truba isui inchendø, tru mayeelø lincha purrabelai malau, treeg tranrrumøn cha, tranrrab misrig kōppe, traningarubig kōn. ¹⁰ Incha Juanbe kailan keeri yau waben, Herodesbe turwan paringarubig kōn. ¹¹ Inchen tunwan para, kan platilloyu srua ya, srusran tranen, nōbe usran tranøbig kōn.

¹² Inchen Juanwei mendig amōñibeløbe amrrua, Juanwei asrwan srua amba, sōrabelø kōn. Incha Jesúswan trunun eshkanrrab ambubelø kōn.

Tratrø mil misagwan Jesús manrrai tranøb
(Mc 6.30-44; Lc 9.10-17; Jn 6.1-14)

¹³ Inchen Jesús Juanwan kweetsin kui wammørabe, truyugurri nōtø kan barcoyu nōøø mu misag warab waraimørømay ibig kōn. Inchen misaamerabe truba nu wammørøppe, pueblomerayugurri webamba, nuimay katsikkatø ambub mendabelø kōn. ¹⁴ Inchen Jesús barcoyugurri pinaya, truba nu misag pasrai ashabe, nōmun lastima kōben, nōmui utu kwanrreelan tamarøbig kōn. ¹⁵ Inchen yandø mawabrab kōbene, nui kusrenanøb pera uniiløbe Jesúswan kemallabe, trenchibelø kōn:

—Yube nu misakkanug kōn cha. Inchagucha yandø maabenwein kōn cha, misagwan amrrai ‘ungwa’ chi cha, yamera pōnrrabsrø amba, nōmuyasig mamig pena manrrain— cha.

¹⁶ Inchene Jesúsbe trenchiptinchibig kōn:

—Chi ambamibe palōmøn cha. Manrrai ñim mannay— cha.

¹⁷ Inchene nōmbe trenchibelø kōn:

—Nambe tratrøgatø pirrimbah, pagatø peskaubatø tōgaguer— cha.

¹⁸ Inchene Jesúsbe trenchibig kōn:

—Yu srua amrrurray— cha.

¹⁹ Incha tru nu misagwan pubilayu purramisingarua, tru tratrøgatø pirrimeranba, pagatø peskaumeranba, tasku muta, srōmbalaneb neesha, Tiuswan ‘mayanguen pay’ chibig kōn. Incha pirrimeran pirisha, nui kusrenanøb pera uniilan tranen, nōmbe misagwan pirishibelø kōn. ²⁰ Inchen mayeelōba øska ma kōrrōmisren, katōgucha pitis undailan tasinmerayu netsōbatø doce tulishibelø kōn. ²¹ Inchen tru mabeløbe ishumburwan, uregwan munchimuben, mōgueløtø tratrø mil kōbig kōn.

Jesús pi palawan arrub
(Mc 6.45-52; Jn 6.16-21)

²² Incha yandø Jesúsbe nui kusrenanøb pera uniilan pisu ambøgatøsrømay merrab amrrai barcoyu nebamingarubig kōn, tru nu misagwan ‘ungwa’ chib pasrappatø. ²³ Incha yandø misagwan chab ‘ungwa’ chabe, nōbe nōtø kan tunbalasrø Tiusba waminchab ya, yem kōben nōtø trusrø wabig kōn. ²⁴ Trune yandø barcobe pisuyu yabsrønguen iben, pi welarmerabe barcongōba megambubig kōn, kaguende isiibe nōmui malaugōba megambub ichen. ²⁵ Inchen lōtsøzhig yemdø Jesús pi palawan katsikka nōmuimay kemallib ibene, ²⁶ nui kusrenanøb pera uniilø pi palawan arri ashippe, truba kwaarøb kōrig kōbiitø trenchib trashibelø kōn:

—Kan mōsig kōn— cha.

²⁷ Inchen Jesúsbe mōi mōi nōmune waminchib trenchibig kōn:

—iKōrmø, mur isua purray! cha. Na kur cha. Kōrig kui inchimōtay— cha.

²⁸ Inchene Pedrobe trenchiptinchibig kōn:

—Señor, trube, ñi kuabe, nan ñuimay pi palawan: “Amø” chirra— cha.

²⁹ Inchene Jesúsbe trenchibig kōn:

—Amø pøs— cha.

Inchen Pedrobe barcoyugurri pinaya, pi palawan Jesúsweimay ib mendabig kōn. ³⁰ Incha tru mur isig ichibigwan tab ashippe, kōriimaptinchibig kōn. Inchen nune asentab mendaptinchen trashibig kōn:

—¡Señor, wesurra!— chib.

³¹ Inchene Jesúsbe mõi mõi tasigu kemørabe, trenchibig kòn:

—Ñi kui ñui isubigwane nainug ke ka kòmønrraindiitø pasra tøgag cha. ¿Chindimbarre kaimamuitamab isugu?— cha.

³² Incha barcoyu nebamben latatø, isiibe wasrøngandø pasramisrøptinchen, ³³ barcoyu purrabeløbe nune kõiibalab tabig waminchib trenchibelø kòn:

—Isa kømø, ñibe Tiuswei Nusrkain kòn— cha.

Jesús Genesaretsrø kwanrreelan truba nu tamarøb
(Mc 6.53-56)

³⁴ Incha yandø tru pisuyu chab larraamba, Genesaret pirausrø pubene, ³⁵ misaamera Jesús kui nebua ashabe, wammørørørøngarubelø kòn tru pirau ørøba. Inchen nuimay maya kwanrreelan srua amrrua:

³⁶ —Ñi pala itøguewa kuig urøzhigwan namun katørabashcha— chib, rugabelø kòn.

Incha mayeeløba katørabeløbe tabig kørømisrøbelø kòn.

15

Møwan trømbøig kaig marøbiibe ¿chi kerah?
(Mc 7.1-23)

¹ Møiløgsrøn Jerusalénsrøngurri amrrubelø fariseosmeraba, Moisés pørigwan kusrenanøbeløba Jesúswan kemallabe, trencha payibelø kòn:

² —¿Ñui kusrenanøb pera uniiløbe namui merrabsreelø trendø treeg marøb tøgagúigwane chindimbarre itøbunabelø køh? cha; pøs mappe, nømbe tasigwan kinømø mabelø kòn— cha.

³ Inchene Jesúsbe trencha payibig kòn:

—Trube, ¿ñimgucha Tius maig maramigwan martrai pønrsrailane chindimbarre marmeelø køge cha, ñim ñimuimburab trendø treeg marigwan marøg købiitø? ⁴ Kaguende Tiusbe trendaig kòn: “Ñui møskai, ñui usrane maig købash inchimø, tab indamig kòn” cha. Katø: “Møskawan kui, kabe usran kui trømbøig nebunrrai wamabigwane trunune kwanrrai pasrig kònrrun” cha. ⁵ Trune ñimbe trenchibelø kòn: “Kan møøbe møskawan kui, kabe usran kui trenchinrrun cha: ‘Na ñimun purugumig tøgagúigwan Tiuswan tranar cha. Ñimune purugunrrab kaimamønrrun’ chinrrun cha. ⁶ Incha møikkøben øyeeg taikkurrimbe, yandø møskawan, usrane lastima ashib purugumibe chi palømøn” cha, ñimbe trenchibelø kòn cha. Øyeeg marøppe, ñimbe Tius martrai karua pasrigwane chigucha kømig kui lataig mara srua kòn cha, ñimui trendø treeg marøb tøgagúilan marøg køptø. ⁷ ¡Palatø tabelø! Tius maig karuigwan eshkabig Isaías ñimuimburab sølwein tain kòn øyah chippe:

⁸ I misaamerabe nan ka trüitøgatø tab inndan cha.

Inchendø nømui manrrøbe nainukkurrimbe yab pønrran cha.

⁹ Nan kõiibalab tabig waminchib taiibe chiweingucha chi tabig marig kømøn cha, møguelø martrai karua pønrsrailane øyeeg maramig kòn chib kusrenanøb.—

¹⁰ Incha Jesús misagwan nuimay wama trenchibig kòn:

—Kalutøga mørøb, katø chigúi mørøb inday cha. ¹¹ Møwan trigu kebibiibe nune chi kaig trømbøig marmøn cha. Treeg kømøtø, møwan kaig trømbøig marøbiibe trigugurri webibig, truipe si, nune trømbøig maran— chibig kòn.

¹² Inchene nui kusrenanøb pera uniiløbe Jesúswan kemallabe trenchibelø kòn:

—¿Ñi øyeeg tailan fariseosmera mørabe, namig mørigwan ashtirru?— cha.

¹³ Inchene nøbe trenchibig kòn:

—Chi tusr køben nai Møskai srømbalasarø wabig ellgwaimígwane srølbafiau kitig kònrrun cha. ¹⁴ Nømune kagøbasay cha. Kagen nømbe kabgailø katøgan kabgailandøwei srua ambubelø kòn cha. Kan kabgaima katøgan kabgaigwan srua yabe, trabyu pailøba kegørrønrrun— cha.

¹⁵ Inchene Pedrobe Jesúswan trenchibig kòn:

—Tru ‘øyeeg lataitøwein kòn’ cha, kemesra wamindigwan namun tab eshkarra— cha.

¹⁶ Inchene Jesúsbe trenchibig kòn:

—¿Ñimgucha chigúinguen mørmøwa pønrrøtirru cha? ¹⁷ ¿Chitøgucha trigu kebibiibe patsau kørøraibig kui ashmeelø køtirru? cha, katø asrugurri webinrrab. ¹⁸ Trune trigugurri webarrubiibe si, møwei manrraugurri arrubig kua, truipe nune trømbøig marøb mindisan cha. ¹⁹ Kaguende møwei manrrø umbugurrimbe kaig isuilø køben, kweetsamelø køben, kasharawarmera itølulamig køben, kasharameelø købendø ishumburba, møgueløba trømbøig maramelø køben, nilamelø køben, isa wamindiilø køben, tsalø wamiilø køben, øyeelø ker-riguh werrun cha. ²⁰ Iiløbe si, møwan kaig trømbøig maran cha. Inchen manrraptø tasigwan kinømuitøbe møwane chi trømbøig marøb mindishimøn— cha, trenchibig kòn Jesúsbe.

*Kan ishug peg pirausriig Jesúswan koreig
(Mc 7.24-30)*

²¹ Incha Jesúsbe truyugurri tarømisra, Tiroba, Sidónba tru ciudadamera pønrrab piraumay ibig kòn. ²² Inchen kan ishug canaansriig tru pirau tsubiibe arrua, Jesúswan trenchib wamab kemallibig kòn:

—Señor, merrabsrø Davidwei Nusrkai, nan lastima ashcha chib. Nai nimbasrbe kan kwaimandzig ni mumayguen tab uñchaingaug indinab megan— cha.

²³ Inchen Jesúsbe chigucha lètømuben, nui kusrenanøb pera uniiløbe kemallabe, trenchibelø kòn:

—Tiusmanda, ishuwane ‘inrrø’ chi cha, namui wendautø trashib arrun— cha.

²⁴ Inchene Jesúsbe trenchibig kòn:

—Nane Israel misaamerai utu tru ubisha trubiilø latalaimaytø ørig kòn— cha.

²⁵ Inchene tru ishuube nui merrab arrua, tømboñsrøb trenchibig kòn:

—¡Señor, purugurra!— cha.

²⁶ Inchene Jesúsbe trenchibig kòn:

—Pirriwan uregwan kerrawa, wera-ureezheelan kebusramibe søl kømøn— cha.

²⁷ Inchene ishuube trenchibig kòn:

—Øø, Señor, treebe treegwein købendø, wera-ureezheeløguen nømui puarwei mishat-sigugurri kørrabzhigwan man— cha.

²⁸ Inchene Jesúsbe trenchibig kòn:

—¡Ishug, ñui isubigwan nainug pasra tøgagúibe purø nuig kòn! cha. Ñi maig palain pasraig, treeg kønrrun— cha.

Inchen tru uraskurri nui nimbasrbe tabig kørrømisrig kòn.

Kwanrreelø truba nørøwan Jesús tamarøb

²⁹ Jesús truyugurri webya, Galilea pisu puluwan purayabe, kan tunbalasrø nebya, truyu wamisrøbig kòn. ³⁰ Misag truba truba nørø nø wainug tulundzuna, cojosmera køben, kabgailø køben, asru chiyu køben kesruilø køben, waminchab kaimabelø køben, katøgan chi kwanrø køben tøgarmera truba nu treelan køben Jesúswei merrab srua amrrua, pønrsrøben, nøbe tamarøbig kòn. ³¹ Treekkurri tru nu misaabe ashippe, ke kwaara asha kørrømisrøbelø kòn, waminchab kaimabeløbe wamindamba, asru chiyu køben kesruiløbe tabig kørrømisramba, cojosmerabe ambamba, kabgailøbe asamba indi ashabe, nømbe Israel misaamerai Tiuswan truba tabig waminchibelø kòn.

*Jesús pib mil misagwan manrrai tranøb
(Mc 8.1-10)*

³² Incha Jesús nui kusrenanøb pera uniilan wamabe, trenchibig kòn:

—Misaameran lastima køtan cha. Chabguen yu pøn kwalømguen naba warøwa, yandø chi mamig chigar kòn cha. Nømui yamay chi mameeløbe ambashig kømøtan cha. Kaguende mayutø pesannabgun— cha.

³³ Inchene nui kusrenanøb pera uniiløbe trenchibelø kòn:

—Ya nu misagweimbe ¿namba chincha mamig wetørrayasamø? cha, ya yu mu misag warab warømøsrømbe.—

³⁴ Inchene Jesúsbe payibig kòn:

—¿Ñimbe pirri mam tøgagøgue?— cha. Inchene nømbe:

—Pirri sietebah, katø mamdø peskau-ureebatø tøgaguer— chibelø kòn.

³⁵ Inchen nøbe misagwan pirau purramisingarua, ³⁶ nui tasigu tru pirri sietenba, peskaumeranba muta, Tiuswan ‘mayanguen pay’ chabe, pirisha, nui kusrenanøb pera uniilan tranen, nømbe misagwan pirishibelø kòn. ³⁷ Inchen mayeeløba øska ma kørrømisren, katøgucha tru pirisaig undailan tasinmerayu siete netsøbateelø tulishibelø kòn. ³⁸ Inchen tru mabeløbe ishumburwan, uregwan munchimuben, møgueløtø pib mil købig kòn. ³⁹ Incha Jesúsbe yandø misagwan chab ungua chabe, barcoyu kebya, Magadan pirausrømay ibig kòn.

16

*Fariseosmeraba, saduceosmeraba kan mana asiimig martrai miab
(Mc 8.11-13; Lc 12.54-56)*

¹ Fariseosmera køben, saduceosmera køben Jesúswan ashchab ambabe, nun chiyugøben kebenørkøg køptø, mana asiimig miabelø kòn Tius nøba pasrain kui ashchab.

² Inchene Jesúsbe trencha løtabig kòn:

—Yandø maaben misrene, ñimbe øyah chibelø kòn cha: “Tab kwaløm kønrrab asønän cha. Kaguende srømbalabe ke pigøzhig pasran” cha. ³ Inchene løtsøbe ñimbe trenchibelø

køn cha: “Møimbe kaig kwaløm kønrrab asønnan cha. Kaguende srømbalabe ke wañindø kasraim pasran” cha. Pøs pala wañi maig pasrai asha, ñim ‘øyeeg kønrrun’ chib, ‘øyeeg kønrrun’ chib waminchibeløbe, jMøin kwaløm chi pureb arrubigwane, trube, ‘øyeeg kønrrun’ chinrrab wetøgørrønrrab kaimabeløbe mailø kogue! cha. ⁴ Møin kwaløm kaig misaamera, kan kasharawar peebe itøluløpteelø lataitøwei Tiusbatø pønrrømø misaamera kailø, Tius naba pasrain kui ashchab marig miatan cha. Inchendø asha kønrrai katøgan chigøben peg kenamara tranmøtø, tru Jonásweiwandø eshkamønrrun— cha.

Incha nømune pønrramnetø, iptinchibig køn.

Fariseosmeraba, saduceosmeraba kusrenanigwan ashiptø kuy
(Mc 8.14-21)

⁵ Nui kusrenanøb pera uniilø pisu ambøgatøsrø chab larraambabe, pirri srua amrrumigwan pesan amrrubrain kui isuptinchibelø køn. ⁶ Inchen Jesúsbe trenchibig køn:

—Au, ñimbe levadura fariseosmeraiwanba, saduceosmeraiwanba ashiptø kuy— cha.

⁷ Inchene nui kusrenanøb pera uniiløbe kangurri kangurri trenchibelø køn:

—Nam pirriwan srua amrrumuimbarre trenda chindah— cha.

⁸ Inchene Jesúsbe nøm trenchib purrai ashabe trenchibig køn:

—¿Chindimbarre kangurri kangurri ‘pirringar ker’ chib purrøgue? cha. Ñim kui ñimui isubigwan nainug ke kagømønrraindøzhig pasra tøgar cha. ⁹ ¿Katøgucha ni chigúinguen mørmeeelø kø chindah? cha. ¿Tru na tratrøgatø pirriwan tratrø mil møguelan pirishiben, undailø mam tasin tulisaiowan ni trunundøguen ke isumeelø kø chindah? cha. ¹⁰ Katø tru siete pirriwan tru pib milwan pirishiben, ¿tru unchibigwan mam tasin tulisaiowan isumeelø kø chindah? cha. ¹¹ ¿Ñimbe mandeelø køh cha, chigúinguen mørmønrrappe, na pirriwan waminchib wamubendøbe, nabe tru levaduran fariseosmeraiwanba, saduceosmeraiwanba ashiptø kuy cha, nabe trunun waminche?—

¹² Inchen nømune ‘tru pirriyu pusi levaduran ashiptø kønrrigay’ chimøtø, ‘tru fariseosmeraba, saduceosmeraba kusrenaniilan ashiptø kønrrigay’ tain kui yandø wetøgørrabelø køn nømbe.

Pedrobe Jesúswan: “Cristo køn” chib
(Mc 8.27-30; Lc 9.18-21)

¹³ Jesús Filipino pirau Cesareasrø puabe, nui kusrenanøb pera uniilan payibig køn:

—¿Misaamerabe Møg Misra Arrubigwane mu køn tah?— cha.

¹⁴ Inchene nømbe trencha løtabelø køn:

—Møiløbe ‘Juan Bautista køn’ chiben; møiløbe ‘Elías køn’ chiben; møiløbe ‘Jeremías kuinrrun’ tan cha, kabe mõikkøben ‘Tius maig karuigwan eshkabig kui’.—

¹⁵ Inchene nøbe trencha payibig køn:

—¿Tru ñimbe nane mu køn chinrrague?— cha.

¹⁶ Inchen Simón Pedrobe trencha løtabig køn:

—Ñibe tru Cristo, Øsig wab Tiuswei Nusrkain køn— cha.

¹⁷ Inchene Jesúsbe trenchibig køn:

—Ñibe mayanguen tab kuig køn cha, Simón Jonáswei nusrkai. Kaguende ñune iigwane yaumbaig, animbaig, ka møg kenamarøb eshkamøtø, nai Møskai srømbalarø wabig eshkan cha. ¹⁸ Inchen nagucha ñune, ñibe Pedro køn char cha. Nai iglesian i srug pala mara pasramønrrun cha. Inchen kwamig kønrrai marøb pasrabigwei maramburab marøbikken tru iglesiane ni chinchaguen kananrrab kaimanrrun cha. ¹⁹ Srømbalarø Tius nø ashib karub wainug llavimeran ñun tranamønrrun cha. Ñi yu pirau lusrøb lataig marene, srømbalarøngucha lusrøb lataitøwei martrun cha. Ñi yu pirau pichib lataig marene, srømbalarøngucha pichib lataitøwei martrun— cha.

²⁰ Incha Jesúsbe nui kusrenanøb pera uniilan mungøben eshkan kønrrain kømø karua pasrøbig køn, nøbe tru Cristo kui.

Jesús nø kwamigwan eshkan
(Mc 8.31–9.1; Lc 9.22-27)

²¹ Incha tru uraskurrimbunø Jesúsbe nui kusrenanøb pera uniilan ‘øyeeg kønrrabig køn’ cha, eshkan mendabig køn. Nune Jerusalénsrømay yamig nebuben, misagwan karubelø kølli misaamera, sacerdotesteran karubelø køben, Moisés pørigwan kusrenanøbelø køben, truba truba kaig indinab megawa, kweetsig kømig nebunrrun cha. Inchendø pøn kwalømyube katø øsiiranrrun chibig køn. ²² Inchen Pedrobe nun nøøsrøb pera ya, murtø waminchib mendabig køn:

—Tius ashib wawa, Señor, ñun øyeeg puraimuimbe— cha.

²³ Inchen Jesúsbe keeshabe Pedrone trenchibig køn:

—Satanás, nainukkurri tarømisr cha. Ñibe nane peñchai ke ka srurrengwangerub attan cha. Kaguende ñibe isuppe, Tius lataig isumøtø, møguelø isuimay isun— cha.

²⁴ Inchabe Jesúsbe nui kusrenanøb pera uniilan trenchibig køn:

—Møikkøben nai mendig uñig købene, nøasiitø nuimburabigwangøba isumøtø, nui kurswan mutab, nai mendig arrum nebunrrun cha. ²⁵ Inchen møikkøben øsig kømigwangøba isubiibe yandø pinab pinamig nebunrrun cha. Inchen nagurrindø kwabiibe managatig øsig kømigwan wetørrawa, tøgagønrrun cha. ²⁶ ¿Kan møg yu pirau chine købigwan kerrigu nuindø maringucha, nui øsig kømigwan trubisaibe, chiwein kui tabig kønrrab kø? cha. Kabe ¿kan møøbe kwamønrrappe, chi tranøbsruerah? cha. ²⁷ Kaguende tru Møg Misra Arrubiibe Møskawei purø nuig tørguegwalmabigu nui ángelesmeraba arrua, møilændøgucha nøm maig marig køben treeg tranrrun cha. ²⁸ Pøs nabe ñimun cierton trendamønrrun: Møiløgøben yu purrabelø tru Møg Misra Arrubig nø ashib karunrrab attrab kenamisren, trunun nebua ashmøwatøbe, kwanrraamøn— cha.

17

Jesús ke peemayig misrøb

(Mc 9.2-13; Lc 9.28-36)

¹ Øyee taig yandø trunewei kan kwalømdø paløben, Jesúsbe Pedronba, Santiagonba, nui nune Juanwanba nøøø kan pala tunsrømay pera ibig køn. ² Incha trusrø nømui merrab Jesúsbe ke peg lataig misrøbig køn. Inchen nui maløbe nøsig lataig tørbilabig misren, nui kewagüiløbe puløzhig pilabig lataig misrøbig køn. ³ Inchene mømbe Moisésba, Elíasba, Jesúsba waminchib pønrrai ashiptinchibelø køn. ⁴ Inchen Pedrobe Jesúswane trenchibig køn:

—Señor, nam yu pønrramibe purø tab køtan cha. Ñi martrain købene, pøngatø ya-ureg na maramøh cha, kan ñui, kan Moiséswei, kan Elíasweingue.—

⁵ Inchen Pedro waminchib pasramnetø, kan wañi tørbilabig nømun pinøbulen, wañi umbugurri kan wam trenchibig køn:

—Iibe nai Nusrkai undaaraig køn cha. Nabe nuimburab truba tab kui war cha. Nune møray— chibig køn.

⁶ Inchen iigwan møøppe, nui kusrenanøb pera uniiløbe truba truba kørig kuilø, maløwan pirau kebatamnegatig utsøbasrøbelø køn. ⁷ Inchen Jesúsbe nømun kemalla katørab trenchibig køn:

—Chi køriimatømøtø, kurray— cha.

⁸ Inchen nøm kurraashene, mugucha kenamuben, Jesúswane nøtø pasrai ashibelø køn.

⁹ Incha tru tunsrøngurri kørrørrub amrruabe, Jesúsbe trenchib karubig køn:

—Mungucha waminchib kønrrab kømø cha, tru asigwan, tru Møg Misra Arrubig kwailai utugurri øsiirawa katø kurramnegatig.—

¹⁰ Inchen nui kusrenanøb pera uniiløbe Jesúswan payibelø køn:

—Trube, treeg købene, Moisés pørigwan kusrenanøbeløbe ¿chindimba Elíasmerriig arrumig køn tah?— cha.

¹¹ Inchene Jesúsbe trenchibig køn:

—Elíasbe arrubwei inchun cha. Incha nøbe kerrigu katøyug tamara pønrrønrrun cha.

¹² Inchendø nabe trendamønrrun: Elíasbe arrubguen inchen, nune mu kui nebua ashmøtø, nømun maig marøg købendø, marig køn cha. Møg Misra Arrubikkucha treetøwei nømui tasku kaig marinab megarun— cha.

¹³ Inchen nui kusrenanøb pera uniiløbe Jesúsbe tru Juan Bautistan wamindin kui wetøgørrabelø køn.

Kwaimandzig tøgá unan Jesús tamarøb

(Mc 9.2-13; Lc 9.28-36)

¹⁴ Misag truba nu pasrainug nøm chab pubene, kan møg pua, nui merrab tømønrrabe, trenchibig køn:

¹⁵ —Au, nai nusrkawan lastima ashcha cha. Kaguende pesannabig tøgáig kua, truba trømbøig nebuinab megabig køn cha. Katø katø nagu kebeñib, piyu kebeñib inchibig køn cha. ¹⁶ Na ñui kusrenanøb pera uniilaimay pera arrubendø, tamartrab kaiman— cha.

¹⁷ Inchene Jesúsbe trencha løtabig køn:

—¿Kan ñim mõi misaamera kørenrrab inchimeelø larrø kailø! cha, ¿nabe managatig ñimba unamig kønrrerah? cha. ¿Kan øyee ashiptø managatig ñimba unamerah? cha. Unan yusrø naimay srua amrruy— chibig køn.

¹⁸ Inchen Jesúsbe tru kwaimandzigwan nama, unainukkurri wambig weguchen latatø, unøbe tabig kørrømisrøbig køn.

¹⁹ Inchen nui kusrenanøb pera uniiløbe nømdø nøøø Jesúswan kemalla, trencha payibelø køn:

—¿Nambe kwaimandzigwan wambig weguchappe, chindimba kaimah?— cha.

²⁰ Inchene Jesúsbe trenchibig kòn:

—Kaguende ñimbe ñimui isubigwan nainug ke ka kòmønrraindiig pasra tøgá kòn cha. Pòs nabe ñimun cierton trendamønrrun: Ñim kan murtasa yellburaptiitøgúen ñimui isubigwan nainug pasra tøgá kuimbe, ñim i tunwan: “Yugurri mendamisra, katøgánsrø purainrrø” chibene, tru tunbe purainrrun cha. Pòs ñimuimbe chitøgúcha kaimamdiibe chi kaagøn cha.

²¹ Kaguende øyeeg kwaimandziibe Tiuswan purugurra chib miaitøgába, ayunab indiiitøgába treeg marendøwei webibig kòn— cha.

Jesús katøle nui kwamigwan eshkab

(Mc 9.30-32; Lc 9.43-45)

²² Galilea pirausrø ketøtø amøñippatø Jesúsbe trenchibig kòn:

—Tru Møg Misra Arrubigwane møgúelai tasku tranig kònrrun cha. ²³ Inchen kweechen, pøn kwalømyube katø øsiirawa kurrønrrun— cha.

Igwan wammørabe, nømbe truba isui inchibelø kòn.

Tiuswei yawan tøgáguimburø an pagaramigwan Jesús pagarangarub

²⁴ Jesúsba nui kusrenanøb pera uniiløba Capernaumsrø pubene, Tiuswei yaburø trendø an pagaranrrain taigwan an utabelø Pedroimay ambabe trenchibelø kòn:

—¿Ñimui kusrennøbikkan Tiuswei yaburø trendø truburø an pagarab kømigwan pagaramiig kuitarru?— cha.

²⁵ Inchen Pedrobe:

—Øø, pagarabwei inchibig kòn— cha løtabig kòn.

Incha Pedro yau kebibene, Jesúsbe øyeemerrig trenchib waminchibig kòn:

—¿Simøn, ñibe maig isuguh? cha. ¿Yu pirau reymerabe trendø pagaramigwan pagaraig utappe, numeran utah? cha: ¿Nømui misaamerandøweindeh? Kabe: ¿Peesrøngurri amrrub misaamerandeh?— cha.

²⁶ Inchene Pedrobe trenchibig kòn:

—Peesrøngurri amrrub misaameran utabelø kòn— cha.

Inchene Jesúsbe trenchibig kòn:

—Trube, treeg købene, tru pirau misaameratøweimbe chi pagaramikken palømuinrrun cha. ²⁷ Treeg kuingucha, nambe mungucha namishimønrrab, nu pisuyumay ya, anzuelun ke keguchengø, megamisrøb peskauwan wesrunrrig, chibig kòn. Incha peskauwei trigwan kurabe, kan an wetørranrrabguen cha, maya tranamigwan neikke. Incha naimburøba, ñuimburøba srua ya, pagarau— chibig kòn.

18

¿Tiuswei merrab mas nuibe mu kerah?

(Mc 9.33-37; Lc 9.46-48)

¹ Inchen tru urastøwei nui kusrenanøb pera uniilø Jesúswan kemallabe, trencha payibelø kòn:

—¿Srømbalásrø Tius nø ashib karub waisrømbe mas nuibe mu køh?— cha.

² Inchene Jesúsbe kan unan wama, nømuin tøbøtag pasrabe, ³ trenchibig kòn:

—Pòs nabe ñimun cierton trendamønrrun cha: Ñim peemayelø misrøb, ureg lataig misrmuisruandøbe, srømbalásrø Tius nø ashib karub wainuube managuen kebamrraamøn cha. ⁴ Nøasiitø ‘nuig kurmab’ isumfiig, i unø lataig misrøbiibe, srømbalásrø Tius nø ashib karub waigu mas nuig kòn cha. ⁵ Inchen møikkøben kan i unø lataigwan nai munchiyu tab wamab utabiibe, nan utan chibig kòn.

Kaig mara kebenamibe kørig kømdiig kòn

(Mc 9.42-48; Lc 17.1-2)

⁶ Møigwan køben i shushmera latailan nan kørebelan kaig mara kebenøsrkøbigweimbe, trembe tru tirigu kitsig nu srugwan naashigu mesra, mar umbusrø kegúcha, pi keesra kwangaruinguen søl købsruinrrun cha. ⁷ Yu nam waraig pirøwaimburappe kan yeekkúcha kúita, chine pønrrabelø misagwan kaig martrai inchib pønrrøben, trune kaigwan nø pera mara kebenøsrkøb møwaimbe ¿maig kønrrerah?

⁸ Inchawei ñui tasig kui, ñui srøb kui kaig maringarua kaigu ñun kebenøsrkøbene, para, kuchi. Managatig øsig wamsrø tasig palabig kui, cojo kui kebyamikken søl kònrrun, pa tasig tøgáig, pa srøb tøgáig tru managuen kwamø nagu kegutsig købgunrriibe. ⁹ Inchen ñui kab kaig maringarua kaigu ñun kebenøsrkøbene, wesrua, kuchi chibig kòn, managatig øsig wamsrø kan kaptø tøgáig kebyamikken søl kònrrun cha, pa kab pusraig møra melamnug kwamø nagu kegutsig købgunrriibe.

*Kan ubisha trubigwan kemesra wamindigu
(Lc 15.3-7)*

¹⁰ 'Au, i shushmeran mōilandōgucha kashmōtay. Kaguende srōmbalarō nōmui ānglesmerabe nai Mōskai srōmbalarō wabigwei malōwan chu urastōgucha ashib pōnrran char nabe. ¹¹ Kaguende Mōg Misra Arrubiibe tru trubigwō kōbigwan kaigyugurri wesranrrab arrig kōn cha. ¹² ¿Ñimune maig asōnata? chibig kōn. Kan mōg cien ubishamera tōgagua, kan pella ya, trubōbenma, noventa y nueven tunbalawan waramnetō, tru pella trubabigwan kabe ¿chugōben lanrrab imōnrraitarru? cha. ¹³ Incha nabe ñimun cierton trendamōnrrun: Wetōrrappe, tru trubabigweimbura mas purō kasraaranrrun cha, tru noventa y nueve ka amōñibelaimburab lataguen kōmō. ¹⁴ Øyeetōwei ñimui Mōskai srōmbalarō wabiibe i shushmeran ni kanguen trubōmuimbemab indan chibig kōn.

*Ñui nuneg ñun kalō maren, ulō paymō mandō pesannamig
(Lc 17.3)*

¹⁵ 'Inchawei ñui nuneg ñun chigōben kaig marene, ya, ñibe nundō mara, waminchi. Incha nui kalō marigwan kalō marig kui ashchai nebua isungaru. Inchen ñun mōrene, ñibe ñui nunewane tab kōrrōmisrrai kusrawa pasran. ¹⁶ Inchen ñundō mōrōg kōmui inchene, trube, kandō kui, pagatō kui wamō, chi pub arrubigwandōgucha pailō kui, pōnelō kui maig kuigwan nōm wamindigu treeg kōrrōmarig kōnrrai. ¹⁷ Inchen truilangucha mōrōg kōmui inchene, trube, iglesiayuelan eshkau chibig kōn. Inchen katō iglesiayuelan mōrōg kōmui inchene, trubeguende, yandō Tiuswan ashmīg judiō kōmīg lataig, kabe kan romasree-layasiḡ an utaptō wabig lataig mara kōrrōmaray cha.

¹⁸ 'Pōs nabe ñimun cierton trendamōnrrun: Ñim yu pirau lusrōb lataig marene, srōmbalarōngucha lusrōb lataitōwei martrun cha. Inchen ñim yu pirau pichib lataig marene, srōmbalarōngucha pichib lataitōwei martrun cha.

¹⁹ 'Nabe katō ñimun trendamōnrrun: Ñim mōikkōben pailō yu pirau chigōben Tiuswan mianrrab lata kandō isua purramisra, miabene, nai Mōskai srōmbalarō wabiibe ñim miaigwan tranrrun cha. ²⁰ Kaguende pailō kui, pōnelō kui nai munchiyu tulundzuna purrainuube nabe nōmui utu pasrar— cha.

²¹ Inchen Pedrobe Jesúswan kemalla, trencha payibig kōn:

—Señor, nai nuneg nan chigōben kaig marōbig marene, nabe ¿mam piejegatig pesannab ulō paymumig kōnrrab kō? cha. ¿Kabe sietegatiitōteh?— cha.

²² Inchene Jesúsbe trenchibig kōn:

—Nabe siete nebumnegatiitō chimur cha. Treeg kōmōtō, sietebatō setenta piejeskatig char— chibig kōn.

Karuig megabig larrō kaigwan kemesra wamindigu

²³ —Srōmbalarō Tius nō ashib karub waibe kan rey nui karuindiig melabelō nōmui ulō misriilan mayambatō ulō kōtashchab ashchab wamisrōb lataig kōn. ²⁴ Incha truigwan ashib mendōbene, kan truba truba nu an ulō misraigwan pera amrrubelō kōn. ²⁵ Inchen tru i mōbe katōburō anwan ungua chinrrab kaimaptinchene, nui reyebe nunba, nui sawanba, nui uregwanba nui chi tōgagūigwanbañau yanrrai karubig kōn, tru ulō misri anwan wartrai. ²⁶ Inchen nui karuindiig megabiibe reywei merrab tōmbōnsra trenchibig kōn: “Au, nai rey, tiusmanda, nan øyeeg nebui megaban lastima ashibsrumugu cha, kerrigu nai ulōwan wartrumōn” cha. ²⁷ Inchene reyebe waachawan yeeg nebutamab isua, nui ulō misrigwan paymōnrrab kaabasha, ka inrrai, ka elachibig kōn.

²⁸ 'Inchen tru karuindiig megabiibe webya ya, katōgan nōba lincha karuindiig megabig nun lamōtiig ulō misraigwan katappe, naashigu merrarrowa, ke chab isrōmbulōsrkōb trenchibig kōn: “Nai ulōwan tranrra” chib. ²⁹ Inchene tru nōba lincha karuindiig megabiibe nui merrab tōmbasra trenchibig kōn: “Tiusmanda, nan lastima ashcha chib. Ulōwan tranrrumōn” cha. ³⁰ Inchen kane kagōbashig kōmuptō, kailan keeri yau keeringarubig kōn nui ulōwan tranamnegatikke.

³¹ 'Inchen katōganelō tru karuindiig lincha melabelōbe øyeeg inchen trunun asha, nōmune truba pusrkwabən, chi purayaigwan kerrigu reyyan eshkanrrab ambubelō kōn. ³² Inchen reybe tru kagōbashmō ulō payiptiigwan wamōnrrab øra trenchibig kōn: “¡Karuindiig megabig, larrō kaig! cha. Ñi nan ulō kuigwan nagurrima ñun ulō paymō, pesannar cha, ñi kaabashcha chib truba truba rugaben. ³³ Pōs ñigucha tru karuindiig ñui lincha megabigwane maindi lastima asambala chibig kōn, na ñun lastima ashib lataitōwei.” ³⁴ Incha reybe truba namaptō, maya ulō kuigwan kerrigu anwan waramnegatig kaigyu mōra meganrrai marōbelan tranōbig kōn cha. ³⁵ Inchabe Jesúsbe trenchibig kōn:

‘Nai Mōskai srōmbalarō wabikkucha ñimune øyeetōwei martrun cha, ñim mōitōgucha ñimui nunewan manrraugurri kerrigu newan pesannab, kagōbashmuisruandōbe.—

19

Sraimba, keeba petiyamumigwan kusrenanøb

(Mc 10.1-12; Lc 16.18)

¹ Jesús øyeelan chab waminchabe, Galileasrøngurri ya, Judea pirausrø pubig køn, Jordán pi ambøgatø pørr kal-labgatøsrø. ² Inchen misag truba nu mendig amben, truyu kwanrreelan tamarøbig køn.

³ Inchen fariseosmera Jesúswan kemallabe, chinchka køben kebenøsrkønrabb isua, trencha payibelø køn:

—¿Ka chigurrin køben srawan kutsamig chi merømig kø chindah?— cha.

⁴ Inchene Jesúsbe trenchibig køn:

—¿Ñingan Tiuswei wamwan pørigu lemeelø køtirru cha, tru srøsrø marøb uras marøbig Tiusbe: “Møwanba, ishuwanba ellmarigwan”? ⁵ Incha Tiusbe trendaig køn: “Øyeekkurri møøbe møskawanba, usranba elatchun cha, nui sraimba kandø kønrabb. Incha tru pailøbe kan asrtø kønrurun” cha. ⁶ Inchawei yandø pailø kømø, kan asrtø køn. Inchawei treeg købene, Tius kandø mara lindisaigwane møøbe tarømaramig kømøn— chibig køn.

⁷ Inchene nømbe trencha payibelø køn:

—¿Trube treeg købene, Moisésbe chindimba kilga mara, purørrain karuig køh? cha, srawan tarømisrabb— cha eshkabig.

⁸ Inchen Jesúsbe trenchibig køn:

—Ñimui manrømera isumig larrø mureløgurri Moisésbe ñimui sralan ka treeg marbasig køn cha. Inchendø srøsrøbe øyeeg kømuig købig køn cha. ⁹ Trune nabe trendamønrurun: Kan møg, nui sraimbe katøgan møøba trømbøig marøb itølumubendø, nui srawan kucha, katøgan ishuuba kasharabiibe, itølulan— cha.

¹⁰ Inchen nui kusrenanøb pera uniiløbe trenchibelø køn:

—Srawanba, kewanba øyeeg pubig købene, trembe kasharamuinguen— cha.

¹¹ Inchene Jesúsbe trenchibig køn:

—Kasharamønrabb tamibe mayeelain kømøn cha. Tius truburab kønrabb traniilaindøwein køn cha. ¹² Møgelane kasharamumig chigurrin køben øyeeg katabelø lataig pønraban cha. Kan utueløbe kasharamigwane chi palai mørrabbgailø usrai patsaugurri treeg kal-lawar køn cha. Inchen kan utuelane sralø palai mørmønrabb kapawa kørrømarilø køben, kan utueløbe srømbalasø Tius nø ashib karubweimburabikkurri ka trendø nømuinetø tre latailøtøwei misran cha. Møikkøben Tiusweimburabeløyu marøb uñchab treeg kørrømisramdiig kui møra, treeg kørrømisrabb— chibig køn.

Uregwan Jesús mayanguen tab kuilø kønrabin chib

(Mc 10.13-16; Lc 18.15-17)

¹³ Inchen Jesúsweimay uremeran srua amrrubelø køn, nømuim pala tasigwan estsara, nømuimburab Tiuswan mianrabb. Inchen nui kusrenanøb pera uniiløbe tru srua amrrubelan namaptinchibelø køn. ¹⁴ Inchene Jesúsbe trenchibig køn:

—Uregwane merømø, naimay ka amrrubasay cha. Kaguende srømbalasø Tius nø ashib karub waibe nøm latailaiwein køn— cha. ¹⁵ Incha tasigwan uregwein pala estsarabe, nøbe truyugurri ibig køn.

Kan pua møg Jesúsba waminchib

(Mc 10.17-31; Lc 18.18-30)

¹⁶ Kan møg Jesúswan ashchab yabe, trencha payibig køn:

—Kusrennøbig, managatig øsig kømigwan na tøgagønrabb, ¿chigøben tabiibe chi maramø?— cha.

¹⁷ Inchene Jesúsbe trencha løtabig køn:

—¿Ñibe nane tru tabigweimburabb chindimba paygu? cha. Mugucha tabiibe kaaben, Tiustøwein køn cha, tabiibe. Inchawei managatig øsig kømigwan tøga pasrønrabb, Tius maig maramigwan martrai pønsraigwan møra, mar— chibig køn.

¹⁸ Inchen matsinøbe:

—¿Møilø køh?— chibene,

Jesúsbe trenchibig køn:

—Kweechimøwei, itølumøwei, nilømwøwei, katøganuimburab isa waminchimøwei, ¹⁹ usri møskawan maig købash inchimø, tab inchib, katø ñima ñiasitøwei maig undaguig køppe, ñui mendaigwangucha treetøwei undaarab inchi— chibig køn.

²⁰ Inchene matsinøbe trenchibig køn:

—Nabe iilane kerriguh marøbig kur cha. Masbe ¿chitø palerah?— chiben,

²¹ Jesúsbe trenchibig køn:

—Chigucha palómfig newan tabig kónrrappe, ya, ñui chi tógagúigwan yana, waachameran tranø cha. Treeg marabe, srømbalarømbe chigurrimbunø tógagønrabbguen cha. Trugurrimbe arrua, nai mendig amø— chibig køn.

²² Inchen tru matsinøbe iigwan mørøppe, truba isu ibig køn, kaguende truba puaiq kua.

Chi tógagúigwangøba isubigweimbe kørandiig køn

²³ Incha Jesúsbe trenchibig køn nui kusrenanøb pera unilan:

—Nabe ñimun cierton trendamønrrun cha: Srømbalarø Tius nø ashib karub wainug kan puaiq keyyamibe truba murig køn cha. ²⁴ Kan camelloqen tsusain kal trabyu illmø larrayandiig køben, kan puaiqe Tius nø ashib karub waisrø kebinrrab kaimanrrun— cha.

²⁵ Inchen nui kusrenanøb pera uniiløbe iigwan mørabe, truba kwaarøb trenchibelø køn:

—Treeg købene, ¿kaigyugurrimbe mu kui wesraig kønrrautah?— cha.

²⁶ Inchen Jesúsbe nømun ashabe, trenchibig køn:

—Møgeløbe iigwan martrab kaimanrrun cha. Trune Tiusweimbe si, chitøgucha maramdiitø køn— cha.

²⁷ Inchen Pedrobe trenchibig køn:

—Au, nambe chi tógagúigwan kerriq elacha, ñui mendig amrruig køn cha. ¿Nambe, trube, chi utamig kønrrerah?— cha.

²⁸ Inchene Jesúsbe trencha løtabig køn:

—Pøs nabe ñimun cierton trendamønrrun cha: Katøyug chi købigwan srøig tamarøb uras tru Møg Misra Arrubig nø wamisrig tørguegwalmabigu nø wamisrøb uras, ñim nai mendig amøñibeløbe tru purramisra karub purraig doce pønrrabeløyu purramisra, tru doce nusrrkalø Israelwainukkurri karrab misaameran ñim ashib karub purramisrrun cha.

²⁹ Inchen mayeeløba yameran, nunelan, nuchalan, usri møskawan, ureqwan, pirømeran nai munchigurrindø elachibeløbe cien piejes menrraguen utab, katø managatig øsig kømigwangucha Tius tranig utønrrun cha. ³⁰ Inchen møiløgøben mõi ya yu pirau nømmerriq pønrrabeløbe trusrømbe srabe melønrrun cha. Inchen yu pirau srabe melabeløbe, trusrømbe nømmerriq pønrrønrrun— chibig køn Jesúsbe.

20

Uvas trau kwallibelan kemesra wamindig

¹—Srømbalarø Tius nø ashib karub waibe øyeeq lataig køn, kan pirø puaiq truba løtsøzhig nui uvas ellguailøyu kwallchabelø lanrrab webibig lataikke. ² Incha tru pionmeran mawain mayan pagaramig køben treeg pagaranrrab misra, incha nui uvas ellgwainug kwallchay øran cha. ³ Incha tru løtsø las nueve katøyug webarruabe, katøganelø plazayu chi maramikkar purrai ashabe, ⁴ trenchibig køn cha: “Ñimgucha nai uvas ellgwainug kwallchab ambay cha, maig pagaramigwan treeg pagarrumøn” cha. Inchen nømbe ambubelø køn. ⁵ Incha puaiqe katøyug kwaløm tøbøtag webya, katø maaben las treskucha webya, treetøwei marøbig køn. ⁶ Incha maaben las cinco køsrøn katøyug plazayumay yabe, katø møiløgøsrøn chigucha maramikkar purrai ashabe, trencha payibig køn: “¿Ñimbe mawa ørøba chi marmøbe yube chinchib purrøgue?” cha. ⁷ Inchene nømbe trencha løtabelø køn: “Namune muguen chi maramig tranmøtan” cha. Inchen nøbe trenchibig køn: “Ñimgucha ambay cha, nai uvas ellgwainug kwallchab.”

⁸ Inchen yandø yem misren, tru ellmarig puaiqe nui kwallibelan ashibigwane trenchibig køn: “Kwallib melabelan wama, pagarau cha. Tru srabe kerrubelanmerriq pølbasa, srøsrø kerrubelane srabe pagaranrrig” cha. ⁹ Tru maaben las cinco lutau køben kebambubelømerriq kemalla, møitøgucha mawa ørøba marøb meløwa lataitøwei neig utabelø køn. ¹⁰ Inchen yandø merrab kebambubeløbe mas utamuitamab isua meløbenba, nøm møitøgucha mawa ørøba marøb melaigwandøwei utabelø køn. ¹¹ Incha tru marøb melaimburø anwan utabe, tru ellmarig puaiqwane nømødø truba namig waminchib mendabe, ¹² tru puaiqwane trenchibelø køn: “I tru srabe kerrubelø kan urazhiitø marendø, ñibe truilangucha nam pørryu mawa mawa marøb melabelan lataitøwei lata pagaran” cha. ¹³ Inchen tru tra puaiqe nømun møigwan køsrøn trenchibig køn: “Kasuku, nabe ñune chigucha chi kalø marmur cha. ¿Yamba mawa marigwan ñune øyah pagarrumøn chiben, ñibe treeg kørrømisrømørgøppeh? cha. ¹⁴ Ñui ana kanaigwan cha, chibig køn. Møimbe inrrø cha. I srabe martrab kebarrubigwan ñun lataitøwei pagarag køben treeg pagaran” cha. ¹⁵ ¿Nan maig maramdiig køben, naiwane nabe na asha maramig kømuitarru? cha. ¿Kabe na merøgømiig menrra tabig kui ashiptø ñibe pusrkwai ashkuh?” cha.

¹⁶ Inchawei mõi ya srabe melabeløbe nømmerriq pønrrøben, mõi ya nømmerriq pønrrabeløbe srabe melønrrun— cha.

Jesús nui kwamigwan pønmayguen eshkab

(Mc 10.32-34; Lc 18.31-34)

¹⁷ Jesús yandø Jerusalénsrømay nebib yabe, nui doce kusrenanøb pera uniilan nøøø wama, trenchibig køn:

¹⁸ —Au, nambe Jerusalénmay nebamub amber cha. Trusrømbe Møg Misra Arrubigwane sacerdotsmeran karubelanba, tru Moisés pørigwan kusrenanøbelanba tranen, truiløbe nune kwanrrai pasrtrun cha. ¹⁹ Incha nømbe nun indzatø ashib, kurraguchib, kurusy mesrøb inchai judíos kømeeelan tranrrun cha. Inchen pøn kwalømyube katø øsiirawa kurrønrrun— chibig køn.

Santiagoønba, Juanwanba pinrrø menda purrønmbosrumugu cha, Señorwan usri treeg miab
(Mc 10.35-45)

²⁰ Zebedeowei nusrkalai usrimbe nui nusrkaløba Jesúswei merrab chigøsrøn mianrrab, nøbe tømbarøbig køn. ²¹ Inchene Jesúsbe payibig køn:

—¿Chi paløta?— cha.

Inchene nøbe trenchibig køn:

—Ni ashib karub wainug nai nusrkalan, kanun kusrma, kanun ñui atsimay purramisingarurra— cha.

²² Inchene Jesúsbe trencha løtabig køn:

—Ñimbe chi miab pønrrermabguen mørmøn cha. ¿Na tru copayu mutsam piwan, kabe ñim muchibsrugueh?— cha.

Inchene nømbe trenchibelø køn:

—Øø, mutsamønrrun— cha.

²³ Inchen Jesúsbe trenchibig køn:

—Na mutsim piwane si, ñimbe muchibwei inchun cha. Inchendø tru kusrma, atsimayba purrønnamigwane na tranamig kømøn cha. Tru purramibe nai Møskai tru purrønrrabelayasig tamariilaindøwein køn— cha.

²⁴ Inchen tru nui kusrenanøb pera uniilø diezeløbe trunun mørabe, tru pa nunelane namabelø køn. ²⁵ Inchen Jesúsbe nømun wamabe trenchibig køn:

—Ñimguen ashen, judíos kømø misaameran karub purrabeløbe nøm karub tøgagüilane maig købash inchib ke nøm karub purran cha. Inchen truyu møguelø nørreelø nøm karub purrabeløbe mungucha manchinraingaig karub purrabelø kui ashchai nømbe kenamaran cha. ²⁶ Trune ñimui utube ñimbe øyeelø kømumig køn cha. Treeg købgunrriibe, ñimui utu mas nuikkug købene, katøganelø karuindiig megamig køn cha. ²⁷ Inchen ñimui utu møikkøben ñimmerrig melag købene, katøganelø karuindiig megamig køn cha. ²⁸ Kaguende øyeetøwei tru Møg Misra Arrubikken katøganelø nuyasig marøb melønrrai arrumøtø, nøguen katøganelayasig marøb meganrrappa, nø kwaitøga truba nu misagwan purøbagarawa, kaigyurri wesranrrappa arrig køn— chibig køn.

Pailø kabgailan Jesús tamarøb

(Mc 10.46-52; Lc 18.35-43)

²⁹ Nøm Jericøgurri webamba ambene, misaamerabe truba nu wendautø ambubelø køn. ³⁰ Inchen pailø kabgailø may menda purrøwabe, Jesús purayai mørøppe, trenchib trashibelø køn:

—¡Namun lastima ashcha chib, merrabsrø Davidwei Nusrkai!—

³¹ Inchen misaamerabe niløtø purrønrrai namingucha, nømbe mas mur trashib trenchibelø køn:

—¡Señor, namun lastima ashcha chib, Davidwei Nusrkai!—

³² Inchen Jesúsbe pasramisra, kabgailan wamabe, trencha payibig køn:

—¿Ñimuyasig na chi maramig paløta?— cha.

³³ Inchene nømbe trenchibelø køn:

—Señor, namune namui kabmera ashibig misrimbe køtan— cha.

³⁴ Inchen Jesúsbe nømun lastima asha, nømui kabmeran katørabene, tru urastø kabgailøbe ashibelø misra, Jesúswei mendig ambubelø køn.

21

Jesús Jerusalénsrø kebib

(Mc 11.1-11; Lc 19.28-40; Jn 12.12-19)

¹ Yandø Jerusalénsrø chab pub amba, Betfagé pueblo tru Olivos Tunsrø chab puabe, Jesúsbe nui kusrenanøb pera uniilø pailan ² trenchib karua øøbig køn:

—Ø pinrrøguesrø yamera tsitsø pønrrabsrømay ambay cha. Trusrømbe pubyutø kan burra, burro-unøzhig peraig, litsig wetørranrrun cha. Incha picha, srua amrrunrrigay cha naimay.

³ Inchippa mōikkōben chigōben chibene, ōyah chinrrigay chibig kōn: “Señor palai indan” cha. Inchen truipe pebrrun— cha.

⁴ Ōyeeg pureppe, Tius maig karuigwan eshkabig maig taig treeg nebunrrain kuig kōn, tru ōyah chib pōrig:

⁵ Sion ciudayuelan ōyah chib eshkau cha:

“Asay chib, ñimui Rey ñimui may arruppe, chigucha chi nuig kōmíig lataig kan burroyu,

burro-unōyu itōguana arrun taig, kan carga nigab animal lluig unōyu.”

⁶ Inchen nui kusrenanōb pera uniilōbe Jesús maig karuigwan treeg mara, ⁷ burran unanbañau srua amrrua, nōmbe nōmui kewagūilan burranba, unanba kayen, Jesúsbe itōguanabig kōn. ⁸ Inchen misag truba nu pasrabiibe mōilōbe nōmui kewagūilandōwei maywan kayen, mōilōbe kullag srarcheelō lutiicha kayibelō kōn. ⁹ Inchen merrab amrrubelō lata, wendau amrrubelō lata, ōyah chib trashib amrrubelō kōn:

“¡Rey Davidwei Nusrkai Hosanna! chib.

¡Señor Tiuswei munchiyu nō ōrig arrubiibe mayanguen tab kuig kōn! chib.

¡Srōmbalarōmbe Hosanna!” chib.

¹⁰ Jesús Jerusalénsrō kebibene, maya misaamera ke chi indi asamgaig inchib, mōilōgōben trenchib payibelō kōn:

—¿Iibe mu kōh?— chib.

¹¹ Inchen tru nu misag sōtōbe trenchibelō kōn:

—Iibe Tius maig karuigwan eshkabig Jesús Galilea pirau nazaretsriig kōn— cha.

Jesús Tiuswei yawan chish marōb

(Mc 11.15-19; Lc 19.45-48; Jn 2.13-22)

¹² Jesús Tiuswei yau kebya, truyu mayeelō yanōb, penab inchib warabelan sōtōba wambig webetabig kōn. Katō misagwan an yunōmarōbelai mishatsiimeran utsōbetab, palomamera yanōbelō purraigwan utsōbetab inchibig kōn. ¹³ Incha trenchibig kōn:

—Tiuswei wamwan pōrigube trenchibig kōn cha: “Nai tab yabe Tiuswan wamindi ya kōn cha, trencha wamig kōnrrun” cha. Trune ñimbe nileelō warain trab marin kōn— cha.

¹⁴ Inchen tru Tiuswei yau kabgailō kōben, cojosmera kōben Jesúswan kemallen, nōbe tamarōbig kōn. ¹⁵ Inchen sacerdotesmeran karubelōba, Moisés pōrigwan kusrenanōbelōba Jesúswei tru purō nōrreelō mariilan ashib katō Tiuswei yau shush ureemera: “¡Rey Davidwei Nusrkai Hosanna!” chib trasai mōrabe, truba namabelō kōn. ¹⁶ Incha Jesúswan trenchibelō kōn:

—¿Iilō ōyeeg chib kōben mōrtirru?— cha.

Inchene Jesúsbe trenchibig kōn:

—Ōō, mōrar cha. ¿Ñimgan Tiuswei wamwan pōrigu iig ōyeeg chibigwan managuen lemeelō kōtirru? cha:

Pitsō muchib shush ureemeran kōben, katō nōrrō ureemeran kōben

ñun newan tabzhig waminchai, ñi Tius treeg marin kōn taigwan.—

¹⁷ Incha nōmun pōnrramnetō, ciudayugurri webya, Betaniasrōmay yabe, trusrō kōrrōmisrōbig kōn.

Higuera tusr mamig ñimíigwan Jesús kaig nebunrrai wamab

(Mc 11.12-14, 20-26)

¹⁸ Incha lōtsō katō ciudayumay arruabe, Jesúsbe parōgwai mōrōbig kōn. ¹⁹ Incha kan higuera tusr may pulu pasrai asha, kemallabe, tru higuera tusrbe ka ishiitō tōgaig kui ashabe, Jesúsbe tru higuerae trenchibig kōn:

—¡Mōingurrimbe yandō managucha mas mamig ñimubash!— cha.

Inchen tru urastō higerabe mul-laptinchibig kōn. ²⁰ Inchen tru chi purayaigwan nui kusrenanōb pera uniilōbe ashabe, truba kwaarōb, Jesúswan trenchib payibelō kōn:

—Higerabe mōi mōi mul-lanrrappe ¿mandō indah?— cha.

²¹ Inchene Jesúsbe trenchibig kōn:

—Pōs nabe ñimun cierton trendamōnrrun cha: Ñim ñimui isubigwan Tiusweinuutō pasra tōgagua treeg kōmuptinchaitamab isumubene, na higuera nō yeeg mari lataitōguen kōmōtō, ñim i tunwanma: “Yugurri mendamisra, maryu kebeñ” chibene, treeg purainrrun cha. ²² Inchawei ñim Tiusba waminchib miappe, chiwandōgucha nō martraitamab kōrewa, miawabe, ñimbe utōnrrun— chibig kōn.

Jesúswei karumburab karuig mu mandamgaig

(Mc 11.27-33; Lc 20.1-8)

²³ Jesús Tiuswei yau kebya, kusrenanōb wamnetō, sacerdotesmeran karubelōba, misagwan karubelō kōlli misaameraba Jesúswan kemallabe, trencha payibelō kōn:

—¿Ñi mariilane mu karua pasriitogarre margu? cha. ¿Ñi øyeeg maramigwane mu karua pasrta?— cha.

²⁴ Inchen Jesúsbe lötappe, trenchibig køn:

—Nagucha ñimun kan chigøsrøn payrrab inchar cha. Ñim iigwan lötøbene, trube, nagucha eshkarrumøn chibig køn, iilan mu karuitøga marar cha. ²⁵ ¿Misagwan Juan piu umbu ulsraibe chugurri arrig køh? cha: ¿Srømbalarøngurrin kønrrab køh? Kabe: ¿Møgueløgurrin kønrrab kø chindah?— cha.

Inchen kangurrin kangurri payiyab mendabelø køn: “ ‘Srømbalarøngurrin kuig køn’ chibene, nøbe namune trenchinrrun cha: Trube, ‘¿chindimba nune køremøgue?’ cha. ²⁶ Katø: ‘Møgueløgurrin kuig køn’, tamgawein køn cha. Kaguende misagwan namune kørig køtan cha. Kaguen ya mayeeløba Juanbe Tius maig karuigwan eshkabig købig kui asha tøgar køn” cha. ²⁷ Treekkurri Jesúswane trencha lötabelø køn:

—Maig kuindøbeh— cha.

Inchene Jesúsbe trenchibig køn:

—Trube, nagucha eshkamumønrrun cha, iilan na mu karuitøga marigwan.—

Pagatø nusrkalø lataitøwein køn cha, kemesra wamindig

²⁸ Jesúsbe payibig køn:

—¿Ñimbe iigwan maig isugue? cha. Kan møg pagatø nusrkalø tøgagua, kanunmerrig trenchan cha: “Nai nusrkai, nai uvas ellgwain trau møi kwallchab inrrø” cha. ²⁹ Inchene nøbe trencha lötabig køn cha: “Ig kømøtan” cha. Inchendø nøbe yanayube treeg marmønrrumab isua møra, ka yan cha. ³⁰ Inchen møskaimbe katøgan nusrkaweimay yabe, katø treetøwein chiben, nusrkaimbe: “ØØ, Papa, na inrrur” chibendø, imøn cha. ³¹ Trube, tru i pa nusrkaløyu møskai maig maringaruigwan ¿møig marerah?— chiben, nømbe:

—Tru srøsrø karuinab nusrkai— chibelø køn.

Inchen Jesúsbe trenchibig køn:

—Pøs nabe ñimun cierton trendamønrrun cha: Romasreelayasig an utabeløba, ishumburmera asrwan anwei yanøbeløba Tius nø ashib karub waisrømbe nømmerikken kebammønrrun cha, ñimguen kebammøwatø. ³² Kaguende Juan Bautistabe sølgandø tabig mandø amønamiigwan kusrenanrrab arruben, ñimbe køremuig køn cha. Trune tru an utabeløba, tru ishumbur an pagarwei trømbøig marøptø warabeløba, truiløguen køreig køn cha. Trune ñimbe iilan kerrigu ashendø, kørenrrab isua mørmuig køn chibig køn.

Kwallibelø larrø kailan kemesra wamindig

(Mc 12.1-12; Lc 20.9-19)

³³ ‘Incha møray, chibig køn, katøgan ‘øyeeg lataitøwein køn’ cha, kemesra wamindigwan. Kan møg pirø puag uvas tra mara, trugurrimbe panig pasra, uvas piwan chu wesrumigwan truyu tamara pasra, incha tru ellmarigwan ashib laramig kan ya-unø palaig mara pasran chibig køn. Incha nui pirøwan katøganellan misrigwan pirishinrraptø kwallchai tranabe, yabsrømay yan cha.

³⁴ ‘Incha yandø tru mamig misrigwan lurramig luturaaben, møilan køsrøn nui karuindiig melabelan tru nuimburaigwan tru kwallchab utabelan mianrrab øriibe, ³⁵ tru kwallibeløbe karua øriilan merrarrawa, kanune kurraguchib, kanune kweechib, kanune sruutøga petab inchibelø køn cha. ³⁶ Inchen tru pirø puaiibe srøsrø lataguen kømø, katøbe karuindiig melabelan mas yam øren, tru kwallibeløbe søteelanba treetøweih maran cha.

³⁷ ‘Incha yandø trugurrimbe nui trag nusrkawan ørøbig køn cha, treeg isub: “Nai nusrkawane chinchimønrrun” cha. ³⁸ Treendingucha tru kwallibeløbe nusrkawan ashippe, nømødø trenchibelø køn: “Pirøwan ketig utønrrabiibe iigwein køn cha. Kwetchab amun chibelø køn, nuimburaab nø utamigwan nam tøga kørrømisrtrab” cha. ³⁹ Incha merrarrawa, uvas traugurri wegucha, nune kweechibelø køn cha.

⁴⁰ ‘Møimbe, trube, ¿tru uvas tra puag arruabe, tru kwallibelane chi martreerah?— chibig køn.

⁴¹ Inchene nømbe trenchibelø køn:

—Tru larrø kailane treetøwei kaig mara kwetchun cha. Incha tru uvas trawane katøgan mendailan tranrrun cha, lurrimørig nuimburaigwan tranrrai.—

⁴² Inchene Jesúsbe trenchibig køn:

—¿Ñimgan Tiuswei wamwan pørigu øyeeg chibigwan managuen lemeelø køtirru? cha: Ya marøbelø kaasig sruube

katsiisrø pølbasa wayamig mas purø tab srukken misrin køn taigwan.

Señor Tius øyeeg marene,

namuin kabyube truba tabig asønatan cha.

43 Inchawei nabe ñimune trenchar: Tius nõ ashib karub waigwane ñimune kerrawa, katøgan peg misaameran Tius tranrrun cha, ellmarig maig misrtrabig køben, treeg ellmarig misrtrabelan. 44 Inchen mõikkøben tru srug pala peñippe, pitis misrtrun cha. Inchen tru srug muim pala køben peñippe, nune usrø tuindø martrun— chibig køn.

45 Inchen tru sacerdotsmeran karubeløba, fariseosmeraba tru ‘øyeeg lataitøwein køn’ chib Jesús eshkab wamindilan mørabe, nõmun kemesra wamindin kui wetøgørrabelø køn.

46 Incha Jesúswan merrarranrrab inchendø, misag sötøwan køriimatabelø køn, kaguende misaamerabe Jesúswane Tius maig karuigwan eshkabig kui treeg tøgagøben.

22

Kasharab yaumay lynchab amrrunrrai eshkai lataitøwein køn cha, kemesra wamindig (Lc 14.15-24)

1 Katø Jesúsbe nõmun ‘øyeeg lataitøwein køn’ cha, kemesra kusrenaniilan waminchib mendappe trenchibig køn:

2—Srømbalasø Tius nõ ashib karub waibe øyeeg lataig køn cha. Kan rey nui nusrkai kasharaben fiesta marøbig lataikke. 3 Incha nui karuindiig melabelan novios yaumay lynchunrrigay cha eshkailan wamønrrab øriibe, tru lynchab amrrunrrai eshkailøbe amrrug kømui indin køn cha. 4 Inchen nui karuindiig melabelan katøganelan katøyug trencha karua ørøbig køn: “Nai tsal-lanin toromeran kweetsingarua mamigwane yandø chab tamaraguen war cha, mõimbe si yandø kerrigu ke chab tamarikken pønrran cha, novios yaumay lynchubash tan” chinrrai. 5 Trune tru lynchai eshkailøbe cuentaguen marmø, mõikkøsrønbe nui trausrømay iben, katøgane penab, yanøb inchab ibig køn cha. 6 Inchen katøganeløbe tru reywei karua øriilan merrarawa, truba kaig marøb kurrabetab køptø kweechibelø køn cha. 7 Inchen reybe truba namaptø, tru kweechibelane nui suldaumeran truilane kweetsingarua, nõmui pueblone parringarun cha.

8 Incha nui karuindiig melabelane trendan cha: “Isa kømø, tru noviosmerai fiesta maramibe chab tamarig pønrrøben, tru lynchab amrrunrrai eshkailøbe treegube lynch-abgailø kuig kua, amrrumug køn cha. 9 Incha mas nõrrø callesmerawan amba, mun wetørrabashø novios yaumay lynchab amrrunrrai eshkanrrigay” tan cha. 10 Inchen tru karuindiig melabeløbe callesmerawan webamba, mun wetørrabashø tulundzunabelø køn, tabelan køben, kailan købengue. Inchen kasharabelø purrai salayube ¡katø! misaato netsaptinchibig køn.

11 Inchen reybe tru lynchab amrrunrrai eshkailan ashchab kebyabe, kan møg noviosyu lynchab keegwan keweig pasrømui ashabe, trenchiptinchibig køn: 12 “Au, kasuku, kasharabyu keegwan keweig kømubendøbe, ñibe ¿chincha kebarrugu?” cha. Inchen nõbe ke wamguen pinim pasramisrøbig køn cha. 13 Inchen reybe tru mishatsigu ashib pønrrabelane trenchiptindan cha: “Srøbwanba, tasiimeranba lusra, wambig purø trømbø løstøyu wegutsay cha. Truyube kishib, trugulmeran tsatsamig kønrrun” cha. 14 Kaguende wamiiløbe truba nu køben, lawa wesruiløbe mamdø køn— chibig køn.

Tiuswein kønrrabigwane Tiuswan tranøppe, Césarwein kønrrabigwane Césarwan tranøb (Mc 12.13-17; Lc 20.20-26)

15 Øyeelø chab puraiben, fariseosmerabe nõørø mendamisra, nõmdø waminchibelø køn, Jesúswan chigøben payen, kalø lötøbene, kebenøsrkønrrab cha. 16 Inchabe mõilan køsrøn nõmui mendig amøñibelanba, Herodesweingateelanba øyah chinrrai ørøbelø køn:

—Kusrennøbig, ñibe ciertonigwan waminchib møg, Tius maig amøñinrrai karuigwan, isa kømø, trunun treeg kusrenanøb, katø misag maig chitanmaptø mørøb pasrømlig kui ashibelø ker cha. Kaguende ñibe mundøgucha nõmun mailø køtasha kandarøtø imøwei inchibig køn cha. 17 ¿Ñune maig købsruerah? cha, namun eshkarra chibelø køn. ¿Tru Romasrø maya misagwan karub wabigwan nam an pagaramig merig køh, kabe merømuig køh, chinderah?— chinrrai.

18 Inchen Jesúsbe nõmun ka kaig martraptø isua inchib pønrrain kui ashabe, trenchibig køn:

—Ñim palatø tabelø, ¿nane chindimbarre kebenøsrkønrrab inchigue? cha. 19 Tru pagaram anwan eshkarra— chibig køn.

Inchen nõmbe kan an srua amrrubene, 20 Jesúsbe trencha payibig køn:

—¿I anyu maløba, i munchi pøriibabe muin køh?— cha.

21 Inchene nõmbe trenchibelø køn:

—Tru Césarwein køn— cha.

Inchene Jesúsbe trenchiptinchibig køn:

—Inchawei Césarwein købene, Césarwan tranay cha. Inchen Tiuswein købene, Tiuswan tranay— cha.

²² Inchen iigwan mōrabe, kwaara asha kōrrōmisra, nōmbe nune pasramnetō, ambupt-inchibelō kōn.

*Kwawa katō ōsiiramigwan payib
(Mc 12.18-27; Lc 20.27-40)*

²³ Tru kwalōmdōwei kan mōilōgōsrōn saduceosmera Jesúswan ashchab ambubelō kōn, truilōbe tru kwabelōbe ōsiiramōnrrun chibelō kuabe, Jesúswane ōyeeg payibelō kōn:

²⁴ —Kusrennōbig, Moisésbe trendaig kōn cha: “Mōikkōben kan mōg urekkaig kwabene, nunebe tru piudan kasharam nebunrrun cha, tru nuneg kwabigweimburab ureg kōrrōmartrab.” ²⁵ Pōs yu namui utuma sieteelō nunelō kōbig kōn cha. Indiibe srōsriibe kasharawa, urekkaig kwawa, srawane nunewan kōrrōmaran cha. ²⁶ Katō tru wendō nunewan treetōweim puraiben, katō tru wendau nunewan treetōweim puraiben, sietee-lanba treetō treetō puraibig kōn cha. ²⁷ Yandō srabebe tru ishukkucha kwan cha. ²⁸ ¿Pōs treeg kōbene, tru kwabelō katō ōsiirabene, tru maya nunelō tru ishuwan kasharaig kuig kōppe, nōbe sieteelai utu mōigwei srain kōnrrerah?— chibelō kōn.

²⁹ Inchen Jesúsbe trencha lōtabig kōn:

—Ñimbe mandō kuinguen mōrmōwa, pella pōnrran cha, kaguende Tiuswei wamwan pōrigwan lata, Tiuswei maramburab marōbigwan lata nebua ashmeelō kua. ³⁰ Kaguende kwailō katōyug ōsiirappe, kasharamōwei, kasharanrrab kōmōwein kōnrrun cha. Treeg kōmōtō, srōmbalāsō āngelesmera latalōtōwein kōnrrun chibig kōn. ³¹ Inchen tru kwailō ōsiiranrrun taigweimburappe, ¿ñimgan lemeelō kōtirru? cha, Tius nōtōwei ōyah taigwan: ³² “Nabe Abrahamwei Tius, Isaacwei Tius, Jacobwei Tius kur” cha, trendaigwan. Inchawei Tiusbe kwailai Tius kōmōtō, ōsiguelai Tius kōn— chibig kōn.

³³ Inchen misag truba nu pasrabiibe iigwan mōrabe, Jesús kusrenanigwan ke kwaara asha kōrrōmisrōbelō kōn.

*Martrai karua pasrig mas nuig
(Mc 12.28-34)*

³⁴ Fariseosmera tru saduceosmeran Jesús nilōtō pōnrram wamindin kui wammōrabe, tulundzuna, ³⁵ kan mōikkōsrōn tru maig maramigwan martrai Moisés pōrigwan kusrenanōbiibe Jesús kalō lōtōbene kebenōsrkōnrrab isua, trencha payibig kōn:

³⁶ —Kusrennōbig, ¿maig maramigwan martrai Moisés pōrigu karua pōnsrailō, mas nuibe mōig kōh?— cha.

³⁷ Inchen Jesúsbe trenchibig kōn:

—“Señor ñui Tiuswane ñui manrraugurri kerrigu newan undaaritōgaba, kerrigu ñui ōsig pasraitōgaba, kerrigu ñui turtōga isumburab isuitōgaba undaaramig kōn, chibig kōn” cha. ³⁸ Tru maig maramigwan martrai pōnsrailōyu, iimerrig kōn cha, trurrigu mas nuibe. ³⁹ Inchen tru wendaikkucha treeg latalōtōwei chibig kōn: “Ñima ñiasitōwei maig undaguig kōppe, ñui mendaigwangucha treetōwei undaaramig kōn” cha. ⁴⁰ Tru maig maramigwan martrai Moisés pōrigu kerrigu pōnrrabig lata, Tius maig karuigwan eshkabelō kerrigu kusrenaniilō lata i pagatō maig maramigwan martrai pōnsrailōyugurri pōlbasra amrrubig kōn— cha, trenchibig kōn.

*¿Cristobe mui misagurri arrubig kerah?
(Mc 12.35-37; Lc 20.41-44)*

⁴¹ Inchen fariseosmera tulaamba srō purramnetō, ⁴² Jesúsbe trencha payibig kōn:

—¿Ñimbe Cristoimburab maig isugue? cha. ¿Mui misagurri arritamague?— cha.

Inchen nōmbe trenchibelō kōn:

—Davidwei misagurri arrub nusrkain kōn— cha.

⁴³ Inchen Jesúsbe trenchibig kōn:

—¿Trube, treeg kōbene, Davidbe Cristone chindimba Señor tah? cha, nun Espiritu trendingaruben. Kaguende Davidbe trendaig kōn:

⁴⁴ Señor Tiusbe tru nai Señorwane trendan cha:

“Nai kusrmaygatō wamisr cha, ñui ashig kōmui inchib tsalō inchibelan

ñi itōbunōnrrai ñui srōb umbu na pōnsramnegatig.”

⁴⁵ Cristone Davidbe: “Señor” cha, ōyeeg wamōbene, trube, ¿mandōgurri Cristobe Davidwei nusrkain kōnrrab kōh?— chiben, ⁴⁶ muguen mancha kusrua lōtōnrrab kaimabelō kōn. Incha tru kwalōmgurri mugucha chigōben mas payrrab inchimeelō kōn.

23

*Fariseosmeranba, Moisés pōrigwan kusrenanōbelanba Jesús ‘ōyeelō kōn’ chib
(Mc 12.38-40; Lc 11.37-54; 20.45-47)*

¹ Øyeelø chab puraiben, Jesúsbe misaameranba, nui kusrenanøb pera uniilanba trenchibig køn:

²—Moisés pørigwan kusrenanøbeløba, fariseosmerababe tru Moisés pørigwan øyeeg chibig køn cha eshkað nømui marøb purramibe truig køn cha. ³ Inchawei nøm ñimun chi maringaruben, kerrigu møra marøb esegay cha. Inchendø nøm maig marigwane, trunun asha marmønrrigay chibig køn. Kaguende nømbe chigøben tabig martrappe chibendø, peemaytø marøbelø køn cha. ⁴ Incha nømbe tru pørigu mas nemarøb, mutamguenga kwatsiguelø latailø mara, katøganelane kildunyu muta ambub lataitøwei inchaiarendø, nømgurrimbe ni tasig-unøtøgaguen kebachig kømui inchibelø køn cha. ⁵ Chiwandøgucha marøppe, misaamera ka ashchaidnø marøbelø køn, cha. Tiuswei wamwan pørigwan kappaløyu køben, kwalmerayu køben nørriig kena melsra amønämig tab kui inchibelø køn cha, katø u tulturmera yab srølmera melsra amønämiba. ⁶ Lincha tabig mabyugucha nørreelø purrainug purø tabigu purrag kui indamba, judiosmera tulundzuni yamerayube purø tab purramdønug purrag kui indamba inchibelø køn cha. ⁷ Incha misaamerabe penab yanøb indinug nømune purø tabzhig wamønrrai inchibelø køn cha, trurriig nømune “Kusrennøbig” cha, wamønrraigue.

⁸ Trune ñimbe “Kusrennøbig” cha, wamønrrai inchimumig køn. Kaguende ñimbe søteeløba nunelø latailø køn. Incha ñimbe kusrennøbiibe kandø tøgær køn cha. ⁹ Katø ñimbe yu pirauke mungucha, “Møskain” chimøtay. Kaguende ñimbe Møskaimbe kandø tøgær køn, truike srømbalasrø wabig. ¹⁰ Katø ñimune “Kusrennøbig” cha, wamønrrain kømøwein kui, kaguende ñimuimbe ashibig mas nuibe Cristo, nøtø køn. ¹¹ Ñimui utu mas nuibe katøganelø karuindiig megamig køn. ¹² Kaguende nøasiitø ‘nuig kurmað’ isubigwane, ka kørig martrun cha. Inchen chigucha kømüg ‘nuig kurmað’ isumügwane ‘i møøbe si, nuig køn’ taig kønrrun, chibig køn.

¹³ ‘jAy, ñim waachamera Moisés pørigwan kusrenanøbeløba, fariseosmeraba, palatø tabelø! Srømbalasrø Tius nø ashib karub wainug kebambam yaskabwan katøganelø kebammønrrai kasrøb, ni ñimdøweinguen kebammøwei, ni katøganelø kebambug kui inchen kebambashmøwei inchibelø køn cha ñimbe.

¹⁴ ‘jAy, ñim waachamera Moisés pørigwan kusrenanøbeløba, fariseosmeraba, palatø tabelø! Pøs ñimbe piudasmeran nømui yameran kerrawabe, tabelø misrøb ke ka yandø truba yana Tiuswan waminchibelø køn cha. Øyeekkuri ñimbe møra melamig mas nuigwan utanrrun chibig køn.

¹⁵ ‘jAy, ñim waachamera Moisés pørigwan kusrenanøbeløba, fariseosmeraba, palatø tabelø! Pirau lata, maryu lata munabatsø ambubelø køn cha, kandøguen ñimuingatø purøsrunrab. Incha yandø ñimuingatø purøsrube, ñim lataitøguen kømø, purab tabelø chibelø kønrrai mara, truigwane tru managuen kwamø nagu kegutsam unø kønrrai marøbelø køn cha.

¹⁶ ‘jAy, ñim waachamera chigüinguen ashmeelø købendø, katøganelan pera ambubelø! “Møikkøben Tiuswei yawei merrab pasramisra, ‘jkatø! marmø kømø, nabe maramønrrun’ taigwan treg marmuingucha, ñimbe chigucha kømøn chibelø køn. Inchendø tru Tiuswei yau oro pasrabigwei merrab pasramisra, ‘jkatø! marmø kømø, nabe maramønrrun’ taigwan trenchibig, trube, martrab taigwane nune maramig nebunrrun” cha, trenchibelø køn, ñimbe. ¹⁷ jTontos, chigüinguen ashmeelø! ¿Møimerrig mas nuig kerah? cha. ¿Orøteh? Kabe ¿tru oron Tiusweyasig tabig kønrrai nøøø tarømarøbig, Tiuswei yateh?

¹⁸ ‘Katø ñimbe trenchibelø køn: “Møikkøben, chigøben martrab cha altarwei merrab pasramisra, ‘jkatø! marmø kømø, nabe maramønrrun’ taigwan, marmuingucha, chigønrraamøn cha. Inchendø tru altar pala Tiusweyasig trana pasrigwan truigwei merrab pasramisra, ‘jkatø! marmø kømø, nabe maramønrrun’ taigwane, nune maramitøwei nebunrrun” cha, trenchibelø køn. ¹⁹ jChigüinguen ashmeelø! ¿Mas nuibe chigø? ¿Tiuswan tranüiteh? Kabe ¿tru Tiusweyasig tranigwan tabig kønrrai nøøø tarømarøbig, tru altarteh? ²⁰ Altar merrab pasramisra, ‘jkatø! marmø kømø, nabe maramønrrun’ chibiibe, altarwandø ke treg maramønrrun chimøtø, tru pala chi pønrrabigwangucha kerriguba treg maramønrrun cha, tøgä trendan cha. ²¹ Tiuswei yawei munchiyu ‘jkatø! marmø kømø, nabe maramønrrun’ chibiibe, tru yawandø kømøtø, Tius truyu pasrabigwangucha tøgä trenchib pasran cha. ²² Inchen srømbalawei munchiyu ‘jkatø! marmø kømø, nabe maramønrrun’ chibiibe, purø tabzhig Tius wamisra waigwanba, katø tru tabzhigu wamisra wabigwanba tøgä trencha pasran chibig køn.

²³ ‘jAy, ñim waachamera, Moisés pørigwan kusrenanøbeløba, fariseosmeraba, palatø tabelø! Ñimbe erbabunanba, aniswanba, cominoswanba, truilane Tiusweyasig diezmørig kanzhig, kanzhig wesrawa tranøbelø køn cha. Inchendø tru maig maramigwan martrai Moisés pørigu kusrennøbig mas nørreelø pønrrabigwane marmø, pinab amban cha, tru

sølgandø tabig maramigwanba, lastima ashibelø kømigwanba, isubigwan Tiusweingwan pasra tøgagømigwanba. Ñimbe marøppe, iilanwei maramig kuig køn cha, tru diezmørig kan kan wesrawa Tiuswan tranamigwangucha pesannamø, tøgatø marøb. ²⁴ ÿÑim chigúinguen ashmeelø købendø, katøganelan pera ambubelø! Pøløm-unøzhigwane tøgä muchimønrrab larruusra muchendø, camellone kebinab pinan cha.

²⁵ ÿAy, ñim waachamera Moisés pørigwan kusrenanøbeløba, fariseosmeraba, palatø tabelø! Pasunba, platillonba wambiimaybe pillmabendø, ñimui umbube ñimbe misagwan kwaarøsrä kerranrrab isuiløba, chigurrimbunø tøgagønrrab parø isuiløba, trutø netsailø køn cha. ²⁶ ÿFariseo chigúinguen ashmüig! Pasun umbumaymerrig chish mar cha, wambiimaygucha chishig körrømisrtrai.

²⁷ ÿAy, ñim waachamera Moisés pørigwan kusrenanøbeløba, fariseosmeraba, palatø tabelø! Kwaig sørin trabmera wambiimaybe puløzhig pisig latailø tabzhig latailø købendø, umbumaybe kwabelain tsutsiimerabah, chigøben køsøngønrraptiibatø netsailø, ñimbe tre latailø køn cha. ²⁸ Ñimbe øyeeg latailø køn: Misaamerai merrappe sølgandø tabelø lataig asønabendø, wambiimay maig køben treegwein kømøtø, umbumaybe isatø tabig lataig indiiløbah, larrø kaibatø netsailø køn cha ñimbe.

²⁹ ÿAy, ñim waachamera Moisés pørigwan kusrenanøbeløba, fariseosmeraba, palatø tabelø! Tius maig karuigwan eshkabelai søriiløyu ñimbe tamara pønrsøb, sølgandø tabig amønibelan sørim pala tabzhig tamarøb inchibelø køn cha. ³⁰ Inchabe ñimbe trenchibelø køn: “Namui merrabsreelø warab uras nam warabelø kuig kuimbe, Tius maig karuigwan eshkabelan kweechib ani lushib nømbe tøgatø marøb pønrrø mubsrubrainrun” cha. ³¹ Pøs øyeeg taikkurri ñimbe Tius maig karuigwan eshkabelan kweechibelainukkurri amrrub misamera ker cha ñimðøweinguen wamindan cha. ³² Inchawei ñimui merrabsreelø pølbäsrä marig købigwane, trube, ñimbe patsøga pasray chibig køn.

³³ ÿUlmera latailø, ñim namig ulmera latailainukkurri karrab misamera! Inchawei ñimbe tru møra melamnug kebusriilø kømønrrab ¿chinha wegørrønrrague? cha. ³⁴ Inchawei asay chibig køn. Nabe Tius maig karuigwan eshkabelø køben, nørøø kusrebelø køben, Moisés pørigwan kusrennøbelø køben ñimuimay øren, møilan køben ñimbe truilane kweechib, kurusyu melsrøb inchun cha. Katø judíosmera tulundzuni yamerayu maig købash marøb ichabetab, puebløsmørig chu amben, chu amben, ñimbe pasrøørøb wendautø amrrun cha. ³⁵ Øyeekkurri tru sølgandø tabig amønibelan kweetsiilai ani mayamba pera lusibe ñimuim pala kønrrun cha, tru Abel sølgandø tabigwei ani lusikkurrimbunø, Berequiaswei nusrkai Zacarias tru altarba, santuarioba pønrrabnug, tru tøbøtag pasrøben, ñim kweecha, truigwei ani lusigwangatig. ³⁶ Pøs nabe ñimun cierton trendamønrrun: Kerrigu øyeeg marikkurri Tiusbe møy ya misagwan ulø payrrun cha.

Jesús Jerusalénwan isua kishib

(Lc 13.34-35)

³⁷ ÿJerusalén! ÿJerusalén! ÿTius maig karuigwan eshkabelan kweechibig, katø ñimuyasig Tius karua øriilan sruutøga petabig! ÿNabe yamba, kan piejetø kømø, kan atøwall nui pullichu-uregwan kwaldzarig umbu kanbalatø mara, maatanab lataitøwei ñui uregwan tulundzunønrrab inchen, ñibe nane kaasig køn! cha. ³⁸ Au, ñim waraig yamerabe elatsig muguchagaig körrømisrtrun cha. ³⁹ Kaguende nabe trendamønrrun chibig køn: Nane katøbe mas ashchaamøn cha, øya tamnegatig: “ÿSeñorwei munchiyu nø ørig arrubiibe mayanguen tab kuig køn!” cha.—

24

Jesús Tiuswei yawan pinisaig kønrrun chib

(Mc 13.1-2; Lc 21.5-6)

¹ Jesús Tiuswei yaugurri webya iben, nui kusrenanøb pera uniløbe nun kemallibelø køn, tru Tiuswei yau yameran eshkanrrab. ² Inchene Jesúsbe nømune trenchibig køn:

—¿Iilan kerrigu ashke? cha. Pøs nabe ñimun cierton trendamønrrun cha: Yube ni kan srukken katøgan srug palabe körrømisrtrun cha. Kerriguba pøtiitsig kønrrun— cha.

Chigurrimbunø købig misaabañau patsam lutau chigøben køb

(Mc 13.23-23; Lc 21.7-24; 17.22-24)

³ Incha Jesús Olivos Tunsrø wabene, nui kusrenanøb pera uniløbe nundø nøørø trencha payrrab kemallabe trenchibelø køn:

—Øyeebe mana purainrrab kui namun eshkarra cha. Katø ñi katøle arrumigwanba, yandø srabe kwaløm punrrabigwanba asamibe ¿chitø kenamisrtrerah?— cha.

⁴ Inchene Jesúsbe trencha løtabig køn:

—Ashiptø kuy cha, mugøben ñimun peløsrkønrain kømø. ⁵ Kaguende møiløgøben nai munchiyu truba nu amrrua trenchinrrun cha: “Nabe Cristo kur” chib. Trumay misaameran isa wamincha, truba nu peløsrkønrrun cha. ⁶ Incha ‘misaamera katøgan peesrø misaameraba purø trømbøig kørig kømndiig kwayab kweetsiyab køn’ chib, katø ‘purø trømbøig kørig kømndiig kwayanrrab køn’ chib ñim wamindi mørabe, mandøguen kømui inçhib kwarmøtay cha. Kaguende øyeebe trendø treeg purainrrabigwein køn cha. Inçhendø katøgucha patsamibe pumø srø kønrrun chibig køn. ⁷ Peg misaamerabe katøgan peg misaameraba kwayaben, katø rey karumburab ashib karuim piraeløbe katøgan reywei misaameraba kwayanrrun cha. Trune parø arruben, chusrøn køben pirø trømbøig kønønrnun cha. ⁸ Inçhendø kerrigu øyeege pureb arrubiibe kan ishuwan unø tammisrtrab pusrkwab pølbasi lataitø kønrrun cha.

⁹ Inçhen ñimune maig købash inçhib kaig marøb srua kønrrai tranen, ñimune kwetchun. Katø chu piraelø køben maya misaamerabe nagurrindø ñimun tsalø asiilø kønrrun cha. ¹⁰ Inçhen tru kwalømmerawane møiløgøben truba nu nan tarømsra, kangurrin kangurri tsalø inçhibelai tasku pønstrøb, kangurrin kangurri ashig kømui indiyab inçhun chibig køn. ¹¹ “Tius maig karuigwan eshkabelø ker” chib isatø eshkabelø truba truba kurra, isatø misagwan truba nu peløsrkønrrun cha. ¹² Kaibe purø trømbøig larrøbichib arruptø, misaamerabe kerrigu lutau kangurrin kangurri katøganelan isua undaaramigwane yandø isumønrrun cha. ¹³ Inçhen srabe kwalømgatig chigüingucha megabig megabiibe kebeñchabig kømig kaigyugurri wesraig kønrrun cha. ¹⁴ Tius nø ashib karub waigwei tabig srø wambe yu pirau pirø muba kuimburab chi misaamerandøgucha eshkar kusrenanig kønrrun, chigüi nebua ashchai misaamera. Inçhen yandø srabe kwaløm punrrun chibig køn

¹⁵ Inçhawei Tius maig karuigwan eshkabig Daniel wamindig tru pinishinrrabig trømbøig køsongønrraptiig Tiusweyasiitø marinug marøb pasramisrin kui ashabe, (lebiibe iigwan tab chigüi mør), ¹⁶ yandø treeg pubene, Judea pirau warabeløbe tunmerasrømay wegørra lulay. ¹⁷ Katø nui ya pala wambig wabiibe køræarrau chigucha wesranrrab kebimumig køn. ¹⁸ Katø chugøben trausrø uñibiibe nui itøtsinigwan tranrrab arrumumig køn. ¹⁹ jshumbur waachamera, tru kwalømmerawan patsø kwanreelø, kabe muchib ureg tøgarmeraimbe maig kørnrer! chibig køn. ²⁰ Ñimbe Tiuswan miay cha, pishin kwalømmerawan wegørra lulumig nebumøwei, katø isrin kwaløm nebumøwei inçhain cha. ²¹ Kaguende tru kwalømmerawane purø trømbøig nebuinab melamig attrun. Pirøwan pølbasa marøb uraskurri møingatig øyeebe kaagüig, katøbe managuen øyeebe kaanrrun chibig køn. ²² Tius tru kwalømmerawan landøranmuisruandøbe, mugucha øsig waramgaig kønrrun cha. Inçhendø tru nuyasiitø tarømariiløgurri landøranrrun cha.

Ka isatø ‘Cristo ker’ chibeløba, ‘Tius maig karuigwan eshkabelø ker’ chibeløba

²³ Incha møikkøben ñimun: “Au, Cristo yu pasran” chib, kabe: “Au, Cristo yu pasran”, taingucha, køremøtay. ²⁴ Kaguende møiløgøben ‘Cristo ker’ chib isatø inçhibeløba, katø, ‘Tius maig karuigwan eshkabelø ker’ chib isatø inçhibeløba amrrunrrun cha. Incha nømui maramburab mariilø truba nørreelø asha kømig kenamariiløba, kwwara asha kønrrai nørreelø mariiløba martrun cha, misagwan treeg incha peløsrkønrrab. Incha Tius nuyasiitø tarømariilanguen kegørrøsrkamdiig kuimbe, kegørrøskønrrab inçhun. ²⁵ Au, nabe ñimune øyeelø puraimøwatø chab eshkar. ²⁶ Inçhawei ñimun møikkøben: “Au, øsrø mu misag warab waraimønug pasran” chibene, ashchab webammøtay cha. Kabe: “Yu yaambusrø wan”, taingucha, køremøtay cha. ²⁷ Kaguende kan palaig pilabig wagurri walli umbusrø kebilab lataitøwei, tru Møg Misra Arrubig arruppe, treeg attrun chibig køn. ²⁸ Kwaig chu tsubene, truyube kallinasumera tulundzunønrrun cha.

Møg Misra Arrubig mandø arrumigwan waminchib

(Mc 13.24-37; Lc 17.26-30, 34-36; 21.25-33)

²⁹ Inçhen tru treeg isumdø kwalømmera chab puraiben latatø, nøsiibe yandø kwaben,

pøibe yandø pilømuben,

estrellamerabe srømbalasøngurri kørøben,

katø srømbalasø purø nørreelø pønrrabelane kønøgøb sruagutsiilø kønrrun chibig køn.

³⁰ Inçhen Møg Misra Arrubig tru arrumigwan eshkabig srømbalasø kenamisren, chu pirausrøn køben misag nørreø pønrrabelø truba truba isub kishchun cha. Inçhen Møg Misra Arrubiibe maramburab maramig tøgäig srømbalasøngurri purø nuig tørguegwalmabig wañiyu arruben ashchab køn, chibig køn. ³¹ Inçhen tropetnan truba mur urrøben, nøbe nui ånglesmeran amrrai ørtrun chibig køn, ambugurri, igurri, walligurri, wagurri, srømbalasø kandarømayrøngurri katøgandarømayrøngatig nui lawa wesruilan kanbalatø tulishinrrai.

³² Kan higuera tusrwanma asha kusrey. Nui sramera uturcheelø misrøb, ishimera weguchene, ñimbe pachig kwalømmera arrumig yandø lutau kui ashibelø køn cha.

³³ Øyeetøwei ñim kerrigu iilan ashabe, attrabiibe attrab yaskabuguen pasraitamab isua kuy, chibig køn. ³⁴ Pøs nabe ñimun cierton trendamønrrun: Møin kwaløm misaamera pinømwatø, øyeeløbe kerrigu purainrrun cha. ³⁵ Srømbalaba, pirøbabe patsøben, na wamindiibe ka wamindiitøbe purainrraamøn cha.

³⁶ Inchen tru treeg punrrab kwalømwanba, uranbabe mugucha ashmøn cha. Srømbalasrø ångelesmeraguen ashmøwei, ni Tiuswei Nusrkai ashmøwei indan cha. Trunun ashippe, Møskaindøwei asan chibig køn. ³⁷ Noé tsub kwalømmerawan maig purayaibe tru Møg Misra Arrubig katø arrum kwalømgucha treetøwei purainrrun cha. ³⁸ Kaguende tru kwalømmerawan sre puben pi pulabig attrab srø købenbatø, tru urasma misaamerabe mab, muchib, kasharab, kasharanøb waraig købig køn cha, Noé nui truba nu barcoyu kebyam kwalømgatikke. ³⁹ Incha treeg pumnegatig øyeeg kønrraitamab isumø warøbenba tru pi pulab arrubiibe maya misagwan patsø srua yaig købig køn cha. Øyeetøwei purainrrun chibig køn, tru Møg Misra Arrubikkucha katøle arruben. ⁴⁰ Incha tru uras pailø møguelø trau warøben, kanune srua iben, kanune kørrømarig kønrrun cha. ⁴¹ Pailø ishumburmera kitsøsrugu kichib køben, kanune srua iben, kanune kørrømarig kønrrun chibig køn.

⁴² Ñimbe pesannamø, isua, ashiptø kuy. Kaguende ñimui Señor chi kwaløm attrab kui ashmøwa køn. ⁴³ Trube, treeg købene, iigwan isua kuy, kan ya puaima niliig yem chu uras attrab kui mörimbe, ashib megawa, yau nilønrrab kebibashmubsruinrrun cha. ⁴⁴ Inchawei ñimgucha tamara melay chibig køn. Kaguende tru Møg Misra Arrubiibe chi isumø købenba arruptinchun cha.

Mendig megabig maig taigwan marøbigwanba, maig taigwan marmügwanba kemesra wamindig

(Lc 12.41-48)

⁴⁵ Kan karuindiig megabig maig taigwan møra marøb, katø chi maramelan nøtø tsabø asha marøbigwan, ya puaiig nui yau warabelan mannam ura puin kuindø nømui mamigwan srøttrab muniitø wabig kønrrai ashai wanninabiibe çmøig kerah? cha. ⁴⁶ Truibe mayanguen tab kuig køn nun karua pasrigwan marøb megabenh ya puaiig puptindinabigweimbe. ⁴⁷ Pøs nabe ñimun cierton trendamønrrun: Ya puaiibe nui chi tøgagügwan kerrigu nø asha marøb pasrønrrai tranrrun cha. ⁴⁸ Inchen karuindiig megabig larrø kaibe nuinetø treeg isubig køn: “Nai ashib karubiibe peguen attraamøn” cha. ⁴⁹ Katøgan karuindiig melabelan kurrabetab menda, katø mutsigueløba mab, muchib, tsubenba, ⁵⁰ nui ya puaiibe ni attraitamab isuinguen kømø kwaløm, ni ø uras punrraitamab isumø tsubenba, puptincha, ⁵¹ purø trømbøig ichagucha, palatø tabelø pønrrainug kertrun cha. Truyube kishib, trugulwan tsatsamig kønrrun chibig køn Jesúsbe.

25

Diez srusralmera novian lynchab webambubelø lataitøwein køn cha, kemesra wamindig

¹ Srømbalasrø Tius nø ashib karub waibe øyeeg lataig kønrrun: Diez srusralmera mu møøba kimeelø aceite lámparameran piløga muta, tru keg misrtrabigwan lynchab katønrrab webambubelø lataikke. ² Truilø tru trattrøgatøbe ni chiguen tre isumeelø køben, katøgan trattrøgatøbe tamara isuatø muniitø melabeløgue. ³ Tru trattrøgatø chi tre isumeeløbe lámparamerane srua ambendø, aceitebe srua ammuin købig køn, tru patsøben katø usramig. ⁴ Trune tru isuptø melabeløbe lámparamerayu usriilø kømmnetø, katø usramig nøøø køtsø-ureezhigu srua ambubelø køn. ⁵ Inchen tru keg misrtrabig peguen arrumbene, nømune soteelanba yandø ki kanaben, soteeløba kiptindin købig køn.

⁶ Inchen yem tøbøtasrømbe trenchib trasay møran: “¡Keg misrtrabiibe yu arrun cha. Katønrrab amrrab werruy!” chib. ⁷ Inchen soteeløba tru srusralmerabe kurra, nømui lámparameran tamarøb mendabelø køn. ⁸ Inchen tru trattrøgatø tre isumeeløbe, tru trattrøgatø isuatø melabelane trenchibelø køn cha: “Ñimui aceiten kuchi namun ketøbsrumugu cha, namui lámparamerabe ke chab kwab amrrun” cha. ⁹ Inchen tru srusralmera tamara isuatø melabeløbe trencha løtabelø køn: “Kaimaysruandøbe cha. Kaguende ñimui lata namui lata nebunrraamøn cha. Trembe yanøbelaisrø penønrrab ambay chibelø køn, ñimuyasiitøwei.” ¹⁰ Inchen tru trattrøgatø srusralmera aceiten penønrrab ambamnetø tru keg misrtrabiibe puptinchen, tru trattrøgatø isuatø melabeløbe keg misrtrabiiba kasharab fiestayumay kebamben, yandø yaskabwan kasrøbig køn.

¹¹ Inchen yana wendau tru kan srusralmeragucha trenchib pubelø køn: “¡Señor, Señor, namun yaskabwan kurtra!” chib. ¹² Inchen nøbe trencha løtabig køn: “Pøs nabe isa kømø, ñimune mumera kui ashmüg kur” cha.

¹³ Inchawei ñimbe pesannamø, ashiptø melay chibig køn Jesúsbe. Kaguende tru Møg Misra Arrubig arrumigwane ñimbe chi kwaløm attrab kui mørmøwei, ni chu uras attrab kui mørmøwei indan cha.

*Anwan uta øyeeg marøbig lataig køn cha, kemesra waminding
(Lc 19.11-27)*

¹⁴ 'Tius nø ashib karub waibe øyeeg lataig køn cha: Kan møg yabsrømay inrrab, nui karuindiig melabelan wama, nui chi tøgagúilan asha marøb kønrrai trana ib lataikke. ¹⁵ Kan møigwan køsrønbe an trattrø mil tranøppe, møigwan køsrønbe pa mil, møigwan køsrømbe milgæ, møigwandøgucha nøm maig martrapteelø køben treg trana, yandø inrrab yan cha. ¹⁶ Tru karuindiig megabig an trattrø mil utabiibe trutøga penab, yanøb incha, katøgan trattrø mil nemaran cha. ¹⁷ Inchen katø tru pa milwan utabikkucha katøgan pa mil nemaran cha. ¹⁸ Inchen tru milwan utabiibe pirau kan trab lalla, tru an tranøbigwei anwane truyu søraptin cha.

¹⁹ 'Indiibe yandø truba yana misrøb iben, tru karuindiig melabelan treg marøb melønrrai karua pasrøbiibe katø arrua, nøm chitø maritashchab wamisra ashib mendan cha. ²⁰ Inchen tru an trattrø mil utabig puabe, trendan cha: "Nai ashib karubig, ñibe nan trattrø mil tranig kømøh cha. Møimbe tru kømnetø nabe katøgan trattrø mil nemara, yu srua arrur" tan cha. ²¹ Inchen truiibe trendan cha: "Øyambesin cha, ñi nai karuindiig megabig tabig, chi isumgaig maig maramigwan marøbig. Ñi lamøtiigwanma chi isumgaig øya sөл mariibe, mas nuwan martrai pasrtrumøn tan chibig køn. Incha kebarrua, naba truba kasraarau" tan cha.

²² 'Inchen tru karuindiig megabig pa mil utabiibe trendan cha: "Nai ashib karubig, ñi nan pa mil tranig kømøh cha. Møimbe katøgan pa mil nemara, yu tøgagur" tan cha. ²³ Inchen tru an tranøbiibe trendan cha: "Øyambesin cha, ñi nai karuindiig megabig tabig, chi isumgaig maig maramigwan marøbig. Ñi lamøtiigwanma chi isumgaig øya sөл mariibe, mas nuwan martrai pasramønrrun cha, trendan cha. Kebarrua, incha naba truba kasraarau" tan chibig køn.

²⁴ 'Inchen tru mendig megabig tru milwan utabiibe trendan cha: "Nai ashib karubig, ñibe ñiashib ellgwaig kømubendø, ellmarigwan tulishib, ñiashib tsurig kømubendø, parøb, katø ñibe chiwandøgucha chi chippe, ke kandø chibig kui nabe ashibig kuabe, treekkurri nane kørig køben, ²⁵ ñui anwan srua ya, pirau sorig køn cha. Inchendø ñui anwan utørra" tan chibig køn. ²⁶ Inchene nui ashib karubiibe trendan cha: "Karuindiig megabig larrø kaig, trurrigu pøig køn cha. Pøs naashib ellgwainug kømubendø, ellmarigwan tulishib, naashib tsurinug kømubendø, parøb inchibig kui ashabe, ²⁷ trube, maindi nai anwan bancoyu an utabelan pastrai tranamdiigwan tan chibig køn, na katøle arrua, nai anwan nemisrigwanbañau utamig kønrrain cha. ²⁸ Inchawei, nai anwan kerrawa, tru an diez mil tøgagigwan tranay tan. ²⁹ Kaguende tøgagigwane masken tranen, uñchaguen tøgagønrrun cha. Inchen chigaigwane nui lamøtiig tøgagügigwanguen kerranrrun cha. ³⁰ Incha i karuindiig megabig chigucha chi marmigwane wambig purø trømbø løstøyu wegutsay tan chibig køn. Truyube kishib, trugulwan tsatsamig kønrrun" cha.

Chu pirausrø misaamerandøgucha Tius maig kønrrabigwan asha marøb

³¹ 'Møg Misra Arrubig nui törguegwalmabigu tru maya ángelesmeraba arrua, wamisra nui ashib karub waig törguegwalmabigu wamisrrun. ³² Inchen yu pirau chi misaameratøgucha nui merrab tulundzunøben, nøbe nøørø, nøørø tarømartrun cha, kan ubisha ashibig ubishameranba, kabrameranba nøørø, nøørø tarømarøb lataitøweingue. ³³ Incha ubishamerane kusrmay pønsrøppe, kabramerane atsimay pønsrønrrun.

³⁴ 'Incha Reybe tru kusrmay pønrrabelane trenchinrrun: "Nai Møskai ñimun mayanguen tab indiløbe naimay amrruy cha. Incha Tius pirøwan marøb uraskurri ñimuyasig tamarig pasrabig tru ashib karub wainuguigwan ñimuyasig utay chinrrun cha. ³⁵ Kaguende na parøgwai uñen, ñimbe na manrrai nan srørrig køn cha. Na pi mulgwai inchen, ñimbe pi mutchai srørrig køn cha. Na arruatig chugucha pumikkaig uñen, ñimbe tab wamab, ya pebøb indig køn cha. ³⁶ Asru chi kemig chigaig uñen, ñimbe nan tranig køn cha. Na kwanrrø tsuben, nan ñimbe ashchab amrruig køn cha. Kailan keeri yau na pasrøben, nan ñimbe neshchab amrruig køn" chinrrun cha.

³⁷ 'Inchen tru sølgandø tabig marøbeløbe trenchib løtab pønrrønrrun cha: "Señor, ¿ñi parøgwai uñen, nambe mana mamig srørrøb, katø ñi pi mulgwai indi ashabe, nambe pi mutchai mana srørrig køh? cha. ³⁸ ¿Arruatig chugucha pumikkaig uñen, nambe ñune tab wamab mana ya pebig køh? cha. ¿Asru kemig palai uñene, nambe mana tranig køh? cha. ³⁹ Kabe ¿kwanrrø tsuben kui, kailan keeri yau keerig pasrøben kui, nambe mana neshchab amrrubrah?" chinrrun cha. ⁴⁰ Inchen Reybe trencha løtønrrun cha: "Pøs nabe ñimun cierton trendamønrrun cha: I nai nunelan chigucha kømøzheelø latalan mariibe, nan marig køn" cha.

⁴¹ 'Incha katø atsimay pønrrabelangucha Reybe trenchinrrun cha: "Ñimbe nainukkurri tarømisray cha; kaigyu pønrrønrrai pønrrailøbe, nugwaimandzigweimba, nui ángelesweimba

tru managuen kwamø nag tamarig pasrabigumay ambay cha. ⁴² Na parøgwai uñen, ñimbe mamig srørrmuig køn cha. Pi mulgwai inchen, pi mutchai srørrmøwei indig køn cha. ⁴³ Na arruatiig chugucha punikkaig uñen, tab wamab nan ya pebmuig køn cha. Asru chi kemikkaig uñen, ñimbe nan tranmuig køn cha. Na kwanrrø tsub, katø kailan keeri yau na pasrab inchen, ashchab amrrumuig køn” chinrrun cha.

⁴⁴ Inchen nømbe trenchib pørrørrrun cha: “Señor, ñime parøgwai uni ashib, pi mulgwai uni ashib, kabe chugucha pumikkaig uni ashib, asru chi kemikkaig uni ashib, kabe kwanrrø tsui ashib, kailan keeri yau pasrai ashib inchen, ñamgan ñun purugumuig kuitarru?” chinrrun cha. ⁴⁵ Inchen Reybe trencha lötørrrun chibig køn: “Pøs, nabe ñimun cierton trendamørrrun cha: I nai nunelan chigucha kømøzheelø latailan ñim chigucha marmuibe, nan treeg marmuig køn cha. ⁴⁶ Iiløbe managatig purø trømbøig mōra melamnumay tarømisra amrrun cha. Inchen tru sølgandø tabeløbe managatig øsig purramsrømay amrrun” chinrrun— cha, trenchibig køn Jesúsbe.

26

Jesúsuan kemøra kwetchab waminchib

(Mc 14.1-2; Lc 22.1-2; Jn 11.45-53)

¹ Jesús iilan kerrigu chab waminchabe nui kusrenanøb pera uniilan trenchibig køn:

²—Ñimnguen ashen pa kwalømyube Pascua Fiestan martrab køn cha. Inchen tru Møg Misra Arrubiibe kurusu mesraig kønrrai tranig kønrrun— cha.

³ Inchen tru urastøwei sacerdotemeran karubeløba, misagwan karubelø kølli misaameraba Caifás, tru maya sacerdotemeran nø karub sacerdoti palacioy tulundzunabelø køn.

⁴ Incha Jesúsuan chinchagøben tammaytø chi isa køben kemøra, kwetchab waminchendø, ⁵ trenchibelø køn:

—Fiesta utu marmønrrab cha, misaamera ke chindi asamgaig inchimønrrain— cha.

Betanasrø kan ishug may irrabigwan Jesúsuan itølushib

(Mc 14.3-9; Jn 12.1-8)

⁶ Betanasrø tru Simón leproso taigwei yau Jesús wabene, ⁷ kan ishug alabastro limetayu truba may irrabig netsiig truba nuweyigwan srua, kemalla, Jesús mishatsigu wamnetø, tru may irrabigwan tur pala itølushibig køn. ⁸ Inchen nui kusrenanøb pera uniiløbe ashabe, ishuwan trenchib namabelø køn:

—¿Ke ka yandøbe iigwane chinchabrre lushibig køh? cha. ⁹ Waachameran purugumig purø nuwei yanøbsruinrrun— cha.

¹⁰ Inchen Jesús wetøbeñabe, trenchibig køn:

—¿Ishuwane chi chibrran purrøgue? cha. Pøs iig nan mariibe truba tabig maran chibig køn. ¹¹ Kaguene waachamerane chu uragucha ñimui utu tøgagønrrun cha. Trune nane treeg kønrraamøn cha. ¹² Ishug tru may irrabigwan nan asru itølusibe nan søramigweyasig tamaran cha. ¹³ Pøs nabe ñimun cierton trendamørrrun: Yu pirau chutøgucha Tiuswei tabig srø wam kaigyugurri wesrabigwan eshka kusrenaniisrømbe tru nø marigwangucha tōga waminchun cha, nun pesannamø, isuig kønrrain— chibig køn.

Judas Jesúsuan ashig kømui inchibelan tranøb

(Mc 14.10-11; Lc 22.3-6)

¹⁴ Judas, tru Iscariote taig, Jesús doce kusrenanøb pera uniilan utuig, sacerdotemeran karubelan ashchab yabe, ¹⁵ trenchibig køn:

—¿Jesúsuan ñimui tasku tranene, nane chi tranrrunrrague?— cha.

Inchen nømbe an treinta tranøbelø køn. ¹⁶ Inchen tru uraskurri Judasbe Jesúsuan mandø incha tranamigwan yandø lab mendabig køn.

Señorwei Pascua mamig

(Mc 14.12-25; Lc 22.7-23; Jn 13.21-30; 1 Co 11.23-26)

¹⁷ Tru Pirri Levaduragaig Maig Fiesta pølbaserøb kwaløm Jesúswei kusrenanøb pera uniilø nun kemallabe, trencha payibelø køn:

—¿Pascua mamigwan ñimbe nabe chu tamaramø?— cha.

¹⁸ Inchene nøbe trenchibig køn:

—Ciudayu kan møweimay ambabe trenchinrrigay cha: “Kusrennøbiibe trendan cha: ‘Nai urabe yandø puin køn’ cha. ‘Pascua maramigwan nai kusrenanøb pera uniiløba ñui yau martrab’ tan”— cha.

¹⁹ Inchen nui kusrenanøb pera uniiløbe Jesús maig karuigwan mara, tru Pascuan tamarøbelø køn.

²⁰ Inchen yandø yem køben, nui kusrenanøb pera uniiløba mishatsigu wawa, ²¹ mab wappe, trenchibig køn:

—Pøs nabe ñimun trendamønrrun cha: Ñim mōikkōsrøn nan ashig kōmui inchibelaingatō misra, nan tranrrrab kōn— cha.

²² Inchen nōmbe truba truba isui incha, kan kan nun payib mendabelō kōn:

—¿Señor, kabe na kōbra chinderah?— chib.

²³ Inchen Jesúsbe trencha lōtabig kōn:

—Kan mōikkōsrøn pirriwan i nindagutōwei naba kebishibig, truig nan ashig kōmui inchibelaingatō misra, tranrrrautan cha. ²⁴ Tru Mōg Misra Arrubiibe Tiuswei wamwan pōrigu maig pōrig pasrōben, truwan pureb iben, trune įtru mōg waacha! tru Mōg Misra Arrubigwan ashig kōmui inchibelan tranrrrabigweimburappe, yeekkucha kuita chibig kōn, trembe trube kal-lamuig kuinguen sōl kōbsruinrrun— cha.

²⁵ Inchen tru Judas, tru ashig kōmui inchibelaingatō misra tranrrrabiibe:

—¿Kusrennōbig, kabe na kōbra chinderah?— cha payene, Jesúsbe:

—Ñibe sōlwein tan— chibig kōn.

Señor nui doce pera uniilōba mab

²⁶ Incha mab purrappatō, Jesúsbe pirriwan muta, Tiuswan ‘mayanguen pay’ cha, pirisha, nui kusrenanōb pera uniilan trenchib srōrrōbig kōn:

—Cha, may cha. Iibe nai asr kōn— cha.

²⁷ Incha katō copan muta, Tiuswan ‘mayanguen pay’ cha, nōmun trenchib purōrōbig kōn:

—Sōteelōba i copayuigwan mutsay cha. ²⁸ Kaguende iig, nai animbe, Tius tru mis-agweyasig srō acuerdon mari anin kōn cha. Tru animbe truba nu misagweyasig kaig mariilan ulō paymō pesannaig kōnrrai lusig kōn cha. ²⁹ Incha nabe ñimun trendamønrrun chibig kōn: Uvas piwane mas muchimumønrrun cha, nai Mōskai nō ashib karub waisrō katōyug ñimba mutsam kwalōmgatig.—

Jesús Pedron, nan ‘ashmīg kur’ chinrrautan cha, kanmaytō eshkab

(Mc 14.26-31; Lc 22.31-34; Jn 13.36-38)

³⁰ Incha yandō kan himnon chab cantawabe, Olivos Tunsrōmay amba, ³¹ Jesúsbe trenchibig kōn:

—Ñimbe mayeelōba nagurrindō mōi yembe nainug isua pōnraigwan trubishinrrun cha. Kaguende Tiuswei wamwan pōrigu oyeeg chibig pōrig pasran cha:

Ubisha ashibigwan na kweechen,

ubishamerabe nōrōtō chab lulrrun, chibig.

³² Inchendō nabe katōyug oširappe, ñimguen ammōwatō, nabe Galileasrōmay yamønrrun— chibig kōn.

³³ Inchen Pedrobe trenchibig kōn:

—Mayeelōba ñuinug isua pōnraigwan trubisaingucha, na kuimbe managuen tarōmismumønrrun— cha.

³⁴ Inchen Jesúsbe nune trenchibig kōn:

—Pøs nabe cierton ñun trendamønrrun cha: Mōi yemdōweinguen kallu wamōmōwatō, ñibe pōnmayguen nan ‘ashmīg kur’ chinrrautan— cha.

³⁵ Inchen Pedrobe trenchibig kōn:

—Ñiba nan kwamig nebuinguen, nabe managuen ñun ‘ashmīg kur’ chimumønrrun— cha.

Inchen mayeelōba nui kusrenanōb pera uniilōgucha treetōwein chibelō kōn.

Jesús Getsemanísrō Tiusba waminchib

(Mc 14.32-42; Lc 22.39-46)

³⁶ Incha Jesúsbe nui kusrenanōb pera uniilōba, kanbalō Getsemaní taisrōmay ambabe, trenchibig kōn:

—Yu purramisray cha, na ošrō nai Mōskaimba waminchab yamne.—

³⁷ Incha Pedronba, Zebedeoewei nusrkalan pailanba pera yabe, truba isui, ni mu-mayguen tab kōmui inchib menda, ³⁸ trenchibig kōn:

—Nai manrraube isubiitō kwabguen ka kwamdiig kōtan cha. Ñimbe yutō kōrrōmisra, naba ñimgucha kimō, purray— chibig kōn.

³⁹ Incha Jesúsbe katōguchi ambuurō ya, nui malōwan piraugatig kebachib sralōptinchabe, trenchib Tius Mōskaimba waminchibig kōn:

—Nai Mōskai, i copan nan tarōmartha cha. Inchendō na maig isuig kōben, treeg kōnrrain kōmōtō, ñun maig maramdiig kōben, treeg kōnrrain— cha.

⁴⁰ Incha katō nui kusrenanōb pera uniilaimay arrua, kib purrai wetōrrawabe, Pedrone trenchibig kōn:

—¿Kan uratøguen kimø, naba kasrig purrønrrab kaimatirru? cha. ⁴¹ Kimø, Tiusba waminchib purray chibig køn, chiyugøben kaigu kegørrømonrrappe. Ñimbe tabigwan martrabwei isuingucha, ñimui asrbe kullaguig køn— cha.

⁴² Incha katøle Jesús Tius Møskaimba waminchab ya, trenchibig køn:

—Nai Møskai, i copan na muchimønrrai tarømaramgaig købene, trube, ñun maig maramdiig køben treeg martra— cha.

⁴³ Incha katø arruabe, katøguen nui kusrenanøb pera uniilane kiptøweim purrain kui wetørrrabig køn, kaguende nømui kabmerabe kigøbiitø ke kanain purrøwa. ⁴⁴ Incha nømun purramnetø katø pønmay kønrrabyu Tius Møskaimba waminchab ya, srøsrø mandø wamingdig treetøwein chib waminchibig køn. ⁴⁵ Incha nui kusrenanøb pera uniilaimay arruabe, trenchibig køn:

—¿Katøgucha ñimngan israb, kib srø warøtirru? cha. Yandø ura pun cha, tru Møg Misra Arrubigwan kaig marøbelai tasku tranamig. ⁴⁶ ¡Kurray, chibig køn, amrrab! cha. Nan ashig kømui inchibelaingatø pasramisrøbig nan tranrrab arrubguen indan cha. ¡Asay!— chibig køn.

Jesúsuan kemøra srua ambub

(Mc 14.43-50; Lc 22.47-53; Jn 18.2-11)

⁴⁷ Jesús waminchib pasramne, Judas, tru doce kusrenanøb pera uniilai utuibe truba truba nu misaaba arrubig køn, nømbe espadamera køben, tsiimera køben sruargue. Truiløbe sacerdotesperan karubeløba, misagwan karubelø kølli misaameraba misra, karua øriilø købig køn. ⁴⁸ Tru Judas Jesúsuan ashig kømui inchibelaingatø pasramisrøbiibe nømunne: “Merrarramig kuitamab ñim ashchai, na chi siñal køsrøn maren, ashib pønrrønrrigay cha, eshkain købig køn. Tru na muchaig, truig kønrrun cha. Kemørrigay” cha. ⁴⁹ Incha Judasbe møi møi Jesúsweim pulu kemallib trenchibig køn:

—¡Kusrennøbig, yandø yem køn!— cha.

Incha muchabene, ⁵⁰ Jesúsbe trenchibig køn:

—Nai trendø lincha uñibig, chi martrab arruabe, mar— cha.

Inchen kaneløbe kemalla, Jesúsuan kemøra, sruamrrab merrarrabelø køn.

⁵¹ Inchen møikkørøn Jesúsba pasrabiibe espadan wesrub, maya sacerdotesperan nø karub sacerdotei karuindig megabigwan kaluwan kelarrab lutiichtinchibig køn.

⁵² Inchen Jesúsbe trenchibig køn:

—Ñui espadane wayinug way cha. Kaguende mutøgucha espadatøga kwayabiibe, espadatøgatøwei kweetsig kønrrun cha. ⁵³ Ñi isubgan nai Møskawan miamønrraitamatirru cha. Na miabene, nøbe møindøweinguen ángelesmera muguen nebua mundzamgaig ørøbsruinrrun cha. ⁵⁴ Pøs treeg købene, Tiuswei wamwan pørigu øyee purainrrun taibe, trube, ¿chinha purainrrab kø?— cha.

⁵⁵ Incha tru urastø Jesúsbe misaameran payibig køn:

—¿Chindimbarre ñimbe espadamera køben, tsiimera køben sruar werrugue cha, nan kemørrab, nabe kan niliig kui lata? Nabe kwalømmørig Tiuswei yau kusrennøb waben, ñimbe managuen nane kemørmuig køn chibig køn. ⁵⁶ Inchendø iig kerrigu øyee nebuppe, Tius maig karuigwan eshkabelø Tiuswei wamwan pørigu maig taig treeg nebunrrain kuig køn— cha.

Inchen nui kusrenanøb pera uniiløbe nundø elachippa, mayeeløba chab luløptinchibelø køn.

Jesús tru Setenteelø maig maramigwan asha marøbelai merrab

(Mc 14.53-65; Lc 22.54-55, 63-71; Jn 18.12-14, 19-24)

⁵⁷ Incha Jesúsuan merrarrabeløbe tru maya sacerdotesperan nø karub sacerdotei Caifáswei yamay nune srua ambubelø køn, tru Moisés pørigwan kusrenanøbeløba, misagwan karubelø kølli misaameraba tulundzuna pasrainuumay. ⁵⁸ Inchen Pedrobe Jesúswei wendau yaptø, yaptø tru maya sacerdotesperan nø karub sacerdotei ya wambiisrøngatig ya, umbu kebyabe, tru ashchay pønrsraig pønrrabeløba wabig køn maig kørømisrtashchab ashchab.

⁵⁹ Inchen sacerdotesperan karubeløba, tru Setenteelø maig maramigwan asha marøbelø mayeeløbabe Jesúsuan kwanrrai pasrtrab møilan køben ‘Jesúsbe kaig maren, nambe ashibwei indig køn’ chib isa waminchabelø labendø, ⁶⁰ wetørranrrab kaimabelø køn, møiløgøben ‘øyee køn’ chib, ‘øyee marøbig køn’ chib isa waminchibelø, truba werruppe werrubendø. Yandø truinchib køptø, pailø werrua, ⁶¹ trenchibelø køn:

—I møøbe øyay taig køn cha: “Nabe Tiuswei yawan pøtiicha, pøn kwalømyutø katø mara pasramønrrun”— cha.

⁶²Inchen tru maya sacerdotemeran nõ karub sacerdote Caifásbe kurra, Jesúswan payibig køn:

—¿Chigucha lõtømønrrapteh? cha. ¿Ñine øyeebe chi kalø maran charre inchib køh?— cha.

⁶³Inchen trendaingucha, Jesúsbe chigucha lõtømuben, tru maya sacerdotemeran nõ karub sacerdotebe trenchibig køn:

—Øsig wab Tiuswei munchiyu nabe ñun, ñi Cristo Tiuswei Nusrkain kuabe, ‘truig kur’ cha, namun eshkau tamønrrun— cha.

⁶⁴Inchene Jesúsbe trencha lõtabig køn:

—Ñitøweinguen chab trendan cha. Katø nabe ñimune trendamønrrun cha: Møg Misra Arubiibe tru maramburab marøb Tiuswei kusrmay waben ñim ashib, katø srømbalærøngurri wañiyu arruben ashib inchun— cha.

⁶⁵Inchen tru maya sacerdotemeran nõ karub sacerdotebe nui kewagúigwandøwei kølsrøb, trenchibig køn:

—I mõebe Tiuswane purø trømbøig waman cha. ¿Namun nuimburab waminchabelø mas chiwein kui palønrrab kø? cha. Ñimdøweinguen Tiuswan tru purø trømbøig wamab wamindigwan møran chibig køn. ⁶⁶Incha ¿ñimune maig asønata?— chiben, nõmbe trencha lõtabelø køn:

—Kaigwein køn cha. Kwabash— cha.

⁶⁷Inchen nõmbe malau illimbi itøtutamba, kurramba inchen, katøganeløbe pashaguchib ⁶⁸trenchibelø køn:

—¡Cristo, mu kurragutsin kui, namun kelarrab eshkau pøs!— chib.

Pedro Jesúswan ‘ashmíig kur’ cha isab

(Mc 14.66-72; Lc 22.56-62; Jn 18.15-18, 25-27)

⁶⁹Inchen Pedrobe ya wambig wabene, kan mendig megabig srusrø kemallabe, trenchibig køn:

—Ñigucha galileasriig Jesúsba uñibig kuig kømøh— cha.

⁷⁰Inchen Pedrobe mayelai merrab ‘ashmíig kur’ chib trenchibig køn:

—Ñibe ni chi waminchib pasrainguen mørmur— cha.

⁷¹Incha yaskabyu Pedro webibene, katøgan srusrø nun ashabe, katøganelan trenchibig køn:

—Øikkucha Nazaretsrø Jesúsba uñibig kuig kømøh— cha.

⁷²Inchene Pedrobe katøyg:

—‘Tiusken ashen, katø nabe isa waminchibgucha pasrømur’ chib, trenchibig køn. Nabe tru møwane ashmíig kur— cha.

⁷³Inchen yanayu truyu purrabeløbe Pedron kemallabe, trenchibelø køn:

—Isa kømø, ñigucha truilai utuigwein køn cha. Waminchibiyutøguen møramdiig waminchibig køn— cha.

⁷⁴Inchen Pedrobe:

—‘Na isab pasraig købene, trube, nan chigøben nebunrrappe nebubash chib, Tiusken ashen katø nabe isa waminchibgucha pasrømur chibig køn’. Tru møwane nabe ashmíig kur— chib.

Inchen tru urastø kan kallu wamapinchen, ⁷⁵Pedrobe Jesús øyah taig kømørramab isuptinchibig køn: “Kalluguen wamømwatø, ñibe nan pønmayguen ashmíig kur chinrrun”, taigwan. Incha Pedrobe truyugurri webya, truba truba isuig kishibig køn.

27

Jesúswan Pilaton tranøb

(Mc 15.1; Lc 23.1-2; Jn 18.28-32)

¹Yandø tør-rraben, sacerdotemeran karubeløba, misagwan karubelø kølli misaameraba mayeelø Jesúswan kwetchab treeg martrab kandø isa pønramisrøbelø køn. ²Inchen nun lusra, srua amba, kubenadur Pilaton tranøbøbelø køn.

Judas kwaig

³Judas, tru Jesúswan ashig kømui inchibelaingatø pasramisrøbiibe, Jesúswan kwanrrai pasrig kui ashabe, treeg marmumøtømab, truba truba isua, sacerdotemeran karubelanba, misagwan karubelø kølli misaameranba tru an treintan ⁴trenchib katø kebusrøbig køn:

—Nabe kaig marar cha, chi kaig marmø møwan kwanrrai tranøb.—

Inchene nõmbe trencha lõtabelø køn:

—Øibe ñuimburab køn cha, namune trunune manguaasamø— cha.

⁵Inchene Judasbe anwan Tiuswei yau kebetappa, truyugurri webya yabe, naashigu tsi pasra, megamisrøppa, kwaptinchibig køn.

⁶ Inchen tru sacerdotsmeran karubeløbe tru anwan tulishabe, trenchibelø køn:

—I anbe yandø ani lushaig kaig an køn cha, Tiusweyasig an pusrinuube pusrmønrrai, merig køn— cha.

⁷ Incha nømbe tru andøga køtsø marøbigwei tulwan penønrrab cha, treeg martrab kandø isua kørømisrøbelø køn, tru peesrøngurri amrrub misaameran søramig tøgagønrrab cha.

⁸ Inchawei tru pirøbe mōin kwalømgatig “Ani Lusra Tul” cha wamig køn. ⁹ Øyamay tru Tius maig karuigwan eshkabig Jeremías øyah taig treeg nebuig køn: “Tru an treinta, tru israelitasmera nune an øya pagaranrrab taig anwan nøm srua pønrramisra, ¹⁰ trutøgabe køtsø marøbigwei tulwan penan taig, Señor nan maig karuig køben treeg” taig.

Pilato Jesúsuan ‘¿øyebe maig kø?’ cha payib

(Mc 15.2-5; Lc 23.3-5; Jn 18.33-38)

¹¹ Incha Jesúsbe yandø kubenadurwei merrab pasrøben, nøbe trencha payibig køn:

—¿Ñigan judíosmerai rey køtirru?— cha.

Inchen Jesúsbe trenchibig køn:

—Ñitøweinguen chab trendan— cha.

¹² Inchen sacerdotsmeran karubeløba, misagwan karubelø kølli misaameraba ‘øyeeg køn’ chib, ‘øyeeg marøbig køn’ chib kømne, Jesúsbe chigucha løtømig køn. ¹³ Inchene Pilatobe trencha payibig køn:

—¿Ñun chigøben yeeg chib kømne mørmøtirru?— cha.

¹⁴ Inchen Jesúsbe ni chi chib kuingucha manchagucha løtømuben, tru kubenadurbe ‘øyebe maig kermab’ ke kwaara asha kørømisrøbig køn.

Jesúsuan yandø kwanrrai pasrøb

(Mc 15.6-20; Lc 23.13-25; Jn 18.38–19.16)

¹⁵ Tru fiesta kwalømmerrawane kubenadurbe kailan keeri yau pønrrabelan misag mōigwan elatchai miaben, trendø treeg marøb elachibig købig køn. ¹⁶ Inchen truyu Barrabás taig mayaelø mu kui asig kailan keerig yau pasrabig køn. ¹⁷ Inchen tru nøm tulundzuna kømne, Pilatobe trencha payibig køn:

—¿Ñimbe mōigwan na elatsamig palain køgue cha, Barrabáswandeh, kabe Jesús tru Cristo taigwandeh?— cha.

¹⁸ Kaguende Pilatobe Jesúswane uni ashig kømuptø nun tranin kui ashibig køn.

¹⁹ Inchen Pilatobe nø wamisra karub waigu srø wamnetø, nui sraimbe trenchinrrai eshkawa ørøbig køn: “Ñibe ñuimburappe chigucha marmøta cha, ø mowan sølgandø tabigwane. Kaguende mira yem purø trømbøbig nan piaig køn cha, ø møkkurrindø.”

²⁰ Inchen sacerdotsmeran karubeløba, misagwan karubelø kølli misaameraba misaamerane miamne indingarubelø køn, Barrabáswane elatchai miappe, Jesúswane kweetsingarunrrai. ²¹ Incha kubenadurbe katøle payibig køn:

—¿Ñimbe i pailan mōigwan elatsamig palain køgue?— cha.

Inchene nømbe trenchibelø køn:

—¡Barrabásuan!— cha.

²² Inchen Pilatobe trencha payibig køn:

—¿Jesús, tru Cristo køn taigwane, nabe mandø indamø?— cha.

Inchene mayeeløba:

—¡Kurusyu mesraig kønrrain!— chiben,

²³ Pilatobe trenchibig køn:

—¿Chindimba øyeeg martrenchigüe? cha. ¿Nøbe chi kalø marig kø?— cha.

Inchen nømbe masken mur trashibelø køn:

—¡Kurusyu mesraig kønrrain!— chib.

²⁴ Inchen Pilatobe mumaygucha yandø chi maramgaig kui asha, trune mas mas trømbøbig inchen, pi tranrrab øra, mayelai malau trenchib tasigwan kinabig køn:

—Nabe naimburappe i kwanrrabigweimburappe, chi marig kaagøn cha. Iibe ñimuimburab kønrrun— chib.

²⁵ Inchen maya misaabe trencha løtabelø køn:

—Nø kwawa ani lusilbe namuimburappa, namui uregweimburappa kønrrun— cha.

²⁶ Inchen yandø Pilatobe Barrabásuan ka inrrai elacha, Jesúswane chab ichagutsingarubabe, kurusyu mesrønrrai tranøbig køn.

²⁷ Incha tru kubenadurwei suldaumerabe tru palacioyu Jesúsuan mas umbusrø srua amba, maya suldau søtø nuim pøtøgatan tulundzunøben, ²⁸ Jesúsuan nui kewagúigwan wesrua, kan keeg kørørabig piguüig kørørabig itøguenanøbelø køn. ²⁹ Incha kan kaldiig corona mara, petsøsrø, kusrmay taskube kan caña tsig trana, nui merrab tømønrsrøbe, ka indzatø ashib trenchibelø køn:

—¡Judíosmerai Rey, viva!— chib.

³⁰ Katø illimbi tutamba, tru cañatøga turbøtø itsamba inchibelø køn. ³¹ Nun øyeege marøb ka indzatø ashib srua køptø, tru kørrabig kenanigwan wesrawa, nuiwan kenanabe, kurusyu mesrønrab srua ambubelø køn.

Jesúswan kurusyu mesrøb

(Mc 15.21-32; Lc 23.26-43; Jn 19.17-27)

³² Incha truygurri webamba amben, kan møg Simón taig cirenesriig arrub pasrain køben, tru møwane Jesúswai kuruswan ke mutamne incha mutøsrøbelø køn.

³³ Incha kanbalø Gólgota tainug pubelø køn (tru trenchippe, “Calaverasrøn” tainug). ³⁴ Incha truyu Jesúswan vinoba, purø trømbø møb piba lindisaigwan mutchai yuuløbelø køn. Inchen Jesúsbe kaizhig muchamørabe, muchimuptinchibig køn.

³⁵ Incha yandø kurusyu chab mesrabe, suldaumerabe Jesúswai kewagúilan mu merraramig køtashchab suerte kuchibelø køn. ³⁶ Inchabe truyu chindashchab ashib purrabelø køn. ³⁷ Inchen nui tur palabe kan pørig mesrøbelø køn, chigurriin kwanrrai mesraig køn cha eshkabig. Trube trenchibig pørig købig køn:

IIBE JUDIOSMERAI TRU REY JESUS KØN

chibig.

³⁸ Katø pagatø nileelangucha nøba kurusyu melsrøbelø køn, kanun kusrmay, kanune atsimaygue. ³⁹ Inchen truwan puraambubeløbe tsalø wamab, turwandø kønøgøb, ⁴⁰ trenchibelø køn:

—¡Ni tru Tiuswei yawan pøtiicha, katø pøn kwalømyutø kusranrrabiibe ni kwamønrab ñitøwei chigøben mar! cha. ¡Tiuswei Nusrkain kuabe, kurusyugurri pinaamø!— chib.

⁴¹ Incha sacerdotemeran karubeløba, Moisés pørigwan kusrenanøbeløba, misagwan karubelø kølli misaameraba misra, ka indzatø ashib trenchibelø køn:

⁴² —Kanelane kaigyugurri wesrubendø, nøasiitøweimbe kaiman cha. Israel misagwei rey kuabe, møimbe kurusyugurri kørraarubash cha, treenchene, nambe nun køremønrøn chibelø køn. ⁴³ Nøbe ¡katø! Tiuswandø isun cha. Trube, Tius nun undaguig kuabe, møimbe nun kwamønrari marbash cha. Kaguende nøbe: “Tiuswei Nusrkain kur” taig køn— cha.

⁴⁴ Inchen nileelø nøba kurusyu melsraig melabeløguen treetøwei nun tøga tsalø wamabelø køn.

Jesús kwaig

(Mc 15.33-41; Lc 23.44-49; Jn 19.28-30)

⁴⁵ Inchen kwaløm tøbøtakkurri maaben las treskatig pirø ørø kerrigu løstiig kørrømisrøbig køn. ⁴⁶ Tre uras Jesúsbe truba mur trashib trenchibig køn:

—Elí, Elí ¿lama sabactani?— cha. (Trenchippe, “Nai Tius, nai Tius ¿chindimba nandø elachigu?” chib.)

⁴⁷ Inchen møiløgøsrøn truyu pønrrabelø mørabe, trenchibelø køn:

—Øibe Elíaswan wamøtan— cha.

⁴⁸ Inchen møi møi nømui utu møikkøsrøn kan ñab esponja lataigwan tranrrab lula, trunun køchiibiyu kebisha, kan caña tsigu pucha, trunun mutchai trig pulusrøngatig nun yuuløbig køn. ⁴⁹ Inchene kaneløbe trenchibelø køn:

—Kagøbasay cha. Inchippa kwamønrari pinøsrannrab Elías attachchab— cha.

⁵⁰ Inchen Jesús katøle mur trashabe, kwaptinchibig køn. ⁵¹ Inchen tru urastø Tiuswei yau tru purø tab lensuzhig kelarrab søtø mesraibe pabalig misrøb palasrøngurri kørrab kølsrøbig køn. Inchen pirøbe mur kønøben, nørrø sruumerabe pushen, ⁵² kwabelan sörin trabmerabe kuren inchibig køn. Inchen Tiuswei tarømari misaamera truba nørrø kwabelai asrmeraguen øsiirraig købig køn. ⁵³ Inchen Jesús kwawa, yandø katø øsiirabene, nømbe tru sörin trabmerayugurri webamba, tru Tiuswei tarømari ciuda Jerusalénsrø kebambubelø køn. Incha misaameran mamdeelandø kømø, kenamisrøbelø køn.

⁵⁴ Inchen tru Roma suldau cienelan nø karubiiba, truyu Jesúswan chindashchab ashib pønrrabelø katøganeløba pirø kønabigwan køben, chine purayaigwan køben ashabe, ¡katø kørig købiitø! ke chinchimmøø inchib trenchibelø køn:

—¡Isa kømø, iibe Tiuswei Nusrkain købwei indin køn!— cha.

⁵⁵ Inchen truyube ishumburmera truba nu yabsrøngurrindø ashib pønrrabelø køn. Tru- iløbe Galileasrøngurri Jesúswai mendig amrruar, katø nømbe nun purugub linchibelø købig køn. ⁵⁶ Inchen tru ishumburwei utube María Magdalena køben, katø Santiagoimba, Josøweimba usri María køben, katø Zebedeøwei nusrkalai usrin køben pønrrabelø køn.

Jesúswan sørig

(Mc 15.42-47; Lc 23.50-56; Jn 19.38-42)

⁵⁷ Yandø yem misren, kan truba pua møg Arimatea pirausriig José taig pubig køn, truikkucha Jesúswei mendig uñibig købig. ⁵⁸ Truipe Pilatoimay yabe, Jesúswei asrwan miaben, Pilatobe truigwan traningarubig køn. ⁵⁹ Inchen Josébe asrwan srua ya, kan lino llensu chishchiitøga kirra, ⁶⁰ kan peñayu José tru nuyasig sørämig trab lalig srøig pasrabigu wayibig køn. Incha tru trabyu truba nu srugwan merrana, kebambinug kasra pasrabe, yandø ibig køn. ⁶¹ Inchen María Magdalenaba, katøgan Mariäba sörinug pinrrøgue purrabelø køn.

Jesúsuan sörinug ashib pønrrønrai pønrsailø

⁶² Inchen katø kwaløm tru isram kwalømwegasig tamarøb kuin kwaløm chab puraiben, katø kwaløm, tru sábadø isrin kwalømbe, tru sacerdotesperan karubeløba, fariseosmeraba kanbalatø misra Pilaton ashchab ambabe, ⁶³ trenchibelø køn:

—Au, namui kubenadur, nambe isua ker cha; tru isa waminchiptiibe øsig uñippatø trendaig køn cha: “Kwawa, pøn kwalømyube katø øsiiramønrrun” cha. ⁶⁴ Inchawei treeg købene, ñibe pøn kwalømgatig sörigwan tab ashib tøgagønrai karu, chibelø køn. Inchippa nui kusrenanøb pera unilø yem amrrua, nui asrwan nilabgun cha. Incha misaameran ‘katø øsiirain køn’ chimønrai. Treeg purayaisruandøbe si, trube, srøsrø isa wamindi lataikken kømø, katøbe purø trømbøig isa wamindig kønrrun— cha.

⁶⁵ Inchen Pilatobe trenchibig køn:

—Suldaumera pønrrabelan pera ambay, cha. Ñim maig tamaramdiig køben, treeg tamar-trigay— cha.

⁶⁶ Incha ambabe, tru sörin trabwan mu chinchimønrai may tamarøbelø køn. Tru kasrøb srugwane kan sello mesrøb, katø truyu suldaumera ashib pønrrønrai pønrsøb, treeg inchibelø køn.

28

Jesús kwawa katø øsiirab

(Mc 16.1-8; Lc 24.1-12; Jn 20.1-10)

¹ Indiibe yandø isrin kwaløm puraiben, tru srø trune pølbarsøb kwaløm ullarbatø, María Magdalenaba, katøgan Mariäba tru sörinug ashchab ambubelø køn. ² Inchen møyimbe pirø truba mur kønaptinchibig køn, kaguende Señorwei ängel srømbaläsörngurri kørarruben. Inchabe sörin trabyu kemalla, tru srug truyu kasrøbigwan wemalsra, tru srug pala wamisrøbig køn. ³ Tru ängelbe kan sre pilabig lataig tørbilabzhig købig køn, nui kewagüibe puløzhig kan pulø wañi latazhikke. ⁴ Inchen suldaumerabe trunun ashabe, kørig købiitø itønab, ke kwailø latailø warambuben, ⁵ ängelbe tru ishumbermerane trenchibig køn:

—Kørig kui inchimøtay cha. Ñimbe tru Jesús kurusyu mesraigwan lab kui, nabe ashar cha. ⁶ Yube mu kaagøn cha. Nøbe kwailai utugurri katø øsiirain køn cha, nø maig taig. Nun wayinug ashchab amrruy cha. ⁷ Incha møyimbe malla ambay chibig køn, nui kusrenanøb pera unillan øyah chinrrab: “Jesúsbe øsiirawa, Galileasrømay ñimnguen ammøwatø, nømerrig inrrun tan chinrrigay cha. Trusrø ñimbe nun ashchun tan” chinrrab. Nabe ñimune yandø chab eshkar— cha, ängelbe trenchibig køn.

Jesús ishumbermeran kenamisrøb

⁸ Inchen ishumbermerabe tru sörinukkurri truba kwaariilø webambuppe, webambendø, truba kasrag luløb ambubelø køn, nui kusrenanøb pera unillan eshkanrrab. ⁹ Inchen trunetø Jesúsbe nømun kenamisra, wamaptinchibig køn. Inchen nømbe Jesúsuan kemalla, nui srøbmeran ira, køriibala tabig waminchibelø køn. ¹⁰ Inchen nøbe trenchibig køn:

—Chi kørig kui inchimøtay cha. Nai nunelan Galileasrømay amrrai eshkanrrab ambay chibig køn. Nømbe trusrø nan ashchun— cha.

Maig purayaigwan møyø waminchimønrai suldaumeran an nørø pagabar

¹¹ Incha ishumbermera ambub kømne, suldaumera møyiløgsrøn tru ashib pønrrabelø ciudayumay ambabe, tru chi purayaigwan sacerdotesperan karubelan kerriguh esh-abene, ¹² truiløbe tru misagwan karubelø kølli misaameraba maig maramigwan wamincha kørømrstrab tulundzunabe, suldaumerane an truba nørø pagabarø køn. ¹³ Incha:

—Ñimbe øya chinrrigay chibelø køn: “Nam kib waramnetø, nui kusrenanøb pera unilø amrrua, Jesúswei asrwane nilin køn” cha. ¹⁴ Inchippa kubenadur wammøøb chinchene, trube, trunune nam asamønrrun chibelø køn. Ñimun chi puraimønrai.—

¹⁵ Inchen suldaumerabe anwan uta, maig karuben treeg marøbelø køn. Incha øyeeg purayaig køn chib wamindiibe judíosmerai utube møyin kwalømgatig wambe larrøbitsig pasrabigu køn.

Jesús nui kusrenanøb pera uniiløbe Galilea pirau tunsrø Jesús eshkainuumay

(Mc 16.14-18; Lc 24.36-49; Jn 20.19-23)

¹⁶ Inchen tru once kusrenanøb pera uniiløbe Galilea pirau tunsrø Jesús eshkainuumay ambubelø køn. ¹⁷ Incha Jesúswan ashippe, køriibala tabig waminchibelø køn, møiløbe ‘¿truig køh? kabe, ¿peg køh? chindermab’ isuatøgucha.

¹⁸ Inchen Jesúsbe nømun kemallabe, trenchibig køn:

—Tiusbe srømbalasrø lata, pirau lata chiwandøgucha mu mandamgaig marøb karu-migwane nan tranig køn cha. ¹⁹ Treeg købene, yu pirau maya misaameran mundøgucha na kusrenanigwan marøb melabelø kønrrai martrab amrrigay cha, Møskaweimba, Nus-rkaweimba, Espíritu Santoi munchiyuba misaameran piu umbu ulsrøb. ²⁰ Incha na ñimun maig karuigwan kerriguh trunun møra martrai kusrenrrigay chibig køn. Inchen nabe naimburappe kwalømmørig srabe kwalømgatig ñimba pasramønrrun— cha, trenchibig køn Jesúsbe.

San Marcos

Juan misagwan piu umbu ulsrøbig mu misag warab waraimønug eshkaab kusrenanøb
(Mt 3.1-12; Lc 3.1-9, 15-17; Jn 1.19-28)

¹ Tiuswei Nusrkai Jesucristoimburab tru tabig srø wambe øyamay pølbasrig køn: ² Tru Isaiás Tius maig karuigwan eshkabig maig pørimbala:

Au, nabe nai wam srua inrrabigwan ñui merrab ørar cha, truiibe ñui maywan tamartrai.

³ Mu misag warab waraimøsrø kan wam trenchib trasan chib:

“Señorwei maywan tamarøb, nuyasig maymerane ølmarøb inday” tan, chib.

⁴ Treekkurri Juan Bautistabe mu misag warab waraimønug kenamisra, misaameran mas kaig marmønrrab isua møra, Tiusweimay llirain kønmab asamig piu umbu ulsrailø kømigwan eshkaab kusrenanøbig køn, kaig mariilan ulø payamig kømig pesannailø kønrrai.

⁵ Inchen maya misag Judea pirausreelø køben, Jerusalén ciudasreelø køben nuimay mørtrab amrruabe, nømui kaig mariilan ‘øyeeg marig køn’ chib eshkaabene, truilan Juanbe Jordán piyu piu umbu ulsrøbig køn.

⁶ Juan kewagúibe camello isiitøga marig købig køn. Inchen nui pørønaiibe kaluswan marig køben, nui mamibe nørøø chapullba, kaambu mielba købig køn. ⁷ Incha misagwan eshkaab waminchibig køn:

—Nai wendaube katøgan na lataguen kømø, maramburab marøbig maskenig attrun cha.

Trunune nabe nui alpargatisyu tsiwan utsøbasra, pichibguen pitchabgaig kur chibig køn.

⁸ Nabe ñimune pi pinøbulrrai piu umbu ulsrar cha. Trune nøbe ñimun Espiritu Santotøga pinøbulrrun— chibig køn.

Jesús piu umbu ulsraig
(Mt 3.13-17; Lc 3.21-22)

⁹ Inchen tru kwalømmerawan Galilea pirau, Nazaret puebloyugurri Jesús webiben, nune Jordán piyu Juan piu umbu ulsrøbig køn. ¹⁰ Inchen piu umbugurri webarrub latatø, Jesúsbe srømbala kuri ashib, Espiritu Santo nuim pala kan paloma lataig kørraarri ashib inchen, ¹¹ Srømbalasarøngurrimbe kan wam treeg mørø waminchib trenchibig køn:

—Ñibe nai Nusrkai undaaraig køn cha. Nabe ñuimburab truba tab kui war— cha.

Nugwaimandzig Jesúsuan chindashchab inchib
(Mt 4.1-11; Lc 4.1-13)

¹² Inchen tru urastø Espiritu Santobe Jesúsuan mu misag warab waraimøsrø møi møi ingarubig køn. ¹³ Inchen Jesúsbe truyu kwalømmera cuarenta nemisramne tsuben, Satanásbe kebenøsrkønrrab ke chinøø maringarunrrab inchibig køn. Inchen ångelesmera purugubelø køn, Jesúsbe namig animalmerai utu tsuben.

Jesús Galilea pirau nui chi maramigwan pølbasrøb
(Mt 4.12-17; Lc 4.14-15)

¹⁴ Juanwan kailan keeri yau keeri wendø, Jesúsbe Tiusweimburab tabig srø wamwan Galilea pirausrø eshkaab kusrenanøb ya, ¹⁵ trenchibig køn:

—Yandø øyeeg kønrrabig puben, Tius nø ashib karub pasraibe lutau pasran cha. Ñimui kaig mariilan isua møra, Tiusweimay llirab, tabig srø wamwan kørey— cha.

Jesús pigatø peskabelan nui mendig amrrunrrai wamab
(Mt 4.18-22; Lc 5.1-11)

¹⁶ Jesús Galilea nu pisu mendawan ib pasrøwabe, Simónwanba, nuneg Andréswanba, truiløbe peskabelø kua, nømui atarrayameran pisuyu keguchib warai ashibig køn. ¹⁷ Inchabe Jesúsbe trenchibig køn:

—Nai mendig amrruy cha. Nabe ñimune misaameran peskabelø kønrrai maramønrrun— cha.

¹⁸ Inchen nømbe møi møi nømui atarrayameran waramnetø Jesúswei mendig ambubelø køn.

¹⁹ Inchen Jesúsbe katøguchi ambuurø yabe, Zebedeowei nusrkalø Santiagonba, nuneg Juanwanba ashibig køn. Truiløbe kan barcoyu nømui atarrayameran tamara tsushib purrabelø køn. ²⁰ Inchabe tru urastø wamøben, nømbe nømui møskai Zebedeowanba, purrugubelanba barcoyu purramnetø, Jesúswei mendig ambuptinchibelø køn.

Kan møg kwaimandzig tøgigwan Jesús tamarøb
(Lc 4.31-37)

²¹ Incha Capernaum puebloyu pua, tru isrin kwalømbe Jesúsbe judíosmera tulundzuni yau kebya, kusrenanøb mendøben, ²² nõ wamindiilan mõra, misaamerabe kwaara ashibelø køn. Kaguende kusrenanøppe, nuinukkurrindøwei mu mandamgaig kusrenanøbig køn, tru Moisés pørigwan kusrenanøbelø lata kømø. ²³ Inchen tru puebloyu judíosmera tulundzuni yaube kan møg trømbøig maringarub kwaimandzigwan tøgag wawa, trenchib trashibig køn:

²⁴ —¿Nambabe ñibe chi asamig tøgagugu cha, Nazaretsrø Jesús? ¿Namun pinishinrrab attirru? cha. Nabe ñune mu kui ashar chibig køn. Ñibe tru Tiuswei Newan Tabig, truig køn— cha.

²⁵ Inchen Jesúsbe kwaimandzigwan namab trenchibig køn:

—¿Ñibe trashimøtø, mõweinukkurrimbe webinrrø!— cha.

²⁶ Inchen trømbøig marøngarub kwaimandziibe mõwan truba mur sruagucha, tru mõweinukkurri mur trashib webibig køn. ²⁷ Inchen mayeeløba kwaara asha, nõmasiyaitø trenchib payiyabelø køn:

—¿Oyeebe chi kerah? cha. ¡Kusrenanig iibe ke srøig, trurrigu nõ maig chippe ke treeg kønrrai maran! cha. I mõøbe trømbøig maringarub kwaimandziimeranguen mu chin-damgaig wamøben, nune mõran— cha.

²⁸ Inchen petø Galilea pirau ørøba misaamerabe Jesús nõ chi marigwan wammøøbelø køn.

*Jesús Simón Pedroi sueeran kwanrrøwan tamarøb
(Mt 8.14-15; Lc 4.38-39)*

²⁹ Incha tru urastø judíosmera tulundzuni yaugurri webambabe, Jesúsbe Jacoboba, Juanba, Simónweimba, Andrésweimba yamay amben, ³⁰ Simónwei sueerabe camayu pachiiba tsuben: “Kwanrrø tsun” cha, tru urastø Jesúswan eshkaben, ³¹ Jesúsbe kemalla, tasigu kemøøb kusrabene, pachiibe weetapinchen, nõbe tru pubelayasig chi maramigwan marøb mendabig køn.

*Jesús truba yam kwanrreelan tamarøb
(Mt 8.16-17; Lc 4.40-41)*

³² Yandø pørr pinaiben, chab pilliraben, Jesúsweimay mayeelø kwanrrø tøgarmenaba, kwaimandziimera tøgarmenaba srua amrruben, ³³ puebloyu maya misaaba yaskabugøba tulundzuna pasrøben, ³⁴ Jesúsbe truba yamelø chi kwanrrø køben tøgarmen tamarøb, katø truba yam kwaimandziimeran misaamerainukkurri webusrøbig køn. Incha kwaimandzi-imerane waminchibashmøig køn, kaguende truuløbe nune mu kui ashibelø køben.

*Jesús Galilea pirau truøø srø wam tabelan eshkab kusrenanøb
(Lc 4.42-44)*

³⁵ Incha løtsøzhig ullarbatø, Jesúsbe kurra, ciudayugurri wambig mu misakkasrø, trusrø Tius Møskaimba waminchib wabig køn. ³⁶ Inchen Simónba, nui linchibeløba lanrrab webamba, ³⁷ wetørrawabe, trenchibelø køn:

—Mayeeløba ñune lab køn— cha.

³⁸ Inchen nõbe trencha løtabig køn:

—Misaamera puluwandø katøganbalømera warabsrømay amrrab cha. Trusrøngucha srø wam tabelan eshkab kusrenrrab, kaguende nabe truweiei arrur— cha.

³⁹ Incha Jesúsbe Galilea pirau ørøba judíosmera tulundzuni yamerayu chutøgucha eshkab kusrenanøb, katø kwaimandziimeran misaamerainukkurri webusrøb inchibig køn.

*Asr trerab kwanrrø, lepra taig, tøgagigwan Jesús tamarøb
(Mt 8.1-4; Lc 5.12-16)*

⁴⁰ Kan møg asr trerab kwanrrø, lepra taig, tøgagig Jesúswan kemalla, tømønrsabe trenchibig køn:

—Ñi nan tamaramdiig købene, tamartra— cha.

⁴¹ Inchen Jesúsbe lastima asha, tasigwan larrøbicha estsarabe, trenchibig køn:

—Tamarøg køtan cha. Tamarig kørrømisr— cha.

⁴² Inchen mõi mõi nui trerab kwanrrøbe pinøben, nõbe chishig kørrømisren, ⁴³ Jesúsbe yandø ‘inrrø’ cha, nune kuchi murtø waminchib trenchibig køn:

⁴⁴—Au, mungøben eshkawabesin cha. Inchendø ya, ñui asrwan sacerdotendø kenamara, tru ñi yandø chishig kørrømisrimburø tru Moisés tranrrig taigwene srua ya, tranrrig cha, mayeeløba ñui kwanrrøwan chishig kørrømisrin kui ashchain— cha.

⁴⁵ Trendaingucha mõøbe ya, chi purayaigwan mayeelan waminchib mendøben, treekkurri Jesúsbe chu puebloytøgucha misag ashene, yandø kebinrrab kaima, mendawansrø misakkanug uñibig køn. Inchen chugurrielø køben nun ashchab amrrubelø køn.

2

Jesús nui maramburab mariitøga kaig marigwan ulø paymumig kønrrai marøbig kui ashchai kenamarøb

(Mt 9.1-8; Lc 5.17-26)

¹ Mam kwaløm wendau køsrøn, Jesús katø Capernaum puebloyu kebiben, nø yau wan taig wammørøppe, ² misaabe petø truba nu tulundzuna, ni yaskabuguen kemuben, nøbe Tiuswei srø wam tabelan waminchibig køn. ³ Inchen pibgatø møguelø kan møg kønønrrab kaimabigwan muta, puben, ⁴ menrra misag køptø, Jesúsweim pulugatig kemallchab kaimappe, tru nø pasraim pala yawan picha, trugurrimbe tru trabyu kwanrriigwane kan tsigalyu kørrøørøbelø køn. ⁵ Inchen Jesúsbe nømui isubigwan ke nuinuutø pasra pønrrai ashabe, Jesúsbe kwanrriigwane trenchibig køn:

—Nai nusrkai, ñui kaig mariilan ulø payamig kømíig, pesannaig kørrømisran— cha.

⁶ Inchen møløgøsrøn tru Moisés pørigwan kusrenanøbeløbe nømui manrrautø truba isub purrabelø køn: ⁷ “¿Nøbe øyeebe chi waminchib pasrarmah? cha. Øyeege chib pasrappe, Tiusweimburab purø trømbøig wamab pasran cha. Kaig mariilane ulø payamig kømíig pesannaig kønrraimbe ¿mu kuiu treeg mariasamø? cha. Tiustøwei øyeege martrun” chib. ⁸ Inchen tru urastø Jesúsbe nømuinetø øyeege isub pønrrailan kelarrab ashabe, trencha payibig køn:

—¿Ñimbe ñimui manrraube chindimbarre øyeege isugue? cha. ⁹ ¿Møigwan mas kørmø trendamdiig købsruerah? cha, tru kønønrrab kaimabigwan: “Ñui kaig mariilan ulø payamig kømíig pesannaig kørrømisran” ¿tamiteh? Kabe: “Kurrab, ñui tsigalwan muta, inrrø” ¿tamiteh? cha. ¹⁰ Pøs, na, Møg Misra Arrubiibe yu pirau kaig mariilan ulø payamig kømíig pesannaig kønrrai mu mandamgaig marøbig kui mømibe ñim ashchai kenamaramønrrun—chibig køn.

Inchabe tru kønønrrab kaimabigwane trenchibig køn:

¹¹ —Nabe ñun trenchar cha: Kurrab, ñui tsigalwan mutab, yamay inrrø— cha.

¹² Inchen truike kurrappa, nui tsigalwan muta, mayeelø ashen, truyugurri webibig køn. Inchen trugurrimbe mayeeløba truba kwaara ashib, Tiuswan truba tabig waminchib trenchibelø køn:

—Managuen nambe kan øyeeckatiibe ashmuig køn— cha.

Jesús Leviwan wamab

(Mt 9.9-13; Lc 5.27-32)

¹³ Incha katø Jesús nu pisu mendasrømay iben, maya misag nuim pulu kemallen, nøbe kusrenanøbig køn. ¹⁴ Incha pureb ya, Alfeowei nusrkai Levi, romasreelayasig an utabelø purrainug wai ashabe, trenchibig køn:

—Nai mendig amø— cha.

Inchen nøbe kurrab, nui mendig ibig køn.

¹⁵ Indiibe Jesúsbe Leviwei yau mab wabene, truba yamelø romasreelayasig an utabelø køben, katøganelø kaig marøb misaamera køben Jesúsba, nui kusrenanøb pera uniiløba mishatsigu trubalatø purrøben, kaguende truba nu købig køn nui mendig amøñibeløbe. ¹⁶ Inchen fariseosmerai utu tru Moisés pørigwan kusrenanøbeløbe Jesúswane mayeelø tru kaig marøbeløba, an utab purrabeløba mishatsigu mab wai ashabe, nui kusrenanøb pera uniilane trencha payibelø køn:

—¿Nøbe an utaptø purrabeløba, kaig marøbeløba mab, muchib wappe, øyeebe maig marøb wah?— cha.

¹⁷ Inchene Jesúsbe trunun mørabe, nømun trenchibig køn:

—Tabelø, kwanrrøgarbe mø marøbig palain kømøn cha. Kwanrreeløbeguende palain køn cha. Nabe tru sølgandø amøñibelan wamønrrab arrumøtø, kaig marøbelan wamønrrab arrig køn— cha.

Ayunamigwan payib

(Mt 9.14-17; Lc 5.33-39)

¹⁸ Juanwei mendig amøñibeløba, fariseosmerai mendig amøñibeløbabe ayunab køben, møløgøsrøn amrrua, Jesúswan payibelø køn:

—Juanwei mendig amøñibeløba, fariseosmerai mendig amøñibeløbabe tru ayunamigwan katø katø maren, ¿ñui kusrenanøb pera uniiløbe chindimbarre trunune marmeelø køh?— cha.

¹⁹ Inchene Jesúsbe trenchibig køn:

—¿Kan novios yaumay linchai eshkailanma keg mistrabig nømbe wabengan, mamø purrønrraitarru? cha. Keg misrtrabig nømbe wabene, manrrun cha. ²⁰ Inchendø keg

misrtrabigwan srua ambam kwalømmerna punrrun cha. Tru kwalømbeguende, trube, nømbe ayunabwei inchun cha.

²¹ Muguen kan køllin camisanma kòlsraigu srø llensu sòtiimígwán waya tsushimøn chibig kòn. Treg marene, srø llensube kesruppa, kòlli llensune kòlsrøben, mas trømbøikken kòlsraig kòrrømisrtrun cha. ²² Katø muguen srø vinonma kòllin kalusmerayu usrmøwei indan cha. Kaguende treg marene, srø vinobe kòllin kalusmeran srurrøgøben, vinobe lusen, kalusmerabe ka kòlsrønrrun cha. Inchawei srø vinone srø kalusmeran marigu usrøbelø kòn— cha.

*Isrin kwaløm maramgaigwan maran cha, Jesúsuan alegab
(Mt 12.1-8; Lc 6.1-5)*

²³ Kan isrin kwaløm Jesús tirigu ellmari utuwan pureb ibene, nui kusrenanøb pera uniiløbe puraambub ambuppe, tirigu tur lurrøb mendøben, ²⁴ fariseosmerabe Jesúsuan trenchibelø kòn:

—Au, ¿ñui kusrenanøb pera uniiløbe isrin kwalømbe chigøben marmønrrai merigwan chindimba øyeeg marøb kòh?— cha.

²⁵ Inchen Jesúsbe trenchibig kòn:

—¿Nimgan managuen lemeelø kòtirru cha, mana kòsrøn Davidwanba, nui linchibelanba chindamgaig palabig arruben, parøgwaben, mandø indigwan? ²⁶ Abiatar, tru maya sacerdotemeran nø karub sacerdote køben, Davidbe Tiuswei carpa ya tabzhigu kebya, Tiusweyasiitø tarømarig pirrimera, tru sacerdotemeratø maim pirrimera mendaibe mu mamønrrai merigwan nø mab, katø nøba purrab misagwangucha srørrøb indigwan.—

²⁷ Incha Jesúsbe katø trenchibig kòn:

—Isrin kwalømwane møyewasig marig kòn cha, møywan isrin kwalømweyasig kømøtø. ²⁸ Inchawei na, Møg Misra Arrubiibe isrin kwaløm nan nø karunrrain kømøtø, maramdigwane marøb, maramgaigwane marmub, isrin kwalømwanguen nabe na asha karubig kur — chibig kòn.

3

*Tasig mul-laig møywan Jesús tamarøb
(Mt 12.9-14; Lc 6.6-11)*

¹ Jesús katø judíosmera tulundzuni yau kebibene, truyu kan møg tasig mul-laig tøggaig waben, ² Jesúsuan larab købelø kòn, isrin kwaløm tamarøbig kòtashchab, chigøben chi kòptø.

³ Inchen Jesúsbe tru tasig mul-laig tøga møywane trenchibig kòn:

—Kurra, yu tøbøtag pasramisr— cha.

⁴ Inchabe katøganelan trenchibig kòn:

—¿Tru maig maramigwan martrai Moisés pøriiløyube isrin kwalømbe chiwan martrain taig kòh cha, tabiiteh, kabe kaiteh? cha. ¿Kwamønrrai indamig kòh, kabe kweetsamig kò, chindah?— cha.

Inchen nømbe chigucha chimuben, ⁵ Jesúsbe nuingatan pønrrabelan namig ashìb, truba isui inchibig kòn, kaguende nømui manrrømerabe purø murelø kuimba. Incha tru møywan trenchibig kòn:

—Kwalwan larrøbichi— cha.

Inchen nøbe larrøbichene, nui kwalbe tabig kòrrømisrøbig kòn. ⁶ Inchen fariseosmerabe webama, tru urastø Herodesweingateeløba Jesúsuan namig kurra, mandø incha pinisamigwan waminchib mendabelø kòn.

Nu pisu menda misag truba nuwan Jesús kusrenanøb

⁷ Inchen Jesúsbe nui kusrenanøb pera uniiløba tarømisra, nu pisu mendasrømay iben, misag truba nu Galilea pirausreelø nui mendig ambubelø kòn. ⁸ Inchen nø chinètø nørreelø marigwan wammøra, judeasreelø køben, jerusalénsreelø køben, idumeasreelø køben, Jordán pi tru pørr kal-labgatøreelø køben, tirosreelø køben, sidónsreelø køben, truba nu ashchab amrrubelø kòn. ⁹ Incha tru treg nu misakkurri Jesúsbe nui kusrenanøb pera uniilan kan barco ke tamara tøgagønrrai eshkabig kòn, tru nu misag nun menrra trag marmønrrai. ¹⁰ Kaguende Jesúsbe kwanreelan truba truba tamarin køben, mayan kwanreeløba katøranrrab nuimaygøba kemallchab tranrabelø kòn.

¹¹ Inchen trømbøig maringarub kwaimandziimera nun ashippe, nui merrab tømønnsra, trenchib trashibelø kòn:

—Ñibe Tiuswei Nusrkain kòn— chib.

¹² Inchen Jesúsbe nune mu kòn cha, mun køben misaameran mørø waminchimønrrain karubig kòn.

*Jesús nòashib karua òramelan doce lawa pònsròb
(Mt 10.1-4; Lc 6.12-16)*

¹³ Incha Jesúsbe kan tunsrò nebya, nò wamònrab asiilan wamòben, nòmbe nuimay amrrubelò kòn. ¹⁴ Incha doce wesrawa pònsra treeg kòrròmara, ilane nòashib karua òriilò kòn cha, wamabig kòn, nòba amòñibelò kònrainba, katò eshkab kusrenanrab amrrai òramigweyasiiba, ¹⁵ katò kwaimandziimeran webusramig mu chindamgaig maròbelò kònrainba. ¹⁶ Tru doce wesrawa pònsrailòbe iilò kòn: Simón, nundòwei katò Pedro cha, munchi pasrig kòben, ¹⁷ Zebedeawei nusrkai Santiagoba, nui nuneg Juanba, truilane Boanerges cha, munchi pasriilò, tru treeg munchibe: “palaig trashibig taigwei nusrkalò”, ¹⁸ katò Andrés kòben, Felipe kòben, Bartolomé kòben, Mateo kòben, Tomás kòben, Alfeowei nusrkai Santiago kòben, Tadeo kòben, Simón Cananistameraingatiig kòben, ¹⁹ katò Judas Iscariote, tru wendò Jesúswan ashig kòmui inchibelaingatò pasamisra, tranrrabig kòbengue.

*Mòilgòsròn Jesúswan Beelzebúwei maramburab marigwan tògaig kòn chib
(Mt 12.22-32; Lc 11.14-23; 12.10)*

²⁰ Inchen Jesús katò nui kusrenanòb pera unilòba kan yau kebiben, katò misag menrra tinmaròb tulundzunaptò, manrrabguen kaima kòbig kòn. ²¹ Inchen Jesúswei yauelòbe treeg inchib kòn taig wammòrabe, nune merrarra, sruramrrunrab ambubelò kòn. Kaguende lukiaian kòn chib kòben.

²² Inchen tru Moisés pòrigwan kusrenanòbelò Jerusalénsròngurri amrrubelògucha trenchibelò kòn:

—Nugwaimandzig, tru Beelzebúwan tògaig kòn cha. Treekkurri, tru kwaimandziimeran nòasha karubigwan tògaig kua, i mòòbe kwaimandziimeran weeran— cha.

²³ Inchen Jesúsbe nòmun wama, ‘òyeege lataitòwein kòn’ chib, kemesra wamindiilòtòga trenchib waminchibig kòn:

—¿Satanásbe Satanáswandòweimbe chinchawegutthaitamague? cha. ²⁴ Kan rey karub tògaweim pirau misaama nòmasiitò nòòròtò misròb kurrabe, warabig warònrab kaimanrrun cha. ²⁵ Katò kan yauelò nòmasiitò nòòròtò misròb kurrabe, chab pinònrrun cha. ²⁶ Inchawei Satanás nòmasiitòwei nòòrò, nòòrò misròb kurrabe, treegu yandò pasrònrab kaimaben, truyu patsònrrun, chibig kòn.

²⁷ ‘Kabe kan mòikkòben kan mur mòwei yauma kebya, tru mur mòwan lusròbmerrig lusrmòwatòbe, nui chi tògagúilwan kerranrab kaimanrrun cha. Lusra trarratòwei nui chi tògagúilwan kerranrrun chibig kòn. ²⁸ Nabe ñimun cierton trendamònrrun cha: Misamara chi kaig mariilan lata, chigòben Tiuswan purò tròmbòig wamindilan lata Tiusbe kerriguh pesannawa, ulò paymònrrun cha. ²⁹ Trune Espiritu Santon purò tròmbòig wamab waminchibigwane ulò payamigwane managuen pesannamíg kònrrun cha. Treeg kòmòtò, nui kaig marigwan managatig tòga kòrròmistrun— chibig kòn.

³⁰ Jesúsbe òyah chippe, kaguende nòmbe nun tròmbòig maròngarub kwaimandzigwan tògaig kòn chib kòben, trendaig kòn.

*Jesúswei usrimba, nunelòba
(Mt 12.46-50; Lc 8.19-21)*

³¹ Inchen Jesúswei usrimba, nunelòba pua, wambiitò pònrramisra, wamònrab òren, ³² Jesúsweim pòtògatan truba nu purrabelòbe trenchibelò kòn:

—Au, ñui usrimba, ñui nunelòba wambig pònrnan cha, ñun payib.—

³³ Inchen nòbe trencha lòtabig kòn:

—¿Nai usri nai nunelòbe mumera kòh?— cha.

³⁴ Incha nuim pòtògatan purrabelan ashabe, trenchibig kòn:

—Nai usri nai nunelòbe iilò kòn cha. ³⁵ Kaguende mòikkòben Tius maig martrai karuben, treeg maròbig, truike sí, nai nuneg, nai nuchag, nai usrin kòn— cha.

4

*Kan mòg mandò kwaligwan trunun Jesús kemesra wamindig
(Mt 13.1-9; Lc 8.4-8)*

¹ Jesús katò nu pisu menda kusrenanòb mendòben, nò wainug misag truba nu tulundzunòben, treekkurri Jesúsbe pisuyu kan barcoyu kebya wamisren, maya misaabe tru pisu mendatò kòrròmistròbelò kòn. ² Inchen nòbe nòmun ‘òyeege lataitòwein kòn’ chib wamindiilòtòga chineh kemesra, kusrenanòbig kòn. ³ Inchabe nui kusrenanigube trenchibig kòn:

—Iigwan mòray cha. Kan kwallibiima tsuròb kwallchab webyan cha. ⁴ Incha tsuròb ibene, kanbalò yellbe mayu kòrròben, illimera amrrua, man cha. ⁵ Inchen katòganbalòbe srug tròldò pirau pirò tre chiganug kòrròben, pirò palatiig kua, tru yellbe kal-lappe, petò kal-labendò, ⁶ pòrr webarrua, mergurarub, sròl tre chigaig kua, mul-laptindan cha.

⁷ Katøganbalø yellbe kal shau utu kørørøben, kalmera nørørørab mendappe, chab kasrøb tsibishiben, truipe chigucha misrmøn cha. ⁸ Inchen katøganbalø tab pirau kørøabiibe sí, kal-lawa, tabig nørørørawa, truba nu nigan cha. Møiløbe kan yellgurrindø mamig trulzheelø treinta niguen, møiløbe sesenta niguen, møiløbe cien nigan— chibig køn.

⁹ Incha trenchibig køn:

—¡Møramig kalu pønsraibe, mør!— cha.

Mandøgurri Jesús 'igwan øyeeq lataig køn' cha, kemesra wamindig

(Mt 13.10-17; Lc 8.9-10)

¹⁰ Jesús yandø nøtø kørøomisren, tru doce kusrenanøb pera uniiøba kanbalatø Jesúsweim pulu pønrrabeløbe trenchibelø køn:

—¿Tru 'øyeeq lataitøwein køn' chib kemesra wamindiiløbe chi chibig køh?— cha.

¹¹ Inchen nøbe trenchibig køn:

—Tiusbe nø ashib karub wainug mu asiimig tøgagúilan ñimune ashchai tranan cha. Inchendø misaamera nøøreelø truyuilø kømeeelane 'øyeeq lataitøwein køn' chib kemesragøba wamindiiløtøga wamindig køn cha,

¹² nømbe ashippe ashendø, ashmøwa lataig kørøomisrøb;

mørøppe mørendø, chi tainguen mørømøwa lataig kørøomisrøb inchain cha.

Incha isua møra Tiusweimay lliamøwei, nømui kaig mariilan Tius ulø payamigwan pesan-namø,

ulø payamig kønrrain kuig køn— cha.

Tru kwaliibe 'øyeeq lataig køn' cha, kemesra wamindigwan Jesús øyeeq køn cha eshka

(Mt 13.18-23; Lc 8.11-15)

¹³ Incha katø trenchibig køn:

—Ñimgan 'øyeeq lataitøwein køn' cha, tru kemesra wamincha pasrigwane ¿chigúí wetøgørrøtirru? cha. Katøgan 'øyeeq lataitøwein køn' cha, kemesra tru wamindiilangucha kerriguba ¿chinchu wetøgørrørrrague? cha. ¹⁴ Tiuswei wamwan waminchibiibe yellwan tsurøbig lataig køn cha. ¹⁵ Inchen tru mayu kørørab yellmerabe iilo latailø køn cha. Nømbe Tiuswei wamwan møren latatø, Satanásbe arrub, tru tab wamwan nømuiug ellmarigwane kerran cha. ¹⁶ Inchen tru srug trøldø pirau pirø tre chiganug tsuri yellmera latailøbe iilø køn cha: Tiuswei wamwan møra, tru urastøbe truba tab kui utøbendø, ¹⁷ nømasiitø srøl tre umbu keetiimeelø kua, maya yanaguen amøñimøn cha. Incha tru Tiuswei wamgurrindø chigøben puben, katø chigøben kaig nebub arruben, nømbe mõi møin elachiptindan cha. ¹⁸ Inchen katøganløbe tsuren, tru kal shau utu kørørab yell latailø køn cha. ¹⁹ Tiuswei wamwan mørøppe mørendø, i pirau chine købigwan menrra isubiibah, nømui chine palømø tøgagúilø purø tabig lataig asønaikkurrimba, trugurri chine tøgagømmørø chull inchi isuiløbatø Tiuswei wamwan mørigwane kerrigu truitø kasrøben, chigucha nømbe ellmarig misrmøn cha. ²⁰ Inchen tru tab pirau tsuriløbe tru Tiuswei wamwan møra, ellmarig misrøbelø, truilø køn: kan trulzhikkurrindø treinta, kabe sesenta, kabe kan trulzhikkurrindø cien nigabelø latailøgue.—

Lámparan kemesra wamindig

(Lc 8.16-18)

²¹ Katø Jesúsbe trenchibig køn:

—¿Kabe kan lámparanma køtsø umbu pasrtrab, kabe cama umbu pasrtrab srua kerrubelø kuitarru? cha. Treeg kømøtø, ¿tør kønrraimbe, pala pasramig kømuitarru? cha. ²² Chigøben sørig pasrabiibe søriitø pasrømøtø, kenamaramig kønrrun cha. Katø chinchaguen asamgaig kasra pasrigwane ashchai tøryu wesraig kønrrun cha. ²³ Møikkøben møramig kalu pønsraig kuabe, mør— cha.

²⁴ Incha katø trenchibig køn:

—Ñim chi mørigwane tab isua kuy cha. Ñim kanelan maig unaasha traniibe, ñimungucha treetøwei unaasha trana, ñimune nemariibaguen tranrrun cha. ²⁵ Kaguende tøgagigwane masken tranen, trune chigagigwane nui lamøttiig tøgagúigwanguen kerranrrun— cha.

Yell nurab lataitøwein køn cha, kemesra wamindig

²⁶ Jesúsbe katø trenchibig køn:

—Tius nø ashib karub pasraibe kan møg pirau yellwan tsuri lataig køn cha. ²⁷ Incha kib tsui lata, kurra uni lata, yem kui lata, kwaløm kui lata, yellbe kal-lawa nuran cha, møøbe mandø indinguen ashmøwatø. ²⁸ Kaguende pirøbe nøasiitø mamig ninguingarubig køn cha. Srøsrøbe ishiimerrig kal-laben, trugurrimbe urø weetøben, urøyube tulmera netsan cha. ²⁹ Inchen yandø trul srønøben latatø, usestøga paran cha, kaguende yandø param kwaløm puin køben.—

Iibe murtasa yell lataitøwein køn cha, kemesra wamindig

(Mt 13.31-32; Lc 13.18-19)

³⁰ Katø Jesúsbe trenchibig køn:

—¿Tius nø ashib karub pasraibe chi lataig asøna cha, kabe chiwan kemesra, ‘øyeeg lataitøwein køn’ chinrrab køh? cha. ³¹ Kan murtasa yell lataig køn cha. Tsurøb uras trube yu pirau maya yellmerai utu purø lamøzhig købendø, ³² tsurinukkurrimbe shush mamig tusrmerai utu katøguchinguen palaig nu tusr-unø srarmerabaig nuraben, illimera pala amøñibeløguen truyu le martrun— cha.

Jesús ‘iibe øyeeg latailø køn’ cha, kemesra wamindig

(Mt 13.34-35)

³³ Jesúsbe Tiuswei wamwan øyamay kusrennøbig køn, ‘øyeeg lataitøwein køn’ chib, truba yambalø kemesra eshkab. Møi eshkaig latailø, nøm mayangatig chigúi nebua mørtrapteelø køben, treetøh marøbig køn. ³⁴ ‘Øyeeg lataitøwein køn’ chib kemesrømøbe, waminchimig køn. Inchendø nui kusrenanøb pera unilane nømundø nøørø kerrigu tør marøb eshkabig køn.

Isig ichibigwanba, pi welar kurrabigwanba Jesús pasramisringarub

³⁵ Incha tru kwalømdøwei yandø pilliraben, nui kusrenanøb pera unilan trenchibig køn:

—Pisu ambøgatøsrømay larraamun— cha.

³⁶ Inchen nømbe misagwan ‘ungwa’ cha, Jesúswan tru nø waig barcoyutøwei pera aben, katøgan barcomeragucha lincha ambubelø køn. ³⁷ Inchen truba mur isig ichibig webarruben, pi welarmerabe barcoyu keguchen, yandø ke pitø netsab arruben, ³⁸ Jesúsbe wendau kan labzhigu ne kib waben, nømbe kasrønabbe trenchibelø køn:

—¡Au, Kusrennøbig! ¿nam asentanrreenchib melamne, ñigan isubguengaig watirru?— cha,

³⁹ Inchen Jesúsbe kurra, isigwan kønømnørrai kandø wama, piwane trenchibig køn:

—¡Wanrømmø, møi møi wasrørau!— cha.

Inchene isiibe pasramisren, yandø kerrigu wasrønzhig kørrømisrøbig køn. ⁴⁰ Inchen Jesúsbe nui kusrenanøb pera unilan:

—¿Chindimbarre kørig køta? chibig køn. ¿Ñimui isubigwan nainuutø pasra kømeeelø kø chindah?— cha.

⁴¹ Inchen nømbe truba kwaariilø kørrømisra, kangurri kangurri trenchibelø køn:

—¿Iibe mu kerah cha, isig ichibig lata, mar lata, nun mørtrappe?—

5

Gerasariig kwaimandzig tøga møg

(Mt 8.28-34; Lc 8.26-39)

¹ Pisu ambøgatømayrø larraamba, Gerasa pirausrø puben, ² Jesús barcoyugurri webiben latatø, kan møg trømbøig maringarub kwaimandzig tøgagig sørin trabmerayugurri webarrua, Jesúswan kemallibig køn. ³ Tru møøbe sørin tulyutø tsubig, muguen lusrtrab kaimaig købig køn, ni cadenastøgaguen. ⁴ Kanmaybe søbmeran tasiimeran cadenastøga køben, katø chitøga køben lusrendø, lusrimørig pitischig marøb lurren, muguen kaimabelø køn. ⁵ Incha yem kwaløm chu uragucha tunmerasrø, sørin tulmerasrø trashib, sruutøga nøasiitø kørriinchib uñibig køn. ⁶ Incha Jesúswane yabgurrindø asha, lula, nui merrab tømboñsra, ⁷ trenchib trashibig køn:

—¿Ñibe nane chi martrab inchigu? cha, Jesús, Tius Mayeelaim Pala Pasrabigwei Nusrkai. Purø trømbøig møra megamig kømønrrai Tiuswei munchiyu ka købash cha, chib miarrumøn— cha.

⁸ Pøs øyeeg chippe, kaguende Jesúsbe:

—¡Ñi, trømbøig maringarub kwaimandzig, i møweinukkurri webinrrø!— chib pasrøben, trendaig køn.

⁹ Inchene Jesúsbe nun trencha payibig køn:

—¿Chi munchi kugu?— cha

Inchen nøbe:

—Legiøn munchi kur, chibig køn. Kaguende nambe purø nu ker— cha.

¹⁰ Inchabe tru piragurri nøørø peesrømay ørmørrurrig chib, Jesúswan truba truba rugabig køn. ¹¹ Inchen tru tun puluwan kuchimera lawa mab truba nu amøñibelø køn.

¹² Inchen tru kwaimandziimerabe rugab trenchibelø køn:

—Kuchimeraimay ambingarurra cha, nam truilainug kebamrrab— cha.

¹³ Inchen Jesúsbe ka kebambashen, trømbøig maringarub kwaimandziimerabe møweinukkurri webamba, kuchimerayu kebambene, truyu kuchimerabe pa milburab

warabeløbe truba trømbø lendeyu lula, chab pinøgørraptincha, larrø nu pisuyu kegørra, pi keesra, chab kwabelø køn.

¹⁴Inchene kuchi ashibeløbe kwaariilø lula, puebloyu køben, wambig nøørowansrøn køben eshka ambubelø køn. Inchen misaamerabe chi purayaigwan ashchab amrrubelø køn.

¹⁵Incha Jesús waisrø pubene, tru kwaimandzig tøgäig købiibe møimbe køsaatiig kømø, keweig, tabig wai ashabe, truiløbe kørig kui inchibelø køn. ¹⁶Inchen tru kwaimandzig tøgäig købigwanba, kuchimeranba maig purayaigwan ashibeløbe nømun eshkaben, ¹⁷nømbe Jesúswan nømuim piraugurri 'irra' chib truba rugabelø køn.

¹⁸Inchen Jesús barcoyu kebibene, tru kwaimandzig tøgäig købiibe:

—¿Ñui mendig arruah?— cha, truba inchen,

¹⁹Jesúsbe arrubashmøtø, trenchibig køn:

—Ñui yamay inrrø cha, ñui yau misaameraimay Señor ñun yeeg nørrig mara, mandø lastima asigwan nømun eshkanrrab.—

²⁰Inchen tru møøbe ya, Decápolis pueblosrø Jesús nun yeeg nørrig marigwan truba eshka mendøbene, mayeeløba kwaara ashibelø køn.

Jesús kan ishuwan kwanrrøwan tamarøb

(Mt 9.18-26; Lc 8.40-56)

²¹Jesús barcoyu katø pisu ambøgatømay larraibene, nuim pøtøgatan misag truba truba nu tulundzunøben, nøbe pisu mendatø kørrømisrøbig køn. ²²Inchen judíosmera tulundzuni yau ashib karubig, Jairo taig, puabe, Jesúswan ashippe, nui srøb pulu tømønnsra, ²³arrubsumugu chib truba inchib, trenchibig køn:

—Nai nimbasr-unø kwanrrab inchib tsun cha. Kwanrrø tammisren, katø øsig uñchai ñui tasigwan nuim pala estsartrab attra— cha.

²⁴Inchen Jesúsbe nøba iben, menrra misag mendig ambuptø nun trag maren, ²⁵tru misag utube kan ishug doce años ørøba ani ib kwanrrø tøgäig kua, ²⁶chu uraskucha purø trømbøig kui uña, mø marøbelai yam tasku pureb megawa, nui chi tøgäigüigwan kerrigu patsøgøben, chiweingucha puraimø, kwanrrøbe masken inchib iben, ²⁷Jesúswan wamindi mørøppe, tru ishuube misag utu wendaugurri Jesúsweim pulu kemallippa, nø kewagüigwan katørabig køn. ²⁸Kaguende nøbe treeg isubig køn: “Kewagüilandøguen katøraitø, tammisrig kørrømisramønrrun” cha. ²⁹Inchen tru ani ibiibe mõi mõi pasramisrøptinchen, asru nui kwanrrøbe yandø purayai møren, ³⁰Jesúsbe nø mun køsrøn nui maramburab mariitøga tamarøbrain kui mørabe, nu misag sötøwan keeshabe, payibig køn:

—¿Na kewagüigwane mu katørah?— cha.

³¹Inchene nui kusrenanøb pera uniiiløbe trenchibelø køn:

—Misag sötø yeeg trag mari ashatø, ñibe: “¿Mu katørah?” taibe— cha.

³²Inchen Jesúsbe mu katøraitashchab ambumay, imay ashene, ³³tru ishuube kørig købiitø itønab, nun maig purayaigwan møra, ya, Jesúswei merrab tømønnsrøb srala, isømø, kerriguwan eshkaben, ³⁴Jesúsbe trenchibig køn:

—Nimbasr; ñui isubigwan nainuutø pasra tøgäigüikurri tamarig kørrømisran cha. Chi isumø, inrrø cha. Ñui kwanrrøbe yandø purayaig køn— cha.

Jesús Jairoi nimbasrwan øsiiranøb

³⁵Trune Jesús waminchib pasramnetø, tru judíosmera tulundzuni yau ashib karubigwei yaugurri møiløgøsrøn amrruppe, unai møskawane trenchibelø køn:

—Ñui nimbasrbe kwabguen indan cha. ¿Kusrennøbigwan mas chinrrabrre øyeeg chigu?— cha.

³⁶Inchen nøm trenchib kuingucha Jesúsbe trunun mørøb pasrømøtø, tru tulundzuni yau ashibigwane trenchibig køn:

—Chi kørig kui inchimøtø, køreptø køreu— cha.

³⁷Incha mas mungucha amrrubashmøwa, Pedronbah, Jacobonbah, Jacoboi nuneg Juanwanbatø amrrungarubig køn. ³⁸Incha tru judíosmera tulundzuni yau ashibigwei yau puabe, ke chindi asamgaig misaabe kishib, müirab, trashib inchib kui ashabe, ³⁹Jesúsbe kebya, trenchibig køn:

—¿Chindimbarre øyeeg inchib, kishib køh? cha. Unøbe kwaig kømøtø, ka kiptø tsun— cha.

⁴⁰Inchen misaamerabe Jesúswane ka indzatø mørøbelø køn. Inchen Jesúsbe mayeelan mõi mõi webamingarua, møskawanbah, usranbah, tru nøba ambubelanbatø pera ya, tru ishug-unø tsuinug kebya, ⁴¹tasigu kemørabe, trenchibig køn:

—Talita, cumi— cha. (Trenchippe: “Ishug-unø, ñun kurrø char” chib.)

⁴²Inchene tru doce años tøgä ishug-unøbe mõi mõi kurrappa, llirab mendøben, misaamerabe truba truba kwaara asha kørrømisrøbelø køn. ⁴³Inchen Jesúsbe mun køben eshka kønrrab kømø cha, unan mamig srøttrai karubig køn.

6

*Jesús Nazaret pueblosø
(Mt 13.53-58; Lc 4.16-30)*

¹ Jesúsbe truyugurri webya, katø nui pirausrømay iben, nui kusrenanøb pera uniiløbe nøba ambubelø køn. ² Incha isrin kwaløm pubene, Jesúsbe judíosmera tulundzuni yau kusrenanøb mendøben, møiløgøben mørøbeløbe truba kwaara asha, trenchibelø køn:

—¿I møøbe Kerrigube churre øyeg kusreh? cha. ¿Iig nui øyeg truba truba kusreibe chiguerah? cha. ¿Kan i møg nui tasiimeratøga maramburab mariilø yeekkucha kuita! cha. ³ ¿Iibe tru tsiimeratøga chine marøbig kømuitarru? cha, tru Mariai nusrkai. Katø ¿Santiagoimba, Joséweimba, Judasweimba, Simónweimba nøbe nuneg kømuitarru? cha. ¿Yamba nui nuchaløgucha yu namui ututøwei warabelø kømuitarru?— cha.

Treekkurri nømbe nune chinetø cha mørøbelø køn. ⁴ Inchen Jesúsbe trenchibig køn:
—Chutøgucha peesrømbe Tius maig karuigwan eshkabigwane tab indan cha. Trune nui piraueløba, nømmissaameraba, nui yaueløbabe chi tab inchimøn— cha.

⁵ Incha truyube maramburab marig chi martrab kaima, mamdø kwanreelan nui tasiitøga estsara, trutøh tamarøbig køn. ⁶ Inchen Jesúsbe yeekkucha køremø misaamera kønrrabmak be kwaara ashibig køn.

*Jesús nui doce pera uniilan kusrenanrrai ørøb
(Mt 10.5-15; Lc 9.1-6)*

Incha Jesúsbe tru puluwan yamera tsitsø pønrrabwan kusrenanøb uñibig køn. ⁷ Incha nøbe nui doce kusrenanøb pera uniilan wama, pagatø, pagatø ørøb menda, trømbøig maringarub kwaimandziimeran mu chindamgaig marøb amrrai tranøbig køn. ⁸ Incha treeg karubig køn:

—Mayuweimbe chigucha sruammønrrain cha. Kan pøtønain tsiitø srua amrrain cha. Pirri srua ammøwei, wasr ila ammøwei, pørønailøyu an pusra ammøwei inchain cha. ⁹ Alpargatistø keeta amrrain cha. Pala itøgueikkucha yunømaramiba kømøtø, kandø kewa amrrain— cha.

¹⁰ Incha Jesúsbe katø trenchibig køn:
—Nim kan yau kebambuppe, tru puebloyugurri ambamnegatig kørrømisstrigay cha. ¹¹ Inchen ñimun wamømøwei, ñimun mørøg kømui indinuube, trube, tru puebloyugurri webamrrappe, ñimui srøbyu usrøwan chishtø kørrøgønrrigay cha. Treeg marøppe, trube: “Ñim kaasig købene, mømimbe ñim kusrenrrigay” chib eshkab.—

¹² Inchen nømbe webamba, misagwan:
—Nim kaig mariilan isua mørøb, Tiusweimay lliray— chib eshkab kusrenanøbelø køn. ¹³ Incha misagweinukkurri kwaimandziimeran truba yam webetab, truba yam kwanreelan aceite srøla, tamarøb inchibelø køn.

*Juan Bautista kwaig
(Mt 14.1-12; Lc 9.7-9)*

¹⁴ Aey Herodesbe Jesúswan wamindi mørøbig køn, kaguende Jesúswei munchiwane misaamerabe nun, nun waminchib køben. Inchen møiløbe trenchibelø køn:

—Juan Bautista kwailai utugurri katø kurriinrrun cha. Incharre tru maramburab øyeg maramig tøgagig kuinrrun— cha.

¹⁵ Inchen katøganeløbe trenchibelø køn:
—Tius maig karuigwan eshkabig Elías kuinrrun— cha. Inchen kaneløbe:
—Nøbe Tius maig karuigwan eshkabig kuinrrun, chibelø køn, tru møikkøben merrab-sreelø lataitøwei.—

¹⁶ Inchen Herodes trunun mørøbe, trenchibig køn:
—Iibe Juan, na tru turwan paringaruiig kuinrrun cha. Mømimbe kwailai utugurri katø kurriinrrun— cha.

¹⁷ Kaguende Herodesbe tru Juanwane kemøringarua, kailan keeri yau lusra wan-ningaruiig købig køn, tru nui nuneg Felipei srai Herodíaskurrindø. Tru Herodíasbe Herodeswei nuneg Felipei srain købig køn. Inchen Herodesbe truwane nui srai marin køben, ¹⁸ Juanbe Herodeswane trenchibig køn:

—Ni ñui nunewei srawan ñui srai mara tøgagømibe merig pasran— cha. ¹⁹ Inchen tru ishug Herodíasbe Juanwan tsalø køptø kwetchab inchendø, kaimabig købig køn. ²⁰ Kaguende Herodesbe Juanwane sølgandø tabig, katø Tiusweindø tarømari møg kwaasha, køriimata, trugurri nune mu chinchimønrrai ashib tøgagøbig køn. Incha Herodesbe Juan wamingdigwane mandøguen kømui inchendø, tammay ka mørøbig køn. ²¹ Indiibe Herodíasbe Juanwan maig maramigwan yandø treeg maramdiig puin kui ashibig køn. Kaguende Herodesbe tru chiwangucha nøm asha karubelaimba, suldaumeran

karubelø nørreaimba, Galilea mas kusreb mōguelaimba nui kal-lain kwalømwān isub kasrag waram kwaløm tabig maren, ²² mōimbe Herodíaswei nimbasrbe truyu kebya, pailaben, Herodeswanba, truyu mab purrabelanba tru pailaibe truba tabig asōnaben, reybe tru srusrane trenchibig kōn:

²³—Ñun chi miag kōbendø, miarra cha. Na tranrrumōn cha. ¡Katø! ñune tranmø kōmø, nabe trunūn tranamōnrrun chib. Ñi chi miaben, tranrrumōn cha. Na muburab ashib karub waigwan tōbøtakkatikken tranrrumōn— chibig kōn.

²⁴Inchen nimbasrbe webya, usran:

—¿Chi miamø?— cha payen, usri Herodíasbe trenchibig kōn:

—Juan Bautistai turwan miau— cha.

²⁵Inchen tru srusrøbe tru urastø tru rey waisrø petøzhiitø kebyabe, trenchib miabig kōn: —Mōindøwei Juan Bautistai turwan kan platilloyu srua arruabe, srusran tranen, nōbe usran tranøbig kōn. ²⁹Inchen Juanwei mendig amōñibelø iigwan wammørabe, amrrua, nui asrwan kusrua, srua amba sōrabelø kōn.

²⁶Inchen reybe truba truba isui inchendø, tru mayeelø lincha purrabelai malau 'treeg tranrrumōn' cha, tranrrrab misrig kōppe, tru miaigwan ka chimø, ka tranøbig kōn. ²⁷Incha tru urastø reybe kan suldauwan Juanwei turwan para, srua arringaruben, ²⁸ truike tru kailan keeri yaumay ya, Juanwei turwan para, kan platilloyu srua arruabe, srusran tranen, nōbe usran tranøbig kōn. ²⁹Inchen Juanwei mendig amōñibelø iigwan wammørabe, amrrua, nui asrwan kusrua, srua amba sōrabelø kōn.

Jesús tratrø mil mōguelan manrrai tranøb

(Mt 14.13-21; Lc 9.10-17; Jn 6.1-14)

³⁰Inchen Jesús nōashib karua øriilø katø amrrua, nōba tulundzuna, nōm chi marigwanba, kusrenanigwanba kerriguh eshkaben, ³¹ Jesúsbe trenchibig kōn:

—Nøørørø mu misakkasrø kuchi isrōnrrab ñimbe amrruy— cha.

Kaguende menrra misag kōptø amben, amrruben inchen, nōmune mab purramikken nebumiig kōn. ³² Incha Jesúsba, nui nōashib karua øriiløba nōmdø kan barcoyu mu misakkasrømay ambubelø kōn. ³³ Inchen mōiløgøben nōm amben asha, Jesúsban mu kui nebua asha, chu puebløuelø kōben trusrømay lula, nōmmerrig pubelø kōn. ³⁴ Incha Jesús barcoyugurri pinaya, truba nu misag pasrai ashabe, lastima isui inchibig kōn, kaguende nōmbe ubishamera mu ashchabig chigar latailø kōben. Incha chine truba kusrenanøb mendabig kōn. ³⁵ Inchen yandø menrra maaben kōben, nui kusrenanøb pera uniløbe Jesúsban kemallabe, trenchibelø kōn:

—Yube mu misakkanug kōn cha. Inchagucha yandø kwa maaben kōn cha. ³⁶ Misagwan amrrai, 'ungwa' chi cha, chugøben nøørørøsn kōben, puluwandø yamera pōnrrabsrøn kōben amba, nōmuyasig chigøben pena manrrain— cha.

³⁷Inchen Jesús lōtappe trenchibig kōn:

—Manrrai ñim manray— cha.

Inchene nōmbe trenchibelø kōn:

—¿Manrrai mannamig kan mōg doscientos días ørøba marøb megawa an pagaraig utiitøga pirrim penōnrrab ambam nebunrrautah?— cha.

³⁸Inchen Jesúsbe trenchibig kōn:

—¿Ñimbe mam pirrim tōgagøgue? cha. Ashchab ambay— cha.

Inchen nōmbe ashabe, trenchibelø kōn:

—Tratrøgatø pirrimbah, pagatø peskaubatø tōgaguer— cha.

³⁹Inchen Jesúsbe misaameran kan sōtø, kan sōtø pillim pubilayu purramisringarubig kōn. ⁴⁰ Inchen kan sōtømørig cienbatø, cienbatø purramisren; kan sōtømerabe cincuentabatø, cincuentabatø purramisrøbelø kōn. ⁴¹ Inchen Jesúsbe tru tratrøgatø pirriwanba, pagatø peskaumeranba nui tasku muta, srømbalaneb neesha, Tiuswan 'mayanguen pay' chabe, pirrimera pirisha, nui kusrenanøb pera unilan misagwan pirishinrrai trana, katø tru pagatø peskaumerangucha mayeelan pirishinrrai tranøbig kōn. ⁴² Inchen mayeeløba øska ma kōrrømisren, ⁴³ tru pirrim pitis, peskau pitis pirisaig undailan tasinmerayu tulishiben, tasinmera doce netsabig kōn. ⁴⁴ Inchen tru pirriwan mabeløbe mōgueløtø tratrø mil kōbig kōn.

Jesús pi palawan arrub

(Mt 14.22-27; Jn 6.16-21)

⁴⁵ Incha tru urastø Jesúsbe nui kusrenanøb pera unilan pisu ambøgatø Betsaidasrømay merrab amrrai barcoyu nebamingarubig kōn, nø tru nu sōtø misagwan 'ungwa' chib pasrappatø. ⁴⁶ Incha yandø misagwan chab 'ungwa' chabe, tunsrø Tius Mōskaimba waminchab ibig kōn. ⁴⁷ Incha yem kōben, barcobe chabguen pisu tōbøtaasrønguen iben, Jesúsbe nōtø pirau kōrrømisrøbig kōn. ⁴⁸ Inchen kaguen isiibe nōmui malaugøba megambub ichen, nōmbe barcoyu amrrab kaima, muraaraig remab melai ashib pasrabig kōn Jesúsbe.

Incha lōtsōzhig yemdō nōbe pi palawan katsikka nōmuimay kemallib ya, purab inrrab lataig inchen, ⁴⁹ pi palawan arri ashippe, nōmbe mōsig kōnmab isua, trashibelō kōn. ⁵⁰ Kaguende mayeelōba ashagurri purō trōmbōig kōrig kui inchen, Jesūsbe mōi mōi nōmune waminchib trenchibig kōn:

—iKōrmō, mur isua purray! cha. Na kur cha. Kōrig kui inchimōtay— cha.

⁵¹ Incha nō barcoyu nebibene, isiibe wasrōngandō pasramisrōptinchen, kan oyeebe chi maig kernab nōmbe truba kwaarōbelō kōn. ⁵² Kaguende tru pirriwta oyeeg marigwanma katōgucha nōmbe tab chigūi mōrmōwa kōrrōmisrin kōbig kōn, larrō mur manrrōmera tōgar srō kua.

Jesūs Genesaretsrō kwanreelan tamarōb

(Mt 14.34-36)

⁵³ Incha yandō tru pisuyu chab larraamba, Genesaret pirausrō pua, truyu barcon pi menda licha pasrōbelō kōn. ⁵⁴ Incha barcoyugurri nōm webamben latatō, misaamerabe Jesūs kui nebua asha, ⁵⁵ nōmbe tru pirau truōrō lula, Jesūs chu wan taig mōrōppe, trusrōmay kwanreelan tsigalyu muta, amrrub mendabelō kōn. ⁵⁶ Inchen Jesūsbe yamera tsitsō pōnrrabsrō, pueblomerasrō, wambig nōrōsrō chugōben kebibene, penab, yanōb indiisrō kwanreelan wara:

—Ni pala itōgewa kuig urōzhigwandōguen namun katōrabashcha— chib, Jesūsuan rugabelō kōn.

Incha mayeelōba katōrabelōbe yandō tamariilō kōrrōmisrōbelō kōn.

7

Fariseosmerai kusrenaniilō

(Mt 15.1-20)

¹ Inchen fariseosmeraba, Jerusalēngurri amrrubelō mōilōgōsrōn tru Moisés pōrigwan kusrenanōbelōbabe Jesūsweim pulu kemallibelō kōn. ² Incha truilōbe Jesūswei kusrenanōb pera unilō mōilōgōsrōn nōmui tasigwan kinōmō mai ashibelō kōn, tru kaigwan chish misrōb chib, tasig kinigwan. ³ Kaguende fariseosmeraba, maya judiōsmeraba merrab-sreelō maig marōb, amrruilane ke tindōga pōnrrabelō kua, maig taigwan tasigwanmerrig kinōmuppe, mameelō kōn. ⁴ Katō penab, yanōb indiisrōngurri amrrua chigucha, tru tasig kinōnrrain taigwan kinōmuppe, mameelō kōn. Katō nōmbe chigōben katōgan trendō treeg mariilan pesannamō marōb tōgagōbelō kuabe, mutsim pasumeran pillmab, katō kōtsōmeran, tsandzōn nindaameran pillmab, manrrab purramisriilan chishmarōb inchi-belō kōn. ⁵ Incha fariseosmeraba, katō tru Moisés pōrigwan kusrenanōbelōbabe Jesūsuan trencha payibelō kōn:

—iNui kusrenanōb pera unilōbe namui merrabsrō kōlleelōgurrimbunō trendō treeg marōb amrruig kōbigwan treegwan marōb amōñimōtō, kaigwan chish misrōb tasigwan kinōmō, maptō manrrappe, chindimba treelō kōh?— cha.

⁶ Inchene Jesūsbe trencha lōtabig kōn:

—Tru Tius maig karuigwan eshkabig Isaiāsbe ñim palatō tabelaimburab maig kōnrrabigwan kanmaytō trenchippe, sōlwein tain kōn cha, oyah chib pōrōppe: I misaamerabe nane ka triitōgatō tab inndan cha.

Inchendō nōmui manrrōbe nainukkurrimbe yab pōnrran cha.

⁷ Nan kōriibala tabig waminchib taibe chiweingucha chi tabig marig kōmōn cha, mōguelō martrai karua pōnsrailan oyeeg maramig kōn chib kusrenanōb.

⁸ Kaguende ñimbe Tius maig maramigwan martrai pōnsraigwan elacha, mōguelō ka trendō treeg marōb tōgagūilangōba kebasrōbelō kōn— cha.

⁹ Incha katō Jesūsbe trenchibig kōn:

—Ñimbe ñim trendō treeg marōb kuilan tōgagōbig tōgagug kōptō, Tius maig maramigwan martrai pōnsraigwane elachippa, mōguelō marōb amrruigwangōba marōbelō kōn cha.

¹⁰ Kaguende Moisésbe trendaig kōn: “Nui mōskai, ñui usrane maig kōbash inchimō, tab indamig kōn” cha. Katō: “Mōskawan kui, kabe usran kui trōmbōig neburrai wamabig-wane trunune kwanrrai pasrig kōnrrun” cha. ¹¹ Trune ñimbe trenchibelō kōn: “Kan mōōbe mōskawan kui, kabe usran kui trenchinrrun cha: ‘Na ñimun purugumig tōgagūibe *Korban* kōn cha, (trenchippe, “Tiuswan keta, tranig kōn” chib) ñimune purugunrrab kaymamōnrrun’ chinrrun” cha. ¹² Treeg chippe, yandō ñimbe usri mōskawane isua ashib purugumibe chi palōmōn tan cha. ¹³ Treekkurri Tius martrai karua pōnsraigwane chigucha kōmīg kui lataig mara srua kōn cha, ñimui kusrenaniilō kanun kanun puraarrub arrub-itōga. Incha ñimbe katōgan oyeelō latalitōtōwei truba marōbelō kōn— cha.

¹⁴ Incha katō Jesūsbe misagwan nuimay wama, trenchibig kōn:

—Ñim mayeeløba nan mørøb, katø chigúi mørøb inday cha. ¹⁵ Chitøgucha mowan wambikkurri kebibiibe truigwane kaig trømbøig marøb mindishinraamøn cha. Møwei manrrøygurri webarrubiibe sí, nun trømbøig marøb mindishibwei indan cha. ¹⁶ jMøikkøben møramig kalu pønraig kuabe, mør!— chibig køn.

¹⁷ Incha Jesús misagwan tarømisra, kan yau kebiben, nui kusrenanøb pera uniiløbe:

—¿Tru 'øyeeg lataitøwein køn' chib kemesra kusrenanigwan chi chibig køh?— cha payene, ¹⁸ nøbe trenchibig køn:

—¿Ñimgucha chigúinguen mørmøwa pønrrøtirru? cha. ¿Mowan chitøgucha wambikkurri kebibiibe kaig trømbøig marøb mindishimíg kui ashmeelø køtirru? cha. ¹⁹ Kaguende manrrau kebimøtø, patsau kørroya, katø asrugurri webinrrun— cha.

Igwan øyah chippe, chi mamitøgucha kaig marmíg 'chishelø' køn, chibig køn. ²⁰ Incha katø Jesúsbe trenchibig køn:

—Møweinukkurri webarrubiibe sí, nune kaig trømbøig marøb mindishibwei indan cha. ²¹ Kaguende umbu manrraugurri webarrubiibe sí, kaig isuilø køben, ishumburba, møgueløba trømbøig maramelø køben, nilamelø køben, kweetsamelø køben, kasharawarmera peebe itølulamelø køben, ²² katøganuiwan tøgagønrrab isumelø køben, trømbøig kaig maramelø køben, may wamincha isamelø køben, chine kaig marøg købiitø srua yaig kømig køben, chigurrin køben pusrkwai asamelø køben, chi purayailan trømbøig wam kusramelø køben, ke purø nuig kømmøø indamelø køben, chigúi mørmíg lataig unamelø køben werrun cha. ²³ Iiløbe sí, kerriguba umbugurri webarrubig kua, mowan kaig trømbøig marøb mindisha kørømaran— chibig køn.

*Judío kømø ishug nui isubigwan Jesúsweinuutø pasra tøgagøb
(Mt 15.21-28)*

²⁴ Incha Jesúsbe kurra, truyugurri Tiroba, Sidónba, tru ciudadamera pønrrab piraumayba yabe, kan yau kebya, mugucha wammørmønrraimab isubig køn. Inchendø trubønrrab kaimabig køn. ²⁵ Inchen trømbøig maringarub kwaimandzig kebyainab ishug-unai usri, tru urastø wammørab, arrua, Jesúsweim pulu tømønrsøbig køn. ²⁶ Tru ishuube griega Sirofenicia pirausriig købig køn. Truibe arrua, nui nimbasrweinukkurri kwaimandzigwan wegutcha chib, Jesúswan miab megaben, ²⁷ Jesúsbe trenchibig køn:

—Nusrkalømerrig pirriwan mamne mabash cha. Kaguende pirriwan uregwan kerrawa, wera-ureezheelan kebusramibe søl kømøn— cha.

Inchene ishuube trenchibig køn:

²⁸ —Øø, Señor, pøs treebe treegwein køn cha. Inchendø tru mishatsig umbu wera-ureezheeløguen pitischigwan man cha, nusrkalø kørøgaigwan.—

²⁹ Inchen Jesúsbe trenchibig køn:

—Ñi ya may isua tab løtiitøgabe, møimbe inrrø cha. Tru kwaimandziibe ñui nimbasrweinukkurri webyainguen køn— cha.

³⁰ Inchen nøbe yau pubene, kwaimandziibe unainukkurri webyainguen køben, nui nimbasr-unøbe camayu tsuin købig køn.

Kalu mørmøwei, waminchimøwei inchibigwan Jesús tamarøb

³¹ Jesús katø Tiro piraugurri webya, Sidónwansrø pureb ya, trugurrimbe Decápolis pirau pueblomerawan puraarrub arrua, Galilea nu pisuyu pubig køn. ³² Inchen truyube kan møg kalu mørmøwei, tør waminchimøwei inchibigwan srua amrrua, truba inchibelø køn:

—Ñui tasigwan nuim pala estsarøbsrumuguh— chib.

³³ Inchen Jesúsbe menda nørøsrø pera ya, tasig-uregwan kalumerayu keera, ilimbi tucha, niløwangucha katørawabe, ³⁴ srømbalaneb neesha, nu israbe, trenchibig køn:

—jEfata!— cha, (trenchippe, “¡Kur!” chib).

³⁵ Inchene tru mørtrab kaimabigwein kalumerabe møi møi kuren, nilø kemendikkucha kønab tammisren, yandø tab waminchibig køn. ³⁶ Inchen Jesúsbe nømunne mungucha waminchimønrrain karua, maya eshkamønrrain taingucha, nømbe masken wam larrøbichibelø køn. ³⁷ Incha misaamerabe truba kwaara ashib trenchibelø køn:

—Chiwandøgucha nøbe tab maran cha. Kalugarwanguen møringarub, waminchimeelanguen wamingarub indan— cha.

8

*Jesús misag pib milwan manrrai tranøb
(Mt 15.32-39)*

¹ Tru kwalømmerawan misag truba nu tulundzuna pasrøben, mamibe chigucha kaaben, Jesúsbe nui kusrenanøb pera uniilan nuimay wamabe, trenchibig køn:

²—Misaameran lastima kōtan cha. Chabguen yu pōn kwalōmguen naba warōwa, yandō chi mamig chigar kōn cha. ³Chi mameelan na nōmui yamay ka ambashendōbe, mayu parōgwab chab pesannanrrun cha. Kaguende kan utuelōbe yabsrōngurri amrruar kōn—cha.

⁴Inchen nui kusrenanōb pera uniilōbe trencha lōtabelō kōn:

—¿Yu ya mu misag warōmōnuube pirri manrrai nōmun chinchā srōttrab?— cha.

⁵Inchen Jesúsbe trencha payibig kōn:

—¿Ñimbe mam pirrin tōgagōgue?— cha.

Inchen nōmbe lōtappe:

—Siete tōgaguer— chiben,

⁶Jesúsbe misagwan pirau purramisingarua, nui tasku tru pirri sieten muta, Tiuswan ‘mayanguen pay’ chabe, pirisha, nui kusrenanōb pera uniilan tranen, nōmbe misagwan pirishibelō kōn. ⁷Katō peskau-urekkucha mamdō tōgagōben, Jesúsbe trunun Tiuswan ‘mayanguen pay’ chabe, katō trunungucha misagwan pirishinrrai karubig kōn. ⁸Inchen mayeelōba ōska ma kōrrōmisren, katōgucha pitis undailan tasinmerayu netsōbateelō siete tulishibelō kōn. ⁹Inchen tru mabelōbe pib milburab kōbig kōn. Incha Jesúsbe misagwan ‘ungwa’ chabe, ¹⁰nui kusrenanōb pera uniilōba barcoyu kebya, Dalmanuta pirausrōmay ibig kōn.

Fariseosmera Jesúswan kan mana asiimīg martrai miab

(Mt 16.1-4; Lc 12.54-56)

¹¹Inchen fariseosmera amrruabe, Jesúswan ‘¿ōyeebe maig kōh?’ chib payib menda, nune srōmbalāsōngurriigwan asamig martrai miabelō kōn, Tius nōba pasrain kui ashchab, ke chinchibig kōtashchab ashig kōptō. ¹²Inchen Jesúsbe truba isui inchib, nu israbe, trenchibig kōn:

—¿Mōin kwalōm misaamerabe Tius naba pasrain kui ashchab chindimba maramig miah? cha. Nabe ñimun cierton trendamōnrrun cha: Mōin kwalōm misaameran ashig kui indigwane chigucha marig kōmōnrrun— cha.

¹³Incha nōbe nōmun pōnrramnetō, katō barcoyu kebya, pisu ambōgatōsrōmay ibig kōn.

Fariseosmerai levadura

(Mt 16.5-12)

¹⁴Inchen nui kusrenanōb pera uniilōbe pirri srua amrrumigwan pesan amba, barcoyube pirri kandō tōgar purrabelō kōn. ¹⁵Inchen Jesúsbe nōmune trenchib eshkabig kōn:

—Au, ñimbe levadura fariseosmeraiwanba, saduceosmeraiwanba ashiptō kuy— cha.

¹⁶Inchen nui kusrenanōb pera uniilōbe kangurrin kangurri trenchibelō kōn:

—Kaguen nam pirrin chigar kuimba, nōbe trendan— cha.

¹⁷Inchen Jesúsbe nōm trenchib purrai ashabe, trenchibig kōn:

—¿Chindimbarre ñimasiyaitō ‘purringar ker’ chib purrōgue? cha. ¿Katōgucha ni chigūinguen mōrmōwei, chiwan wamindinguen mōrmōwei inchigueh? cha. ¿Katōgucha ñimui manrrōmerane mur mara tōga pōnrrōtirru? cha. ¹⁸¿Ñimbe kabmera tōgar kōbendō ashmōwei, kalumera tōgar kōbendō mōrmōwei inchigie? cha. ¿Yamba isumuitarru? cha. ¹⁹Tru na tratrōgatō pirriwan tratrō mil mōguelan pirishib urasma tasinyu netsōbatō ñimbe ¿mam tasin tulisaiig kōh?— cha.

Inchen nōmbe lōtappe:

—Doce— chibelō kōn.

²⁰Inchen Jesúsbe trenchibig kōn:

—¿Tru na siete pirriwan pib mil misagwan pirishib uras chigucha netseelō mam tasin tulisaiig kōh?— cha payene:

—Siete— chibelō kōn:

²¹Inchen nōmune Jesúsbe trenchibig kōn:

—¿Inchendō katōgucha chigúi mōrmōwa kōtirru?— cha.

Betsaidasriig kabgaigwan Jesús tamarōb

²²Incha Betsaida pueblōsrō pubene, Jesúsweimay kan kab ashmīgwan srua amrrua, kabyu katōrabsrumugu chib, melōben, ²³nōbe nun tasku kemōra, pueblōyugurri wambiisrō srua ya, kabyu illimbitōga srōla, nui tasigwan kabgaigweim pala estsarabe:

—¿Maytōguen ashkuh?— cha payibig kōn.

²⁴Inchen tru mōōbe ashabe, trenchibig kōn:

—Mōguelan ashar cha. Tusrmera latailō kōbendō, amōnan— cha.

²⁵Inchen Jesúsbe katōyug nui tasiimeran kab pala estsarabe, nune asingaruben, yandō tabig ashibig kōrrōmisra, chiwandōgucha tōrgandō nebua ashibig misrōbig kōn. ²⁶Inchen Jesúsbe nui yamay ōrōppe, trencha ōrōbig kōn:

—Puebloyu kebiṃōwei, truyu mungucha eshkaṃōwei inchiḡ— cha.

*Pedro Jesúsṃwan: “Cristo kōn” chib
(Mt 16.13-20; Lc 9.18-21)*

²⁷ Incha Jesúsbe nui kusrenanōb pera unilōba Filipino pirau Cesareasrō yamera tsitsō pōnrrabsrōmay webamba ambabe, mayu nōmun trencha payibig kōn:

—¿Misaamerabe nane mu kōn tah?— cha.

²⁸ Inchen nōmbe trencha lōtabelō kōn:

—Mōilōbe Juan Bautista kōn chiben; katōganelōbe Elías kōn chiben; mōilōbe mōikkōben Tius maig karuigwan eshkabig kuinrrun tan— cha.

²⁹ Inchen Jesúsbe trencha payibig kōn:

—¿Trune ñimbe nane mu kōn chinrrague?— cha.

Inchene Pedrobe trencha lōtabig kōn:

—Ñibe Cristo kōn— cha.

³⁰ Inchen Jesúsbe nōmun mungucha eshkaṃōnrrain karubig kōn.

*Jesús nō kwamigwan eshkaḡ
(Mt 16.21-28; Lc 9.22-27)*

³¹ Incha nō tru Mōg Misra Arrubiibe truba truba kaig indinab megamig nebunrrun chib, kusrennōb mendabig kōn. Misagwan karubelō kōlli misaamera kōben, sacerdotessmeran karubelō kōben, tru Moisés pōrigwan kusrenanōbelō kōben nune kaasig kōmig nebunrrain kōn chib. Nune kweechen, pōn kwalōmyube ōsiiranrrun chib. ³² Iḡwane Jesúsbe nōmune tōrgandō eshkabig kōn. Inchen Pedrobe nun nōōrsrō pera ya, murtō waminchib mendabig kōn. ³³ Inchen Jesúsbe keesha asha, nui kusrenanōb pera unilan ashabe, Pedrone trenchib namabig kōn:

—Satanás, ¡nainukkurri tarōmisr! cha. Kaguende ñibe isuppe, Tius lataig isumōtō, mōguelō isuimay isun— cha.

³⁴ Incha Jesúsbe nui kusrenanōb pera unilānba, misagwanba wama, trenchibig kōn:

—Mōikkōben nai mendig uñig kōbene, nōasiitō nuimburabigwangōba isumōtō, nui kuruswan mutab, nai mendig arrum nebunrrun cha. ³⁵ Inchen mōikkōben ōsig kōmigwangōba esegabiibe yandō pinab pinamig nebunrrun cha. Inchen nagurrimba, Tiuswei tabig srō wangurrimba kwabiibe, managatig ōsig kōmigwan esegawa tōgagōnrrun cha. ³⁶ ¿Kan mōg yu pirau chine kōbigwan kerrigu nuindō maringucha, nui ōsig kōmigwan trubisaibe, chiwein kui tabig kōnrrab kō? cha. ³⁷ ¿Kabe kan mōōbe kwamōnrrappe, chi tranōbsruerah? chibig kōn. ³⁸ Inchawei mōikkōben i mōin kwalōm misaamera itōlulōpteelō, kaig marōb misaamerai merrab naimburappa, na wamindiilaimburappa kōrig isub kōrig kui inchiḡgwane, nungucha kōrig purōrtrun, chibig kōn, Mōg Misra Arrubig tru nui Mōskawei tōrguegwalmabigu Tiusweindō tarōmari ángelesmeraba arrua.—

9

¹ Incha Jesúsbe katō trendaig kōn:

—Nabe ñimun cierton trendamōnrrun cha: Mōilōgōben yu purrabelō Tius nō ashib karub waig maramburab marōb arri ashmōwatōbe kwanrraamōn— cha.

*Jesús ke peemayig misrōb
(Mt 17.1-13; Lc 9.28-36)*

² Ōyeeg taig yandō truneweī kan kwalōmdō palōben, Jesúsbe Pedronba, Santiagonba, Juanwanba nōmundō kan pala tunsrōmay pera ibig kōn. Incha trusrō nōmui merrab Jesúsbe ke peg lataig misrōbig kōn. ³ Inchen nui kewagūilōbe pulō tōrchig tōr pilabig misrōbig kōn, muguen i pirau kewagūigwan tsara, ōyeeg pulōzhig mariinrraamōnikke. ⁴ Inchen Elíasba, Moisésba kenamisra, truilōbe Jesúsba waminchib pōnrrai nōmbe ashibelō kōn. ⁵ Inchen Pedrobe Jesúsṃwane trenchibig kōn:

—¡Kusrennōbig, nam yu pōnrramibe purō tab kōtan! cha. Pōngatō ya-ureg margun, chibig kōn, kan ñui, kan Moiséswei, kan Elíasweingue.—

⁶ Kaguende nōmbe kwariilō pōnrrōwa, Pedrobe ni chi chib pasarrmabguen isumig kōn.

⁷ Inchene kan wañi nōmun pinōbulen, wañi umbugurrimbe kan wam trenchibig kōn:

—Iibe nai Nusrkai undaaraig kōn cha. Nune mōray— cha.

⁸ Inchen mōimbe nōmuim pōtōgatan ashene, mu katōgan peebe nōmba kenamuptinchen, Jesúsṃ pasrai ashibelō kōn.

⁹ Incha tru tunsrōngurri kōrrōrrub amrruabe, Jesúsbe trencha karubig kōn:

—Mungucha waminchib kōnrrab kōmō cha, tru ñim asigwane, Mōg Misra Arrubig kwailai utugurri katōle ōsiiramnegatig.—

¹⁰ Inchen nòmbe truigwane nòmuintetø isub esegabendø, tru kwailai utugurri øsiiramnegatig taigwane, treebe mandø cha trendermab nømdø payiyabelø køn. ¹¹ Inchabe Jesúswane trencha payibelø køn:

—Tru Moisés pørigwan kusrenanøbeløbe ¿chindimba Elíasmerriig arrumig køn tah?— cha.

¹² Inchen Jesúsbe nømun trencha løtabig køn:

—Elíasmerriig arrubwei inchun cha, kerrigu katøyg tamara kørrømartrab. Katø Tiuswei wamwan pørigube tru Møg Misra Arrubiibe truba kaig indinab, kaasinab indig kønrrun chippe, ¿mandøgurrin trendah? cha. ¹³ Inchendø nabe ñimune trendamønrrun, chibig køn: Elíasbe manawei arrubguen inchen, nòmbe maig marøg købendø nun kerrigu treeg marig køn cha, Tiuswei wamyu Elíasweimburab maig taig treekke.—

Jesús kan unan kwaimandzig tøgagwan tamarøb
(Mt 17.14-21; Lc 9.37-43)

¹⁴ Incha nòmbe katøle nui kusrenanøb pera uniilø purrainuumay amrrubene, nømun misag truba nu pøtogatan tulundzuna kuin købig køn. Inchen truyube katø møiløggøsrøn tru Moisés pørigwan kusrenanøbeløgucha Jesúswei kusrennøb pera unielane øyeebe maig kø chib kuin købig køn. ¹⁵ Incha Jesúswan ashippe, maya misaaba truba kwaara ashib ‘manguen attirru’ chinrrab luløbelø køn. ¹⁶ Inchen Jesúsbe trencha payibig køn:

—¿Nømbabe chi køn chibrrøn køgue?— cha.

¹⁷ Inchen møikkøsrøn tru nu misag utu pasrabiibe trenchibig køn:

—Kusrennøbig, yu nai nusrkawan kan kwaimandzig waminchimiig marig srua arrur cha. ¹⁸ Chugøben pasrøben, kwaimandziibe kemøra, pirausrøn kuchen, nøbe triimay chall kuchib, trugulwan tsachib ¡katø! tinrranrrig misrøbig køn cha. Inchen nabe ñui kusrenanøb pera unilan kwaimandzigwan wegutcha chiben, nòmbe kaiman— cha.

¹⁹ Inchene Jesúsbe trencha løtabig køn:

—¡Kan mõi misaamera øyeebe mailø kwaasamø cha, chigucha køremeeløbe! ¿Nabe managatig ñimba unamig kønrrerah? cha. ¿Kan øyeege ashiptø managatig ñimba unamerah? cha. Unan naimay srua amrruy— chibig køn.

²⁰ Inchen srua amrruben, kwaimandziibe Jesúswan ashippe, unan mõi mõi purø trømbøig sruaguchen, unøbe pirau peña, latøgushib triimay chall kuchibig køn. ²¹ Inchen Jesúsbe møskawan trencha payibig køn:

—¿Øyeege indiibe maya yana køh?— cha.

Inchen møskaimbe trenchibig køn:

—Unøgurri treeg kuig køn cha. ²² Katø katø kwaimandziibe kwetchab nagu kui, piyu kui keguchibig køn cha. Ñi chi maramdiig købene, namun øyeege kui meløben lastima asha, purugurra— chiben,

²³ Jesúsbe trenchibig køn:

—Ñibe: “Chi maramdiig købene, martra” taibe cha, pøs, ke treeg martraitamab kørebigeimbe chitøgucha maramdiitø køn— cha.

²⁴ Inchen tru urastø unai møskaimbe øyah chib trashibig køn:

—¡Treeg martraitamab kører cha. Kørenrrab inchimig kømønrrab purugurra!— chib.

²⁵ Inchen Jesúsbe misag ke kanbalatø tulundzunab amrrui ashabe, trømbøig maringarub kwaimandzigwan trenchib namabig køn:

—Kwaimandzig wamgaig, kalugaig, na ñun i unainukkurri mõi mõi webinrrø tamønrrun cha. Katøbe yandø nuinug kebarrumønrrabgue.—

²⁶ Inchene kwaimandziibe trashib, unan purø trømbøig sruagucha, webiben, unøbe kwaig lataig kørrømisren, møiløgøben trenchibelø køn: “Kwain tsun” cha.

²⁷ Inchen Jesúsbe kwalyu kemørøb kusrabene, unøbe pasramisrøptinchibig køn.

²⁸ Incha Jesúsbe yau kebibene, nui kusrenanøb pera uniiløbe nundø trencha payibelø køn:

—Nambe kwaimandzigwan wambig weguchappe, ¿chindimba kaimah?— cha.

²⁹ Inchen Jesúsbe trenchibig køn:

—Øyeege kwaimandzigwane Tiusba waminchib miawatøwei weeramig køn— cha.

Jesús nø kwamigwan katø eshkab
(Mt 17.22-23; Lc 9.43-45)

³⁰ Incha truyugurri ambabe, Galileawan puraambub amba, Jesúsbe mugucha wammørønrrai inchibig køn. ³¹ Kaguende nui kusrenanøb pera unilan trenchib kusrenanøb arrig køn:

—Tru Møg Misra Arrubigwane møguelai tasku tranen, nòmbe kwetchun cha. Inchendø kwaig pøn kwalømyube katø øsiiranrrun— chib.

³² Inchen nømun treeg wamindigwane nòmbe chi tainguen mørmøwa, payamibe kørig kui inchibelø køn.

¿Mas nuibe mu kerah?

(Mt 18.1-5; Lc 9.46-48)

³³ Incha Capernaumsrø pua, Jesúsbe yau kebyabe, nui kusrenanøb pera uniilan trencha payibig køn:

—¿Mayube chi charre payiyab amrrub køgue?— cha.

³⁴ Inchen nømbe chigucha lõtømeelø køn, kaguende mayube nømui utube møig mas nuig kønrrerah charre payiyab kuig kua. ³⁵ Incha Jesúsbe wamisra, tru doceelan wamabe, trenchibig køn:

—Møikkøben nømerrig merrab pasrag købene, mayelai wendau pasramisra, mayeelø karuindiig megamig køn— cha.

³⁶ Incha kan unan srua ya, nømui tøbøtag pasra, nui kwalyu mutabe, trenchibig køn:

³⁷ —Møikkøben i unø lataigwan nai munchiyu tab wamab utabiibe, nan utan cha. Inchen nan utabiibe, nan utømø, nan karua ørøbigwan utan— cha.

Katøganelaingattiig kømúibe namuingattiig køn

(Mt 10.42; Lc 9.49-50)

³⁸ Inchene Juanbe trenchibig køn:

—Kusrennøbig, kan møikkøsrøn ñui munchiyu kwaimandziimeran webusri aser cha. Inchendø namba uñibig kømubene, nambe truigwane merer— cha.

³⁹ Inchene Jesúsbe trenchibig køn:

—Merømøtay cha. Kaguende mugøben kan maramburab marig nai munchiyu mara, katøburøbe nan trømbøig waminchaamøn cha. ⁴⁰ Namun namig kurrømfibe namuingattiig køn cha. ⁴¹ Nabe ñimun cierton trendamønrrun cha: Møikkøben ñimun Cristoielø kua asha, kan pi pasutøguen nai muchiyu ñimun srørrøbiibe, truburø nui ketigwane utømø kømø, utønrrun cha.

Katøganun kaig mariiøyu kebenøsrkamibe kørig kømdiig køn

(Mt 18.6-9; Lc 17.1-2)

⁴² 'Møigwan køben i shushmera latailan nan kørebela kaig mara kebenøsrkøbigweimbe trembe tru tirigu kitsig nu srugwan naashigu iløsrka, mar umbusrø kegutsig kuinguen søl købsruinrrun cha. ⁴³ Pøs ñui tasig kaig maringarua kaigu ñun kebenøsrkøbene, par, chibig køn. Trembe managatiig øsig wamsrø kan tasiitø tøgaiig kebyamikken søl kønrrun cha, pa tasig tøgaiig tru møra melamnug tru managuen kwamø naasrø kebigunrriibe; ⁴⁴ truyube nømui yau mab kushimera kwamøwei, katø nag managuen kwamøwei inchißrø.

⁴⁵ 'Katø ñui srøb kaig maringarua kaigu ñun kebenøsrkøbene, trunungucha par, chibig køn. Trembe managatiig øsig wamsrø kandarø srøbgaig kebyamikken søl kønrrun cha, tru møra melamnug pa srøppaig kegutsig købgunrriibe, ⁴⁶ truyube nømui yau mab kushimera kwamøwei, katø nag managuen kwamøwei inchißrø.

⁴⁷ 'Kabe ñui kab kaig maringarua kaigu ñun kebenøsrkøbene, trunun wesru, chibig køn. Trembe Tius nø ashib karub wainug kan kaptø tøgaiig kebyamikken søl køn cha, pa kab pusraig tru møra melamnug kegutsig købgunrriibe;

⁴⁸ nømui yau mab kushimera kwamøwei, nag managuen kwamøwei inchißrø.

⁴⁹ 'Kaguende mayeeløba tretøga larrøsrkøb lataitøwei naatøga larrøsrkailø kønrrun cha. ⁵⁰ Trebe tabig køn. Inchendø yandø tre larrmíig misrene, ¿katøbe ñimbe chinha larrøbig martrague? Incha ñimbe ñimasiitø tre may larrig latailø kuy. Inchawei ñimbe ambugurri igurri lata tab waramig køn— cha, Jesúsbe trenchibig køn.

10

Keeba, sraimba petiyamumigwan Jesús waminchib

(Mt 19.1-12; Lc 16.18)

¹ Jesúsbe truygurri webya, Judea pirausrømayba, Jordán pi ambøgatø pørr kal-labgatøsrømayba iben, katø trusrøngucha misaamera tulundzunab mendøben, nøbe trendø treeg marøbig kua, katø nømun kusrenanøb mendabig køn. ² Inchen møiløgøsrøn fariseosmera Jesúswan kemallabe, trencha payibelø køn, maig inchißig køtashchab:

—¿Keebe srawan kutsamig chi meriimíig kø, chindah?— cha.

³ Inchen nømune trencha løtabig køn:

—¿Moisésbe ñimune maig karuig køh?— cha.

⁴ Inchen nømbe trenchibelø køn:

—Moisésbe ka tarømisriyabasig køn cha. Srawan treeg martrab cha, eshkabig kilga marabe, ka tarømisramig køn taig køn— cha.

⁵ Inchene Jesúsbe trenchibig køn:

—Moisés treeg marbashippe, ñimui manrrømera isumíig larrø mureløgurri ka treeg martrai ñimun pørig køn cha. ⁶ Inchendø srøsrø kwaløm chiwandøgucha marøb uras: “Tiusbe møwanba, ishuwanba ellmarig køn cha. ⁷ Øyeekkurri møøbe møskawanba, usranba elatchun cha, nui sraimba kandø kønrrab. ⁸ Incha tru pailøbe kan asrtø kønrrun” cha. Inchawei yandø pailø kømø, kan asrtø køn cha. ⁹ Inchawei treeg købene, Tius kandø mara lindsaigwane møøbe tarømaramig kømøn— chibig køn.

¹⁰ Incha yausrø purrøwabe, nui kusrenanøb pera uniiløbe trunun katøyug payen,

¹¹ Jesúsbe trencha løtabig køn:

—Møikkøben srawan kucha, tarømisra, katøganba kasharabiibe nune itølula kørømaran cha. ¹² Kabe sraingurrigucha kewan kucha, tarømisra, katøganba katø kasharawabe, treetøwei itølulan— cha.

*Uregwan Jesús mayanguen tab kuilø kønrrain chib
(Mt 19.13-15; Lc 18.15-17)*

¹³ Inchen ureemeran Jesúsweimay srua amrrubelø køn, nø estsartrai. Inchen kusrenanøb pera uniiløbe tru srua amrrubelane namaptinchen, ¹⁴ Jesúsbe trunun ashabe, nama, trenchibig køn:

—Ureemerane merømø, naimay ka amrrubasay cha. Kaguende Tius nø ashib karub waibe nøm latalaiwein køn cha. ¹⁵ Nabe ñimun cierton trendamønrrun cha: Møikkøben Tius nø ashib karub wainuguigwan kan unø latalitøwei utaptinchimíibe managuen truyube kebinrraamøn— cha.

¹⁶ Incha nui kwalyu muta, tasigwan uregweim pala estsarabe, ‘mayanguen tabelø kønrrigay’ chibig køn.

*Kan pua møg Jesúsba waminchib
(Mt 19.16-30; Lc 18.18-30)*

¹⁷ Jesús nui maywan inrrab ibene, kan møg luløb arrua, nui merrab tømønrsrabe, trencha payibig køn:

—Kusrennøbig tabig, ¿managatig øsig kømigwan Tius tranig tøgagønrrappe nabe chi maramerah?— cha.

¹⁸ Inchen Jesúsbe nune trencha løtabig køn:

—¿Chindimba nane: “tabig” cha wamøgu? cha. Tabiibe kandø køben, truiibe Tiustø køn cha. ¹⁹ Ñibe Tius maig maramigwan martrai pønrrailane yandø ashibig køn cha: “Kweechimøwei, itølulømøwei, nilømøwei, katøganelaimburab isa waminchimøwei, may wamincha chiyugøben kebenørkømøwei, ñui usri møskawane maig købash inchimø, tab indamig køn” tailan.—

²⁰ Inchen tru møøbe trencha løtabig køn:

—Kusrennøbig, nabe iilane kerriguh matsinø-unøgurri marøbig kur— cha.

²¹ Inchen Jesúsbe tru matsinan tab ashabe, nun undag køptinchen, nøbe trenchibig køn:

—Kan chigøsrøndø palan cha. Ya, ñui chi tøgagúigwan yana, waachameran tranø cha. Treeg marabe, ñibe srømbalarømbe chigurrimbunø tøgagønrrun cha. Trugurrimbe arrua, nai mendig amø— chibig køn.

²² Inchen tru møøbe øyeeg taigwan mørøppe, nui maløbe minchiptinchibig køn. Incha truba isui ibig køn, kaguen truba puaig kua.

²³ Inchen Jesúsbe pøtøburab ashabe, nui kusrenanøb pera uniilan trenchibig køn:

—¡Tius nø ashib karub wainug puarmera kebambamibe truba murig kønrrun!— cha.

²⁴ Inchen nui kusrenanøb pera uniilø trunun mørabe, truba kwaaren, Jesúsbe katøyug nømun trenchibig køn:

—Ñim nai ureezheelø, Tius nø ashib karub wainug kebambamibe truba murig køn cha.

²⁵ Kan camelloquen tusain kal trabyu illmø larrayandiig køben, kan puaiibe Tius nø ashib karub waisrø kebinrrab kaimanrrun— cha.

²⁶ Inchen iigwan mørabe, nømbe masken kwaara, nømasyaitø trenchib payiyabelø køn:

—Treeg købene, ¿kaigyugurrimbe mu kui wesraig kønrrautah?— cha.

²⁷ Inchen Jesúsbe nømun ashabe, trenchibig køn:

—Møgueløbe iigwan martrab kaimanrrun cha. Trune Tiusweimbe, chi treeg kømøn cha. Kaguen Tiusweimbe chitøgucha maramdiitø køn— cha.

²⁸ Inchen Pedrobe trenchib mendabig køn:

—Au, nambe chi tøgagúigwan kerrigu elacha, ñui mendig amrruig køn— cha.

²⁹ Inchen Jesúsbe trencha løtabig køn:

—Nabe ñimun cierton trendamønrrun cha: Møikkøben nui yawan, nunelan, nuchalan, kabe usri møskawan, ureemeran, pirømeran nagurrimba, Tiuswei tabig srø wamurrimba elachibiibe, ³⁰ mõi yu piraube cien piejes menrraguen yamera, nunelø, nuchalø, usral, nus- rkalø, pirømera utønrrun cha, chigøbendø indinab melamig kuindøgucha. Inchen kansrømbe

managatig øsig kømigwan utørrun cha. ³¹ Inchen mõiløgøben mõi ya yu pirau nõmmerrig pørrabeløbe trusrøbbe srahe melørrun cha. Inchen yu pirau srahe melabeløbe trusrøbbe nõmmerrig pørrørrun— chibig køn Jesúsbe.

Jesús katøyg nõ kwamigwan eshkað
(Mt 20.17-19; Lc 18.31-34)

³² Katø Jerusalénmay nebambub amba, Jesúsbe nui kusrenanøb pera uniilai merrab ib pasrøbene, nõbbe truba kwaariilø ambub køben, kaneløbe wendau kørig kuilø ambubelø køn. Inchen Jesúsbe katø tru doceelan nõøø wama, nun chi purainrrabigwan eshkað menda trenchibig køn:

³³ —Au, nambe Jerusalénmay nebambub amber cha. Trusrøbbe tru Møg Misra Arrubigwane sacerdotesperan karubelanba, tru Moisés pørigwan kusrenanøbelanba tranen, truiløbe nune kwanrai pasra, judíos kømeeelan tranrrun cha. ³⁴ Inchen nune indzaashib, illimbi tuchib, ichib srua kua, kweechen, pøn kwalømyube katøle øsiiranrrun— chibig køn.

Jacoboba, Juanba kan chigøsrøn nõmuyasig miab
(Mt 20.20-28)

³⁵ Inchen Zebedeowi nusrkalø Santiagoba, Juanba, Jesúswan kemallabe, trenchibelø køn:

—Kusrennøbig, namuyasig nam kan chigøsrøn mianrreender cha. Kan treeg marøbsrumuguh— cha.

³⁶ Inchen Jesúsbe trencha payibig køn:

—¿Ñimuyasig chi maramig palain køgue?— cha.

³⁷ Inchen nõbbe løtappe:

—Ñi wainug tøgüegwalmabiisrø namun kanun ñui kusrmay, kanun atsimay purrønøbsrumuguh— cha trenchibelø køn.

³⁸ Inchen Jesúsbe nõmune trenchibig køn:

—Ñimbe chi miab pørrermabguen mõrmøn cha. ¿Na tru copayu mutsam piwan kabe ñim muchib, katø nan treeg chine trømbøig nebub pinøbuløb arrubig na utamigwan ñim trunun utab inchague?— cha.

³⁹ Inchen nõbbe løtappe:

—Øø, maramørrundø— chibelø køn.

Inchene Jesúsbe trenchibig køn:

—Na mutsim piwane ñimbe muchibwei inchun cha. Katø tru nan purø trømbøig nebub pinøbuløb arrubig na utamigwangucha ñimbe utabwei inchun cha. ⁴⁰ Inchendø tru kusrmayba, atsimayba purramigwane, na tranamig kømøn cha. Tru purramibe nõm purrønrrabelayasig tamarilaindø køn— cha.

⁴¹ Inchen tru nui kusrenanøb pera uniilø diezøløbe trunun mõrabe, Juanwanba, Jacobonba namab mendabelø køn. ⁴² Inchen Jesúsbe nõmun wamabe, trenchibig køn:

—Ñimguen ashen judíos kømø misaameran karub purrabeløbe nõm karub tøgagüilane maig købash inchib, ke nõm karub purran cha. Inchen truyu mõguelø nõrreelø nõm karub purrabeløbe mungucha manchinraingaig karub purrabelø kui ashchai nõbbe kenamaran cha. ⁴³ Trune ñimui utube ñimbe øyeelø kømumig køn cha. Treeg købgunrriibe, ñimui utu mas nuig kukkøbene, katøganelø karuindiig megamig køn cha. ⁴⁴ Inchen ñimui utu mõikkøben ñimmerrig melag købene, mayeelø karuindiig megamig køn cha. ⁴⁵ Pøø tru Møg Misra Arrubikken katøganelø nuyasig marøb melønrrai arrumøtø, nõguen katøganelayasig marøb meganrrappa, nõ kwaitøga truba nu misagwan purøbagarawa, kaigyugurri wesranrrappa arrig køn— chibig køn.

Tru kabgaig Bartimeowan Jesús tamarøb
(Mt 20.29-34; Lc 18.35-43)

⁴⁶ Incha Jericøsrø pua, Jesúsbe tru ciudayugurri nui kusrenanøb pera uniiløba misag truba nu perag webya iben, kan kabgaig Bartimeo taig Timeowei nusrkai, ‘anzhig kettra’ chib, miab may menda wawabe, ⁴⁷ Jesús nazaretsriig kemallib arri mõøppe, trashib mendabig køn:

—Jesús, merrabsrø Davidwei Nusrkai, nan lastima ashcha!— chib.

⁴⁸ Inchen ke mõiløgøben niløtø wanrrai namingucha, nõbe trenchib mas mur trashibig køn:

—jMerrabsrø Davidwei Nusrkai, nan lastima ashcha!— chib.

⁴⁹ Inchen Jesúsbe pasramisrahe:

—Wamay— chiben, nõbbe kabgaigwane trenchibelø køn:

—jchi isumø, kurrapinchi! cha. Kaguende ñune wamab pasran— cha.

⁵⁰ Inchen nøbe nui tsina waigwan kuchib, pørtrappe, pasrambua, Jesúsweim pulusrø pubig køn. ⁵¹ Inchen Jesúsbe trencha payibig køn:

—¿Nuyasig na chi maramig paløta?— cha.

Inchen tru kabgaibe trencha løtabig køn:

—Kusrennøbig, nai kabmera ashibig misrimbe køtan— cha.

⁵² Inchen Jesúsbe trenchibig køn:

—Inrrø cha, ñui isubigwan nainug pasriitøgatø, tabig kørrømisran— cha.

Inchen tru urastø tru kabgaibe ashibig misra, Jesúswei mendig ibig køn maywan.

11

Jesús Jerusalén kebib

(Mt 21.1-11; Lc 19.28-40; Jn 12.12-19)

¹ Yandø Jerusalénsrø chab pub amba, Betfagéba, Betaniaba pueblomerayu tru Olivos Tunsrø chab puabe, Jesúsbe nui kusrenanøb pera uniilø pailan trenchib karua ørøbig køn:

² —Ø pinrrøguesrø yamera tsitsø pønrrabsrømay ambay cha. Trusrømbe pubyutø kan burro-unø muguen itøguaniimífig litsig wetørranrrabguen cha. Picha, srua amrrunrrigay cha.

³ Inchippa mõikkøben: “¿Chinchainchigue?” cha payene: “Señor palai indan cha. Katø petø pegutchun” chinrrigay— cha.

⁴ Inchen nømbe ambene, burrobe mayu kan yaskab pulu litsig pasrain købene, nømbe pichen, ⁵ mõiløgøsrøn truyu pønrrabeløbe trenchibelø køn:

—¿Burrone chinchab pichigue?— cha.

⁶ Inchen nømbe Jesús maig taigwan treeg løtøben, truiløbe ka sruambashen, ⁷ nømbe Jesúsweimay burro-unane srua amba, nømuim pala kewagüilan burron kayen, Jesúsbe itøguanabig køn. ⁸ Inchen truba yamelø nømui pala kewagüilan maywan kayen, kaneløbe chugøben nøørsø kullag srarcheelø lutiicha, maywan kayen, ⁹ merrab amrrubelø lata, wendau amrrubelø lata trenchib trashibelø køn:

—¡Hosanna! chib;

¡Señor Tiuswei munchiyu nø ørig arrubiibe mayanguen tab kuig køn! chib.

¹⁰ ¡Namui merrabsrø mõskai David nø ashib karub waig købig arrubiibe mayanguen tab indig køn! chib.

¡Srømbalarømbe Hosanna!— chib, trashibelø køn.

¹¹ Inchen Jesúsbe Jerusalén pua, Tiuswei yau kebyabe, truyu chiwan køben ambumay imay tab ashabe, yandø maaben køben, Betaniasrømay nui doce kusrenanøb pera uniiløba ibig køn.

Jesús mamig niimø higuera tusrwan kaig nebunrrain chib

(Mt 21.18-19)

¹² Katø kwaløm Betaniagurri webamba, Jesúsbe parøgwai møra, ¹³ yabgurri kan higuera tusr ishiibaig pasrai ashabe, mamig niga tusr køtashchab ibene, tru higos nigam põlmera kømuben, ka ishiitø tøgag wetørrabig køn. ¹⁴ Incha Jesúsbe tru higerane trenchibig køn:

—Managuen ñuiinukkurri mamig nigugwan muguen manrrab tamibe chi kaanrrun— cha. Inchen nui kusrenanøb pera uniiløbe nø trendaigwan mõrøbelø køn.

Tiuswei yawan Jesús chish marøb

(Mt 21.12-17; Lc 19.45-48; Jn 2.13-22)

¹⁵ Incha nømbe Jerusalénsrø pua, Jesúsbe Tiuswei yau kebyabe, truyu yanøb, penab inchib warabelan wambig webetab mendapinchibig køn. Katø misagwan an yunømarøb purraig mishatsiimeran utsøbetab, palomamera yanøbelø purraigwan utsøbetab incha, ¹⁶ katø mungucha truyube chigøben srua puramrramamífig køn. ¹⁷ Incha trenchib karua køn:

—Tiuswei wamwan pørigube trenchibig kømuitarru cha:

“Nai tab yabe mayeelø chu pirausrø misaameraindøgucha

Tiuswan wamindi ya køn cha wamig kønrrun” taig.

Trune ñimbe nileelø warain trab marin køn— cha.

¹⁸ Inchen sacerdotsmeran karubeløba, tru Moisés pørigwan kusrenanøbeløba mõrabe, mandø incha kweetsamdiig køtashchab lab mendabelø køn, nun køriimata, kaguende maya misaamera Jesús kusrenanigwan ke kwaara asha køben. ¹⁹ Inchen yandø yem køben, Jesúsbe nui kusrenanøb pera uniiløba ciudaygurri webya ibig køn.

Higuera tusr mamig niimífig yandø mul-laig

(Mt 21.20-22)

²⁰ Incha katø løtsø truwan puraamben, tru higerabe kutøgue srølbañau mul-lain kui ashabe, ²¹ Pedrobe Jesús trendaigwan isua, nune trenchibig køn:

—Au, Kusrennøbig, tru ñi kaig neubash cha trendaig higuera be chab mul-labguen indin kòn— cha.

²² Inchen Jesúsbe trenchibig kòn:

—Ñimui isubigwan ke Tiusweinuutø pasra pønrray cha. ²³ Nabe ñimun cierton trendamønrrun cha: Møikkøbeni tunwanma øyah taimbe: “Yugurri mendamisra, maryu kebeñi” cha. Incha nui manrrøyu treeg kòmuptinchaitamab isumøtø, maig taig ke treeg marig kønrraitamab kòrebene, treeg marig kønrrun cha. ²⁴ Inchawe nabe ñimun trendamønrrun chibig kòn: Ñim chiwandøgucha Tiusba waminchib miappe, chabguen trunun utabguen indermab kòrewabe, ñimbe utønrrun cha. ²⁵ Incha ñim Tiusba waminchib pønrrappe, møigwan kòben namig isuig tøgaguabe, nø kaig marigwan ulø paymønrrab, pesannamig kòn cha, srømbalasø wabig ñimui Møskaingucha ñimui kaig mariilan treetøwei ulø paymø, pesannaig kønrraimbe. ²⁶ Kaguende katøgan ñimun kaig maren, ñimma pesannamø, ulø payene, ñimui Møskai srømbalasø wabikkucha pesannamø, ñimui kaig mariilan ulø payrrun— chibig kòn.

Jesúswei karumburab karuibe mu mandamgaig

(Mt 21.23-27; Lc 20.1-8)

²⁷ Incha katøle Jerusalénmay amrrua, Jesúsbe Tiuswei yau llirab uñene, sacerdotemeran karubeløba, tru Moisés pørigwan kusrenanøbeløba, misagwan karubelø kølli misaameraba nun kemallabe, trencha payibelø kòn:

²⁸ —¿Ñi mariilane mu karua pasriitøgarre margu? cha. Kabe ¿øyeeg maramelane mu karua pasrta?— cha.

²⁹ Inchen Jesúsbe trencha løtabig kòn:

—Na ñimun kan chigøsrøn payrrab inchar cha. Nan løtøbene, øyeelan martraimbe nan i mu mandamgaig marig chugurriig kuig na ñimun eshkarrumøn cha. ³⁰ Juan misagwan piu umbu ulsrøb uniibe ¿srømbalasøngurrin kuig kò chindah, kabe møgueløgurriin kuig kò chindah? cha. Løtørray— chibig kòn.

³¹ Inchene nømdø trenchib payiyab mendabelø kòn:

—Trube, nam: “Srømbalasøngurrin kuig kòn” chibene, nøbe namune trenchinrrun cha: “¿Chindimba nune køremøgue?” cha. ³² Kabe: “Møgueløgurriin kuig kòn chinrrab ashendø, ¿maig kòbsruerah?”— cha. Øyan chippe, kaguende nømbe misagwan kørig isuarre inchibelø kòn, kaguende mayeeløba Juanwane cierton Tius maig karuigwan eshkabig kui asha tøgagøbelø kòben. ³³ Treekkurri Jesúswane trenchibelø kòn:

—Maig kuindøbeh— cha.

Inchen Jesúsbe trenchibig kòn

—Trube, nagucha eshkamumønrrun cha, iilan na mu karuitøga marigwan.—

12

Kwallibelø larrø kailan kemesra wamindig

(Mt 21.33-46; Lc 20.9-19)

¹ Incha Jesúsbe ‘øyeeg lataitøwein kòn’ chib kemesra wamindiiløtøga eshkab menda, trenchibig kòn:

—Kan møg nuim pirau uvas tra mara, trugurrimbe panig pasra, uvas piwan wesrumikkucha pirau tamara pasra, katø tru ellmarigwan ashib laramig kan ya-unø palaig mara pasran cha. Incha nui pirøwan katøganelan misrigwan pirishinrraptø kwallchai tranabe, yabsrømay yan cha. ² Incha yandø lurramig puben, nui kan karuindiig megabigwan tru kwallchab utabelan tra kanbalø lurrigwan utønrrai karua øriibe, ³ nømbe nun kemøra, kurragucha, chiguchagaig ørøbelø kòn cha. ⁴ Inchen tru puaiibe katøgan karuindiig megabigwan øren, truigwane turyu larrøgucha, nømbe tsalø wamabelø kòn. ⁵ Inchen tru ellmarig puaiibe katøgucha katøgan karua øren, truigwane kweetsin kòben, katøbe mas yam øren, kanelane kurrabetab, kanelane kweechib inchibelø kòn.

⁶ Inchen srabe yandø katøgucha kandø kørømisrøbig kòn, truipe nui trag nusrkai, undaraig. Incha yandø srabebe truigwan ørøbig kòn, trenchib: “Nai nusrkawane chinchimønrrun” cha. ⁷ Treendingucha tru kwallibeløbe kangurriin kangurri nømasiyaitø trenchibelø kòn: “Pirøwan ketig utønrrabiibe iigwein kòn cha. Kwetchab amun cha. Pirøbe namuin kørømisrøtrun” cha. ⁸ Incha nusrkawane kemøra, kweecha, asrwane tru uvas traugurri weguchibelø kòn— cha.

⁹ Incha Jesúsbe trenchibig kòn:

—¿Tru uvas tra puaiibe chi marttrerah? cha. Arrua, tru kwallibelane kweecha, tru uvas trawane katøganelan tranrrun cha.

¹⁰ ¿Ñimgan Tiuswei wamwan pørigu iigwan mana lemeelø køtirru? cha:

Tru ya marøbelø kaasig sruube katsiisrø pølbasra wayamig

mas purø tab srukken misrin køn taigwan.

¹¹ Señor Tius øyeeg marene,
namuin kabyube truba tabig asønatan cha.—

¹² Inchen Jesúswan merrarrawa sruamrrab kemørtrab inçhibelø køn, kaguende tru ‘øyeeg lataitøwein køn’ cha waminçhippe, nømun kemesra wamindi møra. Inçhendø nømbe misag truba nuwan køriimata, kagøbasha, pasramnetø ambuptinçhibelø køn.

Tiuswein kønrrabigwane Tiuswan tranøppe, Césarwein kønrrabigwane Césarwan tranøb
(Mt 22.15-22; Lc 20.20-26)

¹³ Incha Jesúsweimay mø fariseosmeran køsrønba, Herodesweingateelanba ørøbelø køn, chigøben wamindingarua, nø kalø løtøbene, truyu kebenøsrkønrrab isua. ¹⁴ Inchen truiløbe amrrua, trenchibelø køn:

—Kusrennøbig, ñibe ciertonigwan waminçhib møg kui aser cha. Katø misag maig chitanmaptø mørøb pasrømiig køn cha. Kaguende ñibe mundøgucha nømun mailø kətasha kandarøtø imøtø, Tiuswei maywan ñibe maig kusrenanamigwan cierton sølwan kusrenanøbig køn cha. Trube, çtru Roma maya misagwan karub wabigwan nam an pagaramig merømiig køh? Kabe, çmerig køh, chinderah? cha. çTranrrautah? Kabe çtranmønrrautah?—chibelø køn.

¹⁵ Inchen Jesúsbe nømun ka isatø, palatø tab inçhib chib pønrrai ashabe, trenchibig køn: —çNane chindimbarre kebenøsrkønrrab inçhigüe? cha. Kan pagaram anwan srua amrruy cha, na ashchab.—

¹⁶ Inchen srua amrruben, Jesúsbe trenchibig køn:

—çI anyu maløba, i munchi pøriibabe muin køh?— cha.

Inchen nømbe:

—Tru Césarwein køn— chiben,

¹⁷ Jesúsbe trencha løtabig køn:

—Césarwein købene, trube, Césarwan tranay cha. Inchen Tiuswein købene, Tiuswan tranay — cha.

Inchen nune ke kwaara ashibelø køn.

Kwailø katøle øsiiranrrab kuigwan payib
(Mt 22.23-33; Lc 20.27-40)

¹⁸ Inchen mø saduceosmera køsrøn Jesúswan ashchab ambubelø køn. Truiløbe tru kwabeløbe øsiiramønrrun chibelø kuabe, Jesúswane øyeeg payibelø køn:

¹⁹—Kusrennøbig, Moisésbe namun treeg pøra kørømarig køn cha: “Møigwei nuneg køben kwawa, srawan urekkaig kørømarene, trube, tru nuneebe piudaba kasharawa, nuneg kwabigweimburab ureg tøgagømig køn” chibig. ²⁰ Trube, siete nunelø købig køn cha. Indiibe srøsrøibe kasharawa, chi urekkaig kwaben, ²¹ tru wendauikkucha tru piudaba kasharawa, katø chi urekkaitøwei kwaben, katø tru pøn kønrrabyuigwangucha treetøwei nehuben, ²² yandø søteeløba tru ishuuba kasharawa, møikkucha ureg kørømarmøn cha. Inchen yandø srabebe ishukkucha kwan cha. ²³ Trube, tru kwabelø katø øsiirabene, çnøbe møigwei srain kønrrerah? cha payibelø køn, tru sieteeløba nune srai mara tøgagüig købene.—

²⁴ Inçhene Jesúsbe trencha løtabig køn:

—Ñimbe mandø kuinguen mørøwøba pella pønrrappe, çTiuswei wamwan pørigwanba, katø Tiuswei maramburab marigwanba tab nebua ashmeelø kuarre pella pønrrømotirru? cha. ²⁵ Kaguende kwailø katøyug øsiirappe, kasharamøwei, kasharanmøwei inçhun cha. Treeg kømøtø, srømbalasrø ángelesmera latailøtøwein kønrrun cha. ²⁶ Inchen tru kwailø katø øsiiramigweimburappe çñimgan Moisés pørigu lemeelø køtirru? cha, tru tusr-unø naara-bigugurri Tius nun øyah taigwan: “Nabe Abrahamwei Tius, Isaacwei Tius, Jacobwei Tius kur” cha trendaigwan. ²⁷ Tiusbe kwailai Tius kømøtø, øsiguelai Tius køn cha. Inçhawei ñimbe purø nu pella pønrran— chibig køn.

Tius karua martrai pønrrailai utuig mas nuig
(Mt 22.34-40)

²⁸ Inchen tru Moisés pørigwan kan kusrenanøbig tru ‘maig køh’ cha, payiyab køben mørøb parabiibe, Jesúsbe søl løti møra, nun kemallabe, trencha payibig køn:

—çTius martrai karua pønrrailai utuig mas nuibe møig køh?— cha.

²⁹ Inchen Jesúsbe trencha løtabig køn:

—Tru martrai karua pasrig mas nuibe iig køn cha: “Au, Israel misag, møyay cha. Namui Señor Tiusbe, Señor nøtø køn cha. ³⁰ Señor ñui Tiuswane ñui manrraugurri kerrigu newan undaaraitøgaba, kerrigu ñui øsig pasraitøgaba, kerrigu ñui turtøga isumburab isuitøgaba, katø kerrigu ñui asru chishkømburab chish kuitøgaba undaaramig køn” tan cha. ³¹ Inchen tru wendauiibe iig køn cha: “Ñima ñiasitøwei maig undaguig køppe, ñui mendaigwangucha

treetøwei undaaramig kòn” cha. Tru maig maramigwan martrai pònsrailø i pagatø lataig nørreeløbe katøgane chi kaagòn— cha, trenchibig kòn.

³²Inchen tru Moisés pørigwan kusrenanøbiibe trenchibig kòn:

—Kusrennøbig, ñibe sölwein tan cha. Tiusbe kandø kòn chib, katøgane mu kaagòn chib, ³³Tiuswan kerrigu ñui manrrøtøgaba, kerrigu ñui isumburab isuitøgaba, kerrigu ñui asru chish kòmburab chish kuitøgaba undaarab, katø mendaigwangucha nòasiitø lataitøwei undaarab indamig kòn cha trenchippe. Iilan mariibe Tiusweyasig traniiba, katø animalmeran kweecha Tiusweyasig parriløba lataitøguen kòmøtø, mas nuig kòn— cha.

³⁴Inchen Jesúsbe truiibe ke tab isua løti ashabe, nune trenchibig kòn:

—Tius nø ashib karub pasrainug pumibe ñibe ke tre yab pasrømøn— cha.

Inchen yandø katøbe Jesúswane mugucha chi payrrab inchimeelø kòn.

¿Cristobe mui Nusrkain kòh?

(Mt 22.41-46; Lc 20.41-44)

³⁵Jesús Tiuswei yau kusrenanøb pasrøwabe, trencha payibig kòn:

—¿Tru Moisés pørigwan kusrenanøbeløbe chindimba tru Cristone Davidwei misagurri arrubig kòn tah? cha. ³⁶Kaguende Davidtøweinguen Espiritu Santo eshkaig trendaig kòn cha:

Señor Tiusbe tru nai Señorwane trendan cha:

“Nai kusrmaygatø wamisr cha,

ñui ashig kòmui inchib tsalø inchibelan

ñi itøbunønrrai ñui srøb umbu na pònsramnegatig.”

³⁷Pøs Cristone David nøtøweinguen: “Señor” cha wamøbene, trube, ¿mandøgurri Cristobe Davidwei nusrkain kònrrab kòh?— chibig kòn.

Inchen misaamera truba nu pasrabiibe truba chull mørøbelø kòn.

Moisés pørigwan kusrenanøbelan nòm mailø kuigwan Jesús waminchib

(Mt 23.1-36; Lc 11.37-54; 20.45-47)

³⁸Jesús kusrenanøb pasrøwabe trenchibig kòn:

—Tru Moisés pørigwan kusrenanøbelane ashiptø kuy cha. Truiløbe kørrelø kewa llirab amønamiig chullelø kòn cha, katø penab, yanøb indiiisrø nòmune maig kòbash kòmø, truba tab wamønrrai inchib, ³⁹katø judiøsmara tulundzuni yamerayube purø tab purramdønug purrag kui indamba, katø lincha tabig mabyugucha nørreelø purrainug purø tabigu purrag kui indamba inchibelø kòn cha. ⁴⁰Incha katø piudasmeran nòmui yameran kerrawabe, tabelø misrøb ke ka yandø truba yana Tiuswan waminchibelø kòn cha. Truiløbe møra melamig mas nuigwan utønrrun— chibig kòn.

Waacha piudai an kegutsig

(Lc 21.1-4)

⁴¹Mana kòsrøn Jesús Tiuswei yau Tiusweyasig an kebusrinug tru pinrrøgue wabene, truba nu misaabe truyu an kebusrøb kòben, truba yamelø puarmerabe truba nørøweyig an kebusri ashibig kòn. ⁴²Inchen truyu kan waacha piuda arruabe, truyu pagatø øskø andø purø lamøzhig kebusren, ⁴³Jesúsbe nui kusrenanøb pera uniilan wamabe, trenchibig kòn:

—Nabe ñimun cierton trendamønrrun cha: I waacha piudabe cajayu pusrøbelø kanelø lataguen kòmø, mas nu kebusran cha. ⁴⁴Kaguen mayeeløba nømbe undaigwandø tranen, trune nøbe waacha kòptø, nui kerrigu tøgagúigwan tranan cha, tru nui øsig tsumig kerrigu tøgagúigwan.—

13

Tiuswei yawan pinisaig kònrrun cha, Jesús eshkaib

(Mt 24.1-2; Lc 21.5-6)

¹Jesús Tiuswei yaugurri webibene, møikkòsrøn nui kusrenanøb pera uniilai utuibe, trenchibig kòn:

—¿Kusrennøbig, ñiguen ash cha, kan yeeg nørø sruumera, yeeg nørø yamera kuita!— cha.

²Inchen Jesúsbe trencha løtabig kòn:

—¿Yeeg nørø yamera mariilan ñigan ashkuh? cha. Yube ni kan srukken katøgane srag palabe kørømisrømønrrun cha. Kerriguba pøtiitsig kònrrun— chibig kòn.

Señor arrum lutau chigøben kònrrabig

(Mt 24.3-28; Lc 21.7-24; 17.22-24)

³Incha Jesús Olivos Tunsrø Tiuswei ya pasrab pinrrøguesrø wabene, Pedroba, Jacoboba, Juanba, Andrésbabe nundø nørø trencha payibelø kòn:

⁴—Øyeebe mana purainrrab kui namun eshkarra cha. ¿Tru kerrigu treeg nebunrrabigwan asamibe chitø kenamistrerarah?— cha.

⁵ Inchen Jesúsbe trenchibig kòn:

—Ashiptø kuy cha, mugøben ñimun peløsrkønrain kømø. ⁶ Kaguende møiløgøben nai munchiyu truba nu amrrua trenchinrrun cha: “Nabe truig kur” chib. Trumay misaameran isa wamincha truba nu peløsrkønrain chibig kòn. ⁷ Incha, ‘misaamera katøgan peesø misaameraba purø trømbøig kørig kømðiig kwayab kweetsiyab kòn’ chib, katø, ‘purø trømbøig kørig kømðiig kwayanrrab kòn’ chib ñim wamindi mørabe, mandøguen kømui inchib kwarmøtay cha. Kaguende øyeebe trendø treeg purainrrabigwein kòn cha. Inchendø katøgucha patsamibe pumø srø kønrrun chibig kòn. ⁸ Peg misaamerabe katøgan peg misaameraba kwayaben, katø rey karumburab ashib karuim piraeløbe katøgan reywei misaameraba kwayanrrun cha. Trune chusrøn køben pirø trømbøig kønøben, parø arruben, iiløbe kan ishuwan unø tammisrtrab pusrkwab pølbasi lataitø kønrrun cha.

⁹ Inchawei ñimasiyaitø tab ashiptø kuy cha. Kaguende ñimune karubelai tasku tranen, katø judíosmera tulundzuni yamerayu ichabetab inchun cha. Katø ñimune karubelø nørreelai merrab, reymerai merrab nagurrindø pønrramig kønrrai martrun cha, trumay ñimbe naimburabigwan wamindamig kønrrain cha. ¹⁰ Srabe kwaløm pumøwatø Tiuswei tabig srø wamwan yu pirau maya misaameran eshkab kusrenanamig nebunrrun cha. ¹¹ Inchen ñimun merrarrawa, tru misagwan ashib karub purrabelaimay tranrrab srua ambene, chi tamermab merrabwei isumønrrigay cha. Tru uras wamincheen Tius maig waminchai tranen, treeg waminchigay cha. Kaguende ñim kømøtø, Espíritu Santo waminchun, chibig kòn. ¹² Inchen nuneebe nømui nunewandøwei kwetchai tranen, møskaimbe nusrkawan tranen, ureemerabe møskalan namig kurra, kwetchai tranrrun cha. ¹³ Maya misaabe ñimune nagurrindø tsalø indiilø kømrrabguen cha. Inchendø srabe kwalømgatig chigúingucha megabig megabiibe kebeñchabig kømig kaigyugurri wesraig kønrrun, chibig kòn.

¹⁴ Tru pinishinrrabig trømbøig køsøngønrraptiig truig nø pasarnug kømubendø, ñim truyu pasrai ashabe (lebiibe iigwan tab chigúi mør), trube, Judea pirau warabeløbe tun palasømay wegørra lulay cha. ¹⁵ Inchen tru kwaløm nui ya pala wambig wabiibe chigøben wesrunrrab kørraarua, umbu kelulmumig kòn cha. ¹⁶ Katø chugøben trausrø uñibiibe nui itøtsingwan tranrrab arrumumig kòn. ¹⁷ ¡shumbur waachamera, tru kwalømmerawan patsø kwanreelø, kabe muchib ureg tøgarmaraimbe maig kønrrer! chibig kòn. ¹⁸ Inchawei ñimbe Tiusba waminchib miay cha, trømbøig pishin kwalømmerawan lulamig nebumønrrai. ¹⁹ Kaguende tru kwalømmerawane purø trømbøig nebuinab melamig attrun cha. Tius chigurrimbunø købigwan marøb uraskurri møingatig øyeebe kaagúig, katøbe managuen øyeebe kaanrrun cha. ²⁰ Señor tru kwalømmerawan landøranmuiruandøbe, mugucha øsig waramgaig kønrrun cha. Inchendø nuyasiitø kønrrai tarømarilø, tru nø lawa wesruiløgurri landøranin kòn cha.

²¹ Inchawei tru kwalømmerawan møikkøben ñimun: “Asay, yu Cristo pasran” chib, kabe: “Asay, yu pasran” taingucha, køremøtay cha. ²² Kaguende møiløgøben ‘Cristo ker’ chib, isatø inchibeløba, katø ‘Tius maig karuigwan eshkabelø ker’ chib isatø inchibeløba amrrunrrun cha. Incha nømui maramburab marøb mariilø, nørreelø asha kømig kenamariiløba, nørreelø kwaara asha kønrrai mariiløba martrun cha, misagwan treeg incha peløsrkønrab. Incha Tius nuyasiitø tarømarilanguen kegørrøsrkamðiig kuimbe, kegørrøskønrrab inchun, chibig kòn. ²³ Inchawei ñimbe tab isua ashiptø kuy cha. Nabe ñimune iigwan kerriguba puraimøwatø chab eshkar cha.

*Møg Misra Arrubig mandø arrumigwan waminchib
(Mt 24.29-35, 42, 44; Lc 21.25-36)*

²⁴ Inchen tru kwalømmerawan, tru treeg isumdø kwalømmera chab puraibene, nøsiibe yandø kwaben, pøbbe yandø pilømuben,

²⁵ estrellamerabe srømbalasøngurri kørrab amrruben,

katø srømbalasø purø nørreelø pønrrabelan

kønøgøb sruagutsiilø kønrrun chibig kòn.

²⁶ Inchen tru Møg Misra Arrubiibe purø nuig maramburab maramig tøgag tøguegwalmabig wafiyu arruben, misaamerabe ashchun chibig kòn. ²⁷ Incha nøbe nui angelesmeran øra, ambugurri, igurri, walligurri, wagurri pirau maya yabsrøngurri kandarø srømbalasøngatig nui lawa wesruilan kanbalatø tulishinrrun cha.

²⁸ Kan higuera turswanma asha kusrey. Nui sramera uturcheelø misrøb, ishi-mera weguchene, ñimbe pachig kwalømmera arrumig yandø lutau kui ashibelø kòn cha. ²⁹ Øyeetøwei ñim iilan purayai ashabe, attrabiibe attrab yaskabuguen pasraitamab isua kuy, chibig kòn. ³⁰ Pøs nabe ñimun cierton trendamønrrun cha: Møin kwaløm misaamera pinømøwatø, øyeeløbe kerrigu purainrrun cha. ³¹ Srømbalaba, pirøbabe patsøben, na wamindiibe ka wamindiitøbe purainrraamøn cha.

³² 'Inchendø tru treeg punrrab kwalømwamba, uranbabe mugucha ashmøn cha. Srømbalarø ångelesmeraguen ashmøwei, ni Tiuswei Nusrkai ashmøwei indan cha. Trunun ashippe, Møskaindøwei asan, chibig køn.

³³ 'Inchawei ñimbe pesannamø, tab ashiptø kuy cha, kaguende ñimbe øyeebe mana purainrrabig kui ashmøwabe. ³⁴ Kaguende ñibe kan møg nui yaugurri yabsrømay webya inrraptø, nui karuindiig melabelane nui yawan ashib kønrrai kørrømara, kanun kanun nømui maramigwan marøb kønrrai karua põnsra, tru yaskabu ashib pasrabigwane chigøben kømønrrai ashib pasrønrrai karua pasra ibig lataitøwein køn cha. ³⁵ Inchawei ñimbe ashiptø kuy, chibig køn. Ya puai pilliraben kui, kabe yem tøbøtag kui, kabe kallu wamøben kui, kabe løtsø kui, mana attrab kui mørømøwabe. ³⁶ Inchippa mõi mõi arrua, kib warøben wetørrainrrab kømø cha. ³⁷ Inchawei na ñimun maig taibe, mayeelan katø treetøwein tamønrrun: ¡Munig, kasriitø kuy!— cha.

14

Jesúsuan mandø incha kemøramigwan waminchib
(Mt 26.1-5; Lc 22.1-2; Jn 11.45-53)

¹ Pascua fiestan maramiba, tru Pirri Levaduragaig maig Fiestan maramiba yandø pa kwalømdø paløben, sacerdotesperan karubeløba, tru Moisés pørigwan kusrenanøbeløbabe Jesúsuan kwetchab chigøben isa mandø incha kemøramdiig køtashchab inchib kuabe, ² trenchibelø køn:

—Fiesta utu marmønrrab cha, misaamera ke chindi asamgaig inchimønrrain— cha.

Kan ishug Jesúsuan may irrabzhittøga itø lushib
(Mt 26.6-13; Jn 12.1-8)

³ Betaniasrø tru Simón Leproso taigwei yau Jesús wabene, kan ishug alabastro limetayu nardotøzhig chi undisaimiig, netsiig, truba may irrabig, purø nuweyigwan srua, kemalla, Jesús mishatsigu wamnetø, limetan pushippa, tru may irrabigwan tur pala itølushibig køn. ⁴ Inchen møiløgøsrøn truyu purrabeløbe nama, nømdø trenchibelø køn:

—¿Purø may irrabzhigwan ke ka yandøbe chinchabrre lusah? cha. ⁵ Waachameran purugumig kan trescientos denarios menrraweinguen yanøbsruinrrun— cha.

Nømbe tru ishuwane truba namig waminchib købelø køn.

⁶ Inchen Jesúsbe trenchibig køn:

—¡Kagøbasay! cha. ¿Chinchabrre inchigue? cha. Nøbe nayasig truba tabzhig maran cha. ⁷ Waachamerane chu uragucha ñimui utu tøgagua, ñim nømun tabig maramdiig købene, tabig martrun cha. Trune nane yube chu uragucha tøgagønrraamøn cha. ⁸ I ishuube nun maig maramdiig nebunen treeg maran cha. Nai asrwan manawei kanmaytø may irrabzhigwan srølan cha, nan søramigweyasig. ⁹ Nabe ñimune cierton trendamønrrun chibig køn: Yu pirau chuiwagucha Tiuswei tabig srø wam kaigyugurri wesrabigwan eshkab kusrenaniisrømbe, tru nø marigwangucha tøga waminchun cha, nun pesannamø, isuig kønrrai.—

Judas Jesúsuan ashig kømui inchibelan tranøb
(Mt 26.14-16; Lc 22.3-6)

¹⁰ Inchen Judas Iscariote, tru doce Jesús kusrenanøb pera uniilai utuig, sacerdotesperan karubelan Jesúsuan nømui tasku tranrrab waminchab ibene, ¹¹ nømbe trunun mørøppe, truba kasraarawa, an tranrrab misrøbelø køn. Inchen Judasbe Jesúsuan mandø incha tranamigwan yandø lab mendabig køn.

Señorwei Pascua mamig
(Mt 26.17-29; Lc 22.7-23; Jn 13.21-30; 1 Co 11.23-26)

¹² Tru Pirri Levaduragaig maig Fiesta pølbarsøb kwalø, tru Pascuayasig ubisha-unan kweechib kwalø, Jesúswei kusrenanøb pera uniiløbe nun trencha payibelø køn:

—¿Pascua mamigwan ñuimbe chu tamartrab ambamø?— cha.

¹³ Inchen nømbe nui kusrenanøb pera uniilan pailan trencha karua ørøbig køn:

—Ciudayumay ambay cha. Truyube kan møg pigøtsø mutaig ñimun katøben, truigwei wendautø amrrigay cha. ¹⁴ Incha truig kebyainug kebambabe, ya puai gwane ñimbe trenchinrrigay cha: “Kusrennøbiibe ñun trendan cha: ‘¿Nai kusrenanøb pera uniiløba pascua mamigwan mab purram salabe chu køh?’ ” cha. ¹⁵ Inchene ya puaipe pala pisusø kan nu sala chiguen palømiig yandø ke chab tamarikken ñimun eshkanrrun cha. Inchen ñimbe namuyasig truyu tamartrigay— chibig køn Jesúsbe.

¹⁶ Inchen nømbe amba, ciudayu puabe, Jesús nømun maig taig treeg wetørrawa, tru Pascuan tamarøbelø køn.

¹⁷ Inchen yandø yem køben Jesúsbe nui doce kusrenanøb pera uniiløba pua, ¹⁸ mishatsigu mab purrøwabe, Jesúsbe trenchibig køn:

—Nabe ñimun cierton trendamønrrun cha: Ñim mōikkōsrōn naba mab wabig nan ashig kōmui inchibelaingatō misra, nan tranrrab kōn— cha.

¹⁹ Inchen nōmbe truba isui inchib menda, Jesúswan kan kan payibelō kōn:

—¿Kabe na kōbra, chinderah?— chib.

²⁰ Inchen Jesúsbē trencha lōtabig kōn:

—Ñim doceelai utuig kōn cha, naba i nindagutōwei pirriwan kebishibig. ²¹ Pōs, tru Mōg Misra Arrubiibe Tiuswei wamwan pōrigu maig pōrig pasrōben, truwan pureb iben, trune jtru mōg waacha! tru Mōg Misra Arrubigwan ashig kōmui inchibelan tranrrabigweimburappe, yeekkucha kuita, chibig kōn. Trembe truike kal-lamui guinguen sōl kōbsruinrrun— cha.

²² Incha mab purrappatō, Jesúsbē pirriwan muta, Tiuswan ‘mayanguen pay’ cha, pirishabe, nōmun trenchib srōrrōbig kōn:

—Cha, may cha. libe nai asr kōn— cha.

²³ Incha katō copan muta, Tiuswan ‘mayanguen pay’ chabe, nōmun purōrōbig kōn. Inchen tru copayuiwan sōteelōba muchibelō kōn. Inchen nōbe nōmun trenchibig kōn:

²⁴ —Iig, nai animbe, Tius tru misagweyasig srō acuerdon mari anin kōn cha. Tru animbe truba nu misagweyasig lusig kōn cha ²⁵ Nabe ñimun cierton trendamønrrun cha: Uvas piwane mas muchimumønrrun cha, nai Mōskai nō ashib karub waisrō katōyug ñimba mutsam kwalōmgatig.—

Pedro nan ‘ashmíg kur’ chinrrautan cha, Jesús trenchib

(Mt 26.30-35; Lc 22.31-34; Jn 13.36-38)

²⁶ Incha kan himnon chab cantawabe, Olivos Tunsrōmay amba, ²⁷ Jesúsbē trenchibig kōn:

—Ñimbe mayeelōba nainug isua pōnrraigwan trubishinrrun cha. Kaguende Tiuswei wamwan pōrigu ōyah chibig pōrig pasran cha:

“Ubisha ashibigwan na kweechen,
ubishamerabe nōrōtō chab lulrrun” chibig.

²⁸ Inchendō nabe katōyug ōsiirappe, ñimnguen ammōwatō, nabe Galileasrōmay yamønrrun— cha.

²⁹ Inchen Pedrobe trenchibig kōn:

—Mayeelōba ñuinug isua pōnrraigwan trubisaingucha, na kuimbe tarōmismumønrrun— cha.

Inchen Jesúsbē trencha lōtabig kōn:

³⁰ —Nabe ñun cierton trendamønrrun cha: Mōi yemdōweinguen kallu pamay wamōmōwatō, ñibe pōnmayguen nan ‘ashmíg kur’ chinrrautan— cha.

³¹ Inchen Pedrobe truba inchib trenchibig kōn:

—Ñiba nan kwamig nebuinguen, nabe managuen ñun ‘ashmíg kur’ chimumønrrun— cha.

Inchen sōteelōba treetōwein chibelō kōn.

Jesús nui Mōskaimba Getsemanisrō waminchib

(Mt 26.36-46; Lc 22.39-46)

³² Incha nōmbe kanbalō Getsemaní taisrō puabe, Jesúsbē nui kusrenanōb pera uniilan trenchibig kōn:

—Yu purramisray cha, nai Mōskaimba na wamindamne.—

³³ Incha Pedronba, Jacobonba, Juanwanba pera yabe, truba truba isui, ni mumayguen tab kōmui inchib menda, ³⁴ trenchibig kōn:

—Nai manrraube isubiitō kwabguen ka kwamdiig kōtan cha. Ñimbe yutō kōrrōmisra, kimō purray— chibig kōn.

³⁵ Incha Jesúsbē katōguchi ambuurō ya, pirau sralōptincha, Mōskaimba waminchib miabig kōn:

—Tru purō trōmbōig attrabig nan treeg punrrain kōmubene, treeg pumugasam— chib.

³⁶ Katō Tiuswan trenchib miabig kōn:

—Abba, nai Mōskain chib, ñuimbe chitōgucha kaimamō, maramdiitō kōn cha. I copan nan tarōmartra cha. Inchendō na maig isuig kōben, treeg kōnrrain kōmōtō, ñun maig maramdiig kōben, treeg kōnrrain— chib.

³⁷ Incha nui kusrenanōb pera unilaimay arrua, kib purrai wetōrrawabe, Pedrone trenchibig kōn:

—Simón, ¿kib watirru? cha. ¿Kan uratōguen kimō, kasriibe wanrrab kaimatirru? cha.

³⁸ Kimō, Tiusba waminchib purray, chibig kōn, chiyugōben kaigyu kegōrrōmōnrrappe. Ñimbe tabigwan martrabwei isuingucha, ñimui asrbe kullaguig kōn— cha.

³⁹ Incha katøle Jesúsbe ya, treetøwein chib Møskaimba waminchibig kòn. ⁴⁰ Incha katø arruabe, katøguen nui kusrenanøb pera uniilane kiptøwei purrain kui wetørrabig kòn, kaguende nømui kabmerabe kigøbiitø ke kanaim purrøwa. Incha nømbe mancha lètønrrab kaimabelø kòn. ⁴¹ Inchen Jesúsbe pønmay kònrrabyu arruabe, trenchibig kòn:

—¿Katøgucha ñimgan israb, kib srø warøtirru? cha. Yandø tsabø kòn cha. Ura pun cha. Yandø tranan, chibig kòn, tru Møg Misra Arrubigwan kaig marøbelai tasku. ⁴² ¡Kurray, chibig kòn. Amrrab! cha. Nan ashig kømui inchibelaingatø pasramisrøbig nan tranrrab arrubguen indan cha. ¡Asay!— chibig kòn.

Jesúswan merrarrowa srua ambub

(Mt 26.47-56; Lc 22.47-53; Jn 18.2-11)

⁴³ Incha Jesús waminchib pasramne, tru Judas, tru doce kusrenanøb pera uniilai utuibe truba nu misaaba arrubig kòn, nømbe espadamera køben, tsiimera køben sruargue. Truiløbe sacerdotesteran karubeløba, tru Moisés pørigwan kusrenanøbeløba, misagwan karubelø kølli misaameraba misra, karua øriilø købig kòn. ⁴⁴ Tru Judas Jesúswan ashig kømui inchibelaingatø pasramisrøbiibe nømune: “Merrarramig kuitamab ñim ashchai, na chi siñal kòsrøn maren, ashib pønrrørrigay” cha, eshkain købig kòn. “Tru na muchaig, truig kònrrun cha. Truigwan kemøra, suldaumeraba sruamrrigay” cha. ⁴⁵ Inchen Judas puabe, møi møi Jesúswaim pulu kemallib trenchibig kòn:

—¡Nai Kusrennøbig!— cha.

Inchabe muchabig kòn. ⁴⁶ Inchene nømbe Jesúswan kemøra, sruamrrab merrarrabelø kòn.

⁴⁷ Inchen møikkòsrøn truyu pasrabiibe nui espadan wesrub, maya sacerdotesteran nø karub sacerdotei karuindiig megabigwan kaluwan kelarrab lutiichiptionchibig kòn. ⁴⁸ Inchen Jesúsbe misaameran trenchibig kòn:

—¿Chindimbarre ñimbe espadamera køben, tsiimera køben sruar werrugue cha, nan kemørrab, nabe kan niilig kui lata? ⁴⁹ Nabe ñimba kwalømmørig Tiuswei yau kusrennøb waben, ñimbe managuen nane kemørmuig kòn cha. Inchendø Tiuswei wamwan pørigu maig taig treg nebunrrain kuig kòn— chibig kòn.

⁵⁰ Inchene nui kusrenanøb pera uniiløbe nundø pasramnetø, mayeeløba chab luløptinchibelø kòn. ⁵¹ Inchen kan matsinube kòsaatiig llensutø tsinaig tru wendautø iben, nune kemørøptinchen, ⁵² nøbe llensun wesølnnøb, kòsaatiig ¡katø! pinaptinchibig kòn.

Jesús tru Setenteelø maig maramigwan asha marøbelai merrab

(Mt 26.57-68; Jn 18.12-14, 19-24)

⁵³ Incha Jesúswan tru maya sacerdotesteran nø karub sacerdotemay srua ambubelø kòn. Inchen mayeelø sacerdotesteran karubeløba, misagwan karubelø kølli misaameraba, tru Moisés pørigwan kusrenanøbeløba kerriguh tulundzunabelø kòn. ⁵⁴ Inchen Pedrobe Jesúswei wendau yaptø, yaptø tru maya sacerdotesteran nø karub sacerdotei ya wambiisrøngatig ya, tru ashchai pønraig pønrrabeløba pachiirab naabulu wamisra wabig kòn.

⁵⁵ Inchen sacerdotesteran karubeløba, tru Setenteelø maig maramigwan asha marøbelø mayeeløba misra Jesúswan kwanrrai pasrtrab, møilan køben ¡Jesúsbe kaig maren, nabe ashibwei indig køn' chib, waminchabelø labendø, treg waminchabelø wetørranrrab kaimabelø kòn. ⁵⁶ Inchen møiløgøben nuimburab chigøben isa waminchendø, nøm waminðiibe ka peetø, peetø webibig kòn. ⁵⁷ Inchen møiløgøben kurra, isatø Jesúswan trenchibelø kòn: ⁵⁸—Nabe nø trendai mørig køn cha: “Nabe i Tiuswei yawan møguelø marigwan pinisha, pøn kwalømyube Tiuswei ya katøgan, møguelø marig kømøtø, mara pasramønrrun” tan— chib.

⁵⁹ Inchen treendingucha, katøgucha nømui waminðiibe peetø, peetø webiben, ⁶⁰ tru maya sacerdotesteran nø karub sacerdotebe mayelai utu kurra pasramisra, Jesúswane payibig kòn:

—¿Chigucha lètømønrrapteh? cha. ¿Ñune øyeebe chi kalø maran charre inchib køh?— cha.

⁶¹ Inchen Jesúsbe niløtø pasrøwa, chigucha lètømuben, tru maya sacerdotesteran nø karub sacerdotebe katøyug trencha payibig kòn:

—¿Ñigan tru Cristo køtirru cha, tru Tius mayanguen Tab Indigwei Nusrkai?—

⁶² Inchen Jesúsbe trenchibig kòn:

—Nabe truigwein kur cha. Inchagucha tru Møg Misra Arrubig tru maramburab marøb Tiuswei kusrmay waben ñim ashib, katø srømbalásrøngurri wañiyu arruben ashib inchun— cha.

⁶³ Inchen tru maya sacerdotesteran nø karub sacerdotebe nø kewagúigwandøwei kòlsrøb, trenchibig kòn:

—¿Namun nuimburab waminchabelø mas chiwein kui palønrrab kø? cha.
64 Ñimdøweinguen Tiuswan purø trømbøig wamab wamindingwan møran cha. ¿Ñimune maig asønata?— chibig køn.

Inchen nømbe mayeeløba treeg kaig kuin kui mara, kwanrrai kørømara pasrøbelø køn.

65 Inchen møiløgøben nun illimbi tuchib, maløwan kasra, nun kurraguchib mendabe trenchibelø køn:

—¡Namun kelarrab eshkau pøs, chib, mu kurragutsin kui!—

Inchen tru Tiuswei yau ashchay pønraig pønrrabeløbe Jesúswan merrarrawa, pashaguchibelø køn.

Pedro Jesúswan ‘ashmíig kur’ chib

(Mt 26.69-75; Lc 22.56-62; Jn 18.15-18, 25-29)

66 Inchen Pedrobe pinaamay yawambig waben, trunetø tru maya sacerdotemeran nø karub sacerdotei mendig megabig kan srusrø puabe, 67 Pedro nag pulu pachirab waben, nun tab ashabe, trenchibig køn:

—Ñigucha tru nazaretsriig Jesúsba uñibig kuig kømøh— cha.

68 Inchen Pedrobe trenchib isabig køn:

—Ashmíig kur cha. Ni chi wamindinguen mørmur— cha.

Incha wambig kerruisrø webibene, kan kallu wamabig køn. 69 Inchen tru srusrøbe katøle Pedron ashabe, truyu purrabelan katø eshka mendappe:

—Iibe trulai utuigwein køn— chiben,

70 Pedrobe katøguen ‘ashmíig kur’ chib isabig køn. Inchen truyu purrabeløbe yanayutø katøguen Pedrone trenchibelø køn:

—Isa kømø, ñigucha trulai utuigwein køn cha; kaguende ñibe galileasriig køn— cha.

71 Inchen Pedrobe:

—Na isab pasraig købene, trube, nan chigøben neburrappe nebubash chib. Tiusken ashen, katø nabe isa waminchibgucha pasrømur, chibig køn. Ñim waminchib kui møwane ni ashibguen ashmíig kur— cha.

72 Inchen trenchiben latatø kallube katøganguen wamaptinchibig køn. Inchene Pedrobe Jesús øyah taig kømørramab isuptinchibig køn: “Kallu pamayguen wamømwatø, ñibe nan pønmayguen ‘ashmíig kur’ chinrrautan” taigwan. Incha trunun isuabe, truba truba isuig kishibig køn.

15

Jesús Pilatoi merrab

(Mt 27.1-2, 11-14; Lc 23.1-5; Jn 18.28-38)

1 Inchen yandø chab tør-rrabedø sacerdotemeran karubeløba, misagwan karubelø kølli misaameraba, katø tru Moisés pørigwan kusrenanøbeløba, tru Setenteelø maig maramigwan asha marøbelø kerrigueløba tulundzunabelø køn. Incha nømbe Jesúswane lusra, srua amba, Pilaton tranøbelø køn. 2 Inchen Pilatobe Jesúswan trenchibig køn:

—¿Ñigan judíosmerai rey køtirru?— cha.

Inchen Jesúsbe trencha løtabig køn:

—Ñitøweinguen chab trendan— cha.

3 Inchen sacerdotemeran karubeløbe nune chine, chine ‘øyeeg marøbig kuig køn’ chiben, 4 Pilatobe katøyug trenchibig køn:

—¿Chigucha løtømønrrapteh? cha. Ñiguen ash cha, ñune chigøben yeeg waminchib køn cha, nømbe.—

5 Inchen Jesúsbe treeg indingucha løtømuben, Pilatobe ‘kan øyeebe maig kermab’ isub kørømisrøbig køn.

Jesúswan kwanrrai pasrøb

(Mt 27.15-31; Lc 23.13-25; Jn 18.38-19.16)

6 Fiesta kwalømmerawane kubernadurbe kailan keeri yau pønrrabelan misag møigwan elatchai miaben, trendø treeg marøb elachibig køn. 7 Inchen tru keeri yaube kan møg Barrabás taibe keerig pasrabig køn, nøbe larrø kailøba søtømisra, ashib karubelan namig kurrabyu misag kweechaig. 8 Inchen misaamerabe amrrua:

—Ñi trendø treeg marøbiibe, treeg mar— chib, Pilatone miab mendøben,

9 Pilatobe trencha løtabig køn:

—¿Ñimbe judíosmerai reywan na elatsamig palain køgue?— cha.

10 Kaguende Pilatobe tru sacerdotemeran karubeløbe Jesúswane uni ashig kømøptø nun tranin kui ashibig køn. 11 Inchen sacerdotemeran karubeløbe Jesúswan kømøtø, nømbe Barrabáswane elatchai inchibelø køn. 12 Inchen Pilatobe katøyug payippe, trenchibig køn:

—Trube, ¿ñim tru judíosmerai rey køn taigwane nabe mandø indamø?— cha.

¹³ Inchen nõmbe katø trenchib trashib løtabelø køn:

—¡Kurusyu mesrø!— chib.

¹⁴ Inchen Pilatobe trenchibig køn:

—¿Nøbe chi kalø marindørre øyeeg martrainchigue?— cha.

Inchen nõmbe masken mur trashibelø køn:

—¡Kurusyu mesrø! ¡Kurusyu mesrø!— chib.

¹⁵ Inchen Pilatobe tru nu misagwan ka tab kønrrai inchig køptø Barrabáswan ka inrrai elacha, Jesúswane ichagutsingarua, kurusyu mesrønrrai tranøbig køn.

Suldaumera Jesúswan indzatø ashib

¹⁶ Inchen suldaumerabe palacioyu mas umbusrø srua amba, maya suldau sötøwan tulundzuningarua, ¹⁷ kan yalø piguiig itøguenana, kaldiigwan corona mara, petsøsrøbelø køn. ¹⁸ Incha trugurrimbe trenchib trashib mendabelø køn:

—¡Judíosmerai Rey, viva!— chib.

¹⁹ Incha cañatøga turbøtø itsamba, illimbi tutamba, tab inchib chib, nui merrab tømønrsamba inchibelø køn. ²⁰ Incha øyeeg marøb ka indzatø ashib srua køptø, tru yalø piguiig itøguenanigwan wesrawa, nuiwan katøle kenana, kurusyu mesrønrrab nune wesrubelø køn.

Jesúswan kurusyu mesraig

(Mt 27.32-44; Lc 23.26-43; Jn 19.17-27)

²¹ Kan møg cirenesriig Simón taig, Alejandroimba, Rufoimba møskai wambig nõørøsrøngurri purainrrab arruben, nune Jesúswei kuruswan ke mutamne incha mutøsrøbelø køn.

²² Incha kanbalø Gólgota taisrømay nune srua ambubelø køn, (tru trenchippe, “Calaverasrø” tainug). ²³ Jesúswane vinoba, mirraba lindsaig yuulingucha, Jesúsbe muchimig køn. ²⁴ Inchen kurusyu mesra, suldaumerabe Jesúswei kewagüilan mu merrarramig nebutashchab suerte kuchibelø køn.

²⁵ Inchen løtsø las nuevetø købig køn, tru Jesúswan kurusyu mesrøben. ²⁶ Incha kan pørig mesrøbelø køn, chigurrin kwanrrai mesraig køn cha eshkabig:

JUDIOSMERAI TRU REY KØN

chibig. ²⁷ Incha katø pagatø nileelangucha kanun kusrmay, kanun atsimay nunba kurusyu melsrøbelø køn. ²⁸ Inchen tru Tiuswei wamwan øyah chib pøriibe nebuig køn: “Tru kailai utu nune tøga pasrig kønrrun” taig.

²⁹ Inchen truwan puraambubeløbe tsalø wamab, turwandø kønøgøb trenchibelø køn:

—¡Au, ñi Tiuswei yawan pøtiicha, katø tru pøn kwalømyutø kusranrabiibe, ³⁰ kwamønrrab ñitøwei chigøben mar! cha. ¡Kurusyugurri pinaamø!— cha.

³¹ Inchen tru sacerdotemeran karubeløba, tru Moisés pørigwan kusrenanøbeløba treetøweih nun indzatø ashib kangurrin kangurri trenchibelø køn:

—Kanelane kaigyugurri wesrabendø, nõasiitøweimbe kaiman cha. ³² Tru Cristo, Israel misagwei reybe, mõi kurusyugurri pinaarrubash cha, nam asha, nõ kuitamab kørenrrab— cha.

Inchen nõba kurusyu melsraig melabeløgucha Jesúswan tsalø wamabelø køn.

Jesús kwaig

(Mt 27.45-56; Lc 23.44-49; Jn 19.28-30)

³³ Yandø kwaløm tøbøtag misrene, maaben las treskatig pirau ørøba løstiig kørrømisren, ³⁴ tre uras Jesúsbe truba mur trashibig køn:

—¡Eloi, Eloi! ¿Lama sabactani?— cha. (Trenchippe: “¡Nai Tius, nai Tius! ¿Chindimba nandø elachigu?” chib.)

³⁵ Inchen møiløgøsrøn truyu pønrrabelø mørabe, trenchibelø køn:

—Møray cha. Elíaswan wamøtan— cha.

³⁶ Inchen møikkøsrøn lulabe, ñab esponjan køchiibiyu kebisha, kan caña tsigu pucha, mutchai pulusrø yuuløb trenchibig køn:

—Kagøbasay cha. Inchippa kwamønrrai pinøsrannrrab Elías attachchab— cha.

³⁷ Inchine Jesúsbe mur trashippe, yandø isrømuptinchibig køn. ³⁸ Inchen Tiuswei yau tru purø tab llensuzhig kelarrab sötø mesraibe palasrøngurri kørrab kølsra, yandø paig misrøbig køn. ³⁹ Inchen tru Roma suldau cienelan nõ karubiibe Jesúsweim pinrrøgue pasrøwa, øyeeg trasaigwan mørøb, mandø kwaigwan ashib inchabe, trenchibig køn:

—Isa kømø, i møøbe Tiuswei Nusrkaiwein kuin køn— cha.

⁴⁰ Inchen ishumburmera mōilōgōsrōn yabsrōngurrindō ashib pōnrrabelō kōn. Tru utube María Magdalena kōben, tru Wendiiig Santiagoimba, Josēweimba usri María kōben, katō Salomé kōbengue. ⁴¹ Inchen tru ishumburmerabe Jesús Galileasrō uñen, nui mendig amōñib, purugub inchibelō kōbig kōn. Inchen truyube truilōtō kōmōtō, katōgan ishumburmera Jerusalénmay Jesúsba nebamba yam pasrabig kōn.

Jesús swan sōrig

(Mt 27.57-61; Lc 23.50-56; Jn 19.38-42)

⁴² Inchen yandō yem misrōb kōben, tru isram kwalōmweyasig tamarōb kuin kwalōm kōbig kōn, kaguende katō kwalōmbe isram kwalōm kōnrrab kōben. ⁴³ Inchen José arimateasriig, tru Setenteelō maig maramigwan asha marōbelai utuig truba nuig tabig kui asig mōg, nōgucha Tius nō ashib karub wainuguigwan muniirabig arrua, Pilato wainug kōrmō kebinrrab isua, nōbe kebya, Jesúswei asrwan miabig kōn. ⁴⁴ Inchen Pilatobe, trube, kwabguen inditamab isua, nōbe truba kwaara, kan suldau cienelan nō karubigwan wama, kwabguen inditarru cha, payibig kōn. ⁴⁵ Inchen trube nun eshkaben, Pilatobe Jesúswei asrwan Joséwan pinōsrungarubig kōn. ⁴⁶ Inchen Josébe kan lino llensutōga kirra, Jesúswei asrwan pinōsrua, truyu pulabe, kan peñayu sōramig trab lalig patsabigu waya, trugurrimbe kan nu srugwan merrana, kebambinug kasrōbig kōn. ⁴⁷ Inchen María Magdalenaba, María Joséwei usribabe chu sōrōben ashibelō kōn.

16

Jesús ōsiirraig

(Mt 28.1-10; Lc 24.1-12; Jn 20.1-10)

¹ Inchen sábadō kwalōm puraiben, María Magdalenaba, katō Jacobwei usri María, Saloméba Jesúswei asrwan srōlrrab ambamig may irrabzheelō penabelō kōn. ² Incha tru srō trune pōlbasrōb kwalōmbe, ullarbatō ambubelō kōn sōriisrōmay. ³ Inchendō nōmbe kangurriin kangurri trenchibelō kōn:

—¿Sōrin trabyu kebambannug srugwane namune mu tarōmara traniasamō?— cha.

⁴ Incha mōimbe ashene, tru sōrinug truba nu srug kasraibe truyu kōmōtō, manawei malsrainguen tsuptinchen, ⁵ umbu sōrinug kebambabe, kan matsinō pullig kōrrabig keweig truyu kusrmay wai ashiptinchibelō kōn. Inchen nōmbe kwaaren, ⁶ trube trenchibig kōn:

—Kwarmōtay cha. Ñimbe Jesús nazaretsriig tru kurusyu mesraigwan lan cha. Ōsiirain kōn cha. Yube mu kaagōn cha. Ñimuen asay, chibig kōn, yu nun wayinug. ⁷ Mōimbe ambay, chibig kōn, nui kusrenanōb pera uniilanba, katō Pedrongucha ōyah chinrrab: “Galileasrōmay ñimuen ammōwatō, nōmerrig inrrun tan chinrrigay cha. Trusrō ñimbe nun ashchun tan cha, ñimun nō maig taig.”—

⁸ Inchene tru ishumburmerabe sōrinukkurri wegōrra ambuppe, kwaarōptō ke itōnab chab lulōbelō kōn. Incha mungucha chigucha eshkameelō kōn, kaguende kwaariilō kua.

Jesús María Magdalenan kenamisrōb

(Jn 20.11-18)

⁹ Tru truaalōm ullarbatō Jesúsbe katōyug ōsiirawabe, María Magdalena tru siete kwaimandziimeran webusrinabigwanmerrig kenamisrōbig kōn. ¹⁰ Inchen nōbe ya, Jesúsba amōñibelan eshkabig kōn, truilōbe isuilō kishib kōben. ¹¹ Inchen nōmbe ‘Jesús ōsiirain kōn’ taigwanba, katō María ‘nō ashar’ taigwanba mōrabe, nōmbe kōremeelō kōn.

Jesús nui pagatō kusrenanōb pera uniilan kenamisrōb

(Lc 24.13-35)

¹² Indiibe iilō chab puraiben, kusrenanōb pera uniilō pailō wambig nōōrsrōmay ambub pōnrrōbene, Jesúsbe, nō kōmō, peg lataig kenamisrōbig kōn. ¹³ Inchen nōmbe amba, katōganelan eshkaben, truilōgucha nōmune kōremeelō kōn.

Jesús nui pera uniilan nōashib karua ōrōb

(Mt 28.16-20; Lc 24.36-49; Jn 20.19-23)

¹⁴ Indiibe mas wendōbe tru once pera uniilō mishatsigu mab purramnetō Jesúsbe truyu nōmun kenamisrabe, namabig kōn, tru ‘nō katōle ōsiirawa uni aser’ cha eshkabelan nōmui manrrōmera murelō kuikkurribah, katō kōrenrrab inchimeelō kuikkurribatō. ¹⁵ Inchabe trenchibig kōn:

—Ñimbe yu pirau truōrō amba, Tiuswei tabig srō wamwan mu misagwandōgucha eshkab kusrenanrrigay cha. ¹⁶ Inchen mōikkōben kōreb, katō piu umbu ulsraig kōb inchibiibe kaigyugurri wesraig kōnrrun cha. Inchen mōikkōben kōremigwane kaigyu pasrōnrrai pasrig kōnrrun cha. ¹⁷ Inchen nan kōrebelane, nabe nōmba pasrain kui asamig iig tru ōyeeeg asha kōnrrai marilōbe nōmba pōnrrabig pōnrrōnrrun cha: nai munchiyube kwaimandziimeran

webusrøb, srøig peg wammera waminchib, ¹⁸ nømui taska ulmeran kemørinaingucha, chinchimub, katø inchipa chigøben kwetchaptiig tøga mutsinaingucha, chi kømub, katø nømui tasiimeran kwanrreelaim pala estsarene, truiløbe tabelø kørømisrøb inchun— cha, trenchibig køn Jesúsbe.

Jesús srømbalasarømay nebib

(Lc 24.50-53)

¹⁹ Incha Señor Jesúsbe nømun chab waminchene, nune srømbalasarømay kusraben, Tiusweim pulu kusrmay wamisrøbig køn. ²⁰ Inchen nømbe webamba, Jesucristoimbura-belan chutøgucha truørø eshka kusrenanøbelø køn. Inchen Señorbe nømbe marøb pasrabig køn, nøm wamindigwane nui wam kui asig kønrrai maramburab mariiløtøga kenamarøb.

San Lucas

Maig kuigwan eshkab pølbarsøbig

¹ Pøs møiløgøben maig purayaiowan eshkabig kan pørig tamara kørromartrab indig købig køn lutøgurri, namui utu isa kømøtø, cierton treeg purayeeelan. ² Tru srøsrøgurri nømui kaptøga nømashib ashibelø, katø Tiuswei wamwan nøm waminchib pønrrabelø namun maig eshkaig køben, treeg. ³ Inchen nagucha kerriguba chitø purayailø maig kuigwan srøsrøgurriigwan tab nebua ashene, nangucha tabig asønaben, lutøgurri tamara ñun pørtrab inchar, ñi nai purø tab Teófilon, ⁴tru ñun maig kusrenanig købigwan, tru ciertonigwan ñi tab nebua asamig kønrrai.

Kan ángel Juan kal-lamigwan eshkab

⁵ Herodes Judea rey køben, judiosmerai kan sacerdote Zacarías taig merrabsrø Abíaswei sacerdotemerai utuig tsubig køn. Sraimbe Aarónwei misagugurri arrubig købig køn, Elizabet taig. ⁶ Tiuswei merrab pailøba sølgandø amøñibelø kua, Señor chi martrain taigwanba, katø chi maramigwan martrai karua pønrrailanba muguen chi tamgaig marøbelø købig køn. ⁷ Inchendø chi urekkar købig køn, kaguende Elisabetbe trendø ureg chigaig, pailøba yandø kølleelø kua.

⁸ Indiibe kan kwaløm Zacaríaswei sacerdotes sötøwan Tiuswei merrab Tiusweiwan maramig nømun nebuben, ⁹ sacerdotesmerai utu trendø treeg marøbelø kua, suerte kucha ashene, Zacaríaswan Tiuswei yau incienso patrab kebyamig nun neubig køn. ¹⁰ Inchen incienso parrøb pasramne, maya misaabe wambig Tiusba waminchib købig køn. ¹¹ Inchen mõimbe incienso parri altar pulu kusrmaygatømay Señorwei ángel Zacaríaswan kenamisrøptinchen, ¹² Zacaríasbe ángelwan ashabe, ¡katø! mandøguen kømuptinchen, ke chinchimmørø inchib kørig kui inchibig køn. ¹³ Inchen ángelbe trenchibig køn:

—Zacarías, kørig kui inchimøta cha. Kaguende Tiusbe ñi nun miaigwan mørig kua, ñui srai Elisabetbe kan nusrka tøgagønrrun cha, truigwane ñibe Juan munchi pasrtrig chibig køn. ¹⁴ Inchen ñibe truba tab kui mørøb kasraaraben, nø kal-labene, katøganelø mõiløgøben tab kui mørtrun cha. ¹⁵ Kaguende ñui nusrkaimbe Tiuswei merrab truba nuig kønrrun cha, managen vino muchimøwei, mutsiiranraptiig kørap pi muchimøwei inchabig. Incha usrai patsau wappatøwei Espiritu Santotø netaig kua, ¹⁶møilan køben, Israelwei misaameran nømui Señor Tiusweimay truba nu lirangarunrrun cha. ¹⁷ Tru Juanbe Señorwei merrab ippe, tru merrabsrø Tius maig karuigwan eshkabig Elias maig isubig køben treetøwei isubig, katø truigwei maramburab marigwan tøgag inrrun cha. Møskaløbe nusrkaløba katøle tabig waramig kønrrai marøb, katø kailø mormeeløbe sølgandø amøñibelø misaasun marigu amøñinrrab liranrrai inchun cha. Kan nu sötø misaamera Señorwan utønrrab ke muniitø melønrrabelø kønrrai tamarøb.—

¹⁸ Inchen Zacaríasbe ángelwan payippe:

—¿Ilgwane mandø incha treeg kønrraitamab isumø? cha, trencha payibig køn. Kaguende nabe yandø køllig køben, nai sraingucha treetøwein køn— cha.

¹⁹ Inchen ángelbe trencha løtabig køn:

—Na, Gabrielbe Tiuswei merrab pasrabig kur cha. Incha nane i tabig srøigwan ñun wammørøsrkønrrai ørtan cha. ²⁰ Incha mõimbe tru treeg nebum kwalømgatig ñibe wamgaig, chigucha waminchab kaimabig kørromisrtrabguen cha, na maig taigwan køremikkurri. Tru na trendailøbe treeg pum kwaløm punrrun— cha.

²¹ Trune misaabe wambig munig kua, Zacarías Tiuswei yaugurri ke peguen webarrumuben, chindermab isub købene, ²² Zacarías webarruppe, waminchab kaimabig webarruptinchen, Tiuswei yau chitø kenamisren, asiitamab isubelø køn. Inchen nøbe wamgaig kørromisra, nømune ka señas maratø eshkabig køn.

²³ Inchen Zacaríasbe Tiuswei yau Tiusweiwan maram kwalømmera chab patsøben, nøbe nui yamay iben, ²⁴tru kwalømmera puraiben, Elisabetbe kwanrriig kørromisra, nui yaugurri trattø pøl webimíig køn, øyee isub: ²⁵“Møi i kwalømmerawan Señor nayasig øyee tabig martan cha, misaamera kaasinab megamig kømønrrai martrab.”

Kan ángel Jesús kal-lamigwan eshkab

²⁶ Indiibe tøbø pilayu ángel Gabrielwan Galilea, kan pueblo Nazaret tainuumay Tiusbe ørøbig køn, ²⁷kan managen mu mõøba kimø srusrø, María taigwan ashchai. Truike kan møg, José taig, merrabsrø rey Davidweinukkurin karrab misaaba kasharanrrab misraig købig køn. ²⁸ Inchen ángelbe María wainug kebyabe, trenchibig køn:

—¡Ka watirru! cha. ¡Tius mayanguen tab indig! Señorbe ñiba pasran cha. Katøgan ishumburmeran lata kømø, ñundø purø tab indig køn— cha.

²⁹ Inchen Mariábe ángel wamindiilan mørabe, kan øyeeg chib tab wamibe maig kermab isubig køn. Katø ángel øyeeg chib tab wamibe chi chibig kermab isubig køn. ³⁰ Inchen ángelbe trenchibig køn:

—María kørig kui inchimøta cha. Kaguende ñibe Tiuswei merrab mayanguen tabig asønaig køn cha. ³¹ Møimbe kwanrriig kørromisra, kan nusrkai kal-labene, Jesús munchi pasrtrig chibig køn. ³² Nøbe purø nuig, Tius Mayeelaim Pala Pasrabigwei Nusrkain cha wamig kønrrun cha. Inchen Señor Tiusbe tru møskai David wamisra ashib karub waigwan tranrrun cha. ³³ Inchen nøbe Jacobwei misaameran managatig ashib karub wanrrun cha. Inchen tru nø ashib karub wamibe managuen patsønrraamøn— chibig køn.

³⁴ Inchene Mariábe:

—¿Na mu møøbagucha kimígwane øyeebe chinchá purainrrab kø?— cha, payene, ³⁵ ángelbe trenchibig køn:

—Espíritu Santo ñuim pala kørraarruben, Tius Mayeelaim Pala Pasrabigwei maramburab marøbig kan wañi lataig ñun pinøbulen, treekkurri tru newan tabig kal-lanrrabiibe, Tiuswei Nusrkain cha wamig kønrrun chibig køn. ³⁶ Katø ñimui Elisabetgucha ya køllim palasø kan nusrkai tøgagønrrab køn cha. Chi ureg tøgagønrrab kaimabig køn taikken seis mesesken kwanrriig køn cha. ³⁷ Kaguende Tiusweimbe chitøgucha kaimamdiibe kaabig køn— cha, trenchibig køn.

³⁸ Inchene Mariábe trenchibig køn:

—Nabe Señor maig karuigwan marøb megabig kur cha. Ñi nan maig taig treeg kønrrain— chiben, yandø ángelbe truygurri ibig køn.

María Elisabetwan ashchab ib

³⁹ Tru kwalømmerawan Mariábe tamara, Judea pirau tunneragøba tøga pirømerasø kan puebloyumay petø ya, ⁴⁰ Zacaríaswei yau kebyabe, Elisabetwan ‘ka undirru’ chibig køn.

⁴¹ Inchen Elisabet María ‘ka undirru’ taigwan mørenene, unøbe patsø umbu kønaptinchen, Elisabetbe Espiritu Santo netsaig kørromisra, ⁴² nøbe truba mur wamab trenchibig køn:

—Tiusbe maya ishumburmerai utu ñune mayanguen tab kuig kønrrai indig køben, katø ñui patsau tøgagøig unangucha mayanguen tab kuig kønrrai indig køn cha. ⁴³ ¿Nan øyeeg lastima asiibe chugurri arrerah? cha, ¿Nai Señorwei usri nan ashchab punrraimbe?

⁴⁴ Kaguende ñi nan ‘ka undirru’ cha wamigwan møren latatø, nai unøbe kasrag køptø nai patsø umbu kønaptinndan cha. ⁴⁵ Kørebigweimbe mayanguen tab køn cha. Kaguende Señor maig kønrrun cha, chi taibe, chi taibe, nøbe teeg neburrai martru— chibig køn.

⁴⁶ Inchen Mariábe trenchibig køn:

“Nai mõiibe Señorwan maya nuguen tabig wamindan cha.

⁴⁷ Katø nai espíritu Tius nai Kaigyugurri Wesrabigweinug truba kasraaran cha.

⁴⁸ Kaguende Tiusbe na nø karuigwan marøb megabig, na chigucha kømø waachawan isua asin køn cha. Pøs møingurrimbunøbe misaamera srøig srøig kurrab amrrubeløbe nane mayanguen tab kuig køn chinrrautan cha.

⁴⁹ Kaguende Tius maramburab marøbiibe nan purø nørriig tabelø marin køn cha, nui munchibe newan tabig køben.

⁵⁰ Inchen nui lastima asiibe, nun køriibala melabelaimbe, srøig srøig misag kurrab arrimørig truilain kønrrun cha.

⁵¹ Nui taska chigøben purø nørreelø mara, tru nørreelø truba møg inchib, chigøben martrab isuilane chindinguen møriimig ka isuitø purainrrai kørromarin køn cha.

⁵² Karumburab karub purrabelane nøm purramisra karub purraigwan kerrawa, chigucha kømeelan tabigu neerin køn cha.

⁵³ Parøgüilane tabig tøgagønrrai unchaguen tranøppe, puarmerane chiguchagar ambasan cha.

⁵⁴ Katø nø karuigwan marøb megabig Israelwan purugun cha, nø lastima asigwan isub,

⁵⁵ tru merrabsø namui kølli misag Abrahamwanba, nuinukkurri karrab misaameranba maig wamindig managatig treeg kønrrai.”

⁵⁶ Incha Mariábe Elisabetba pøn pølburab kørromisra, nui yamay katø ibig køn.

Juan kal-laigwan waminchibig

⁵⁷ Yandø Elisabetwan unø kal-lam kwaløm puben, kan nusrkai tøgagøbig køn. ⁵⁸ Inchen nui ya pulueløba, nui yaueløba Señor nun truba lastima asin kui ashabe, nømbe Elisabetba truba kasraarabelø køn. ⁵⁹ Indiibe ke trune kwalømyube unan circuncidanrrab srua amba, unane munchi pasrøppe, møskawei yauhi Zacarías pasrtrab inchen, ⁶⁰ usrimbe trenchibig køn:

—Kah, treeg kømøtø, unøbe Juan munchi kønrrun— cha.

⁶¹ Inchen nømbe trenchibelø køn:

—Mugucha ñimui yaueløbe treeg munchi tøgørbe kaagøn— cha.

⁶² Incha mōskawan: “¿Chi munchi pasrtrab?” cha, señas maratø payene, ⁶³ Mōskaimbe pøramig kan tabla-unø miawabe: “Nui munchibe Juan køn” chib, pøøbig køn. ⁶⁴ Inchen tru urastø Zacaríaswane nilø kemendikkucha kurrøben, wam larraiben, Tiuswan tabig waminchib mendabig køn. ⁶⁵ Treekkurri mayeeløba nui ya pulueløbe truba truba kwaariilø kørømisren, tru Judea pirau tunmeragøba tøga pirømerasø warab misaamerabe, øyeelø purayigwangøba waminchib købelø køn. ⁶⁶ Inchen mayeelø wammøøbeløbe nømui manrrautø esegab trenchibelø køn:

—¿I unøbe chi maig kønrrabig kerah?— cha.

Kaguende Señorwei tasiibe nøba pasrøben.

Zacarías cantaig

⁶⁷ Zacarías tru unai mōskawane Espiritu Santo netsaben, maig pub attrabigwan øyah chib waminchibig køn:

⁶⁸ “Israelwei Señor Tiusbe mayanguen tabig wamindig kønrrain cha. Kaguende namun ashchab arrua, nui misagwane katøle nuielø kønrrai wesrun cha.

⁶⁹ Maramburab Marøbig Kaigyugurri Wesranrrabig kusrain køn cha, tru karuigwan marøb megabig Davidwei yaugurri.

⁷⁰ Tru merrab manasøngurri tru Tiusweindø tarømariilø Tius maig karuigwan eshkabeløgurri nø maig taig:

⁷¹ Namun tru ashikken kømui inchibelainukkurrimba, katø mayeelø namun tsalø inchibelainukkurrimbe wesranrrab cha trendaigwan.

⁷² Merrabsø namui kølli misaameran truba lastima asigwanba, katø Tius tru misaaba øyeeg martrab cha, tru newan tabig nuinukkurri nø lata kandø isua martrab pasrigwan isumig kønrraimba,

⁷³ tru namui kølli misag Abrahamwan treeg marmø kømø jkatø! treeg marig kønrrun cha kørømarig købigwan.

⁷⁴ Tru namun ashig kømui inchibelai taskugurri namun wesraikkurrimbe, chigucha chi kørig kuin kømø, nuiwan marøb,

⁷⁵ katø nam amønain kwalømmerawan kwalømmørig chu urastøgucha nui merrab kerigu newan tabig, sølgandø marøb kømig kønrrai.

⁷⁶ Inchen ñi nai unøzhiibe, Tius maig karuigwan eshkabig tru Mayeelaim Pala Pasrabig-weimburab waminchibig køn taig kønrrun cha. Kaguende ñibe Señorwei merrab inrrabig køn cha, nui maymeran tamarøb,

⁷⁷ katø kaigyugurri wesrailø kømigwan misaameran nebua ashchai kenamarøb inchab, tru nømui kaig mariilan ulø paymø pesannab indikkurri.

⁷⁸ Namui Tius purø nu lastima asikkurri, kan sø kwaløm pørr tørguegwalmabig neeshibig lataig kal-lanrrun cha,

⁷⁹ purø løstøyu warabelanba, katø kwamitø itøgasraig warabelanba kebilønrrab. Incha ambumay imay tabig amønām maywan ambamig kønrrai martrab.”

⁸⁰ Inchen unøbe nurab ippe, Tiusweimburabeløyu treetøwei mur pasrabig nurab ya, Israel misaameran kenamisram kwalømgatig mu misag warab waraimøsrø tsubig køn.

2

Jesús kal-laigwan eshkab

(Mt 1.18-25)

¹ Tru kwalømmerawan Roma maya misagwan ashib karub wabig César Augustobe treeg maramig kønrrai kan kilga treeg pøra weerig købig køn, chutøgucha misaamera maya nu køtashchab munchimeran tulisamig. ² Iig køn, tru srøsrøwan munchimeran tulisingarui, Cirenio Siria pirausrø kubenadur køb uras. ³ Inchen mayeeløba tru trendø nømuim pirau pueblomerasø munchiwan pøra kørømartrab ambamig neubig køn.

⁴ Treekkurri Josébe Galilea pirau Nazaret puebloyugurri webya, Judea pirau Belén tru Davidweim pueblo tainuumay ibig køn, kaguende nøbe merrabsø Davidwei misagugurri arrubig kua. ⁵ Incha Mariába Belénsrø nømui munchiwan pøra kørømartrab ibig køn. Mariábe Joséba kasharanrrab misraig kwanrriig købig køn. ⁶ Indiibe Belén waramnetø, Mariane unan tammisramig ura puben, ⁷ nui mayor nusrkawan tøgamisra, may pula, animal maig kan patiyay wayibig køn, kaguende nømuimbe ya pebøbelainuube chu kørømisramig kaaben.

Angelesmera ubisha ashibelan eshkab

⁸ Inchen tru pirau Belén pulu møiløgøsrøn ubisha ashibelø ubisha ashib yem warøbene, ⁹ mømibe Señorwei ángel nømun kenamisren, Señorwei tørguegwalmabig nømuim pøtøgatan kebiløben, nømbe truba truba kørig kui inchibelø køn.

¹⁰ Inchen ángelbe trenchibig køn:

—Kørig kui inchimøtaya cha. Kaguende ñimun wammøørskønrabb kan tabig srøig wam srua arrur cha, mayeelø kasraaramig kønrrai. ¹¹ Møi Davidwei puebloyu ñimuyasig kan Kaigyugurri Wesrabig kal-lain køn cha, Cristo tru Señor. ¹² Incha truig kuitamab asamibe, unane pula, animal maig kan patiyayu wayig wetørranrabguen— cha, trenchibig køn ångelbe.

¹³ Inchen mømibe tru urastø ångelweim pulube katøgan ångelesmera srømbalastreelø kenamisra, Tiuswan tabig waminchib trenchibelø køn:

¹⁴ “jsrømbalastreembe Tiusweimibe purø tabig køn chib kasraarab,

katø piraube misaamera Señor nø mayanguen tab kui wamig kønrrai, treeg pønrrabelaimbe ambumay imay mayanguen tab køn!” chib.

¹⁵ Inchen ångelesmera katø srømbalastreemay amben, ubisha ashibeløbe kangurrin kangurri trenchibelø køn:

—Chi purayaitashchab, Señor namun chi taitashchab, mõindøwei Belønrsø ashchab amun — cha.

¹⁶ Incha malla amba, Mariånba, Josëwanba wetørrabelø køn, unane animal main patiyayu wayig. ¹⁷ Incha ashabe, ångel tru unaimburab chi taigwan tru ubisha ashibeløbe eshkaben, ¹⁸ mayeeløba chi eshkaigwan mørabe, truba kwaarøbelø køn.

¹⁹ Inchen Mariåbe chi tailane treebe maig kermab isub, nuinetø esegabig køn. ²⁰ Inchen ubisha ashibeløbe katøle ambuppe:

—Tiusbe maya nuguen tabig køn chib— truba tabig waminchib ambubelø køn, nõm chi mørigwan nõm chi asigwan, tru ångelesmera maig taig treeg purayigwan asha.

Jesús-unan Tiuswei yaumay srua ambub

²¹ Inchen trune kwalømyube unan circuncidamig puben, treeg mara, Jesús munchi pasrøbelø køn. María kwanrriig kømøwatø ångel chi munchi pasringaruig, treeg pasrig købig køn.

²² Inchen tru maig maramigwan martrai Moisés pørigu maig chibig køben, tru chilliguig kørrømisrigwan chish maram kwalømmerra puben, unan Jerusalén ciudayu Señorwan ‘nuin kønrrai tranrrumøn’ chinrrab srua ambubelø køn. ²³ Tru maig maramigwan martrai Señor pasrigu maig chibig køben treeg: “Mutøgucha srøsrø kal-lab nusrkawane Señorweindø tarømarig kønrrain” taigwan. ²⁴ Tru maig maramigwan martrai Señor pasrigu maig chibig køben, pagatø nushin kui, kabe pagatø paloma-ureezheelø kui Tiusweyasig tranrrab ambubelø køn.

Simeón cantaig

²⁵ Inchen tru kwalømmerawan kan møg Jerusalén Simeón taig tsubig køn, sølgandø tabig, Tiuswan chu uragucha pesannamig, Israel misaamera tab kømui melaigugurri webambamigwan muniirabig. Inchen Espiritu Santobe Simeónba pasrabig køn. ²⁶ Incha nune Espiritu Santobe maig kønrrabigwan eshkain købig køn, Criston tru Señorwan ashmøwatøbe ñibe kwanrraamøn cha. ²⁷ Inchen tru mõøbe Espiritu Santo inrrai inchen Tiuswei yaumay ya, tru Jesús-unai mõskalø tru maig maramigwan martrai Moisés pørigu maig chibig køben, nuimburab martrab Tiuswei yaumay srua amrrubene, ²⁸ Simeónbe Jesús-unan nui kwalyu muta, Tiuswan tabig waminchib, trenchibig køn:

²⁹ “Señor, Mayeelaim Pala Pasrabig,

na ñi karuig megabigwan

chi isumø pishindø tabig kwabashcha chib,

ñi nan maig eshkaig købiibe yandø treeg nebui ashar cha.

³⁰ Kaguende nai kaptøga kaigyugurri ñi wesraig kømigwan ashar cha.

³¹ Truigwane maya misaamera ashen, ñi tamara pasarin køn cha.

³² Iibe tru maya misag judíos kømeelaimbe ñun kenamaramig tør køben, katø ñui misag israelitasmeraimbe maya nuguen tabig køn” cha.

³³ Inchen Josëba, Jesúswei usrimba unaimburab tru Simeón maig taigwan mørabe, kan øyebe maig kermab isub kwaara ashen, ³⁴ Simeónbe mayanguen tab kuilø kønrrain chabe, Jesúswei usri Mariane trenchibig køn:

—Au, i unøbe Israel misagwan truba nuwan mõilane nõrreelø kuigwan chigucha kømeelø kønrrai marøb, mõilane nõrreelø kønrrai marøb inchabig, treeg køn cha. Tiusweimburabigwan nõ kenamaren, misaamera nun kashchab kui asamig, nõbe truig køn cha. ³⁵ Truba nu mõilaiwan køben, nõmui manrrømerayu maig isubelø kuigwan kenamarig kønrrain cha. Inchen ñibe ñui manrrau isubigube kan espadatøga kelarrab kwani lataig isub pusrkwaig kørrømisramig kønrrun— chibig køn.

Ana maig kuigwan waminchibig

³⁶ Inchen truyu kan ishug, Tius maig karuigwan eshkabig, Fenuelwei nimbasr, Aserwei misagugurri arrubig, Ana taikkucha wabig køn. Truibe yandø truba køllig købig køn.

Truba unø kasharawa, siete años keeba tsua, ³⁷ yandø keg kwaben nøtiig kørrømisra, yandø ocenta y cuatro años tøgaig købig køn. Tiuswei yaugurri managucha tarømisrmig købig køn, Tiuswan køriibala tabig waminchib, ayunab, katø Tiusba waminchib yem, kwaløm Tiusweyasig treeg marøb. ³⁸ Inchen Anabe tru urastøwei arrua, Tiuswan 'mayanguen ungwa, ungwa' chibig køn. Incha nøbe tru unaimburab waminchib mendabig køn tru mayeelø Jerusalén misag Tiusweilø kønrrai kaigyugurri wesrailø kømigwan isub muniirabelane.

Nazaretmay katø ambub

³⁹ Incha tru maig maramigwan martrai Señor pasrigu maig karuilan kerrigu chab marabe, Galilea pirau Nazaretsrømay ambubelø køn, tru nømuim puebloyumay. ⁴⁰ Inchen unøbe nurab ippe, murig chishig, purø kusrebig misrøb iben, Tiuswei tru ka yandø tab indiibe nuim pala pasrabig køn.

Jesús-unø kusrebeløba waminchib Tiuswei yau

⁴¹ Inchen nui møskaløbe Jerusalén pascua fiestayumay pilamørig ambubelø købig køn. ⁴² Incha Jesúsbe doce años tøgaig misren, fiestayumay ambubelø køn, trendø maig marøbelø køben, treeg martrab. ⁴³ Inchen fiesta chab patsøben, nømbe yamay katø amrruben, Jesús-unøbe Jerusalén kørrømisrin køben, møskaløbe ashmuin købig køn. ⁴⁴ Nømbe tru misag utu unøbe arritamab isua, mawa ambiisrø amba, nømui nømmisaamerai utuba, asiilai utuba lab menda, ⁴⁵ kalawabe, Jerusalénmay katø llirabelø køn, trusrø lanrrab.

⁴⁶ Incha pøn kwalømyube Tiuswei yau tru Moisés pørigwan kusrenanøbelai utu mørøb, nøgurri payib wabyu wetørrabelø køn. ⁴⁷ Inchen mayeeløba mørøbeløbe truba truba kusrebig kui ashib, katø nø maig løtilan mørøb inchabe, ke kwaara ashibelø køn. ⁴⁸ Inchen møskalø ashabe, ke kwaara asha, Jesúswei usrimbe trenchibig køn:

—¿Nai nusrkai, namun chindimbarre øyeeg margu? cha. Nui møskaimba, nababe truba truba isuilø lab ker— cha.

⁴⁹ Inchene Jesúsbe trenchibig køn:

—¿Nane chinchabrre lague? cha. ¿Nabe nai Møskawei chi maramelan na marøb wamigwan ñimgan ashmeelø køtirru?— cha.

⁵⁰ Inchen nømbe ni chi tainguen mørmeelø køn.

⁵¹ Inchabe nui møskaløba Nazaretsrømay katø mendig ya, maig karuben treeg mørøb megabig køn. Inchen nui usrimbe kutøgue iilan nui manrrautø isua esegabig køn. ⁵² Inchen Jesúsbe turrrigu kusrebig misrøb, nurab ibig køn, Tius lata, misaamera lata mayanguen tab indinab.

3

Juan Bautista mu misag warab waraimønug waminchib

(Mt 3.1-12; Mc 1.1-8; Jn 1.19-28)

¹ Roma maya misagwan ashib karub wabig Tiberio chabguen quince años karub waben, Pilatobe Judea pirau kubenadur køben, Herodesbe Galilea pirau ashib karub wabig køn. Inchen Herodeswei nuneg Felipebe Iturea pirøwanba, Traconite pirøwanba karub waben, Lisaníasbe Abilinia pirau ashib karub wabig køn. ² Inchen Anásba, Caifásbabe maya sacerdotsmeran tru uras nøm karubelø køben, Zacaríaswei nusrkai Juanwan Tius wamindig køn, mu misag warab waraimønug tsuben. ³ Inchen Juanbe Jordán pi puluwan chuguen palømmø pureb ippe, misaameran mas kaig marmønrrab isua møra, Tiusweimay llirain kønmab asamig piu umbu ulsrailø kømigwan eshka kusrenanøbig køn, kaig mariilan ulø paymø pesannailø kønrrai. ⁴ Truibe merrabsrø Tius maig karuigwan eshka big Isaiás pørigu maig taig øyeeg:

“Kan wam mu misag warab waraimønug trenchib trasan cha:

‘Señorwei maywan tamarøb, nuyasig maymerane ølmarøb inday tan chib.

⁵ Kullimera købeløbe netsøganiilø køben, nørø tunmeraba, shush tunmerababe kanguelarrøtø chag mariilø køben,

andul maymerabe ølmariilø køben, mitør maymerabe min mariilø kønrrun chib.

⁶ Inchen maya misaabe Tius misagwan kaigyugurri wesranrrai ørigwan ashchun’ ” taig køn.

⁷ Inchen misaamera Juan piu umbu ulsrailø kønrrab webambene, trenchibig køn:

—¿Ñimbe ul lataig inchib misaamera! ¿Ñimune mu eshkata cha, Tiuswei purø kørig kømdiig ñimuim pala atrabig pub pasrabigugurri wegørrønrraimbe? ⁸ Nümüi kaig mariilan isua møra, Tiusweimay llirawar kuy tørgandø asamdiig kønrrai treelø kua, ñimbe ñimasiitø øyeeg chib mendømøtay cha: “Nambe, Abrahamwei misaamera ker” chib. Kaguende nabe trendamønrrun cha: Tiusbe i sruumeranguen Abrahamwei misaamera kønrrai marøg købene, martrun cha. ⁹ Katø walømbe tusrmeran srølba para øramig chabguen srølyu

pasringuen pasran cha. Chi tusrwandøgucha tab mamig niimígwane para, nagu kegutsan — cha.

¹⁰ Inchene misaamerabe truba nu pasrabiibe trencha payibelø køn:

—¿Nambe chi maramø?— cha.

¹¹ Inchen Juanbe trencha løtabig køn:

—Møikkøben pa turin tøgaiibe chiguchagaigwan kan tranø cha. Inchen møikkøben mamig tøgaiibe, chigaigwan pirishi— cha.

¹² Inchen katø møyiløgsrøn tru romasreelayasig an utabelø piu umbu ulsrailø kønrrab amrruabe, Juanwane trencha payibelø køn:

—Kusrennøbig, ¿nambe chi maramø?— cha.

¹³ Inchen Juanbe trenchibig køn:

—Anwan maya utønrrai karua pasrigwan menrra utønrrab kømø, maig utamigwandø utønrrigay— cha.

¹⁴ Inchen katø møy suldaumera køsrøn trencha payibelø køn:

—¿Nambe chi maramig kønrrerah?— cha.

Inchene nøbe trenchibig køn:

—Mun køben ‘chigøben martrumøn’ cha kwaarøsa chigøben kerramøwei, katø mun køben ka isatø chigøben kemesra kebenøsrkømmøwei inday cha. Ñim chigøben marøb kuimburo ñimun maig pagaraitøgatø kasraaray— cha, trenchibig køn.

¹⁵ Inchen misaamerabe ke nungøba isua ashib kuig kōppe, Juanwane nømuinetøbe Cristo kōppeendimab isub købelø køn. ¹⁶ Inchen Juanbe mayeelan trenchibig køn:

—Nabe ñimune pi pinøbulrrai piu umbu ulsraa cha. Trune nai wendau arrubiibe si, Espiritu Santotøgaba, naatøgaba pinøbulrrun cha. Truibeguende, na lataguen kømø, maramburab marøbig køben, nabe truburab kømíg kua, nui alpargatisyu tsiwanguen pitchabgaig kur chibig køn. ¹⁷ Nøbe tirigu isig øra tarømartrab tru kalagutsamig tsig utigwane sruaugen pasran cha. Incha truyu tru tirigu chishmari yabaløwan kerrigu chab chishmarabe, tirigune tru esegainug esegappe, shauwane mana kwamø nagu patrab.—

¹⁸ Incha maig melamigwan treeg marøb melay chib, katøgan øyeelø lataliløba misaameran waminchibig køn, Tiuswei tabig srø wamwan. ¹⁹ Inchen tru Galilea pirau ashib karub wabig Herodesbe nui nuneg Felipei srai Herodíaswan nø pera tsumba, katø chigurrimbunø kaig mariiløgurrimba Juanbe Herodeswane ‘øyebe kalø køn’ chib namuben, ²⁰ Herodesbe møri urasbe, trubalatø mas kaig marøb, Juanwane merrarrawa, kailan keeri yau pasrøbig køn.

Jesúswan piu umbu ulsraig

(Mt 3.13-17; Mc 1.9-11)

²¹ Inchen Juan maya misagwan piu umbu ulsrøb uñib uras, Jesúswangucha piu umbu ulsraig kuig køn. Inchen Jesús Tius Møskaimba waminchib pasramne, srømbalabe kuren,

²² Espiritu Santobe nuim pala kan paloma lataig kōrraaruben, srømbalasarøngurrimbe kan wam treeg mørø waminchib trenchibig køn:

—Ñibe nai Nusrkai undaaraih køn cha. Nabe ñuimbura truba tab kui war— cha.

Jesucristoi merrab misaamera

(Mt 1.1-17)

²³ Jesúsbe nui maramigwan pølbaserøppe chabguen treinta años køsrøn tøgaiibe købig køn.

Jesúsbe Josèwei nusrkain kuitamab isubelø køn.

²⁴ Josèwei møskaimbe Elí køben,

Elíwei møskaimbe Matat købig køn.

Matatwei møskaimbe Leví køben,

Levíwei møskaimbe Melqui køben,

Melquiwei møskaimbe Jana køben,

Janaí møskaimbe José købig køn.

²⁵ Josèwei møskaimbe Matatías køben,

Matatíaswei møskaimbe Amós køben,

Amóswei møskaimbe Nahum køben,

Nahumwei møskaimbe Esli køben,

Esliwei møskaimbe Nagai købig køn.

²⁶ Nagaiwei møskaimbe Maat køben,

Maatwei møskaimbe Matatías køben,

Matatíaswei møskaimbe Semei køben,

Semeiwei møskaimbe José køben,

Josèwei møskaimbe Judá købig køn.

²⁷ Judáwei møskaimbe Joanan køben,

Joananwei mǝskaimbe Resa kǝben,
Resai mǝskaimbe Zorobabel kǝben,
Zorobabelwei mǝskaimbe Salatiel kǝben,
Salatielwei mǝskaimbe Neri kǝbig kǝn.
²⁸ Nerii mǝskaimbe Melqui kǝben,
Melquiwei mǝskaimbe Adi kǝben,
Adii mǝskaimbe Cosam kǝben,
Cosamwei mǝskaimbe Elmodam kǝben,
Elmodamwei mǝskaimbe Er kǝbig kǝn.
²⁹ Erwei mǝskaimbe Josu   kǝben,
Josu  wei mǝskaimbe Eliezer kǝben,
Eliezerwei mǝskaimbe Jorim kǝben,
Jorimwei mǝskaimbe Matat kǝbig kǝn.
³⁰ Matatwei mǝskaimbe Levi kǝben,
Leviwei mǝskaimbe Sime  n kǝben,
Sime  nwei mǝskaimbe Jud   kǝben,
Jud  wei mǝskaimbe Jos   kǝben,
Jos  wei mǝskaimbe Jon  m kǝben,
Jon  mwei mǝskaimbe Eliaquim kǝben,
Eliaquimwei mǝskaimbe Melea kǝbig kǝn.
³¹ Meleai mǝskaimbe Mena kǝben,
Menai mǝskaimbe Matata kǝben,
Matatai mǝskaimbe Nat  n kǝbig kǝn.
³² Nat  nwei mǝskaimbe David kǝben,
Davidwei mǝskaimbe Isai kǝben,
Isaiwei mǝskaimbe Obed kǝben,
Obedwei mǝskaimbe Booz kǝben,
Boozwei mǝskaimbe Salom  n kǝben,
Salom  nwei mǝskaimbe Naas  n kǝbig kǝn.
³³ Naas  nwei mǝskaimbe Aminadab kǝben,
Aminadabwei mǝskaimbe Admin kǝben,
Adminwei mǝskaimbe Arni kǝben,
Arnii mǝskaimbe Esrom kǝben,
Esromwei mǝskaimbe Fares kǝben,
Fareswei mǝskaimbe Jud   kǝbig kǝn.
³⁴ Jud  wei mǝskaimbe Jacob kǝben,
Jacobwei mǝskaimbe Isaac kǝben,
Isaacwei mǝskaimbe Abraham kǝben,
Abrahamwei mǝskaimbe Tar   kǝben,
Tar  wei mǝskaimbe Nacor kǝben,
Nacorwei mǝskaimbe Serug kǝbig kǝn.
³⁵ Serugwei mǝskaimbe Ragau kǝben,
Ragauwei mǝskaimbe Peleg kǝben,
Pelegwei mǝskaimbe Heber kǝben,
Heberwei mǝskaimbe S  laj kǝben,
S  lajwei mǝskaimbe Cain  n kǝbig kǝn.
³⁶ Cain  nwei mǝskaimbe Arfaxad kǝben,
Arfaxadwei mǝskaimbe Sem kǝben,
Semwei mǝskaimbe No   kǝben,
No  wei mǝskaimbe Lamec kǝbig kǝn.
³⁷ Lamecwei mǝskaimbe Matusal  n kǝben,
Matusal  nwei mǝskaimbe Enoc kǝben,
Enocwei mǝskaimbe Jared kǝben,
Jaredwei mǝskaimbe Mahalaleel kǝben,
Mahalaleelwei mǝskaimbe Cain  n kǝbig kǝn.
³⁸ Cain  nwei mǝskaimbe En  s kǝben,
En  swei mǝskaimbe Set kǝben,
Setwei mǝskaimbe Ad  n kǝben,
Ad  nwei M  skaimbe Tius kǝn.

4

Nugwaimandzig Jesúswan chinchibig kõtashchab marøb
(Mt 4.1-11; Mc 1.12-13)

¹ Jesús Espiritu Santotø netaisg Jordán piyugurri katø arruben, Espiritu Santobe mu misag warab waraimøsrømay pera iben, ² truyu kwalømmera cuarenta nemisramne tsuben, nugwaimandziibe ke kebenøsrkønrrab marøbig køn. Tru kwalømmerawan chigucha mamøwa, yandø parøgwai møren, ³ nugwaimandziibe:

—Ñi isa kømø, Tiuswei nusrkain kuabe, i srugwan ‘pirri misr’ cha, trenchi— chibig køn.

⁴ Inchene Jesúsbe trencha løtabig køn:

—Tiuswei wamwan pørigube trenchibig pørig pasran cha: “Møøbe pirrindøgatø øsig tsumig kømøn” chibig.—

⁵ Inchen nugwaimandziibe kan tun palasrømay pera ya, yu pirau chutøgucha nørreelø nøm ashib karub purrailan kerriguba ke pestø Jesúswan eshka kenamarabe, ⁶ trenchibig køn:

—Nabe ñi karumburab karumigwan kerrigu ñun tranøb, katø nømui chigurrimbunø purø tabig tørigwan tranøb inchumøn cha. Kaguende nane iilan kerrigu tranig køn cha. Incha nabe mun tranøg køben, tramamønrrun cha. ⁷ Inchawei ñi nan tømbaras, køriibala tabig waminchene, iibe kerriguba ñuin kønrrun— cha.

⁸ Inchene Jesúsbe trencha løtabig køn:

—Trenchibig pørig pasran cha: “Señor ñui Tiuswandø køriibala tabig waminchib, nuyasi-itø marøb megamig køn” chibig.—

⁹ Inchen trugurrimbe nugwaimandziibe Jerusalén ciudadrømay pera ya, tru Tiuswei yau purø palasrø pasrabe, trenchibig køn:

—Isa kømø, ñi Tiuswei Nusrkain kuabe, yugurri pirausrø pørsrau cha, ¹⁰ kaguende Tiuswei wamyube trenchibig pørig pasran cha:

“Tiusbe nui ángelesmeran ñun chinchimønrrai ashchai ørtrun chibig.

¹¹ Incha ñui srøbwan sругu srurrengwamønrrai nømui tasiimeratøga ñune kusranrrun” chibig.—

¹² Inchen Jesúsbe trencha løtabig køn:

—Øyeeg chibig pasran cha: “Ñui Señor Tiuswane ke chinchibig kõtashchab lataikkucha maramig kømøn” chibig.—

¹³ Inchen nugwaimandziibe øyeeg chiyutø kebenøsrkønrrab indamigwan kerrigu chab marabe, Jesúsweim pulugurri maya yana køsrøn tarømisrøbig køn, katøle treeg maramdiig punnegatig.

Jesús Galilea nui maramigwan pølbærø
(Mt 4.12-17; Mc 1.14-15)

¹⁴ Jesús Espiritu Santoi maramburab maramigwan tøgag Galileamay katø arruben, tru pirau tru pøtøgatanbe chutøgucha nungøba, nungøba waminchib købelø køn. ¹⁵ Inchen judíosmera tulundzuni yamørig nøbe kusrenanen, mayeeløba nun truba tabig waminchibelø køn.

Jesús Nazaretsrø
(Mt 13.53-58; Mc 6.1-6)

¹⁶ Incha Jesúsbe nø nurainumay Nazaretsrømay ya, nø trendø treeg marøbig køppe, isrin kwalømbe judíosmera tulundzuni yau kebya, lenrrab pasramisren, ¹⁷ Tius maig karuigwan eshkabig Isaíaswei pørigwan lenrrai tranen, larrøbicha kurøppe, øyeeg pørig pasrabigu kurøbig køn:

¹⁸ “Señor Tiuswei Espiritube naim pala pasran cha.

Kaguende nane waachameran tabig srøigwan eshkanrrai aceite itølusha tarømarig køn cha;

merrarraig pønrrabelan ‘Elatsiilø kønrrun’ chinrraimba,

katø kabgarwan ashibelø kønrrai martraimba,

katø kaig indinab melabelane, amrrai wesrab inchaimba,

¹⁹ katø Señorwei truba tab pila attrabigwangucha

eshkanrraimba nane ørig køn” chibigwan.

²⁰ Incha Jesúsbe tru pørig tøgagwan judíosmera tulundzuni yau purugubigwan katøle kirra tranabe, wamisrøbig køn. Inchen mayeeløba judíosmera tulundzuni yau purrabeløbe ke nungøba ashib purrabelø køn. ²¹ Inchen nøbe trenchib eshka mendabig køn:

—Na leben ñim mørig, i Tiuswei wam pøriibe, ñimui merrab mø yandø treeg nebun— cha.

²² Inchen misaabe mayeeløba nuimbura tabig waminchib, katø nui trigugurri purø tabzhig wamindi wammeran ke kwaara ashib trenchibelø køn:

—¿libe Joséwei nusrkain kømmørgøppeh?— cha.

²³ Inchen Jesúsbe trenchibig køn:

—Ñimbe nane indzabelø chibgunrrig øyeeg chinrrautan cha: “Ñi mō marøbiibe ñiasiiøwei mō mar” cha. Katø nane: “Ñi Capernaumsrø chine, chine mariilan nam tru wammørigwan, yu ñuim piraugucha treegwei mar”,— cha.

²⁴ Inchabe katø trenchibig køn:

—Nabe ñimun cierton trendamønrrun cha: Tius maig karuigwan eshkabigwane mōigwanguen nui piraeløtøweimbe chi tab indiimíig køn cha. ²⁵ Isa kømø, Tius maig karuigwan eshkabig Elías uñib uras tru pøn pila y tøbø pila sre pumubenma, tru pirau ørøba truba truba parø pasrøben, Israel misaamerai utube piudamera truba yam waraingucha, ²⁶ Tiusbe Elíaswane Israel pirau warabelan purugunrrab ørmøtø, Sidón ciuda pulu Sareptasrø tsub piudan purugunrrab ørig købig køn cha. ²⁷ Katø Tius maig karuigwan eshkabig Eliseo uñib uras chigucha, Israel misaamerai utube lepra kwanrreelø truba nu kuig køn cha. Inchendø truiløbe ni kanguen kwanrrowan chishmariimeelø køben, Siria pirausrig Naamánwane kwanrrowan chishmarig købig køn— cha.

²⁸ Inchen iigwan mørøppe, judíosmera tulundzuni yau purrabeløbe namig kōbiitø ke chinchimmørø incha, ²⁹ kurra pønrramisra, puebløyugurri weera, tru nøm waramig ciuda marim pasrab tunyu pala trømbøsrømay pera ambubelø køn, trusrø pinørtrab. ³⁰ Inchen Jesúsbe nømuint tøbøtagwan pureppa, iptinchibig køn.

*Kan møg kwaimandzig tøgagig
(Mc 1.21-28)*

³¹ Incha Jesúsbe Galilea pirau Capernaum puebløyumay ya, isrin kwalømmerawan misagwan kusrenanøbig køn. ³² Inchen nø kusrenanigwane kwaara ashibelø køn, kaguende nø wamindiiløbe mu mandamgaig wamindig køben.

³³ Inchen judíosmera tulundzuni yau kan trømbøig maringarub kwaimandzig tøgagig wawabe, mur trashib trenchibig køn:

³⁴ —¡Aul! ¿Nambabe ñibe chi asamig tøgagugu cha, Nazaretsrø Jesús? ¿Namun pinishinrrab attirru? cha. Nabe ñune mu kui ashar chibig køn. Ñibe tru Tiuswei Newan Tabig, truig køn— cha.

³⁵ Inchen Jesúsbe kwaimandzigwan namab trenchibig køn:

—¡Ñibe trashimøtø, møweinukkurrimbe webinrrø!— cha.

Inchen kwaimandziibe nøm mayelai merrab mōwane pirau penøsrka, tru møweinukkurri webibig køn, chigucha chi kørriinchimøtø. ³⁶ Inchen mayeeløba kwaara, kangurriin kangurri:

—¿Kan øyeeg wamindi wammerabe chi køh? chibelø køn. ¡I mōøbe mu mandamgaig karuitøgaba, maramburab mariitøgaba trømbøig maringarub kwaimandziimeranguen webingaruben, truilø webamrøppe!—

³⁷ Inchen nune tru pirau ørøba chutøgucha nun, nun waminchibelø køn.

*Jesús Pedroi sueeran tamarøb
(Mt 8.14-15; Mc 1.29-31)*

³⁸ Incha Jesús judíosmera tulundzuni yaugurri webya, Simónwei yau kebibene, Simónwei sueerabe mur pachiiba kwanrø tsuben, nømbe kwanrriigweyasig Jesúswan:

—Purugurra— cha, rugaben,

³⁹ Jesúsbe kwanrriigweimbala utsøbasrabe, pachigwan webinrrai kandø wamøben, pachibe weetapinchen, nøbe tru urastø kurra, tru pubelayasig chi maramigwan marøb mendabig køn.

*Jesús truba yam kwanreelan tamarøb
(Mt 8.16-17; Mc 1.32-34)*

⁴⁰ Yandø nøsig pinaiben mayeeløba chi kwanrø køben tøgarmen misaamerabe Jesúsweimay srua amrruben, kwanrreelømørig nøbe nui tasiimeran nømuint pala estsara, tamarøbig køn. ⁴¹ Inchen katø truyu mōilan køben truba yamelainukkurri kwaimandziimerabe trenchib trashib webambubelø køn:

—Ñibe Tiuswei Nusrkain køn— chib.

Inchen Jesúsbe kwaimandziimerane kandø wamab, waminchibashmíig køn, kaguende nømbe Cristo kui ashibelø køben.

*Jesús Galileasrø eshkab kusrenanøb
(Mc 1.35-39)*

⁴² Yandø chab tør-raben Jesúsbe ciudayugurri webya, katøganbalø mu misakkasrø tarømisra iben, misaamerabe lab kua, nø waisrø puabe, ibashmønrrab inchen, ⁴³ Jesúsbe trenchibig køn:

—Misag sötømera katøganbaløsrø warabelangucha nabe Tius nø ashib karub pasrain-uguiwei tabig srøigwan eshkaab kusrenanamig køn cha. Kaguende truweiwei ørig kur—cha.

⁴⁴Incha Judeasrø judíosmera tulundzuni yamerayu Jesúsbe eshkaab kusrenanøb uñibig køn Tiuswei wamwan.

5

Mana øyeeeg asiimíig peskaumera purø nørrø wesrub
(Mt 4.18-22; Mc 1.16-20)

¹Kan kwaløm Jesús Genesaret nu pisu menda pasrøbene, misaamerabe Tiuswei wamwan mørtrab nuingatan ke nømdø trawaguchib tulundzunøben, ²nøbe tru pisu mendabe pagatø barcomera mu misakkar pønrrai ashibig køn, kaguende peskabeløbe truyugurri webamba, nømui atarrayameran chishmarøb warøben. ³Inchen Jesúsbe tru pagatø barcomera pønrrayu tru Simónwei barcoyu kebyabe, pi mendagurri katøguchi amburøsrø ørtra cha, nøbe tru barcoyu wamisra, truyugurri misagwan kusrenanøb mendabig køn. ⁴Incha yandø chab waminchabe, Simónwane trenchibig køn:

—Barcon amburø mas umbu pisrø øra, peskanrrab ñimui atarrayameran kebetay— cha.

⁵Inchen Simónbe trencha løtabig køn:

—Kusrennøbig, name kwalma kwalma peskab meløbendø, kanguen wesranrrab kaymer cha. Inchendø ke ñi trendaig køptø, atarrayan kegutchab— cha.

⁶Incha keguchene, peskaube nu kegørraptø atarrayabe kølsrøb mendøben, ⁷nømbe nømui lincha amøñibelø katøgan barcoyu purrabelan, purugunrrab amrrunrrai keberen, nømbe amrrua, pa barcomeran peskautø netsøganen, barcomerabe piu ke asentanrraptiig inchibelø køn. ⁸Inchen trunun ashabe, Simón Pedrobe Jesúswei srøb pulu tømboñsrøb trenchibig køn:

—Señor, naim pulugurri tarømisrtra cha. Kagen nabe kaig marøb møg kur— cha.

⁹Peskau treeg nørrø wesraikkurri Simónbe truyu mayeelø nøba pønrrabeløba kwaarøbiitø ke chindamdiig kui inchibelø køn. ¹⁰Katø tru Zebedeowei nusrkalø Jacoboba, Juanba, tru Simónwei trendø lincha peskab amøñibeløgucha treetøwein kørig kui inchibelø køn. Inchene Jesúsbe Simónwan trenchibig køn:

—Chi kørig kui inchimøta cha, møingurrimbunøbe misaameran peskabig kønrrig— cha.

¹¹Inchen nømbe barcomeran pisu mendasrø wesrawabe, kerrigu pønrramnetø, Jesúswei mendig ambuptinchibelø køn.

Jesús kan lepra kwanrrø tøgagwan tamarøb
(Mt 8.1-4; Mc 1.40-45)

¹²Jesús mø pueblomerayu køsrøn tsubene, kan møg asr trerab kwanrrø, lepra taig, tøgag pua, Jesúswan ashabe, tømboñsra, maløwanguen pirau kebatamnegatig utsøbasrabe, trenchib miabig køn:

—Señor, nan ñi tamaramdiig købene, tamartra— cha.

¹³Inchen Jesúsbe tasigwan larrøbicha estsarabe, trenchibig køn:

—Tamarøg køtan cha. Tamarig kørrømisr— cha.

Inchen tru urastø nui trerab kwanrrøbe chishig kørrømisren, ¹⁴Jesúsbe trencha karubig køn:

—Au, mungøben eshkawabesin cha. Inchendø ya, ñui asrwan sacerdotendø kenamara, tru ñi yandø chishig kørrømisrimburø tru Moisés tranrrig taigwane srua ya, tranrrig cha, mayeeløba ñui kwanrrøwan chishig kørrømisrin kui ashchain— cha.

¹⁵Treendingucha Jesúswane ke nun, nun waminchen, nune mas wammørig kørrømisren, misaamerabe truba nørrø nun mørtrappa, katø nømui kwanrrømeran tamarilø kønrrappa tulundzunabelø køn. ¹⁶Inchendø Jesúsbe chugøben mu misakkasrø ya, truyu Tius Møskaimba waminchibig køn.

Jesús kønørrab kaimabigwan tamarøb
(Mt 9.1-8; Mc 2.1-12)

¹⁷Kan kwaløm Jesús kusrenanøb wabene, møiløgøsrøn fariseosmeraba, tru maig maramigwan martrai Moisés pørigwan kusrenanøbeløba truyu purrabelø køn. Truiløbe Galilea pirau maya puebløsrøngurrimba, Judea pirausrøngurrimba, Jerusaléngurrimba amrruar. Inchen Tiuswei maramburab maramibe Jesúsba pasrabig køn kwanrreelan tamarøb. ¹⁸Inchen mø møguelø køsrøn katøgan møg kønørrab kaimabigwan tsigalyu muta pua, yau keera, Jesúswei merrab pasrtrab inchendø, ¹⁹mumaygwen kebambamig wetørranrrab kaimabelø køn. Kaguende menrra misag pasrøben, trugurri ya pala nebamba, tejameran picha, trab kura, kwanrriigwan tsigalbañau misag utu Jesúswei merrab kørrøørøbelø køn.

²⁰ Inchen Jesúsbe nòmui isubigwan ke nuinuutø pasra ashabe, kwanrriigwane trenchibig køn:

—Au, kasuku, ñui kaig mariilane yandø ulø payamig kømíig pesannaig kørrømisran— cha.

²¹ Inchene tru Moisés pørigwan kusrenanøbeløba fariseosmerababe treeg isub mendabelø køn: “I møg Tiusweimburab purø trømbøig wamab waminchibiibe, ¿mu køh? cha. Kaguende kaig mariilan ulø payamig kømíig pesannaig kønrraimbe ¿mu kuin treeg mari-asamø? cha, Tiustøweimbe treeg martrun” chib, isubelø køn.

²² Inchen Jesúsbe nøm chi isub pønrrailan kelarrab ashabe, trenchibig køn:

—¿Ñimbe ñimui manrraube chindimba øyeeg isugue? cha. ²³ ¿Møigwan mas kørmø trendamdiig købsruerah? cha. Kabe: “Ñui kaig mariilan ulø payamig kømíig pesannaig kørrømisran” ¿tamiteh? Kabe: “Kurrab, inrø” ¿tamiteh? cha. ²⁴ Pøš, na, Møg Misra Arrubiibe yu pirau kaig mariilan ulø payamig kømíig pesannaig kønrrai mu mandamgaig marøbig kui mømibe ñim ashchai kenamaramønrrun— chibig køn.

Inchabe tru kønønrrab kaimabigwane trenchibig køn:

—Nabe ñun trenchar cha: Kurrab, ñui tsigalwan mutab, ñui yamay inrø— cha.

²⁵ Inchen tru urastø tru kwanrriibe nòmui merrabgurri kurra, nø tsuig tsigalwan muta, Tiuswan truba tabig waminchib nui yamay ibig køn. ²⁶ Inchene mayeeløba kwaara asha kørrømisra, Tiuswan truba tabig waminchib, truba kwaariilø:

—Møin kwaløm kan yeekkucha tabelø mari aser— cha trenchibelø køn.

Jesús Levíwan wamab

(Mt 9.9-13; Mc 2.13-17)

²⁷ Øyeeg purayaig wendø Jesús webyabe, kan møg Levi taig, romasreelayasig an utabelø purrainug wai ashabe, trenchibig køn:

—Nai mendig amø— cha.

²⁸ Inchen Levíbe chi tøgagúigwan kerrigu kørrømarabe, kurrappa, Jesúswei mendig ibig køn.

²⁹ Incha trugurrimbe Levíbe Jesúsweyasig nui yau truba nu fiesta maren, tru romasreelayasig an utabelø truba yameløba, katøganeløba mishatsigu nømbe truba nu purrabelø køn.

³⁰ Inchen fariseosmeraba, tru Moisés pørigwan kusrenanøbeløbabe nui kusrenanøb pera uniilane namig, Jesúsweimburab chinetø chib, trenchibelø køn:

—¿An utabeløba, kaig marøbeløba ñimbe truiløbabe chindimba lincha mab, muchigüe?— cha.

³¹ Inchene Jesúsbe nømune trencha løtabig køn:

—Tabelø, kwanrrøgarbe mø marøbig palain kømøn cha. Kwanrreeløbeguende palain køn cha. ³² Nabe tru sølgandø amøñibelan wamønrrab arrumøtø, kaig marøbelan wamønrrab arrig køn cha, yandø nòmui kaig mariilan isua mørøb, Tiusweimay lliiranrrai.—

Ayunamigwan Jesúswan payib

(Mt 9.14-17; Mc 2.18-22)

³³ Inchen kaneløbe Jesúswan trencha payibelø køn:

—Juanwei mendig amøñibeløbe katø katø truba ayunab, katø Tiusba waminchib indamigwan marøbelø køn cha. Katø fariseosmerai mendig amøñibelø treetøwei maren, trune ñuieløbe ka mab, ka muchib inchibelø køn— cha.

³⁴ Inchene Jesúsbe trencha løtabig køn:

—¿Kan novios yaumay linchai eshkailanma keg mistrabig nømbe wabengan, mamø purrønrrai inchaitarru? cha. ³⁵ Inchendø yandø keg mistrabigwan srúa ambam kwalømmera punrrun cha. Inchen tru kwalømmerawane ayunabwei inchun— cha.

³⁶ Incha katø Jesúsbe ‘øyeeg lataitøwein køn’ cha, kemesra trenchibig køn:

—Mugucha kan srø camisanma para wesrumøn cha, køllin camisayu waya tsushinrrab. Treeg marene, srø camisabe ka minchen, inchagucha srøigwan waya tsusaibe køllin camisayube chi tab punrraamøn chibig køn. ³⁷ Katø muguen srø vinonma køllin kalusmerayu usrmøwei indan cha. Kaguende treeg marene, srø vinobe kalusmeran srurrøgøben, vinobe lushen, kalusmerabe ka kølsran cha. ³⁸ Inchawei srø vinone srø kalusmeran marigu usramig køn cha. ³⁹ Katø mugucha øl-laig vinon muchibiima srø vinone mugucha muchig kømui indan cha. Kaguende: “Øl-laibe mas mayig køn” chibelø køn— cha, trenchibig køn Jesúsbe.

6

Jesúswei kusrenanøb pera uniilø isrin kwaløm tirigu tur lurrøb

(Mt 12.1-8; Mc 2.23-28)

¹ Kan isrin kwaløm Jesús tirigu ellmarig utuwan pureb ibene, nui kusrenanøb pera uniiłbe tirigu turmeran lurrøb ambabe, tirigu turwan tasiitøga katsøsrá, mabene, ² mø fariseosmera kørørn nòmune trenchibelø køn:

—Ya isrin kwaløm chigøben marmønrrai merigwan ¿ñimbe chindimba øyeeg margue?— cha.

³ Inchene Jesús trencha løtabig køn:

—¿Ñimgan lemeelø køtirru cha, tru mana kørørn Davidwan parøgwab, nui linchibelan parøgwab inchen, nø mandø indigwan? ⁴ Nøbe Tiuswei carpa ya tabzhigu kebya, Tiusweyásiitø tarømarig pirrimera, tru sacerdotesmeratø maim pirrimeran mendaibe mu mamønrrai meriilan nø mab, katø nøba purrab misagwangucha srørrøb indigwan.—

⁵ Incha katø trenchibig køn:

—Møg Misra Arrubiibe tru isrin kwaløm nan nø karunrrain kømøtø, maramdiigwane marøb, maramgaigwane marmub, nabe na asha karubig kur— cha.

Kan møg tasig mul-laig

(Mt 12.9-14; Mc 3.1-6)

⁶ Indiibe katøgan kwaløm isrin kwalømdøwei Jesúsbe judíosmera tulundzuni yau kebya, kusrenanøb pasrøbene, truyube kan møg nui kusrmay tasig mul-laig tøgag waben, ⁷ tru Moisés pørigwan kusrenanøbeløba, fariseosmerababe Jesúswan larab købelø køn, isrin kwaløm tamarøbig køtashchab, chigøben chi køptø. ⁸ Inchen nøbe chi isub pønrrailan asha, tru tasig mul-laig tøga møwane:

—Kurra, uyu tøbøtag pasramisr— cha trenchibig køn.

Inchen tru møøbe nòmuiin tøbøtag kurra pasramisrøbig køn. ⁹ Inchen Jesúsbe katøganelan trenchibig køn:

—Na ñimun payrrab inchar cha: ¿Maig maramigwan martrai Moisés pøriibe isrin kwalømbe chiwan martrain taig køh cha, tabiiteh, kabe kaiteh cha; kwamønrrai indamig køh, kabe kweetsamig kø, chindah?— cha.

¹⁰ Incha Jesúsbe mayeelø nuim pøtøgatan pønrrabelan ashabe, tru møwan trenchibig køn:

—Kwalwan larrøbichi— cha.

Inchen møøbe treeg inchen, nui kwalbe tabig kørørmisrøptinchibig køn. ¹¹ Inchen treekkurri kaneløbe truba nama, kangurrin kangurri Jesúswan chi kaig maramdiig køtashchab payib mendabelø køn.

Jesús nøashib karua øramelø doce lawa wesrub

(Mt 10.1-4; Mc 3.13-19)

¹² Tru kwalømmmerawan Jesús kan tun palasrø Tius Møskaimba waminchab ya, kwalma ørøba treeg marøb wawa, ¹³ tør-rabene, nui kusrenanøb pera uniiłan wama, truilai utu doce lawa, wesrawa, truilane nøashib karua øriił køn cha, wamabig køn. ¹⁴ Truiløbe iilø køn: Simón, nundøwei katø Pedro cha munchi pasrig køben, Simónwei nuneg Andrés køben, Santiago køben, Juan køben, Felipe køben, Bartolomé køben, ¹⁵ Mateo køben, Tomás køben, Alfeøwei nusrkai Santiago køben, Simón Zelote cha wamig køben, ¹⁶ Judas Santiagoi nusrkain køben, Judas Iscariote, tru wendø Jesúswan ashig kømui inchibelaingatø pasramisra, tranrrabig købengue.

Misag truba nuwan Jesús kusrenanøb

(Mt 4.23-25)

¹⁷ Incha Jesús tun palasrøngurri nømbe kørørraaru, kan chagu pasramisrøbig køn. Inchen truyu nui mendig amøñibeløbe truba nu tulundzuna, pasrabig køn, Judea pirauelø kerrigu, jerusalénsreelø køben, Tiroba, Sidónba tru mar pulusreelø køben, ¹⁸ truiløbe Jesúswan mørtrab amrruin købig køn, nømui kwanrrømeran tamartraimba. Inchen tru kwanrreelø trømbøig maringarub kwaimandziimera larrø trømbøig kuig melønrrai marinabeløbe tamariilø køben, ¹⁹ maya misaabe nun katøranrrab inchibelø køn, kaguende Jesúswei maramburab marøbig nuinukkurri webarrua, mayeelanba tamaren.

Kasrag købiiba, chigucha tab kømüba

(Mt 5.1-12)

²⁰ Incha Jesús nui kusrenanøb pera uniiłan ashabe trenchibig køn:

—Mayanguen tab kuilø køn cha, ñim waachamerabe.

Kaguende Tius nø ashib karub waibe ñimuiwein køn cha.

²¹ Mayanguen tab kuilø køn cha, ñim møi ya parøgwailøbe.

Kaguende maig palai melaigwan Tiusbe nømun unchaguen traniiłø kønrrun cha.

Mayanguen tab kuilø køn cha, ñim møi ya kishibeløbe.

Kaguende wendøbe indzønrrabguen cha.

²² Mayanguen tab kuilø køn cha,

ñimun misaamera tsalø ashib,
 ñimune nøøøø kørnrai tarømarøb,
 ñimun tsalø waminab,
 ñimui munchiwan ke kaigwan lataig indinab,

tru na, Møg Misra Arrubikkurrindø ñimun treeg marene.

²³ Treeg pureb kwalømba ñimbe truba truba tab kui mørøb, truba kasraarab pørtray chibig køn. Kaguende truburø ñimbe srømbalårømba truba nuig ketig utamig tøgagørrun cha. Kaguende merrabsrø nømui kølli misaamerama Tius maig karuigwan eshkabelan øyeegwei kaig marøbelø kuig køn cha.

²⁴ jAy, ñim waacha, puarmeraimbe!

Kaguende yandø tsabøtø utarguen køn cha, kasrag købigwan.

²⁵ jAy, ñim waacha, mõi ya chi palømø tøgarbe!

Parøgwai mørtrun cha.

jAy, ñim waacha, mõi ya indzabeløbe!

Ñimbe wamamøra isub kishchun cha.

²⁶ jAy, ñim waacha, ñimun mayeelø tabig wamindinabelaimbe!

Kaguende ñimui merrabsrø kølli misaamerama treetøwei tabig waminchibelø købig køn cha, tru 'Tius maig karuigwan eshkabelø ker' chib isabelan.

*Ñimun ashig kømui inchibelan tsalø ashmumig
 (Mt 5.38-48; 7.12)*

²⁷ 'Inchendø ñim nan mørøbelane nabe trendamørrun: Ñimun ashig kømui inchibelane undaarab, ñimun tsalø kui inchibelane tabig marøb inday cha. ²⁸ Ñimun 'trømbøig nehubash' chib wamabelaimbe ñimbe nømune 'mayanguen tabig nebunrray' chib trenday cha. Ñimun kaig marøbelaimbe, nømuyasig Tiusba wamindamig køn cha. ²⁹ Møikkøben ñun kandarø maløbøtø pashene, kandariigwangucha yul cha. Møikkøben ñui turiwan kerrabene, ñui camisangucha ka srua ibasingaru cha. ³⁰ Ñun mu chi miabigwane tranøb, chiwan køben ñuiwan kerrabene, miamøta cha. ³¹ Ñimurrima katøganelø ñimuyasig tabig maramig palai inchibeløbe, ñimgucha katøganelan treetøwei tab inday chibig køn.

³² 'Ñim ñimun undaarabelandø undaarawabe, ¿ñimbe chigüin tabig martrague? cha. Kaguende kaig marøbeløguen nømun undaguelane nømgucha undaarabelø køn cha. ³³ Ñim ñimun tab inchibelandøwei tab inchabe, ¿ñimbe chigüin tabig martrague? cha. Kaguende kaig marøbeløgucha treetøweimbe marøbelø køn cha. ³⁴ Peba tranøppe, katø utamdealandø pebøbeløbe, ¿ñimbe chigüin tabig martrague? cha. Kaguende kaig marøbeløgucha katøganelø kaig marøbelandøweimbe, katø kerriguwan treetøwei utønrrab pebøbelø køn cha. ³⁵ Trune ñimbe ñimui ashig kømui inchibelan undaarab, tabig marøb, pebøb indamig køn, katøyug utønrrab isua kømøtø. Treeg marene, ñimui utamibe truba nuig køben, ñimbe Tius Mayeelaim Pala Pasrabigwei ureemera kønrrun chibig køn. Kaguende nøma chiweinguen ungwanguarwan, larrø kailan, tab inchibig køn cha. ³⁶ Ñimui Tius Møskaima lastima ashibig købene, ñimgucha treetøwei lastima ashibelø kuy cha.

*Katøganelane 'kailø køn' chib
 (Mt 7.1-5)*

³⁷ 'Ñimbe katøganelan 'øyeeg køn, øyeeg marøbelø køn' chib waminchimøtay, ñimungucha 'øyeelø, øyeelø køn' chimønrraimbe. Katøganelan kaigyu pønrrønrrai pønrsrømtøay, ñimun treetøwei kaigyu pønrrønrrai pønrsrømtøay. Ñimun kaig maren, ulø paymø pesannay, ñimungucha Tius ulø paymø pesannilø kørnrappe. ³⁸ Katøganelan tranay; ñimungucha tranrrun, talegayu tab unaasig tingandø kørøguana, pinølusam netsøganig. Kaguende ñim kanelan maig unaasha traniiibe, ñimungucha treetøwei unaasha tranrrun— chibig køn.

³⁹ Incha katø Jesúsbe 'øyeeg lataitøwein køn' cha, kemesra trenchibig køn:

—¿Kan ashchab kaimabiima katøgan ashchab kaimabigwandøwei srua inrrautah? cha. ¿Pailøba treeløtøbe tabyu kegørrømtørraitarru? chibig køn. ⁴⁰ Kan kusreb mendig megabiibe nui kusrenanøbigwan purab nuig kømøn. Inchendø chi kusremigwan ne kusrewabe-guende, nun kusrenanøbig lataitøwein kønrrun.

⁴¹ ¿Chindimbarre ñui nunewan kabyu shauzhig wabigwangøba ashku cha, tru ñuin kabyu nu tsig wabigwanguen ashmubendøbe? ⁴² Inchawei ñitøweinguen ñuin kabyu nu tsigwan ashmubendøbe, ñui nunewane chinchaa øyeeg chinragu: "Nai nuneg, ¿ñuin kabyu shauzhig wabigwan wesrarruah?" cha. jÑi, palatø tabig! Ñuin kabyu nu tsig wabigwanmerrig wesru chibig køn. Treenchabe si, ñui nunewein kabyu shauzhig wabigwan wesrumig tab ashchabguen cha.

Tusrbe mamikkurri asig kɔn
(Mt 7.17-20; 12.34-35)

⁴³ Kan tab tusrbe kaig mamig niimíg kɔben, katɔ kan kaig tusrbe tab mamig niimíg kɔn cha. ⁴⁴ Kaguende tusrmɔrig chi mamig niguen tabig kui, kaig kui truyu asan cha. Kal tusrmerayugurri yashig lurrmɔwei, kaldɔ misrɔb tusrjugurri uvas lurrmɔwei inchibelɔ kɔn cha. ⁴⁵ Inchawei kan mɔg tabiibe tabig isulian nui manrrau esegabig kua, truyugurrimbe tabig wesrub wamindan. Inchen kan mɔg kaibe kaig isulian nui manrrau esegabig kua, truyugurrimbe kaig wesrub wamindan. Inchawei nui manrrau chine isua tɔgagúilɔ pinɔguchen, nui triibe treeg wamindan chibig kɔn.

Pailɔ ya marɔbelan kemesra wamindig
(Mt 7.24-27)

⁴⁶ ʔNimbe nane chindimba: “Señor, Señor” chib wamɔgue cha, na maig karuigwane mɔra marmeelɔ kɔbendɔbe? ⁴⁷ Mugucha naimay arrua, nan mɔra, na maig taigwan marɔbigwane, ɔyeeg mɔg lataig kɔn tamɔnrrun cha: ⁴⁸ Truibe kan mɔg yawan martraptɔ pirɔwanmerrig sruyu larrayamnɔgatig umbu lalla, trugurrimbe tru srug pala yawan niga pasrɔnrrabigwan marɔbig lataig kɔn cha. Inchen pibe nurawa, arrua, tru yawan purɔ trɔmbɔig neguchib megambuagucha, kɔnɔgɔnrrab kaiman cha, kaguende purɔ may mara pasrig kua. ⁴⁹ Inchen kan mɔg nan mɔrendɔ, na maig karuigwan marmibe, nui yawan niga pasrɔnrrabig srug pusrmɔtɔ, ka pirɔ palatɔ kusrubig lataig kɔn cha. Pi nurawa arrubig, tru yawan mur megambub neguchene, tru yabe kebeñen, kerrigu pinisaig kɔrrɔmisran— cha, trenchibig kɔn.

7

Suldau sɔtɔwan nɔ karub pera pasrabigwei mendig megabigwan Jesús tamarɔb
(Mt 8.5-13; Jn 4.43-54)

¹ Yandɔ misagwan Jesúsbe chab waminchabe, Capernaumsrɔ kebibene, ² truyu kan romanosmerai suldau, cienelan ashibig, centurión taig, kan karuindiig megabig truba undaaraig tɔgagúibe, truibe kwanrrɔtɔga yandɔ ke pinamdɔ palabig tsubig kɔn. ³ Inchen tru cien suldaumeran ashibiibe, Jesúswan wamindi mɔrabe, judío misaameran karubelɔ kɔlli misaameran karua ɔrɔbig kɔn, nui kwanrriigwan tamartrab attrai. ⁴ Inchen nɔmbe amba, Jesúsweim pulu kemallabe, ke tiusmanda chib truba inchib trenchibelɔ kɔn:

—Tru mɔwane ñi treeg ka purugumdiig treeg mɔg kɔn cha. ⁵ Kaguende yu nam warain pirau maya misagwan undaguig kua, nɔashib nam judíosmera tulundzuni yawan maringaruig kɔn— chib.

⁶ Inchen Jesúsbe nɔmba iben, yandɔ yau pub lutau ambene, tru suldaumeran ashibiibe nui trendɔ linchibelan mɔilan kɔsrɔn trenchinrrai karua ɔrɔbig kɔn:

—Señor, ɔyangatiizhiitɔ attra tan chinrrai. Kaguende ñi nai yau kebattraimbe, nabe trengatig kɔmunatan cha. ⁷ Incha trekkurri ni naashibguen ñun lanrrab arrumur cha. Tammisr cha, treetɔ chirra chibig kɔn. Nai karuindiig megabig tammisrig kɔnrrai.

⁸ Kaguende nagucha mas nɔrreelɔ karua pasrig kur cha. Katɔ treeg kɔben na karub tɔgagúilɔ suldaumera tɔgaig kur cha. Truilanma na mɔigwan kɔben: “Inrrɔ” chibene, ib; katɔ na mɔigwan kɔben: “Amɔ” chibene, arrub; katɔ nai karuindiig megabigwan: “Chigɔben mar” chibene, marɔb inchibig kɔn cha. Nɔbe trendan— chibelɔ kɔn.

⁹ Inchen Jesús iigwan mɔrabe, tru mɔwan nɔguen kwaara asha, nui mendig truba nu misag amɔñibelan keesha ashabe, trenchibig kɔn:

—Nabe ñimun trendamɔnrrun cha: israelitasmerai utuguen isubigwan nainug pasrig ɔya nuig wetɔrramur cha, i mɔwei lataig.—

¹⁰ Indiibe tru karua ɔriilɔ katɔle yau pubene, tru karuindiig megabiibe tabikken waptinchibig kɔn.

Jesús kan piudai nusrkawan katɔ ɔsiirangarub

¹¹ Yandɔ ɔyeeg chab puraiben, Jesúsbe kan pueblo Naín taisrɔmay iben, nui kusrenanɔb pera uniiłɔba, truba nu misaaba linchibelɔ kɔn. ¹² Inchen tru puebloyu kebambam yaskab pulu pubene, kan kwaigwan sɔrɔnrrab muta, amrrubelɔ kɔn, tru kwabiibe kandɔ nusrkain kɔben, usrimbe piuda. ¹³ Inchen Señorbe tru ishuan lastima ashabe, trenchibig kɔn:

—Kishmɔta— cha.

¹⁴ Incha Jesúsbe kemalla, taulwan katɔraben, muta ambubelɔbe pɔnrramisren, Jesúsbe kwaigwane trenchiptinchibig kɔn:

—Matsinɔ, na ñun jkurrɔ! char— cha.

¹⁵ Inchen tru kwabiibe kurra, wamisra, waminchib mendɔben, Jesúsbe usran tranɔbig kɔn, pera inrrai.

¹⁶ Inchen iigwan ashene, nòmune mayeelamba korig kòbitø ke chindamdiig kòben, Tiuswan truba tabig waminchib trenchibelø kòn:

—¡Tius maig karuigwan eshkabig purø nuig namui utu kurrin kòn! chib. ¡Tiusbe nui misagwan purugunrrab arrin kòn!— chib.

¹⁷ Inchen Judea pirau kerriguba, katø tru pirau tru pøtøgatanwan kerriguba Jesús chi marigwan wammørøbelø kòn.

*Juan Bautistai kusrenanøb pera uniilø
(Mt 11.2-19)*

¹⁸ Inchen Juanwei kusrenanøb pera uniiløbe øyeeg purayailan kerrigu nun eshkaben, Juanbe nui mendig amøñibelan pailan wama, ¹⁹ Jesúswan trencha payrrai ørøbig kòn: ¿Tru Cristo attrabig kòbiibe ñi kuin kui, kabe nambe katøganun muniiram kuin kui? ²⁰ Inchen tru Juanwei kusrenanøb pera uniiløbe amrrua, Jesúswan kemallabe, trenchibelø kòn:

—Juan Bautistabe, ñun payrrai, namun karua ørtan cha. ¿Tru attrabig kòbiibe ñi kuin kui, kabe nambe katøganun muniiramig kuin chindi?—

²¹ Inchen tru uras, Jesúsbe kwanrreelø truba yamelan tamarøbig kòn, chigurrimbunø kaig kwanrø tøgarmen kòben, kwaimandzig tøgarmen købengue. Katø truba yam kabgailan ashchai tamarøb inchibig kòn. ²² Inchabe Jesúsbe Juan karua øriilan trenchibig kòn:

—Amba, ñim chi mørigwan, ñim chi asigwan Juanwan eshkanrrigay cha. Kabgailøbe ashen, cojosmerabe amben, asr trerab kwanrø tøgarmenane nòmui kwanrøwan tamara chishmariilø kòben, kalu mørmeeløbe mørøbelø misren, kwailøbe øsiiraben, waachamerane Tiuswei tabig srø wamwan eshkab kusrenaniilø kòn cha. ²³ Mayanguen tab kuig kòn chibig kòn, nan peg kuitamab isumøtø, na kuitamab isubigweimbe.—

Juan Bautistaimburab maig kuigwan Jesús waminchib

²⁴ Incha Juanwei kusrenanøb pera uniilø ambene, Jesúsbe Juanweimburab truba nu misagwan trenchib waminchib pølbasrøbig kòn:

—¿Misag warab waraimørømbe ñimbe chi ashchab webamgue? cha. ¿Kan caña ambumay, imay isig srua yainaptiigwandeh? cha. ²⁵ Trube, ¿chi ashchab webamgue? cha. ¿Kabe kan møg truba tabig keweigwandeh? cha. Ñimbe ashibelø kòn cha, truba tabig kebeløbe nòmun maig marøg købendø marøb, reymerai yau purrabelø kui cha. ²⁶ ¿Trube, treeg købene, chi ashchab webambig kø? chibig kòn. ¿Kabe Tius maig karuigwan kan eshkabigwandeh? cha. Øø, nabe ñimun trendamønrrun cha: Treegwanwei ashchab webambig kòn cha, trurriгу Tius maig karuigwan eshkabigwan lataitøguen kømø, mas nuigwan. ²⁷ Juanbe tru Tiuswei wamwan pørigu øyah taig truig kòn cha:

“Au, nabe nai wam srua inrrabigwan ñui merrab ørar taig, ñui maywan ñui merrab tamartrai.”

²⁸ Nabe ñimun trendamønrrun chibig kòn: Maya møguelø kal-labelai utu tru Juan lata nuibe muguen kaagüig kòn cha. Inchendø treeg kuindøgucha, Tius nø ashib karub wainuube kan møg chigucha kømíikken mas nuig kòn cha, Juan lataguen kømø.—

²⁹ Inchen maya misaameraba, tru romasreelayasig an utabeløba Jesús wamindigwan mørabe, Tiusbe maig kønrrabigwan tabig sølgandø marøbig kuin kòn chibelø kòn, tru Juan piu umbu ulsrainabeløbe. ³⁰ Trune tru fariseosmeraba, tru maig maramigwan martrai Moisés pørigwan treeg maramig kòn chib kusrenanøbeløbabe nømuiimburab Tius maig martrab isua indigwan kaashibelø kòn, kaguende truiløbe Juan piu umbu ulsrimeelø kua.

³¹ Katø Señorbe trenchibig kòn:

—¿Møin kwaløm møguelane chi latailø kòn chinrrab køh? cha. ¿Chi lataig asønän chinrrab køh? cha. ³² Kan plazayu ureemera esheerrab purramisra, kangurrin kangurri øyeeg chib trashib purrabelø latailø kòn cha:

“Nambe ñimuyasig luswan urringucha,
ñimbe pailamøwei;

cantailø isumdeelø cantaben,

ñimbe miirab kishmøwei indan” chibelø latailø.

³³ Pøs Juan Bautista pirri mamøwei, vino muchimøwei inchibig arrubene, ñimbe nune, kwaimandzig tøgäig kòn, chibelø kòn. ³⁴ Inchen tru Møg Misra Arrubig mab, muchib inchibig arrubene, trube, ñimbe menrra maptiig kòn tamba, menrra muchiptiig kòn tamba, romasreelayasig an utabeløba, kaig marøb misaameraba linchibig kòn tamba inchibelø kòn. ³⁵ Inchendø mu møkken nebua isumgaig tru Tius marøb pasraigwane nui ureemerainug ashchai kenamaran— chibig kòn.

Jesús Simón fariseowei yau

³⁶ Kan mōikkōsrōn fariseo Jesúswan nōba lincha manrrab attrai eshkaben, Jesúsbe truigwei yau kebyabe, mishatsigu wamisrōbig kōn. ³⁷ Inchen tru pueblōyutōwei kan kaig marōb ishug tsubig, tru fariseowei yau Jesús mab wan tai wammōrōppe, kan alabastro limetayu truba may irrab aceite srua puabe, ³⁸ kishib Jesúswei wendau srōb pulu wamisra, nui kappinwan Jesúswei katsig tambal pala kōrrōgōb sōmara, trugurrimbe nui pusruutōga pinōmōra, katsigu muchawa, yandō tru may irrab aceiten nui srōb pala itōlūshibig kōn. ³⁹ Inchen tru fariseo Jesúswan manrrab attrai eshkabig ashabe, nuinetō treeg isubig kōn: “I mōg Tius maig karuigwan eshkabig kuimbe, nun katōrabiibe mu ishug kui, kaig marōb ishug kui asin kōmbala” cha. ⁴⁰ Inchen Jesúsbe fariseowan trenchibig kōn:

—Simón, ñun chigōsrōn tamig tōga war— cha.

Inchen fariseobe:

—Kusrennōbig, eshkarra— chiben,

⁴¹ Jesúsbe trenchibig kōn:

—Kan an pebigwan pailō mōguelō nun ulōmisrar kōbig kōn cha, kane quinientos denarios ulō kōbene, kane cincuenta ulō kōbig kōn cha. ⁴² Indiibe truilōbe chugurringuen tranrrabgailō kōben, tru an pebōbiibe pailanba paymōnrrab kagōbashiitindig kōn cha. Treeg kōbene, ¿i pailōbe tru an pebōbigwan mōig mas undaarerah?— cha.

⁴³ Inchen Simónbe trenchibig kōn:

—Tru mas nu anwan ulō paymō, kagōbasinabig, na mōren truig kōmmōrgōtan— cha.

Inchen Jesúsbe trenchibig kōn:

—Sōl isua trendan— cha.

⁴⁴ Inchen Jesúsbe ishuwan keesha ashabe, Simónwane trenchibig kōn:

—¿I ishuwan ashkuh? cha. Nabe ñui yau kebarruben, nai katsigwan kwalamig ñibe nan pi tranmuben, trune i ishuube nui kappinwan kōrrōga sōmara, nui pusruutōga pinōmōrtan cha. ⁴⁵ Ñibe nan muchamuben, trune nōbe na kebarrinukkurri nai srōbmeran muchab wan cha. ⁴⁶ Ñibe nai tur pala aceite srōlmuben, nōbe may irrab aceiten nai srōb pala itō lushtan cha. ⁴⁷ Inchawei ñun trendamōnrrun chibig kōn: I ishūwei truba nōrrō kalō mariilan nun ulō paymō pesannaikkurri nōbe truba truba undaaran cha. Inchen mōikkōben tre nu kōmīgwan ulō paymō pesannabiibe, tru ulō paymō kagōbashiibigwane tre undaaramōn— cha.

⁴⁸ Inchabe tru ishuwane trenchibig kōn:

—Ñui kaig mariilōbe payamig kōmīg, pesannaig kōrrōmisran— cha.

⁴⁹ Inchen truyu lincha mab nōba purrabelōbe, nōmasiyaitō trenchib mendabelō kōn:

—¿Chigōben kaig mariilanguen ulō paymō pesannamig kōnrrai marōbiibe, iibe mu mōg kōh?— cha.

⁵⁰ Inchen Jesúsbe ishuwan trenchibig kōn:

—Ñi ñui isubigwan nainuutō pasra tōgagūikkurri, kaigyugurri wesraig kōrrōmisran cha, mōimbe chi isumō, inrrō— cha.

8

Ishumburmera Jesúswan mendig amōñibelō

¹ Yandō iig chab puraiiben, Jesúsbe tru tabig srō wam Tius nō ashib karub wainuguigwan eshkab kusrenanōb pueblomerasrō yamera tsitsō pōnrrasrō uñibig kōn, nui doce kusrenanōb pera unilōba. ² Inchen katō mō ishumburmera kōsrōn nō kwaimandziimeran webusriilōba, kwanrrōmeran tamariilōba linchibelō kōn. Inchen truilai utube tru siete kwaimandziimera webambinabig, María Magdalena kōben, ³ Herodeswei yau ya ashib tsubig Cuzai srai Joana kōben, Susana kōben, katōgan ishumburmera kōben linchibelō kōn. Iilōbe nōmui chi tōgagūilōtōga Jesúswanba, nui kusrenanōb pera unilānba purugubelō kōbig kōn.

Kan kwallibig mandō kwaligwan kemesra kusrenanōb

(Mt 13.1-9; Mc 4.1-9)

⁴ Misag truba nōrrō tulundzuna, chu pueblōyuelō kōben, Jesúswan itōmaytō ashchab webamben, nōbe ‘ōyeeg lataitōwein kōn’ cha, kemesra waminchib trenchibig kōn:

⁵—Kan kwallibiibe nui yellwan tsurōb kwallchab webyan cha. Incha tsurōb ibene, kanbalō yellbe mayu kōrrōben, itōbunōben, illimera amrrua, man cha. ⁶ Inchen katōganbalōbe srug trōlyu kōrra, kal-lappe, kal-labendō, pirō sōig kōmōwagurri mul-lan cha. ⁷ Kan utu yellmerabe kalshau utu kōrra, kal-laben, kalbe kanbalatō nōrrōrawa, chab tsibisan cha. ⁸ Inchen kanbalōbe yell tab pirau kōrra, nōrrōrawa, tabig misra, kan yellgurrindō trulzheelō ciengatig nigan— cha.

Iigwan trenchabe, Jesúsbe truba mur waminchib trenchibig kōn:

—jMōramig kalu pōnsraibe, mōr!— cha.

*Mandogurri 'iibe øyeelø latailø køn' cha Jesús wamindig
(Mt 13.10-17; Mc 4.10-12)*

⁹ Inchen nui kusrenanøb pera uniiløbe:

—¿Tru 'øyeeg lataitøwein køn' cha wamindiibe tappe, mandø køh?— cha payen,

¹⁰ Jesúsbe trenchibig køn:

—Tiusbe nø ashib karub wainug mu asiimíg tøgagúilan ñimun ashchai tranan cha. Trune katøganelane 'øyeeg lataitøwein køn' chib wamindiiløtøga eshkab waminchar cha, "nømbe ashippe ashendø, ashmøwa lataig kørømisrøb; mørøppe mørøndø, chigúii mørøwa kørømisrøb inchain" cha.

*'Iibe kan ellmarøbig lataitøwein køn' cha wamincha pasrigwan Jesús tab eshkab
(Mt 13.18-23; Mc 4.13-20)*

¹¹ Tru 'øyeeg lataitøwein køn' cha, kemesra wamindiibe øyeeg chibig køn cha: Tru yellbe Tiuswei wamwan eshkabig køben, ¹² tru may pulu kørørab yellmerabe, tru Tiuswei wamwan mørøbelan truilan eshkabig køn cha. Inchen nugwaimandziibe arruppa, nømui manrrau tru wam ellmarigwan kerran cha, nøm Tiuswan køreben, kaigyugurri wesrailø kømønrrai. ¹³ Inchen srug trølyu kørørab yellbe tru Tiuswei wamwan møra, truba truba tab kui mørøb utabelan, truilan eshkabig køn cha. Inchendø truiløbe chi srølgar kua, maya yanagatiitø kørewa amøña, chigøben maig inchibelø køtashchab pubene, tarømisrøptinchibelø, truilø køn cha. ¹⁴ Inchen tru kal shau utu kørørab yellbe tru wamindigwan mørøbelan eshkabig køn cha. Inchendø truiløbe nømui ambam maywan ambub køben, tru chine, chine menrra isubiibah, puamisrøg købiibah, chigurrimbunø marøb kasrag amøñinrrab treeg marøg købiibatø kasran cha. Incha tru ellmarigwane nørørabashmøn cha. ¹⁵ Inchen tru tab pirau kørøbiibe tru nømui manrrau purø tabig isub, trurrigu sølwan isub, Tiuswei wamwan møra, truigwan elachimø, tøgagua, melabig meløwa, ellmarig misrøbelan eshkabig køn cha.

*'Aceite lámpara lataitøwein køn' cha, kemesra wamindig
(Mc 4.21-25)*

¹⁶ Mugucha kan aceite lámparan piløgøppe, chitøgagøben kasrømøwei, kabe cama umbu partrab kømøweim piløgøbelø køn cha. Treeg kømøtø, kerrubelan tør kønrrai, pala pasrøbelø køn cha. ¹⁷ Inchawei chitøgucha søriibe søriitø kørømisrømø, kenamisrtrun cha. Katø chigøben ashmønrrai kasra pasriibe, nebua asiimíg kørømisrømøtø, tøryu webattrun cha.

¹⁸ Inchawei ñim mørigwane tab isua asha kuy cha. Kaguen tøgagwane masken tranen, trune chigaigwane nui lamøtiig tøgagurmab isuigwanguen kerraig kønrrun— chibig køn, Jesúsbe.

*Jesúswei usrimba, nuneløba nun lab
(Mt 12.46-50; Mc 3.31-35)*

¹⁹ Inchen Jesúswei usrimba, nuneløba nø wainug pubendø, menrra nu misag pasrøwa, nuim pulugatig kemallchab kaima køben, ²⁰ møikkørøn Jesúswan trencha eshkabig køn:

—Ñui usrimba, ñui nuneløba wambig pønrran cha, ñun ashchab isua amrrua.—

²¹ Inchene Jesúsbe løtappe trenchibig køn:

—Tiuswei wamwan møra, trunun marøbeløbe, nai usri, nai nunelø køn— cha.

*Isig ichibigwanba, pi welarmeranba Jesús kønøbashmø
(Mt 8.23-27; Mc 4.35-41)*

²² Kan kwaløm Jesús nui kusrenanøb pera uniiløba barcoyu kebyabe, trenchibig køn:

—Pisu ambøgatøsrømay larraamun— cha.

Inchabe ambubelø køn. ²³ Incha larraambub ambub købene, Jesúsbe barcoyu kiptinchen, mømibe tru nu pisuyube isig ichibig purø trømbøig namab webarruben, piibe barcoyu michab mendøben, yandø ke asentannraptiig inchibig køn. ²⁴ Inchen Jesúswan kasrønabene trenchibelø køn:

—¡Kusrennøbig! ¡Kusrennøbig! ¡Nambe piu ke chab asentab meler!— cha.

Inchen Jesúsbe kurra, isig ichibigwanba, pi welar trømbøig latøgushib kurrabelanba pasrambunrrai kandø wamabig køn. Inchen truiløbe pønrrambuben, yandø kerrigu wasrønzhig kørømisrøbig køn. ²⁵ Inchen Jesúsbe nui kusrenanøb pera unilan trenchibig køn:

—¿Ñimui isubigwan nainuutø pasra tøgagúigwane chinchigüe?— cha.

Inchen nømbe truba kwaariilø, kan øyebe mandø kermab isub kangurrin kangurri trenchibelø køn:

—¿Iibe mu kerah cha, isig ichibig lata, pi latøgushib kurrabig lata, nø pasrambun-garubene, iiløguen nun mørtrappe?—

Kan gadarasriig kwaimandzig tōgaig
(Mt 8.28-34; Mc 5.1-20)

²⁶ Incha yandø gadarenosmeraim pirausrø larraambubelø køn, tru Galilea nu pisu ambøgatømayrø. ²⁷ Incha Jesús barcoyugurri pirau pinaiben latatø, tru pueblouyig kan møg kwaimandziimera tōgaig katønrab webibig køn, truike manasrøngurri chigucha kemøwei, yau tsumøwei inchibig, sörin trabmerayutø tsubig. ²⁸ Incha Jesúswan ashippe, nu merrab mur trashib tømbsrøb peñabe, trenchibig køn:

—¿Ñibe nane chi martrab inchigu cha, Jesús, Mayeelaim Pala Pasrabigwei Nusrkai? ¡Ñi nan purø trømbøig mōra megamig kōmōnrrai marmōrrunrig!— chib.

²⁹ Kaguende Jesúsbe tru trømbøig maringarub kwaimandzigwane: “Møweinukkurri we-binrø” chibguen indin køben nøbe trendaig køn, kaguende truiwane kwaimandziibe katø katø nø merrarrowa sruaig købig kua. Inchen chu imōnrrai, misaamerabe tasiimeran srøbmeran cadenastōga lusra tōgagüingucha, nøbe cadenasmeran lurren, kwaimandziibe nu misag warab waraimōsrø ingarubig køn. ³⁰ Inchen nune Jesúsbe payibig køn:

—¿Chi munchi kugu?— cha.

Inchen nøbe lötappe:

—Nabe: “Legiōn”, munchi kur— chibig køn, kaguende tru mōweinuube kwaimandziimera purø nu kebamba kua. ³¹ Incha tru kwaimandziimerabe ‘tru purø trømbø umbu trabuyamay ørmōrrunrig’ chib truba rugabelø køn, Jesúswane. ³² Inchen tru tunyube kuchimera truba nu sötø mab llirab amøñiben, tru kwaimandziimerabe ‘tru kuchimerayu kebamingarurra’ chiben, Jesúsbe ka kebambashibig køn. ³³ Inchen kwaimandziimerabe mōweinukkurri webamba, kuchimerayu kebambene, tru kuchi sötøbe truba trømbø lendeyu lula, chab pinøgørraptincha, pisuyu kegørra, pi keesra chab kwabelø køn.

³⁴ Inchen tru kuchi ashibelø treeg purayaigwan ashabe, kwaariilø lula, pueblouy køben, wambig nøøwansrøn køben eshkab ambubelø køn. ³⁵ Inchen misaamerabe chi purayaigwan ashchab werrua, Jesús waisrø pubene, tru kwaimandzig tōga møg købiibe Jesúswei srøb pulu, yandø asru keweige ye yandø tabig wai ashibelø køn. Inchabe truba kørig kui inchibelø køn. ³⁶ Inchen tru treeg purayaigwan ashibeløbe tru kwaimandzig tōga mōwan Jesús mandø incha tamarigwan katøganelan eshkaben, ³⁷ tru Gadara pirau maya misaamerabe Jesúswan nōmuinukkurri ‘irra’ chib truba rugabelø køn, kaguende nømbe truba truba kørig kuilø kua. Inchen Jesúsbe barcoyu kebya ibig køn. ³⁸ Inchen tru kwaimandziimera webambinab møøbe:

—¿Nui mendig arruah?— chib truba inchen,

Jesúsbe trenchibig køn:

³⁹—Nui yamay katø inrø cha, ñun Tius chigøben yeeg nørriig mariilan kerriguh eshkanrrab.—

Inchen tru møøbe, Jesús nun øyeeg nørreelø marigwan kerrigu eshkab ibig køn tru pueblo ørøba.

Kan ishuwei kwanrøwan Jesús tamarøb
(Mt 9.18-26; Mc 5.21-43)

⁴⁰ Incha katø Jesús pisu ambøgatøsrømay larraibene, mayeeløba munig kuig køppe, misaabe nune truba kasrag utabelø køn. ⁴¹ Inchen kan møg judíosmera tulundzuni yau chi maramigwan ashibig, Jairo taig, puabe, Jesúswei katsig pulu tømbsnsra, nui yamay tiusmanda arrubsumugu chibig køn, ⁴² kaguende nui kandø nimbasr doce añosig tōgagüibe ke kwanrrab inchib tsuben.

Inchen Jesús ibene, nu misag sötøbe nui mendig trag marøb ambubelø køn. ⁴³ Inchen tru ututø kan ishug doce años ørøba ani ib kwanrø tōgaig kua, nui chi tōgagüigwan kerrigu patsøgøben, mugucha tamartrab kaimaig købig køn. ⁴⁴ Tru ishuube Jesúswan wendaugurri kemallippa, Jesús nø kewagüig urøzhigwandø katørabene, tru urastø tru ani ibiibe pasramisrøptinchibig køn. ⁴⁵ Inchen Jesúsbe trenchibig køn:

—¿Nane mu katørah?— cha.

Inchen mayeeløba: “Ñune mu katøramer” chiben, Pedrobe trenchibig køn:

—Kusrennøbig, misag sötøbe ñun yeeg tinmarøb ambumay imay trawagutsan— cha.

⁴⁶ Inchen Jesúsbe trenchibig køn:

—Møikkøben nan katørainrun cha. Kaguende nai maramburab marig nainukkurri webrain kui mōrar— cha.

⁴⁷ Inchen ishuube nø treeg marigwan chi sōramgaig kuin kui ashabe, itōnab arrua, Jesúswei merrab tømbsnsrøb srala, maya misagwei merrab chindimba katøraigwanba, katø tru urastø mandø tabig kōrrømisrigwanba eshkabene, ⁴⁸ Jesúsbe trenchibig køn:

—Nimbasr, ñui isubigwan nainuutø pasra tōgagüikkurri tamarig kōrrømisran cha. Chi isumø, inrø— cha.

Jairoi nimbasrwan Jesús øsiiranøb

⁴⁹Inchen Jesús waminchib pasramnetø, tru judíosmera tulundzuni yau ashib karubigwei yaugurri møikkøsrøn puabe, unai møskawane trenchibig køn:

—Ñui nimbasrbe kwabguen indan cha. Kusrennøbigwan mas chi chimøta— cha.

⁵⁰Inchen Jesúsbe mørabe trenchibig køn:

—Kørig kui inchimøtø, køreptø kørepu cha, ñui nimbasrbe tammisrtrun— cha.

⁵¹Incha yau puabe, Jesúsbe mungucha kerrubashmøtø Pedronbah, Jacobonbah, Juanwanbah unai møskalanbatø kerrubashibig køn. ⁵²Inchen mayeeløba unan isub waminchib truba kishib køben, Jesúsbe trenchibig køn:

—Kishmøtay cha, unøbe kwaig kømøtø, ka kiptø tsun— cha.

⁵³Inchen nømbe kwain tsui asha kua, Jesúswane ka indzatø mørøbelø køn. ⁵⁴Inchen unan Jesúsbe tasigu kemøra, mur wamab trenchibig køn:

—Ishug-unø, ¡kurrø!— cha.

⁵⁵Inchen espíritube katø nuinug puben, øsiirawa tru urastø kurraptinchen, Jesúsbe manrrai manningarubig køn. ⁵⁶Inchen møskaløbe ke kwaara asha kørrømisren, Jesúsbe chi purayaigwan nømune mungucha eshkamønrain karubig køn.

9*Jesús nui doce kusrenanøb pera uniilan karua ørøb*

(Mt 10.5-15; Mc 6.7-13)

¹Jesús nui doce kusrenanøb pera uniilan wama, tulundzunabe, mayan kwaimandzi-imeran wambig webusrøb, kwanrrømeran tamarøb inchai, maramburab maramigwanba, mu chindamgaig karumigwanba tranøbig køn. ²Incha Tius nø ashib karub wainuguigwan eshka kusrenanrraimba, kwanrreelan tamartraimba karua ørabe, ³nømune trenchibig køn:

—Mayuweimbe chigøben srua ammønrrigay cha. Pøtønain tsig srua ammøwei, wasr ìla ammøwei, pirri srua ammøwei, an srua ammøwei, turingucha pagatø kømø, kandø kewa ambay cha. ⁴Chugøben puebloyu yau puppe, webamba ambamnegatig truyutø kørrømisrtrigay cha. ⁵Inchen ñimun wamab utag kømui indinuube, trube, tru puebloygurri webamrrappe, ñimui srøbyu usrøwan chishtø kørrøgønrrigay cha. Treeg marøppe, trube ‘ñim kaasig købene, mømibe ñim kusrenrrigay’ chib eshka.—

⁶Inchen nømbe webamba, pueblomørig puraambub ambuppe, Tiuswei tabig srø wamwan eshka kusrenanøb, chutøgucha kwanrreelan tamarøb ambubelø køn.

Jesúsuan Herodes mu kuinguen mørmub

(Mt 14.1-12; Mc 6.14-29)

⁷Inchen Galilea pirau ashib karub wabig Herodesbe Jesúsweimburab wamindi mørøb nø chi mariilan kerrigu wammørabe, chi isum kuinguen mørmíg køn, kaguen møiløgøsrøn: “Juan Bautista kwailai utugurri katø kurriinrrun” chiben. ⁸Inchen kan utueløbe: “Tius maig karuigwan eshkabig Elías kenamisrin køn” chiben, kan utueløbe: “Tius maig karuigwan eshkabig merrabsriig møikkøben katø øsiirain køn” chiben, inchibelø køn. ⁹Inchen Herodesbe trenchibig køn:

—Juanwane natøwei turwan paringaruiig køn cha. ¿Trube, chigøben na yeeg wamindig wammøriiløbe mu kønrrab køh?— cha.

Incha Herodesbe Jesúsuan ashig kui inchibig køn.

Trattø mil møguelan Jesús mamig tranøb

(Mt 14.13-21; Mc 6.30-44; Jn 6.1-14)

¹⁰Jesús nøashib karua øriilø katø amrruabe, nøm chi marigwan nun eshkaben, nømune Jesúsbe Betsaida puebløsrømay nømundø nøørø pera ibig køn. ¹¹Inchendø tru nu misag sötøbe wammørøppe, wendautø amben, Jesúsbe tabig wamab uta, nømun Tius nø ashib karub wainuguigwan waminchib, kwanrrøwan tamaramig palai melabelane tamarøb inchibig køn.

¹²Inchen yandø mawab misrøb arruben, nui doce kusrenanøb pera uniløbe Jesúsuan kemallabe, trenchibelø køn:

—Misaameran yandø amrrai, ungwa chi cha, puluwandø yamera pønrrabsrøn køben, chugøben nøørøsrøn køben, ya peba kørrømisrtrappa, mamig penønrrappa amrrain cha. Kaguende yube nambe mugucha warømønug pønrrer— cha.

¹³Inchene Jesúsbe trenchiptinchibig køn:

—Manrrai ñim manny— cha.

Inchen nømbe trenchibelø køn:

—Nambे trattrøgatø pirrimbah pagatø peskaubatø tøgaguer cha. Ya nu misagweimbe srøig penørrab ambatøwein kønrrun— cha.

¹⁴ Kaguende møgueløtø trattrø milburab købig køn. Inchen Jesúsbe nui doce kusrenanøb pera uniilan trenchibig køn:

—Kan sətø, cincuentabatø, cincuentabatø purramisingaruy— cha.

¹⁵ Inchen treeg maren, misaabe mayeeløba chab purramisrøbelø køn. ¹⁶ Inchen Jesúsbe tru trattrøgatø pirriwanba, pagatø peskaumeranba nui tasku muta, srømbalaneb neesha, Tiuswan 'mayanguen pay' cha, pirrimeran pirishabe, nui kusrenanøb pera uniilan misagwan pirishinrai tranøbig køn. ¹⁷ Inchen mayeeløba øska ma kørrømisren, pitis undailan tasinmerayu netsøbatø doce tulishibelø køn.

*Pedrobe Jesúswan: "Cristo køn" chib
(Mt 16.13-19; Mc 8.27-29)*

¹⁸ Kan kwaløm Jesús nøøørøsrø Tius Møskaimba waminchib wabene, nui kusrenanøb pera uniiløbe nøba purrøben, Jesúsbe trencha payibig køn:

—¿Misaamerabe nane mu køn tah?— cha.

¹⁹ Inchen nømbe trencha løtabelø køn:

—Møiløbe: "Juan Bautista køn" chiben, møiløbe: "Elías køn" chiben, møiløbe: "Tius maig karuigwan kan eshkabig merrabsriig katø øsiirainrrun" chiben indan— cha.

²⁰ Inchen Jesúsbe trencha payibig køn:

—¿Trune fümbe nane mu køn chinrrague?— cha.

Inchene Pedrobe trencha løtabig køn:

—Ñibe Tiuswei tru Cristo køn— cha.

*Jesús nø kwamigwan eshkab
(Mt 16.20-28; Mc 8.30-9.1)*

²¹ Inchen Jesúsbe iigwane mungøben eshkamønrrain karubig køn. ²² Inchabe trenchibig køn:

—Møg Misra Arrubiibe chinetø kaig indinab megamig nebunrrun cha. Katø misagwan karubelø kølli misaamera køben, sacerdotemeran karubelø køben, Moisés pørigwan kusrenanøbelø køben nune kaasig kømig kønrrab køn cha. Incha kweechen, pøn kwalømyube kusraig kønrrun— chibig køn.

²³ Incha mayeelan trenchibig køn:

—Møikkøben nai mendig uñig købene, nøasiitø nuimburabigwangøba isumøtø, kwalømmørig nui kuruswan muta, nai mendig arrum nebunrrun cha. ²⁴ Inchen møikkøben øsig kømigwangøba esegabiibe yandø pinab pinamig nebunrrun cha. Inchen nagurrindø kwabiibe managatig øsig kømigwan esegawa tøgagørrun cha. ²⁵ ¿Kan møg yu pirau chine købigwan Kerrigu nuindø maringucha, nøasiitø minchib, nøasiitø pinamigwei marøb indiibe, chiwein kui tabig kønrrab kø? ²⁶ Pøs møikkøben naimburappa, na wamindiilaimburappa kørig isub kørig kui inchibigwane, nune kørig purørtrun chibig køn, tru Møg Misra Arrubig tru nui tørguegwalmabiiba, nui Møskawei tørguegwalmabiiba, Tiusweindø tarømari ángelesmerai tør pilabiiba arrua. ²⁷ Nabe fümun cierton trendamønrrun chibig køn: Møiløgøben yu purrabelø Tius nø ashib karub pasraigwan ashmøwatøbe kwanrraamøn— cha.

*Jesús ke peemayig misrøb
(Mt 17.1-8; Mc 9.2-8)*

²⁸ Øyeeg taig trune wendau køsrøn Jesúsbe Pedronba, Juanwanba, Santiagonba pera, kan tun palasrø Tius Møskaimba waminchab nebibig køn. ²⁹ Inchen Jesúsbe Tiusba waminchib pasramnetø, nui maløbe ke peg lataig misrøptinchen, nui kewagüiløbe truba puløzhig tørgwalmabelø misrøbig køn. ³⁰ Inchen mõimbe pailø møguelø nøba waminchib kenamisrøptinchibelø køn. Truiløbe Moisésba, Elíasba, ³¹ nømbe tørguegwalmabig pinøgasrailø, Jesús Jerusalénsrø mandø kaig indinab megawa, kwamigwan waminchib pønrrabelø køn. ³² Inchen Pedroba, nui linchibeløba kigøbiitø ke chindamdø kuim purrøwagucha, kimø kasrig ka purrøwa, Jesúswei tørguegwalmabigwanba, tru pagatø møguelø nøba pønrrabelanba ashibelø køn. ³³ Inchen tru møguelø yandø Jesúsweim pulugurri tarømisra ambene, Pedrobe nøtøwei chi chib pasrarmabguen mõrmubendø, trenchibig køn:

—Kusrennøbig, ¡nam yu pønrramibe purø tab køtan! cha. Pøngatø ya-ureg margun cha, kan fñui, kan Moiséswei, kan Elíaswei.—

³⁴ Inchen tru waminchib pasramnetø kan wañi arrua, nømun kasrøben, nømbe wañi umbu kørrømisra, Pedroba, Juanba, Santiagobabe truba truba kørig kui inchibelø køn.

³⁵ Inchen wañi umbugurrimbe kan wam trenchibig køn:

—Iibe nai Nusrkai, nai lawa wesruig køn cha. Nune mõray— cha.

³⁶ Tru wambe yandø mas mørø waminchimuptinchen, Jesúsbe katø nøtø pasrai ashibelø køn. Incha nømbe tru chi asigwane tru kwalømmerawane mungucha maizhikken mørø waminchimeelø køn.

Jesús kan kwaimandzig tōga unan tamarøb
(Mt 17.14-21; Mc 9.14-29)

³⁷ Katø kwaløm tunbalarøngurri kørørrubene, Jesús swan katønrrab truba nu misag wer-ruben, ³⁸ mømbe kan møg tru misaamerai utugurri truba mur wamab trenchibig køn:

—Au, Kusrennøbig, kabe tiusmanda nai nusrkawan ashibsrumuguh cha, nai kandø nusrkain køn cha. ³⁹ Nune kwaimandziibe merrarraben, nøbe mõi møin trashibig køn cha. Inchen kwaimandziibe pirausrø kucha, itønangarub, triimay chall kutsingarub, purø trømbøbig lastimaig marøb, ¡katø! elachimørsaatø inchibig køn cha. ⁴⁰ Inchen ñui kusrenanøb pera uniilan kwaimandzigwan webusrtai na rugaben, kaiman— cha.

⁴¹ Inchen Jesúsbe trenchibig køn:

—¡Kan ñim mõi misaamera kørenrrab inchimeelø larrø kailø! cha, ¿Nabe managatig ñimba unamig kørnrrerah cha, ñimun øyeeg ashiptø? Ñui nusrkawan yu srua amø— chibig køn.

⁴² Inchen unøbe kemallib iben, kwaimandziibe unan pirausrø kucha, sruaguchen, Jesúsbe trømbøbig maringarub kwaimandzigwan nama, webingarua, unane tamara, møskawan tranøbig køn. ⁴³ Inchen Tiuswei purø nuig tabigwan mayeeløba kwaara ashibelø køn.

Jesús nø kwamigwan katø eshka
(Mt 17.22-23; Mc 9.30-32)

Inchen mayeeløba Jesús øyeeg marigwan kwaarøb kømne Jesúsbe nui kusrenanøb pera uniilan trenchibig køn:

⁴⁴ —Pesannanrrab kømø, iigwan tab møray cha, tru Møg Misra Arrubigwane møguelai tasku tranig kørnrrabigwan.—

⁴⁵ Inchen nømun øyeeg taigwane nømbe chi tainguen mørmeelø køn, kaguende Tius chigúinguen mørønrrai indilø kua. Incha nø øyeeg taigwan chi chibig kø cha payamibe nømbe kørig kui inçibelø køn.

Mas nuibe mu kerah
(Mt 18.1-5; Mc 9.33-37)

⁴⁶ Inchen nui kusrenanøb pera uniiløbe nømui utu nømbe møig mas nuig kørnrraptiig kuin kui waminchib payiyab mendabelø køn. ⁴⁷ Inchen nøm chi isub purraigwan Jesúsbe wetøbeña, kan unan srua ya, nuim pulu pasrabe, ⁴⁸ trenchibig køn:

—Møikkøben i unan nai munchiyu tab wamab utabiibe, nan utan cha. Inchen nan utabiibe, nan karua ørøbigwangucha utan cha. Inçhawei ñimui utu mas chigucha kømfig lataig kui asiibe, truiibe si, mas nuig køn— chibig køn.

Namun maig købash inçimíbe namuingatø pasran
(Mc 9.38-40)

⁴⁹ Inçhene Juanbe trenchibig køn:

—Kusrennøbig, kan møikkørøen ñui munchiyu kwaimandziimeran webusri aser cha. Inçhendø namba uñmfig købene, nambe truigwane merer— cha.

⁵⁰ Inçhen Jesúsbe nun lötappe trenchibig køn:

—Merømøtay cha. Kaguende ñimun namig kurrømíbe ñimuingatig køn— cha.

Jesús Jacobonba, Juanwanba namab

⁵¹ Yandø Jesús srømbalarø utig kømig lutau køben, Jerusalénmay ke punrrab isua ib menda, ⁵² eshkanrrabelø wam sruar merrab øren, nømbe Samaria pirau kan pueblørø chigøben nuyasig tamartrab ambene, ⁵³ samaritanosmerabe Jesús wane utømeelø køn, kaguende nøbe Jerusalénsrømay inrrab arri asha. ⁵⁴ Inchen nui kusrenanøb pera uniilø Jacoboba, Juanba øyeeg indi ashabe, trenchibelø køn:

—¿Señor, nømun pinishinrrab srømbalarøngurri nam nag kørørraringaruah cha, Tius maig karuigwan eshka møg Elías latawei?—

⁵⁵ Inçhen Jesúsbe nømun keesha ashabe, namabig køn. ⁵⁶ Incha katøganbalø yamera tsitsø pørnrrabsrømay ambubelø køn.

Jesúswei mendig ambamibe murig køn
(Mt 8.19-22)

⁵⁷ Nøm maywan ambub købene, kan møg Jesús swan trenchibig køn:

—Señor, ñi chu ibendø, nabe mendig arrumønrrun— cha.

⁵⁸ Inçhen Jesúsbe trencha lötabig køn:

—Zorramerabe waramig trabmera tɔgar kɔben, katɔ pala amɔñib illimeragucha nɔmui lemera tɔgar kɔn cha. Trune na, Mɔg Misra Arrubiibe ni nai turwan chu nerrarramikken chigaig kur— cha.

⁵⁹ Incha Jesúbe katɔganun trenchibig kɔn:

—Nai mendig amɔ— cha.

Inchen nɔbe:

—Señor, nai mɔskawan sɔrɔnrrabmerrig ibashcha— chiben,

⁶⁰ Jesúbe trenchibig kɔn:

—Ñibe nai wendautɔ amɔ cha. Tiusweimburabigu kwaig latailɔbe nɔmui kwailan sɔrɔbash cha. Inchen ñibe ya, Tius nɔ ashib karub wainuguigwan katɔganelan eshka kusrenan— cha.

⁶¹ Inchen katɔgangucha trenchibig kɔn:

—Señor, ñui mendig arrug kɔtan cha. Inchendɔ nai yauelanmerrig ungwa chinrrab ibashcha— cha.

⁶² Inchen Jesúbe trencha lɔtabig kɔn:

—Mutɔgucha arauwan kemɔra arab pasrɔbendɔ, wendɔmaygɔba keeshibiibe, Tius nɔ ashib karub wainuguigwane chi tab martrabgaig kɔn— cha.

10

Jesús setenteelan karua ɔrɔb

¹ ɔyeeg chab puraiben, Señor katɔ setenta lawa wesrua, pagatɔ pagatɔ pueblomɔrig katɔganbalɔmerasɔ nɔ yamsrɔmay nui merrab ɔrɔbig kɔn.

² Incha nɔmun trenchibig kɔn:

—Ellmarig tulisamibe truba nɔrrɔ kɔben, trune tulishinrrabelɔbe mamdɔ kɔn cha. Inchawei tru ellmarig puaig Tiuswan miay chibig kɔn, nui ellmarigwan tulishinrrabelɔ ɔrtrai. ³ Ñimbe ambay cha. Au, nabe ñim ubishamera latailan lobosmerai utu ɔrar cha. ⁴ An pusramig urasr ila ammwɔwei, wasr ila ammwɔwei, alpargatis katɔ nɔrɔrɔ srua ammwɔwei, ñim maywan ambuppe, mun kɔben wamab waminchib pɔnrrɔmɔwei inchigay cha.

⁵ Incha kan yau kebampuppe, ɔyeemerrig chinrrigay cha: “I yaube chi isumgaig mayanguen tab kɔnrrun” cha. ⁶ Inchen truyu chi isumgaig tab kɔbigwan tɔga mɔg wabene, tru: “Chi isumgaig tab kɔnrrun” cha ñim trendaibe nunug kɔrrɔmisrtrun chibig kɔn. Inchen treeg mɔg kaabene, tru ñim trendaibe ñimuinuutɔwei kɔrrɔmisrtrun cha. ⁷ Inchen ñimbe tru yautɔwei kɔrrɔmisra, nɔm chi srɔrrendɔ mab, mutchigay cha. Kaguen chi marɔbiibe nui marimburɔbe mu chi chinrrainga, utamig kɔn cha. Yamɔrig, yamɔrig ammwɔnrrigay cha. ⁸ Ñim kan pueblouy kebamben, ñimun wamab utɔbene, chi srɔrrendɔ manrrigay cha. ⁹ Incha truyu kwanreelan tamarɔb, tru misaameran: “Tius nɔ ashib karub wainuguibe ñimuinuube lutaarab pasran” chinrrigay cha.

¹⁰ Inchen ñim kan pueblouy puben, ñimun wamɔmubene, trube, callesmerayu webamba, misagwan ɔyeeg chinrrigay cha: ¹¹ “Ñimui pueblouy usrɔ namui srɔbmerayu mendigwan mɔimbe trube, ñim kusnrrigay chib pabɔrrguer chib. Inchendɔ mɔimbe yandɔ ñimbe isua kuy cha, Tius nɔ ashib karub wainuguibe ñimuinuube lutaarain kɔn” chib. ¹² Inchawei nabe ñimun trendamɔnrrun: Srabe kwalɔmbe tru puebloimbe Sodomai lataitɔguen kɔmɔ, Tiuswei tru maig kɔnrrabigwan asha maram kwalɔm attrabiibe mas purɔ trɔmbɔig kɔnrrun cha.

Isua mɔrmɔ misaameran isumdiig nebunrrabig

(Mt 11.20-24)

¹³ ¡Ay, ñi Corazín pueblo, waacha! ¡Ay, ñi Betsaida pueblo, waacha! Kaguende Tirosrɔ, Sidónsrɔ tru maramburab mariilan na ñimui utu lataitɔwei marig kuimbe, manawei truilɔbe nɔmui kaig mariilan isua mɔra, Tiusweimay llirabsruig kuinrrun cha. Incha kaig marmɔnrrab yandɔ isua mɔrer chib kenamartrab, trɔsrkɔleelɔ keb, nagusrɔyu purramisrɔb inchibsruiinrrun cha. ¹⁴ Pɔs Tiuswei tru maig kɔnrrabigwan asha maram kwalɔmbe Tiroba, Sidónba misamera lataitɔguen kɔmɔ, ñimbe mas purɔ trɔmbɔigwan utɔnrrun cha. ¹⁵ Inchen ñi Capernaum pueblogan, çpurɔ tab incha srɔmbalasarɔngatig kusruig kɔnrrurmb isutirru? cha. Treeg kɔmɔtɔ, ñibe tru mɔra melamnug kegutsig kɔnrrabguen— chibig kɔn.

¹⁶ Incha nui pera uniilan trenchibig kɔn:

—Ñimun mɔrɔbiibe, nan mɔran cha. Inchen ñimun kaashibiibe, nan kaasan cha. Inchen tru nan kaashibiibe, nan karua ɔrɔbigwan kaasan— cha.

Karua ɔrig setenteelɔ katɔ amrrub

¹⁷ Inchen tru setenteelɔbe truba kasrag katɔ amrruabe, trenchibelɔ kɔn:

—Señor, ñui munchiyube kwaimandziimeraguen namune mɔrtan— cha.

¹⁸ Inchene Jesúsbe trenchibig kòn:

—Satanásbe srømbalásrøngurri kan palaig peñib lataig peñen, nabe asig kòn cha. ¹⁹ Nabe mu mandamgaig maramburab maramigwan ñimun tranamønrrun cha, ulmeran, alacránmeran itøbunønrrai, katø tru ashig kømui inchibig, Satanás, nø kanawa, chi mar-trab kaimanrraimba. Inchen ñimbe chi indiimeelø puramrrun cha. ²⁰ Inchen ñimbe, kwaimandziimera ñimun mörimba kasraaramøtø, ñimui munchimera srømbalásrø pørig pønrraimba kasraaray— chibig kòn.

*Jesús nuielaimburab kasraarab
(Mt 11.25-27; 13.16-17)*

²¹ Incha tru uras Jesúsbe Espiritu Santogurri truba kasraarawa, trenchibig kòn:

—Nai Møskai, srømbalawanba, pirøwanba ashib karubig, ñun tabig waminchar cha, kaguende ñibe kusrebelø chigüi mörøbelan ashmønrrai tru sørig pønrrabelane tru chigucha kømeeelø kusremeelan kenamarikkurri. Treewein kòn, nai Møskai, ñi treeg kønrrai maramig tab kuig kua.

²² 'Nai Møskaimbe chiwandøgucha nan trandan cha. Mugucha na Nusrkawane mu kui ashmuben, Møskaindøwei asan cha. Mugucha Møskawane mu kui ashmuben, na Nusrkaimba, møyilgøben na asingaruielø truiløbatø asan— chibig kòn.

²³ Incha nui kusrenanøb pera unilán ashabe, nømundø trenchibig kòn:

—Tru ñimui kabmera nebua asigwan ñim ashibeløbe mayanguen tab kuilø kòn cha. ²⁴ Kaguende nabe ñimun trendamønrrun cha: Truba nørø Tius maig karuigwan eshkabelø køben, reymera køben, i ñim asigwan asinrrabna kui inchendø, ashmuig kòn cha; i ñim mørigwan mörinrrabna kui inchendø, mörmuig kòn— cha.

Kan tabig marøb samaritanon Jesús kemesra wamindig

²⁵ Inchen tru maig maramigwan martrai Moisés pørigwan kan kusrenanøbig Jesúswan mandø inchibig køtashchab nøba waminchab kurra yabe, trencha payibig kòn:

—Kusrennøbig, ¿managatig øsig kømigwan Tius tranig tøgagønrappe, nabe chi maramerah? — cha.

²⁶ Inchen Jesúsbe trencha løtabig kòn:

—Maig maramigwan martrai Moisés pørigube ¿chi pørig pasrah? cha. ¿Ñibe truigwane mandø taitamab isugu?— cha.

²⁷ Inchen nøbe trenchibig kòn:

—“Señor ñui Tiuswane ñui manrraugurri kerrigu newan undaaritøgaba, kerrigu ñui øsig pasraitøgaba, katø kerrigu ñui asru chishkømburab chish kuitøgaba, kerrigu ñui turtøga isumburab isuitøgaba undaaramig kòn cha. Katø ñiima ñiasitøwei maig undaguig køppe, ñui mendaidøwangucha treetøwei undaaramig kòn” cha, trenchibig pørig pasran— cha.

²⁸ Inchen Jesúsbe trenchibig kòn:

—Ñibe sølwei løtan cha. Iigwan mar cha. Treeg marabe si, ñibe managatig øsig kømigwan Tius tranig tøgagønrrabguen— cha.

²⁹ Inchen tru møøbe nø payigwan tab webig køb, Jesúswane trencha payibig kòn:

—¿Naimbe mendaiibe mü kerah?— cha.

³⁰ Inchene Jesúsbe trencha løtabig kòn:

—Kan møg Jerusalmay ambi maywan Jericómay kørraarrub arrubene, nileelø merrarr-rawa, kerrigu nui kewagüigwanbañau nila, kurragucha, kwaig lataig mara trarra ambubelø kòn cha. ³¹ Inchen kan judiosmerai sacerdotø tru maywandøwei chi isumø purainrrab arrub pasrøwa, tsui ashippe, yabwansrøndø purayan cha. ³² Katø treetøwei kan levitagucha truyu pubendø, ashabe, mendawansrøndø pureppa ib ibig kòn cha. ³³ Trune kan Samariasrø møg tru maywandøwei purainrrab arrua, nun ashabe, lastima isua, ³⁴ møwan kemal-labe, nui pisrøwan aceiteba, vinoba srøla, llensutøga lusra, trugurrimbe nui burroyutøwei itøguanøsrø, kan ya pebøbelainuumay srua ya, truyu ashib tøgagüig kòn cha. ³⁵ Incha katø kwaløm samaritanobe inrrappe, tru ya puagwan pagatø an wesrawa, trana: “I møwan ashchunrrig tan cha. Ñi mas kastain købene, katø arruabe, pagararrumøn” tan— cha.

³⁶ Incha Jesúsbe tru Moisés pørigwan kusrenanøbigwane trenchibig kòn:

—¿Tru nileelø kemørinab møwan, tru i pønelø nøasi lataitøwei isua ashibiibe, ñiune møig truig kønrraptiig køta?— cha.

³⁷ Inchen nøbe løtappe trenchibig kòn:

—Tru møwan lastima ashibig, truig kømmergøtan— cha.

Inchen Jesúsbe trenchibig kòn:

—Ñigucha ya, treetøwei mar— cha.

Jesús Martaba, Mariaba waminchib

³⁸ Incha Jesúsba, nui kusrenanøb pera uniiløba nui maywan amba, yamera tsitsø pønrabsrø pubene, truyube kan ishug, Marta taig, nui yaumay amø cha, utabig køn. ³⁹ Martabe kan numøsrøi María taig tøgøig købig køn. Inchen truipe Jesúswei srøb pulu nø chi taigwan mørtrab wamisren, ⁴⁰ trune Martabe, ke chi maram kuinguen mørmig wawa, Jesúswan kemallabe, trenchibig køn:

—Señor, chi maramelan nai numøsrøi ke nandø keguchen, ñungan isumuitarru cha, nui puruguptøguen wau taindø— cha.

⁴¹ Inchen Jesúsbe trenchibig køn:

—Marta, Marta, ñi kui ke chinsraatø inchib, ñui chigurrimbunø maramelangøba isun cha. ⁴² Inchendø kanbaløtø mas isumig pasran cha. Inchen Mariabe tru mas tabigwan trunun lawa wan cha. Truigwane kerraig kømønrrun— chibig køn.

11

Jesús Tius Møskaimba mandø wamindamigwan kusrenanøb

(Mt 6.9-15; 7.7-11)

¹ Kan pieje kanbaløsrø Jesúsbe Tius Møskaimba waminchib wawa, chab patsøgøbene, møikkøsrøn kan nui kusrenanøb pera uniibe trenchibig køn:

—Señor, tru Juan nui kusrenanøb pera uniilan kusrennøb lataitøwei, namungucha Tiusba wamindam kusrenanrra— cha.

² Inchen Jesúsbe trenchibig køn:

—Ñim Tiusba waminchib pønrrappe, øyah chinrrigay cha:

“Namui Møskai,

ñui munchibe tabigweindø tarømara, newan tab indig kønrrun.

Ñi ashib karub pasraibe pirau larrøbitchab amø.

³ Kwalømmørig nam mamig maig palabigwan namun møi tranøb,

⁴ namui kaig mariilan ulø paymø, pesannarrunrrig chib.

Kaguende namma namun kaig marøbelan mayeelan ulø paymø, pesannabelø ker chib. Chiyugøben namun kegørrøsrkønraptiig pønrrøbene, truwane ambashmørrunrrig chib.

Masken tru kaigweinukkurrimbe tarømartra”— chib.

⁵ Incha Jesúsbe katø trenchibig køn:

—Ñimma møikkøben kan trendø asig tøgagua, yem tøbøtag truigwei yamay ya: “Au, nai kasuku, pøngatø pirrim pebøbsrumugu chinrrun cha. ⁶ Pøs nai trendø asig inrrab arrua, nai yau puben, chigucha srørramig chi kaagur” cha. ⁷ Inchen kane yaambugurri trencha løtimbeh: “Yaskappe yandø kasraig pasran cha. Mas wamab fregamørrunrrig chib. Nabe nai ureemeraba camayuguen warøwa, chigucha pebrab kurrønrrab kaimamønrrun” cha. ⁸ Pøs nabe ñimun trendamønrrun: Pebrab kurrappe, nui trendø asig kuimbatø pebrab kurrømøtø, ke wamabig wamab tsuikkurri kurra, chi palabigwan nøbe kerriguh tranrrun cha. ⁹ Inchawei nabe ñimune trendamønrrun: Miabene, Tiusbe ñimune tranrrun cha. Lawabe, ñimbe wetørranrrun cha. Yaskabu wamubene, ñimune kurtrun cha. ¹⁰ Kaguende mugucha miabiibe utøben, labiibe wetørraben, yaskabyu wamabigwane kurtrun cha.

¹¹ ¿Ñimma møikkøben, møskain kua, ñui nusrkai pirri miaben, pisrugwan tranrraitirru? ¿Kabe peskau miabene, ulwan tranøbsruguh? ¹² ¿Kabe kan atøwall srug miabene, alacrånwan tranøbsruguh? ¹³ Pøs ñimma ya kailø købenguen ñimui uregwane tabig keta tranøbelø køben, ¿kan mas ñimui Møskai srømbalasrø wabiibe nun miabelane Espiritu Santon tranmønrraitarru?— chibig køn.

Møiløgøsrøn Jesúswan kwaimandzigwei maramburab marigwan tøgøig køn chib

(Mt 12.22-30; Mc 3.20-27)

¹⁴ Kan møwan kan kwaimandzig wamgaig marigwan Jesúsbe wambig weguchen, kwaimandzig webibene, tru wamgaibe waminchiptinchen, misaamerabe truba kwaara ashen, ¹⁵ kan utueløbe trenchibelø køn:

—Kwaimandziimeran ke nøasha karub pasrabig, tru Beelzebúgurri kwaimandziimeran nøbe webusrøbig køn— cha.

¹⁶ Inchen kaneløbe Jesúswan maig inchibig købtashchab ashig køptø, nune srømbalasrøngurriig asamig martrai miabelø køn, Tius nøba pasrain kui ashchab. ¹⁷ Inchen Jesúsbe nøm chi isub pønrraigwan ashabe, trenchibig køn:

—Kan rey karub tøgaweim pirauma misag nømasiitø nøørotø misrøb kurrabe, pinønrrun cha. Katø kan yuelø nømasiitø nøørotø misrøb kurrabe, chab pinønrrun cha. ¹⁸ Inchawei Satanåskucha nøasiitø nøørotø misrene, nui ashib karub waibe ¿chincha pasrabig pasrønrrab kø? cha. Kaguende ñimbe nane trendan, chibig køn, Beelzebú martrai

tranikkurri kwaimandziimeran webetan cha. ¹⁹ Tru kwaimandziimeran na webetappe, Beelzebúgurri webetig købene, trube, ¿ñimui mendig amõñibeløbe kwaimandziimerane mu webetingaruitõgarre webetah? cha. Inchawei, treeg købene, maig kuigwan ñimun uyube nõm chibig køn. ²⁰ Trune na Tiuswei tasig-unõtõga kwaimandziimeran webetõbene, Tius nõ ashib karub pasraibe ñimui utube puaguen pasran cha.

²¹ Kan mur mõõma iitõgäbe chinchamamõrrurmab may tamara, nui tab yawan tab ashib tõgagõbene, truyu nui chigurrimbunõ tõgagüibe chi isumgaig pasran cha. ²² Inchen katõgan mõg, nõ lataguen kõmõ, mas murig arrua, nun merrarrawa kanawa, tru chinchamamug, iilõtõgäbesimab isua tõgagüilan kerrawa, tru nõ chi tõgagüilane katõganelõba pirisan cha.

²³ Naingatõ pasrõmibe, nan tsaleelaingatõ maran. Naba tulishimübe truõrõtõ wiitan cha, trenchibig køn Jesúsbe.

*Kaig espõritu katõle mõweimay arrub
(Mt 12.43-45)*

²⁴ Kan trõmbõig maringarub kwaimandzig mõweinukkurri webippe, chugõben purmerasõ isramig lab uña, yandõ wetõrranrab kaimappe, trenchibig køn: “Katõ nai yamay inrrab cha, na chugurri webarrua arrinuumaytõwei.” ²⁵ Incha katõ arruabe, tru mõwane kan yawan chishtõ paluuncha, tamara pasrig lataig wetõrranrun cha. ²⁶ Incha ippe, katõgan kwaimandziimera, nõ lataguen kõmõ, mas larrõ trõmbõig marõbelan sieteba tulundzuna, sõteelõba trubalatõ tru mõweinug purrõnrrab kebamrrun cha. Inchen tru mõõbe yandõ sräbebe mas purõ kaikken kõrrõmisrtrun cha, tru srõsrõ lataitõguen kõmõ.—

Isa kõmõ, purõ tab kõbig

²⁷ Jesús iilan waminchib pasramne, misag utu kan ishug õyeeg chib trashibig køn: —¡Ñun tõgagõb, mutsõsrõb ishuube mayanguen tab kuig køn!— cha.

²⁸ Inchen Jesúsbe trenchibig køn:

—Tius maig taigwan mõrõb, maig karuilan mõrõbelõ, truilõbeguende mayanguen tab kuilõ køn— cha.

*Kaig misag Jesúswan mana asiimüg martrai miab
(Mt 12.38-42; Mc 8.12)*

²⁹ Misaamera Jesúsweim põtõgatan mas mas tulundzunõben, nõbe trenchib waminchib põbasrõbig køn:

—Mõin kwalõm larrõ kaig misaamera, Tius naba pasrain kui ashchab marig miatan cha. Inchendõ asha kõnrrai katõgan chigõben peg kenamara tranmõtõ, tru Jonásweiwandõ eshkamõnrrun cha. ³⁰ Jonásma Nínivesrõ warab misaameraimbe chigõben kõnrrab kuitamab isua asha kõmig kõnrrai nune treeg pasrig køn cha. Treetõwei na, Mõg Misra Arrubikkucha mõin kwalõm misaameraimbe isua asha kõmig kõnrrai pasrig kõnrrun cha. ³¹ Tru ambõ umbu pirausrõ reinagucha Tiuswei tru maig kõnrrabigwan asha maram kwalõmbe kurrõnrrun cha. Incha nõbe tru mõin kwalõm mõguelõ ñimun mõra melõnrrai maringarunrrun. Kaguende nõma purõ yabsrõngurringuen arrig kõbig køn, Salomõn, tru purõ kusrebig wamindigwan mõrtrab. Inchen yu pasrabiibe Salomõn lataitõ kõmõ, mas nuikken kur chibig køn. ³² Tru Nínive ciudadesrõ misaamerabe Tiuswei tru maig kõnrrabigwan asha maram kwalõmbe kenamisrtrun cha, tru mõin kwalõm misaameran kaiyu põnsrõnrrab. Kaguende Nínivesrõ misaamerabe Jonás eshkaigwan mõra, nõmui kaig marilian isua mõra, Tiusweimay liraig køn cha. Inchen yu pasrabiibe Jonás lataitõ kõmõ, mas nuig køn— cha, trenchibig køn.

*Kabmerabe asru kan lámpara latailõ køn
(Mt 5.15; 6.22-23)*

³³ —Muguen kan aceite lámpan pilõga srõrrõyu pasrmõwei, ni kõtsõ umbu pasrmõwei indan, masken kerrubelan tõr kõnrraimbe, pala pasran. ³⁴ Asru kappe kan lámpara lataig køn. Inchawei ñui kab tabig købene, ñui asrube kerriguba tõr kebilig kõnrrun. Inchen ñui kab kaig købene, ñui asrube kerriguba lõstigi kõnrrun. ³⁵ Inchawei ashiptõ kuy, ñim tõr tõgagüibe lõstigi kõbgunmab. ³⁶ Kaguene asru kerriguba tõr køben, katõ truyu chigucha lõstigi kaabene, ñibe kerriguba tõrgandõ ashchun chibig køn, kan lámpara purõ tõrig, ñun pilõben lataitõwei.—

*Jesús fariseosmeranba, maig maramigwan martrai põrigwan kusrebelanba õyeelõ køn chib
(Mt 23.1-36; Mc 12.38-40; Lc 20.45-47)*

³⁷ Yandõ Jesús chab waminchene, kan fariseo nui yau lincha manrrab attrai eshkaben, Jesúsbe kebya, mishatsigu wamisrene, ³⁸ fariseobe Jesús mamigwan mamõwatõ, tasig kinõmõ mai ashabe, truba kwaaren, ³⁹ Señorbe trenchibig køn:

—Trube, ñim fariseosmerabe pasunba, platillonba wambiimaybe pillmabendõ, ñimui umbube ñimbe misagwan kwaarõsra kerranrrab isuilõba, chigurrimbunõ tõgagõnrrab parõ

isuiløba, trutø netsailø køn cha. ⁴⁰ ¡Ñim chugúinguen mørmeelø! Tiusbe palamay asrwanma marig køppe, ¿katø umbuigwangucha nõtøwei marig kømuitarru? cha. ⁴¹ Treeg inchibgunrriibe, tru umbu tøgagúigwan waachameran lastima asha, srørray chibig køn, treenchene, ñimune kerriguba chishig kørrømisrtrun cha.

⁴² ¡Ay, ñim fariseos waachamera! Ñimbe erbabunan, rudan, chigurrimbunø katøgan shush tusrmeran Tiusweyasig diezmørig kanzhig, kanzhig wesrawa, tranendø, tru sølgandø tabig maramigwanba, katø Tiuswei tru undag købigwanbabe, ñimbe pinab marøbelø køn cha. Ñimbe marøppe, iilanwei maramig kuig køn cha, tru diezmørig kan kan wesrawa, Tiuswan tranamigwangucha pesannamø, tøgatø marøb.

⁴³ ¡Ay, ñim fariseos waachamera! Judíosmera tulundzuni yamerayu purø tab misaamera purrainug purramig chullelø, katø penab, yanøb indinug ñimune maig købash kømø, purø tabzhig wamønrrai inchibelø køn cha.

⁴⁴ ¡Ay, ñim waachamera, kwaig sørin trabmera latailø, chi kenameelø! Misaamera tru sørim palawan chigúinguen ashmø llirab kuilø latailø køn— chibig køn.

⁴⁵ Inchen tru maig maramigwan martrai Moisés pørigwan kusrennøbiibe trencha løtabig køn:

—Kusrennøbig, ñi øyeeg chippe, namungucha tøga wamøtan— cha.

⁴⁶ Inchen Jesúsbe trencha løtabig køn:

—¡Ay, ñim waachamera, tru maig maramigwan martrai Moisés pørigwan kusrennøbelø chigucha! Ñimbe katøganelane niga ambamga kwatsiguelø neguanendø, ñimbe ñimðweinguen ni kan tasig-unøtøgaguen kuñab kebachig kømui indan cha.

⁴⁷ ¡Ay, ñim waachamera! Tius maig karuigwan eshkabelan ñimui merrabsrø misaameratøwei kweecha, søriilø købelan ñimbe tamara pønsrøbelø køn cha. ⁴⁸ Treeg mariitøga ñimbe ñimui merrabsreelø treeg marigwane lata kandø isubelø kui kenamaran cha. Kaguende nømuimburappe kweechen, ñimuimburappe tru sørin trabmeran tamaran cha.

⁴⁹ Inchawei Tius nø kusremburab kusrebig kuigu, trendaig køn: “Na maig karuigwan eshkabelanba, katø naashib karua øriilanba nabe øren, truilan kan utuelane kweechen, kanelane kaig martrun” cha. ⁵⁰ Inchawei pirøwan marøb uraskurri Tius maig karuigwan eshkabelan mayeelan kweetsiilai ani lusigwan Tiusbe møin kwaløm misaameran ulø payrrun cha, ⁵¹ tru Abelwan kweecha ani lusigwangurrimbunø, tru Zacarías altarba, santuarioba pønrrabnug, tru tøbøtag pasrøben kweetsig, tru Zacaríaswei ani lusigwangatig. Inchawei nabe ñimun trendamønrrun chibig køn: Tru misaameran kweetsiilan Tiusbe møi ya misagwan ulø payrrun cha.

⁵² ¡Ay, ñim waachamera, tru maig maramigwan martrai Moisés pørigwan kusrennøbelø Kagen tru nebua ashib kusreb kømig kan llavi lataig tøgagúigwan ñim kerrawa tøgagua, ñimðweinguen kebamøwei, ni kebambug kui inchibelan chigucha kebambashmøwei indan— chibig køn.

⁵³ Jesús truyugurri webibene, tru Moisés pørigwan kusrenanøbeløba, fariseosmeraba Jesúswan truba nama, ke chine payib mendabelø køn, ⁵⁴ kebenørkøg køptø, nø chi kusrua løtbene, chigøben tamig tøgagønrrab.

12

Jesús palatø tabelø kømønrrai kusrenanøb (Mt 10.26-27)

¹ Trune misaabe truba truba nørø tulundzuna, nu køptø ke nømdø melambub itøbuniyaben, Jesúsbe nui kusrenanøb pera unillan nømunmerrig trenchib pølbaserøbig køn:

—Au, fariseosmerai levaduran ashiptø kuy cha, tru palatøbe truba tab indigwan.

² Pøs chitøgucha søra pasriibe søriitø kørrømisrmø, ashchai kenamarig køben, katø wammørmønrrai søra tøgagúibe wammøriimibe kørrømisrtraamøn cha. ³ Inchawei ñim løstøyu wamindigwane tøryu wammørbøguen inchen, ñim yaskabwan kasra nilø wamindigwane yabalasrøngurri trasaig kønrrun cha.

Jesús møigwan kørig tøgagømigwan waminchib (Mt 10.28-31)

⁴ Na ñim nai linchibelane trenchar: Asrwandø kweechibelane kørig kui inchimøtay cha. Kagen asrwane kweechendø, mas trømbøibe chi martrab kaiman cha. ⁵ Inchendø nabe ñim møigwan kørig tøgagømigwan eshkarrumøn cha. Kweecha, mu manchinrainga tru møra melamnug kegutchabig, truigwane kørig tøgaguy cha. Nabe katøle trendamønrrun: Trunune si, kørig tøgaguy cha.

⁶ ¿Tratrøgatø illinzheelan pa centavozhigweindø yanøbelø kømuitarru? chibig køn. Inchendø Tiusbe treelanguen pesannamø, ashibig køn cha. ⁷ Pøs ñimuimburappe ñimui turyu

pusruumeranguen kan kan mundziizheelø køn cha. Inchawei chi kørig kui inchimøtay chibig køn. Truba yam illimera lataitøguen kømø, ñimbe mas purø nuweyelø køn cha.

Misaamerai malau 'Jesucriston ashmüg kur' chib pønrrømeelø
(Mt 10.32-33; 12.32; 10.19-20)

⁸ 'Katø nabe ñimun trendamønrrun: Møikkøben misaamerai merrab 'Jesúsweingatiig kur' chibigwane na, tru Møg Misra Arrubikkucha Tiuswei ángelesmerai merrab treetøwei truigwane 'ningatiig kur' cha, nabe trendamønrrun cha. ⁹ Inchen misaamerai malau 'Jesúsweingatiig kømur' chibigwane Tiuswei ángelesmerai merrab nabe nungucha 'ningatiig kømur' tamønrrun cha.

¹⁰ 'Møikkøben na, Møg Misra Arrubigwan chigøben kaig waminchibigwane Tiusbe uløwan paymønrrab pesannanrrun. Trune møikkøben Espiritu Santon purø trømbøig waminchibigwaneguende pesannamø, ulø payrrun cha.

¹¹ 'Ñimun payrrab judiosmera tulundzuni yamerayumay, kabe juezmeraimay, kabe karubelaimay srua ambene, mandø cha løtamermab, mucha løtamermab, chi tamermab chi isumøtay chibig køn. ¹² Kaguende yandø wamindamig puben, Espiritu Santobe maig tamigwan ñimun kusrenanrrun— cha.

Kan pua møg chugúi mørmüg lataigwan kemesra wamindig

¹³ Kan møikkøsrøn misag utu Jesúswan trenchibig køn:
—Kusrennøbig, nai nunewan naimburabig kønrrabigwan pirisha, nan tranø chirra— cha. Inchen Jesúsbe trenchibig køn: ¹⁴ —Au, kasuku, ¿nan kan juez lataig, kabe kan pirø pirishibig lataig kønrraimbe nane mu pasrah?— cha.

¹⁵ Incha katø trenchibig køn:
—Parø indamigwane treenchimønrrab ashiptø kuy cha. Kaguende kan møg øsig kømibe chi nørø tøgagúinug pasrømiig køn— cha.

¹⁶ Incha katø 'øyeeg lataitøwein køn' cha, kemesra waminchib trenchibig køn:
—Kan truba pua mowan nui pirømerayu truba truba ellmarig misren, ¹⁷ tru puaiibe nuinetø isub mendabe trendan cha: "¿Chindamer? cha. Nai ellmarig tulisailan yandø chu esegamig chigagur" cha. ¹⁸ Inchabe treeg isubig køn cha: "Møimbe si chi maram kui ashar cha. Nai mamig keerøb esegailan picha, mas nørreelø mara, truyu nai ellmarig tulisailanba, chi tøgagúilanba kerrigu esegamønrrun cha. ¹⁹ Incha nabe naasiitøwei trendamønrrun tan cha: 'Møimbe si, chigøben truba nørø esegailø yam pilawei pønsra war cha. Møimbe israb, mab, muchib kasraarau' tamønrrun" cha. ²⁰ Inchene Tiusbe trendan: "Chugúinguen mørmø møg, mõi yemdøwei ñui møsigwan miaben, kwamig nebuben, ñi esegawa tøgagúibe, ¿muin kørrømisrtrerah?" cha.

²¹ 'Kan møøbe nuyasiitø chine palømo, tun pønsraindøgucha, Tiusweimburabigwan chiguchaga waachawane øyeeg purainrrun— chibig køn. Jesúsbe.

Tiusbe nui uregwane chi palabigwan tranøbig køn
(Mt 6.25-34)

²² Incha Jesúsbe nui kusrenanøb pera uniilan trenchibig køn:
—Ñimune trendamønrrun cha: Øsig amønamiig, ñim mamigwanba, asru chi kemermab isumigwanba menrra isumøtay cha. ²³ Pøs øsig amønamiikkan kan mamig lataitø kuitarru cha. Kabe asrkan kan asru keelø lataitø kuitarru cha. ²⁴ Pøñiimeranma asay cha, chi ellguamøwei, ellmarig tulishimøwei, mamig esegamig chi kawei, mamig nørø keera tun pønsra esegamig chi kaweyelanguen Tiusbe manrrai mannøbig køn cha. Ñimbe illimera lataguen kømø, maseløguen køn cha. ²⁵ ¿Ñim møiløgøben, maya maya incha, katøgan tøbø metrotøguen nurabsruguh? cha. ²⁶ Ñim yandøzhigwanguen martrab kaimabeløbe, ¿katøgan peg maramelane chinchabrre isugue? cha.

²⁷ 'Umeranma asay chibig køn, kwallmøwei, kumøwei inchibelø købendø, tabig nørøran cha. Inchendø nabe ñimune trendamønrrun: Rey Salomónguen nui chine purø tabzhig tøgagua, umerø lata tabzhiibe kemuig køn cha. ²⁸ Wambig kaumera, mõi ka pønrrøwa, srønabe nagu parrig kønrrabigwanguen Tiusbe øyeeg tabzhig kenanøb lataig marøbiibe, ñimune treetøguen kømøtø, masken marmønrraitarru cha, ñim isubigwan Tiusweinug pasra tøgagúingwan ke kagømønrraindøzhig tøgawan. ²⁹ Inchawei chindamerab isuptø menrra isui inchib lamøtay chibig køn, chi mamerab, chi mutsamermab. ³⁰ Kaguende yu pirau misaamerabe mutøgucha iilan isua labelø køn cha. Trune ñimui Møskaimbe ñimui chi palabelan ashaguen wabig køn cha. ³¹ Treeg kømøtø, ñimbe Tius nø ashib karub wainuguigwan isua lay chibig køn. Trumaybe tru katøgan chi palabelangucha ñimbe nemarig utønrrun cha.

*Srømbalasrø chigurrimbunø pønrrabelø
(Mt 6.19-21)*

³² 'Nai mamdø ubishazheelø, chi kørig kui inchimøtay. Kaguende ñimui Møskaimbe nui karub wainuguigwan tranamig tab kui indin køn. ³³ Chi tøgagúilán yana, chigarwan tranay, treeg marabeguende, an pusrig urasrmerá, pinønrrabig kømeeelø tøgagønrrabguen, chi tøgagúilø managuen pinønrrabgailan srømbalasrø eseganrrab. Truyube niliig kebinrrab kaimabwei, ni pullilla parmøwei inchibnug. ³⁴ Kaguende ñimui chi tøgagúilø chu esegaig pønrrøbene, ñimui manrrøgucha ke truyutø isub pasrønrrun cha.

Tamara muniitø kømig køn

³⁵ 'Ñimbe kewa, tamara, pørønawa, martrab ke muniitø kuy; katø ñimui aceite usri lámparamerangucha piløga kuy; ³⁶ ñimbe kan mendig melabelø latailø kønrrigay ya puaiḡ novios yaugurri attrab køben muniirabelø latawei. Incha pua, nø yaskabwan pinrrøgøbene, kurtrab muniitø melabelø latailø kømig køn. ³⁷ Mayanguen tab kuilø køn tru karuindiḡ melabelø ya puaiḡ nømun kib køben kømø, kasrig purrabuyuh puinabeløbe. Nabe ñimun cierton trendamønrrun: Ya puaiḡ nøashib tamara pørønawa, mishatsigu nømun purramisingarua, mamigwan nøashib pirishinrrun cha. ³⁸ Yem tøbøtag pui lata, løtsø pui lata nømun kib kømø, kasrig purrøben puinabeløbe mayanguen tab kuilø kønrrun cha. ³⁹ Kan ya puaima niliig chu uras attrab kui mörimbe, yau nilønrrab kebibashmubsruinrrun cha. ⁴⁰ Ñimigucha tamara melay chibig køn. Kaguende tru Møḡ Misra Arrubiibe chi isumø købenba arruptinchun— cha.

Mendig megabig maig taigwan marøbigwanba, maig taigwan marmüigwanba kemesra wamindiḡ

(Mt 24.45-51)

⁴¹ Inchene Pedrobe trencha payibig køn:

—Señor, ¿iḡ 'øyeeg lataitøwein køn' cha, kemesra wamindiḡwangan namuyasiitø waminchitirru? cha, kabe ¿mayeelain kuitarru?— cha.

⁴² Inchen Señorbe trenchibig køn:

—Kan karuindiḡ megabig maig taigwan møra marøb, katø chi maramelan nøtø tsabø asha marøbigwan, ya puaiḡ nui yau warabelan mannam ura puin kuindø nømui mamigwan srøttrab muniitø wabig kønrrai ashai wanninabiibe ¿møig kerah? cha. ⁴³ Truiḡbe mayanguen tab kuig køn cha, nun karua pasrigwan marøb megabenh ya puaiḡ puptindinabigweimbe. ⁴⁴ Pøs nabe ñimun cierton trendamønrrun: Ya puaiḡbe nui chi tøgagúigwan kerrigu nø asha marøb pasrønrrai tranrrun cha. ⁴⁵ Inchen tru karuindiḡ megabig nuiḡnetø ya puaiḡbe pegen arrumønrraitamab isua, katøgan karuindiḡ melabelan møguelan lata, ishumburmeran lata kurrabetab menda, katø mab, muchib, mutsiirab tsubenba, ⁴⁶ nui ya puaiḡbe ni attraitamab isuinguen kømø kwaløm, ni ø uras punrraitamab isumø tsubenba, puptincha, purø trømbøig ichagucha, maig taigwan marmeelø pønrrainug kertrun cha.

⁴⁷ 'Inchen tru karuindiḡ megabig nun karua pasrøbig ya puaiḡ maig maramig palai indi ashibig købendø, tamarmøwei maig chiben mormøwei inchibigwane truba yam ichagutsig kønrrun cha. ⁴⁸ Inchen tru karuindiḡ megabig nun karua pasrøbig ya puaiḡ maig maramig palai indi mormøwa, kørrø ichagutsamdiḡ marøbigwane trengatig yam ichagutsig kømønrrun cha. Inchen møigwan køben maramigwan mas nu tranøppe, treetøwei nu ulø payrrun cha. Inchen møigwan køben mas purø nørø maramig traninabigwane, trunune masken nu ulø payrrun chibig køn.

*Jesúskurri misaamera ke nøørøtø misrøb
(Mt 10.34-36)*

⁴⁹ 'Nabe yu pirau nag lataig kegutchab arrig køn. ¡Nabe yambe manawei pilabguen pasrømønrrammab truba isur! ⁵⁰ Nane purø trømbøig pinøbuløb arrubigu pureb yamig nebunrrautan. ¡Nane purø isutan treeg nebunnegatiibe! ⁵¹ ¿Ñim isubgan nabe piraumay arruppe, ambumay imay tab købigwan srua arritamab isugueh? Nabe treeg kømøtø, nøørøtø, nøørøtø inchib kønrrai arrur cha trendamønrrun. ⁵² Kagen møingurrimbunøbe kan yau tratrøgatø purramnuube nøørøtø inchib kønrrun cha, pønøbe pailan namig kurra tarømisren, pailøbe pønelan namig kurra tarømisrrun cha. ⁵³ Møskaimbe nusrkawan namig kurrøben, nusrkaingurrimbe møskawan namig kurrøben, usrimbe nimbasrwan namig kurrøben, nimbaskurrimbe usran namig kurrøben, sueeragurrimbe yernan, katø yernagurrimbe sueeran namig kurrønrrun— cha, trenchibig køn.

*Maig pub attrabigwan wamindiḡ
(Mt 16.1-4; Mc 8.11-13)*

⁵⁴ Incha katø Jesúsbe misagwan trenchibig køn:

—Wañimera pørr kebibsør kurrab arrubene, ñimbe trenchibelø køn cha: “Sre punrrun” cha. Inchen pubwei inchibig køn cha. ⁵⁵ Inchen isig ambø umbusrøngurri webarrubene: “Pachig kønrrun” chiben, treegwein købig køn cha. ⁵⁶ ¡Palatø tabelø! Pala wañi maig pasrai asha, pirau maig kui asha ñim øyeeg kønrrun chib, øyeeg kønrrun chib waminchibelø købendø, ¿møin kwaløm chi pureb arrubigwane, trube, øyeeg kønrrun chinrrab wetøgørrørrrab kaimabeløbe mailø kogue? cha.

Ñui ashig kømui inchiibiiba ambumay imay lata tab kønrrai mar
(Mt 5.25-26)

⁵⁷ ¿Sølgandø tabig maig kønrrabigwan ñimasiyaitøwei chindimba asha tamarmøgue? ⁵⁸ Ñun maig maramigwan asha marig kønrrai tru kejabiiba, tru maig maramigwan asha marøbigweinuumay ambub pønrrapatø, mallatø trunun mayutø nõba tamara kørørrmisrtrab inchi. Inchippa ñun juezweimay srua amben, juezbe policíameran trana øren, truiløbe ñun merrarrawa kailan keeri yau keera pasrmønrraimbe. ⁵⁹ Pøs nabe ñimun trendamønrrun: Truyugurri webinrrappe, maya ulø misrigwan ke chishtø pagawatøwei webinrrabguen — cha.

13

Kaig marmønrrab isua mørtrai wamiilø

¹ Inchen tru urastøwei mõiløgøsrøn truyu pønrrøwabe Jesúswan trenchibelø køn:
¹—Pilato be mõ mõguelan kørørrøn galileasreelan kweecha, truilai aniwane tru nõm Tiuswan tranamig animal kweetsiilai animba lindsain køn— cha.

² Inchen Jesúsbe trenchibig køn:

—¿Ñim isuppe, Galilea mõguelø treeg nebuinabeløbe, tru nõmui pirau katøganelø lataguen kømø, purab kailø kuimbarre treeg nebuitamab isugueh? cha. ³ Nabe ñimune treeg kømøn tamønrrun. Ñimdøweinguen ñimui kaig mariilan isua møra, Tiusweimay lllramuisruandøbe, ñimgucha mayeeløba truilø lataitøwei kwanrrabguen cha. ⁴ ¿Kabe ñim isubgan Siloésrø tru purøbala ya itøguebeñen kwabelø tru dieciochoeløgan Jerusalénsrø maya misag warabelan purab kailø kuitamatirru? chibig køn. ⁵ Nabe ñimune chi treeg kømøn tamønrrun. Ñimdøweinguen ñimui kaig mariilan isua møra, Tiusweimay lllramuisruandøbe, truilø lataitøwei ñimgucha mayeeløba kwanrrabguen— cha.

Higuera tusr mamig niimígwan kemesra wamindig

⁶ Incha Jesús katø ‘øyeeg lataitøwein køn’ chib, iigwan kemesra waminchibig køn:
—Kan mõg nui pirau kan higuera tusr ellguawa, tøgagua, higos niguitashchab ashchab ya, chigucha wetørramiig lataig køn cha. ⁷ Inchabe tru pirø ashib mõwane trendan cha: “Au, na pøn pilawan mamig lanrrab i tusryu arrua, managuen wetørramur cha. ¡Lutiichi! tan cha. ¿Tusrwan pirøyu ke ka yandøbe chinchib pasrøbashchab?” tan cha. ⁸ Inchen tru pirø ashibiibe trenchibig køn cha: “Au, nai ashib karubig, mõim pilatøbe ka pasrøbashchab cha. Na pirøwan alaraanøb, animal pøy pusrtrab cha. ⁹ Inchippa, treenchene mamig misrøbgun cha. Inchendø katøgucha misrumbene, trube, lutitchig” tan cha, trendan— chibig køn.

Kan ishug kesruig kurrashchab kaimabigwan isrin kwaløm Jesús tamarøb

¹⁰ Kan isrin kwaløm Jesús judiosmera tulundzuni yau kusrenanøb pasrøbene, ¹¹ truyube kan ishug dieciocho años ørøba kwanrrø uñibig wabig køn, kwaimandzig utsomay kesrungaruig, ni chinchagucha kurrashchab kaimabig. ¹² Inchen Jesúsbe nun asha, wamabe trenchibig køn:

—Au, ishug, yandø ñibe kwanrrø kømø, tabig kørørrmisran— cha.

¹³ Incha nui tasigwan tru ishuweim pala estsarene, ishuube mõi mõi ølmisrøb, kurraashibig køn. Incha Tiuswan truba tabig waminchib mendabig køn. ¹⁴ Inchen tru tulundzuni yau ashib karubiibe, Jesús isrin kwaløm treeg tamarikkurri truba nama, misaamerane trenchibig køn:

—Chigøben maramigwan maram kwalømmerabe seis días køn cha. Ñimui kwanrrømeran tamariiilø kønrrappe, tru kwalømmerawan tamartrai amrumbala cha, isrin kwaløm kømøtø.—

¹⁵ Inchen Señorbe kusrub trenchibig køn:

—¡Palatø tabelø! ¿Ñimma mõikkøben ñimui weywan, kabe ñimui burron isrin kwaløm pi mutsøsrønrrab sruamrrab pichimeelø køtirru? cha. ¹⁶ I ishug Abrahamwei misagwan Satanás kwanrrøtøga dieciocho años ørøba lusra lataig tøgagüigwan, ¿Kabe isrin kwaløm køn chiptø i kwanrriigwane øyeeg iløsrkaig megaigugurri elatsamig kømø, chindah?— cha.

¹⁷ Jesús nõ øyeelan waminchene, nui ashig kømui inchibeløbe søteeløba kørriimisra kørørrmisren, trune katøganeløbe Jesús tabig mana asiimíg mari ashabe, truba kasraarabelø køn.

Iibe murtasa yell lataig kòn cha, kemesra wamindig

(Mt 13.31-32; Mc 4.30-32)

¹⁸ Incha katø Jesúsbe trenchibig kòn:

—¿Tius nõ ashib karub pasraibe chi lataig asønan chinrrab køh? cha. Kabe ¿møig lataig kòn chinrrab køh? cha. ¹⁹ Pøs kan murtasa yellwan kan møg nui trau tsurøb lataig kòn cha, nurawa, kan tusr-unøburabig misren, pala amøñibelø illimeraguen tru srarmerayu le maran— cha.

Iibe levadura lataig kòn cha, kemesra wamindig

(Mt 13.33)

²⁰ Katø Jesúsbe trenchibig kòn:

—¿Tius nõ ashib karub pasraigwane chi lataig kòn chinrrab køh? cha. ²¹ Pøs levadura lataig kòn cha. Kan ishug pa arruba harina sømara, levaduran pusren, maya sømarigwan trunun ørøba pulingarub lataig.—

Trag yaskab

(Mt 7.13-14, 21-23)

²² Pueblomerasømba, yamera tsitsø pønrrabsømba Jesúsbe kusrenanøb Jerusalénsrømay pureb ibig kòn. ²³ Inchen møikkøsrøn trencha payibig kòn:

—¿Señor, kaigyugurri wesrainanrrabeløgan mamdeelø kønrrab kuitarru?— cha.

²⁴ Inchene nõbe trenchibig kòn:

—Trag yaskabwan kebambamigwan ñimbe kebamrrab tranrray cha. Kaguende nabe ñimun trendamønrrun: Mayamba kebamrrab inchendø, kaimanrrun cha. ²⁵ Ya puag kurra, yaskabwan kasrøbene, ñim wambig kørrømisrøbeløbe yaskabwan pinrøgøb trenchinrrun cha: “Señor yaskabwan kurra” cha. Inchen nõbe ñimune trencha lètønrrun cha: “Nabe ñimune chuelø kui ashmíg kur” cha. ²⁶ Inchen ñimbe trenchinrrun cha: “Nambe ñiba mab, muchib inchen, katø ñibe namui callesmerayu kusrenanøb indig kømøh” cha. ²⁷ Inchene nõbe ñimune trencha lètønrrun: “Nabe ñimune chuelø kui ashmur cha. Kaig marøbeløbe mayeeløba nainukkurrime tarømisray” cha. ²⁸ Inchen ñimbe tuyube kishib, trugulmeran tsatsamig kønrrun cha, Abrahamwan, Isaacwan, Jacobwan, katø mayeelø Tius maig karuigwan eshkabelan, Tius nõ ashib karub waisrø nõm trusrø purrøben ñim asha, ñimbe wambig webetiilø kua. ²⁹ Kaguen pørr kal-labgatøsrøngurrielø køben, pørr kebibgatøsrøngurrielø køben, ambøgurrielø køben, igurrielø køben, yu pirau chugurrieløtøgucha amrrunrrun, Tius nõ ashib karub wainug purramisra manrrab. ³⁰ Inchen mõiløgøben mõi ya yu pirau srabe melabeløbe srømbalarømba nõmmerrig pønrrønrrun. Inchen mõi ya yu pirau nõmmerrig pønrrabeløbe srømbalarømba srabe melønrrun— chibig kòn Jesúsbe.

Jesús Jerusalénwan isua kishib

(Mt 23.37-39)

³¹ Inchen tru kwalømdøwei mõ fariseosmera køsrøn puabe, Jesúswan trenchibelø kòn:

—Ñiguen yugurri webya, inrrø cha. Kaguende Herodesbe ñune kweechig kuin kòn— cha.

³² Inchen Jesúsbe trencha lètabig kòn:

—Ø zorra lataigwan trenchinrrab ambay cha: “Au, mõimba, srønaba nabe kwaimandzi-imeran webetab, kwanrreelan tamarøb, trumarbe nai maramigwan patsøgamønrrun” tan chinrrab. ³³ Inchendø nabe mõimba, srønaba, trumarba nai maywan ib yamig kòn cha. Kaguen Tius maig karuigwan kan eshkabiibe nõørsøron kømø, Jerusalénsrø kwamig neburunrrun chibig kòn.

³⁴ ¡Jerusalén! ¡Jerusalén! ¡Tius maig karuigwan eshkabelan kweechib, katø ñimuyasig Tius karua øriilan sruutøga petabig! ¡Nabe yamba, kan piejetø kømø, kan atøwall nui pullichu-uregwan kwaldzarig umbu kanbalatø mara, maatanab lataitøwei ñui uregwan tulundzunønrrab inchen, ñibe nane kaasig kòn! cha. ³⁵ Au, ñim waraig yamerabe elatsig kørrømisrtrun cha. Inchawei nabe trendamønrrun chibig kòn: Nane mas ashchaamøn cha, øyah tamnegatig: “¡Señorwei munchiyu nõ ørig arrubiibe mayanguen tab kuig kòn!”— cha.

14

Kan møg parab kwanrrø tøgagigwan Jesús tamarøb

¹ Kan isrin kwaløm Jesúsbe kan fariseo chi maramigwan nõ ashibigwei yausrø manrrab kebya wabene, kaneløbe ke chindashchab ashibelø kòn. ² Inchene tuyube kan møg Jesúswei merrab parab kwanrrø tøgagig wabene, ³ Jesúsbe tru maig maramigwan martraí Moisés pørigwan kusrenanøbelanba, fariseosmeranba trencha payibig kòn:

—¿Isrin kwaløm kan kwanrriigwan tamarmønrrai merig kø, chindah, kabe merømuig kø, chindah?— cha.

⁴ Inchen nømbe chigucha lõtømeelø køn. Inchene nõbe kwanrriigwan srua arrua, tamarabe, yandø inrrai 'ungwa' chibig køn. ⁵ Incha nømune trenchibig køn:

—¿Ñimma mõikkøben, ñui nusrkain kui, kabe ñui wey kui pisuyu kebeñenna, isrin kwaløm kuingucha, tru urastø wesramønrraitirru?— cha.

⁶ Inchen nømbe øyeelan chigucha lõtønrrab kaimabelø køn.

Novios yaumay linchab amrrunrrai eshkailø

⁷ Linchab amrrunrrai eshkaig misaamera mishatsigu mas tab purramdønug, tab purramdønug laben, Jesúsbe treeg indi ashabe, øyeg kømig køn chib eshkaib waminchibig køn:

⁸ —Mõikkøben ñun kan novios yaumay linchab attrai eshkaibene, mas tab wamdønug merrarramøta cha. Inchippa ñi latagen kømø, mas nuigwan linchab attrai eshkaib kua, truig puben, ⁹ tru ñunba, truigwanba linchai eshkaibiie arruppa: “Ñi waigwan ønun tranø” chibene, ñibe køriimisra wendausrø wanrrab purainrrabguen cha. ¹⁰ Treeg inchimøtø, masken ñun lincha cha eshkaibene, wendausrø wamisr cha, tru ñun lincha chibig arrua: “Ñi, kasukube, yu merrabsrø wanrrab puraamø” cha, ñun trenchinrrai. Inchen ñibe tru mishatsigu ñiba purrabelai merrab truba tab indig kønrrabguen cha. ¹¹ Kaguen mõikkøben nõasiitø 'nuig kurnab' isubigwane, ka kørig martrun cha. Inchen nõasiitø 'nuig kurnab' isumígwane 'i mõøbe si, nuig køn' taig kønrrun— chibig køn.

¹² Incha katø Jesúsbe tru lincha cha eshkaib møwangucha trenchibig køn:

—Ñi kan mamig srørrøppe, ñui asiilandø kømøwei, ñui nunelandø kømøwei, ñui misagwandø kømøwei, ñui ya pulu puarmerandø kømøwei wama srøsr cha. Kaguen truiløbe ñungucha treetøwei linchai wama, nømgurringucha treetøwei marene, truburø ñibe utamigwan uta kørrømisrtrun cha. ¹³ Treeg kømøtø, ñi kan fiesta marøppe, waachameran køben, kønønrrab kaimabelan køben, cojosmeran køben, kabgarmeran køben linchab amrrunrrai eshkaibe, ¹⁴ ñibe mayanguen tab indig kønrrabguen cha. Kaguende truiløbe ñune katøburø treetøwei marmuindøgucha, sølgandø tabigwan marøbelø katø øsiirab kwalømbe, tru ututø ñungucha Señorbe truburø tranamigwan tøgatø tranig kønrrun— chibig køn.

Iibe mamig truba nu tamara kuigwan kemesra wamindig

(Mt 22.1-10)

¹⁵ Inchen iigwan mørabe, tru kan mishatsigu wabiie Jesúsban trenchibig køn:

—Tius nõ ashib karub waisrø mamigwan mabiie mayanguen tab kuig kønrrun— cha.

¹⁶ Inchen Jesúsbe nun trenchibig køn:

—Kan møg truba nõrrø mamimera mannamig tamara, misaamera truba nu linchab amrrunrrai eshkaiba, ¹⁷ yandø mam urasbe nui karuindiig megabigwane tru lincha tailan trenchinrrab ørøbig køn cha: “Yandø ke chab pønsrainguen pønrran cha, amrruy” chinrrai. ¹⁸ Inchene mõitøgucha ke chine kemesrøb mendabelø køn cha. Srøtiibe: “Kanbalø pirø ke mõindø chab pena, trunun ashchab inrrab war tan cha. Treekkurri kaimamønrrun tan chirrurrig cha”, trendan cha. ¹⁹ Inchen kane: “Weymera diez arabelø pena, maig marøbelø køtashchab ashchab inrrab war tan cha. Treekkurri attrab kaimamønrrun tan chirrurrig” tan cha. ²⁰ Inchen katøgane: “Ke srø kasharawa kua, trugurri attrab kaimamønrrun tan, chirrurrig” tan cha.

²¹ Inchen karuindiig megabiie ya, tru nun karub pera wabig ya puagwan kerrigu eshkaiben, nõbe namappe, karuig megabigwane trenchibig køn cha: “Malla inrrø cha, ciudayu calleswanba, maywanba ya, waachameran køben, kønønrrab kaimabelan køben, cojosmeran køben, kabgarwan køben yu pera attrig” cha. ²² Inchen mas yanasrø tru karuindiig megabiie trenchibig køn cha: “Ñi nan karub pera wabig, ñi maig karuigwan marenen, katøgucha aldø pasran” cha. ²³ Inchen nõbe tru karuindiig megabigwane: “Ciudayu wambiisrø nõrrø maymerawan køben, shush maywan køben ya, nai ya netsanrrai katøganelan amrrumø kømø, ke amrrumne wamønrrig cha, trendan cha. ²⁴ Kaguende nabe trendamønrrun: Tru srøsrøelø na lincha cha wamiiløbe mõikkucha nai mamigwane maig mamig kuinguen mørtraamøn” cha trendan— chibig køn Jesúsbe.

Jesúswei mendig yamibe murig køn

(Mt 10.37-38)

²⁵ Misag truba nõrrø Jesúswei mendig amben, nõbe keesha ashabe trenchibig køn:

²⁶ —Mõikkøben naimay arrua, nui mõskawan, nui usran, nui srawan, nui uregwan, nui nunelan, nui nuchalan lataitøguen kømø, nan mas undaarab, katø nui øsig kømigwan lataitøguen kømø, nan mas isub undaaramíbe nai mendig uñibig kønrraamøn cha. ²⁷ Inchen katø mõikkøben nui kuruswan nõ muta arrumigwan muta, nai mendig arrumíbe, nai mendig uñibig kønrraamøn chibig køn. ²⁸ Ñimma mõikkøben, kan truba pala ya martrab inchabe, ¿patsøgamdiig køtashchab anwanmerrig ashchab wamisrmønrraitirru? cha.

²⁹ Treenchimotø, pøtøburab pølsrugwandø pølbasra, patsøgønrrab kaimabene, mayeelø ashibeløbe ñune indzatø ashib trenchinrrun cha: ³⁰ “Ø møøbe yawan martrab pølbasra, patsøgønrrab kaiman” cha. ³¹ Kabe kan reyma katøgan reyba kwayanrrab webinrraptø, ÷suldaumera diez mil nø tøgagúitøgaba, katø tru nøba kwayanrrabig suldaumera veinte mil pera arrubiiba, ka kwayamdiig køtashchab trununmerriig isunrrab wamismønrraitarru? cha. ³² Pøs kaimappe, tru katøgan rey yabsrø srø pasrøbenbatø, kwayamø, tammay kørømisrkun chinrrai karuilø ørtrun cha. ³³ Inchawei ñim møikkøben chi tøgagúigwan kerrigu elachimíbe, nai mendig uñibig kønrraamøn chibig køn.

Tre yandø larrmíig misrøb
(Mt 5.13; Mc 9.50)

³⁴ “Trebe tabig køn. Inchendø yandø tru trebe larrmíig misrabe, ÷katøbe chinchá kui larrøbig misriasamø? ³⁵ Pirø tamisrrai pirøyu wíitamdiig kømøwei, animal pøywan abono marigu pusramdiig kømøwein køben, yandø petig kønrrun cha. ¡Møramig kalu pønraibe mør!— chibig køn.

15

‘Tibe ubisha trubabig lataitøwein køn’ cha, kemesra wamindig
(Mt 18.10-14)

¹ Romasreelayasig an utabeløba, kaig marøbeløba Jesúswan mørtrab mayeelø kemallen, ² fariseosmeraba, tru Moisés pørigwan kusrenanøbeløbabe yeeg marøbig køn chib, trenchibelø køn:

—I møøbe kaig marøbelan wamab, truiløba mab inchibig køn— chib.

³ Inchen Jesúsbe ‘øyeeg lataitøwein køn’ cha, kemesra waminchibig køn:

⁴ —¿Ñimma møikkøben ubishamera cien tøgagua, truilø kan palab misrene, noventa y nueven wambig nøørsø nømdø warønrrai warøbashiappa, wetørramnegatig tru ubisha trubabigwan lanrrab imønrraitirru? cha. ⁵ Incha wetørrappe, kasrag købiitø, ñui kildunyu muta, arrua, ⁶ yandø yau puabe, ñui ya puluelanba, ñui trendø asielanba tulundzuna, trenchinrrun cha: “Naba kasraaragun cha. Kaguende nai ubisha trubabigwan wetørrar” cha. ⁷ Inchawei nabe trendamønrrun chibig køn: Srømbalasarøngucha treetøwei kasraaran køn cha, kan kaig marøbig nui kaig mariilan isua møra, Tiusweimay lliabene, tru noventa y nueve sølgandeeø tabelø isua møramig chi palømeelaimburab lataguen kømø.

An trubigwan kemesra waminchib

⁸ “Kabe ÷kan ishuma anzheelø diez tøgagua, truyu kan trubøbene, kan lámpara piløga, yawan paluunchib wetørramnegatig, tab lamønrraitarru? cha, ⁹ Incha wetørrappe, nui trendø asielanba, nui ya puluelanba tulundzuna, trenchinrrun cha: “Kaguen nai an trubigwan wetørrar cha, naba kasraaragun” cha. ¹⁰ Inchawei kan kaig marøbig nui kaig mariilan isua møra, Tiusweimay lliabene, Tiuswei ángelesmerai utugucha treetøwei kasraaranrrun— cha trendamønrrun.

Kan nusrkai chi tøgagúigwan maramgaig marøbigwan kemesra wamindig

¹¹ Jesúsbe katø trenchibig køn:

—Kan møg pagatø nusrkalø tøgagúibe, ¹² wendiibe møskawane trenchibig køn cha: “Nai møskai, nan keta tranig naimburab kønrrabigwan pirishirra” cha. Inchen møskaimbe chi tøgagúilan nømun pirisha, tranen, ¹³ mam kwalømyutø tru wendø nusrkaimbe nuimburabigwan kerrigu tulisha, yabsrø katøgan pirausrømay ya, trusrø chigøben kaig marøbyutø patsø pinishibig køn cha. ¹⁴ Inchen nui anwan yandø chab patsøgøbenba, tru pirausrømbe chutøgucha parøbe truba nuig arruben, nune yandø palabig arrub mendabig køn cha. ¹⁵ Inchen tru pirausrø kan møweinig maramig lanrrab ibene, truike nui kuchimera waraisrø, kuchi ashib meganrrai øøbig køn cha. ¹⁶ Inchen nøbe tru kuchi maig mamimeran øska mainrrabna isuben, nune muguen chi srørrmeelø køn cha. ¹⁷ Inchen nøbe katøle isua møra trenchibig køn cha: “¡Kan nai møskawei yau marøb melabeløbe mamig yeeg nørø uncha tøgagøben, trune nabe yu parøgwab kwamønrrun! cha. ¹⁸ Trembe nai møskawei yamay katø kurrab ya, nune trendamønrrun cha: ‘Nai møskai, Tiusweimburappa, ñuimburappa kalø mara pasrar cha. ¹⁹ Møimbe yandø kan ñui nusrkain kui lataig tøgagømgaiig kur cha, ñui marøb melabelan lataitøwei tøgagørra’ chinrrab tan” cha. ²⁰ Incha møskawei yamay íb mendabig køn cha.

“Inchen møskaimbe yab arrubendø, nebua asha, kan nai unan yeekkucha nebutamab lastima ashabe, katønrrab lula, irab, muchab indan cha. ²¹ Inchen nusrkaimbe møskawane trendan cha: “Nai møskai, Tiusweimburappa, ñuimburappa kalø mara pasrar cha. Møimbe yandø nai nusrkain køn cha wamig kønrrabgaig kur” cha. ²² Inchen nui møskaimbe nui karuig mendig melabelan wama, trendan cha: “Kenanamelan mas tabelan petø wesrua

kenanøb, tasigu surtigas pasrøb, alpargatis keetøsrøb inday cha. ²³ Incha tru ø tsal-lanin toron srua amrrua, kweetsay tan cha. Incha fiesta marøb, mab kasraaragun cha. ²⁴ Kaguen i nai nusrkaimbe kwaig lataig kua, katø øsiirain køn cha, trubig lataig kuigwan katø wetørrar” tan cha. Incha fiesta marøb mendabelø køn cha.

²⁵ Inchen tru mayor nusrkai tru trau uñibiibe arrua, ya pulu pub kuabe, truba may wannrøb, palø ichib, katø pailab kui møabe, ²⁶ truyu kan møigwan køsrøn karuindiig megabigwan wama payibig køn cha: “¿Chinchibrren køh?” cha. ²⁷ Inchen truiibe trenchibig køn cha: “Ñui nuneg puben, ñui mōskaimbe tru tsal-lanin toron kweetsingarun cha, kaguen chigucha kømø, tabig ka øsig puben.” ²⁸ Inchene mayor nuneebe namaptø, kebarrumønrab inchen, mōskaimbe webya, kebatrai truba inchibig køn cha. ²⁹ Inchen nøbe mōskawane trendan cha: “Yamba nabe ñun yeeg yam pila chu uragucha ñi maig karuigwan mōra marøb megaben, trune nane managuen kan cabro-unøtøguen ketømīg køn cha, nai linchibeløba fiesta maramig.” ³⁰ Trune mōimbe ñui nusrkai ñui anwan kaig ishumburmeraba chab patsøga pubene, ñibe tru tsal-lanin toron kweetsin køn” cha.

³¹ Inchene mōskaimbe trendan chibig køn: “Nai nusrkai, ñibe chu uragucha naba waben, na chigurrimbunø chi tøgagüibe ñuiwein køn cha. ³² Trune ñui nuneebe kwaig lataig kua, katø øsiirain køn cha; trubig lataig kuigwan, katø wetørrar cha. Treekkurri mōimbe fiesta marøb, kasraaramibe søl køn” tan— cha, trenchibig køn Jesúsbe.

16

Iibe tru chi købigwan ashib tsunrrai trarrig søl marmīgwan kemesra wamindig køn

¹ Incha katø Jesúsbe ñui kusrenanøb pera unillan trenchibig køn:

—Kan pua møg nui chi købigwan ashib tsunrrai trarrig tøgagøbig køn cha. Indiibe mōiløgøsrøn tru pua mōwan trencha eshkanrrab ambubelø køn cha: “Tru ñui chi købigwan ashib tsunrrai trarriibe ñi chi tøgagüigwan ke ka yandø chine marøb ka patsøgøb tsun” cha. ² Inchen tru pua mōøbe tru ashib tsunrrai trarrigwan wamabe, trenchibig køn: “¿Chigüindørre ñune øyeeg waminchib køh? cha. Trube mōimbe, ñi nai chi købigwan ashib tøgagüigwan nan lutøgurri eshkarra tan cha. Kaguen yandø nai chi købigwan ñibe ashib tsumibe mas kaanrrab køn” cha. ³ Inchen tru ashib tsunrrai trarrinabiibe nuinetø treeg isubig køn cha: “¿Nan øyeegwan martrai tranøbig tru maramelan yandø nan kerrabene, trube, mōimbe chi maramerah? cha. Yandø kwallchabgaig kur cha. ‘Chigøben ketra’ cha, miab unamibe kørig køtan cha. ⁴ Nan yandø ashib tsumønrrai weguchene, mugøben nømui yamerayu nan wamab utønrrai, mōimbe si, nabe chi maram kui asha pasrar” tan cha.

⁵ Inchabe nui ashib karubigwan ulø misrarwan kan kan wama, srøsrīgwane trencha payibig køn cha: “¿Nai ashib karubigwan ñibe maya ulø kugu?” cha. ⁶ Inchen nøbe: “Olivo aceite cien galones ulø kur” chiben, tru chi maramigwan ashib tsubiibe: “Ñui ulø misrig pørin kilgawan cha chiptinchibig køn. Petøzhiitø wamisrøb mōimbe cincuintaindiig kørrøørøb pøroptinchi” tan cha. ⁷ Incha katøganune: “¿Ñibe maya ulø kugu?” chiben, nøbe: “Tirigu cien cargas ulø kur” chiben, tru maramigwan ashib tsubiibe: “Ñui ulø misrig pørin kilgawan utørra chibig køn. Mōimbe ochentaindiig truyu pør” cha. ⁸ Inchen nui ashib karubiibe tru chi købigwan ashib tsunrrai trarrig maig maramigwan marmīgwane ke chi maramdiig køtasha ashib megawa marin kui ashabe, kan trengucha møg isua marøbig kønrrab tan cha. Pøs yu pirauigwandø isum misaamerabe nøm treeløtø misrøppe, purø møg isua marøbelø køn chibig køn, tøyuelai ureemera lata kømøtø.

⁹ Nabe ñimune trendamønrrun cha: Yu tabig kømø pirau ñim an tøgamisriiløtøga misaam- era asiimeelan asiilø mara tøgagønrrab inday cha. Treeg maren, ñimui tru chi tøgagüilø chab patsindøgucha, ñim managatig purramnug srømbalasrømbe nøm ñimun utønrrabelø purrønrrain cha.

¹⁰ Inchen lamøtiigu søl marøbiibe nuwangucha treetøwei søl martrun chibig køn. Inchen lamøtiigu søl marmiibe nuwangucha treetøwei søl marmønrrun cha. ¹¹ Inchawei yu pirau chi købig tabig kømīgwanguen ñim maig maramigwan søl asha marmeelane, ¿mas tru newan tabigwane ashib tøgagønrraimbe ñimune mu trianaasamø? cha. ¹² Ñimuin kømīg pegwanguen ñim chi tab asha marmeelane, ¿mas ke ñimuyasig tøgagønrraimbe mu trianaasamørra? cha.

¹³ Kan karuindiig megabiima muguen pailanbabe tab mara tranrrab kaimanrrun cha. Kaguende kanune tsalø ashippe, kanune undaaranrrun cha. Kanune chiyugucha truba tab mørøb megappe, kanune kaashib webinrrun cha. Inchawei Tiusweimburabigu marøb pasrønrrab isumba, anweimburabigu marøb pasrønrrab isumba inchibiibe martrab kaimanrrun cha, pabaløbabe.—

¹⁴ Inchen fariseosmera anwane ke chinchimmøø inchib undaarabelø iigwan kerrigu mørøb pønrrøwabe, Jesúswan indzatø ashen, ¹⁵ Jesúsbe trenchibig køn:

—Ñimwein kòn cha, misag malaube ñim ñimasiitøwei sòlgandø amõñibelø tabelø misrøb pønrabeløbe. Trune Tiusbe ñimui manrrømerayu chi isuilan asan cha. Kagen møguelø purø tabig asønai indigwane, Tiuswein kabyube ashikken kønrrabgaig trømbøig kòn cha.

Maig maramigwan martrai Moisés pøriiba, Tius nø ashib karub waiba

¹⁶ 'Maig maramigwan martrai Moisés pørigwanba, Tius maig karuigwan eshkabelø kusrenaniilanbabe Juan arrub kwalømgatig møra maramig kòbig kòn cha. Inchen tru uraskurrimbunøbe Tius nø ashib karub waigwan tabig srø wamwan eshka kusrenanen, mayeeløba kebamrrab tranrrabelø kòn cha.

¹⁷ 'Srømbalaba, pirøba pønrrabelø pinamikken chigucha kòmuben, trune tru maig maramigwan martrai Moisés pørigu maya lamøzhig pønrrabikken ka yandøbe, purainrraamøn chibig kòn, Jesúsbe.

Keeba, sraimba petiyamumigwan waminchib

(Mt 19.1-12; Mc 10.1-12)

¹⁸ 'Mu møøtøgucha nui srawan kucha, tarømisra, katøganba kasharabiibe, itølulan cha. Inchen katø tru keg kucha ishuuba kasharabiibe, katø treetøwei itølulan— chibig kòn.

Pua møøba, Lázaroba

¹⁹ Katø Jesúsbe trenchibig kòn:

—Kan truba pua møg kòbig kòn cha, larrø tab yalø pigøzheelø kemba, linotøga mariilø nuweyelø kemba, kwalømmørig purø tab fiestamera maramba inchibig. ²⁰ Inchen katø kan truba waacha møg Lázaro taibe, asru pisrøtø netsaig chu uragucha puagwei yau wambig kerruinug yaskabu wamisra, ²¹ tru waachabe tru puagwei mishatsigugurri kørriitøga øska mainrrabna isuben, trune pisrømerane werameratøø kemalla, nerab kòbelø kòn cha.

²² 'Indiibe kan kwaløm tru waachabe kwaben, purø tabzhiisrø Abrahamba wanrrai ánglesmera pera ambubelø kòn cha. Inchen tru puaiikka kwaben, sòrabelø kòn cha. ²³ Inchen tru puaiibe tru kwabelø amba møra melainug purø trømbøig kui megawa, kurraasha, yabgurri Abrahamwanba, Lázaronba purrai ashabe, ²⁴ trashibig kòn cha: “Abraham, merrabsrø nai møskai, nan lastima asha, Lázaron ørtra chib, nui tasig-unandøguen piyu keguana, nai niløwan sømarrab attrai. Kaguende nabe yu i nag naarabigu mumaygucha kòmui purø trømbøig kui megar” cha. ²⁵ Trendaingucha Abrahambe trenchibig kòn: “Nusrkai, ñiguen isu cha. Ñi pirau øsig tsub urasbe ñibe tabiitø, tabiitø utøben, Lázarobe treetøwei kaitø, kaitø utig kòn cha. Møimbe Lázarobe yube chi isungai tabig wamig utøben, ñibe mumaygucha kòmui purø trømbøig kui megan cha. ²⁶ Treeg køben katøgucha, namuimba, ñimuiimba tøbøtag kan purø trømbø umbu kulli pasran cha. Yugurri ñimuiimay ambug kui inchibelø puramrrab kaimabwei, katø ñimuinukkurri namuimay purørrug kui inchibelø kaimabwei inchai.”

²⁷ 'Inchen tru puaiibe trenchibig kòn: “Treeg købene, trube, Lázaron nai møskawei yamay inrrai ørtra cha. ²⁸ Trusrø nunelø trattrøgatø tøgagur cha, nøm isua kønrrai truilan waminchai, nømgucha yusrø mumaygucha kømig purø trømbøigumay amrrumønrrain” cha. ²⁹ Inchen Abrahambe trenchibig kòn: “Nømbe Tius maig karuigwan eshkabelø pøriilan køben, Moisés pørigwan køben tøgar kòn cha. ¡Truilan mørbash!” cha. ³⁰ Inchen tru pua møøbe trenchibig kòn: “Nai møskai Abraham, kah, treeg kømøtø, møikkøben nømuiimay kwailai utugurri kurra ibenesi, nømbe nømui kaig mariilan isua møra, Tiusweimay lliarrun” cha. ³¹ Inchen Abrahambe trenchibig kòn: “Moiséswanba, Tius maig karuigwan eshkabelanba, truilanma mørmuibe, kwailai utugurri møikkøben katø øsiiraingucha mana kørenrrab kø” tan — cha, Jesúsbe trenchibig kòn.

17

Kalø marigwan ulø paymumigwan eshkabig

(Mt 18.6-7, 21-22; Mc 9.42)

¹ Jesúsbe nui kusrenanøb pera unilan trenchibig kòn:

—Chine chinetø iløsrkøb kegørrøsrkøb attrabigwane arrumønrrai chinchka katamgaig kòn cha. Inchendø jmøg waacha! tru kaigwan nø pera mara kebenøsrkøbigweimbe jkan maig kuaasamørra! cha. ² Trembe kan tirigu kitsig nu srugwan naashigu iløsrka, mar umbusrø kegutsig kuinguen søl købsruinrrun cha, i shushmeran kaig mara kegørrøsrkøbgunriibe.

³ Inchawei ñimøwei ashiptø kuy cha. Ñui nuneg ñun chigøben kaig marene: “Ñi øyeeg marmumbala” cha, alegau, chibig kòn. Inchen nø nui kaig mariilan isua møra, Tiusweimay lliabene, ñibe trunun yandø mas ulø paymønrrab, pesannau cha. ⁴ Mawawan nøbe katøle, katøle siete nebumnegatig ñun kaig mara, tru kaig marimørig ñun: “Øyeeg maramgaigwan marar” chib arrubene, ñibe trunun mas ulø paymønrrab, yandø pesannamig kòn— cha, trenchibig kòn Jesúsbe.

Isubigwan nainuutø pasra tøga pønrraibe maramburab martrun

⁵ Jesús nøashib karua øriiløbe nun trenchibelø køn:

—Namui isubigwan ñuinug mas tøga melaigwan nemartra— cha.

⁶ Inchen Señorbe trencha løtabig køn:

—Ñim kan murtasa yellburaptiitøguen isubigwan nainug pasra tøgar kuimbe, i sicomoro tusrwan: “Yugurri ucha, maryu ellgwawa pasrambu” chibene, tusrbe maig chiben møøbsruinrun cha.

Karuig mendig megabig chi maramelø

⁷ Ñimma møikkøben, kan karuindiig megabig tøgagua arab uña, traugurrin kui, kabe ubisha ashib uña kui pubene: “¿Puraarrua, kabe yusrø manrrab wamistr” chinraitirru? cha. ⁸ Treeg chimøtø: “Nai mamigwanmerrig nena, pala itøgueigwan kewa, pørønawa, na chab mab, chab mutsamenegatig chi palain kuindø purørtrab ashib pasrau cha, treebe chinrun cha. Incha trugurrimbe si, ñigucha mab, muchib inchig” chinrun cha. ⁹ Kabe nui karuindiig megabigwanma nø maig karuigwan maren, ¿truburø ‘ungwa’ chibelø kuitarru? cha. ¹⁰ Ñimgucha treetøwei Tius maig karuigwan kerrigu marabe, trenchinrrigay chibig køn: “Nambe mendig melabelø chiguen trengatig marmeelø ker cha. Kaguende ke maig karuizhigwandø nebua marer”— cha.

Diezelø asr trerab kwanrrø tøgarwan Jesús tamarøb

¹¹ Jesús Jerusalénsrømay ippe, Samaria pirøwanba, Galilea pirøwanba pureb maywan pureb ya, ¹² kan yamera tsitsø pønrrabnug pubene, møguelø diezelø lepra kwanrrø asr ørø trerabig tøgar katønrrab werruppe, werrubendø, yaptø pønrramisra, ¹³ trashibelø køn:

—Jesús, ñi Kusrennøbig, namun lastima ashcha!— chib.

¹⁴ Inchen Jesús ashabe, trenchibig køn:

—Judiosmerai sacerdotesperan eshkanrrab ambay— cha.

Inchen nøm ambul pønrrannetø nømui kwanrrøbe tammisra, chishmisrikken kørømisrøbig køn. ¹⁵ Inchen møikkøsrøn nun chishmisrin kui ashabe, truba mur trashib Tiuswan truba tabig waminchib katø arruabe, ¹⁶ Jesúswei merrab tømønnsra ‘ungwa, ungwa’ chib maløwan piraugatig utsøbasrøbig køn. Tru møøbe judioguen kømøtø, samariasriig købig køn. ¹⁷ Inchene Jesúsbe trenchibig køn:

—¿Kwanrrøwan chishmarilø kørømisrøbeløbe yamba diez kømmergøppeh? cha. ¿Nueveeløbe chu ambah? cha. ¹⁸ ¿Mu katøgan møikken Tiuswan maya nuguen tabig køn chib waminchab arrumuben, i peg pirausrøitø Tiuswan ‘ungwa’ chinrrab arru chindah?— cha.

¹⁹ Incha tru møwane trenchibig køn:

—Kurra, inrrø cha. Kaguende ñui isubigwan nainuutø pasra tøgagüikkurri tabig kørømisran— cha.

Tius Nø ashib karub wainuguibe møi ya pasrabguen indan

(Mt 24.23-28, 36-41)

²⁰ Fariseosmera Jesúswan Tius nø ashib karub wainuguibe chu ura punrrerah cha, payen, Jesúsbe trencha løtabig køn:

—Tius nø ashib karub wainuguig publiibe kaptøga ke asha kønrrai attrabikkucha kømøn cha. ²¹ Kabe: “Yu pasran” chimøwei: “Uyu pasran” chimøwei inchun cha. Kaguen Tius nø ashib karub wainuguibe ñimui umbuguen pasran— cha.

²² Incha nui kusrenanøb pera unilane trenchibig køn:

—Na, Møg Misra Arrubig ñimui utu unin kwalømmera, katø kan kwaløzmzhiitøguen pumønrrabmab, ñim isum kwaløm attrun cha. Inchendø treebe asamig kaanrun chibig køn. ²³ Ñimun: “Yu pasran” tantø: “Uyu pasran” tantø indingucha, ashchab ammøwei, mendig ammøwei inchigay cha. ²⁴ Kaguen kan palaig pilabig kandarø srømbalasarøngurri katøgandarøsrø kebilab lataitøwei, tru Møg Misra Arrubig arrub kwalømbe treeg kønrun chibig køn. ²⁵ Inchen treeg pumøwatøbe, nabe chigøben marinab, kaashib indig kømig nebunrun cha, møi misaamera. ²⁶ Noé tsub kwalømmerawan maig purayaibe tru Møg Misra Arrubigwein kwalømmerawangucha treetøwei purainrun cha. ²⁷ Misaamerabe chi isumø mab, muchib, kasharab, kasharanøb inchib kuig køn cha, Noé nui nu barcoyu kebib kwalømgatig. Inchen sre kwarømiig pub menda, mayeelanba chab pinisaig købig køn cha. ²⁸ Katø Lot tsub uras chigucha treetøweim purayaig køn cha. Misaamerabe chi isumø mab, muchib, penab, yanøb, ellmarøb yamera marøb inchib købenba, ²⁹ Lot Sodoma ciudadayugurri yandø webibene, srømbalasarøngurri naaba, azufreba sre pua, mayeelan patsø pinisaig købig køn cha. ³⁰ Na, Møg Misra Arrubig kenamisrøb kwalømgucha treetøwein kønrun chibig køn.

³¹ Tru kwalømbe ya pala wambig wabiibe, yaambu chigøben tøgaguabe, wesranrrab kørøarrumøta cha. Inchen møikkøben trau uñiibe, yamay arrumøta cha. ³² Lotwei

srawanma ñimguen isuy chibig kòn. ³³ Inchen mòikkòben chigòben kòben kwamònrrab inchibiibe pinab pinamig nebunrrun cha. Trune tru kwawa pinabiibe nui òsig kòmigwan esegawa tøgagònrrun cha.

³⁴ Inchawei nabe trendamònrrun: Tru arrub yembe pailò kan camayutò kib waròben, kane pera yaig kòben, kane kòrròmarig kònrrun cha. ³⁵ Katò ishumburmera pailò kitsòsrugu kichib kòben, kanune srua iben, kane kòrròmarig kònrrun cha. ³⁶ Mòguelò pailò trau waròben, kane pera yaig kòben, kanune kòrròmarig kònrrun— cha, trenchibig kòn.

³⁷ Inchen iigwan mòrabe, nòmbe payibelò kòn:

—¿Señor, øyeebe churre purainrrerah?— cha.

Inchene Jesúsbe trencha lòtabig kòn:

—Kwaig chu tsubene, truyu kallinasumera tulundzunònrrun— cha.

18

Maig kònrrabigwan asha maròb wabigwanba, piudanba maig indigwan waminchibig

¹ Chu urastøgucha Tiusba kwamindamigwane elachib kullaaramò melamig truba palabig kòn chinrrab, Jesúsbe nui kusrenanòb pera uniilan 'øyeeg lataitòwein kòn' cha, kemesra waminchib ² trenchibig kòn:

—Kan puebloyu kan juez wabig kòn cha, truiibe: “Tiuswan kòrmòwei, ni mòguelan naimburab kòmòbашtòrab” isubig. ³ Inchen tru puebloyutòwei kan piudagucha wabig kòn cha. Truiibe tru juezweimay trenchinrrab arruptò arrubig: “Nan kalò maròbigwan maig maramigwan tamara kettra” chib. ⁴ Inchen tru juezbe kan maya yana kòsròngaitò ke mòròg kòmui inchibig kòn cha. Inchabe yandò truiibe treeg isubig kòn cha: “Nabe Tiuswan kòrmòwei, ni mòguelan naimburab kòmòbашtòrab isubig kuagucha, ⁵ i piudabe ke menrra pub lirab, ke pesròlig inchib ke katò katò arrumònrrai, ka tamara tranrrab isur” tan— cha.

⁶ Inchabe Señorbe trenchibig kòn:

—Tru sòlgandò tabigwan marmò juezken, nò øyeeg taigwan mòray cha. ⁷ ¿Inchawei Tiusbe nuindò kònrrai lawa wesruilò yem kwalòm nun miabelane, nòmuyasig sòlgandò maig kònrrabigwan maròb puròmisrmònrraitarru? cha. Kabe ¿muniitò, muniitò melònrrai inchautah? cha. ⁸ Pòs nabe trendamònrrun cha: Tiusbe sòlgandò maig kònrrabigwan petò tamara kettrun cha. Inchen treeg kòben, na, tru Mòg Misra Arrubig yu piraumay katò arrub kwalòmbe ¿isubigwan nainuutò tøgà misag piraub katøgucha wetòrranrrautah?— chibig kòn.

Chigòben tøgagùmburò an utab wabigwanba, Fariseowanba kemesra kwamindig

⁹ Mòilògòben nòmdò sòlgandiig tabelò kermab isua, katòganelane kaashibelaimburab Jesúsbe 'øyeeg lataitòwein kòn' chib kemesra waminchib trenchibig kòn:

¹⁰ —Pailò mòguelò Tiuswei yau Tiusba waminchab ambubelò kòn cha, kane fariseo kòben, kane romasreelayasig an utabig. ¹¹ Tru fariseobe pasramisra, øyah chib Tiusba waminchibig kòn cha: “Nai Tius, ungwa, ungwa chib, kaguen nabe kanelò lata niliig kòmòwei, kalò maròptiig sòl marmiig kòmòwei, itòlulòptiig kòmòwei, ni i an utabig lataig kòmòwein kur cha. ¹² Nabe truneyu pa kwalòm ayunab, na chi tøgagùgugurri diezmòrig kan kan tranòb inchibig kur” chib. ¹³ Trune tru an utabiibe wendausròndò pasramisra, ni nui kabmeranguen sròmbalaneb neeshig kòmui inchib, nui pechondò kurròb, trenchibig kòn cha: “Tius, nan lastima ashcha chib. Nabe kaig maròbig kur” cha. ¹⁴ Inchawei nabe trendamònrrun chibig kòn: Tru an utabiibe nui yamay katò ippe, Tiusba chi kaig kòmig lataig Tius tabig kòrròmarig yan cha. Trune fariseobe treeg kòmò yan cha. Kaguen mòikkòben nòasiitò 'nuig kurmab' isubigwane ka kòrig martrun cha. Inchen nòasiitò 'nuig kurmab' isumfiigwane 'i mòòbe si, nuig kòn' taig kònrrun— cha.

Uregwan Jesús mayanguen tab kuilò kònrrain chib

(Mt 19.13-15; Mc 10.13-16)

¹⁵ Ureezheelan chigucha Jesúsweimay srua amrrubelò kòn, nò estsartrai. Inchen nui kusrenanòb pera uniilò trunon ashabe, srua amrrubelan namòben, ¹⁶ trune Jesúsbe uremerane nuimay wama, trenchibig kòn:

—Ureemerane meròmbò, naimay ka amrrubasay cha. Kaguende Tius nò ashib karub waibe nòm latailaiwein kòn cha. ¹⁷ Inchawei nabe ñimun cierton trendamònrrun chibig kòn: Mòikkòben Tius nò ashib karub wainuguigwan kan unò lataitòwei utaptinchimibe managuen truyube kebinrraamòn— cha.

Kan pua mòg Jesúsba waminchib

(Mt 19.16-30; Mc 10.17-31)

¹⁸ Kan mòikkòsròn chi maramigwan nò ashibiibe Jesúsban trencha payibig kòn:

—Kusrennøbig tabig, ¿managatig øsig kømigwan Tius tranig tøgagønrappé, nabe chi maram-
erah?— cha.

¹⁹ Inchen Jesúsbe trenchibig kòn:

—¿Chindimba nane tabig cha wamøgu? cha. Tabiibe kandø køben, truiibe Tiustø køn cha.
²⁰ Tius maig maramigwan martrai pønsrailane ñibe yandø ashibig kòn cha: “Itølulmøwei,
kweechimøwei, nilømwøwei, katøganelaimburab isa waminchimøwei, ñui usri møskawan maig
købash inchimø, tab indamig kòn” tailan.—

²¹ Inchen tru møøbe:

—Nabe iilane kerriguh matsinø-unøgurri marøbig kur— chiben,

²² Jesús iigwan mørabe trenchibig kòn:

—Katøgucha kan chigøsrøndø palan cha. Ñui chi tøgagúigwan kerrigu yana, waachameran
pirishi cha. Treeg marabe, srømbalásrømbe chigurrimbunø tøgagønrabguen cha. Trugur-
rimbe arrua, nai mendig amø— chibig kòn.

²³ Inchen tru møøbe iigwan mørabe, truba isui inchibig kòn, kaguen truba puaiq kua.

²⁴ Inchen Jesúsbe nun ashabe, trenchibig kòn:

—¡Tius nø ashib karub wainug puarmera kebambamibe purø murig kòn! cha. ²⁵ Kan
cammelloguen tsusain kal trabyu illmø larrayamdiig køben, kan puaiibe Tius nø ashib karub
waisrø kebinrrab kaimanrrun— cha.

²⁶ Inchen møøbeløbe trenchibelø kòn:

—Trube, treeg købene, ¿kaigyugurrimbe mu kui wesraig kønrrautah?— cha.

²⁷ Inchen Jesúsbe løtappe:

—Møguelø martrab kaimaigwane Tiusbe sí, martrun— chibig kòn.

²⁸ Inchen Pedrobe trenchibig kòn:

—Au, nambe namui chi tøgagúilan elacha, ñui mendig amrruig kòn— cha.

²⁹ Inchen Jesúsbe trenchibig kòn:

—Pøs nabe ñimun cierton trendamønrrun cha: Møikkøben nui yawan, sawan, nunelan,
møskalan, uregwan Tius nø ashib karub waigweimburabigwan isua elachibiibe, ³⁰ møi yu
pirauibe øyeetøguen kømø, mas purø nu uta tøgagua, kansrømbe managatig øsig kømigwan
utønrrun— cha.

Jesús katøyug nø kwamigwan eshka

(Mt 20.17-19; Mc 10.32-34)

³¹ Jesús nui doce kusrenanøb pera uniilan nøøøø wamabe, trenchibig kòn:

—Au, nambe Jerusalénmay nebambub amber cha. Trusrømbe tru Møg Misra Arru-
bigweimburab Tius maig karuigwan eshkabig pøriibe kerrigu maig taig punrrun cha.
³² Kaguende nune judíos kømeealan tranen, indzaashib, tsalø wamab, illimbi tuchaashib,
³³ ichaguchib srua kua, yandø kwetchun cha. Inchendø pøn kwalømyube katø øsiranrrun—
chibig kòn.

³⁴ Inchen nømbe trunun mandø kuinguen mørmøwei, ni wamindigwan chi tainguen
mørmøwei inchibelø kòn. Kaguende iig wamindiiløbe nømune sörin pasrøben, nømbe ni
chiwan tainguen mørmeele kòn.

Jesús kan jericósrøig kabgaigwan tamarøb

(Mt 20.29-34; Mc 10.46-52)

³⁵ Jesús yandø Jericó ciuda pub lutau ibene, may menda kan kabgaig ‘anzhig kettra’ chib,
miab wawabe, ³⁶ misag truba nu puraambi mørabe, kabgaibe:

—¿Chindah?— cha, payene:

³⁷ —Nazaretsrø Jesús pureb yan— cha, trenchiptinchibelø kòn.

³⁸ Inchen kabgaibe trenchib trashibig kòn:

—¡Jesús, merrabsrø Davidwei Nusrkai, nan lastima ashcha!— chib.

³⁹ Inchen tru merrab ambuløbe niløtø wanrrai namingucha, nøbe trenchib mas mur
trashibig kòn:

—¡Merrabsrø Davidwei nusrkai, nan lastima ashcha!— chib.

⁴⁰ Inchen Jesúsbe pasramisra, srua amrrungaruben, nuim pulu pubene, trencha payibig
kòn:

⁴¹ —¿Na ñuyasig chi maramig paløta?— cha.

Inchen kabgaibe trencha løtabig kòn:

—Señor, nai kabmera ashibig misrimbe køtan— cha.

⁴² Inchen Jesúsbe nun trenchibig kòn:

—¡Ashibig misr! cha. Ñui isubigwan nainug pasriitøga tabig kørrømisra— cha.

⁴³ Inchen tru urastø kabgaibe ashibig misra, Jesúswei mendig Tiuswan truba tabig
waminchib iben, mayeelø iigwan ashibeløbe nømgucha Tiuswan tabig waminchibelø kòn.

19

Jesúsba, Zaqueoba

¹ Incha Jesús Jericó ciudayu kebya, truyu pureb ibene, ² kan truba pua móg romasree-layasis an tabelan nõ asha karubig, kan Zaqueo taig, ³ Jesúswan truba ashig kui inchibig wabig kõn. Inchendõ menrra misag kõben ashchab kaimabig kõn, Zaqueobe lamõtõ móg kua. ⁴ Incha merrab lula, Jesús purayam puluwan, kan sicomoro tusryu ashchab nebiben, ⁵ Jesúsbe tru puluwan puraya, palabunõ neeshabe, trenchibig kõn:

—Zaqueo, mallatõ pinaamõ cha. Kaguene mõi ñui yau kõrrõmisram kõnrrab kõn— cha.

⁶ Inchen Zaqueobe mallatõ pinaarra, Jesúswan truba tab kui inchib wamab utabig kõn. ⁷ Inchen iigwan ashabe, mayeelõba Jesúswan trenchib nõmdõ namig mullib mendabelõ kõn:

—Kan kaig marõbigwei yau kõrrõmisrtrab yan— chib.

⁸ Inchen Zaqueobe pasramisra, Señõrwan trenchibig kõn:

—Au Señor, waachameran na Kerrigu chi tõgagúigwan tõbõtagwan tranrrab cha. Inchippa na mõigwan kõben isatõ menrra utab, na kalõ marig kõbene, trube, katõburõ pibmaybatõ menrra tranamõnrrun— cha.

⁹ Inchen Jesúsbe nun trenchibig kõn:

—Kaigyurri wesrailõ kõmig mõi yu yau puin kõn cha. Kaguende i mõkkucha Abrahamwei misagurrindõwein kal-laweig kõn cha. ¹⁰ Kaguende tru Móg Misra Arrubiibe trubigwan lanrrappa, kaigyurri wesranrrappa arrig kõn— cha.

Anmera diez trubigwan kemesra wamindig

¹¹ Jesús õyee tailan misaamera mõrõb põnrramne, nõbe ‘õyee lataitõwein kõn’ cha, kemesra waminchibig kõn. Kaguene nõbe Jerusalén pub lutau iben, nõmbe Tius nõ ashib karub wainuguiibe mõi mõi punrraitamab isubelõ kõn.

¹² Inchen treekkurri Jesúsbe trenchibig kõn:

—Kan móg, truba tab misagurri arrubig, yabsrõ katõgan peg pirausrõ ‘rey kõnrrai mara kõrrõmarig kõnrrab ibig kõn’ cha, katõ nuim piraumaytõwei attraptõ.

¹³ ‘Incha inrraptõ nui karuindiig melabelan diezelan wama, kanun kanun kan kan an truba nuweyelõ tranabe, trenchibig kõn cha: “I anwan nemisrõb larrõbitchai marõb kõnrrigay” cha, na arrumnegatiibe. ¹⁴ Inchendõ nuim pirau misaamerabe tsaleelõ kua, mõilan kõsrõn nui wendautõ amrrai wesrawa õrõbelõ kõn cha, õyah chinrrigay chib: “Nambe i mõwane namui rey kõnrraimbe palain kõmer” cha.

¹⁵ ‘Inchen treeg indingucha, nõbe Rey kõnrrai mara kõrrõmarig, katõle nuimbiraumay arruabe, tru nui karuindiig melabelan tru nõ an traniilan, nuimay amrrungarubig kõn cha, tru anwan kan kan utabelõ mayambatõ mariitashchab ashchab. ¹⁶ Inchen srõsriig arruabe trendan cha: “Nai ashib karubig, ñi nan kan anzhig traniitõgatõ mõimbe diez nemarar” cha.

¹⁷ Inchen reybe: “Õyambesin tan cha, nai karuindiig megabig tabig. Ñi lamõtiiguma ñi õya sõl mariibe, mõimbe pueblomera diezwan karubig kõnrrai martrumõn” cha, trendan cha.

¹⁸ Inchen katõgan karuindiig megabig arrubiibe trenchibig kõn cha: “Nai rey, ñi nan kan anzhig traniitõgatõ mõimbe trattrõgatõ nemarar” cha. ¹⁹ Inchen trunungucha trenchibig kõn cha: “Trube, ñigucha trattrõ pueblomera karubig kõnrrabguen” cha.

²⁰ ‘Inchen katõgan karuindiig megabig arruppe, trenchibig kõn cha: “Ñi, nai ashib karubig, ñiguen ash cha, ñui anwane kan pañeluyu pula ka esegawa tõgagur cha, ²¹ põs ñun kõrig kõben, kaguende ñibe chiwandõgucha chi chippe kandõ chibig kuimba; põs ñi põnsrõmubendõ, ñi merrarrab; ñibe ñiashib ellgwaig kõmubendõ, ellmarigwan tulishib, treeg inchibig kuimba.” ²² Inchen nõbe trenchibig kõn cha: “Karuindiig megabig larrõ kaig, põs ñi nan õyee kõn chib, treeg kõn taig kuig kõbene, trube, ñui trig maig waminditõgatõwei mõimbe ñun trubalawei nebunrrai maig kõnrrabigwan marar cha. Nabe chiwandõgucha chi chippe kandõ chibig kui ashib, na põnsrõmubendõ, na merrarrab; na ellgwaig kõmubendõ, tulishib inchibig kui ashabe, ²³ trube, maindi nai anwan bancõyumay srua ya, pasrambala tan cha, na katõle arrua, nai anwan nemisrigwanbañau utabsrubrainrrun” cha. ²⁴ Incha truyu purrabelan trenchibig kõn cha: “Nune anwan Kerrawa, tru diez tõgagigwan tranõ” cha.

²⁵ Inchen nõmbe trendan cha: “Namui ashib karubig, trube diezken tõgagõn” cha. ²⁶ Inchen tru an tranõbiibe trencha lõtabig kõn cha: “Nabe trendamõnrrun cha: Tõgagigwane masken tranen, trune chigaigwane nui lamõtiig tõgagúigwanguen Kerranrrun tan cha. ²⁷ Incha tru nan tsaleelõ nõmui rey kõmõnrrai inchibelane yu nai merrab srua amrrua, kweetsay” tan — cha, trenchibig kõn Jesúsbe.

Jesús Jerusalén kebib

(Mt 21.1-11; Mc 11.1-11; Jn 12.12-19)

²⁸ Iigwan chab waminchabe, Jesúsbe Jerusalénmay ibig kòn. ²⁹ Incha yandø Betfagéba, Betaniaba pueblomerayu tru Olivos Tun taisrø, trusrø pub ambabe, nõbe nui kusrenanøb pera uniilø pailan ³⁰ trenchib karua ørøbig kòn:

—Ø pinrrøguesrø yamera tsitsø pønrrabsrømay ambay cha. Truyu puabe, kan burro muguen itøguaniimig litsig wetørranrabguen cha. Picha, yumay srua amrrunrigay cha. ³¹ Inchippa møikkøben: “¿Chinchab pichigüe?” cha payene: “Señor palai indan” chinrrigay — chibig kòn.

³² Inchen nui kusrenanøb pera uniiløbe amba, Jesús nõmun maig taig treeg wetørrawa, ³³ burron pichib pønrrøbenba, puarbe trenchibelø kòn:

—¿Chinchab pichigüe?— cha.

³⁴ Inchen nõmbe:

—Señor palai indan— cha løtabelø kòn.

³⁵ Incha Jesúsweimay srua amba, nõmui kewagúilan burro-unøyu kaya, itøguanøsrøben, ³⁶ Jesús pureb ibene, misaamerabe nõmui kewagúilan maywan kayibelø kòn. ³⁷ Incha yandø Olivos Tun lendesrø misrøb ambuppe, mayeelø tru nu sòtø nui mendig amøñibeløbe tru maramburab mariilan Kerrigu asikkurri Tiuswan truba tabig wamab kasraarab trashib mendappe, trenchibelø kòn:

³⁸ —¡Señor Tiuswei munchiyu Rey arrubiibe mayanguen tab kuig kòn! cha. ¡Srømbalasarømbe mayanguen tab kuinrrun! chib. ¡Srømbalasarømbe tørguegwalmabig kuinrrun!— cha.

³⁹ Inchen mø fariseosmera kòsrøn, tru misag utu pønrrabeløbe trenchibelø kòn:

—Kusrennøbig, ñui mendig amøñibelan niløtø pønrrønrrai namø— cha.

⁴⁰ Inchen Jesúsbe trenchibig kòn:

—Nabe trendamønrrun cha: Iilø chi chimø, niløtø pønrrøbene, sruumeraguen trashinrrun— cha.

⁴¹ Incha Jesús Jerusalén pulusrø pua, ciudawan ashabe, trunun isua, kishib ⁴² trenchibig kòn:

—¡Chi isumgaig tab købig tøgagømigwan kan møin kwalømdøguen ñigucha nebua isuimbe kòn! cha. Inchendø truigwane mømbe ñi ashmønrrai sørin pasran cha. ⁴³ Kaguende larrø kaig kwalømmera ñun puben, ñui ashig kømui inchibeløbe ñuim pøtøgatan chamba mara, ambumay imay ñun kata kønøbashmønrrun cha. ⁴⁴ Incha ñune pirau pøtiicha, tru ñui umbu warab misaameran kweecheen, ni kan sruutøguen katøgan srug palabe kørørmismønrrun chibig kòn, kaguen ñi, Jerusalénbe, Tius kaigygurri wesranrab arrub uras ke ka arrua uni lataitø indikkurri.—

Jesús Tiuswei yawan chish marøb

(Mt 21.12-17; Mc 11.15-19; Jn 2.13-22)

⁴⁵ Incha Jesúsbe Tiuswei yau kebya, truyu yanøb warabelan wambig webetab mendabe, ⁴⁶ nõmun trenchibig kòn:

—Tiuswei wamwan pørigube trenchibig kòn cha: “Nai yabe Tiuswan wamindi ya kòn” cha. Trune ñimbe nileelø warain trab marin kòn— cha.

⁴⁷ Incha Jesúsbe kwalømmørig Tiuswei yau kusrenanøbig kòn. Inchen tru sacerdotemeran karubeløba, tru Moisés pørigwan kusrenanøbeløba, katø maya misagwan karubeløbabe Jesúswan mandø incha kwetsamdiig køtashchab labendø, ⁴⁸ chinchaguen martrab kaimabelø kòn, kaguende misaabe mayeeløba Jesús wamindigwane purø tab møren.

20

Jesús karumburab karuig

(Mt 21.23-27; Mc 11.27-33)

¹ Kan kwaløm Jesús misaameran Tiuswei yau kusrenanøb, tabig srø wamwan eshka pasrøbene, sacerdotemeran karubeløba, tru Moisés pørigwan kusrenanøbeløba, misagwan karubelø kølli misaameraba kemallabe, ² nune trenchibelø kòn:

—Namun eshkarra cha: ¿Ñi mariilane mu karua pasritøgarre margu? cha. ¿Ñi øyeeg maramigwane mu karua pashta?— cha.

³ Inchene Jesúsbe løtappe, trenchibig kòn:

—Nagucha ñimun kan chigøsrøn payrrab cha. Løtørray pøs cha. ⁴ ¿Misagwan Juan piu umbu ulsrøb uniibe srømbalasarøngurrin kuig kø chindah, kabe møguelainukurrin kuig kø chindah?— cha.

⁵ Inchen nõmbe nõmasiyaitø trenchib payiyab mendabelø kòn: “Nam: ‘Srømbalasarøngurrin kuig kòn’ chibene, nõbe namune trenchinrrun cha: ‘¿Chindimba nune køremøgue?’ cha. ⁶ Kabe: ‘Møguelainukurrin kuig kòn’ chibene, misaamerabe mayeeløba namune sruutøga

petønrurun cha. Kaguen misaabe Juanwane Tius maig karuigwan eshkabig kui ke yandø tsabø asha tøgær køn” cha. ⁷ Incha nømbe trencha løtabelø køn:

—Maig kuindøbeh— cha.

⁸ Inchen Jesúsbe trenchibig køn:

—Trube, nagucha eshkamumønrurun cha, iilan na mu karuitøga marigwan.—

Kwallibelø larrø kailan kemesra wamindig

(Mt 21.33-44; Mc 12.1-11)

⁹ Incha Jesúsbe misaameran pølbasa waminchib mendappe ‘øyeeg lataitøwein køn’ chib kemesra iigwan waminchibig køn:

—Kan møg uvas tra mara, trugurrimbe nui misrigwan pirishinrraptø pirøwan katøganelan kwallchai tranabe, yabsrømay truba yana yan cha. ¹⁰ Incha yandø lurrarig puben, nui kan karuindig megabigwan tru kwallchab utabelan tru kanbalø kurrigwan nøm tranrai karua ørøbig køn. Inchen treeg øringucha, nømbe nun kurragucha, chiguchagaig ørøbelø køn cha. ¹¹ Inchen puaike katøgan karuindig megabigwan øren, truigwangucha tsalø wama, kurragucha, chiguchagaig inrai øran chibig køn. ¹² Inchen puaike pønmay kønrrabyu katøgan øren, tru kwallibeløbe trunungucha kørriincha, truyugurri wambig weguchibelø køn cha.

¹³ Inchen yandø tru pirø puaike trendan cha: “¿Chindamer? cha. Nai undaarraig nusrkawan ørtrab tan cha. Nune inchippa chinchimubgun” cha. ¹⁴ Inchen tru kwallibelø nun ashabe, nømdø trenchibelø køn cha: “Pirøwan ketig utønrabiibe iigwein køn cha. Pirøwan namui martrab nune kweechigun” tan cha. ¹⁵ Inchabe uvas traugurri wegucha, nun kweechibelø køn cha.

¿Trube tru uvas tra puaike tru kwallibelane chi martterah? cha. ¹⁶ Arrua, tru kwallibelane kweecha, tru uvas trawane katøganelan tranrrun— chibig køn Jesúsbe.

Inchene misamera iigwan mørabe:

—¡Managuen kan trengatikkucha puraimuimbe!— chibelø køn.

¹⁷ Inchene Jesúsbe nømun ashabe trenchibig køn:

—Trube, treeg købene, ¿Tiuswei wamwan pørigu øyah chibiibe mandø cha trendah? cha: “Tru ya marøbelø kaasig sruube katsiisrø pølbasa wayamig mas purø tab srukken misrin køn” chippe.

¹⁸ Inchawei møikkøben tru srug pala peñippe, pitis misrtrun cha. Inchen tru srug muim pala køben peñippe, nune usrø tuindø martrun— chibig køn.

¹⁹ Inchen tru uras tru Moisés pørigwan kusrenanøbeløba, sacerdotemeran karubeløba tru ‘øyeeg lataitøwein køn’ cha waminchippe nømun kemesra wamindi møra, Jesúswan ¡katø! møi møi kemørtrab inchendø, misaameran kørig kui inchibelø køn.

Tiuswein kønrrabigwane Tiuswan tranøppe Césarwein kønrrabigwane Césarwan tranøb

(Mt 22.15-22; Mc 12.13-17)

²⁰ Inchabe kan møilan køsrøn larønrrai ørøbelø køn, sølgandø amøñibelø misrøb, Jesús chigøben wamindigu kebenøsrka trumay kubenadurwei tasku purørtrab, nui mu mandamgaig maritøga nø asha martrai. ²¹ Inchabe nømbe payibelø køn:

—Kusrennøbig, ñibe søl waminchib, søl kusrenanøb indi nambe ashibelø ker cha. Ñibe misaameran mumeru kőtasha asha kusrenmø, Tiuswei maywan ñibe maig kusrenanamigwan cierton sølwan kusrenanøbig køn cha. ²² Trube, ¿tru Roma maya misagwan karub wabigwan nam an pagaramig merig køh, kabe merømuig køh, chinderah?— cha.

²³ Inchen Jesúsbe nømune ka kaig isuatørre inchib pønrrai ashabe, trenchibig køn:

²⁴ —Kan anwan eshkarru cha. ¿I anyu maløba, i munchi pøriibabe muin køh?— cha.

Inchen nømbe trencha løtabelø køn:

—Tru Césarwein køn— cha.

²⁵ Inchen Jesúsbe trenchiptinchibig køn:

—Césarwein købene, Césarwan tranay cha. Inchen Tiuswein købene, Tiuswan tranay— cha.

²⁶ Inchen misagwei malau nø chi tailøyu chiyugucha kebenøsrkønrrab kaimabelø køn. Tru nø løtiilan nømguen kwaara asha, niløtø kørrømisrøbelø køn.

Kwailø katøle øsiiranrrab kuigwan payib

(Mt 22.23-33; Mc 12.18-27)

²⁷ Inchen møiløgøsrøn saduceosmera Jesúswan ashchab amrrubelø køn. Tru saduceosmerabe kwailøbe katøbe øsiiramønrurun chibelø kua, Jesúswane øyeeg chib payibelø køn:

²⁸ —Kusrennøbig, Moisésbe namune øyeeg pøra kørrømarig køn cha: “Møigwei nuneg køben kwawa, srawan urekkaig kørrømarene, trube tru nuneebe piudaba kasharawa, nuneg kwabigweimburab ureg tøgægømig køn” chibig.

²⁹ Trube, siete nunelø købig køn cha. Indiibe srøsrribe kasharawa, chi urekkaig kwaben, ³⁰ tru wendauikkucha tru piudaba kasharawa, katø chi urekkaitøwei kwaben, ³¹ katø tru pøn kønrrabyuigwangucha treetøwei nebuben, yandø søteeløba tru ishuuba kasharawa, møikkucha urekka kwabelø køn cha. ³² Inchen yandø srabebe tru ishukkucha kwan cha. ³³ Pøs treeg købene, trube, tru kwabelø katø øsiirabene, ¿nøbe møigwei srain kønrrerah? cha, payibelø køn, tru sieteeløba nune srai mara tøgagüg købene.—

³⁴ Inchen Jesúsbe trencha løtabig køn:

—Møi yu piraube kasharab, katø kasharanøb inchibelø køn cha. ³⁵ Trune tru kansrø kanmaytø kebamrrai tøgagüinabeløbe trunun nebub, katø kwabelai utgurri øsiiramigwan nebub incha, truiløbe kasharanrrab kømøwei, kasharanøb kønrrabelø kømøwein køn cha, ³⁶ kaguende nømbe katøle kwanrrabelø kømøwa. Pøs nømbe ángelesmera latailø, katø Tiuswei uremera køn cha, kwabelai utgurri øsirab ureg kua. ³⁷ Inchen tru tusr-unø naaraigu maig purayaigwan pøra pasriguma, tru kwabeløbe katø øsiiranrrab kuigwan Moisésken kenamarig køn, tru Señorwan øyah cha wamappe: “Tiusbe Abrahamwei Tius, Isaacwei Tius, Jacobwei Tius køn” cha. ³⁸ Pøs Tiusbe kwailai Tius kømøtø, øsiguelai Tius køn cha. Inchawei mayeeløba nuimbe øsigueløtø køn— chibig køn.

³⁹ Inchen mõiløgøsrøn tru Moisés pørigwan kusrenanøbeløbe trenchibelø køn:

—Kusrennøbig, ñibe sølwein tan— cha.

⁴⁰ Trugurrimbe yandø mas payrrab inchimeelø køn.

¿Cristobe mui misagurri arrubig kerah?

(Mt 22.41-46; Mc 12.35-37)

⁴¹ Jesúsbe trencha payibig køn:

—¿Misaabe chincha Cristone Davidwei misagurri arrub nusrkain køn tamig kønrrab køh? cha. ⁴² Kaguende Davidbe nøtøweinguen Salmoswan pørigu trenchibig køn cha: “Señor Tiusbe tru nai Señorwane trendan cha:

⁴³ ‘Nai kusrmaygatø wamistr cha,

ñui ashig kømui inchibelan ñi nebuna wamig na pønramnegatig.’ ”

⁴⁴ Cristone Davidbe: “Señor” cha, øyeeg wamubene, trube, ¿mandøgurri Cristobe Davidwei nusrkain kønrrab køh?— chibig køn.

Moisés pørigwan kusrennøbelø nøm mailø kuilan Jesús waminchib

(Mt 23.1-36; Mc 12.38-40; Lc 11.37-54)

⁴⁵ Maya misaamera mørøb pønrrøben, Jesúsbe nui kusrenanøb pera uniilan trenchibig køn:

⁴⁶ —Tru Moisés pørigwan kusrenanøbelan ashiptø kuy cha. Kaguen nømbe kørrabelø kewa llirab amønarnamig chullelø, penab yanøb indiisrø maig købash kømø, truba tab wamønrrai indamigwan chullelø køn cha. Katø judíosmera tulundzuni yamerayube purø tab purramdønug purrag kui indamba, katø lincha tabig mabyugucha nørreelø purrainug purø tabigu purrag kui indamba inchibelø køn cha. ⁴⁷ Katø piudasmeran mõui yameran kerrawabe, tabelø misrøb ke ka yandø truba yana Tiusba waminchibelø køn cha. Truiløbe møra melamig mas nuigwan utønrrun— chibig køn.

21

Kan waacha piuda Tiusweyasig an tranøb

(Mc 12.41-44)

¹ Tiuswei yau an kebusrinug, puarmera an kebusrøb køben Jesúsbe ashib wabig køn. ² Inchen katø kan waacha piudagucha, øskø an pagatøtøh kebusri ashabe, ³ Jesúsbe trenchibig køn:

—Nabe ñimun cierton trendamønrrun cha: I waacha piudabe mayeelø lataitøguen kømø, menrraguen tranan cha. ⁴ Kaguen mayeeløba nømbe undaigwandø tranen, trune nøbe waacha køptø, tru nui øsig tsumig tøgagügwanguen kerrigu tranan— cha.

Jesúsbe Tiuswei yawan pinisaig kønrrun chib

(Mt 24.1-2; Mc 13.1-2)

⁵ Møiløgøsrøn Tiuswei yau tru tab sruuzheelanba, chigøben tabzheelø Tiusweyasig tranig pønrrabelanba, truilan waminchib køben, Jesúsbe trenchibig køn:

⁶ —Iig ñim ashib kuigwan pinisam kwalø m attrun cha. Yube ni kan srukken katøgan srug palabe kørrø mismørønrrun cha. Kerriguba pøtiitsig kønrrun— chibig køn.

Chigurrimbunø købig misaabañau patsam lutau chigøben køb

(Mt 24.3-28; Mc 13.3-23)

⁷ Inchene nømbe trencha payibelø køn:

—Kusrennøbig, ζøyebe mana purainrrerah? cha. ζTruilø ke yandø treeg purainrrabig-wan asamibe chitø kenamisrrerah?— cha.

⁸Inchen Jesúsbe trenchibig køn:

—Ashiptø kuy cha, ñimun peløsrkønrrain kømø. Kaguende mōiløgøben nai munchiyu truba nu amrrua trenchinrrun cha: “Nabe truig kur” chib, katø: “Møi ya srabe kwaløm punrrabiibe lutau køn” chib amrrubene, truilan mendig ammøtay, chibig køn. ⁹Incha ‘misaamera katøgan peesrø misaameraba purø trømbøig kørig kømdiig kwayab kweetsiyab køn’ chib; ‘misaamera tru piraeløtøwei trømbøig namig kurra kwayab køn’ taig ñim wamindi mørabe, ñimbe kwarmøtay cha. Kaguende iilømerrigwei trendø treeg purainrrabigwein køn cha. Inchendø katøgucha patsamibe ke møi mōin kønrraamøn— chibig køn.

¹⁰Inchabe katø trenchibig køn:

—Peg misaamerabe katøgan peg misaameraba kwayaben, katø rey karumburab ashib karuim piraeløbe katøgan reywei misaameraba kwayanrrun cha. ¹¹Trune pirø purø trømbøig kønabelø arrumba, chu pirausrøn køben parø amrrumba, kaig kwanrrømera amrrumba inchen, kørig kømdiig chigøben arrumba, katø srømbalasarøngurrimbe chigøben truba nørreelø kenamisrøb inchen cha.

¹²‘Inchendø øyeelø arrumøwatø, ñimune kemøøb, larrø kaig marøb inchen cha. Katø ñimune judiøsmera tulundzuni yamerayumay payib sruagønrrab srua ambamba, kailan keeri yau keera pønrsamba inchen cha. Incha nagurrindø reymerai merrab køben, karubelai merrab køben srua amben, ¹³naimburab ñim wamindamig kønrrun chibig køn. ¹⁴Ñimui manrrøyube øyeegwan isua pønrrønrrigay chibig køn, mandø løtamigwan ke kanmaytø isua tōga pønrrønrrab inchimønrrab. ¹⁵Kaguen ñimun ashig kømui inçhibelø mayeelø, nøm manchaguen løtønrrain kømøwei, nøm ñimun purab waminchib kasrønrrain kømøwei, nabe ñimun muguen øyeeg waminchimuinnrunig wamindamig tranamønrrun chibig køn. ¹⁶Inchen ñimui mōskalø køben, nunelø køben, ñimui ñimmisaamera køben, ñimui trendø lincibelø køben, ñimun ashig kømui inçhibelan tranen, ñimun mōilane kwetchun cha. ¹⁷Maya misaabe ñimune nagurrindø tsalø indiilø kønrrabguen cha. ¹⁸Inchendø ñimui turyu kan pusruuzhikken chi indiimig kønrrun chibig køn. ¹⁹Ñim chi arringucha melabig meløwabe, ñimasiitøwei ñimui mōsiimerane øsiguig wesranrrabguen cha trenchibig køn.

Jerusalénwan pinisaig kømig

²⁰Jerusalén ciudawan pøtøburab suldautø tulsruig kui ashabe, petø pinisaig kønrraitamab isua, ²¹Judea pirau warabeløbe tunmerasrømay wegørra lulay. Inchen ciudayu warabeløbe truyugurri webambamig køn. Inchen ciudayugurri yabsrø warabeløbe ciudayumay katø ammøtay. ²²Kaguende trømbøig mōra melønrrai maram kwalømmera kønrrun, Tiuswei wamwan pørigu maig taig kerrigu treeg neburnrai. ²³!Shumbur waachamera, tru kwalømmerawan patsø kwanrreelø, kabe muchib ureg tøgarmairambe maig kønrrer! chibig køn. Kaguen yu pirau purø isumdiig arruben, katø i misaameraimburab namig købig purø kørig kømdiig attrab køn. ²⁴Mōiløbe espatatøga kweetsiilø køben, mōiløbe chugøben asiimø pirausrømay kemōra srua ambiilø kønrrun chibig køn. Inchen tru judiøsa kømeelø Jerusalén ciudawan mindishib itølulrun, tru nømui treeg maram kwalømmera patsamnegatiitø.

Tru Møg Misra Arrubig katø arrumig

(Mt 24.29-35, 42-44; Mc 13.24-37)

²⁵‘Inchen chigøben truba nørreelø kenamisrtrun nøsigu køben, pølyu køben, estrellam-erayu køben. Inchen pirau misaamera nørø pønrrabiibe purø trømbøig isui inchen, mar purø trømbøig wanrrab mullib, trømbøig latøgushib kurrøben. ²⁶Katø misaamerabe yu pirau maig purainrrabelan isubiibah kørig købiibatø pesannanrrun, kaguende srømbalasarø purø nørreelø pønrrabelan kønøgøb sruagutsiilø køben. ²⁷Inchen tru Møg Misra Arrubiibe maramburab maramig tōgaig purø nuig tørguegwalmabig wañiyu arruben ashchun, chibig køn. ²⁸Inchawe iilø pureb arrub mendøbene, ølgandø pønrramisra, kurraasay chibig køn. Kaguen yandø ñim kaigyugurri wesruilø kømig lutau kønrrun— cha.

Higueran kemesra wamindig

²⁹Incha katø ‘øyeeg lataitøwein køn’ cha, kemesra trenchibig køn:

—Higueranma asay cha, katø mayan tusrmeranba, ³⁰ishiimera weguchib mendøbene, ñimbe pachig kwalømmera arrumig lutau kui asan cha. ³¹Øyeetøwei ñim iilan purayai ashabe, Tius nø ashib karub pasraibe yandø lutau kuitamab isua kuy cha.

³²‘Pøs nabe ñimun cierton trendamønrrun chibig køn: Mōin kwaløm misaamera pinømøwatø, kerriguh purainrrun cha. ³³Srømbalaba, pirøbabe patsøben, na wamindiibe ka wamindiitøbe purainrraamøn cha.

³⁴ Ñimbe ñimðwei ashiptø kuy cha, ñimui manrrømerayu øyeeløtø netsailø kømønrrab, mamburab mab, mutsiirab, yu pirau øsig waramig chigøben tøgagømigwangøba isub indiilø, tru Señor arrin kwalømbe ñimun kan ilagu kegørrøsrka merrarrab lataig arrindø mørmønrrappe. ³⁵ Kaguene tru kwalømbe yu pirau muba kuimburab mayeelaim pala treeg attrun chibig køn. ³⁶ Inchawei ñimbe ashiptø melay chibig køn, chu uragucha Tiuswan purugurra chib, øyeelø kerrigu pureb arrubigu kullaaramø, mur pønrramig kønrraimba, tru Møg Misra Arrubigwei merrab kemalla, pønrramig kønrraimba.—

³⁷ Incha Jesúsbe kwalømmerawane Tiuswei yau kusrenana, yembe Olivos taig tunsrø kørrømisrtrab ibig køn. ³⁸ Inchen kwalømmørig ke løtsøzhig, løtsøzhig maya misaamerabe Tiuswei yau nun mørtrab pubelø køn.

22

Jesúsuan kemørtrab waminchib

(Mt 26.1-5, 14-16; Mc 14.1-2, 10-11; Jn 11.45-53)

¹ Pirri Levaduragaig maig Fiesta, tru Pascua Fiesta taig, lutau køben, ² sacerdotesteran karubeløba, tru Moisés pørigwan kusrenanøbeløbabe Jesúsuan mandø kweetsamigwan labendø, misagwan køriimatabelø køn.

³ Inchen Jesús tru doce kusrenanøb pera unilail utuig, Judas, tru Iscariote cha wamigwan, Satanásbe kebiben, ⁴ Judasbe webya, sacerdotesteran karubelanba, tru Tiuswei yau ashib pønrrab suldaumeran karubelanba ashchab ya, Jesúsuan mandø incha nømui tasku tranamigwan waminchene, ⁵ nømbe truba kasraarawa, an tranrrab misrøbelø køn. ⁶ Inchen nømbe treeg martrab misra, misag tre nu kaaben Jesúsuan mandø incha tranamigwan yandø lab mendabig køn.

Señorwei pascua mamig

(Mt 26.17-29; Mc 14.12-25; Jn 13.21-30; 1 Co 11.23-26)

⁷ Yandø Pirri Levaduragaig main kwaløm puben, tru Pascua ubisha-unan kweecha tranamig købig køn. ⁸ Inchen Jesúsbe Pedronba, Juanwanba trencha karua ørøbig køn:—

—Pascua Fiesta mamigwan manrrab tamartrab ambay— cha.

⁹ Inchen nømbe:

—¿Nambe chu tamaramø?— cha payen,

¹⁰ Jesúsbe trenchibig køn:

—Ñim ciudaya kebambene, kan møg pigøtsø mutaig ñimun katøben, truigwei wendautø amrrigay cha, nø kebyam yaugatic. ¹¹ Incha tru ya puaiwane trenchinrrigay chibig køn: “Kusrennøbiibe ñun trendan cha: ¿Nai kusrenanøb pera uniløba pascua mamigwan mab purram salabe chu køh?” cha. ¹² Inchen ya puaipe pala pisusrø kan nu sala chab tamarikken ñimun eshkaben, truyu tamartrigay— chibig køn.

¹³ Inchen nømbe amba, Jesús maig taig treeg wetørrawa, tru Pascuan tamarøbelø køn.

Señor nui doce pera uniløba mab

¹⁴ Incha yandø ura puben, Jesúsbe nui karua øriiløba mishatsigu wamisrabe, ¹⁵ trenchibig køn:

—¡Nan øyeeg kaig nebuig megamig pumøwatø, Pascua Fiesta mamigwan ñimba manrrab truba truba isuig køn! cha. ¹⁶ Kaguende ñimun trendamønrrun chibig køn: Tius nø ashib karub wainug katøle ñimba manrrab wamisramnegatic nabe i mamigwane mamumønrrun— cha.

¹⁷ Incha copan muta Tiuswan ‘mayanguen pay’ chabe, trenchibig køn:

—Cha iigwan, larrabelø mutsas cha. ¹⁸ Kaguende ñimun trendamønrrun cha: Møingurrimbunøbe uvas piwane mas muchimumønrrun cha, nai Møskai nø ashib karub waisrø katøyug ñimba mutsam kwalømgatic.—

¹⁹ Incha pirriwan muta, Tiuswan ‘mayanguen pay’ cha, pirisha, nømun trenchib srørrøbig køn:

—Iibe nai asr køn cha, ñimuyasig tranig. Iigwan øyeeg marøppe, nan isunrrab maray— chibig køn.

²⁰ Inchen chab ma, katø treetøwei copan mutabe, trenchibig køn:

—Iibe tru nai anindøga Tius tru misagweyasig srø acuerdon marig, tru copa køn cha, tru ñimuyasig na ani lusig.

²¹ Inchendø asay chibig køn. Nan ashig kømui inchibelan tranrrabigwei tasiibe i mishatsigutøwei nain tasiiba trubalatø trarra wan cha. ²² Tru Møg Misra Arrubiibe muwan inrrai pasrig, truwan iben, trune ¡tru nun ashig kømui inchibelan tranrrab møg waachaweimbe, kan maig kønrrer!— chibig køn.

²³ Inchen nømasyaitø:

—¿Treeg martrabiibe mu kerah?— cha payiyab mendabelø køn.

Møig mas nuig kerah cha payiyab

²⁴ Inchabe nømbe nømui utu møig mas nuig kønrraptiig kerah cha, payib aleguiyab købelø køn. ²⁵ Inchen Jesúsbe kusrub trencha løtabig køn:

—Tru reymera judíos kømeeløbe nøm karub tøgagüilane maig købash inchib purran cha. Inchen tru nømun ashib karub purrabelane ‘misaamerayasig tabig marøb møguelø køn’ chib wamiilø køn cha. ²⁶ Trune ñimbe øyamay kømøtø kømig køn chibig køn. Masken ñimui utu tru mas nuibe matsinø-unø lataitø misramig køn cha. Inchen tru chi maramigwan nø ashibiibe kan karuig marøb megabig lataitø misramig køn cha. ²⁷ Pøs trube, øyeeg købene, ¿møig mas nuig kønrrab køh? cha. ¿Mishatsigu manrrab wamisrøbiiteh? Kabe ¿tru mishatsigu mamigwan pønsrøbiiteh? cha. ¿Pøs mishatsigu manrrab wamisrøbig, truig mas nuig kømuitarru? cha. Øyeeg kuingucha, nabe ñimui utube tru mishatsigu manrrai pønsrøb megabig lataig kur chibig køn.

²⁸ Ñim køn chu uragucha nan elachimø, chigøben murig pub arringucha treegu wendautø lincha melabeløbe. ²⁹ Incha nai Møskai tru ashib karub waigwan nan tranøb lataitøwei, nabe ñimun tranamønrrun chibig køn, ³⁰ tru na ashib karub waisrø nai mishatsigu mab, muchib, katø tru ashib karub purramigu purramisra, ñim tru doce nusrrkalø Israelweinukkurri karrab misaameran ashib karub purramig kønrrain— cha.

*Pedro nan ‘ashmüig kur’ chinrrautan cha, Jesús eshkab
(Mt 26.31-35; Mc 14.27-31; Jn 13.36-38)*

³¹ Incha Señorbe katø trenchibig køn:

—Au, Simón, Simón cha, Satanásbe ñimun miain køn cha, kan tirigu trulmeran latawei kønishib sruagutchab. ³² Inchendø nabe ñuimburappe ñui isubigwan nainuutø tøga pasraigwan elachib pasrømønrrai ñuyasig Møskawan miar chibig køn ‘purugurrnrig’ chib. Ñi nan wendøbasra ya, naimay katøle arruabe, ñibe ñui nunelan chiyutøgucha kullaaramø, mur pønrrønrrai purugunrrig— cha, trenchibig køn.

³³ Inchene Simónbe:

—Señor, ñun kailan keeri yau keeren, nabe ñiba truyu pasrønrrab treetø attrab pasrømøtø, nagucha ñiba tøga kwanrrab attrab pasrar— cha, trencha løtabig køn.

³⁴ Inchen Jesúsbe trenchibig køn:

—Pedro, nabe ñune trendamønrrun cha: Møin kwalømdøwei kallu wamømwatø, ñibe pønmayguen nan, ‘ashmüig kur’ chinrrautan— cha.

Purø trømbøig kuim pasramig luturaab

³⁵ Incha Jesúsbe trencha payibig køn:

—Na ñimun wasrkaig, katø nan pusramig chigaig, alpargatskaig ørenma, ¿ñimun chi palappuig køh?— cha.

Inchen nømbe:

—Chigucha chi palappumuig køn— cha løtabelø køn.

³⁶ Inchen Jesúsbe trenchibig køn:

—Møimbe treeg kømøtø, an pusrig tøgaiibe, srua inrrø cha. Inchen wasr tøgaiibe, ila inrrø cha. Inchen espadagaibe, trube, nui pala itøgueigwan yana, kan penø cha. ³⁷ Kaguende nabe ñimun trendamønrrun cha: Tiuswei wamwan pørigu naimburab iig øyeeg chibig pasrabiibe treeg nebunrrain køn cha: “Larrø kailai utu treeg kui lataitøwei asha tøgagüig køn” taig. Kagen naimburab chi nebunrrai pørig pasrabiibe kerriguh treeg nebunrrabig køn— cha.

³⁸ Inchen nømbe:

—Señor, yuguen pagatø espadamera køn— chiben,

Jesúsbe:

—Øiløtø tsabø køn— cha, løtabig køn.

*Jesús Getsemanísrø Tius Møskaimba waminchib
(Mt 26.36-46; Mc 14.32-42)*

³⁹ Incha Jesúsbe nø trendø treeg marøbig kuig køppe, Olivos Tunsrømay iben, nui kusrenanøb pera uniiiløgucha mendig ambubelø køn. ⁴⁰ Incha truyu puabe, trenchibig køn:

—Tiusba waminchib purray cha, chiyugøben kaigyu kegørrab pønrrømønrrappe.—

⁴¹ Incha Jesúsbe kan srug kutsimburab lataitø ya, Tius Møskaimba waminchab tømønnsrabe, ⁴² trenchibig køn:

—Nai Møskai, i copan nan tarømaramdiig købene, tarømartra cha. Inchendø na maig isuig køben, treeg kønrrain kømøtø, ñi nan maig maramdiig køben, treegwan maramig kønrrain— cha.

⁴³ Inchen srømbalasiig kan ángel Jesúswan mas kullaaramønrrai purugunrrab kenamisrøbig køn. ⁴⁴ Inchen truba truba trømbøig køben, katøgucha ¡katø! miabig, miabig køn. Inchen nui pøsrømbiguen pirau kan anim pirrab lataig nørriig pirrabig køn.

⁴⁵ Incha kurra, nui kusrenanøb pera uniilan ashchab yabe, isubiitø kamariilø, kib purrain kui wetørrawabe, Jesúsbe trenchibig køn:

⁴⁶ —¿Chindimba kib køgue? cha. Kurra, Tiusba waminchib purray cha, chiyugøben kaigyu kegørrab pønrrømønrrappe.—

Jesúsuan kemøra srua ambub

(Mt 26.47-56; Mc 14.43-50; Jn 18.2-11)

⁴⁷ Inchen Jesús waminchib pasramne, truba nu misag puben, Judas taig, tru doce kusrenanøb pera uniilai utuibe, truilan pera arrua, Jesúsuan muchanrrab kemallen, ⁴⁸ Jesúsbe trenchibig køn:

—Judas, ¿Møg Misra Arrubigwan nan ashig kømui inchibelan kan muchawa tranrrreendirru?— cha.

⁴⁹ Inchen Jesúsba pønrrabeløbe tru treeg purainrrabigwan ashabe, nune payibelø køn:

—Señor, ¿nam espadatøga kørriincha petamøh?— cha.

⁵⁰ Inchen nømui utu møikkøsrøn tru maya sacerdotesmeran nø karub sacerdotei karuindiig megabigwan kusrmay kaluwan kelarrab lutiichiptinchibig køn. ⁵¹ Inchen Jesúsbe trenchibig køn:

—Au, øyeebe marmøtay— cha.

Incha kaluwan katørawa, treetøwei tamarøbig køn. ⁵² Incha sacerdotesmeran karubelanba, misagwan karubelø kølli misaameranba, Tiuswei yau ashib pønrrabelø policíameranba nun tru sruamrrab amrrubelan trenchibig køn:

—Nabe kan niliig kui lata ñimbe espadamera køben, tsiimera køben sruar werrunrrappe, ¿chindimba treeg werrugue? cha. ⁵³ Nabe ñimba kwalømmørig Tiuswei yau waben, kemørmuig køn cha. Inchendø yandø mømibe tru kaig maringarubig tru løstøyuig nø merrarrawa nø karub pasramisren, ñimuimburab ñim maramig ura puin køn— cha.

Pedro Jesúsuan ‘ashmüig kur’ cha isab

(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Incha Jesúsuan kemøra, tru maya sacerdotesmeran nø karub sacerdotei yamay srua amben, Pedrobe yaptø, yaptø mendig ibig køn. ⁵⁵ Incha tru yawambigu nag urra, tru pøtøgatan purramisren, Pedrogucha nømui utu wamisren, ⁵⁶ kan srusrø mendig megabiibe naabilabig tøryu Pedron wai ashabe, ashib pasraptø, ashib pasraptø trenchibig køn:

—I møkkucha Jesúsba uñibiitøwein køn— cha.

⁵⁷ Inchen Pedrobe trenchib isabig køn:

—¡Paare ishube, nagan ashibig kuitarru!— cha.

⁵⁸ Inchen yanazhigutø Pedron katøgan ashabe, trenchibig køn:

—Ñigucha truilai utuigwein kørreh— cha.

Inchene Pedrobe:

—¡Paare møøbe! nagan truig kuitarru— chibig køn.

⁵⁹ Katø kan ura wendau køsrøn katøgan trenchibig trenchig køn:

—Isa kømø, i møkkucha Jesúsba uñibigwein kørreh cha. Kaguende nøbe galileasriitøwein køn— cha.

⁶⁰ Inchen Pedrobe trenchibig køn:

—¡Paare møøbe! ñibe ni chi waminchib pasrainguen mørmur— cha.

Inchen tru urastø Pedro waminchib pasramnetø, kan kallu wamapinchibig køn.

⁶¹ Inchen Señorbe keesha, Pedron ashene, Pedrobe Señor øyah taig kømørramab isuptinchibig køn: “Møi kallu wamømwatø nan pønmayguen, ‘ashmüig kur’ chib isønrrautan” taigwan. ⁶² Inchabe Pedrobe webya, truba truba isuig kishibig køn.

Jesús tru Setenteelø maig maramigwan asha marøbelai merrab

(Mt 26.59-68; Mc 14.55-65; Jn 18.19-24)

⁶³ Inchen tru møguelø Jesúsuan ashib srua købeløbe nun indza ashib, kurrøb incha, ⁶⁴ kabwan lusra, maløbøtø pashabe, trenchibelø køn:

—¿Mu kurragutsin kui? Namun kelarrab eshkau pøs— cha.

⁶⁵ Incha trømbøig tsalø wamab, katø chineh chibelø køn.

⁶⁶ Yandø tønrraben tru misagwan karubelø kølli misaameraba, sacerdotesmeran karubeløba, tru Moisés pørigwan kusrenanøbeløba trubalatømisra, nømui tru Setenteelø tru maig maramigwan asha marøbelai merrab Jesúsuan srua amben, ⁶⁷ nømbe trenchibelø køn:

—¿Ñi Cristo køtirru? cha. Namun eshkarra— cha.

Inchen nøbe trencha løtabig køn:

—Na ñimun: “Truig kur” cha, trenchibene, ñimbe køremøwei, ⁶⁸ katø na chigøben payene, ñimbe lètømwøwei inchantan cha. ⁶⁹ Inchen møingurrimbunøbe na, Møg Misra Arrubiibe tru maramburab marøb Tiuswei kusrmaygatø wamisrtrun— chibig køn.

⁷⁰ Inchene mayeeløba trencha payibelø køn:

—¿Trube, ñibe Tiuswei Nusrkain køtirru?— cha.

Inchene Jesúsbe trencha lètabig køn:

—Ñimdøweinguen nabe truigwein køn cha chab trendan— cha.

⁷¹ Inchene nømbe trenchibelø køn:

—¿Trube, nuimburab waminchabelø mas chiwein kuin palønrrab kø? cha. Nui tri-itøgatøwei wamindigwan namashib mører— cha.

23

Jesús Pilatoi merrab

(Mt 27.1-2, 11-14; Mc 15.1-5; Jn 18.28-38)

¹ Incha mayeeløba truyu tulundzuna pasrabiibe kurra, Pilatoimay Jesúswan srua amba, ² truyu ‘øyeeg køn, øyeeg marøbig køn’ chib mendabelø køn:

—I møøbe namui misagwei isuigwan kaig isubelø kønrrai ke peemaytø chab yunømarøb, Roma maya misagwan karubig Césarwan nam trendø an pagarab kuigwan pagaramumig køndamba, katø nøbe tru Cristo, kan rey kurtamba indi aser— cha.

³ Inchen Pilatobe Jesúswane trenchibig køn:

—¿Ñigan judíosmerai rey køtirru?— cha.

Inchen Jesúsbe trencha lètabig køn:

—Ñitøweinguen chab trendan— cha.

⁴ Inchen Pilatobe sacerdotsmeran karubelanba, misaameranba trenchibig køn:

—I møwane nabe chigucha chi kaig mariibe wetørramur— cha.

⁵ Inchen nømbe masken, masken inchib, trenchibelø køn:

—Judea pirau kerriguba, maya misaameran nui kusrenaniiløtøga ke chindi asamgaig maran cha. Galilea pirausrø pølbasa, mømbe yusrø treeg inchib arrun— cha.

Jesús Herodeswei merrab

⁶ Inchen Pilatobe trunun mørahe, trencha payibig køn:

—¿Trube, nøbe galileasriig kø chindah?— cha.

⁷ Inchen:

—Trusrigwein køn— chiben,

Pilatobe Jesúswane tru Galileasrø Herodes karub waim pirauig kuin kui ashabe, nune Herodesweimay purøørøbig køn, kaguen Herodeskucha tru kwalømmerawane Jerusalénsrøwei waben.

⁸ Inchen Herodesbe Jesúswan ashabe, truba kasraarabig køn, kaguende mas merrab-srøwei ashimmøø inchibig købig kua. Pøs Jesúsweimburab chigøben wamindi møørøbig kua, nøgurri Tius maramburab marigwan mari ashig kui inchibig køn. ⁹ Incha chigøben truba truba payen, Jesúsbe chigucha kusrua lètømuben, ¹⁰ sacerdotsmeran karubeløba, tru Moisés pørigwan kusrenanøbeløbabe ‘øyeeg køn’ chib; ‘øyeeg marøbig køn’ chib, truiløbe truba truba trenchib truyu purrabelø køn. ¹¹ Inchen Herodesbe nui suldaumeraba Jesúswan truba kaig inchib, indzatø ashib srua kua, truba tabzheelø kenana, Herodesbe Pilatoimay katøle øørøbig køn. ¹² Tru kwalømbe Pilatoba, Herodesba tab linchibelø misrøbelø køn, merrappe tsaleelø købig kuig.

Jesúswan yandø kwanrrai pasrøb

(Mt 27.15-26; Mc 15.6-15; Jn 18.39-19.16)

¹³ Inchen Pilatobe sacerdotsmeran karubelan køben, tru pirau ashib karub purrabelan køben misaameran køben tulundzunønrrai wama, ¹⁴ trenchibig køn:

—Ñimbe nan i mowan misaameran ke chine martrab isunrrai marøb unan chib, naimy srua amrrutan cha. Inchen nabe ñimui merrab maig kuitashchab ashchab paya ashen, nuinuube chigucha chi kalø mariibe wetørramur cha, tru ñim ‘øyeeg, øyeeg kalø marøptig køn’ chib pønrraigwane. ¹⁵ Katø Herodeskucha chi maramgaig kui asha, katøle nøbe namuimaytøwei ørin køn cha. Ñimuen ashke cha, ke kwanrraingatig maramdiibe chigucha chi kaig mariibe kaagøn cha. ¹⁶ Treekkurri nun ichaguchabe, elatchab— chibig køn.

¹⁷ Fiesta kwalømmerawane Pilatobe kan merrarrawa keerig pasrabisgwan inrrai elatsamig nebugig køn. ¹⁸ Inchen mayeeløba trenchib trashib mendabelø køn:

—¡Øigwane patsøgay! cha. ¡Barrabáswan inrrai elachi!— chib.

¹⁹ Pøs, tru Barrabásbe tru kailan keerinug pasrappe, tru Jerusalén ciudayu misaameran pera kaig marøb kurrikkurrimba, katø kweetsikkurrimba merrarrawa keerig pasrabig

købig køn. ²⁰ Incha Pilatobe Jesúswan elatchab isua, katøygug nømun waminchen, ²¹ nømbe mas mur trashibelø køn:

—¡Kurusyu mesrø! ¡Kurusyu mesrø!— chib.

²² Inchen pønmayyu Pilatobe katø trenchibig køn:

—¿Chindimba øyeg martrainchigue cha? ¿! møøbe chi kalø mara pasra? cha. Kwamnegatig maramdiibe nuinuube chigucha chi kaig mariibe nabe wetørramur cha. Ichaguchabe, inrrai lelatchab— chibig køn.

²³ Inchen nømbe:

—¡Kurusyu mesrø, mesrø!— chib, mur trashib miab køptø, nøm maig marøg kui indigwan treeg martrab uta pønrramisrøbelø køn. ²⁴ Inchen Pilatobe tru nøm miaigwane treeg kønrrai kørrømarøbig køn. ²⁵ Incha tru misaameran pera kaig marøb kurrikkurrimba, katø kweetsikkurrimba tru kailan keeri yau pasrab mowan nøm elatchai miaigwan, trunun inrrai elacha, Jesúswane nømun maig marøg køben martrai tranøbig køn.

Jesúswan kurusyu mesramsromay srua ambub

(Mt 27.32-44; Mc 15.21-32; Jn 19.17-27)

²⁶ Yandø Jesúswan kurusyu mesrønrrab srua amba, kan Cirenesrø møg, Simón taig, nøøørøsrøngurri arruben, nun kemørabe, kuruswan mutøsrø, Jesúswei wendautø mer-ranøbelø køn.

²⁷ Inchen misaamera truba nu mendig amben, truba yam ishumburmera nun isua wamamøra kishib, isuilø trashib amrruben, ²⁸ Jesúsbe nømun ashabe, trenchibig køn:

—Jerusalén ishumburmera, nan isua kishmøtø, ñimuyasiiba, ñimui uregweyasiiba isua kisay cha. ²⁹ Kaguende kwalømmøra attrun cha, øyah tamig: “Ureg tøgagønrrab kaimabelø, mana patsø kwanrriig kømeeelø købelø, mana urekkar kua mutsørøb nørrøranmeelaimbe mayanguen tab kuilø køn” tailø kømig. ³⁰ Katø misaamerabe nørrø tunmeran: “Namuim pala itøgørrørray” chib, shush tunmerane: “Namun itøgasrørray” chib mendønrrun cha. ³¹ Kaguene ¿tsøg tusrwanguen øyeg marøbeløbe, mas mulwane chitø martreherah?— chibig køn.

³² Katø pagatø kaig marøbelangucha Jesúsba kegøtø kwetchab srua ambubelø køn.

Jesúswan kurusyu mesrøb

³³ Incha kanbalø Calavera tainug puabe, truyu Jesúswane kurusyu mesrøbelø køn, tru pagatø nileelangucha, kanun kusrmay, kanun atsimaygatø. ³⁴ Inchen Jesúsbe trenchibig køn:

—Nai Møskai, nømun ulø paymø, pesannanrrig cha. Kaguende nømbe chi marermabguen isumøn— cha.

Inchen suldaumerabe Jesús kewagúilan suerte kucha, pirishibelø køn. ³⁵ Inchen misaamera truyu ashib køben, tru ashib karubelø købenguen Jesúswan indzatø ashib trenchibelø køn:

—Kanelanma kaigyugurri wesrabiibe nøasiitøwei pinaarrubash cha, nø tru Cristo, Tius Lawa Wesruig kuabe.—

³⁶ Inchen suldaumeragucha indza ashib, køchiibiwan mutchai yuuløb kemallabe, ³⁷ trenchibelø køn:

—¡Ñi tru judíosmerai rey kuabe, kwamønrrab ñitøwei chigøben mar!— chib.

³⁸ Inchen Jesús megaim palagucha kan pørig mesraig megabig køn, griegomay køben, latinmay køben, hebreomay købengue:

IIBE JUDIOSMERAI TRU REY KØN

chibig.

Jesúsba, tru pailø kailøba

³⁹ Inchen truyu melsraig melabeløgucha kane trenchib tsalø wamabig køn:

—¿Ñibe tru Cristo kømøtirru? cha. ¡Kwamønrrab ñitøwei chigøben mara, namungucha treetøwei martra!— cha.

⁴⁰ Inchen kane tru katøganun namig trenchibig køn:

—Ñigucha treegøtøwei mesraig megabendø, ¿ñungan Tiuswan kørig kømuitarru? cha.

⁴¹ Kaguende nambe øyeg marig melappe melsrambuawei melsrai meler cha. Kaguende nambe kaig marimburø øyeg melambuawei møra meløben, trune i møøbe chigucha chi kaig marig kømøn— chib.

⁴² Inchabe Jesúswan trenchibig køn:

—Jesús, ñi ashib karub wamigwan ñi ashib karub pøllbasrabe, nan isurrunrrig— cha.

⁴³ Inchen Jesúsbe trencha løtabig køn:

—Nabe ñun cierton trendamønrrun cha: Møindøweinguen naba purø tabzhiisrø wanrrabguen— cha.

*Jesús kwaig**(Mt 27.45-56; Mc 15.33-41; Jn 19.28-30)*

⁴⁴ Inchen yandø kwaløm tøbøtag køsrøn køben, tre uraskurri maaben las treskatig pirau ørøba løstiiig kørrømisren, ⁴⁵ pørrbe løtsøraben, Tiuswei yau tru purø tab llensuzhig kelarrab sötø mesraig megabiibe tøbøtakkørrab kølsrøbig køn. ⁴⁶ Inchen Jesúsbe mur trashib trenchibig køn:

—Nai Møskai, nai espíritun ñui tasku tranar— chib.

Trenchabe yandø isrømuptinchibig køn.

⁴⁷ Inchen tru Roma suldau cienelan nø karubiibe øyeeg purayaigwan ashabe, Tiuswan trenchib truba tabig waminchibig køn:

—I møøbe, isa kømø, sølgandø tabig uñibig kuin køn— chib.

⁴⁸ Inchen maya misaamera øyeeg purayailan truyu ashib pønrrabeløbe, truba isub nømui pechondø kurrarørb truyugurri ambubelø køn. ⁴⁹ Inchen mayeelø Jesúswei asiløba, ishumburmera Galileasrøngurri nui mendig amrrubeløbabe yabsrøngurrindø ashib pønrrabelø køn truyu treeg puraiben.

*Jesúsuan sørig**(Mt 27.57-61; Mc 15.42-47; Jn 19.38-42)*

⁵⁰ Kan møg José taig Judea pirau Arimatea pueblosriig købig køn, truiibe tru Setenteelø maig maramigwan asha marøbelai utuig truba tabig, katø sølgandø uñibig. ⁵¹ Katø tru Josébe Tius nø ashib karub wainugwigwan muniirabigwein kuabe, tru Setenteelø maig maramigwan asha marøbelø ‘øyeelø martrab’ chib kørrømara pønrraigwanba, nøm chi mariilanbabe chi tab kømui asig køn. ⁵² Incha nøbe Pilaton ashchab ya, Jesúswei asrwan miawa, ⁵³ kurusyugurri pinøsrwabbe, kan lino llensutøga kirra, peñayu søramig trab lalig mungen søriimiig pasrabigu sørabig køn. ⁵⁴ Katø judiosmerai isram kwaløm tru sábadoweyasig tamaram kwaløm maaben købene, yandø tru sábadø kwaløm pumibe ke pølbasarmitø palabig køn.

⁵⁵ Inchen ishumburmera Jesúsuan Galileasrøngurri mendig amrrubeløbe nømgucha mendig amba, sørigwan ashib, Jesúswei asrwan mandø wayigwan ashib inchibelø køn. ⁵⁶ Incha nømbe katøle ambabe, may irrabzheeløba, srølameløba tamarabe, tru maig maramigwan martrai Moisés maig karuig køben, tru sábadø kwalømbe israbelø køn.

24*Jesús øsiraig**(Mt 28.1-10; Mc 16.1-8; Jn 20.1-10)*

¹ Srø trune pølbasarø kwaløm tru ishumburmerabe ullarbatø løtsøzhig søriinumay amrrubelø køn, nømui may irrabzheelø nøm tamarilan srua. Inchen nømbe katøgan ishumburmeragucha amrrubelø køn. ² Incha nøm truyu pua, ashene, tru sørinug kasraig sruube yandø truyu kømø, malsrain tsuptinchen, ³ nømbe kebambabe, Señor Jesúswei asrwane kalaptinchibelø køn. ⁴ Inchen, treeg køben, kwaariilø chinchabguen kaima pønrrøbene, mømbe pailø møguelø, tør pilabelø kewar, nømuim pulu pønrraptinchen, ⁵ nømbe kørig køptø malømeran pirausrøngatig kebachen, tru møgueløbe trenchibelø køn:

—¿Ñimbe øsiguigwane kwaitai utube chindimba lague? cha. ⁶ Yube mu kaagøn cha. Katø øsiraig køn cha. Nø Galileasrø uñib urassrøwei ñimun maig wamindiilan isuy chibelø køn, ⁷ tru nø øyeeg taigwan: “Na, Møg Misra Arrubigwane kaig marøbelai tasku tranig kømig nebuben, kurusyü mesrøben, pøn kwalømyube katø øsiiranrrun” taigwan.—

⁸ Inchen ishumburmerabe Jesús chi wamindiilan isua, ⁹ sørinukkurri katøle amrrua, tru onceelanba, katø mayeelanba maig purayaigwan kerrigu eshkabelø køn. ¹⁰ Inchen tru chi purayaigwan tru Jesús nøashib karua øriilan eshka ishumburmerabe iilø købelø køn, María Magdalenaba, Joanaba, Jacoboi usri Mariaba, katøgan ishumburmeraba. ¹¹ Inchen nømune tru ishumburmera wamindiibe ke ka indzøkken kønrraptiig mørøraben, nømbe køremeelø køn.

¹² Inchendøgucha Pedrobe søriisrømay ashchab luløb ya, sørinug trarraashene, tru kirra sørig llensumeratø waraptinchen, treeg purayaigwan ashabe, ‘kan øyeebe maig kermab’ truba kwaarig, yamay ibig køn.

*Jesús Emaúsrømay ambi mayu arrub**(Mc 16.12-13)*

¹³ Inchen tru kwalømdøwei pailø Jesúsuan lincha amøñibelø købeløbe Emaús taig pueblosrømay ambubelø køn, Jerusaléngurri once kilømetrosburab ambiisrø, ¹⁴ tru purayailan nømdø kerrigu waminchib. ¹⁵ Inchen nøm waminchib payiyab ambub pønrramnetø, Jesúsbe nøashib kemalla, nømbe ib mendøben, ¹⁶ nømbe nømui kabmerabe

kasrailø latalilø kua, nune mu kuinguen nebua ashmeelø køn. ¹⁷ Inchene Jesúsbe trencha payibig køn:

—¿Ambub pønrrappe, ñimbe chiwan waminchibrre amgue?— cha.

Inchen nømbe pønrramisrøppe, isubiitø ke maløguen mindiilø købig køn. ¹⁸ Inchen møikkørøn, Cleofas taibe, nune trenchibig køn:

—Møin kwalømmerawan Jerusalén chi purayaigwan mayeeløba wammøra køben, ¿ke ñitøgan wammørmfíg truyu arruatiig pua tsutirru?— cha.

¹⁹ Inchen Jesúsbe:

—¿Chi purayah?— cha payen, nømbe trenchibelø køn:

—Nazaretsrø Jesúsweimburab waminder cha. Truibe Tius maig karuigwan kan eshkabig, nui mariiløyu, nui wamindiiløyu maramburab marøbig købig køn cha, Tiuswei merrab lata, katø maya misagwei merrab lata. ²⁰ Inchen truigwane sacerdotemeran karubeløba, namun ashib karub purrabeløba kurusyu mesra, kweetsig kønrai tranan cha. ²¹ Nam isuppe, Israel maya misagwan kaigyugurri wesranrabiibe nøwein kønrraitamab isua muni-iraiig købig køn cha. Møimbe yandø kweetsig pøn kwalømguen purayan cha. ²² Inchagucha namui utu ishumburmerabe namune kwaarørøtan cha, tru ullarbatø søriisrø ashchab ambubeløbe. ²³ Incha nui asrwan wetørramuig kuig køppe, namune trenchib amrrubelø køn cha, nømune: “Angelesmera kenamisra: ‘Jesúsbe øsig unan’ chitan” chib. ²⁴ Inchen møiløgrøn namui lincha amøñibelø søriinumay amba, ishumburmera maig eshkaig treeg wetørrabwei inchendø, Jesúswane ashmuin køn— chibelø køn.

²⁵ Inchene Jesúsbe trenchibig køn:

—¿Ñim kui, chugúinguen mørmeelø! cha. ¿Tius maig karuigwan eshkabelø chi wamindilan kørenrraptøgucha ke yaandø, yaandø amøñibelø køn! cha. ²⁶ ¿Nui tørguegwalmabigu nø wamnug kebimøwatø, Cristogan øyeeløyumerrig trømbøbig marinab purayamig palømuig kuitarru?— cha.

²⁷ Incha nøbe tru Moisés pøriiløyugurri pølbasa Tius maig karuigwan eshkabelø pøriiløyu chishtø eshkab pureb ya, Tiuswei wamyu nuimburab waminchibig pørig pønrrabelan kerriguba øyeeg køn cha nømun eshkabig køn.

²⁸ Incha tru Emaús pueblosrø pub ambabe, Jesúsbe nui maywan ke merrabmisra, ib inrrab lataig inchen, ²⁹ nømbe ke kørrømsri ashchab inchibelø køn. Inchabe trenchibelø køn:

—Namba kørrømsrø cha. Kaguen yandø maaben køben, yandø pilliranrraindan— cha.

Inchen Jesúsbe nømbe kørrømsrøtrab kebya, ³⁰ nømbe mishatsigu wawabe, pirriwan muta, Tius Møskawan ‘mayanguen pay’ cha, pirishabe, nømun srørrøbig køn. ³¹ Inchen nømbe Jesús kui nebua ashiptindinaben, Jesúsbe waitø kenamuptinchibig køn. ³² Inchen nømbe kangurri kangurri trenchibelø køn:

—Au yamba, nø namun maysrø Tiuswei wam pørig pønrrabelan øyeeg køn chib eshkab arrubene, namune namui manrraube ke nøs, nøs indig kømøh— cha.

³³ Inchen nømbe tru urastø Jerusalénmay katø amba, trusrømbe tru once Jesús kusrenanøb pera uniiløba, truyu nømbe lincha purrabeløba tulaamba purrabyuh pubelø køn. Inchen truyu purrabeløbe trenchibelø køn:

³⁴ —Isa kømø, Señorbe katø øsiirain køn cha. Incha Simónwan kenamisrin køn— cha.

³⁵ Inchen tru pailø pubeløbe maysrø maig purayaigwan kerrigu eshkabelø køn, katø Jesús pirriwan pirishiben, yandø nø kui nebua ashiptindigwanba.

Jesús nui kusrenanøb pera uniilan kenamisrøb

(Mt 28.16-20; Mc 16.14-18; Jn 20.19-23)

³⁶ Inchen nøm tru waminchib purramnetø, Jesúsbe nømuiin tøbøtag pasramisrøb:

—Ñimun chi isumgaig, tab køn— chibig køn.

³⁷ Inchen nømbe kwarilø truba kørig kuilø kan møsigwan asermab isubelø køn. ³⁸ Inchen Jesúsbe trenchibig køn:

—¿Chindimbarre kørig kui inchigue? cha. ¿Ñimui manrraube chindimbarre na kømuitamab isugue? cha. ³⁹ Nai tasiimeranba, srøbmeranba asay cha. Peg kømø, natøwein kur cha. Nan katørab ashib inday chibig køn. Kan møsiibe yaungawei, ni tsutsikkawayig køn cha, ñim nan asi lataig kømø.—

⁴⁰ Incha iigwan chab trenchabe, tasiimeran srøbmeran eshkab kenamaren, ⁴¹ nømbe kasrag købiibah kan øyeebe maikkermab kwaarøbiibatø, katøgucha køremø srø pønrrøben, Jesúsbe trenchibig køn:

—¿Ñimbe yu chigøben mamig tøgagømgueh?— cha.

⁴² Inchen nømbe nun peskau pitu tsirigwan srørrøen, ⁴³ nømbe uta, nømui malau mabig køn.

⁴⁴ Inchabe trenchibig køn:

—Na ñimba uñippatøwei nabe ñimun iilan wamindig køn cha, tru maig maramigwan martrai Moisés pøriiløyu lata, Tius maig karuigwan eshkabelø pøriiløyu lata, Salmosyu lata naimburab waminchibig pønrrabiibe truyu maig taig kerriguh treeg nebunrrabig køn—chib.

⁴⁵ Incha nømune Tiuswei wamwan pørigwan tøgandø øyeeg kuitamab isunrrai nømui isubigwan kura, ⁴⁶ nømune trenchibig køn:

—Øyah chibig pørig pasran cha, Cristobe trømbøig marinab megamig nebuben, pøn kwalømyube kwailai utugurri katø øsiiraben, ⁴⁷ mas kaig marmønrrab isua møramigwanba, nømui kaig mariilan ulø paymø pesannilø kømigwanba nui munchiyu eshkab kusrenanamig kønrrai Jerusalénsrøngurri pølbasa, chu pirausreelandøgucha kerriguba. ⁴⁸ Inchen møi øyeeg purayaigwan ashibeløbe ñim køn chibig køn. ⁴⁹ Au, nai Møskai tranrrab misra kørømmisrigwane nabe øramønrrun cha, ñimuim pala. Inchendø ñimbe yu Jerusalén ciudayutø ka kørømmisray cha, maramburab marøbig srømbalasrøngurri arrua, ñimun pinøbulamnegatig.—

Jesús srømbalasrømay nebib
(Mc 16.19-20)

⁵⁰ Incha Jesúsbe ciudayugurri wambig Betaniasrøngatig nui kusrenanøb pera uniilan pera ya, tasiimeran kusruabe, nømuiimbura 'mayanguen tabig kønrrain' chibig køn. ⁵¹ Incha trenchib pasraimaytø nømuiim pulugurri tarømmisen, nune srømbalasrømay srua yaig køn. ⁵² Inchen nømbe Señorweimbura truba tabig wamincha, Jerusalénmay katø truba truba kasrag amba, ⁵³ nømbe chu uragucha Tiuswei yau Tiuswan tabzhig waminchib købelø køn.

San Juan

Wambe kan mɔg misrig

¹ Chigucha kaabenbatø tru Wambe manawei pasrabguen inchibig kɔn. Tru Wambe Tiusba pasrøben, katø tru Wambe Tius kɔbig kɔn. ² Tru Wambe srøsrøgurri Tiusba pasrabig kɔbig kɔn. ³ Tiusbe chiwandøgucha marøppe, tru Wamgurriwei marig kɔn. Inchen chitøgucha Tius mariilø pønrrabiibe, tru Wamgurriin kømíibe chigucha mariilø kaagøn. ⁴ Øsig kømibe nuinug pasrøben, tru øsig kømig pasrabiibe mayeelayasig tər kɔbig kɔn. ⁵ Inchen tru tərbe løstøyu piløben, tru tərwane løstiibe chinchaguen kasrønrrab kaimaig kɔn.

⁶ Kan mɔg kɔbig kɔn, Tius karua ørig, truiibe Juan taig, ⁷ tru maig kuigwan waminchabig. Nøbe tru tərweimburab maig kuigwan waminchen, nøgurri mayeeløba kørenrrai. ⁸ Juanbe nøashib tru tər kømøtø, tru tərweimburab maig kuigwan ka waminchaptø arrig kɔbig kɔn. ⁹ Tru tər ciertonig maya misagwan pilabiibe yu pirau kebarrub arrubig kɔn.

¹⁰ Inchen truiibe yu pirau pasrøben, katø Tiusbe pirøwan truikkurri marig kuindøgucha, pirau misaamerabe nune mu kuinguen ashmuig kɔbig kɔn. ¹¹ Trendø nuinumay nøbe arrubendø, nui misaamerabe utømøtø, kaasig kɔn. ¹² Trune mutøgucha nun kashmø, utab, nui munchiyu kørebelane Tiuswei ureg misra pønrramig kønrrai tranig kɔn. ¹³ Truiløbe yu pirau maig kal-labelø køben treeg kal-lawar kømøwei, ureg tøgagug køben tøgagüig ureg latailø kømøwei, katø møwei isuig maig køben, trumay kømøtø, Tiusweinug kal-lawar kɔn.

¹⁴ Tru Wambe kan mɔg misra, namui utu unig kɔbig kɔn. Inchen nambe tru nui tørguegwalmabigwan tab asig kɔbig kɔn, tru Møskaweinukkurri arrubig Kandø Nusrkawei ka yandø tab indiiba, ciertoniibatø netsigwan. ¹⁵ Juan truigweimburab maig kuigwan eshkappe, trenchib waminchibig kɔn:

—Iig kɔn cha, tru na øyah taig købiibe, nai wendau arrubiibe, na lataguen kømø, nøbe purø nuig kɔn cha, kaguende nagen kømøwatø, nømerrig kɔbig kua.—

¹⁶ Kaguende tru chigucha palømig nui tab indigugurri nambe mayeeløba tru ka tab indigwane srøig, srøig itø uter. ¹⁷ Tru maig maramigwan martrai pørigwane Moiséskurri tranig kɔbig kɔn. Inchen tru ka yandø tab indiiba, newan ciertoniibabe Jesucristogurri arrig kɔn. ¹⁸ Tiuswane mugucha managuen ashmuinrrun. Inhendø nui Kandø Nusrkai Tius, managucha Møskaweim pulu trag lincha pasrabig, truig namun kenamaran, Tiuswan ashibelø kønrrai.

Juan Bautista Jesucristoimburab waminchib

(Mt 3.11-12; Mc 1.7-8; Lc 3.15-17)

¹⁹ Iig kɔn, tru Jesúsweimburab maig kuigwan Judíosmeran Juan eshkaig. Judíosmerabe Jerusalénsrøngurri sacerdotsmeranba, levtasmeranba karua ørøbelø kɔn, Juanwan: “¿Ñibe mu kugu?” cha payrrab. ²⁰ Inchen Juanbe sørømø, maig kuigwan eshkaib, masken maig kuigwan kelarrab eshkaib kɔn.

—Nabe Cristo kømur— chib.

²¹ Inchen nømbe katøle payibelø kɔn:

—Trube, ¿mu kugu? cha. ¿Kabe Tius maig karuigwan tru eshkabig Eliasteh?— cha.

Inchen Juanbe:

—Tru kømur— chibene, nømbe payibig payibelø kɔn:

—Trube ñigan, ¿Tius maig karuigwan tru eshkabig køtirru?— cha.

Inchen nøbe:

—Kah— chibig kɔn.

²² Inchen:

—Trube, ¿mu kugu? chibelø kɔn. Kaguende nambe tru namun karua ørøbelan eshkamig kɔn cha. Trube, ¿ñuimburappe, ñibe mu kur chinrragu?— cha.

²³ Inchen nøbe trenchibig kɔn:

—Kan wam mu misag warab waraimønug trenchib trashibig, truig kur cha: “Señorwei maywan ølgandø kuray” chib, tru Tius maig karuigwan eshkabig Isaías maig taig, treekke.

²⁴ Inchen tru Juanwan payrrai karua ørøbeløbe fariseosmera købelø kɔn. ²⁵ Tru karua øriiløbe trenchib payibelø kɔn:

—Trube, ¿misagwan chindimba piu umbu ulsrøbig kugu cha, Cristo kømøwei, Eliás kømøwei, Tius maig karuigwan tru eshkabig kømøwein købendøbe?—

²⁶ Inchene Juanbe trencha løtabig kɔn:

—Nabe pitøga pi pinøbulrrai ulsrøbig kur cha. Inchendø ñimui utube, ñim asiimíig, kan mugøsrøn pasran cha, ²⁷ tru nai wendau attrabig. Nabe trunune nui alpargatisyu tsiwanguen pichib pasramig truburab kømuintan— cha.

²⁸ Øyeelø kerrigu pureppe, Betaniasrøn purayaig køn, Jordán pi ambøgatøsrø, tru Juan misagwan piu umbu ulsrøb uniisrø.

Jesús, tru Tiuswei Ubisha-unø

²⁹ Indiiibe katø kwaløm Juanbe Jesús nuim pulumay pub arri ashabe, trenchibig køn:

—Asay cha, iibe Tiuswei tru Ubisha-unø piraueelø kaig mariilan kerranrrabig køn cha. ³⁰ Iig køn, chibig køn, tru na øyah taig: “Nai wendau attrab møøbe na lataguen kømø, mas nuig køn cha. Kaguende naguen kømøwatø, nøbe manawei købig kuig køn” cha. ³¹ Natøweinguen nabe nune mu kui ashmíig kuig køn cha. Inchendø Israel misaameran mu kui nebua ashchai kenamartrab, misagwan piyu ulsrøb arrur— cha.

³² Katø Juanbe maig kuigwan trenchib eshkabig køn:

—Nabe Espiritu Santon kan paloma lataig srømbalarøngurri kørraarra, nuim pala pasramisri ashar cha. ³³ Inchen nabe katøgucha nune mu kui ashmúig køn cha. Inchen misaameran pitøga pinøbulrrai piu ulsrønrrai nan Karua Ørøbiibe trendaig købig køn cha: “Tru ñi ashen Espiritu Santo nuim pala kørraarra, pasramisinabig, truig kønrrun cha, Espiritu Santotøga pinøbulrrabiibe.” ³⁴ Inchen nabe yandø trunun nai kaptøga asha, truiibe Tiuswei Nusrkain kui nabe eshkabig kur— chibig køn Juanbe.

Jesúswei kusrenanøb pera uniielø srøsrøelø

³⁵ Katø kwaløm Juanbe tru nui mendig amøñibelø parba katøle truyu pasrøwabe, ³⁶ Jesús pureb pasrai ashabe, Juanbe trenchibig køn:

—Au, asay cha, øibe Tiuswei tru Ubisha-unø køn— cha.

³⁷ Inchen tru Juanwei pailø mendig amøñibeløbe tru trendaigwan mørabe, Jesúswei mendig ambubelø køn. ³⁸ Inchen Jesúsbe keesha asha, nui mendig amrrui ashabe, trenchibig køn:

—¿Chi lague?— cha.

Inchen nømbe trenchibelø køn:

—¿Kusrennøbig, chu wabig kugu?— cha.

³⁹ Inchene Jesúsbe trenchiptinchibig køn:

—Ashchab amrruy— cha.

Inchen nømbe amba, chu wabig kui ashabe, tru kwalømbe truyu nøba kørømisrøbelø køn, kaguende yandø las cuatro lutau køben.

⁴⁰ Tru pailø Juan wamindigwan mørøbelø Jesúswei mendig ambubeløbe, kane Simón Pedroi nuneg Andrés købig køn. ⁴¹ Incha Andrésbe nuneg Simónwanmerrig lanrrab ya, wetørrawabe, trenchibig køn:

—Nabe si, Mesíaswan wetørrer— cha, (Mesías chippe, Cristo taig).

⁴² Incha Andrésbe Simónwan Jesúsweisrømay pera iben, Jesúsbe Simónwan ashabe, trenchibig køn:

—Ñibe Simón køn cha, Juanwei nusrkai. Inchendø mømibe yandø Cefas taig kønrrun— cha, (trenchippe, Pedro cha wamig).

Felipenba, Natanaelwanba Jesús wamab

⁴³ Katø kwaløm Jesúsbe Galilea pirausrømay inrrab isua, Felipen wetørrawabe, trenchibig køn:

—Nai mendig attra— cha.

⁴⁴ Tru Felipebe Betsaida puebløsríig købig køn, tru Andrésba, Pedroba waraisriig. ⁴⁵ Inchen Felipebe Natanaelwan lanrrab yabe, trenchibig køn:

—Tru maig maramigwan martrai Moisés pøriguba, katø Tius maig karuigwan eshkabelø pøriguba, truiløyu nuimburab pørig pasrab møwan nambe wetørrer cha. Truiibe Nazaret puebløyu Joséwei nusrkai, Jesús køn— cha.

⁴⁶ Inchen Natanaelbe trenchibig køn:

—¿Nazaretkurringan chi tappaig webattraitarru?— cha.

Inchen Felipebe trenchibig køn:

—Trube, ashchab amø pøs— cha.

⁴⁷ Inchen Jesúsbe Natanael kemallib arri ashabe, trenchibig køn:

—Øibe si, isa kømø, israelita kui asamdiig køn cha. Nuinuube treeg kønmb ashchaidø indiiibe chigaig køn— cha.

⁴⁸ Inchene Natanaelbe trencha payibig køn:

—¿Nane treeg kuimbe mandø incha ashku?— cha.

Inchene Jesúsbe trenchibig køn:

—Felipeguen ñun wamømøwatø, ñi higuera tusr umbusrø wabenwei nabe ñun asig køn— cha.

⁴⁹ Inchen Natanaelbe trenchibig køn:

—Kusrennøbig, ñibe Tiuswei Nusrkai, Israel misagwei Rey køn— cha.

⁵⁰ Inchene Jesúsbe trenchibig køn:

—¿Na ñun: “Higuera tusr umbusrø waben ashar” cha, na trendaimba, ñigan nan køretirru? cha. Øyeetø kømø, purø nørreeløguen ñibe ashchabguen— cha.

⁵¹ Incha katø Jesúsbe trenchibig køn:

—Pøs nabe ñimun isa kømø, cierton trendamønrrun cha: Srømbalabe kurim pasrøben, Tiuswei ångelesmerabe Møg Misra Arrubigweinukkurri nebambub, katø nuimay kørrørrub, inchib køben ñimbe ashchabguen— cha.

2

Caná pueblorø kasharab

¹ Pøn kwalømyu Galilea pirau Caná pueblouy kasharab køben, Jesúswei usrimbe truyu wabig køn. ² Inchen Jesúswanba, nui kusrenanøb pera uniilanba, truilangucha kasharab yaumay lynchab amrrunrai eshkaig købig køn. ³ Inchen vinobe patsaptinchen, Jesúswei usrimbe trenchibig køn:

—Vinone chab patsøgain køn— cha.

⁴ Inchen Jesúsbe løtappe trenchibig køn:

—Ishug, ¿nane chindimba iigwan maringarunrrab inchigu? cha. Kaguende na treeg maramig urabe pumø srø køn— cha.

⁵ Inchen usrimbe truyu mendig melabelan trenchibig køn:

—Nø maig chiben, trunun treeg maray— cha.

⁶ Truyube srug køtsømera seis pønrrabig køn, judíosmera tru nøm kaig marigwan chish misramigweyasing pi usrøb tøgagüilø. Tru køtsømerabe setenta, kabe cincuenta litros kebelø købig køn. ⁷ Inchen Jesúsbe tru pirishibelan trenchibig køn:

—I køtsømeran pi netsøganay— cha.

Inchen netsøzheelø netsøganen, ⁸ Jesúsbe trenchiptinchibig køn:

—Møimbe lamø truyugurri wesrawa, tru novios yau chi maramigwan ashib pasrabigwan srua amba, tranay— cha.

Inchen nømbe treeg marøbelø køn. ⁹ Inchen tru ashib pasrabiibe tru pibe vino misrigwan mucha mørendø, chugurri srua amrruimbe ashmíg køn. Truyu purugub pønrrabelø truiløbe asha købig køn, piwane nøm wesraig kua. Inchen truyu ashib pasrabiibe tru novion wama, ¹⁰ trenchibig køn:

—Mutøgucha srøsrøbe tab vinon sørørbelø køn cha. Inchen yandø tru linchai eshkailø lincha purrabelø tsabø muchene, tab vino kømígwan ka srørrørbelø køn cha. Trune ñibe tab vinon møingatic esegain køn— cha.

¹¹ Iig, tru srøsrøzhitø Tius nøba pasrain kui asha kønrai Jesús pølbasa mariibe Galilea pirau Caná pueblorø marig kuig køn. Tru treeg mariitøga nui tørguegwalmabigwan ashchai kenamaren, nui kusrenanøb pera uniiløbe nun kørebelø køn.

¹² Inchen øyeelø chab puraiben, Capernaum pueblorømay ambubelø køn, Jesúsbe nui usrimba, nui nuneløba, nui kusrenanøb pera uniiløba. Incha truyu mam kwalømdø warabelø køn.

Tiuswei yawan Jesús chish marøb

(Mt 21.12-13; Mc 11.15-18; Lc 19.45-46)

¹³ Yandø tru judíosmerai Pascua Fiestan maramig pub lutau køben, Jesúsbe Jerusalén ciudasrømay ibig køn. ¹⁴ Inchen Tiuswei yaube møimbe waaramera køben, ubishamera køben, palomamera køben yanøbelø purrai ashib, katø misagwan an yunømarøbelø køben purrai ashibig køn. ¹⁵ Incha trunun ashippe, Jesúsbe ichabetamig kan latigo mara, mayeelanba tru Tiuswei yaugurri webetabig køn, tru nømui ubishameranba waarameranbañau. Incha tru an yunømarøbelai anwane pirau wiita, mishatsiimeran utsøbetabig køn. ¹⁶ Incha tru paloma yanøbelane trenchibig køn:

—Iilane yugurri wesruiy cha. Nai Møskawei yawane kan penab, yanøb indi ya maramig kømøn— cha.

¹⁷ Inchene nui kusrenanøb pera uniiløbe Tiuswei wamwan pørigu trenchibigwan isupt-inchibelø køn: “Ñui yabe ñuindø kønrraimab isuptø, nane ke chindamdø køtan” chibigwan.

¹⁸ Inchen judíosmerabe trencha payibelø køn:

—¿Ñi øyeema mariibe, Tius ñiba pasrain kui asamibe namun chi kenamartrunragu?— cha.

¹⁹ Inchene Jesúsbe kusrub løtappe trenchibig køn:

—I Tiuswei yawan pøtiitsay cha. Inchen nabe pøn kwalømyutø katøyug mara pasramønrrun— cha.

²⁰ Inchene judíosmerabe trenchibelø køn:

—Tiuswei yawane marøb meløwa cuarenta y seis añosyu chab marig købig køn cha. ¿Ñigan pøn kwalømyutø kusranrrurmab isutirru?— cha.

²¹ Jesúsbe tru Tiuswei yawan waminchipe, nui asrwan wamindig kuig køn. ²² Inchawei Jesús katøyug øsiirabene, nui kusrenanøb pera uniløbe tru nø trendaigwan isua, Tiuswei wamwan pørigwanba, Jesús nø maig wamindigwanba kørebelø køn.

Jesús mayeelan newan ashibig

²³ Jesús Jerusalén ciudasrø Pascua Fiestayu wabene, møiløgøben, truba nu, nui munchiyu kørebelø køn, Tius nøba pasrain kui asamig nørreelø nø mariilan ashabe. ²⁴ Inchendø Jesúsbe ka isatø inchib pønrrai asha køremig køn, kaguende nøbe mayeelan mailø kuigwan asha pasrøwa. ²⁵ Katø misagweimburab øyeelø køn cha, mu eshkam palaim pasrømig køn, kaguende nøbe nøashib misaamera maig isubelø kuigwan tørguelarrab asha pasraig kua.

3

Jesús Nicodemoba waminchib

¹ Kan fariseo Nicodemo taig købig køn, judíosmerai utu nø karub møg. ² Truibe Jesúsweimay yem ashchab arruabe, trenchibig køn:

—Kusrennøbig, ñibe kusrenanøbig Tiusweinukkurri arruauig kui asha ker cha. Kaguende mugucha Tius maramburab mariilan asha kønrrai martrab kaiman cha, ñi mari lataibe, Tius nøba pasrømubene.—

³ Inchene Jesúsbe løtappe trenchibig køn:

—Nabe ñun isa kømø, cierton trendamønrrun cha: Katøyug srøig kal-lamíbe Tius nø ashib karub waisriigwan ashchab kaimanrrun— cha.

⁴ Inchen Nicodemobe payibig køn:

—¿Kan møg yandø kølig misra, katøyuube mandø incha kal-layasamø? cha. ¿Kabe katøyug usrai patsau kebinrrautah cha, katøyug kal-lanrrab?—

⁵ Inchene Jesúsbe trenchibig køn:

—Nabe ñun isa kømø, cierton trendamønrrun cha: Pigurrimba, Espiritu Santogurrimba kal-lamíbe Tius nø ashib karub wainug kebinrrab kaimanrrun cha. ⁶ Møskaløgurrin kal-labiibe, misag maig køben treetøwein køn cha. Inchen Espiritu Santogurrin kal-labiibe, espíritu maig køben treetøwein køn cha. ⁷ “Mayeelø katøyug srøig kal-lamig køn” cha, na trendaigwan, kan treebe maig kernab isub kwaara ashmøta chibig køn. ⁸ Isig ichibiima muba køben itsan cha, wanrimbe mørendø, chugurri arri mørmuwei, ni muba yai mørmuwei indan cha. Øyeetøwein køn chibig køn, mayeeløba Espiritu Santogurrin kal-labeløbe.—

⁹ Inchene Nicodemobe katøyug payibig køn:

—¿Treebe maig kønrrab køh?— cha.

¹⁰ Inchene Jesúsbe trenchibig køn:

—¿Ni Israel misaamerai utu kusrennøb møg købendø, ñigan øyeelan chigúi mørmig køtirru? cha. ¹¹ Nabe ñune isa kømø, cierton trendamønrrun cha: Nambe maig kui asha waminchib, katø namashib namui kaptøga asigwan waminchen, nam eshkaigwan ñim utømøn cha. ¹² Na yu pirau chine pønrrabelan waminchen, ñim trununguen køremuibe, trube ¿srømbalasarøn pønrrabelan waminchene, chinchka kørenrrague? cha.

¹³ Srømbalasarømaybe mugucha nebmuben, tru srømbalasarøngurri kørarrubig, tru Møg Misra Arrubiitøwei nebyan cha.

¹⁴ Moisésma mu misag warab waraimønug tsandzøn ulwan tsigu mesra kusruibe, øyeetøwei tru Møg Misra Arrubigwangucha mesra kusraig kømig palønrrab køn cha.

¹⁵ Mutøgucha nun kørebiibe tru managatig øsig kømigwan tøgagønrrai.

Tiuswei undag købig maya misagweyasig

¹⁶ Tiusbe yu pirau misagwan truba truba isua undag køptø, nui kandø Nusrkawanguen tranig køn cha, møikkøben nun kørebiibe kaigyu kebeña pinab pinømtø, masken managatig øsig kømigwan tøgagønrrain cha. ¹⁷ Kaguende Tiusbe nui Nusrkawan yu piraumay ørøppe, yu pirau misagwan kaigyu pønrrønrrai pønrsønrrab kømøtø, masken nøgurri yu pirau misaameran kaigyugurri wesranrrai ørig køn cha.

¹⁸ Tiuswei Nusrkawan kørebigwane kaigyu pasrønrrai pasrimig køben, trune nui Nusrkawan køremigwane manaweinguen kaigyu pasrønrrai pasrikken køn cha, kaguende Tiuswei kandø Nusrkawei munchiwan køremiukkurri. ¹⁹ Inchen tru kaigyu pønrrønrrai pønrsøppe, treekkurrin køn cha: tru tørbe piraumay arruben, misaamerabe tørwan kømø, løsttiigwangoaba undaarabelø køn cha, kaguen nømui mariiløbe tabig kømø, kailø kuikkurri.

²⁰ Mutøgucha kaig marøbiibe tørwane ashig kømub, tsalø kuinchib, toryumaybe kemallmøn cha, nõmui kaig mariilø kenamisraitamab korig køptø. ²¹ Inchen mõikkøben tru ciertonig maig køben, treeg uñibiibe toryumay kemalan cha, nui mariiløbe Tius maig kønrrain køben treeg mariilø kuin kui torgandø kenamisrai.—

Juan Bautista katøyug Jesúsweimburab waminchib

²² Tru øyeelø chab puraiben, Jesúsbe nui kusrenanøb pera uniiløba Judea pirausrømay ya, truyu maya yana køsrøn nõmba misagwan piu umbu ulsrøb uñibig køn. ²³ Inchen Juangucha treetøwei marøb uñibig køn, Enon taisrø, Salim pulu, kaguende truyube truba pi køben. Misaamerabe nõrrø amrrua, piu umbu ulsrailø købig køn. ²⁴ Øyeeg pureppe, Juanwan kailan keeri yau pasrmøwatø kuig køn.

²⁵ Inchen mõiløgsrøn Juanwei mendig amøñibeløbe kan judiøba payiyab aleguiyab mendabelø køn, tru kaig marigwan chish maramig køn taigweimburab. ²⁶ Inchabe Juanweimay amrruabe, trenchibelø køn:

—Kusrennøbig, tru møg Jordán pi ambøgatømayrø ñiba uñibig, tru ñi namun wamindi mõøbe, mõimbe misaameran piu umbu ulsrøb uñen, mayeeløba nuimaygøba amban— cha.

²⁷ Inchene Juanbe trenchibig køn:

—Mugucha chi utønrrab kaimanrrun cha, srømbalarøngurri tranmubene. ²⁸ Na øyeeg taigwane pøs ñimdøweinguen mõrar køn: “Nabe Cristo kømøtø, nui merrab attrai karua ørig kur” taigwan. ²⁹ Tru srai misrtrabigwan pera pasrabiibe keg misrtrabig truiq pera pasran cha. Inchen tru keg misrtrabigwei trendø trag lynchibiibe truyu mørøb pasrøwa, nui wamwan mørabe, truba truba kasraaran cha. Pøs øyeetøwei, nai kasrag købiibe mõimbe neig køn cha. ³⁰ Nøbe purø nuig misrøb yamigwein køben, trune nabe chigucha kømig misrøb yamig køn— cha.

Palagurri arrubiibe mayeelaim pala pasran

³¹ Palagurri arrubiibe kerrigu mayeelaim pala pasran. Inchen piraugurri arrubiibe, pirauiq kua, waminchippe, pirauiqwan wamindan. Inchen srømbalarøngurri arrubiibe kerrigu mayeelaim pala pasran. ³² Incha nõbe tru maig asigwan, maig mõrigwan treeg køn chib waminchene, tru nõ treeg køn taigwane mugucha utag kømui indan. ³³ Inchen mõikkøben tru nõ trendaigwan utabiibe, Tiusbe ciertonig køn cha, treeg kørømara pasran. ³⁴ Kaguende Tius karua øriibe Tiuswei wamwan wamindan, pøs Tiusbe nui Espiritun tøgagømburab tøgagønrrai tranøbig kua. ³⁵ Møskaimbe Nusrkawane undaguig kua, chiwandøgucha nõ ashchai nui tasku pønsraig køn. ³⁶ Nusrkawan kørebiibe, managatig øsig kømigwan tøgagønrrun. Trune Nusrkawan kaashibiibe srøig øsig kømigwan ashmønrrun. Inchen Tiuswei purø trømbøig namig købiibe nuim pala pasran.

4

Jesús Samariasø ishüba waminchib

¹ Fariseosmerabe wammørin købig køn Jesúsbe Juan lataguen kømø, mendig amøñibelø mas tøgagømba, piu umbu ulsrailø mas tøgagømba indin kui. ² (Inchendø piu umbu ulsrøppe, Jesús nõashib kømøtø, nui kusrenanøb pera uniilø marøbelø køn.) ³ Treeg wammøra kuin kui Jesúsbe trunun wammøra, Judea piraugurri webibig køn, katø Galilea pirausrømay inrrab.

⁴ Incha nõ pureb yamibe Samaria pirauiwan pureb yamig nebunrrab købig køn. ⁵ Treekkuri Samariasø kan Sicar taig puebloyu pubig køn, merrabsrø Jacob nui nusrkai Joséwan tranig pirø pulu. ⁶ Truyube kan pisu, “Jacobwein køn” taig waben, Jesúsbe muraaraig arrua, tru pisu pulu wamisrøbig køn, yandø kwaløm tøbøtag misrøb køben.

⁷ Inchen kan ishug samariasriibe pi wesrunrrab arruben, Jesúsbe trenchiptinchibig køn: —Nan pi srøttra— cha.

⁸ (Pøs nui kusrenanøb pera uniiløbe mamig penønrrab pueblosrømay ambin køben.)

⁹ Inchene tru ishug samariasriig lötappe, trenchibig køn:

—Ñibe judiø købendø, na ya samariasriigwan: “Pi srøttra” taibe— cha.

(Kaguende judiømerabe samaritanosmerababe lynchimeelø købig køn.) ¹⁰ Inchene Jesúsbe trenchibig køn:

—Tius tranamigwan ñi nebua ashib, katø tru: “Pi srøttra” chibigwan ñi mu kui ashib indimbe, ñibe nun miabsruinrrun cha. Inchen managuen kølømø piwan srørrøbsruinrrun— cha.

¹¹ Inchene ishübe trenchibig køn:

—Au, kasuku, ñibe piwan chitøga wesramig chigaig wan cha. Katø pisube purø umbu wan cha. ¿Trube, ñibe tru kølømø piwane chugurri wesranragu? cha. ¹² ¿Tru merrabsrø namui kølli misag Jacob, nõ muchib, nui ureemera muchib, nui animalmera muchib indim piwan namun keta kørømarøbig lataguen kømø, kabe ñigan mas nuig køtirru?— cha.

¹³ Inchene Jesúsbe trencha lətabig kən:

—Məikkəben i piwan muchibiibe katəyug pimulgwai inchun cha. ¹⁴ Trune tru na tranim piwan muchibiibe managuen pimulgwai inchimənrrun cha. Kaguende tru na tranim pibe nuinuube kan pigab pərsrab weguchib lataig kənrrun cha, tru managatig əsig kəmigweyasig.—

¹⁵ Inchene ishuube trenchibig kən:

—Trube, kasuku, tru piwan srəttəra cha, nagucha pimulgwai mərməwei, katə mas yusrə wesranrrab arruməwei inchab— cha.

¹⁶ Inchene Jesúsbe trenchibig kən:

—Ñui kewan wamənrrab ya, katə amə— cha.

¹⁷ Inchen ishuube trenchibig kən:

—Nabe kekkaig kur— cha.

Inchene Jesúsbe trenchiptinchibig kən:

—“Kekkaig kur” chippe, ñibe səlwein tan cha. ¹⁸ Kaguende ñibe trattəgatə kelə təgaig kəbig kən cha. Inchen məi ya təgəgəibe ñui keg kəmən cha. Isəmə, ñibe səlwein tan— cha.

¹⁹ İigwan mərəppe, ishuube trenchibig kən:

—Au, kasuku, ñibe Tius maig karuigwan eshkabig treeg mөг kəmmərgə cha. ²⁰ Namui merrabsreelə samaritanosmerabe i tunyu Tiuswan kəriibala tabig waminchibə kəben, trune ñim judiəsmərabə Tiuswan Jerusalənsrə treeg martrab ambamig kən chibə kən— cha.

²¹ Inchene Jesúsbe trencha lətabig kən:

—Ñiguen ishug, igwan kərəra cha. Məskawan kəriibala tabig waminchib maramig ura punrrab kui, i tunyu amrrua kəməwei, kabe Jerusalənsrə amba kəməweingue. ²² Ñim samaritanomerabe chigü ashmubendə kəriibala tabig waminchibə kən cha. Inchen nabe kəriibala tabig waminchippe, chigüi asha marəbələ ker cha. Kaguende kaigyurri wesraig kəmime judiəsmərai misagurri arrubig kən cha. ²³ Pəs treeg maram kwaləmbe punrrun cha; Inchen trube məiweinguen pubguen indan cha, tru cierton kəriibala tabig waminchibə Məskawan kəriibala tabig waminamig əspiritutəga, cierton isua. Pəs Məskaimbe kəriibala tabig waminchibə əyamay marəbelan lan cha. ²⁴ Tiusbe Espiritu kəben, kəriibala tabig waminchibə, əspiritutəga, cierton isua waminamig kən— cha.

²⁵ Inchen ishuube trenchibig kən:

—Mesias attrab kui, nabe asha kur cha (tru Cristo taig). Truig arruppe, namune maig kuigwan kerriguba tərgandə eshkanrrun— cha.

²⁶ Inchene Jesúsbe trenchiptinchibig kən:

—Trube nawein kur cha, tru ñiba waminchib wabig.—

Jesús kusrenanəb pera uniilə katə nuimay amrrub

²⁷ Inchen waminchib pasramnetə nui kusrenanəb pera uniiləbe katə amrruabe, truba kwaarəbələ kən, Jesús kan ishuuba waminchib pasrain kui ashippe. Inchendə nəbbe məikkucha chigucha payrrab inchimeelə kən: “¿Chi palai inchigu?” cha. Kabe: “¿Nəbabe chi waminchigu?” cha.

²⁸ Inchene ishuube nui pi mutingətsən pasrəb, puebləsrəmay ya, misagwan trenchib eshkabig kən:

²⁹ —Kan məwan ashchab amrruy cha. Na maig mariilan kerriguh eshkatan cha. ¿Inchippa Cristo kəppeendi?— chib.

³⁰ Inchen puebləyueləbe webamba, Jesúsweisrəmay ambubələ kən. ³¹ Trunetə nui kusrenanəb pera uniiləbe Jesúswan truba inchib trenchibə kən:

—Kusrennəbig, maytəguen manrrauren— cha.

³² Inchen nəbe trenchibig kən:

—Nabe mamig təgagur cha, ñim asiimig.—

³³ Inchen nui kusrenanəb pera uniiləbe nəmasiitə trenchibə kən:

—¿Mugəben kabe mamig srua amrrua srərra chindah?— cha.

³⁴ Inchen Jesúsbe trenchibig kən:

—Nai mamibe, tru nan Karua Ərəbig maig kənrrain kəben, trunun marəb, katə nui maramigwan patsamnegatig marəb indamig, truig kən cha. ³⁵ Nime trenchibə kəmətirru chibig kən: “Tirigun paramibe pib pəl palan” cha. Trune nabe ñimun trendamənrrun cha: ¡Ñinguen kabwan larrəbicha tab asay cha, ellmarig warabelan! Kaguende yandə chab əskəraikken waran cha, paramdə palabelə. ³⁶ Parəb, tulishib megabiibe tru parəb megaimburə pagarraig an uta, tru ellmarig misrigwane managatig əsig kəmigweyasig tulisan cha, tru tsurəb ellmarəbig lata, parəb tulishibig lata kanguetə tə kasrag purramig kənrrai. ³⁷ Kaguende misaamera əyan chippe, səlwein tan cha: “Kane tsurəb ellmaren, katəgane

parøb tulisan” cha. ³⁸ Nabe ñimune parøb tulishinrrai ørar cha, ñim chigucha chi mariimønug. Murig maramigwan marøb kwallibeløbe kanelø køben, truilø kwaligwane ñim tulishinrrab pønrramisrin køn— cha, trenchibig køn Jesúsbe.

³⁹ Samaria puebloyi warabelø truba yamelø Jesúswan kørebelø køn, maig kuigwan tra ishug eshkaikkurri: “Na maig marig købigwan kerriguh eshkatan” chib. ⁴⁰ Inchen samariasreeløbe amrruabe, Jesúswan nomba kørrømisr chib truba rugaben, truyu nøbe pa kwaløm nomba kørrømisrøbig køn. ⁴¹ Inchen nø wamindigwan mørabe, masken yamelø kørebelø køn. ⁴² Inchabe ishuwane trenchibelø køn:

—Møimbe ñi trendaigwan trunun ka møratø kørewa pønrrømøtø, møimbe yandø nambe namashib nun møra, isa kømø, i møøbe yu pirau misagwan Kaigyugurri Wesrabig kuin kui aser— cha.

*Kan kusreb møwei nusrkawan Jesús kwanrrøwan tamarøb
(Mt 8.5-13; Lc 7.1-10)*

⁴³ Tru pa kwaløm puraiben Jesúsbe Samariagurri Galilea pirausrømay ibig køn, ⁴⁴ kaguende Jesús nøøweinguen trendaig købig køn: “Tius maig karuigwan eshkaib møwane nuim piraeløtøweimbe chi tab indimig køn” cha. ⁴⁵ Incha Galilea pubene, truyueløbe truba tab utabelø køn, kaguende Jerusalén Pascua Fiestayu nømgucha amønag kua, Jesús tru chine mariilan nømbe ashagurri.

⁴⁶ Incha Jesúsbe Galilea pirau Canásrømay katø arrubig køn, tru piwan vino kønrrai mariisrømay. Inchen truyube reyweyasig marøb wab møøbe nui nusrkawan kwanrrø trarra købig køn, Capernaumsrø. ⁴⁷ Inchen tru møøbe Jesús Judeagurri Galileasrø pun taig wammørabe, nui nusrkawan tamartrab nui yamay ‘tiusmanda kørraarubsumugu’ chinnrab ashchab ibig køn, kaguende yandø ke patsønrraptiig tsuben. ⁴⁸ Inchene Jesúsbe trenchibig køn:

—Chigøben Tius naba pasrain kui asamig mari ashmøwei, katø purø nørreelø mariilø ashmøwei inchabe, ñimbe managuen kørenraamøn— cha.

⁴⁹ Inchen tru reyweyasig marøb wab møøbe trenchibig køn:

—Señor, petø amun cha, nai unø pinømøwatø.—

⁵⁰ Inchen Jesúsbe trenchibig køn:

—Inrrø cha, ñui nusrkaimbe kwanraamøn— cha.

Inchen tru møøbe Jesús trendaigwan kørewa ib menda, ⁵¹ nui yausrø pub ibene, nui karuindiig melabeløbe katønrrab werruabe, trenchiptinchibelø køn:

—Ñui nusrkaimbe ka øsig tsun— cha.

⁵² Inchen møøbe nømun payibig køn:

—¿Chu uraskurri tammisrøb ya?— cha. Inchene nømbe trenchibelø køn:

—Pachiibe marig kwaløm la una weetan— cha.

⁵³ Inchene møskaimbe tre uraswei Jesús øyah taig kømømab isubig køn, tru: “Ñui nusrkaimbe kwanraamøn” taigwan. Incha nøba, nui yauelø kerrigueløba Jesúswan kørebelø køn.

⁵⁴ Lig køn, tru srøsrø marigwei wendau katøgan Tius nøba pasrain kui asamig kønrrai mara eshkaig Jesús Judeagurri Galileasrømay arrua.

5

Betesdasrø kan kwanrriigwan Jesús tamarøb

¹ Yandø øyeelø chab puraiben, Jesúsbe Jerusalénsrømay nebibig køn judíosmerai fiestayumay. ² Inchen Jerusalén ciudayu tru Ubishamerai Yaskab cha, wamim pulube, kan pisu wabig køn, pøtøgatan ya-ureezheelø trattrøgatø wambiiteelø tøgag, hebreomaybe Betesda taig. ³ Truiløyube kwanreelø truba nu warabig køn, kabgar køben, cojosmera køben, kønønrrab kaimabelø købengue piwan kønøgamne munig. ⁴ Kaguende kanmay kanmay kan ángel pisuyu kørraarua, piwan kønøgøben, møikkøben nømerig tru piyu kebibibe chi kwanrrø tøgaitøgucha tammisrig kørrømisrøbig køn. ⁵ Inchen kan møg treinta y ocho años ørøba kwanrrø megabig, truyu pirau tsubig køn. ⁶ Inchen Jesúsbe truyu tsui ashabe, øyeetø truba yana kwanrrø tsubig kuin kui ashabe, trenchibig køn:

—¿Tammisrøg køtah?— cha.

⁷ Inchene tru kwanrriibe trenchibig køn:

—Kasuku, nane muguen srua ya, pisuyu kertrabig kaatan cha, tru piwan kønøgøben. Na kebinrrainchib megamne, katøganguen kebiptø kebibig køn— cha.

⁸ Inchene Jesúsbe trenchibig køn:

—¡Kurrø! cha. ¡Ñui tsgalwan mutab, punab inrrø!— cha.

⁹ Inchen tru urastø tru møøbe tabig kørromisra, nui tsgalwan muta, punab ib mendabig køn. Inchen tru kwalømbe isrin kwaløm købig køn. ¹⁰ Treekkurri judíosmerabe tru tamarin-abigwane trenchibelø køn:

—Møin kwalømbe isrin kwaløm køben, tru maig maramigwan martrai Moisés pøriibe ñui kaya tsuigwan muta inrrain kømø merabig køn— cha.

¹¹ Inchene tru møøbe trenchibig køn:

—Tru nan tamarøbittøwei trenchitan cha: “Ñui kaya tsuigwan kusrua muta, inrrø”— cha.

¹² Inchene nømbe:

—“Ñui kayigwan tulisha, muta, inrrø” chippe, ñune çmu møg trenchita?— chibelø køn.

¹³ Inchen tru tamarinab møøbe mu kuinguen mørmig køn, kaguende Jesúsbe truyugurri tarømisrin køben, katø truyube purø nu misag pasrøben.

¹⁴ Inchen yanayu Jesúsbe tru tamarig møywan Tiuswei yau ashabe, trenchibig køn:

—Au, ñi mõi yandø tabig kørromisrabe, møyngurrimbe katø mas kaig martrab kømø cha, katøbe ñun masken trømbøig nebumønrraimbe.—

¹⁵ Inchene tru møøbe ya, judíosmeran eshkabig køn:

—Tru nan tamarøbiiibe Jesús kuin køn— cha.

¹⁶ Incha treekkurri judíosmerabe Jesúswan kaig martrab wendautø llirab mendabelø køn, kaguende øyeelan isrin kwaløm maren. ¹⁷ Inchen Jesúsbe trenchibig køn:

—Nai Møskaima chu uraskucha nui maramigwane møyin kwalømgatig marøb wabig køben, nagucha marøbig kur— cha.

¹⁸ Trenchibene, judíosmerabe masken inchibelø køn Jesúswan kwetchab, kaguende isrin kwalømbe chi maramig kømøyin cha, mera pasrigwandø kalø marmøtø, Tiuswangucha: “Nai trag Møskain køn” chib, Tiusba lataig misren.

Jesús nun mu chi tamgaig martrai tranigwan waminchib

¹⁹ Inchen Jesúsbe nøymun løytape, trenchibig køn:

—Nabe ñimun isa kømø, cierton trendamønrrun cha: Tiuswei Nusrkaimbe ka nuimbura-ptøbe chigucha marmøyin cha. Møskai chi mari asha, trunundø maran cha. Møskai chi marin kuindø Nusrkaingucha treetøwei maran cha. ²⁰ Kaguende Møskaimbe Nusrkawan undaguig kua, nøy chi mariilan kerrigu kenamaran cha. Incha treetø kømøtø, mas purø nøyreeelø marig kenamartrun cha, ñim kwaara asha kørromisramnegatig. ²¹ Kaguende Møskaima kwailan øsiirana øsig kømigwan traniiibe, treetøwei Nusrkaingucha tru øsig kømigwan møyilan tranamidøg asøyaben, tranan cha. ²² Katø Møskaimbe maig maramigwan mungucha nøy asha marøb wamøtø, tru maig maramigwane Nusrkai nøy asha martrai tranig køn cha, ²³ mayeeløba Nusrkawangucha purø tab inchai Møskawan purø tab inchib lataitøwei. Nusrkawan tab inchimiiibe, Møskai karua ørøbigwangucha chi tabig inchimøyin cha.

²⁴ Nabe ñimun isa kømø, cierton trendamønrrun: Møikkøben na wamindigwan møyøb, nan Karua Ørøbigwan køreb inchibiibe managatig øsig kømigwan tøyagønrrun cha. Incha truigwane kaigyu pasrønrrai pasrig kømøyinrrun cha, kaguende kwamigugurri øsig kømigumay yandø puraya pasramisrikkurri. ²⁵ Nabe ñimun isa kømø, cierton trendamønrrun: Treeg maramig urabe punrrun cha. Inchen truiibe møyindøweinguen pubguen indan cha, tru kwabelø Tiuswei Nusrkawei wamwan møyramig. Inchen tru møyøbeløbe øsig kønrrun cha. ²⁶ Kaguende Møskaimbe nøyashib øsig kømigwan tøyagig kua, Nusrkawangucha treetøwei nøyashib øsig kømigwan tøyagønrrai tranan cha. ²⁷ Katø Møskaimbe Nusrkawan maig kørromisrtrabigwan mu mandamgaig maramigwangucha tranan cha, kaguende nøybe Møg Misra Arrubig kuimba. ²⁸ Iig na trendaigwan maig kønrrermab isub kwarmøtay cha, kaguende treeg kømig urabe punrrun cha, mayan kwabelø søriilø purrabelø nui wamwan møyra, ²⁹ truyugurri webambamig. Inchen tru tabig marøbeløbe katøyug øsiirawa kurrappe, srøig øsig kømigwan tøyagønrrab kurrøbene, trune kaig marøbeløbe katøyug øsiirawa kurrappe, kaigyu pønrrønrrai pønrrailø kønrrab kurrønrrun cha.

Jesúsweingatø waminchib

³⁰ Nabe ka naimburaptøbe chigucha chi marmøyig kur cha. Nabe maig kønrrabigwan na asha marøppe, tru nai Møskai maig taig møyrigwandø asha maren, tru maig kønrrabigwan na asha mariibe sølgandø marig køn cha. Kaguende nan treeg marøg kuimba treeg marmøtø, nan karua ørøbig maig martrain køben, trunin marar cha. ³¹ Na naasiitø maig kuigwan ka naimburaptø wamindiibe, trube, tru na wamindiibe ka wamindiitø købsruinrrun cha.

³² Inchen naimburab maig kuigwan eshkabiibe katøygan køn cha. Inchen nøy tru naimburab eshkab wamindiibe isa kømø, maig kuigwan wamindig kui nabe asha kur cha. ³³ Ñimbe Juanweisrø payrrai øren, nøybe tru newan cierton maig kuigwan eshkabwei indig køn cha.

³⁴ Pøsnabe kan møyg naimburab ‘øyeeig køn’ cha wamindiitøga pasrømiig kur cha. Inchendø nøy trendaigwan na trenchippe, ñim kaigyuurri wesrailø kønrrain trenchar cha.

³⁵ Juanbe kan lámpara naarab pilabig lataig kuig kòn cha. Inchen kan maya yanatø ñimbe tru nui toryu kasraaramig tab kui morig kòbig kòn cha. ³⁶ Inchendø naimburab Juan wamindi lataitøguen kòmø, mas nuig tøgagur cha. Kaguende nai Mòskai nan martrai tranilø, truiløtøwei naimburab na maig kuigwan eshkan cha, nane nai Mòskai karua ørig kuin kui. ³⁷ Katø nai Mòskai nan karua ørøbikkucha naimburab na maig kuigwan eshkan cha. Ñimbe managuen nui wamwan mørømøwei, nui maløwan ashmøwei indan cha. ³⁸ Katø ñimbe nui wamindigwan ñimui manrrau chigar kòn cha, kaguende nø karua ørigwan ñim køremuikkurri. ³⁹ Ñimbe Tiuswei wamwan pørigwan ashippe, maig køtashchab truba tab ashib labelø kòn cha, kaguende managatig øsig kømigwan truyu wetørranrrab isubelø kua. Inchen tru pøriiløbe nan mu kui ashchai naimburab waminchibelø kòn cha. ⁴⁰ Inchendø ñimbe naimay amrrug kømuidan cha, tru srøig øsig kømigwan tøgagørrrab.

⁴¹ Nabe misaamera nan maya nuguen tab inchib taiwane utømíig kur cha. ⁴² Inchagucha nabe ñimune mailø kui ashib, Tiuswei undag kòbigwan ñimuinug chigar kui ashar cha. ⁴³ Nabe nai Mòskawei munchiyu ørig arruben, ñimbe nane utømøtan cha. Inchen katøgan ka naimburab nui munchiyutø arrubigwane si, trube, ñimbe utønrrun cha. ⁴⁴ ¿Ñim mandø incha nan kørenrrague? cha, kangurri kangurri maya nuguen tab indig kømigwangøba ñim labeløbe, Tius kandø wabigweinukkurri maya nuguen tab indig arrubigwan lamøtø. ⁴⁵ Nai Mòskawei merrab na ñimun 'øyeeg kailø kuig kòn' chinrraitamab isumøtay. Moisés, ñim ke trunundø isua melaig, nui pøriløtøgatøwei ñimune 'øyeeg kaig marøbelø kømøtirru' chinrrun. ⁴⁶ Kaguende Moisés maig taigwan ñim køreig kuimbe, nan kørebruig kuinrrun cha. Kaguende Moisésbe naimburabweim pørig kòn cha. ⁴⁷ Tru nø pørigwanma ñim køremeeløbe, na wamindigwangucha chinha kørenrrague— cha, trenchibig kòn Jesúsbe.

6

*Jesús trattrø mil møguelan manrrai mamig tranøb
(Mt 14.13-21; Mc 6.30-44; Lc 9.10-17)*

¹ Incha Jesúsbe Galilea pisu ambøgatøsrømay ibig kòn, tru Tiberias pisu taisrømay. ² Inchen truba nu misag Jesúswan mendig ambubelø kòn, kaguende Tius nøba pasrain kui asamig kønrrai kwanrreelan tamaren asha kua. ³ Inchen Jesúsbe kan tun palasø nebya, nui kusrenanø pera uniiløba truyu wamisrøbig kòn. ⁴ Inchen yandø judíosmerai Pascua Fiestabe lutau kòbig kòn. ⁵ Incha Jesúsbe kurraasha, truba nu misag mendig amrruin kui ashabe, Felipe trenchibig kòn:

—¿Yeeg nu misagweimbe nabe mamig pirrimbe chu penønrrab?— cha.

⁶ Trenchippe, Felipe ka manchitamørraptø trenchibig kòn, Jesúsbe maig maramigwan asha købendø. ⁷ Inchene Felipebe trenchibig kòn:

—Ni kan møg doscientos días ørøba marøb megawa an pagaraig utiitøga pirrim pena, piti piti srørramikken neburraamøn— cha.

⁸ Inchen kusrenanø pera uniilai utuig Andrés, Simón Pedroi nuneebe trenchibig kòn:

⁹—Yube kan matsinø—unø trattrøgatø cebada pirrimbah pagatø peskaubatø sruaig pasrain cha. Inchendø kan yandiibe ya nu misagweimbe mayanguen kømøn— cha.

¹⁰ Inchen Jesúsbe trenchiptinchibig kòn:

—Mayeelanba purramisringaruy— cha.

Truyube pu truba tsitsig køben, møguelø trattrø milburab purramisrøbelø kòn. ¹¹ Inchen Jesúsbe tru pirrimeran muta, Tiuswan 'mayanguen pay' chabe, maya misag truyu purrabelan pirishabe, katø treetøwei peskaumerangucha maya mag kui inchen srørrøbig kòn.

¹² Inchen yandø øska maben, Jesúsbe nui kusrenanø pera uniilan trenchibig kòn:

—Pitis unchibelane pirau ka petig warømønrrai, pitiswane tulisay— cha.

¹³ Inchen tru trattrøgatø cebada pirri pirisaigwan maben, yandø tru undailan tulishiben, tasinmera doce netsabig kòn. ¹⁴ Inchen misaamerabe Tius maramburab marigwan Jesús mari ashabe, trenchibelø kòn:

—Tru Tius maig karuigwan eshkan møg tru yu piraumay attrabig kòn taibe, isa kømø, iigwein kòn— cha.

¹⁵ Inchen Jesúsbe misaamera nun rey martrab ke merrarrawa sruamrrab amrrunrrab kui wetøbefippe, nøbe katøyug tunbalasrømay inrrab nøtø tarømisrøptinchibig kòn.

*Jesús pisu palawan ib
(Mt 14.22-27; Mc 6.45-52)*

¹⁶ Yandø pillirab arruben Jesúswei kusrenanø pera uniiløbe pisuyu kørørruabe, ¹⁷ kan barcoyu kebamba, Capernaumsø larramrrab ambub mendabelø kòn. Inchen yandø chab pilliraben, Jesúsbe katøgucha nømuiamay arrumø srø køben, ¹⁸ yandø truba mur isig ichibig webarruben, pi welarmera kurrab mendabig kòn. ¹⁹ Incha yandø kan trattrø

kilómetros, kabe kan seis kørsrøn remab ambabe, Jesúswane barco pulusrømay pi palawan arri ashiptinchibelø kòn. Inchabe truba kørig kui inchen, Jesúsbe:

²⁰ —¡Na kur cha. Kørmtøtay!— chibig kòn.

²¹ Inchen nømbe barcoyu Jesúswan truba tab kui wamab uta, petøzhiitø tru pum pirausrø pubguen inchibelø kòn.

²² Katø kwaløm tru nu misag sötø tru pisu igatømay kørømisrøbeløbe truyu barco kandøzhiitø pasrabigu Jesúswei kusrenanøb pera uniiløbe tru barcoyu amben, Jesúsbe nømbe tøgä imuin kui ashibelø kòn. ²³ Inchendøgucha Tiberias ciudasingurrimbe katøgan barcomera pua pønrrabelø kòn, Señor pirriwan ‘mayanguen pay’ chiben, tru maim pulusrø. ²⁴ Incha tru nu misaabe Jesús truyu mu kawei, nui kusrenanøb pera uniilø mu kawein kui ashippe, tru barcomerayu kebamba, Capernaumsrø Jesúswan lanrrab chab ambubelø kòn.

Jesús tru øsig kømigwan tranøb pirri

²⁵ Incha pisu ambøgatøsrø chab pua, Jesúswan wetørrawabe, trenchibelø kòn:

—Kusrennøbig, ¿yusrømbe ñibe mana pugu?— cha.

²⁶ Inchene Jesúsbe trenchiptinchibig kòn:

—Nabe ñimun isa kømø, cierton trendamønrrun cha: Ñimbe nane lappe, Tius naba pasrain kui asha kønrrai mariilan asha kømøtø, tru pirrimera øska mamne maig kua, trugurrinre lan cha. ²⁷ Ñim marøppe, mamig ka petø patsønrrabigwandø isua marmøtø, managatig øsig køm mamigwan isua maray chibig kòn. Truigwane tru Møg Misra Arrubig ñimun tranrrun cha. Kaguende treeg maramigwan tranig kui asig kønrrai Tius Møskaimbe nui sellon nuinug pasrig kòn— cha.

²⁸ Inchene nømbe trenchibelø kòn:

—¿Tiuswei maramelan marøb pølbasrtrappe, nambe chi maramig palerah?— cha.

²⁹ Inchene Jesúsbe trenchibig kòn:

—Tiuswei maramibe iig kòn cha, Tius tru nø karua ørigwan køremig.—

³⁰ Inchene nømbe trencha payibelø kòn:

—¿Tius ñiba pasrain kui nam ashib, ñun køreb inchaimbe, chi martragu? cha. Trube, ¿chi marøbig kugu? cha. ³¹ Namui merrabsrø kølli misaamerabe mu misag warab waraimønug maná taigwan maig købig kòn cha, Tiuswei wam maig pørigu trendaim pala: “Nøbe nømune srømbaløsrø pirriwan manrrai tranig kòn”— cha.

³² Inchene Jesúsbe trenchibig kòn:

—Nabe ñimun isa kømø, cierton trendamønrrun cha: Srømbaløsrøngurri arrub pirri ciertonigwan nømun tranøbiibe, Moisés kømug kòn cha. Treeg kømøtø, tru cierton pirri srømbaløsrøngurri arrubigwan ñimun tranøppe, nai Møskai, nø tranig kòn cha. ³³ Kaguende Tiuswei pirrimbe tru srømbaløsrøngurri yu piraumay kørøarraua, katø misaameran srøig øsig kømigwan tøgagønrrai tranøbig, truig kòn— cha.

³⁴ Inchene nømbe trenchibelø kòn:

—Señor, chu uragucha tru pirriwan srøttra— cha.

³⁵ Inchene Jesúsbe trenchibig kòn:

—Tru øsig køm pirrimbe na kur cha. Naimay arrubiibe managuen parøgwai mørømwei, katø nan kørebiibe managucha pimulgwai mørømwei inchen cha. ³⁶ Inchendø na ñimun trendaim pala ñimbe nan ashippe, ashendø, nane køremøn cha. ³⁷ Møitøgucha Møskai nan traniiibe naimay attrun cha. Inchen naimay arrubigwane nabe managuen wambig weguchimümønrrun cha. ³⁸ Pøs, nabe srømbaløsrøngurri kørøarruppe, nan maig maramdiig køben treeg martrab arrumøtø, nai Møskai nan karua ørøbig na maig martrain køben, treeg martrab kørøarrig kòn cha. ³⁹ Inchen nan karua ørøbig martrai isuibe iig kòn cha: Nø nan traniiilane ni kanguen trubishimø, srabe kwaløm katøyug na nømun øsiirangarunrrain kòn cha. ⁴⁰ Nai Møskai martrai isuibe øyeeg kòn cha: mutøgucha Nusrkawan nebua asha, nun kørebiibe managatig øsig kømigwan tøgagønrrain kòn cha. Inchen nabe srabe kwaløm nun katøyug øsiirangarunrrain kòn— cha.

⁴¹ Inchen judiosmerabe namig nømdø nilø chigøben chib mullib mendabelø kòn, tru: “Pirri srømbaløsrøngurri kørøarrubiibe na kur” taikkurri. ⁴² Incha trenchibelø kòn:

—¿Øibe tru Jesús Josøwei nusrkain kømuitarru? cha. Nambe usri møskawan ashibelø ker cha. ¿Møimbe mandøgurri nøbe øyeeg tah cha: “Nabe srømbaløsrøngurri kørøarrig kòn” cha, trenchippe?—

⁴³ Inchene Jesúsbe trenchibig kòn:

—Ñimguen ñimdø mas namig mulla mørømøtay cha. ⁴⁴ Møgucha naimaybe attraamøn cha, Møskai nan karua ørøbig naimay attrai inchimubene. Inchen naimay arrubigwane nabe srabe kwaløm katø øsiirangarumønrrun cha. ⁴⁵ Tru Tius maig karuigwan eshkabelø pørigube treeg chibig pørig pasran cha: “Mayeelanba Tius nø kusrenaniilø kønrrun” chibig. Inchawei mayeeløba Møskawan mørøb, nuiwan kusreb inchibeløbe naimay amrrunrrun cha.

⁴⁶ Pøs Møskawane mugucha asiibe kaagøn cha. Tiusweinukkurri arrubig, truitøwei Møskawan ashibwei indan cha. ⁴⁷ Nabe ñimun isa kømø, cierton trendamønrrun cha: Nan kørebiibe managatig øsig kømigwan tøgagøn cha. ⁴⁸ Tru øsig køm pirrimbe na kur cha. ⁴⁹ Ñimui merrabsrø kølli misaamerabe mu misag warab waraimønug tru maná taigwan mabendø, kwaig købig køn cha. ⁵⁰ Trune tru srømbalarøngurri kørraarrub pirrimbe yu pasran cha, møikkøben tru pirriwan mabiibe, kwamønrrai. ⁵¹ Tru srømbalarøngurri øsig køm pirrimbe na kur cha. Møikkøben i pirriwan mabiibe managatig øsig wanrrun cha. Inchen yu pirau tru maya misagwan srøig øsig kønrrai tru na tranam pirrimbe nai asrtøwein køn— chibig køn, Jesúsbe.

⁵² Inchene judíosmerabe nømasyaitø namig trenchib mendabelø køn:

—¿I møøbe nui asrwandøwei manrraimbe namune mandø tranrrab indah?— cha.

⁵³ Inchene Jesúsbe trenchibig køn:

—Nabe ñimun isa kømø, cierton trendamønrrun cha: Tru Møg Misra Arrubigwei asrwan mab, katø nui aniwan muchib inchimeeløbe srøig øsig kømigwan ñimuinug tøgagønrraamøn cha. ⁵⁴ Møikkøben nai asrwan mab, nai aniwan muchib inchibiibe managatig øsig kømigwan tøgagøben, nabe srabe kwaløm nune katø øsiirangarumønrrun cha. ⁵⁵ Kaguende nai asrbe si, cierton mamig køben, katø nai animbe si, mutsamig ciertonig køn cha. ⁵⁶ Nai asrwan mab, nai aniwan muchib inchibiibe nainug pasrabig pasrøben, katø nagurringucha nunug pasramønrrun cha. ⁵⁷ Nan karua ørøbig Øsig Wab Møskaingurri tru øsig kømigwan na tøgagøb lataitøwei, nagurri nøgucha tru øsig kømigwan tøgagønrrun cha tru nai asrwan mabiibe. ⁵⁸ Iibeguende tru srømbalarøngurri kørraarrub pirrin køn cha, tru ñimui merrabsrø kølli misaamera maig lataig kømøtøb, nømbe mappe, mabendø, kwaig købig køn cha. Trune i srømbalarøngurri pirriwan mabiibe managatig øsig kønrrun— chibig køn.

⁵⁹ Jesús øyeelan kusrenanøppe, judíosmera tulundzuni yau Capernaumsrø kusrenanig køn.

Møiløgøben Jesúswei mendig amba katøyug llirab

⁶⁰ Møiløgøben Jesúswei mendig amøñibelø i kusrenanigwan mørabe, trenchibelø køn:

—Nø øyeeg kusrenaniibe maramga menrra murig køn cha. ¿Mu kui möriasamø?— cha.

⁶¹ Inchen Jesúsbe nømdø chigøben chib mullib kui ashabe, trenchibig køn:

—¿Ñimun øyeeg chibene pusrkwatah? cha. ⁶² Tru Møg Misra Arrubig tru nø srøsrø waisrøndøwei katøle nebiben asimbe, trube, ¿maig købsruerah? cha. ⁶³ Øsig kømigwan tranøbiibe Espiritu køben, asrbe truburappe chigucha chi purugumlig køn cha. Na ñimun wamindiibe Espiritu køb, øsig kømig køb køn cha. ⁶⁴ Inchendø katøgucha ñimui utu møiløbe køremeelø køn— cha, trenchibig køn.

Kaguende Jesúsbe manawei srøsrøgurri asig købig køn, numeratø nun køremeelø kuigwan, katø tru nun ashig kømui inchibelan tranrrabiibe møig kuigwan. ⁶⁵ Incha katø Jesúsbe trenchibig køn:

—Inchawei treekkurri nabe ñimune trenchar cha: Mugucha naimaybe amrrunrraamøn cha, nai Møskai amrrunrrai inchimubene.—

⁶⁶ Inchen yandø trugurrimbe møiløgøben nui mendig amøñibeløbe chab llirawa, yandø Jesúsba amøñimeelø køn. ⁶⁷ Inchen Jesúsbe nui doceelan trenchibig køn:

—¿Kabe ñimgucha treetøwei llirawa ambug køtah?— cha.

⁶⁸ Inchen Simón Pedrobe trencha løtabig køn:

—¿Señor, nambe muimay kui ambamø? cha. Tru managatig øsig køm wamwane ñitøwein tøgag køben, ⁶⁹ nambe ñun køreb, katø tru Tiuswei Newan Tabiibe ñi kui ashib inder— cha.

⁷⁰ Inchene Jesúsbe trenchibig køn:

—¿Yamba, na ñimun doce lawa wesrab mørgøppeh? cha. Treeg kuindøgucha ñimui utu kane kwaimandzig køn— cha.

⁷¹ Øyah chippe, Simón Iscariotei nusrkai, Judaswan waminchibig køn. Kaguende tru doceelai utuig kuatøgucha, tru Jesúsban ashig kømui inchibelan nø tranrrab pasrøben.

7

Jesúswei nunelø nun køremub

¹ Yandø øyeelø chab purayaig wendø, Jesúsbe Galilea pirausrø uñibig køn, Judea pirau llirab uñmønrrab, kaguende judíosmera truyube kwetchab lab køben. ² Tru judíosmerai Yareg Maram Fiesta yandø pub køben, ³ Jesúswei nuneløbe nun trenchibelø køn:

—Yugurri Judea pirausrømay inrrø cha. Ñui mendig amøñibelø ñi chi mariilan ashchain cha. ⁴ Pøs kan møikkøbenma misaamera mu kui nebua asig kønrrappe, chiwandøgucha søratø marmøn cha. Tru ñi øyeelø marøbiibe, trube, maya misaamera ashchai martraurren— cha.

⁵ Pøs Jesúswei nuneløtøweinguen nune køremeelø køn. ⁶ Inchene Jesúsbe nømune trenchibig køn:

—Na treeg maramibe pumø srø køn cha. Trune ñimuimbe chu ura marøg køben maramig chi kømøn cha. ⁷ Yu piraeløbe ñimune chi tsalinchab kaimanrrun cha. Trune nane tsalinndan chibig køn; kaguende nøm marøb kuigwan kaig køn cha, na eshkaben. ⁸ Ñimbe fiestayumay ambay chibig køn. Nabe katøgucha tru fiestayumaybe nebarrumumønrrun cha, kaguende na treeg maramibe pumø srø køben.—

⁹ Incha trenchabe, Galileasrø kørrømisrøbig køn.

Jesús Ya-ureg Maram Fiestasrø

¹⁰ Inchen yandø nunelø fiestayumay chab amben, Jesúskucha ippe, ibendø, mayeelø ashchain kømøtø, ibig køn. ¹¹ Inchen judíosmerabe fiestayun nun lab kua, trenchibelø køn:

—Tru møøbe ¿chu unerah?— cha.

¹² Inchen misag utube Jesúswaimburab mutøgucha niløzhiitø truba waminchib købelø køn, kaneløbe: “Tru møøbe truba tabig køn” chiben, kaneløbe: “Tabig kømøn cha. Misagwan may wamincha, ka isaptiig køn” chibelø køn.

¹³ Inchendø møitøgucha nuimburab waminchippe, waminchendø, ke mayeelø mørtrain kømøtø waminchibelø køn, judíosmeran kørig køptø.

¹⁴ Yandø fiestabe tøbøtakken pureb ñben, Jesúsbe tru Tiuswei yau kebya, kusrenanøb mendaptinchibig køn. ¹⁵ Inchen judíosmerabe truba kwaarøb trenchibelø køn:

—¿I møøbe kan øyeebe chincharre kusrebig køh cha, chu kusreweig kømubendø?— chib.

¹⁶ Inchene Jesúsbe trencha løtabig køn:

—Na kusrenaniibe nain kømø, nan karua ørøbigwein køn cha. ¹⁷ Møikkøben Tius maig martrain køben trunun marøg kui inchibiibe na kusrenaniilane Tiusweinukkurri arrubig kuin kui, kabe naimburaptø kusrenanøbig kuin kui nebua ashchun cha. ¹⁸ Møikkøben nuimburaptø waminchibiibe, misaamera ka nun maya nuguen tab inchaindø lan cha. Inchen møikkøben tru karua ørøbigwan maya nuguen tab indig kønrrai labiibe, trube si, cierton waminchibig, nuinuube chigucha kalø marig chigaig køn cha.

¹⁹ ¿Tru maig maramigwan martrai pørigwane ñimune Moisés nøwein tranig kømuitarru? cha. Inchen ñimbe møikkucha tru martrai pørigwane møra marmøn cha. ¿Nane chindimba kwetchab lague?— chibig køn.

²⁰ Inchene misaamera nu pasrabiibe trencha løtabelø køn:

—Ñibe kwaimandzig tøgag køn cha. ¿Ñune mu kwetchab lab kø?— cha.

²¹ Inchene Jesúsbe trencha løtabig køn:

—Isrin kwaløm kan mana asiimig asha kønrrai marigwandø ñimbe mayeeløba kwaara asha køn cha. ²² Pøs inchawei Moisésbe circuncidanrrai ñimune karua pasrig køn cha, (trube Moisésweinukkurri arrubig kømøtø, ñimui merrabsrø kølli misaamerainukkurri pølbasa arrubigwan). Inchen ñimbe isrin kwaløm kuindøgucha kan møg-unan circuncidabelø køn cha. ²³ Inchawei tru maig maramigwan martrai Moisés pøriilan maig taigwan kalø mara kørrøarmønrraptø, kan mowan isrin kwaløm kuindøgucha ñimma circuncidabelø købendø, na isrin kwaløm kan mowan kwanrrøwan kerrigu newan tamarene, trube, ¿ñimbe nane chindimba namøgue cha? ²⁴ Ñimuin kabyu maig misag asønaben ke trunundø asha marøb pønrrøtø, marøppe, maig kønrrabigwan sølgandø asha maramig køn— cha, trenchibig køn Jesúsbe.

¿Jesús tru attrabig Cristo kø chinderah?

²⁵ Inchen møiløgøben jerusalénsreeløbe trenchibelø køn:

—¿Øigwanweinre kwetchab lab amøñimuitarru? cha. ²⁶ Au, ya mayelai malau waminchib pasrøben, mugucha chi chimøn cha. ¿Kabe tru ashib karubeløbe øibe Cristo kui asha treeg mara tøgagø chinderah? cha. ²⁷ Inchendø nabe møg møøbe chugurri arrig kui asha ker cha. Trune Cristo arrubene, chugurri arrin kui mugucha ashchaamøn— chibelø køn.

²⁸ Inchen Jesúsbe Tiuswei yau kusrenanøb pasrøwa, truba mur waminchib trenchibig køn:

—Ñimbe nane mu kui ashib, katø nabe chugurri arrig kui ashawein køn cha. Nabe arrua pasrappe, naimburaptø arrua pasrøtø, tru ciertonig nø karua ørig pasrar cha, tru ñim mu kui nebua asiimig. ²⁹ Inchen nabe nune mu kui ashibig kur cha, kaguende nabe nuinukkurri arrub, katø nø nan karua ørig kua.—

³⁰ Inchen nun merrarrawa, sruamrrab inchendø, mugucha merrarrameelø køn, kaguende nun treeg maramig ura pumø srø køben. ³¹ Inchen puebløy misaamera truba nu nun kørewabe, trenchibelø køn:

—Cristo arruppe, ¿Tius nøba pasrain kui asha kømig mariilø i møg lataig maskucha mana martrab kø?— cha.

Fariseosmera Jesúswan merrarranrrab inchib

³² Fariseosmerabe misag truba nõrrø Jesúsweimburab niløtø truba waminchamørøb kui mørabe, nõmbe judíos sacerdotemeran karubeløba misra, Tiuswei yau ashib pønrabelan ørøbelø køn Jesúswan merrarranrai. ³³ Inchene Jesúsbe trenchibig køn:

—Yu ñimbabe katøgucha kan maya yanatø uñchab kur cha. Trugurrimbe nan karua ørøbigweisrømay katø inrrab kur cha. ³⁴ Inchen na ibene, ñimbe labendø, nane wetørranrab kaimanrrun cha. Katø tru na wanrrab yaisrømbe ñimbe amrrab kaimanrrun— cha.

³⁵ Inchene judíosmerabe nõmasiyaitø trenchib payibelø køn:

—Ø møøbe ¿chumay inrraindah? cha, nam wetørramgaibe. Kabe ¿tru judíosmera griegosmerai utusrø amba warabelaisrømay ya, tru griegosmeran kusrenanrrab inrrab inda, chindah cha? ³⁶ ¿Øyeebe mandø tah? cha, tru: “Nan lappe, labendø, nane kalanrrun” chib. Katø: “Na waisrømbe ñimbe amrrunrab kaimanrrun” chippe.—

Øsig kømigwan tranøb pi

³⁷ Incha tru srabe kwaløm, fiesta purø tabig purayam kwaløm Jesúsbe pasramisra, mur waminchib trenchibig køn:

—Møikkøben pimulgwaibe naimay arrua, muchi cha. ³⁸ Tiuswei wamwan pørigu maig taig, møikkøben nan kørebiibe nui manraugurrimbe managuen kølømø pimera lulrrun— cha.

³⁹ Øyee chippe, Jesúsbe tru nun kørebeløbe Espiritu Santon utønrrab køn cha, truigweimburab trendaig køn. Pøs katøgucha Espiritun tranimig srø køben, kaguende Jesúsbe purø nuig purø tabig tørigwan utømø srø kua.

Misaamera nõørøtø misrøb

⁴⁰ Inchen mõiløgøsrøn tru nu misag sötøyuelø nõ wamindiilan mørabe, trenchibelø køn:

—Iibeguende, Tius maig karuigwan eshkabig, tru møg køn— cha.

⁴¹ Inchen kaneløbe trenchibelø køn:

—Iibe Cristo køn— cha.

Inchen katøganeløbe trenchibelø køn:

—¿Cristogan Galileagurri attraitarru? cha. ⁴² Cristobe Davidwei misagurri arrub, katø tru David tsui pueblo, Beløngurri attrabig køn cha. ¿Tiuswei wamwan pørigube yamba trenchibig kømuitarru?— cha.

⁴³ Incha misaabe Jesúskurrindø nõmdø ke nõørøtø misrøb chab tarømisra, ⁴⁴ mõiløbe kemørtrab inchendø, mõikkucha chinchimeelø køn.

Judíosmeran karubelø Jesúswan køremub

⁴⁵ Incha tru Tiuswei yau chigøben puraimønrrai ashib pønrrabeløbe tru sacerdotemeran karubeløba, fariseosmeraba purraisrø katø pubene, truiløbe nõmune trenchibelø køn:

—¿Jesúswane chindimba sruamrrumøgue?— cha.

⁴⁶ Inchen tru ashib pønrrabeløbe trencha løtabelø køn:

—¡Kan managuen ø møg lataibe muguen wamindig kaagøn!— cha.

⁴⁷ Inchene fariseosmerabe trenchibelø køn:

—Kabe ¿may waminchen ñimgucha tabig chitanmab tru kuindø kørewa pønrrappeendi? cha. ⁴⁸ Kabe ¿namui ashib karubelø kui, fariseosmera kui mõikkøben truiløma nun køreitarru? cha. ⁴⁹ Pøs i misag sötø tru maig maramigwan martrai Moisés pørigwan ashmeeløbe larrø kaig nebuim pønrrønrrai pønsrailø køn— cha.

⁵⁰ Inchen Nicodemo, tru srøtøzhiitø Jesúswan yem ashchab ibig, tru fariseosmerai utuibe trenchiptinchibig køn:

⁵¹ —¿Tru maig maramigwan martrai namui pørikkan kan mõwan chi marig kuitashchab ashchab, nõ wamindigwan mørøbmerrig mõrmubendøgan kaigyu pasrønrrai pasrøbig kuitarru?— cha.

⁵² Inchene nõmbe trencha løtabelø køn:

—¿Kabe ñigucha galileasriitøwein køtirru? cha. Tiuswei wamwan pørigwan maig chibig køtashchab ñiguen tab ashchig chibelø køn, Tius maig karuigwan eshkab møg Galileagurrimbe muguen kurrømuig kuin kui, ñiguen ashchabguen— cha.

⁵³ Inchabe yandø mõitøgucha yamay chab ambubelø køn.

8

Ishug keebaig købendø, katøganba kaig marøb tsuben merrarrainabig

¹ Inchen Jesúsbe Olivos Tunsrømay ya, ² katø kwaløm tørraben, katø Tiuswei yaumay arrubene, maya misaabe nun kemallen, nõbe wamisra, kusrenanøb mendabig køn.

³ Inchen tru Moisés pørigwan kusrenanøbeløba, fariseosmerababe kan kasharawa ishug kaig marøb tsuin køben merrarrawa, Jesúsweimay srua amrrua, truyu purrabelai tøbøtag pasrabe, ⁴ Jesúswan trenchibelø køn:

—Kusrennøbig, i ishuwane kaig marøb tsuben ke truyu merrarraig køn cha. ⁵ Trube, tru maig maramigwan martrai Moisés pøriibe øyeeg ishumburmerane sruutøga peta, kweetsingarubig køn cha. Treeg købene, trube, ¿ñibe manchinrragu?— cha.

⁶ Nømbe øyamay payippe, mandø inçhibig køtasha, chigøben chi køptørre trencha mørøbelø køn. Inçhene Jesúsbe utsøbasra, tasig-unøtøga pirau pørøb mendabig køn. ⁷ Inçhen ke payibig payen, katø kurraashabe, nømune trenchibig køn:

—Ñim møikkøben kaig marig chigaibe, trumerrig pølbasra sruutøga nun petø pøs— cha.

⁸ Incha katø Jesúsbe utsøbasra, pirau pørøbig, pørøbig køn. ⁹ Inçhen nømbe tru nø trendaigwan mørabe, mas kølleelø merrig kan kan pera pølbasra, webamba ambub mendabelø køn, Jesúsba tru ishug truyu pasrabiibatø kørrømisram. ¹⁰ Inçhen Jesúsbe kurraashabe, trenchibig køn:

—Au, ishug ¿kaneløbe chu ambah? cha. ¿Mugucha ñune møra meganrrai chi marmuitarru?— cha.

¹¹ Inçhene nøbe trenchibig køn:

—Kasuku, mugucha nane treeg marmøtan— cha.

Inçhene Jesúsbe trenchibig køn:

—Katø nagucha ñune chi marmumønrrun cha. Inrrø, chibig køn. Møingurrimbe katø kaig martra kømø— cha.

Jesús yu pirau maya misagwei tør

¹² Jesúsbe katø fariseosmeran trenchib waminçhibig køn:

—Nabe yu pirau misagwei tør kur cha. Inçhen nai mendig uñibiibe managuen løstøyu uñmøtø, tru øsig kømig tørwan tøgagørrun— cha.

¹³ Inçhene fariseosmerabe trenchibelø køn:

—Ñibe maig kuigwan eshka waminçhippe, ka ñuimburaptø wamindan cha. Treekkurri ñui wamindiibe ka isatø køn— cha.

¹⁴ Inçhene Jesúsbe trencha løtabig køn:

—Maig kuigwan na naimburaptø wamingdunen, na wamindiibe isa wamingd kømøn cha. Kaguende nabe na chugurri arrigwan ashib, katø chumay yamigwan ashib inchar cha. Trune ñimbe na chugurri arrigwan ashmøwei, ni chumay yainguen ashmøwei indan cha. ¹⁵ Ñimbe maig maramigwan asha marøppe, møguelø maig isua marøbelø køben, ñimbe treeg isua marøbelø køn cha. Trune nabe mungucha maig maramigwan treeg mara ashmøg kur cha. ¹⁶ Inçhen tru maig maramigwan na asha maringuen, trube maig maramigwan sølgandø asha marig isa kømø, treeg køn cha. Kaguende nabe natø kømøtø, nai Møskai nan karua ørøbiiba misra marar cha. ¹⁷ Maig maramigwan martrai ñimui pøriiøyuma, trenchibig pørig pasran cha, maig kuigwan ashibelø møguelø pailø treetøweih eshkaikkurrimbe, isa kømøn chibig. ¹⁸ Pøs naimburabigwan maig kuigwan eshkaibiibe natøwein køben, katø nai Møskai nan karua ørøbikkucha naimburabigwan maig kuigwan eshkan— cha, trenchibig køn Jesúsbe.

¹⁹ Inçhene nømbe trencha payibelø køn:

—Ñui møskaimbe ¿chu pasra?— cha.

Inçhene Jesúsbe trencha løtabig køn:

—Ñimbe nan ashmøwei, nai Møskawan ashmøwei indan cha. Nan ashibelø kuimbe, nai Møskawangucha ashibelø købsruinrrun— cha.

²⁰ Iilan waminçhib pasrappe, Jesúsbe tru Tiuswei yau Tiusweyasig an pusrim pulu kusrenanøb pasrøwa, trendaig køn. Inçhen mugucha kemørtrab inçhimeelø køn, kaguende nun treeg maramig pumø srø køben.

“Na yamsrømbe ñimbe amrrunrraamøn”

²¹ Incha Jesúsbe katø trenchibig køn:

—Nabe inrrainchar cha. Inçhen ñimbe nane lappe, labendø, ñimbe ñimui kaig marøb amønainuutø kwanrrun cha. Pøs na yamsrømbe ñimbe amrrunrrab kaimanrrun— cha.

²² Inçhene judíosmerabe nømdø trenchibelø køn:

—¿Kabe nøasiitø kwanrrainçhippeendi? cha: “Na yamsrømay iben, ñimbe amrrunrrab kaimanrrun” chinrappe.—

²³ Inçhene Jesúsbe nømune trenchibig køn:

—Ñimbe yuelø køben, nabe palasriig kur cha. Ñimbe yu piraelø køben, trune nabe yu pirauig kømur cha. ²⁴ Inçhawei treekkurri nabe ñimun trendaig køn cha: “Ñimbe kaig marøb amønailøyutø kwanrrun” cha. Kaguende ñim nan na kuitamab isua køreimuikkurrimbe, ñimui kaig marøb amønailøyutø ñimbe kwanrrun— cha.

²⁵ Inçhene nun trencha payibelø køn:

—Trube, ¿ñibe mu kugu?— cha.

Inchene Jesúsbe trencha lɔtabig kɔn:

—Srɔsrɔgurrɪ na ñimun maig eshkab arrig, truig kɔn cha. ²⁶ Nabe ñimun chigɔben wamindamig truba tɔgagur cha, ñimbe ɔyeelɔ kɔn tamig. Inchen nan karua ɔrɔbiibe isa kɔmɔ, cierton waminchibig kɔn cha. Inchen na yu piruelan wamindiibe na nun wamindi mɔrigwan, trunun waminchar— cha.

²⁷ Inchen Jesúsbe nui Mɔskawan waminchen, nɔmbe ni chiwan wamindinguen wetɔgɔrrrɔmeelɔ kɔn. ²⁸ Treekkurri Jesúsbe nɔmune trenchibig kɔn:

—Ñimbe tru Mɔg Misra Arrubigwan mesra pala kusrabene si, nabe na kui ñimbe nebua ashɪb, katɔ chiwandɔgucha marɔppe, ka naimburaptɔ marmɔtɔ, iilan waminchippe, nai Mɔskai maig kusrenanigwan waminchibig kuin kui nebua ashɪb inchun cha. ²⁹ Kaguende nan karua ɔrɔbiibe naba pasrab, katɔ nɔbe nandɔ elachimɔwei indig kɔn cha. Pɔs nabe managucha marɔppe, nɔ tab kui wanrrai treegwandɔ marɔbig kur— cha, trenchibig kɔn.

³⁰ Jesús iigwan waminchene, truba yamelɔ nun kɔrebelɔ kɔn.

Tiuswei ureemeraba, kaig marɔptɔ amɔñibelɔba

³¹ Incha tru judíosmera nun kɔrebelane Jesúsbe trenchibig kɔn:

—Na maig wamindiilan ñim trunun mɔra marɔb pɔnrrɔwabe, isa kɔmɔ, nai mendig amɔñibelɔ kɔnrrabguen cha. ³² Incha ñimbe tru newan ciertonigwan nebua ashene, tru ciertonibe ñimune ilɔsrkɔbelɔyugurrɪ elatsiilɔ kɔnrrai martrun— cha.

³³ Inchen nɔmbe trencha lɔtabelɔ kɔn:

—Name Abrahamweinukkurri amrrub misaamera ker cha. Name managuen mu karua srua kuindiig melɔmɔ misaamera ker cha. Ñibe ɔyeebe ¿mandɔ chigu? cha, ‘namun elatsiilɔ kɔnrrun’ chinrrappe.—

³⁴ Inchene Jesúsbe trenchibig kɔn:

—Nabe ñimun isa kɔmɔ, cierton trendamɔnrrun cha: Mutɔgucha kaigwan marɔb pasra-biibe, tru kaig marɔb pasraig, truitɔ kanawa srua yaig pasran cha. ³⁵ Kan karuindiig megabiima yaube managatig kɔrrɔmismuben, trune kan nusrkaimbe si, managatig truyu kɔrrɔmisran cha. ³⁶ Inchawei Tiuswei Nusrkai ñimun kaig marɔb melaigugurrɪ elachene, ñimbe isa kɔmɔ, newan elatsiilɔ kɔnrrabguen cha. ³⁷ Ñimbe Abrahamweinukkurri amrrub misaamera kui nabe ashaweim pasrar cha. Inchendɔ ñimbe nane kwetchab inndan cha. Kaguende na wamindiibe ñimuinuube kɔrrɔmismɔn cha. ³⁸ Nabe nai Mɔskaimba pasrɔwa asigwan, truigwan waminchen, ñimbe ñimui mɔskawan mɔrigwan trunun maran— cha.

³⁹ Inchen nɔmbe trencha lɔtabelɔ kɔn:

—Namui mɔskaimbe Abraham kɔn— cha.

Inchen Jesúsbe trenchibig kɔn:

—Ñim Abrahamwei nusrkalɔ kuimbe, trube ñimigucha, Abraham mari lataigwei marɔbsruinrrun cha. ⁴⁰ Inchendɔ ñimbe mɔimbe nane kwetchab inndan cha, Tius mandɔ taig mɔrigwan na tru newan cierton waminchib mɔwane. ¡Abrahambe managuen ɔyeebe marmuig kɔbig kɔn cha! ⁴¹ Ñimbe ñimui mɔskai mariilan marɔbelɔ kɔn— cha, trenchiben, nɔmbe trencha lɔtabelɔ kɔn:

—Name mu mendaigwei tɔgamisri ureemeragucha kɔmer cha. Name mɔskaimbe kandɔ tɔgar ker cha, truiibe Tius.—

⁴² Inchene Jesúsbe trenchibig kɔn:

—Ñimui mɔskai Tius kuimbe, trube, ñimbe nane undaarabsruinrrun cha. Kaguende nabe Tiusweinukkurri arrua, yu pasrar cha. Nabe ka naimburaptɔ arrig kɔmɔtɔ, nane Tius ɔrig kɔn cha. ⁴³ Ñimbe na wamindigwane ¿chindimbarre chugúinguen mɔrmeelɔ kɔh cha? Na wamindigwan ñimbe mɔrmeelɔ kuarre treendan cha. ⁴⁴ Ñimbe ñimui mɔskai nugwaimandzigwei ureg kua, ñimui mɔskai maig palain kɔben, ñimbe trunun marɔb pɔnrran cha. Nugwaimandziibe srɔsrɔgurrɪ kweechiptig kua, managuen tru newan ciertonigube pasramisra marmúig kɔn cha, kaguende nuinuube ciertonibe chigaa kua. Inchawei nɔ chigɔben isa waminchippe, nɔ maig kua, treeg wamindan cha. Kaguende nɔbe purɔ isaptig kɔn cha. Incha nɔbe isa wamindigwei mɔskain kɔn cha. ⁴⁵ Trune nabe ñimun tru newan cierton waminchene, ñimbe nane kɔremɔn cha. ⁴⁶ ¿Ñim mɔikkɔben na chigɔben kaig mara pasrai ashkeh? cha. Trube na isa kɔmɔ cierton waminchene, ñimbe nane ¿chindimba kɔremɔgue? cha. ⁴⁷ Kaguende Tiuswei unɔbe, Tius wamindiilan mɔran cha. Trune ñimbe Tiusweyelɔ kɔmɔwa, treekkurri Tius wamindigwane mɔrmeelɔ kɔn— cha.

Abrahamguen kɔmɔwatɔ Cristobe manawei kɔbig

⁴⁸ Inchene judíosmerabe Jesúsban trenchibelɔ kɔn:

—Ñibe samaritano kan kwaimandzig tɔgaig kɔn chippe, name sɔlwein chibrain kɔn— cha.

⁴⁹ Inchene Jesúsbe trenchibig kɔn:

—Nabe kwaimandzig tōgaig kōmur cha. Treeg kōmōtō, nabe marōppe, nai Mōskawan tab indig kōnrrai marar cha. Trune ñimbe nane maig kōbash inndan cha. ⁵⁰ Nabe nan maya nuguen tab inchaindō lamur cha. Inchendō kan kōn cha, naimburab nan tab inchai lab, katō maig maramigwan asha marōb inchibig. ⁵¹ Nabe ñimun isa kōmō, cierton trendamōnrrun cha: Na maig taigwan mōra marōbiibe managuen kwamigwan ashchaamōn—cha.

⁵² Inchene judíosmerabe trencha lōtabelō kōn:

—Mōimbe si, aser cha, ñibe kan kwaimandzig tōgaig kui. Abraham lata, Tius maig karuigwan eshkabelō lata chab kwaben, trune ñibe: “Na maig taigwan mōra marōbiibe managuen kwanraamōn” tan cha. ⁵³ ¿Kabe ñigan namui mōskai Abraham lataguen kōmō, mas nuig kōtirru? cha. Truibe kwaben, katō tru Tius maig karuigwan eshkabelō lata chab kwaig kōn cha. ¿Ñibe mu kurmab isugu?— cha.

⁵⁴ Inchen Jesúsbe trencha lōtabig kōn:

—Na naasiitōwei maya nuguen tab inchib pasraibe, trembe chi marmuinguenig kōn cha. Nan maya nuguen tab kōnrrai marōbiibe nai Mōskain kōn cha, tru ñim ñimui Tius kōn taig, truig. ⁵⁵ Inchendō ñimbe nune ashmeelō kōn cha. Trune nabe si, ashibig kur cha. Na ‘nun ashmīg kur’ taimbe, trube, ñim latawei isaptiig kōsrubrainrrun cha. Pōs nabe nun ashib, katō nō maig taigwan mōra marōb inchibig kur cha. ⁵⁶ Merrabsrō ñimui mōskai Abrahambe nain kwalōm punrrabigwan asha, truba kasraaraig kōn cha. Incha ashabe, truba kasrag kui indig kōn— cha.

⁵⁷ Inchene judíosmerabe Jesúswan trenchibelō kōn:

—Ni cincuenta añosikken kōmubendō, ¿ñigan: “Abrahamwan nebua ashibig kur” chitirru?— cha.

⁵⁸ Inchene Jesúsbe lōtappe trenchiptinchibig kōn:

—Nabe ñimun isa kōmō, cierton trendamōnrrun cha: Abrahamgwen kōmōwatō, Na Kur— cha.

⁵⁹ Treekkurri nōmbe Jesúswan sruutōga petōnrrab srug kusruben, nōbe trubabig kōn. Incha Tiuswei yaugurri webya, ibig kōn.

9

Kan mōg kerrigu ashmīgwan Jesús tamarōb

¹ Jesús kanbalō pureb pasrōwabe, kan mōg srōsrōgurri kerrigu ashmīg kal-laweigwan ashibig kōn. ² Inchen nui kusrenanōb pera unilōbe trenchibelō kōn:

—Kusrennōbig, ¿ō mōg ashchab kaimabig kal-lanrraimbe, mōig kaig marig kerah? cha. ¿Mōskalō kaig marikkurrin kōh? Kabe: ¿nōasiitōwei kaig marikkurrin kō, chinderah?— cha.

³ Inchene Jesúsbe trencha lōtabig kōn:

—Nō kaig marikkurrin kōmōwei, kabe mōskalō kaig marikkurrin kōmōwein kōn cha. Treeg kōmōtō, Tiusbe nui maramburab mariilō tru ashmīgweinug kenamisrtrain kuig kōn cha. ⁴ Kwalōm kōbenbatō nan karua orōbigwei maramigwan nambe marmō kōmō, maramigwein kōn cha; kaguende yembe attrun cha, mugucha maramgaikke. ⁵ Na yu pirau uñippe, piraelai tōr kur— cha.

⁶ Incha Jesúsbe oyah chib pasrōwabe, pirau illimbi tucha, tru illimbitōga kaizhig chillig marabe, trutōga ashmīgwein kabyu srōlōbig kōn. ⁷ Inchabe trenchibig kōn:

—Silōé pisusrō malōwan kwallchab inrrō— cha. (“Silōé” chippe, “karua orig” chib.)

Inchen tru ashmūibe ya, malōwan kwalla, katō arruppe, ashibig arruptinchibig kōn.

⁸ Inchen nui ya puluelōba, katō tru ‘chigōben kettra’ cha, miab wabigwan ashibelō kōbelōbabe trenchibelō kōn:

—¿Tru ‘chigōben kettra’ chib, miab wabiibe oigwein kōmuitarru?— cha.

⁹ Inchen kanelōbe trenchibelō kōn:

—Nōwein kōn— cha.

Inchen katōganelōbe trenchibelō kōn:

—Truig lataig asōnabendō, nō kōmōn— cha.

Inchen nōbe nōashib trenchiptinchibig kōn:

—Nawein kur— cha.

¹⁰ Inchene nōmbe trenchib payibelō kōn:

—¿Chincha ashibig misrku?— cha.

¹¹ Inchene nōbe trenchibig kōn:

—Kan mōg, munchibe Jesús taig, chillig mara, nan kabmerayu srōlabe, trenchitan cha: “Silōé pisusrōmay ya, malōwan kwallchig” cha. Inchen nabe ya, malōwan kwallene, nai kabmerabe ashibig misrōptinndan— cha.

¹² Inchen nune trencha payibelō kōn:

—¿Tru møøbe chu yah?— cha.

Inchen nøbe:

—Chindindø— chibig køn.

Fariseosmera tru ashmíg købigwan truba payib srua køb

¹³ Incha tru kerrigu ashmíg købigwan fariseosmerai merrab pera ambubelø køn.

¹⁴ Kaguende tru Jesús chillig mara, ashmígwan tamarin kwalømbe isrin kwaløm købig køn.

¹⁵ Incha fariseosmeragucha tru mowan katøyug payibelø køn:

—¿Mandø incha, ashibig misrku?— cha.

Inchene nøbe trenchibig køn:

—Kappala nane chillig srøldan cha. Inchen nabe maløwan kwaliitø, ashibig misrinatan— cha.

¹⁶ Inchen mõiløggøben fariseosmerabe trenchibelø køn:

—Kan øyeeg marøb møøbe Tiuswein kømuinrunn cha. Kaguende isrin kwalømwane ke isrin kwaløm kømui lataig marøbig køn— cha.

Trune katøganeløbe trenchibelø køn:

—¿Kan kaig marøb møøbe øyeeg Tius nøba pasrain kui asha kømig mariilø mana martrab kø?— cha.

Incha yandø nõmdø ke nõørotø misrøbelø køn. ¹⁷ Inchawei tru ashmíg købigwane katøle payibelø køn:

—Ñibe, ¿tru mõweimburab manchinragu cha, tru ñui kabmeran tamarig købene?—

Inchen nøbe lötappe trenchibig køn:

—Nabe Tius maig karuigwan kan eshkab møg køn tamønrunn— cha.

¹⁸ Inchen katøgucha judiosmerabe kørenrrab inchimeelø køn ke ashmíg købig kua, katøle ashibig misritamappe. Incha tru tamarinabigwei mõskalanguen amrrunrai wama,

¹⁹ nõmune trenchib payibelø køn:

—¿Iig tru ñimui nusrkain kuitarru cha, tru ñim kerrigu ashmíg kal-lan? taig. ¿Trube, mõimbe mandø incha ashibig misrah?— cha.

²⁰ Inchene mõskaløbe trenchibelø køn:

—Namui nusrkaiwein køn cha, tru kerrigu ashmíg kal-labig. ²¹ Inchendø ashibig misrtrappe, mandø indigwane nambe trunune ashmer cha. Katø ya ashibig misrtrambe kabmerane mu tamarin kui namgucha ashmer cha. Ñimbe nunashib payay chibelø køn, yandø kølig køn cha, nõashib maig kuigwan eshkanrunn— cha.

²² Mõskalø øyeeg chippe, judiosmeran kørig køptørre øyeeg chibelø køn, kaguende judiosmerabe mõikkøben: “Jesúsuan Cristo køn” chibigwane nõmui tulundzuni yaugurri wegutchab waminchaguen køben. ²³ Incha treekkurri mõskaløbe trendaig købig køn:

—Nunashib payay cha, yandø kølig køn— cha.

²⁴ Incha judiosmerabe tru ashmíg køb mõwane katøle wama, trenchibelø køn:

—Tiuswane maya nuguen tabig waminchi cha. Nambe tru møøbe kaig marøbig kui asha ker— cha.

²⁵ Inchene nøbe trenchibig køn:

—¿Kaig marøbig køh? Kabe: ¿Kaig marmíg kø, chindi? Nabe trunune ashmur cha. Nabe kerrigu ashmíg købig kuig, mõimbe yandø na ashibig misrigwan nabe trunune isua pasrar— cha.

²⁶ Inchen katøyug payibelø køn:

—¿Chi marta? cha. ¿Ashibig misrtrambe mandinda?— cha.

²⁷ Inchene nøbe lötappe, trenchibig køn:

—Yamba chab eshkaben, ¿mørmeelø kø chindah? cha. ¿Chindimbarre katøyug mõramig palangøgue? cha. ¿Ñimgucha kabe nui mendig amøñibelø misrøg køtah?— cha.

²⁸ Inchene nõmbe nun trømbøig tsalø wamabe, trenchibelø køn:

—Ñibeguende tru mõwei mendig pasran cha. Trune namuimburappe, nambe Moisés maig chiben treegwan pønrrabelø ker cha. ²⁹ Moiséswane Tius wamingdig kui nambe ashibelø ker cha. Tru tru mõwane chuig kuinguen nambe ashmeelø ker— cha.

³⁰ Inchen tru møøbe trencha lötatag køn:

—Pøs, kan øyeegweinre mandø kuinguen mõramgaig, ke kwaara asamdiig tabig køn cha. Ñimbe chugurri arringuen ashmuben, trune nane kabmeran ashibig martan cha. ³¹ Nambe trendø ashibelø ker cha, kaig marøbelane Tiusbe mõrmíg kuin kui, trune mõikkøben nun køriibala tabig waminchibigwane nøbe mõøbig kui. ³² Managuen kan kal-lainukkurri ashmíg kal-labigwan mu tamarin taig manasrøngurri mugucha wammøra kømøn cha. ³³ Tru møg Tiusweinkurri arrubig kømuimbe, chigucha martrab kaimain kømbala— chibig køn.

³⁴ Inchene nõmbe trenchibelø køn:

—Ñi, yeeg kaig mariitø netsaig kal-lawaiḡ kōbendø çnamungan ñibe kusrenanrrab indirru?— cha.

Incha nømbe nune judíosmera tulundzuni yaugurri weguchibelø køn.

Tiusweiwan ashibelø ker chibendø, ashmeelø

³⁵ Inchen Jesúsbe tru ashmíḡ kōbigwan judíosmera tulundzuni yaugurri wegutsin køn taig wammøra, nun katabe, trenchibig køn:

—çÑigan tru Møg Misra Arrubigwan kōretirru?— cha.

³⁶ Inchene tru mōøbe trencha lōtabig køn:

—Au, Kasuku, çtruiḡbe mu kōh? cha, na nun kōrenrrab— cha.

³⁷ Inchene Jesúsbe trenchiptinchibig køn:

—Ñibe ashibguen indan cha. Ñiba waminchib pasrabig, nabe truig kur— cha.

³⁸ Inchene tru mōøbe trenchibig køn:

—¡Señor, nabe ñun kōrer!— cha.

Incha nun kōriibala tabig waminchibig køn. ³⁹ Inchen Jesúsbe trenchibig køn:

—Nabe yu piraumay arruppe, maig kōnrrabigwan asha martrab arrig køn cha, ashmeeløbe ashibelø misrrai; Inchen ashibeløbe ashmeelø misrrain— cha.

⁴⁰ Inchen mōilōḡsørøn fariseosmera Jesúsba pōnrrabelø tru trendaigwan mōrabe, trenchibelø køn:

—çKabe namgucha kabgar ashmeelø kōbra chindah?— cha.

⁴¹ Inchene Jesúsbe lōtappe trenchiptinchibig køn:

—Ñim ashmeelø kuig kuimbe, ñim kaig marig chigar kōbsruinrrun cha. Inchendø mōimbe ñim ‘ashibelø ker’ chib pōnrraikkurri ñimui kaig mariiløbe ñimuinḡ pasrabwei indan cha.

10

Ubishameran tulisha kanbalatø keerigwan kemesra waminchib

¹ Nabe ñimun isa kōmø, cierton trendamōnrrun cha: Ubishameran tulisha kanbalatø keerinḡ tru yaskabwan kebiḡmøtø, nōøøø pegwan kebiḡiibe, truiḡbe niliḡ, katø maig kōbash marøḡ wesrabig, treeḡ køn cha. ² Trune tru yaskabmay kebiḡiibe si, tru ubisha ashibig køn cha. ³ Yaskab kurøḡ pasrabiibe nō kebinrrai yaskabwan kuren, ubishamerabe tru ubisha ashibigwei wamwan mōøøbelø køn cha. Incha nøbe nui ubishameran nōmui munchiwan, nōmui munchiwan wama, tru keerinukkurri wambig wesrun cha. ⁴ Yandø kerrigu nuielan chab wesrawabe, nøbe ubishamerai merrab iben, ubishamerabe wendautø ambubelø køn cha, kaguende nui wamwandø tsabø mōøøbelø kua. ⁵ Trune kan asiimíḡ pegwane managuen wendautø amrraamøn cha. Nuinukkurrimbe lulōptinchun cha, kaguende asiimeelai wamwane mu kui mōrmeelø kua.—

⁶ Jesúsbe iigwan ‘øyeeg lataitøwein køn’ cha, kemesra waminchene, øyeeg chippe, chiwan wamindinguen mōrmeelø køn.

Jesús, tru Ubisha Ashibig Tabig

⁷ Incha Jesúsbe katø nōmun trenchibig køn:

—Nabe ñimun isa kōmø, cierton trendamōnrrun cha: Ubishamera kebambig yaskappe na kur cha. ⁸ Mayeeløba na arrumøwatø amrrubeløbe nileelø, maig kōbash marøḡ niila wesrabelø kōben, ubishamerabe nōmune mōrmuig køn cha. ⁹ Nabe yaskab kur cha. Mōikkōben nai yaskabwan kebarrubiibe kaigyugurri wesraig kōnrrun cha. Truiḡbe kebiḡ, webarrub llirab uña, pumera mamelø wetōrranrrun cha.

¹⁰ Kan niliibe nilōnrrappah, kwetchappah, ka pinishinrrappatø arruben, trune nabe arruppe, srøig øsig kōmigwan tōḡagōnrrai arrur cha, trurriḡ tōḡagōmburab tōḡagōnrrai. ¹¹ Nabe ubishameran tru purø tab ashibig truig kur cha. Tru ubishameran tab ashibiibe nui øsig kuigwan ubishamerayasig purøbasran cha. ¹² Trune tru ka anweindø ashibiibe ubisha mabig lobo arri ashippe, ubishamerane chinchaindø lulōptinchun cha, kaguende tru ubisha ashibig kōmøwei, katø ubishameragucha nuielø kōmøwein kuimba. Inchen lobobe ubisha sōtøyu kelula, merrarraben, yandø tru ubishamerabe nōøøtø misran cha. ¹³ Tru anweindø ashibiibe lulōptindan cha, kaguende anwandø isubig kua, ubishamerane nōm kusrenraindø.

¹⁴⁻¹⁵ Nabe ubishameran tru purø tab ashibig truig kur cha. Nai Mōskaimbe nan tab ashen, nagucha nai Mōskawan tab ashar cha. Øyeetøwei nabe nai ubishameran ashen, nōmgurringucha nane ashibelø køn cha. Incha nabe nai øsig kuigwan ubishamerayasig purøbasrar cha. ¹⁶ Nabe katōḡan ubishamera tōḡagur cha, i tulyuig kōmeelø. Truilangucha nane pera arrumig palōnrrautan cha. Truiløbe nai wamwan mōrtrun cha. Trumaybe ubisha sōtømera kandø misren, ubishameran ashibikkucha kandø kōnrrun cha.

¹⁷ 'Inchawei nai Møskaimbe nan undaguig kòn cha, kaguende katøle utønrraptø, nabe natøwei nai øsig kømigwan tranig kuimba. ¹⁸ Nane nai øsig kuigwan mugucha kerranrraamøtan cha. Treeg kømøtø, na naashib tranar cha. Nabe øsig kuigwan mu mandamgaig tranamig tøgagøb, katø mu mandamgaig katøle na utamig tøgagig kur cha. Øyeeg maramigwane nabe nai Møskawan utig kòn— cha, trenchibig kòn Jesúsbe.

¹⁹ Inchene øyeeg wamindigwan judíosmera mørabe, katøguen nøørotø misrøbelø kòn. ²⁰ Incha møiløgøben trenchibelø kòn:

—Kwaimandzig tøgagig kua, chugúinguen mørmíig pasran cha. ¿Chinchabrre mørgue?— cha.

²¹ Trune kaneløbe trenchibelø kòn:

—¿Mu kan kwaimandzig tøgagigkan øyeeg waminchaitarru? cha. ¿Kabe kan kwaimandzikkkan ashmeelan tamartraitama chindah?— cha.

Judíosmera Jesúswan kaashib

²² Inchen Jerusalénsrømbe fiesta marøb købig kòn, tru merrabsrø Tiuswei yawan Tiusweindø kònrrain cha tranøb marigwan katøle trunun isunrrab. Inchen larrø pishim pømera købig kòn. ²³ Inchen Jesúsbe tru Tiuswei yau tru yaguetawan, Salomønwei yaskab tainig llirab uñene, ²⁴ truyu judíosmera tulsruabe, trencha payibelø kòn:

—¿Nam mu kuinguen mørmíig melønrrai managatiirre øyeetø, øyeetø namun tøgagønrragu? cha. Isa kømø, ñi Cristo kuabe, trube, kanmaytø kelarrab eshkau pøs— cha.

²⁵ Inchene Jesúsbe trencha løtabig kòn:

—Yamba ñimun eshkaben, ñimbe na Cristo kuitamab køremøn cha. Na nai Møskawei munchiyu na chigøben mariiø, truiløbe naimburab treegwein kòn chib eshkan cha. ²⁶ Inchendø ñimbe nai ubisha utuelø kømøwa, nane køremøn cha. ²⁷ Nai ubishamerabe nai wamwan mørøbelø køben, nagucha nømun ashibig kur cha. Incha nømbe nai mendig amr-rubelø kòn cha. ²⁸ Nabe nømunne managatig øsig kømigwan tranen, managuen pinønrrabelø kømøwei, katø nai taskugurrimbe mugucha kerranrraamøn cha. ²⁹ Nai Møskai nan truilan tranøbiibe mayeelan purab nuig køben, Møskawei taskugurrimbe mugucha kerranrrab kaimanrrun chibig kòn. ³⁰ Naba, nai Møskaimbabe kandø ker— chibig kòn.

³¹ Inchene judíosmerabe kwetchab srug muta petønrrab katøguen srug kusruben, ³² Jesúsbe trenchibig kòn:

—Nabe nai Møskaweimburabelan ñimui merrab chigøben purø nørreelø marøb kenamarig kòn cha. ¿Tru na treeg tabig mariiøyu, møig kalø kuindørre nane sruutøga petønrrainchigue?— cha.

³³ Inchene tru judíosmerabe trenchibelø kòn:

—Nam sruutøga petappe, ñi tabig marikkurrin kømøtø, ñi Tiusweimburab purø trømbøig wamab, tru ñibe ka møøtø købendø: “Tius kur” chib pasraikkurrindø nambe petønrrab inder— cha.

³⁴ Inchene Jesúsbe nømunne trenchibig kòn:

—¿Tru maig maramigwan martrai ñimui pørigube øyeeg chibig pørig pasrømuitarru cha: “Ñimbe tiusmera kòn” cha, Tiusbe trendan taig. ³⁵ Tru Tiuswei wam pørigwan wamindinabelandøguen: “Tiusmera kòn” cha wamig købene, (katø tru Tiuswei wamwan pørigwane ka treeg kønmab ashatø tarømarøptindamig kømøn cha.) ³⁶ trube, Møskai nuyasiitø tarømara, yu piraumay karua ørig: “Na Tiuswei Nusrkain kur” chibene: “Ñibe purø trømbøig wamab pasran” cha, ñimgan trenchib køtirru? cha. ³⁷ Nai Møskai mariilan na marmubene, trube, køremørunrrigay cha. ³⁸ Inchen nai Møskai mariilan na marene, trube, nan nui Nusrkain kuitamab køremuindøgucha, tru na mariilandøguen kørey chibig kòn. Nai Møskaimbe nainug pasrøben, katø nabe nai Møskaweinug pasrabig kuin kui nebua ashib, chigúu mørøb in-chappe.—

³⁹ Inchen nømbe katøguen Jesúswan merrarrawa, sruamrrab inchen, nøbe nømui utugurri iptinchibig kòn.

⁴⁰ Incha Jesúsbe tru Jordán pi ambøgatøsrømay katø ya, truyu kørrømisrøbig kòn, Juan tru srøtøzhiitø misaameran pi umbu ulsrøb uniisrø. ⁴¹ Inchen misaamerabe Jesúsweimay truba nu ambabe, nømdø trenchibelø kòn:

—Juanbe Tius nøba pasrain kui asha kønrrai mariiø marøppe, marmuindøgucha, ø møweimburab nø chi wamindiiløbe kerriguba isa kømubwei indin kòn— cha.

⁴² Incha misaamerabe Jesúswan truba nu kørebelø kòn, truyube.

11

Lázaro kwaig

¹ Kan møg Lázaro taig Betania pueblosriig tru Maríaimba, Martaimba nuchaabe kwanrø tsubig kòn. ² Tru Mariabe, Señorwei srøb pala tru purø may irrabzhigwan lusha, nui srøbwan

pusruutøga pinømørøbig købig, truig køben, tru Lázaro kwanrrø tsubiibe nui nuchag købig køn. ³Inchen tru nui pa nuchaløbe Jesúsweisrømay karua ørøbelø køn:

—Señor, ñi undaaraibe kwanrrø tsun— cha, eshkanrrai.

⁴Inchen Jesúsbe trunun mørabe, trenchibig køn:

—Tru kwanrrøbe kwam kwanrrø kømøtø køn cha. Treeg kømøtø, Tiuswei maya nuguen tabigwan kenamaramigweyasig køn cha, treeg mariitøga Tiuswei Nusrkawan maya nuguen tabig marig kønrrai.—

⁵Jesúsbe Martanba, numøsrwanba, nuchawanba truba undaguig kwagucha, ⁶tru Lázarobe kwanrrø tsun taingucha, tru nø tsuinug katøgucha Jesúsbe pa kwaløm srarrabig køn. ⁷Incha nøbe nui kusrenanøb pera uniilan trenchibig køn:

—Judeasrømay katø amun— cha.

⁸Inchene nømbe trenchiptinchibelø køn:

—Kusrennøbig, judíosmera trusrø yamba ñun srug muta, peta ñun kwetchab inchib kuig yandø yanatø køben, ¿trusrømay katø inrrapteh?— cha.

⁹Inchene Jesúsbe trenchibig køn:

—¿Kan mawabe doce uras tøgaig kømuitarru? cha. Pøð, kan kwaløm uñibiibe srurrengwamøn cha, kaguende yu pirau tør pilimba. ¹⁰Trune kan yem uñibiibe srurrengwanrrun cha, kaguende yembe tør chigaig løstiig kua.—

¹¹Inchabe katø Jesúsbe trenchibig køn:

—Lázaro namui trendø asiibe kiaïn køn cha. Inchendø nabe nun kasrønanrrab inrrab— cha.

¹²Inchene nui kusrenanøb pera uniiløbe trenchibelø køn:

—Señor, trube, kiptø tsubiibe, treebe tammisrtrab kuinrrun— cha.

¹³Jesúsbe Lázaro kwain køn cha waminchib pasrøben, trune nui kusrenanøb pera uniiløbe: “Ka kib tsun” chitanmab isua pønrrabelø køn. ¹⁴Inchabe Jesúsbe tørgandø trenchibig køn:

—Lázarobe kwabguen indan cha. ¹⁵Nane ñimuimburappe tabguen køtan chibig køn, truyu na mu kaagúikkurri, kaguende trumaybe ñim nan kørenrrain cha. Trube, nun ashchab amun — chibig køn.

¹⁶Inchene Tomás, tru Gemelo taibe, tru katøgan kusrenanøb pera uniilan trenchibig køn:

—Namgucha, trube, amun cha, nøba kegøtø kwanrrab.—

Jesúsbe kwabelanguen øsiiranøbig

¹⁷Incha Jesús puabe, Lázarone sørig chabguen pib kwalømguen purayain kuin kui ashbig køn. ¹⁸Betaniabe Jerusalén pulutø købig køn, truyugurri kan pøn kilómetro køsrønsrø. ¹⁹Inchen judíosmerabe Martanba, Maríanba nuchag kwain køben menrra isui inchimønrrai, lincha purrønrrab truba yam amrruin købig køn. ²⁰Inchen Martabe Jesús pub arrun taig mørøppe, katønrrab webiben, trune Mariábe yau ka kørømmisrøbig køn. ²¹Inchabe Martabe Jesúsban trenchibig køn:

—Señor, ñi yu tsuig kuinguen nai nuchag kwamumba cha. ²²Inchendø møingucha Tiuswan ñi chi miabendø, trannrrab kui ashar— cha.

²³Inchene Jesúsbe Martane trenchibig køn:

—Ñui nuchaabe katøle øsiiranrrun— cha.

²⁴Inchen Martabe trenchibig køn:

—Nabe ashaweim pasrar cha, tru kwabelø srabe kwaløm katøle øsiiraben, Lázarobe øsiirabwei inchab kui.—

²⁵Inchene Jesúsbe nune trenchibig køn:

—Katøle øsiiramiba, øsig kømibabe na kur cha. Nan kørøbiibe kwawagucha, øsig kønrrun cha.

²⁶Inchen mutøgucha øsig uñibig nan kørøbiibe managucha kwanrraamøn chibig køn. ¿ligwan kørøtirru?— chibig køn.

²⁷Inchene Martabe trenchibig køn:

—Nai Señor, øø, cha. Ñibe tru Cristowein kuin kui kørøwa pasrar cha, tru Tiuswei Nusrkai yu piraumay attrabig købig.—

Jesús kishib

²⁸Truigwan chab trenchabe, Martabe numøsrái Marían wamønrrab ya, nundø nilø trenchibig køn:

—Kusrennøbiibe yu pua, ñun waman— cha.

²⁹Inchen Mariábe mōra mallatø kurra, Jesúsban ashchab ibig køn. ³⁰Inchen Jesúsbe katøgucha pueblø y pumø, tru Marta katinuutø srø pasrabig køn. ³¹Inchen María truba mallatø kurra, webyai ashippe, judíosmera tru yau nun menrra isui inchimønrrai lincha purrabøbe wendautø ambubelø køn, sørin tulsrø kishchab yaitamab isua.

³²Inchen Mariábe Jesús pasrainug puabe, nui merrab trenchib tømønnsrøbig køn:

—Señor, ñi yu tsuig kuimbe, nai nuchag kwamumba— chib.

³³Inchen Jesúsbe Mariaba, katø tru lincha amrrubelø judíosmeragucha kisi ashabe, nuinetø truba truba isui inchibig, kan mandøguen kømui inchib køn. ³⁴Incha nømun trencha payibig køn:

—¿Chu sørøgue?— cha.

Inchene nømbe:

—Señor ashchab amø— chiben,

³⁵Jesúsbe kishibig køn. ³⁶Inchen judíosmerabe trenchibelø køn:

—Au, truba undaguig kwaasøna— cha.

³⁷Inchen mõiløgøsrønbe nømdø trenchibelø køn:

—I møg tru kab ashmíngwanma tamarøbiibe, ¿Lázarongucha kwamønrrai inchibsrømøshata?— cha.

Lázaro katø øsiirab

³⁸Inchen Jesúsbe katøle nuinetø truba truba isuim pasrøwa, tru sörinug kemallibig køn. Truibe kan nu trab købig køn, kebambinuube kan nu sruutøga kasraikke. ³⁹Inchene Jesúsbe trenchibig køn:

—Srugwan kusruy— cha.

Inchen Marta tru kwabigwei nuchaabe trenchibig køn:

—Señor, yandø irrøraig kuinrrun cha. Kaguende kwaibe chabguen pib kwalømguen køn— cha.

⁴⁰Inchen Jesúsbe nun trenchibig køn:

—¿Yamba na ñun trenchib mørgøppeh cha, ñi nan kørewabe, Tiuswei tørguegwalmabigwan ashchabguen?— cha.

⁴¹Inchen yandø srugwan mendamaren, Jesúsbe srømbalaneb neeshabe trenchibig køn:

—Nai Møskai, mayanguen ungwa, ungwa cha, kaguen nan mørtan cha. ⁴²Ñibe chu uraskucha nane møøbig køn cha. Inchendø nabe øyeeg chippe, misaamera yu pøtøgatan pønrraikkurri trenchar cha, nane ñi karua ørig kui kørenrrai.—

⁴³Incha iigwan chab trenchabe, truba mur wamabig køn:

—¡Lázaro, webamø!— cha.

⁴⁴Inchene tru kwabiibe tasiimeran srøbmeran llensumeratøga kirrig, maløwane llensutøga pinappulig webarruptinchibig køn. Inchene Jesúsbe nømun trenchibig køn:

—Picha, ibasay— cha.

Jesúsban kemørtrab waminchib

(Mt 26.1-5; Mc 14.1-2; Lc 22.1-2)

⁴⁵Inchen judíosmera truba nu tru Marian ashchab amrrubeløbe, Jesús treeg marigwan asha, Jesúsban kørøbelø køn. ⁴⁶Inchen truyu mõiløgøsrøn fariseosmeraisrømay ambabe Jesús chi marigwan nømun waminchen, ⁴⁷sacerdotesmeran karubeløba, fariseosmeraba misra, tru maig maramigwan asha marøbelø Setenteelan wama, tulundzunabe, trenchibelø køn:

—¿Nambø mandø inchab? cha. Kaguende tru møøbe Tius nøba pasrain kui asamig truba truba mariilø kenamaran cha. ⁴⁸Øyeetø martrai nam elachene, mayeeløba nun kørøben, Romasrø karubeløbe amrrua, namui Tiuswei yawanba, namui maya misagwanba chab pinishinrrun— cha.

⁴⁹Inchen mõikkøsrøn nømui utuig, Caifás taig, tru pilawan maya sacerdotesmeran nø karub sacerdotebe trenchibig køn:

—Kan ñimbe ni chigúinguen mørmøwa køn cha. ⁵⁰Maya misagwan ørøba pinisailø købgunrriibe, nam maya misagweyasig kan møøtø kwamikken søl kui, treegwandøguen ashmeelø kø chindah— cha.

⁵¹Incha Caifásbe trenchippe, ka nø trenchig køptø trenchimuig køn. Kaguende tru pilawan nøbe tru maya sacerdotesmeran nø karub sacerdote kuig køppe, Tius trenchinrrai isungaruben trendaig køn, maya judíosmerayasig Jesúsbe kwanrrab køn cha. ⁵²Katø tru i maya misagweindø kømøtø, mayeelø Tiuswei ureemera truørø amba warabelan kanbalatø tulundzunamig kønrrai, treegweyasiiba køn cha. ⁵³Tru kwalømgurri judíosmeran karubeløbe Jesúsban kwetchab cha waminchibelø køn.

⁵⁴Treekkurri yandø Jesúsbe judíosmerai utube mayeelø ashchai uñmíg køn. Incha Judea piraugurri webya, kanbalø mu misag warab waraimønug tru puluwansrø, Efraín taig puebløsrømay ibig køn. Incha trusrø nui kusrenanøb pera uniiløba kørømisrøbig køn.

⁵⁵Inchen tru judíosmerai Pascua Fiesta pumíg yandø lamø paløben, wambig nøørøsrøngurri misaamerabe Jerusalénsrømay truba nebambubelø køn, kaig marigwan chish misrtrab, tru Pascua Fiesta pumøwatø. ⁵⁶Jesúsban lab amøña, Tiuswei yau purrøwabe, nømdø kangurriin kangurri trenchib payiyabelø køn:

—¿Ñimbe maig isugue? chib ¿fiestayumaybe ni arrubguen inchimuisruandø?— chib.

⁵⁷ Inchen sacerdotesmeran karubeløba, fariseosmerababe karuin købig køn, møikkøben Jesúsuan chu wai ashibiibe, eshkanrrain cha, Jesúsuan kemørtrab.

12

Kan ishug purø may irrabzhigwan Jesúsuan itølushib

(Mt 26.6-13; Mc 14.3-9)

¹ Pascua Fiesta maramig trunewei pa kwaløm paløbenba Jesúsbe Betaniasrømay ibig køn, tru kwabelai utugurri nø øsiirangaruig møg, Lázaro tsuisrømay. ² Truyube Jesúsuan tab inchab kan mamig tamara nena, Martabe pirishiben, Jesúsba mishatsigu purrabelai utu Lázarogucha wabig køn. ³ Inchene Mariabe purø may irrabzhig nardotøzhig marig libraburab srua arrubig køn, truiibe truba nuweyig. Incha nøbe Jesúswei katsig tambalyu itølushabe, nui pusruutøga pinømørøbig køn. Inchen tru may irrabzhiitø ya ørø kebig køn. ⁴ Inchen Judas Iscariote, Jesús kusrenanøb pera uniilai utuig, tru Jesúsuan wendø nun ashig kømui inchibelan tranrrabiibe trenchibig køn:

⁵ —¿Waachameran purugumig i may irrabzhigwan kan trescientos denarioswei yanamdiig kømø, chindah?— cha.

⁶ Inchendø Judasbe waachameran isubig kua kømøtø, niliig kua, trendaig køn. Katøgucha nømui anwane nø esegab srua uñibig kua, truyu pusrigwan wesrubrre inchibig køn.

⁷ Inchene Jesúsbe trenchibig køn:

—Ka marbash cha. Nan sòram kwalømwei esegawa tøgagúin køn cha. ⁸ Waachamerane chu uragucha ñimui utube tøgagønrrun cha. Trune nane ñimui utube ñimbe chu uragucha tøgagønrraamøn— cha.

Lázaron kwetchab inchib

⁹ Truba nu sètø judiosmera Jesús Betaniasrø unan taig wammørøppe, trusrømay ambubelø køn, nun ashchab isuatø kømøtø, tru kwailai utugurri nø øsiiranig Lázaron ashchappa.

¹⁰ Inchene sacerdotesmeran karubeløbe Lázarogucha kwetchab wamincha kørrømisrøbelø køn, ¹¹ kaguende Lázarogurrindø judiosmerabe truba nu tarømisra, Jesúsuan køreben.

Jesús Jerusalénsrø kebig

(Mt 21.1-11; Mc 11.1-11; Lc 19.28-40)

¹² Indiibe katø kwaløm Jesús Jerusalénmay attrab køn taig wammørøppe, misaamera tru fiestayumay purø nu sètø amrrua pasrabiibe, ¹³ palma ishiimeran muta, Jesúsuan trenchib trashib katønrrab webambubelø køn:

“¡Hosanna! chib.

¡Señor Tiuswei munchiyu nø ørig arrubiibe,

tru Israel misagwei Rey, mayanguen tab kuig køn!” chib.

¹⁴ Jesúsbe kan burro-unøzhig pasrain køben, trunun itøguana ibig køn, Tiuswei wamyu maig pørig køben treekke:

¹⁵ “Jerusalén, kørig kui inchimøta cha.

Asay cha, ñimui Reybe kan burra lluig burro-unøyu itøguana attrun” taig.

¹⁶ Srøbatøbe Jesúswei kusrenanøb pera uniiløbe øyeeg mariilane chi chibig kuinguen ashmeelø køn. Inchen yandø Jesúsuan purø nuig, purø tabig mara kusruben, truyu wetøgørrabelø køn, tru øyeeg pørig pønrrabiibe, nuimburab pørig pønrrøwa, nun tru øyeeg mariilan eshkabig kuin kui.

¹⁷ Tru Lázaro kwaben sørig truyu waben, tru misaamera Jesúsba pønrrabelø købeløbe nøm maig asigwan eshkb waminchibølø køn. ¹⁸ Inchagurri tru nu misag sètøgucha Tius nøba pasrain kui asamig i tru marigwan wammørabe, Jesúsuan katønrrab webambubelø køn.

¹⁹ Inchene fariseosmerabe kangurri kangurri trenchibelø køn:

—Au, chiguen maramgaig køn cha. Ñinguen asay cha. Maya misaabe kerriguba nui wendautø chab amban— cha.

Møiløgøsrøn griegosmera Jesúsuan lab

²⁰ Misaamera Jerusalén fiestasrø Tiusuan køriibala tabig waminchab nebambubelai utu truyu møiløgøsrøn griegosmeragucha tøgagøbig køn. ²¹ Incha truiløbe tru Felipe Galilea pirau betsaidasriigwan kemallabe, trenchibelø køn:

—Kasuku, namune Jesúsuan ke asinrrabna kòtan— cha.

²² Inchen Felipebe ya, Andrésuan eshkaben, nømbe pailøba Jesúsuan eshkanrrab ambene, ²³ Jesúsbe trenchibig køn:

—Møg Misra Arrubigweyasig purø nuig, purø tabigwan kenamaramig yandø uta pun cha. ²⁴ Nabe ñimun isa kømø, cierton trendamønrrun cha: Kan tirigu trulma pirau peña kwamøwabe, chu uragucha kan truldø kønrrun cha. Trune pirau peña kwawabe si, truba

nu larrøbichib misran cha. ²⁵ Møikkøben nui øsig kømigwan undaguibe yandø pinab pinamig nebunrrun cha. Trune møikkøben yu pirau nui øsig kømigwan tsalø inchibiibe, managatig øsig kømigweyasig esegawa tøgagønrrun cha. ²⁶ Inchen møikkøben naiwan marøb megabiibe, nai mendig arrumig køn cha. Incha na chu pasrøben, nai mendig megabikkucha truyutøwei pasrønrrun cha. Møikkøben naiwan marøb megabigwane nai Møskaimbe nune truba tab inchun chibig køn.

Jesús nui kwamigwan eshkab

²⁷ Møimbe nane manrrau isubiitø purø trømbøig køtan chibig køn. ¿Nabe mandø chinrrab køh? cha: “¿Nai Møskai, nan øyeeg trømbøig mõi pumønrrai purømisra” chinrrab kø, chindah? cha. Treeg kømøtø, nabe øyeeg punrrabigu pasrønrrabwei arrur cha. ²⁸ Nai Møskai, ñui munchiwan maya nuguen tabig kønrrai mar— cha, trenchibig køn.

Inchene srømbalærøngurri kan wam mørø, trenchibig køn:

—Nabe nai munchiwan yandø maya nuguen tabig kønrrai marar cha. Katøyukken maya nuguen tabig kønrrai maramønrrun— cha.

²⁹ Inchen misag truyu mørøb purrabeløbe trenchibelø køn:

—Kan palaig trashitan— cha.

Inchen kaneløbe trenchibelø køn:

—Nune kan ångel wamindirrun— cha.

³⁰ Inchen Jesúsbe trenchibig køn:

—I wam mørø wamindiibe, nayasig kømøtø, ñimuyasig køn cha. ³¹ Møin køn chibig køn, yu pirau maig kønrrabigwan asha maramig. Katø møin køn, chibig køn, yu pirau nø karub pasrabig, Satanáswan wambig wegutsamig. ³² Incha nabe piraugurri kusruig kua, mayeelø naimay amrrug kui inchai maramønrrun— chibig køn.

³³ Øyamay Jesúsbe mandø kwamigwan eshkabig køn. ³⁴ Inchen misaabe nune trenchibelø køn:

—Tru maig maramigwan martrai pøriiløyube trenchibig køn taig nambe mørøbelø ker cha: “Cristobe managatig wanrrabig køn” cha. Inchen ¿ñibe mandø chigu cha: “Tru Møg Misra Arrubiibe kusruig kømig nebunrrun” chippe? ¿Tru Møg Misra Arrubiibe mu køh?— cha.

³⁵ Inchene Jesúsbe nømun trenchibig køn:

—Katøgucha kan maya yanatø tørbe ñimui utu pasrønrrun cha. Tør tøgagøppatø tøryu amønay cha, løstiiig ñimun ke ka inchib latatø merraramønrraimbe, kaguende løstøyu uñibiibe chumay ib pasrarmabigwan ashmøn cha. ³⁶ Ñim tru tərwan tøgagøppatø, tərwan kørey, chibig køn, tərwei ureemera kønrrappe.—

Øyeelan chab trenchabe, Jesúsbe tarømisra, nømuinukkurri trubabig køn.

Judiosmera Jesúswan tru Cristo kømuitamab køremub

³⁷ Yeeg nørreelø chigøben Tius nøba pasrain kui asha kømig mariilø nømui merrab Jesúsbe kenamaringucha, nune køremeelø køn. ³⁸ Kaguende Isaias, tru Tius maig karuigwan eshkab møg øyah chib pørig nebunrrain kuig køn:

“Señor Tius, ¿namui eshkaigwane mu køreitarru? cha.

¿Señor Tiusbe nui maramburab maramigwan mun kenamarah?” cha.

³⁹ Inchawei nømbe treeg kuitamappe køremeelø køn. Kaguende Isaiasbe trencha pørig købig køn:

⁴⁰ “Tiusbe nømun kabmeran ashmeelø kønrrai marøb,

katø nømui manrrømeran murelø kønrrai marøb indig køn cha,

kaptøga chigúi ashmøwei,

nømui manrrøtøga chigüinguen mørømøwei inchain cha,

nøm nuimay llirawa amrruben, tamariilø kømønrrain” chib.

⁴¹ Isaias øyah chippe, Jesúswei tørguegwalmabigwan nøbe asha kua, nuimburab treeg wamindig købig køn.

⁴² Treeg kuingucha tru utu ashib karubeløguen nun truba nu kørebelø køn. Inchendø nømbe fariseosmeran kørig køptø nøm kørewa pønrrain kui ashchai mayeelai merrappe chi kenarmeeelø køn, tru judiosmera tulundzuni yaugurri webusrilø kømønrrab.

⁴³ Kaguende nømbe misamera maya nuguen tab indiilø kømigwan chullelø købig køn, Tius maya nuguen tab indig kømigwan kømøtø.

Jesús wamindiibe misagwan maig kønrrabigwan asha mara kørrømarøb

⁴⁴ Inchen Jesúsbe truba mur waminchib trenchibig køn:

—Møikkøben nan kørebiibe nan køremøtø, nai Møskai nan karua ørøbigwan køren cha.

⁴⁵ Inchen nan ashibiibe, nan karua ørøbigwan asan cha. ⁴⁶ Nabe arruppe, yu piraumay kan tər lataig arrig køn chibig køn, mutøgucha nan kørebiibe løstøyu kørrømisra pasrømønrrai.

⁴⁷ Inchen mōikkøben nai wamwan mōrendø, maig taigwan mōra marmígwane, nun maig maramígwane na asha marmur cha. Kaguende nabe yu pirauelan maig maramígwane na asha mara kōrrømartrab arrumøtø, misagwan kaigyugurri wesranrrab arrig køn cha. ⁴⁸ Inchen mōikkøben nan kaashib, na wamindigwan mōrmub inchibiibe, maig kōnrrabigwan asha kōrrømartrabig chabguen nøbe tøgaguen pasran cha. Tru na nun wamindi wamðøwei tru srabe kwalømbe nun maig kōnrrabigwan asha mara kōrrømartrun cha. ⁴⁹ Kaguende nabe waminchippe, naimburaptø waminchimøtø, Møskai nan karua ørøbig chi tamigwan chiwan wamindamigwan nane nø karuig køn cha. ⁵⁰ Incha tru nø martrai karua pasriibe managatig øsig kōmig, treeg kui, nabe ashar cha. Inchawei na waminchippe, nai Møskai nan maig wamindingarugwan nabe treeg waminchar— cha, trenchibig køn Jesúsbe.

13

Jesús nui kusrenanøb pera uniilan srøbwan kwallib

¹ Yandø tru Pascua Fiesta pumig kan kwalømdø paløben, yandø yu piraugurri Møskaweisrømay yamig puin kui Jesúsbe ashibig køn. Yu pirau amøñibelan nuielane chu uragucha nøbe undaarabig kua, mōimbe øyeeg newan srabegatig undaarag køn.

² Inchen mab purramnetø nugwaimandziibe Simónwei nusrkai, Judas Iscariotei manrrabe, Jesúsbe ashig kømui inchibelan tranrrai isungarubig køn. ³ Inchen Jesúsbe chiwandøgucha nø asha martrai Møskaimbe nui tasku pønsrain kui ashib, katø nøbe Tiusweinukkurri webarrua arrua, katø Tiusweimaytøwei yamig kui ashib inchibig køn. ⁴ Incha Jesúsbe mab wainukkurri kurra pasramisrøb, pala kewa pasraigwan wesrawa, kan toallan nemøra, pørnawa, ⁵ trugurrimbe kan paila-unøyu pi usrøb, nui kusrenanøb pera uniilan srøbmeran kwalla, nui pørnawa pasraig toallatøga pinømørbig køn.

⁶ Incha tru Simón Pedron srøbwan kwallchab inchene, nøbe trenchibig køn:

—¿Señor, ñigan nan nai srøbmeran kwallchaidirru?— cha.

⁷ Inchene Jesúsbe trencha løtabig køn:

—Na møi marøb waigwane ñibe chigúinguen ashmøn cha. Inchendø tsøndasrømbe chigúí ashchun— cha.

⁸ Inchen Pedrobe trenchibig køn:

—Nan kuimbe, managuen ñibe nai srøbmerane kwallchaamøn— cha.

Inchene Jesúsbe trenchibig køn:

—Na ñui srøbmeran kwallmubene, ñibe nainuube chi asamig tøgagømønrrabguen— cha.

⁹ Inchen Simón Pedrobe trenchibig køn:

—Señor, trube, treeg købene, srøbwandø kwallmøtø, tasigwan kinøsrøb, turwan chishtø pirtra— cha.

¹⁰ Inchene Jesúsbe trenchibig køn:

—Chab piraiibe srøbwandøwein kwalamig palan cha. Kaguende asr ørøba chishtø køn cha. Ñimbe yandø chishelø køn cha, søteeløbabe treetø kōmuingucha.—

¹¹ Nun tru ashig kømui inchibelan tranrrabiibe nøbe manawei mu kui asha kua: “Søteeløbabe chishelø kōmøn” cha trendaig køn.

¹² Yandø Jesúsbe nōmui srøbmeran chab kwalla, nui pala kewagúigwan katøle kewa, mishatsigu wamisrabe, trenchibig køn:

—¿Na ñimun øyeeg marigwan ñimbe chigúí mørgueh? cha. ¹³ Ñimbe nane: “Kusrennøbig” cha wamamba, katø: “Señor” cha wamamba indan cha, trumaybe sølwein tan cha. Kaguen nabe treegwein kur cha. ¹⁴ Pøs na Señor, na Kusrennøbikken ñimui srøbmeran kwallene, ñimgucha kangurri kangurri srøbmeran kwalamig køn cha. ¹⁵ Nabe ñim asha kusrenrrai mara pasrar cha, na mari lataitøwei ñimgucha martrai. ¹⁶ Pøs nabe ñimun isa kōmø, cieron trendamønrrun cha: Kan mendig megabiibe nun martrai karubigwan purab nuig kōmøn cha. Katø kan karua øriinabiibe tru karua ørøbigwan purab nuig kōmøn cha. ¹⁷ Ñim iilan chigúí asha, treegwan marabe, mayanguen tab kuilø køn cha.

¹⁸ Nabe ñimun øyeeg waminchippe, søteelanbabe øyeeg chimur cha. Kaguende mōilan na lawa wesruilø kui nabe asha pasrar cha. Inchendø, Tiuswei wamwan pørigu øyeeg pasrabig nebunrrain køn cha: “Tru naba lincha mab wabiibe nan srøb kusrawa eshkan” taig.

¹⁹ Inchawei nabe mōingurri nabe ñimun eshkar cha, øyeeg puraimøwatø, øyeeg puraiibene, tru Nabe Na kuin kui kørenrrai. ²⁰ Pøs nabe ñimun isa kōmø, cieron trendamønrrun: Na karua ørigwan tab wamab utabiibe nan utan cha. Inchen nan utabiibe nan karua ørøbigwan utan— chibig køn Jesúsbe.

Judas ashig kømui inchibelaingatø pasramisrtrab køn cha, Jesús eshka

(Mt 26.20-25; Mc 14.17-21; Lc 22.21-23)

²¹ Jesúsbe iilan chab trenchabe, nune chindamguengaig isuben, maig kuigwan kelarrab eshka trenchibig køn:

—Nabe ñimun isa kòmø, cierton trendamønrrun cha: Ñim møikkøsrøn nan ashig kòmui inchibelaingato misra, nan tranrrab kòn— cha.

²² Inchen nui kusrenanøb pera uniiløbe mun waminchib waig mørmøwa, nømbe kangur-rin kangurri malau asiyabelø kòn. ²³ Inchen møikkøsrøn nui kusrenanøb pera unig mas undaarabe Jesúsweim pulu mab wabene, ²⁴ Simón Pedrobe mun waminchib wain kui pay chib, señas marøbig kòn. ²⁵ Inchen tru pulu wabiibe pechoyu kemenda, Jesúswan payibig kòn:

—Señor, ¿møig kerah?— cha.

²⁶ Inchene Jesúsbe trenchibig kòn:

—Na pirrim pitin kebisha, møigwan tranen, truig kønrrun— cha.

Incha pirrim pitin kebisha, Simón Iscariotei nusrkai Judaswan tranøbig kòn. ²⁷ Inchen Judas pirriwan utøben latatø, Satanásbe nui manrrau kebiben, Jesúsbe trenchiptinchibig kòn:

—Tru ñi marøb pasraigwane petø mar— cha.

²⁸ Inchen mishatsigu mab purrabeløbe chindimba trendermab møikkucha chi tainguen mørmøelø kòn. ²⁹ Katøgucha Judasbe anwan nø esegawa sruaig købene, møiløbe treeg isubelø kòn: “Jesúsbe fiestayuweí chi palabigwan penøtah, kabe waachamèran maitøguen tranø” ta, chindermab.

³⁰ Inchen yandø Judasbe pirriwan utaptø webiben, yandø yem købig kòn.

Kan srøig martrai karua pasrig

³¹ Inchen yandø Judas webiben, Jesúsbe trenchibig kòn:

—Mømbe tru Møg Misra Arrubiibe maya nuguen tabig indig kønrrai maren, Tiusbe nuinug maya nuguen tabig indig kønrrai maran cha. ³² Tiusma Cristoinug maya nuguen tabig marig kuig køppe, Tius nøgurringucha Nusrkawane nuinuutøwei maya nuguen tabig martrun cha. Tru purø nuig tabig kønrrai maramigwane petø martrun chibig kòn. ³³ Nai ureezheelø, yandø ñimbabe maya yanatø unamønrrun cha. Ñimbe nane lanrrun cha. Inchendø na judíosmeran trendaig købigwandøwei mømbe ñimun trendamønrrun cha: “Na yamsrømay ibene, ñimbe amrrunrrab kaimanrrun” cha. ³⁴ Nabe ñimune kan srøig martrai karua pasrar cha: kangurrin kangurri undaarayamig. Na ñimunma mandø undaarabe, treetøwei ñimgucha kangurrin kangurri undaarayamig kòn cha. ³⁵ Ñim kangurrin kangurri undaguelø købene, maya misaamera ñimune nai kusrenanøb pera uniilø kui ashchun— chibig kòn.

Pedron Jesúsbe nan ashmüig kur chinrrautan chib

(Mt 26.31-35; Mc 14.27-31; Lc 22.31-34)

³⁶ Inchen Simón Pedrobe Jesúswan trencha payibig kòn:

—Señor, ¿Chumay inrrainchigu?— cha.

Inchene Jesúsbe trenchibig kòn:

—Na yamsrømay ibene, ñibe nai mendig attraamøn cha mømbe. Inchendø tsøndatøsrømbe si, attrabguen— cha.

³⁷ Inchene Pedrobe trencha løtabig kòn:

—Señor, ¿mømbe nabe chindimba arrumønrrain køh? cha. Nabe ñuimburab nai øsig kuigwan tranrraptøweim pasrar— cha.

³⁸ Inchene Jesúsbe trenchiptinchibig kòn:

—¿Ñigan isa kòmø, naimburab ke kwanrraptø pasrar chitirru? cha. Pøs nabe isa kòmø, cierton trendamønrrun cha: Kallu wamømøwatø, ñibe pønmayguen nan ‘ashmüig kur’ chinrrautan cha.

14

Jesúsbe Møskaweínug pumig may kòn

¹ Ñimbe ñimui manrrau ke kan mandø kuinguen kòmui lataig isui inchimøtay cha. Tiuswan køreb, katø nangucha kørey chibig kòn. ² Nai Møskawei yaube purramig truba truba pønrran cha. Treeg pønrrømuiimbe, trube, kanmaytø eshkabsrubrainrrun cha. Nabe ñimuyasig purramig trusrø tamartrab yar chibig kòn. ³ Incha nabe ya, tru purramigwan chab tamarabe, katøle nabe natøwei ñimune pera inrrab arrumønrrun cha, na chu waben, ñimgucha truyutøwei purrønrrai. ⁴ Ñimbe tru na chumay yamigwan ashib, katø maywan ashib inchibelø kòn— chibig kòn.

⁵ Inchene Tomásbe Jesúswan trenchibig kòn:

—Señor, ñibe chumay inrrab kuinguen mørmøer cha. ¿Mas maywane nambe mandø incha asig kwaasamørra?— cha.

⁶ Inchene Jesúsbe trenchibig kòn:

—Nabe may køb; tru newan ciertonig køb; katø øsig kømig køb kur cha. In-chawei Møskawemaybe nagurrin kømíbe mugucha attraamøn cha. ⁷ Ñim nan isa kømø nebua ashibelø kuig kuimbe, nai Møskawangucha nebua ashibelø købsruig kuinrrun cha. Møingurrimbe Møskawan nebua asan cha. Møimbe yandø ñimbe kaptøga asin køn— cha.

⁸ Inchene Felipebe trenchibig køn:

—Señor, Møskawan namun asingarurra cha. Trutøgabe tsabø kønrrautan— cha.

⁹ Inchene Jesúsbe trenchibig køn:

—Felipe, ¿katøgucha nane mu kui ashmøtirru? cha, na ñimui utu ya yana uñen. Nan ashibiibe, Møskawangucha asan cha. Treebe ¿ñibe mandø chigu cha: “Møskawan asingarurra” chippe? ¹⁰ ¿Nabe nai Møskaweinug pasrøben, nai Møskaimbe nainug pasrain kui ñigan køremøtirru? cha. Na ñimun wamindiiløbe ka naimburaptø wamindiilø kømøn cha. Treeg kømøtø, Møskai nainug pasrabig nui maramelan marøbig køn cha. ¹¹ Nabe nai Møskaweinug pasrøben, nai Møskaimbe nainug pasrabig kuin kui kørerray cha. Trengømuppe, na mariilandøguen isua asha, kørey chibig køn. ¹² Pøs nabe ñimun isa kømø, cierton trendamønrrun cha: Nan kørebiibe nøgucha na mariilan martrun cha. Incha treetøguen kømø, mas nørreeløguen martrun cha. Kaguende nabe Møskaweisrømay inrrainchar cha. ¹³ Chiwandøgucha nai munchiyu miabene, trunune nabe maramønrrun cha, Nusrkai Møskawan maya nuguen tabig kønrrai martrab. ¹⁴ Chiwan køben ñim nai munchiyu miabene, nabe maramønrrun, chibig køn Jesúsbe.

Jesús Espiritu Santon ørtrab misrøb

¹⁵ Ñim nan undaguelø kuabe, na maig maramigwan martrai pønrrailan møra martrun cha. ¹⁶ Inchen nabe Møskawan miamønrrun cha. Inchen nøbe katøgan chi isumønrrai Purømisrøb Lincha Pasrønrrabig ñimun tranrrun cha, managucha ñimba lincha pasrønrrai, ¹⁷ tru Espiritu newan ciertonigwan. Truigwane tru Tiuswan ashmø misaamerabe utønrrab kaiman cha, kaguende nune ashmøwei, mu kui mørmøwei inchibelø kua. Trune ñimbe nun ashibelø køn cha. Kaguende nøbe ñimba pasrab, katø ñimuinug pasrabig pasrønrrab køn cha.

¹⁸ Nabe ñimundø peta kørrømmøtø, nabe katøle ñimuimay arrumønrrun cha. ¹⁹ Kan maya yanayutø nane yu pirau misaamerabe nane mas ashmuben, trune ñimbe nan ashchun cha. Na øsig waikkurri, ñimgucha øsiguelø kønrrun cha. ²⁰ Inchen ñimbe tru kwalømbe nai Møskaweinug nabe pasrabig kui ashib, katø ñimbe nainug pønrrøben, nagurrimbe ñimuinug pasrabig kui ashib inchun chibig køn. ²¹ Møikkøben na maig maramigwan martrai karuilan uta tøgagua, trunun møra marøbiibe, truike nan undaguig køn cha. Inchen nan undaguigwane nai Møskai undaaraig kønrrun cha. Inchen nagurringucha nun undaara, na maig kuigwan nuinug kenamisrtrai maramønrrun— cha.

²² Inchen Judas (tru Iscariote kømø, katøgan Judasbe) trenchibig køn:

—¿Señor, pirau misaamerane ñi maig kuigwan kenamarmubendø, namune ñi maig kuigwan mandøgurri kenamartrab inchigu?— cha

²³ Inchene Jesúsbe trenchibig køn:

—Møikkøben nan undaguibe na maig taigwan møra martrun cha. Inchen nai Møskaimbe nun undaaranrrun cha. Incha naba, nai Møskaimba nuinumay amrrua, nambe nuinug purramønrrun cha. ²⁴ Nan undaguig kømíbe na maig taigwan mørmíig køn cha. Na eshkaab wamindigwan ñim mørøb kuike nain kømøtø, nai Møskai nan karua ørøbigwein køn cha.

²⁵ Øyeelan nabe ñimun kerriguh trenchar cha, na ñimba pasrappatø. ²⁶ Inchendø tru Espiritu Santo, tru chi isumønrrai Purømisrøb Lincha Pasrønrrabig, Møskai nai munchiyu øramig, truike ñimun chiwandøgucha kusrenanøb, na chi tailane kerriguh katøle isunanøb pasrønrrun cha.

²⁷ Nabe ippe, ambumay imay chi isumgaig purø tab købigwan ñimun kørrømarøb, katø nai chi isumgaig purø tab købigwan ñimun tranøb inchar cha. Tru ambumay imay tab købigwan na traniibe, yu piraelø tranig lataig kømøtø køn cha. Ñimui manrrau ke mandø kuinguen kømui lataig isui inchimøwei, kørig kui inchimøwei inday cha. ²⁸ Na ñimun øyeeg taigwan ñimbe mørig køn cha: “Nabe ya, katøle ñimuimay arrumønrrun” cha trendaigwan, ñim nan, undaguelø kuimbe: “Møskawemay inrrainchar” taig mørøppe, ñimbe kasraarabruinrrun cha. Kaguende nai Møskaimbe na lataitøguen kømø, mas nuig køn cha. ²⁹ Øyeeg puraimøwatø, nabe ñimune kanmaytø iigwan eshkar cha, treeg puraibene, nan kønrrai.

³⁰ Møimbe yandø ñimbabe menrra waminchimumønrrun cha. Kaguende Satanás, yu pirau ke nø karub pasrabiibe yandø arrun cha. Truike nababe chigucha chi asamig chigaig køn cha. ³¹ Inchendø pirau misaamerabe asam kusremig køn cha, nabe nai Møskawan undaguig køb, trurriku nabe Møskai maig martrai karuigwan treeg marøbig kuin kui.

’Kurray, chibig køn, yugurri amrrab— cha.

15

Uvas tusrba, nui srarmeraba

¹ Jesúsbe katø trenchib waminchibig køn:

—Tru uvas tusr ciertoniibe na køben, nai Møskaimbe tru ellmarøb kwallibig køn cha.

² Nøbe nainug srarmera uvas niimeelane lutiicha, petappe, trune tru uvas nigabelane katøguchingen may niirrai tamara parøb chishmarøbig køn cha. ³ Ñimbe yandø chishelø køn cha, tru na ñimun wamindig tru wamgurri. ⁴ Ñimbe naba kanbalatø pønrrabig pønrray cha. Inchen nabe ñimba kanbalatø pasrabig pasramønrrun cha. Kan srarma nøsiitøbe chigucha mamig niimøn cha, tusryugue pasrømøwabe. Ñimgucha treetøwei chigucha martrab kaimanrrun cha, naba kanbalatø pønrrabig pønrrømøwabe.

⁵ Nabe uvas tusr køben, ñimbe truyu srarmera køn cha. Møikkøben naba kanbalatø pasrabig pasrøben, na nainug pasrøbene, truike truba truba mamig nigan cha. Inchen nainukkurri ñim nøørotø pønrraisruandøbe, ñimbe chigucha martrab kaimanrrun cha. ⁶ Nainug naba kanbalatø pasrabig pasrømigwane srarwan latawei wambig weguchen, mullan cha. Incha treeg srarmerane tulisha, nagu parrilø køn cha.

⁷ Ñimbe naba kanbalatø pønrrabig pønrrøben, katø na wamindiilø ñimuinug pønrrabig pønrrøbene, ñimun chi miag købendø, miay chibig køn, ñimune tranig kønrrun cha. ⁸ Ñim øyeeg maren, nai Møskaimbe maya nuguen tab indig utønrrun chibig køn, ñim truba truba mamig misrig nigab, øyamay isa kømø nai mendig amøñibelø kui kenamaren. ⁹ Nai Møskai nan undaguig køb lataitøwei, nagucha ñimun undaaraig køn cha, nai undag købig tøgagügu truyu pønrrabig pønrray cha. ¹⁰ Na ñimun maig maramigwan martrai pønrsailan møra marabe, nai undag købigu pønrrabig pønrrønrrun cha. Nai Møskai martrai nan karua pønrsailan na møra mara, nui undag købigu pasrabig pasrab lataitøweingue.

¹¹ Nabe øyeelan ñimun waminchippe, nai kasrag købiibe ñimuinug pasrøben, tru ñimui kasrag købiibe ka palabinøtiig kømø, newanig kønrrai inchar cha. ¹² Inchen na maig maramigwan martrai pasriibe iig køn cha, ñim kangurrin kangurri undaguelø kønrrai, na ñimun undaarab lataitøwei. ¹³ Kan muguen undag købig iigwan purab nuibe tøgagømuinrrun cha, nui øsig kuigwan nui trendø tab lincha amøñibelayasig purøbasra kwamig. ¹⁴ Martrai tru na karua pønrsailan marabe, ñimbe nai trendø tab lincha amøñibelø køn cha. ¹⁵ Nabe ñimune yandø ka karuindiig melabelø cha wamømur cha. Kaguende kan karuindiig megabiibe nui karub pera wabiibe ni chi marøb uningen mørmøn cha. Treeg kømøtø, nabe ñimune masken nai trendø tab lincha amøñibelø cha wamar chibig køn, kaguende nabe nai Møskawan na chi møriilane ñimune kerriguh eshakb kenamarikkurri. ¹⁶ Nane ñim lawa wesrunøtø, nabe ñimungen lawa wesrua, ñimune amrrai wesrua pønrsraig køn cha, truba truba mamig niirrai. Trurrigu tru mamig misriibe pinømø, misrøbig misrtrain cha. Treekkurri ñim chiwandøgucha nai Møskawan nai munchiyu miabene, nøbe ñimune tranrrun cha. ¹⁷ Nabe ñimun martrai karua pasrøppe, iigwan karua pasrar cha: kangurrin kangurri undaarayanrrai.

Tiuswan ashmø misaamera Jesúswanba, nuielanba ashig kømui inchib

¹⁸ Ñimun yu piraelø tsaliinchene, nanmerrig tsalø indig købigwan isunrrigay cha. ¹⁹ Ñim yu piraelø kuimbe, yu pirau misaamerabe ñimune undaarabsruinrrun cha, nømuelan undaarab lataitøwei. Inchendø nabe ñimune yu piraeluai utugurri lawa, wesruig køn cha. Treekkurri yu piraeløbe ñimune ashig kømui indan cha, kaguende yandø ñimbe i piraelø kømuben. ²⁰ Na ñimun øyah taig købigwan isua kui chibig køn: “Kan mendig megabiibe nui karubigwan purab nuig kømøn” cha, trendaigwan. Inchawei nanguen kaig martrabgøba, kaig martrabgøba indiibe ñimungucha treetøwei kaig martrabgøba inchen cha. Na wamindiilan ñim møra marøbelø kuisruandøbe, ñim wamindiilangucha møra martrun cha. ²¹ Pøs chine ñimun øyeelø marøppe, nagurri øyeeg martrun cha, kaguende nan karua ørøbigwan ashmeelø kua.

²² Na arrumøwei, katø na nømun waminchimøwei indig kuimbe, chi kaig mara pønrrømubsruinrrun cha. Inchendø møimbe nømui kaig marøb pønrraigwane chigøben kemesratø, øyeekkurriin køn chib puraambamig kaanrrun cha. ²³ Nan tsalø inchiibe nai Møskawangucha tsalø indan cha. ²⁴ Katøgan mu møkken øyeelø mariimeelan na nømui utu marmuig kuimbe, nømbe chigucha chi kaig marar pønrrømubsruinrrun cha. Inchendø na mana asimeelø mariilan møimbe asha pønrrøbendø, nan ashig kømui indamba, nai Møskawan ashig kømui indamba indan cha. ²⁵ Pøs øyeeg pureppe, tru maig maramigwan martrai nømui pøriiløyu maig pørig pasrabig treeg nebunrrain kuig køn cha: “Chigucha kømubendø, nan ka tsalø indan” taig.

²⁶ 'Inchendø tru chi isumønrrai Purømisrøb Lincha Pasrønrrabig, tru Møskaweinukkurri na ñimui may øramig, tru Espiritu newan ciertonig, truike Møskaweinukkurri arrubiibe, naimburab maig kuigwan waminchun cha. ²⁷ Inchen ñimgucha naimburab maig købigwan waminchun chibig køn, kaguende ñimbe srøsrøgurri naba amøñibelø kuikkurri.

16

¹ 'Nabe ñimun iilan waminchippe, ñimui isubigwan nainuutø pasra pønrraigwan ni chindinguen mormøwa pønrrømønrrai waminchar cha. ² Ñimune judíosmera tulundzuni yamerayugurri webetab inchun cha. Inchen møikkøben ñimun kweechabe, truike 'Tiusweyasig tabig maramab' inchib pasramig, treekkatikken punrrab køn cha. ³ Ñimun øyeeg marøppe, Møskawan lata, nan lata ashmeelø kuarre, treg martrun cha. ⁴ Na ñimun iilan eshkappe, yandø tru øyeelø pubene, ñimbe manawei na tru eshkaigwane isua pønrrømønrrai eshkar chibig køn, Jesúsbe.

Espiritu Santoi chigøben maramelø

'Inchendø øyeelane nabe ñimun srøsrøgurri eshkamuig købig køn cha, kaguende nabe ñimba unig kua. ⁵ Incha mømibe nan karua ørøbigweisrømay na inrraindingucha, ñimbe møikkucha nane paymøtan cha: "¿Chumay inrrainchigu?" cha. ⁶ Na iilan ñimun trenchib eshkabene, ñimui manrrøbe purø isui indan cha. ⁷ Inchendø nabe ñimun isa kømø, cierton trendamønrrun cha: Na yamibe ñimuiibe mas tabguen køn cha. Kaguende na imubene, tru chi isumønrrai Purømisrøb Lincha Pasrønrrabiibe ñimba pasrønrrab arrumønrrun cha. Inchen na yabe, ñimuyasig nun øramønrrun cha. ⁸ Inchen nø arruppe, yu pirau misaamerane tru kaig mariibe chi købig kuin kui ashchai tøgandø kenamarøb, misagwan Tiusba sølgandø mandø pønrramigwan kenamarøb, natøwei kaig mara pasraibe chu pasrig kømigwan kenamarøb inchun chibig køn: ⁹ Tru kaig marigwan kenamarøppe, nan køremuikkurrin køben, ¹⁰ misagwan Tiusba sølgandø mandø pønrramigwan kenamarøppe, nabe Møskaweisrømay iben, ñimbe nan mas ashmønrrab kuikkurrin køben, ¹¹ natøwei kaig mara pasraigwan tru chu pasrig kømigwan kenamariibe, tru Satanás, yu pirau nø karubigwan, nune chu pasramigwan pasrønrrai kørromara pasrabguen indikkurrin køn cha.

¹² Nabe ñimune chigøben eshkamig katøgucha truba truba tøgagøbendø, ñimbe mømibatøbe trengatig nebua chigüi mørtrab kaimanrrun cha. ¹³ Inchen tru Espiritu newan ciertonig arruppe, truike kerriguwan ciertonigumay ñimune pera inrrun cha. Kaguende nøbe ka nuimburaptø waminchimøtø, nø maig mörigwan kerrigu waminchib, katø chigøben maig pub attrabigwan ñimune eshkanrrun cha. ¹⁴ Nøbe nane maya nuguen tabig kønrrai martrun cha. Kaguende nøbe naiwan uta, ñimun maig kuigwan asha kønrrai kenamartrun cha. ¹⁵ Chitøgucha nai Møskai tøgagüibe nain køn cha. Inchawei nabe trendaig køn, Espiritube naimburabigwan uta, ñimun maig kuigwan asha kønrrai kenamartrun cha.

Isuig melaibe katølebe kasrag købig misrtrun

¹⁶ Maya yanayutø ñimbe nane yandø ashchaamøn cha. Inchendø katø yana kømøwatø ñimbe nane katø ashchun cha. Kaguende nabe nai Møskai waisrømay inrrainchar— cha.

¹⁷ Inchen mõiløgøsrøn nui kusrenanøb pera uniiløbe nømdø kangurrin kangurri payibelø køn:

—¿Øyeeg chippe, mandø terah? cha: "Maya yanayutø ñimbe nane yandø ashmønrrun chib; katø yana kømøwatø ñimbe nane katø ashchun chib. Kaguende nabe nai Møskai waisrømay inrrainchar" chib. ¹⁸ "Maya yanayutø" chippe, ¿mandø chibrrendah? cha. Nøbe ni chi waminchib pasrainguen mörmer— chibelø køn.

¹⁹ Inchene Jesúsbe trunun payig køb inchib kui mörabe, trenchibig køn:

—¿Ñimgan na ñimun øyeeg taigwanrre payib køtirru? cha, tru: "Maya yanayutø ñimbe nane ashchaamøn" taigwan: "Yana kømøwatø ñimbe nane katø ashchun" taigwan. ²⁰ Pøs nabe ñimun isa kømø, cierton trendamønrrun cha: Ñimbe isuig wamamøra kishib kømnebe, yu piraeløbe kasraaranrrun cha. Ñimbe truba isuig kullaaraig melønrrun cha. Inchendø tru isuig kullaaraig melaibe katølebe kasrag købig misrtrun cha. ²¹ Kan ishuuma tamisrtrappe, truba pusrkwai inchib kullaaran cha, kaguende yandø tru treg tammisramig ura puben. Inchen yandø unø kal-labene, kasrag købiitø tru treg pusrkwaiingane isubguen inchimøn cha, kaguende kan srø misaazhig yu pirau kal-laben. ²² Inchawei ñimgucha mømibe øyeetøwei isub kullaaran cha. Inchendø katøle na ñimun ashene, ñimui manrrøbe truba truba kasraaranrrun cha, kasrag købigwan kan muguen kerramgaikke.

²³ "Tru kwalømbe ñimbe nane yandø chigucha paymønrrun cha. Nabe ñimun isa kømø, cierton trendamønrrun cha: Ñim chiwandøgucha nai Møskawan miappe, nai munchiyu miabene, nøbe ñimune tranrrun cha. ²⁴ Møingatig ñimbe nai Møskawan nai munchiyube

chigucha miamuig kɔn cha. Miay, chibig kɔn, utɔnrrabguen cha, ñimui kasrag kɔbigwan chigucha palɔmɩg newanig kɔnrraimbe.

Jesucristobe yu pirau kaig puingucha, treegu puraya pasramisrɔb

²⁵ Nabe ñimun iilan waminchippe, iibe ɔyeelɔ latailɔ kɔn chib, kemesratɔ wamindig kɔn cha. Inchendɔ ɔyeelɔ latailɔ kɔn chib kemesra waminchimumig punrrun cha, nai Mɔskaweimburabigwan tɔrgandɔ kelarrab wamindamig. ²⁶ Tru kwalɔmbe ñimbe nai munchiyu Tiuswan mianrrigay cha, pɔs nabe ñimuyasig Mɔskawan miamɔnrrun chimur. ²⁷ Pɔs Mɔskai ñashib ñimune undaaran cha, kaguende ñimbe nan undaaran, katɔ nabe Mɔskaweinukkurri webarrua, yu piraumay arrig kɔn cha. Incha mɔimbe katɔle yu piraugurri, nai Mɔskaweimay yamɔnrrun— chibig kɔn.

²⁹ Inchen nui kusrenanɔb pera uniilɔbe trenchibelɔ kɔn:
—Mɔimbeguende ñibe chigɔben 'iibe ɔyeeg latailɔ kɔn' chib, ka kemesratɔ waminchimɔtɔ, tɔrgandɔ kelarrab wamindan cha. ³⁰ Ñibe chiwandɔgucha newan ashibig kuin kui mɔimbeguende nambe aser cha. Mugɔben ñune chi paya ashib pɔnrramikken palɔmɩn cha. ɔyeekkurriwei, ñibe Tiusweinukkurri arrubig kuin kui kɔrewa pɔnrrer— chibelɔ kɔn.

³¹ Inchene Jesúsbe trencha lɔtabig kɔn:
—ɔMɔimbesei kɔregueh? cha. ³² Pɔs ɔyeeg punrrab kuig yandɔ mɔiwei pubguen indan cha, ñimbe nɔɔrɔtɔ, kan kan chab tarɔmisra, nane yandɔ nandɔ kɔrrɔmara ambamig. Inchendɔ nabe natɔ pasrɔmur cha, kaguende nai Mɔskaimbe naba pasrɔben. ³³ ɔyeelan nabe ñimun waminchar cha, naba kanbalatɔ pɔnrrɔwabe, chi isumɔ purɔ tab pɔnrramigwan tɔgagɔnrrai. Yu piraube chigɔben isumɩdig puig melɔnrrabguen cha. Treegu kuindɔgucha kullaaramɔ, mur isua pɔnrrɔnrrigay cha. Nama yu pirau chine kaigwan kanawa pasrar— cha, trenchibig kɔn Jesúsbe.

17

Jesús nui kusrenanɔb pera uniilayasig Mɔskaimba waminchib

¹ Yandɔ iilan chab trenchabe, Jesúsbe srɔmbalaneb neesha trenchibig kɔn:

—Nai Mɔskai, yandɔ treeg maramig pun cha. Ñui Nusrkawan maya nuguen tabig indig kɔnrrai mar cha, ñui Nusrkaingucha ñun maya nuguen tabig indig kɔnrrai martrai. ² Tru maya misagweim pala nɔ karub pasrɔnrrai ñi trana, tru mayeelan ñi nun traniilane managatig ɔsig kɔmɩgwan tranrraima tranig kuig kɔppe. ³ Inchen tru managatig ɔsig kɔmibe iig kɔn: ñi Tius ciertonig kanrɔb wabigwan mu kui nebua ashib, katɔ Jesucriston tru ñi karua ɔrigwan mu kui nebua ashib indamig.

⁴ Nabe yu pirau ñune maya nuguen tabig kɔnrrai marar cha, tru ñi nan martrai karua pasrigwan na chab patsɔgɔb. ⁵ Trube mɔimbe, nai Mɔskai, ñui merrab nan tɔrguegwalmabig kɔnrrai martra cha, tru chigurrimbunɔ kɔbigwan marig kaabenbatɔ manasrɔwei ñui merrab tru tɔrguegwalmabigwan na tɔga waig kɔbiitɔgatɔwei.

⁶ Yu pirauelai utu ñi nan tranrrab lawa wesruilane ñun mu kui ashchai nabe asingarur cha. Truilɔbe ñuielɔ kɔben, ñibe nan tranen, nɔmbe ñi maig wamindigwan mɔra, maran cha. ⁷ Mɔimbe nɔmbe ashibelɔ kɔn chibig kɔn, chigurrimbunɔ ñi nan traniibe ñuinukkurri arrubig kuin kui. ⁸ Kaguende nabe ñi nan eshkaigwan nɔmun eshkaben, nɔmbe mɔrig kɔn cha. Incha isa kɔmɔtɔ, nabe ñuinukkurri webarrua arrig kui nebua ashib, katɔ nane ñi karua ɔrig kuin kui nɔmbe kɔreb indig kɔn cha.

⁹ Nabe nɔmuyasig ñun miar chibig kɔn. Nabe yu pirauelaimburab miamɔtɔ, ñi nan traniilayasig miar chibig kɔn, kaguende ñuielɔ kuimba. ¹⁰ Kerriguba naimbe ñuin kɔben, katɔ Kerriguba ñuimbe nain kɔn cha. Incha nɔngurri maya nuguen tab indig pasrar cha.

¹¹ Yandɔ nabe naimburappe yu pirau uñmuben, trune nɔmbe yu pirau amɔñibig amɔñinrrun cha, nabe ñimuy arruben. Nai Mɔskai Newan Tabig, ñi nan traniilane ñui munchi maramburab marɔbiitɔga chi nebumɔnrrai ashib tɔgagɔrra cha, naba, ñiba kanbalatɔ pɔnrrab lataitɔwei nɔmgucha mayamba kanbalatɔ pɔnrrɔnrrain cha. ¹² Na yu pirau nɔmbe uñib urasma, ñi nan traniilane ñui munchiyu nɔmune chigɔben nebumɔnrrai, nabe ashib tɔgagúig kɔn cha. Na tab ashib tɔgagɔben, mɔikucha nɔmbe tarɔmisra, pinɔmuig kɔn cha. Tarɔmisra pinappe, tru manawei treeg pinɔnrrab pasrabig truitɔwei pinig kɔn cha, tru Tiuswei wamwan pɔrigu maig taig, truiq neburrai.

¹³ Incha mɔimbe yandɔ nabe ñi waisrɔmay katɔ attrainchar cha. Incha na yu pirau pasrappatɔ iilan waminchar cha, nai kasrag kɔbigwan nɔmgucha nɔmuminug newan tɔgagɔnrrai. ¹⁴ Nabe ñui wamwan nɔmun eshkaib waminchen, pirauelɔbe nɔmune tsalɔ kuindan cha, kaguende na i pirauig kɔmub latawei, nɔmgucha yu pirauelɔ kɔmuimba. ¹⁵ Nabe ñun miappe, yu piraugurri nɔmun wesrunrrai miamɔtɔ, Satanás, tru larrɔ kaig, nɔmun chinchimɔnrrai, treegwan miar cha. ¹⁶ Na i pirauig kɔmub latawei, nɔmgucha i pirauelɔ kɔmɩn cha. ¹⁷ Tru

newan ciertoniiŋga ñuyasiitø tarømariiø kønrrai martra chibig køn. Ñui wambe tru newan ciertonig køn cha. ¹⁸ Ñi nan piraelai karua ørøb lataitøwei, nagucha nømun piraelai karua ørar cha. ¹⁹ Incha nabe naasiitø nømyasiŋ ñuindø kønrrab pasramisar cha, nømgucha treetøwei tru newan ciertonigu ñuindø kønrrab pønrramisrtrain cha.

²⁰ 'Inchendø nabe nømyasiitø miamøtø, katø wendøsrø nøm wamindigwan møra, nan kønrrabelayasikkucha tōga miar chibig køn, ²¹ mayeeløba nømgucha kando lataig kønrrai, ñi nai Møskai, naba, ñiba kandø køb lataitøweingue. Katø nømgucha namuinug kanbalatø pønrrønrrai miar cha, pirau misaabe nane ñi karua ørøbwei indig kui kønrrai. ²² Ñi nan tōrguegwalmabig tranigwane nabe nømun tranar cha, nømgucha mayamba kandø lataig kønrrai, naba, ñiba kandø køb lataitøweingue. ²³ Nabe nømuinug pasrøben, ñibe nainug pasrøben, trumaybe newan ke kanbalatø pønrramigwan nebua tōgagønrrain cha. Pirau misaabe ñi nan karua ørig købig kuin kui ashib, katø ñibe nan undaarab lataitøwei nømgucha undaguig kuin kui ashib inchai.

²⁴ 'Nai Møskai, ñi nan traniiløbe, na chu waben nømgucha truyutøwei naba purrønrrai inchar cha, tru tōrguegwalmabig ñi nan tranig købigwan nøm ashchain cha, tru chiwanguen marmøwatøsrøwei ñi nan undaguig kua, tranigwan. ²⁵ Nai Møskai sølgandø tabig, yu piraeløbe ñune mu kui ashmuindøgucha, nabe, ñun ashibig kur cha. Inchen iiløgucha yandø nane ñi karua ørig kuin kui ashibelø køn cha. ²⁶ Nabe nømune ñui munchiwan mu kui nebua asingarur cha. Katøgucha nabe asingarubig asingarumønrrun cha, tru ñui undag købig ñi nayasiŋ tōgagüigwan nømgucha lata tōgagønrrai. Inchen nabe nømuinug pasramønrrun— cha, trenchibig køn Jesúsbe.

18

Jesúswan merrarawa srua ambub

(Mt 26.47-56; Mc 14.43-50; Lc 22.47-53)

¹ Jesús iilan Tiusba chab waminchabe, nui kusrenanøb pera uniiløba webya ibig køn, Cedrøn pi ambøgatøsrø larramrrab. Tru pi ambøgatømayrømbe kan olivos tul pasrøben, Jesúsbe nomba truyu kebibig køn. ² Inchen tru Judas Jesúswan ashig kømui inchielaingatø pasramisrøbiibe nøgucha tru tulwan ashibig købig køn, kaguende Jesúsbe katø katø nui kusrenanøb pera uniiløba truyu tulundzunabig købig køben. ³ Incha Judasbe kan søtø Roma misaamerai suldaumeraba, policiámeraba pubig køn, sacerdotesmeran karubeløba, fariseosmeraba misra karua øriilø, espadamera køben, lámparamera køben sruar, nag piløga mutar. ⁴ Inchene Jesúsbe kerrigu nun øyeeg purainrrabigwan ashaguen kua, nømerrig webippa, payibig køn:

—¿Mun lague?— cha.

⁵ Inchene nømbe trencha løtabelø køn:

—Nazaretsrø Jesúswan ler— cha.

Inchene Jesúsbe trenchibig køn:

—Truibe na kur— cha.

Inchen Judas, tru Jesúswan ashig kømui inchielaingatø pasramisrøbiibe, truyu nomba pasrabig køn. ⁶ Inchene Jesúsbe: “Truibe na kur” chiptinchene, nømbe wendømay amba, pirausrøn kørrelø køn. ⁷ Inchene katøle nøbe payibig køn:

—¿Mun lague?— cha.

Inchene nømbe:

—Nazaretsrø Jesúswan ler— cha, trenchiben,

⁸ Jesúsbe katøle trenchibig køn:

—Yamba nabe, truibe na kur, chimmørgøppeh cha. Nan lab amrruabe, trube iilane ambasay— cha.

⁹ Øyeeg puppe, Jesús nøtøwei øyah taig truig nebunrrain kuig køn: “Nai Møskai, ñi nan tranielane møigwangucha kanguen trubishimur” taig. ¹⁰ Inchene Simón Pedrobe espada srua kua, wesrawa, tru maya sacerdotesmeran nø karub sacerdotei karuindiig megabig, Malco taigwan, kusrmay kaluwan kelarrab lutiichtiptinchibig køn. ¹¹ Inchen Jesúsbe Pedron trenchibig køn:

—¡Espadane painayu way! cha. Tru purø trømbøig punrrabig nai Møskai mutchai tranin copan, ¿nagan muchimumuitarru?— cha.

Jesús Anáswei merrab

(Mt 26.57-58; Mc 14.53-54; Lc 22.54)

¹² Inchen tru Roma suldau søtømeraba, nømun nø karub pera pasrabiiba, katø Tiuswei yau pønrrabelø judío policiámeraba Jesúswan merrarawa, lusrøbelø køn. ¹³ Incha tru Anásweisrømaymerrig srua ambubelø køn. Anásbe Caifáswei sueeru køben. Katø tru Caifásbe tru pilawan maya sacerdotesmeran nø karub sacerdote købig køn. ¹⁴ I Caifás nø købig køn,

øyeeg marene tab kørnrun cha, judíosmeran waminchibig: “Maya misagweyasig kan møøtø kwamikken söl kørnrun” chib.

Pedrobe Jesúswan ‘ashmüg kur’ chib
(Mt 26.69-70; Mc 14.66-68; Lc 22.55-57)

¹⁵ Simón Pedroba, katøgan Jesús kusrenanøb pera uniiba Jesúswei wendautø ambubelø køn. Tru kane maya sacerdotemeran nø karub sacerdotei asig kuig køppe, Jesúsba truigwei ya wambiisrøngatig kebiben, ¹⁶ trune Pedrobe wambig yaskabutø kørromisrøbig køn. Inchen Jesús kusrenanøb pera unig kane tru maya sacerdotemeran nø karub sacerdotei nøbe trendø asig kua, katøle webarrua puramrrai, tru yaskab kurøb pasrab srusran wamincha, Pedron umbu pera kebibig køn. ¹⁷ Inchene tru srusrøbe Pedron trencha payibig køn:

—¿Nigucha tru ø møwei mendig uñibig kømmørgøppeh?— cha.

Inchene Pedrobe trenchibig køn:

—Kah, nabe tru kømur— cha.

¹⁸ Inchen karuindiig melabeløba, tru Tiuswei yau pønrrabelø policíamerababe nag urra kua, pishi yem køben, pønrramisratø pachiiirab køben, Pedrogucha truyu nømbe nag pulu pachiiirab pasrabig køn.

Maya sacerdotemeran nø karub sacerdoti Jesúswan maig kuitashchab payib
(Mt 26.59-66; Mc 14.55-64; Lc 22.66-71)

¹⁹ Inchen maya sacerdotemeran nø karub sacerdoti Jesúswan payibig køn tru nui mendig amønibelaimburab maitø kuigwanba, kusrenanøppe, chitø kusrenaniilanba, truilan. ²⁰ Inchene Jesúsbe trencha løtabig køn:

—Nabe maya misaamerai malau wamindig køn cha. Judíosmeran tulundzuni yamerayuba, Tiuswei yau judíosmera tulundzuninuuba chu uraskucha kusrenanøbig kur cha. Inchawei chigucha na sòratø wamindiibe kaagøn cha. ²¹ ¿Nane chindimba paygu? cha. Tru na maig tailan wamindi mørøbelan pay, chibig køn. Truiløbe na maig tailan ashibelø køn— cha.

²² Jesús iigwan trenchibene, kan policia truyu pulu pasrabiibe Jesúswane maløbøtø pashabe, trenchibig køn:

—¿Maya sacerdotemeran nø karub sacerdotengan øyeeg løtamig kuitarru?— cha.

²³ Inchene Jesúsbe trenchibig køn:

—Trube, na chigøben kaig taig købene, chiyu kalø tain kui eshkau pøs cha. Inchen tru na trendaig chi kalø kømubene, trube, nane ¿chindimba pashku?— cha.

²⁴ Inchen Anásbe Jesúswan lusrimbatig tru maya sacerdotemeran nø karub sacerdoti Caifásweisrømay ørøbig køn.

Pedro katøle Jesúswan ‘ashmüg kur’ chib
(Mt 26.71-75; Mc 14.69-72; Lc 22.58-62)

²⁵ Trune Pedrobe tru nag pulu pasramisra, pachiiirab pasrøben, trenchibelø køn:

—¿Nigucha tru møwei mendig uñibig kømmørgøppeh?— cha.

Inchen Pedrobe trenchibig køn:

—Kah, nabe tru kømur— cha.

²⁶ Inchene tru maya sacerdotemeran nø karub sacerdoti kan karuindiig megabig, tru Pedro kaluwan lutiitsinab møwei nømmisaabe, Pedrone trenchiptinchibig køn:

—¿Nabe ñune tru olivos ellguain tulyu Jesúsba pasrøben ashib mørgøppeh?— cha.

²⁷ Inchene Pedrobe katøyg ‘ashmüg kur’ cha isøben, mømibe tru urastø kan kallu wamaptingchibig køn.

Jesús Pilatoi merrab
(Mt 27.1-2, 11-14; Mc 15.1-5; Lc 23.1-5)

²⁸ Inchen yandø tør-rram lutauguen køben Caifáswei yaugurrimbe tru Pilato waig palaciosrømay Jesúswane srua ambubelø køn. Inchendø judíosmerabe tru yaube kebammeelø køn, trømbøig marig chillig indi lataig kørromisrømønrrab, nøm kebammuikkurrimbe tru pascua mamigwan chi kømø ka mamig kønrrai. ²⁹ Inchene Pilatobe nømun payrrab webya trenchibig køn:

—¿I møwane ñimbe chitø kalø maran chibrre inchigüeh?— cha.

³⁰ Inchene nømbe trencha løtabelø køn:

—Larrø kaig kømuiimbe, ñui merrab nam mana srua amrrubsru— cha.

³¹ Inchene Pilatobe trenchibig køn:

—Ñim srua ambay cha. Tru maig maramigwan martrai ñuiui pørig maig chibig køben, treeg asha maray— cha.

Inchene nømbe trenchibelø køn:

—Nam judíosmerane ka namuimburaptøbe mungucha kweechib pønrømønrrai merig køn— cha.

³² Inchen øyeeg puppe, Jesús tru nui kwamig chiyu punrrab pasrabigwan, tru nø maig wamindig treeg nebunrrain kuig køn. ³³ Inchen Pilatobe katøyug tru palacioyu kebya, Jesúswan wamabe, payibig køn:

—¿Nigan tru judíosmerai rey køtirru?— cha.

³⁴ Inchene Jesúsbe trenchibig køn:

—¿Ilgwangan ka ñiasiitø trenchitirru? Kabe ¿katøganelø naimburab ñun mu trendaimba trenchitirru?— cha.

³⁵ Inchene Pilatobe trenchibig køn:

—¿Kabe nagan judío kuitarru? cha. Nui piraueløba, katø tru sacerdotesmeran karubeløba naimay ñune sruamrruig køn cha. ¿Chi kalø mara pasrøgu?— chibig køn.

³⁶ Inchene Jesúsbe trencha løtabig køn:

—Na ashib karub tøgagúig naimbe yu pirauiig kømøn cha. Tru na ashib karub tøgagúig yu pirauiig kuimbe, trube, nai mendig melabeløbe nan judíosmerai tasku tranig kømønrrai kwayabsruinrrun cha. Pøs na karumburab ashib karub tøgagúig naimbe yu pirauiig kømøn— chibig køn.

³⁷ Inchene Pilatobe trenchibig køn:

—Trugan, ¿ñibe rey køtirru?— cha.

Inchene Jesúsbe trenchibig køn:

—Ñibe nane rey køn cha, trendan cha. Nabe truweiwei kal-lab, yu piraumay arruppe, truweiwei arrig køn cha, tru newan ciertonigwan eshkanrrab. Mutøgucha tru ciertonig-weingatø pasrabiibe, nai wamwan møran— cha, trenchibig køn Jesúsbe.

³⁸ Inchene Pilatobe trenchibig køn:

—¿Tru newan ciertoniibe, chi køh?— cha.

Jesúsuan kwanrrai pasrøb

(Mt 27.15-31; Mc 15.6-20; Lc 23.13-25)

Iigwan chab trenchabe, Pilatobe katøle webya, judíosmeran trenchibig køn:

—Nabe tru møweinuube chigucha chi kalø mariibe wetørramur cha. ³⁹ Inchendø ñimbe trendø treeg maramig tøgær køn cha, Pascua Fiesta kwalømbe kan kailan keeri yau pasrabigwan na elacha wertraí. ¿Trube, tru judíosmerai reywan na elatsamig palain køgue?— cha, trenchibig køn.

⁴⁰ Inchene nømbe mayeeløba katø trenchib trashibelø køn:

—¡Øigwan kømøtø, Barrabásuan elachi!— chib.

Tru Barrabásbe niliig købig køn.

19

¹ Inchene Pilatobe Jesúsuan merrarrawa, itsingarubig køn. ² Inchen suldaumerabe kaldiiigwan corona mara, Jesúswei turyu petsøsa, katø asru kan keeg kørrrabig yalø piguiig itøguenanøbelø køn. ³ Inchabe nui pulu kemallabe, trenchibelø køn:

—¡Judíosmerai rey, viva!— chib.

Incha maløbøtø pashagutsamba inchibelø køn.

⁴ Inchene Pilatobe katøyug webya, misaamerane trenchibig køn:

—¡Au! Nun wambiisrø pera arrumønrrun cha, nuinuube chigucha chi kalø marig nabe wetørramuin kui ñim ashchai.—

⁵ Inchen Jesúsbe, tru corona kaldiiigwan marigwan petsaig, tru yalø piguiigwan keweig webibig køn. Inchen Pilatobe trenchibig køn:

—¡Asay! cha, i møøbe yu pasran— cha.

⁶ Inchen tru sacerdotesmeran karubeløba, tru policíameraba Jesúsuan ashippe, trashibelø køn:

—¡Kurusyu mesrø! ¡Kurusyu mesrø!— chib.

Inchen Pilatobe trenchibig køn:

—Treeg købene, trube, ñimdøwei srua amba, kurusyu mesray cha. Pøs, nabe naimburappe, nuinuube chigucha chi kalø mariibe wetørramur— cha.

⁷ Inchen judíosmerabe nune trenchibelø køn:

—Nabe maig maramigwan martraí pørig tøgær ker cha. Inchawei truyu maig chibig køben, nøbe kwamitøwein køn cha, kaguende nøbe nøasiitø: “Tiuswei Nusrkain kur” chib pasraikkurri.—

⁸ Inchen Pilatobe tru trendaigwan mørabe, mas kørig kui inchibig køn. ⁹ Incha katøle palacioyu kebya, Jesúsuan payibig køn:

—¿Ñibe chuig kugu?— cha.

Inchen Jesúsbe niløtø pasrøben, ¹⁰ Pilatobe trenchibig køn:

—¿Nanguen løtømønrrapteh? cha. Nabe ñun elatsamdiig købene, elachib, kurusyu mesramdiig købene, mesrøb indamig mu mandamgaig maramigwane na asha marøbig kui çashmøtirru?— cha.

¹¹ Inchene Jesúsbe trencha løtabig køn:

—Nan øyeg punrrai ñi marøb wamigwane chigaig købsruinrun cha, ñun srømbalarøngurri treeg marøb wanrrai tranmuig kuimbe. Inchawei tru nan ñui tasku tranøbiibe purab kaikken mara pasran— cha.

¹² Trugurrimbe Pilatobe Jesúswan mandø incha elatsamdiig køtashchab labig køn. Trune judíosmerabe trenchib trashibelø køn:

—Ñi nun elachabe, Roma maya misagwan karub wabig Césarweingatiig kømøn køn chib. Kaguende møikkøben: “Rey kur” chib pasrabiibe Roma maya misagwan karub wabig Césarweingatiig kømøn— chib.

¹³ Inchene Pilatobe trinun mørøppe, Jesúswan wambig wesrungarua, maig kønrrabigwan asha martrab wamisrinug wamisrøbig køn, tru “Sruutøga Kayig” tainug, hebreomaybe Gabata cha waminug. ¹⁴ Pascua Fiesta maramig kan kwalømdø paløben, kwaløm tøbøtag køsrøn købig køn. Inchen Pilatobe judíosmeran trenchibig køn:

—¡Au, ñimui rey yu pasran!— cha.

¹⁵ Inchene nømbe trashibelø køn:

—¡Kwabash! ¡Kwabash! chib. ¡Kurusyu mesrø!— chib.

Inchen Pilatobe trenchibig køn:

—¿Nagan ñimui reywan kurusyu mesrønrrab waitarru?— cha.

Inchen sacerdotsmeran karubeløbe trencha løtabelø køn:

—Nambe katøgan rey tøgar kønrrab kømøtø, Roma maya misagwan karub wabig Césarwandø rey wannar ker— cha.

¹⁶ Inchen yandø Pilatobe Jesúswan kurusyu mesrønrrai nømun tranøbig køn.

Jesúswan kurusyu mesraig

(Mt 27.32-44; Mc 15.21-32; Lc 23.26-43)

Inchen nømbe Jesúswan kemøra, srua amben, ¹⁷ Jesúsbe nui kuruswan muta, tru Calavera cha wamiisrømay webibig køn, hebreomaybe Gólgota taig. ¹⁸ Incha truyu kurusyu mesrøbelø køn, katø pailan pinrrømenda kan kan, Jesúswane tru tøbøtakke. ¹⁹ Incha Pilatobe kurusyu kan pørig mesrønrrai karubig køn:

JESUS NAZARETSRIIG, JUDIOSMERAI TRU REY KØN

chibig. ²⁰ Inchen tru pøra mesraigwane judíosmera mugøben truba yamelø lebelø køn, kaguende tru Jesúswan kurusyu mesraibe ciuda pulu køben. Inchagucha tru pørig megabiibe hebreomay køben, latinmay køben, griegomay køben pørig købig køn. ²¹ Incha treekkurri judío sacerdotsmeran karubeløbe Pilatone trenchibelø køn:

—“Judíosmerai rey køn” cha pøra mesrømøta cha. Treeg kømøtø: “ ‘Nabe judíosmerai rey kur’ cha, nø trendaig køn” chibig, treeg pør— cha.

²² Inchen Pilatobe trencha løtabig køn:

—Na pøriibe, pørig megabasay— cha.

²³ Incha suldaumerabe Jesúswan kurusyu chab mesrabe, nui kewagúigwan kusrawa, pippalø pirishibelø køn, kanui kan kangue. Incha trugurrimbe tru pala kewagúigwangucha kusrabelø køn. Inchen triibe kemesra tsusaimíg kørrappa kandiig pasrig købig køn.

²⁴ Suldaumerabe kangurri kangurri trenchibelø køn:

—Kølsrømgun cha. Trembe tru kewagúigwan muin kørrømisrtashchab suerte kucha ashkun— cha.

Øyeg maren, Tiuswei wamwan pørigu øyah chibig truing nebuig køn:

“Nai kewagúilan nømdø pirisha,

tru nai pala itøgueigwane muin kørrømisrtashchab suerte kucha asan” taig.

Suldaumerabe øyeg marig købig køn.

²⁵ Jesúswei kurus pulube nui usrin køben, nui usrai numøsrain køben, Cleofaswei srai María køben, katø María Magdalena køben pønrrabelø køn. ²⁶ Inchen Jesúsbe nui usran ashib, katø nui undaraig kusrenanøb pera uniibe nui usraim pulu pasraa ashib inchabe, usrane trenchibig køn:

—Au, ñui nusrkai lataigwan uyu ñi pera pasran— cha.

²⁷ Inchabe katø tru nui kusrenanøb pera unigwan trenchibig køn:

—Ñui usri lataigwane uyu ñibe pera pasran— cha.

Indig tru uskurrimbunø tru kusrenanøb pera unig købiibe nui yau pera kørrømisrøbig køn.

*Jesús kwaig**(Mt 27.45-56; Mc 15.33-41; Lc 23.44-49)*

²⁸ Yandø øyeeg chab puraiben, Jesúsbe kerrigu treeg chab nebui ashabe, Tiuswei wamwan pørigu øyah taig nebunrrai trenchibig køn:

—Pimulgwatan— cha.

²⁹ Inchen truyu kan kòtsøyu kòchiibi netsiig tøgäig pasrøben, kan ñab espunjan tru piyu kebisha, kan hisopo srarchigu pucha, mutchai Jesúswei triisrø yuuløbelø køn. ³⁰ Inchen Jesúsbe tru vinon yuulen, chab webishabe, trenchibig køn:

—Yandø chab marig kørromisran— cha.

Incha turwan utsøbasra, yandø nui espíritun tranøbig køn.

Kan suldau lanzatøga Jesúswan tømbylu larrab kwanøb

³¹ Inchen yandø Pascua Fiesta punrrabigweyasig tru tamarøb kuin kwaløm køben, judíosmerabe tru asrmeran isrin kwalømbe kurusyu melsraig melømønrrai inchibelø køn, kaguende tru kwalømbe, tru isrin kwaløm, purø nu kwaløm kønrrab køben. Treekkurri Pilatone, melabelai srøbmeran landiitsingarunrrai rugabelø køn, asrmeran kurusyugurri pinøsrumig kønrrai. ³² Inchen suldaumerabe amba, kanunmerrig srøbmeran landi-icha, trugurrimbe Jesúsba kurusyu mesraig megabigwan kanungucha landiichibelø køn. ³³ Incha Jesúswan kemalla ashene, yandø kwainguen megaptinchen, treekkurri nune srøbmeran landiichimeelø køn.

³⁴ Inchendøgucha kan suldaube Jesúswane tømbylu lanzatøga larrab kwanen latatø, animba, piba weguchibig køn. ³⁵ Inchen nui kaptøga ashibiibe maig kuigwan wamindan. Inchen maig kuigwan tru nø wamindiibe cierton wamindig køn. Nøbe ka isatø waminchib pasrømurmba isua pasran, ñimgucha Jesúswan kørenrrai. ³⁶ Kaguende øyeelø pureppe, Tiuswei wamwan pørigu øyah taig nebunrrain trenchibig køn: “Nui tsutsigwane kanguen landig kømønrrun” taig. ³⁷ Katøganbaløsrø Tiuswei wamwan pørigugucha katø trenchibig køn: “Misaamerabe tru lanzatøga kwaninabigwan ashchun” cha.

*Jesúswan sörab**(Mt 27.57-61; Mc 15.42-47; Lc 23.50-56)*

³⁸ Øyeeg chab puraiben, José Arimatea pueblsriibe Jesúswei asrwan srua inrrab cha, Pilaton miabig køn, tru Josébe judíosmeran kørig køb Jesúswan nui isuigutø uñibig kuagucha. Inchen Pilatobe ka srua ibashen, Josébe asrwan srua ibig køn. ³⁹ Inchen tru Nicodemo, tru merrabsrø Jesúswan yem waminchab ibikkucha, kan treinta kilosburab may irrabzhig mirraba, áloesba lindisaig srua arrubig køn. ⁴⁰ Incha Joséba, Nicodemoba Jesúswei asrwan srua amba, llensutøga kirrøbelø køn. Tru may irrabzheelantøga, judíosmera sörønrrab maig marøbelø køben, treeg tamara sörabelø køn. ⁴¹ Inchen Jesúswan kurusyu mesraim pulube kan tul ellmarig pasrabig køn. Tru tulyube söramig kan trab srøig mungucha wayiimig, ka pasrabig køn. ⁴² Kaguende yandø judíosmerai isrin kwaløm pølbasmig lutau køben, katø tru söramikkucha pulutø køben, truyu Jesúswei asrwan wayibelø køn.

20*Jesús øsirab**(Mt 28.1-10; Mc 16.1-8; Lc 24.1-12)*

¹ Incha tru srø trune pølbasmø kwaløm María Magdalenabe løtsøzhig sörisrømay ullarbatø ibene, tru sörin trabyu nu srug kasraibe kusruim pasraptindi ashibig køn. ² Inchen nøbe luløb ibig køn tru Simón Pedroba, katøgan kusrenanøb pera unig, tru Jesús undaaraig kõiiba, truilø purrainuumay. Inchabe Mariabe trenchiptinchibig køn:

—Sörinukkurri Señorwei asrwane srua ambin køn cha. Nambe chu srua amba wayig mörmer— cha.

³ Inchene Pedroba, tru katøgan kusrenanøb pera unibabe webamba, sörisrømay ambubelø køn. ⁴ Pailøba kegøtø luløb ambendø, kane Pedro lataguen kømø, katøguchinguen mur lula, tru sörisrø nømerrig luløb pubig køn. ⁵ Incha trusrø trarraasha ashene, tru llensu kirriiløbe truyu warai ashibig køn. Inchendø kebimig køn. ⁶ Inchen nui wendautø Simón Pedrobe pua, sörin trabyu kebyabe, tru llensumerane truyu warai ashibig køn. ⁷ Inchagucha tru Jesúswei turwan pinøbulig llensugucha, tru kirri llensumeraba trubalatø kømø, nøøøø kurisaig trarrig tsubig køn. ⁸ Inchen tru kusrenanøb pera unig tru sörinug nømerrig merrab pubikkucha, yandø umbøsrøngatig kebya, ashabe, kørebeg køn. ⁹ Pøs katøgucha nømbe tru Tiuswei wamwan pørigu Jesúsbe kwabelai utugurri katøle øsiiramig palønrrab køn taigwane chigüi mörmuin købig køn. ¹⁰ Incha tru kusrenanøb pera uniløbe nømui yamay katø ambubelø køn.

Jesús María Magdalenan kenamisrøb
(Mc 16.9-11)

¹¹ Inchen Mariåbe sörim pulu wambig kishib pasramisrabe, kishib sörin trabyu trar-raasha ashene, ¹² pagatø ángelesmera pullig kørraig kewar, tru Jesúswei asrwan wayig købigube kane turgabøryu, kane katsigu purrai ashiptinchibig køn. ¹³ Inchen ángelesmerabe payibelø køn:

—Ishug, ¿chindimba kishku?— cha.

Inchene nøbe trenchibig køn:

—Pøš nai Señorwan srua ambin køn cha. Incha chu wayig mörmur— cha.

¹⁴ Iigwan chab trencha, nø keesha ashene, truyu Jesúsbe pasraptinchibig køn. Inchendø, nøbe Jesús kuitamappe isumig køn. ¹⁵ Inchene Jesúsbe payibig køn:

—Ishug, ¿chindimba kishku? cha. ¿Mun lagu?— cha.

Inchene nøbe tru tulyu ellmarig ashibig kuitamab isua, trenchibig køn:

—Au, kasuku, inchippa ñi srua yabe, trube, chu wayigwan eshkarra cha. Na srua inrrab— cha.

¹⁶ Inchene Jesúsbe trenchiptinchibig køn:

—¡María!— cha.

Inchene nøbe keesha ashabe, hebreamay:

—¡Rabuni!— chibig køn, (trenchippe, “Kusrennøbig” chib).

¹⁷ Inchene Jesúsbe trenchibig køn:

—¡Elatcha! cha. Kaguende nabe nai Møskai waisrø nebimø srø pasrar cha. Inchendø ñibe ya, nai nunelan trenchinrrig cha: “Naimba, ñimuimba Møskaweisrømay, naimba, ñimuimba Tiusweisrømay nabe inrrab kur tan” cha, eshkanrrab.—

¹⁸ Inchen María Magdalenabe yabe, tru kusrenanøb pera uniilan:

—¡Nabe Señorwan ashar!— chibig køn.

Incha Señor nun maig tailangucha nømun eshkabig køn.

Jesús nui kusrenanøb pera uniilan kenamisrøb
(Mt 28.16-20; Mc 16.14-18; Lc 24.36-49)

¹⁹ Tru truaalømdøwei yandø yem misren, Jesúswei kusrenanøb pera uniiløbe tulundzuna purrabelø køn, yaskabmerane mu kurtraingag kasra pønsra, judíosmeran kørig køb. Inchene Jesúsbe truyu kebib, nømuin tøbøtag pasramisrøb, trenchibig køn:

—¡Chi isumgaig tab købiibe ñimba kønrrain!— cha.

²⁰ Incha chab trenchabe tasiimeranba, nui tømbulwanba kenamarene, nui kusrenanøb pera uniiløbe Señorwan ashippe, truba truba kasraarabelø køn. ²¹ Inchen Jesúsbe katøle trenchibig køn:

—¡Chi isumgaig tab købiibe ñimba kønrrain! cha. Nabe ñimur karua ørar cha, nai Møskai nan karua ørøb lataitøwei.—

²² Incha iigwan chab trenchabe, Jesúsbe nømuim pala urra, trenchibig køn:

—Espíritu Santon utay cha. ²³ Ñim møilan køben nømui kaig mariilan ulø paymø kagøb ashene, truilai kaig mariiløbe ulø payamig kømig kørørmisran cha. Inchen ñim truilai kaig mariilan pesannamø ulø payene, nømune pesannamø ulø payamig kønrrun— chibig køn.

Jesúsba, Tomásba

²⁴ Inchen Tomás, Gemelo taig, tru doce kusrenanøb pera uniilai utuig, truipe tru Jesús arrubene, nømba wamuig kuig køn. ²⁵ Inchen tru kusrenanøb pera uniilø kaneløbe trenchibelø køn:

—Nambe Señorwan aser— cha.

Inchene Tomásbe trenchibig køn:

—Nabe nui tasku kølabus larrøoriilan ashmøwei, katø tru kølabus larrøøriiløyu tasigunan kegwanmøwei, katø tru nui tømbulyu nai tasigwan kegwanmøwei inchimuppe, nabe køremumønrrun— cha.

²⁶ Indig trune wendau tru kusrenanøb pera uniiløbe katøle umbu tulundzuna purrøben, Tomás kucha nømba wabig køn. Inchene yaskabmerabe mu kurtraingag kasrailø pønrraingucha, Jesúsbe kebya, nømuin tøbøtag pasramisrøb, trenchibig køn:

—¡Chi isumgaig tab købiibe ñimba kønrrain!— cha.

²⁷ Inchabe Tomáswane trenchiptinchibig køn:

—Ñui tasigunan yu kegwanøb, nai tasiimeran ash cha. Incha ñui kwalwan larrøbicha, yu nai tømbulyu tasigwan kegwan cha. Ke truiig kømuitamptø isub uñmøtø, ñiguen kørebeg ku— cha.

²⁸ Inchene Tomásbe trencha løtabig køn:

—¡Nai Señor! ¡Nai Tius!— cha.

²⁹ Inchene Jesúsbe trenchibig køn:

—Tomás ¿møi ke nan ashagan køretirru? cha. Mayanguen tab kuilø køn cha, ashmøwagucha, kørebeløbe.—

Mandøgurri i kilgameran pørig

³⁰ Jesúsbe truiløtø kømøtø, katøgan Tius nøba pasrain kui asha kømig mariilø truba kenamarøbig køn nui kusrenanøb pera uniilai merrab. Truiløbe i kilgamerayube pørig kaagøn. ³¹ Inchendø iilan pøriilø køppe, Jesúsbe tru Cristo Tiuswei Nusrkain kuin kui kørenrrain pørig køn. Incha tru treeg køreitøgabe srøig øsig kømigwan nøgurri tøgagønrrai indig køn.

21

Nui kusrenanøb pera uniilan Jesús Galileasrø kenamisrøb

¹ Inchen treeg chab puraiben, Jesúsbe nui kusrenanøb pera uniilan katøle kenamisrøbig køn Tiberias nu pisu menda. Nøbe øyamay kenamisrig køn: ² Simón Pedro køben, Tomás tru Gemelo taig køben, Natanael tru Galilea pirau canásriig køben, Zebedeowei nusrkalø køben, katøgan pailø Jesúswei kusrenanøb pera uniiløba, trubalatø lincha warøben. ³ Incha Pedrobe trenchibig køn:

—Nabe peskanrrab inrrainchar— cha.

Inchene nømbe trenchibelø køn:

—Namgucha ñiba amrrunrrab— cha.

Incha ambabe, kan barcoyu nebamba, tru yembe chigucha wesrunrrab kaimabelø køn.

⁴ Inchen yandø tør-rrab arruben, Jesúsbe pi menda nømun kenamisren, tru kusrenanøb pera uniiløbe nune mu kui ashmeelø køn. ⁵ Inchene Jesúsbe trenchibig køn:

—Au, nai ureezheelø, ¿chigucha chi peskau kemørtrab kaimatirru?— cha.

Inchene nømbe:

—Kah— chibelø køn.

⁶ Inchene Jesúsbe trenchiptinchibig køn:

—Atarrayan barcoyu kusrmaygatømay kegutsay cha. Trenchabe ñimbe wesranrrabguen— cha.

Inchen nømbe atarrayan keguchibelø køn. Inchabe piyugurri atarrayan wesranrrab kaimaptinchibelø køn, peskau nu køptø. ⁷ Inchene tru kusrenanøb pera unig Jesúswei undaaraibe Pedrone trenchibig køn:

—¡Au, Señor køn!— cha.

Inchene Pedrobe: “Señor køn” taig mørøppe, nui pala itøgueigwan wesrawa tsuig køppe, truiowan kewa, pørønab, piyu pørstapinchibig køn. ⁸ Inchen tru kusrenanøb pera uniilø kaneløbe barcon srua pubelø køn, atarrayan peskautø netsiig keetab sruar. Kaguende nømbe pi mendagurri cien metros køsrøndø waraig købig køn. ⁹ Incha nømbe pirau pinaambabe, kan trøsr nag pasrai ashibelø køn, tru palabe peskauba, pirrimba warig.

¹⁰ Inchen Jesúsbe trenchibig køn:

—Mamdø tru ñim møi wesruim peskaumeran srua amrruy— cha.

¹¹ Inchen Simón Pedrobe barcoyu nebya, atarrayan nørø peskaumeratø ciento cincuenta y tres netsiig tøgagwan pi mendagatig keetab srua ibig køn. Inchen maya nu kuingucha, atarrayabe kølsrømig køn. ¹² Inchene Jesúsbe nømun trenchibig køn:

—Manrrab amrruy— cha.

Inchen møikkucha kusrenanøb pera uniiløbe: “¿Ñibe mu kugu?” cha payamig kørig kui inchibelø køn, kaguende nømbe Señor kui asha kua. ¹³ Inchene Jesúsbe kemalla, pirriwan nui tasku srua pasramisrabe, nømun srørrøbig køn, katø peskauwan chigucha.

¹⁴ Iibabe chabguen pønmay købig køn, Jesús kwaitai utugurri katøle øsiirawa kurra, nui kusrenanøb pera uniilan nø kui ashchai kenamisrig.

Jesús Simón Pedropa waminchib

¹⁵ Yandø chab mabe, Jesúsbe Simón Pedron payibig køn:

—Simón, Juanwei nusrkai, ¿iilø lataguen kømø, nan mas undaguig kugu?— cha.

Inchen Pedrobe trenchibig køn:

—Øø, Señor, nabe ñun undaguig kui ñibe ashibig køn— cha.

Inchene Jesúsbe trenchibig køn:

—Nai ubisha-ureemeran mannøb ashib tøgagørrunrrig— cha.

¹⁶ Katøle Jesúsbe payibig køn:

—Simón, Juanwei nusrkai, ¿nan undaguig kugu?— cha.

Inchen Pedrobe trenchibig køn:

—Øø, Señor, nabe ñun undaguig kui ñibe ashibig køn— cha.

Inchene Jesúsbe trenchibig køn:

—Trube, nai ubishameran tab ashib tøgagørrunrig— cha.

¹⁷ Pønmay kønrrabyu katøle payibig køn:

—Simón, Juanwei nusrkai, ¿nan undaguig kuguh?— cha.

Inchen Pedrobe kullaarab isui inchibig køn, kaguende chabguen pønmayguen: “¿Nan undaguig kuguh?” chib payen. Inchen nøbe trenchibig køn:

—Señor, ñibe chiwandøgucha Kerrigu ashibig køn cha. Nabe ñun undaguig kui ñibe ashibig køn— cha.

Inchene Jesúsbe trenchibig køn:

—Nai ubishameran mannøb ashib tøgagørrunrig cha. ¹⁸ Nabe ñun isa kømø, cierton trendamønrrun cha: Ñibe matsinøtiig køb urasbe, ñui pørønagwan ñiasiitø pørønawa, ñun chuikkøben ibig kuig køn cha. Inchendø yandø ñi køllig misrene, ñui kwalmeran ñi larrøbichen, katøgan mendaig ñune pørønana, ñi ig kømui indiisrømay srua inrrun— cha.

¹⁹ Øyan chippe, Pedro nø mandø kwamig nebuben, treeg kwaitøga Tiuswan maya nuguen tabig indig kønrrai martrab køn cha, trendaig køn Jesúsbe. Inchabe Pedrone trenchibig køn:

—Nai mendig amø— cha.

Jesús kusrenanøb pera unig tru undaaraiig

²⁰ Inchen Pedrobe keesha ashene, Jesús tru kusrenanøb pera unig undaaraiibe nui wendau arri ashibig køn. (Truibe tru mab purrab uras Jesúswan pechoyu ne tsumisra: “Señor, ¿ñun ashig kømui inchibelan tranrrabiibe mu køh?” cha, payibig, truig købig køn.)

²¹ Inchen Pedrobe truigwan ashabe, Jesúswan payibig køn:

—Señor ¿inchen øigwane ñibe mandø inchainchigu?— cha.

²² Inchene Jesúsbe trencha løtabig køn:

—¿Na arrumnegatig nune ka uñchai indingucha, ñuimburappe treegwane chi asamig kaagøn cha? Ñibe nai mendig amø— chibig køn.

²³ Indiiibe tru trendaigwane nunelai utube treeg wam larrøbitsig købig køn, tru kusrenanøb pera unig, truibe kwamønrrab køn tan cha. Inchen Jesús trenchippe: “Truibe kwamønrrab”, køn cha kømøtø, trenchippe, ka: “Na arrumnegatig nune ka uñchai indingucha, ñuimburappe treegwane ñibe chi asamig kaagøn” cha, treebe taig købig køn.

²⁴ Tru kusrenanøb pera unig trendainabig nøtøwei iilane maig kuigwan eshka wamincha, katø nøtøwei pørøb indig køn. Incha maig kuigwan nø eshka wamindiibe isatø kømø, cierton kui asha pønrrer.

²⁵ Katø chigøben Jesúsbe truba truba marig købig køn. Lutøgurrih trumørig pørimbe, tru pørig kilgamerabe yu pirau ørøbaguen kemubsruitamab isur.

Los Hechos

Jesucristo Espiritu Santon tranrrab misrig

¹ Nai Teófilo, nai srósró pórigebe maig purayaigwan eshkaib pórige kuig kón, Jesús tru chigurrimbunó maróþ þólbasiilanba kusrenaniilanba. ² Kató nòashib karua órameló lawa wesruilan Espiritu Santogurri chitó maramelan martrai karua þónsra, srómbalósrómay srua yain kwalómgatig kóbigwan pórige kón. ³ Incha nóbe kwaig tsua, ósiirawa, nómuné ósiguig kenamisróbig kón, nó kuin kui asamdiig kónrrai chine maróþ. Incha nóbe kwalómmera cuarenta nemisramne nómun kenamisrób uña, Tius nó karub waigweimburabigwan waminchibig kón.

⁴ Incha Jesúsbe nómba trubalató purrówabe:

—Jerusalénsrómaybe ammónrrigay cha karubig kón, nai Mòskai tranrrab misra kórrómisrigwan treeg punnegatig munugunrrain cha, ⁵ tru ñim nan óyah taig mórige kóbigwan. Þós Juanbe isa kómóþ, piþóga pinóbuliiló kónrrai ulsrain kón cha. Trune ñimbe mam kwalómmyutó Espiritu Santotóga pinóbuliiló kónrrun— chibig kón.

Jesús srómbalásrómay ib

⁶ Jesúsba truyu tulaamba purrówabe, trencha payibeló kón:

—¿Señor, Israel misaamera merrabsró nómb ashib karub tógagúig kóbigwan katóle treetówei nómb karub tógagómig punrrai mói yan tamara pasrtraindirru?— cha.

⁷ Inchene Jesúsbe trencha létabig kón:

—Treeg maramibe mana punrrabigwanba, Mòskai nóashib nui maram purab mari-itógatówei chi kwalóm treeg punrrai mara kórrómaramigwanbabe, ñimbe wammóra kómig chi palómón cha. ⁸ Inchendó Espiritu Santo yandó ñimuim pala arrubeneguende maramburab maramigwan ñim uta, Jerusalénsró, Judea pirau kerrigu, Samaria pirausró, píró muba kuimburab puró yabsrónguen naimburab maig kuigwan waminchab webamrrun— chibig kón.

⁹ Incha yandó iigwan chab waminchene, nómb ashib þónrramne, Jesúswane pala kusruben, kan wafí arrua, nun pinóbulen, yandó mas ashchab kaimabeló kón. ¹⁰ Inchen Jesús iben, nómb srómbalaneb neeshib þónrramnetó, móimbe pagató mógueló pulózheeló kewar nómuim pulu kenamisrabe, ¹¹ trenchibeló kón:

—¿Galileasró mógueló, chindimba srómbalaneb neeshib kórrómisrke? cha. I Jesúsówei ñimui utugurri srómbalásrómay srua yainabiibe, ñim maig yai asig kató nóbe treetóweih attrun— chibeló kón.

Judasweimburó puróbasramig Matíaswan lawa wesrab

¹² Inchen tru nóashib karua óriilóbe tru Olivos taig tunsróngurri Jerusaléngatig kató ambubeló kón, tru maig maramigwan martrai Moisés pórige isrin kwalómbe maya yabgatig amrrain chibig kóben, treezhíitó. ¹³ Jerusalén ciudayu puabe, tru nómb pui yau, pala písusró nebambubeló kón, truyube Pedro kóben, Juan kóben, Jacobo kóben, Andrés kóben, Felipe kóben, Tomás kóben, Bartolomé kóben, Mateo kóben, Alfeowei nusrkai Jacobo kóben, Simón Zelote kóben, Jacoboi nusrkai Judas kóben, tru iiló ya peba warainug. ¹⁴ Truilóbe Tiusba wamindamigwane sótóba kandó isua, maikken elachimó maróþeló kóbig kón, Jesúswei usri María kóben, nui nuneló kóben, katógan ishumburera kóben kanbalató misra.

¹⁵ Inchen tru kwalómmerawan Jesucristo kusrenanigwan maróþeló kan ciento veinte kósrón tulundzuna kóben, Pedrobe truilai utu pasramisra trenchibig kón:

¹⁶ —Nai nuneló, Tiuswei wamwan pórige maig taig, truiþe nebumig palaig kuig kón cha. Tru pórigebe Espiritu Santobe David wamindig kanmaytó Judasweimburab treeg neburrun cha wamindig kuig kón. Jesúswan kemóra, sruamrrabelan mandó indamigwan eshkaib pasrabigwan. ¹⁷ Þós Judasbe namui utuítówei, kató namui maramelóyu maramig tógaig kóbig kón cha. ¹⁸ (Indiibe tru nó kaig marimburó an utuítóga kan tul penig kón cha. Inchabe ippa, turmay peñippe, patsówan srurram peñen, þóitsimerabe kerrigu webólabig kón cha. ¹⁹ Inchen Jerusalén mayeeló warabeló wammórabbe, tru pírówane, “Acéldama” cha wamabeló kón, nómuin trikkabe, “Ani Lusin Tul” chibig.) ²⁰ Kaguende Salmosyube trenchibig pórige pasran:

“Nui yabe mugucha waraimíg kutsi ya kórrómisren,
kató truyube muguen tsunrrabig kaanrrain” cha.

Kató:

“Nó chi maróþ pasraig kóbigwane katógan peg utórrrain” cha.

²¹ Inchawei óyeeg kóbene, tru namui utu Jesús trendó namba lincha llibar uñen, ²² tru Juan Jesúswan piu umbu nun ulsraikkurrimbunó, kató nun namuinukkurri kusraben,

nun srømbalasrø utig kømnegatig namba managucha tin lincha amøñibelø yu møguelø køn cha. Incha kan treeg lincha uñibigwan, tru Jesús kwawa, katøle øsiiraigwan treeg køn chib waminchib, namba tøgatø pasrønrrai maramibe ke søldøwein køn— chibig køn.

²³ Incha pailan wesrawa pønrsøbelø køn: Matíaswanba, Joséwandøwei Barsabás cha wamab (katø Justo cha wamab indi) møwanba. ²⁴ Inchabe øyeeg chib Tiusba waminchibelø køn:

—Señor, ñibe mayelai manrømeran ashibiibe, i pailan ñi mønun lawa wesrua tōga pasraigwan eshkarra chib, ²⁵ Cristo nøashib karua ørigwei maramigwan uta pasramisra martrabiibe mu kuin kui. Kaguende Judasbe nui yamsrømay inrrab, tru maramigugurrimbe tarømisra pella, peg maywan yaig køn— cha.

²⁶ Inchawei møgweim pala pendashchab suerte kuchene, Matíasweim pala peñen, truiibe yandø tru Cristo once nøashib karua øriilai utuig kørømisrig køn.

2

Espíritu Santo arrigwan waminchibig køn

¹ Judíosmerai Pentecostés taig tru kwaløm yandø puben, nømbe mayeeløba kanbalatø tulundzuna købene, ² mømibe jkatø! srømbalasrøngurrimbe wanrrabig kan truba mur isig ichibig lataig arrubig køn, tru purrainuube jkatø! ya ørø tru wanrrabiitø kasramgue. ³ Inchene nømun kanun kanun traniilø kan nagurømera latailø kenamisra, nømun kanuim pala, kanuim pala pønrramisrøbelø køn. ⁴ Inchene nømbe mayeeløba Espiritu Santotø netsailø kørømisra, peg, peg wammera waminchib mendabelø køn, Espiritu nømun maig wamindingaruben.

⁵ Inchen Jerusalénsrømbe judíos misaamera warabelø køn, Tiusweimburabelan maizhikken elachimø marøbelø, chu pirausrøngurringuen palømíkke. ⁶ Inchen tru misag sötøbe tru wanrrabigwan mørabe, tulundzunabelø køn. Inchabe ipaare! kan øyeebe chi mandø kermab isubelø køn, kaguende nøm mørenene, tru Jesucriston kørebeløbe møitøgucha peg wam peg wam tru nøm mørøb pønrrabelai wamwan, trunun, trunun waminchiptinchene. ⁷ Inchen nømbe truba kørø kwaariilø, kangurrin kangurri ipaare! kan mandø kermab isub, trenchibelø køn:

—¿I mayamba waminchib pønrrabeløbe Galileasrø misaamera kømuitarru? chib. ⁸ Pøs kan namuin triimay, namuin triimay nam wamindi mørtrappe ¿mandø kerah? cha. ⁹ Yube Parto pirausreelø køben, medosmera køben, elamsreelø køben, mesopotamiasreelø køben, judeasreelø køben, capadociasreelø køben, pontosreelø køben, Asia pirausreelø køben, ¹⁰ frigiasreelø køben, panfiliasreelø køben, egiptosreelø køben, tru Cirene pirø pulu Libia pirausreelø køben, katø Romasrøngurri amrrubelø ka petø amrruarteelø judíosmera køben, judíos kømeeelø Tiusweiwan judíosmera marigu pønrrønrrab purørruwarmera køben, ¹¹ katø cretasreelø køben, arabiasreelø køben, treeg yam paløsreelø købendø, nambe mayeeløba Tius truba nørreelø mariilan namuin triimay, namuin triimay wamindi mører— chibelø køn.

¹² Incha mayeeløba nømbe kwariilø jkan paare! øyeebe mandø kermab isub kangurrin, kangurri trenchibelø køn:

—¿Kan øyeebe chi kerah?— chib.

¹³ Trune kaneløbe indzatø ashib trenchibelø køn:

—Mutsiguelørre inchib waran— cha.

Espíritu Santo kørøarruben, Pedro misagwan maig kønrrabigwan waminchib

¹⁴ Inchen Pedrobe Cristo tru once karua øriiløba kurra pasramisra, nøbe mur waminchib trenchibig køn:

—Judea møguelø køben, katø mayeelø yu Jerusalén warab misaamera køben, iigwan ñim chigúí nebua ashchain køn cha. Na wamindamigwan tab mørtraí chibig køn. ¹⁵ Ya løtsø las nuevetø køben, i møguelan ñimbe mutsiguelø kønmb isuinrun cha, ¹⁶ treeg kømøtø, Tius maig karuigwan eshkaibig Joelgurri Tius tru øyeeg taig købig, iibe tru køn cha:

¹⁷ “Srabe kwalømmerawane treeg pub attrun cha,

Tiusbe trendan chib,

mu misagweim palatøgucha nai Espiritun uncha tøgagønrrai øramønrrun cha.

Ñimui nusrkalø, ñimui nimbasrmerabe

Tius nømun chi eshkaigwan eshkaben,

ñimui matsøreløbe kan piab lataigu chigøben ashen,

ñimui kølleeløbe piailø tøgagønrrun cha.

¹⁸ Tru kwalømmerawane katø ishumbur lata, møguelø lata,

nai karuindiig melabelaim pala

nai Espiritun uncha tøgagønrrai tranen,

nømbe na nømun chi eshkaigwan eshkanrrun cha.

¹⁹ Inchen srømbalasrømbe nabe kwaara asha kønrrai mariilø marøb,

katø yu piraube na maramburab mariilan asha kømig kenamaramønrrun cha, anin køben, nag køben, naguish kurrabig købengue.

²⁰ Nøsiibe larrø løstigi misren,
pølbe ani lataig misrtrun cha.

Señor arrum kwaløm truba nuig purø tab kwaløm pumøwatø, treeg kønrrun cha.

²¹ Inchen Señor Tiuswei munchiwan wamab, purugurra chib miab pasrabiibe, kaigyugurri wesraig kønrrun” cha, trendaig.
Iibe tru køn, chibig køn.

²² ‘Ñim Israel misaamera, na wamindigwan møray chibig køn: Nazaretsrø Jesúsbe Tius nø karua øri møg kui ashchai, nø treeg trani møg købig køn cha, nøgurri ñimui merrab maramburab mariitøgaba, kwaara asha kønrrai mariitøgaba, Tius nøba pasrain kui asha kømig mariitøgaba. Pøs ñimðweinguen ashibelø køn cha. ²³ I møwandøwei Tiusbe merrab-srøngurri manawei nø maig martrab isuilane tøgaguen kua, ñimun tranen, ñimbe nune kurussyu mesra, ñim kweetsig køn cha, tru larrø kailai tasku purøøra. ²⁴ Inchen nune kwilal utugurri Tiusbe kusraig køn cha, øyeeg purø trømbøig indinawa kwaig tsuigugurri. Kaguende tru kwab kwanrrai marøb pasrabiibe nune chinchagucha nø merrarrawa tøgagønrrab kaimaig køn cha. ²⁵ Pøs merrabsrø rey Davidbe Jesúsweimburab waminchippe, trendaig købig køn cha:

“Nabe Señorwane chu uragucha nai merrab wai ashibig kur cha.

Kaguende nøbe nai kusrmay pasran cha,
nan amburab, iburab sruagutsig mandøguen kømui pasramig chigaanrrai.

²⁶ Treekkurri nai manrrøbe truba kasraaraben,
nai niløbe truba truba tabig waminchib kasraaran cha.

Inchen nai asrken, chi isumø muniiramigwan muniirab isrønrrun cha.

²⁷ Kaguende ñi, Tiusbe, nan kwabelø pønrrainug pasrønrrain kønrrain kømøwei,
katø ñui Newan Tabigwan trerab tsunrrain kønrrain kømøwei inchnun cha.

²⁸ Ñibe nan øsig køm maymeran nebua asingarua,
ñi naba waikkurri nane truba truba kasraaranganunrrautan” taig køn cha, trenchibig køn.

²⁹ ‘Nai misaamera, nabe maig kuigwan tørgandø kelarrab ñimun trendamønrrun: Merrab-srø namui kølli misag Davidbe kwaben, sørig køn cha. Inchen tru nui søriibe møin kwalømgatig namui utu pasran cha. ³⁰ Inchendø Davidbe, Tius maig karuigwan eshkabig købig kua, tru kan nuinukkurri kurrab misagwan David nø wamisra karub wainug wanrrai wannamigwan, Tiusbe: “¡Katø! treeg marmø kømø, treeg kønrrai maramønrrun” cha, trendaigwan ashibig kuig køppe, ³¹ Davidbe manawei Cristo øsiiramigwane chab asha kua, tru Cristo katøle øsiiramigwan trencha wamindig købig køn cha ‘kwabelø pønrrainug truyutø pasrønrrai kørromarig kømøwei, katø nui asrbe treraig kømøwein kønrrai indig kønrrun’ cha. ³² Inchawei Tiusbe tru Jesúswandøwei katø øsiirangaruben, nambe mayeeløba tru øyeeg purayaigwane namashib asha pønrrer chibig køn. ³³ Incha nune Tiusweim pulu kusrmay wanrrab attrai kusraben, Møskai tranrrab misra kørromisrig tru Espiritu Santon uta, uncha tøgagønrrai trunun tranan chibig køn. Inchen ñim møi ashib, mørøb inchnun kuibe, tru køn cha. ³⁴⁻³⁵ Kaguende Davidbe srømbalasarømaybe nebimuig køn cha. Inchendø Davidbe trendaig køn cha:

“Señor Tiusbe nai Señorwane trendan cha:

‘Nai kusrmaygatø wamisr cha,

ñun ashig kømui inchnun tsalø inchnun

ñi ñui srøbmeran truilaim pala nebuna wamig kønrrai na pønrramnegatig.’ ”

³⁶ ‘Israel misaamera mayeeløba treeg kømuitamab asha pønrray cha, tru Jesús ñim kurussyu mesraigwandøwei Tiusbe nune Mayeelaim Pala Pasrabig kønrrai maramba, Cristo kønrrai maramba indin køn— chibig køn, Pedrobe.

³⁷ Incha øyeeg tailan mørøppe, truba kullaarab isui inchnun køn nømui manrrau kebachen. Inchabe Pedronba, trugurri Cristo nøashib karua ørig katøganelanba payibelø køn:

—Ñim nai misaamera, ¿nambe chi maramig kønrrerah?— cha.

³⁸ Inchen Pedrobe trenchibig køn:

—Ñim møitøgucha nimui kaig mariilan isua møray cha. Incha Tiusweimay llirawa, Jesucristoi munchiyu piu umbu ulsraillø kuy chibig køn, ñimui kaig mariilan ulø payamig kømig, pesannaig kørromisrtraimbe. Inchen Tiusbe ñimune Espiritu Santon tranrrun cha. ³⁹ Kaguende i tranamigwan nø tranrrab misra kørromisriibe, ñimuyasig køb, ñimui ureemeryasig køb, katø mayeelø chu uras tsøndatøsrø kønrrabelayasig køb, katø mayeelø namui Tius nun mun wamag køben wamamelai, truilayasig køb køn— chibig køn.

⁴⁰ Incha Pedrobe *øyeelø* wamindig *kømnethø*, *katø srøithø* waminchib, *øyamay melamig køn* chib trenchibig *køn*:

—Yeeg larrø kaig marøb misaamerainukkurrimbe wemallib ambay— cha.

⁴¹ Inchen tru *nø* wamindigwan *møra* utabelane piu umbu ulsrailø *kørrømisren*, tru kwalømbe Jesucriston *kørewa pønrramisrøbeløbe* kan pøn mil *køsrøn nemisrig købig køn*. ⁴² Incha *nømbe mayeeløba Cristo nøashib karua øriilø kusrenanigwane tindøga marøb pønrrabelø køn*, kanbalatø lincha *kømigü lata*, mamig pirisha kanbalatø mab *kømigü lata*, *katø kanbalatø misra Tiusba waminchib kømigü lata*.

Jesucriston kørebelø srøsrøelø mandø waraig

⁴³ Inchen *nømunne mønundøgücha* ka *nøs nøstø købig køn*, tru Cristo *nøashib karua øriiløgurri* kwaara asha *kønrrai marøb*, *katø Tius nømbe pasrain* kui asha *kønrrai truba truba marøb* inchen. ⁴⁴ Inchen *mayeeløba Criston kørebeløbe kanbalatø lincha tulundzunab*, *katø chimerandøgücha ke kanguelarrøtø tøgagøb inchibelø køn*. ⁴⁵ Incha *nømui pirømeran*, *yameran*, *katø chi tøgagüilan køben yana*, *søteelan pirishibelø køn*, *møitøgücha maig palain køben*, *treetø*. ⁴⁶ Incha *kwalømmørig*, *kwalømmørig Tiuswei yau søteeløba tulundzunabelø køn*. Incha *mamigwan nømui yamørig truba truba kasrag*, *kanbalatø lata pirisha mabelø køn*, *tabig isua*, ka *treeg maranmab ashchaidø kømø*, ⁴⁷ *manrraugurri tabig isub Tiuswan truba tabig waminchib*, *katø nømbe maya misaamera truba tabig waminchibelø køn*. Inchen *Señorbe kaigyugurri wesraig kønrrabelan wesrawa*, *kwalømmørig nømuinuube srøithø*, *srøithø nemarøbig køn*.

3

Kan uñchab kaimabigwan tamarøb

¹ Kan *kwaløm Pedroba*, *Juanba*, *maaben las tres pailøba kegøtø Tiuswei yaumay nebamubelø køn*, *Tiusba wamindam uras købene*. ² Inchene *truyube kan møg tru kal-lainukkurri uñchab kaimabig wabig køn*. *Truigwane Tiuswei yau tru “Tab Yaskabzhig køn”* cha *waminug kebambubelan ‘an kettra’* cha *miab wanrrai*, *kwalømmørig srua amba wannig wabig køn*. ³ Inchen *tru uñchab kaimabiibe Pedronba*, *Juanwanba Tiuswei yau kebamrrab inchen ashabe ‘an kettra’* cha *miaben*, ⁴ *nømbe nun ashabe*, *Pedrobe trenchibig køn*:

—Namun ash— cha.

⁵ Inchen *tru uñchab kaimabiibe chi tranrrab indermab isua*, *truba tab ashene*, ⁶ *Pedrobe trenchibig køn*:

—Angawei, *orogawein kur cha*. *Inchendø na tøgagüigwaneguende tranrrumøn cha*. *Nazaretsø Jesucristoi munchiyu kurra*, *inrrø— chibig køn*.

⁷ Incha *Pedrobe kusrmay tasigu kemøra kusrabene*, *tru urastø nui srøbmeraba*, *nui yetølømeraba mur misren*, ⁸ *tru uñchab kaimabiibe ¡katø! kan pørsrappe pasrambua*, *ib menda*, *Tiuswan ‘Tabiibe ñitø køn’ chib*, *trashib*, *pørsrab Tiuswei yau Pedroba*, *Juanba kehibig køn*. ⁹ Inchen *maya misaamerabe nune uñbig misrin kui ashib*, *katø Tiuswan ‘Tabiibe ñitø køn’ chib*, *truba tabig wamindi ashib inchibelø køn*. ¹⁰ Incha *tru Tiuswei yau tru “Tab Yaskabzhig”* cha *waminug tru ‘an kettra’* cha, *miab wabigwan truig kui ashabe*, *truba kwaarøbelø køn*, *¡kan paare! øyeebe mandø kermab isub tru treeg purayain køben*.

Pedro maig pub arrigwan Tiuswei yau waminchib

¹¹ Inchen *tru uñchab kaimabig købiibe Pedronba*, *Juanwanba kemøra pasramnebe*, *misaabe mayamba kwariilø luløbelø køn Pedromeraimay*, *tru Tiuswei yau Salomónwei Yaskabumay*.

¹² Inchen *Pedro iigwan ashabe*, *misagwan trenchibig køn*:

—*Namui Israel misaamera øyeeegwan asha ñimbe chindimbarre kwargue? cha*. *Kabe tru maramburab maramigwan nam namashib tøgär kua*, *kabe nam Tiuswei merrab purø tabelø kuikkurri i mowan uñbig kønrrai nam mari lata ¿chindimbarre namungøba ashke? cha*. ¹³ *Treeg kømøtø*, *Abrahamwei*, *Isaacwei*, *Jacobwei Tius namui merrabsrø kølli misaamerai Tiusbe tru nui marøb megabig Jesúswane tørguegwalmabig kønrrai maran cha*. *Truigwane tru misagwan ashib karub purrabelan ñimbe kemøra*, *tranø*, *katø Pilatobe nune elatchab inchen*, *ñimbe elachibashmub indig købig køn cha*. ¹⁴ *Tru Newan Tabig katø Kerriguwan Sølhandiigwane ñimbe kaasha*, *tru kweechiptiigwane*, *trube*, *kelachai miaig køn cha*. ¹⁵ Incha *tru øsig kømigwan nø tøgä pasrabigwane ñimbe kweechen*, *truigwan Tiusbe kwailai utugurri katøle øsiirangaruben*, *nambe tru treeg purayaigwane namashib ashibelø ker chibig køn*. ¹⁶ *Pøs Jesúswai munchibe tru ñim trendø asi møg ñim mõi ashib pønrraigwan øyah chishig kønrrai tamaran cha*, *nui isubigwan tru munchiyu pasrikkurri*. *Tru isubigwan Jesús tøgagønrrai marig*, *truike nune newan tamaran cha*, *pøs ñim mayeelø asiinrrabguen chibig køn*.

¹⁷ Pøs, trube, mõiimbe ñim nai misaamera, ñimbe chugú mormowa, øyeeg marøb pønrrain kuin kui ashar chibig kòn, katø ñimun ashib karub purrabelø chigucha. ¹⁸ Inchendø mayeelø Tius maig karuigwan eshkabelø wamindiitøga nui Cristobe kwamnegatig purø trømbøig indinab meganrrun cha, manawei Tius eshkawa pasrig købigwan treeg nebunrrai marig kòn cha. ¹⁹ Inchawei treeg købene, ñimui maig mariilan isua møra, Tiusweimay lliray chibig kòn, ñimui tru kaig mariilan chi kaig mariimíg lataig kørrømsrtraimbe. Tru-maybe Señorbe chi isumø, tabig pishindø waram kwalømmøra ørøb, ²⁰ katø tru muniirab kui Criston, tru Jesúswan, ñimuyasig manawei nø tarømara wesrua pasrigwan trunungucha ørtrun cha. ²¹ Inchendø nøbe mõiibatøbe srømbalasø ka wamig kòn cha, Tius tru chiwandøgucha lutøgurri tamara pønrsamnegatig, tru Tius nuindø tarømariilø nø maig karuigwan eshkabeløgurri nø manasrøwei maig taig, treeg. ²² Inchawei Moisésma trendaig købig kòn: “Señor ñimui Tiusbe ñimui misag utugurrindøwei Tius maig karuigwan kan eshkabig na lataitøwei katøgan kusranrrab kòn cha. Inchawei nø maig wamindiilane chiyutøgucha møramig kòn cha trendaig købig kòn. ²³ Kaguende møikkøben Tius maig karuigwan tru eshkabigwan mormígwane, Israel misaamerainukkurri kanguen kaagøm, pinisaig kønrrun” taig kòn cha.

²⁴ Inchawei Samuel tsub uraskurrimbunø mayeeløba Tius maig karuigwan eshkabelø truilø chigucha møin kwalømmøra øyeeg punrrabigwan wamindig købig kòn cha. ²⁵ Pøs ñimbe tru merrabsø Tius maig karuigwan eshkabelai ureemera køb, katø tru namui kølli misaameran tru nuinukkurri acuerdo marigwan tøgagøb indan cha. Abrahamwan tru trenchib uras: “Ñigurri karrab larrøbichib misaamerabe pirau maya misaaba mayanguen tab indiiilø kønrrun” chib. ²⁶ Inchawei Tius nui Marøb Megabigwan kusrua, trugurri Tiusbe ñimuimaymerrig ørig pøbølø kòn, ñim møitøgucha tru kaigwan marmønrrab llirawa pønrramisren, mayanguen tab indiiilø kønrrain— chibig kòn, Pedrobe.

4

Pedroba, Juanba tru Setenteelø maig maramigwan asha marøbelai merrab

¹ Pedroba, Juanba misagwan waminchib srø pønrramne, judiosmerai sacerdotesmera køben, Tiuswei yau policíamera ashib pønrrabelan nø karub pasrabig køben, saduceosmera køben truba namikkøleelø pøbølø kòn, ² kaguende Pedroba, Juanba misaameran kusrenanøb, katø tru kwabeløbe katøyug kwailai utugurri øsiiramibe Jesucristoinug kòn chib, eshkab kusrennimba. ³ Incha tru karubeløbe Pedronba, Juanwanba kemøra, yandø maaben købene, katø kwalømgatig kailan keeri yau keerøbelø kòn. ⁴ Inchendø møiløgøben Tiuswei wamwan wamindi mørøbeløbe Criston køreben, møguelandø munchen trattø milburab nemisrig købig kòn.

⁵ Incha katø kwalømbe tru nømun ashib karub purrabelø køben, misagwan karubelø kølli misaamera køben, tru Moisés pørigwan kusrenanøbelø køben, Jerusalén tulundzunabelø kòn. ⁶ Truyube maya sacerdotesmeran nø karub sacerdote tru Anás køben, Caifás køben, Juan køben, Alejandro køben, maya sacerdotesmeran karubigwei yaelø køben mayamba, truy purrabelø kòn. ⁷ Incha Juanwanba, Pedronba nømuin tøbøtag pønrsabe payibelø kòn:

—¿Ñimbe iigwane maramburab marig muindøgarre margue? cha. ¿Iilane mui munchiyurre margue?— cha.

⁸ Inchen Espiritu Santotø netsaig Pedrobe trenchibig kòn:

—Misaameran ashib karub purrabelø, katø ñim misagwan karubelø kølli misaamera, ⁹ kan møg kwanriigwan nam tabig marigwan chi wetøgørramdig køtashchappa, i mowan mandø incha tamarig kuitashchappa, ñim namun payib srua kuig købene, ¹⁰ trube, ñim mayeeløba, katø Israel maya misaameraba nebua asig kønrrai eshkanrrab cha. Tru i møg ñim mayeelai merrab pasrabiibe tru Nazaretsø Jesucristoi munchiyu tabig tammisrig kuig kòn cha, tru ñim kurusu mesra kweechen, Tiusbe katø øsiirangaruig, truigweinug. ¹¹ Jesúsbe ñim

“ya marøbelø tru kaasig srug kòn cha.

Inchendø tru katsiisrømbe pølbasa wayig mas purø tab srukken misrin kòn” cha.

¹² Pøs nam kaigyurri wesrailø kømibe mu katøgan pegwei munchiyube chi kaagøn cha; kaguende kaigyurri wesramigwane yu piraube mungucha treeg martrai tranig kaagøn— chibig kòn.

¹³ Inchen tru payibeløbe Pedronba, Juanwanbabe chigucha chi kørig kuin kømø, løtab pønrrai ashib, katø mana chu kusreb purrømeelø, chigucha kømeeelø kuin kui ashib inchabe, truba kwaara asha, nømune Jesúswei mendig amøñibelø kuin kui nebua ashibelø kòn. ¹⁴ Inchagucha tru tamari møøbe nømuim pulu kurra pasrabwei indi ashabe, treekkurri Pedronba, Juanwanbabe chigucha chi tamgaig købig kòn. ¹⁵ Incha nømune tru Setenteelø

maig maramigwan asha marøbelø purrainukkurri webamingarua, nõmdø kangurrin kangurri payiyab waminchib kõrrømisrabe,¹⁶ trenchibelø kõn:

—¿Møguelane nambe chi martrab? cha. Kaguende Jerusalén mayeelø warab misaameraimbe Tius nõmba pasrain kui asamig marig kan truba nuig kenagøn cha, nõmgurri marig. Inchawei nambe chinchagucha chi treeg kõmøn tambegaig kõn cha.¹⁷ Inchendø tru treeg marigwan misag utu mas mas wam larrøbichimønrriambe, mõingurrimbunøbe mungucha Jesúswei munchiyube waminchimønrriai ‘chigøben ñimune maramønrriai’ chinrrab— cha, nõmbe trenchibelø kõn.

¹⁸ Incha Pedronba, Juanwanba katø wamabe, chiweingucha Jesúswei munchiyube waminchimøwei, kusrenanmøwei inchai, ¡katø! kandø mera pasrøbelø kõn.

¹⁹ Trune Pedroba, Juanbabe trencha lõtabelø kõn:

—Ñimguen tab isuy cha, Tiuswei merrab søl kõbig kuitashchab nun mõrmøtø, ñimun mõrøb pønrriamig.²⁰ Kaguende nam ashib, nam mõrøb indigwane nambe elachimø, wamindamønrriai— chibelø kõn.

²¹ Inchen tru karubeløbe:

—Ñim namun mõrmøwabe, mõimbe chi maramigwane nam asamønrriai— chatø, elachibelø kõn, tru maya misaameragurri chinchaguen ichabetønrriai kaima. Kaguende truiløbe tru treeg purayaigwan asha, Tiuswan truba tabig waminchib kõbelø kõn.²² Pøs tru puro nuig tabig marøb, tamarinab mõøbe cuarenta años menrra tøgag kõbig kõn.

Tiuswei ureemera nundø kemenda kõrmø pønrriai Tiuswan miab

²³ Pedroba, Juanba yandø ka elatsiilø kua nõmui lincha amøñibelaisrømay ambabe, tru sacerdotesmeran karubeløba, misagwan karubelø kõlli misaameraba nõmun maig taigwan kerrigu eshkaben,²⁴ tru lincha amøñibelø nõm iigwan mõrabe, søteeløba ke kandø isua pønrriamisra, Tiusba trenchib waminchibelø kõn:

—Ñi mayeelaim pala ñi ashib pasrabig srømbalawan lata, pirøwan lata, marwan lata, chigurrimbunø truyi chi purrabelan chigucha marøbig,²⁵ Espiritu Santogurri namui merrabsrø David, ñi karuigwan marøb megabigwan ñi øyeeg chib wamingingarui kõbig kõn cha:

“¿Judíos kõmeelø truba truba namig kurramba,

katø chi misaamera kõben ke ka yandø chi marmuinguenig martrab kurramba inchippe, chindimbarre indah? cha.

²⁶ Pirau reymerabe yandø kwayanrrab lutømaytø pønrriamisren,

katø tru ashib karubeløgucha wamincha kanbalatø misra,

Señor Tiuswanba, nui Cristonba

kaig martrab namig kurran” cha.

²⁷ Kaguende isa kõmøtø, Herodesba, Poncio Pilatoba, judíos kõmø misaameraba, katø maya israelitasmeraba ñui newan tabig marøb megabig, Jesúswan, tru ñi aciteitøga itølusig lawa wesraigwan tsalø køb, chigøben martrab isub i ciudayu tulundzunig kuig kõn cha,²⁸ ñi Tius manasrøwei øyeelø purainrrai maig martrab isua tøgagúilan treeg nebunrrai, martrab.²⁹ Señor mõimbe tru nõm namun chigøben øyeelø martrumøn cha trencha pønsrailan ashib, katø nam ñuiwan marøb melabelan maikkucha kullaaramø ñui wamwan kõrmø waminchib pønrriamig kõnrriai tranrra chib.³⁰ Ñui tasigwan larrøbichi cha, tru ñui newan tabig marøb megabig, Jesúswei munchiyu kwanrreelan tamarøb, ñi namba pasrain kui ashchai mara kõrrømarøb, katø kwaara asha kõrrømistrai marøb inchi— cha, trenchibelø kõn.

³¹ Incha Tiusba chab waminchene, tru nõm tulaamba purrainuube mur kõnøben, mayeeløba Espiritu Santotø netsailø kõrrømisra, Tiuswei wamwan maikkucha kullaaramø nõmbe waminchibelø kõn.

Kanguelarrøtø tøgagøb

³² Incha tru nu misag søtømera mayeeløba tru Jesúswan kõrebeløbe mõitøgucha lata kan manrrøtø lataig lincha pønrriai, kandø isubelø kõn. Møitøgucha nõmui chi tøgagúigwane ‘nain kõn’ chimøtø, chi kõbigwane kanguelarrøtø tøgagøbelø kõn.³³ Inchen Cristo tru nõashib karua øriiløbe Señor Jesús øsiirawa kurrigweimbura maig kuigwan waminchippe ¡katø! muguen chindamgaig waminchibelø kõn. Incha nõmbe warappe, kan mõitøgucha tab kõbigwan tøgagømburab tøgagønrriai traniiilø purø tab warabelø kõn.³⁴ Inchawei nõmui utube chigøben palai inchibiibe muguen kaabig kõn. Kaguende mõiløgøben pirømera, yamera tøgørbe yana, maig yanigwan anwane srua amrrua,³⁵ Cristo tru nõashib karua øriilø nõm ashchai tranøbelø kõn. Inchen nõmbe trunune nõmun maig palain kõben kanun kanun treeg pirishibelø kõn.³⁶ Inchen kan levita José taig pi tøbøtag pirø pasrabig Chipre pirausrig, Cristo tru nõashib karua øriiløbe truigwane Bernabé cha wamig (trenchippe, “Isui meløben, isui inchimønrriai tabig waminchib nusrkain kõn”) taig).³⁷ Tru mõøma kan pirø tøgagua

trunun yanabe, anwane srua arrua Cristo tru nõashib karua øriilø nõm asha martrai tranøbig køn.

5

Ananíasba, Safiraba isønrrab indigwan waminchib

¹ Inchen kan møg Ananías taiba, srai Safiraba kan pirø tøgagüigwan yanøbelø køn. ² Inchabe i møøbe nui sraimba misra, tru anwane tøbøtø tranrrab cha, wamincha, tøbøwane kørrømara, Cristo tru nõashib karua øriilaimay tøbøwandø nõm ashchai tranrrab srua ibig køn. ³ Inchen Pedrobe trenchibig køn:

—Ananías, ¿Satanás ñui manrrau nõ kebya pasramisra, ñigan øyeekkatig martramab pasrøtirru? cha, ñi Espiritu Santon isab pasramig kønrai, tru pirø yani anwan kerriguwan tranmøtø kørrømara tranrrappe. ⁴ ¿Pirøbe ñuiwein kømuitarru? cha. ¿Katø yanen, tru angucha ñi asamig kømuitarru? cha ¿Ñui manrrau chindimba øyeeg martrab isua pasramisrku? cha. Ñibe møguelan isab pasrømøtø, Tiuswan isan— chibig køn.

⁵ Inchen Ananíasbe iig trendaigwan mørabe, kwain peñiptinchibig køn. Inchen mayeeløba trunun wammøøbeløbe truba truba kørig kui inchibelø køn. ⁶ Inchen matsøreløbe amrrua, asrwan tamara pula, sørønrrab srua ambubelø køn.

⁷ Indiibe pøn ura wendau køsrønyu Ananíaswei srai tru treeg purayaigwan chi wammørmø, kebarrubena, ⁸ Pedrobe payibig køn:

—Eshkarra cha, tru ¿Ñim pirøwan øyawei yaner cha trendaigwan trewei yangueh?— cha. Inchen nõbe trenchibig køn:

—Øø, treweiwei yanøwei indig køn— cha.

⁹ Inchene Pedrobe trenchiptinchibig køn:

—¿Ñim pailømisra chindimbarre treeg martrab isua pønramisrke? cha, Señorwei Espiritun ke maig inchibig køtashchab ashchab inchib. ¡Ñiguen mør! cha, ñui kewan sørønrrab srua ambubeløbe chabguen yaskabyuguen amrrutan cha, møimbe ñungucha sørønrrab srua amrrun— cha.

¹⁰ Inchen tru urastø Pedroi srøb pulu Zafiragucha kwain peñiptinchibig køn. Inchen tru matsørelø kerruabe kwaikken wetørrawa, srua amba, keweim pulu sørabelø køn. ¹¹ Inchen tru iglesian kerriguelanba, katø mayeelø tru treeg purayaigwan wammøøbelanbabe purø trømbøig kørig kui indamig arrubig køn.

Cristo nõashib karua øriilø chine asha kønrai marøbelø

¹² Cristo nõashib karua øriiløbe misaamerai utu chine Tius nõmba pasrain kui ashchai mariilan maramba, kwaara asha kønrai maramba inchibelø køn. Inchen Tiuswei uremerabe Salomønwei Yaskabyu mayeeløba maig isuppe, treeg kandø isua tulundzunabelø køn. ¹³ Inchendø katøganeløbe nõmbabe lynchab inchimeelø køn, tru maya misaamerabe nõmmune truba truba tab inchib tøgagüingucha. ¹⁴ Inchen misaamera Señorwan kørebeløbe møguelø lata, ishumbur lata katøguchinguen katøguchinguen nemisirø ambubelø køn. ¹⁵ Incha kwanrreelanguen tru puraambub liraig calleswan camamerayu, tsigalmerayu srua amrrua pønrsøbelø køn, Pedro puraijen, nui pørr møsiitøguen møigwan køben kwanrreelaim pala kasrønrai. ¹⁶ Inchen Jerusalén ciuda puluwansreelø misag truba nõrrø amrrubelø køn, kwanrreelø køben, trømbøig maringarub kwaimandziimera tøgarg kan mandøguen kømui inchibelø, treelø køben sruar. Inchen mayeeløba tamarilø købelø køn.

Pedroba, Juanba kaig indiilø

¹⁷ Inchen maya sacerdotemeran nõ karub sacerdoteba, saduceosmeraingateelø truyu nõba purrabeløba purø puskrwai ashiptø namig kurra, ¹⁸ Cristo nõ ashib karua øriilane merrarrawa tru kailan keeri yau keerøbelø køn. ¹⁹ Inchen kan Señorwei ángel tru keeri yau yaskabmeran yem kura, wambiisrø wesrawabe, trenchibig køn:

²⁰ —Amba, Tiuswei yau pønramisra, i srøig øsig kømigweimburab wamwan misaameran trunun kerrigu eshkar waminday— cha. ²¹ Inchen nõmbe iigwan mørabe, yandø tørrabene, Tiuswei yau kebamba, kusrenanøb mendabelø køn.

Tru inchib kømmetø tru maya sacerdotemeran nõ karub sacerdoteba, truyu nõba purrabelø katøganeløba amba, tru Setenteelø maig maramigwan asha marøbelan tulundzuningarubelø køn, katø tru maig maramigwan ashibelø israelitasmerai kølli misaameran mayamba. Inchabe tru kailan keeri yau purrabelan nõmuimay merrana, amrrunrabelø ørøbelø køn. ²² Inchen policíamerabe amba, tru kailan keeri yausrømbe muganug pua, katøle amrruppe, treeg wam srua amrrubelø køn:

²³ —Truyube mugucha chindamgaig kasraig pasrøben, wegørrømønrai, ashibeløgucha yaskabmerayu pønrrøbendø, yaskabmeran nam kurene, umbusrømbe mugucha kaagøptindig køn— cha.

²⁴Inchen iigwan mōrabe, tru Tiuswei yau policíameran ashib pera pasrabiiba, sacerdotés-meran karubelōba, jkan paare! øyeebe mandø kermab isubelø køn, kan øyeebe chugatig punrrai indamab isubgue. ²⁵Trunetø mōikkōsrøn trenchib puptinchibig køn:

—Ñim tru merrarrawa keerig mōgueløbe Tiuswei yau misagwan kusrenanøb purran—cha.

²⁶Inchene Tiuswei yau policíameran ashib pera pasrabiibe, nui policíameraba ya, Pedronba, Juanwanba katø merrana ambendø, maig kōbash tsag inchimøtø merranøbelø køn, kaguen misaamera nōmun srug muta petamigwan kōriimata. ²⁷Incha merrana amrruabe, tru Setenteelø maig maramigwan asha marøbelai merrab pōnsrøben, maya sacerdotésmeran nø karub sacerdotēbe, trenchib payibig køn:

²⁸—Yamba nambe ñimune Jesúswei munchiyube kusrenanmōnrrai, ¿kandø mera pasrøb mōrgōppēh? cha. ¿Ñimbe chi margue? cha. Ñimbe Jerusalén ørøba ñimui kusrenanigwan larrøbitsingarua, tru mōwan kweecha ani lusigwane namungøba, namungøba kemesrøtan—cha.

²⁹Inchen Pedroba, katøgan Cristo nōashib karua øriiløba løtappe trenchibelø køn:

—Namuimbe Tiuswanmerrig mōramig køn cha, mōguelø taigwan kōmøtø. ³⁰Ñim kususyu mesra kweetsig tru Jesúswandøwei namui merrabsrø kōlli misaamerai Tiusbe katø øsiirangaruig køn cha. ³¹Incha Tiusbe nune purø nuig kōnrrai marøb nui kusrmay wangerua, Kerrigu Nø Merrab Pasrabig, Kaigyugurri Wesrabig kōnrrai marig køn cha, Israel misaameran nōmui kaig mariilan isua mōra, Tiusweimay liranrrai marøb, katø nōmui kaig mariilan ulø payamig kōmōnrrai marøb inchaimba, treeg marig køn chibelø køn. ³²Nambe øyeeg purayaigwane namashib asha pōnrrer cha. Inchen nun tru mōrøbelan Tius tranig Espiritu Santo chigucha asha pasrainrrun—cha.

³³Inchen iigwan mōrøbeløbe, truba trømbøig nama, kwetchab inchibelø køn. ³⁴Inchen kan mōg tru Setenteelai utuig kan fariseo Gamaliel taig, tru maig maramigwan martrai Moisés pōrigwan kusrennøbig, maya misag nune mu chi taimig, kurra pasramisra, tru Cristo nōashib karua øriilan kan petøzhiitø wambig wesrangaruabe, ³⁵nōmune trenchibig køn:

—Nemui Israel mōguelø, purø ashiptø maray cha, i mōguelan ñim chi martrappe.

³⁶Ñimguen isuy cha, mana kōsrøn kan Teudas taig ‘kan truba nu kusreb mōg kur’ chibig kurrøben, truigwanma mōguelø cuatrocientos mendig amōnaig køn cha. Inchendø nune kweechen, mayeeløba mendig amōñibeløbe chab tarømisren, chab pinig køn cha. ³⁷Katø wendøsrø misag mayan kōtashchab munchi tulishib kwalømmerrawan galileasriig Judas kurra, misag nui mendig amōñinrrabelø truba nu pera kurrig kōbig køn cha. Indig truig chigucha kwaben, mayeeløba mendig amōñibeløbe nōørøtø chab tarømisrig kōbig køn cha. ³⁸Inchawei mōi øyeeg pūim pasrøbene, nabe ñimun trendamōnrrun cha: Tru mōguelane kagøbashippa, ñimguen ka ambasay cha. Kaguende tru nōm chi martrab isua tøgagūig nōm chi marøb amōnaibe, ka mōguelaindø kuisruandøbe, patsōnrrun cha. ³⁹Inchen Tiuswein kuisruandøbe, ñimbe pinishinrrab kaimanrrun cha. Inchippa ñimbe Tiusba kwayanrrab inchib pōnrrabgun—chibig køn.

⁴⁰Gamaliel wamindiibe treegwein kuitamab isua, Cristo nōashib karua øriilan wama, ichabetabe, Jesúswei munchiyube mas waminchimōnrrai mera, yandø elachibelø køn.

⁴¹Inchen nōmbe tru Setenteelø maig maramigwan asha marøbelai merrabgurri, truba kasrag webamba ambubelø køn, Jesúswei munchigurri øyeeg kaig indinab pōnrrambuawei pōnrrōnrrai Tius i nōmun treeg pōnsraig kuitamab isua. ⁴²Incha nōmbe kwalømmørig, kwalømmørig Tiuswei yau kusrenanøb, katø yamørig kusrenanøbelø køn, tru tabig srø wambe, Jesúsbe tru Cristo køn chib, maikken elachimøgue.

6

Tiuswei ureemeran chi palabigwan ashchabelø sieteelø wesrawa pōnsrailø

¹Inchen tru kwalømmerrawan Jesucristoi kusrenanigwan marøb melabeløbe nōrrø nemisrøb iben, judíosmera griegosmerai wamwan waminchibeløbe mōrōnnatø waminchib namig kurrabelø køn tru judíosmerai wamwan waminchibelane. Tru kelø peta kwailø nōmui utueløbe, kwalømmørig mamig pirishibyu chi lata asiimeelø køn chib. ²Inchen Cristo nōashib karua øriilø tru doceeløbe, tru nu misag Jesucristoi kusrenanigwan marøb melabelan tulundzuningarua trenchibelø køn:

—Nam Tiuswei wamwan eshka kusrenanamigwan elacha, mishatsigu tru mamig pirisamigu ashib pōnrramibe söl kōmōn cha. ³Inchawei, namui nunelø, ñimui utu siete mōguelø lawa wesruiy cha. Muguca øyeelø køn tainab pōnrrømeelø, Espiritu Santotø netsailan, maig kōnrrabigwan asha maram kusrebelan. Incha truilan i maramigwan trana pōnsrōnrrab cha. ⁴Inchen nambe namuimburappe Tiusba wamindamigwan elachimø

marøb, katø Tiuswei wamwan eshkaab kusrenanøb amøñibig amøñinrrab— cha trenchibelø køn.

⁵ Øyeeg chibene, tru misag sətø nu pasrabigwane truba tabig mørøraben, Esteban tru nui isubigwan Tiusweinuutø newan tøga pasrabig Espiritu Santotø netsaig mowan lawa wesrabelø køn. Trugurri Filipen køben, Procoron køben, Nicanorwan køben, Timónwan køben, Parmenaswan køben, kan møg antioquíasiig tru Tiusweiwan judíosmera marøb pønraigu puraarruaig Nicoláswan købengue. ⁶ Incha yandø tru Cristo nøashib karua øriilø docelaimay pera amrruben, nømbe Tiusba wamincha, nømui tasiimeran truilaim pala nømun tabig kønrrai estsarøbelø køn.

⁷ Inchen Tiuswei wambe mas larrøbichib iben, Jesucristoi kusrenanigwan marøb melabeløbe Jerusalénsrø nørro nemisrøb arruben, sacerdotemeraguen truba yam nømui isubigwan Tiusweinug pasra tøgagønrab pønramisrøbelø køn.

Estebanwan kailan keeri yau pasrtrab srua ambub

⁸ Inchen Esteban Tiuswei tru ka yandø tab indigwanba, katø maramburab maramigwanba newan tøgag, truike kwaara asha kønrrai maramba, Tius nøba pasrain kui ashchai purø nørreelø mariilø maramba inçhibig køn, tru misaamerai utu. ⁹ Inchen møiløgøsrøn mu karuimíg “Elatsiilø” cha wamiilai tulundzuni yaugurrielø namig kurrabelø køn, sirenesreelø køben, alejandriásreelø køben, ciliciasreelø køben, Asia pirausreelø køben misra, Estebanwan ‘¿Maig kø?’ chib, payiyab. ¹⁰ Inçhendø Esteban kusremburab kusrebig kuigwanba, Espiritu nun wamindingaruitøga wamindigwanbabe, muguen kanab waminchab kaimabelø køn. ¹¹ Inçhabe kan mu møguelan køsrøn an keta tranøbelø køn nømuingatø misra, øyeeg chinrrai: “Name Moiséswan purø trømbøig wami mørøb, Tiuswan purø trømbøig wami mørøb inder” chinrrai, tru Estebanbe. ¹² Inçhabe truiløbe misaameran køben, katø misagwan karubelø kølli misaameran køben, tru Moisés pørigwan kusrebelan køben, ke nøm isuigwan marøb kønrrai inchen, truiløbe namig amrrua, kemøra, tru Setenteelø maig maramigwan asha marøbelaimay srua ambubelø køn. ¹³ Katø trugurrimbe nømui kaptøga maig kui ashmubendø, isa waminchabelø øyeeg chibelø pera amrrubelø køn:

—I møøbe chu uragucha i Tiusweyasiitø tarømarig tab yawanba, katø tru maig maramigwan Moisés pøriilamba, trømbøig tsalø wami mører chib. ¹⁴ Kaguende nambe trendai mører chib: “Tru Nazaretsø Jesúsbe i Tiuswei yawane pinishib, Moisés namun maig martrai karua kørrømarilane chishtø yunømarøb inçhun” tan mørøb inder— chibelø køn.

¹⁵ Inchen mayeelø tru Setenteelø maig maramigwan asha marøb purrabelø Estebanwan ashene, mømibe nui maløbe kan ångelwei malø lataig kui ashibelø køn.

7

Esteban nø 'treeg mara pasrømur' chib waminchib

¹ Inchen tru maya sacerdotemeran nø karub sacerdotebe Estebanwan trencha payibig køn:

—¿Isa kømø, nøm trenchib kuibe treeg kuitarru?— cha.

² Inchen nøbe trencha løtabig køn:

—Nai misaamera, nai kølli misaamera, nan mørtray cha: Tius tørguegwalmabiibe nai nui kølli misag Abrahamwan Harán pirausrø tsunrrab imøwatø, Mesopotamia pirau kenamisrig køn cha. ³ Inçhabe trendaig købig køn cha: “Ñui pirøwan elachib, ñui yauelan elachib, na eshkaab pirøsrømay inrrø” cha. ⁴ Inchen Abrahambe Caldea misaameraim piraugurri webya, Haramsrø tsunrrab iben, yandø møskai kwabene, Tiusbe Abrahamwan møi ñim waraim pirausrø tsunrrai ørig købig køn cha. ⁵ Inçhendø nune i pirøwan nui srøb trarramikken, nuyasiibe keta tranmuig køn cha. Inçhendø nune ‘i pirøwane tranrrumøn’ cha kørrømisrig købig køn cha, katø nuinukkurri karrab misaameraimba. Tru urasbe Abrahambe nusrrkainguen chigaig købenbatøsrøwein købig køn. ⁶ Incha Tiusbe trendaig købig køn cha: “Ñuinukkurri karrab misaamerabe peg pirausrø ka ambatø warøben, nømunne ka karua srua kuindiig melabelø kømig kønrrun cha, larrø kaig indinab cuatrocientos años ørøba.”

⁷ Inçhendø Tiusbe: “Tru nømun karua srua kuindiig melønrrai marøb misaameran nømunne maig kønrrabigwan asha maramønrrun cha. Inchen trugurrimbe yandø tru pirausrøngurri webamba, nømbe i pirautøwei nane køriibala tabig waminchib kønrrun” cha. ⁸ Incha Tiusbe Abrahamwan tru circuncisión maram acuerdon tranig køn cha. Treekkurri nui nusrrkai Isaac kal-labene, Abrahambe Isaacwan trune kwalømyube asru circuncidabig køn cha. Inchen Isaackucha nui nusrrkai Jacobwan treetøwei maren, Jacobgucha nui nusrrkalan treetøwei marig købig køn cha, tru doce nusrrkalø Israelweinukkurri karrab misaamerai møskalan.

⁹ 'Tru Jacobwei nusrkalo namui merrabsreeløbe nomui nuneg Joséwan pusrkwai ashib tsalø koptø, Egipto pirausrømay srua amrrai yanøbelø køn. Inhendø Tiusbe Joséba pasrøwa, ¹⁰ nune chine puben isuig megainukkurri treetø megamønrrai wesrawa, Egiptosrø rey Faraónwei merrab nøbe tab indamdiig kui asig kønrraimba, katø larrø kusrebíg kønrraimba Tiusbe tranen, Faraónbe Joséwane Egipto pirau maya misagwan ashib karub wanrrai neera wannig køn cha, katø nui purø nuig purø tab yawan chigucha kerriguan nø aschhai.

¹¹ 'Inchen tru, urassrø parø arrubig køn, purø trømbøig isuig melamig Egipto pirau ørøba, katø Canaan pirausrøn chigucha. Inchen namui kølli misaamerabe chigucha mamig kalawa købelø køn. ¹² Inchen Jacobpe Egiptosrømbe tirigu pønrran tai wammørabe, nui nusrkalo, tru namui kølli misaameran ke srøsrøzhiitø ørøbig køn. ¹³ Incha katø wendø ambene, Josébe nui nunelane nøbe tru nomui nuneg kuin kui asingaruben, øyamay tru Egipto rey Faraónbe Joséwei misagwane mumera kui nebua asig købig køn cha. ¹⁴ Incha Josébe nui mōskai Jacobwanba, nui yauelan mayamba Egiptomay amrrunrrai pertrab ørig købig køn cha, kerrigu yauelø setenta i cincoelan. ¹⁵ Pøs øyamay Jacobpe Egiptomay yaig købig køn cha, tru nō lata namui merrabsrø kølli misaamera lata chab kwaisrømay. ¹⁶ Inchen nomui asrmerane Siquemsrømay srua ambig købig køn cha, tru merrabsrø Abraham Hamorwei nusrkalan sōramig anwei penig pasrabigu, Siquem pirausrø sōrønrrab.

¹⁷ 'Inchen yandø, Tius Abrahamwan nō treeg tranrrab cha korrømisriibe pumig yandø laturab køben, Israel misaamerabe Egipto pirau nørø larrøbichib nurab yaig købig køn cha. ¹⁸ Inchen Egiptosrømbe kan rey Joséwan ashmíg ashib karunrrab pølbasra, ¹⁹ tru reybe sōratø purø mōg isua, namui misaameratøga mōg inchib pasrøwa, namui kølli misaamerane maig købash indig købig køn cha, tru nomui srø kal-laig mōg-ureezheelan kweetsingarub. ²⁰ Inchen tru kwalømmerawan Moisés kal-labig køn cha, tru unøbe Tiuswein kabyu larrø tab unøzhig. Inchen mōskaløbe nomui yau pøn pølgatig nurana, ²¹ yandø kwanrrai elatsamig nebuben, Egipto reywei nimbasr tru unan wetørrawa, nui nusrkawan lataitøwei nuranig købig køn cha. ²² Inchen Moisésbe tru Egipto misaamera maig kusrebølø køben, treeg kusrenanig kusreweig købig køn cha, trurrigu waminðiløyu lata nui chi mariiløyu lata purø nuikke.

²³ 'Incha yandø cuarenta años tōgaig misra, Moisésbe nui manrraube nui misag israelitasmeran ashchab inrrab isuig købig køn cha. ²⁴ Inchen truyu kan egipcio israelitan truba kaig inchen ashabe, purømisra, Moisésbe truburø ulø payib tru egipcione kweetsig købig køn cha. ²⁵ Øyeeg kaig indinab melainukkurri Moisés nōmun pera webinrrai Tius pasrigwan nui misaamera truigwan nebua ashchaitamab isua inchene, nømbe treeg kōnrrabig kuitamappe isubguen inchimeelø køn cha. ²⁶ Inchen katø kwalømbe pailø israelitasmera kwayab kuin køben, Moisésbe tammay kōrromartrab isua, trenchibig køn: "¡Au ñimbel! ¿Mu peguelø kōmøtø, ñimmissaatøwein køn cha, kangurrin kangurri chindimbarre øyeeg kaig inchib kōgue?" cha. ²⁷ Inchene tru kanun kaig marøbiibe Moiséswane trawagucha trenchibig køn: "¿Ñi namun ke ñi asha karubig kønrraimba, katø maig kønrrabigwan ñi asha marøbig kønrraimbabe ñune treebe mu pasra? cha. ²⁸ ¿Kabe nangucha marig kwaløm egipcion latawei ñune kweechig kōtah?" cha. ²⁹ Inchen Moisésbe trunun mōrabe, Madian pirausrømay trubab ya, trusrømbe kan peg pirausrø lataig tsubig køn. Incha trusrø pagatø nusrkalo tōgagüig købig køn.

³⁰ 'Indig truig yandø cuarenta años puraiben, Sinaí Tun pulu mu misag warab waraimønug Moiséswan kan ángel kaldusr naarabigu kenamisrig køn cha. ³¹ Inchen Moisésbe tru treeg kenamisrigwan ashabe, truba kwaara, ashchab katøguchi kemallene, Señorwei wam trenchib mōrø waminchibig køn cha: ³² "Nabe ñimui merrabsrø mōskalai Tius kur cha, Abrahamwei, Isaacwei, Jacobwei Tius". Inchene Moisésbe kørig køb itōnab menda, kurrashmíg køn cha. ³³ Inchene Señorbe trenaig købig køn cha: "Ñui srøbyu alpargatiswan wesru cha. Kaguende ñi pasraig pirøbe Tiusweindø tarømarø køn byu. ³⁴ Nabe nai misag Egiptosrø yeeg isuig kullaarailø melaigwan tab ashib, katø purø murig nebuptø ke mulliptø tranrrab melailan mōrøb incha, wesranrrab kōrraarur cha. Mōimbe jamø! taig købig køn, ñune Egiptomay ørtrumøn" cha.

³⁵ "¿Ñi asha karubig kønrraimba, katø maig kønrrabigwan ñi asha marøbig kønrraimbabe ñune treebe mu pasra?" chib, nøm trenchib kaashib kuig Moiséswandøwei, Tiusbe nōmun nō asha karubig kønrraimba, katø treeg kaigyugurri pera webattraimba ørig køn cha, tru kaldusr naarabigu ángel kenamisrøbikkurri. ³⁶ Inchen nøbe Tius nōmba pasrain kui ashchai maramburab mariilan marø Egiptosrøngurri wesruig købig køn cha, mar Rojuyu lata, mu misag warab waraimønug lata cuarenta años ørøba treeg marøb. ³⁷ Mu peg kōmøtø, iibe tru Moisésstøwein køn cha israelitasmeran øyah chibig: "Tius maig karuigwan kan eshkabig nan kusrub lataitøwei, Tiusbe ñimui misag utugurrindøwei kusrunrrun" cha trenchibig. ³⁸ Moisésbe nōtøwein kuig køn cha, mu misag warab waraimønug, tru israelitasmera kanbalatø amrrub købeløba pasrab, katø Sinaí Tunyu ángelba waminchib, katø nomui merrabsrø

kølli misaameraba pasrab inchibiibe. Incha nõbe tru øsig køm wammeran utig købig køn cha, tru namun tranrrab.

³⁹ Inchen namui kølli misaamerabe mørøg kømui inchib, kaasha, nõmui manrrøwane ke Egiptosrøndø pasra købelø købig køn cha. ⁴⁰ Incha Aarónwane trenchibelø køn cha: “Namui merrab amrrabelø namuyasig tiusmera mar cha. Kaguende Egipto piraugurri namun wesrabig Moiséswane chindinguen mørmer” cha. ⁴¹ Inchabe tru kwalømmeran kan toro-unø mara pasra, truigweyasig animalmera kweecha, tranig købig køn cha. Inchabe tru nõmui tasiitøga mari tiuswane truba kasraarab tøgagøbelø køn cha. ⁴² Treeg inchen, Tiusbe nõmuinukkurri tarømisrøppa, chigøben srømbalærø chigurrimbunø pønrrabelan tius kui lataig køriibala tabig waminchib warønrraindø elachiptindig køn cha, Tiusbe. Inchawei Tius maig karuigwan eshkabelai pøriiløyu maig taibe treeg køn cha:

“Israel misaamera ¿ñim mu misag warab waraimønug
cuarenta años ørøba ambub kua,

animal kweetsilan tranøb,

katø chigøben nayasig kabe nan tranig kø chindah? taig.

⁴³ Nan trani urasbe tru tius Moloc pasraig carpa yawan muta ambub,

tius Refánwei estrellan muta ambub inchibelø kømøgue taig,

køriibala tabig waminchib kønrrab,

ñimashib ñimui taska mariilan.

Treekkurri Babiloniætøguen kømø,

purø yabsrø warønrrai webetamønrrun” cha.

Tius trendaig købig køn cha.

⁴⁴ Merrabsrø namui kølli misaamerabe mu misag warab waraimøsrø amøñib uras, Tius nõ pasrai carpa ya tabzhigwan tøgær købig køn cha, Tius tru Moiséswan maig karuig køben treekke, Moisés maig asigwan tru treezhigwei maringaruigwan. ⁴⁵ Inchen merrabsrø namui kølli misaamerabe tru yawan nõmun ketig uta, Josué tru nõ karubig køben, tru judíos kømø misaamera waraisrø muta kebambig køn cha, Tius tru namui kølli misaamerai merrabgurri tru judíos kømø misaameran nõmuim piraugurri webetiisrø. Inchen tru carpa yabe David tsub kwalømmerrawangatig trusrø pasraig købig køn. ⁴⁶ Tiuswein kabyu Davidbe tabig kui asig kua, nõbe Jacobwei Tius truyu pasrønrrai kan ya tranøbsrumugu cha, miaig købig køn cha. ⁴⁷ Inchendø Tiuswei yawan marøppe, Salomón marig købig køn cha. ⁴⁸ Inchen køben Tius Mayeelaim Pala Pasrabiibe, mu møguelø taska mari yamerayu pasrømig køn cha. Tius maig karuigwan eshkabig øyah taimbala:

⁴⁹ “Srømbalabe na wamisra waig købene,

pirøbe na itøbuna waig køn cha.

¿Nayasiibe maig ya martrab inchigue? cha.

¿Na israb wamibe chu køh? cha, Señorbe.

⁵⁰ ¿Kerrigu iilane nai tasiitøga marig kømuitarru?” cha trendaig.

⁵¹ Incha waminchibig wamincha Estebanbe trenchibig køn: Ñim kui ke purab, purab pønrramisrøb misaamera køn cha, manrraube nõsken kebati mørmeelø, møramig kalugailø latailø. Incha chu uragucha Espiritu Santone mørøg kømub purø mur pønrrabelø køn cha. Ñimui kølli misaamera mailø købig køben, ñim treeløtøwein køn cha. ⁵² ¿Ñimui kølli misaamerama Tius maig karuigwan eshkabelan kabe kanundøguen chi kaig marmeelø tabelø købig kuitaru? cha. Tru Kerriguwan Sølgangdiig attrabigweimburab manawei eshkab amrrubelane nõmbe kweetsig købig køn cha. Inchen mõi truig arrubene, ñimbe kailø køptø tsaleelaingatø pønrramisra, kweetsan cha. ⁵³ Tru maig maramigwan martrai Moisés pøriilan ñimbe ángeløsmerragurri uta tøgær købendø, truigwane chiweinguen møra marmeelø køn— cha, trenchibig køn Estebanbe.

Esteban kwaigwan waminchib

⁵⁴ Inchen øyeeg tailan mørøppe, nõmui manrraube ke kan chinchimmøro inchib purø trømbøig namig kuulø, ke trugulwandø tsacha mørøbelø køn, Estebanwan namig købiitø. ⁵⁵ Trune Estebanbe Espiritu Santotø netsaig srømbalaneb neeshabe, Tiuswei tørguegwalmabigwan ashib, katø Jesúswane Tiuswei kusrmaygatø pasramisra pasrai ashib inchibig køn. ⁵⁶ Inchabe trenchibig køn:

—¡Asay! cha. ¡Srømbalamerabe kurin pønrrøben, Møg Misra Arrubiibe Tiuswei kusrmay pasrai ashar!— cha.

⁵⁷ Inchen nõmbe nõmui kalumeran kasrøb truba mur trashib, ¡katø! mayamba Estebanweim palatø itø ambubelø køn. ⁵⁸ Incha ciudadugurri wegucha, sruutøga petabelø køn. Inchen tru øyeeg punrrai waminchib kurrabeløbe nõmui kewagüilan wesrua, kan matsinø Saulo taigweim pulu warøbelø køn.

⁵⁹ Inchen tru nøm sruutøga petab kømne, Estebanbe Tiuswan trenchib wamab miabig køn:

—Señor Jesús, nai espíritun utørra— chib. ⁶⁰ Incha yandø tømboñsra mur trashib wamab trenchibig køn:

—¡Señor, nøm øyeeg kaig marigwan chi treeg marmuig kui lataig kørrømar!— cha.

Yandø chab trenchabe, kwaptinchibig køn.

8

Saulo Jesucriston kørebelan kaig martrab pasraarøb

¹ Inchen Saulobe Estebanwan kweechen, kan øyeeg maramigweim palaig kuig kømømab isub pasrabig køn.

Inchen tru kwalømdøwei Jerusalénsrømbe iglesiayuelan purø trømbøig martrab yandø kønab kurrab mendøben mayeeløba Judea pirausrømay køben, Samaria pirausrømay køben, ke kan ørøtø chab ambubelø køn, Cristo nøashib karua øriiløtøh ammø Jerusalén ka kørømisrøbelø køn. ² Inchen mø møguelø kørørn Tiusweimbubeløbelan maizhikken elachimø marøbelø Estebanwan isub truba kishib sørabelø køn. ³ Inchen Saulobe iglesiayuelan purø trømbøig inchi, pinishinrrab inchi, yamørig kebya, ishumburwan lata, møguelan lata kemøra, unchi warambatø srua webya, kailan keeri yausrø pønrsøbig køn.

Tiuswei wam Samariasrø larrøbitsig

⁴ Inchen tru Jerusaléngurri webamba ke kan ørøtø chab ambubeløbe chu ambatøgucha Tiuswei tabig srø wamwan eshkab kusrenanøbelø køn. ⁵ Inchen tru utuig Felipe Samaria ciudasrømay ya, trusrø Cristoimburabigwan eshkab kusrennøbig køn. ⁶ Inchen misaamerabe tulundzuna, Felipe maig wamindigwan mørøb, Tius nøba pasrain kui ashchai Felipe tru mariilan ashib, mørøb inchabe, mayeeløba ke kandø isub, Felipe wamindigwane truba truba tab mørøbelø køn. ⁷ Kaguende truba yam misaamerainukkurri trømbøig maringarub kwaimandziimera purø trømbøig trashib webamben, katø truba yam kønønrrab kaima warabelø køben, cojosmera køben, tamarilø købig køn. ⁸ Trugurri misaabe tru ciudayube truba truba kasraarabelø køn.

⁹ Inchen manasrøngurri kan møg Simón taig tru ciudayube tsubig køn, kaig libron kusrewa, kwaimandzigweimburabigwan marøbig. Samaria misaameran chine mariiløtøga chull asøskøb, nøbe purø nuig misrøb tsubig køn. ¹⁰ Inchen nune mu amrrubiitøgucha, kusrebelø lata, chi treeg kømeeelø lata nø chi martashchab ke nundø ashibelø kua, trenchibelø køn:

—I møøbeguende Tiuswei tru maramburab marig truiig køn cha, tru “Purø Nuig”, kui asig.

¹¹ Incha nune ke chi martashchab ashib melabelø køn, kaguende tru nø magia kusrewa mariiløtøga manasrøngurri nømune keerøba, kwaara ashib kønrrai mara srua køben.

¹² Inchen Tius nø ashib karub wainuguig tru tabig srø wamwanba, Jesucristoi munchiwanba Felipebe eshkab kusrennen, trunun kørøwabe, ishumbur lata, møguelø lata piu umbu ulsrøbelø køn. ¹³ Inchen tru Simóndøweinguen trunun kørøb, piu umbu ulsraig køb incha, Felipeba lincha, uñibig køn. Tius nøba pasrain kui ashchai Felipe mariilanba, katø nø maramburab truba nørreelø mariilanba ashabe, Simónbe truba kwaarøb uñibig køn.

¹⁴ Inchen Cristo nøashib karua øriilø Jerusalénsrø warabelø tru samariasreelø Tiuswei wamwan uta pønrramisrin køn tai wammørabe, Juanwanba, Pedronba trusrømay ørøbelø køn. ¹⁵ Inchen nømbe trusrø puabe, tru kørøbelø Espiritu Santon utønrrai, Tiusba waminchibelø køn. ¹⁶ Kaguende møigwandøgucha nømum palabe Espiritu Santo kørøarrumø srø køben, Señor Jesúswai munchiyutø piu umbu ulsrailø købig køn. ¹⁷ Incha Pedroba, Juanba truilaim pala tasigwan estsaren, Espiritu Santon utabelø køn.

¹⁸ Inchen Cristo nøashib karua øriilø tasigwan truilaim pala estsara, Espiritu Santon kanelan trani ashabe, Simónbe ‘an pagarruah’ chibig køn:

¹⁹ —Nangucha øyeeg maramburab maramigwan tranrra cha, nangucha møigweim pala køben nai tasigwan estsarene, truipe Espiritu Santon utønrrain— chib.

²⁰ Inchene Pedrobe trenchibig køn:

—Ñui anbe ñiba tøgatø pinøbash cha. Kaguende Tius keta tranigwane ñibe andøga pena tøgagømdig kuitamab indan cha. ²¹ Ñibe namui utube chi asamig kaweí, chi marøb unamig kawein køn cha. Kaguende ñui manrrøbe Tiuswein kabyube chi sølgandø tabig kømøn cha. ²² Inchawei iig øyeeg trømbøig isuigwan isua møra, Tiusweimay llirau cha. Incha ñui manrrau øyeeg isuigwan Tius ñun ulø payiimig kønrrai treeg mara kørømartashchab Tiuswan miau chibig køn. ²³ Kaguende ñibe purø trømbøig kan køndø srurri lataig møbgøliitø netaig kui ashib, katø kaig maramigurrimbe webinraingaug pasrig kui ashib inchar— cha.

²⁴ Inchene Simónbe trencha lōtabig kōn:

—Señorwan nayasig ñim miarray cha. Ñi mōi òyeeg chib pasrailōbe mōikken nan treeg nebumōnrrain— cha.

²⁵ Incha nōmbe maig kōbigwan eshkaab, katō Tiuswei wamwan eshkaab waminchib kuabe, Jerusalénmay katō amrrubelō kōn tru Cristo nōashib karua òriilōbe. Incha Samariasrō truba yambalō misamera tsitsō warabsrō, tru tabig srō wamwan eshkaab kusrenanōbelō kōn.

Felipeba, kan Etiopíasrō mōōba

²⁶ Inchen Felipeimburappe kan Señorwei ángel Felipe trenchib waminchibig kōn:

—Kurra, Jerusaléngurri Gazamay kōrreb maywan tru pōrr pineppurab inrrō — cha. Truibe tru mu misag warab waraimō may kōn. ²⁷ Inchene Felipebe kurrab ibene, mayube kan Etiopía pirausrō kan mōg eunuco katabig kōn. Truibe, Etiopíasrō reina Candacei kan mōg karubig nui reinai anwan kerriguba nō esegabig kōbig kōn. Nōbe Jerusalénsrō Tiuswan kōriibala tabig waminchab ya, ²⁸ trusrōngurri katōle arrub pasrappe, kaullimera sruin karruyu Tius maig karuigwan eshkabig Isaiaswei pōrigwan leb arrub pasrabig kōn.

²⁹ Inchen Espiritu Santobe Felipe trenchibig kōn:

—Wetōga ò karruyu kemalla linchi — cha. ³⁰ Inchen Felipebe lulōb ya, wetōgabe, Tius maig karuigwan eshkabig Isaias pōrigwan leb arri mōrōbig kōn. Inchabe Felipebe trenchibig kōn

—¿Ñi leb arrigwan chi taig mōrtirru?— cha.

³¹ Inchene nōbe trenchibig kōn:

—¿Kan nan mu ‘òyeeg kōn’ cha eshkamubene, nabe mandō kui mōramō?— cha.

Incha nōbe Felipeb:

—Tiusmanda naim pulu wanrrab nebamō— chibig kōn. ³² Tru Tiuswei wam pōrigwan nō leb arriibe iig kōbig kōn:

“Kan ubishawan latawei kwetchab srua ambig kōn cha.

Inchen isig parōb kōmne,

kan ubisha-unō nilōtō tsub lataitōwei,
nōgucha manchibgucha inchimui kōn cha.

³³ Incha nōmui merrab israbig luchimubashtō nilōtō megaben,
tru sōlgandō tabigwan nune treeg asha martrab inchimōtō,
kagōbashiptindig kōn cha.

Nuinukkurri katō srōig misag karrab kurrōnrrun tamibe kaanrrun cha.

Kaguede nui òsig kuigwane yu piraube kerraig kōbig kōn” taigwan.

³⁴ Incha tru eunucobe Felipeb payibig kōn:

—Tiusmanda eshkarra cha, ¿Tius maig karuigwan eshkabig nōasiitōwein trenda chindah, kabe mu katōganun trenda chindah?— cha.

³⁵ Inchen Felipebe tru nō Tiuswei wam pōrigwan leb yaigwan tuyugurri pōlbasra, Jesúswei tabig srō wamwan eshkaab kusrenanōbig kōn. ³⁶ Incha maywan ambub kua kan pi wabnug puabe, tru mōōbe trenchibig kōn:

—Yube pi wan cha. ¿Na piu umbu ulsraig kōbsrutah?— cha.

³⁷ Inchen Felipebe trenchibig kōn:

—Ñi ñui manrrau newan kōrebene, treeg marig kōnrrun— cha:

—Inchen mōōbe trenchibig kōn Jesucristobe Tiuswei Nusrkain kui isua pasrar— cha.

³⁸ Incha nōm ambub kuin karrun Felipebe tru mōwan pasramisingaru chibig kōn. Incha pailōba piyamay pinaamba, Felipebe nun piu umbu ulsrbig kōn. ³⁹ Incha piugurri webambene, Señorwei Espiritube mōi mōi Felipeb kusrua, srua iben, tru mōōbe Felipeb mas ashipe ashmubendō, nui maywan kasrag inrraibig kōn. ⁴⁰ Incha Felipebe Azoto ciudasrō pasraptindinaben, trusrō Jesucristoi tabig srō wamwan ciudamōrig eshkaab kusrenanōb pureb ya, Cesarea ciudasrō pubig kōn.

9

*Saulon Tiusbe peemayig kōnrrai yunōmarig
(Hch 22.6-16; 26.12-18)*

¹ Trune Saulobe tru Jesucristoi kusrenanigwan marōb melabelane kaig maramigwanba, kweecha petamigwanbabe namig kōbiitō ke chinchimmōrō inchib uña, treekkurri maya sacerdotsmeran nō karub sacerdoten ashchab yaig kōn. ² Incha Damascōsrō tru judíosmera tulundzuni yamerasrō treeg marōb kebyamig kilgamera pōriilō tru sacerdotsmeran karubigwan miabig kōn, tru srō maywan amrrab pōnrramisra pōnrrabelane ishumbur kui lata mōguelō kui lata, Jerusalénsrō kailan keeri yau pōnrrōnrrab srua yamig kōnrrai. ³ Incha ib menda yandō Damascō pub lutausrō ibene, jkatōl mōi mōi nuingatanbe

srømbalasnøngurrimbe kan tørgwalmabig arrua, nuin pøtøgatan piløben, ⁴ Saulobe pirau peña tsua, kan wam trendaig mørøbig køn:

—¿Saulo, Saulo chindimbarre nane kaig marøb lliragu?— cha trenchibig.

⁵ Inchene Saulobe trenchibig køn:

—¿Señor, ñibe mu kugu?— cha. Inchene nøbe trenchibig køn:

—Nabe Jesús tru ñi nan kaig marøb unig, truig kur cha. ⁶ Kurrab, Damasco ciudayu kebinrrø chibig køn. Truyube ñi chi maramigwan ñune eshkanrrun— cha.

⁷ Inchen møguelø Sauloba ambubeløbe truyutø pønrrambua, ¡katø! wamguen piniilø pønrrabelø køn, mungucha ashmubendø, wamindigwan møra. ⁸ Inchen yandø Saulone piraugurri kusraben, kabwane kurendø, chigucha ashchab kaimabig køn. Inchen kwalyu kemøra, srua Damascosømay ambubelø køn. ⁹ Truyube pøn kwaløm ørøba ashchab kaimabwei, manrrab kaimabwei mutchab kaimabwei inchibig køn.

¹⁰ Damasco ciudayuibe kan Jesucristoi kusrenanigwan marøb megabig Ananías taig tsubig køn. Inchen truigwane Señorbe kan piab lataigu kenamisra, trenchibig køn:

—¡Ananías!— cha. Inchene nøbe løtappe:

—Señor, yu war— cha trenchiben,

¹¹ Señorbe nune trenchibig køn:

—Kurra, “Ølgandø” cha wamin callewan pureb inrrø cha. Incha Judaswei yau puabe: ¿Kan møg tarsosriig Saulo taig wah? cha, payrrig chibig køn, truibe Tiusba waminchib wan cha. ¹² Tru møøbe kan piab lataigu asin køn cha, kan møg Ananías taig kebarruabe, nui kabmeran katøle pilønrrai, nuim pala tasigwan estsarøbig.—

¹³ Inchene Ananías iigwan mørøppe trenchibig køn:

—Señor, i møweimburappe, mugøben wamindi wammøra kur cha, ñui misaameran Jerusalénsrø chitø, chitø kaig marøb uniilan. ¹⁴ Møima yusrønguen mayeelø, ñui munchiwan wamab tøgga pønrrabelane merrarranrrab sacerdotemeran karubelø nun treeg martrai ørig arrin køn— cha.

¹⁵ Inchene Señorbe trenchibig køn:

—Inrrø cha. Kaguende i møøbe na øyeeg marøb tøgagønrrab na lawa wesruig møg køn cha, judíos kømø misaameran køben, reymeran køben, Israelwei misaameran køben nai munchiwan asingarunrrabig. ¹⁶ Kaguende nabe nun kenamaramønrrun cha, nai munchigurri chugatig kaig nebuig megamigwan.—

¹⁷ Inchene Ananíasbe tru Saulo tsui yamay yabe, kebya, tasigwan nuim pala estsarabe, trenchibig køn:

—Cristogurri nai nuneg Saulo, Señor Jesús mayu arrub pasrøben kenamisrøbiibe ñi katøle ashibig misrøb, katø Espiritu Santotø netsaig kørømisrøb inchaimba nan ørtan— cha.

¹⁸ Inchen tru urastø Sauloi kabmerayugurrimbe kalus pitis latailø kørøben, katø ashibig misrig køn. Incha kurrøben, Saulone piu umbu ulsraig køn. ¹⁹ Incha Saulobe maben, katøle nui asrbe tammisrøbig køn. Incha Damascosø Jesucristoi kusrenanigwan marøb melabeløba mam kwaløm kørøn tsubig køn.

Saulo Damascosø Tiuswei wamwan eshka kusrenanøb

²⁰ Incha tru urastø Saulobe judíosmera tulundzuni yamerayu Jesúsweimburab eshka waminchib pølbisrøbig køn: “I Jesúsbe Tiuswei Nusrkain køn” chib. ²¹ Inchen mayeeløba mørøbeløbe truba truba kwaariilø trenchibelø køn:

—¿I møg kømørgøppeh cha, tru Jerusalénsrø purø trømbø inchib pinishinrrab inchibig, i munchiwan wamab tøgga pønrrabelane? ¿Yusrømaybe tru inchabwei arrub mørgøppeh? cha, judíos sacerdotemeran karubelaimay merrarrawa nømun srua inrrab— chib.

²² Inchen Saulobe kusrenanøb eshkaimørig katøguchinguen katøguchinguen mur pasramisrøb ya, judíosmera Damascosø warabelane, ¡kan paare! øyeebe mandø kuinguen mørøwa kørnrai marøbig køn, Jesúsbe tru Cristo muniirab kuig, tru køn chib kenamarøb.

Saulo judíosmeran chinchamamub

²³ Inchen yandø yam kwalømyu judíosmera Saulon kwetchab wamincha køben, ²⁴ Saulobe wammørin købig køn. Incha nømbe yem, kwaløm ciudayu yaskabmerayubaguen larab, kwetchab muniirabelø køn. ²⁵ Inchen nui kusrenanigwan marøb melabeløbe Saulone yem pera amrua, tru ciuda pøtøgatan sruubirøbanrrig palaig marinug kan nu tasinyu waya, kørøørelø køn.

Sauloba, Señorgurri nuneløba Jerusalénsrø

²⁶ Incha Saulobe Jerusalénsrø puabe, Jesucristoi kusrenanigwan marøb melabeløba linchab inchen, mayeeløba kørig kui inchibelø køn. Kaguende nømbe kørmeelø køn Saulobe Jesucriston kørwa unitamappe. ²⁷ Trune Bernabébe nune kashmø uta Cristo nøashib karua øriilaimay pera ya, Saulobe Señorwan maysrø mandø nebua asigwan, Señor nun mandø

wamindigwan, Jesúswei munchiyu Damascosrø chigucha kørmo eshka kusrenanigwan nòmun eshkabig kòn. ²⁸ Oyamay Saulobe nomba Jerusalénsrø kebib, katø webarrub llibab uñibig kòn. ²⁹ Inchen Señorwei munchiyu chigucha kørmo, Tiuswei wamwan eshka kusrenanøb, katø judiosmera griegosmerai wamwan waminchibeløba waminchib, øyeebe maig kø chib payib inchen, trune nømbe nune kwetchabgøba larabelø kòn. ³⁰ Inchen nunelø trunun wammørabe, Saulon Cesarearøngatig lincha amba, truyugurrimbe Tarsosrømay ørøbelø kòn.

³¹ Inchen Judea pirau kerrigu, katø Galilea pirausrø, Samaria pirausrø kerrigu iglesiabe ambumay imay tab købigwan tøgagøbelø kòn. Incha nømbe Tiusweimburabeløyu nørrørab, Señorwei merrab kørribala amøñib inchibelø kòn. Inchen Espiritu Santo purugub waminchib pasraitøgabe purø nørrø nemisrøb ibig kòn.

Pedro Eneaswei kwanrøwan tamarøb

³² Pedrobe truørø llibab uñabe, katø Tiuswei misaameran Lidasrø warabelangucha ashchab ibig kòn. ³³ Inchen trusrømbe kan møg Eneas taig kønønrab kaimabig kua, ocho años ørøba camayu kwanrø tsuben, Pedrobe pubig kòn. ³⁴ Incha Pedrobe trenchibig kòn:

—Eneas ¡Jesucristobe ñune tamaran! cha. Kurrab, ñui tsuigwan kusru— cha.

Inchen Eneasbe tru urastø kurrøben, ³⁵ mayeelø Lida pirausrømba, Sarón pirausrømba warabeløbe trunun asha, Señorweimay lllirawa, pønramisrøbelø kòn.

Dorcas øsirraigwan waminchib

³⁶ Tru urassrø Jupe ciudayu kan ishug Jesucristoi kusrenanigwan marøb megabig Tabita taig, griegomaybe Dorcas cha wamig, tsubig kòn. Tru ishube chigøben tabig maramelangøba marøb, katø chugurrin kømui melabelane purugub inchibig købig kòn. ³⁷ Indiibe tru kwalømmerawan Dorcasbe kwanrø peñippa, kwaptinchen, yandø asrwan chab pirabe, pala katøgan pisorø kan salayu trarrøbelø kòn. ³⁸ Inchen tru Lida ciudabe, Jope pulutø købene, Pedrobe Lidasrø unan tai wammørabe, tru Jesucristoi kusrenanigwan marøb melabeløbe pailø møguelan trenchinrai ørøbelø kòn:

—Ke tuismanda yu nam warainukkatig peba atra tan— chinrai.

³⁹ Inchen Pedrobe truiløba kurrab ya, trusrø pubene, tru kwabig tsuisrømay pera amben, mayeelø kelø peta kwailøbe Pedroim pulu tulundzuna, tru Dorcas øsig uña, kewa amønamelø køben, katø pala itøgueelø køben mariilan eshka truba truba kishibelø kòn.

⁴⁰ Inchen Pedrobe mayeelan wambig webamingarua, tømboñsra, Tiusba wamincha, tru kwaig tsubigwan keesha ashabe, trenchibig kòn:

—Tabita ¡Kurrø!— cha.

Inchen nøbe larraashippa, Pedron ashabe, kurra, wamisrøptinchibig kòn. ⁴¹ Inchen Pedrobe tasigu kemøra, kusrua, Tiuswei misaameranba, tru kelø peta kwailanba wama, øsiguig nòmun kenamarøbig kòn. ⁴² Inchen øyeege marigwane Jope ciuda ørøba wammøra, møiløgøben Señorwan truba nu kørebelø kòn. ⁴³ Inchen Pedrobe yam kwaløm tru Jope ciudayu kørrømisrøbig kòn, kan møg Simón taig tru kalusmeran kullaarana, tabzhig tamarøbigwei yausrø.

10

Cornelio kan piab lataig asigwan waminchibig

¹ Cesarea ciudayu kan møg Cornelio taig tsubig kòn, suldau “Søtøwan Italiano” cha wamig søtøyu, tru suldau cienelan nø karub pera pasrabig. ² Truiibe Tiuswan truba isua pasrabig Tiuswan kørribala marøb megabig købig kòn, mayeelø nui yaueløba kerrigu. Katø misaameran chugurrin kømuelan isua asha purugub tabig marøb, katø managucha Tiusba wamindamigwane pesannamø, marøb megabig købig kòn. ³ Indiibe kan maaben las tres køsrøn kan piab lataigu Tiuswei ángel tørgandø kenamisri ashibig kòn, nø wainug kebarrua trenchibig:

—¡Cornelio!— cha. ⁴ Inchen Corneliobe ángelwan ke tab ashabe, truba kwaarig trenchibig kòn:

—¿Señor, chinda?— cha.

Inchen ángelbe trenchibig kòn:

—Tiusbe ñi nøba wamindiilan mørøb, katø tru chugurrin kømuelan ñi isua asha purugub tabig mariilan pesannawa, wamøwei indan cha. ⁵ Møimbe Jope ciudadsrømay møguelø ør cha, Simón taigwan wamønrrab, katø nøbe Pedrogucha munchi kòn cha. ⁶ Truiibe katøgan Simónwei yau, ya peba tsun cha, Simónbe tru kalusmeran kullaarana tabzhig tamarøbig mar pulu ya pasraig kòn— cha.

⁷ Inchen tru ángel nun waminchibig iben latatø, Cornelio be pagatø nui karuindiig melabelanba, katø kan suldau nui trendø trag melabelai utuig Tiuswan truba isua pasrabigwanba wamabig køn. ⁸ Incha maig kuigwan nõmun kerrigu eshkawabe, Jopemay amrrai ørøbig køn.

⁹ Indiibe katø kwaløm Cornelio øriilø maywan ambub kua, yandø Jopesrø pub ambub køben, Pedro be kwaløm tøbøtag lutau køsrøn wambig yabala Tiusba waminchab nebibig køn. ¹⁰ Inchen nune truba mag isub parøgwaben, nuyasig mamig nenøb kømne, kan piab lataig tøgagøbig køn. ¹¹ Srømbalabe kurim pasrøben, kan nu llensu lataig pib tsøbmerayu litsig piraumay kørarri ashibig køn. ¹² Inchen tru llensuyube chi animalgurrimbunø tøgag købig køn, pib srøppar køben, pirau srala amøñibelø køben, pala amøñib illimera køben ke. ¹³ Inchen kan wam trendai mørøbig køn:

—¡Pedro kurrab, kweecha, ma!— cha.

¹⁴ Inchene Pedro be trenchibig køn:

—¡Señor, paare, kan treekkucha mana maramø! cha. Kan nabe managuen maimiig mamønrrai merigwan ma kømøwei, chish mariimigwan ma kømøwein kur— cha. ¹⁵ Inchen tru wambe katøyug waminchipe trenchibig køn:

—Tius tabig chishig mara kørømarigwane, ñibe mamgaig trømbøig kønmab asha tøgagømøta— cha.

¹⁶ Treetø treetø pønmay kenamisren, tru llensune ¡katø! mõi mõi srømbalasarømay kusruptindig købig køn. ¹⁷ Inchen Pedro be tru nõ piab lataig asiibe chi chibig kønrrabgømbab isub, nuinetø mumayguen kømui wamnetø, Cornelio ørig møgueløbe Simónwei ya chugúin kui paya, yaskabu chabguen pubguen inchibelø køn. ¹⁸ Inchabe:

—Kuaeje chabe, payibelø køn: ¿Kan Simón, katø nundøwei Pedrogucha taig, yu ya peba tsuita?— cha.

¹⁹ Inchen Pedro be tru nõ piab lataig asigwan maig kermab isubsrø wamnetø, Espiritu Santobe nun trenchibig køn:

—¡Aui! ñune pøngatø møguelø lab køn cha. ²⁰ Kurrab, yugurri kørroya, kan mandø inchab kømab isuptø pasrømøtø, nõmba inrrø cha. Kaguende nõmune na ørar— cha.

²¹ Inchen Pedro be tru Cornelio øri møguelan wamønrrab ashchab kørarruabe, trenchibig køn:

—Tru ñim lab kuibe, na kur cha. ¿Kan chindamig lataig palai amrruge?— cha.

²² Inchen nõmbe trenchibelø køn:

—Nambe Cornelio ørig amrruer cha. Truibe suldau sötø cienwan nõ karub pera pasrabig, katø sølgandø tabig, Tiuswan køriibala pasrabig, katø truigwane maya judiosmera truba tabig køn chib wamininab møg køn cha. Truigwane kan Tiusweindø tarømari ángelgurri maig indamigwan kenamarin køn cha, ñun nui yamay arringarua, tru ñi wamindigwan nõ mørtrai.—

²³ Inchen Pedro be kebera, ya peba kørømara, katø kwalømbe nõbe truiløba kurra iben, nunelø tru Jopesrø warabeløgucha Pedron lincha ambubelø køn.

²⁴ Incha katø kwalømbe Cesareasrø pubelø køn, Cornelio nui nammisaameran køben, nui ke trendø linchibelan køben lincha cha pera munig waben. ²⁵ Inchen Pedro yau pubene, Cornelio be wamønrrab webarrua, nui merrab tømønnsrøb, køriibala tabig waminchen, ²⁶ trune Pedro be nun trenchib kusrabig køn:

—¡Kurra, pasramisr! cha. Nagucha ñi lataitøwei ka møøtø kur— cha.

²⁷ Incha Pedro be Cornelio be waminchib, waminchib keyyabe, truba nu misag tulundzuna pasrain kui ashibig køn. ²⁸ Inchabe Pedro be trenchibig køn:

—Ñimbe ashibelø køn cha, kan judiobe judio kømeeløbbabe linchimønrrai, merig kui. Inchendø nane Tiusbe kenamartan cha, mu misagwandøgucha chigucha kømiig kui lataig mara wamømwøwei, køøggønrrapteelø køn tamig kømøwein køn cha. ²⁹ Inchawe trukkuri nan wamøben latatø, chi chib pasrømøtø, arrur cha. Inchawe ñimun payrrab inchar chibig køn. ¿Chigurri nan wama ørig kuin kui?—

³⁰ Inchene Cornelio be lötappe trenchibig køn:

—Pib kwaløm køn cha, øya uras lata, tru las tres Tiusba wamindam ura købig købene, nai yau treuras na Tiusba waminchib wabene, møyimbe kan møg tørgwalmabig keweig nai merrab pasramisra, ³¹ trenchitan cha: “Cornelio, Tiusbe ñi nun wamindiilan mørøb, katø chigøben palai melabelan isua ashib purugub indiilan chigucha, Tiusbe pesannamø, isua køn cha. ³² Inchawe Jope ciudadasarømay karua ør chibig køn, Simónwan wamønrrab, katøgan munchibe truigwane Pedrogucha taig. Truibe tru Simón kalusmeran tabzhig kullaarana tamarøbig mar pulu ya pasraigweinug ya peba tsun” cha. ³³ Inchen nabe tru urastø ñuimay øriibe, manguen arrin køn cha. Møyimbe mayeeløba nambe Tiuswei merrab purrer chibig køn, Señor ñun chitø wamindingaruigwan nam kerrigu mørtrab.—

Pedro Cornelioi yau waminchib

³⁴Inchen Pedrobe waminchib pølbasa, trenchibig køn:

—Møimbe ciertonwei wetøbeñar cha, Tiusbe møilane ørømara katøganelandø tab inchimøtø lata isubig kuin kui. ³⁵Misaamera nørø pørrrabig chu pirausreeløtøgucha nun kørribala marøb, sølgandø tabig marøbigwane Tiusbe kashmig køn cha. ³⁶Tiusbe Israelweinukkurri amrøb misaameran chi isumø tab amønami kønrai marøbig tabig srø wamwan Jesucristogurri eshka kusrenananig køn cha. Nøbe Mayeelaim Pala Nø Karub Nø Ashib Pasrabig køn cha. ³⁷Pø s fümbe ashibelø køn cha, tru srø wamwane Galileasrø pølbasa, Judea pirau kerriguba wammøra kønrai marig køn cha, tru piu umbu ulsramigweimburabigwan Juan eshka kusrenanikkurrimbunø. ³⁸Nabe tru Nazaretsrø Jesúsweimburab truiigwan waminchar cha, Tiusbe nune Espiritu Santotøgaba, nui maramburab mariitøgaba itølushen, nøbe tabig marøb, nugwaimandzig mandøguen kømui melønrai srua kuilan tamarøb unig købig køn cha, Tius nøba pasraikkurri. ³⁹Inchen nambe Judea pirausrø lata, Jerusalénsrø lata, Jesús chitø mariilane nambe namashib chishtø ashibelø ker cha. Katø nune kurusu mesra, kweetsig købig køn cha. ⁴⁰Inchendø Tiusbe pøn kwalømyube katøle kusrua, nune kenamisringarui køn cha. ⁴¹Ke maya misagwangucha kenamismøtø, tru maig kuigwan nømashib ashib pønrrabelan Tius tru manasrøwei nø lawa wesruilandø kenamisrig køn cha, Jesús tru kwaig tsua, katøle kwailai utugurri kurra, tru namba lincha nøba mab muchibelan. ⁴²Incha Tiusbe namune misaameran eshka kusrenanrai karui køn cha, tru øsiguelan lata, kwabelan lata maig kønrrabigwan asha martrai Tius pasriibe nø køn chib, nam waminchib eshkanrai. ⁴³Katø mayeeløba Tius maig karuiigwan eshkabelø Jesúsweimburab waminchippe, tru mayeeløba nun kørebeløbe Jesúswei munchiyu kaig mariilan ulø payamig kømig pesannaig kørørmisrtrun taig køn— cha.

Judíos kømeeø Espiritu Santon utab

⁴⁴Inchen Pedro øyeeg waminchib pasramnetø, Espiritu Santobe kørraarrubig køn, tru mayeelø Tiuswei wamwan wamindi mørøb pønrrabelaim pala. ⁴⁵Inchen Pedroba amrubelø tru circuncidawar kørewarmerabe, truba kwaariilø kørørmisrøbelø køn, judíos kømø misaamerangucha Espiritu Santon keta nømuiim pala srøb tøgailø køben, tøgagønrai trana kørørmaren. ⁴⁶Kaguende nømbe møriimig peg wam wamindi møramba, Tiuswan tabig wamindamba indi ashibelø køn. ⁴⁷Inchene Pedrobe trenchibig køn:

—¿I misaameran piu umbu ulsrailø kømønrai kabe mu købgan merønraitarru? cha, nam latatøwei Espiritu Santon nøm utøben.—

⁴⁸Incha Pedrobe Jesucristoi munchiyu nømun piu umbu ulsrøngarubig køn. Inchen nømbe Pedron:

—Katøgan mam kwaløm køsrøn tiusmanda namba kørørmisr— chibelø køn.

11*Pedro Jerusalénsrø chitø purayaigwan eshka*

¹Cristo nøashib karua øriiløba, nunelø Judeasrø warabeløba tru judíos kømø misaameragucha Tiuswei wamwan utin kui wammørøbelø køn. ²Incha Pedro Jerusalénsrø katø nebibene, tru asru circuncidawar kørewarabe nune øyebe maig marøb pasrøgu chib, ³trenchibelø køn:

—¿Kan fibe judíos kømø misaamera tru circuncidameelai yau kebya, truiløba lincha main køn!— cha.

⁴Inchen Pedrobe lutøgurri maig purayaigwan eshka, trenchibig køn:

⁵—Na Jope ciudasrø tsua, na Tiusba waminchib wabene, kan piab lataigu na øyeeg kenamisri ashibig kur cha. Truyube kan nu llensu lataig pib tsømerayu litsig srømbalásrøngurri kørraarrub arrua, naim pulugatig kørraarrubig køn cha. ⁶Inchen umbu chi tøgag køtashchab na tab ashene, animalmera pib srøb tøgailø køben, namiguelø køben, pirau srala ambubelø køben, pala amøñib illimera køben tøgag asinabig køn cha. ⁷Katø kan wangucha trendai mörinabig køn cha: “Pedro, kurra kweecha, ma” cha. ⁸Inchene nabe trenchibig kur cha: “¿Señor, paare, kan treekkucha mana maramø! cha. Kan nabe managuen nai trigube mamønrai merigwanba, chish mariimigwanbabe mugabguen muga kømur” cha. ⁹Inchen srømbalásrøngurrimbe wambe nane katøle løtab trenchibig køn cha: “Tius tabig chishig mara kørømarigwane fibe mangag trømbøig kømab asha tøgagømøta” cha. ¹⁰Trube pønmay treetø treetø incha, katø kerriguba srømbalásrømay nebibig køn cha.

¹¹Inchen trunetø pøn møguelø Cesareasrøngurri nan lanrrab øriilø nam purrai yau puptinchibelø køn cha. ¹²Inchen Espiritu Santobe nane: “Mandø inchab kømab isuptø pasrømtø, nømbe inrø” chiben, katø i seiselø nuneløgucha naba lincha amrruig købig køn cha. Incha nambe sötøba Cornelioi yausrø kebambubelø ker cha. ¹³Inchen nøbe nui yau kan ångel pasramisra, tru nun øyah chib pasraig asigwan namun eshkabig køn cha:

“Jopesrømay ør cha, Simónwan, trunundøwei katø Pedrogucha taigwan attrai wamønrrab. ¹⁴ Trube ñiba, ñui yauelanba kaigyugurri mandø incha ñimun wesrailø køm wammeran waminchun” chitan, chibig køn.

¹⁵ Inchen na pua, truyu waminchib mendøbene, tru srøsrøzhiitø Espiritu Santo namuim pala kørarrub lataitøwei nõmuim pala kørarruptinchibig køn cha. ¹⁶ Inchene nane Señor øyah taigwan isuptinchibig køn cha: “Juanbe piu ulsra pitøga pinøbulingaruben, trune ñimbe Espiritu Santotøga pinøbuliilø kønrrun” taigwan. ¹⁷ Nam judíosmera Señor Jesucriston kørebelan Tius keta tranigwan nõm judíos kømeeLangucha trunundøwei keta tranene, ¿Tiuswan treeg marmøta chib pasrønrrappe, nabe mu købrai køh?— chibig køn.

¹⁸ Inchen Tiuswei misaamera jerusalénsreelø ilan mørabe, yandø chi chimøtø, Tiuswan truba tabig waminchib trenchibelø køn:

—Trube, Tiusbe judíos kømø misaamerangucha øsig kømigwan nebua tøgagønrrai kaig marigwan isua møra, nuimay lliranrrai marin køn— chib.

Siria pirau Antioquíasrø Tiuswei ureemera

¹⁹ Inchen tru Estebanwan kweechen isumdiig kaig pub mendøben trugurri, ke kan ørøtømisra chab ambubeløbe, Feniciasrøn køben, Chipresrøn køben, Antioquíasrøn køben øyasrøngatig ambig købig køn, mungucha mendailane Tiuswei wamwan waminchimøtø, judíosmerandø waminchib. ²⁰ Inchendø nõmui utuelø mõiløgøsrøn, chipresreeløba, cirenesreeløba Antioquia ciudayu puabe, griegosmerangucha waminchibelø køn, Señor Jesúswaimburab eshkaab kusrenanøb. ²¹ Inchen Señorwei tasiibe nõmba pasrøben, misaabe truba nu kørewa, Señorweimay llirabelø køn.

²² Inchen Jerusalénsrø iglesiayueløbe trunun wammøra, nõmbe Bernabéwane Antioquíasrøngatig ørøbelø køn. ²³ Inchen Bernabé trusrø puabe, Tius ka yandø tab indin kua asha, nõbe truba kasraarawa, Señorwei mayu pønrrappe nõmui manrrau tab isua mur pønrrønrrai mayeelan waminchibig køn. ²⁴ Kaguende Bernabébe tabig, Espiritu Santoba, nui isubigwan Cristoinug pasriiba truitø netsaig købig køn. Inchen Señorweyasig misaabe nõrrø nemisrig købig køn.

²⁵ Incha yandø Bernabébe Saulon lanrrab Tarsosrømay ya, yandø wetørrawabe, Antioquíasrømay pera ibig køn. ²⁶ Incha nõmbe trusrø pila ørøba iglesiayueløba tulundzunab kua, misagwan nõrrø kusrenanøbelø køn. Tru Antioquíasrøn kuig køn, tru Jesucristoi kusrenanigwan marøb melabelan ke srøsrøzhiitø pølbasra “Cristoielø” cha munchi pasra wamig.

²⁷ Inchen tru kwalømmerawan mõiløgøsrøn Tius maig karuigwan eshkabelø Jerusaléngurri Antioquiamay kørørrubelø køn. ²⁸ Inchen kan tru ambubelai utuig Agabo taibe, Espiritu Santo nun maig tamigwan isunrrai inchen, trenchibig køn:

—Pirau ørøba parø truba nuig attrab køn— cha. Indiibe treeg kønrrun taibe Claudio karubig køben treeg purayaig købig køn. ²⁹ Inchawei Antioquíasrø Jesucristoi kusrenanigwan marøb melabeløbe nõmun kanun kanun maig tranamdiig køben an treeg purugua trana, ørtrab chibelø køn, nunelø tru Judeasrø warabelayasig. ³⁰ Incha treeg mara, Judeasrø Tiusweimburabelan pera marøb pønrrabelan tranrrai, Bernabéwanba, Saulonba tru ketamig tulisagwan trana ørøbelø køn.

12

Jacobo kwaigwanba, Pedron kailan keeri yau keerigwanba waminchib

¹ Inchen tru kwalømmerawan rey Herodesbe mõilan køsrøn iglesiayuelan kemørøbig køn, kaig inchib srua kønrrab. ² Incha Juanwei nuneg Jacobone espadatøga kweetsingarubig køn. ³ Treeg marigwane judíosmerane truba tabig asønain køben, Herodesbe Pedrongucha merrarrangarubig køn. Trube tru Pirri Levaduragaig Maig Fiesta kwalømmerawan purayaig køn. ⁴ Incha Pedron merrarrawabe, Herodesbe kailan keeri yau keerøbig køn, suldaumera pib søtø ashib pønrrønrrai pønsra kan søtøyu pib suldaubatø. Herodesbe tru Pascua Fiesta puraiben, Pedrone misagwei merrab wesranrrab isua treeg inchibig køn. ⁵ Inchawei Pedrobe kailan tru keeri yaugurri webimønrrai truba may ashib tøgagüig waben, iglesiabe nuyasig ¡katø! elachimø, Tiusba waminchib miab købelø køn.

Pedron kailan keeri yaugurri Tius wesrab

⁶ Herodes Pedron misagwei merrab løtsø wesramig køben tru kwalmab yem, Pedrobe pagatø suldaumerai tøbøtag pa cadenatøga merrarraig, kib tsuben, katøgan suldaumerabe yaskabu tru kailan keeri yawan ashib pønrrabelø køn. ⁷ Inchen mõi mõi kan Señorwei ångel kenamisren, tru kailan keeri yaube kan tørguegwalmabig kebiløben, ångelbe Pedron tømbulyu kønøga kasrønnanabe, trenchibig køn:

—¡Mallatø kurrø!— cha. Inchen cadenasmerabe Pedroi taskugurri køraptinchibig køn. ⁸ Inchabe ångelbe trenchibig køn:

—Tamara pøronab, ñui alpargatiswan keetab inchi— cha.

Inchen Pedrobe treeg marene, ángelbe trenchibig køn:

—Pala itøgwegatúigwan keb, nai mendig amø— cha.

⁹ Inchen webyabe ángelwei wendautø ibendø, tru ángel øyee punrraig marigwane ka inditamptø isub, nøbe tab chigúi nebua ashmúig køn, pøs øyeebe nune kan piaig lataitø køben. ¹⁰ Incha suldaumera ashib pønrrainug srøtiigu puraamba, trugurrimbe katøganbalø puraamba, trugurri yandø wambig callegatømayrø tsandzøn yaskabyu pubene, tru yaskappe nøtø kurøptinchibig køn. Inchen webamba, kan yabgatig ambene, tru ángelbe nøtø inrrai tarømisrøptinchibig køn.

¹¹ Inchen Pedrobe yandø chigúi møra trenchibig køn:

—Møimbeguende, Señor nui ángelwan øra, Herodeswei taskugurrimba, katø maya judíosmera nan maig martashchab ashig kui inchi pønrraigugurrimba wesratan— cha.

¹² Incha Pedrobe yandø iigwan maig kui ashabe, Mariai yamay ibig køn, tru Juanwan katø Marcoskucha taigwei usrimay. Inchen truyube truba yamelø tulundzuna, Tiusba waminchib købelø køn.

¹³ Incha Pedrobe yagueta pua, yaskabwan pinrrøgøbene, kan srusrø-unø truyu mendig mendabig, Rode taibe, mu køtashchab arruabe, ¹⁴ Pedroi wam kui mørøppe, kasrag købiitø yaskabwanguen kurmøtø, katøle umbusrø kelula:

—¡Pedro yaskabu pasrøtan!— cha, eshkabig køn.

¹⁵ Inchene nømbe trenchibelø køn:

—¡Paare! ñibe loca asønnan— cha.

Inchen nøbe:

—¡Truigwein køtan!— chiben, nømbe trenchibelø køn:

—Pedro kømøtø, nui møsig kuinrrun— cha.

¹⁶ Trune Pedrobe katøgucha yaskabwan pinrrøgøbig, pinrrøgøben, kura ashabe, truba kwaarøbelø køn. ¹⁷ Inchen nøbe 'niløtø kønrray' sifial mara, tru kailan keeri yaugurri Señor mandø wesraigwan eshkawabe, trenchibig køn:

—Jacobonba, nunelø katøganlanba iigwan wammørøsrkønrrigay— cha.

Incha webyabe, peesrømay ibig køn. ¹⁸ Inchen yandø tør-rraben, suldaumerabe ¡katø! mamdøguen kømuilø truba truba waminchib købig køn, Pedrone ni chindinguen mørmøwa. ¹⁹ Inchen Herodesbe langarua, wetørranrab kaimappe, tru suldau ashib pønrrabelan maig purayagwan nømun paya ashib srua kuabe, kweetsingaruiig købig køn. Incha Herodesbe Judeagurri webya, Cesareasrømay ya, trusrø tsubig køn.

Herodes kwaigwan waminchib

²⁰ Herodesbe Tiroba, Sidónba warab misagwan larrø namig tsuben, trusreeløbe søteeløba maig maramigwan lata ke kandø isua pønrramisra, tru rey Herodeswei yau ke nøashib trag megabig Blasto taigwan nømuingatø misrtrai ubønnanøb wamincha, truikkurri ambugurri, igurri lata tab warønrrab cha miabelø køn. Kaguende Tiroba, Sidónbabe tru reyweim piraugurri mamig weerigwan purøsrubelø købig kua. ²¹ Inchen Herodesbe kan kwaløm treeg martrab cha wesrua pasra, tru kwalømbe Herodesbe tru keilø purø tabelan kewa, tru wamisra ashib karub wainug wamisra chull møramdiig purø may waminchibig køn. ²² Inchen misaamerabe trashib mendappe, trenchibelø køn:

—¡ligwan waminchibiibe møg kømøtø, kan tius køn!— chib. ²³ Inchen tru urastø Señorwei kan ángel Herodeswane kwanrrø penøsrkøbig køn, kaguende tru maya nuguen tab kønrrai indigwan Tiuswein kønrrain kømøtø, nuyasig kønrrai inchi wabenba. Incha nøbe pøømmera maig kwabig køn.

²⁴ Trune Tiuswei wambe larrøbichib nurab ibig køn.

²⁵ Inchen Bernabéba, Saulobabe tru ketamig tulisha trana øriilan chab peguchabe, Jerusalénsrøngurri Antioquíasrømay katø ambubelø køn Juanwan pera, truitøwei Marcos taigwan.

13

Bernabéwanba, Saulonba lawa wesrub

¹ Antioquía iglesiyube Tius maig karuigwan eshkabelø køben, kusrennøbelø køben købig køn: Bernabé køben, Simón (trunundøwei Níger taig) køben, cirenesriig Lucio køben, Manaen køben (tru misagwan ashib karubig Herodesba trubalatø nuraweig), Saulo købengue. ² Indiibe kan kwaløm Señorwan nøm køriibala tabig waminchib, ayunab købene, Espíritu Santobe trenchibig køn:

—Bernabéwanba, Saulonba tarømartray cha, na nømun chi martrai wamigu marøb pønrrønrrain— cha.

³ Inchen nòmbe ayunab, Tiusba waminchib kuabe, tab kònrrai tasiimeran nòmuiim pala estsara, yandø, 'trube, ka amrrigay' cha ørøbelø køn.

Bernabéba, Sauloba Chipre pirausrø

⁴ Inchen Espírítu Santo øriilø Bernabéba, Sauloba Seleucíasrømay amba, truyugurrimbe barcoyu Chipre pirausrømay ambubelø køn. ⁵ Incha Salaminasrø puabe, judíosmera tulundzuni yamerayu Tiuswei wamwan eshkaab kusrenanøbelø køn. Incha Juanwangucha nòmun purugub uñchai pera amøñibelø køn.

⁶ Incha tru pi tøbøtag Chipre pirø pasrabigu kandarømaysrø Pafossrøngatig larraambabe, truyube kan judío Barjesús taig, kaig libron kusrewa, kwaimandzigweimburabigwan marøbig, ka isatø 'Tius maig karuigwan eshkabig kur' chibigwan wetørrabelø køn. ⁷ Tru møøbe Sergio Paulo kubenadur maig kømigwan purø tab isua marøbig treeg møøba, tsubig køn. Inchen tru Sergio ashib karubigwane Tiuswei wamwan nune mørøg køben, Bernabéwanba, Saulonba wamønrrab ørøbig køn. ⁸ Inchen tru Barjesús, griegomaybe Elimas cha wamig, tru kaig libron kusrebig, truipe tru karubig nui isubigwan Tiusweinug pasrmønrrai truba sötø luløb megabig køn. ⁹ Inchen Saulo, katø Pablogucha taibe, Espírítu Santotø netsaig, tru Elimaswan malau ke tab ashabe, trenchibig køn:

¹⁰ —¡Kan ñi kui! ¡Misagwan kegørrøsrkamig, isatø indiibah, larrø kaig maramibatø netsaig møg, nugwaimandzigwei nusrkai! ¡Chigurrimbunø sølgandø tabigwane larrø tsaliig ashig kømui inchib pasrabig køn! cha. ¿Ñibe Señorwei tab maymerane managatig mindishibig mindishinrragu? cha. ¹¹ Møimbe Señorwei tasiibe ñun trømbøig nebunrrai martrun cha. Møimbe maya yanagatig kabgaig kørømisra, pørrwan ashchab kaimanrrabguen — chibig køn.

Inchen mõi mõi nune kabyu wañim peñib løstiig misren, srølamøratø ibig misra, møikkøben tasku nun kemøra srúa amrrai labig køn. ¹² Inchen treeg purayaigwan ashabe, tru kubenadur Señorweimburabelø kusrenaniilan ke kwaara asha, Señorwan kørebíg køn.

Pablo Antioquía ciudarsø tsuig

¹³ Pabloba, nui linchibeløba Pafos ciudaygurri barcoyu nebamba amba, Panfilia pirau Perge ciudarsø puben, trune Juanbe truyu nòmun tarømisra, katø Jerusalénsrømay arrubig køn. ¹⁴ Incha Pergøgurrimbe nòmbe Pisdia pirau Antioquía ciudarsømay amba, truyu sábadø isrin kwaløm judíosmera tulundzuni yau kebamba, purramisrøbelø køn. ¹⁵ Inchen tru maig maramigwan martrai Moisés pørigwanba, Tius maig karuigwan eshkabelai pøriilanba chab lebene, judíosmera tulundzuni yau chi maramigwan ashib karubeløbe møigwan køsrøn øyeeg chinrrab, 'inrrø' chibelø køn:

—Ñim, namui misaamera, mandø melamigwan øyeeg melønrrigay chib misagwan wamindamig tøgaguabe, waminday— chinrrai.

¹⁶ Inchen Pablobe pasramisra, tasigwan kusrawabe, trenchibig køn:

—Ñim, Israelwei misaameraba, katø ñim Tiuswan køriibala tøgø pønrrabeløba mørtray cha. ¹⁷ Iig Israel misaamerai Tiusbe, namui merrabsrø kølli misaameran lawa wesrawa, tru misaamerane truba nørreelø kønrrai marig købig køn cha, nømbe Egipto pirausrø ka ambateelø warøben. Incha tru Egipto pirausrøngurri nui tasiitøgø ashig kui ashchai marøb wesruig købig køn cha. ¹⁸ Incha mu misag warab waraimønug Tiusbe cuarenta añosburab nòmune ka awentab tøgagúig købig køn cha. ¹⁹ Incha Tiusbe Canaan pirausrø misaamera sietø nørøø sötø pønrrabigwan pinisha, truilaum pirømera købelan nòmui mara tøgagønrrai tranig købig køn cha, ²⁰ kan cuatrocientos cincuenta añosburab.

'Inchen trugurrimbe tru maig kønrrabigwan asha marøb purørrabelø 'asha martrabelø' cha wamiilø Tiusbe tranig købig køn cha, Tius tru maig karuigwan eshkabig Samuel køb uraskatig. ²¹ Inchen trugurrimbunøbe, israelitasmerabe nòmun ashib karub wanrrabig kan rey miaben, Tiusbe Benjaminweinukkurri karrab misagúig Quiswei nusrkai Saulwan cuarenta años ørøba karub wanrrai tranig købig køn cha. ²² Incha trugurrimbe Tiusbe rey Saulwan ø ashib karub waigwan kerrawa, Davidwan rey kønrrai kusruig købig køn cha. Incha trunune Tiusbe nuimbubab trendaig købig køn cha: "Isaiwei nusrkai Davidbe na maig isubig køben, treeg isub møg kui asha kur cha. Truipe na chi martrai inchen, treeg martrun" cha. ²³ Tru Davidweinukkurri srøig karrab misaameran ø maig martrab cha kørømisrig købig maig køben, Israel misaamerayasig kan Kaigyugurri Wesanrrabig Jesúswan ørig købig køn cha. ²⁴ Inchen Jesús ø arrumøwatøbe, mayeelø Israel misaameran Juanbe mas kaig marmønrrab isua møra, Tiusweimay llirain kønmba asamig piu umbu ulsrailø kømigwan eshkaab kusrenanøb arrig købig køn cha. ²⁵ Incha Juanbe nui maramigwan yandø chab patsøgøb arruabe trendaig købig køn cha: "¿Nabe mu kuitamab isugue? cha, nabe tru ñim isub kuig truiig kømur cha. Inchendø nai wendaube katøgøn atrun cha, trunune nabe nui

alpargatiswan tsiwan pitsamikken truburab kōmuinatan” cha, Juanbe trendaig kōbig kōn cha.

²⁶ *Ñim, nai misaamera, Abrahamweinukkurri srōig larrōbicha amrrubelōba, katō ñimui utu Tiuswan kōriibala marōb melabelōba: tru tabig srō wam kaigyugurri wesrabigwane yamba namuiwei ōrig kuin kōn cha. ²⁷ Kaguende Jerusalēnsrō warab misaameraba, katō nōmun ashīb karub purrabelōbabe, Jesúswane mu kuinguen nebua ashmōwei, katō tru isrin kwalōmmōrig Tius maig karuigwan eshkabelō wamindi wamwan leigwan chigucha, nōmbe trugwan chī mōrōg kōmuindiig kua, nōm Jesúswan ōyeeg kwanrai marōb pōnrrappe, tru pōrig maig taimbala nōmbe treeg nebunrai marig kōbig kōn cha. ²⁸ Jesúswan chigurri kwanrai maramdiig nuinuube chi kalō marig wetōrramubendō, Pilaton nōmbe kwetchai miaig kōbig kōn cha. ²⁹ Inchen nuimburab maig pōrig pōnrrabelō kerrigu treeg puraiben, kurusyugurri pinōsrua, sōrabelō kōn cha. ³⁰ Inchendō Tiusbe katō kwailai utugurri ōsirangarubig kōn cha. ³¹ Inchen Jesúbe kwamōwatō, tru Galileasrōngurri Jerusalēnsrōngatig nun lincha nerrubelane katō ōsiirappe, nōmune truba yam kwalōmgatig kenamisrōb unig kōbig kōn cha. Incha truilōbe mōimbe nōmashib maig asigwan misagwei merrab nuiwan waminchibelō, nōm kōn cha.

³² *Inchawei nangucha tru merrabsrō namui kōlli misaameran Tius tranrrab misra kōrrōmisrig, tru tabig srō wamwan ñimun wammōrōsrkōb eshke cha. ³³ Nam tru truilai ure-emerane treeg martrab kōrrōmisrigwane maran cha, Jesúswan Tiusbe ōsirangara. Inchen katō Salmo dosyugucha ōyeeg pōrig pasran cha:

“Ñibe nai Nusrkain kōn cha.

Mōi nabe ñui Mōskai misra pasrar” cha.

³⁴ Katōbe mana trerannrabig kōmīg Tiusbe Jesúswane kwailai utugurri katōle kusrua, tru treeg marigweimburappe Tiusbe trencha pasrig kōbig kōn cha:

“Tru newan tabig, ciertonig treeg martrab cha,

Davidwan tranrrab kōrrōmisriilane ñun tranrrumōn” cha.

³⁵ Inchawei katōganbalōsrōngucha trenchibig kōn:

“Ñui Newan Tabigwei asrwane trerabashmōnrrun” cha.

³⁶ *Pōs Davidbe Tius maig kōnrrain kōben tru nō tsuin kwalōmmerawan misaameran ashīb purugub wawa, yandō kwawa, nui mōskalōba tsumisrene, nui asrbe treraig kōbig kōn cha. ³⁷ Trune Tius tru kwailai utugurri katōle kusruigwei asrbe treramuig kōbig kōn cha. ³⁸ Inchawei ñim, nai misaamera, ñim nebua asig kōnrai inder cha, tru kaig mariilan ulō payamig kōmīg pesannaig kōnrrun chib eshkab kusrenniibe Jesúskurrin kui. ³⁹ Inchawei tru maig maramigwan martrai Moisés pōriilōtōga chi kaig kōmīg lataig, tabig kōrrōmisra pōnrrōnrrab kaimaigwane, mutōgucha Jesucriston kōrebelōbe nuinuubeguende chi kaig kōmeelō lataig, tabig kōrrōmisrtrun cha. ⁴⁰ Inchawei ashiptō kuy chibig kōn, Tius maig karuigwan eshkabelō ōyeeg chib pōriibe ñimun nebui warōnrrab kōmōtō:

⁴¹ “Au, ñim chiwandōgucha ke ka indzatō mōrōbelō,

jkatō! ke kwaara ashīb kenaguen kōmō, pinay taig.

Kaguende nabe, ñim warain kwalōmmerawan purō nuig maramōnrrun taig,

ñimun mugōben treeg kōbig kōn chib wamingugucha,

treeg marig kōbig kuitamappe ke kōremgaikke.”—

⁴² Incha Pabloba, nui linchibelōba judíosmera tulundzuni yaugurri webambene:

—Wendō truwan isrin kwalōmgucha ōyeelandōwei waminchurrunrigay— chibelō kōn.

⁴³ Incha truyu misag tulundzuna pasrabigwan yandō nōmbe ‘ungwa’ cha ambene, mōilōgōben truba yam judíosmeraba, katō mōilōgōben judíosmera nōm Tiusweiwan marōb pōnrraigu purōrua Tiuswan purō isua melabelōbabe, Pablonba, Bernabéwanba mendig amben, nōmbe:

—Tiuswei tru ka yandō tab indigu maizhikkucha elachib pōnrrōnrrab kōmōtō, melabig melōnrrigay— chib waminchibelō kōn.

⁴⁴ Inchen wendō truwan isrin kwalōm tru ciudayu ke maya misag lutau Tiuswei wamwan mōrtrab tulundzunōben, ⁴⁵ judíosmerabe misag truba nōrrō tul yai ashabe, truba namig pusrkwai asha, Pablo tru trenchib wamingugwane ‘treeg kōmōn’ chib, tsalō wamabelō kōn. ⁴⁶ Inchen Pabloba, Bernabébabbe chigucha kōrmō trenchibelō kōn:

—Tiuswei wamwane ñim judíosmeranmerrigwei eshkamig kuig kōn cha. Inchendō ñim yandō kaashīb, managatig ōsig kōmigwan ñim tōgagōmig truburab kōmui indig kuig kōbene, trube, nambe mōimbe judíos kōmeelaimay katō amrrab chibelō kōn. ⁴⁷ Kaguende Señorbe namun trencha karua pasrig kōn cha:

“Judíos kōmō misaamerayasiig kan tōr lataig kōnrai ñune pasrar cha,

kaigyugurri wesrailō kōmigwan eshkab pirau munabatsō srua inrrai.”—

⁴⁸ Inchen iigwan mørabe, judíos kómø misaamerabe truba kasraarawa, Señorwei wamwan truba tabig waminchibelø kòn. Incha tru managatig øsig kómigwan tøgagønrrai chabguen tarømarilø købeløbe møiløtøgucha Jesucriston kørebelø kòn. ⁴⁹ Inchen Señorwei wambe tru pirau kerrigu larrøbichibig kòn. ⁵⁰ Inchen judíosmerabe tru ciudayu møiløgøsrøn ishumberma, Tiuswan purø isua melabelø trurrigu nøm mailø kui asiilanba, katø ciudayu møguelø nørreelø ashib karubelanba kaig marøb kurrønrrai nòmune ke treeg isumne incha, Pablonba, Bernabéwanba nømuiim piraugurri webusrøbelø kòn. ⁵¹ Inchen nømbe nømui srøbyu usrøwan pabørrgøbelø kòn, ñim øyeeløgurri uyube mømibe ñim kusrenrrigay chib eshkab. Incha Iconio ciudadsrømay ambubelø kòn. ⁵² Inchen tru Jesucristoi kusrenanigwan marøb melabeløbe kasrag købiibah, Espiritu Santobatø netsailø købig kòn.

14

Pabloba, Bernabéba Iconio pirausrø

¹ Iconiosrø Pabloba, Bernabéba judíosmera tulundzuni yau kegøtø kebamba, purø may waminchib kusrenanen, judíosmera køben, griegosmera køben truba nørø Jesucriston kørebelø kòn. ² Trune judíosmera Jesucriston køremeeløbe tru judíos kømeeleane ke kaig isumne inchibelø kòn tru Pabloimburappa, Bernabéweimburappa. ³ Inchen treeg kuingu, Pabloba, Bernabéba truyu yana warøwa, Tiuswei wamwan chigucha chi kørig kuin kómø waminchibelø kòn. Inchen nui wamwan tru ka yandø tab indigwan treegwein kui ashchai, Señorbe nømui tasiimeratøga mariilø truba nørreelø marøb, kwaara asha kønrrai mariilø marøb inchai tranig kòn. ⁴ Inchen tru ciudayu misaamerabe kan utueløbe judíosmeraingatø køben, møiløbe Cristo nøashib karua øriilaingatø købig kòn. ⁵ Inchen judíosmera køben, judíos kømeeleø køben, nømun ashib karub purrabeløba kandø misra, nømun trømbøig kaig inchib, sruutøga petønrrab kurrøben, ⁶ Pabloba, Bernabébae trunrun wammøra Licaonia pirau tru Listraba, Derbeba, pueblomerasrømayba, katø tru puluwan katøganbalømerasrømayba trubab ambubelø kòn. ⁷ Incha trusrø tru tabig srø wamwan eshkab kusrenanøbelø kòn.

Listrasrø Pablon sruutøga petab

⁸ Inchen Listrasrømbe kan møg kal-lainukkurri managuen uñchab kaimabig srøbmera tulundzunig wabig kòn. ⁹ Inchabe tru møøbe Pablo waminchen mørøb wabig kòn. Inchen Pabloba nun ke tab asha, ke tamarig kømuitamab isub wai ashabe, ¹⁰ mur wamab trenchibig kòn:

—jØlgandø kurrab, pasramisr!— cha.

Inchene tru møøbe øsrøppe, pasramba, lliirab mendabig kòn. ¹¹ Inchen misaamerabe Pablo chi marigwan ashippe, nømui Licaonia triimay trenchib trashib mendabelø kòn:

—jMøguelø lataig, tiusmera namuinug kørrørruin kòn!— chib.

¹² Incha Bernabéwane tius Zeus kòn chippe, Pablone tius Hermes kòn cha wamabelø kòn, kaguende Tiuswei wamwan waminchibiibe Pablo køben. ¹³ Inchen tru tius Zeuswei tab ya, tru ciudayu kebaminuutø pasrabigu ashib wab sacerdotēbe, toromera køben, umera purø tabzheelø tamarilø køben, tru ciudayu kebambi yaskabmerasrø srua arrua, tru toromera kweecha, misaamerabamisra, Pablonba, Bernabéwanba, nømune tiusmera kui mara tranrrab mendabelø kòn. ¹⁴ Inchen Cristo nøashib karua øriilø Bernabéba, Pabloba nømun treeg martrab indi mørabe, nømui kewagüilan kølsrøb, misag utusrø kegørra, ¹⁵ trenchibelø kòn:

—jAu, yu mayeelø pønrrabelø! ¿Chindimba øyeeg martrab inchigue? cha. Nambe ñim latailøtøwei ka møgueløtø ker cha. Ke ka treeg maranmab ashchaidnø mariilan elacha, øsig wab Tius srømbalawan køben, tru pirøwan køben, marwan køben, chigurrimbunø truyu pønrrabelan marøbigweimay lliirawa pønrramisrtrai, tru tabig srø wamwan nambe ñimun waminchab amrruer chib. ¹⁶ Merrabsrø misag srøig, srøig kurrab amrrubelane misaamera nørø pønrrabelan chuelandøgucha kerriguēlan, nømun maig amøñig køben, treeg ka amøñibasig kòn cha. ¹⁷ Inchen køben managucha numburabigwane maig kuigwan eshkab wamindig købig kòn cha, tabig marøb. Srømbalærøngurri srewan kòn, ellmariilø misram pølmera pubene, tru kuindø, tru kuindø misringarunrrun cha, chi palømø unchaguen mamig tøgagønrrai tranøb, ñimui manrømeran truba kasraaranøb.—

¹⁸ Inchen nøm øyeeg chib waminchagucha, nømbe misaameran ke trendø merønrrab kaimasrubelø kòn, tru nømun tiusmera kui mara toromera kweecha tranmønrrai.

¹⁹ Inchen Antioquíagurrimba, Iconiogurrimba møiløgøsrøn judíosmera puabe, misag purø nu pasrabigwan ke kaig maramne inchai wamincha, Pablon kwetchab srug muta peta, ciudayugurri wambiisrømay ke paluunchib megam srua webambubelø kòn, yandø kwaig kønmab. ²⁰ Trune Jesucristoi kusrenanigwan marøb melabeløbe nuin pøtøgatan

tulundzunoben, nõbe kurra, katø ciudayu kebig køn. Incha katø kwalømbe Pabloba, Bernabéba Derbesromay ambubelø køn.

²¹ Incha Derbesrø Jesucristoi tabig srø wamwan eshka kusrenana, Jesucristoi kusrenanigwan marøb melabelø nõrrø nemisrtra mara, trugurrimbe Listramayba, Iconomayba, Antioquiamayba katø amrruig købig køn. ²² Incha trusrømbe tru Jesucristoi kusrenanigwan marøb melabelan kullaaramø mur pønrrørrai waminchib, isubigwan Tiusweinug pasragúgwane elachib pønrrømø, tindøga pønrrørrai chib waminchibelø køn. Incha nõmune trenchibelø køn: “Tius nõ ashib karub waisrø kebambamibe chinetø chinetø murelø puben, truyu puraambub meløwawe kebambamig køn” cha. ²³ Incha iglesiawørig nõmbe Tiusweimburabelan pera marøb pønrrabelø wesrawa pønsra, Tiusba waminchib, ayunab kuabe, nõmune tru nõm kørewa pønrraig Señor nõ ashchai pønsrøbelø køn.

Antioquia ciudasmay katø ambub

²⁴ Incha trugurrimbe Pabloba, Bernabéba Pisidia pirauwan puraambub amba, Panfilia pirau pubelø køn. ²⁵ Incha Perge ciudayu Tiuswei wamwan eshka kusrenana, trugurrimbe Ataliasromay amrrubelø køn. ²⁶ Incha truyugurrimbe barcoyu nebamba, Siria pirau Antioquiasmay ambubelø køn. Tru nõm mõi ya patsøga pønrraigwan martrab amrrai Tiuswei tru ka yandø tab indiitøga tabig ashib tøgagúilø kønrrigay chib, tru nõmun pønsraig købiismay. ²⁷ Incha trusrø puabe, iglesiayuelan tulundzuningarua, Tius nõmba chinetø, chinetø mariilanba, tru judíos kømø misaameragucha isubigwan Señorweinug pasra tøgagønrrai yaskamberan mandø kurøb arrigwanba waminchibelø køn. ²⁸ Incha Pabloba, Bernabéba Jesucristoi kusrenanigwan marøb melabeløba truyu truba yana kørrømisra waraig købig køn.

15

Jerusalén waminchab tulundzunab

¹ Inchen tru uras mõiløgsrøn Judeagurri Antioquiasmay amba, nunelan treeg kusrenanin købig køn:

—Moisés kusrennig tru circuncisión maramigwan marmøwabe, kaigyugurrimbe wesrailø kønraamøn— chib. ² Inchen Pabloba, Bernabéba tru treeg kusrenanøbelan ‘øyeebe maramig kømøn’ chib, nõmba purø mur aleguiyabelø køn. Treekkurri Pablonba, Bernabéwanba katø truyu nõmui utuelø mõilan køsrønbamara, Jerusalénsromay ørrab wesrawa pønsrøbelø køn, tru øyeege pub arrigwan Cristo nõashib karua øriiløba, Tiusweimburabelan pera marøb pønrrabeløba trusrø waminchib.

³ Inchen tru iglesiayuelø tru amrrai karua øriiløbe Fenicia pirøwanba, Samaria pirøwanba puraambub ambubelø køn, judíos kømø misaamera nõmui trendø marøb kuilan elacha, Tiuswei maywan amøñinrrab nõm mandø pønrramisrigwan eshka. Treekkurri trusrø tru mayeelø nuneløbe truba kasraarabelø køn.

⁴ Incha Pabloba, Bernabéba, tru lincha ambubeløba Jerusalénsrø chab pubene, trusrø iglesiayueløba, Cristo nõashib karua øriiløba, katø truyu Tiusweimburabelan pera marøb pønrrabeløba nõmune wamab utøben, nõmbe Tius maig marigwan kerriguh waminchibelø køn. ⁵ Inchene mõiløgsrøn merrappe fariseosmeraingateelø købelø kua, mõimbe Jesucriston kørebeløbe trenchibelø køn:

—Tru judíos kømø misaamera Jesucriston kørebeløba tru circuncidamigwan maringarub, katø tru maig maramigwan martrai Moisés øriilan maringarumig palan— cha.

⁶ Inchen Cristo nõashib karua øriiløba, Tiusweimburabelan pera marøb pønrrabeløba tru øyeege puigwan maig køtashchab ashchab tulundzunabelø køn. ⁷ Inchen purø trømbøig mur aleguiyab kømig puben, Pedrobe kurra pasramisra, trenchibig køn:

—Nai nunelø, ñimbe srøsrø kwalømmerawangurri ashibelø kuinrrun cha, Tiusbe ñimui utugurri nan lawa wesruig køn cha, judíos kømø misaamera tru tabig srø wamwan na waminchen mõra, kørenrrai. ⁸ Tiusbe nõmui manrrømeran ashibig kuabe, nam judíosmeran tranøb lataitøwei Espiritu Santon nõmungucha tranøb, nõmuingatø pasrar chib kenamarig køn cha. ⁹ Tiusbe nõmun nõrø mara namuingatø inchib pasrømuig køn cha, nõmui isubigwan Tiusweinug pasra tøgagúitøgatø nõmui manrrømeran chishmarig købig kua. ¹⁰ ¡Ñim kui! ¿Ke Tiuswane chinchibig køtashchab inchib pønrrøtirru? cha, tru nam lata, namui merrabsrø kølli misaamera lata, øyeege maramigwan marøb kønrrab kaimaigwane tru Jesucristoi kusrenanigwan marøb melabelan, trunon nõm niga amrrai mõimbe nõmun neguanøb. ¹¹ Treeg kømøtø, Señor Jesús tru ka yandø tab incha ketiitøgatø nambe kaigyugurri wesrailø kermab kørewa pønrrer cha, nõm lataitøwei.—

¹² Inchen truyu maya misag tulundzuna pasrabiibe niløtø kørrømisra, mõrøb purrabelø køn, Bernabéba, Pabloba tru judíos kømø misaamerai utusrø, Tiusbe nõmba pasrain kui

ashchai nôm gurri mariilanba, kwaara asha kônrrai mariilanba waminchen. ¹³ Inchen nôm chab waminchen, Jacobobe trenchibig kôn:

—Nai nunelø, mørtray cha: ¹⁴ Simónbe wamindan cha, judíos kômø misaameran srøtøgurri nômungucha isua pasarnmab ashchai, truilai utugurri nui ureg sòtømera kônrrai mara, nui munchin nôm uinug tøgagørrai marigwan. ¹⁵ Pøø mõi øyeeeg publiibe, tru merrabsrø Tius maig karuigwan eshkabelø maig pøriiba ke kandø kôn cha. Tru øyeeeg pørig pasraimbala:

¹⁶ “Øyeeeg purayaig wendøbe tru Davidwei ya penin tsuigwan katøle kusrua pasramønrrun chib.

Chab pinabsruigwan katøle tamara kusrub, srøig mara pasramønrrun taig.

¹⁷ Maya misaamera katøganelø uncha pønrrabelø

Señorwan lanrrain cha, mayeelø judíos kômø misaamerainug nai munchiwan nôm uinug pasra wamig kônrrun cha.

¹⁸ Tru Señor ilan marøbig øyeeeg tan taig,

tru manasrøngurri øyeeeg martrab isua tøgaguen waig købigwan.”

¹⁹ Inchawei nabe, ke treeg maramne inchib pønrramgaig kui ashar cha, judíos kômø misaamera nômui merrabsrø marøb kuilan elacha, Tiusweimig pønrrønrrab llirawa amrrubelan. ²⁰ Treeg kômøtø, taska mari tiusmera tøgagüilan pønnsraig mamimeran mamøwei, katø møguelø lata ishumbur lata larrø trømbøig marøb kômigwan marmøwei, kweetsig kômøtø, ka melamisratø kwaig animalmerai yauwan mamøwei, katø aniwan mamøwei indamig kôn chibig, treegwan eshkawa, pøramitø palan cha. ²¹ Kaguende merrab manasrøngurri Moiséswei pørilan ciudadmørig judíosmera tulundzuni yamerayube eshka kusrenanøbelø tøgagøben, truiløbe isrin kwalømmørig tru maig maramigwan martrai pørigwane lebelø købig kôn— cha.

Pabloa, Bernabéba Siria pirau Antioquiasrømay katø ambub

²² Inchen Cristo nøashib karua øriiløba, Tiusweimburabelan pera marøb pønrrabeløba, katø iglesia mayeeløba tru nômui utugurri lawa wesrawa, øramig tabig asønai inchibelø kôn, Antioquiasrømay Pabloa, Bernabéba amrrai. Incha Judas, katø nundøwei Barsabás taigwanba, Silaswanba amrrai wesrubelø kôn, nunelai utu tru mas nørreelø kui asi møguelan. ²³ Incha nømune ørøppe, kan kilga øyeeeg chibig pøra, trana ørøbelø kôn:

Nam Cristo nøashib karua øriiløba, Tiusweimburabelan pera marøb pønrrabelø, nam ñimui nunelø ñim judíos kømeeelø Antioquiasrømba, Siriasrømba, Ciliciasrømba warabelø nunelan ‘ka amøñiguh’ chinrrab inder.

²⁴ Møiløgsrøen yu namui utuelø amba, namma chigucha treebe marøb kônrrai karumendø, chinetø cha, ñimune ¡katø! kan ørøba mandøgucha kømuielø melønrrai marin kôn. ²⁵ Incha treekkurri nam mayeeløba kandø isua pønrramisra, namui utelan mø møguelan kòsrøn lawa wesrua, namui undaaraig nunelø Bernabéba, Pabloa kegøtø nømun ñimuimay ørtrab inder. ²⁶ Tru Pabloa, Bernabéba Señor Jesucristoi munchigurri ke kwamig nebuinarraptiikken inchib meløwar kôn. ²⁷ Incha nambe Judaswanba, Silaswanba ñimuimay ører. Truiløbe nam pørigwan, nømashib trunundøwei waminchun. ²⁸ Espiritu Santon lata, namun lata tabig asønatan katøgan srøig, srøig maramelø ñimun negwanmøtø, iig tru maramig palønrrapteelandøh martrai karumig: ²⁹ tru taska mari tiusmeran animal kweecha pønnsrai yaumeran mamøwei, katø aniwan mamøwei, kweetsig kômøtø ka melamisratø kwaig animalmerai yauwan mamøwei, katø møguelø lata ishumbur lata larrø trømbøig marmøwei indamigwan. Ñim øyeelan marøb pønrrømuiikkurrimbe, søl marøb pønrrønrrabguen.

Trube, ungwa, mayanguen tab kuilø kônrrigay, chib pørig kôn.

³⁰ Incha yandø nømun, ‘trube, ka amrrigay’ cha øren, Siria pirausrø Antioquiamay amba, tru asamigwan ashchab eshkailø tulundzunøben, tru kilga ørigwan nømbe tranøbelø kôn.

³¹ Incha trunun nøm lewabe, truba kasraarabelø kôn øyeeeg purugub wam tabig wamindigwan møra. ³² Inchen Judasba, Silasba nømgucha Tius maig karuigwan eshkabeløtøwein kua, tru tabig purugub wam nu wamincha ketiitøga trusrø nunelan kullaaramø ambub melamig kônrrai kørømarøbelø kôn. ³³ Incha truyu maya yana kòsrøn nømbe kørømisra warøben, nuneløbe ‘chi isumgaig tab kuilø kônrrigay’ chib, nømun karua ørøbelaisrømay ‘ungwa’ cha, katøle ørøbelø kôn. ³⁴ Inchen Silasbe trusrø nø kørømisramig tab punrrab kui isubig kôn. ³⁵ Inchen Pabloa, Bernabéba Antioquiasrø kørømisrøbelø kôn, trusrøelø truba yameløba Señorwei wamwan kusrennøb, katø trunun wammøsrøb.

Pablo nui martrab yamigwan katøle marøb pølbasrøb

³⁶Yandø mam kwalømyu kørørnbe Pablobe Bernabéwan trenchibig kòn:

—Ciudamørig nam Señorwei wamwan eshka kusrenaniisrø nunelan maig inchi meløtashchab katø ashchab amun— cha.

³⁷Inchen Bernabébe Juanwan, katø nundøwei Marcos taigwan, pera inrrab inchen, ³⁸trune Pablobe pera ambamgaig kui ashibig kòn, kaguende tru srøsrø ambenma Marcosbe Panfiliatø nòmun tarømisra, nòmba tru maramigwan martrab imuinukkurri.

³⁹Inchen ke mumayguen kòmig peemaytø puptinchen, møikkurrindøgucha tarømisra, Bernabébe Marcoswan pera barcoyu Chipresømay ibig kòn. ⁴⁰Incha Pablobe nuimburappe Silaswan lawa wesrawa, tru nunelø: “Señorwei ka yandø tab indiitøga tabig ashib tøgagüilø kørriigay” cha øriilø ambubelø kòn. ⁴¹Inchen Siria pirauwanba, Cilicia pirauwanba pureb ibig kòn, Tiuswei ureemera tru iglesia truørø pønrabelan kullaaramø, mur pønrønrri purugub waminchib.

16

Timoteo Pablonba, Silaswanba lincha ib

¹Pablo Derbesømba, Listrasømba pueblomerayu pubene, truyube kan Jesucristoi kusrenanigwan marøb megabig Timoteo taig tsubig kòn, trube Criston kørøweig judía ishugwei nusrkai. Inhendø møkaimbe griego købig kòn. ²Inchen Timoteobe tru Listrasø, Iconiosø nunelai utu, chigucha tamgaig tabig købig kòn. ³Inchen Pablobe Timoteowan nòmba lincha attrai incha, tru trusrø warabelø judíosmeragurri nune asru circuncidamigwan marøbig kòn, kaguende mayeeløba møkaimbe griego kui ashibelø kuimba. ⁴Incha nømbe tru pueblomerawan puraambub ambimørig, Cristo nøashib karua øriiløba, Tiusweimbura-belan pera marøb pønrabelø tru Jerusalénsrø purrabelø, maig marøb kørrii karuilane isua mørøb kørrii eshka ambubelø kòn trusrø Tiuswei ureemeran. ⁵Inchen trusrø tru iglesiamera pønrabeløbe nømui isubigwan Tiusweinug pasra pønrøamigu, kullaaramø, mur pønrøramisren, misaabe kwalømmørig nemisrøb ibig kòn.

Kan møg macedoniasriig Pablon piab lataigu kenamisrøb

⁶Incha nømbe Frigia pirøwanba, Galacia pirøwanbabe ka purab ambubelø kòn, kaguende Asia pirausrømbe Espiritu Santo Tiuswei wamwan waminchibashmuben. ⁷Incha Mísia linderosrø puabe, Bitinia pirausrø kebamrrab inchen, Jesúswei Espiritube trusrø kebam-bashmuben, ⁸Mísia pirø puluwan yabwandø puraamba, Troassrø kørøambubelø kòn. ⁹Indig trusrø Pablobe yem kan piab lataig asig tøgagüig kòn. Truyube kan møg Macedonia pirausrø pasramisra trenchib miab pasrai ashibig kòn: “Macedoniasrømay larraamø cha, namun purugunrrab.” ¹⁰Inchawei Pablobe tru piab lataigu treeg asin køben latatø, nambe Macedoniasrømay amrrab inchielø ker, namun Tius nui tabig srø wamwan eshka kusrenanrrai wamitamptøwei isua.

¹¹Indiibe Troaskurri barcoyu nebamba, Samotraciasrømay kanmaytø ke purab amba, katø kwalømbe Neápolisrø pua, ¹²truyugurrimbe Filiposrø pubelø ker. Tru ciudabe Macedonia pirau mas nuig køb, katø kan sötø Roma misaamera truyube kebamba warab inchielø kòn. Incha tru ciudayu nambe mam kwaløm kørørn kørømisrøbelø ker. ¹³Inchen kan isrin kwaløm tru ciudayu nu yaskabu wambiisrø webambubelø ker kan pi mendasrømay, truyube judíosmera Tiusba waminchab tulundzuninug kuitamab isua. Incha nambe truyu purramisra, ishumburmera tulaamba purrabelan waminchibelø ker. ¹⁴Inchen tru utube kan ishug, Lidia taig mørig waben, Señorbe nui manrøwan kurøbig kòn Pablo chi chitamøtrab ke tab mørig wanrrai. Trube, Tiatria ciudasriig, yalø pigø llensumera purø tabig yanøbig, trurrigu Tiuswan kørriibala tabig waminchib megabig købig kòn. ¹⁵Incha nøba, nui yaueløba piu umbu ulsailø kørømisra, ke tiusmanda chib namune trenchibig kòn:

—Na, Señorwan cierton kørøin kui ashabe, trube, ñim nai yamay amrrua, kørømisrøtrigay— cha.

Incha namune ke kørømisramne inchiibig kòn.

¹⁶Nam Tiusba wamindinuamay ambub købene, kan srusrø karuindiig megabig, kebasra tranøb kwaimandzig tøgagig namun katønrab arrubig kòn. Trube tru nun karub pera købelane truba nørø an asingarubig købig kòn, nø misagwan kebasra ketiiløtøga. ¹⁷Incha tru srusrøbe Pablonba, namunba wendautø trenchib trashib arrubig kòn:

—i! møgueløbe Tius Mayeelaim Pala Pasrabigwei karuindiig melabelø, kaigyugurri wesrailø køm maywan ñimun eshka kusrenanøbelø kòn!— chib.

¹⁸Inchen ke treetø treetø purø yam kwaløm uñen, yandø Pablon ke pesriikken inchen, nøbe keesha, tru kwaimandzigwane trenchibig kòn:

—Jesucristoi munchiyu i srusrainukkurri nabe webinrø tamønrøun— cha.

Inchen tru urastø kwaimandziibe elachibig kòn.

¹⁹ Inchen tru karub pera kōbelø tru treeg an marøb pønrramibe yandø patsi asha, Pablonba, Silaswanba kemøra, misag tulundzunuumu ya ke paluunchib waram srua ambubelø kōn, tru misagwan ashīb karubelaisrømay. ²⁰ Incha merrab pønrsrabe, trenchibelø kōn:

—¡Kan i mōgueløbe ya judíos kōleelø kōbendø, namui ciudawane ke chi maringuen asamgaig marøb amrrun! cha. ²¹ Nøm waminchib kusrenanøppe ke peemaytø mariilø nam uta tōgagømig kōmøwei, katø treegwan marøb kōmig kōmøwei inchai namune meriilan kusrenanan cha, nam ya romanosmeran.—

²² Inchen misaabe mayamba kanbalatø misra namig kurrøben, maig kōnrrabigwan asha marøb purrabeløbe, Pablomera kewagúilan tsakkandø wesrawabeta, tsiitøga itchai karubelø kōn. ²³ Incha nømune truba yam ichabeta, kailan keeri yau kebusra, truyu ashīb pasrabigwane webamrraingag purø may ashīb tōgagungarubelø kōn. ²⁴ Inchen tru treeg martrai karuigwan mōrabe, truyu ashībibe katøguchi umbusrø keera, srøbmeran cepoyu kegwana, purrønnoβig kōn.

²⁵ Inchen yem tōbøtasrømbe Pabloba, Silasbabe Tiusba waminchib, Tiusweyasig cantab kōben, katøganelø truyu keerig pōnrrabeløbe mōrøbelø kōn. ²⁶ Inchene ¡katø! mōin kagúitø mur pirøgønabig arruptinchen, tru kailan keeri yawan niga pasrabigwan truilanguen punø panrrø sruaguchen, ¡katø! tru urastø truyu maya yaskabmeraba kurig pōnrramisren, tru keerig pōnrrabelai cadenasmerabe mayeelaimba picha kōrrabelø kōn. ²⁷ Inchen truyu keeriilan ashīb pasrabig kiagasrøbene, mōimbe tru kailan keeri yau yaskabmerabe kurim pōnrraptindi ashabe, nui espadan wesrawa, ¡katø! nōasiitø ke yandø kwanrrab inchibig kōn, kaguende truyu pōnrrabelø chab wegørra chab lulitamab isua. ²⁸ Inchene Pablobe mur trashib trenchibig kōn:

—¡Ñiguen øyeeeg kaig marmøtø kagøbash! cha. ¡Søtøba nambe yu ka purrer!— cha.

²⁹ Inchene tru kailan keeri yawan ashīb pasrabiibe kan pela piløgaig miawa, umbusrø luløb kebya, Pabloba, Silasweimba merrab itønab tōmbønrsrøbig kōn. ³⁰ Incha wambig pera webyabe, payibig kōn:

—¡Au kasukumera! ¿na kaigyugurri wesraig kōmibe chi maramig palønrrerah?— cha.

³¹ Inchene nømbe trenchibelø kōn:

—Señor Jesucriston kōreu cha. Incha ñiba, ñui yaueløbañau kaigyugurri wesrailø kōnrrabgen— cha.

³² Inchen nømbe Señorwei wamwan nunba, nui yau purrabelø søteelanba waminchibelø kōn. ³³ Incha nømun ichabeta tru pisrø mariilan tru yemdøwei tre uras pillmawa, tru urastø nōba, nui yauelø kerrigueløba piu umbu ulsrailø kōbig kōn. ³⁴ Incha trugurrimbe Pablonba, Silaswanba nui yamay pera ya, manna, nōba, nui yaueløbañau Tiuswan kōreikkurri truba kasraarabelø kōn.

³⁵ Indiibe tōr-rabene, tru maig maramigwan asha marøb purrabeløbe tru policíameran karua ørøbelø kōn, tru kailan keeri yawan ashīb pasrabigwan, trenchinrrai: “Pablonba, Silaswanbabe elatchain” cha. ³⁶ Inchen tru yawan ashīb pasrabiibe Pablone trenchibig kōn:

—Tru maig kōnrrabigwan asha marøb purrabeløbe yandø ñimun weeriilø kōnrrai karua ørin kōn cha. Pøs treeg kōbene, webamba, chi isumøtø, ka ambay— cha.

³⁷ Trune Pablobe trenchibig kōn:

—Nam ya Roma pirausrø kal-lawar kōb lataitøwei kal-lawarwan, namun maig kuitashchab payaguen ashmubendø, maya misagwei merrab namun ichabeta, namun kailan keeri yau kebusra ¿møingan mugucha wammøriimøzhig namun nilø wertrab inditarru? cha. ¡Pøs chi treeg kōnrraamøn! chibig kōn. Pøs truiløtøwei namun wesrunrrab amrrubash— cha.

³⁸ Inchen tru policíamerabe tru maig kōnrrabigwan asha marøb purrabelan tru treeg taigwan eshkabene, truba kwaarøb kōrig kui inchibelø kōn, truiløbe Roma kal-lawar lataitøwei kal-lawar kuin kui wammøppe. ³⁹ Inchen nømbe Pablonba, Silaswanba ‘kan nambe treeg kōmui tamab isua indig kōn’ chib amba, kailan keeri yaugurri wesrawabe, ‘ciudayugurri ke tiusmanda amrray’ chibelø kōn. ⁴⁰ Incha truyugurri webambabe, nømbe Lidiai yamay amba, truyu Jesucristogurri nømui nunelan ashabe, maig melamigwan treeg marøb melønrrigay chib wamincha, yandø ambubelø kōn.

17

Pabloba, Silasba Tesalónicasrø

¹ Pabloba, Silasba ambuppe, Anfipoliswanba, Apoloniawanba puraambub amba, Tesalónica ciudasrø judíosmerai kan tulundzuni ya pasrabnug pubelø kōn. ² Incha Pablobe nøbe trendø treeg marøbig kua, tru judíosmera tulundzuni yausrø nømun ashchab kebya,

pøn sábadø ørøba tru judíosmeraba Tiuswei wamwan pørigugurri ‘øyeeg køn’ chib, ‘øyamay køn’ chib, waminchibig køn. ³ Øyeeg kuig køn’ cha, tab eshka:

—Tru Cristo ñim muniirab kuibe truba kaig indinab megawa, kwawa, katø kwaitai utugurri kurrab indamig, trendø treeg purayamig palønrrabig kuig køn— chib.

Incha nõbe trenchibig køn:

—I Jesús na ñimun eshka wamindiibe, Cristo truitøwein køn cha, tru ñim muniirab kuig.

⁴ Inchen mõiløgsrøn tru Pablo wamindigwan yandø treegwein kuitamab isua, Pablonba, Silaswanba linchen, katø griegosmera Tiuswan truba isua melabelø truba yameløba, katø ishumburmera truba kusrebelø yameløba truiløgucha linchibelø køn.

⁵ Inchen judíosmerabe truba pusrkwai namig kui asha, larrø kaig mõguelø ka lliraptø pønrrabelan wama, kan nu søtø trubalatømisra, ciudayu misaameran chineto isunrrai trømbøig inchib kurrabelø køn. Incha Jasónwei yau kegørrabelø køn, Pablonba, Silaswanba merrarrawa, misaamerai merrab wesunrrab. ⁶ Incha truyu wetørranrab kaimappe, Jasónwanba, nunelø katøganelanba kemøra, paluunchib waram srua ambubelø køn, ciudayu misaameran ashib karub purrabelaimay, trenchib trashib:

—Yu pirau kerriguba maya misaameran ¡katø! kan ørøba mandøgucha kømuelø melønrrai marøb mõgueløbe yusrøngucha amrruin køn chib. ⁷ Inchen Jasónbe nui yau wama pera wain køn cha. Iiløbe tru Roma maya misagwan ashib karub wabig César tru maig maramigwan martrai pøra warilane, mõrøg kømub utsøbetab ka nõmuimbaraptø marøbelø køn cha, katøgan rey køn chib, kan Jesús taig.—

⁸ Inchen iigwan mõrabe, maya misaameraba katø tru misagwan ashib karub purrabeløbabe truyu nõmgucha ke mandøguen kømui inchibelø køn. ⁹ Inchendø Jasónwanba, tru kanelanba elatsamig kønrrai truburø an utabe, elachibelø køn.

Pabloa, Silasba Berea ciudasrømay ambub

¹⁰ Inchen nuneløbe ke pillirabendø Pablonba, Silaswanbabe Bereasrømay webambin-garuben, trusrø puabe, judíosmera tulundzuni yau kebambubelø køn. ¹¹ Tru Bereasrø judíosmerabe tesalónicaelø lata kømø, maig isumigwan isummay isubelø kuabe, Jesu-cristo wamindigwan truba chull inchib uta, tru nõm trendaibe ka isatø kømuitashchab ashchab, kwalømmørig Tiuswei wam pørigwan chi køtashchab maig køtashchab ashibelø køn. ¹² Inchawei treekkurri truiløbe Criston truba nu køreben, kusreb ishumburmera griegasmera køben, katø mõguelø truba yameløba kørebelø køn. ¹³ Inchen Tesalónicasrø judíosmerabe, Tiuswei wamwan Bereasrøngucha Pablo eshka kusrenanøb unan taig wammøroppe, trusrø misag nõrrø pønrrabigwan namig kui inchib kurrønrrai martrab ambubelø køn. ¹⁴ Inchen tru urastø nuneløbe Pablone mar pulusrønmay øren, Silasba, Timoteobatø Berea kørrømisrøbelø køn. ¹⁵ Inchen Pablon pera ambubeløbe Atenassrøngatig pera amba pegucha, yandø tru Silaswanba, Timoteowanba ke petø nõba tulundzunønrrab amrrunrrain cha, Pablo trencha karuigwan mõrabe, nõmbe katøle Bereamay legucha amrrubelø køn.

Pablo Atenassrø

¹⁶ Incha Pablobe Silaswanba, Timoteowanba Atenassrø muniirab uña, ke taska mari tiusmeratø netsaig ciuda kui ashabe, nuinetø chiguen tab kømui inchibig køn. ¹⁷ Incha treekkurri judíosmera kusrenani yau judíosmeraba, katøganelø Tiuswan truba isua melabeløba ‘iibe øyeeg køn’ chib, ‘iibe øyamay køn’ chib ambugurri igurri waminchibelø køn, katø mayeelo misaamera tulundzuninug kwalømmørig truyu amrrubeløba chigucha. ¹⁸ Inchen nõrrø kusreb mõguelø, tru filøsofos “epicúreosmera” tailø, nõmui nõrrø isuigu asrwan ka tab kønrrai marøb tøgagúinuutø tabig køn chibeløba, katø tru filøsofos “estoicosmera” tailø nõrrø isuigwan kusrebeløba ‘iibe øyeeg køn’ chib; ‘iibe øyamay køn’ chib, Pabloba waminchibelø køn. Inchabe kan utueløbe trenchibelø køn:

—¿I mõg ya wamdø nigaibe namune chi wamincherah?— cha.

Inchen kaneløbe:

—Katøgan peg pirasrø tiusmeraiwan eshka kusrennøbig køb asøn— chibelø køn, kaguende Pablobe Jesúswei tru tabig srø wamwanba, kwawa katø øsiraigwanba eshka kusrenanen.

¹⁹ Incha nune kanbalø Areópago taig, tru kusrebelø tulundzuninumay merrarrawa pera amrrua, trencha payibelø køn:

—¿Tru srøig peeto kusrenanøb ñi waminchib arrigwan namun wammørsrkøbsrumugh? cha. ²⁰ Pøs namui kalumerayube ñibe chigøben ke ka peesrøtiitø waminndan cha. Inchawei trunun tab chi chibig kui wetøgørrag kuin ker— cha.

²¹ Kaguende mayeeløba Atenas warab misaameraba, katø tru petø ka amrruatø warabeløba įkatø! chi peg isumøtø, chigøben ke srøig isuigwandø waminchib kua, nømbe truiwangøba wamindi mørøg kui inchib købig køn.

²² Inchen Pablobe Areópago taig tru kusrebelø tulundzuninug nømuin tøbøtag pasramisra, trenchibig køn:

—Atenas misamera, ñimbe chiyutøgucha Tiuswan isuer taigu ke maizhikken pinab marmønrrab inchibelø kuin kui ashar cha. ²³ Kaguende na truørø llirab ashib uñene, tru tiuswan kørribala tabig waminchib mariiløsrø, kanbaløsrømbe altargucha wetørrar cha. Truyube trenchibig pørig tøgai,

TIUS ASIIMIIGWAN

chibig. Tru ñim ashmubendø kørribala tabig waminchib marøb tøgagúig, tru Tiuswan nabe ñimun eshkab waminchar, chibig køn.

²⁴ I Tius køn cha, tru pirøwan marøbig, katø truy chine købelan chigucha. Inchawei srømbalawan lata, pirøwan lata, nøwei ashib pasrabig kuig køppe, nømbe møguelai taska marig tab yamerayu wamúig køn cha. ²⁵ Katø misag nømui taska mariiløtøga tab inchaim palai wamúig køn cha, chi palai wamúig kuabe. Kaguende nø køn cha, mayeelan øsig kømigwan tranøb, israb amønami kønrrai tranøb, katø chigurrimbunø tranøb inchibiibe.

²⁶ Kan møkurrindø truyugurri chi misaatø larrøbichib inrrabigwan nømbe marig købig køn cha, pirø muba kuimburab warønrrai. Incha merrabsrøwei nøm maya yana waramigwanba, chutø, chutø waramigwanba kanmaytø chab asha pønsraig købig køn cha. ²⁷ Øyeeg marøppe, ka srølamøratøguen Tiuswan lawa inchippa, wetørratashchab indig køn cha. Pøs isa kømø, Tiusbe nam møigweinuutøgucha chi yab pasrømøn cha. ²⁸ Kaguende nambe Tiusweinug øsig pønrrab, nøgurri llirab amøñib, nøgurri misag pønrrer cha. Katø kan ñimui utuitøwei, chiwan køben purø tabzhig isua waminchibiima trendaig købig køn cha: “Name Tiusweinukkurri larrøbicha amrrub misamera ker” cha. ²⁹ Pøs trube, nam Tiuswei uremera kuig køppe, Tius nø trendø maig kuigwane kabe oron, kabe anwan, kabe srugwan møguelai isuitøga taska purø tabzhig mari lataig kuitamab isumgaig køn. ³⁰ Chigucha nebua ashmeelø køb urassrø øyeeg waraig købigwane, Tiusbe ka treeg purainraindø kagøbashippa, mõi yan kwalømmerawane maya misaameran chuelandøgucha nømui kaig mariilan isua møra, Tiusweimay lliranrrai karua pasran cha. ³¹ Kaguende nømbe pirau maya misaameran maig asha maramig kan kwaløm wesrua pasran cha, tru sølgandø tabig maig kønrrabigwan maramig tru kan møg treegwan martrai nø lawa wesrua pasriitøga martrab. Incha treeg purainraitamab isua pønrramig kønrraimbe, tru møwane kwaitai utugurri kusruig købig køn— cha.

³² Inchen tru mørøbeløbe, tru kwaitø katøle øsiiranrrun taigwan mørøppe, kan utueløbe ke ka indzatø møren, katøganeløbe trenchibelø køn:

—I wamindigwane katøwan chi mørtrumøn— cha.

³³ Inchen yandø Pablobe nømui utugurri webya ibig køn. ³⁴ Inchen køben, møiløgøsrøn møguelø Pablon mendig amba, Tiuswan kørrebelø køn. Inchen tru ututø Dionisio tru Areópagoyu kusreb møguelai utuiba, katø kan ishug Dámaris taiba, katøganeløba Tiuswan kørrebelø køn.

18

Pablo Corintosrø

¹ Inchen treeg puraiaben, Atenaskurri Pablobe Corinto ciudadsrømay webibig køn. ² Incha trusrømbe kan judío Aquilas taig Ponto pirausrigwan wetørrabig køn, tru Aquilasba, nui srai Priscilababe Italiagurri Corinto ke srø puatø warøben. Kaguende tru Roma maya misagweim pala ashib karub wabig Claudiobe treeg karuin købig køn, judíosmerabe mayamba Romagurri webusriilø kønrraingue. Incha Pablobe truilaimay ibig køn. ³ Inchen Aquilasba, Priscilababe Pablo nø marigwandøwei tru carpas ya-ureg marøb tsushibelø købene, nømbe kørømisra tru marøb warabelø køn. Pøs nømbe carpas ya-ureg marøb tsushibiitøwein købig kua. ⁴ Incha judíosmera tulundzuni yau isrin kwalømmørig Pablobe øyeeg køn chib, øyamay køn chib waminchibig køn, judíosmeran, griegosmeran maig kuigwan nebua asøskønrrab inchib.

⁵ Inchen Silasba, Timoteoba Macedoniagurri pubene, Pablobe Jesúsweimburab eshkab kusrenanamigutø kebya pasramisrøbig køn, tru judíosmeran: “Jesúsbe tru ñim muniirab kuig tru Cristo køn” cha eshkab. ⁶ Inchen judíosmerabe mørøg kømub chi treeg kømubendø indan chib namig kurra, nun tsalø wamøben, Pablobe nui kewagúilan pabørrgøb trenchibig køn:

—iÑimui animbe ñimuim palatøwei peñchai mømibe ñimdøwei lawa pønramisran! cha, įYandø mømibe tru animbe naim pala attraingai chishig webya pasar! cha. Møingurrimbunøbe judíos kømø misaameraisrømay yamønrrun— chibig køn.

⁷ Incha truyugurri webya, kan mōg Tito Justo taigwei yamay ibig kōn. Truike Tiuswan kōriibala tabig waminchibig kōbig kōn. Inchen nui yabe tru judiosmera tulundzuni ya mendatōweim pasrabig kōn. ⁸ Inchen tru judiosmera tulundzuni yau ashib pera pasrabig, Crispobe, nui yauelōba kerrigu Señorwan kōreben, mōilōgōben truba yamelō corintosreelōgucha Pablo wamindingwan mōrōbelōbe Criston kōrewa, piu umbu ulsrailō kuig kōn. ⁹ Inchen Señorbe Pablon yem kan piab lataigu trenchibig kōn:

—Kōrig kui inchimōta cha; waminchibig waminchi cha; ka kōbashiptionchimōtō. ¹⁰ Kaguende nabe ñiba pasrar cha, ñune mugucha kaig martrab kebatachab kaimanrrun cha. Kaguende i ciudayube nabe misag truba nu tōga pasrar— cha.

¹¹ Inchen Pablobe Corintosrō pila y tōbō pila kōrrōmisrōbig kōn, Tiuswei wamwan kusrenanōb.

¹² Galión Acaya pirau maya misagwan ashib karubig kōb uras judiosmerabe sōteelōba ke kandō isua pōnrramisra, Pablon ashig kōmub namig kurra, tru maig maramigwan asha marōb purrainumay srua ambubelō kōn, ¹³ trenchib:

—Tiuswan kōriibala tabig wamindamig tru maig maramigwan martrai Moisés pōrig maringarumay kōmōtō, nōbe misaameran ke peemay maramne inchib unan — chib. ¹⁴ Inchen Pablobe ke waminchabguen inchen, Galiónbe judiosmeran trenchibig kōn:

—¡Au, ñim judiosmera! Kan chigōben truba nu kalō marig kui, kabe purō trōmbōig marig treeg chigūimbe, trube na ñimun treegwan mōrōb wabsrubrainrrun cha. ¹⁵ Inchendō iibe chi treeg kōmōtō, ka wamindiilanbah, katō tru munchimera chabah, tru ñimui maig maramigwan martrai pōra warilō chatatōrre inchib kuig kōbene, uyube ñim asay cha, oyeegwane nabe asha tranrrabgucha wamur— chibig kōn.

¹⁶ Incha tru maig maramigwan asha marōb purrainukkurri wambig weguchibelō kōn. ¹⁷ Inchen mayeelōmisra judiosmera tulundzuni yau ashib pera pasrabig Sōsteneswan kemōra, tru maig maramigwan asha marōb purraig merrab truba kurraguchibelō kōn. Inchen Galiónbe trunune chigucha isua ashmō, chinchibgucha warōbashmab ashibig kōn.

Pablo katōle Siria pirau Antioquíasrōmay ib

¹⁸ Inchen kōben Pablobe katōgucha truyu yam kwalōm kōrrōmisra, nunelan yandō ‘ungwa’ chibig kōn. Incha yandō Siria pirausrōmay barcoyu iben, Priscilaba, Aquilasba nōba ambubelō kōn. Incha Cencreasrōmbe Pablobe pusrugwan chishchig parōbig kōn, Tiuswan ‘nō maig martrab cha kōrrōmisrigwan treeg maramōnrrun’ chib. ¹⁹ Incha Efeso ciudasrō puabe, Priscilanba, Aquilaswanba tarōmisra, judiosmera tulundzuni yau kebya, judiosmeraba maig kuitashchab payiyub waminchibig kōn. ²⁰ Inchen nōmbe katōguchi nōmba truyu kōrrōmisrtrai tiusmanda chib kuingucha, nōbe kōrrōmisrmōtō, ²¹ nōbe yandō:

—Ka inrrab inchar cha ‘ungwa’ chabe, trenchibig kōn: Tius nan katō yusrōmay attrain kōbene, katō arrumōnrrun— cha.

Incha barcoyu nebya, Efesogurri ibig kōn. ²² Incha Cesarea ciudasrō puabe, tru iglesian ‘ka warōgueh’ chinrrab nebya, trugurrimbe Antioquíamay kōrraarrubig kōn. ²³ Incha truyu kan maya yana kōsrōn tsuabe, Galacia pirauba, Frigia pirauba, trusrō lutōgurri llirab inrrab webibig kōn, mayeelōba tru Jesucristoi kusrenanigwan marōb melabelan kullaaramō, mur pōnrrōnrrai purugub waminchib.

Apolos Efeso ciudasrō eshkab kusrenanōb

²⁴ Inchen tru uras kan judío alejandríasriig, Apolos taig, purō may waminchib mōg Tiuswei wam pōrigwangucha treetōwei purō nu nebua ashibig, Efeso pubig kōn. ²⁵ Nōbe Señorwei maywan muba amōnamigwan kusrenanigwan kusrenweig kua, nōbe jkatō! treegwan martrab isua marōb, Jesúsweimburab waminchib kusrennōppe, maig kuigwan treeg kusrenanōbig kōn. Juan tru misaameran piu umbu ulsrailō kōmig kusrennigwandō nebua ashibig kuagucha. ²⁶ Incha Apolosbe judiosmera tulundzuni yau mungucha kōrmō waminchib kusrennōb pōlbasen, Priscilaba, Aquilasba tru wamindingwan mōrabe, Apoloswane nōrōpera amba, Tiuswei maywan katōguchinguen tab nebua asingarub maig kuigwan eshkabelō kōn. ²⁷ Inchen Apolos Acaya pirausrōmay inrrab inchen, nunelōbe masken ka martrai inchib, trusrō tru Jesucristoi kusrenanigwan marōb melabelan kan kilga pōrōbelō kōn, Apoloswan nōm tabig wamab utōnrrai. Inchen nōbe Acayasrō puben, Tius tru nō ka yandō tab indiitōgatō Tiuswan kōrebelayasibe kan maya nuguen tab kōbig kōn. ²⁸ Kaguende judiosmera tru nōm ‘treeg kōmōn’ chib amruigwane mayelai merrab Apolosbe mu mandamgaig ‘treeg kōn’ chib waminchibig kōn. Tiuswei wamwan pōrigu treeg chibig kōn cha eshkab: “Jesúsbe tru Cristo ñim muniirab kuig, truibg kōn” chib.

¹ Apolos Corinto tsumne, Pablobe tru pirauwandøwei pureb ya, Efesosrø kørraarrua, kan møiløgøsrøn Jesucristoi kusrenanigwan marøb melabelan wetørrabig køn. ² Inchabe trencha payibig køn:

—¿Nimbe Criston køreb uras Espíritu Santon utøgueh?— cha.

Inchene nømbe:

—Espíritu Santo købig kuin kui nambe wammørbøguen wammørmeelø ker— cha trenchibelø køn.

³ Inchene Pablobe trenchibig køn:

—Trube, ñimun tru piu umbu ulsraibe ¿chi køn chibigwan utig køh?— cha.

Inchene nømbe trenchibelø køn

—Nambe Juanwei piu umbu ulsraigwandø utig køn— cha.

⁴ Inchen Pablobe trenchibig køn:

—Juanbe nøm mas kaig marmønrrab isua møra, Tiusweimay llirain kønmab asamig piu umbu nømun ulsrailø kuig køn cha, tru nui wendau attrabig Jesúswan nø kuitamab isua, misaamerabe nun køreinrrain— chib.

⁵ Inchen misaamerabe øyee-gwan mørabbe, Señor Jesúswei munchiyu piu umbu ulsrailø købelø køn. ⁶ Incha Pablo tasigwan nømumim pala estsarene, nømumim palabe Espíritu Santo kørraarruben, møriimø wammera waminchib menda, Tius maig karuigwan nømbe waminchibelø køn. ⁷ Truiløbe kerrigube møguelø doceburab købig køn.

⁸ Incha Pablobe pøn pøl ørøba judíosmera tulundzuni yau nøbe chigucha kørmø kusrenanøb 'øyeeg kømøn' chib, 'øyamay køn' chib waminchibig køn, maig kuigwan nebua asamne inchib Tius nø ashib karub pasraigweimburab. ⁹ Inchen kan utueløbe nømui manrrømeran mur marøb, trunun treeg kømuitamab isub kaashib, maya misagwei merrab trømbøig wamabelø køn tru srø maywan. Inchen Pablobe nømun tarømisra, tru Jesucristoi kusrenanigwan marøb melabelan nøørø pera ya, kan Tirano taigwei kusrenani yau kwalømmørig 'iibe øyamay køn' chib eshkab waminchibig køn. ¹⁰ Treetø pa pila ørøba maren, trugurri Asia pirau warab misaamerabe mayeeløba, judíosmera lata, griegosmera lata Señorwei wamwan mørbøbelø køn. ¹¹ Incha Tiusbe Pabloi tasikkurri maramburab mariilø purø nørreelø marøbig køn. ¹² Pabloi pañelumeran katø chigøben marøb pasramistrab pala itøgueelø nui asr kebatiilan, truilanbaguen kwanrreelaim pala wartrab srua amben, treetøgatø nømui kwanrrømerabe chab tammisriilø kørørmisren, kwaimandziimerabe nømuiinukkurri webamben inchibelø køn.

¹³ Inchen mø judíosmera køsrøn kwaimandziimeran tru misaamerainukkurri webusrøb truørø, truørø amøñibeløgucha tru treeg maramig Señor Jesúswei munchitøga mara ashchab inchibelø køn, tru kwaimandziimeran trenchib:

—¡Tru Pablo eshkab kusrenanig Jesúswei munchiyu, nabe webambay tamønrrun!— chib.

¹⁴ Inchen tru iigwan marøbeløbe kan judío Esceva taig, tru sacerdotsmeran karubigwei nusrkalø sietø købig køn. ¹⁵ Inchendø nøm treeg maren, tru kwaimandziibe nømune trencha løtabig køn:

—Jesúswane mu kui ashib, katø Pablongucha mu kui ashib inchibig kur cha. ¿Inchen ñimbe mumera kermah?— cha.

¹⁶ Inchen tru kwaimandziitøga møøbe nømumim pala itøbørsrawa, nømune mayeelanba kamaren, ¡katø! nømbe tru yaugurri kegøsaateelø kørriindiilø chab luløbelø køn. ¹⁷ Inchen tru øyee-g purayaigwane tru Efeso warab misaamera mayeeløba wammørig kørørmisrøbig køn, judíosmera lata, griegosmera lata. Inchen mayeeløba truba truba køriimatøben, Señor Jesúswei munchibe masken, masken wammørig kørørmisrøb ibig køn.

¹⁸ Inchen møiløgøben truba yamelø Criston kørebeløbe øyee-g maramgailanrre marøbelø ker chib mayeelai merrab eshkab amrrubelø køn. ¹⁹ Inchen tru kaig libron kusrewa, kwaimandzigweimburabelan marøbeløbe truba yamelø truiløgucha treetøwei tru nømui kaig libromeran srua amrrua, mayeelai merrab chab parrøbelø køn. Inchen tru libro peni anmeran mayan køtashchab ashene, cincuenta mil købig køn. ²⁰ Incha øyamay Señorwei wambe larrøbichib nurab, mu chindamgaig kørørmisrøb ibig køn.

²¹ Inchen øyeelø chab purai-ben, Pablobe Macedonia pirauwan køben, Acaya pirauwan køben llirab yabe, nui-netø Jerusalénsrømay inrrab isua, trenchibig køn: "Jerusalénsrømay yabe, Romasrømaygucha yamig tab punrrautan" cha. ²² Incha Macedoniamaybe nui pagatø purugubelan Timoteowanba, Erastonba øra, nøbe Asia pirau katø kan maya yana køsrøn kørørmisrøbig køn.

Efeso misaamera ke chindi asamgaig inchib kurrab

²³ Tru kwalømmerrawan tru srø mayweimburappe truba namig waminchib kurrabelø køn. ²⁴ Kaguende kan møg, Demetrio taig, andøga chigøben marøbiibe, tiusa Dianai ya-ureemera andøga mariilø tabzheelø marøbig kua, tru katøganelø treeløwei marøbelane tru yaniiløtøga

purø kørro anmera maringarubig købig køn. ²⁵ Incha tru treeg marøbelanba, katøganelø treeg lataitøwei marøbelanba tulundzuna, Demetriobe trenchibig køn:

—jNim mayeelø! nam puarmera misrøb ambamibe øyeeg mariiløyugurri an arrubig kui ñimbe ashibelø køn cha. ²⁶ Katø ñimbe ashib, mørøb indiinrrun cha, Efesotø kømøtø, Asia pirau kerrigu lutau Pablobe: “Møguelø taska mariiløbe tiusmera kømøn” chib, ke treeg kuitamab isumne inchib wamincha, misagwan truba nørø tarømarin køn cha. ²⁷ Kan nam iitøga yeeg yanøb an marøb kuibe øyeeg inchene, chi tabig kømui ashib kashib kebamben nambe kegørramsun køn cha. Katø trutø kønrrab kuindø, tru purø nu tiusa Dianai tab yagucha, chigucha kømig lataig kørørrmisrøb iben, Diana, tru purø nuig, purø tabiibe petø pinab inrrun chibig køn, Asia pirau mayamba, yu pirau katø maya misaameraba, nun køriibala tabig waminchib tøgagüig.—

²⁸ Inchen øyeeg wamindiilan mørabe, purø trømbøig nama, trenchib trashibelø køn:

—jEfesosmerai Dianabe purø nuig køn!— chib.

²⁹ Inchen tru ciudayu maya misaabe ke chindinguen asamgaig inchib mendappe, misaabe ke kanbalatø amba, Pabloi linchibelø Macedoniasrø møguelan, Gayonba, Aristarconba kemøra, jkatø! paluunchib waram srua ambubelø køn, tru chigøben waminchab misag tulundzuniisrømay. ³⁰ Inchen Pablobe truyu misagwan waminchab kebinrrab inchen, Jesucristoi kusrenanigwan marøb melabeløbe kebibashmeelø køn. ³¹ Katø møiløgøsrøn Asia pirau misaameran ashib karub purrabelø Pabloi trendø asiilø chigucha, nuimay ørøbelø køn: “Tru chigøben waminchab tulundzuniisrømbe tiusmanda ke-bimørrig” cha eshkanrrai. ³² Inchen misaamera truyu tulundzuna pasrabiibe ke chindinguen asamgaig inchib kuig køppe, kaneløbe peg chib trashiben, katøganeløbe katø peg chib trashiben, tru mayeelø lutau tøbø pasrabiibe chinchab tulundzunin kuinguen mørmøwa købig køn. ³³ Inchen tru nu misag pasrabigwei utuelø møiløgøsrøn Alejandron webingarundiig køn chib eshkaben, judiosmerabe maya misaamerai merrabsrøngatig purainrrai trawaguchen, Alejandrosabe maya misagwei merrab maig kuigwan eshka waminchab, ‘niløtø kuy’ cha, tasig kusrubig køn. ³⁴ Inchendø judio kui wetøgørrappe, katøle sötøbah, sötøbah trashibelø køn, kan pa ura purab trenchib:

—jEfesosmerai Dianabe purø nuig køn!— chib.

³⁵ Inchen tru ciudayu tru chigurrimbunø mariilanba, maramelanba kilga pørøb wabiibe misagwan yandø mas trashimumne inchib megaptø, yandø wasrørangaruabe trenchibig køn:

—Efeso misaamera, tru purø nuig tiusa Dianai tab yawanba, katø tru nø lataigwei srømbalasarøngurri peñibigwanba, yamba i Efeso ciudabe truilan chi kømønrrai ashib pasrabig kui jkan mube wammørmig kønrraitamabelø kø chindah? cha. ³⁶ Inchawei treeg kømubendø chib kan mugucha isan tamgaig købene, ñimbe yandø wasrøramdiig køn chibig køn, chiwandøgucha ke kan chinchaptø inchib marmøtø. ³⁷ Kaguende i møguelø ñim srua amrruiløbe namui tiusmerai tab yamerayugurri nilab wesrub kømøwei, namui tiusan purø trømbøig chi wamab pønrrømmøwei indan cha. ³⁸ Inchawei Demetrioba, katø tru nøba treetøwei marøb pønrrabeløba muba køben aleguiyaig tøgaguabe, truweiwei maig kuigwan nøm asha martrai truyu purøora pønrramelø pønrrab, katø maig kønrrabigwan asha marøbelø purrab indan cha. Møitøgucha truyube kangurriin kangurri ñimun maig punrrabigwan treeg asha martra tay, chibig køn. ³⁹ Inchen ñim katøgan peg wamindamig tøgaguabe, trube, treegwan waminchab tulaamba, trunun purramisra asamig palønrrun cha. ⁴⁰ Kaguende møi øyeeg puigwane namune ka kailø køptørre, øyeeg martrab kurrig kui inchaptiikken køn cha, kan chigurri nambe øyeeg inchib kurrig køn cha eshka pønrramig chigaabendøbe.—

⁴¹ Incha nøbe øyeeg taitøga misag tru tulya pasrabigwane chab tarømarøbig køn.

20

Pablo Macedoniamayba, Greciamayba ib

¹ Yandø tru øyeeg chindinguen asamgaig marøb kuig wasrøraben, Pablobe Jesucristoi kusrenanigwan marøb melabelan wamingarua, maig melamigwan treeg marøb melønrrigay chib wamincha, trugurrimbe nømun ‘ungwa’ cha, Macedoniasrømay inrrab ibig køn. ² Incha tru pirau truøø lllirab uña, Tiuswei ureemeran maig melamigwan treeg marøb melønrrigay chib truba nu wamincha ketabe, Greciasrømay ibig køn. ³ Incha nø trusrø pøn pøl kørørrmisra, yandø katøguen Siriamay barcoyu ke inrrabguen incha, judiosmerabe nilø trubatø nun kaig martrab inchib kui wammørbøig køn. Incha treekkurri katøyug Macedoniawandøwei purainrrab ibig køn. ⁴ Inchen bereasriig Pirroi nusrkai Sopater køben, tesalónicasreelø Aristarco køben, Segundo køben, Derbe pirausreelø Gayo køben, Timoteo køben, Asia pirausreelø Tíquico køben, Tróximo køben Pablon linchibelø køn. ⁵ Incha nømbe namui merrabguen webamba, Troas ciudasrø namun muniirain købig køn. ⁶ Pirri

chi levaduragaig main kwalømmerra chab patsøben, nambe Filiposkurri barcoyu webamba amba, trattro kwaløm wendau Troas ciudarsø nømun wetøgøbelø ker. Incha truyu trune kørømisrøbelø ker.

Pablo Troassrø ashchab ib

⁷ Incha nambe truaalømbe tru pirriwan pirishinrra manrrab tulundzuna køben, Pablobe waminchab pølbasøbig køn. Kaguende katø kwalømdø nuimbe webyamig køben, nui wamindamigwan waminchippe, yem tøbøttakattig waminchibig køn. ⁸ Inchen pala pisusrø nam tulundzuna purrainuube, lãmparamera truba yam pilab meløben, ⁹ kan matsinø, Eutico taig, pendana pala wabigwane yandø ki kanab arruben, Pablobe jkatø! waminchibig waminchen, tru matsinøwane yandø ke kigøbiitø kamarig kib wawa, tru pøn pisusrøngurri kebinabya, kwabeñen, kwaig kusrabelø køn. ¹⁰ Inchen Pablobe kørøarraua, tru matsinan irab kusrawabe, trenchibig køn:

—Øsiiran cha, kwarmøtay— cha.

¹¹ Incha Pablobe katøle palasrø nebarrua, tru pirriwan pirisha mab kua, katø nømui mamigwan chab mabe, tør-rramnegatig wamincha, yandø ibig køn. ¹² Inchen tru matsinane øsiguig pera amben, mayeeløba truba isuin kua, kasrag kuilø kørømisrøbelø køn.

Troassrøngurri Miletosrømay ambub

¹³ Incha nambe merrab misra amba, Asøn ciudarsøngatig barcoyu ambubelø ker, Pablon trusrø katønrrab, kaguende nøbe barcoyu kømøtø, katsikkatø inrrab misra, nøbe treeg kørømisrig køben. ¹⁴ Incha Pablobe namba Asønsrø asiyaben, nambe barcoyu nun nebera, Mitilene ciudarsømay ambubelø ker. ¹⁵ Incha truyugurri webamba, katø kwalømbe Quío ciuda pinrøguesø pubelø ker. Incha wendø kwalømbe Samos ciudarsø pua, katø kwalømsrømbe Mileto ciudarsø pubelø ker. ¹⁶ Incha Pablobe Efeso ciudarsømbe barcoyu purab inrrab isuig køn, kaguende Asia pirau menrra yana kørømisrmønrrab isua. Pøs treeg nebubene, Pentecostés kwalømbe Jerusalénsrø wanrrab isuig kua, mallatø inchib megaig købig køn.

Iglesiyau ashib pønrrabelan Pablo inrrab 'ungwa' taig

¹⁷ Pablobe Miletosrøngurri wamønrrai ørøbig køn, tru Efeso iglesiasrø tru Tiusweimbura-belan pera marøb pønrrabelan. ¹⁸ Incha amrrubene, trenchibig køn:

—Nimbe na srøsrø kwaløm Asiasrø punukkurrimbunø, nabe chu urastøgucha ñimui utu na maig uñibig kuigwan ñimbe tab ashibelø køn cha. ¹⁹ Ñimui utu Señorweimbura-belan maig køben inchimø, tammay marøb, truba kappin kørøggøb, judiosmera nan chinetø kaig martrab kurrøben, treeløyu pureb arrigwan. ²⁰ Treeg kuingucha, ñimuyasig chigøben tabig kørørabigwane nabe kørig kui inchib sørab pasrømø, maya misagwei merrab lata, trusrø yamørig eshka kusrenanig købig køn cha, ²¹ judiosmeran lata, griegosmeran lata, nømui kaig mariilan isua møra, Tiusweimay liramigwanba, nømui isubigwan namui Señor Jesúsweinug pasra tøgagømigwanba eshka waminchib.

²² Incha mømibe nabe Jerusalénsrømay inrrab inchar cha, jkatø! nan trusrømay Espiritu ke inrrai inchen, trusrø nan chi purainrrab kuinguen mørubendø. ²³ Ciudamørig na yaisrømbe nane chi peg punrrabig pønrrømøtø, ka kailan keeri yau pasramibah, kaig nebuben isuig megamibatø treeg nebunrrab køn cha. Espiritu Santo eshkaigwan trunundøwei nabe asha pasrar chibig køn. ²⁴ Inchendø nai øsig kømigwangøba isub pasrømøwei, øsig kømibe nayasiibe purø tabig kuitamab isub pasrømøwei inchar cha. Nai chu pumigwan pumsrøngatig pub, katø Tiuswei tru ka yandø tab indig tru tabig srø wamwan eshka waminchab na Señor Jesúswan utigwan patsøggøb indikkurrimbunøbe chi kømønrrautan cha.

²⁵ Inchawei mayeeløba mømibe ñim Tius nø ashib karub pasrainuigwan na eshka kusrenanøbe pureb yaisreeløbe nai maløwane katølebe manugan ashschaamøn cha. ²⁶ Inchawei mømibe kanmaytø nabe kelarrab trendamønrrun cha: Mayelai ani naim pala attrain kømø, naimburappe yandø chi isumikkaig chish pasrar cha. ²⁷ Kaguende Tius maig martrab isua tøgagüigwane nabe kørig kui inchib chi sørab pasrømø, kerrig eshka wamindig kuig køn cha. ²⁸ Inchawei ñimbe ñimasiitøwei tab ashiptø kuy cha, katø ñim ashib tøgagüig Tiuswei iglesia mayeelan chigucha. Truilan ñim Tiusweimbura-belan ashib pera pønrrønrrai Espiritu Santo pønrsraig købene, mayeelø Señorwei iglesiyuelan maig ashib tøgagømigwan treeg ashib tøgaguy cha. Kaguende truiløbe nuyasig nui anindøga peniilø køn cha. ²⁹ Kaguende na yugurri webya ibene, ñimui utube mendailø kerrunrrun cha, ñim ashib tøgagüi ubisha sötøwan pinishinrrabelø, kan lobosmera larrø namiguelø lataiilø. ³⁰ Inchen ñimui utueløtøweinguen nømui kaig kusrenaniiløtøga, tru Jesucristoi kusrenanigwan marøb melabelan peløsrka nømui mendig amøñibelø kørørrai martrabelø kurrønrrun cha. ³¹ Inchawei treeg købene, pesannamø tab ashiptø, katø isua kuy cha,

tru na pøñ pila ørøba yem, kwaløm ñimun møigwandøgucha maig melamigwan ke isuppatø meløñrrai, ñimun chu uraskucha kanun kanun na kappin kørøgøb wamindig købig køn cha.

³² 'Trube, mømibe øyeeg købene, Señor Jesucristogurri nunelø, ñimun Tius nø ashib tøgagøñrraimba, katø nui tru ka yandø tab indig wamyuba pøñsra cha. Truibe tabig nørørab amrrai maramburab marøbig køb, katø tru keta tranrrab kørømisrigwan, nuyasiitø tarømarilø mayamba trunun utamig køñrrai marøb inçhibig køn cha. ³³ Nabe anwan lata, oron lata, asru keelan lata, muiwangucha naimarømmøø inçhib chull inçha kømur cha. ³⁴ Ñimbe ashibelø kuinrrun cha, naimburab chi palabelanba, yu purrabelai chi palabigwanba tøgagøñrrai, marøbiibe i nai tasiimera kui. ³⁵ Chiyutøgucha nabe øyeeg mariiløtøga, truburab kømeelan kuñab purugunrrab, øyamay kømig købig kuitamab asha køñrrai marøb ñimun kenamarig købig køn cha. Señor Jesús øyah tailane nai turyube ke tindøgague: "Tranamibe, utamig lataguen kømø, mayanguen tab kuig køn" cha, tru trendaigwan.—

³⁶ Inçha iigwan çhab trenchabe, Pablobe tømboñsra, søteeløbamisra Tiusba waminçhibelø køn. ³⁷ Inçhen søteeløba truba truba isub kishib, Pablon irab, muchabelø køn. ³⁸ Inçha truba isui kishib waminçhibelø køn, kaguende Pablobe nune yandø mas ashmøñrrautan çhib wamindikkurri. Inçha barcosrøngatig linçha ambubelø køn.

21

Pablo Jerusalénsrømay ib

¹ Inçha yandø nambe nømun 'ungwa' cha, tarømisra amba, barcoyu nebambabe, Cossrømay sølgandø amba, katø kwalømbe Rodasrømay, truyugurrimbe Pátarasrømay ambubelø ker. ² Inçha Pátarabe kan barco Feniciasrømay inrrabig pasrain køben, truyu nebamba ambubelø ker. ³ Inçha puraambub amba, mar tøbøtag pasrabig tru Çhipre pirøwan nebua asha, truigwane yandø atsimaygatø kørømarøb, Siriasrøngatig puraambub amba, Tirosrø pubelø ker, kaguende tru barcobe tru chi niga arrigwan truyu pinøøramig køben. ⁴ Inçha nambe truyu trune kørømisrøbelø ker, Jesucristoi kusrenanigwan marøb melabelø truyu warain køben. Inçhen nømbe Espiritu Santogurri eshkailø kua, Pablone Jerusalénsrømay imøñrrain çhibelø køn. ⁵ Inçhen yandø tru waram kwalømmera nemisren, nambe werruben, mayeelø nømui sraløba, ureeba ciudayurru wambiisrø werrumnegatig namune linçha werrubelø køn. Inçha truyu pi menda søtøba tømboñsra, nambe Tiusba waminçhibelø ker. ⁶ Inçha nambe kangurriin kangurri 'ungwa' çhabe, barcoyu nebamben, nømbe nømui yamay katø ambubelø køn.

⁷ Inçha nambe piu treeg puramrrub amrrua, Tirogurrimbe Tolemaidasrø pubelø ker. Inçha tru nunelan 'ka linçha warøgue' çhib puabe, nømba truyu kan kwaløm kørømisrøbelø ker. ⁸ Inçha katø kwalømbe, truyugurri webamba amba, Cesarea ciudadasrø puabe, Felipe tru Tiuswei tabig srø wamwan eshçab uñibigwei yau pubelø ker. Truibe tru srøsrø sietø wesrawa pøñsrailai utuig købig køn. Inçha nambe truigwei yau kørømisrøbelø ker. ⁹ Inçhen Felipeb piggatø nimbasrmera nømdeelø tøgagig købig køn, truiløbe Tius maig karuigwan eshkabelø. ¹⁰ Nam truyu yam kwaløm warøbene, Judeagurri kan møg, Agabo taig, Tius maig karuigwan eshçabig kørøarrubig køn. ¹¹ Inçha namuinug puabe, Pabloi pørønaigwan kusrua, nøasiitøwei katsigwanba, tasigwanba lusrabe, trenchibig køn:

—Espiritu Santøbe trendan çha: "Jerusalénsrømbe judíosmerabe i pørønaig puaigwane øyeeg lusra, judíos kømø misaameran tranrrun"— cha.

¹² Inçhen trunun mørabe, nambe truyueløba misra, Pablon 'Jerusalénsrømay imøta' çhib truba inçhibelø ker. ¹³ Inçhen Pablobe trenchibig køn:

—¿Chinçabrre kishib køgue çha, nai manrrøwan kullaaranøb ke nan ka isui inçhai inçhib? Pøs nabe ka lusriitø køñrrab kømøtø, kwamig nebubene, Jerusalénsrø ka kwanrraptø pasrar çha, Señor Jesúswei munchigurri.—

¹⁴ Inçhen nambe imøñrrai maya, maya inçhib meløwa kaimappe, trenchibelø ker:

—Trube, Señor maig køñrrain køben, treeg køñrrain— cha.

¹⁵ Inçha yandø truyu treeg warøwa, maig palønrrabigwan srua ambamig çhab tamarabe, Jerusalénsrømay nebamben, ¹⁶ katø møiløgøsrøn Jesucristoi kusrenanigwan marøb melabelø cesareasreeløgucha namba amrrubelø køn, kan çhipresriig Mnasun taigwan perar. Tru Mnasunbe manasrøwei Cristoimburbelø marøbig købig køn. Inçhen nambe truigwei yausrø pua, kiamig købig køn.

Pablo Jacobon ashçab ib

¹⁷ Inçha nam Jerusalénsrø pubene, nuneløbe namune truba tab wamab kasrag utabelø køn. ¹⁸ Inçha katø kwalømbe Pablobe namba Jacobon ashçab amben, truyu tru Tiusweimburbelø pera marøb pønrrabeløgucha kerrigu tulundzunabelø køn. ¹⁹ Inçhen Pablobe 'ka linçha warøgue' çhabe, lutøgurrih waminçhibig køn, tru judíos kømø misaamerai utu nui

maramelan marøb uniløtøga Tius chitø mariilan. ²⁰ Inchen trunun mørabe, Tiuswan truba tabig waminchibelø køn. Incha be Pablon trenchibelø køn:

—Trube, namui nuneg, judíosmerai utube purø nørø Jesucriston kørewa, truiløbe mayeeløba tru maig maramigwan martrai Moisés pøriilane nømbe chiwanguen pinab marmønrrab ke chinsraatø inchibelø kuigwan ñibe ashibig køn cha. ²¹ Pøs nòmune ñuimburab treeg wammørøsrkain pasran cha, ñibe tru judíos kømø misaamerai utusrø maya judíosmera warabelane Moisés pørigwan kusrenaniiløyugurri tarømisrøb amrrai treeg kusrenana, nømui ureemerane asru circuncidamøtay chib, katø namui trendø marøb amønailan treeg marøb amønimøtay chib kusrenanin kui. ²² Trube, ¿møimbe chi martrab? cha, pøs misaabe ñi arrin kui wammørøptøwei inchun cha. ²³ Inchawei øyeeg købene, nam maig taigwan mar cha. Yu namui utu pibgatø møguelø køn cha, Tiuswei merrab maig martrab taigwane treeg martrab kørrømisrar. ²⁴ Truilan ñiguen pera ya, tru nøm kaig marig chigaig kønrrab chish misrøb marigwan nømbe truguegøtø treegwan ka marøb, nømui pusrugwan køsaazhig partrai tru pusrug parøbigwan ñi pagarab inchi cha. Ñi treeg marene, tru ñi treeg inchibig køn chib tru nøm wammøra kuigwane ka isatø inchib kui mayeeløba wetøgørra, ñigucha tru maig maramigwan martrai Moisés pøriilan maig tailan marøb big kuin kui ashchun chibelø køn. ²⁵ Inchendø tru judíos kømø misaamera Criston kørebelaimburappe tru nam isua treeg martrab cha kørrømisrig, trunundø nambe nømun pørig kuig køn cha: tru animal kweecha taska mari tiusmeran pønssrai yaumeran mamøwei, katø aniwan mamøwei, urkawa kweetsi yauwan mamøwei, katø møguelø lata, ishumbur lata trømbøig marmøwei indamig køn— chib.

Tiuswei yaugurri Pablon merrarrawa, srua ambub

²⁶ Inchen Pablobe tru pibgatø møguelan pera ya, katø kwalømbe truiløba kegøtø tru chish misrøb marigwan nømbe kegøtø treeg mara, Pablobe Tiuswei yau kebbig køn, tru kaig marig chigaig kønrrab marøb kuin kwalømmera chi kwaløm nemisren, nømui kanuin kanui Tiuswan tru keta tranamigwan chi kwaløm tranamigwan eshkanrrab.

²⁷ Tru treeg marøb kuin trune patsønrrab kwalømbe, Asia pirausrø warab judíosmerabe Pablon Tiuswei yau ashabe, maya misag ke chindi asamgaig namig kurrønrrai mara, Pablon kemørabe, ²⁸ trashibelø køn:

—¡Namui misag, israelitamera purugurray! chib. Chutøgucha mayeealan namui misagweimburappa, tru maig maramigwan martrai pøra warilaimburappa, katø Tiuswei yaweimburappa tsalø køb ka nørøtø kusrenanøb uñibiibe, i møg køn cha. Incha kan treetø kønrrab kuindø, Tiusweyasiitø tarømarig i nui tab yau kan treeg ya kømui lata kaig trømbøig marøb, griegosmeran yu kertrab arrin køn— cha.

²⁹ Nøm øyeeg chib køppe, kaguende mana køsrøn Jerusalén ciudayu kan efesosriig Trófimoba lincha uni ashibelø kua, trunun Tiuswei yau Pablobe kertrab arritamab isuarre inchibelø køn.

³⁰ Inchen ciudayu misaabe ke chindi asamgaig inchib kurra, mayeeløba namig kurra, kan tulundø misra, luløb amrrua, Pablon kemøra, Tiuswei yaugurri wambiisrømay ¡katø! paluunchib megam srua amben, tru urastø yaskabmeran kasrøbelø køn. ³¹ Incha yandø kwetchab inchib køben, Romasrø maya suldau sötømeran ashib karub wabigwan, yu Jerusalén maya misag chindi asamgaig inchib namig kurrin køn chib eshka wam puben, ³² mõi mõi tru maya suldaumeran nø karubiibe suldaumeran køben, katø suldau cienbatø nøm karubelan køben, pera luløb kørraarrubig køn. Inchen tru maya suldaumeran nø karubigwanba, suldaumeranba judíosmera ashabe, yandø Pablone mas kurraguchimeelø køn. ³³ Inchen tru maya suldaumeran nø karubig puabe, Pablon merrarrawa, pagatø cadenastøga lusringarubig køn. Incha nøbe mu kuin kui, chi marøb unig kuin kui payibig køn. ³⁴ Inchen tru nu misag sötøbe, møiløbe peg chib trashiben, katøganeløbe katø peetø chib trashiben, treegu chi tainguen mørtrab kaima, suldaumera waraig muguen chindamga yaumay srua ambingarubig køn. ³⁵ Incha tru nebanab nebanbiisrøngatig srua pubene, tru nu misag sötø purø trømbøig inchen, treekkurri yandø truyugurrimbe suldaumerabe Pablone pala muta ambam nebugig køn. ³⁶ Kaguende truyu tru nu misag sötøbe mayeeløba wendautø trenchib trashib amrrubelø køn:

—¡Kweechi!— chib.

Pablo misagwei merrab ‘treeg mara pasrømur’ chib waminchib

³⁷ Incha Pablon tru suldaumera waraig muguen chindamga yau yandø ke kertrab inchen, tru maya suldaumeran nø karubigwan Pablobe trenchibig køn:

—¿Na chigøsrøn chinrrab, waminchibashchunrraguh?— cha.

Inchen tru nø karubiibe trenchibig køn:

—¿Ñibe griego wamwan waminchibig kōtirru? cha. ³⁸ Trube, tru mariizhiitō, misaameran kaig marōb pera kurra, tru pib mil ka kweechabetaptō amōñibelan mu misag warab waraimōsrōmay pera webibig ¿ñibe tru egipcio kōppeendi?— cha.

³⁹ Inchen Pablobe trenchibig kōn:

—Isa kōmōtō, nabe judío kur cha, Cilicia pirau Tarso ciudayu kal-laweig, chigucha kōmō ciudazhigu kōmōtō. Tiusmanda misagwan ka waminchibashcha— chibig kōn.

⁴⁰ Inchen tru suldaumeran nō karubiibe ka wamingingaruben, Pablobe tru nebunab nebambinug kurra pasramisra, misaameran nilōtō kōnrrai tasiitōga siñal maren, yandō wasrōnzhiig pinōben, hebreomay trenchib waminchib pōlbasrōbig kōn:

22

¹ —Ñim, nai nunelō, nai mōskalō, na treeg mara pasrōmuigwan waminchab inchar cha, ¡Mōrtray!— chib.

² Inchen nōm wamingdig hebreomay wamindi mōrōppe, masken wasrōnzhiig kōrrōmisren, Pablobe trenchibig kōn:

³ —Nabe judío kur cha, Cilicia pirau Tarso ciudayu kal-laweig. Inchendō nurappe, yu Jerusalén nurawa, katō nabe kusrebgucha Gamaliel maig kusrenanigwan kusreweig, tru maig maramigwan martrai Moisés pōriilan merrabsrō namui kōlli misaamera kan maizhikken pinab marmō, marōb tōgagūigu treegwan kusrenanig kur cha. Tiusweimburabigwan kalō marmōnrrab ñim mōin kwalōm mayeelō ke chinsraatō inchib pōnrrab lataitōweingue. ⁴ Nabe merrappe tru i srō maywan amōñibelane kwamnegatig marōb, mōguelan kōben, ishumburwan kōben merrarrawa, kailan keeri yau keeringarub indigwan, ⁵ maya sacerdotemeran nō karub sacerdote lata, katō mayeelō misagwan karubelō kōlli misaamera lata treegwein kuig kōn chib nōm eshkanrrab kuinrrun cha. Inchen nōmbe nane kilga pōriilō tranōbelō kōn cha, tru nammisag judíosmera Damascosrō warabelan tru na chi martrab isuigwan martrai. Inchen Damascosrōmay ibig kur cha, Jesucriston kōrebelō trusrō warabelan merrarrawa, yu Jerusalénsrōmay sruatrab, ichabetiilō kōnrrai.

Pablo nō Tiuswei mayu mandiincha pasramisrigwan waminchib

⁶ 'Indiibe na ib pasrōwa, kwalōm tōbōtag kōsrōn Damascosrō na pub lutau ibene, ¡katō! mōi mōi naingatan srōmbalasarōngurri purō nuig tōrig pilabig kōn cha. ⁷ Inchen nabe pirausrō peñabe, kan wam trendaig mōrinabig kōn: “Saulo, Saulo ¿nane chindimbarre kaig martrabgōba inchib arrugu?” chib. ⁸ Inchene nabe trencha lōtabig kur: “¿Señor ñibe mu kugu?” cha. Incha nōbe nan lōtappe: “Nabe Nazaretsrō Jesús ñi kaig martrabgōba inchib arrig, truig kur” chibig kur. ⁹ Inchen naim pulu pōnrrabelōbe tru srōwan ashippe ashendō, tru naba waminchibigwei wamwane, chi tainguen mōrmeelō kōn cha. ¹⁰ Inchen nabe trenchibig kur cha: “¿Señor chi maramōh?” cha. Inchen Señorbe nane trenchibig kōn: “Kurra, Damascosrōmay inrrō cha. Truyube chi maramigwan karua pasrigwan kerriguh eshkanrrun” cha. ¹¹ Inchen nane tru purō tōr pilabiibe ashmīg kōrrōmarig kōppe, tru Damascosrōmbe naba lincha amrrubelō tasku kemōra, srua ambindiig kebibig kur cha.

¹² Inchen tuyube kan mōg Ananías taig, tru maig maramigwan martrai Moisés pōrig maig chibig kōben, Tiuswan purō isua marōb megabig, judíosmera Damascosrō warabelaimbe nōbe chiyuguen chi tamga tab uñib mōg, ¹³ truiibe nan ashchab arrua, puabe, trenchibig kōn: “Cristogurri nai nuneg Saulo, katōyug ashibig misr” cha. Inchen nabe katōle ashibig misra, nun asinabig kōn cha. ¹⁴ Inchen Ananíasbe nane trenchibig kōn: “Namui merrabsrō mōskalai Tiusbe, nō maig marōg kuig waigwan ñi nebua ashchai ñune manasrōwei kanmaytō wesrawa pasrig kōbig kōn cha, tru Kerrigu Sōlgandiigwan nebua ashib, katō nui triitōga wamingdigwan mōrōb inchai. ¹⁵ Kaguende ñibe Tiusweyasig maya misagwei merrab maig kuigwan waminchib pasrōnrrabig kōn cha, ñi asigwan ñi mōrigwan. ¹⁶ Treeg kōbene, ¿chi munig tsunrragu? cha. Kurrō, chibig kōn. Incha piu umbu ulsrō cha. Katō ñibe Señorwei munchin wamab ñui kaig mariilan chish misr” chibig kōn nane.

Pablon judíos kōmeelaisrōmay ōrig

¹⁷ Inchen Jerusalénsrōmay katō yabe, Tiuswei yau Tiuswan waminchib wawa, kan piab lataig asamig tōgagūinabig kōn cha. ¹⁸ Incha truyu na Señorwan ashen, nōbe nan trenchibig kōn cha: “Mallatō incha, mōi mōi Jerusaléngurri webinrrō cha. Kaguende yube ñi naimburab maig kuigwan waminchen mōrtraamōn” cha. ¹⁹ Inchen nabe trenchibig kur cha: “Señor, nōmbe ashibelō kōn cha, nabe judíosmera tulundzuni yamōrig ya, ñun kōrebelane merrarrawa kailan keeri yau srua yamba ichabetamba indiilan. ²⁰ Katō ñuimburab maig kuigwan waminchibig Estebanwan kweechib ani lushen, tru uraskucha nabe ‘ka kweetsay’ chib truyu pasrōwa, kweechibelō nōmui kewagūilan wesra waren, nabe truilanguen ashib pasrabig kui nōmbe ashibelō kōn” cha. ²¹ Inchene nane Señorbe

trenchibig kòn: “¡Inrrø! cha. Kaguende nabe ñine yabsrø judíos kòmø misaameraisrømay inrrai øramønrrun”— cha.

Pablo tru maya suldau sətømeran nø karubigwei merrab

²² Inchen judíosmerabe tru iig srahe trendaigwan ke chab trendamnegatiitø mørabe, trenchib trashib mendabelø kòn:

—¡Øyeeg møwane yu pirau uñimønrrai kweetsay! chib. ¡Kaguende øyeegwane chinchibguen uñbasamgaig kòn!— chib. ²³ Incha trashibig trasha, nømui pala kewagüilan wesrawa petamba, usrøwan pala petamba inchibelø kòn. ²⁴ Inchen maya suldaumeran ashib nø karub wabiibe, tru suldaumera waraig muguen chindamga yau Pablon keeringarua, ichaguchib maig kuigwan payingarubig kòn, misaamerabe chindimbagurrinre nun tsalø køb øyeeg trashib kuigwan ashchab. ²⁵ Inchen lusra srua kua ke yandø ichagutchabguen inchen, Pablobe tru suldau sətø cienwan nø karub pera pasrabigwane trenchiptinchibig kòn:

—¿Roma pirau kal-laweigwan chi kalø marig kõtashchab paya ashibguen paya asiimíigwan ñim treeg ichaguchib pønrramibe merig kòmuitarru?— cha.

²⁶ Inchen truigwan mørabe, tru suldau cienwan nø karub pera pasrabiibe tru maya suldaumeran nø karubigwan trenchib eshkabig kòn:

—¿Ñi chi marøb pasraigwan ñigan maig kui asha pasrøtirru? cha. ¡Kan! i møøbe Roma pirauig kuin kòn— cha.

²⁷ Inchene tru maya suldaumeran nø karubiibe arrua, Pablon payibig kòn:

—Ñibe Roma pirauig kuin chindi, eshkarra— cha.

Inchene Pablobe trenchibig kòn:

—Øø, treegwein kur— cha.

²⁸ Inchen tru maya suldaumeran nø karubiibe trenchibig kòn:

—Nama kan Roma pirau kal-lawei køb lataitøwei misrtrappe, tsabøtø nu an petabe treeg misrar— cha.

Inchene Pablobe trenchibig kòn:

—Nabe treeg mara kòmøtø, kal-lainukkurri trendø truig kur— cha.

²⁹ Inchen Pablon payrrab inchib srua købeløbe mõi mõi nuinukkurri chab tarømisrøptinchen, tru maya suldaumeran nø karubiitøweinguen Roma pirauig kuin kui ashippe, truba kwaarøbig kòn, keerøba cadenastøga merrarrowa, srua kuikkurri.

Pablo treeg mara pasrømur chib waminchib

³⁰ Incha katø kwalømbe tru maya suldaumeran nø karub pasrabiibe tru judíosmera chigurrinre øyeeg marøbig kòn chib kuigwan ke tab ashchab isua, Pablon elacha, sacerdotemeran karubelanba, katø tru Setenteelø maig maramigwan asha marøbelan mayamba tulundzunønrrai karua, yandø Pablon wesrua, trulai merrab pasrøbig kòn.

23

¹ Inchen Pablobe tru Setenteelø maig maramigwan asha marøbelan ke tab ashabe, trenchibig kòn:

—Nai nunelø, nabe møin kwalømgatig Tiuswei merrab nai isub kebachib pasrabigu chi kalø kòn chibig chigaig, chishig uñibig kur— cha.

² Inchene tru maya sacerdotemeran nø karub sacerdote Ananíasbe Pabloim pulu purrabelane triibøtø Pablon pashagutsingarubig kòn. ³ Inchene Pablobe trenchibig kòn:

—¡Ñi ya pirøbanrrig pullin itsig lataigwan! ¡Tiusbe ñunguen pashagutchun! cha. ¿Ñibe uyu wappe, tru maig maramigwan martrai Moisés pørig maig chibig køben, nan treeg asha martrab wamøtirru? cha. ¿Ñibe tru pørigwane utsøguchib ka itøbunab ñigan nan pashagutsingarub watirru?— cha.

⁴ Inchen truyu purrabeløbe trenchibelø kòn:

—¿Maya sacerdotemeran nø karub sacerdote Tiusweiwan marøb pasrabigwan, ñigan øyeeg tsalø wamøtirru?— cha.

⁵ Inchene Pablobe trenchibig kòn:

—Nai nunelø, maya sacerdotemeran nø karub sacerdote køben, nabe ashmø inchibrain kòn cha. Kaguende Tiuswei wamwan pørigube trenchibig kòn cha: “Ñui misaameran ashib karub wabigwane kaig nebubash chib trømbøig wamamig kòmøn”— cha.

⁶ Incha Pablobe tru Setenteelø maig maramigwan asha marøbelø, tøbøbe fariseosmera køben, tøbøbe saduceosmera kui ashabe, tru Setenteelan truba mur trashib trenchibig kòn:

—Nai nunelø, nabe fariseo køb, fariseowei nusrkain køb kur cha. Katø kwabelø katøle øsiiramigwan muniirabig kuikkurri, øyeeg indinab payib sruagüinab pasrar— cha.

⁷ Inchen nõ trenchibene, fariseosmeraba, saduceosmeraba nõmdø aleguiyab mendappe, ke nõøøtø misra, tru Setenteelø maig maramigwan asha marøbelø tulaamba pasrabiibe chab tarømisrøbelø køn. ⁸ Kaguende saduceosmerabe tru kwabeløbe katølebe øsiiramøwei, ångelesmera kawei, mõsiimera kawein køn chibelø køben, trune fariseosmerabe treelane kerriguh treeg købig kuitamab isubelø købig køn. ⁹ Inchen mayeeløba trashib mendøben, mõiløøsrøn tru Moisés ørigwan kusrenanøbelø fariseosmeraingateelø kurra põnrramisrabe, trømbøig aleguiyab trenchibelø køn:

—I mõwane kaig mariibe chigucha wetørramer cha. Inchippa kan mõsig kui, kabe kan ångel kui wamindin købgun cha, Tiuswane esheerrab inchimugun— chibelø køn.

¹⁰ Inchen ambumay imay ke nõmdø aleguiyab kurra nõøøtø misren, maya suldaumeran nõ karub pasrabiibe Pablone ke pitis marøbgunmab isua køriimata, suldaumeran kørraambingarubig køn, nõmui utugurri mallatø merrarrawa wesrawa, suldaumera waraig mu chindamga yaumay katø pera amrrai.

¹¹ Inchen katø yembe Pablon Señorbe kenamisra trenchibig køn:

—Pablo, kullaaramø, kørmø mur pasrau cha. Kaguende yu Jerusalénma naimburabigwan maig kuigwan wamindiibe Romasrøngucha naimburabigwan katø treetøwei ñune wamindamig neburrun— cha.

Pablon kwetchab inchib

¹² Katø lõtsø judíosmerabe kaig martrab nõmdø nilø wamincha: “Nam treeg martrab taigwan marmubene, namundøwei trømbøig nebubash chib põnrramisra, jkatø! Pablon kweechimuppe, mamøwei, muchimøwei inchab” chibelø køn. ¹³ Inchen tru: “Treegwan marmø kømø, jkatø! martrab” cha, põnrramisrøbeløbe cuarenta menrra lata købig køn. ¹⁴ Incha truiløbe sacerdotesteran karubelainuumayba, katø misagwan karubelø kølli misaamerainuumayba ambabe, trenchibelø køn:

—Nam martrab taigwan nam marmubene, namundøwei trømbøig nebubash chib põnrramisrer cha. jkatø! Pablon kweechimuppe, name chigucha mamørrab ter cha. ¹⁵ Inchawei mõimbe ñimbe tru Setenteelø maig maramigwan asha marøbeløbamisra, tru maya suldaumeran nõ karubigwan maig chitashchab waminchab ambamdiig køn cha, ñimui merrab Pablon srøna wesrai chinrrab, nun tru øyeeg puigwan maikkurrin kuitashchab ke tab paya ashchab chibelø misrøb. Trune nambe nõ trusrø pumøwatø, ke kwetchab tamara munig kømørrrun— cha.

¹⁶ Inchen Pabloi nuchawei nusrkaimbe tru chi isumø amrrub køben, larab warøwa, tru kaig martrab inchib kuigwan wamindi, tru suldaumera waraig mugucha chindamga yausrø nõbe kebya, Pablon eshkaben, ¹⁷ Pablobe tru suldau sötø cienwan nõm karub põnrrabelan kan mõigwan køsrøn wamabe, trenchibig køn:

—I matsinan maya suldaumeran nõ karubigweimay pera inrrø cha. Kaguende chigøsrøn eshkamig tøgagøn— cha.

¹⁸ Inchen truipe maya suldaumeran nõ karubigweimay, pera yabe, trenchibig køn:

—Pablo kailan keeri yau keerig wabiibe nan wama tiusmanda i matsinan ñuimay pera irra chitan cha, ñun kan chigøsrøn eshkamig tøgagøn— cha.

¹⁹ Inchen tru maya suldaumeran nõ karubiibe tru matsinan tasku kemøra srua ya, nõøøtø pera yabe nundø mara payibig køn:

—¿Nan chi eshkamig tøgagugu?— cha

²⁰ Inchen matsinøbe trenchibig køn:

—Judíosmerabe Pablon srøna tru Setenteelø maig maramigwan asha marøbelai merrab ke tiusmanda ñun wesrabsrumugu chinrrab, ke kandø isua põnrramisrin køn cha, nuimburab maig kurrin kuitashchab ke tab paya ashchab chibelø misrøb. ²¹ Trendaingucha køremørrrig cha. Kaguende nõmui utu mõguelø cuarenta menrra lata, kaig martrab larørrab nilø tamarøb køn cha. “Nam treeg martrab taigwan marmuinabene, namundøwei kaig nebubash chib põnrramisra, jkatø! Pablon kweecha kuchimuppe, mamøwei, muchimøwei inchab” chib køn cha. Incha nõmbe ke yandø chab tamara, mõimbe ke ñi mancha lõtamigwandø munig køn— cha.

²² Inchen tru maya suldaumeran nõ karubiibe tru matsinane trenchib ‘ungwa’ cha, øøbig køn:

—Ñi nan eshkaigwane nan eshkar cha, mungucha eshkanrrab kømø— cha.

Pablon Félix kubenadurweimay pera ambub

²³ Inchen maya suldaumeran nõ karubiibe tru suldau sötø cienwan nõm karub pera põnrrabelan pailan wama, trenchibig køn:

—Yem las nueve webambamig katsikka amrrabelø suldau doscientosba, kaulli palarr setentaba, lanza sruar doscientosba Cesareamay amrrai tamaray— cha. ²⁴ Incha katø maya suldaumeran nõ karubiibe kaulli itøguanamelø Pabloyasig tamingarua, kubenadur

Félixweimay chi indiimíg, tabig pera amrrai inchibig kòn. ²⁵ Incha øyeeg chibig kilgagucha pøra trana ørøbig kòn:

²⁶ Na Claudio Lisias, ñi nai purø tab kubenadur Félixwan ‘ka uñgu’ chinrrab inchar.

²⁷ Judíosmerabe i mowan kemøra srua kua, kwetchab inchen, trune nabe nune kan Roma pirauig kuin kui wammørab, nai suldau sətøba ya, truyugurri wesrar. ²⁸ Incha nabe chi charre payib srua kuitashchab ashchab isua, Pablone judíosmerai tru Setenteelø maig maramigwan asha marøbelai merrab pera kørrayar. ²⁹ Incha nabe tru nømui maig maramigwan martrai Moisés pørigwan ka kalø maran chatørre inchib kuin kui wetøbefiendø, nune kwanrrai maramdiibe nøbe treekkatig chi trømbøig mara pasrømøwei, katø kailan keeri yau keera tøgagømdiig kømøwein kuin kòn. ³⁰ Inchen tru mowan søratø kaig martrab inchib kòn taig nane wammørsrøben, nabe tru urastø ñuisrømay ørar cha, katø tru nun øyeeg mara pasrømøtirru chib payib srua købelan chigucha chigøben tamig tøgaguabe, trube, ñui merrab tørgandø eshkanrrigay cha, nømune trenchar cha nabe.

³¹ Inchen suldaumerabe nømun maig karuig køben treeg mara, Pablone wesrawa, yem Antipatrissrøngatig pera ambubelø kòn. ³² Incha katø kwalømbe Pablone kaulli pala ambubeløtø lincha amrrai, suldaumera katsikkateeløbe tru nøm waraig mu chindamga yamuy katøle legucha amrrubelø kòn. ³³ Incha Cesarearø pua, kubenadurwan tru kilga pøra ørigwan tranabe, Pablongucha nui merrab pera kemallibelø kòn. ³⁴ Inchen kubenadurbe tru kilga ørigwan ashabe, Pablone:

—¿Chu pirusriig kugu?— cha payibig kòn. Incha ciliciasriig kuin kui ashabe, trenchibig kòn:

³⁵ —Trube, ñun øyeeg puigwane tru ñun øyeekkurrin kuig kòn chibelø amrruben, trunun ashchab— cha.

Inchabe Herodeswei purø tab yau Pablone keera wanna, tab ashib tøgagønrrai karubig kòn.

24

Pablo Félixwei merrab ‘øyeeg mara pasrømøtirru’ tainab

¹ Trattør kwaløm wendau maya sacerdotsmeran nø karub sacerdote Ananíasba, møiløgøsrøn misagwan karubelø kølli misaameraba, trugurri kan purø maig waminchibig Tértulo taiba Cesarearø kørraambubelø kòn. Incha truiløbe tru misaameran ashib karub wabigwei merrab Pablone tsalø køb ‘øyeeg, øyeeg mara pasran’ chinrrab amrrua kemallibelø kòn. ² Inchen yandø Pablone wamøben, Tértulobe Pablone ‘øyeeg, øyeeg marøbig kòn’ chib menda, Félixwane trenchibig kòn:

—Namui purø tab kubenadur Félix, kan nabe ñugurri ambumay imay tab warer cha, ñun mayanguen ungwa, ungwa chinrrab inchar cha. Incha ñibe purø tab asha marøbig kuikkurri, nam i pirau mayeelø warabelayasiibe, srøitø, srøitø yunømarøb tammisrøb arrun cha. ³ Kan ñi namui Félix purø tabig, chusrøndøgucha katø chu uratøgucha, ñune kashmø mayanguen ungwa, ungwa chibelø ker cha. ⁴ Inchendø ñun menrra trømbø inchib menrra waminchimonrrab, kan petøzhiitø tiusmanda kalu pebøbsrumugu chinrrab inder cha, ñibe chiwandøgucha yan tammay mara tranøb wabig købene. ⁵ Kaguende i mowane nabe kan larrø kaig kwanrrø lataig wetørrer cha. Yu pirau chutøgucha judíosmerai utu misaamerane ke nøørotø marøb namishib pera kurramba, katø tru Nazarenos taig sətømeran ke nø pera marøb chib pasrabig kømbe indan cha. ⁶ Katø Tiuswei yawan chigucha, Tiuswei yaambu kømui lataig kaig trømbøig martrab indamba inchen, nabe nun kemørig kòn cha. Incha nabe tru maig maramigwan martrai Moisés pørig maig chibig køben, treeg martrab inchen, ⁷ tru maya suldaumeran nø karubig Lisiasbe nui suldaumeraba arrua, tsakkandø namui taskugurri Pablone kerraig kòn cha, ⁸ tru øyeeg mara pasrømøtirru chib srua købelane ñuisrømay ambay chib amrrai ørøppa.

’Trube, ‘øyeeg, øyeeg mara pasrømøtirru’ chib kuigwan, ñiashib iigwan kerrigu tab ashabe, maig kuigwan tab ashchabguen— chibig kòn.

⁹ Inchen judíosmera truyu pønrrabeløgucha:

—Iibe kerriguba isa kømø, treegwein kòn— chib truba inchibelø kòn.

¹⁰ Inchen tru kubenadurbe Pablone waminchai señas maren, Pablone trenchibig kòn:

—Ñi ya yam pila i pirau maig maramigwan asha marøb wabig kui ashabe, kalø mara pasrømøigwan nabe chi kørømø eshkanrrab inchar cha.

¹¹ Ñitøweinguen asiinrrun cha, na Jerusalénsrø Tiuswan kørribala tabig waminchab arriibe kwalømmera docetøwei purayan cha. ¹² Pøs Nane Tiuswei yau muba køben aleguiyab pasrai ashmøwei, namishib misag sətø peragurri ashmøwei, katø judíosmera tulundzuni yamerayu treeg marøb pasrai ashmøwei, kabe chugøben ciudasrø treeg marøb pasrai

ashmøwei indig kòn cha. ¹³ Inchawei i misaamerabe mõi nan øyeeg mara pasrømøtirru chibeløbe øyeeg marøbig kòn chib kuigwane treeg kòn chinrrappe kaimanrrun cha. ¹⁴ Inchendø nabe maig kuigwan kelarrab, trendamønrrun cha: Nabe merrabsrø namui kølli misaamerai Tiuswan kørìbala tabig waminchibig kur cha, tru nøm Tiusweiwan peemaytø marøbelø cha wamig, tru srø may maig køben treekke. Tru maig maramigwan martrai Moisés pøriilan lata, katø Tius maig karuigwan eshkabelø pøriilan lata isa kømø, kerrigu treegwein kuitamab kører cha. ¹⁵ Nabe Tius mandø taigwane treeg kònrraitamab isua munig megabig kur cha, tru nøm muniirab kuigwandøwei, tru kwabelø sølgandø tabelø lata, katø tru sølgandø tabelø kømeeleø lata katøle øsiirawa kurramigwan. ¹⁶ Inchawei treekkurri nabe Tiuswei merrab lata, møguelai merrab lata chigøben kalø mara treegwan nai isub kebachib pasrabigu chi kalø kòn chibig chigaig kònrrab inchib megabig kur cha, chu urastøgucha.

¹⁷ Nabe truba yam pila peesrø llirab uñabe, ketamig tulisaiigwan naim pirau misaameran kettrappa, katø Tiuswan keta tranrrappa arrubig kur cha. ¹⁸ Incha nabe tru maig maramigwan martrai pørig maig chibig køben, Tiuswei yau tru chish misrtrab marigwan chab mara pasrøben, møiløgøsrøn judiosmera Asia pirausreelø pubelø kòn, na misagwan namishib pera kurra kømøwei, kabe chindinguen asiimiig maringarub pera kurra kømøwein pasrøben. ¹⁹ Inchawei mømibe, truilø nømwei amrrumig kòn cha, yu ñui merrab nan øyeeg mara pasrømøtirru chib nan tsalø køb chigøben tamig tøgaguabe. ²⁰ Kabe katø tru Setenteelø maig maramigwan asha marøbelai merrab na kemalla pasrab uras nan chi kalø marig wetørraig købene, trube, truburappe nømdeøwei yu tømrbash cha. ²¹ Nabe tru nømui utu pasrøwa tru urasbeguende mur trashib øyeeg chibwei indig kòn: “Kwabelø katøle øsiiramigwan na muniirabig kuikkurri, mõi ñim øyeeg indinab paya asinab pasrar”— cha.

²² Inchen Félixbe tru srø maywan tab wammøraig kuabe:

—Maya suldaumeran nø karubig Lisias arruben, iigwan na maig køtashchab katøwan ashchab— chippa, patsøgøbig kòn.

²³ Incha Félixbe suldau søtø cienelan nø karub pera pasrabigwane Pablone elachimø, ashib tøgagønrrai karubig kòn. Inchendø nui chi maramdeelane mu merønrrain kømø marøb, katø nui asillø møiløgøben nun purugunrrab inchene merømøwei inchain karubig kòn.

Cesareasrø Pablon kailan keeri yau keerøb

²⁴ Mam kwaløm wendau kørørøn Félixbe nui srai judía Drusilaba katø pua, Pablon pertrab ørabe, isubigwan Jesucristoinug pasra tøgagømigwan waminchen mørøbig kòn. ²⁵ Inchen Pablobe tru sølgandø tabigwanba, chiyugucha srua irramamø amønamiigwanba, katø maig kònrrabigwan treeg asha maramig punrrabigwanba waminchen, Félixbe truba kwaara, trenchibig kòn:

—Møimbatøbe ka inrrø cha. Inchendø katøwan nan utø køben, wamørrumøn— cha.

²⁶ Inchagucha Pablo nun elatchai kabe kan maya an tranrrua chinrraitamabrre muniirabig kòn Félixbe. Incha treeg isua, Félixbe nuimay Pablone katø katø wamabig kòn waminchab. ²⁷ Inchen yandø pa pila puraiben, Félixbe webiben, Porcio Festo truigwan purø wamisrtrab kubenadur kebibig kòn. Incha Félixbe judiosmeraba ka tab kørømisrøg køptø Pablone kailan keeri yau ka wabashippa, webibig kòn.

25

Pablo tru srø kubenadur Festoi merrab

¹ Inchen tru pirau karub wanrrab uta kebyaig pøn kwaløm wendau, Festobe Cesareagurri Jerusalénmay nebiben, ² maya sacerdotesperan karubeløba, katø judiosmeran ashib karubeløba Pabloburub tru treeg puigwan katøle kønøgønrrab Festoi may ambubelø kòn, ³ Pablon tsalø køb, Jerusalénmay pegutcha chib. Kaguende nømbe Pablone mayu lara kwetchab isua tamarøb købelø kòn. ⁴ Inchen Festobe løtappe trenchibig kòn:

—Pablone Cesareasrø ashib tøgagüig wan cha. Naashib trusrømay menrra yana kørøwatø inrrab isur cha. ⁵ Inchawei ñimui utu maig maramigwan ñim asha marøb pønrrabeløbe Cesareasrømay naba kørørruy chibig kòn. I møweinug chigøben kalø marig pønrrøbene, trube øyeeg mara pasran chib truyu waminchab.—

⁶ Incha Festobe Jerusalénsrø trune køh, kabe trune y pa kwaløm kø chigøsrøn nømbe kørømisra, Cesareasrømay katø ya, katø kwalømbe tru maig maramigwan asha marøbelø purrainug wamisra, Pablon pera amrrunrrai karubig kòn. ⁷ Inchen Pablo trusrø pua kebarrubene, tru judiosmera Jerusalénsrøngurri amrrubeløbe tulsrua, nune chigøben truba truba trømbøig marøbig kòn chibendø, chigucha ke treeg mariiløbe, wetørranrrab kaimabelø kòn. ⁸ Inchen Pablobe nøbe ‘treeg mara pasrømur’ chib, trenchib waminchibig kòn:

—Nabe i tru maig maramigwan martrai Moisés pørig judíosmeraimburabigwan lata, Jerusalén Tiuswei yaweimbura lata, katø Romasrø maya misagweim pala ashib wabig Césarweimbura lata chi kalø mara pasrømur— cha.

⁹ Inchendø Festobe judíosmeraba ka tab kørørmisrøg køptø, Pablone trencha payibig køn: —¿Jerusalénmay attragu? cha, tru øyeeg wamindilla ñuimbura bigwan maig kønrrabigwan trusrø ashchab— cha.

¹⁰ Inchene Pablobe trenchibig køn:

—Roma maya misagweim pala ashib wabig César maig maramigwan asha marøb wainug nabe truyuweim pasrar cha, tru maig kønrrabigwan nan asha maramnug. Pøs judíosmeran chigucha chi kalø mariibe chigagøn cha, ñiguen tab asiinrun cha. ¹¹ Kabe na chigøben kalø mara pasrain kui, ñim nan kwanrrai maramdiig na treekkatig kaig mara pasrøbene, nabe kwanrraptøweim pasrar cha. Inchendø nøm øyeeg mara pasrømøtirtu chib kuig ka isiitø webibene, mugucha nane truilane tranrrappe kaimanrun cha. Nabe Romasrø tru maya misagweim pala ashib karub wabig César maig maramigwan ø asha martrai miamønrun— chibig køn.

¹² Inchen Festobe tru maig maramigwan nun isum purugub purrabeløba chab waminchabe, trenchibig køn:

—Ñi maya misagwan ashib karub wabig César ø asha martrai miaig kuig købene, trube, Césarweimay inrrig— cha.

Pablo rey Agripai merrab

¹³ Inchen yandø mam kwaløm køsrøn puraiben, rey Agripaba, Bereniceba Feston ‘ka uñgu’ chib tabig wamab punrrab, Cesareasrømay ambubelø køn. ¹⁴ Inchen trusrø nøm truba yam kwaløm waraig køppe, Festobe tru Pablon øyeeg nebuigwan reywan trenchib eshkabig køn:

—Yube kan møg wan cha, kailan keeri yau Félix kørørmara wannig. ¹⁵ Na Jerusalénsrømay ya wabene, truigweimbura ppe sacerdotesperan karubeløba, judíosmeran karubelø kølli misaameraba, ke chinetø køn chib nan eshka amrrubelø køn cha, Pablon truyu møra pasrønrrai kørørmara pasramdiig køn chib. ¹⁶ Inchen nabe nømune trencha løtig købig køn cha: “Tru ‘øyeeg kaig mara pasran’ tainabig; tru ‘ñi øyeeg maraweim pasrømøtirtu’ chibelø nui malaugue trenchib amrruben, ‘øyeeg kømuig køn’ chib; ‘øyeeg mara pasrømur’ chib nøashib waminchimøwatøbe, romanosmerabe mu møwangucha mana treebe marmeelø køn” cha. ¹⁷ Incha truilø nøm yusrømay naba amrruben, chi srarrømøtø, katø kwalømdø, nabe tru maig maramigwan asha marøb wainug wamisra, tru mowan pera amrrunrrai karuig køn cha. ¹⁸ Inchendø tru ‘øyeeg mara pasrømøtirtu’ chibeløbe amrrubendø, chigøben trømbøig kalø marilø tre latailøbe marig wesrumelø køn cha, pøs nabe ø treeg trømbøig mara pasrainðweimre inditamub isubene. ¹⁹ Treeg kømøtø, tru nuimbura waminchib kuibe, tru Tiusweimbura bigwan ø marøb unigwan truikkurin chabah, katø kan møg, Jesús taig, kwaig købigwan, Pablobe trunun kwaig kømøtø, ka øsig wan cha, trenchibre inchen, trugurrimbatørrre inchib kuin køn chibig køn. ²⁰ Inchen nabe øyeeg maramigwane mandø maram kui mørmøwa, Jerusalénsrømay inrra kuh chibig kur; tru maig kønrrabigwan trusrø asha marig kønrrig cha. ²¹ Inchendø Pablobe tru maig kønrrabigwan Augusto César asha marig kønrrab cha, ka ashib tøgagúig wanrrab cha ø miaig købene, treekkurri Césarweisrømay na øramnegatig nune tab ashib tøgagønrrai karuig købig køn— cha.

²² Inchene Agripabe Feston trenchibig køn:

—Nangucha tru mowan mørinrrabna køtan— cha.

Inchene Festobe trenchibig køn:

—Srøna wamindi mørtrabguen— cha.

²³ Indiibe katø kwaløm Agripaba, Bereniceba puppe, purø tabig tamarar ke kan chill asamdiig amrruabe, tru chigøben waminchappa, katø wamindilla mørtrappa tru tulundzuniisrø kebambubelø køn, tru suldaumeran karubelø nørreelø køben, katø nørreelø ashib karubelø ciudayuelø købengue. Inchen Festobe Pablon pera amrrun-garuben, pera pubelø køn. ²⁴ Inchabe Festobe trenchibig køn:

—Rey Agripaba køben, ñim maya møguelø yu namba purrabelø køben, i mowan asay cha. I moweimbura ppe maya judíosmera søteeløba Jerusalénsrø lata, yu Cesarea lata ‘yeegwane øsig uñbasamgaig køn’ chib, trashib amrrubelø køn cha. ²⁵ Inchendø nabe nun kwanrrai maramdiig chigucha chi kaig marmuin kui wetørrab, katø tru maig kønrrabigwan asha marig kømigwan Augusto ø asha martrai nøtøwei miaig kuig købene, trusrømay nabe ørtrab isuig køn cha. ²⁶ Inchendø tru Pabloimbura bigwan treeg treeg køn chib nai ashib karub wabig Augusto purø nuigwan na pøra øramig kan chiguen wetørramur cha. Incha treekkurri ñimuinumay pera arrur cha, ñi nai tab rey Agripa. Maig kønrrabigwan tab asha kørømarene, na maitøguen Auguston eshka pøramig kønrrautan chibig køn. ²⁷ Pøs kan kailan keeri yau

keerig wabigwan chiburøgurri ‘øyeeg kuig køn’ chib kuigwan chi cha eshkamubendø, na øramibe ke kan ka wainguenig marig lataig punrrautan— chibig køn Festobe.

26

Pablo nuimburabigwan rey Agripai merrab eshkab

¹ Inchene Agripabe Pablon trenchibig køn:

—Ñuimburabigwan maig kuigwan ñitøwei waminchi— cha.

Inchen Pablobe yandø waminchab tasigwan kusrawabe, tru nuimburab ‘chi kalø mara pasrømur’ tamigwan waminchab pølbaserøbig køn: ² —Møi na naimburab ‘treeg mara pasrømur’ chib waminchib pasramig mayaguen tab kuim pasrar cha, nai rey Agripai merrab, nan judiosmera chigurrimbunø ‘øyeeg mara pasrømøtirru’ chib kuigwan. ³ Inchagucha ñibe judiosmera chitø, chitø marøbelø kuigwan kerrigu ashib, katø nam judiosmera mandø melambuyab amrruigwan chigucha ñibe tab nebua ashibig kuig købene, trube, tiusmanda tammay mørtra chinrrab inchar cha.

⁴ Maya judiosmera na matsinø-unøgurri nabe nai misaamerai utu Jerusalénsrø maig tsubig kuigwan ashibelø køn cha. ⁵ Truiløbe manasøngurri ashibelø køn cha, nømun eshkamdiig købene, øyeeg købig køn chib maig kuigwan ñun eshkamdiig kuinrrun cha, Tiusweiwan kan chizhigwanguen pinab kømø marøb misag sètømerayuiig nabe fariseo købig kur cha. ⁶ Incha mømibe tru merrabsrø namui kølli misaameran Tius tru tranrrab misra kørrømisrigwan muniirabig kuikkurri, mømibe øyeeg paya ashib Tius tru kuinab pasrar chibig køn. ⁷ Tru Israelweinukkurri namui doce srøig, srøig karrab misaamera Tius tru tranrrab kørrømisrigwan nømbe nebunrrab isua, yem kwaløm Tiuswan køriibala tabig waminchib kuigwan, nagucha truigwan muniirabig kuinukkurri, judiosmerabe yu ñi øyeeg kaig marøbig kømøtirru tainab pasrar chibig køn, nai rey Agripa. ⁸ ¿Tiusbe kwabelan kwailai utugurri kusuribe kaimanrreramab isubelø kø chindah ñimui utube?

⁹ Pøs isa kømø, naguen Nazaretsrø Jesúswei munchiwane tsalø køb chinetø martrab isua, ¹⁰ Jerusalénsrøma treeg marøbig kur cha. Sacerdotesmeran karubelø nan treegwan martrai karuigwan uta, Tiuswei misaameran kailan keeri yau pønsrøb, katø treegcha petøbene, nabe truilaingatøtø inchib pasrabig købig kur cha. ¹¹ Incha katø, katø judiosmera tulundzuni yamørig truilane ichabetab ibig kur cha, Tiuswan purø trømbøig nømun wamin-garummørø inchib. Incha ¡katø! kan nømun namig købiitø ke chinchimmørø inchib, nabe peg pirau ciudaderasønguen kaig martrab wendautø ibig købig kur cha.

Pablo mandøgurri Tiuswei mayu pasramisrigwan waminchib

¹² Nabe øyeeg martrab isua, Damasco ciudadsrømay ørig ibig kur cha, tru sacerdotesmeran karubelø maramburab martrai traniiitøga treeg martrab inrrai karua pasrig. ¹³ ¡Nai tab rey! mayu kwaløm tøbøtaabe srømbalarøngurri kan tørbilabig pørr lataguen kømø, purø tørig naingatanba, tru naba ambubelaingatanba piløben, ¹⁴ nambe pirausrø sötøba kørrinabig køn cha. Inchen kan wam hebreomay trenchib wamindi mørøptindinabig køn cha: “Saulo, Saulo cha, ¿Chindimbarre nane kaig martrabgøba inchigucha? cha. Ñibe kan wey kølabus tsøb pønsrailøyu søl yatab lataitøwei incha, ñibe ka ñiasitø kørriindan” cha. ¹⁵ Inchene nabe: “¿Señor mu kugu?” chiben, nane Señorbe trenchibig køn cha: “Nabe Jesús, ñi mõi kaig martrabgøba indig, nabe truig kur cha. ¹⁶ Inchendø kurra, pasramisrø chibig køn. Kaguende nabe ñun kenamisrøppe, naiwan marøb megabig kønrrai wesrawa pasrtrappa, katø mõi naimburab ñui kaptøga ñi asigwan waminchibig kønrraimba, katø wendøsrø naimburab maig kuigwan kenamaramigwan eshkabig kønrraimba treeg martrab kenamisrar cha. ¹⁷ Inchawe nabe ñui misaamerai taskugurri kaig marmønrrai wesrab, katø judios kømø misaamerai taskugurri kaig marmønrrai wesrab indamønrrun chibig køn. Pøs nabe mõi tru misaamerayasigwei ørar cha, ¹⁸ nebua ashchai ñi nømui kabmeran kuren, løstøyu amøñibelø købig kuig, toryumay werrub, katø Satanás maramburab mariilø kua, Tiusweimay purørrunrrai. Tru nømui kaig mariilan ulø payiimig pesannaig kømigwan uta, tru nømui isubigwan nainug pasrikkurri tru Tiusweyasig tarømariiløba tøgatø, tru keta tranamig tøgagüigwan utamig kønrrain” chibig køn.

Piab lataigu Tius kenamisra maig taigwan Pablo møra marøb

¹⁹ Inchawe, nai rey Agripa, tru srømbalarøngurri piab lataigu kenamisren asigwan nabe mørønrrab inchimøtø, ²⁰ Damascosrø warabelaisrømaymerrig ibig kur cha. Incha trugurrimbe Jerusalénsrømay, trugurrimbe Judea pirau kerrigu truøsrø ya, katø trugurrimbe judios kømø misaameraisrømay ya, nømui kaig mariilan isua møra, Tiusweimay llirawa, yandø tru kaig marmønrrab isua mørin kui asamdiig kønrrai tabig marøb inday chib eshkab waminchibig kur cha nabe. ²¹ Incha na øyeegwan marikkurri judiosmerabe Jerusalénsrø Tiuswei yau nane merrarrawa, kwetchab indig køn cha. ²² Inchendø møin

kwalømgatig Tius nan purugúitøga nabe yu pasrar cha, kusrebelan lata, kusremeelan lata maig kuigwan na waminchib. Nabe waminchippe, ka nøørotø peetø waminchimøtø, Tius maig karuigwan eshkabelø maig purainrrun taigwanbah, katø Moisés maig purainrrun cha eshkaigwan, truigwanbatø waminchar chibig køn: ²³ Tru Cristobe truba truba kaig nebuinab megawa, trugurrimbe kwawa, nømerrig katø øsiirawa, namui judíosmeran lata, judíos kømø misaameran lata kaigyugurri webambamig tørwan eshkaib kusrenrrun chib trendailan.—

²⁴ Pablobe ‘kaig mara pasrømur’ chib, waminchib pasramnetø, Festobe øyah chib trashibig køn:

—¡Pablo ñibe chugúi mørmíig misriasøna! chib. ¡Menrra kusreptø chugúinguen mørmíig misrin køn!— chib.

²⁵ Inchene Pablobe trenchibig køn:

—Nai purø tab Festo, nabe chugúinguen mørmíig kømøtø pasrar cha. Na waminchippe, ka isatø waminchib pasrømøwei, katø chiwan waminchib pasrarmab isua waminchib pasrar cha. ²⁶ Pøs rey Agripabe, iilane kerrigu ashibig kuimba, nui merrab chigucha chi kørig kuin kømø waminchar cha. Kaguende nøbe iilane ashmíig kønrrab kømøtø, nebua ashibig kuitamab isua pasrar cha. Kaguende iilane kan turiumbu mu søratø marikkucha kømøn cha. ²⁷ ¿Nai rey Agripa, Tius maig karuigwan eshkabelø maig taigwan ñigan treeg kuitamab køretirru? cha. Ñibe kørewa wain kui nabe asha pasrar— cha trenchibig køn Pablobe.

²⁸ Inchene Agripabe trenchibig køn:

—¡Ke yandiitøgatø Tiuswei mayu puraarrua pasramisrtraí indiibe!— cha.

²⁹ Inchene Pablobe trenchibig køn:

—Yandiitøgatø kui lata, kabe nu wamindiitøga kui lata, ñitø kømøtø, mõi yu møøb purrabelan chigucha kerrigueløba na lataøwei misra pønrraimbab isutan chibig køn, inchendø nan lata cadenatøga øyee merrarraimeelø.—

³⁰ Inchen rey kurra pasramisren, kubenadurgucha, Bereniceba kurrøben, truyu nømba purrabeløgucha kurra, yandø webamba, ³¹ nømdø nøøørsø ambabe, kangurri kangurri trenchib waminchibelø køn:

—I møøbe chiburø kwanrrai maramdiig kømøwei, katø kailan keeri yau keera tøgagømdiig kømøwei marøbig kuin køn— cha.

³² Incha Agripabe Feston trenchibig køn:

—Pablo nøashib César asha marig kønrrab chib miamuig kuimbe, pøs nøbe elatsikken købsruinrrun— cha.

27

Pablon Romasømay ørig

¹ Yandø Italiasømay amrrai treeg wamincha kørrømisren, kan suldau tru cienwan nø karub pera pasrabig tru Augusto maya misagwan ashib wabigwei suldau sötømerayuig Julio taigwan ashib tøgagønrrai tranøbelø køn, Pablonba, katøgan kailan keeri yau pønrrabelanba. ² Incha adramitiosriig kan barco Asia pirau, tru barcos puisrømay webinrrab inchib pasrøben, nabe truyu nebambubelø ker. Inchen nambabe Aristarco kan Macedonia pirausrig Tesalónica ciudayuikkucha arrubig køn. ³ Incha katø kwaløm Sidón tru barcos puisrø nam pubene, truyube Juliobe Pablon truba tab inchib, nune nui trendø asiilaisømay ibashibig køn, tabig wamab utab tøgagúig uñichai. ⁴ Incha Sidóngurri webambabe, Chipre pirø pi tøbøtag pasrabiisrø isig srørrø ketawan puraambub ambubelø ker, kaguende isig ichibiibe ambangau merrammay megambub ichen. ⁵ Incha yandø tru nu pi tøbøtaasrø Cilicia pirauba, Panfilia pirauba pinrrøguesrø misrøb ambabe, yandø Licia pirau Mira ciudayu pubelø ker.

⁶ Incha truyu suldau sötø cienwan nø karub pera pasrabiibe kan barco Alejandría pirausrig Italamay inrrabig pasrain kui wetørrawa, truyu amrrab, namun nebamingarubig køn. ⁷ Incha tsøndatø truba yam kwaløm ambub meløwa, isig ichibig namun merrammaygøba megambub ichen, ke trendø pumubsruatø Gnido pinrrøguesrø pubelø ker. Incha Salmón pinrrøguesrø Creta isig srørrø ketawan puraambub ambubelø ker. ⁸ Incha mendawandø ke trendø chab kaimab purørrub amrrua, kanbalø Buenos Puertos taisrø pubelø ker, Lasea ciuda pulusrø.

Maryu kørig kømdiig pi namab kurrab

⁹ Inchen amrrub kuig yandø yanaguen misrøb arruben, yandø tru barcoyu ambamikkucha purø kørig kønrraptiig misrøb arrubig køn. Kaguende tru ayunain kwaløm puraiabwe ichen, yandø tru sre pøl kebinrrab købig køn. Incha Pablobe øyee maramdiig køn chib waminchibig køn:

¹⁰—Nai lincha amrrubelø, i barcoyu ambamibe barcon mindisainab, katø purø nørrø ka yandø pinørrab kui ashar cha, barco chigøben niga arriilø lata, barco lata yandø ka pinøben, katø namdøweinguen kwamigwan lanrrun— chib.

¹¹ Inchen tru suldau sətø cienwan nø karub pera pasrabiibe øyeeg maramdiig køn cha Pablo wamingdigwane mørmøtø, tru barco srubigwanba, barco puaigwanba, trulangøba mørøppe, Pablone mørmíig køn. ¹² Inchagucha barcos puinug sre pubweimbe tab kømøtønug køben, søteelø lutauba truyugurri webamrrab isubelø køn, Creta pirau Fenice ciudasrø tru barcos puinug puin chindi. Inchen truiibe pørr neeshibgatømayba, pørr pinebgatømayba pinrrøguesrøn købig køn.

Maryu purø trømbøig isig ichibig webarrub

¹³ Inchen sursrøngurri kan kaizhig isig ichibig webarruben, chu punrrab isuigwan yandø ke nebuermab isua, barco imørrai merrarrabig kuatsig tsandzønwan piugurri wesrawa, yandø tru Creta pirø pulusrø kemallib ambubelø køn. ¹⁴ Indiibe yanazhigutø Euraquiløn cha wamig isig purø trømbøig pøtømay pailab ichibig tru pørr kal-labgatømaygurri webarrua, barcon yamgaig megambub arrubben, ¹⁵ yandø barcobe isig ichibig srua yaig kuig køppe, tru isig ichibigwane kamara ambamgaig køben, yandø isig ichibig srua inrraindø ka purrabelø ker. ¹⁶ Incha kan pirø, pi tøbøtag pasrabig Cauda tainug isig srørrøgatømay purørrub amrrua, truba truba inchib meløwa, tru kwamønrrab webambig tru kan lamø barcozhigwan nemørbelø ker. ¹⁷ Incha trunun barcoyu neerabe, nu barco nøørøtiig mismønrrai, manilastøga pøtøburab kirrøb mendabelø køn. Inchendø piu umbu pørrum tunmerayu kegalrraitamab kørig køben, barco inrrai isig utabig velas taigwan kørøøra, tru mur isig ichibig barcon ka srua inrraindø ka purrabelø køn. ¹⁸ Indig katø kwaløm purø trømbøig namab isig ichib kurrøben, barco niga arrigwan pinøbusrøb menda, ¹⁹ pøn kwalømyube tru barcoyu chi palabelan trendø truyu tøgagúilan nømashib pinøbusrøbelø køn. ²⁰ Inchen truba yam kwaløm kan pørr kenamismøweih, estrellamera kenamismøwei inchen, purø trømbøig isig ichib pi welamera namab kurrøben, yandø øsig webammumuitamaptøwei isub melabelø ker.

²¹ Nambe yandø yam kwalømguen mamø ambig kuig køppe, Pablobe nømui utu pasramisra, trenchibig køn:

—Au, nai lincha amrrubelø, na maig taigwan møra Cretagurri werrumuig kuinguen, barcon øyeeg trømbøig mindisainamøwei, øyeeg nørrø pinisha pønrrømøwei inchibsruiinrrun cha. ²² Treeg kuindøgucha tru isuptø chi kullaaramugun chinrrab inchar cha; kaguende barcobe chab pinindøgucha, ñimbe møikkucha kwanraamøn cha. ²³ Kaguende nan tru nuin kønrrai inchib pasrab, katø nui maramigwan nan maringarub inchib pasrab Tiuswei kan ángel mira yem nan kenamisrtan cha. ²⁴ Incha nane tru ángelbe trenchitan cha: “Pablo, chi kørig kui inchimøta cha. Kaguende ñibe Roma maya misagwan karub ashib wabig César purø nuigwei merrab pasramig palønrrab kuimba, barcoyu ñiba amrrub købelan Tiusbe mayeelanba øsig webambamig kønrrai martrun” chitan cha. ²⁵ Inchawei, nai lincha amrrubelø, chi kullaarab trunun isumøtay cha. Kaguende nabe Tiuswandø isua pasrar cha, nø maig taibe treeg kønrraitamab isuague. ²⁶ Inchen køben, kan pi tøbøtag pirø pasrabiisrø barco namunbañau srua ya trusrø kebusriilø kømig nebunrrun— chibig køn.

²⁷ Indiibe parru kønrrab yembe nam Adriatico maryu ke pi muba srua yaindeelø ambub kua, yem tøbøtasrø tru barcoyu ambubeløbe yandø ke pirø pulu pub yain kui mørabe, ²⁸ piwan maya umbuig kətashchab tsiwan kegucha ashene, treinta y seis metros køben, katøguchi ambuurøsrø katø kegucha unaashene, veintisiete metros købig køn. ²⁹ Inchen nørrø sruumerayu melambumuitamab kørig køben, barcon imønrrai merrarrabig pigbatø wendaumay kuatsiguelø piu kebusriilan kebeta, ke kan petø tør-rraimemab isub munig melabelø køn. ³⁰ Inchen tru barco srubelø barcoyugurri wegørra amrrab isua, tru merrabmay piu kebusriilø tru kuatsig tsandzønmeran merrarrab tsimeran yabranøbelø misrøb, tru kwamø øsig webambam barco-unan piu kebenøsrkøbelø køn. ³¹ Inchen Pablobe suldau sətø cienwan nø karub pera pasrabigwanba, suldaumeranba trenchib eshkabig køn:

—Iilø yu barcoyu ka purrømtø wegørra ambisruandøbe, ñimbe øsig webamrraamøn— cha.

³² Inchene suldaumerabe tru øsig webambam barco-unan merrarrab tsimeran para, piyu ibashiptinchibelø køn.

³³ Inchen yandø tør-rrab arrubben, mayeelanba maytøguen chi isumø, ka may chib, Pablobe trenchibig waminchibig køn:

—Yandø møi chabguen parruguen køn cha, chi puraitashchab muniiraptø ñim chigucha mamø melaig. ³⁴ Inchawei nabe tiusmanda ka may tamønrrun cha, pøs ñimui asr tabig chishtø kønrrai. Kaguende ñimune møigwandøgucha kan pusruutøguen mindisag kønrraamøn— cha.

³⁵ Trunun chab waminchabe, Pablobe nui tasku pirriwan muta, mayeelai merrab Tiuswan ‘mayanguen pay’ cha, pirisha, trugurrimbe mab pølbarsen, ³⁶ mayeeløba ka mamøtømab isua, nømgucha mabelø køn. ³⁷ Inchen tru barcoyu nam mayeelø amrrubeløbe doscientos setenta y seis købelø ker. ³⁸ Incha yandø mamne ma, tirigun maryu kebetabelø køn, barco chairanrrai.

Barco piu umbu ulsra pasrambub

³⁹ Incha tør-rabene tru pirøwane chu pirau kuinguen ashmubendø, kanbalø barco kebambig wambiitiig pisrum chaabaig nebua asha, trusrø pasrambumdiig købene, barcon trusrø pasrambungarunrrab inçhibelø køn. ⁴⁰ Incha barcon imønrrai merrarrabig tru kuatsig tsandzøn piu kegutsigwan piu wamnetø tsimeran parøppa, trugurrimbe tru barcon muba inrrai lliskaigwan lusrig pasrabigwan alaaranøb, tru isig utabig velle taigwan kusrubene, tru barcobe pisrum chaasrømay ib mendabig køn. ⁴¹ Inçhendø tru pi ambgurri igurri megambuinug pisrum tunyu pasrambunrrab iben, barcone trusrø kegaløsrka pasrambungarubelø køn. Inchen merrabmayiibe pisrum tunyu ulsra kønømiig pasrambuben, wendaumayiibe tru nørøø pi welamera purø trømbøig megambuben, barcobe ke nøøøtiig misrøb ibig køn.

⁴² Inchen suldaumerabe tru kailan keeri yau pønrrabelan srua amrruilan kwetchab isubelø køn, wegørra amba møikkucha lulumønrrai. ⁴³ Inchen tru suldau sətø cienwan nø karub pera pasrabiibe Pablone kweechimønrrai isua, nøm isuigwane ka isuitø purainrrai marøbig køn. Incha møiløgøben nadam kusrebeløbe truilømerrig kegørra ambingarubig køn pursrø webamrrai. ⁴⁴ Inchen katøganelane:

—Tablamerayu kui, kabe tru barco nøøøtiig misra wegørriløyu kui ambay— chibig køn. Øyee inçhib meløwa mayeeløba pirausrø øsig pubelø køn.

28

Pablo Maltasrø chitø marøb purayailø

¹ Incha yandø sətøba øsig webambabe, tru pi tøbøtag pirø pasrabiibe, Malta cha wamim pirø kuin kui nebua ashibelø ker. ² Inchen trendø truyu warab misaamerabe namun kwa tab inçhib tab wama, srebub kwa pishin køben, nømbe nag urra, namun søteelanba kemallçhai wamabelø køn. ³ Inçhene Pablobe trar mul nu tulisha, nagu kebusrene, mømimbe kan ul nag pachiiiraben truyugurri webarruppe, Pabloi tasku tsacha megambuben, ⁴ trendø truyu warab misaamerabe ul Pabloi tasku tsacha megai ashabe, kangurri kangurri trenchibelø køn:

—I møøbe chiguen kømø kweechaitøwein kuinrrun cha. Maryugurrimbe chindiimig ka øsig webarrindøgucha, tru maig kønrrabigwan asha mariibe pinab ashmig kuabe, øsig uñbashmønrrab asønän— chibelø køn.

⁵ Inchen Pablobe ulwan nagu pabørrgøbene, chigucha inçhimig køn. ⁶ Inchen nømbe parab mendøtashchab, kabe møi møi kwain tsumbutashchab ashib muniirab købelø køn. Inçhendø tru chindashchab truba yaana ashib køben, chigucha inçhimui ashabe, katøbe peemaytø isua, Pablone ‘kan tias køn’ chib mendabelø køn.

⁷ Inchen tru warainug trugatanbe Publio taigweim pirømera købig køn, tru pi tøbøtag pirø pasrabigu misagwan ashib karubigwei. Truibe namun truba tab wamab uta, pøn kwaløm ørøba truba tab inçhib kørrømisringarubig køn. ⁸ Inchen tru Publio møskaime pachibiig, ani larraibiibaig camayu kwanrø tsuben, Pablobe ashchab ya, Tiusba wamincha, tasigwan kwanrriigweim pala estsarene, tammisrøbig køn. ⁹ Inchen trugurrimbe katøgan kwanrreeløgucha tru pi tøbøtag pirø pasrabigu warabeløbe Pabloimay amrrua, tamarilø købelø køn. ¹⁰ Incha chigøben truba ketiiløtøga namun truba truba tab incha, nam amrrab barcoyu nebammwatø, ambamig chi palønrrabigwan nømbe chishtë tranøbelø køn.

Pablo Romasrø pub

¹¹ Incha tru pi tøbøtag pirø pasrabigu pøn pøl warøwabe, kan barco alejandríasriig tru srebub pølmara chab purayamne, truyu pasrabigu ambubelø ker. Tru barcobe Cástorwanba, Póluxwanba marig tøgaiig købig køn, chiyuilø kui asamig kønrrai. ¹² Incha barcos puinug Siracusasrø puabe, truyu pøn kwaløm warabelø ker. ¹³ Trugurrimbe pirø puluwandø purørrub amrrua, Regio ciudadsrøngatig amben, katø kwalømbe sursrøngurri, isig ichib kurrøben pa kwaløm kønrrabyube Puteolisrø pubelø ker. ¹⁴ Incha trusrømbe nunelø warabelø kuin kui wetørrabelø ker. Inchen nømbe namun truyu kørrømisray chiben nambe kan trune lincha kørrømisrøbelø ker. Incha øyee amba Romasrø pubelø ker. ¹⁵ Inchen Romasrø nuneløbe nam amrrunrrab kui wammøraguen kua, Apio ciudadsrø misag amrrua tulundzuniisrømba, katø tru Tres Tabernas taisrømba namun wamab utønrrab amrruin købig køn. Inchen Pablobe nømun ashabe, Tiuswan ungwa, ungwa cha, chi kømui lataig katøle truba tab kui mørøbig køn.

¹⁶Incha nam Roma chab pubene, Pablone trusrømbe nuin kui nøøøø yau tsubashibig køn, kan suldaowan nun ashchai pasra.

Pablo Romasø Tiuswei wamwan eshkaab kusrenanøb

¹⁷Incha tru puig pøn kwalømyube judíosmeran ashib karubelan Pablobe linchab amrrun-rrai eshkangarua, yandø truyu chab tulundzunøbene, trenchibig køn:

—Nai nunelø, nabe judíosmeran tsalø køb chi kaig marmøwei, katø namui kølli misaamera nømui trendø chigøben marøb tøgagúilan treelane marmumig køn chib pasrømøwei inchendø, Jerusalénsrøwei nane merrarra, romanosmerai tasku tranig køn cha.

¹⁸Inchen truiløbe nan maig kuigwan tab ashabe, elatchab inchibelø køn cha, kwan-rrai maramdiig nainug chigucha chi kalø marig kaaben. ¹⁹Trune judíosmerabe nan elachimønrrai sətølulen, nane treeg marøg kømuindøgucha nan maig punrrabigwan César asha martrai nane miamig nebuig køn cha, kabe na naim pirau, nai misaameraimburab chi køn chinrrab isua kømøtø. ²⁰Inchawei øyeeg puikkurri ñimun ashchappa, waminchappa nabe wamig køn cha. Nam israelitasmera muniiraigwan muniirabikkurri møi yu i cadenastøga merrarraig pasrar— chibig køn.

²¹Inchene nømbe Pablon trenchibelø køn:

—Nambe Judeagurri ñuimburab eshkabig chi kilga pøra ørig utømøwei, katø namui misag judíosmera trusrøngurri amrrubelø møikkucha ñi kalø maran chib ñuimburab namune chigucha waminchimøwei indig køn cha. ²²Inchendø ñi maig isuigwan wamindi mørinrabna kuin ker cha. Kaguende tru i sətø Tiusweiwan srøig peemay kusrenanøb marigwane chutøgucha ‘kaig køn’ chib, wamindi ashibelø ker— cha.

²³Incha nømbe kan ø kwaløm Pabloba tulundzunønrrab cha wesrawa pasra, tru Pablo ya peba tsuinuumay truba nu amrruben, løtsøgurri maabengatig ‘Tius tru nø ashib karub wainuguigwan øyeeg, øyeeg køn’ chib eshkaab, nøbe maig kuigwan waminchibig køn. Jesucristoimburab ke treegwei købig kuin kømab nøm nebua isumne inchib, tru maig maramigwan martrai Moisés pøriilan pølbasra, Tius maig karuigwan eshkabelø pøriilanbañau waminchibig køn. ²⁴Inchen kan utueløbe Pablo wamindigwan treegwein købig kuin kui isuben, trune kan utueløbe køremeelø køn. ²⁵Incha nømbe nømui ututøwei lata kandø isumuig køppe, tarømisra ambub køben, yandø ke srabe Pablobe trenchibig køn:

—Espíritu Santøbe tru Tius maig karuigwan eshkabig Isaiaskurri tru merrabsø ñimui kølli misaameran øyah chib, waminchippe, sølwei wamindin køn cha:

²⁶“I misaameran iigwan waminchab inrrø cha:

Ñimbe mørøppe, mørendø, managuen chigúi mørmønrrun chib.

Ashippe ashendø, chigúinguen nebua ashchaamøn chib.

²⁷Kaguende i misaamerai manrrømerabe nasrkwaailø,

katø mørøppe, mørendø, tab chigúinguen mørmeelø køn chib.

Nømui kabmerabe kasrailø køn cha,

kabmeratøga ashmøwei, nømui kalumeratøga mørmøwei inchai.

Katø nømui manrrøtøga mandø kuinguen mørmøwei,

katø naimay lliramøwei,

katø na tamarailø kømøwei kønrrun chinrrig,” taimbala.

²⁸‘Pøs øyeeg købene, ñimbe isua kuy cha. Judíos kømø misaameran tru kaigyugurri wesrabig Tiusweiwane wammørøsrailø køben, truiløbe mørtrun— chibig køn. ²⁹Inchen Pablo øyeeg chibene, judíosmerabe nømdø truba truba payiyab waminchib ambubelø køn.

³⁰Inchen Pablobe tru an pagarawa pebi yau pa pila ørøba kørrømisra, nun ashchab ambubelane mundøgucha wamab utab wabig køn truyu. ³¹Tius nø ashib karub wainuguigwan waminchib, Señor Jesucristoimburabigwan eshkaab kusrenanøb inchibig køn, mui malautøgucha trurriigu chi sətø luliimíike.

Romanos

'Ka amõñiqueh' chib pørig

¹ Na Pablo, Jesucristoi marøb megabig, Jesucristo nõashib nan karua ørig kønrrai nan wama pasrøb, Tiuswei tabig srø wamwan eshka kusrenanøb pasrønrrai nan tarømara pasrøb indig, i kilga pørigwan ørar.

² Iig tru tabig srø wambe Tius maig karuigwan eshkabeløgurri nui newan tab wam pøriiløyu tru merrabsrøwei Tius tranrrab misra kørrømisri wam køn ³ tru nui Nusrkaweimburab. Tru Nusrkai nõ misag kuigweimburappe, nõbe Davidwei misagurri arrubig køben, ⁴ tru Espiritu Newan Tabigweimburappe, tru maramburab mariitøga nune Tiuswei Nusrkain køn cha eshkawa pasrig. Treeg køn, tru kwabelai utugurri nõ katøle øsiirawa kurrig kuikkurri, truibe Jesucristo, tru namui Señor.

⁵ Incha nõgurri tru ka yandø tab indigwanba, nõashib karua ørig kømigwanba nambe utig køn, judíos kømø misaamera chu pirausreelandøgucha nõmui isubigwan nuinuutø pasrikkurri nõ maig taigwan mørøbelø kømigwan nam waminchib ambamig kønrrai, Cristoi munchiweyasig. ⁶ Inchen tru maig taigwan mørøbelai utu Jesucristoielø kønrrai wamiiløba ñimgucha truyu tøga pønrran. ⁷ Ñim mayeelø Romasrø warabelø Tius uidaarailø, Tiuswei misaamera kønrrai wamiilan ka yandø tab indiiiba, chi isumgaig tab købiiba ñimba kønrrai inchar, Tius namui Møskaweinnukkurimba, Señor Jesucristoinukkurimba arrubigwan.

Pablo Romasrømay yainrrabna kui inchib

⁸ Señor Jesucristogurri nai Tiuswanmerrig ungwa, ungwa chinrrab inchar ñim mayeelaimburab. Kaguende ñim ñimui isubigwan Cristoinuutø pasra tøgagüigwane chutøgucha tabig waminchibelø køn. ⁹ Pøs nai manrraugurri kerrigu newan isua, nui Nusrkawei tru tabig srø wamwan eshka kusrenanøb, nuiwan na marøb pasraig Tiusbe nane asha pasran, tru na nõba wamindigube managuen pesannamø ñimun isubig kuigwan. ¹⁰ Nabe nai Tiuswan 'purugurra' cha, miabig kur; Tius nan inrrain køben, yandø na chinchagøben ñimun ashchab arrumig may kurtra. ¹¹ Kaguende nane ñimun asinrrabna køtan, Tiusweimburabeløyuigwan chitøguen ñimun pirishinrrab, ñim mas mur pønrramig kønrrai, ¹² masken tru ñim lata, na lata namui isubigwan Jesucristoinug kanguelarrøtø tøga pønrraitøga nam ambugurri, igurri kuñab pønrramig kønrrai.

¹³ Pøs nabe ñim, nai nunelan, wammøra kønrrai inchar, nabe ñimuisrømay ñimun ashchab katø katø attrab isub megaigwan, na judíos kømeelø katøgan misaamerai utusrø kan ellmarig tulishib latawei, ñimui utugucha maitøguen tulishinrrab. Inchendø møingatig arrumgaig pasrambuig megabig kur. ¹⁴ Nabe griegosmeran lata, griegos kømø misaameran lata, kusreb misaameran lata, chi kusremø misaameran lata ulø pasrar Tiuswei wamwan eshka kusrenanamig. ¹⁵ Inchawei treekkurri ñim Romasrø warabelangucha nabe Tiuswei tabig srø wamwan truba truba eshka kusrenanøg kuim pasrar.

Tiuswei tabig srø wambe kaigyugurri wesramig maramburab marøbig køn

¹⁶ Pøs Tiuswei tabig srø wamweimburappe nabe chi kørig kui inchib pasrømur, kaguende truibe Tiuswei maramburab marøbig køn kaigyugurri wesrailø kønrrai mutøgucha Jesucriston kørebigeimbe, judíosmeramerrig, trugurrimbe katø griegosmeragucha. ¹⁷ Kaguende tru tabig srø wamyu kenamisran tru chi kaig marmeelø lataig tabig kørrømisra pønrramig Tiusweinukkurri arrubig, truibe isubigwan Cristoinuutø pasra pønrraikkurimba, katø isubigwan nuinuutø pasra pønrramig kønrraimba. Tru Tiuswei wamwan pørigu maig taimbala: "Tiusba tru mandø pasramigwan sølgandø treeg tabig pasrabiibe nui isubigwan Tiusweinug pasra tøgagüitøgatø uñchun" taig.

Maya misaamera kaig mara pønrraig

¹⁸ Tiuswei purø trømbøig namig købiibe srømbalasarøngurri kenamisrøb arrun, tru møguelø larrø trømbøig mariilaim palaba, tru sølgandø tabig kømigwan mariilaim palaba, tru treeg sølgandø tabig kømigwan mariiløtøga tru newan cierton tabigwan søtøgatab pønrrabelan. ¹⁹ Kaguende Tiusweimburabig kui asamigwane nõmbe tøgandø ashibelø køn, pøs Tiusbe nõashib trunun nõmun kenamarig kua. ²⁰ Kaguende tru chigurrimbunø pirøwan mara pasrøb uraskurri Tiusweimburabigwan tru kaptøga nebua asiimeelø, tru managurri mangatig nui maramburab marøb pasrabiiba, nõ trendø Tius køppe, treeg kuibabe tøgandø chigüi nebua samdiig kenamisran tru nõ chi mariiløyu. Inchawei treekkurriwei chi kemesra køben 'ashmeelø ker' chib pønrramibe chigagøn.

²¹ Kaguende nõmbe Tiuswan nebua ashippe ashendø, Tius kui ashabe, Tiuswan lataig tabig inchib tøgagømøwei, mayanguen ungwa, ungwa chimøwei inchibelø købig

køn. Treeg kømøtø, nømui isubigube chi purugunrrabgailø isumguengailan isuben, nømui chugúinguen mormubendø isub manrrøbe løstøraig kørømisrig købig køn. ²² Nømbe truba truba kusrebelø kermab inchendø, chugúinguen mormeelø kørømisrig købig køn. ²³ Tius managuen pinønrrabig kømíigwei tru törguegwalmabigwane møg kwawa pinønrrabigwei asrwan tre lataiøwei maramba, illimera latailø maramba, pib srøptøga animalmera latailø maramba, pirau srala ambub animalmera latailø maramba inchib, øyeeløtøga yunømarøbelø købig køn.

²⁴ Inchawei treekkurri nømui manrrau møgueløba, ishumburmeraba trømbøig marøg købig arrubigu trømbøig marøb chinchibgucha warønrrai Tiusbe elatsig køn, nømui asrmeran nømasiyaitø larrø trømbøig marøb kønrrai. ²⁵ Nømbe Tiuswei tru newan ciertonig køreigwane lelacha, isa wamindigwan kørewa, Tius tru mara pønsrailan køriibala tabig waminchib, truilayasisig marøbelø købig køn, tru chigurrimbunø kønrrai Tius mara pønrsøbig, Tius tru managatisig mayanguen tabig wamindigwan tabig wamindi urasbe. Treeg kønrrun.

²⁶ Inchawei øyeeckurri nømune purø trømbøig køríkken kønrraptiig marøb kønrrai Tiusbe elatsig købig køn, ishumburmerabe nømui asrwan møguelan tranamig købigwan treeg marmøtø, ishumburmeraaasiyaitø trømbøig marøb kebamben. ²⁷ Katø møgueløbe treetøwei nømui asrtøga ishumburba trendø treeg marigwan elacha, kanikkurri kanikkurri trømbøig marøg købitø kan chinsraatø inchib, møgueløbe nøm møgueløasiyaitø purø trømbøig køríkken kønrraptiig marøb kebambig købig køn. Nøm treeg trømbøig marøb pønrraimburø nømui asrutøwei nøm møra melamigwan utig købig køn.

²⁸ Inchagucha nømbe Tiuswane ni Tius kuitamabguen isug kømui inchen, Tiusbe elachiptindig købig køn, nømui isubigwane larrø kaig mindiilø tøgagøbashchab chi maramgaigwan marbashib. ²⁹ Nømbe kalø marøb amrruiløtø netsailø, purø trømbøig marøbelø, pareelø, trurrigu yandø larrø kailø, treelø køn. Nømbe chigurrin køben pusrkwai asamig køben, misagwan kweecha petamelø køben, kwayam lamelø køben, isatø may wamincha kegørrøsrkamelø køben, katøganun kaig martrab isumelø køben, trutø netsailø køn. ³⁰ Katøganuimbura chine wamincha mørøbelø, wam kusrupteelø, Tiuswane larrø tsaleelø, møramguenga trømbøig wamabelø, purab nørreelø mørørai inchibelø, nømasiitø purab nørreelø misrøw waminchibelø, chigurrimbunø kaig maramigwane srøitø, srøitø isua wesrubelø, usri møkalan chigucha mørmeelø, ³¹ larrø chugúi mormeelø, chi martrab waminchendø ka wamdø waminchibelø, manrrøga latailø, mungucha lastima ashmeelø, treelø køn. ³² Tru øyeege marøbeløbe kwamig kønrrai Tius treeg nebunrrai mara pasrigwan nømbe ashibelø købendø, katøgucha nømbe treegwan ka mariitø kønrrab kuindø, katøganelø treeg marene, 'øyambe søldøwei maran' chibelø køn.

2

Tiusbe mayeelan maig maramigwan asha martrab pasrainrrun

¹ Inchawei treeg købene, au, ñibe chi kemesra køben 'ashmíg kur' tamibe chigagøn, ni mu kuingucha, ñi katøganun 'øyeeg, øyeeg marøbig køn' chib pasraibe. Kaguende ñi katøganun 'øyeeg marøbig køn' chib pasrappe, ñibe ñiasiiitøwei kebeñib pasran. Pøs katøganun ñi 'øyeeg, øyeeg marøbig køn', chib pasraptøga ñigucha treetøwei marøb pasran. ² Inchawei nambe ashibelø ker, tru øyeeg marøbelane Tiusbe maig kønrrabigwan treeg kønrrai mara pasrøppe, tru newan ciertonig maig køben treeg marig kui. ³ Au, ñi tru katøganelø treeg marøbelan 'øyeeg, øyeeg marøbelø køn' chib pasraptøga, ñigucha treetøwei marøb pasrøbendø, ñi isuppe, ¿Tius tru maig kønrrabigwan treeg kønrrai mara pasrigugurri chi indimíg ñigan welulrrurmatirru? ⁴ ¿Kabe Tiuswei tru purø tab indig tøgagømburab tøgagúilanba, nø chindingucha tammayig kuigwanba, tammay munugubig, munugubig kuigwanba, truilan kashchab inchib pasrøtirru, Tiuswei tru purø tab indibe ñui kaig mariilan isua møra, Tiusweimay lliranrrai inchib pasrøben, trunun isua ashmøtø?

⁵ Inchendø ñibe ke ñi isuigwandø martrab inchibikkurrimba, mas kaig marmønrrab ñui manrrau ñi isua mørmuikkurrimba, ñibe Tiuswei namig købigwan nui sølgandø maig kønrrabigwan asha maram kwalømwei ñuyasiitøwei tunbasrøb yan, Tiuswei tru maig kønrrabigwan sølgandø asha marig kenamisram kwalømweyasig. ⁶ Tiusbe møigwandøgucha nøm maig marig køben kanun kanun truburø nø maig tranamigwan treeg tranrrun. ⁷ Managatisig øsig kømigwan tranrrun Tiusbe, tru managuen elachimø, tabig marøbig marøb melaigu tru maya nuguen tab indigwanba, tabig kui asha tab indigwanba, managuen patsønrrabig kømíigwanba labelane. ⁸ Inchendø tru nøm maig isuppe, ke treegwandø kønrrai isua marøb, tru newan ciertonigwan møra marmøtø, tru sølgandø tabigwan møra marmeelaim pala attrun Tiuswei tru purø trømbøig namig købiibe. ⁹ Tru kaig marøbelaimbe muim palatøgucha purø trømbøig chine nebui melamiba, ni mumayguen kømíig isui melamiba

atrun, judíosmeranmerrig, trugurrimbe judíos kómø misaameran. ¹⁰ Trune mōnundøgucha tabig marøbelambe tru maya nuguen tab indiiba, tabig kui asha tab indiiba, chi isumgaig tab købiiba kønrrun nōmuimbe, judíosmeranmerrig, trugurrimbe judíos kómø misaameran. ¹¹ Kaguende Tiusbe muingatøgucha wamøtø, lata ashibig køn.

Tru maig maramigwan martrai Moisés pørig

¹² Inchawei maig maramigwan martrai Moisés pørigwan chigarmera kua, mutøgucha kaig marøbeløbe tru maig maramigwan martrai pørigu asha mariilø kōmuingucha, pinab pinamnuumay amben, katø tru maig maramigwan martrai Moisés pørigwan tøgarmera kua, kaig marøbeløbe, trube, tru nōmui pørig tøgagüitøwei maig kønrrabigwan asha mariilø kønrrun. ¹³ Kaguende maig maramigwan martrai pørig maig tailan ka mōratø amōña, Tiuswein kabyu sølgandø tabelø kønrrab kōmøtø, tru maig maramigwan martrai Moisés pørig maig tailan mōra marøbelø, truiløbeguende Tius tabig kōrrømariilø kønrrun. ¹⁴ Pøs tru judíosmera kōmeelø tru maig maramigwan martrai pørig chigarguen tru pørig maig martrain chibigwan nōmbe ka trendø treeg marøb amøñippe, nōmbe tru maig maramigwan martrai pørigwane chigarmerabe kōbendø, nōmui mariiløyu tru maig martrai karuigwane pøri latailø købig køn nōmashib. ¹⁵ Nōmbe tru maig maramigwan martrai pørigwane nōmui manrrau pøri lataig tōgar kuin kui kenamaran. Tru nōmui isub kebachib pasrabiibe nōm maig kuigwan eshkaben, tru nōmui isubiibe, ‘ñibe kalø mara pasran’ tain kui, kabe ‘tabig mara pasran’ tain kui indan. ¹⁶ Inchen øyeebe tru mōguelø nōmui manrrau mu asiimüg nōmuinetø tøgagülan Cristo Jesúsukuri Tius maig kønrrabigwan asha marøb kwaløm treeg kønrrun, Tiuswei tru tabig srø wamwan na wamindig maig kōben.

Judíosmeraba, tru maig maramigwan martrai Moisés pøriiba

¹⁷ Ñi, judío misag cha wamig, tru maig maramigwan martrai Moisés pørig maig chibig kōben ñibe ke truigwandø kemenda pasrøwa, ‘Tiusbe namunwei lawa wesrailø ker’ chib, ñi nuig misrøb mōg inchib pasrab, ¹⁸ katø ñibe Tius maig martrai palai waigwan nebua ashib, katø tru purø tabigwane ñibe ‘tabigwein køn’ chib, pasrab inchibig køn, kaguende ñibe tru Moisés pørigwan kusrenanig kua. ¹⁹ Ñibe tru chi ashmeelø kabgar latailan muba ambamigwan ‘nabe sí, pera ibig kurmab’ isua pasrab, katø lōstøyuelaimbe ñibe ‘tør kurmab’ isub, ²⁰ katø, ‘chugüi mōrmeelan maig kuigwan kusrenanøb, ureg latailan kusrenanøb inchibig kurmab’ isuinrrun, kaguende tru maig maramigwan martrai Moisés pørigube nebua ashib kusreelanba, tru newan ciertonigwanba maig kuigwan newan trendailan ñibe tøgagua. ²¹ Ñi katøganelanguen kusrenanøbig kōbendø çñiasitøweimbe kusrennrrab inchimøtirru? ‘Nilamig kōmøn’ chib, ñi eshkab kusrenanendø, çñigan niløtirru? ²² Katø ‘itølulumig køn’ chib, ñi waminchendø, çñigan itøluldirru? Ñibe taska mari tiusmeran larrø tsaliig kōbendø, trube, truilø pønrrai yau chi pønrrabigwane çñigan nila wesratirru? ²³ Tru maig maramigwan martrai Moisés pørigu ñibe truba nuig misrøb waminchib pasrøbendø, çtru pørigwandøwei kalø marøb itøbunab pasraitøga, Tiuswane kaigwan lataig inchib ñigan maig kōbash marøb pasrøtirru? ²⁴ Tiuswei wam maig pørig pasraimbala: “Ñimgurrindø judíos kómø misaamerabe Tiuswei munchiwan purø trømbøig wamig køn” taig.

²⁵ Pøs ñi circuncisiónwan mara tøgagüibe, tru maig maramigwan martrai Moisés pørig maig chibigwan mōra mareneguende, purugubwei indan. Inchendø tru maig maramigwan martrai Moisés pørigwan ñi kalø marøb itøbunøbene, tru ñi circuncidawa pasrab taibe chi circuncidamüg lataitøwein køn. ²⁶ Inchawei tru circuncisiónwan marmikken tru maig maramigwan martrai Moisés pørigu maig chibigwan treeg marene çcircuncidamüg kuingucha, Tiuswein kabyube nui misag kui asamig circuncidaweig kui lataitøwei kōrrømarig kōmuitarru? ²⁷ Inchen tru judío kómø misag, asru tru circuncidamüg kōbendø, tru maig maramigwan martrai Moisés pørig maig taigwan marøbiibe, ñi, judío, tru Moisés pørigwan tøgag, katøgucha circuncidaweig kōbendø, tru pørigwan kalø marøb itøbunøbene, nø maig uniitøga ñune nōguen ñi kalø marøptiig kui kōrrømartrun.

²⁸ Kan judío kōmibe, ka palatø judío kønrrab kōmøwei, asru ka palatø circuncidaweig kuikkurri judío kønrrab kōmøwein køn. ²⁹ Treeg kōmøtø, kan cierton judiøbe nui umbugurri treeg køn. Katø tru circuncisiónwan Espiritu Santogurri manrrau marig køn, tru maig maramigu pøriiløgurrin kønrrab kōmøtø. Inchen tru treeg mōwane maya nuguen tabig wamindiibe mōguelainukkurrin kōmøtø, Tiusweinukkurri arrubig køn.

3

¹ Trube, treeg kōbene, çkan judíoimbe chiyutørre mas tabig kerah kan judío kōmügwei lata? çKatø tru circuncisión mariibe chi purugub pasrah? ² Pøs, kan judío kōmibe chiyutøgucha truba truba tab køn. Srøtøbe, Tiuswei wamwan nōmunwei asha marøb tøgagørraimab isua trana pasrig købig køn. ³ Pøs nōm mōiløgøben Tiusba maig pønrramigwan treeg

pønrømuingucha, tru nøm Tiusba treeg pønrømuikkurrindø, Tius nø maig tabig kuigwane treeg kòmønrrai mana treeg martrab kø. ⁴ ¡Kah! mumaygucha chi treeg kønrraamøn. Treeg kømøtø, Tiusbe nø maig martrab taigwane isømø, treeg marøbig køn, misaabe mutøgucha isapteelø kuingucha. Tiuswei wamwan maig pørig pasraimbala:

“Ñi wamindiiløyu sølwan waminchibig kui asig kønrrain køn taig.

Katø ñun ‘øyeeg, øyeeg marøbig køn’ tainab pasraigu ñibe tab puraya webyan” taig.

⁵ Inchen tru nam sølgandø tabig marmub pønrraibe Tius nø sølgandø tabig kuigwane masken tab nebua asig kønrrai kenamarene, trube, ¿nambe chi chinrrab køh? ¿Tru Tius nui namig købiitøga namun møra melønrrai marøppe, søl marmúg køptø, treeg marig kønrrab kø chindah? (Nabe iigwan trenchippe, møguelø maig isubelø køben, trumay isua trenchar.)

⁶ ¡Kah! mumaygucha chi treeg kønrraamøn. Trube, øyamay kuimbe ¿pirau maya misaameran tru maig kønrrabigwan Tiusbe chinha asha martrab kø?

⁷ Inchen tru nai isa wamindiibe Tiuswei newan chertongigwane masken maya nuguen tabikken kønrraiarendøbe, trube ¿nane katøgucha chindimbarre kaig marøptiig kuig mara kørømarah? ⁸ Trube, øyah chinrrauta (tru møiløgøsrøn namuimburab trømbøig waminchib itø amrrubeløma namun ke øyeeg chib pønrrabelø kui marøbelø køn): “Kaigwan margun cha, tabig attraimbe”. Tru trenchibelane møra pønrrønrrai maramig sølwein køn.

Tabig sølwan marøbeløbe kanguen mu kaagøn

⁹ Trube, treeg købene, ¿nam judiosmerabe katøguchi tabelø købra chindah? ¡Kah! mumaygucha chi treeg kømøn. Kaguende: “Judiosmeran lata, judios kømeeelan lata, kaibe mayeelanba nø karub tøga pasran” cha. Yandø nambe: “Treeg køn” cha chab trendaig kuig køn. ¹⁰ Tiuswei wamwan pørigu maig taimbala:

“Sølgandø tabiibe ni kan kandøguen mu kawei,

¹¹ maig kuigwan chi chibig kui mørtrabig muguen kawei,

Tiuswan isub lanrrabiibe muguen kawein køn cha.

¹² Mayeeløba peeburabgøba amba,

møitøgucha chi martrabgaig kailø misrin køn cha.

Tabig marøbiibe muguen kaagøn cha,

ni kan kandøguen mu kaagøn cha.

¹³ Nømui mørambe kan kwaig sørin trabwan kura pasri lataig køben,

nømui niløtøgabe may wamincha, isa kegørrøsrkøbelø køn.

Nømui trikkalusyube ulmerai venenon muga latalø, treelø køn cha.

¹⁴ Katø nømui trigube kaig nebunrrai trømbø wamamibah,

larrø pusrkwanrraptiig wamamig møbgølig lataibatø netsailø køn cha.

¹⁵ Nømbe kweechib, ani lushib luløb pønrramig srøbmerabe unchaguen tøgar køn cha.

¹⁶ Nømui amønailøbe purø isumdiig kørømisra waramig kønrraimba,

chugurringuen kømuielø isuig kørømisra waramig kønrraimba,

treeg marøbelø køn cha.

¹⁷ Ambumay imay tab amønamiigwane ashmø misaamera køn cha.

¹⁸ Nømbe Tiuswan kørig tøgagømiigwane

ni managuen isumeelø, treelø køn” cha,

trenchibig køn.

¹⁹ Pøs nambe ashibelø ker, tru maig maramigwan martrai Moisés pøriibe tru pørig maig chiben truigwan marøb melabelaimburab waminchibig kui, mumeratøgucha chi chinchab kaima pønrramig kønrraimba, katø Tiuswei merrab pirau maya misaamera kerriguba nømui chi mariilan eshkab pønrramig kønrraimba. ²⁰ Kaguende tru maig maramigwan martrai Moisés pørig maig chibig køben trunun marikkurri Tiuswei merrab chi kaig marmúg lataig munguen tabig kørømarig kønrraamøn. Treeg kømøtø, tru pøriibe nambe kaig marøbelø kui trunun kenamarøb pasran.

Kaigyugurri webambamibe isubigwan Jesucristoinug pasra tøgagüikkurrin køn

²¹ Inchen mømbe tru chi kaig marmeelø lataig tabig kørømisra pønrramig kønrrai marøbig Tiuswei yandø kenamisrin køn, tru maig maramigwan martrai Moisés pøriiba chi asamikkaig, Tius maig karuigwan tru eshkabeløba, katø tru maig maramigwan martrai Moisés pøriguba, tru truigweimburab maig wamindig køben, treeg. ²² Iig tru chi kaig marmeelø lataig tabig kørømisra pønrramig kønrrai marig Tiusweimbe, isubigwan Jesucristoinug pasra pønrraikkurri arrubig køn mayeelø nun kørebelaimbe,

mungucha nøøø marøb kandarøtø inchimø. ²³ Kaguende mayeeløba kaig mara, Tiuswei tørguegwalmabigwane chinha nebumøn. ²⁴ Incha tru chi kailø kømeeelø lataig tabig pønrramig keta traniiibe Tius ka yandø tab indikkurrin køn, Cristo Jesús kurri Tiusweyelø kønrrai wesruilø kuikkurri. ²⁵ Tiusbe Cristone kan animal kweecha tranøb lataitøwei marig køn,

Cristoi ani lusing nømui isubigwan pasrikkurri misag kaig mariilan Tius ulø paymumig

kønrrai. Øyeege marøppe, Tius nui tru sølgandø tabigwan ashchai kenamaran, kaguende tammay muniirabig køptø, tru merrabwan kaig mariilane chi ulø paymønrrab pesannawa. ²⁶ Nøbe øyeege marøppe, tru mõi øyan kwaløm nui sølgandø tabigwan kenamartrab indig køn. Katø nøbe isubigwan Jesúsweinug pasrøbigwane chi kaig kømígg lataig tabig kørrømisrtrai marøbig køn.

²⁷ Trube, treeg købene, ¿chiyu møg inchib pønrrønrrerah? Pøs treeg indamibe yandø patsan. Trube, ¿trunune mumay martrai pasriitøga patsøga pasrah? ¿Chigøben tabig mariiløtøga kønrrab kø chindah? Kah, treeg kømøtø, trube isubigwan Cristoinug pasrtrai indiitøga patsøgan. ²⁸ Pøs nambe øyamay køn chibrren pønrrer, tru chi kaig kømígg lataig tabig pasramibe isubigwan Cristoinug pasra tøgagúikkurrin køn cha, tru maig maramigwan martrai pørigu truilan mariiløgurrin kønrrab kømøtø.

²⁹ ¿Kabe Tiusbe judíosmerayasiitø Tius kønrrab kø chindah? ¿Nøbe judíos kømø misaam-eraingucha Tius kømuitarru? ¡Pøs yamba treegwein kømuitarru! Judíos kømø misaam-eraingucha nøbe Tius køn. ³⁰ Kaguende Tiusbe nøtø kandø køn, isubigwan nuinug pas-rikkurri judíosmera, tru asru circuncidawarmeran chi kailø kømeeelø lataig tabig pønrramig marøb, katø judíos kømeeelø, tru asru circuncidawa kømeeeløgucha nømui isubigwan nuinug pasrikkurri chi kaig kømeeelø lataig tabig pønrramig marøb inchibig. ³¹ Pøs treeg købene, ¿isubigwan Tiusweinug pasra tøgagúitøga tru maig maramigwan martrai pørigwane chigucha kømígg mara kørrømartrautah? ¡Kah! mumaygucha chi treeg kønrraamøn. Masken nambe tru maig maramigwan martrai pørigwane maig købiibe, treeg kønrrai inchib pønrrer.

4

Abraham isubigwan Tiusweinug pasrikkurri Tiuswei merrab chi kaig kømígg lataig kørrømarig

¹ Treeg købene, ¿nam judíosmerai tru merrabsrø namui kølli misag Abrahambe chi wetørraig køn, chinrrab? ² Pøs Abraham chigøben tabig mariitøga chi kaig kømígg lataig tabig pasramig kuig kuimbe, møg inchib waminchib pasramig købwei inchisruinrrun, inchendø Tiuswei merrab kømøtø. ³ ¿Tiuswei wamwan pørigube mandø chibig køh?: “Abrahambe Tiuswan køreben, treekkurri nune Tiusbe chi kaig kømígg lataig, tabig treeg asha pasrig køn” cha, trenchibig køn. ⁴ Pøs møikkøben kan chigøben marenma, truburø tranibe keta tranig kømøtø, nui marimburø tranamigwan tranig, treeg køn. ⁵ Inchen Tiusba tab pønrrønrrab chi marmuindøgucha, tru kaigwan chi kaig kømígg lataig tabig kørrømarøb Tiuswan kørebene, tru nui isubigwan nuinug pasrigwane Tiusbe sølgandø tabig kui asan. ⁶ Davidbe katø treetøwein taig køn: “Maya nuguen tab kuig køn cha, kan møg nui tabig mariiløgurrin kømøtø, Tius ka yandø chi kaig kømígg lataig tabig treeg asha treeg kørrømarinabigweimbe.” ⁷ Øyah chib:

“Mayanguen tab kuilø køn cha,

kaig mariilan Tius nømun chigucha chi ulø paymønrrab pesannab,

katø nømui kaig mariilan chi isua ashmø kasra kørrømarinabelaimbe.

⁸ Mayanguen tab kuig køn cha,

Señor nui kaig marigwan trunun isua ashmøtø, Señor kagøbasinab møøbe.”

⁹ Inchen iig tru mayanguen tab købiibe ¿circuncidawarmeraindø kønrrab kø chindah, kabe circuncidameelaingucha kønrrab kø chindah? Pøs nambe trendaig kuig køn: “Abrahambe isubigwan Tiusweinuutø pasra tøgagúikkurri nune Tiusbe chi kaig kømígg lataig tabig treeg asha pasrig kuig køn” cha. ¹⁰ Inchen ¿tru treeg mara kørrømarøb urasbe nøbe maig uñen kuig køh? ¿Nøbe circuncidaweig køben kuig køh, kabe circuncidamígg srø køben kuig kø chindah? Nøbe circuncidaweig køben kømøtø, nøbe circuncidamígg srø købenbatøsrøwei treeg kørrømarig kuig køn. ¹¹ Inchen Abrahambe tru isubigwan Tiusweinuutø pasra tøgagúikkurri chi kaig kømígg lataig tabig treeg asha kørrømarí wendøsrø, truigweimburab tru circuncisiónwane kan siñal, kan sello lataig utig køn. Treekkurri Abrahambe circuncidameelø mayeelø Tiuswan kørebelaimbe nøbe møskain køn, nømøgucha kaig kømeeelø lataig tabig treeg asilø kømígg kønrrai. ¹² Katø Abrahambe tru circuncidailaingucha møskain køn, tru treegwan ka mariitø kømøtø, tru namui møskai Abraham circuncidamígg køppatøsrøwei nui isubigwan Tiusweinuutø tøgga unigu truwandøwei trappunabelaimbe.

Tius nø martrab kørrømisriibe isubigwan nuinuutø tøgagúikkurri utønrrun

¹³ Kaguende Tius tru treeg tranrrrab cha kørrømisrigwan Abrahamwanba, nuinukkurri karrab misaameranba pirøwan ketig utønrrun chib urasbe, tru maig maramigwan martrai pøra wesruitøga tranmøtø, nø isubigwan Tiusweinuutø pasra tøgagúigu chi kaig kømígg lataig nø treeg kuigu tranig køn. ¹⁴ Kaguen tru keta tranrrrab misrigwan utønrrabeløbe tru maig maramigwan martrai pørig maig taigwan marøbelø, truiløtø kuig kuimbe, trube, tru isubigwan Tiusweinug pasra tøgagúibe chi tøgagømuinguenig køben, katø tru treeg

trannrrab cha korrømisrikkucha ka treeg martrab taitø purebsruinrrun. ¹⁵ Pøs kaguende tru maig maramigwan martrai pøriibe Tiuswei trømbøig namig købigwan tøgag arrubig køn mørmeelaim palabe. Inchen tru maig maramigwan martrai pøra wesruig chiganuube, kalø marøb itubunab kømikkucha chigagøn.

¹⁶ Inchawei Tius tru treeg trannrrab cha korrømisriibe misaamera nømui isubigwan Tiusweinug pasrikkurri arrubig køn, triibe Tiuswei tru ka yandø ketig kønrrai. Incha tru Abrahamweinukkurri amrrub misaamerai mayeelaimba maig marigwane mu kønøgamgaig treeg marig korrømisrtrain kuig køn. Tru maig maramigwan martrai pørig maig taigwan marøbelaindø kømøtø, tru isubigwan Tiusweinuutø pasrig Abraham tøgagüigwandøwei tøgaweimbe nømuingucha kønrrai. Inchawei Abrahambe Tiusweimbura-bigu nam mayeelai møskain køn. ¹⁷ Tiuswei wamyu maig chibig pørig pasraimbala: “Truba yambalø peesrøn, peesrø warønrrab misaamerai ñune møskain kønrrai marar” taig. Tru Abraham kørewa pasraig Tiuswein kabyube Abrahambe namui møskain køben, tru Tiusbe kwallan øsiirangarub, chi marig kaabendø, chabguen marig pønrrai lataig wamabig, treeg Tius køn.

¹⁸ Chi treeg kønrraitamab isua muniiramig chigagüingucha, Abrahambe kørewa, muniirab megaig køn. Treekkurri truba yambalø peesrøn, peesrø warønrrab misaamerai møskai misrig køn, Tius øyah taimbala: “Ñuinukkurri karrab misaabe øyeeg nørro kønrrun” taig. ¹⁹ Abrahambe isubigwan Tiusweinug pasra tøgagüigube treeg kømuptinchaitamab nui as-rwan isua, kullaaramuig køn, nøbe yandø kwai lataig kuinaindøgucha. Kaguende nøbe yandø cien años lutauig købig køn. Katø Saragucha ureg tøgagømibe kwai lataitøwein købig køn. ²⁰ Øyeeg køben Tius tru treeg martrab cha korrømisrigwane Abrahambe treeg kømuptinchaitamab isumuig køn. Treeg kømøtø, nui isubigwan nø Tiusweinuutø pasra tøgagüibe masken mur pasrønrrai marig pasrøwa, Tiusweyasig maya nuguen tabig marøbig køn. ²¹ Abrahambe treeg kønrrab kui newan isua pasrabig køn, Tius treeg martrab cha korrømisrigwane maramburab maramigwan tøgä Tius kui. ²² Incha nui isubigwan Tiusweinug pasrikkurri Tiusbe Abrahamwane chi kaig kømifig lataig tabig kui asha utig køn.

²³ Inchen tru: “Chi kaig kømifig lataig tabig kui asha utig køn” cha pøriibe Abrahamweyasi-itø kømøtø, ²⁴ namuyasikkucha tøgä pøra pasrig køn, tru nam chi kaig kømeeelø lataig tabig kui asha Tius utiilø kønrrabelaimbe, tru namui Señor Jesucristo kwallai utugurri katøle øsiirangarub Tiuswan nam kørebelaimbe. ²⁵ Cristobe namui kaig mariilaimburø kwanrrai tranig kua, katø nune katøle øsiirangaruig køn, Tius namun chi kaig kømeeelø lataig tab kui asiilø kønrrai.

5

Kaig marig chigar kønrrai yandø tabig korrømarig

¹ Inchawei isubigwan Cristoinug pasra pønrraikkurri chi kailø kømeeelø lataig tabig pønrramig kua, Tiusba chi isumgaig tab pønrramigwan tøgaguer, Señor Jesucristogurri. ² Pøs katø nambe nøgurri namui isubigwan nuinuutø pasriitøgä øyeeg tru ka yandø tabig tranig kebamba, truyu pønrrøwa, Tiuswei tørguegwalmabigwan namgucha tøgagønrrab, treegwan isua muniirab tab kui mørøb pønrrer. ³ Incha øyeetø kømøtø, namun chigøben isumdiig nebuben, katø nambe mayanguen tab kui kasraarabelø ker, kaguen tru chigøben isumdiig nebui pønrramig arrubiibe maig kuingucha tammay melam kusremig arruben, ⁴ tru maig kuingucha melabig melaigugurri arrubiibe, chine pub arrubigu chi kømui lataig pønrrabelø kømig arruben, tru treeg chi kømui lataig pønrrabelø kuigyugurri arrubiibe, tru tøgagømigwane yandø tøgaguen pønrrermab isua pønrramig arrubig kui isubelø kuig køppe. ⁵ Inchen nam tru tøgaguermab isua munig melaibe, treeg kømuptincha namun ka isuindø pønrramig kønrrai korrømartrabig kømøn. Kaguende Tiusbe namun manrrøwan nui undag købiitøgä netsøgana pasrig køn, Espiritu Santon namun tøgagønrrai tranikkurri.

⁶ Pøs nambe chigucha chi martrabgailø pønrrøben, Cristobe kailayasiig kwaig køn, yandø ke treeg maramig puben. ⁷ Tabig sølgandø uñib møweimburø kan mugøben nø purøbasramisra kwanrrab indamibe purø murig køn, ke kan larrø tabig marøb møweimburøgan pøs kan mube nø purøbasramisra kwanrrab pasramisrøbwei inchibsruitarru køben. ⁸ Trune Tiusbe nui undag købig namuyasiig tøgagüigwan øyeeg marigu kenamaran, nam kaig marøbelø købenbatøsrøwei, Cristo namuimburø nø purøbasramisra kwaigu. ⁹ Møimbe yandø Señor Jesucristo ani lusiitøgä nam chi kaig kømeeelø lataig tabig pønrraig køppe, møimbeguende Tiuswei trømbøig namig købig namui pala attrabig pasrabigwan Cristogurri treeg pumønrrai mariilø kømønrrun. ¹⁰ Pøs nam Tiuswan ashig kømui inchib pønrrab urassrøweinguen, nui Nusrkai kwaikkurri Tiusba tammay tabig korrømisra pønrramig kønrrai mariilø kuig køppe, møimbeguende, yandø nam nøba tabig korrømisra pønrrønrrai mariiløbe, nambe kaigyugurri

wesrailø kømønrrun Nusrkai øsig kuikkurri. ¹¹ Incha katø iitø kømøtø, nambe Tiusweinug maya nuguen kasrag pønrrer namui Señor Jesucristogurri. Pøs nøgurri nambe Tiusba tru tammay tabig kørømisra pønrramigwan mømibe utig kuig køn.

Adánweiwanba, Cristoiwanba waminchibig

¹² Pøs kaig mariima kan møkkurrindø yu pirau kebarruben, kwamibe tru kaig marikkurri arrig købene, øyeetøwei tru kwamibe maya misagwan puraarrub arrig køn, kaguende mayeeløba kaig marig kua. ¹³ Tru maig maramigwan martrai pørig chigaabenbatøwei, kaig mariibe yu piraube pasrabguen indig køn. Inchendø tru maig maramigwan martrai pørig kaabene, kaig marigwangucha chi isua asamig kaabig køn. ¹⁴ Treeg kuindøgucha, tru kwamibe Adán tsub urassrøngurri Moiséskatig mayeelaim pala pasrøben, mayeelamba kwamig arrig køn, Tius karua pasrigwan kalø marøb itøbunab Adán mari lataitøwei marigwan marmeelaim palaguen. Adánbe tru wendau attrabigweimbe tre lataitøwein kuig køn.

¹⁵ Inchendø Tius nø keta traniiiba, tru karua pasrigwan Adán kaig marøb itøbuniibabe treetøwein kømøtø, peg køn. Kaguende Tius karua pasrigwan kan møg kalø marøb itøbunikkurrindø misag truba nørø kwamima kuibe, treetøguen kømø, Tiuswei tru ka yandø tab indiibe misag nørø pønrrabelaim pala arrumburab arrig køn, tru Jesucristo kan møweinkurrindø ka yandø keta tranig arrubig. ¹⁶ Inchagucha Tius tru keta traniiibe, tru kan møøtø kaig marigugurri arrubig lataig kømøtø køn. Kaguende tru kaig marimburo maig kønrrabigwan asha mariilø pønrramig arrubiibe, kanbalø kalø marikkurrindø arrua, misagwan kailø kui kørømara pønrrailø kømigwan tøgäig arrig køn. Trune Tius tru ketiibe møguelø puro nørø kalø mara pønrrøben, treekkurri arrua, Tiuswein kabuyu nam chi kaig kømeeelø lataig tabig pønrramig kønrrai mariilø kømigwan tøgäig arrig køn. ¹⁷ Pøs Tius tru karua pasrigwan kan møg, nøtø kaig marøb itøbunikkurrindø maya misagweim pala tru kwamig nø karub pasrønrraima, tru kan møøtø øyeeg mariibe, treetøguen kømøtø, tru Jesucristo, nø kan møkkurrindø nøm øsig kuigube chigurrimbunø arrubigwan nøm kanawa puraambub amrrun, tru Tiuswei nørø ka yandø tab indigwanba, tru chi kaig kømig lataig kømig ketigwanba Tius tranig utabelø.

¹⁸ Pøs Tius karua pasrigwan kan møg kanbalø kaig marøb itøbunikkurrindø maya misaameran møra pønrrønrrai pønrrailø kømima kuibe, katø treetøwei kan møg kanbalø sølgandø tabig mariitøgatø maya misaameran tru chi kaig kømeeelø lataig tabig kørømisramigwan maran, truiibe nømuyasig øsig kømigwan tøgäig arrubig. ¹⁹ Kaguende kan møøtø maig karuigwan møra marmuikkurrindø misaamera truba nørø kaig marøbelø kønrrai mara kørømariibe, katø treetøwei kan møøtø tru maig karuigwan møra mariibe truba nørø chigucha chi kaig kømeeelø lataig tabig kørømariilø kønrrun.

²⁰ Tru maig maramigwan martrai pøriibe tabigwane tabig kui ashchaimba, kaig marigwane kaig kui ashchaimba asøskønrrab kebarrubene, tru kaig marøb itøbunab kømibe masken nurab larrøbitsig køn. Tru kaig marig mas larrøbichib nurabene, Tiuswei tru ka yandø tab indiibe treetøguen kømø, purab nuikken nurab larrøbitsig køn. ²¹ Inchawei tru kaig mariibe misagwan Tiusweinkurri tarømara, kwamigumay srua ib truig kerriguwan nø karub pasrab lataitøwei, tru ka yandø tab indikkucha tru sølgandø tabig mariitøga kerriguwan nø karub pasrønrrain kuig køn, managatig øsig kømigwan tøgäig Jesucristo namui Señorgurri.

6

Kaig marøb melaigugurri yandø wesrailø

¹ Trube, treeg købene, ¿mandø chinrrab? ¿Tiuswei tru ka yandø tab indig mas nurab larrøbichib attraimbe, trube, kabe kaig maramigwan marøbig martrab køh? ² ¡Kah! munaygucha chi treeg kønrraamøn. Kaguende nam kaig maramigweimburappe yandø kwailøbe tru kaig maramigu katøgucha chincha øsig pønrrønrrab. ³ ¿Kabe ñimbe ashmeelø køtirru, nam mayeelø Cristo Jesúswei munchiyu piu umbu ulsrøbeløbe, tru nø kwaigu namgucha nøba kanguegøtø nø kwab lataitøwei mara pønrrain kui? ⁴ Kaguende nambe piu umbu ulsraitøga nøba kanguegøtø søri latailø kuig køn, nø kwaigu namgucha kwanrrab, Møskawei torguegwalmabiitøga kwabelai utugurri Cristo katøle øsiirawa kurrab lataitøwei, namgucha katøgan srøig peemay øsig amønnamigwan tøgagønrrab.

⁵ Cristo kwaiguma trakkandø kanbalatø nam nøba pønrrain kuabe, treetøwei nø øsiirawa kurrigugucha nambe øsiirawa pønrramig kønrrun. ⁶ Kaguende nambe ashibelø ker, tru nam trendø kaigwan tøga kal-laig tru køllig namui umbu pasrabigwane Criston tru kurussyu mesrøben, tøga mesrøb lataig marigwan, tru namui umbu kaig martrai isungarubigwan pinisäig kønrrai, nam kaig maramigutø melabig melamig kømønrrai. ⁷ Kaguende yandø kwabiibe, treeg kaig marøb megamigugurrimbe treeg marmønrrab webya pasran. ⁸ Pøs

namgucha Cristoba kanguegøtø kwab lataitøwei marabe, katø nõba øsig purramigwan-gucha purramig kõnrrab kui isua põnrrer. ⁹ Kaguende nambe ashibelø ker, Cristobe kwabelai utugurri katøle øsiirawa, yandø kurrikkurrimbe katøbe yandø mana kwamønrrabig køben, tru kwangarub pasrabiibe yandø nune katøbe chigucha martrab kaimanrrab kui. ¹⁰ Cristobe kwappe, tru kaig marigweimburab kan pijitø managatigweyasig kwawa, katø moi øsig wappe, Tiusweyasig øsig wan. ¹¹ Inchawei treetøwei ñimbe kaig maramigweimburappe yandø kaig marmønrrab kwailø kermab isua põnrray. Inchendø Tiusweyasiibe Cristo Jesúsba kanbalatø põnrraikkurri øsiguelø kermab isuague.

¹² Trube, treeg købene, tru kaig maringarub pasrabig tru ñimui patsønrrab asru nõ karub pasrønrrain kõmøtø kuig, tru kaig marøg købig arrubigwan ñim tru kuindø maramig kõmønrrai. ¹³ Katø ñimui asru tasiimera, srøbmera, øyeelø chine tøgagúilan kaig maramigweyasig tranrrab inchib põnrrømtø. Treeg kõmøtø, masken ñimbe kwailø latailø kua, katøle øsiirawa latailøsun Tiusweyasig tranrrab inchib, ñimui asru chi põnrrabigwane trurrawa sølgandø tabig marøb kõmigweyasig tranrrab inday. ¹⁴ Pøs tru kaig mariibe ñimune yandø nõ karub pasrømønrrun. Kaguende yandø ñimbe tru maig maramigwan martrai pørig truig karuig melømøtø, Tius nõ ka yandø tab indig truig karuin põnrran.

Møimbe yandø kaigwan kõmø, tabig maramigwan marøb melabelø.

¹⁵ ¿Trube, treeg købene, mandø inchab? ¿Tru maig maramigwan martrai pørig truig karuig melømøtø, Tiuswei tru ka yandø tab indig karuig põnrraig køppe, kabe kaigwan marøb kõnrrab køh? ¡Kah! mumaygucha chi treeg kõnrraamøn. ¹⁶ ¿Ashmeelø køtirru, ñimma mungøben nõ maig karuben treeg karui mørøb melørrumøn cha melamisrabe, nõ maig karuben ñim møra marøb melai mowaimbe nõ karuindig melamig købig kuin kui? Pøs, tru kaig maramig nõ karub tøgä pasraibe kwamigumay srua iben, Tius maig karuigwan møra marig truig karub tøgä pasraibe Tiusba tab põnrramigumay srua ibig køn. ¹⁷ Inchendø Tiuswan mayanguen ungwa, ungwa chinrrab. Pøs ñimbe merrappe tru kaig marig karuindø melabelø kuagucha, tru tabig kusrenanigwan ñim maig utig køben, treeg marøb kõmigu põnrramisra, ñimui manrraugurri newan isua treggwan møra marig køn. ¹⁸ Ñimbe kaig marigugurri yandø wesrailø kua, mõimbe ñimbe tru sølgandø tabigweyasig karuindø melønrrabelø misrin køn.

¹⁹ Nabe waminçippe, misaamera wamindimay waminchar, kaguen ñim misaamera kuig køppe, isugu kullaguelø kuimba. Pøs tru merrabwanma ñimui asru tasiimera, srøbmera øyeelø chine tøgagúilan køsøngønrraptigweyasig treggwandø, treggwandø katøguchinguen, katøguchinguen trømbøig marøb kõmima kuibe. Møimbe treetøwei ñimui asru chine põnrrabigwan tru sølgandø tabig marøb kõmigweyasig treggwandø marøb kõmig tranrrab inday, ñimuyasiitøwei Tiusweindø tarømarig põnrramig kõnrrai.

²⁰ Pøs tru ñim kaig maramigu trutø trutø marøb køb urasma tru sølgandø tabig maramig ñimun truig nõ karuimig amøñibelø kuig køn. ²¹ ¿Inchen tru kaig marigugurrimbe tabiibe chi wesrawa põnrrøgue? Møi yambalasrømbe ñimune kørikken kuin põnrramitø køn. Pøs truihe sraebe ka kwamitøwei srua arrubig køn. ²² Trune mõimbe ñimun kaig marøb melaigugurri yandø wesrailø, Tius karuindø melabelø misrikkurrimbe, Tiusweyasiitø tarømarig põnrramig tøgagøn. Inchen truikkurri arrubiibe tru managatig øsig kõmig, truig køn. ²³ Kaguende kaig mariibe tru kaigwan marimburø nõ tranøppe, kwamigwane tranan. Trune Tius keta traniiibe managatig øsig kõmig, truig køn, namui Señor Jesucristoba kanbalatø põnrraigu.

7

Kasharawamera maig køben, treetøwein køn cha wamindig

¹ Nai nunelø, tru maig maramigwan martrai karuigwan ashibelan nabe waminchar. ¿Ñimbe ashmeelø køtirru, tru maig maramigwan martrai karuibe kan mowane øsig unamnegatiitø nõ tøgä pasrabig kui? ² Kaguen kan kasharawa ishuwanma tru maig maramigwan martrai pasriibe keeba nõørø kõnrrain kõmø, kandø mara tøgagøn keg øsig wamnegatiibe. Inchendø yandø keg kwabene, tru pørig nui keeba nõørø kõnrrain kõmø, mara kørrømarig købigwane nõbe yandø truburappe chi asamikkaig kørrømisran. ³ Inchawei keg øsig wamne, katøgan møøba kasharabene, truigwane 'kewan itøluløptø ishug køn' cha, nune treeg wamig kørrømisrtrun. Inchen nui keg kwabeneguende, tru maig maramigwan pasrig nui keeba nõørø kõnrrain kõmø, kørrømarig købigwane, yandø nõbe truburappe, chi asamikkaig kørrømisran. Katøgan møøba ya, kasharaingucha, yandø kewan itøluløptø ishug kõnrraamøn.

⁴ Katø treetøwei ñim, nai nuneløgucha, Cristoi asruelø kuikkurri tru maig maramigwan martrai pørigweimburappe ñimbe yandø kwai latailø kørrømisrig kuig køn, tru katøganwei

misra pønrrønrrab, Cristo tru kwailai utugurri øsiirabigwei, nam øyamay Tiusweyasig tabig marøbelø kønrrab. ⁵ Kaguende trendø kaig marøb asr namun nø karuim pønrrab urasbe, tru maig maramigwan martrai Moisés pørigu kaigwan marmønrrai tru mera pasriibe namune kaigwan martrab isunrrai masken kiagasrønanen, tru kaig marøg kõiibe namui asru marøb pasrabig køn, namun øyamay kwamigumay srua inrrabigweyasig marøbelø kønrrai marøb. ⁶ Inchendø mõiibe tru Moisés pørig nø karub tøgagüigweimburappe nambe yandø kwaikkurri, nambe truigweimburappe chi asamikkar kørømisrig køn, Espiritu Santoinug peemay øsig kømig srøizhigu nam Tiusweyasig marøb melamig kønrrai, tru maig maramigwan martrai merrabsrø köllin pørigu kømøtø.

Tabigwan martrab inchen kaigwan martrai inchibig namui umbu pasrabig

⁷ ¿Trube, treeg købene, mandø chinrrab? ¿Tru maig maramigwan martrai pøriibe kaig marøbig kønrrab kø chindah? ¡Kah! mumaygucha chi treeg kønrraamøn. Kaguende tru martrai pørig kømuiibe, kaig mariibe maig købig kuin kui nabe nebua ashmubsrubrainrrun. Pøs tru maig maramigwan martrai pørig: “Mendaigweiwane chull asamig kømøn” cha, trenchimuig kuimbe, trube, tru mendaigweiwane chull asamibe kalø købig kuig nabe nebua ashmubsrubrainrrun. ⁸ Inchen kaig maramibe tru øyeeq marmønrrai karua pasrinug nø kelula, pasramisra, nane chigurrimbunø chull ashüb pasramig kønrrai nane masken isunrrai kiagasrønaniq køn. Kaguende tru maig maramigwan martrai pørig chi kaabene, tru kaig mariibe chi martrabgaig, kwaig lataig køn. ⁹ Tru maig maramigwan martrai pørig maig maringaruigwan merrabsrø chigaig køppatøbe, nabe øsiguig købig kur. Inchen tru maig maramigwan martrai pasrig arrubene, tru kaig maramibe nainuube ke øsiirab lata inchen, nabe kwai lataig kørømisrinabig køn. ¹⁰ Pøs tru maig maramigwan martrai pøriibe tru øsig kømigumay pera inrrabig kuig købendøbe, nane masken kwamikken kønrrai marøptinndan. ¹¹ Inchen kaig maramibe tru maig maramigwan martrai pasrinug nø kelula, pasramisra, nane purø may kebenøsrka, tru karua pasriitøga nane kwaig lataig mara, Tiusweinukkurri tarømartan.

¹² Inchawei tru maig maramigwan martrai pøriibe newan tabig køben, katø tru martrai karua pasriibe newan tabig, sølgandø maig maramigwan marøbig, tabig køn. ¹³ ¿Trube, tru treeg tabig købendøbe nane kwamig kønrrai marøb pasra chindah? ¡Kah! mumaygucha chi treeg kømøn. Treeg kømøtø, tru kaig mariibe tru tabig martrai pørigwan nø merrarrawa marøb pasraitøga nane kwanrrai mara, øyamay kaig mariibe kaig marigwein købig kuin kui ashchai kenamarig køn. Inchen tru maig maramigwan martrai pasriibe tru kaig marigwane newan kaig købig kui kenamaran.

Møøbe kullaguig køn

¹⁴ Pøs tru maig maramigwan martrai pøriibe Tiuswei newan tabigweimburabigwan nambe asamig køben, trune nabe asr mumay srua iben treeg kuinawa, trumay isumøtø, kaig marigu trunundø, trunundø marøb meganrrai yani lataig kur. ¹⁵ Pøs natøweinguen na marøb pasraigwane ni mandø kuinguen mørmuinatan. Kaguende na marinrrabna indigwane marmubendø, tru tsalø kømüig na marmønrrab isuigwane, trube, marøptø marinaig købene, trube, tru maig maramigwan martrai pøriibe chi kaig kømøtø, nabe truigwane tabig kui asha pasrar. ¹⁷ Pøs treeg købene, tru treeg kaig marigwane yandø narre marøb pasrømøtø, tru nainug kaig martrai inchib pasrabig, truirre marøb pasan. ¹⁸ Pøs Tiusba kømüibe trendø na kaig kuinaiqube chigucha tabiibe pasrømüin kui ashar nabe. Kaguende tabigwan nabe martrappe isuinabendø, truigwane martrappe kaimainatan. ¹⁹ Pøs tru na mariibe tru tabig martrab isuigwan marmøtø, tru kaigwan marmønrrumab isuigwane marøptø marinatan. ²⁰ Inchawei tru na marmuinrrabna indigwan na mariibe, narre marig kømøtø, nainug kaig martrai inchib pasrabig, truirre marøb pasan.

²¹ Inchawei nainug kaig martrai inchib pasrabig købig kuin kui nebua ashar, nabe tabigwan martrab indingucha, tru kaig maramibe nainuube nømerrig, nømerrig pasrabig kuin kui. ²² Kaguende nabe nai umbube truba truba tab kui mørøb kasraarar tru maig maramigwan martrai Tius pasrigu kaigwane marmub, tabigwane marøb indamigwan nebua asha. ²³ Inchendø nai asru tasiimera, srøbmera øyeeq chine pønrrabigu øyeeqwan martrai inchibig katøgan nuin kui nainug kaig maringarub pasrabig kuin kui ashar, tru nai turtrawa isuigu maringarub pasrabig tabig karuigwane marmønrraigøba inchib pasrabiba kwayab, tru nai asru chine pønrrabigu kaig maringarub pasrabig, truig køn, tru nan iløsrka meganrrai nø merrarrawa srua ibig.

²⁴ ¡Karrengucha kuita kan na waachawane! ¿I tru kaig maringarub pasrabig kwamigumay srua ibigurrimbe nane mu wesranrrerah? ²⁵ ¡Pøs Tiuswan mayanguen ungwa, ungwa char, namui Señor Jesucristogurri nan wesranrrab kui! Inchawei natøweinguen nai turyu

isuitogabe Tius martrai karua pasrigu isub megainabendø, tru na trendø kaig kuinaitogabe kaig martrai karua pasrigu marøb megainatan.

8

Tiuswei Espiritu maig kønrrain køben amøñibeløbe yandø tabigu webamba pønrran.

¹ Inchawei mømimbe Cristo Jesúsba kanbalatø pønrrabelaimbe møra melønrrai maramimbe yandø chigaagøn. ² Kaguende Espiritu tru martrai karua pasrig øsig kømig Cristo Jesúsweinug pasrabiibe, tru kaig marøbig kønrrai indamba, kwamig kønrrai indamba tru martrai karua pasrig treeg inçhibigugurri nane wesruig køn. ³ Kaguende tru maig maramigwan martrai Moisés pøriibe truburab martrab kaimaigwan Tiusbe marig køn, pøs tru pøriibe yandø truburab martrabgaig køben, tru namui trendø kaig kuinaiigu truikkurri. Inchen Tiusbe nui trag Nusrkai managuen kaig marmigwan kan kaig marøb møg kui lataig, kaig mariilaimburø kwanrrai øra, øyamay tru kaig marøb kømig namuinug maringarub pasrabigwane chinçhaingagig kørrømara pasran, ⁴ tru maig maramigwan martrai pørigu sølgandø maig marøb kømigwan karuilø namuinug marig kørrømisrtrai, tru namui trendø kaig kuinaiigu marøb amønainug kømøtø, tru Espiritu Santo maig kønrrain køben marøb amøñibelainug.

⁵ Tru trendø kaig kuinaiigu treegwan marøb amøñibeløbe, ka truburabigwandø isuben, trune tru Espiritu Santo maig amøñinrrai inchen treegwan marøb amøñibeløbe, Espiritu Santomburabigwan isubelø køn. ⁶ Inchen tru trendø kaig kuinaiigu isub pasraibe Tiuswan tarømisra, kwaig lataig pasraig, treeg køben, trune Espiritu Santo maig kønrrain køben treegwan isub pasraibe srøig øsig kømiba, Tiusba chi isumgaig tab kømiba, treeg køn. ⁷ Pøs tru trendø kaig kuinaiigu treeg isub tøgä pasraibe Tiuswan tsalø isub pasran, kaguende Tiuswei tru maig maramigwan martrai karuulan møra martrab inçhimøwei, katø truilan martrab kaimabwei indig kua. ⁸ Incha tru trendø kaig kuinaiigu isubig maig karuben treegwan møra marøb amøñibeløbe, Tiuswane tab kui wanrrai martrab kaiman.

⁹ Inchen ñimbe tru ñimui trendø kaig kuinaiigu isubig maig karuben treegwan møra marøb amøñibelø kømøtø, Espiritu Santo maig amøñinrrain karuben treeg amøñibelø køn. Treetøgucha Tiuswei Espiritu ñimuinug pasrøbene kønrrun. Pøs møikkøben Cristoi Espiritun chigaibe, Cristo in kømøn. ¹⁰ Inçhendø Cristo ñimuinug pasraikkurrimbe asrbe kaig mariiløgurri kwamig kuindøgucha, Tius nøba ñimun kaig marmeelø lataig tabig kørrømara pønrraikkurri, ñimui espiritube øsig pasran. ¹¹ Inchen Tiuswei Espiritu Jesúsba kwallai utugurri katøle øsiirangarubig ñimuinug pasrøbene, Criston kwallai utugurri tru katøle kusrabiibe ñimui ka pinønrrab asrmerangucha tru nui Espiritu Santo ñimuinug pasrabiitøga øsig kømigwan tranrrun.

¹² Inchawei, nai nunelø, nambe uløbe pønrrøbendø, tru trendø kaig kuinaiigu tru kaig maramigwan uløgucha pønrrømer, truig maig marøg kuinchen marøb pønrrønrrab, ¹³ kaguende tru trendø kaig kuinaiigu isubig maig karuben treegwan marøb amøñabe, ñimbe kwanrrun Tius malø asamikkaig. Inçhendø tru ñim asru kaig marøb tøgä pønrraigwan Espiritu Santotøga kwai lataig kønrrai kørrømarabe, ñimbe managatig Tiusba øsig kønrrun.

¹⁴ Mayeeløba Tiuswei Espiritu maig amøñinrrain køben truwan ambubeløbe Tiuswei ureemera køn. ¹⁵ Pøs ñim Espiritu Santon utiibe ke larrø kwaarørsa srua kuilø lataig kørig kuindø katøle treeg melønrrai marøbigwan uta pønrrømøtø, kan trag ureemera lataig kønrrai marøb Espiritu Santon utig køn. Incha nambe nøgurri Tiuswan: “Abba, nai Møskain” çhib wamabelø ker. ¹⁶ Inchen tru Espiritu Santotøwei namui espiritune eshkabig køn, nambe Tiuswei ureemera kui. ¹⁷ Trube, nam nui ureemera kuig køppe, nø keta tranamig tøgagüigwangucha utønrrabelø ker, Tius tru keta tranamigwan nam utønrrabelø køb, katø Cristo utigwan namgucha kanguelarrøtø utønrrabelø købgue. Pøs ka yandø kømø, cierton nun chine nebuinab megaigwan namgucha chine puraambub meløwabe køn, nøba kanbalatø tørguegwalmabisrø purramig kønrraimbe.

Tru purø tabig wendøsrø attrabig

¹⁸ Pøs møin kwaløm nam chine kaig nebuinab melaiibe tru tørguegwalmabig namun kenamarig kønrrabiibe, ni kan ‘øyeeg køn’ cha waminçhibguen wamindamgaig purø nuig køn. ¹⁹ Tius chigurrimbunø mara pønrrailøbe truba truba ashig kui muniirab køn Tiuswei ureemera tørguegwalmabelø kenamisramigwan. ²⁰ Kaguende tru chigurrimbunø mara pønrrailøbe øyeeg mumayguen tab pumuig pønrramig kønrrain kuig køn, nøm treeg pønrrønrrab indikkurri inçhimøtø, Tius nø trendø treeg kønrrai marikkurri. Inçhendø treetø kørrømisrtrain kømøtø muniiramigwan tøgäig marig kua, ²¹ tru chigurrimbunø mara pønrrailøtøweinguen minçhib trerab inrrai marigugurri mas treramønrrai wesrailø kønrrun, tru Tiuswei ureemera purø nuig purø tabigu webamba pønrraigu truuløgucha pønrrailø kønrrab.

²² Pøs tru chigurrimbunø mara pønsrailøbe møin kwalømgatig kan ishuumisag nø tammisrtrab truba truba mullib pusrkwai inchib lataig indi aser. ²³ Pøs tru treeg tab kømui pønrrappe, tru chigurrimbunø mara pønsrailø truiløtø kømøtø, Espiritu Santon namun pølbasa tranigwan uta tøgarmena namdøweinguen namui umbu truba truba mullib pusrkwai inchib lataitøweim pønrrer, Tius tru namun nui trag ureg lataig mariilø kømigwan truba truba muniirab, tru namui pirau asrmeran kaigyugurri wesruilø kømigwan. ²⁴ Kaguende treeg kønrraitamab isua muniirab melaigu kaigyugurri wesrailø pønrrer. Pøs tru nam muniirab melaigwan nam chab ashaguen pønrraimbe, trube, tru muniirab melamigwane chinchab muniiramubsrinrun. ¿Kaguen yandø chab ashaguen pønrraigwane chiwan muniiraiasamørra? ²⁵ Inchen nam chi nebua asiimigwan ke tøgagønrrumab isua muniirab meløwabe, munig melabiitø munig meler.

²⁶ Katø treetøwei Espiritu Santobe namui kullag kuigu purugubig køn. Pøs nambe Tiusba wamindigu chi wamindam kuinguen mørmuben, Espiritube namuimbunø nø purøbasramisra miappe, wamdøgabe ni mandø chibguen miamgailan truba truba nu israb miabig køn. ²⁷ Inchen Tius namui manrømeran maig køtashchab umbusrøngue tab ashibiibe, Espiritu Santo nø maig isua pasraigwan ashibig køn. Kaguende Espiritube Tius maig kønrrain køben, trumay Tiuswei misaamerai purøwaminchib miabig køn.

Tius namun kaigyugurri wesranrrab øyeeg marig

²⁸ Tiuswan undaguelaimbe chitøgucha pub arrubiibe tabguen kønrrai Tiusbe treeg marøbig kui nabe ashibelø ker, tru nø martrab isua tøgagüig trug maig køben trumay treeg wamiilaimbe. ²⁹ Tius tru manasrøwei nø asilane manasrøwei kanmaytø lawa wesrabgucha wesraig kuig køn, nui Nusrkai maig køben, treeløtøwei misrtrai, Nusrkaimbe truba nørrø nunelø mayeelai utu nømerrig kønrrai. ³⁰ Incha tru manasrøwei kanmaytø treelø kønrrai lawa wesrailane katø nøbe nui misaamera misrtrai wama, katø tru nø wamiilane chi kaig kømeeleø lataig tabig pønrrønrrai mara, tru treeg tabelø kønrrai kørøramariilane nui torguegwalmabigugucha tøgatø pønrrønrrai marig køn.

³¹ ¿Trube, iibe øyeeg købene, nambe mandø chinrrab køh? Tiusbe namuingatø pasrøbene ¿namune mugøben sətøbasramisrøb kurringucha, chigüin kønrrautah? ³² Tiusbe nui trag Nusrkawanguen namun tranmønrrab inchimøtø, nam mayelayasig kwanraima traniibe, ¿chigurrimbunø tranamburab namun tranamigwangucha tranmønrraitarru, Nusrkaimba kegøtø? ³³ ¿Tius nø lawa wesruilane mu kui 'øyeeg, øyeeg kaig marøbelø køn' chinrrautah? Pøs, chi kaig kømeeleø lataig tabig pønsrøbiibe, Tius, nø køn. ³⁴ Trube, ¿kaigu pønrrønrrai, mu pønrrønrraitama chindah? Pøs Cristo Jesúsbe mana treeg martrab køn. Kaguende nøbe kwawa, katø trutø kømøtø, nøbe katøle øsiirawa, Tiuswei kusrmaygatø wan, katø namuyasig purøwaminchib. ³⁵ ¿Cristoi undag købigugurri namune mu kui tarømartrab kø? ¿Chine isui melamig pub arrubiiteh, kabe chigøben murig pui melamig arrubiiteh, kabe kaig indinab melamig arrubiiteh, kabe mamig kaagøbig parø arrubiiteh, kabe asru kemig chigucha kaagøb arrubiiteh, kabe chigøben kørig kømndiig pub arrubiiteh, kabe kweecha petiilø kømig arrubiiteh? ³⁶ Pøs Tiuswei wamwan pøriguma trenchibig køn:

"Nambe ñigurri chu urastøgucha kwaitø, kwaitø meler cha.

Namune ubishameran kweetsamsrømay srua ambamig kui lataig mara tøgagüilø ker" cha.

³⁷ Inchendø chigurrimbunø øyeeg pub arrubigu chinchaingaig kanawa webamba pønrrer, tru namun undaarabikkurri. ³⁸ Pøs Tiuswei undag købigwane ni chigucha tarømartrab kaimanrrab kui nabe asha pasrar, kwamig lata, øsig kømig lata, ångelesmera lata, nøm asha karub pønrrabelø lata, møin kwalømig lata, katø wendø attrabig lata, katø maramburab marøb pønrrabelø lata, ³⁹ purø palasriig lata, purø umbusriig lata, chigurrimbunø Tius mara pønsrailøyu købeløbe møikkucha namune chinchagucha tarømartrab kaimanrrun tru Tiuswei undag købig namui Señor Cristo Jesúsweinug pasrabigugurrimbe.

9

Tius Israelwan lawa wesraig

¹ Na Cristoinug pasrawa cierton waminchar. Nabe isa waminchimur. Tru nai isub kebachib pasrabiibe Espiritu Santogurri isa kømø, treegwein kui eshkatan, ² tru nai manrraube truba nu isui pasrab chu uraskucha nabe pusrkwai isuin pasrabig kui. ³ Pøs nai misag israelitasmera, nai nunelø nammisamera, nøm Criston yeeg kaashene, nøm kaigyugurri webamrrai nane Cristoinukkurri tarømisra, Tius trømbøig nebunrrai pasrigu naasiitøweinguen truyu pasrønrrab indamdiig kuimbe, treeg maramdiig køtan. ⁴ Truiløbe Israelweinukkurri amrrub misaamera, nømbe Tiuswei trag ureemera kønrrai kørøramariilø, Tius nui torguegwalmabigwan kenamarig lata, Tius nømbe tru acuerdomera

mara korrømisriilø lata, tru maig maramigwan martrai Moisés pørigwan utig lata, Tiuswei-wan marøb tulundzuni yau nun mandø tabig marøb kømigwan eshkaig lata, katø Tius tranrrab korrømisriilan tranamig lata nømunwei traniilø køn nømbe. ⁵ Tru merrabsrø kølli misaamera nørreeløbe nømuiin køben, katø Cristo møg lataig misra arriibe tru misaamer-ayugurri arrig køben, Cristobe, nø Tius chigurrimunø købigweim pala pasrabig, jmanagurri managatig mayanguen tab indig køn! Treeg kønrrun.

⁶ Pøs Tiuswei wambe treeg kønrrabigwan martrab kaimaig kømøtø køn. Kaguen Israel-weinukkurri amrrub misaamerabe mayambagucha nømbe Tiuswei misaasunelø kømøn. ⁷ Maya Abrahamweinukkurri amrrub misaamera kuagucha, mayambagucha nui uremera kømøn. Treeg kømøtø, Tiusbe Abrahamwan trendaig køn: “Nuiinukkurri karrab misaamerai utu Isaackurri larrøbichib ambubelandø Abrahamweinukkurri amrrub misaamera cha, wamiilø kønrrun” cha. ⁸ Pøs øyeeg chippe, tru Abrahamwei misagugurri amrruitøgatø Tiuswei ureg kønrrab kømøtø, Tius tru tranrrab korrømisri unø Isaackurri larrøbichib amrrub ureemerabeguende Abrahamweinukkurri amrrub misaamera kui asiilø køn. ⁹ Kaguende Tius tru tranrrab korrømisriibe Abramwan øyeeg taig kuig køn: “Øyan kwalømmerawan na arruben, Sarabe kan nusrkai tøgagønrrun” cha.

¹⁰ Katø treetø kømøtø, Rebeca ureg tøgagüiløma kan mōskaindø tøgarmera købig køn, tru merrabsrø namui mōskai Isaacwei. ¹¹ Inchawei tru pu uremera tru urastø parchig kal-lanrrabelø kal-lamøwatø, tru ureezheelø tabig marig kawei, kaig marig kawein købenbatøwei, Tius nø tru martrab isua tøgagüig pasramisrtraimbe nø lawa wesruigu, trumay kønrrai indig køn, ¹² kabe chigøben tabig maragurrin kømøtø, Tius tru lawa wesrua wamikkurrin kønrrai. Pøs Tiusbe Rebecane trendaig købig køn: “Tru srøsrø kal-labiibe wendau kal-labigweyasig karuig marøb meganrrabig køn” cha. ¹³ Tru Tiuswei wamwam pørigu maig taimbala: “Jacobwane nabe undaarappe, Esaúwane tsalø indig købig køn” taig.

¹⁴ Trube, treeg købene, ¿mandø chinrrab? ¿Tiusbe sølgandø tabig marmig køn, chinrrab kø chindah? ¡Kah! mumaygucha chi treeg kømøn. ¹⁵ Kaguen Tiusbe Moiséswane trendaig købig køn:

“Nan mun lastima ashig køben,
truigwan lastima ashib,
nan mun tab inchig køben,
truigwan tab indamønrrun” cha.

¹⁶ Inchawei treeg købene, Tius tru lawa wesruig kømibe møg nø treeg kønrrab isuigu kømøwei, kabe møg nuinetø treegwan neburrab inchib megawa kømøwein køn. Treeg kømøtø, Tius lastima asiitøgatø køn. ¹⁷ Pøs Tiuswei wamwan pørigue Faraónwanma Tiusbe trenchibig køn: “Øyeeg martrab ñune rey kønrrai kusraig køn cha, ñi øyeeg inchib pasraigu tru nai maramburab mariilan kenamartrappa, katø nai munchiwan piro muba kuimburab nan mu kui nebua asig kønrrai martrappa.” ¹⁸ Inchawei Tiusbe mun lastima ashig køben, truigwan lastima ashib; mōigwei manrrøwan køben murig marøg købene, murig marøb inchibig køn.

Tiuswei lastima asiiba, nui namig kōbiiba

¹⁹ Pøs ñimui utu mōibe nane trenchinrraabe: “Trube, treeg købene, ¿katøgucha Tiusbe namune chindimbarre kailø køn tah? cha. Kaguende ¿nø martrab indigwane mu kui treeg marmønrrai indiasamørra?”

²⁰ ¿Ñi, mōøbe, mu kurmagu? Tiuswan: “¿Øyeeg mumay margu?” chib wamincha mørtrappe. Kabe kan pirogoetsøma tru marøbigwan øyeeg chinrrautah: “¿Chindimba nan øyeeg margu?” cha. ²¹ ¿Chillitøga chigøben marøbiima tru chillitøgatøwei kan kōtsøne tabigutø katørab srua kømig marøppe, katøgan kōtsøne chiyugøben katørab srua kømig nun maig maramdiig køben treeg maramig kōmuitarru?

²² Inchippa Tiusbe nui namig købigwanba, katø nui maramburab marigwanba kenamartrab inchib weig kōppeendi, tru manasrøwei kaigu pønrrønrrab amrrai tamarilø nun yeeg namig kōmdø misaameran yeeg tammy awentab. ²³ Pøs kabe Tiusbe nui torguegwalmabigu chine nørro købigwan tru nø lastima asilan kenamartrab indig kōppeendi, manasrøwei nø tamariilan tru torguegwalmabigweyasig. ²⁴ Inchen tru wamiiløbe namgucha ker. Pøs tru nam wamiiløbe, judiosmerai utugurrindø wamiilø kømøtø, judios kømø misaamerai utugurringucha wamiilø ker. ²⁵ Katø Oseaswei pørigu Tiusbe trenchibig køn: “Nai misag sətø kōmeelan: ‘Nai misaamera køn’ tamønrrun cha.

Undaaraimig købigwan: ‘Undaarraig’ cha, wamamønrrun cha.

²⁶ Katø tru: ‘Ñimbe nai misaamera kømøn’ chib pasrainuutøwei:

Ñimbe: ‘Øsig Wab Tiuswei nusrkalø køn’ chib, wamiilø kønrrun” taig køn.

²⁷ Israelitasmeraimburab Isaíasbe trenchib trasaig købig køn:

“Israelweinukkurri amrrub misaamera nu køptø,

maryu kan pisrum lataig købendø,
 nui misagugurri kan lamø kørrømisrøbiitø
 kaigyugurri wesrailø kømigwan tøgagønrnun cha,
 28 kaguende Señorbe yu pirau øyeeg nebuiløgucha warøbash cha,
 nø trencha pasrigwane petø kanmaytø newanig martrun” chib.

29 I wendauigwan trenchimøwatø, mas merrabsrøwei Isaiásbe nøtøwei trendaig købig køn:
 “Señor, Mayeelaim Pala Pasrabig,
 tru nam israelitasmeran srøig larrøbichib kurrønrrai kørrømarmuig kuimbe,
 nambe Sodoma lataitøwei nebuilø køb,
 Gomorra lataitøwei kerriguan pinisailø købsrubrainrun” cha.

Judíosmeraba, Tiuswei tabig srø wamba

30 ¿Øyeeg købene, trube, nambe mandø chinrrab køh? Judíos kømø misaamera tru chi kaig kømeelø lataig Tiusba tab pønrramigwan nebunrrab chi tranrrømeeløguen treeg Tiusba tabig pønrramigwan nebuig køn, tru isubigwan Cristoinug pasra tøgagükkurri. 31 Trune israelitasmera Tiusba tab pønrramigwan nebunrrab maig maramigwan martrai pørigu maig taigwan tru kuindø martrab tranrrabeløguen, tru truigwane chinchu nebua tøgagønrnab kaimaig købig køn. 32 ¿Chindimba? Kaguende tru isubigwan Tiusweinug pasra tøgagügu lamøtø, chigøben tabig mariitøga nebunrrab inchibelø køn. Incha tru “srurrengwam srugu” srurrengwaig købig køn. Tru sruube Cristo nøm kaasig, truig køn. 33 Pøs Tiuswei wamwan pørigube øyah chibig køn:

“¡Au! Nabe tru Jerusalén Sionsrø kan srug srurrengwagarubig trarramønrrun cha,
 kan srug tru misagwan kørrøsrkønrrabig.

Inchen nun kørebiibe chi køriimisa kørrømisrønrrun” cha.

10

1 Nai nunelø, na nai manrrau truba isuiba, nai Tiuswan na truba miab wamindiibabe israelitasmera kaigyugurri wesrailø kønrraimab isua inchar. 2 Pøs nabe nømuiburappe, ‘treeg køn’ cha, tømarrøb wamindamønrrun. Nømbe Tiusweiwane truba truba marøb meløbendø, Tius nø maig martrain kuigwane chigüi mōra marøb pønrrømøn. 3 Pøs misaamera mandø incha Tiusba tab pønrramig Tius nø mara pasrigwane israelitasmerabe ashmeelø misra, tru Tiusba tab pønrramigwane nøm marøb tøgagügu ke treeg nebunrrab inchibelø kuabe, tru chi kaig kømeelø lataig tabig pønrramig Tiusweinkurri arrubig maig køben, treeg mōra martrab inchimeelø købig køn. 4 Kaguende tru maig maramigwan martrai pørigwan øyangatiitø kønrrai mara pasrøbiibe, Cristo, nø køn, mutøgucha isubigwan nuinug pasrøbigwane Tiusba tabig kørrømisra pønrramig kønrrai.

5 Tru chi kaig kømeelø lataig Tiusba tab pønrramig maig maramigwan martrai pørig maig taigu kømigwane Moisésbe øyeeg cha pørig køn: “Møikkøben øyeeg karua pønrrailan marabeguede, truikkurri øsig uñchun” cha. 6 Trune tru isubigwan Tiusweinug pasra tøgagükkurri Tiusba tab kørrømisra pønrramigwan waminchibiibe Tiuswei wamwan pørigu øyeeg chibig køn: “Ñui manrraube øyeeg cha, mōrmøta cha: ‘¿Srømbalasarømaybe mu nebinrrerah?’ cha, Criston kørrattrai inchib lataig. 7 Kabe: ‘¿Tru purø umbusrø mu kørrainrrerah?’ cha, tru kwabelø pønrraisrø truilai utugurri Criston nebattraí inchib lataig.” 8 Treeg chib kunrriibe, trube, ¿Tiuswei wamwan pøriibe mandø chibig køh?: “Tiuswei wambe ñuim pulu, ñui trigu, ñui manrrau pasran” tan, tru isubigwan Cristoinug pasra tøgagøm wam, i tru nam øyeeg eshka kusrenanig: 9 Ñi ñui tritøga: “Jesúsbe Mayeelaim Pala Nø Karub Pasrabig køn” chib, katø Tiusbe Cristone kwailai utugurri kusraig købig kuin kui ñui manrrau køreb inchabe, ñibe kaigyugurri wesraig kønrrabguen cha. 10 Kaguende tru chi kaig kømig lataig tabig kørrømarig kømigwan nebua tøgagømibe, manrrau køreitøga køben, katø kaigyugurri wesraig kømigwan nebua tøgagømibe, tritøga: “Jesúsbe Mayeelaim Pala Nø Karub Pasrabig køn” taigu køn.

11 Pøs Tiuswei wamwan pøriguma trenchibig køn: “Mutøgucha Tiuswan kørebeløbe chi kørig misra kørrømisrønrrun” cha. 12 Kaguende judiosmera lata, judíos kømeelø lata, møitøgucha chi peg kønrrab kømøtø, treetø køn. Pøs tru Señortøwei mayeelaim pala nø ashib karub pasrabig kua, mayeelø nun wamab waminchibelane truba truba tab inchibig køn. 13 Kaguende: “Mutøgucha Señorwei munchiwan wamabiibe kaigyugurri wesraig kønrrun” chibig køn, Tiuswei wambe. 14 ¿Inchendø nømbe mandø chib wamiasamø nun køremubendøbe? ¿Katø tru nuimburabigwan wamindi mōra kømøwabe, kørebgucha mandø incha køreasamø? ¿Katø nuimburabigwan mu eshka kusrenanmubene, mōrøbgucha chinchu mōriasamø? 15 ¿Katø tru Tiuswei wamwan eshka kusrenanrrai nømun mu karua ørmubendøbe, nømbe mandø incha eshka kusrenaniasamørra? Øyeeg pørig pasraimbala:

“Tabig srøigwan wammørøskønrrab srua amrrubelaimbe yeekkucha kasrag kømdiig køn” taig.

¹⁶ Inchendø tru tabig srø wamwanma israelitasmera mayeeløbabe mōra marmuig køn. Kaguende Isaiasbe trendaig køn: “Señor, ¿nam waminchib eshkaigwanma mu køreig kuitarru?” cha. ¹⁷ Inchawei isubigwan Cristoinug pasra tøgagømibe wamwan wamindi mōrikkurrin køben, tru wamwan wamindi mōriibe Cristoimburabigwan eshkaib kusre-nanikkurrin køn.

¹⁸ Inchendø nabe payrrab: Trube ¿nømbe mōrmuig kønrrab kø chindah? cha. ¿Nømbe mōrøbwei indig køn! Pøs Tiuswei wamwan pøriguma trenchibig køn:

“Tiuswei wamwan eshkaib kusrenanøbelai wambe pirau truørø wamindi mōrig køben, katø nømui wamindiiløbe yu pirau maya yabsrøngatikken puig køn” cha.

¹⁹ Pøs nabe katøyug payrrab: ¿Trube, israelitasmerabe chi purainrrab kui mōrmuig kønrrab kø chindah? cha. Tiusbe Moiséswanmerrig trendingaruig køn tru israelitasmeran:

“Israelitasmera, nai misag sötø kømeeløtøga ñim namig ashib kønrrai marøb, chugúinguen mōrmø misag sötømeratøga ñim namig kui inchib kønrrai indamønrrun” cha.

²⁰ Katø Isaiaskucha tsakkandø kelarrab trendaig køn:

“Nan Tiuswan lameelø israelitasmera kømeeløguen nan wetørraben, truilo nan paymeelanguen nabe kenamisrig køn” cha.

²¹ Inchen israelitasmeraimburappe Tiusbe trendaig køn:

“Nabe nømun utønrrab nai kwalmeran chu urastøgucha nabe larrøbicha pasraig køn cha, yeeg mōrmø misaamera, trurriгу nøm maig isuigwandø martrab inchibelan.”

11

Israelwei misagugurri unchibelan Tius nøørø lawa wesruilø

¹ Trube, treeg købene, nabe payrrab: Pøs, ¿Tiusbe nui misag sötømera israelitasmeran kaasig kønrrab kø chindah? ¿Kah! mumaygucha chi treeg kømøn. Kaguende nama natøweinguen israelita tru Abrahamwei misagugurri arrubig, Benjaminwei misag karrabigugurri arrubig kur. ² Tiusbe israelitasmera nui misaameran kanmaytø manasrøwei tru nø asha tøgagúilane chi kashmuig købig køn. ¿Ashmeelø køtirru? Pøs Tiuswei wamwan pørigu nø maig karuigwan eshkaibig tru Eliásweimburab waminchibigu, Eliás Tiusba waminchib israelitasmeran ‘øyeelø køn’ chib, mandøtø taigwan: ³ “Señor, ñi maig karuigwan eshkaibelan kweetsamba, ñui altarmeran pøtiitsamba inchen, nabe natøzhiitø øsig kørrømisra pasrøben, nangucha kwetchab inchib køtan” chib, trendaigwan. ⁴ Inchen ¿Tiusbe nune mandø cha løtig køh?: “Tru taska marig tuis Baalwei merrab tømønøsrømø møguelø siete mil nayasig tarømarar” cha, trencha løtig køn. ⁵ Pøs treetøwei møin kwalømgucha israelitasmera kan tøbø uncha kørrømisrøbelø køn, Tius ka yandø tab indiitøgatø lawa wesruilø. ⁶ Trube, tru lawa wesruilø kømibe ka yandø tab indiitøga kuig købene, yandø chigøben tabig mariiløtøga kømøtø køn. Pøs trumay kuig kuimbe, tru ka yandø tab indiibe, trube, chi tab indig kømubsruinrrun.

⁷ ¿Trube, treebe mandø kerah? Tru israelitasmera unchibelø Tius tru lawa wesruiløbeguende Tiusba tab pønrramigwan nebua tøgagøben, trune tru lawa wesruimeelø Tiusba tab pønrramigwan ke chinsraatø inchib lab melaigwan nømbe nebumuig køn, nømui manrrømerabe larrø murelø misriilø kua. ⁸ Tiuswei wamwan pørigu tru nø lawa wesruimeelaimburab maig taimbala:

“Nømui isubig tøgagúigube chigucha isumeelø nasrkwailø,

kabmerabe chi ashmeelø latailø,

kalumeragucha mōrmø kalumera kønrrai

møin kwalømgatig Tius treeg mariilø køn” cha.

⁹ Incha Davidbe nømuiimburaptøwei trendaig købig køn:

“Nøm tulundzuna kasrag warønrrab

mab, muchib waraibe

nøm truyutøwei ka ilørka melamibah,

kegørra waramibah, treegu srurrengwamibah,

øyeeg marøb kuimburø mōra melamigweyasiibatø misrbash cha.

¹⁰ Nømui kabmerabe ashmønrrai løstørailø kørrømisren,

nømui lliibe chu urastøgucha kurraashibguen

kurrashmeelø murigu marøb melamig nebulø købash” cha.

Judíos kømø misaamera kaigyugurri webambu

¹¹ Trube, treeg købene, nabe payrrab inchar: ¿Judíosmera treeg srurrengwawa kørrappe, katølebe managuen kurrønrrabikkaig kørrig kø chindah? cha. ¿Kah! mumaygucha chi

treeg k nrraam n. Tru Tius karua pasrigwan n m kal  mar b it bunab kuibe judios k m  misaamera kaigyurri wesrail  k migweyasig arrin k n, judiosmera n mguen pusrkwai ashib k mig k nrrai. ¹² Inchen judiosmera kal  mar b it bunab kuibe yu pirau kat gan misaamera Tiusweimburabigwan n rr  t gag migweyasig k ben, kat  judiosmera n m ke ka k m nrraind zhig t ga p nrraibe judios k m  misaamerayasiibe tru Tiusweimburab puro tabigwan n rr  t gag mig k nrrai mar b inchene, jmas maig tabig k nrrerah tru judiosmera maig p nrramigu n m newan p nrramisren, truyugurri arrubiibe!

¹³ Nabe m imbe  nim judios k m  misaameran waminchar. P s judios k m  misaamerai Cristo n ashib nan karua  rig kuikkurri, tru na mar b t gag igwane truba tabig kui asha t ga pasrar. ¹⁴ P s nabe nai misag judiosmeran pusrkwai ashib k nrrai mumay k ben kiagasr narrab isua inchar, truil  m il g ben kaigyurri wesrail  k nrrai. ¹⁵ Inchen judiosmeran Tius kaashen, yu pirau tru kat gan misaamera n  Tiusba tabig k rr misra p nrramima kuibe, trube, judiosmeran Tius yand  ut bene, jke kwail  latail  kuig, kat le  siiraig latail  k nrrun! ¹⁶ P s tru harina masaigurrima piti lurra, truiugwanmerrig pirri mara, Tiusweind  k nrrai tranene, tru masaibe kerriguba Tiusweind  k rr misran. Inchen kat  tru sr lwanma Tiusweind  tar marig kuig k bene, srarmeragucha nuind  tar mariil t weine k n.

¹⁷ P s tru israelitasmera lawa wesruimeel be tab olivo tusryu srarmera latail  kua keg lsrail  latail  k ben, trune  ibe, judio k m ig, kan kau umbu olivo, n t  pe a kal-lab tusryu srar-un  lataigwan, tru tab olivo tusryu kal-lanrrai kemesra pasren,  ibe tru ellmarig tab olivo sr lyu tab piwan m imbe t gat  utab pasran. ¹⁸ Inchend  tru olivo tusryu trend  truyu srarmerane  ibe purab tabig kurmba ka isaba inchim ta. Inchen  i treeg ka isaba inchib pasr wabe, trube, sr lwan  sig k migwan  i tran b pasr m t ,  sig k migwane sr lguen  un tran b pasrain kui isuagu.

¹⁹ P s  ibe inchippa trendaisruand be trenchinrrun: “Tru olivoyu m  srarmerane keg lsrail  kuig k n cha, truyu nan kemend srka kal-lanrrab.” ²⁰ P s treebe treegwein k n. Judiosmerabe chigucha chi k renrrab inchimuben, treekkurri keg lsrail  k bwei indig k n. Inchen  ibe isubigwan Cristoing pasra t gag ikkurri truyu pasran. P s inchawei puro nuig k mm r  inchib pasr m t ,  ibe k riibala isuat  pasrau. ²¹ Kaguende Tiusbe tru srarmeran trend  truyuelanguen ka p nrr basm t , para petiibe,  ngucha ka pasr basm t , treet wei para kutchun.

²² P s isua ash, Tius n  yeeg tammayig kuigwanba, n  chi chippe, kand  wamabig kuigwanba, tru k rra p nrrabelaimbe n be kand  kand  wamabig k bend , trune  ine tammay indan. Inchend gucha tru n  tammay indigu  i truyu pasrabig pasr bene k nrrun. Treeg k muisruand be,  igucha keg lsraig k nrrabguen. ²³ Inchen judiosmera n m k rem , treet  mel nrrab inchim t , n m k rebene, kat le tru olivoyut wei nuranrrai kemesra p nsrail  k nrrun. Kaguende Tiusbe maramburab mar big k n, kat le kemesra p nsramig. ²⁴ P s  i, judio k m ig, tru  i kau umbu ka trend  n t  pe a kal-lab olivo lataigwan para, mana treeg mariim igwan tru ellmari tab olivo tusryu nuranrrai truiugwanma kemesra pasriibe, kan mas tru ellmari tab olivo tusryu srarmera keg lsrail  k belane kat le tru tusryut wei n rr ranrrai kemesrail  k m nrraitarru, tru judiosmeran.

Israel misagweyasig Tius maig martrab isua t gag ig

²⁵ Nai nunel , israelitasmera k meel , Tiuswei tru mu asiim ig pasrabigwan tab chig  m ra k nrrai inchar,  im  iiminet  puro n rreel  misr b p nrr m nrrai. Israelitasmerabe ke mayambagucha k m , kan t b t  n mui manr meran mur mar b p nrraigu keg rra p nrrappe, tru judios k m  misaamera kaigyurri webamrrabel  mayeel ba kaigyurri webambanegatiit  k n. ²⁶ Inchen  yeeg nebubene, israelitasmerabe mayamba kaigyurri wesrail  k nrrun, Tiuswei wamwan p rigu maig taimbala:

“Tru Kaigyurri Wesrawa P nsr nrrabiibe Jerusal n Sion Tunsr ngurri arrua, Jacobweinukkurri amrrub misaamerane n mui kaigwan kerranrrun cha.

²⁷ Inchen tru kaig marigwan na kerrabene, tru n mba na acuerdo marig, truiig k nrrun” cha.

²⁸ P s judiosmerabe Cristo tabig sr  wamwan kaasikkurri, truburappe Tiusbe tsal  indil weine k big k n, tru  im judios k meelaimburab tabguen k nrrai. Inchend  n mun Tius lawa wesruikkurri, truburappe tru n mui merrabsr  Tiuswan m r bel  k lli misaameragurri n mbe Tius undaarail  k n. ²⁹ P s Tiusbe n  keta traniiilane kat  kerranrrab k m wei, kat  n  wamigwane wam m ig kui lataig martrabgucha k m weine k n. ³⁰ Inchen  im judios k meel gucha treet wei merrabwansr mbe Tiuswan larr  m rmeel  k big kuig, m imbe Tiuswei lastima asigwan nebua t gag n, judiosmera m rmeel  kuikkurri. ³¹ Inchen tru  im judios k meelan Tius lastima asigwan  imun tranikkurri n m judiosmeragucha m i yambe n mbe larr  m rmeel  misrin k n, n mgucha Tiuswei lastima asigwan nebua utamig

kõnrrai. ³² Põs Tiusbe maya misaameran larrø mørmeelø misra melamigu mumaygucha wegønõnrraingai pønrrailø pønrran, tru maya misaameran nõ lastima asha tõgagõnrrab.

³³ ¿Tiuswei kusremburab kusrebig kuiba,

kusrebig kua nebumburab nebua asiløbabe

purø nõrriig muguen nebua isumgailø kõn!

¿Nø maramig tõgagüilane ni mandøguen 'øyeeg kõn' tamgailø,

nø mandø martrab isuiløbe maig kermab nebua isumgailø, treelø kõn!

³⁴ Tiuswei wamwan pørigube trenchibig kõn:

"¿Señor isua tõgagüilane mu nebua asitarru cha?

¿Kabe Señorwane 'ñi øyamay marambala'

chinrrabig mu kõbig kuig kø chindah cha?

³⁵ ¿Kabe Tiuswanmerrig mugøben chi tranig kø chindah cha,

truburø katøle Tius nun tranrrai?"

³⁶ Kaguende chitøgucha kõbiibe Tiusweinukkurri arrubig køb,

katø nõgurrim pønrrab, katø nuyasig kõn.

Tiuswane managatig tõrguegwalmabig kõnrrun.

Treeg kõnrrun.

12

Tius tab kui wanrrai nam tabig amønaig

¹ Inchawei nai nunelø, Tiuswei lastima asiitøga nabe ñimun tiusmanda trenchinrrab inchar, ñim mõitøgucha ñimui asmeran kan øsiguig keta tranøb lataig Tiuswan keta tranay cha, Tiusweindø kõnrrai tarømarig, nuin kabyu truba tab kui asig, treekke. Iig kõn, tru ñim øsig amønaigu Tiusweimburab kõriibala tabig maramibe. ² Møin kwaløm pirau maig pub arrubigu ñimgucha trumay ambub pønrrõnrrab kõmøtø pønrray. Treeg kõmøtø, Cristogurri ñimui srøig peemay isuitøga ñimui amønamiawan yunømarilø kuy. Treeg marabe, Tiuswei isuigube ñim maramig nõ mõigwan maramig palaiwein kui ñimbe nebua ashchabguen, tru purø tabigwanba, nuinug truba tab kui asigwanba, newan tabigwanba.

³ Tius nui ka yandø tab indigwan nan traniiitøga nabe ñim mayeelan trendamønrrun: Møitøgucha ñim mayangatig kuigugurrimbe mas nuig kurmab inchib pasrønrrab kõmø cha. Masken treeg kõmøtø, tab isua pasramig kõn cha, Tius mõigwandøgucha pirisha ketig, tru isubigwan Cristoinug maya pasra tõgagüi maig køben, treetøh kuy cha. ⁴ Põs nambe mõitøgucha asrbe kandø købendø, namui asrube chine pønrran. Inchendø truiløbe chi maramigwan mayababe truigwandøwei marøbelø kõmøn. ⁵ Øyeetøwei namgucha truba nu købendø, Cristoinuube nambe kan asrtø misra, nambe mayeeløba nõøøø kõnrrab kõmøtø, kangurriin kangurri kanbalatø misra pønrrer.

⁶ Tiusbe namun chigøben peg peg marøbelø kõnrrai keta tranøppe, nui ka yandø tab indig maig køben, treeg tranig kõn. Põs trube, Tius maig eshkangaruigwan wamin-damigwan ketig uta tõgaibe nui isubigwan Cristoinug maya pasra tõgagüig maig køben, treetø waminchi. ⁷ Katøganelan purugub megamigwan ketig uta tõgaibe purugumigu purugu. Kusrenanøbig kõmigwan ketig uta tõgaibe kusrenanamigwan kusrenan. ⁸ Katøganelan øyamay maramdiig kõn chib waminchibig kõmigwan uta tõgaibe, øyamay maramdiig kõn chib waminchi. Chigøben palai melabelan tranøbiibe, merøbala kõmø, treeg tranøb; chi maramigwan nõ pera marøb pasramigwan uta tõgaibe, trunun martrab isua pera marøb; lastima ashibig kõmigwan uta tõgaibe, larrø tab kui kasraatø marøb; treeg maramig kõn.

Tiuswei ureemerabe øyamay marøb kõmigwan waminchibig

⁹ Ñimui undag kõbiibe ka palatø kõmø, cierton kõmig kõn. Kaig maramigwane trømbøig kui mørøb, tabig maramigwane si, merrarrawa maray. ¹⁰ Ñimbe kangurriin kangurri trag nunelø lataig undaarayay. Nayasig tab kõnrrain kõmø, katøganelayasig tab kõnrrai, ñimbe treeg marøbelø kuy, ambugurri igurri maig købash kõmø.

¹¹ Ñui chi maramigwane marig kõrrømisrtrai marøb, pøilø kõmumig kõn, Señorweiwane martrurmab isua marøb.

¹² Cristoba purø tabig tõrbilabigu pønrramigwan ñim isua munig melaigu kasrag pønrrab, chigøben isumdiig murig pub arrubigu tammay melabig melab, Tiusba waminamigwane elachimø, marøbig marøb inday.

¹³ Tiuswei misaameran chigøben palabig arrubigu purugub, mõiløgøben ñimui yau pube-lane tabig wamab, treeg maramig kõn ñimbe.

¹⁴ Ñimun kaig marøbelane 'chigøben trømbøig nebubash' chib, treeg inchimøtø; 'mayanguen tabig nebunrrun' chib, treeg indamig kõn.

¹⁵ Kasraatø purrøbene, tru kasraatø purrabeløba lata kasraarab; kishib purrøbene, tru kishib purrabeløba lata kishib inday.

¹⁶ Ambugurri, igurri lata tabig lincha warab, truba nørreelø kømmørø inchimøtø, chigucha kømø misaazheeløba chi pesriig kui mørømø linchibelø kømig køn. Ñim ñuinuinetø truba kusrebelø kermab isumøtay.

¹⁷ Ñimun mugøben kaig maren, truburø ñimgucha treetøwei marøb kønrrab kømøtø, ñimbe maya misaamerai merrab tabigwan marøbelø kønrrab inday. ¹⁸ Ñimuiiburappe, ñimun mayangatig tabig waramdiig køben mu misaamerabatøgucha ambugurri, igurri tabig warønrrab inday. ¹⁹ Ñim, nai undaarailø, kaig marimburø ñimashib treetøwei pagaranrrab inchimøtø, Tiuswei namig købigwan nømum pala arrubasay. Kaguende Tiuswei wamyube øyeeg chibig ørig pasran: “Kaig marimburø pagaramibe nain køn cha. Truburøbe na asha maramig køn” cha, Señorbe trendan. ²⁰ Masken treeg inchimøtø:

“Ñun ashig kømui inchibig chugurri mamig kaagúin købene, manrrai tranøb,
pi mulgwai inchene, mutchai pi srørrøb indamig køn cha.

Treeg marabe, tru ñun kalø marimburø nune nuba køriimarøb may parra kørrømartrabguen”
cha.

²¹ Tru chigurrimbunø kaibe ñun nø kananrrain kømøtø,
tru chigurrimbunø kaigwane tabiitøga kanamig køn ñibe.

13

¹ Misagwan ashib karub purrønrrai purrønnilane nøm maig chiben mayeeløba trulan møramig køn. Kaguende ashib karub purrønrrai purrønniløbe Tiuskurrin kømibe purrømøn. Inchen treeg purrabeløbe nø treeg kønrrai mariiløgurrim burran. ² Inchawei tru ashib karub purrabelan sètø pasramisrøb kurrabiibe Tius treeg kønrrai mara pasrigwan treeg kømønrrai sètø pasramisrøb kurran. Inchen tru treeg marøb purrabeløbe nømuyasiitøwei tru møra pønrramig kønrrai marinab kømigwan lab pønrran. ³ Kaguende tru ashib karub purrabeløbe tru tabig marøbelan truba kwaarøsa tøgagønrrab purrømøtø, kaig marøbelane nømbe treeg martrab purran. ¿Ashib karub wabigwan chi kørig isumø, ñune treeg uñig køtah? Pøs, trube, tabigwan mar, trumaybe nø tabig wamingdig kønrrabguen. ⁴ Kaguende tru ashib karub wabiibe Tiusweimburø mara tranøb wan, ñuimburab tab kønrrai. Inchendø ñi chigøben kalø marabe, trube, kørig tøgagu. Kaguende tru ashib karub wabiibe nui espadane kagatø tøgagømøn. Kaguende nøbe Tiusweimburø mara tranøb pasrappe, kalø marøbigwane Tius øyamay martrai palai waitøga møra melønrrai marøbig køn. ⁵ Inchawei tru ashib karub purrabelane nøm maig taigwan møramig køn, møra melønrrai mariilø kømigwan kørig isuatø kømøtø, namui isub kebachib pasrabigu chi isumig kaanrrangue.

⁶ Inchawei øyeekurri ñimbe an pagaramigwan pagarabelø køn. Kaguende tru ashib karub purrabeløbe Tiusweimburø marøb purran, tru nøm mandø maramigwan chu urastøgucha trunun merrarrowa marøb. ⁷ Pøs mønundøgucha ñim maig pagaramigwan trunun treeg pagaramig køn: chi tøgagúimburø chi pagaramigwane trunun pagarab; yanøb, penab indimburø pagaramigwane treeburø pagaramig køn. Inchen tab inchib tøgagømelane tab inchib; maig købash inchimumelane tab inday.

⁸ Mungucha chigøben ulø kømøtay. Kangurrin kangurri undaguelø kømigwan, truigwane ulø pønrramig køn. Kaguende mendaigwan undaarabiibe tru maig maramigwan martrai Moisés ørig maig taigwan, trunun maran. ⁹ Kaguende tru maig maramigwan martrai pønrrailø, tru: “Itølulmøwei, kweecha petømøwei, nilømøwei, ñui marømmørø inchib chull ashmøwei indamig køn” chib, tru katøgan maramig karua pasrig chigucha, tru: “Ñui mendaigwan ñiasiitø lataitøwei undaaramig køn” cha, trencha karua pasrigu, truyutø chishtø tøgata trendain pasran. ¹⁰ Pøs tru undag købiibe mendaigwan chi kalø marmøn. Inchawei undag købiibe tru maig maramigwan martrai Moisés ørig maig taigwan treeg marig kørrømisrtrai maran.

¹¹ Pøs ñimbe øyeegwane maramig køn, mõi yambe maig kwalømmøra kui ashabe. Pøs yandø ñim kiagasramig puin køn. Kaguen nam kaigyugurri wesrailø kømibe mømibe katøguchinguen lutau pasran, tru nam Criston srøtø køreb uras lataguen kømø. ¹² Yandø yana yemguen purayain køben. Cristo arrumig tømørram lutau lataig misrøb arrun. Chigøben kaig marig løstøyuelane yandø elacha, tøryu kwayab kewa pønrrailan kewa pønrrøgun, tru tabig sølgandø marig tøryu marøb pønrrailøtøga. ¹³ Nambe kan kwalømyu amøñib lataig maig amønnamigwan sølwan amøñigun, mabgucha mamburab mab, mutsiirab, ishumburmeraba, møgueløba trømbøig marøb, chugatig trømbøig marøg køben treeg marøb, kwayam lab, pusrkwai ashib treeg marøb kømøtø. ¹⁴ Masken, Señor Jesucristo nø pinøbuliilø kønrrab inday, trendø kaig kuinaigu asr maig marøg kui inchen, treegwan martrab inchab kømøtø.

14

Cristoimburab nuneløbe kullaateelane isuptø maramig køn

¹ Møikkøben nui isubig Cristoinug pasra tøgagúgu newan kómíig kullaatiigwan utappe, nø chigøben øyamay kui tamab isua tøgagúgwane ‘øyeeg, øyeeg køn’ chib wam lamøtø, utamig køn. ² Pøs møibe chi mamigwandøgucha maben Tiusweimburappe chi kómíig kui treeg isubene, møibe nui isubigwan Cristoinug pasragúgu kullaatiibe ka mamizhiitø man, kaguende yau mabene, Tiuswein kabyube kalø kønrrai tamab isua. ³ Inchawei møikkøben chi mamigwandøgucha lutøgurri mabiibe tru mø mamimerandø mabigwane kashmumig køn. Inchen tru mø mamimerandø mabiibe, trube, tru chi mamimerandøgucha lutøgurri mabigwane kalø køn chib chinetø cha mørmumig køn. Kaguende Tiusbe nune kashmø, utig køn. ⁴ Kan karuindiig megabig katøganuiwan ñi ‘øyeeg, øyeeg køn’ chinrrappe, ðíibe mu kurmagu? Pøs nø kebenin kui, kabe kebeñmuin kui tru nø karub pera wabig uyube nø ashchab kuinrrun. Inchen karuig megabig Señorweimbe kebeñmø pasrønrrun. Kaguende Señorbe maramburab marøbig køn nune mur pasrønrrai maramig.

⁵ Pøs møibe treeg isun, mø kwalømbe katøgan kwaløm lata kómø, mas tabig kuitamab. Inchen katøgane mø kwalømmeratøgucha treetø kuitamab treeg isun. Pøs øyeeg isuilan ñim møitøgucha maig isua tøgagúgwane chigurri øyan købig kuin kui ashabe, trube, kanmaytø treeg isua kómig køn. ⁶ Inchen møikkøben mø kwalømbe tabig kuitamab isubiibe tru kwalømwane Señorwan tab indig kønrrai isua maran. Inchen chi mamigwandøgucha mabiibe Señorwan tab indig kønrrai isua man. Kaguende Señorwan ungwa, ungwa tan. Inchen tru mø mamigwan mamíig, truikkucha Señorwan tab indig kønrrai isua trunun mamøwa, Señorwan ungwa, ungwatøwein tan.

⁷ Kaguende nambe møitøgucha nayasiitøwei øsig uñmøwei, katø kwabgucha nayasiitøwein kwamøwei indan. ⁸ Pøs nambe øsig warappe, Señorweyasig øsig warab; kwamig nebubene, Señorweyasig kwamig kønrrun. Inchawei øsig waramig nebuli lata, kwamig nebuli lata, nambe Señorweyelø ker. ⁹ Kaguende Cristobe øyeeg kønrraiwei kwawa, katøle øsiiraig køn, kwabelai lata, øsiguelai lata mayeelaim pala nø Ashib Karub Pasrabig kønrrab.

¹⁰ Trube, treeg købene ðíibe ñui nunewane chindimbarre ‘øyeeg, øyeeg marøbig køn’ chigu? ¿Katø ñui nunewane chindimbarre kashku? Kaguende nambe mayeeløba tru maig kønrrabigwan Tius nø asha marøb wainug kemalamig kønrrab køn. ¹¹ Kaguende Tiuswei wamyube trenchibig pørig pasran:

“Señorbe trendan cha: ‘Na øsig wamma waibe,

treetøwei nai merrappe mayeeløba tømønrsøben,

katø mui niløtøgucha ‘Tiuswan tabig køn’ chib, waminchun’ ” cha.

¹² Inchawei nambe møitøgucha naimburabigwan Tiuswan eshkamig neburrrun.

¹³ Pøs treeg købene, nambe kangurri kangurri mas ‘øyeeg, øyeeg køn’ chimugun. Masken treeg kómøtø, katøgelanelan ka srurrengwangerub, søtøbasramisøb nui nunewein kabyu kalø kui asigwane marmønrrab isumig køn. ¹⁴ Nabe Señor Jesúsweinuube kerrigu newan øyeeg kuitamab isua pasrar, chi mamimeratøgucha ka yandøbe kaig kømuin kui. Inchendø møikkøben ‘i mamibe kaig kuitamab’ isubigweimbe, nuimbe kaløwein køn. ¹⁵ Inchen ñi kan mamigwan maikkurrindø ñui nunewan ka isui uñchaidø mariibe, yandø ñibe undag købitøga marøb pasrømøn. Ñui mamikkurrindø ñui nunewan kerriguwan mindisha kørørmarmøta, Cristo nuyasig kwaig købigwan. ¹⁶ Øyeeg marigwan tru ñimburappe søl kui asha, ñi treeg tøgagúgwane katøgelaneløbe chine kaig wamincha mørøb kønrrain kómøtø kuy, tru ñi øyeeg mariitøgatø. ¹⁷ Kaguende Tius nø ashib karub waibe mamimeragurri chi asamig kønrrab kómøwei, mutsiløgurri chi asamig kønrrab kómøwein køn. Treeg kómøtø, Tius tru nø ashib karub waibe tabig sølgandø mariiba, chi isumgaig tab købiiba, kasrag købiiba, truilø køn, Espiritu Santogurri. ¹⁸ Kaguende Criston øyeeg mariitøga nuyasig marøb pasrabiibe Tiuswan truba tab kønrrai marøb, katø misaameragucha nune chi tamgaig marøbig kui asig køn.

¹⁹ Inchawei treeg købene, ambumay imay tab kønrrai marøb, ambugurri igurri pугuyab Señorweimburab nørørab ambamigwan tøgagønrrab inchigun. ²⁰ Tiuswei marilan mamimeragurrindø ka mindisha kørørmarmøta. Isa kómøtø, chi mamimerane Tiusbe mamønrrain cha meriibe kaaben, tru kalø køppe, tru mamimeragurrindø kan møg katøgelanelan treegu ka srurrengwanrrai indig, truirren kalø køn. ²¹ Pøs trembe yau mamøwei, vino muchimøwei, katø ñui nunewan penørkønrrabig chigøben marmøwei indikken, søl køn. ²² Pøs ñui isubigwan Cristoinuutø tøgagúgwane ñiba Tiusbatø tøgagu. Pøs nø chi marøb pasraigu nui manrrau isub kebachibigube chi kalø kui mørmø marøb pasrabigweimbe mayanguen tab køn. ²³ Trune tru kalø kønrraitamabgøba isubendø mabiibe, maikkurrindø kaig mara pasramisan. Kaguende nui isubigwan Cristoinug tøgagømubendø

maran. Inchawei chitogucha isubigwan Cristoinug pasra tögagüigugurrin kømøtø arrubiibe, kaig køn.

15

Nuimburab kui lataitøwei mendaigwan tab kønrrai marøb

¹ Inchawei nam Señorweimburabigu tabig mur pønrrabeløbe tru Señorweimburabigu kullaateelan nambe purugumig køn, nam namasiitøwei tab kui mørøb pønrrømøtø. ² Nambe møitogucha namui nuneg kullaatiigwan tab kui mørtrai maramig køn nuimburab tab kønrrai, Señorweimburabigu nurab inrrai marøb. ³ Kaguende Cristo købenguen nøasiitøwei tab kui mørøb pasramigwan lamøtø, Tiuswei wamwan pørigu Cristo maig taimbala kuig køn: “Tru tsalø wamabelø ñi Tiuswan tsalø wamiiløbe naim palatø arrig køn” taig. ⁴ Kaguende kerrigu tru merrabsrø Tiuswei wamyu pøriibe namun kusrenanrrab pørig købig køn, tru nam tammay melabig melaiikkurrimba, tru Tiuswei wam pørig namun tabig purugub wamgurrimba, nam Tiuswei tørguegwalmabigu nam Cristoba kanbalatø pønrramigwan isua muniiramig tögagønrrai. ⁵ Inchen tru namun tammay melabig melamigwan tranøb, katø tru namun tabig purugub Tiusbe ñim kanikkurri kanikkurri kandø isua pønrramigwan tranrraimab isur, Cristo Jesús nø maig isuig køben, treetøwei, ⁶ ñim mayeeløba kandø isua, kan wamdø misra namui Señor Jesucristoi Møskai Tiuswan truba tabig wamindamig kønrrai.

Tiuswei tabig srø wambe mu misaameraindøgucha køn

⁷ Inchawei ñimbe ambugurri, igurri wamab utay, Cristo ñimun utab lataitøweingue Tiusweyasig tørguegwalmabig kønrrai. ⁸ Pøs nabe ñimun trendamønrrun: Cristobe judíosmera, tru circuncidawarmeran purugub meganrrab arrig køn cha, tru Tiuswan mørøbelø merrabsrø kølli misaameran nø maig martrab kørørmisrig købigwan treeg marig kørørmisrrai, øyamay Cristobe kenamartrab indig køn, Tiusbe nø maig martrab taigwane treeg marøbig kui ashchai. ⁹ Incha katø trutø kømøtø, Cristobe arruppe, tru judíos kømø misaamera nømun Tius lastima asimburø Tiuswan maya nuguen tab indig kønrrai arrig køn. Tiuswei wamwan pørigu maig taimbala: “Øyeekkurri nabe judíos kømø misaamerai utu ñi, Tiuswan tabig waminchib, ñui munchiwan cantab indamønrrun” cha, trendaig.

¹⁰ Katø katøganbaløsrø trenchibig køn:

“Ñim, judíos kømø misaamera, Tiuswei misaameraba truba kasraaray” cha.

¹¹ Incha katøganbaløsrø katø trenchibig køn:

“Mayeelø judíos kømø misaamera Señorwan purø tabig waminchib, mu misaameratøgucha nun purø tabig waminday” cha.

¹² Katø Isafaskucha øyeeg taig køn:

“Isafweinukkurri arrubig kan tusrwan srøldø pasram parig lataigugurri srøig kal-lab lataitøwei katøgan srøig kurra, judíos kømø misaameran ashib karub pasrønrrab pasramisren, truiløbe nøm isua muniirab melaigwan ke nuinuutø pasra tögagønrrun” cha.

¹³ Pøs tru nam isua muniirab melamigwan tranøb Tiusbe tru ñim nun køreikkurri maya nu kømburab kasrag købigwanba, chi isumgaig tab købigwanba ñimun netsøganrrai isur, tru isua munig melaig, truitø tögagømburab tögagønrrai Espiritu Santoi maramburab mariitøga.

Jesucristo maig karuilan Pablo mariilø

¹⁴ Pøs, nai nunelø, nabe ñimuimburab øyeeg kuin kui asha pasrar, tab in chibelø kømitø netsailø, chigurrimbunø nebua asamig truitø netsailø, ambugurri igurri maig maramigwan waminchib eshkab pønrrønrrapteelø, ñimbe treelø kui. ¹⁵ Inchendø nabe ñimun igwan pørøppe, kanmaytø murtø trencha pørar, tru chimerayube maig kømigwan ñimun katøle isunanrrab isua, nui ka yandø tab indigwan Tius nan tranikkurri, ¹⁶ tru na Cristo Jesúsweian judíos kømø misaamerayasig na marøb meganrrai. Pøs, na Tiuswei tru tabig srø wamwangøba eshkab kusrenanøbig kur, kan sacerdotø Tiuswan keta tranøb latawei tru judíos kømø misaameran na Tiuswan keta tranen, nø ka utamdeelø kønrrai, nuyasiitø tarømarilø Espiritu Santogurri.

¹⁷ Inchawei nabe Cristo Jesúsweinuube truba tab kui mørøb pasramig tøga pasrar, na mariilø Tiusweimburabeløyu. ¹⁸ Pøs nabe katøgan chi pegwan waminchab inchimøtø, na waminchippe, tru judíos kømø misaamera Tiuswan møra mørøbelø kønrrai, tru nagurri Cristo chi mariilandø wamindamønrrun. Iigwane nabe marøppe, wamindiløtøgaba, mariiløtøgaba, ¹⁹ Tius naba pasrain kui asamig nørreelø mariiløtøgaba, kwaara asha kønrrai mariiløtøgaba, iilai tru maramburab mariitøga marøb, katø Tiuswei Espiritui tru maramburab

mariitōga marōb indiilan, nabe trunundō wamindamōnrrun. Ōyamay Jerusalénsrōngurri chutōgucha Ilírico pirausrōngatig kerrigu chigucha palōmig na Cristoi tabig srō wamwan eshka kusrenanig kōbig kōn. ²⁰ Pōs nabe Criston tru mana wamindi mōriimōsrō, treegu tru tabig srō wamwan eshka kusrenanōb pasramigwan mas isua martrab inčhibig kur, Cristoi tabig srō wamwan mōikkōben eshka kusrennōbig pōlbasra marinug srōig itō marōb kebimōnrrab. ²¹ Masken Tiuswei wamwan pōrig maig taimbala:

“Managuen nuimburabigwan mu wammōrōsraimeelō kōbelō nun nebua ashīb,
wamindigwan mana mōrmeelō kōbelō chigūi nebua mōrōb inčhun” taig.

Pablo Romasrōmay inrrab isub

²² Inčhawei ōyeekkurri nabe katō katō ñimun ashchab attrab inčhen, arrumōnrrai marinab pasrabig kur. ²³ Inčhendō mōimbe yu na tsuim pirausrōmbe naimbe yandō chu maramig kawēn kōben, katō merrab pilamerawansrōngurri ñimun ashchab truba arrug kui megaig kōppe, ²⁴ Españasrōmay na inrrab arrua, pua purainrrab inčhar. Kaguende nabe ñimun asha purainrrab isur, tru petō purainrrab arrua, kan maya yana ñimba lindigu truba kasraatō puraya, na trusrōmay yamigwan ñim nan purugunrrai.

²⁵ Inčhendō mōimbe nabe Jerusalénsrōmay inrrab yar Tiuswei misaameran an purugūigwan tranrrab. ²⁶ Kaguende macedoniasreelōba, acayasreelōbabe tru Jerusalénsrō Tiuswei misaamerai utu waachameran purugumig an tulisamig nōmune tabig asōnaig kōn. ²⁷ Pōs nōmbe tabig martrab isua marig kōn. Inčhagucha nōmbe judíosmerane ulōweim pōnrran. Kaguende tru judíos kōmō misaamerama Tiusweimburabig purō tabig tru judíosmeraiwan nōm tōga utab pōnrraibe, nōmgurringucha nōm chi tōgagūilōtōga judíosmeran tranōb pirisamig ulō pōnrran. ²⁸ Inča i maramigwan nabe yandō chab mara, tru kan mamig misrizhig latawei tru an purugūigwan nōmun purōrabe, Españasrōmay inrrab arrua, ñimun ashchab arrumōnrrun. ²⁹ Inča na ñimuisrōmay arruppe, Cristoi mayanguen tabigwan ñimun pirishinrrab tōgagōmburab tōga arrum kui nabe asha pasrar.

³⁰ Inčhendō nabe, nai nunelan, namui Señor Jesucristogurrimba, Espirito Santoi undag kōbikkurrimba, naimburab ñim Tiusba truba rugab wamindigu, tiusmanda naba kanbalatō misrtrai chinrrab, Tiuswan truba truba miab melamigu. ³¹ Pōs tru Judea pirau Jesucriston chi kōrenrrab inčhimō misaamerai tasku na kebeñmōnrraimba, katō tru Jerusalénsrō Tiuswei misaamera tru an purugūig srua yaigwan tabig kui ashīb utōnrraimba Tiuswan miarrunrigay, ³² pōs Tius treeg kōnrrain kōbene, na ñimuisrō arruppe, truba truba kasrag pua, ñimba kanbalatō pishindō tab wamig kōnrrai. ³³ Inčhen Tius tru chi isumgaig tab kōbiibe ñim mayeelōba pasrōnrrai isur. Treeg kōnrrun.

16

‘Tab ka amōñiguhē’ chib, Pablo wam ōriilō

¹ Cristogurri tru namui nuchag Feben tabig ashīb tōgagōrrunrigay chinrrab inčhar, tru Cencrea iglesiayu chi maramigu purugubigwan. ² Señorwein kuimba ñimbe nun truba tab wamab utōnrrigay chinrrab, Tiuswei misaameran maig utamig kōben, trumay. Katō ñimgurri nun chi purugumig palain kōbene, purugub inčhigay. Kaguende nōma truba yamelan truba truba purugub megabig kōn, katō nan chigucha.

³ Cristo Jesúswei maramigu linča marōb melabelō, Priscilanba, Aquilanba ‘tab ka amōñiguhē’ tan chirrunrigay. ⁴ Truilōbe naimburab nan chi kōmōnrraindō kwam labguen inčhibelō kōn. Truilane nabe mayanguen ungwa, ungwa tamōnrrun. Katō natō kōmōtō, judíos kōmō misaamerai iglesiameragucha mayamba nōmune ungwa tan. ⁵ Katō iglesia tru nōmui yau tulundzunabelangucha ‘ka amōñiguhē’ tan chirrunrigay. Katō tru Epeneto, nai undaraig, Asia pirausrō ke srōsrōzhiitō Criston nōmerrig kōrewa pasramisrōbigwangucha ‘ka uñgu’ tan chirrunrigay. ⁶ Katō ñimuyasig truba truba marōb megabig Mariangucha ‘tab ka uñgu’ tan chirrunrigay. ⁷ Andrōniconba, Júniaswanba, nai misaameran ‘ka amōñiguhē’ tan chirrunrigay, kailan pōnsraig yau merrarrawa keeriilō naba linča pōnrrabelō kōbelan. Truilōbe Cristo nōashīb karua ōriilō nōmune tabelō mumeru kui asilō, katō nōmbe Criston naguen kōremōwatō, nōmmerrig kōrewa pōnrrabelō, treelō kōn.

⁸ Señorweimburab nai undaraig Ampliaswan ‘ka uñgu’ tan chirrunrigay. ⁹ Katō Cristoi maramigu namun linča marōb megabig Urbanonba, katō nai undaraig Estaquiswanba ‘ka amōñiguhē’ tan chirrunrigay. ¹⁰ Apeles, Cristoimburabigu chine nebuinab puraya mōwanba, katō Aristóbuloi yaelanba ‘ka amōñiguhē’ tan chirrunrigay. ¹¹ Nai misag Herodiónwanba, Narcisoi yaelō Señorwan kōrewa pōnrrabelanba ‘ka amōñiguhē’ tan chirrunrigay. ¹² Señorwei maramigu truba marōb melabelō Trifenanba, Trifosanba ‘ka amōñiguhē’ tan chirrunrigay, katō Pérsida, truba undaraig, tru Señorwei maramigu truba truba marōb megabigwanba. ¹³ Señorweinug purō tabig kui asig Rufonba, nui usranba ‘ka amōñiguhē’ tan chirrunrigay, pōs truike nai usri lataig kuig kōn. ¹⁴ Asíncriton kōben,

Flegonten kōben, Hermeswan kōben, Patrobaswan kōben, Hermaswan kōben, katø nunelø nōmba warabelan kōben 'ka amøñigueh' tan chirrunrrigay. ¹⁵ Katø 'ka amøñigueh' tan chirrunrrigay Filólogon kōben, Julian kōben, Nereowan kōben, katø nui nuchawan kōben, Olimpaswan kōben, katø tru nōmba warabelø mayeelø Tiuswei misaameran kōbengue.

¹⁶ Kangurri kangurri 'ka amøñigueh' chib tabig wamab Tiuswei undag kōbiitōga tasing traniyay. Cristoi iglesiamerabe mayamba ñimun 'ka amøñigueh' cha øran.

¹⁷ Pøs nabe ñim, nai nunelan, ashiptø kōnrrigay chinrrab inchar ñimun nōørotø misrtrai indamba, Cristoi maywan sōtøbōnramisramba inchibelan. Truiløbe tru ñimun kusrenanigwan ka peemaytø punrrai marøbelø kōn. Ñimbe truilane tarømisray. ¹⁸ Kaguende treeg misaamerabe namui Señor Cristoiwan marmeelø kōn. Treeg kōmōtø, ka nōmuimburaptø tab kōnrrai labelø kua, waminchibgucha purø tabzhig wamincha, mōrøptø wamdiig tabzhig wamincha, chigucha trunun nebua ashmø misaazheelan kegørrøsrkøbelø kōn. ¹⁹ Pøs tru tabig srø wam maig taigwan ñim mōra marøbelø kuigwane mayeeløba nebua asha kōn. Treekkurri nane ñimuimburab truba kasrag kōtan. Inchendø ñimbe chigøben tabigwane purø nu kusrebelø, kaigwane kan isubguen isumeelø kuimbe kōtan. ²⁰ Inchen Tius tru chi isumgaig tab kōbiibe kan maya yanayutø Satanáswane nōbe tambalørtrun ñim itøbuna pōnrrønrriai. Namui Señor Jesúswei ka yandø tab indiibe ñimba kōnrrun.

²¹ Timoteo, maramigu nan lincha marøb megabig, ñimune 'ka amøñigueh' cha øran, katø trugurri tru nammisaamera Lucio kōben, Jasón kōben, Sosípater kōben, truiløgucha.

²² Na, Tercio, Pabloi kilga pørøbikkucha 'ka amøñigueh' cha ørar, Señorwei munchiyu.

²³ Gayogucha ñimun 'ka amøñigueh' cha øran, tru nan truyu tsumig ya pebøb, katø iglesia mayeelanba pebøb inchibig. Inchen katø Erasto tru ciudadu an asamigwan nō ashibiiba, katø trugurri namui nuneg Cuartogucha 'ka amøñigueh' cha øran.

Tiuswan srabe tabzhig wamindig

²⁴ Namui Señor Jesúswei ka yandø tab indiibe ñim mayeeløba kōnrrun. Treeg kōnrrun.

²⁵ Møimbe Tiuswan maya nuguen tabig waminchigun, Tiuswei tru tabig srø wamwan na wamindiiba, Jesucristoimburab na eshkab kusrenaniiba iilø maig kōben treegu mur pōnrrønrriai marøbigwan. I tru tabig srø wambe tru manasrøngurri mu asiimig pasrabig Tius nō maramigwan nuinetø tøgagüigwan tru kenamarig maig kōben, treeg kōn. ²⁶ Inchendø møimbe Tius tru maig karuigwan eshkabelø pøriiløgurri tru mu asiimig pasrabigwane kenamaran judíos kōmeelø chu pirausrø misaamerandøgucha, Tius tru manasrøngurri managatig wabig nō maig maramigwan martrain pasrig, treeg, nōmui isubigwan Cristoinug pōnsra tøgagüigu maig taigwan mōra marøbelø kōnrrai.

²⁷ ¡Tius tru nōtø kandø wabig, tru muguen nebua kusremgaig newan kusrebigwan managatig tørguegwalmabig kōnrrun Jesucristogurri! Treeg kōnrrun.

1 Corintios

Pablo pørøb

¹ Na Pablo, Tius nan trendø treeg kørnrain køben, Cristo Jesús nøashib karua ørig kørnrai wamig, nai nuneq Sóstenesba misra, i kilgawan pørar, ² Corintosrø iglesiyuelan, Cristo Jesús kurri tru Tiusweyasig tarø mariilø, nuyasiitø newan tabelø kørnrai wamiilanba, katø tru mayeelø chutøgucha namui Señor Jesucristoi munchiwan wamabelanba, traibe namuimba, nømuimba Señorwan. ³ Namui Møskai Tiusweimba, Señor Jesucristoimba tru ka yandø tab indigwan køben, chi isumgaig tab købigwan køben ñim tøgagørrai inchar.

Cristogurri tabig tranigwan 'ungwa, ungwa' taig

⁴ Chu urastøgucha nabe Tiuswane ñimuimburab 'ungwa, ungwa' chibig kur, Cristo Jesús kurri ñimun Tius ka yandø tab indigwan tranikkurri. ⁵ Kaguende chiyutøgucha ñimbe nuinug purø nørø tøgagørrai traniiø køn, kerrigu wamindigu lata, kerrigu nebua ashib ambigu lata. ⁶ Trumay Cristoi tru srøig tabigwan wamindiibe ka wamindiitø kømø, ñimuinuube cierton kørø misrin køn, ⁷ Tiusweiwan marøbelø kømigwan keta tranig chigucha chi palømeelø kømnegatikke, Jesucristo kenamisramigwan ñim munig melappe. ⁸ Katøgucha srabegatig ñim kørø mur pørrørrai nøbe tøg pasrørrun, namui Señor Jesucristo katø arrub kwalø chi kaig mariilø chigar pørrramig kørnrai. ⁹ Tiusbe nøbe maig martrab chippe, treegwan marøbig køn. Ñimbe nøgurri wamiilø kuig køn, nui Nusrkai Jesucristo namui Señorba lincha pørrramig kørnrai.

Corintosrø Tius wami misamera nørøtø inchib tarø misrøb

¹⁰ Nai nunelø, Señor Jesucristoi munchiyu maig maramigwan tiusmanda øyeeg marøb melørrunrigay chib waminchab inchar. Peg peg isub kømøtø, kandø isuy cha, ñimui utu mas nørøtø inchib tarø misramig kaanrai. Masken treeg kømøtø, newan kanbalatø lincha kandø isub, maig marameløyu kandø isub inchigay cha. ¹¹ Nai nunelø, møiløgøsrøn Cloëwei yaeløbe nane eshkatan, ñimbe kwayam labrre waran cha. ¹² Pøs nabe trenchinrrab inchar, møiløgøsrøn ñimbe trenchibrrøn køn tan cha: "Nabe Pabloingatiig kur" chiben, katøgane: "Apolosweingatiig kur" chiben, katøgane: "Nabe Cefasweingatiig kur" chiben, katøgane: "Cristoingatiig kur" chib. Treeg inchib køn tan cha.

¹³ Trube, treeg købene, ¿Cristobe nuin kui, nuin kui misra pasra chindah? Kabe ñimuyasig kurusyu kwanrai mesrøppe, ¿na Pablon mesraig kø chindah? Kabe ñimun piu umbu ulsrøgucha ¿nai munchiyu piu umbu ulsraig kø chindah? ¹⁴ Tiuswan nabe 'mayanguen ungwa, ungwa' tamørrun, ñimun møigwangucha na piu umbu ulsrømuigwan. Nabe piu umbu ulsrøppe, Crisponbah, Gayonbatøwei treeg marig kuig køn, ¹⁵ nai munchiyu 'piu umbu ulsraiø ker' chib mugucha trenchib kømørrai. ¹⁶ (Katø Estéfanaswei yaelandøbe piu umbu ulsrøbwei indig køn. Inchendø katøgan mas mungucha piu umbu ulsraibe nane isumøtan). ¹⁷ Kaguende nane Cristobe misagwan piu umbu ulsrøb uñchai ørmøtø, Tiuswei tru tabig srø wamwan eshkab kusrenanrai ørig køn. Incha nabe waminchibgucha, nørø wammeratøga purø may waminchimur, Cristo kurusyu kwaigwane chigucha kømíig kui lataig marig kømørrai.

Cristobe tru Tiuswei muguen nebua kusremgaig kusreiba, maramburab mariiba køn

¹⁸ Cristo tru kurusyu kwaigweimburab tru eshkab kusrenaniibe yandø tru kaigyu kegørra pørrabelaimbe chigucha kømíig, ke chugúinguen mørmubendø wamindi lataig køn. Inchen nam yandø kaigyugurri wesrailaimbe tru wamindiibe Tiuswei tru maramburab marig, truig køn. ¹⁹ Kaguende trenchibig pørig pasran:

"Purø kusreb møguelø chigurrimbunø nebua kusrewa tøgagúilane pinisamørrun cha.

Kusrebelø nøm chigúí møra tøgagúilane chigucha kømíig mara kaasha kørø maramørrun" chibig

²⁰ ¿Pøs, tru purø kusrebiiba, katø kusrennøbiiba, katø møi i kwalø m nørø kusrewa 'treeg, treeg køn' chibeløbabe chu pørrar? ¿yu pirau chine purø nørø kusreigwane chugúinguen mørmubendø marig, Tiusbe treeg mara tøgagømuitarru? ²¹ Kaguende Tiusbe, tru nui muguen nebua kusremgaig kusrebig kuigu, yu pirau misaamerabe nømui tru purø nørø kusrewa tøgagúitøgabe nun nebua ashmørrai indig køn. Pøs tru chugúinguen mørmubendø wamindig mara tøgagúigwan eshkab kusrenaniitøga nun kørebelane kaigyugurri wesramig, Tiuswane tabig asønaig køn.

²² Kaguende judíosmerabe kan møg Tius nøba pasrain kui ashchai mariilan miaben, griegosmerabe tru purø nørø kusreig wamindiilan mørog kui inchibelø køn. ²³ Trune nambe Cristo kurusyu kwaigwan eshkab kusrenanøbelø ker. Traibe judíosmeraimbe ke

ka srurrengwanganubig køben, judíos kømø misaameraimbe ke chugúinguen mørmubendø wamindig, treeg køn. ²⁴ Trune Tius tru wamiilayasiibe, judíosmerai lata, griegosmerai lata, Cristobe tru Tiuswei maramburab mariiba katø Tiuswei tru muguen nebua kusremgaig kusreiba, truig køn. ²⁵ Kaguende Tiuswei tru chugúinguen mørmubendø wamindi lataig asønabiibe møguelø purø may isua wamindi lataig kømøtø, mas purab nuig køben, katø Tius tru itønaptiig lataig kuibe, kan møwei fuerzas lataikken kømøtø, purab murikken køn.

Corintosø Tiuswei misaamera mailø kuig

²⁶ Inchawei, nai nunelø, tru ñimun wamab uras ñim mailø købelø kuigwan isua asamig køn. Misaamerain kabyu kusrebeløbe ñimbe ke kan kandøwein køben, katø ashib karub purrabelø nõrreeløbe mamdø køben, katø tab misagugurri amrrub misaamerabe mamdø køn. ²⁷ Yu pirau chugúinguen mørmubendø wamindi lataig tøgagúigwan Tiusbe truigwan wesrawa pasrig køn, tru purø nõrrø kusrebelan kørig mara kørrømartrab. Katø yu pirau kwa kaizheelø kømmab asha tøgagúilan Tiusbe truigwan wesrawa pasrig køn, nõrreelan kørig mara kørrømartrab. ²⁸ Yu pirau misagwein kabyu larrø kaizheelø kømmab asha tøgagúilanba, katø kaashib indiilanba, tru chigucha kømøzheelø kui asilan, Tiusbe truilan lawa wesraig køn, tru nõrreelan chigucha kømeelø mara kørrømartrab, ²⁹ mugucha Tiuswei merrab nõrreelø misrøb møg inchib pønrrømonrrai. ³⁰ Ñimbe Tiuskurri Cristo Jesúsba kanbalatø pønrran. Cristo Jesúsbe namuimbe tru mu nebua kusremgaig kusremiba, katø sølgandø tabiiba, katø Tiusweyasiitø tarømariilø kømiba, kaigyugurri wesruilø kømiba, treeg køn nõbe. ³¹ Inchawei Tiuswei wamwan pørigube trenchibig køn: “Møikkøben truba nuig kømmøø inchib waminchib pasrag købene, Señorweimburappe møg inchib waminchib pasrøbash” cha.

2

Criston kurusyu mesraigwan wamindig

¹ Inchawei nai nunelø, Tiusweimburabig mun kenamariimig pasrabigwan na ñimun eshkab kusrenanøb arrub urasma, ke kan chull møramdiig purø may waminchib, katø purø nõrrø kusreb nebua asilan waminchib arrumuig køn. ² Pøs nabe ñimui utube katøgan chi pegwan isub pasrønrrab kømøtø, Jesucristonba, nun kurusyu mesra kweetsigwanba, trunundø isua pasrønrrab isuig køn. ³ Incha nabe ñimui utu uñib urasbe truburab chish kømøwei, trurrigu kørig kuig ¡katø! itønab pasraig købig køn. ⁴ Inchawei na wamindigu lata, katø Tiuswei wamwan eshkab kusrenanigu lata, purø nõrrø nebua ashib kusreig wamdøga purø may køremdiig waminchimuiig køn. Treeg kømøtø, Tiuswei Espiritui maramburab mariitøga kenamarøb wamindig køn, ⁵ tru ñimui isubigwan Jesucristoinuutø pasriibe møguelø purø nõrrø kusreigu pasrig kønrrain kømøtø, Tiuswei maramburab maramigu pasrig kønrrai.

Tiusbe nui Espiritugurri nebua ashchai marøbig køn

⁶ Treeg kuingucha, Tiusweimburabeløyu yandø tsabø nõrrørawarwei utubeguende nõrrø nebua kusreigwan waminchibwei inchibelø ker. Nambe waminchippe, tru nõrrø nebua ashib kusreigwan mõi nam warain kwalømigwan kømøwei, kabe møin kwaløm yu pirau nõm ashib karubelø nõmguen patsab ambubelaiwan kømøwei wamindig køn. ⁷ Treeg kømøtø, nambe waminchippe, Tiuswei tru muguen nebua kusremgaig mu asiimig, sørig pasrabigwan wamindig køn, tru chi pønrrabikken kaabenbatøsrøwei namuyasig maya nuguen tab kønrrai kanmaytø manasrøwei Tius treeg martrab isua tøgagúigwan. ⁸ Inchen mõi yu pirau nõrreelø karub purrabeløbe møitøgucha iig tru muguen nebua kusremgaigwane chigúinguen mørmuiig køn. Pøs iigwan chigúi mørig kuimbe, namui Señor tru tørguegwalmabigwane kurusyu mesra kweechimubsruig kuinrrun. ⁹ Inchendø Tiuswei wamwan pørigu taimbala:

“Mugucha kaptøgabe nebua ashmøwei,
muguen kalutøgabe nebua mørmøwei,

ni muguen øyeeg kuitamappe isubguen isumøwei indigwan,

Tiusbe nun undaguelayasiibe trunun tøgagønrrai tamara pønrrain køn” cha.

¹⁰ Inchendø Tiusbe sørig pasrabigwan nui Espiritugurri namune kenamarig køn, kaguende tru Espiritube maig kuigwan kerriguh chishtø ashibig kua, Tiuswei tru muguen nebua asiimig nõ purø umbusrø tøgagúilanguen kerrigu. ¹¹ Pøs ¿kan møwanma nui manrrau umbusrøngue chi isub pasraigwan nebua ashibiibe nui espíritutøweimbe nebua ashmuitarru? Øyeetøwei Tius nõ purø umbusrø tøgagúilane mugucha nebua ashmuben, Tiuswei Espíritutøwei nebua asan. ¹² Nambe espiritu yu pirauigwan utømtøtø, utappe, Tiusweinukkurri arrubig Tiuswei Espiritun utig køn, nõ ka yandø keta tranigwan chigúi

mørøbelø kōmig kōnrrai. ¹³ Inchawei nam iigwan waminchippe, mōguelø yu pirau kusremburab kusrebelø kusrenani wamdōga waminchimer. Treeg kōmōtō, Espiritu Santo kusrenaniitōga Tiusweimburabelan øyeeg kōn chib waminchippe, Espiritu Santon tōgarmeran waminchibelø ker.

¹⁴ Kan mōg Tiuswei Espiritun chigaibe, Tiuswei Espirituimburabigwane utōnrrab kaiman. Pōs nuimbe ke chugūnguen mōrmubendø mari lataig kōben, ni mandø kuinguen mōrmōn, kaguende Espiritu Santo purugubendøwei, øyeeg, øyeeg kōbig kuin kui nebua asamig kua. ¹⁵ Inchen Tiuswei Espiritun tōgaibe chiwandōgucha øyeeg, øyeeg kōbig kuin kui nebua isumig tōgaig kōn. Inchen nungurrimbe mugucha ‘øyeeg, øyeeg kōn’ chinrrab kaimanrrun. ¹⁶ Pōs Tiuswei wambe trenchibig kōn:

“¿Señorwei isuilan kabe mu nebua asitarru? cha.

¿Señorwane kabe mu kusrenrrautah?” cha.

Inchendø nambe Cristo nō isuimay isumigwan tōgar ker.

3

Tiusweimburabeløyu lincha maram purugubelø

¹ Inchawei nai nunelan, nabe Tiuswei Espiritu maig kōnrrain kōben treeg isubelan lataig waminchab kaimaig kuig kōn. Treeg kōmōtō, tru maig amōñig kōben amōñibelan lataig, trumay wamindig kōn, Cristoimburabigube kan shush ureezheelø latalain. ² Nabe ñimune pitsōtō mutsōsraig kōn, tranrrø mamig manrrai manmōtø, kaguende katōgucha truigwane utōnrrabgailø srø kuimba. Ni mōi yanguen katōgucha treeg mamigwane manrrabgailø srø kua, ³ katōgucha ñimbe ñimui asr maig marøg kui inchen treegwan marøbelø srø kōn. Pōs ñimui utube pusrkwai ashib kōmig, aleguiyam lab treeg inchib pōnrraibe, ¿ñimui asr maig marøg kui inchen treegwan marøb, maig kōbash amōñibelø lataig marøb amōñimōtirru? ⁴ Kaguende ñim mōibe: “Nabe Pabloingatiig kur” chiben, katōgane: “Nabe Apolosweingatiig kur” chiben, øyeeg inchib pōnrrappe, ¿maig amōñig kōben amōñibelø lataig marøb pōnrrømōtirru?

⁵ ¿Trube, treeg kōbene, na Pablōba, Apolosbabe chimera kōbrah? Pōs nambe ka marøb melabeløtø kōben, ñimbe namgurriwei kōrewa pōnrran, namun mōigwandōgucha Señor maig martrai karua pōnsraig kōben, treegwan marøbelø. ⁶ Nabe ellguaben, Apolosbe pi kuchen, tru tusrwan nurangaruppe, Tius nō nurangarun. ⁷ Inchawei ellguabig lata, pi kuchibig lata chigucha kōmeelø kōben, kal-lawa nuranrrai marøbiibe Tius, nō kōn. ⁸ Ellguabig lata, pi kuchibig lata, mōibe kabe peg kōnrrab kuindø trunundøwei marøb kōn. Inchendø nōm mōitōgucha nōmui maramigwan maig marig kōben, Tiusbe tru marimburø pagaraben, utōnrrab kuinrrun. ⁹ Kaguende nambe maramigwan Tiusba lata lincha maren, ñimbe Tiuswei ellmari tul kōb, katø Tiuswei ya kōb indan.

¹⁰ Tius nui ka yandø tab indigwan nan maya traniitōga, kan mōg yawan purø may maram kusrebig lataitøwei yawan niga pasrōnrrabigwan nabe pōlbasra pasren, katōgane tru na pōlsrugwan mara pasrim pala, kusrub yan. Inchendø mōitōgucha marøb ambuppe, mandø marøb yainatashchab asha maramig kōn. ¹¹ Pōs kaguende yawan niga pasrōnrrabigwan chab marig pasrøbene, mugucha katōgane katø srøig peg nōrø maramig kōmōn. Kaguen tru chab mara pasriibe Jesucristo kōn. ¹² Inchen tru yawan niga pasrōnrrai pōlbasra marim palabe: orotōga marin kui, andōga marin kui, kabe purø tab sruezheeløtōga marin kui, tsiitōga marin kui, putōga marin kui, kabe ka shautōgatø marin kui inchun. ¹³ Inchen tru nōm treeg mariiløbe mōigweindōgucha tōrgandø chigūi asamdiig kenamisrtrun tru maig kōnrrabigwan asha marøb kwalōm. Kaguende maig kōtashchab naatōga parra ashen, tru naabe kanuin kanui nōm maig marigwan chigūi ashchai kenamartrun. ¹⁴ Inchen mōikkōben tru yawan niga pasrōnrrabigwan marim pala nō marøb kusrab yaig chi kōmø, nagu ka puraibene, truburø nōbe tru utamigwan utōnrrun.

¹⁵ Inchen mōigwein kōben nō chi marøb megaig pachiptinchene, tru nō treeg marigwane kaptøashchun. Nōbe truyugurri weluløppe, weluløbwei inchendø, treetōgucha welulrrab kan nag pilab utuwan pruyluløb ib lataig welulabe kōnrrun. ¹⁶ ¿Ñimbe ashmeelø kōtirru? yamba ñimdøweinguen Tiusweimbe tab ya kōben, Tiuswei Espiritube ñimuing pasrabig kuin kui. ¹⁷ Inchawei mōikkōben i Tiuswei yawan pinishibigwane Tiusbe nungucha pinishinrrun. Kaguende Tiuswei yabe newan tabig nuyasiitø kōben, tru Tiuswei yabe ñimdøwein kōn.

¹⁸ Kusrebelø kermab ñimasitø kegōrrab pōnrrømōtay. Ñimui utu mōikkōben misaamera mōin kwalōm yu pirau isuigu truba truba nu kusrebig kurbam isubiibe, chi nebua ashmifig lataig misramig kōn, cierton kusrebig kōnrrappe. ¹⁹ Kaguende kusremburab kusreig yu pirauibe Tiuswein kabyube ke chugūnguen marmubendø marig treeg kōn. Pōs øyeeg chibig pōrig pasran: “Nōm truba truba kusrebelø kermab isuigutøwei Tiusbe ilōsrka kegōrrōnrrai marig kōn” chibig. ²⁰ Katø treekkucha chibig kōn: “Señorbe ashibig kōn cha, tru nōrrø

kusrebelai isuiløbe chi isumuinguenig isuilø kui.”²¹ Inchawei mugucha, ø møøbesin chib, truba truba møg inchib waminchib pasramibe chigagøn. Pøs Kerriguba ñimuin køn:²² na Pablo lata, Apolos lata, Pedro lata; iig waraig pirø lata, øsig kømig lata, kwamig lata, møin kwalømlata, katø wendø attrabiglata; pøs ñimuiwein køn Kerriguba.²³ Katø ñimbe Cristoieilø køben, Cristobe Tiuswein køn.

4

Cristo nøashib karua øriilø nøm marøb kuilan waminchibig

¹ Ñimbe mutøgucha namune Cristoi maramigwan marøb, katø Tiuswei tru mu asiimig sørig pønrrabigwan nam asha marøb, kusrennøb pønrrønrrai pønrsrailø kui, namune ka treetø isua tøgagørrunrigay. ² Pøs tru maramigwan nøm asha marøb kønrrai pønrsrainabeløbe møitøgucha nui mariiløyu chi isumgaig marøbelø kønrrain køn. ³ Nane naimburappe, chi menrra isumøtan, ñim kui, kabe yu pirauelø mugøben tru maig kønrrabigwan asha marøb purrabelø, truilø kui, nan ‘ñibe øyeeg, øyeeg marøbig køn’ tainab pasramig. Kaguende nabe naasiitøweinguen ‘øyeeg, øyeeg kur’ chimur. ⁴ Pøs nabe naimburappe, nai manrraube chi kalø marig kebachiibe chigaig pasrar. Inchendø na treg pasraitøga ‘chi kalø marmig kur’ tamig kaagøn. Kaguende nan maig kønrrabigwan asha marøbiibe Señor, nø køn. ⁵ Inchawei treg købene, treg maramig pumøwatøbe ‘ñibe øyeeg, øyeeg kuin køn’ chib, treg kui mara kørrømmøtay. Muniiray Señor arrumnegatig. Tru sørig pønrrabigløstøyuelan nøbe toryu wesrawa, møguelø nømui manrrømerayu chi martrab isua tøgagüilan kuragutçhun. Inchen møitøgucha Tius tabig wamindig kømigwan utønrrun, nøm maig marig køben, treekke.

⁶ Nai nunelø, iigwan Kerrigu øyeeg pørøppe, Apoloswanba, nanba asha kusrenrrai indig køn ñimuyasig tab kønrrai, ñim namun asha kusrewa, pørig maig chibigwan purab marøb pønrrømønrraimba, kanune kaig køn chib, kanuingatøgøba inchib ñim truba møg inchib nørreelø misrøb pønrrømønrraimba. ⁷ ¿Ñun mu kui nebua asig kønrraima ñiune mu treg mara pasrta? ¿Tius tranigwan utiimibe ñibe chi tøgagugu? Inchen nø tranigwan ñi uta tøgagüig købene, trube, ¿chindimbarre møg inchib nuig misrku, tranigwan uta kømøwa lata?

⁸ ¡Paare, ñim waachaalleeløbe! Yandø ke newanelø, katø ñimbe yandø chiyutøgucha palømig ke newan tøgar køppeendi, ñimbe namun palain kømø, yandø reymera, yandø ñimdø ke tsabø asha karubelø. ¡Kan waachaalleelø! Ñim isa kømøtø, reymera kua, ke ñim karub pønrraimbe, nangucha treetøweim pønrrønrrab, ñimba ke amøñigasamig køtan. ⁹ Pøs nam Cristo nøashib karua øriilane yandø wendau ke srabesrø melab lataig treg pønrrønrrai pønrsrailø ker, yandø kwanrrai wesrawa pønrsrailan latawei. Pøs nambe yu pirau mayeelai merrab misagashib srua kuilø kømig køtan, ångesmera lata, misaamera lata. ¹⁰ Nambe Cristoimburbikkurri ke chugüinguen mørmeelø lataitø køben, trune ñimbe Cristoimburbabeløyu purø kusrebelø latailø køn. Nambe ke itaptø kaizheelø køben, trune ñimbe purø mur chibelø latailø køn. Ñimbe tabelø kønmab asiilø køben, trune nambe kaasiilø ker. ¹¹ Pøs nambe møin kwalømgatig parøgwai mørøb, pi mulgwai mørøb øyeeg nebuig meler, asru kemig truburab kømüielø, ichabeta kørrindilø, katø chu waramig ya kaweyelø. ¹² Nambe namui tasiimeratøga muraara, muraara marøbelø ker. Namune trømbøig tsalø wamøben, namgurrimbe nømune mayanguen tabig nebuilø kønrrai inchibelø ker. Namun kaig maringucha, namgurrimbe awentabelø ker. ¹³ Namune kailø kønmab ashchai isa waminchen, namgurrimbe maig købash inchimø, tammay løtabelø ker. Nambe møi øyan kwalømgatig yu pirau yandø kaasha kørrømarig chilliirrøsr kørreibig latailø ker, mayeelai kaasi shau.

¹⁴ Nabe ñimun iigwan pørøppe, ka kørig martrab inchimøtø, masken tabig melønrrai waminchar, nai undaaraig ureemera latailø kuimba. ¹⁵ Pøs ñimbe Cristoimburbagiu kusrenanøbeløbe diez milburab tøgagüindøgucha, kan møkai lataibe kandø tøga køn. Kaguende Cristo Jesúsweinuube Tiuswei tru tabig srø wamgurri nabe ñimuiimbe møkai misrig køn. ¹⁶ Inchawei nabe ñimun øyeeg marøb melørunrigay cha waminchar, na maig marøbig køben, ñimgucha tregwei marøb kønrrai.

¹⁷ Inchawei nabe Timoteowan ñimuiimay ørig køn, nai undaaraig nusrkai lataig Señorwan maikkucha tarømisrmø megabigwan. Nøbe na Cristo Jesúsweimburab maig marøb uñibig kuigwan ñimun isunanrrun, na chutøgucha iglesiamørig maig kusrenanøb yailan. ¹⁸ Inchen ñim møiløbe na ñimun ashchab arrumønrraitamab purø nørreelø misrøb møg inchibelø misrin køn. ¹⁹ Inchendø nan Señor inrrain købene, peba ñimun ashchab arrua, nøm truba truba nørreelø misrøb wamindiilan ashmøtø, tru nømui marøb kuigwan asamønrrun. ²⁰ Kaguende Tius nø ashib karub waibe wamindigu pasrømøtø, maramburab marigu pasran. ²¹ ¿Nabe ñimuiimay tsig srua arrumig palain køgueh? ¿Kabe undag købiitøga larrø tammay waminchab arrumig palain køgueh? ¿Ñimbe møigwan palainøgue?

5

Møgueløba, ishumburmeraba trømbøig marmumigwan waminchibig

¹ Ñimui utube ishumburmeraba, mõgueløba trømbøig marøb kuigwan truba wam køn, ñimui utube mõikkøsrønbe panabusrandøwei pera tsuin kui, judíos kømeeelø Tiuswan ashmø misaameraguen kan øyeekkatig trømbøig maramigwane purø trømbøig kui asha treeg marbasiimigwan. ² ¡Trune treeg kømnebe ñimbe chi kømui lataig nõrreelø misrøb ka mõg inchippe pønrran! ¿Ashene, øyeeg pubene, ñimbe isuig kishibguen pønrrømø, chindah? Tru øyeeg kaig marøb mõwane ñimui utugurrimbe wegutchai inday. ³ Pøs nabe ñimba kømøtø, nai asr pasraigube yabsrø nõøøø pasraindøgucha, nai isuigube ñimba pasrøwa, tru treeg kaig marøb mõwane nun maig itø attrabigwan treeg kønrrai kørømara pasrøbguen inchar, na ñimui utu pasrøwa lataitøwei. ⁴ Namui Señor Jesucristoi munchiyu ñim tulundzunøben, na maig isubig kuigube ñimba pasrøben, Señor Jesúswei maramburab maramig truyu pasrøben, ⁵ tru larrø kaig marøb mõwane Satanás nõ tøgagønrrai pasrrigay, nui asrwan pinisaig kønrrai, Señor arrub kwaløm nui espíritune kaigyugurri wesraig kønrrai.

⁶ Ñim nõrreelø misrøb waminchib pønrraibe chi tabig kømøn. ¿Ashmeelø kòtirru, harinayu levaduran lamøtø pusriitø maya sømarigwan larrøb pulingarubig kui? ⁷ Tru kølli levadura lataig tøgagúigwan wegutsay, harina sømarig chi levadura larrimig latawei ñim chishelø kønrrab, ñimbe yandø chabguen treelø kuig køppe. Kaguende Criston, tru namui Pascua Fiestayu Ubisha-unø kweetsamig købigwane namuimburø kweetsig købig køn. ⁸ Inchawei nambe tru Pascua Fiestan marøppe, tru kølli levadura lataigwan tøga marøb kømøgün, tru kaig martrabgøba isub, chine trømbøig maramigwangøba isub indi levaduran. Treeg kømøtø, tru pirri chi levadura chigaig lataitøga fiesta margun, tru pirriyu chi lindsaimig chi sørig chigaig, ciertongue.

⁹ Nabe ñimun kilgayu pørøppe, asrtøga trømbøig marøb ishumburmeraba, trømbøig marøb mõgueløba linchimøtay cha pørig køn. ¹⁰ Inchendø nabe igwan trenchippe, yu pirau tru Tiuswan ashmø misaameran truilaimburab waminchimur, tru ishumburmera lata mõguelø lata trømbøig marøbelan, tru larrø pareelan, chi isa køben an nila wesrabelan, katø chiwangøben kan tius kui lataig inchibelan. Pøs treeg misaameraba kerriguan linchimumig kuimbe, trube, ñimbe yu piraugurrimbe webambam neubusrinrun. ¹¹ Pøs nabe ñimun pørøppe, ‘ñimui nuneg kur’ chib pasrøbendø, menda ishumburba trømbøig marøptiig, larrø pariig, katø chiuwan køben kan tius kui lataig inchibig, kabe isa waminchib wam kusruptiig, mutsiiraptiig, purø may isa nila wesraptiiba, øyeeløba lindamig kømøn cha pørar. Treeg inchibiibabe mabguen lincha mamumig køn. ¹² ¿Pøs nagan Tiuswei misaamera kømeeelø nõøreelan kabe na asha marøb pasramig kuitarru? ¿Tru iglesiyuelan asha maramigwane ñim maramig kømuitarru? ¹³ Kaguende Tiuswei misaamera kømeeelø nõøreelane maig kønrrabigwan Tius nõ asha martrab kuinrun. Inchendø: “Tru ñimui utu tru larrø trømbøig marøbigwane ñimbe wegutsamig køn” cha, trenchibig køn Tiuswei wamwan pørigube.

6

Tiuswei ureemera ambugurri, igurri aleguiyab

¹ ¿Maig marøb pønrrabelø kuaasamø, ñim mõikkøben Cristogurri nui nuneeba aleguiyam laig tøgagua, Tiuswei misaamerainug kømøtø, tru sølgandø tabigwan marmeeleisrø tru kwayam laigwan ‘tamara kettra’ chib, treeg inchib pønrrønrrappe? ² ¿Ñimgan ashmeelø kòtirru Tiuswei misaamerabe yu pirau misagwan maig asha maramigwan nõmguen asha martrabelø kui? ¿Inchen yu pirau misaameran treegwan ñimguen asha martrabelø købendøbe, trube, chigøben kwayam lailø yandøzhig pub arrubigwane treetøwei asha martrab kaimabelø kø chindah? ³ ¿Ashmeelø kòtirru ångelesmeranguen maig asha maramigwan nam asha martrabelø kuibe, mas yu pirau chigøben pub arrubigwandøbe chinchu asha marmønrrab kø? ⁴ Inchawei tru kwayam lailø yu pirau chigøben pub arrubigwane iglesiyuelø kømeeelan ¿mandøgurri truilan asha martrai pønsrøbelø køh? ⁵ Nabe ñimune kørig purørrab trenchar, tru nunelai utu kwayam lailan maig kuigwan paya ashib martrabig chigúu mørøb isum kusrebig ñimui utube, ¡paare! ¿ni kandøguen mu kaagø chindah? ⁶ Inchen kan treeg martrab isui urasbe kan nuneeba katøgan nuneeba kwayam lawabe, juezmeran ‘tamara kettra’ chib, eshkab ambubelø køn Tiuswan køremø misaameran.

⁷ Ñimbe ñimuimburappe chiguen kømø, yandø newan kegørø pønrran, ñimui ututøwei øyeeg kwayam lab pønrraikkurri. ¿Trembe ñimun sølwan marmø kalø marindøgucha, treegu ka puraambub melamdiig kømø, chindah? ¿Ñimun isa wamincha nilindøgucha, trembe ka awentamdiig kømø, chindah? ⁸ Treeg inchibelø kui urasbe sølwan marmø ñimguen kalø marøb, isa wamincha nilamba inchibelø køn, kan trutøgucha nunelandøwei.

⁹ ¿Tius nò ashib karub waigwan tru sòlgandò tabigwan marmeelòbe tru ketig utamigwan utòmònrabelò kui ashmeelò kò chindah? Ñimguen ñimòdwei kegòrrab pònrròmòtay: mòguelò lata, ishumburmera lata tròmòbòig maròbelòba, chiwangòben kan tius kui lataig inchibelòba, itòlulòpteelòba, mòkkòlig kòbendò ishug lataig inchibelòba, mòguelòbe mòguelòasiyaitò, ishumburmerabe ishumburasiyaitò tròmòbòig maròbelòba, ¹⁰ nileelòba, larrò pareelòba, mutsiirapteelòba, isa waminchib wam kusrupteelòba, purò may isa nìla wesrapteelòba, tru Tius nò ashib karub waigwan truilòbe ketig utòmònrab kui. ¹¹ Ñimgucha mòilòbe merrappe òyeelòwei inchibelò kòbig kòn. Inchendò mòimbe yandò chishtò pillmailò, ñimbe Tiusweyasiitò taròmariilò, chi kaig kòmeelò lataig tabig kòrròmariilò kòn, Señor Jesucristo munchiyuba, namui Tiuswei Espiritugurrimba.

Asrbe tròmòbòig maramigweyasig kòmòtò kòn

¹² “Chiwandògucha nan meriimíig, na ka maramdiig kòbendò”, kerrigubabe chi purugunrrabgailò kòn. “Chiwandògucha nan meriimíig, na ka maramdiig kòbendò”, na treeg maròb megamig kònrrai na òyeeg maramelòyu nì mòyutògucha truig srua yaig pasrònrrabgucha kòmur. ¹³ “Mamibe patsauweyasig kòben, patsòbe mamigweyasig kòn”. Inchendò Tiusbe mònundògucha i pabalòwanba chigaanrrai pinishinrrab kòn. Asrbe ishumburmeraba, mòguelòba tròmòbòig maròb tògagòmigweyasig kòmòn. Treeg kòmòtò, asrbe Señorwein kòben, Señorbe asrweyasig kòn. ¹⁴ Pòs Tiusbe Señorwanma katòle òsig kònrrai kusraig kòppe, namungucha katò treetòwei òsig kòmig kònrrai nui maramburab mariitòga kusarrrun.

¹⁵ ¿Ñimgan ashmeelò kòtirru, ñimui asrmerabe Cristoi asrutòwei pònrrabelò kui? ¿Inchen nabe Cristoi asru pònrrabelan wesrawa, kan kaig ishug nui asrwan anwei yanòbigweinug kandò misrrai mara, truyu pònsnòrraitamaguh? ¡Managuen treebe kòmònrnun! ¹⁶ ¿Kabe ashmeelò kòtirru, tru treeg kaig ishùuba kandò misra kaig mariibe, yandò kan asrtò lataig kòrròmisirig kui? Kaguende trenchibig pòrig pasran: “Tru pailòbe kan asrtò kònrnun” cha. ¹⁷ Inchen mòikkòben Señorba kandò misriibe, nòba kan espiritù kòn.

¹⁸ Ishumburba, mòguelòba tròmòbòig maramigugurrimbe wegòrray. Mòguelò katògan chinètò kalò mariilòbe nòmui asrutòwein kòmòtò, nòòrò kòn. Inchen ishùuba, mòòba asrtòga tròmòbòig mariibe, nui asrwandòwei tròmòbòig maran. ¹⁹ ¿Kabe ashmeelò kòtirru, ñimui asrbe Espiritu Santo nò kebya pasraig tab ya kui, ñimuinug pasraig tru ñim Tiuswan uti Espiritu? Ñimbe ñimòdwei ñimuyasig kòmòn. ²⁰ Kaguende Jesucristo nuwei peniilò kòn. Inchawei ñimbe ñimui asrtòga Tiuswan maya nuguen tabig indig kònrrai maray.

7

Kasharawarbe maig kòmigwan waminchibig

¹ Trube, mòimbe ñim nan kilga pòra paya òrig kòbigwan trencha lòtònrab inchar: Pòs tab kòn cha, kan mòg kasharamò, nòtiig kòmig. ² Inchendò ishumburmeraba, mòguelòba purò tròmòbòig maròbelò kuikkurri, mòguelòbe mòitògucha nui srain tògagig kòmig kòben, ishumburmerabe mòitògucha nui keg tògagig kòmig kòn. ³ Pòs keebe srawei asrwan tab kònrrai maramig kòben, sraimbe nui keweì asrwan tab kònrrai maramig kòn. ⁴ Kaguende sraimbe, nui asr kuimba nuimburaptò tògagòmig kòmòtò, keg nò asamig kòben, katò kekkurringucha nui asr kuimba nuimburaptò tòga kòmòtò, srai nò asamig kòn. ⁵ Inchawei tru ñim Tiusba wamindamigutò kebamrrab, kan maya yanagatig ñim pailò lata tru treegwan marmònrab wamincha kòmòwabe, kanikkurri kanikkurri asrwan tranmònrab inchi-mumig kòn. Tiusba wamindamigwan chab wamincha, trugurrimbe ñimui asrwrane katò treetòwei tranamig kòn, tru treegwan marmuikkurrindò Satanás ñimui kegòrròsrkònrab chigòben mara ashmònrriai.

⁶ Nabe iigwane ka òyamay maramdiig kòn chatò eshkar. Ke treeg maramig kòn cha, karua pasrmòtò. ⁷ Pòs maya mòguelòba na lataitòwei nòmdeelò kuimbemab isur. Inchendò mòitògucha tru nòm trendò treeg kòmigwan keta tranig uta tògar kòn Tiusweinukkurri arrubigwan, mòibe òyamayig kòbene, katò mòibe peemayikke.

⁸ Nòmdeelanba, piudameranbabe trendamònrnun: Na lataitòwei natò kòrròmisirimbe tab kòbsruinrrun cha. ⁹ Inchendò kaig marmò uñibig uñichab kaimabiibe, kaig maròg kòbiitò ke chinsraatò inchib uñibgunrriibe kasharaikken sòl kònrnun cha.

Kasharawarbe petiyamumig

¹⁰ Inchen kasharawarmerane iigwan karua pasrar; na karua pasrig kòmòtò, Señor nò karua pasrig kòn: Sraimbe kewane kuchimumig kòn cha. ¹¹ Inchen srai kuchippe, trube, nòtò tsumig kòn. Trengòmuppe, nui keeba katòle tammay kòrròmisra lindamig kòn. Inchen keebe nui srawane taròmiseròb kutsamig kòmòn.

¹² Inchen katòganelane Señor trendaig kòmòtò, naimburab na trendamònrnun: Mòikkòben kan nuneg, nui sraimbe Tiuswan kòremíig pera kua, nò ka lincha meganrrab megabene,

keebe tarømisrøb kutsamig kømøn cha. ¹³ Inchen kan srai, keebe Tiuswan køremíig tøgagua, nõ ka lincha uñchab inchene, sraimbe tarømisrøb kutsamig kømøn cha. ¹⁴ Kaguende tru keg Tiuswan køremíibe nui sraingurri Tius kaasiimíig køben, katø Tiuswan køremø sraimbe, nui kekkurri Tius kaasiimíig køn. Pøs treeg kømumibe ñimui ureemerabe kaiba lindig købsruben, mømibe yandø Tius tabig kui asiilø køn. ¹⁵ Inchendø møikkøben tru pailøyu Tiuswan køremíig tarømisra ibene, ka ibasamig køn. Pøs øyegube, kan srai lata, kan keg lata Tiuswan kørebeløbe imønrrai inchib ke treegutø melønrraingucha pønrrailø kømøn. Kaguende Tiusbe ñimun wamappe, chi isumø pishindø tab waramig kønrrai wamig køn. ¹⁶ Pøs, ¿ñi sraimbe ashtirru, ñi ñui kewan inchipa kaigyugurri wesram kønrrab kui? Kabe ¿Ñi kekkucha ashtirru, ñi ñui srawan kaigyugurri wesram kønrrab kui?

Tiuswan ashíbig maig kømigwan waminchibig

¹⁷ Inchendø ñim møigwandøgucha ñimun Señor maig uñchai marig køben, treegutø unamig køn, tru ñi Tiuswan nebua ashíib uras maig købig kuibe, trumaytø ka unamig køn. Chu iglesiamerayuelandøgucha iigwan øyamay marøb kønrrai nabe treeg karua pasrar. ¹⁸ ¿Tru ñui isubigwan Cristoinug pasra tøgagønrrai wamab uras yandø circuncidaweikken købig køtirru? Trube, circuncidaweig kømønmb ashchai inchimøta. ¿Ñim møikkøben ñui isubigwan Cristoinug pasra tøgagønrrai wamab uras asru circuncidamíig køben wamig køtirru? Trube, treeg marmíig købig kuabe, circuncidanrrab inchimøta. ¹⁹ Kaguende circuncidaweig kui chi kønrrab kømøwei, circuncidamíig kui chi kønrrab kømøwein køn. Tius maig maramigwan martrai pønrrailan møra marig, trube tabig køn. ²⁰ Tius ñimun wamab uras møitøgucha ñim mailø køben, treeg wamiiløbe, trumaytø ka kørømisramig køn. ²¹ ¿Tru ñun wamab uras karuindiig megabig køtirru? Trube, trunune chi isumøta. Inchendø ka karuindø megabig kømønrrab indamdiig købene, trube, treegwan mar. ²² Inchen karuindiig megaben Señor waminabiibe, Señorweimburappe yandø webya pasran. Inchen katø treetøwei ka karuptø srua kuig megabig kømøtø, nuimburab uñen waminabiibe, Cristo karuindiig meganrrabig køn. ²³ Kaguende ñimbe Tius nuwei peniilø kuig køppe, møguelø karuindiig melabelø kømøtø kuy. ²⁴ Inchawei, nai nunelø, ñim møitøgucha ñim maigu pønrrøben wamiiløbe, Tiusba treegutø ka kørømisray.

Nømdeelan wamindig

²⁵ Inchen tru kasharameelø nømdeelaiburappe, Señor nõ karua pasriibe chigagur. Inchendø Señor nan lastima asigwan nebua tøgagúikkurri, na maig taigwan ñim treeg kuitamab isumdiig kuinawa, naimbura ñimun øyamay maramdiig køn chinrrab inchar. ²⁶ Pøs mõi ya øyeeeg chinetø isumdiig købene, maig pasrabiibe trumaytø kørømisramig søl lataig kui ashar. ²⁷ Inchen ñi srain tøgag kuabe, trube, tarømisrøb inchimøta. Kabe chi sraingag, ñitiig kuabe, trube, srai tøgagønrrab lamøta. ²⁸ Inchendø ñi kasharaikkucha, chi kaig marig kømøwein køben, katø kan srusrø kasharaikkucha, chi kaig marig kømøwein køn. Inchen køben tru kasharabeløbe chinetø nebuig pønrramig arruben, isui melamig kønrrab køn. Pøs nane ñim treeg nebuig melai ashmuinrrabna køtan.

²⁹ Inchendø nabe, nai nunelan, ñimun trenchinrrab inchar: Srabe kwalømmerra pumibe purø landøraim pasran cha. I landøzhig pasrabigwan Tiusweimburabigwan martrab, sralø tøgare sralø tøgare kømøwa lataig pønrray. ³⁰ Inchen truba isui kishib melabeløbe isuig kishib pønrrømøwa lataig pønrrøben, truba kasrag pønrrabeløbe chi kasrag pønrrømøwa lataig pønrrøben, chigøben penabeløbe chigucha penømøwa lataig pønrrøben, ³¹ katø yu pirau chine købigu tab kui mørøb amøñibeløbe ke truitø srua yailøgucha amøñimumig køn. Kaguende yu pirau øyeeeg pasrabiibe ka pureb arrubiitø køn.

³² Nane ñim chigucha chi isumikkaig treeg amønaimbebab køtan. Kaguende kan kasharamíig nøtiibe Señorweimburabigwan katøguchinguen isun, Señor tab kui wanrrai maramigwan. ³³ Trune kasharaweibe yu pirau chigøben købigwan mas isun, nui srawan mandø tab kui wanrrai maramigwan. ³⁴ Incha nõ chi martrab isuibe pabalø, pabalø isuim pasran. Inchen kan ishug kasharamíig, nøtiig, kabe kan srusrø nøtiibe Señorweimburab marøb megamigwan mas isun, nui asru lata, nui espíritu lata Señorweyasiitø kønrrab isua. Trune kasharawa ishuube yu pirau chi købigwan mas isun, nui kewan mandø tab kui wanrrai maramigwan.

³⁵ Iigwan na kerrigu ñimun trenchippe, ñimundøwei tab kønrrai trenchar. Kabe ñimun ke truyutø iløsrka melønrraingucha inchimøtø, masken mumay amønaimigwan treeg marøb amøña, Señorweimburabigwan tab chi iløsrkaimíig marøb melamig kønrrai inchar.

³⁶ Inchen mu møøba kimø srusran kan møg kasharanrrab misraig, nõ tab marmurab kørig isub, katø tru srusrøgucha yandø køligwein køben, treekkurri møøbe yandø kasharam kui ashabe, trube, maig maramdiig køben treeg maramig køn. Treebe chi kaig marøb pasraig kømøtø køn. Ka kasharay. ³⁷ Inchen kan møg nui manrrau nõ maig isuigwane treeg martrab kandø isua pasrabig, katø nui asru maig marøg købig arruben, truing

mumaygucha srúa irramamø, tru nõ maig isua tøgagúigwan isua møra tøgá pasrøwa, tru srusrøba kasharamønrrab nõ treeg isua pasrabiibe, kasharamuig söl køn. ³⁸ Inchawei tru kasharanrrab misri srusrøba kasharaig söldøwein køben, katø kasharamuibe mas tabguen køn.

Piudameraimburab waminchibig

³⁹ Keg øsig uñene, sraimbe nõøø kønrrab kømø, kandø køn. Inchen keg kwabeneguende, yandø nuin kuin køben, mubagøben ka kasharamig køn, Tiuswan ashibiibabe. ⁴⁰ Pøs na isuibe øyeeg køn: katøle kasharamø, nõøø kørrømisrikken, mayanguen tab kønrrab kui. Nagucha Tiuswei Espiritun tøgagurmab isua, trenchib pasrar.

8

Cierton tius kømeelan trani yaumeran mandø indamigwan waminchibig

¹ Animalmera kweecha tru yauwan taska mari tiusmeran trana pønrsraigweimburappe nambe mayeeløba nebua ashibelø ker. Pøs tru nebua ashib kusreibe ka nõrreelø misrøb pønrrønrrai maren, trune tru undag købig Tiusweinukkurri arrubiibe Tiusweimburabigu nõrrøram purugubig køn. ² Møikkøben maitøguen nebua ashibig kurnmab isubiibe, tru maig kuigwan tab nebua asamigwane katøgucha tab ashmø srø køn. ³ Trune mõikkøben Tiuswan undaguigwane Tiusbe nune mu kui nebua asan. ⁴ Trube, tru taska mari tiusmeran pønrsraig yaumeran maigweimburappe ¿mandø chinrrab? Pøs tru taska mari tiusmerabe yu pirauibe chigucha kømeelø kui nambe ashibelø ker, katø Tiusbe nõøø kandø kui. ⁵ Pøs srømbalasrø lata, pirau lata tiusmera cha wamiilø mõiløgøben købwei indan ('tiusmera køn' cha, wamiiløba, katø chiwandøgucha nõm karub purrabelø cha wamiiløba truba nõrrø køb lataitøwei). ⁶ Treeg kuingucha, namuimbe Tiusbe kandø nõøø køn, tru Møskai. Tru chigurrimbunø arrubiibe nuinukurrindø arruben, katø nambe nuyasig øsig amøner. Katø Señor Jesucristo kandø køben, chitøgucha købiibe nõgurruiwei pønrrøben, namgucha nõgurruiwei øsig amøñibelø ker.

⁷ Inchendø mayeeløbabe iigwane chigúi nebua ashmeelø køn. Møiløbe katøgucha tru taska mari tiusmeran tøgagøm kusreelø købig kua, tru mamimeran mappe, tru tiusmeran trani mamig kønmab isua mabelø køn. Incha tru nõmui isub kebachib pasrabigu kullaguølø kuikkurri, yandø kaig mararmab isub kørrømisrøbelø køn. ⁸ Pøs mamibe Tiusweinug nam katøguchi kemalla pønrramig kønrrai marmøwei, katø nam tru mamuikkurri mas kailø misrtrab kømøwei, kabe nam truigwan maikkurri mas tabelø kønrrab kømøwein køn.

⁹ Inchendø ñim tru chi kalø kønrraitamab isumikkaig marøb tøgagúigwane kullaateeløbe truyu srurrengwanrrain kømøtø ashiptø maray. ¹⁰ Kaguen mõikkøben nui isub kebachib pasrabigu kullaatiig tøgáig, ñi tru maig kuigwan yandø tab nebua ashib kusrebig, tru taska mari tiusmerai tab yausrø ñim mab wai ashabe, ¿nøgucha tru taska mari tiusmeran trani mamimeran ka manrrurmab isumønrrab køh? ¹¹ Inchawei tru maig kuigwan ñi nebua asha kusrewa tøgagúig, truikkurrindø kan nuneg kullaatiibe yandø kebeña, pinab pinønrrun, Cristo nuyasig yamba purøgwaig købigwan. ¹² Inchawei øyamay tru nunelan kaig marøb, nõmui isub kebachib pasrabigu kullaguigwan kørrincha kørrømarøb pønrrappe, ñimbe Criston kaig marøb pønrran. ¹³ Inchawei mamibe nai nunewan kebenøsrkamitø kønrrab købene, managuen nabe yauwane mamumønrrun, nai nunewan ka srurrengwan-garumønrrappe.

9

Cristo nõashib karua ørig maig marøb pasramig

¹ ¿Maig maramdiig køben treegwan maramig nabe tøgáig pasrømubra chindah? ¿Nabe Cristo nõashib karua ørig kømubra chindah? ¿Kabe nabe Jesús namui Señorwan ashmuig kuig kø chindah? ¿Señorweimburab na marøb pasraigu yell kørrømisrøbeløbe ñimwein kømøtirru? ² Pøs mõilaimbe nabe Cristo nõashib karua ørig lataig utig kømuinaindøgucha, isa kømøtø, ñimuinbeguende nõashib treeg karua ørig kur. Kaguende Señor nan nõashib karua ørig kui asamdiibe ñimwein køn.

³ Nan mõiløgøben 'øyeeg marin køn' chib, payibelane 'øyan køn' chib, kusra løtamønrrun. ⁴ ¿Kabe nam købgan mab, muchib indamig kømuitarru? cha. ⁵ ¿Kabe nam købgan Tiuswan ashibigwan srai mara, pera pønrramig kømuitarru? cha, tru katøganelø Cristo nõashib karua øriiløba, katø tru Señorwei trag nuneløba, katø tru Pedroba, truilø lataitøweingue. ⁶ ¿Kabe naba, Bernabébatøgan namui taska maramigwan elatsamig kømønrrain kuitarru, namui øsig waramig marøb kuigwan?

⁷ ¿Kan suldauma maig kuaasamø nõ suldau pasraptøga, chi palabigwan nui andøgatøwei penabiibe? ¿Kan mu kuaasamø uvas tusrmera elguawa, uvas misren, truigwanguen mamíbe? ¿Kan mu kuaasamø kabramerane ashib tøgagøbendø, pitsøn sunna muchimíbe?

⁸ Kabe na øyee chib pasrappe, ¿møguelø isuimay trendaig tamagueh? ¿Tru maig maramigwan martrai Moisés pørikkucha treetøwein chibig kømuitarru? ⁹ Kaguede tru maig maramigwan martrai Moisés pøriguma øyee chibig pørig pasran: Kan wey tirigun kwattra i tøbunab megabigwane mabashig kømub pusalgutsamig kømøn cha. ¿Kabe Tiusbe weymeran isua trendaig kø chindah? ¹⁰ Øyee chippe, ¿namuimburab trendaig kømønrrab kø chindah? Pøs namuyasigwei pørig kuig køn. Kaguede pirøwan arab megabiibe ma-muitamab isuawei kwallib megaben, katø mugøben tirigun kwattra i tøbunab megabiibe tru misrigwan manrrab isuawei marøb megan. ¹¹ Inchawei nama ñimuinug Tiuswe-imbubabelan ellmarig købene, trube, ¿ñim chigøben tøgagúigwan maitøguen nam utamig menrra indig kønrrab kø chinderah? ¹² Tru kaneløma nømui chi palabigwan ñimun utambuawei utig købene, ¿nambe treetøguen kømø, utamigwein kømuitarru? Inchen køben, nambe tru treet utamigwane managuen treebe marmui køn, Cristoi tabig srø wamwan chigøben iløsrkøbelø pønsmønrab, chigúindøgucha ka puraambub melaig køn. ¹³ ¿Ashmeelø køtirru, Tiuswei yau marøb melabeløma truyugwan maben, katø Tiuswei altaryu marøb pønrrabeløbe truyugwan mabelø kui? ¹⁴ Inchawei Señorbe treetøwei karua pasrig køn, Tiuswei tabig srø wamwan eshka kusrenanøbeløbe trutøga øsig warønrrain cha.

¹⁵ Inchendø øyee maramdeelø kuindøgucha, nabe managuen trunue marmui køn. Katø iigwan na pørbøgucha, nan treet martraimab isua pørmur. Pøs na chi treet marmøwagurri na øyee purø tab kui mørøb møg inchib waminchib pasraigwan nan mugøben kerramøwatø, kwamikken søl kønrrautan. ¹⁶ Pøs Tiuswei tru tabig srø wamwan na eshka kusrenanøb pasraibe nainetø møg inchib waminchib pasramig kømøtø køn. Kaguede nane truigwane martraim pasrig kur. ¿Pøs Tiuswei tabig srø wamwan na eshka waminchimuinairuandøbe, nane maig kuaasamø! ¹⁷ Inchawei maramigwan na naashib martrab isua marabe, truburø utamigwane utamønrrun. Inchen treet kømøtø, ke nan trunun martrai inchendø marinairuandøbe, trube, tru karua pasrigwan ka marmøn chimønrraindø marig kørømisrrun. ¹⁸ ¿Pøs trube, tru na marøb pasraimburø utiibe chi kønrrab kø? Na Tiuswei tabig srø wamwan eshka kusrenanøppe, truburø chi tranrrain kømø, na ka yandø waminchib pasraig, truig køn, tru Tiuswei tabig srø wamwan waminchib uña, na miambuawei miamigwan treet utab pasrømø kagøbasig.

¹⁹ Nabe mu karuig megamiig kuagucha, nabe natøwei mayeelø karuindiig meganrrab pasramisrar, maya nebuingatig Cristoyasig misag nørø nebu tøgagønrrab. ²⁰ Nabe judíosmerai utu uñippe, kan judío lataitøwei uñibig kur, nøm Criston nebua ashchai martrab. Tru maig maramigwan martrai Moisés pørig maig chibig truig ke nø karuig natøweinguen ke treet pasrømuinaindøgucha, tru pørig maig chibig køben treet melabelai utube, trube, tru pøriilan marøb megabig lataig uñibig kur, tru pørig maig chiben treet melabelan Criston nebua ashchai martrab. ²¹ Inchen Moisés pørigwan tøgagømelai utube, treetøwei nagucha chigaig lataitøwei uñibig kur, tru maig maramigwan pørig chigaig melabelan Criston nebua ashchai martrab. (Tius maig maramigwan martrai pørigwan na chi asamig chigaig kønrrab kømøtø, Cristo maig martrai karuigwan trunun nabe marøb megabig kur.) ²² Kullaateeløbabe nagucha kullaatiig lataitøwein pasrabig kur, tru kullaateelan Cristoin kønrrai martrab. Mu misaamerabatøgucha, nøm mailø køben, treet kønrrab inchibig kur, møilandøguen chinchagøben kaigyugurri wesranrrab. ²³ Iigwan na kerrigu øyee marøppe, Tiuswei tabig srø wamgurri øyee marøbig kur, truyugurri purø tabig tøgag arrubigwan nagucha trunun tøgatø utønrrab.

²⁴ ¿Ashmeelø køtirru misaamera nørø tulaamba ashib purrainug møig kanab luldashchab luløbeløma luløppe, søteeløbawe lulendø, tru kanaigwan utabiibe kandø købig kui? Inchawei ñim luløppe, tru kanawa utamigwan Tius tranig utønrrurmarb isua lulay. ²⁵ Inchawei møikkøben treet lulameløyu kebya pasramisrøbiibe, chiyutøgucha nui asr maig marøg køtanmaptø marøb megamøn. Pøs truiløbe kan corona ka petø minchib pinønrrabigwan utønrraptø treet maren, trune nambe corona managuen minchib pinønrrabig kømigwan utønrrab Tiusweiwan marøb meler. ²⁶ Inchawei nabe luløppe, chu pumgúinguen mørmbendø, luløbig lataig luløb megamøwei, katø kan kwayabig nørøtø, nørøtø kurrøb kwayab lataig pasrømøwei inchar. ²⁷ Treet kømøtø, nabe naasitøwei nai asrwane purø murig purayam kusrenrai kusrenanøb ke treetwan kønrrai inchibig kur. Inchippa na katøganelan eshka kusrenanøb pera pasrøwa, natøweinguen kaiman tainab megamønrrappe.

10

Taska mari tiusmeran Tius kui lataig mara tøgagømumig

¹ Nabe, ñim nai nunelan, tru merrabsrø namui kølli misag, judíosmera, mayeeløba wañi umbu melab, katø mayeeløba mar Rojoyu larraambub indigwan pesannamø, isua

kõnrrai inchar. ² Incha nõmbe mayeelõba tru wañimba, marba pinõgasrõb pinõbuliilõ kuikkurri Moisésba kanbalatõ põnrran. ³ Incha katõ treetõwei mayeelõba Tiusweimburab mamigwandõwei mab, ⁴ katõ mayeelõba Tiusweimburab piwandõwei muchib indig kõbig kõn. Kaguende tru nu srug nõmun lincha ibig Tius tranigugurri webarrub piwan nõmbe mutsig kõn. Inchen tru nu sruube Cristo kuig kõn. ⁵ Inchen treeg amrruig kuindõgucha, misagwane kerrigu lutaуwan Tiusbe chi tab kui ashmuig kõbig kõn. Incha nõmui asrmerabe mu misag warab waraimõnug truõrõ kwaig waramig nebuig kõn.

⁶ Øyeeg pureppe, nam trunundõguen asha kusremig kõnrrain kuig kõn, nam ke chinchimmõrõ inçhib chigõben kailan isub põnrramig kõmõnrrai, israelitasmera ke chinchimmõrõ inçhib isub põnrrab lataitõwei. ⁷ Põs nõm mõilõgõben chiwangõben kan tius kui lataig inçhibelõ lataitõwei marmõtay ñimbe. Põs tru uras nõm øyeeg marigwan treeg chibig pørig pasran: “Tru misaamerabe manrrab, mutchab purramisra, trugurrimbe pailamburab pailanrrab kurrig kõn” cha. ⁸ Katõ nambe menda mõguelõba, menda ishumburmeraba namui asrtõga trõmbõig marõbelõ kõmumig kõn, tru mõilõgõben truilõ treeg marõb latawei. Incha treekkurri kan kwalõmyutõ misaamera 23.000 kwaig kõbig kõn. ⁹ Katõ Señorwangucha ke chinchibig kõtamõrtrab kaig inçhimumig kõn, tru mõilõgõben truilõ ke chinchibig kõtashchab inçhibelõ latawei. Põs truilõma ulmera tsatsiilõ kwamig nebuig kõbig kõn. ¹⁰ Nilõ waminchib ñimuinetõ namig, Tiuswan mulla marmõtay, tru mõilõgõben truilõ treeg marõbelõ lataitõwei. Truilanma tru kweechib ángel arrua, nõmune pinisaig kõn.

¹¹ Israelitasmeran øyeeg pureppe, nam trunundõguen asha kusremig kõnrrain kuig kõn. Incha nam kusremig kõnrrai pøriilõ põnrran, nam yandõ tru srabe kwalõmmerra pui warab misaamerayaisig. ¹² Inçhawei mõikkõben Tiusweinug yandõ ke tab pasrarmab isua pasra-biibe, trube, peñchab kõmõ, purõ tab isua pasrau. ¹³ Ñim kebenõsrkõnrrai indinab chigõben puinab põnrraibe, ke mun treeg nebuí asimig kõmõtõ, mundõgucha treeg nebuí asig kõn. Inçhendõ Tiusbe managucha nõ maig tabig kõppe, trendõ treeg kua ¡katõ! ke ñim kaima melõnrraingatikkucha treeg põnrrõbasmõnrrun. Ke chinchibelõ kõtashchab puim põnrrõbene, truguetõ treegugurri wegõrramigwan tõgatõ tranõbig kõn, ñim kõrrõmõ, ka puraambamig kõnrrai.

¹⁴ Inçhawei treeg kõbene, nai undaarailõ, tru taska mari tiusmeraimburabigwane kerriguwan tarõmisray. ¹⁵ Nabe ñimun waminçhipe, yandõ tab chigui mõrõbelan lataig waminchar. Na wamindigwane sõi kõtashchab isub purray. ¹⁶ Tru copa mayanguen tabig, tru nam, ‘mayanguen pay’ tain copabe, ¿tru Cristoi ani namgucha kanguelarrõtõ lata nõba põnrraig truig kõmuitarru? Katõ nam pirriwan pirisha maibe nam kanguelarrõtõ Cristoi asru kanbalatõ põnrraig ¿truig kõmuitarru? ¹⁷ Kaguende pirrima kandõ kuig kõppe, namgucha truba nu kõbendõ, nambe kan asrtõ ker, põs mayeelõba kan pirriwandõ mabelõgurri.

¹⁸ Tru israelitasmeranma ñimguen isua asay: Tru kweecha tranig animalmerai yauwan mabelõ, treeg marõppe, ka yauwandõ mamõtõ, ¿altarweimburabigwangucha tõga marõb põnrrõmuitarru? ¹⁹ Iigwan na øyeeg çhipe, tru taska mari tiuswan trani yaumbe chi kõn çhib, kabe tru taska mari tiusbe chi marõbig kõn çhib pasrõmur. ²⁰ Põs nabe treeg kõmõtõ, Tiuswan ashmõ misaamera judíos kõmeelõ tru animal kweecha traniibe Tiuswan kõmõtõ, kwaimandziimeran tranig kõn cha trenchar. Incha nabe ñimune kwaimandzi-imeraba kanbalatõ marõb põnrrõmõnrrai inchar. ²¹ Ñimbe Señorwei copayuigwan mutsamba, kwaimandziimerai copayuigwan mutsamba inçhimumig kõn. Katõ Señorwei mishatsigúigwan mamba, kwaimandziimerai mishatsigúigwan mamba inçhimumig kõn.

²² ¿Kabe nambe peg tiuswan keesha põnrramisrõb Señorwane ke larrõ namishinrrab inçhab kõ? ¿Kabe nambe nõ lataguen kõmõ, purab martrapteelõ kõbra chindah?

Chiwandõgucha marõppe, Tiuswan tabig wamindig kõnrrai maramig kõn

²³ Põs: “Chiwandõgucha meriimig, ka maramdiig”, kõbendõ, chiwandõgucha lutõgurri maramibe chi tabig kõmõn. Põs: “Chiwandõgucha meriimig, ka maramdiig”, kõbendõ, lutõgurri truilõbe Tiusweimburab nõrrõramigube chi purugunrrabgailõ kõn. ²⁴ Mutõgucha ñuimburabigwandõ tab kõnrrai lamõtõ, katõganelaimburab tab kõnrrai lamig kõn.

²⁵ Yau yanõbyu maig yau yanbashtõ ka pena may, ñimui isub kebachib pasrabikkurri chi paya mõrõb põnrrõmõtõ. ²⁶ Kaguende: “Pirõba, truyu chi põnrrabelõbañau kerriguba Señorweindõ kõn.”

²⁷ Inchen mõikkõben Tiuswan kõremig nui yamay manrrab ñimui amrrunrrigay çhiben, ñim ambabe, ñimun chi manrrai põnsrõbendõ, mamig kõn, ñimui isub kebachib pasrabikkurri chi payib purrõmõtõ. ²⁸ Inchen ñimun mõikkõben: “I yaumbe tru taska mari tiusmerai kweetsi yaun kõn” cha, trenchibene, trube, mamumig kõn, tru treeg yaun kõn cha eshkabigwan mindisha kõrrõmarmõnrrappa, katõ trugurri isub kebachib pasrabigu kalõ kõn çhibig tõgagõmõnrraimba. ²⁹ Inçhendõ nabe tru isub kebachib pasrabig ñuinug pasrabigwan waminchib pasrõmõtõ, nabe tru katõganuinuguigwan waminchib pasrar. Na chi

ilòsrkaimígg pasraigwan katògan mòweinug isub kebachib pasrabig nan kalò maròptiig kui mara, chiburò treeg marinab pasramibe chigagòn. ³⁰ Mamigwan na Tiuswan 'mayanguen ungwa, ungwa' cha maben, trube, ¿name chindimbarre 'kalò maròptiig kòn' tah, tru na ungwa taig mamigwan maikkurri? ³¹ Inchawei mabyu lata, muchibyu lata, kabe chi peg maròbyu lata, chi marigutògucha Tiuswan maya nuguen tab indig kònrrai maramig kòn ñimbe. ³² Pòs mu misaamerandògucha, judiosmeran lata, griegosmeran lata, Tiuswei iglesian lata ka srurrengwanrrai marmòtay, ³³ na mundògucha chiyutògucha lata tab kònrrai inchib megab lataitòweingue. Nabe naimburaptò tab kònrrai lamòtò, misaamera truba nòrròwan tab kònrrai inchibig kur, nòm kaigyugurri wesrailò kònrrai.

11

¹ Na maig maròbig kòben, ñimbe trunun asha maròb melònrrigay, Cristo maig maròbig kòben, na trunun asha maròb megab lataitòweingue.

Tiuswei yau maig kòmigwan waminchibig

² Nabe 'ñimune tabig marin kòn' chib mayanguen tabig waminchar, kaguende ñimbe chiyutògucha nane isua melab, na ñimun maig waminchib kusrenniilane ñimbe elachimò, tòga pònrraimba. ³ Inchendò nabe iigwan nebua asha kònrrai inchar, Cristobe maya mòguelaim pala nò ashib pasrabig, nò tur kòben, katò mòòbe ishuwan nò ashibig, nò tur kòben, Tiusbe Criston nò ashib pasrabig, nò tur kui. ⁴ Mu mòtògucha turwan nebetsa Tiusba waminchib, kabe Tius maig karuigwan eshka waminchib, treeg pasra-biibe, Cristo, tru turwane chigucha kòmígg kuigg lataig maròb pasran. ⁵ Inchen mu ishuutògucha chi nebetsòmò, turtiig Tiusba waminchib, kabe Tius maig karuigwan eshka waminchib, treeg pasra-biibe, mòòmisag, tru turwane chigucha kòmígg kuigg lataig maròb pasran. Kaguende pusrugwan mulla, parig lataitòwein kòn. ⁶ Inchen ishug nebetsòmibe, trube, pusrugwan mulla, paramig kòn. Inchen ishuwan pusrugwan mulla, pariibe kòrig kònrraptiig kòbene, trube, turwan nebetsaig kòmígg kòn. ⁷ Inchen mòòbe turwan kasròb nebetsamig kòmòn. Kaguende mòòbe Tius nò maig kòben treetòwein kòb, katò Tiuswei tru purò nuigg tòrguegurnabigwan kenamaròbig, treeg kòn. ⁸ Kaguende mòòbe ishuumisag-weinukkurri arrubig kòmòtò, ishukken mòweinukkurri arrubig kòn. ⁹ Inchagucha tru sròsrò Tius mòwan maròppe, ishuumisagweyasig marmòtò, ishuwanguen mòòmisagweyasig marig kòn. ¹⁰ Inchawei treekkurri ishuube mòg maig chiben treeg megabig kui ashchai, ángelesmeragurri nui turwane nebetsaig kòmígg kòn.

¹¹ Inchendò Señorweinuube mòòmisag ka nuimburaftò kònrrab kòmòwei, ishuumisag ka nuimburaftò kònrrab kòmòwein kòn. ¹² Inchawei ishuuma mòweinukkurri arrub lataitòwei, mòkkucha ishuumisagweinukkurri kal-labig kòn. Inchendò Kerriguba arrupe, Tiusweinukkurri arrubig kòn. ¹³ Inchawei ñimòwei maig kòtashchab isuy: ¿Ishug misaabe turwan chi nebetsòmígg Tiusba waminchib pasramig sòl kòbsru chinderah? ¹⁴ ¿Inchen kan mòwane pusrugwan yabig wanòsrkòb tógagòmibe tròmbòtiig kòrikken kònrraptiig kòbig kui, tru trendò treeg kònrrai chine mara pònsrailòtòweinguen kusrennòbig kòmuitarru? ¹⁵ Trune ishuwane pusrugwan yabig wanòsrkamibe nuimbe truba tabig kòn, kaguende ishuwane turyu nebetsig lataitòwei pusrugwan tranig kua. ¹⁶ Inchen mòikkòben 'òyeelan treeg kòmòn' chib, chineta chib waminchig kui indindògucha, nambe òyeelanwei maren, katò Tiuswei iglesiameta chigucha treetòwei maròbelò kòn.

Señorwei mamigwan mabyu maramgailan maròb

¹⁷ Na òyamay maramig kòn chib yu wamindamigube, 'jkan waachaalleelò! yangucha tabig maròb melain kòn' chinrrab inchimur. Ñim tulundzunappe, ka tròmbòbig martrab tulundzunabelò kuin kòn, chi tabig martrab kòmòtò. ¹⁸ Na pòlasra wamindamibe òyeemerrig kòrre, ñim kan iglesiasun tulundzunòbendò, ka nòòrò nòòrò misra warònrraptòrre tulundzunabelò kuigwan, pòs òyube nabe treegwein kòbwei inditamur. ¹⁹ Pòs òyeeg nòmuiin kui nòòrò misròb ñim treeg inchib waramig palabwei indan, ñimui utu mòilò sòlwan isua maròbelò kuitashchab truyu asamig kònrrai. ²⁰ Pòs ñim kanbalatò linchib tulundzunappe, Señorwei mamigwan manrrab tulundzunòmòtò, ²¹ mòitògucha ñimui mamigwanmerrig manrrab tulundzunabelò kòn, katòganelan munugumòtò, kane parògwaig wannebe, kane mutsiguikken wanrrab. ²² ¿Kabe ñimbe yamera chigargòtiru mab, muchib purramig? ¿Kabe Tiuswei iglesiane kaashib, chigar purrabelane kòrig puròrtrab inchigueh? ¿Nabe ñimune mandò chinrrab kòh? ¿Kabe, jwaachaalleelò, yangucha tabig marin kòn! chinrrab kò chindah? ¿Òyeeg marigwane kan waachaalleelò truba tabig marin kòn! chinrrab pasròmur.

Señorwei pirriwanba, copayu mutsigwanba mandò maramigwan Pablo tab eshka
(Mt 26.26-29; Mc 14.22-25; Lc 22.14-20)

²³ Kaguende tru na ñimun katøle kusrenanigwane nabe Señorwan utig kuig kòn: Señor Jesúswan tru ashig kòmui inchibelan tranrrab yem, nõbe pirriwan muta, ²⁴ yandø 'mayanguen pay' cha, pirishabe, trendaig kòn: "Iibe nai asr kòn cha, tru ñimuyasig kwanrrai tranig. Iigwan øyeeg marøppe, nan isub kònrrab martrigay" cha. ²⁵ Incha tru mamigwan chab mabe, katø copangucha mutabe, trendaig kòn: "I copabe tru nai anindøga Tius tru srø acuerdo mara pasrig, truig kòn cha. Iigwan mutsimørig, chu uraskucha nan isub kònrrab martrigay" cha. ²⁶ Inchawei chu uraskucha i pirriwan mab, i copayuigwan muchib indimørig, Señorbe namuimburo kwaig købig kòn cha ñimbe eshkaab pønrran nõ arrumnegatig.

Señorwei mamigwan sølwan maramig

²⁷ Inchawei mõikkøben maig købash inchendø, Señorwei pirriwanba, copayuigwanba mab, muchib inchibiibe, Señorwei asrwanba, aniwanba nuinug trømbøig marøb pasran. ²⁸ Inchawei mõitøgucha ñimashib maig pønrrabraitashchab isummerrig isuy. Trugurrimbe pirriwan mab, copayuigwan muchib indamig kòn. ²⁹ Kaguende mõikkøben Señorwei asrwanbe ni kan maig kerahmabguen isua ashmøtø, tru mab, muchib indiibe nuyasiitøwei lab pasran trømbøig nebui pasramig kònrrai. ³⁰ Inchawei øyeekkurri ñimui utube kwanreelø, kullaarailø truba nõrrø køben, mõiløbe kwaig, mu kaagøn. ³¹ Inchendø nam namashib mõitøgucha nam mandø pønrramigwan treeg pønrrabraitashchab tab isubene, trube, Tius namun maig maramigwan asha mara, kørørrø mariilø kòmubsruinrrun. ³² Inchendø Señor namun maig maramigwan asha mariilø pønrrappe, nam kalø marigwan nõ namun ølmartrab mariilø pønrrer, pirau nun ashmeeløba tøgatø namun kaigyu pønrrailø kømønrrab.

³³ Inchawei, nai nunelø, ñim tru mamigwan manrrab tulundzunabe, kangurriin kangurri muniiramig kòn. ³⁴ Ñimun mõigwan køben parøgwabene, trube, ñimui yausrø mamig kòn, tru ñim tulundzuna waraibe Tius ñimun mõra pønrrønrrai marinab waramig kømønrraimbe. Inchen nõrø katøgan maramelane, na trusrø pua, maig kònrrabigwan tamara pønrramønrrun.

12

Espíritu Santo mõigwandøgucha Tiusweyasig peg peg marøbelø kònrrai pirisha ketig

¹ Nai nunelø, Tiusweimburabeløyu iglesiayasig marøbelø kònrrai Espiritu Santo keta tranigweimburappe, chigüinguen mõrmeelø kørørrø misrønrrai inchar.

² Ñimbe isua kuinrrun, ñim judíos kømeeelø Tiuswan ashmeelø køb urasbe, mumay køben srua amrramabelø købig kuigwan tru chi wamgailø taska mari tiusmeraimay. ³ Inchawei nabe ñimun eshkanrrab inchar, Tiuswei Espiritu trendingaruben waminchibiibe, mugucha øyeeg chinrraamøn cha: "Jesúswane kaig neubash" chib. Katø Espiritu Santo trendingarubene, mugucha øyeeg chinrraamøn cha: "Jesúsbe tru Señor kòn" cha.

⁴ Pøs Tiusweimburabigu marøbig kònrrai keta traniiiløbe peg, peg købendø, tru traniiiløbe Espiritu Santoinukkurrindøwei arrubig kòn. ⁵ Katø chi purugub marameløgucha, peemay, peemay maramig kuindøgucha, Señorbe kandø kòn. ⁶ Katø chi marameløgucha peemay, peemay maramig købendø, tru marameløyu chiwandøgucha trumørig mayeelainug marøb pasrabiibe, tru Tiustøwein kòn.

⁷ Inchendø Espiritu Santo nõ mõigweinuutøgucha øyamay marøb kena pasrabig kòn, mayeelan kelarrappa tab kònrrai. ⁸ Kaguende mõigwane Espiritu Santo nõgurri nui wamindiiløyu maig kømigwan purø may isua waminchibig kònrrain tranøppe, katøganune maig kuigwan tab chigüi mõra waminchibig kònrrai tranan tru Espiritu Santotøwei. ⁹ Inchen tru Espiritu Santotøwei katøganune nui isubigwan Jesucristoinug tøgagømburab tøgagønrrai tranen, katøganune kwanreelan tamarøbig kømigwan tru Espiritu Santotøwei tranan. ¹⁰ Katøganune Tius maramburab mariilan marøbig kømigwan tranen, katøganune Tius maig karuigwan eshkaabig kònrrai trunun tranen, katøganune Tiuswei Espiritu kuin kui, kabe treeg kømuiin kui tørgandø nebua ashibig kømigwan, trunun tranan. Inchen katøganune peg, peg wammera waminchibig kònrrain tranen, katøganune tru peg wammera wamindiilan: "Øyeeg tan" cha eshkaabig kònrrai, treeg tranan. ¹¹ Inchen iilan kerrigu øyeeg marøb pasrabiibe, nõtø kandø, tru Espiritu Santotøwein kòn, mõigwandøgucha nun maig tranamdiig køben, treeg tranøbig.

Asrbe kandø købendø, truyube chine pønrran

¹² Asrma kandø købendø, tru asrube chine tøgagig kòn. Inchen tru asru pønrrabeløbe truba nu købendø, kan asrtø kòn. Inchawei Cristogucha treetøwein kòn. ¹³ Kaguende nambe mayeeløba kan asrtø misrtrab kan Espiritutøgatø pinøbuliilø kuig kòn, judíosmera lata, griegosmera lata, karuindiig melabelø lata, treeg melømeelø lata. Incha namune mayeelanba tru Espiritu Santondøwei utønrrai tranig kòn.

¹⁴ Inchawei asrbe kanbaløttiig kōnrrab kōmōtō, chine, chine pōnsraig tōgaig kōn.
¹⁵ Inchawei srōbma øyeeeg taimbeh: “Tasig kōmūkkurri asruig kōmur” cha. ¿Treekkurri, trube, asruig kōmōtō, nōøriig kōnrrautah? ¹⁶ Inchen kalugucha øyeeeg taimbeh: “Nabe kab kōmūkkurri asruig kōmur” cha. ¿Treekkurri, trube, asruig kōmōtō, nōøriig kōnrrautah? ¹⁷ Inchen asr ørōba kaptō kuimbe ¿trube, mandō incha mōrōøbsruehah? Inchen kerriguba kalutō kuimbe ¿trube, mandō incha irrōmōrōbsruehah? ¹⁸ Pōs Tiusbe asru chiwandōgucha nōm chu pōnrrōnrrabelan truyu, truyu pōnrrōnrrai pōnsraig kōn, nun maig asōnaben, treekke.
¹⁹ Kaguende asru chi pōnrrabig kerriguba kanbaløttiig kuimbe ¿trube, asrbe chu pasrab-sruehah? ²⁰ Inchawei nuin kui, nuin kui truba yambalō kōbendō, asrbe kandō kōn.

²¹ Pōs kappe tasigwane øyeeeg chinrraamōn: “Ñune chi palōmōtan” cha. Katō tur chigucha srōbmeran øyeeeg chinrraamōn: “Ñimune chi palōmōtan” cha. ²² Inchawei treeg kōmōtō, asru murguen kōbatamgailōbe masken palabig kōn. ²³ Inchen asru tre tabig kōmō lataigwane nambe katōguchinguen tab tōgagōbelō ker. Inchen asru tre tabig kōmīg asōnabelane nambe masken tabig kasra tōgaguer. ²⁴ Pōs namui asru chi kōrig isumgaig tōgagūilōbe tre isua asamig palain kōmōn. Inchendō Tiusbe namui asrwan øyamay pōnsrōb tamaran, tru trengatig tab inchib tōgagūimeelane mas tab inchab. ²⁵ Øyamay mōibe nōørō, nōørō kōnrrain kōmōtō, masken asru pōnrrabelōbe mōitōgucha ambugurri, igurri lata isunrrain kōn. ²⁶ Asru pōnrrabelō mōikkōben pusrkwai inchene, truyu pōnrrabelōgucha kerriguba truba pusrkwai mōran. Katō asru mōigwan kōben tab inchene, truyu pōnrrabelōbe mayamba truba tab kui mōrōb kasraaran.

²⁷ Pōs inchawei ñimbe Cristoi asr kua, ñimbe mōitōgucha kan kan nui asruelō kōn. ²⁸ Incha Tiusbe nui iglesiayu Cristo nōashib karua øriilan nōmunmerrig wesrawa, pōnsraig kōn. Incha tru wendaube Tius maig karuigwan eshkabelan wesrawa, pōnsra, yandō tru wendaube kusrenrrabelan wesrawa, pōnsrōbig kōn. Incha trugurrimbe maramburab marilō treeg marōbelan, trugurrimbe kwanrreelan tamarōbelō kōnrrai keta traniiilan, trugurrimbe tru purugubelan, trugurrimbe chi maramigwan asha marōb pōnrrabelan, katō mōilane peg, peg wammera waminchibēlō kōnrrai keta traniiilan, treeg pōnsraig kōn. ²⁹ ¿Kabe mayeelōba Cristo nōashib karua øriilōtō kuitarru? ¿Kabe mayeelōba Tius maig karuigwan eshkabelōtō kuitarru? ¿Kabe mutōgucha kusrennōbelōtō kuitarru? ¿Kabe mayamba maramburab mariilan marōbelōtō kuitarru? ³⁰ ¿Katō mayeelōba kwanrreelan tamarōbelō kōmigwan keta tranig utarō kuitarru? ¿Kabe mayamba peg wammera waminchibēlōtō kuitarru? ¿Kabe mayamba peg peg wammera waminchibēlōtō kuitarru? ³¹ Inchendō ñimbe tru keta traniiilan mas tabigwan nebua ke tōgagōnrrab isua lab melamig kōn.

Chiwandōgucha purab nuibe tru undag kōbig kōn

Inchen nabe treetōguen kōmō, kan may mas tabigwan eshkanrrab inchar, truhan ambamig.

13

¹ Chi wammera kōben mōguelō wamindi wamwan na waminchib, katō ángelesmera wamindi wamwanguen na wamindindōgucha, tru na undag kōbigwan chigaig kuinaisruandōbe, nabe kan tsandzōn wanrrōbig lataig, kabe kan tsandzōn platilloswan ichen ka wanrrōbig lataitō kōmōnrrun. ² Tius maig karuben na trunin eshka pasramig keta tranig tōgaig kōb, katō mu nebua asiimīg sørig pōnrrabigwan kerriguba chigui mōrōb, katō nebua asamburab kerriguwan nebua ashibig kōb, katō nai isubigwan kerriguba Jesucristoinuutō na tōgagōmburab tōgagūikkurri nōrrō tunmeranguen nōørsrō puraamba pōnrrōnrrai marōbig, na treeg tōgagōb indinaindōgucha, undag kōbigwan chigaig kuinaisruandōbe, nabe chigucha kōmur. ³ Na chi tōgagūilan kerrigu ketōb, katō nai asrwanguen parrig kōnrrai na tranōb indindōgucha, undag kōbigwan na tōgagōmuinainsruandōbe, treeg maratōbe nabe chigui wesramō.

⁴ Undag kōbiibe chi puindōgucha tammay ka megabig kōmig, larrō tab inchibig kōmig, treeg kōn. Undag kōbiibe katōgan chigōben tōgagōben pusrkwai ashib pasrōmīg kōmig, katō purō mōg inchib chib waminchimīg kōmig, katō undag kōbiibe purab nuig misrōb pasrōmīg kōmig, treeg kōn. ⁵ Undag kōbiibe larrō tsag inchib maig kōbash inchimīg kōmig, nuimburaaptō tab kōnrrai inchimīg kōmig, ke kuchingurrindō namōmīg kōmig, kalō marig chab purayeeelan katōle isub namig kōrrōmisrōmīg kōmig, treeg kōn. ⁶ Undag kōbiibe chigōben sølgandō tabig mariimeelōyu tab kui mōrōb kasrag pasramig kōmōtō, isa kōmīg, søligube tab kui mōrōb kasrag pasramig, treeg kōn. ⁷ Undag kōbiibe ‘øyangatitō kōtan’ chimō, awentabig kōmig, kerrigu kōrewa pasrabig kōmig, katō chiwandōgucha ka muniirabig kōmig, chine nebub arruben, treegu ka pureb megabig kōmig, treeg kōn.

⁸ Undag kōbiibe managuen patsōnrraamōn. Trune Tius tru maig karuigwan eshkamelōbe patsab, katō peg, peg wammera wamindiilōbe yandō patsab, trugurri tru kusremburab kusrewa nebua asiilōgucha patsab inchun. ⁹ Kaguende nambe newan kōmō, mayandōwei nebua asha kōben, katō Tius maig karuben nam eshkailōgucha newan kōmō, mayandōwei nebua eshkailō kōn. ¹⁰ Inchen Señorwein kwalōm tru newanig tabig pubene, tru newanig kōmig mayandōwein kōbiibe yandō pinōnrrun.

¹¹ Na unō kōb urasbe unō wamindimay waminchib, unō isuimay isub, ōyamay kuitamab unō isuimay isub inchibig kōbig kur. Inchen yandō kōlig misrabe, unō kua maig kōbig kuigwane elachar. ¹² Mōimbe nambe kan espejo tre tōr kenamīgu ashib lataitō aser. Inchendō tru urasbe nambe malaugue asamig kōnrrun. Mōi yambe nabe mayangatiitō nebua ashibig kuinaindōgucha, tru urasbe kerrigu newan nebua asamōnrrun, na maig kuigwan Tius nan asig kōb lataitōwei.

¹³ Inchen mōi yambe pōngatō pōnrrabig pōnrran: isubigwan Jesucristoinuutō pasriiba, katō isua munig melaiba, trugurri tru undag kōbiiba. Inchendō tru i pōngatōyu purab nuibe tru undag kōbig kōn.

14

Peg wammera waminchibig kōnrrai tranilōba, Tius maig karuigwan eshkailōba

¹ Ñimbe undag kōbigwan tōga pōnrrabig pōnrrab, katō Tiusweimburabelōyu marōbelō kōmig nō keta traniilan tōgagōmigwan isub inday. Inchendō Tius tru maig karuigwan eshkabelō kōmigwan, trunun tōgagōnrrab indamig kōn. ² Kaguende peg wam mōrimīg waminchibiibe mōguelan kōmōtō, Tiusba waminchen, mugucha ni chi tainguen mōrmōn, pōs Espiritu Santogurri chinchaguen wetōgōrramgailō waminchen. ³ Trune Tius tru maig karuigwan eshkabiibe misagwan wamindan, Tiusweimburab mas nōrrōrab ambamigweyasiiba, maig melamigwan treeg marōb melōnrrai wamindamigweyasiiba, chigūindōgucha ka puraambub melōnrrai purugumigweyasiiba. ⁴ Mōikkōben kan peg wam mōrimīg waminchibiibe Tiusweimburabigu nōasiitōwei nuraben, trune Tius maig karuigwan eshkabiibe iglesian Tiusweimburabigu nōrrōranrrai wamindan. ⁵ Pōs nane ñim mayeelōba peg wammera waminchibelō kuimbemab isutan. Inchendō Tius maig karuigwan ñim trunun eshkabelō kuimbe kōtan. Kaguende treegwan waminchibiibe mas nuikken kōn. Inchendō peg wam wamindikkucha tabiitōwein kōn, tru peg wam wamindigwan mōikkōben ‘ōyeeg tan’ cha eshkabene, iglesiabe Tiusweimburabigu nōrrōranrrai. ⁶ Pōs inchawei, nai nunelō, na ñimuisrōmay arrua, peg wam wamindimbe ¿ñimune chigūi purugunrrab kō? Tius maig kenamarigwan eshkamōwei, chigūi mōrōb nebua asiilan waminchimōwei, kabe Tius maig karuigwan eshkamōwei, kabe chi kusrenmōwei inchene.

⁷ Kan chimera kōben ōsiguig kōmeelanguen, luswan lata, arpan lata chiwan urramigwan chi wanrri mōrtrain kōnōmubene ¿trube, tru lus urrigwan chi urri mōramgawei, arpa kōnigwan chiwan kōni mōramgawei kōmōnrraitarru? ⁸ Inchawei katō kan trompetanma tru chi maramigwan chigūi mōrtrain truigwan urrōmubene ¿kwayanrrab webamrrab mu kuin tamartrab kō? ⁹ Inchawei ñimgucha treetōwein kōn. Ñim tru peg wamwan wamindigu chi tai mōramdiig treeg waminchimubene, ¿ñim waminchib pōnrraigwane mandiincha chi tai mōriasamō? Ñimui wamindiibe isig ichibigu wamindi lataitō purainrrun. ¹⁰ Pōs yu pirauma chi wammera kōben purō nōrrō kōn. Inchendō chi wamdōgucha tru wamwan waminchibigweimbe chi tai mōramdig kōn. ¹¹ Inchawei nama mōikkōben peg wam wamindigwan ni chi tainguen mōrtrab kaima pasrappe, nabe tru waminchibigweimbe nuim pirauig kōmōtō, peesriig lataig kōmōnrrun. Inchen nōgurringucha naimbe peg pirausriig lataig kōnrrun. ¹² Inchawei ñim tru Tiusweimburabelōyu maramig nō keta tranigwan tōgagōnrrab inchib melabelōbe, truilan masken, masken tōgagōnrrab inday, iglesian Tiusweimburabigu nōrrōram purugumig.

¹³ Inchawei mōikkōben kan peg wam mōrimīg waminchibiibe, trube, tru peg wam wamindigwan ‘ōyan tan’ cha katōburō eshkabig kōnrrab, Tiuswan trunun tranrra cha miamig kōn. ¹⁴ Kaguende na peg wamdōga Tiusba waminchib pasrōbene, nai espiritube Tiusba wamindingucha, nai turyu isubigube chigucha chi kōrrōmismōnrrun. ¹⁵ ¿Trube, treeg kōbene, nabe mandō inchab kōh? Nai espiritutōga na Tiusba waminchippe, nai turyu chigūi mōrōb isuitōgagucha Tiusba wamindamōnrrun. Katō nai espiritutōga cantappe, katō turyu chigūi mōrōb isuitōgagucha Tiuswan cantamōnrrun. ¹⁶ Inchawei ñibe ñui espiritutōgatō ‘Tiuswan mayanguen tabig kōn’ chib, ‘ungwa’ chib pasrōben, mōikkōben Tiusweimburabigwan chi kusremībe ñi trenchib pasraigwan chi tainguen mōrmuig kōppe ‘treegwein kōn’ chib, maana trenchinrrab kō. ¹⁷ Pōs ñibe Tiuswan mayangucha tabig ungua taingucha, treeg mariibe kanune Tiusweimburabigu nuramig chi purugumōn.

¹⁸ Nabe Tiuswan ‘mayanguen ungua, ungua’ char; kaguende nabe peg wammera mas yanguen waminchibig kur, ñim mayeelø lataitøguen kømø. ¹⁹ Inchendø iglesiyube trat-trøgatøtiitøgucha chi taig møramdiig treeg wamindinguen køtan, kaneløgucha chigüi mørøb kusrenrai, peg triimay diez milburab chi taig møramgaig waminchib pasrabgunrriibe.

²⁰ Nai nunelø, ñim maig isumigube ureezheelø latailø kønrrab kømøtø, chigøben kaig maramigwan isua asamigube shushcheelø latailø kømig køn. Inchen maig isumigube yangdø køleeløsun isubelø kømig køn. ²¹ Pøs tru maig maramigwan martrai Moisés pøriguma trenchibig køn:

“Señorbe trendaig køn cha:

‘I misaameran møguelø peg triimay wamindiiløtøga na wamindamba, peg pirausrø misaamera nøm wamindigu na wamindamba inchen, ni treekken nane mørmønrrautan’ ” cha.

²² Inchawei tru peg wammera møriimig wamindiiløbe Tiuswan korebelayasig kømøtø, Tiuswan koremø misaamerain køn, Tius truyu pasrain kui asamig kønrrai. Trune tru Tius maig karuigwan eshkabe Tiuswan koremø misaamerain kømøtø, Tiuswan korebelayasig køn. ²³ Inchawei ñim iglesia mayamba tulundzuna, mayamba peg triimay møriimig waminchib køben, tru peg wammera waminchibig kønrrai Tius keta tranigweimburabigwan kusremeelø kui, kabe Tiuswan koremeelø kui møin kebambatø pønrrabeløbe, çñimune ‘chab lukiaian køn’ chimønrrab køh? ²⁴ Trune ñim mayeeløba Tius maig karuigwan trunun eshkabene, Tiuswan koremig kui, kabe møikkøben Tiusweimburabigwan kusremig kui kebya pasrabiibe, mayeelø wamindiitøga nøbe kaig marøbigwein købrairenrab isunrrai marøb, mayeelø wamindiitøga nune kaig marøbig kuin kui asha kørømarøb inchen. ²⁵ Inchen nui manrrau nuinetø chi isua tøgagüiløbe tørgandø kenamarig kønrrun. Inchen øyeekkurri nøbe pirau srala, Tiuswan køriibala tabig waminchib, trenchinrrun: “¡Isa kømøtø, Tiusbe ñimui utu pasrabwei indan!” cha.

Tiusweyasig marøb tulundzuninug maig maramigwan tabig marøb

²⁶ Trube, treeg købene, nai nunelø, çmandø chinrrab køh? Pøs ñim tulundzunappe, møitøgucha kane cantamig tøga kuin kui, kabe møibe kusrennamig tøga kuin kui, kabe møibe Tius nun kenamarigwan wamindamig tøga kuin kui, møibe peg wam møriimig wamindamig tøga kuin kui, kabe møibe tru peg wam wamindigwan ‘i wamindiibe øyeeg chibig køn’ cha, eshkamig tøga kuin kui, ñimbe treeg purrabelø køn. Trube, truigwan marøppe, chiwandøgucha iglesiane Tiusweimburabigu mas nørørab ambamig kønrrai maramig køn. ²⁷ Inchawei tru peg wamwan waminchippe, pailø kui, kabe pønølgatig, treetø wamindamig køn. Treetøgucha kan kan waminchen, kane ‘i wamindiibe øyeeg chibig køn’ cha eshkamig køn. ²⁸ Inchen tru peg wamwan wamindigwan ‘i wamindiibe øyeeg tan’ cha eshkanrrabig mu kaabene, trube, iglesiyube truigwane esgappa, nuinetø waminchib katø Tiusbatø wamindamig køn.

²⁹ Inchen katø Tius maig karuigwan eshkabeløgucha pailø kui, pønølø kui treetø wamindamig køn. Inchen kaneløbe tru wamindigwan Tiuswein køh, kabe Tiuswein kømø chinderamab isub purramig køn. ³⁰ Inchen møigwan køben truyu wabigwan inchippa, chigøben waminchai Tius eshkangaruben wamincheenchene, trube, tru waminchib pasrabiibe mas waminchimumig køn. ³¹ Kaguende ñimbe mayeeløba Tius tru maig karuigwan eshkappe, kan kan wamindamig køn, mayeeløba kusreb, katø mayeeløba tab melamigwan utab inchai. ³² Inchagucha Tius maig karuigwan eshkabelai espírituerabe nøm maig kønrrain køben, treegwan martrab pønrran. ³³ Kaguende Tiusbe chi maringuen asimig marøb Tius kømøtø, ambugurri, igurri chi isumgaig lata tab kui møramig, treeg Tius køn.

Tru Tiuswei misaamera maya iglesiamera maig marøbelø køben, ³⁴ treetøwei ishumburmerabe iglesiyube niløtø purramig køn. Kaguende truyube ishuumisagwane waminchimønrrai indiiilø køn. Pøs tru maig maramigwan martrai Moisés pørigu chigucha trenchibig køn, nømbe maig chiben treeg melamig køn cha. ³⁵ Nøm chiwan køben nebua kusremig paløbene, nømui kelan nømui yau payamig køn. Kaguende kan ishug iglesiyu waminchab indamibe chi søl kømøn. ³⁶ ¿Tiuswei wambe kabe ñimuinukkurri pølbasa arrig kø chindah? ¿Kabe ke ñimuinuutø puig kø chindah?

³⁷ Pøs møikkøben ‘Tius maig karuigwan eshkabig treeg kurmba’ isub, kabe ‘Tiusweimburabigwan maramig keta tranig tøggaig kurmba’ isub inchabe, trube, tru iig na ñimun pørigwane Señor nø karua pasrøbwei indig kui, treeg isua asamig køn. ³⁸ Inchen øyeeg kui ashatøgucha, nø ashmig misrene, nungucha treetøwei isua ashmuinab pasrønrrun.

³⁹ Inchawei treeg købene, nai nunelø, Tius maig karuigwan eshkamigwan martrab inchib melay. Katø tru peg wammera møriimig wamindamigwangucha merømøtay. ⁴⁰ Inchendø chiwandøgucha marøppe, tabig sølwan marammay maramig køn, ambumay, imay ke chi maringuen asamgaig martrab kømøtø.

15

Cristo kwawa, katøle øsiiraigwan waminchibig

¹ Møimbe, nai nunelø, na Tiuswei tabig srø wamwan eshka kusrenanig købigwan katøle ñimun isunanrrab inchar, ñim trunun uta, truigwan elachimø, truyu mur pønrraigwan.

² Ñimbe tru Tiuswei tabig srø wamgurriwei kaigyugurri wesrailø køn, na ñimun maig eshka kusrenanigwan trunun elachimø, tindøga pønrrøwabe. Treengømuirsuandøbe, tru ñim køreibe chi køremui lataitøwein kuin kønrrun.

³ Nabe ñimun kusrenanøppe, tru nan mas nuig purø tabig kusrenanig utig købigwan ñimun kusrenanig køn, Tiuswei wamwan pørigu maig chibig køben, namui kaig mariiløgurri Cristobe treeg kwawa, ⁴ katø nøbe, Tiuswei wamwan pørigu maig chibig køben, treeg sorig kua, pøn kwalømybe katøle øsiirawa, ⁵ Pedron kenamisrøb, katø trugurrimbe tru nøashib karua øriilø tru doceelan kenamisra, ⁶ trugurrimbe albiji nunelø quinientos menrrawan kenamisrig købigwan. Tru ashibeløbe mayeelø lutau ka øsig amønnan, kan kandøwei yandø kwaig mu kaaben. ⁷ Incha trugurrimbe Santiago kenamisra, trugurri mas wendøbe tru nøashib karua øriilan mayeelanba kenamisrig køn.

⁸ Incha yandø kerrigu sraabe katø nan kenamisrig købig køn, na tru kal-lam kwaløm kømø, kal-lawa lataigwan. ⁹ Pøs nabe Cristo nøashib karua øriilai utube truburab kømfig, purø lamig kur. Trurrigu Cristo nøashib karua ørig køn cha trenchaguen wamig kønrrabgaille, kaguende nabe Tiuswei iglesian larrø kaig marøbig købig kur. ¹⁰ Inchendø na ñi øyah pasrappe, Tius nan ka yandø tab indiitøgatø na treeg pasrainatan. Inchen nui tru ka yandø tab indiibe kagatø purayaig kømøtø køn. Treeg kømøtø, nabe masken tru Cristo karua øriilø mayeelø nøm lataguen kømø, marinabig køn. Inchendø na marig kømøtø, Tiuswei tru ka yandø tab indig naba pasraikkurri marig køn. ¹¹ Pøs na wamindig kui lata, kabe nøm wamindig kui lata, nabe iigwan eshka kusrenanen, ñimbe iigwan treeg køreig købig køn.

Kwabelø katøle øsiiramigwan waminchib

¹² Pøs trube, Cristobe tru kwailai utugurri katøle øsiiraig købigwan eshka kusrenanig købendøbe, trube, ñim møyiløgøben ñimui utu mandøgurriinre øyeeg chib køh, kwabeløbe katøle øsiirawa kurrømønrrun chibrrun kønrrappe? ¹³ Pøs, tru kwabelø katøle øsiirawa kurrømuig købene, trube, Cristogucha katøle øsiirawa, kurrømuig køn. ¹⁴ Trube, Cristo katøle øsiirawa, kurrømuig kuig købene, nam Tiuswei wamwan eshka kusrenaniibe ka yandiig kørrømsiren, katø treetøwei ñimui isubigwan Cristoinug pasra pønrraikkucha tøgagømuingueniitø purayan. ¹⁵ Katøgucha treetø kømø, nabe Tiusweiwan ka isatø waminchib pønrrabelø kuig, treeg webinrrun. Kaguende nambe 'Tiusbe Cristone katøle øsiirangaruig køn' chib pønrraig kuig køn. Inchen kwailø øsiiramønrrab kui cierton webibene, trube, Tiusbe katøle Criston øsiirangaruig, treeg køn. ¹⁶ Pøs kwailø katøle øsiiramuig købene, Cristogucha, trube, øsiiramuig køn. ¹⁷ Inchen Cristo katøle øsiiramuig købene, trube, ñimui isubigwan nuinug tøga pønrraikkucha, tøgagømuingueniig tøgagúig puraiiben, trube, ñimbe katøgucha kaig marøb srø amønnan. ¹⁸ Trube, treeg købene, Criston tru kørewa kwabeløgucha pinab pinamsrø pønrrønrrab amban. ¹⁹ Nam yu øsig amønnaigu ka pirauweyasiitø Criston isub muniirabelø kuisruandøbe, nabe maya misaamerai utu trembe misag kømuingueneelø ker.

²⁰ Inchendø treeg kømøtø køn. Cristobeguende kwabelai utugurri katøle øsiirabwei indig køn, tru kwabelai utugurri ke srøsrøzhiitø ke nømerrig pølbasa øsiirab. ²¹ Pøs kwamima kan møykurrindø arrig købene, katø kwabelø katøle øsiirawa kurramikkuha kan møykurrindø arrig køn. ²² Inchawei Adángurrima mayeeløba kwaben, katø treetøwei Cristogurri øsig kømigwangucha mayeeløba tøgagønrrun. ²³ Inchendø møyitøgucha nøm møyimerrig pølbasa øsiinrrabig køben, treeg kønrrun: Cristo ke srøsrøzhiitø nømerrig pølbasa øsiiraben, trugurrimbe nø katøle arruben nuelø øsiiranrrabelø køn. ²⁴ Trugurrimbe yandø tru sraabe kwaløm punrrabig køn, Cristo tru nørreelø nøm asha karub purrabelan køben, mugucha manchinrraingaig nøm karubelan køben, nørreelø maramburab marøb purrabelan køben, yandø truilan kerriguan chigucha martrabgailø kørrømara, tru Cristo ashib karub waigwan yandø Tius Møskawan nø ashchai purøøren. ²⁵ Kaguende Cristobe nun tru ashig kømui inchibelø tsaleelan nui srøb umbu nø maig chiben treeg pønrrønrrai, Tius nun pønramnegatig, nøbe ashib karub wanrrabig køn. ²⁶ Inchen tru ashig kømui inchib tsalø inchibig srabeig pasrabigwan pinisaig kønrrabiibe, tru kwamig køn. ²⁷ Kaguende Tiuswei wamwan pørigube trenchibig køn: "Chigurrimbunø købigwan kerriguba nui srøb umbu nø maig chiben treeg pønrrønrrai Tius pønraig køn" cha. Pøs: "Chigurrimbunø købigwan", nui srøb umbu pønraig køn chippe, Tiuswangucha truyu tøga pasrig køn cha trenchimuig kui tørgandø asamdiig køn. Kaguende Tius nøwein køn tru chiwandøgucha kerriguba Cristo maig chiben treeg pønrrønrrai marøbiibe. ²⁸ Inchen Tius chiwandøgucha kerriguba Cristo maig chiben treeg

põnrrõnrai, nun chab põnsrõbene, Cristo, tru Nusrkaindõweinguen, tru chigurribunõ kõbigwan nõ maig chiben treeg põnrrõnrai, nun põnsrõbig Tiuswan maig chiben, nõbe treeg pasrõnrrab pasramisrtrun, chiyutõgucha kerriguwan Tius nõ ashib karub pasrõnrrai.

²⁹ Põs trube, ¿tru kwabelayasig piu umbu ulsrailõbe chi martreerah? Tru kwabelõ kerriguwan õsiiramõnrrab kõbene, trube, ¿chinchabrre tru kwabelaimburab isua piu umbu ulsrõbelõ kõh? ³⁰ Inchen ¿nambe chu urastõgucha chindimbarre kwam lab põnrrabrah? ³¹ Nai nunelõ, nabe kwalõmmõrig ke kwamigu puitõ, puitõ ka megar. Iibe isatõ kõmõtõ, namui Señor Cristo Jesúsweinug na purõ nuig mõrõraim pasramibe ñim kõn. ³² Põs mõg kuinawa, ka treekkurrindõ tru Efesosrõma larrõ namig animal lataig inchib misaameraba namig aleguiyab, na treeg marõb megaibe chi marmui lataitõwei webinrrautan. Põs tru kwabelõ katõle õsiiranrrab kõmubene, mugõsrõn chibgunrrig, trube:

“¡Mab, muchib inchab kõh,

põs srõnatõ kwamig kõbashtõ!”

³³ Ñimbe chi isa kõben suamrramamõtay. Mugõsrõn chibgunrrig: “Kaig marõbelõba linchib põnrraibe tabelõ kuigwan ka mindishibig kõn.” ³⁴ Ñimbe katõle tab chugúii mõra sõlgandõ põnrrõnrrab inday, mas kaig marõb põnrrõmõtõ. Kaguende mõilõbe Tiusweimbura-bigwane ni maig kuinguen ashmeelõ kõn. Iigwan na trenchippe, ñimun kwaarõsrõb kõrig purõtrab trenchar.

Katõle õsiiraig asrbe õyeeg kõnrrabig kõn

³⁵ Põs mõibe õyeeg chinrraabe: “¿Kwabelõbe mandõ õsiiranrrerah? cha. ¿Katõle õsiirawa amrruppe, maig asrmera tõgar amrrunrrerah?” cha. ³⁶ Kan ñi kui chugúinguen mõrmíig, kan yellwanma ñi ellguabene, kwamõwabe, õsig kõmigwan tõgagõnrraamõn. ³⁷ Tru ñi ellguappe, tru tusr maig kõnrrabigan ellguamõtõ, trulzhigwandõ ellguan, tirigu kui lata, kabe katõgan chi peg yell kui lata. ³⁸ Põs Tiusbe i yellwanma chi tusr kõnrrai marõppe, nun maig maramdiig kõben, treeg marig kõn, chi yellõgucha trumõrig chi tusr kõnrrabiibe tru tusr kõnrrai. ³⁹ Chi asrmeratõgucha lata treeg asrmeratõ kõmõn, kane misag asr kõben, kane animalmerai asr kõben, kane illimerai asr kõben, kane peskaumerai asr kõn. ⁴⁰ Inchen katõ treetõwei srõmbala põnrrabelan maig kõnrrabelan treeg marilõ kõb, katõ pirauelan maig kõnrrabelan treeg marilõ kõb indan. Inchendõ tru srõmbala põnrrabelai tabzhig tõr pilabiibe katõgan kõben, yu pirau põnrrabelai tabzhig tõr pilabiibe katõgan peemayig kõn. ⁴¹ Inchen nõsigwei tabzhig tõr pilabiibe peemayig kõben, katõ põlwei tabzhig tõr pilabiibe peemayig kõn. Katõ estrellamerai tabzhig tõr pilabiibe peemayig kõben, tru utu mõ estrellamerai tabzhig tõr pilabiibe katõ peemayig kõn.

⁴² Inchawei õyeetõwein kõn tru kwabelõ katõle õsiiramikkucha. Tru asrwan sõriibe trerannrrabig kõben, katõle truig õsiirabiibe yandõ manugen trerannrrabig kõmõtõ kõn. ⁴³ Yandõ chigucha kõmigwan pirau sõra trarrig, katõle truig õsirappe, tõr pilab tabig õsiiranrrun. Chigucha martrabgaig pirau sõra trarrig, katõle truig õsiirawa kurrappe, maramburab marõbig kurrõnrrun. ⁴⁴ Trendõ yu pirau tõga pasrai asrwan sõrig, katõle õsiirawa kurrappe, asr espíritu kurrõnrrun. Asr yu pirauig kõb, katõ asr espíritugucha kõn.

⁴⁵ Katõ Tiuswei wamwan põrigugucha treeg chibig kõn: “Tru srõsrõ mõg Adánbe kan misag õsiguig misrig kõn” cha. Inchen Adán tru Srabe Arrubig, Jesucristobe, espíritu kõn, nõbe õsig kõmigwan tranõbig. ⁴⁶ Inchawei espírituimburabiimerrig arrumõtõ, asr trendõ maig kõnrrabig truemerrig arruben, trugurrimbe yandõ espírituimburabig arrig kõn. ⁴⁷ Tru srõsrõ mõõbe pirõtõga marig yu pirauig kõben, tru wendau mõõbe srõmbalarõ Tiusweisrig kõn. ⁴⁸ Inchawei tru pirõtõga mari mõg maig kõbig kõben, yu pirauelõbe treelõtõwein kõn. Inchen tru srõmbalarõ mõg maig kõben, tru srõmbalarõelõbe truig lataitõwein kõn. ⁴⁹ Yu pirau mõg maig kõben, nam treelõ kõmigwanma tõgagúibe, katõ tru srõmbalarõ mõg maig kõben, nambe truig lataitõwei kõmigwangucha tõgagõmõnrrun. ⁵⁰ Inchawei nabe, nai nunelan, trendamõnrrun: Tius nõ ashib karub waigwane asr yaumbaig animbañiibe chincha tõgagõnrrab kaimanrrun cha. Katõ tru trerawa patsõnrrabiibe tru mana trerab patsõnrrabig kõmigwane chincha nebua tõgagõnrrab kaimanrrun cha.

Tru kwamigwan yandõ srabe kanawa puraambamig

⁵¹ ¡Au! mõimbe kan chigõsrõn mu asiimiig sõrig pasrabigwan na ñimun eshkanrrab inchar: Nambe ke mayeelõbabe kwamig kõmõnrrab kõn cha. Inchendõ nambe mayeelõba yandõ kerriguwan peemayelõ kõnrrai yunõmariilõ kõmig kõnrrun, ⁵² ¡katõ! mõi mõi, kan kab kasrõb lataitõgue, tru trompeta srabe urrig wanrrõben. Kaguende trompeta wanrrõbene, kwabelõbe õsiirangaruilõ kõnrrun katõbe manugen trerannrrabig kõmíikke. Inchen nambe mayeelõba yandõ kerriguwan peemayelõ kõnrrai yunõmariilõ kõmig kõnrrun. ⁵³ Kaguende tru trerannrrab asrbe trerab minchabgaitõga pinõbulig kõnrrain kõben, katõ iig tru patsõnrrabigwane tru patsõnrrabgaitõga pinõbulig kõnrrain kõn. ⁵⁴ Inchen tru trerannrrabigwane yandõ tru manugen trerab minchabgaitõga pinõbulig kõb, katõ iig tru

patsønrrabigwane tru managuen patsønrrabgaitøga pinøbulig kørromisrøb inchene, iig tru øyeeg cha pøra pasriibe yandø treeg neburrun: “Tru kwamigwane yandø kanawa kenaguen kømfig, pinisan” taig.

⁵⁵ “¿Ni, kwangarub pasrabig, ñi kanawa pasraibe mømibe chu pasra? taig.

¿Ni, kwangarub pasrabig, ñi pusrkwananøb pasraibe mømibe chu pasra?”

⁵⁶ Kaguende tru kwamigwei pusrkwangarub pasraibe tru kaig marig, truig køn. Inchen tru kaig marig maramburab marøbiibe tru maig maramigwan martrai Moisés pørig, truig køn. ⁵⁷ Inchendø Tiuswan ‘mayanguen ungwa, ungwa’ chinrrab, namui Señor Jesucristogurri nam kerriguwan kanawa pønrramig kønrrai tranigwan.

⁵⁸ Inchawei treeg købene, nai undaaraig nunelø, kørønrrabgaig mur pønrrab, mumaygucha wemaløsrkønrraingaig pønrrab, chu uratøgucha Señorwei marameløyube katøguchinguen, katøguchinguen marøb melay, kaguende Señorweimburbeløyu ñim nøba marøb melaibe, ka treeg marøb melaitø puraimønrrab kui ashabe.

16

Jerusalénsrø Tiuswei misaameran purugumig an utig

¹ Tru Jerusalénsrø Tiuswei misaamerayasis an purugúig utamigweimburappe, tru Galacia pirausrø iglesiamera na mandø martrai karua pønsraig køben, ñingucha treetøwei martrigay. ² Ñim møitøgucha an maya tulishabe, truyugurri tarømara, esegab amrrigay truaalømmørig, na trusrø puben, ñim ke møin tulishib mendaptindamig kømønrrai. ³ Incha ñim møilan karua øramdeelø kui asha kørromariilan, na trusrø puabe, tru Jerusalénsrømay trana øramig ñim an ketigwan nømun trana ørøppe, kan kilga pøra, tøga trana øramønrrun, tru i karua øriiløbe chi isumga møguelø kui nøm ashchai. ⁴ Inchen naimburab nagucha yamig søl kønrraptiig købene, trube, na iben, nømbe naba mrrunrrun.

Pablo nui lincha amrrabeløba mandø ambamigwan wamindig

⁵ Nabe Macedonia pirauwansrø pureb arrua, yandø ñimuisrø pumønrrun, kaguende nabe Macedoniawansrø pureb yamig kua. ⁶ Inchippa kan maya yanagatig kørromisrisruandøbe, ñimba ka kørromisramønrrun, kabe tru pishim pølmera chab purayamnegatikken, nan chumay yamig nebuben, nai yamigu ñim purugumig kønrrai. ⁷ Kaguende mømibe ñimun ke ka petø asha purainrraptø arrug kømøtan. Pøs Señor nan treeg kønrrain købene, kan maya yanagatig ñimba kørromisrøb attrab isur. ⁸ Inchendø Pentecostés kwaløm pumnegatig nabe yu Efeso kørromisrøb kur. ⁹ Kaguende yube kan yaskab purø nuig nayasis kurin køn, Tiusweiwan wamindig nu larrøbichaptiikke. Inchendø marmønrrai nan sötølulrabelø truba truba køn.

¹⁰ Inchippa Timoteo trusrø pubene, ñimui utu chi kørig kui inchimønrrai inchigay. Kaguende nøgucha Señorwei marameløyu na lataitøwei marøb megabig køn. ¹¹ Inchawei nune møitøgucha palabinøtø inchib kønrrab kømø, masken chi isumønrrai purugua ørtrigay, naimay katø attrai. Kaguende nabe namui nunelanba, nunba munig megar.

¹² Inchen namui nuneg Apolosweimburappe, tru nunelø ñimuisrømay amrrabeløba nungucha na tiusmندا maya lincha irra taingucha, mømibatøbe nøbe chi inrrab inchimøn. Inchendø nun chu uras yamig pubene, inrrab kuinrrun.

Maig amønnamigwan treeg melønrrai wamindiiløba, ‘ka amøñigweh’ tailøba

¹³ Tab ashiptø pønrray. Pesan amøñimøtø, isubigwan Cristoinug tøga pasra pønrraigu mur pønrrab, chishkandø møgueløsun pønrrabelø køb, trurrigu murelø kuy. ¹⁴ Incha chiwandøgucha ñim marøppe, undag købiitøga maramig køn.

¹⁵ Nai nunelø, ñimbe ashibelø køn tru Acaya pirausrø Estéfnaswei yaueløbe ke srøsrøzhiitø nømmerig Tiuswan nebua ashibelø misra, Tiuswei misaameran nømbe purugunrrab pønrramisrigwan. ¹⁶ Inchawei nabe ñimun øyeeg melørrunrrigay chinrrab inchar, tru øyeeg melabelane nøm maig chiben mørøb melønrrigay cha, katø tru mayeelø i maramigwan purugub marøb melabelan treetøweingue.

¹⁷ Nane truba kasrag køtan Estéfnas køben, Fortunato køben, Acaico køben amrruin køben. Kaguende ñim mu kaagua, purugunrrab kaimaigwan nømbe nan purugua, ¹⁸ pøs truiløbe nai isubigu lata, ñimui isubigu lata chi isumikkaig, tab kønrrai marig køn. Øyeeg møgueløbe mayanguen tab indig kønrrabelø køn.

‘Ka amøñigweh’ taiba, ‘ungwa’ taiba

¹⁹ Tru Asia pirausrø iglesiamera ñim corintosreelan ‘ka amøñigweh’ cha øran. Aquilaba, Priscilaba, katø iglesia nømui yau tulundzunabelø, truilø chigucha Señorwei munchiyu ‘mayanguen tab ka amøñigweh’ cha øran. ²⁰ Katø mayeelø nuneløgucha ñimun ‘ka amøñigweh’ cha øran. Ñimbe kangurrin kangurri ‘ka amøñigweh’ chib, Tiuswei undag købiitøga tasig traniyay.

²¹ I 'ka amøñigueh' taigwan na Pablo ñimun naashib nai taska pørar.

²² Møikkøben Señorwan undaguig kømfigwane Tiuswei namig købig nuim pala købash.
¡Namui Señor Jesucristo amø!

²³ Señor Jesúswei tru ka yandø tab indiibe ñimba pasrønrrai inchar. ²⁴ Cristo Jesúsweinug
nai undag købiibe ñim mayeeløba pasrønrrun. Treeg kønrrun.

2 Corintios

'Ka amõñiguh' chib pørig

¹ Tius nan trendø treeg kørnrain kuikkurri, na Pablo Cristo Jesús nõashib karua ørig, namui nuneg Timoteoba misra, Corintiosø iglesianba, katø tru Acaya pirau muba kuimburab Tiuswei misaamera warabelanba i kilgawan pørar. ² Tius namui Møskaweimba, Señor Jesucristoimba tru ka yandø tab indig køben, chi isumgaig tab købig køben ñimba kørnrai inder.

Chine isumdeelø nebuingucha Pablo Tiuswan 'ungwa, ungwa' tailø

³ Tru namui Señor Jesucristoi Møskai, Tiusbe mayanguen tabig wamindig kørnrun, tru lastima ashib pønrrabelø kømigwan tøga Møskai, katø isui meløben chiyutøgucha isui inchimønrrai purugub Tiuswan. ⁴ Truibe nam chine puig meløben, namun tab kui mørtraï purugubig køn, katøganelø chiyugøben treetøwei isui meløben, Tius namun isui inchimønrrai purugúitøgatøwei namgucha purugubelø kømig kørnrai. ⁵ Criston tru chine, chine kaig nebulø namuinug treetøwei itømaytø nebul arrubene, katø treetøwei tru isui inchimønrrai purugúikkucha tru kuindø, tru kuindø Cristoinukkurrindøwei arrubig køn. ⁶ Inchendø namun chine puig melamig arrubiibe, ñim chi isui inchimø tab kui pønrramigweysiiba, kaigyurri wesrailø kømigweysiiba kørn. Inchen namun tru isui inchimø pønrramig kørnrai publiibe, tru ñim chi isui inchimø pønrramig kørnrain kua, tru namun isui melamig nebul lataitøwei ñimun treeg nebul arruben, ñim chigúingucha melabig melamig truiibe treeg atrun. ⁷ Inchawei nam ñimuimburab øyah kørnrunmab isuiibe treeg kørnrab køn. Pøs nam chine kaig nebuinab melaiguma treetøwei ñingucha pønrrabelø kuig køppe, nam chi isumø tab kui pønrraigugucha, ñimbe treetøwei tab kui pønrrørnrrab kui asha pønrrer.

⁸ Namui nunelø, namun Asia pirausrø purø isumdiig nebui melaigwan ñim wammøra kørnrai inder. Yandø mu melangaig trømbøig arruptø, namuinetøbe yandø chincha melangaig purø trømbøig køben, yandø ke øsig webammumuitamab isubelø ker. ⁹ Pøs nambe ke yandø kwamigu puermaptøwei isub melabelø ker. Pøs øyeeg puppe, nam namasiitø namdø tsabø kermab isubelø kørnrain kømøtø, Tius tru kwailanguen katøle øsiirangarub kusrubigwan isua pønrrabelø kørnrain kuig køn, ¹⁰ tru øyeeg trømbøig ke kwamitø palab melaigugurri nõ namun ka puraambingarub, katø namun ka puraambub ambamig kørnrai martrabigwan. Incha nambe ke nuinuutø isua meler, ka puraambub ambamig katøgucha namun ashib pasrønrrab kui, ¹¹ ñim Tiuswan namuyasig 'purugurra' chib miab meløbene. Øyamay truba yamelø namuimburab Tiuswan 'mayanguen ungwa, ungwa' chib kørnrun, pøs truba yamelø misra Tiuswan namuimburab miaben løtigwan nam truba nu purugúig utikkurri.

Pablo Corintiosømay chindimba imuigwan eshka

¹² Kaguende nam tab kui mørøb pønrraibe iig køn: yu pirau namui isub kebachib pasrabigu 'chi kalø marig køn' chibig chigaig pønrraig, mas ñimui utube katøguchinguen isuptø amønaig købig køn. Amøñippe, tru newan chishchiitøgaba, søratø kømø, sølwan marig Tiusweinukkurri arrubiitøgaba nambe amønaig køn, chine nõrrø kusreelø møguelainukkuri arrubiitøga marmøtø, Tiuswei ka yandø tab indiitøga marøb. ¹³ Pøs nam ñimun kilga pørøppe, chi peg waminchibikkucha kørnrab kømøtø, ñim chi leb kuigwan ñim chigúi nebua mørøb kuigwan truiigwan newan chigúi mørtraïmab isua pører. ¹⁴ Inchawei namuimburab mayandøguen nebua chigúi mørig køppe, pøs ñimbe tab newan chigúi mørtrun, ñim namuimburab tab kui mørøb pønrramig kørnrai, tru nam ñimgurri tab kui mørøb pønrramig kørnrab køb lataitøwei tru Señor Jesús arrub kwaløm.

Pablo Corintiosø ashchab inrrab waminchib

¹⁵ Inchawei nabe iigwan treeg kørnraitamab isua, ñimuisømaymerrig attrab isuig køn, ñim srøsrø truba tab kui nan utig kømnetø katøle nan tab kui utamig kørnrai. ¹⁶ Incha Macedoniasømay pureppe, ñimuinug pua puraya, katøle trusrøngurri aruppe, ñimuinug puatøweim purainrrab isuig kuig køn, ñim nan Judeasrøngatig yamigwan purugunrrai. ¹⁷ Tru na øyeegwan martrab isuiibe, çkabe nabe ke mõi mõi martrab kurrig kørnrab kø chindah? çKabe tru na øyeeg martrab indiibe, nai isuigu Tiuswan ashmø misaamera lataig martrab inchibig kua, møindø ke: "Martrab" taitø, katø: "Marmønrrab" taitø inchab inditamagueh?

¹⁸ Pøs Tiusbe nõ maig chippe, nõbe treegwan marøbig køb lataitøwei, nam ñimun wamindiibe møindø: "Øn" taitø: "Ka" taitø indig kømøtø køn. ¹⁹ Kaguende ñimui utu na køben, Silvano køben, Timoteo køben, nambe Tiuswei Nusrkai Jesucristoimburab eshka kusrenanig køn:

“Øn” tantø: “Ka” tantø indig kømøtø, nuinuube chu uraskucha: “Øn” taig. Nøbe trug køn. ²⁰ Kaguende Tius kerrigu nø chi martrab cha kørømisriiløbe Cristoinuube: “Treeg martrab” taig, trug køn. Inchawei nambe Cristogurri: “Treeg køn” chibelø ker, namgurri Tiusbe mayanguen tabig wamindig kønrrai. ²¹ Inchen Tius nøtøwein køn Cristoinug mur pønrramig kønrrai marøbiibe namun lata, ñimun lata. Incha namune nuindø kønrrai tarømara pønrsra, ²² nuieelø kønrrai sellotøga sellawa, ñim manrrau pasrønrrai Espiritu Santon katsig pasra tranøbguen indig køn, tru tranrrab kørømisrigwan kutøguewan tranrrab kui asamig kønrrai.

²³ Pøs nabe Tiusken ashen trendamønrrun: Na Corintosrømay katøgucha arrumuppe, na ñimun kalugueetømønrrab lastima ashiptø arrumug købig køn cha. ²⁴ Kaguende ñimui isubigwan Cristoinug pasra pønrramigwane treeg pønrrønrrai inchib ke nam karub pønrrønrrab kømøtø, masken ñim kasrag pønrrønrrai nambe purugubguen pønrrer. Kaguende ñimbe tru isubigwan Cristoinug pasra pønrraikkurriwei ñimbe mur pønrran.

2

¹ Inchawei na katøle ñimuisrømay arruppe, nabe ñimun truba truba isui inchain kømøtø, attrab isuig kuig køn. ² Kaguende na ñimun isui inchai marene, trube, çnane mu kasraarani-asamø? çTru na isui inchai mariiløtøwei kasraaranmønrraitarru? ³ Inchawei nabe øyeeckurri tru merrab kilgawan na pørøppe, tru nanguen kasraaranrrabelø na trusrø puben, nan isui indingarumønrraim pørig køn. Pøs na kasrag pasrøbene, ñimigucha chiguen kømøtø, mayeeløba treetøwei pønrrønrraimab isuague. ⁴ Kaguende nabe ñimun pørøppe, truba truba isui pørig kuig køn, nai manrraube purø tab kømui, truba kappin kørøggøb. Kabe na ñimun truba truba isui inchai martrab kømøtø, nabe ñimun truba truba undaguig kui ashchai indig købig køn.

Kalø marøbigwan Pablo truburø ulø paymub

⁵ Tru øyeege isuim pasrønrrai møikkøben treeg marøbiibe, nandø kømøtø, kan mayangatig ñim mayeelanba isui inchai mara pasran tamønrrun, ke menrra inchimønrraptø. ⁶ Inchawei tru mowan ñim mayeelø lutaelø misra, nui kalø marigwan øl martrab ñim asha mariibe yandø tsabø køn. ⁷ Trugwane yandø ulø payib kømø, pesannab, masken kuñab purugumig køn, isubiitø yandø kerriguwan mandøguen kømui inchimønrrai. ⁸ Inchawei nabe ñimun tru moweimburab ñimui undag købigwan katøle tiusmanda kenamaray tamønrrun, ñim undaguelø kui nø ashchai. ⁹ Kaguende na ñimun pørøppe, øyeegewan isua pørig køn, chiyutøgucha maig taigwan ñim mørøbelø kətashchab ashchab isua. ¹⁰ Inchawei chigøben kalø marøbigwan ñim chi ulø paymø pesannanrrab isua kørømarene, nagucha nune treetøwei ulø paymø kørømisramønrrun. Pøs chi kalø marigwan na ulø paymø, pesannappe, (ulø paymumig chi pønrraig kuig køh chindindøbe køben) ñimgurri treegwan marig køn, Señor Jesucristoi merrab, ¹¹ namun Satanás kegørøsrkøb nø kanailø kømønrrab. Kaguende nambe tsabø ashibelø ker nøbe chitø martrab inchibig kuigwan.

Cristotøgabe kanawa puraamba pønrramig

¹² Na Troas ciudasrø, Cristoi tabig srø wamwan eshka kusrenanrrab pubene, Señorweimburabelan maramig yaskappe tabig kurøppe kurendø, ¹³ nai nuneg Tito trusrø mu kaagøptinchene, nane nai isubigube ni mumayguen kømuben, nabe trusrøngurri nømun ungw ahippa, Macedoniasrømay ibig kur.

Tiuswan ‘ungwa, ungw a’ taig

¹⁴ Inchendø Tiuswan ‘mayanguen ungw a, ungw a’ chinrrab, Cristoinuube nam kaigwan kanawa çkatø! luchimig tsimaytø puraambub ambamig kønrrai marøb, katø tru Cristoimburab nebua asiløbe purø may irrabzhig lataig chutøgucha namgurri larrøbitchai marøb Tiuswan. ¹⁵ Kaguende Tiusweimbe nambe Cristoi tru purø may irrabzhig latailø ker, kaigyugurri wesraig pønrrabelai lata, tru managatig pinab pinamsrømay amrrab pønrrabelai lata. ¹⁶ Incha møilø tru pinab pinamsrømay amrrabelaimbe tru irrabbiibe kwaitø irrøben, katøganelø kaigyugurri wesrailaimbe tru may irrabbiibe øsig kømigwan irrabig køn. çInchen øyeegewan marøb pasrønrraptiibe mu kø chinderah? ¹⁷ Katøganelø misaamera truba nørø tru Tiuswei wamwan kan chigucha kømig kui lataig an marøb srua llibelø latawei, nambe treetøwei marøb pønrrømeelø ker. Treeg kømøtø, Tiuswei merrab waminchippe, maig wamindamigwan sora kømø, sølwan waminchib, Tius øriilø kermab isua, Cristogurri waminchibelø ker.

3

Tru srøig ‘øyeege, øyeege martrab’ cha kørømisrig

¹ ¿Kabe nambe katøguen namashib chi isumgaig 'tabelø ker' chib waminchib pønrrabra chindah? ¿Kabe nambe katøganelø latawei chi isumgaig tabelø kui ashchai, kilga pøriilø ñimun tranamig, kabe ñimgurri kilga pøriilø namun tranamig palaim pønrrabra chindah?

² Nam mailø kuigwan treeg asønannrabelø tru namuyasig kilga pørig latailøbe ñimwein køn, tru ñim purø tabig amønaig, tru namui manrrømerayu pørig pasrabig, mu misaameratøgucha ñimun numera køtashib, mailø køtashib ashib tøgagüilø. ³ Ñimbe tøgandø asameelø køn, kan kilgayu Jesucristo nøashib pøri latailø, tru namui maramigwan marøb pønrrailøyugurri ñim srøig kurrabelø, tintatøga pørig kømøtø, øsig wab Tiuswei Espiritutøga pøriilø. Kabe srug tambalmerayu pøriilø kømøtø, misaamerai manrrømerayu pøriilø køn.

⁴ Nambé iigwane Cristogurri Tiuswei merrab treeg kuitamab isua pønrrer. ⁵ Kabe nam namashib øyeeqwan martrapteelø namdø tsabø marøbelø kua, chi arrubiibe namuinukkurri arrubig kui lataig inchib pønrrømøtø, nam øyangatig tsabøtø marøb pønrramig arrubiibe Tiusweinukkurri arrubig køn. ⁶ Incha Tius nøtøwei namune tru srøig acuerdo marigwan nam sølgandø marøbelø kønrrai mara pønrraig køn, tru acuerdo merrabsriig maig maramigwan martraim pørigwan kømøtø, tru Espiritu Santoiwan. Kaguende tru maig maramigwan martrai pørigwan mørmigweimbe kwamigwan srua arruben, trune Espiritu Santohe tru srøig øsig kømigwan tranøbig køn.

⁷ Inchen tru maig maramigu marøptøga pønrraig kwamigwan srua arrubig, srug tambalmerayu pørikken tørguegwalmabig køptø, Israel misaamerabe Moiséswan malauguen ashchab kaimaig købig køn, nui malø tørguegwalmabig køben, tru tørguegwalmabiibe kwab yaindøgucha. ⁸ Inchen tru øsig kømigwan srua arrubigwan marøb pønrraig tru Espiritu Santoimbe, ¿kan treetøguen kønrrab kømø, maig tørguegwalmabig kuaasamø? ⁹ Inchen tru maig maramigwan marøptøga pønrraig misagwan kaigyu pønrrønrrai kørømaras pasrøbikken treeg tørguegwalmabig kuibe, tru marøptøga pønrraig misagwan Tiuswei merrab chi kaig kømeeelø lataig tabig kønrrai marøbiibe, ¿kan treetøguen kønrrab kømø, mas purø tørig tørguegwalmabig køn! ¹⁰ Kaguende truig tørguegwalmabig lataig kuikken tru iig purø tørguegwalmabiibamara ashene, truiibe chi tørguegwalmabig kømøn. ¹¹ Inchawei tru tørguegwalmabig kwab ibikken kan treeg tørguegwalmabig tøgag arriibe, tru mana pinømø pasrabig pasrønrrabiibe jmas maig tørguegwalmabig kuaasamørra!

¹² Inchawei tru tøgagønrrurmab isuigwan nam tøgaguen pønrraig køppe, nambe chi kømø maig tamigwan tøgandø waminchibelø ker. ¹³ Kabe tru Moisés lataig inchib pønrrømer, tru Israel misaamera nui malau tørguegwalmabig kwab arrubig yandø patsi ashmønrrai, malø kasraitøga kasrøb lataig. ¹⁴ Inchendø nømui turmerayube yandø chi wamindikken kebyainameelø murig misriilø kua, møin kwalømgatig tru merrabsrø Tius acerdon marig købigwan leben, chi tainguen mørmeelø køn, tru malø pinøgasrøb pasrabiitøwei pasrabig pasraikkurri. Kaguende tru pinøgasrøbigwane Cristotøwei kerranrrun. ¹⁵ Incha møin kwalømgatig tru maig maramigwan martrai Moisés pøriilan asiimørig, tru maløwan pinøgasrøbig lataig pasrabiibe nømui manrrømerayube kasrain pasran. ¹⁶ Inchendø møikkøben Señorweimay lllirawa pasramisrene, tru pinøgasrøbig lataig pasrabiibe nuinukkurrimbe kerraig kønrrun. ¹⁷ Kaguende Señorbe tru Espiritu kua, Señorwei Espiritu chu pasrøbene, Tiuswei merrab kemalamig tryube chigucha iløsrkønrrabiibe chi kaagøn. ¹⁸ Inchawei nambe mayeeløba maløwan chi kasra kømø lataig ashib pønrrabeløbe, kan espejo latailø ker, Señorwei tru tørguegwalmabigwan kegurnabelø, nø maig køben nam treeløtøwei misrøb, katøguchinguen, katøguchinguen tørelø misrøb amber. Treebe Señorweinukkurri arrubig køn, tru nø Espirituinug.

4

Jesucristoimburabigwan eshkabelø

¹ Inchawei nambe Tius namun lastima asiitøga i tru marøb pønrramigwan tøga pønrraig køppe, nambe chi kullaarab melømer. ² Pøs chigøben ke kørikken kønrrapteelø sørato marilane nambe yandø wendøbasrar ker, sørato larrø møg isua marøb pønrrømøwei, Tiuswei wamwan lliska peemaytø marøb pønrrømøwingue. Treeg marøb pønrrømøtø, tru newan ciertonigwane maig kuigwan tøgandø kenamarøb pønrraikkurri, nam tabelø kuigwan namashib kenamarøb pønrrer, maya misaamerai isub kebachib pasrabigu ka inchib pasrømugumab isumig kaanrrai Tiuswei merrab. ³ Inchen tru tabig srø wamwan nam eshkab kusrenanig katøgucha pinøgasraig lataig chugüi møriimig kørømisrøppe, tru yandø pinab pinannuumay amrrabelaimbe pinøgasraig lataig kørømisran. ⁴ Kaguende tru møin kwaløm yu pirau tius, tru nugwaimandziibe, tru chi køremeelane nøm chigüi møramig isubig tøgagüigwane chigüi mørmeelø kønrrai kasra pasrin køn, tru Cristoi tørguegwalmabigwei tabig srø wam tørbilabigwan nøm nebua ashmønrrai; tru Cristobe Tius maig køben, truig køn. ⁵ Kaguende nambe namuimburabigwandøwei eshkab kusrenanmøtø, Cristo Jesúsbe

mayeelaime pala nõ ashib karub pasrabig kõn cha eshkab kusrenanobelø ker. Katø nambe Jesucristoyasig ñimuiembe ka karuindø melabelø ker. ⁶ Kaguende: “Tru løstøyugurri tõr pilørrrain” cha, trenchib Tius nõtøwei namui manrrømerayu nui tõrtøga kebilin kõn, tru Tiuswei tõrguegwalmabig Jesucristoi malau pilabigwan nebua asam tõrwan namun tranig kõnrrai.

Chigøben trømbøig puingucha mur pønrab

⁷ Inchendø nambe iig tru purø tabigwane namui asr kan pirø køtsø lataigutø tøgaguer, tru iig maramburab marøbig purø nuig tabiibe namuin kõmøtø, Tiuswein kui kenamartrab. ⁸ Chiyutøgucha chine chine pui melamig nebuingucha, ke truyutø tambal ambagucha warømer. Ke kan chindamerma isumig pui meløbendø, yandø ke kaimamuita-mappe isuløgucha melømer. ⁹ Namun kaig marøb amruindøgucha, namundø elatsiilø melømer. Pøtiitsiiløbe kuinabendø, kerriguwan pinisailøbe kõmuinatan. ¹⁰ Inchawei nambe chu ambuptøgucha, namui asru Jesucristo kwaigwane tøga amøner, katø Jesucristo øsig waikkucha namui asru kenamisrrai. ¹¹ Kaguende nam øsig pønrabeløbe Jesucristogurri chu urastøgucha ke kwaitø, kwaitø melamig nebutan, namui ka pinønrab asru Jesucristoi øsig pasraikkucha kenamisrrai. ¹² Inchawei namuinuube kwamig marøb pasrøben, trune ñimuinuube srøig øsig kõmig marøb pasran.

¹³ Tiuswei wamwan pøriguma trenchibig kõn: “Kørewa, treekkurri waminchar” cha. Pøs namgucha namui isubigwane Cristoinug treetøwei pasra pønrøwa, treekkurri nambe kørewa, Tiuswei wamwan waminder. ¹⁴ Pøs nambe ashibelø ker, Señor Jesuñwan kwailai utugurri Tius tru katøle øsirangarubiibe, namungucha Cristo Jesuñba tru kanbalatø pønrarikkurri kusrua, Tiusbe nui merraptøwei nam ñimba kanbalatø pønrarig kõnrrai martrab kui. ¹⁵ Pøs kerrigu øyeeg pub arrubiibe ñimuyasig tab kõnrrain kõn, tru ka yandø tab indig misagwan katøguchinguen, katøguchinguen nebut ibene, ‘ungwa, ungwa’ tameløgucha nuramburab nuranrrai, Tiusweyasig maya nuguen tab kõnrrai.

¹⁶ Inchawei nambe chi kullaaramer. Kaguende namui asrbe patsab yaingucha, namui umbewe kwalømmørig, kwalømmørig srøig misrøb inrrun. ¹⁷ Pøs nam chigøben puinab melamig ka petø pureb arwøbig, kan yangucha murig køtanmab isub mur kui melaibe managuen patsønrabgaig kan tõrguegwalmabig maya nuibaguen øyeeg lataig kõn cha, kemesra trendamgaig tabigwan tøgagig arrubig kõn. ¹⁸ Kaguen nambe namui kaptøga asigwan asha pønrømtø, chi nebua asiimigwan asha pønrer. Kaguende kaptøga nebua asiiløbe ka purainrrabiitøwein køben, trune tru kaptøga nebua asiimeeløbe managatigweyelø kõn.

5

¹ Pøs nambe yandø ashibelø ker, yu pirau nam øsig pønrarig tru namui asr ka petøweindiig kan rancho-unø mara pasrindø lataig, yandø minchib patsindøgucha, katøgan srø asr purø tab ya lataig, mu møguelø taska mari ya kõmøtø, srømbalasø managuen patsønrarig kõmig Tius tranig tøgagømigwan. ² Inchawei nambe yu pønrarippe, tru srømbalasø kewa purramitøga pinøbuliilø kõmigwan, mana kõnrremab truba truba nuisrab isubelø ker. ³ Treebe namune srø asrtøga kenanen, nambe yandeelø asr chigar kõmø, tøgag kõmørrun. ⁴ Inchawei i asr kan carpa ya lataigu nam øsig pønrabeløbe larrø tab kõmui, truba truba nuisrab isuig melabelø ker. Pøs namune kwamuinrrabna køtan nam tøgag pønrarig asrwan trubalatø srøig itøguenniilø kõmøwatøbe, tru yandø pinab patsønrarigwane tru srøig øsig kõmibe yandø nõtø kerriguwan pinabgasra pasramisrrai. ⁵ Inchen namun øyeeg pønrarig kõnrrai marøbiibe Tius nõ kõn, tru treeg kõnrrai Espiritu Santon katsig pasra namun tranøbguen inchibig, tru tranrrab kõrrømisrigwan kutøguewan tranrrab kui asamig kõnrrai.

⁶ Inchawei nambe chu urastøgucha chi isumø pønrer, tru namui asru øsig amøñipatøbe, Señorweim pulu kõmøtø, nambe yabsrøndø pønrabelø kui nebua asha. ⁷ Kaguende nambe amøñippe, namui isubigwan Cristoinug pasriitøgatø amøner, namui kabrawa nebua ashagurriin kõmøtø. ⁸ Inchendø nambe treeg kõnraitamab chi isumø pønrer, masken namune asrugurri tarømisra ambinrrabna køtan, Señorba kanbalatø purrønrab amrrab. ⁹ Inchawei namui asru øsig pønrøwa lata, asrugurri tarømisra amba lata Señor nõ tab kui mørøb wanrrai marøbelø kõmig namuimbe truig kõn. ¹⁰ Kaguende nambe tru maig maramigwan Cristo asha marøb wainug mayeeløba kemalamig kõn, namui asru amøña tabig marig kuin kui, kaig marig kuin kui maig marigwan nam mõitøgucha truburø utønrab.

Tiusba katøle tab kõrrømisramig

¹¹ Inchawei Señorwan mandø kõrig tøgag pønrarigwan nam ashibelø kuig køppe, misaamera Señorwan kørenrrai inchib melabelø ker. Pøs Tiuswei merrabma nam mailø kuigwan tõrgandø kenagüibe, katø ñimui isub kebachib pasrabigugucha treetøwei tõrgandø kenagønrarimab isur. ¹² Kabe nambe namasiitø katøguen ñimui merrab ‘truba tabelø ker’

chib pønrrømötø, ñim namgurri tab kui mörøþ kasrag pønrramigwan tögagønrrai treeg isua inchib pønrrer, ñim tru mandø lötamigwan tögagønrrai, tru manrraugurri isua kømötø, ka palatø treeg maranmab ashchaindø møg inchib chib pønrrabelan. ¹³ Namun 'locos kør' tainab pønrraibe, Tiusweyasig kør. Inchen maig pønrramigwan chugúi mörø þønrraibe, ñimuyasig kør. ¹⁴ Kaguende Cristoi undag kõiibe namune martrai trawagøchibig kør. Þøs iigwan nam isua ashene: Cristoma kwappe, mayeelaimburo kwaig købene, treekkurri mayeeløba kwaig kør. ¹⁵ Inchen Cristobe kwappe, mayeelayasig kwaig kør, tru øsig amøñibeløbe ka nømuyasiitøwei øsig amøñimötø, nuyasig amøñibelø kørnrai, tru kwawa, katøle nømuyasig øsiirabigwei.

¹⁶ Inchawei nabe yandø møingurrimbunøbe mundøgucha yu pirauelø isuimay ka treetø isua ashib pønrrømeelø ker. Þøs nabe merrappe Cristone yu pirauelø isua asimay ashibelø kuatøgucha, mømibe yandø treetø nebua asha tøga pønrrømer. ¹⁷ Inchawei møikkøben Cristoinug pasrabiibe, yandø nøbe kerrigu srøig kør; merrabiibe yandø chab puraiben, mømibe yandø kerrigu srøig marig peemayig kør. ¹⁸ Inchen kerriguba øyeg arrubiibe Tiusweinukkurrin kør. Þøs nam kailø kua nøbatøwei tab kørørmisramigwan Cristo Jesúskurri treeg kørnrai mara, kailø kua, Tiusba tru tab kørørmisram wamwan nam marøþ pønrrønrrai, nø tranig kør. ¹⁹ Tru wambe iig kør: Tiusbe nøbatøwei Cristogurri pirau maya misaameraba kailø kua, tab kørørmisramigwan marøþ pasraig, nømui chi kaig marilian ulø payrrab isua ashmötø. Tru øyeg nøba tab kørørmisram wamwane namun waminchai trana pønrraig kør. ²⁰ Nabe Cristoi munchiyu, misag utu Cristo nø waminchib pasrab lataitøwei nui wamwan waminchib pønrrønrrai pønrrailø ker. Namgurri Tius nøashib treeg maray chib pasrab lataitøwei, nabe Cristoi munchiyu ñimun tiusmanda øyeg martrunrrigay tamønrrun: ¡Tiusba tab kørørmisramigwan maray! cha. ²¹ Cristobe chigucha chi kaig marig chigaigwan, Tiusbe namuimburo nune kaig marøþig kui lataig treeg mara pasrig kør, nam kaig marmua lataig pønrramig kørnrai Cristogurri treeg martrab.

6

¹ Nam Tiusba marøþ pønrrabelø kuig køppe, ñimune øyeg marøþ kørrunrrigay chinrrab, Tiuswei tru ka yandø tab indigwane ke chi martraamøbendø uta tögagømötay cha. ² Kaguende nui wamwan pørigube Tiusbe trenchibig kør:

“Yandø tru purugum kwalømmera puim pasrøben, ñun mørig kør cha.

Kaigyugurri wesrailø køm kwaløm puim pasrøben ñun purugúig kør” cha.

¡Møi yan kør, tru tabig purugúigwan utamibe! ¡Møi yan kør, tru kaigyugurri webambam kwalømbe!

Pablon chine chine nebul arrilø

³ Mugøben Tiuswei tabig srø wamwan kaashib, nam marøþ pønrraigwan kaig kør chib wamindig kømønrraimbe, nabe kaig marøþ mungucha srurrengwangerub pønrrømer.

⁴ Masken treeg inchimötø, nabe chiyutøgucha Tiusweiwan marøþ melabelø kui asilø kørnrrab treeg kenamarøbelø ker: chu uraskucha elachimötø, marøþig marøþ melamigu lata, chine kaig pub arrubigu lata, chine palai mörøþ, isui melamig arrubigu lata, ⁵ ichagutsiilø kømig nebui lata, kailan pønrrai yau keerig pønrramig nebui lata, kanbalatømisra kaig martrab namig kurrøben treegu melamig nebui lata, maramga murelan marøþ melamig nebui lata, kibguen kimø melamig nebui lata, chigucha mameelø puraambub melamig nebui lata, ⁶ chi kaig marmø chishig amønarnamigu lata, nebua ashib ambigu lata, chine indindøgucha tammay ka melabig melab, tab inchibelø kømigu lata, Espiritu Santo namba pasraigu lata, nam ka inchib kømø, cierton undaguelø kuigu lata ⁷ cierton wamindamigwan treeg waminchibelø ker. Tiuswei maramburab marøþiitøga marøþ, tru chigurrimbunø tabig sølgandø marøþ pønrraitøgabe nabe kusrmayba, atsimayba srua kwayab pønrrer, kan suldau kwayab turiamig kusrmaybe espadan atsimaybe escudon srua kwayab pasrab lataitøwingue. ⁸ Kanmaywane truba tab indinab, kanmaywane maig købash indinab, kanmaywane truba tabelø kør chib wamindinab, kanmaywane larrø kailø kui mara wamindinab, maig kuigwan nam cierton waminchendø, larrø may wamincha isapteelø kui marinab, ⁹ nabe mumera kui nebua asilø kuinabendø, asiimeelø kui lataig tögagúinab, yandø kwawa pinanmab asha tögagúindøgucha, øsig amøñibig amøñibelø, trømbøig ichabetiilø kuinabendø, kwamø ka øsig amøñibelø, ¹⁰ truba isuilø meløbendø, purø tab kui kasrag pønrrabelø, larrø waachamera kuinabendø, misag truba nørrowan tabigwan tögagømburab tögagønrrai marøþelø, chugurringuen kømeeelø kerrigu chiga latailø kuinabendø, kerriguh tøgar treelø kuinatan.

¹¹ Nabe, ñim corintosreelan, maig wamindamigwan tørgandø treeg waminder. Nam ñimuimburo isumibe namui manrrømerabe ke kurindø pasran. ¹² Ñimuimburo nam isumibe chugatikkucha kurin pasrøben, ñimweinre kasrøþ tögagøn namuimburo. ¹³ Ambugurri

igurri lata treeg kōnrraimab isua, kan nai ureg kui lataitōwei nabe ñimune trenchar: ñÑimui manrrōmerangucha treetōwei kusa tōgagōrrunrigay! cha.

Nambe øsig wab Tiuswei ya ker

¹⁴ Ñim Tiuswan kōrebelōbe Tiuswan lata kōremeelōbabe lincha maramgaigube chi lincha maramig kōmōn. ¿Kaguende tru tabig sølgandō maramiba, sølgandō kōmō mariibabe chincha kandō kōnrrab kō? ¿Katō lōstiiba, tōrbabe chincha trubalatō kōnrrab kō? ¹⁵ ¿Cristoba, Belialbabe chincha kandō isunrrab kō? ¿Criston kōrebiiba, Criston kōremibabe chincha kandō isub pōnrramdiig kōnrrab kō? ¹⁶ ¿Katō Tiuswei yaba, taska mari tiusmerababe chincha trubalatō kōnrrab kō? Kaguende nambe tru managuen kwamō øsig wab Tiuswei ya ker. Pōs nōbe trendaig kōn: “Nabe yandō nōmuinug pasrabig pasrab, nōmui utu uñib indamōnrrun cha. Nabe nōmui Tius kōben nōmgurrimbe nai misaamera kōnrrun” cha.

¹⁷ “Inchawei treeg kōbene:

Tru kaig marōb misaamerai utugurrimbe webamba,

yandō nōrōmisray” cha,

Señorbe nui misaameran trendan.

“Chigōben kōsōngōmdiigwane katōramōtay cha.

Pōs marmubene, nabe ñimun utamōnrrun” cha.

¹⁸ “Incha nabe ñimuimbe mōskai misren,

ñimgurrimbe naimbe nai nusrkalō,

nai nimbasrmera misrtrabguen” cha,

Tius Newan Maramburab Marōbiibe trendan.

7

¹ Inchawei ñim, nai undaarailō, tru Tius tranrrab misra kōrrōmisriilan tōgarbe, namui asru lata, namui espírituyu lata, kaig marig kōsōngōnrrapteelan kerriguwan chish misrkun, Tiuswan kōriibala pōnrraigu kerriguwan nuindō newan tabelō kōnrrab.

corintosreelō yandō mas kaig marmōnrrab isua mōrōb

² Namun ñimui manrraugurri isua utōrray chinrrab inchar. Nambe mōigwangucha ñimun sølwan marmō kalō mara pōnrrōmōwei, kaig marōb ñimun mōigwangucha mindisha kōrrōmarmōwei, kabe nam ñimgurri nam tōgamismōwei indig kōn. ³ Nabe iigwan ñimun øyeeg chippe, ñimbe øyeeg kailō kōn chinrrab kōmōtō inchar. Nabe yamba trendaig kuig kōn, nambe ñimune namui manrrau tōga pōnrrer cha, øsig amōña lata, kwamig kui lata ñimun namui manrrau tōgagōnrrab. ⁴ Nabe ñimune chi isumgailō kui isua pasrab, chiburō kōben ñimgurri na truba tab kui mōrōb pasramigwan tōgagōb inchar. Nan truba tab kōnrrai mari pasrar; chine isui pōnrramig puindōgucha, kasrag kōbigwan tōgagōmburab tōga.

⁵ Nam Macedoniasrō puabe, namui asrwane kan pishindō tabguen israb tōgagōmig nebumig kōn. Treeg kōmōtō, chiyutōgucha ka isui melamitō, isui melamitō arrubig kōn namune, namuim pōtōgatanbe chinētō indinab melamig arruben, namui manrraube kōrig isub melamig. ⁶ Inchendō Tius tru larrō kullaarai isui melabelan isui inchimōnrrai marōbiibe, Tito arriitōga namune truba tab kui melōnrrai marig kōn. ⁷ Katō Tito arrikkur-rindō kōmōtō, nōgucha ñimgurri truba tab kui mōrōb pasramigwan utikkurrimba kōn. Nōbe namun wammōrōsrkōtan, ñimbe nan truba ashig kui melaigwanba, ñim tru merrab kalō marig kōbigwan isua mōra kappin kōrrōgaigwanba, ñim naimburab truba truba isub melaigwanba. Treekkurri nane katōguchinguen kasraaranrrai martan.

⁸ Pōs na ñimun tru kilga pōra øriitōga ñimun truba isuilō kōrrōmisrtrai marig kōbigwane nane chi isumōtan. Pōs tru urasbe nane isubwei indig kōn, kaguende tru na kilga pōra øriibe kan maya yanagatiitōbe ñimun isui melōnrrai marōbwei inchen. ⁹ Mōimbe nane kasrag kōppe, tru ñim truba isui melaigwan, trunun isua kasrag kōmōtō, tru ñim truba isui indiibe ñimui kaig mariilan isua mōra, Tiusweimay lliarrrai marikkurri nane kasrag kōtan. Pōs ñim truba isui inchib pōnrrappe, Tius trendō treeg kōnrrain kōben kuig kua, nambe ñimune chigucha chi kalō punrraimbe marmuig kōn. ¹⁰ Tius maig palain kōben nam trumay isui inchib pōnrraibe ñimui kaig mariilan isua mōra, Tiusweimay lliarrrai marōbig kōn, kaigyugurri wesrailō kōmigweyasig trembe kaabashmōmab isumig chigaikke. Trune isui inchib pōnrramig arrubig yu pirauibe, kwamibe tōgaig arrubig kōn. ¹¹ Tius maig palai inchen, ñim trumay isui inchib pōnrraigwan ñimguen asay: ñimuinug truba marōg kui inchib pōnrramig arrub, øyeekkōlig kalō marōbrain kōn chib tōr marōb pōnrramig arrub, kalō maren namig isub pōnrramig arrub, kōriibala pōnrramig arrub, truba truba asinrrabna kui inchib pōnrramig arrub, tabigweimburab ke chinsraatō inchib pōnrramig arrub, kaig marōbigwane mōra mēanrrai marōb pōnrramig arrub, treeg arrin kōn. Inchawei kerrigu øyeeg purayaigu ñimbe chi kalō mara pōnrrōmuin kui kenamarōb pōnrran. ¹² Inchawei tru kilgawan pōrōppe, tru sølwan marmō kaig marōbigwan isua, truikkurrim pōrmōwei, kabe

tru kalø marinabigwan isua, truikkurrim pørmøwei indig køn. Treeg kømøtø, tru ñim namuimburab truba isubelø kuigwan ñimui utu Tiuswei merrab nebua asig kønrrai indig kuig køn. ¹³ Inchawei nambe chi isumø tab kui pønrramig kønrrai mariilø ker.

Nam tru treeg tab kui pønrraig kømnetø, Titon truba truba tab kui pasrai ashabe, nambe larrø tab kui truba kasrag pønrrer. Kaguende Titone nui isubigu katøle truba tab kui mørøb pasønrrai, ñim soteelømisra purugúin køn. ¹⁴ Pøs ñim corintiosmeraimburab truba tab kuim pasrar chib Titon na waminchib pasraigwan, chi kóriimisra kørøromismur. Nam ñimun kerriguba chigøben wamindiima chi isa wamindig kømuiig køppe, ñimuimburab truba tab kui mørøb Titon nam waminchib pønrraikkucha treetøwei isa kømø wamindig webyan. ¹⁵ Inchawei Titobe mõiimbe ñimune katøguchinguen undaguig køn, tru nø maig karuigwan ñim mayeeløba mørøb, nun utabgucha, kóriibala ke itønab utig købigwan isua. ¹⁶ Chiyutøgucha ñimbe chi isumgailø kuimba mayanguen nane tab køtan.

8

Merø kømø, tranamburab tranigwan waminchibig

¹ Trube, mõiimbe ñim nai nunelø, wammøra kønrrai inder, tru Macedonia pirausrø iglesiameran Tius nui ka yandø tab indigwan øyeeg tranigwan. ² Yeeg chine kaig nebuinab melamig pub arrubig ututø, nømui kasrag købigwan kasrag kømburab tøgagúiba, larrø chugurringuen kømuiilø melaiababe, merøbala kømø, tranamburab tranøbølø kønrrai marin køn. ³ Inchawei nabe maig kuigwan wamindamønrrun, tru nømun maig purugumdiig køben treeg purugua, nebumgaigwanguen nebua tranig køn cha, nømun mu tranrrai indig kømøtø. ⁴ Pøs namune truba rugabelø køn: “Tru Jerusalénsrø Tiuswei misaameran namgucha truilan tøga purugúig kønrrai treeg marbashisrumøgue” chib. ⁵ Incha nam treeg martrairamab isuigwandø marmøtø, nømbe Señorweyasimerrig pønrrønrrab nømashib pønrramisra, trugurrimbe namun treetøwei pønrrønrrab pønrramisrøbelø køn, Tius maig kønrrain køben treeg. ⁶ Inchawei nambe Titone øyegwan martrunrrig cha waminchibølø ker: “Iig truba tab indigwan ñi maig marøb pølbasiibe, katø treetøwei tru corintiosmera Jerusalénsreelayasig tranigwane tabig marøb patsøgørrunrrig” cha. ⁷ Pøs ñimbe isubigwan Jesucristoinug pasra tøgagømigu lata, Tiusweimburabigwan nebua ashib waminchib ambigu lata, Cristoi maramigwan tab asha maramigu lata, ñim namuimburab undag købig tøgagúigu lata, chiyutøgucha ñimbe ya merrabguen melaig køppe, lastima asha tranøbølø kømigu chigucha iyu treetøwei merrabguen webamrrab inchigay.

⁸ Maig martrain chippe, ke kandø chibig lataig nabe treeg karua pasrmur, treeg kømøtø, ñim undag købigwan cierton tøgagúitashchab ashchab inchar, katøganeløma treeg tab marøbølø køn cha trunun eshka. ⁹ Kaguende ñimbe namui Señor Jesucristoi tru ka yandø tab indigwan nebua ashibølø køn, nøbe chigucha chi palømiig tøgag købendø, ñimun undag købiitø larrø waacha misra, tru nø treeg waacha misriitøga ñimun Tiusweimburabigwan chigucha chi palømeelø kønrrai marigwan.

¹⁰ Incha iigube nabe ñimun øyeg maramdiig køn chinrrab inchar: tru purugunrrab tulisamigwan ñimbe marig pilawei tranamigwan ñimmerrig tranøb, katø trutø kømøtø, maramigwan ñimwei isuig kuig købene, ¹¹ trube, ñim pølbasa marigwane mõiimbe tabig marøb patsøgamig køn cha. Tru ñim purugunrrab indamigwanma ñim ke martraptø pønrraig køppe, trube, tru maramigwane treetøwei marøb patsøgamdiig køn cha, ñimun maig nebubendø. ¹² Kaguende møikkøben ke tranrrab isua, mayanzhig tranamdiig køben treeg tranigwane Tiusbe chi kashmø utabig køn, ke chugurrrin kømuingucha tranrrai inchimøtø.

¹³ Inchendø nabe øyeg chippe, kaneløbe chairilø kørøromisren, ñimbe purugub meløwa, ke chugurringuen kømui inchib kønrrain kømøtø, ¹⁴ mumaytøgucha lata kønrrai inchar. Møin kwalø ñim chigucha chi palømiig uncha tøgagúibe nømun purugumig køben, katøwan ñim palai meløbene, tru nøm uncha tøgagúibe ñimun purugumig kønrrai. Trumaybe mumaytøgucha lata kønrrun. ¹⁵ Tiuswei wamwan pørigu maig taimbala: “Nu tulishibiibe ke unchagø ñim tøgagømwøwei, lamøtø tulishibiibe palappuin kømøwein køn” taig.

Titon Corintosrømay karua ørøb

¹⁶ Namui Tiuswan ‘mayanguen ungua, ungua’ chinrrab, ñimuimburab na isui lataitøwei Titoi manrraugucha isunrrai pasrigwan. ¹⁷ Pøs na nun Corintosrømay ya, øyeg maramdiig køn cha, na wamindigwan ka møriitø kømøtø, nøbe maramigwane ke marøg kuindø megaig kuig køppe, nøashib treeg martrab isua, ñimuisrømay yan.

¹⁸ Incha kan nuneg, Tiuswei tabig srø wamwan eshka kusrenanøb pasraigu, chu iglesiameratøgucha nune truba tabig wamindinabigwan nambe Titoba lincha inrrai ører. ¹⁹ Incha katø treetø kømøtø, tru iglesiameragucha nun lawa wesraig kuig køn, tru Jerusalénsreelai tab indig purugúigwan nam srua amben, nø namun lincha attrai. Nambe Señorwan maya nuguen tab indig kønrraimba, nam purugug kui pønrraigwan katøganelan

kenamartrappa, tru an tulisai gwane nam asha marøb pønrrabelø ker. ²⁰ Mugøben namun 'øyeeg kalø marøpteelø køn' tainab pønrramig kømønrrai inder, tru yeeg nørø keta tranii lan nam asha marøb tøgä pønrrønrrai tranigwan. ²¹ Kaguende nambe chiwandøgucha maig maramigwan sölwan martrab inchib melabelø ker, Señorwei merraptø kømø, misaamerai merrabgucha treetøweingue.

²² Incha nambe katøgan namui nunewan nømun lincha inrrai ører, nui mariiløyu chiyugøben ke martraptø pasrabig kui katø katø treeg møg kui nam asigwan. Incha møimbe nøbe katøguchinguen tru maramigube ke martraptøweim pasran, ñim chi isumgailø kui nø truba isua tøgagükkurri. ²³ Pøs Titobe, naimbe nan lincha megabig, katø ñimui utu chi maramigu purugub megabig, treeg køn. Inchen tru katøgan lincha ambub nuneløbe, tru iglesiamera karua øriilø, Cristoyasilbe maya nuguen tabig kønrrai pønrrabelø, nømbe treelø køn. ²⁴ Inchawei ñimbe tru møguelane truba undaguelø kuin kui ashchai kenamartrigay, iigwan tru iglesiamera mayeeløba asha kønrraingue. Katø na ñimuimburab tab kui mørøb pasraibe chigurrin kui ashchai inday.

9

Cristogurri nunelan purugumig an tulisai g

¹ Inchen tru Tiuswei misaameran purugumig tru an tulisamigweimburappe ñimune chi pøramikken palømtan. ² Pøs tru purugumigwane ñimbe purugunrrab ke muniitø pønrrabelø kui nabe ñimune ashbig kur. Incha nabe treegwan ñimuimburab macedoniasreelai utu truba tab kui waminchib pasraig køn, ñim acayasreeløbe tru tranamigwane marig pilasrøwei tranrrab chab tamara kuig købene. Inchen tru maramigwan ¡katø! marig kørrømisrrai isua ñim marøb kuibe, nøm tru macedoniasreelø truba yamelø treetøwei martrab isunrrai indin køn. ³ Øyeeg kuindøgucha tru ñimuimburab nam øyeegu truba tab kui mørøb waminchib pønrraibe, ka wamindiitø pureptinchibgunmab isua, i nunelan ørar, tru ñimuimburab na maig waminchib arrig, masken tamara kønrrai, ⁴ inchipa macedoniasreelø møiløgøben naba amrrub chi inchene, ñim chigucha marmø, pesan køben puinab melømønrrai. Pøs, kan treeg pubene, namune purø nu køriimisram neburrrab køn, ñim chab tamara melaitamappa nam ñimun chi wammøørøsrømkurrindø. Pøs, ñimune masken køriimisram neburrrun. ⁵ Inchawei øyeekkurri, i nunelan ñimuistrømay merrab ashchab amrrai øramig nabe palai asig køn tru purugumburab purugunrrab misrig købigwan tulisam purugua yandø ke chab tamara munig kønrrai. Trumay tru ñim purugumig tulisaiibe merøbala kømø, tranig kui asamdiig kønrrai, ke tranrrai inchendø, tranig kømøtø.

'Merø kømø, purugumigwan øyeeg maray' chib wamindig

⁶ Incha ñimbe iigwan isua kuy: møikkøben ke kagømønrraindiig ellguabiibe, katø treetøwei kagømønrraindiig tulishinrrun. Inchen møikkøben ellguamburab ellguabiibe, katø ellmarigwan tulisamburab tulishinrrun. ⁷ Ñim møitøgucha tranamigwan tranøppe, ñui manrrau maig tranrrab isua tøgagüig køben, treeg tranamig køn, ke tranmuinrrabna købendø, tranmøwei, kabe ke treeg tranamig kuikkurrindø tranmøweingue. Kaguende Tiusbe kasraatø tranøbigwane undaguig køn. ⁸ Inchen Tiusbe maramburab marøbig køn chigurrimbunø tøgagømigwan ñimuinug tøgagømburab unchaguen tøgagømig kønrrai, treeg maramig, chiyutøgucha ñim chi palabigwan chu urastøgucha palømø tøgagua, chigøben tabig maramigu kerriguba ñim purugub kømig unchaguen tøgagønrrai. ⁹ Inchawei Tiuswei wamwan pørigube trenchibig køn:

"Larrøbitchai tsurøb, waachameran tranøb indig køn cha.

Inchen nui tru tabig sølgandø maramibe managatig pasrabig pasran" cha

¹⁰ Inchen Tius tru ellmarøbigwan yell tranøb, pirri manrrai tranøb inchibiibe, maig palabigwan tranøb, ñimui yellwan nørø larrøbitchai marøb, tru ñim tabig sølgandø maramibe kan ellmarig misrøb lataitøwei nørø larrøbitchib inrrai martrun. ¹¹ Trumaybe ñimbe chiyutøgucha chi palømig tøgagønrrai mariilø kønrrun, chiyutøgucha purugumigu merøbala kømø, tranamburab tranøbelø kønrrai. Inchen ñim tru purugüigwan nam nømun tranen, nømbe Tiuswan 'mayanguen ungua, ungua' chib kømig kønrrun. ¹² Kaguende ñim øyeeg marøb kuibe Tiuswei misaameran chi palabigwan treeg purugüitø kørrømisrøtø, Tiuswan 'mayanguen ungua, ungua' chib kømikkucha truba truba kønrrun. ¹³ Inchen tru ñim øyeeg purugüigu ñimbe mumera kui asiilø køn. Katø nømbe Tiuswan truba tabig waminchun, Cristoi tabig srø wamyu pønrrøwa, truig maig taigwan ñim møra, truigwan kenamarikkurrimba, katø ñimbe nømun merøbala kømø purugub, katøganelø mayeelan treetøwei purugub indikkurrimba. ¹⁴ Katø nøm tru ñim purugüigwan utabeløbe ñimuyasig Tiusba waminchippe, ñimuimburab truba nu undatøga martrun, Tius nui ka yandø tab indigwan tøgagømburab tøgagønrrai ñimun tranikkurri. ¹⁵ ¡Tiuswan 'mayanguen ungua, ungua' chinrrab, wamindiitøgabe kan mandøguen tamgaig purø nuig tabig keta tranigwan!

10

Pablo Tiusweiwan nò maròb pasraigwan chinhaingai waminchib

¹ Na Pablo ñimun òyee martrigay chib waminchar, Cristoi tru purò tammayig kuitògaba, purò tab inchibig kuitògaba. Tru na ñimui malau pasrappe, chi tre chish waminchib pasròmíg kòn tainab, trube, peesròn pasrappe, maig tamigwan kelarrab, kelarrab trenchibig kòn tainabig. ² Na ñimun trenchinrrab inchar, na ñimuisròmáy arrua, namun mòilògòsròn ka namuimburaþtò isub yu pirau maig kòbashtig amòñibelò kòn chibelan kelarrab, kelarrab tamig tógagúigwan tiusmanda ñimun trendamig kòmònrri inchunrigay cha. ³ Pòs nambe misag kuinabwei inchendò, yu pirauelò maig kwayabelò kòben, treeg kwayab amòñimeelò ker. ⁴ Kaguende tru chitòga kwayamig nam tógagúibe, mòguelain kònrab kòmòtò, trube Tiusweinug maramburab maròbig, treeg kòn, ni mumaygucha chindanga murelò nugwaimandzig pònsraig pònrrelan pòtiitsamig. ⁵ Pòs truitòga nambe tru kusremburab kusrewa wamindiilanba, katò tru purab nòrreelò isuilò misaamera Tiusweimburaþigwan nebua ashmònrri sòþ pasramisròb kurrabigwanba pòtiitser, tru chigur-rimbunò isuilane Cristo maig kònrri inchen, treegu pònrònrri merrarrawa pònsròb. ⁶ Incha ñim newan mòròbelò misra pònrreemirre, tru maig taigwan mòrmeelane nambe mòra melònrri mara kòrròmartrab pònrre.

⁷ Ñim kui ñimui kabyu maig kenagòben, ka palatò isua ashibelò. Mòikkòben, isa kòmò Cristoin kurrab isua pasròwabe, trube, iigwan isua kòmíg kòn: Nòma Cristoin kuig kòbene, namgucha Cristoielòþwein kuin kui. ⁸ Maig maramigwan nam karub tòga pònrònrri Señor namun trana pònsraigwan, iigwan na purò mòg inchib waminchib pasrab lataig indinaindògucha, nabe chi kòrig misrabe pasròmumònrri. Pòs tru maig maramigwan karub pònrònrri Señor namun trana pònsròþpe, ñimun mindishaguen kòrròmartrab kòmòtò, Tiusweimburaþigu nòrròram purugunrainguen tranig kuig kòn. ⁹ Pòs na kilgama pòra, ñimun truilòþga ke kwaaròsròg kòþ lataikkucha indig kòmònrri inchar. ¹⁰ Pòs mòilòþe trenchibelò kòn: “Tru Pablo kilga pòriilòþe purò murtò tranòþig, ke menrra mur waminchibig treelò kòn cha. Inchendò nòashib namba pasrappe, chi trengatig kòmòllig, waminchibgucha chi may waminchimiig kòn” cha. ¹¹ Pòs tru treeg chibelòþe, trube, iigwan isua kòmíg kòn: nam yabsròm pònròþwa, kilga pòrigu mandò chib pòròþelòþe, ñimui utu amrrua, maròþgucha treetòþei martrab kui.

‘Nuig misròb mòg inchibig kòn’ taigwan lòþab

¹² Pòs nambe tru nòmasiitò ‘truba tabelò ker’ chib pònrrelòþe truilò mailò kòben, namgucha nòmba latailòþ ker chib pònròþmòþei, kabe nòm maig tabelò kòben namgucha treelòþwein tabelò kòþraitashchab inchib pònròþmòþei inder. Trune truilòþe nòmasiitò kangurrin kangurri mayangatig kòþashib, katòþanelò lataitòþwein kòþraitashchab inchib pònrreþpe, chugúinguen mòrmeelò kòn. ¹³ Inchen nambe mòg inchib ke purabgucha waminchib pònrònrri kòmòtò, Tius namun mayangatig martrai pònsraigwan nambe treeg-wandòþ maròþ pònrre, katò ñimuisròngatikken pumig kònrri tranigwan maròþ. ¹⁴ Kaguende nambe namuinukkurri webunagucha pònròþer, pòs nam ñimuisròþ pumuig kuig lata. Pòs nambe ñimuisròngatig Cristoi tabig srò wamwan nammerrigwei srua amrruig kòþig kòn. ¹⁵ Kabe katòþanelò nòþreelò marigu kebamba, purab mòg inchib waminchibgucha pònròþer, namuinukkurri webambub. Masken treeg kòmòtò, ñimui isubigwan Jesucristoinug pasra tógagúgu katòþguchi nòrròrab amrraimab isua muniirab meler, namui maramig ñimui utube nòrròþ larròþichib inrrai. ¹⁶ Tiuswei tru tabig srò wamwan ñim corintoelainukkurri mas yabsrònguen eshka kusrenanig kònrri; peenug katòþanelò kebamba marinug trusròþ nam kebuna mòg inchib waminchib pònròþmòþer.

¹⁷ Inchen mòikkòþen nui misròþ mòg inchib waminchib pasrag kòbene, nòasiitò kòmòþ, Señorweiwane tab kui mòròþ tabig waminchib pasròþash. ¹⁸ Kaguende nòasiitòþ ‘truba tabig kur’ chib, nuimburaþtò waminchibigwan tabig kui asha kòrròmarig kònrab kòmòtòþ, tabig kòn cha, Tius nò wamindig, trube tabig kòn.

11

Pabloba, ‘Cristo nòashib karua òriilòþ ker’ chib ka isatò inchibelòþa

¹ Ke na chugúþ mòmíg lataig na mayandò wamincha mòrtrab ñim trunon ka awentaimbe kòþan. Pòs na treeg indingucha ñimun ka awentarray chinrrab inchar. ² Kaguende ñim mòigweyasig pònrreþpe, ke truígweindò kònrri, na treeg inchib truba isub pasrappe, Tiusweinnukkurri arrubiitòþa treeg inchib pasrar. Muba kasharanrrab misrabe, truibatò kasharanrrai nabe ñimun treeg mara tòga pasrar, trube tru Cristoba, tru nòþerainrrab arrub kwalòþ nui merrab kan mu mòþbagucha kimòþ srusròþ newan chishig lataitòþei na ñimun nun treeg kenamartrab. ³ Inchendò nane kòrig isutan, tru ul puròþ may

kebenørkamig tøgagúitøga tru Evan kebenørkøb lataitøwei ñimungucha mumay køben ñimui isubigu peløsrkøngarunrraitamab tru ñim isa kømø pønrraigwanba, tabig chishchig Cristoinug pønrraigwanba. ⁴ Kaguende mõikkøben ñimun tru nam eshka kusrenani lataig kømøtø, Jesúswiwan peemay eshka kusrenanøb arrin kui, kabe tru ñim Espiritu Santo uta tøgagúigwan kømøtø, katøgan peg espíritun waminchib arrin kui, kabe Tiuswei wamwan ñim uta tøgagúigwan kømøtø, pegwan waminchib arrin kui inchibigwane, trube, ñimbe chi chimø melabelø køn. ⁵ Cristo nõashib karua øriilø misrøb, tru purab nõrreelø chib pønrrabelai merrab chiyugucha lamíig kømur nagucha. ⁶ Pøs nabe nai wamindigube kan mõrøptø purramdiig, may waminchimíig kuinaindøgucha, nebua kusreb asigube nabe maig kuigwan nebua ashibig kur. Iigwane chiyutøgucha ñim tørgandø ashchai kenamarig køn.

⁷ Ñim nõrreelø misrtrai, nabe naasiitø chigucha kømíig misrøb, Tiuswei tabig srø wamwan truburø chi utømø eshka kusrenanøb pasrappe, ¿kabe nabe kaig marøb pasrabraig kø chindah? ⁸ Na ñimun purugub pasrønrrab, kabe katøgan iglesiameranguen kerrab lataig utamig nehubig køn, nai chi palab arrubigwan tøgagøønrrab. ⁹ Pøs na ñimui utu Corintosø uñib urasma nan chi palab arringucha, munguen tranrra cha, miamuig køn. Kaguende nan chi palab arrubigwane namui nunelø Macedoniasrøngurri amrrua, tranig køn. Chiyutøgucha nabe ñim ke nan tranraindø, tranraindø inchimøønrrab, nabe purø ashiptø megaig køn. Pøs katøgucha mun miamø, nabe treetø ka megabig megamøønrrun. ¹⁰ Cristoi newan ciertonig nainug pasrai mõra lataitøwei, na chi an purugúig utømø, tru mõg inchib tab kui mõrøb waminchib pasraigwane Acaya pirausrøngucha nane muguen waminchimøønrrai katøønrramøn. ¹¹ ¿Chindimbagurri? ¿Pøs kabe na ñimun undaguig kømubra chindah? ¿Pøs Tiusbe asha pasran, nabe ñimun undaguig kui!

¹² Nabe tru purugurray chib miamø maig marøb arrigwane marøbig maramøønrrun, an utab pønrrøbendø, tru nam lataitøwei marøbelø ker chi køptø tru kemesratøguen mõg inchib waminchib pønrramigwan labein marbashmø kanmaytø kata pasrtrab. ¹³ Kaguende tru treeg inchibeløbe, Cristo cierton nõashib karua øriilø kømøn. Tru marøbeløbe ka may wamincha isatø marøbelø, Cristo nõashib karua øri lataillø misrøb treeg inchibelø køn. ¹⁴ Inchen øyeegwane ke kwaara asamikkucha kømøn. Kaguende Satanástøweinguen kan ångel tabig tørigwan tøgag lataitøwei misrøbig køn. ¹⁵ Inchawe øyebe kwaaramdiikkucha kømøn, pøs tru Satanás karuigwan marøb pønrrabeløgucha tru sølgandø tabigwan marøbelø misrøb pønrrøben. Pøs nõmui kaig marimburø maig utamig køben, treegutøweim patsønrrun.

Pablo chine chine kaig nebuinab megaig

¹⁶ Pøs nabe katøle trenchinrrab inchar: mugucha nane ke chugúí mõrmíig kui lataikkucha mara srua kømøørrunrrigay cha. Inchendø ñim nan treeg isua tøgaguabe, trube, na chugúí mõrmíig kuingucha, nan treeg ka utørray chinrrab, na maitøguen mõg inchib pasramig kønrrai. ¹⁷ Tru na naasiitø truba tab kui mõrøb mõg inchib waminchib pasraibe, nan Señor wamindingaruben wamindig kømøtø, chugúinguen mõrmubendø wamindi lataig, treeg køn. ¹⁸ Pøs truba yamelø mõiløgøbenma piraug maig køben treegu nõmasiitø purø nõrreelø mõrørai inchib pønrrøbene, nagucha treetøwei purø nuig kui mõrørai inchib pasrønrrab. ¹⁹ Ñimbe ya kusrebelø købendø, chugúinguen mõrmeelane, trube, ñimbe ke mõrøguen isrømøzhig melabelø køn. ²⁰ Møikkøben ñimun maig martrain chippe, ke treeg marøb melønrrai inchibigwanba, ñimun søtø pønsra nõ tøga kørømmisrtrab marøbigwanba, ñimun chi isa køben kerrawa, nui marøbigwanba, ñimune chigucha kømeeelø marøb nuig misrøb pasrabigwanba, ñimun maløbøtø pashaguchib, treeg inchibigwanbabe, trube, trugwane ñimbe ke chi chimøzhiitø melabelø køn. ²¹ Pøs nambe øyeeg kenamarøb pønrramibe yangucha kullaguelø købrain køn tamig, nane kørikken køtan.

Kaneløma ke nõmasiitø chinetø mõg inchib wamincha mõrene, treetøwei nagucha martrab, treeg wamindamibe na chugúí mõrmøgølig lataig wamindig kuindøgucha. ²² ¿Nømbe hebreosmera kø chindah? Nagucha hebreotøwein kur. ¿Nømbe Israelwei misaamera kø chindah? Nagucha Israelwei misaatøwein kur. ¿Nømbe Abrahamwei misaamera kø chindah? Nagucha Abrahamwei misaatøwein kur. ²³ ¿Nømbe Cristoiwan marøb melabelø kø chindah? (Pøs chugúí mõrmíig lataitøwei waminchar) Nabe nõm lataitøwei kømø, masken marøb, marameløyugucha mas mur marøb, kailan keeri yau nõmun lataitø kømø, katø katø merrarrowa keeriinab, ichaguchibgucha, mam ichagutsamigwan nõmun lataitø kømø, ichagutsamburab ichagutsinab, katø katø ke yandø øsig kømurmab isui megamig pub, ²⁴ katø trattrø pijibe judiosmera maig ichaguchibelø kuigwan treinta y nuevebatø ichagutsinab megabig kur. ²⁵ Katø pønmay tsiitøga ichib srua kuinab, katø kan pijibe kwetchab sruutøga petinab, katø pønmay barco pitis misrøb chab mincha, piu asentaben, kan pijibe kwalma y mawa nane mar tøbøtaasrø pi srua yaig megamig nehubig køn. ²⁶ Chu urastøgucha naimbe webya yamitø, yamitø nebuben, kanmaywane nõrrø pimerayu chine purayaig

megamig nebuben, kanmaybe nileelai utuwan chi kuinanrraptiig purayamig nebuben, kanmaybe naim pirau misaameratøwei chigøben marinanrraptiig pureb yamig nebuben, kanmaywane judíos kømø misaamera chigøben marinanrraptiig purayamig neububig køn. Inchen kanmaywane ciudayu korig kømðiig inchibeløyu purayamig nebuben, katø kanmaywane nu misag warab waraimøsrø korig kømðiigu purayamig nebuben, kanmaywane maryu chigøben kuinanrraptiig treegu pureb megamig nebuben, katø kanmaymerawane ka isatø ‘Cristogurri nunelø ker’ chibelø chigøben marinanrraptiig, treeg unamig neububig køn. ²⁷ Marameløgucha purø murig, trurriigu ni mandøguen kømui megamig, treeg neububig køn. Katø katø kibguen kimøwei, katø parøgwai mørøb, pi mulgwai mørøb, katø katø chigucha mamíig megamig neubub, kørrag kui megamig neubub, asru kemig chigagúinab megamig neubub inchibig køn.

²⁸ Inchen tru kømnetø kwalømmørig na isuim pasramibe iglesiamerabe mayamba chinchib kermab isub pasramig, truig købig køn. ²⁹ Møikkøben kullaarain pasrøbene, nan kullaaraig kui lataig købig køn. Inchen møikkøben kaigu srurøngwanguinab megabene, nan pusrkwabig køn. ³⁰ Na møg inchib waminchib pasramig nebubene, na truburab kømíig kullaguig kuigu, truyube møg inchib waminchib pasramørrun. ³¹ Namui Señor Jesucristoi Møskai, Tius tru managurri managatig mayanguen tabig wamindinabiibe nabe ka isatø inchib pasrømui asha pasran. ³² Rey Aretas karuigwan marøb wabig, tru Damasco ciudayu kubenadurbe tru damacenosmerai ciuda pøtøgatan laringaruin købig køn, nan kemørtrab. ³³ Inchen nane tru ciudayu pøtøgatan srug pirøbanrrig marigugurri kan pendanyu kørørørelø køn, kan tasinyu waya. Øyamay nabe truigwei taskugurri welula, ibig kur.

12

Pablon Tius nuimburabig mu asiimíig pønrrabelan kenamarøb

¹ Nabe katøgucha naasiitø møg inchib waminchib pasramig køtan, treeg mariibe chi purugumíig kuindøgucha. Nabe piab lataigu na chigøben asiilanba, Señor nuimburabelan nan kenamarailanba, trunun waminchab. ² Nabe kan møg ashibig kur, Criston kørewa pasrabigwan, mõi ya catorce añosken køn. Truigwane tru pøn srømbalærøngatig srua yaig købig køn. Nune asrbañau srua yaig køh, kabe asrbañau kømø, srua yaig køh, chindindø, truigwane maig kui mørmur. Trunune Tiustøwei asan. ³⁻⁴ Tru møwane tru srømbala Tiuswei purø tabzhiisrømay srua yaigwan nabe asha kur. (Nune asrbañau srua yaig køh, kabe asrbañau kømø, srua yaig køh, chindindø, truigwane maig kui mørmur. Trunune Tiustøwei asan.) Inchen trusrømbe ni kan mandø chaguen trendamgailø nøbe wamindi mørig køn, treegwane kan møwane waminchimørrai meriilan. ⁵ Pøs nabe tru møweimburappe si møg inchib waminchib pasrabwei indamørrun, pøs truike nawein kuinaben. Inchendø nabe naasiitø møg inchib waminchib pasrømøtø, na trengatig kømíig kullaguig kuinaigube møg inchib pasramørrun. ⁶ Pøs nan møg inchib waminchib pasrag køben, na treeg inchib pasrainguen, nabe ke chugúi mørmíig lataig indig kømubsruinrun. Kaguende nabe cierton waminchibsrubrainrun. Inchendø nabe treebe marmumørrun, na maig kuigwan asig tre lataitø kømøwei, na waminchen ñim møri lataitø kømøwei, mas nuikken kuin kui mugøben nan treeg isumørrai.

⁷ Øyeeg chigøben purø nørreelø nan kenamarig, truilø nan purab nuig kurmab isub pasramig marmørrai, nane nai asru chu uragucha kan kal lataig kebuchib pasrønrrai pasrig køn, Satanás ørig, ni mandøguen kømui pasramig kønrrai martrabig, na purab nuig misrøb pasramig kømønrrai. ⁸ Inchen nabe iigwan Señorwan pønmay ‘tiusmanda kerrarra’ cha miaben, ⁹ Señorbe nane trenchibig køn: “Tru nai ka yandø tab indig truitø ñune tsabø køn cha. Kaguende tru nai maramburab marøb pasrabiibe ñi truburab kømíig kullaguig kuigu masken tab kenamisran” cha. Inchawei treeg købene, na truburab kømíig kullaguig kuigu mayanguen tab kui mørøb møg inchib waminchib pasramørrun, Cristoi maramburab marøbig nainug pasrønrrai. ¹⁰ Inchawei nabe na truburab kømíig kullaguig kuigu lata, nan tsalø waminab pasraigu lata, nan chi palabigu lata, Cristogurri nan kaig martrabgøba indinab megaigu lata, nabe truba tab kui mørøb kasraarar.

Pablo corintosreelan isub

¹¹ Pøs nabe kan chugúi mørmíig lataig indig køn. Inchen na treeg inchaimbe nane ñimweinre indig køn. Naimburab tabig waminchippe, ñimguen tabig wamindig kønrraptiig kur. Kaguende tru Cristo nøashib karua øriilø misrøb purab nørreelø chib pønrrabelaimbe nabe chiyugucha lamíig kømur, nabe maya chigucha kømíig kuinaindøgucha. ¹² Cristo nan nøashib karua ørig kuin kui asamig, maig kuindøgucha tammay nabe ñimui utu kenamarig køn: Tius naba pasrain kui ashchai mariilø marøb, kwaara asamdeelø marøb, maramburab mariilø marøb, treeg. ¹³ Tru katøgan iglesiameran lataguen kømø, ñnabe ñimun chiyurren

lameelø marøb kørøra pønsrøbrah? Na ñimun tranrrai miamuig, trutøwein køn. Pøs na miamub kalø marigwan ulø paymø pesannarrai chinrrab inchar. ¹⁴ ¡Au! Nabe katøguen chab tamaraguen megar ñimun ashchab attrab, møimbabe chabguen pønmayguen kønrrab køben. Treetøwei katø na ñimun mianrrab kømø arrumørrun. Kaguende nabe ñim chi tøgagüigwan isua lamøtø, ñimun isur. Pøs kaguende uremera møskalayasi esegab tulisamig kømøtø, uregweyasig esegab tulishib melamibe møskalainguen køn. ¹⁵ Inchawei nabe tab kui kasraatø naiwan kerrigu kastamønrrun, naasiitøweinguen ñimuyasig patsønrrai marøb. Na ñimun mas undaarabene, çñimgurrimbe nane tre undaaramønrrapteh?

¹⁶ Pøs trube, naimburappe ñimbe ashibeløguen na ñimun tranrrai miamuigwan. Inchendø nabe ke chi maramdiig køtashib ashib megabig køndainabig kuig køppe, trube, çke chi isa køben kabe ñimun chi wesrabraig køppeendi? ¹⁷ çKabe na tru møilan køsrøn na ñimuisrømay karua øriiløtøga chi isa køben, kabe ñimun chi wesrabraig kø chindah? ¹⁸ Nabe Titone: “Tiusmanda ashchab irrunrrig” cha, Cristogurri namui katøgan nunewanba nun lincha inrrai ørig kuig køn. çKabe Titobe ñimune chi isa køben chi wesraig køppeendi? çName yamba pailøba treetøwei kandø isua marøb, katø pailøba yamba tru maywandøwei pønrrammørgøppeh?

¹⁹ Nambe ñimui merrab ka tab wegørrag køptørre inchib pønrrabelø kui, çñimbe katøgucha møi øyangatig kabe treeg asønain pønrrøgeh? Treeg kømøtø, nambe waminchippe, Cristoinug pønrrabelø kui asamdiig Tiuswei merrab waminchib pønrrer. Inchen nam kerrigu mariiløbe, ñim, nai undaarailø, Tiusweimburab ñim nørørab amrrain køn. ²⁰ Pøs nane køristö køtan na ñimuisrø puben, na ñimun mailø kønrrai isua pasraig ñim treelø kømøwei, katø ñimgurri nan maig kønrrai isua pønrraig treeg kømøwein køptinchen tsaotø indinab pønrrainabgunmab. Nane køristö køtan ñimui utu aleguiyam lailø, møikkøben chi tøgagøben pusrkwai asiilø, purø trømbøig namig kui indiilø, nøørø katøgan søtømisrøb tarømisrøb ambiilø, katøganuimburab wam kusrub wamindiilø, isa wamincha møriilø, purø nørreelø misrøb pønrrailø, mumaygucha kømüig mara pønrrailø, treeg kønrraitamab. ²¹ Incha nane kørig isutan na ñimun katø ashchab puben, Tiusbe ñimui merrab nan kørig purøøren, truba yamelaimburø nan kisamig nebunrraitamab isua, tru merrabwan nømui køsøngønrraptig mariilanba, møgueløba, ishumburmeraba trømbøig mariilanba, mu mandiimüig chi marøg køben trømbøig maramitø srua ambiilanba isua mørmuin køben.

13

‘Isua ashiptø melønrrigay’ chib wamindiilø srabeig

¹ Na ñimun ashchab arrumig møimbabe pønmayguen kønrrab køn. Chigøben kalø puigwan asha marøppe, kan pailø kui, pønelø kui ‘maig purayaigwan treeg køn’ cha nømashib eshkabendøwei, maig kønrrabigwan asha maramig køn. ² Nabe tru pamay kønrrabyu marig merrabwan arrua, ñimba pasrøwa, kanmaytø isua kønrrai eshkaig købig kuig køn. Na møi katø ñimba pasrømøwagucha katøle katø eshkanrrab inchar, tru merrabwan kaig marøbelanba, mayeelø katøganelanba na katøle arruppe, kan waachaalleelø chib mun lastima ashchab attrab kømur cha, ³ kaguen ñimbe Cristo nagurri waminchib pasrabig kuitashchab ashig køb ñimbe trurre lab kuig køben. Cristobe ñimba mumay kømigwane chi martrabga kaizhikkucha kømøtø, nøbe ñimui utu maramburab marøbig køn. ⁴ Pøs isa kømø, Cristobe misagwei asr lataitøwei kullag kua, kurusyø mesrøben, kwaig køn. Inchendø Tiuswei maramburab marøbiitøga øsig wan. Pøs katø treetøwei nambe Cristoinuube kullaguelø kuinabendø, Tiuswei maramburab marøbiitøga Cristoba øsig pønrramønrrun ñimuyasig marøb pønrrønrrab.

⁵ Ñimui isubigwan Jesucristoinug pasra pønrraigu pønrrabraitashchab tab isua ashib, maig købraitashchab ñimasiitøwei paya mørøb inday. çJesucristo ñimuinug pasrabig kuin kui ñimbe ashmeelø kø chindah? tru ñim maig pønrraitashchab isub pønrraigu chi kalø webammuikkurrimbe. ⁶ Pøs namui isubigwan Cristoinug pasra tøgær kua nam tabig webamba pønrraigwan ñim nebua ashchun. ⁷ Incha nambe Tiuswan purugurra cha mier, ñim chigucha chi kalø marøb kømønrrai. Kabe tru namun mailø kuitashchab ashen, tab webamigwan ashchai isua kømøtø, ñim tabigwan marøbelø kønrrai isua inder, ñimuin kabyube nambe kegørra pønrrai lataig asønaindøgucha. ⁸ Kaguende nambe tru newan ciertonigwane chi treeg kømønrrai martrab indamgaig køn. Treeg kømøtø, tru ciertonigweimburab nam marøb pønrramibe køn. ⁹ Inchawei namun kullaatø mørøraingucha, ñim tabig mur pønrrøbene, kasraarabelø ker. Incha nambe Tiuswan iigwan miabelø ker: ñim newan tabelø kønrraimab isua. ¹⁰ Inchawei øyeekkurri nabe yabsrø pasrappatøwei iigwan pørar, tru na ñimuisrø pua, nai maramigwan na tsakkandø marøb pasrønrrab arrumig kømønrrai. Señor nan ashib karub pasrønrrai tranøppe, pinishib inrrain kømøtø, kusrua pønrsrøbguen inrrai tranig køn.

'Ka amõñigüeh' chib wamindiilø srabeig

¹¹ Trube, mõimbe yandø, nai nunelø, maya nuguen kasraaray. Ñimbe newan tabelø kønrrab inchib, na 'øyeeg, øyeeg melønrrigay' chib wamindigwan møra marøb, katø pønrrabgucha kandø isua pønrrønrrigay. Katø kangurrin kangurri tab warønrrigay. Tius tru undag købig tru chi isungaig tab købiibe ñimba pasrønrrun. ¹² Kangurrin kangurri 'ka amõñigüeh' chib tabig wamab, Tiuswei undag købiitøga tasig tranay. ¹³ Tiuswei misaamera mayeeløba yuelø ñimun 'ka amõñigüeh' chib wam øran.

¹⁴ Señor Jesucristoi ka yandø tab indiiba, Tiuswei undag købiiba, Espiritu Santoi tru trakkandø lincha pasraibabe ñim mayeeløba pasrønrraimab isur.

Gálatas

‘Ka amõñiqueh’ chib pørig

¹ Na Pablo Jesucristo nõashib karua ørig, mu møguelø nõmuimburab karua ørig kømøwei, mu katøgan inrraincha karua pasrig kømøwein kur. Treeg kømøtø, Jesucristoba, katø Tius Møskai Jesucriston kwaitai utugurri øsiirangarubiiba karua ørig kur. ² Namui nunelø mayeelø naba warabeløba Galacia pirausrø iglesiameran i kilgawan na pørar. ³ Namui Tius Møskaimba, Señor Jesucristoba nui ka yandø tab indigwan køben, chi isungai tab købigwan køben ñimun tranrrun. ⁴ Truibe nam kaig mariilaimburab nõashib kwanrrab pasramisrig køn, nam warain kwaløm larrø kaig pasrabigurri namun wesraig kønrai, tru namui Tius Møskai maig kønrrain køben, trumay. ⁵ Truigwan tørguegwalmabig kønrrun managatig. Treeg kønrrun.

Kaigyugurri wesrab wam katøgan peebe chi kaagøn

⁶ ¡Paare! Kan øyeg misaamerabe mailø kermab ashar, Tiuswei tabig srø wamwan peemay yunømara srua pønrrønrrab, tru Cristoi ka yandø tab indiitøga ñimun wamabig Tiuswan chabguen yandø yanayutø tarømisrøbguen ambin køben. ⁷ Tabig srø wam katøgan peg kuimba kømøtø, møiløgøben ñimune ke ka iløsrkøb, Jesucristoi tabig srø wamwane ke kan mumaygucha kømfig kønrrai mindisha pønsrcøg køb indan. ⁸ Namdøwein kui lata, kabe kan ángel srømbalsriig kui lata, tru tabig srø wamwan nam ñimun eshka kusrenani lataig kømøtø, katøgan peemaytø yunømara waminchibiibe, managatig trømbøig nebuig pasrønrrai pasrig købash. ⁹ Nam ñimun eshkaigwan, mõi katøle katø nabe eshkanrrab inchar: tru ñim uti lataig kømøtø, møikkøben tru tabig srø wamwan yunømara peemaytø eshka kusrenanøbiibe, managatig trømbøig nebuig pasrønrrai pasrig købash cha.

¹⁰ ¿Nabe misaamera nan tabchamab lab pasrabrah, kabe Tius tab inchai lab pasrabrah chindah? ¿Kabe misaamera tabzhiig inchai lab pasabra chindah? Pøs na katøgucha misaamera tab kui møtraai na nõmun tabzhiig inchib pasrabig kuimbe, trube, nabe Cristoi marøb megabig kømubsrubrainrrun.

Pablon Tius martrai karua pasrig

¹¹ Iigwan ñim, nai nunelan, wammøøsrkønrrab inchar, tru tabig srø wamwan na eshka kusrenaniibe møguelø nõmdø isua wesruigwan wamindikkucha kømøn. ¹² Pøs nabe, kan møywan utig kømøwei, katø kan møg kusrenanig kømøwein kur. Treeg kømøtø, nan Jesucristo ashchai kenamaren, treeg utig købig køn.

¹³ Kaguende ñimbe manawei nane wammøøbelø kuinrrun, judíosmera Tiusweyasig maig marameløyu, na trunun marøb uñib uras na merrabsrø maig inchib uñibig kuigwan: kan namig købiitø ¡katø! chindinrrabna kui inchib, Tiuswei iglesian kaig martrab wendautø llirab, nõm tru treeg marøb tøgagúigwan kerriguwan pinishinrrab truba truba inchib unig købigwan. ¹⁴ Namui misag utu, naba ketøtø nõrrørawarwei utu møyilan køben nabe kanab kusrebig købig kur, judíosmera Tiusweyasig maig marameløyube, kaguende nabe merrabsrø namui kølli misaamera maig marøb amrruigwane maikken purøbuniimig kønrrai inchibig købig kua. ¹⁵ Inchendø Tiusbe nane nai usrai patsø umbu wabenbatøsrøwei nane tarømara, nui ka yandø tab indiitøgatø nane wamig køn. Incha nun tabig asønaben, ¹⁶ nui Nusrkawan na nebua ashchai kenamarig køn, judíos kømø misaamerai utu nuimburabigwan na eshka kusrenanamig kønrrai. Inchen nabe tru urastø mu møywan paya mørmøwei, ¹⁷ katø naguen treeg kømøwatø Cristo nõashib karua øriilan payrrab Jerusalénsrømay nebiimøwei indig køn. Treeg inchimøtø, Arabia pirausrømay ya, trugurrimbe katøle Damascosrømay arrig købig køn.

Jesucristo nõashib karua øriilø katøganeløba Pablo lincha waminchib

¹⁸ Indiibe yandø pøn pila puraißen, Jerusalénsrø nabe Pedroba waminchab ya, trusrø nõba parru kørrømisrøbig kur. ¹⁹ Cristo nõashib karua øriilan nabe trusrømbe møywangucha ashmur. Ashippe, Señorwei nuneg Jacobondøh ashar. ²⁰ Na ñimun pøriibe, Tiuswei merrab isa kømøtø, treeg køn cha, treeg pørar.

²¹ Incha trugurrimbe Siria pirausrømayba, Cilicia pirausrømayba ibig kur. ²² Nane Judea pirausrø Cristoi iglesiamerabe malauguebe ashmeelø srø købig køn. ²³ Truiløbe øyegwandøwei wammøøbelø køn: “Tru merrabsrø namun kaig marøb llirab uñibig købiibe, møyimbe tru Jesucristoi tabig srø wamwan eshka kusrenanøb unan taig, tru merrabsrømbe nõ pinishinrrab inchib unig købigwan.” ²⁴ Incha nagurri Tiuswan truba tabig waminchibelø køn.

2

Cristo nõashib karua õriilõ Pablon chi chimõ ka utab

¹ Indiibe yandõ patorce años misren, katõ Jerusalénmay Bernabéba ibig kur, katõ Titongucha tõgatõ pera. ² Inchendõ nabe trusrõmay ippe, Tius nan trusrõmay inrrai nan kenamaren, nabe treekkurri yaig kõn. Incha tru Tiuswei tabig srõ wamwan judíos kõmõ misaameran na mandõ eshkab kusrenanõb unigwan nõmun eshkabig kur. Nabe truigwan marõppe, tru tabelõ kui asha tõgagüig nõrreelõba, namdõ nõõrõ tulundzuna trunun wamindig kõn, na tru mõi marõb pasraigwanba, na tru marõb unig kõbigwanba, ka treeg marõb uniitõ puraimõnrrai. ³ Inchendõ na pera yaig Titon kõbenguen griego kuingucha, nune circuncidaweig kõnrrai inchimuig kõn. ⁴ Tru treegwan martrai inchibelõbe ka isatõ Cristogurri namui nunelõ chib isabelõ sõlwan kõmõ, peemaytõ kusrenanõbelõ, ashmõwatõ nilõ kegõrrin kõbig kõn, nam Cristogurri chi ilõsrkaimeelõ melaigwan maig inchibelõ kõtashchab larõnrrab, katõle truyutõwei kegõrra melõnrrai martrab. ⁵ Inchen nambe nõm chi tailan ni kan petõzhiitõgüen alrranmeelõ ker, Tiuswei tabig srõ wam newan ciertonibe nõimu utu maig kõbiibe treeetõ pasrabig pasrõnrrai.

⁶ Tru tabelõ kui asha tõgagüig, tru nõrreelõbe, nane õyeege martrig cha, srõibe chigucha eshkawa pasrmuig kõn. Tru truilaimburappe, nõm nõrreelõ kuigwane naimburappe trunun isua ashib pasramibe chigaagõn. Põs Tiusbe muingatõgucha pasrõmiig kõn. ⁷ Masken treeg inchibgunrriibe Tiuswei tru tabig srõ wamwan judíos kõmõ misaameran, tru circuncidameelan na eshkab waminchib unamig kõnrrai, nan trana pasrig kuin kui ashibelõ kõn, judíosmera circuncidawarwan kusrenanõb waminchib uñchai Pedron pasrig kõb lataitõweingue. ⁸ Pedron tru judíos misaamerayasig Jesucristo nõashib karua õrig kõnrrai, tru nõ marõb uniilõyu marõb pasrab Tiustõwei na marõb uniilõyugucha marõb pasraig kõn, tru judíos kõmõ misaamerayasig Cristo nõashib karua õrig kõnrrai. ⁹ Nan õyeege kõnrrai tranig kuin kui nebua ashabe, Jacoboba, Pedroba, Juanba tru tabelõ kui asiilõ, kan pilarmera latailõ kui asha tõgagüilõbe, nanba, Bernabéwanba kusrmay tasigwan tranõbelõ kõn, yandõ mõimbe lata lincha marõb amõñibelõ kõnrrab cha, treeg kenamarõb, nambe judíos kõmõ misaameraisrõmay amben, nõmbe judíosmera circuncidailaimy ambamig kõnrrai. ¹⁰ Namune eshkappe, waachameraimburab pesannamõ isua kõnrrai, trunundõh eshkabelõ kõn. Põs nabe trununwei truba truba isua marõb megabig kur.

Pablo Antioquiasrõ Pedron 'kalõ marin kõn' cha namab

¹¹ Inchendõ wendõ Antioquia ciudasrõ Pedro puben, nabe nun malaugue 'õyeebe maig margu' chib truba mur namabig kur, kaguende nõ treeg mariibe, pella marõb pasraig kõben. ¹² Kaguende Jacobo karua õriilõ mõilõgõsrõn amrrumõwatõbe, judíos kõmõ misaameraba ka lincha mab uñabe, truilõ yandõ pubene, trube, nõõrõtõ inchib, yandõ linchimub kebibig kõn, tru judíos kõmõ misaamera kõrebelane, trube, circuncidamig kõn chib, treeg inchib sõtõmeran kõrig kõptõ. ¹³ Inchen Jesucriston kõrewa põnrrabelõ katõgan judíosmeragucha, Pedro tru kalõ marõb pasraigutõwei marõb kebamben, tru nõmguen treeg marmubendõ, treeg marõbelõ misrõb põnrraigu Bernabégüen tõga kebeña pasrabig kõn. ¹⁴ Inchawei Tiuswei tru tabig srõ wam newan ciertonig maig kõben treegwan sõlgandõ amõñimuin kui ashabe, nabe mayelai merrab Pedrone trenchibig kur: "Ni ya judiõgüen yandõ kan judiõ kõmiig lataig marõb uña, ¿judíos kõmõ misaamerane, trube, ñigan judíosmera latailõ kõnrrai martrab inchib pasrõtirru?" cha.

Isubigwan Jesucristo pasra tõgagüikkurri kaigygurri webambamigwan tõgagõb

¹⁵ Nambe kal-lainukkurri trendõ judíos misaamera ker, judíos kõmõ misaamera kaig marõbelõ kõmõtõ. ¹⁶ Inchendõ nambe ashibelõ ker, tru maig maramigwan martrai Moisés põrig truig maig karuilan treeg mara, ni kan muguen chi kaig kõmiig lataig tabig kõrrõmartrab kaimaigwan. Treeg kõmõtõ, isubigwan Jesucristoinuutõ pasrikkurri, treeg kõn. Namgucha Cristo Jesúswan kõreig kõn, isubigwan Cristoinug pasra tõgagüikkurri chigucha chi kaig kõmeelõ lataig kõrrõmarig kõnrrab, tru maig maramigwan martrai Moisés põrig maig martrain chibig kõben trunun mara kõmõtõ. Kaguende tru maig maramigwan põrig, truig maig chibig kõben treelan mariitõgabe, muguen chi kaig kõmiig kui lataig tabig kõrrõmarig kõnrraamõn.

¹⁷ Põs nambe Cristogurri chigucha chi kaig marmõwa lataig kõnrrab inchib melõben, trube, mõi Cristoinuube katõ nambe kaig marõbelõ kuin kui treeg puptinchene, trube, ¿Cristobe kaig martrainguen inchib pasrabig kõn ta chindah? ¡Kah! mumaygucha chi treeg kõnrraamõn. ¹⁸ Tru maig maramigwan martrai Moisés põrig maig chibig kõben trunun na mas treeg marõb pasrõmõnrrab pinishib patsõgaigwan, katõle trunundõwei kusrua pasrõb kebyabe, tru na treeg marmõnrrab cha wamindigwane natõwei itõbunab pasraig webinrun. ¹⁹ Tru maig maramigwan martrai Moisés põriibe yandõ nane chi

martrabgaikkurri truigweimburappe yandø nabe kwaig lataig kur, na Tiusweyasig øsig pasrønrrab. ²⁰ Kaguende nabe Cristoba kegøtø kurusyu mesraig lataig kuig køn. Incha mømibe nabe yube naimburab naasiitø øsig uñmøtø, Cristo nainug pasran. Møi ya na øsig uniibe, Tiuswei Nusrkaweinug isubigwan pasrikkurri øsig pasrar, nøbe nan undaarawa, nøashib nayasig kwaig køn. ²¹ Nabe Tiuswei ka yandø tab indigwane kashmur. Kaguende tru maig maramigwan martrai Moisés pørig maig taigwan treeg mariitøga, chi kaig kømíig lataig tabig pasrønrrab indamig kuig kuimbe, trube, Cristo kwaibe ka kwag køptø kwaig lataig webibsruiinrun.

3

Isubigwan Jesucristoinuutø pasra pønrraiba, maig maramigwan martrai Moisés pøriiba

¹ ¡Ñim Gálatasmera larrø chugú mormø misaamera! ¿Ñimune øyeetø mumaygucha wegønønrraingiga lataig melønrraimbe ñimune murre may søtiicha pønrsøta? Jesucristone tru kurusyu mesraig køn cha, ñimun ke tab asha kønrrai kusrennøb wamindigwan øyeeg mar-traimbe. ² Nabe ñimuimburab chi mas kømøtø, iigwandøh wammørinrrabna kōtan: ¿Tru maig maramigwan martrai Moisés pørig maig chibig køben treegwan mara, Espiritu Santon utig køh, kabe isubigwan Cristoinuutø pasra, tru tabig srø wamwan mørikkurrin kø chindah? cha. ³ ¡Kan ñim kui, larrø chugú mormø misaamera! Espiritu Santotøga marøb pølbsara, ¿trube, mømibe chu punrrab indamigwane ka ñimuimburab ka ñim mariiløtøgatø punrrab inchib kōtirru? ⁴ ¿Ñim chinetø chinetø pøsig kuig mørøb puraambiibe, trube, chiweingucha chi purugumuig kønrrab kø chindah? Pøs purugubwei indig kuinrrun. ⁵ ¿Kabe Tiusbe nui Espiritun ñimun tranøb, katø tru maramburab mariilan ñimui utu marøppe, tru maig maramigwan martrai pørig, truig maig chibig køben trunun ñim marikkurri treeg mara chindah? ¿Kabe tru tabig srø wamwan ñim møra køreikkurrin kø chindah?

Abraham nui isubigwan Tiusweinug pasrikkurri Tiusbe nune kaig kømíig lataig tabig kui asig

⁶ Abrahamma Tiuswan øyeetøwei køreben, nune chi kaig kømíig lataig tabig kørrømarig købig køn. ⁷ Inchawei isua asamig køn, isubigwan Tiusweinug pønrsøbeløbe si, Abrahamwei ureemera kuin kui. ⁸ Inchawei Tiuswei wamwan pørigube manasrøwei trendaig købig køn: Isubigwan Tiusweinuutø pasrikkurri judíos kømø misaamerangucha chi kaig kømeelø lataig tabig kørrømariilø kønrrain cha. Tiusbe kanmaytø nui tru tabig srø wamwane Abrahamwan eshkaig købig køn, øyah chib: “Judíos kømø misaamera chu pirausreelandøgucha ñigurri mayanguen tab indiilø kønrrun” cha. ⁹ Inchawei kørebeløbe tru Abraham Tiuswan køreb møøba kanbalatø mayanguen tab indiilø køn.

¹⁰ Kaguende mayeeløba tru maig maramigwan martrai Moisés pørig, truig maig chibig køben treeg mariitøga trumay kaigyugurri webamrrab inchibeløbe, trømbøig nebuig pønrrønrrai pønrsailø køn. Kaguende treeg pørig pasran: “Mundøgucha trømbøig nebuig pønrrønrrai pønrsailø kønrrun cha, tru maig maramigwan martrai pørin kilgayu maig taig-wan marøbig marmeelane.” ¹¹ Inchawei tru maig maramigwan martrai pørig maig chibig køben, treeg mara, Tiuswei merrappe, chi kaig kømeelø lataig muguen tabig kørrømisruiig kuin kui torgandø asamdiig køn. Kaguende: “Sølgandø tabig uñibiibe isubigwan Tiusweinuutø pasra tøgagúikkurri øsig uñchun.” ¹² Inchen tru maig maramigwan martrai pøriibe, tru isubigwan Tiusweinuutø pasra pønrraigugurri arrumíig køn. Treeg kømøtø, tru maig maramigwan pøriibe trenchibig køn: “Truig maig karuilan marabe, treeg mariiløtøga øsig uñchun” cha.

¹³ Cristobe nø namun pena, kaigyugurri wesruig køn, tru maig maramigwan mar-trai pørig namun trømbøig nebuig pønrrønrrai indigugurri, tru nø namuimburab nøashib larrø trømbøig nebuig pasramisra. Kaguende Tiuswei wamwan pøriibe trenchibig køn: “Mutøgucha kan tusryu mesra kweetsinabiibe larrø kaig kui asig kønrrun” cha. ¹⁴ Øyeeg marøppe, Abrahamwan tru mayanguen tabigwan tranig købiibe Cristo Jesúsurrri tru judíos kømø misaameran tøga nebunrrai indig kuig køn, isubigwan Jesucristoinuutø pasra, Espiritu Santon tranrrab kørrømisrig købigwan nam utamig kønrrai.

Maig maramigwan martrai pøriiba, Tius tranrrab misriiba

¹⁵ Nai nunelø, mømibe misag maig waminchibelø køben nabe trumay isua waminchab inchar: ‘Øyeeg marig kørrømisrtrai treeg martrab’ cha, kan møg wamindigwan købenguen yandø treeg marig kørrømisrtrai pøra kørrømarigwane, utsøgutsamig kømøwei, kabe srøitø nemaramig kømøwein køn. ¹⁶ Inchawei Tiusbe Abrahamwan ‘øyeeg marig kørrømisrtrai treeg martrab’ cha kørrømisriilane Abrahamweinkurri arrub misagwein kønrrai tøga trencha pasrig køn. Nui wambe: “misaamera srøig srøig kurrab amrrubelø” chimíig køn, purø nørøø kui lataig. Treeg chimøtø: “ñuinukkurri kandøzhiitø arrub misagwein” taig køn,

truibe Criston. ¹⁷ Inchawei nabe trenchinrab inchar: Tius Abrahamwan manasrøwei tru nuinukkurri acuerdon treeg martrab cha kandø isua nø kørørmisrigwane, tru maig maramigwan martrai Moisés pørig 430 años purailben wendau arrubiibe, treeg marig kørørmismørriai martrab kaimanrrun cha, Tius tru øyeeg martrab cha kørørmisrigwan treeg marmuig kui lataig mara kørørmartrab. ¹⁸ Inchawei tru namun keta tranamig tøgagúigwan tru maig maramigwan martrai pørig truikkurri utamig kørnrrab kui kuimbe, trube, tru ketig utamigwane tru ‘tranrrumøn’ cha kørørmisrikkurri utamig kømubsruinrrun. Inchendø Abrahamwane Tiusbe keta tranamig tøgagúigwan ka yandø keta tranig købig køn, tru ‘tranrrumøn’ cha kørørmisrig truikkurri.

¹⁹ Trube, treeg købene ¿tru maig maramigwan martrai Moisés pøriibe chindamigweyasig kerah? Pøs trunune tranøppe, tru kalø marigwan chigúí nebua ashchai treekkurri tranig købig køn, tru ‘tranrrumøn’ cha kørørmisrig, tru Abrahamweinukkurri arrubig arrum-nøgatig truigwan marøb kømig kørnrrai. Inchen tru maig maramigwan martrai pørigwane Tiusbe ángelesmeragurri kan møg katøganelayasig purøwaminchabigwan tranrrai tranig køn. ²⁰ Inchawei Tiusbe Abrahamwan tru ‘treeg martrab’ cha wamincha kørørmisrøppe mu katøgan purøwaminchabig palain kømøtø marig køn, pøs Tiusbe nøtø kandø kua.

Tru maig maramigwan martrai pørigwan Cristobe patsøgøb

²¹ Trube, treeg købene, ¿tru maig maramigwan martrai pøriibe, Tius tru ‘treeg martrab’ cha kørørmisriilane treeg marmuig kuig lataig, kabe sötø pasramisrøb nøørøtø kutchab inda chindah? ¡Mumaygucha chi treeg kørnrraamøn! Pøs maig maramigwan martrai tøgagúig, tru øsig kømigwan tranrraptiig kuig kuimbe, trube, tru sølgandø tabig mariibe tru maig maramigwan martrai pørikkurrin købsruinrrun. ²² Inchen Tiuswei wamwan pøriibe trenchibig køn, maya misamerabe kaig maramigutø melørrai merrarrawa tøgagúilø køn cha, tru isubigwan Jesucristoinuutø pasra pønrraikkurri Tius tru tranrrab misrigwan nun kørebelane tranamig kørnrrai.

²³ Inchen tru isubigwan Jesucristoinug pasra tøgagømig arrumøwatøbe, tru maig maramigwan martrai pøriibe namune nø merrarrawa tøga pasrabig køn, isubigwan Jesucristoinuutø pasra pønrramigwan ashchai kenamariilø kømnegatig wegønømø pønrrørrai. ²⁴ Inchawei tru maig maramigwan martrai pøriibe namune Cristoinug pegutchab nø pereb pasrabig lataig kuig køn, isubigwan Jesucristoinuutø pasra tøgagúikkurri nam chi kaig marmeelø lataig tabig kørørmisra pønrramig kørnrrai. ²⁵ Trune mømbe yandø tru isubigwan Jesucristoinuutø pasra tøgagømig puikkurrimbe peguchib pera liraindeelø melømer. ²⁶ Inchawei isubigwan Cristo Jesúsweinug pasra tøgagúikkurrimbe ñimbe mayeeløba Tiuswei ureemera køn. ²⁷ Incha Cristoba kanbalatø misrrab mayeeløba ñim piu umbu ulsrailøbe, yandø Cristotøga pinøbuiilø misrin køn. ²⁸ Mømbe yandø ‘judío køn’ tamig kawei, ‘griego køn’ tamig kawei, ‘karuindiig megabig køn’ tamig kawei, ‘mu karuimúig nuimburab uñibig køn’ tamig kawei, ‘møg køn’ tamig kawei, ‘ishug køn’ tamig kawein køn. Kaguende Cristo Jesúsba kanbalatø pønrraikkurri ñimbe mayeeløba kandø køn. ²⁹ Incha ñimbe Cristoieilø kuikkurrimbe, yandø ñimbe tru Abrahamweinukkurri amrrub misamera køn, Tius tru keta tranrrab misrig truig maig køben treeg ketig utønrrabelø.

4

Mømbe karua srua kuindiig melabelø kømøtø, yandø nusrkalø ker

¹ Incha nabe trenchinrab inchar: Kan yauma, tru chi købigwan ketig utønrrab unø lamúig srøbatøbe, kan karuindiig megabig maig køben, treetøwein køn cha, tru chigurrimbunø købigwan puaiibe nøwein købendø. ² Masken treeg kømøtø, tru unøbe nøm møilø ashib pera kørnrrab kørørmisrøbeløba, katø tru unaimburab chi købigwan nøm ashib kørnrrab pønrramisrøbeløba truilø ashib pera kuindiig køn, møskai tru maya yanagatig treeg kørnrrain cha pasrig truig nebunnegatikke. ³ Inchawei namungucha treetøwei, nam ureemera latailø srø købenbatøbe, yu pirø muba kuimburab mandø isua marøb kømig tøgagúilø truig nø merrarrawa tøgagúig melabelø købig ker. ⁴ Inchen ke yandø treeg maramig pubene, Tiusbe nui Nusrkawan ørig købig køn, ishug misagweinug kal-laweig, tru maig maramigwan martrai Moisés pørig maig chibig køben treegwan marøb megabig. ⁵ Tru maig maramigwan martrai pørig maig martrain karuben, treegwan marøb melabelan, namun pena wesranrrai ørig køn, nam nui trendø trag ureemera latailø kømigwan utamig kørnrrai. ⁶ Incha yandø mømbe Tiuswei ureemera kuig købene, Tiusbe nui Nusrkawai Espiritun namui manrrømerayu pasrønrrai ørig køn. Inchen tru Espiritu Santobe truba truba miabig køn: “Abba, nai Møskain” chib. ⁷ Inchawei treeg købene, mømbe yandø ñibe karuindiig megabig kømøtø, nusrkain køn, trube, yandø nusrkai misra kørørmisrikkurrimbe, tru keta tranamigwangucha utønrrabig kørnrrai marig køn Tiusbe.

Tru maig maramigwan pørig ke truig srua ambiilø melømønrrai wamindiilø

⁸ Pøs ñimbe Tiuswan nebua ashmeelø køb uras merrabsrømbe chi cieron tiusmera kømeelan karuindiig melabelø købig køn. ⁹ Trune mømibe yandø ñim Tiuswan nebua ashen, kabe Tius ñimun yandø mumeru kui asiilø kuig køppe, trube ¿yu pirø muba kuimburab mandø isua marøb kømig tøgagüilø truig nõ merrarrawa pasrabigwan katøle truigwan chinchab marøb kebamgue? Yeeg chiwiingucha chi purugunrrabgaig, kaizheeløyu, ¿ñimungan katøle truilandøwei marøb melag kuitarru? ¹⁰ Ñimbe katøgucha mõ kwalømmerawane øyeeg marmumig køn chib, i pølmerawane iigwan maramig køn chib, øyeeg pølmera arrubene, øyeelan maramig købig køn chib, i pilamera pubene, ilan maramig køn chib, ñimbe treeg inçibelø køn. ¹¹ Nane ñimuimburab truba kørig isutan, na ñimuimburab tab kønrrai marøb megaibe, ke ka treeg marøb megaitø purainrrab kø chindermab isua.

Nun chitø purayailø

¹² Nai nunelø, tiusmanda na lataitøwein kørrunrigay chinrrab inchar, nama ñim lataitøwein kønrrab pasramisrig købene. Pøs ñimbe nane chigucha chi kaibe marmuig køn. ¹³ Pøs ñimbe ashibelø køn, na srøsrøwan Tiuswei tabig srø wamwan ñimun eshkab kusrenanøb uras nai asru kwanrrøbe Tiuswei wamwan wamindig kønrrai treeg puig købigwan. ¹⁴ Inchen nai asru tru treeg kwanrrøbe ñimune ke chindashig køb lataig indingucha, ñimbe nane køsøn kui inçimøwei, kashmøwei indig køn, masken ñimbe treeg inçimøtø, nane kan Tiuswei ángel kui lataig, kabe Cristo Jesús kui lataig utig købig køn. ¹⁵ ¿Tru ñim treeg tabig kasrag købig tøgagüig købigwane, mømibe chu chincha pønrrøgue? Pøs nabe ñimuimburab treeg tamig tøgagur: ke ñimbe ñimui kabmeranguen wesrua, nan tranamdiig kuimbe tranømmøø inçibelø købig kuig køn cha. ¹⁶ Maig købig kuigwan na waminchib pasrappe, ¿kabe na ñimun tsalø køb ashig kømui inçibig misrarre inçib pasrabra chindah? ¹⁷ Tru kusrenanøbølø katøganeløbe ñimune nõmui marøb køb ke køsraatø inçibelø køn, chi tabig isua kømøtø. Masken ñimune namuinukkurri nõørø misrrai inçib køn, ñim nõmuingatø misra nõmun ke chinsraatø inçib pønrrørai isua. ¹⁸ Pøs tab kønrraimab isua, chu uraskucha ke chinsraatø inçib isub pønrramibe tabigwein køn, na ñimui utu uñendø kømøtø. ¹⁹ Nai ureezheelø, kan ishuumisag unø tammisrtrab pusrkwai inçib lataitøwei, katøle pusrkwai isum pasrar, Cristo ñimuinug ke newan tab pasramisramnegatig. ²⁰ Kan mõwei nane ñimui utu pasrammøø køtan, øyeeg murtø waminchimøtø, peemay waminchab. Pøs nane ñimuimburab ni chi isumgüinguen mõramgaig køtan.

Agarwanba, Saranba kemesra wamindig

²¹ Tru maig maramigwan martrai pørig maig chibig køben ñim treegwan marøb melag kui inçibeløbe, trube, ¿tru martrai Moisés pøriibe maig chibig kui ashmeelø kø chindah? ²² Kaguende Abrahambe pagatø nusrkalø tøgagüig køn chibig pørig pasran Moisés pørigu: kan nusrkaimbe tru karuindiig megab ishuwein købene, kane mu karuimig megab ishuwei nusrkai. ²³ Inchen tru karuindiig megabigwei unøbe, mutøgucha maig tøgagøbelø køben treeg kal-laig tøgagüig unø køben, trune tru mu karuimig megabig tru srawei unøbe, Tius ‘treeg tranrumøn’ cha kørrømisrig købig kua treeg kal-laig købig køn. ²⁴ Iig tru øyeelø purayaibe ‘øyeeg lataig køn’ cha eshkabig køn: Tru i pagatø ishumburmerabe Tiuskurri pabalø acuerdo marigwan trunun eshkabig køn: Agar tru ureemera karua srua kuindiig melabelø kønrrai tøgagøbe ishuube Tius tru Sinaí Tunsrø nõ øyeeg martrab cha kandø isua kørrømisrig, truig køn. ²⁵ Kaguende Agarbe Arabia pirausrø Sinaí Tunyu maig purayaigwan eshkabig kua, tru mõin kwaløm Jerusalénwan eshkabig køn, trube truyu nui ureebañau karua srua kuindiig megabigwan. ²⁶ Trune tru Jerusalén srømbalasriig tru namui usrimbe, mu karua srua kuig kømøtø køn. ²⁷ Kaguende øyeeg chibig pørig pasran: “Ureg tøgagønrrab kaimab ishug, managuen ureg tøgagømibe, truba tab kui mõrøb kasraarab trashi cha, unø tammisrtrab pusrkwabigwan ñi mana maig kui mõrmibe. Kaguende kan ishug nundø elatsigwei ureebe mas nu køn, keg tøga ishuwei lataguen kømø.”

²⁸ Trube, mømibe nai nunelø, Isaac latawei ñimgucha Tius ‘treeg tranrumøn’ cha kørrømisrig tru ureemera køn. ²⁹ Inçhendø tru urassrøma mutøgucha maig tøgagøbelø køben treeg kal-lab unøbe Espíritu Santo maig kønrrain køben treeg kal-lab unane ashig kømui inçib kaig martrabgøba inçibig køn. Møingucha treetøwein køn. ³⁰ Inçhendø ¿Tiuswei wamwan pøriibe mandø chibig køh? “Karuiindiig megab ishuwane unanbañau weguchi chibig køn. Kaguende tru karuindiig megab ishuwei nusrkaimbe, tru mu karuimig megab ishuwei nusrkawan chi købigwan keta tranamigwan tøgatø utamibe managuen chi kaanrrun” cha. ³¹ Inçhawei, nai nunelø, nambe tru karuindiig megab ishuwei ureemera kømøtø, tru mu karuimig megab ishuwei ureemera ker.

5

Cristo chigucha ilósrkaimeelø kónrrai marigu wemallmø pønrramig kón

¹ Cristo namun chigucha ilósrkaimeelø kónrrai mara, treegu pønrrónrrai pønraigugurri mur pønrray. Katø tru maig maramigwan martrai pørig, truig maig karuben trunun martrab kebamba, truyutø srua kuindiig melønrrab kómøtø.

² ¡Au ñimguen mörtrail! Na Pablobe ñimun trenchar: Ñim asru circuncidarramaysruandøbe, trube, Cristobe ñimune chiweingucha chi purugumíig kui lataig webibsruinrrun cha. ³ Nabe katøle maig tamigwan katø trendamønrrun: Møikkøben circuncidarramabiibe, trube, tru maig maramigwan martrai Moisés pørig maig karuigwan kanguen pinab marmø, kerriguwan martrai indig kónrrun cha. ⁴ Tru maig maramigwan martrai Moisés pørig maig karuigwan ñim treeg mara, chi kaig kómeeelø lataig tabig kørømistrab inchibeløbe, Cristoinukkurri tarømisrøb, katø Tius ka yandø tab indiiøga pønrramigugurrimbe tarømisramba indin kón. ⁵ Kaguende nambe isubigwan Cristoinuutø pasra truba muniirab meler, Espíritu Santogurri chi kaig kómeeelø lataig tabig kørømariilø kómigwan muniirab. ⁶ Kaguende nam Cristo Jesúsba pønraikkurrimbe circuncidaweig kui chi kørnray kómøwei, circuncidamíig kui chi kónrrab kómøwein kón. Treeg kómøtø, isubigwan Cristoinuutø pasra undag kóbiitøga marøb pønrraig treeg mariibe tabig kón.

⁷ Ñimbe yamba tsabøtø tab ambub melaigwan, ¿tru newan ciertonig maig taigwan ñim mørøb melømønrraimbe, ñimune murre ilósrkøb sötø pønrramisrta? ⁸ Øyeeg maramne inçhib pasrabiibe, tru ñimun wamabigweinukkurri arrumíig kón. ⁹ Pøs: “Levaduran kan lamøzhig pusriitø harinawan maya sømarimba kerrigu larrøbig kón.” ¹⁰ Nabe Señortøgabe ñimuimburab chi isumø pasrar, na maig isubig køben ñimgucha treetøwei isunrrab kui. Inçhen ñimun øyeeg punrrai marøbigwane mu kuindøgucha møra meganrrai marig kónrrun.

¹¹ Nai nunelø, naimburama na katøgucha circuncidamíig kón chib eshkab kusrennøb unimbe, ¿trube, nane kaig martrab lliramubsruinrrun? Pøs na treeg inçhib uñibig kuimbe, trube, tru Cristo kurusyu kwaigwan wamindiibe nømune yandø chi ilósrkøb namishimubsruinrrun. ¹² Ñimun asrwan circuncidangarub, ilósrkøb sötø pønrramisrøb llirabelane, nømundøweinguen kanmaytø kapainguen kón.

Asr maig marøg kui mariiløba, Espíritu Santogurri mariiløba

¹³ Nai nunelan, ñimun wamappe, ñimbe chiyugucha ilósrka melønrrain kómøtø wamig kón. Inçhendø tru ñim chigucha chi ilósrkaimeelø kómig tøgagúigwane, treelø ker chiptø tru kemesra, ñimui asr maig marøg kui inçhen trømbøig maramigweyasig tøgagømumig kón. Masken treeg inçhimøtø, undag kóbiitøga kanikkurri kanikkurri mara tranay. ¹⁴ Kaguende tru maig maramigwan martrai Moisés pøriibe iigwan martrai karua pasrigu chishtø tøga pasran: “Ñui mendaigwan ñiasi lataitøwei undaarau” cha, trendaigu. ¹⁵ Inçhen ñim namig kóbiitø kanikkurri kanikkurri lasruyab ke chab mab lataig inçhib amøñabe, ñimbe kangurriin kangurri yandø chab pinammay inçhib amøñinrrun.

Tiuswei Espíritu maig kónrrain køben amønaig

¹⁶ Inçhawei nabe ñimun trendamønrrun: Espíritu Santo maig martrain køben trunun marøb amønay cha, trumaybe ñimui asr maig marøg kui inçhen, treegwan marmeelø kónrrabguen. ¹⁷ Kaguende asr maig marøg kui inçhen kaig marøg kóbiibe Espírituimburabigwane chi marbashmø katøben, katø Espíritube asr kaig marøg kui inçhen marbashmø katan. Inçhawei møikkurrindøgucha sötø pønrramisrøb marbashmø katab pønrran, ñimun maig marøg køben treeg marmønrrai. ¹⁸ Trune tru Espíritu Santo maig martrai isunanen treegwan marøb meløwabe, tru maig maramigwan martrai pørig truig karuig kómøtø marøb melønrrun.

¹⁹ Inçhawei asr maig marøg kui inçhen treeg mariiløbe tørgandø asamdiig øyeelø kón: møgueløba, ishumburmeraba trømbøig mariilø, køsøngønrraptig mariilø, maramburab trømbøig mariilø, ²⁰ chiwan køben kan tius kui lataig mara tøgagúilø, misag purrønna kwaimandzigweimburabelan mariilø, ashig kómui inçhib tsalø asiiyailø, kwayam lailø, naiwan katøgan kerranrraitamab isub pusrkwai asiilø, namig kóbiitø ke kan chinchimmørø indiiilø, chiyutøgucha ke na pasrainrrabna kui isub indiiilø, nørø katøgan sötømisrøb tarømisrøb ambiilø, kanuingatøtø inçhib trugatø misrøb ambiilø, ²¹ møikkøben chigøben tøgagøben pusrkwai asiilø, mutsirab indiiilø, mabgucha maya mag køben mamburab maig øyeelø kón. Katøgan øyeeg latailan nabe ñimun treeg marøb kómønrrai kanmaytø waminchar, marigwansrø waminchib lataitøwei. Inçhen øyeelan marøbeløbe Tius nø ashib karub waigwan utamibe chi kaanrrun.

²² Trune tru Espíritu Santoinukkurri arrubiibe øyeeg kón: undag købig tøgagømig, kasraatø unamig, chi isumø tab unamig, chine arringucha tammay ka megamig, maig købash inçhimø purø tammayig kómig, larrø tab inçhibig kómig, maikkucha tarømisrømø megamig,

²³ chish inchimíg, tammayig kómig, asr mumay srua itanmaptø kómø isua møra uñibig kómig. Øyeeg mariilan 'kalø køn' chinrrabiibe wesrua pasrig chi kaagøn. ²⁴ Kaguende Cristo Jesúsweyeløbe tru trendø kaigwan tøga kal-laig asrwane chine kaig marøg købig arrubigwanba, katø treetø treetø kaig marøg købigwanbañau marmørrab elachar køn, tru kurusyu tøgatø mesrøb lataig. ²⁵ Inchen mømibe nam Espiritu Santogurri øsig amøñibeløbe, trube, Espiritu Santo namun maig amøñinrain køben treegwan amøñigun.

²⁶ Purø nørreelø misrøb ka isaba inchibelø kømugun, kangurriin kangurri namisiyab, kanikkurri kanikkurri chigurriin køben ka pusrkwai asiyaab.

6

Kangurriin kangurri puruguyamig

¹ Nai nunelø, inchippa møikkøben chiyugøben kaig mara kebeña megabene, Espiritu Santo maig maringaruben ñim treeg pønrrabeløbe, katøle treetøwei tab pasramisrtrai maig købash inchimø, tammay puruguy. Inchendø ñiasitøwei ashiptø mar, ñigucha treegøtøwei kebeñib megamønrrappe. ² Chinetø puig meløben kangurriin kangurri lata kuñam puruguyamig køn. Treeg marabe, Cristo maig martrai karua pasrigwan ñimbe marøb kønrrabguen.

³ Kaguende møikkøben truburab kómig købendø, truba truba nuig kurnab inchibiibe, chi treeg kømubendø incha, nøtøwei ka kebeñib pasran. ⁴ Inchawei ñim møitøgucha chi marigwan ñiimburbigwan søl køtashchab tab isua asamig køn, trumaybe ñibe ñiasitø tab kui mørøb pasramig kønrrun, na marigwanba, katøgan marigwanba, maig køtashchab ashib pasramig kømøtø. ⁵ Kaguende møitøgucha nui chi maramigwane mu mendaig kømøtø, nøashib srua yamig køn.

⁶ Tiuswei wamwan kusrebig kønrrai møikkøben ñun kusrenanøbigwane chigurribunø ñi tabig tøgagúitøga nun purugub pirisamig køn.

⁷ Chigøben kømønrraitamab ñimguen ñimasiitø treeg isumøtay, Tiusbe nun maig købash inchib ka indzatø mørtraingucha kømøtø køn, kan møg nø maig ellmara kørømmariibe katøburø trunundøwei tulishinrrun. ⁸ Kaguende ñim asrwan tab kønrrai ellmarøb pønrraibe, truiikkugurrimbe trømbøig marig utønrrun. Inchen Espiritu Santon tab kønrrai ellmarøb pønrraibe, truiikkurrimbe managatig øsig kómigwan uta tøgagømig kønrrun. ⁹ Tabig maramigwane muraaramø marøbig marøb meløgun. Kaguende tru treeg marigwan utamig yandø pubene, treeg marigwan utamig kønrrun, nam kullaaramø marøb meløwabe. ¹⁰ Inchawei treeg købene, chigøben maramdiig købenbatø, mayeelanba tabig margun. Inchen mas Tiuswei misag, tru isubigwan Cristoinug pasra tøgarmarane katøguchinguen tabig maramig køn.

Mandø kómigwan Pablo srabe wamindiilø

¹¹ ¡Au, ñimguen asay! Nabe nai taska ñimuyasig øyeeg nørriig pørar. ¹² Møiløgøben truba tabig marøbelø kønmab asiilø kønrrab inchibeløbe, ñimune asru circuncidamne inchibelø køn, Cristo kurusyu kwaigwan waminchen, kaig martrab wendautø llirailø kømønrrab. ¹³ Pøs tru circuncidawar købenguen, tru maig maramigwan martrai pørig maig karuben trunun marmeelø købendørre inchibelø køn. Inchendø nømbe ñimune asrwan circuncidanrrai indan, nømbe ñimui asru truba tab kui mørøb, ka møg inchib pønrramig kønrraindø. ¹⁴ Pøs naimburappe namui Señor Jesucristo kurusyu kwaigweimburab kømubene, managuen katøgan chi pegube, møg inchib pasramig pumuiimbe køtan. Jesucristo kurusyu kwaikkurri naimburappe yu pirauibe yandø kwai lataig patsig køben, katø nagurri pirauigweimburappe kwawa lataitøwei patsig kur. ¹⁵ Asru circuncidaweig kui chi kønrrab kømøwei, circuncidamig kui chi kønrrab kømøwein køn, treeg kømøtø, kerrigu srøig peemay amønamiig truibeguende tabig købwei indan. ¹⁶ Tru iig maig karuigwan treeg amøñibelane tru chi isungai tab købiiba, lastima asiiba, nømumim pala kønrrai inchar; katø tru cierton mayeelø Tiuswei israelitasmeraim palagucha.

¹⁷ Møingurribunøbe mugucha nan chinetø pui pasramig kønrrai marmørrunrrigay. Kaguende nabe nai asru Jesucristogurri kaig indinab kørriindiilan nai asru asamdiig tøga pasrar.

¹⁸ Namui Señor Jesucristoi ka yandø tab indiibe, nai nunelø, ñimba pasrønrraimab isur. Treeg kønrrun.

Efesios

'Ka amõñiqueh' chib pørig

¹ Na Pablo, Tius trendø øyegg kønrrain kuikkurri Cristo Jesús nõashib karua ørig, Tiuswei misaamera, Cristo Jesúswan tarømisrmø pønrrabelø, Efesosrø warabelan, truulayasig i kil-gawan pørar. ² Tius namui Møskaimba, namui Señor Jesucristoba tru ka yandø tab indigwan køben katø chi isumgaig tab købigwan køben, ñimun tranrrun.

Tiusbe Cristogurri chigøben tabigwan tranøb

³ Namui Tius Señor Jesucristoi Møskaimbe mayanguen tab indig kønrrun, srømbalasrø tru chigurrimbunø nuimburabelø tabig pønrrabiitøga Cristogurri namune trutøga mayanguen tab kuilø kønrrai marøbigwan. ⁴ Pøs Tiusbe tru chigurrimbunø pønrrabigwan nõ mara pønrsrømøwatø manasrøwei namune Cristogurri tarømara wesraig købig køn, tabigweindø tarømariilø, kaig mariitøga chillig inchar kømeelø, nui merrab pønrramig kønrrai. ⁵ Nøbe namune undag købiitø Jesucristogurri nui trag ureg kønrrai maramig manasrøwei nõ treeg mara tøgagúig købig køn, tru nõ trendø treeg martrab isua tøgagúig truig maig køben treekke, ⁶ tru nui ka yandø tab indig purø nuig purø tabigwan maya nuguen tabig wamindamig kønrrai, tru nui truba undaarraig Nusrkaingurri namun ke ka yandø tab indig tranigwan. ⁷ Nuinug nambe nui anaarraig nuielø kønrrai kaigyurri wesrailø ker; namui kaig mariilan ulø payimeelø, Tiuswei tru ka yandø tab indig tøgagømburab tøgagúig truig maig køben treeg. ⁸ Tru ka yandø tab indigwan tranøppe, Tius namun tøgagømburab tøgagønrrai tranig køn, tru chiwandøgucha nam purø tab asha maram kusrebelø kømigwanba, katø tøgandø chigúii mørøbelø kømigwanba. ⁹ Nøbe tru nõ trendø treeg martrab isua tøgagúig tru muguen asiimígg pasrabigwan namun kenamarig køn, Cristoinug nõ treeg maramig nun maya nuguen tabig asonaben tru treeg tøga waig købigwan, ¹⁰ tru treeg maram kwalømmera pubene, trunun treeg maramig pasrønrrai: tru srømbalasrø chi pønrrabigwan lata, katø pirauigwan lata kanbalatø mara, maig maramigwan Cristo kerriguwan nõ asha martrai pønrsønrrab.

¹¹ Katø nambe tru namuimburabigwan nõ ketig tranamig tøgagúigwane Cristoinuutøwei utig købig køn, manasrøwei namun treegwan utønrrain kønrrai marig købig kua, tru chiwandøgucha Tius nun maig maramígg asonaben tru treeg kønrrai marøbig, maig martrab asig køben trumay treeg. ¹² Tru srøsrø ke nammerrig Criston muniirab melabelø kuikkurri, tru nui tøguegwalmabigwan namgurri maya nuguen tabig wamindig kønrrai. ¹³ Katø treetøwei ñimbe nuinug tru wam newan ciertonig, tru tabig srø wam kaigyurri wesrabigwan ñim møra, nun køreben, tru tranrrab misra kørrømisrig Espiritu Santotøga Tiusweyelø kuin kui asiilø kønrrai ñimbe sellailø kuig køn. ¹⁴ Truibe tru namuimburabig kønrrabigwan ketig utamig kønrrai katsiibasra tranøbguen indig truig køn, tru Tius nuyasig tøgagønrrab wesrailan ke tab webamba pønrramnægatig, nui tøguegwalmabigwan maya nuguen tabig wamindamig kønrrai.

Pablo Tiuswei ureemerayasig Tiuswan miab

¹⁵ Inchawei treekkurri tru ñimui isubigwan Señor Jesucristoinug pasra tøgagúigwanba, katø Tiuswei misaameran mayeelanba ñim truba undaguelø køn taig na wammørabe, ¹⁶ chu urastøgucha na Tiusba wamindigu tøgatø isub palømmø, ñimuimburab 'ungwa' chibig kur. ¹⁷ Nabe tru namui Señor Jesucristoi Tius tru tøguegwalmab Møskawan miabig kur; ñimun Espiritu Santogurri øyeggwan tranrrai, kusrebelø kømigwanba, katø nebua asiimíggwan tøgandø tab chigúii nebua ashchaimba, newan nun tab nebua asamig kønrrai.

¹⁸ Katø chigúii mørøb nebua asamig ñimui isubigu tøgandø kebiliilø kua, tru ñim tøgagønrrumab isua muniirab melønrrai ñimun wamigwan, øyegg købig køn kuin kui nebua ashchaimba, tru nui misaameran keta tranrrab misrig chigucha palømiig purø nuig purø tabigwan øyegg købig kuin kui nebua ashchaimba, ¹⁹ katø tru nam nun kørebelainug maramburab marøbiibe, purø nuig købig kuin kui nebua ashchaimba, miabig kur. Inchen tru nui purø nuig maramburab marøb pasrabiibe, ²⁰ Tius tru Criston kwailai utugurri katøle øsiirangarua, tru srømbalasrø nõ wainug nui kusrmay wamisrtrai maramburab mariitøgatøwei marøb pasran. ²¹ Mayeelaime pala nõm asha karubelaime pala køben, katø mugucha manchinraingaug karubelaime pala køben, katø maramburab marøbelaim pala køben, katø maya misagwan nõm asha karubelaime pala køben, nõrrø kusrebelø kuikkurri nõrrø munchimera tøgagønrrai tranilaime pala køben, kerrigu ilaime pala nun wannig køn, mõi i kwalømweindø kømøtø, katø wendøsrø attrabiguwein chigucha. ²² Incha Tiusbe tru chigurrimbunø købigwanguen Cristo nõ maig kønrrain køben treeg pønrrønrrai pønnsra, iglesiaimbe chiyutøgucha nõ tur kønrrai pasrig køn. ²³ Inchen truibe Cristoi asr køn,

Cristo nõtøwei tru chigucha chi palømig netsiig pasraig. Cristobe treetøwei chi købigu mumaytøgucha nõtø netsiig pasrabig køn.

2

Tius ka yandø tab indikkurri kaigyurri wesrailø

¹ Ñimbe ñimuimburappe, martrai karua põnsrailan mørmø, itøbunab marmuiløyubah, katø kaig marøb amønailøyubatø kwailø købig køn. ² Kaguende ñimbe merrabsrømbe yu pirau maig arrub pasrøben trunun marøb, katø tru srømbala chiguchagayu nø muba karumburab nø karub pasrabig, tru nugwaimandzig, maig maringaruben treeg marøbelø købig køn, tru møi ya Tiuswan mørmø misaameran nø kaig maringarub pasrabig karuig. ³ Namgucha merrabsrømbe mayeeløba namun asr maig trømbøig marøg kui inchen nømui utu treetøwei marøb amønibelø købig ker, namui asr maig srua itanmaptø, tru kuindø kaig marøb, kailan isub. Kaigwan nam trendø tøgagüikkurri, Tiuswei purø trømbøig namig købigwan utønrrabelø købig ker, katøganelø mayeelø latawei. ⁴ Inchendø Tiusbe yeeg purø nuig lastima asamburab isua ashibig køptø, tru purø nuig undag købig tøgagüitøga namun undag køptø, ⁵ tru martrai karua põnsrailan møra marmuiløyutø kwailø amønibenbatøsrøwei, tru øsig kømigwane Cristoba kanbalatø tøgagønrrai namun tranig købig køn. ¡Tius tru ka yandø tab inditøgatø ñimbe kaigyurri wesrailø køn!

⁶ Incha Tiusbe namune Cristo Jesúsba kegøtø øsiirangarua, nøba srømbalasrø Tius waisrø purramisingaruig købig køn, ⁷ tru wendøsrø attrabigu nui ka yandø tab indig tøgagømburab tøgagüigwan kenamartrab, nø namun purø tabig køptø Cristo Jesúskurri. ⁸ Kaguende ñimbe Tius ka yandø tab inditøgatø kaigyurri wesrailø køn, ñimui isubigwan Jesucristoinuutø pasrikkuran. Iibe ñim chigøben marikkurrin kømøtø, iigwane Tiusbe ka yandø keta tranig køn. ⁹ Kabe nam chigøben tabig marikkurrin kømøtø køn, 'tabig marikkurrin køn' cha, mugucha møg inchib põnrramig kaanrrai. ¹⁰ Kaguende namba Tius nø mariilø ker, Cristo Jesúskurri srøig peemayelø kønrrai mariilø tabigwan marøbelø kønrrai mariilø, tru treegwan marøb amønibelø kønrrai Tius manasrøwei põnsrailan.

Cristogurri kanguelarrøtø lincha põnrramisrig

¹¹ Inchawei ñim tru trendø judíos kømø misaamerane merrabsrømbe tru judíosmera nømui asru taska circuncidailøbe ñimune: "Circuncidaimø misakkølleelø" cha wamab tøgagüilan isua kuy. ¹² Ñimbe tru urasrømbe Cristone chigar, Israel misaamera chitø marøbelø køben, ñimbe treegwan maramig chigar kønrrai tarømarilø, katø Tius nui misagwan øyeeg tranrrab kørømisri acuerdosmera mariilane chi asamig chigar, katø chiwan muniirab melamig chigawei, yu pirau ñimbe Tius kaweyelø købig køn. ¹³ Inchendø mømibe Cristo Jesúsba kanbalatø põnrraikkurri Tiusweimay kemalsrailø køn, Jesucristoi anindøga, ñim merrabsrømbe yabsrø põnrrabelø købig kuigwan.

¹⁴ Kaguende tru ambugurri igurri chi isumikkaig tab købig namuinug pasrabiibe Jesucristo nøwein køn, tru pa sètø købigwan kan sètøtø kønrrai marøbig. Tru ashig kømui indiyab waraig købig kan pirøbanrrig sètøbasrab lataig pasrabigwan pøtiichippe, ¹⁵ tru maig maramigwan martrai Moisés pøriiløyugurri wesrawa, øyeeg, øyeeg maramig køn chibig pørig põnrrabigwan chi asamig kaanrrai mara pasra, treeg mariitøga patsøga pasrig kuig køn, Cristo nø kurusyu kwawa, tru pa sètø nøørøtø købelan nuinug srøig kandø mara pasrtrab, øyamay ambugurri igurri tabig kørømisrtrai marøb. ¹⁶ Incha katø Cristobe tru pabalø købigwan kan asrtø lataig mara, Tiusba katøle treetøwei katø tab kørømisrtrai marig køn, tru ashig kømui indiyab põnrraigwan yandø mas treeg kømønrrai nø kurusyu kwaitøga patsøga kørømarøb.

¹⁷ Incha Cristobe arrua, tru ambugurri igurri tab waramigwan eshka kusrenanig køn: ñim judíos kømeeelø Tiusweinukkurri yabsrøn põnrrabelan lata, pulutø põnrrabelø judíosmeran lata. ¹⁸ Kaguen nøgurriwei nam lata, nøm lata, Tius Møskawan tru Espiritu Santotøgatøwei kemalamig tøga põnrrer. ¹⁹ Inchawei yandø ñimbe peg pirausreeelø kømøwei, ni pestø ka pua puramrraptø amrruateelø kømøwein køn. Mømibe treeg kømøtø, Tiuswei misaameraba kanguelarrøtø marøb tøgagømigwan tøgare, Tiuswei misaameraba kan yautø latailø, ²⁰ Cristo nøashib karua øriilaim palaba, katø Tius maig karuigwan eshka belaim palaba ñimbe pølbasa kusrub mariilø køn, tru katsigugurri niga pasrab sruube Cristo nõtøwein køben. ²¹ Inchen nuinug tru yawan, purø may tamara warøb tabig kusrub marene, tru yabe kurrab ippe, Señorweyasiitø tarømari ya kønrrab kurrab yandø. ²² Inchen tru utu ñimungucha kanbalatø kusrub marøb ambiilø køn, Espiritu Santogurri Tius truyu nø pasramig kønrrai.

3

Nui tabig srø wamwan judíos kømeeelan waminchib inrrai Pablon Tius pasrig

¹ Øyeekkurri na Pablobe Cristo Jesúsweiwan marøb megabig kuikkurri kailan keerig yau pasrar, ñim judíos komeelayasig tab kònrri. ² Pøs ñimbe manawei wammøraguen kuinrrun, Tius ka yandø purø tab inchibig kòptø ñimuyasig tab kònrri nan iigwan martrai pasrigwan. ³ Iibe tru mu asiimíig pasrabigwan nan ashchai Tius kenamarig truíg kòn, tru na ñimun landøttiig pørøbguen indig. ⁴ Inchawei ñim iig tru pørigwan ashabe, muguen asiimíig pasrabig Cristoiwan, øyeeg chigúí mörangailan nabe nebua ashibig kuin kui ñimbe wetøgørrønrabguen. ⁵ Iig, tru muguen asiimíig pasrabigwane merrabsrø misaamerane munguen kenarmuig købig kòn, tru mõi ya Cristo nøashib karua øriilø, Tiusweindø tarømarilanba, katø Tius maig karuigwan eshkabelanba, Tius nui Espíritu Santotøga kenamarøb lataibe. ⁶ Iig, tru muguen asiimíig pasrabiibe, tru judíos kømø misaameragucha judíos misaameraba tøgatø tru ketigwan utamig tøgagøb, tru asryutøwei pønrramig køb, katø Jesucristoinug tru tranrrab misra kørømmisrigwan tøgatø utamig tøgagøb indamig truíg kòn, tru Tiuswei tabig srø wamgurri. ⁷ Nane Tius ka yandø tab incha ketikkurri, iig tru tabig srø wamwan waminchib marøb meganrrai pasrig kur, nui maramburab marig maig køben truitøga.

⁸ Nabe Tiuswei misaamerai utu tru chigucha kømø waachawan tru Cristoi chine chine purø tabig, kan øyangatiitø kòn tamgaig Tiuswei tru tabig srø wamwan eshkab kusrenanøb pasramig kònrri pasrig kur, tru judíos kømø misaameran. ⁹ katø trugurri tru mu asiimíig pasrabigwan maitø marøb attrabigwan, Tius tru chiwandøgucha mara pønrsrøbigweinug tru manasøngurri sörig pønrrabigwan. ¹⁰ Iigwane tru iglesiagurri kerriguba mõi ya asig kònrri kenamartrab isua indig kuig kòn, nui tru muguen nebua isumgaig purø nuig kusrebíg kuigwan tru srømbalasrø nøm asha karubelanba, katø mugucha manchinrraingaig karubelanba. ¹¹ Tius øyeeg marøppe, tru nø trendø manasøngurri treeg martrab isua tøgagua, trunun treeg marig købig kòn namui Señor Jesucristoinug. ¹² Inchawei nabe chigucha katønrraingaig chi isumø nøgurri Tiusweinug kemalamig tøgaguer namui isubigwan Jesucristoinuutø pasra tøgagúikkurri. ¹³ Inchawei nan øyeeg trømbøig isumdiig puig megaigwan, trunun isuptø kullaaramørrunrigay chinrrab inchar. Masken nan øyeeg puibe ñimuyasiibe maya nuguen tab kònrriin kòn.

Cristoi undag købig

¹⁴ Inchawei nabe Tius Møskawei merrab tømønrsrøbig kur, ¹⁵ tru srømbalasrø lata, yu pirau lata, kan sètø, kan sètø købelan trumørig munchi pønrsra wamabigwei merrab. ¹⁶ Tru nø chigurrimbunø nui tørguegwalmabig chi palømlig maya tøgagúig, truíg maig køben, truyugurri tru ñimui manrrau chishkandø mur pasrønrrai, nui Espíritugurri maramburab maritøga martrai miar, ¹⁷ Cristo ñimui manrrømerayu pasrønrrai tru isubigwan nuinuutø pasra tøgagúikkurri. Pøs øyangurrimbe ñimbe umbu srøl keetiilø, undag købigutø pønrramisra, ¹⁸ Jesucristoi undag købig maya nuig kuigwan ñim mayeelø nui misaameraba kanbalatø pønrramisra, tru Cristoi undag købiibe lendømay treetøwei, yammay treetøwei, palamay treetøwei, lendegørrab treetøwei nuigwan ñim tab chigúí mørtrai miar. ¹⁹ Katø tru Cristoi undag købig mu newan nebua isumgaigwan ñim nebua ashchai miar, ñim øyamaybe Tius nø maya nu kømburab kuig truíg ñimuinug netsiig pasrønrrai.

²⁰ Inchen tru chiwandøgucha nøbe marøppe, tru nam miaigwandø kømøwei, kabe nam isuigwandø kømøtø, ke uñcha køm tøgagønrrai marøb Tius, tru nui maramburab marøb pasrabig maig køben namuinug treeg marøb pasrabigwan, ²¹ Tiuswei iglesiayuba, Cristo Jesúsweinuuba tørguegwalmabig kònrriin, managatig. ¡Treeg kònrriin!

4

Criston kørebeløbe Espíritugurri kandø kòn

¹ Inchawei Señor Jesucristogurri tru kailan keeri yau na pasrabiibe, ñimun trenchinrrab inchar: Tius ñimun treeg amøñinrraiwei wamiilø kuig køppe, maig amønarnigwan trumay treeg amøñinrrigay cha, ² maig køben inchimeelø larrø kørøtøelø, maig købash indingucha larrø tammayelø, maig køben kuingucha tammay melabelø, kanikkurri kanikkurri chigúingucha lata inchimøtø undag købiitøga chi kømui lataig pønrrabelø. ³ Espíritu Santoinug newan kanbalatø pønrrønrrab indamigwan treeg pønrrønrrab inday, tru kanbalatø pønrramig ambugurri igurri tab købiitøga, ⁴ kan asrtø, kan Espíritu Santotø kòn, tru ñim muniirab melønrrai ñimun wamig kandø køb lataitøwei. ⁵ Señor kandø køb, tru isubigwan Jesucristoinug pasra pønrramikkuha treetøwei kandø køb, piu umbu ulsraikkucha treetøwei kandø køb indan. ⁶ Tius kandø, trurrigu mayeelai Møskai, nøbe mayeelain pala nø pasrabig køb, mayeelainug trumørig nø pasrab, mayeelainug pasrabiibe nøtø kòn.

⁷ Inchendø namune kanun kanun Tiusweyasig chigøben marøbelø kònrri keta tranig kòn, Cristo pirisha keta tranig maig køben, treeg. ⁸ Inchawei Tiusbe trendaig kòn:

“Tru srømbalasrømay ippe,

tru merrarrawa srua kuig melabelan
nø merrarrawa, nø pera yaig køn cha.

Incha misaamerane Tiusweyasig chigøben marøbelø kønrrai keta tranøb indig køn” cha.

⁹ Tru øyee: “nebyaig køn” cha trenchippe, ζtru wallibirø umbugatig kørebemerrig kørrayaig køn cha trenchimuitarru? ¹⁰ Tru kørraibiibe nøtøwein køn, tru maya srømbalamera põnrrabigu purø palasrø nebibig, kerriguwan nøtø netsiig pasrønrrab. ¹¹ Incha truig nøtøwei mõilane nøashib karua øriilø kønrrai marøb, mõilane Tius maig karuigwan eshkabelø kønrrai marøb, mõilane Tiuswei tabig srø wamwan truøø srua llirabelø kønrrai marøb, mõilane tru Criston kørebelan tab ashib pera põnrrabelø kønrrai marøb, katø kusrenanøbelø kønrrai øyee põnsraig køn, ¹² tru Tiuswei misaamera nõmui marøb põnrramigu purø may kusrenniilø kønrrai isua, Criston kørebelø, tru nui asr, nurab inrrai martrab. ¹³ Tru nam mayeeløba tru isubigwan Jesucristoinuutø pasra kanbalatø põnrramiguba, katø Tiuswei Nusrkawan tab nebua asamiguba nam kanbalatø põnrramigwan nebumnegatig martrab, kan møg ne nuraig lataig misrøb, Cristo maig køben treeg misramnegatig nebumig kønrrai.

¹⁴ Øyangurrimbe nambe yandø mas shush ureemera latailø kømumønrrun, kan pi latøgushibig amburab iburab srua ambi latailø, chine srøig peemaytø kusrenaniilø kan isig ichibig lataig arrubig punø, panrrø sruabetiilø, møguelø kaig maramigwandø isubelø kaigu kegørrøsrkamig purø may isua põnsrailøtøga kegørrøsrkaimeelø. ¹⁵ Masken treeg kømøtø, tru newan ciertonigwan undag købiitøga waminchib, chiyutøgucha nørrøragun tru tur Cristoinug nõba kanbalatø. ¹⁶ Pøs nøgurriwei asr ørøba kandø misra, tru kønabigwan merrarrab srølmørig ambumay imay lata purugubene, nõm mõitøgucha chi maramigwan trunun trunun marøb põnrramisren, nurab yan, katø undag købiitøga nørrørab ambamig kønrrai.

Cristogurri srøig peemay amønamiigwan tøgagøb

¹⁷ Inchawei nabe iig øyeeigwan ñimun eshkappe, marmø kømø, martrai karunrrab inchar Señorwei munchiyu: mõimbe yandø amønippe, Tiuswan ashmeelø judiø kømø misaamera nõm chiweingucha chi purugunrrabgaig isub amønailøyu ñimgucha amønimøtay cha. ¹⁸ Nõmui isubiibe løstørailø, nõmui manrrømera purø murelø kuikkurri chugüinguen mõrmeelø kua, øsig kømig Tius tøgagüigugurrimbe nõmbe purø yab põnrran. ¹⁹ Yandø chi kørikkengar misrikkurrimbunøbe, yandø kaig maramigwandø martrab kebambubelø køn, chigurrimbunø køsøngønrraptiig marøg købig arrubigwan neguen kømuig marøbig marøb põnrrønrrab. ²⁰ Trune ñimbe Cristoiwan kusreppe, øyee marøbelø kømønrrab kusreig køn. ²¹ Ñimbe isa kømø, tru newan ciertonigw Jesúsweinug pasrabigwan cierton mørøb, nuinug kusrenaniilø kuig kuinrrun. ²² Tru ñim merrabsrø Tiuswan ashmeelø køb uras marøb tøga amønaiig købigwane wegutsay, tru køllig ñim trendø kaigwan tøga kal-laig, chi tabig pummøø chull isubig purø trømbøig marøg købig trutø srua yaig, ñimui umbu kaig pasrabigwan, ²³ tru ñimui isubigu srøig peemay isubelø kønrrab. ²⁴ Ñimbe tru srøig øsig kømigwan kewa põnrray, truike Tius nõ maig køben treetøwein kønrrai marig køn, cierton sølgandiitøgaba, newan chishchig tabiitøgaba.

²⁵ Inchawei øyeekurri ñimbe isa wamindamigwane yandø elacha, masken ñim mõitøgucha ñimui mendaigwane isa kømø, sølwan wamindamig køn. Kaguende nambe mayeeløba kangurriin kangurri kan asrtø ker.

²⁶ Namappe, namubendø, namig køtanmaptø chigøben kaig marmøwei, namig købigwane ke põrr pinayamneggatikkucha tøga amønimøwei indamig køn. ²⁷ Katø nugwaimandzig ñimuinug kelulrrain kømøwein kuy.

²⁸ Nilaptiig købiibe yandø mas nilømøta. Masken treeg inchimøtø, ñui tasiitøga chigøben tabig maramigwan mar, mõikkøben chi palai inchene, purugumig tøgagønrrab.

²⁹ Ñimui trigugurrimbe mørøbguen møramgaig trømbøig webinrrain kømøtø kuy. Treeg kømøtø, Tiusweimburabigu maig palaim purrøben purugunrraptiig, treeg wamindamig køn, mørøbelanguen purugunrraptiig, treeg kønrrai. ³⁰ Tiuswei Espiritu Santon isuim pasrønrrai marmøtay, tru kerrigu yandø newan kaigyurri wesram kwalømweyasig tru-itøga ñimbe Tiusweyelø kui asamdiig kønrrai sellailø køn.

³¹ Ñimui manrrau chu uraskucha mõbraindø põnrramig kønrrai marøb pasrabigwanba, ke chab srurab namig købigwanba, trømbøig namig købig pasrabigwanba, trømbøig namig trasamigwanba, trømbøig tsalø wamab indamigwanba, chigurrimbunø kaig põnrrabigwan kerrigu truilanbañau chishtø elatsay. ³² Masken treeg inchiigunrriibe, ñimbe larrø tab inchibelø, lata lastima asiyabelø, Tius ñimun Cristogurri kaig marigwan ulø paymub pesannab lataitøwei, kangurriin kangurri ñimgucha ulø payiyab põnrrømumig køn.

5

Tiuswei ureemera mandø amønamig

¹ Inchawei ñimbe Tiuswei undaarag ureemera kuig køppe, nø maig køben treetøwein kønrrab inday. ² Amøñippe, undag købigwane tøga amønay, Cristo namun maig undaguig køben treetøwei. Nøbe nøashib namuyasig purøbasramisra kwaig køn, kan animal kweecha purø may irrabzhig Tiuswan keta tranøb lataig.

³ Ñimbe ñimui utube, møgueløba, ishumburmeraba chigøben trømbøig maramigwanba, katø chineto køsongønrrapteelanba, katø chiwandøgucha ke chinchimmøø inçhib parø indamigwanba, øyeelane mørøguen wamincha mørmmumig køn, Tiuswei misaamera kuig køppe. ⁴ Mørøbguen mørangaig wamincha ashib pønrrømøwei, chugúinguen mørmbendø wamincha mørømøwei, trømbøig wamindamgailan wamincha indza mørømøwei indamig køn, treeg indamgailan maraashib pønrrømøtø, masken ñimbe Tiuswan 'ungwa' chib kømig køn. ⁵ Kaguende ñimbe yandø iigwane tsabø ashibelø køn: møguelø ishumburmeraba trømbøig marøbeløba, katø chigøben ashikken kønrrabgaig trømbøig marøbeløba, chiwandøgucha ke chinchimmøø inçhib parø inçhib, pønrramigwane ke tius mara tøgagøbeløba, treeløbe Tiusba, Cristoba nøm ashib karub purraisrømbe mugucha chi ketig utamig chigar kønrrab kuin kui.

Tørwei ureemera maig amønamigwan waminchibig.

⁶ Chiweingucha chi purugunrrabgailø wamindiiløtøga mugøben kegørrøsrkainab kønrrab kømø, kaguende øyeekurrindøwei Tiuswei purø trømbøig namig købiibe tru mørømø misaameraim pala arrybig køn. ⁷ Inchawei ñimbe treeg marøbeløba lincha tøgatø marøb kønrrab kømø. ⁸ Kaguende ñimbe merrabsrømbe løstøyuelø købig kuig, mømimbe Señorweinuube tøyuelø køn. ¡Ñimbe amøñippe, tørwei ureemerasun amønay! ⁹ Kaguende tru tøyugurri chi arrubiibe maya nuguen purø tab indiiba, sølgandø tabig mariiba, ciertoniiba øyeeg køn. ¹⁰ Señorwan tab kui warrai maramigwan, mumay maren tab kui mørtashchab treegwan lab melamig køn. ¹¹ Chi tabig marig kørrømisrtrabig chigaig løstøyuigwan mariilan ñimgucha tøgatø marøb kønrrab kømø, masken ñimbe treeg inçhibgunrriibe øyebe kalø køn cha esh-abugen pønrramig køn. ¹² Kaguende nømui chigøben søratø mariiløbe wamindamikken kørig kønrraptiig trømbøig mariilø køn. ¹³ Inchen tru chigurimbunø købigwan tøyru pønrsøbene, maig kuigwan tørgandø asamig kenamisran. Pøs tru chiwandøgucha maig kuigwan asha kømig kønrrai tørgandø kenamarøbiibe tru tør køn. ¹⁴ Inchawei øyeeg chibig køn:

“Ñi, kib lataig tsubiibe, kiagasra,
kwailai utugurri kurrø cha.

Cristobe ñun kebilønrrun” cha.

¹⁵ Inchawei tab isuamøra amønay ñim mandø amønamigwane. Kan chugúinguen mørmeelø lataig amøñimøtø, maig amønamigwan tab isuamøra amøñibelø kuy. ¹⁶ Chigøben tabig maramdiig pubene, treegwan ka purainrraindø ashatø pønrrømøtay. Kaguende purø kaig kwalømmøra køn. ¹⁷ Inchawei ñimbe ke chugúinguen mørmeelø kømøtay. Treeg inçhimøtø, Señor nam chiwan martraim palai watashchab trunun nebua ashchab indamig køn. ¹⁸ Vino mucha; mutsiiramøtay. Truibe chugatig kaig marøb køben kaig martrai srua ibig køn. Masken treeg kømøtø, Espiritu Santotø netsailø kømig køn.

¹⁹ Ñimbe salmostøga, himnostøga, Tiusweimburabelan cantailøtøga kangurrin kangurri waminday. Ñimui manrraugurri newan isua cantab, Señorwan maya nuguen tabig køn chib waminchib. ²⁰ Chu uragucha Tius Møskawan 'mayanguen ungwa, ungwa' tay chiwandøgucha lutøgurri namui Señor Jesucristoi munchiyu.

Tiuswei ureemera keeba, sraimba mandø kømigwan waminchibig

²¹ Ñimbe kanikkurri kanikkurri lata mørøb melamig køn, Criston køriibala tøgagúikkurri. ²² Sraløbe, kelø maig chiben treeg mørøb melamig køn, Señorwan lataitøweingue. ²³ Kaguende keebe srawane nø asha karubig tur køn, Cristo nui iglesiai, tru nui asrwein tur køb lataitøwei, truigwane tru Kaigyugurri Wesrabig nøtøwein køn. ²⁴ Cristo nø maig karuigwan iglesia møra marøb melab lataitøwei, sraløgucha kelane treetøwei mørøb melamig køn chiyutøgucha.

²⁵ Keløbe nømui sralane undaguelø kømig køn. Cristoma nui iglesian undag køptø, nui øsig kuigwan nøashib tranig køn, ²⁶ tabig nuyasiitø tarømar misaamera kønrrai martrab, tru nui wamdøga piu umbu ulsraitøga pillmawa, chish mara, ²⁷ iglesia tørguegurnabig, kaig mariitøga chigucha chillig inçhaig kømig, maig købendiig trømbøtiig mindig kømøwei, chi tre lataibe chiguchagaig, masken treeg kømøtø, tabigweindø tarømarig, kaig mariitøga chillig inçhaig kømig treeg pasramig kønrrai nuyasiitøwei øyamay kenamartrab indig køn. ²⁸ Øyeetøwei keløbe sralan undaguelø kømig køn, nømui asrwan lataitøweingue. Nui srawan undaguibe nøasiitø undaaran. ²⁹ Kaguende mugucha nui asrwane managuen

nøasiitøweimbe tsaliinchimøn. Treeg kømøtø, asr maig palai inchen mab muchib, maig køben kørnrain kømø ashib tøgagøn, Cristo iglesian ashib tøgagøb lataitøwingue. ³⁰ Pøs kaguende nambe nui asruelø kuimba, namungucha treetøwei ashib tøgagøn. ³¹ “Inchawei treekkurri møøbe usri mōskawane elacha, sraimba kandø misrtrun. Incha tru pailøbe kan asrtø kørnrun.” ³² ¡Øyeebe mandø kuinguen mōramgaig purø nuig køn! Inchendø iigwan waminchippe, ‘Cristonba, nui iglesianba treeg køn’ cha waminchar. ³³ Inchawei treeg købene, ñim keløbe mōitøgucha sralane ñimui asrwan lataitøwei undaguelø kømig køn. Inchen sraløgurrimbe kelane maig købash inchimø, korig tōgar kømig køn.

6

¹ Señorwan undag købiitø ureemerabe ñimui mōskalane mandø chiben treeg mōramig køn. Kaguende iibe treeg maramig søl køn. ² “Nui usri mōskawane maig købash kømø, purø tab inchib tøgagu, ³ yu pirau purø tabig kasraatø tsumig kørnraimba, øsig kōllirab tsumig kørnraimba.” (Tru maig maramigwan martrai karua pōnsrailøyu iimerrig køn, tabig tranrrab misra kōrrømisrigwan utamibañauibe.)

⁴ Inchen ñim mōskaløbe ñimui uregwane namishib namig kōtanmaptø menrra inchimøtay namig isumørrai. Treeg kømøtø, sōlwan maram kusrenrrai kusrenanøb, Señor maig kusrenaniitøga ‘øyeeg maramig køn’ chib waminchib kusrenanamig køn.

Ka karuindø melabeløba, karub pera købeløba

⁵ Ñim, karuindiig melabelø, yu pirau ñimun karub pera købelane mōramig køn, kōriibala, maig købash inchimø, manrraugurri tabig isua, Criston mōrøb melab lataitøwingue. ⁶ Marøppe, nømbe ka tab kōrrømisrtraptø marmumig køn, nøm ñimun ke ashib pōnrrøbendø. Cristo karuindiig melabelø køppe, Tius maig martrai køben palabinøtø kømø, tabig martrurmb isua maramig køn. ⁷ Maramigwane ka palabinø inchib, mōguelayasig marøb pōnrrermab isua marmøtø, marøppe, martrab isua Señorweyasig lataig maray. ⁸ Yandø ñimbe ashibelø køn, karuindiig megabigwan lata, kabe mu karuimig nuimburab uñibigwan lata, mōigwandøgucha chi tabig marigwan tru marimburøbe Señor nō tranrrab kui.

⁹ Inchen ñim karub pera købeløbe ñimui karuig mōrøb melabelane ñimguringgucha tabig tøgaguy ‘yeegwane chigøben martrumøn’ chib, chineto chimøtø. Kaguende ñimbe ashibelø køn, tru nōmun ashib karub pasrabig tru Señorøwei ñimun ashib pasrabiibe srømbalasrø wabig kui. Kaguende Tiusbe mōigwane purømisrøb, kandarøtø inchimig køn.

Tiuswei uregwan kwaimandziiba chitøga kwayanrrai traniiilø

¹⁰ Trube, mōimbe yandø Señorweinuuba, nui maramburab marøb tøgagüg purø nuiguba kōrrønrrabgaig mur pōnrramisray. ¹¹ Tius tru chitøga kwayanrrai kerrigu traniiiløtøga tamara pōnrramisray, nugwaimandzig purø may kegōrrøsrkōnrrab tamara pōnsra kua kegōrrøsrkōnrrab inchen, maig kuingucha kōrmø kwayawa, truyu puraambub ambamig kōnrrai. ¹² Kaguende nambe kwayab puraambub ambamibe yu pirau misag yaumbag, animbag, treeløba kwayamig kømøtø, tru nøm asha karubeløba, katø mugucha manchinrraingaig karubeløba, tru lōstøyu nøm muba karumburab karub pōnrrabeløba, tru kwaimandziimera larrø trømbøig marøbelø srømbalasrø pōnrrabeløba, treeløba kwayamig køn. ¹³ Inchawei øyeeg købene, Tius chitøga kwayanrrai traniiilane truigwane kerrigu tōga pōnrray, kaig kwaløm pubene, kullaaramø pōnrramig kōnrrai, incha yandø øyeegwan kerrigu chab mara pōnrramisrikurrimbe kōrrønrrabgaig mur pōnrrønrrab.

¹⁴ Inchawei kōrrønrrabgaig mur pōnrray, tru newan cierton wamindiitøga pōrønawa lataig. Trugurrimbe tru sōlgandø tabig amōnaitøgabe, tru pechoburab chinchimønrrai katabigwan kewa lataig pōnrray. ¹⁵ Tiuswei tru tabig srø wam chi isumgaig tab købigwane waminchab amrrab muniitø pōnrramig, srøbyu keetigwan lataitøwei tōga pōnrray. ¹⁶ Kerrigu iilø kōmnetø, tru isubigwan Jesucristoinuutø pasra pōnrraigwane sōlburramønrrab katab srua pasraigwan lataig tōga pōnrray, tru nugwaimandzig flechameran piløga petiilø, chigurrimbunø amrrubigwan kweetsamig kōnrrai. ¹⁷ Katø tru kaigyugurri wesraig kømig tøgagügwane chinchimønrrai turyu petsig kan tsandzøn cascon lataig tōga pōnrray. Espiritu Santoi espadane srua pōnrray, trube Tiuswei wamwan. ¹⁸ Tiuswei Espiritu maig maringaruben, Tiusba waminday, chu urastøgucha ñim mumay køben Tiusba waminchib, miab indiiiløyu. Isua ashiptø kuy, Tiuswan ‘purugurra’ cha miab, nui misaamerai mayeelayasig maikkucha pesannab kōnrrab kømøtø.

¹⁹ Katø naimburabgucha Tiuswan ‘purugurra’ chib miarrunrrigay, na ke waminchab inchen, tru na maig tamelan nan tranrrai, tru Tiuswei tabig srø wam sōrig pasrabigwan nebua ashchai chigucha chi korig kuin kømø, wamindamig kōnrrai. ²⁰ Truigwan Jesucristo nō waminchib pasrab lataitøwei yu pirau nui wamwan na waminchib pasrønrrai pasrig kur. Katøgucha kailan keeri yau pasrar. Tiuswei wamwan na maig wamindamigwan chigucha kōrmø wamindamig kōnrrai Tiuswan miarrunrrigay.

'Ka amõñiqueh' cha wamindig srabeilø

²¹ Trube, treg købene, Tíquico, namui undaraig nuneg, Señorwei maramigu chu uragucha tarømisrmø, chi maramelan nø asha marøb megabiibe, na maig tsuigwanba, katø na chi marøb megaigwanba, kerriguba ñimun eshkanrrab wam srua inrrun. ²² Nabe nune truweiwei ørar, nam mandø melaigwan ñimun wammørøsrønrraimba, ñim truba tab kui mørøb kørrømisrtraimba.

²³ Tius Møskaweinukkurrimba, Señor Jesucristoinukkurrimba tru ambugurri igurri tab købig arrubigwan nunelan tranrrai inchar, undag købig tru isubigwan Jesucristoinuutø pasra tøgagüigwanbañau. ²⁴ Tiuswei tru ka yandø tab indiibe tru namui Señor Jesucriston undaaramigwane managucha patsønrraigaig undaarabelø mayeeløba pasrønrrun.

Filipenses

Pablo kailan keeri yaugurri Filipos iglesian pørøb

¹ Pabloba, Timoteoba Señor Cristo Jesúsweimburabigwan marøb melabelø Cristo Jesúskurri Tiuswei misaamera mayeelø Filipos ciudadsrø warabelan pørar, tru Tiusweimburabelan ashib pera pønrrabelanba, Tiuswei yau purugunrai wesrawa pønrrailanbañau. ² Namui Tius Møskaweimba, Señor Jesucristoimba tru ka yandø tab indigwanba, chi isumgaig tab købigwanba ñim tøgagønrai inder.

Pablo Tiuswei ureemerayasig Tiuswan 'purugurra' cha miab

³ Na ñimun isuimørig nai Tiuswan 'mayanguen ungwa, ungwa' chib, ⁴ chu uraskucha na Tiusba wamindimørig ñim mayeelaimburab kasraatø miabig kur, ⁵ kaguende ñimbe tru Tiuswei tabig srø wam tabigweimburabigu srø pølbasrøb kwalømgurri møin kwalømgatig lincha marøb melabeløgurri. ⁶ Nabe iigwan treegwein kønrrab kui asha indig køn: ñimuinug tabig marøb pølbasrøbiibe Jesucristo arrum kwalømgatig ñimune newanelø kønrrai tamarøb pasrønrrab kui. ⁷ Ñim mayeelaimburab na øyamay isumig søl køn. Kaguende nabe ñimune nai manrraube tøga pasrabig kur. Na kailan keeri yau pasraigu lata, mui merraptøgucha Tiuswei tabig srø wamwan purømisrøb, maig kui ashchai 'øyeeg køn' chib, waminchib pasraigu lata, Tius tru ka yandø tab indigwane ñimbe naba tøgatø utab køn. ⁸ Inchawei Tiusbe asha pasran, na ñimun mayeean pesannamø, truba truba isubig kuigwan Señor Jesucristoi undag købiitøga. ⁹ Inchawei na Tiusba waminchippe, ñimui undag købiibe katøguchinguen katøguchinguen nurab inrraimba, katø purø nu nebua ashib kusreb amrraimba, maig køb arrubigwan tørgandø nebua ashib amrraimba miabig kur. ¹⁰ Chiwan mas tabig kui nebua ashibelø misra, kaig marig chigar chishelø 'ñibe øyeeg kalø mara pasran' tainab pønrramig chigar kønrrai, Jesucristo katø arrub kwaløm. ¹¹ Jesucristoinukkurri arrubig tru tabig sølgandø marig, treeg ellmarig arrubiitø netsaim pønrrønrrai inchar, Tiusweyasig maya nuguen tab indig kønrraimba, purø tabig wamindig kønrraimba.

Na øsig unamibe Cristo køn

¹² Nai nunelø, nan chi pub arrubiibe, Tiuswei tabig srø wamweimburappe masken purugubgen inchib arrin kui, ñim wammøra kønrrai inchar. ¹³ Inchawei tru palacioyu suldaumera lata, katø maya misaamera lata, kailan keeri yau na pasrappe, Cristogurri keerim pasrai asha køn. ¹⁴ Inchen nan treeg pasrønrrai keerikkurri, nai nuneløbe, kerrigu lutauba, chigucha kullaaramø pønrramisra, Tiuswei wamwan chigucha chi kørmø waminchibelø køn.

¹⁵ Pøs ka isatø kømø, møiløbe Cristoimburabigwan eshka waminchippe, pusrkwai ashib tsalø køppah, ka kwayam lag køppatø marøbelø køn. Trune kaneløbe tabig isua, marammay maran. ¹⁶ Incha iiløbe Cristoimburab eshka waminchippe, undaguelø isuar kua waminchibelø køn, Tiuswei tabig srø wamwan waminchib purømisrøb pasrønrrai, nan pasrig kui asha. ¹⁷ Trune tru kaneløbe Cristoimburab eshka waminchippe, ka kwayam lag køptø maran, tabigwan isua kømøtø, ka indzaashig køptørre marøbelø køn, kailan keeri yau na pasramnebe katøguchinguen isuim pasrønrrai martrab isua. ¹⁸ ¡Inchendø chigüin kønrrautah! Ka isatø inchib Cristoimburabigwan ka wamincha møri lata, kabe cierton wamindi lata, pøs mumaytøgucha Cristoiwana waminchib, kusrenanene, nane kasrag køtan. Incha nabe katøgucha kasraarabig kasraaramønrrun, ¹⁹ ñim Tiuswan nayasig miab melaikkurrimba, Jesucristoi Espiritu nan purugüikkurrimba, øyeeg pub arrubiibe na øyeeg keerig pasraigugurri wesraig kømig punrrab kui, nabe asha pasrar.

²⁰ Chiyugucha na chi kørig misrmø purayamuitamab isua pasraig, treeg punrrab kui, masken chi kullag isumøtø, møi lata, chu urastøgucha, Cristobe nai asru purø nuig marøb tabig wamindig kønrrun, na øsig pasrai lata, kabe na kwaimbala lata. ²¹ Kaguende naimbe øsig unamibe Cristo køben, kwamibe maya nuguen tabig tøgagig køn. ²² Inchen na asru øsig unibiibe, Tiuswei marameløyube tsabøtø truba nørø kønrrai maramdiig kønrrautan. Trube, ¿nabe møigwan merrarrawa pasramisrtrab køh? Pøs mandøguen kømøtan. ²³ Inchawei nabe mumay yam kuinguen mørmøwa pasrar. Nane yugurri webya, Cristoba wanrrab yainrrabna køtan. Kaguen trumaybe naimbe masken tab kønrrautan. ²⁴ Inchendø na øsig pasramibe katøguchinguen tab kønrrab køn ñimuimburappe. ²⁵ Inchawei øyeeg kønrrab kui ashabe, chiguen kømøtø, ñimba unamuitamab isur, ñim mayeeløba kørrømisrtrab, katøguchinguen katøguchinguen nebua asamigwan ñim nebua ashib, isubigwan Jesucristoinug pasra tøgagüigwan kasrag tøga pønrramig kønrrai. ²⁶ Ñim naimburab Cristo Jesúsweinguen maya nuguen tab kui pønrramig punrrai, na ñimui utu katøle arrua pasraikkurri.

Jesucristoi srø wam tabig maig chibig køben treeg marøb amønamiig køn

²⁷ Jesucristoi srø wam tabig maig køben, trumay treeg amønamiirre mas palan, na ñimun ashchab arri lata, ashchab arrumui lata, ñimbe masken kanbalatø ke tab pønrramisra, tru isubigwan Cristoinuutø tøga pasra pønrramig Tiuswei srø wam tabigweimburappe, ñimbe kanbalatø mayeeløba ke kandø isub truba truba marøb køn tai wammørinrrabna køtan. ²⁸ Katø ñimun ashig kømui inchibelø 'chigøben martrumøn' cha, kwaarøsrø tøgagüilø kømøweingue. Tru ñim truilø kwaarøsrøimíig pønrraibe nòmuyasiibe managatig pinønrrab ambamnuumay amrrab pønrrain kui asamig kenamisren, trune ñimbe tuyugurri wesrailø pønrrain kui asamig kenamisran. Inchen iibe Tiusweinukkurri arrubig køn. ²⁹ Pøs ñimune Cristogurri øyeekkatig tabig pønrrønrrai marøppe, nun ka kørewatø pønrrønrrai marmøtø, nuimburab chineto nebuig melamig kønrraingucha marig kuig køn. ³⁰ Nan maig kaig nebul arri asigutøwei ñimgucha melan. Katø mõi ya nan øyeeg kaig puig pasraigwangucha ñimbe wammøra køn.

2

Jesucristo maig kuigwan nam asha kusremig

¹ Inchawei ñim Cristoinug kanbalatø pønrraikkurri kuñab purugumig tøgagøb, nui undag købig chi isumig kaanrrai marøbig tøgagøb, Espiritu Santogurri kanguelarøtø lincha pønrramig tøgagøb, ñim larrø tab inchibelø, trurriugu lastima ashibelø kømigwan ñim tøgagøb indig købene, ² trube, nai kasrag købig palabigwan ñim nemarkrunrigay, mayeeløba kandø isub, undag købigwan mayeeløba trunundøwei tøgagøb, kandø lataig pønrrab, kandø lataig isub tøgagøb inditøga. ³ Chiyutøgucha ke nøtø kønrrab inchimøwei, purø nuig kømmørø inchib marøb kønrrab kømøwein kømig køn. Masken treeg kømøtø, larrø tammayig, katøganelane ñim lataitøguen kømø, katøguchinguen nørreelø kønmab asha tøgagømig køn. ⁴ Møitøgucha ke nømuimburabigwandø tab kønrrai marøb kebammøtø, katøganelayasikkucha tab kønrrai maramig køn.

Cristobe managuen nuig mismøtø, masken lamíig misrig

⁵ Cristo Jesús maig isubig købig køben, ñimgucha treetøwei isubelø kømig køn:

⁶ Nøbe trendø Tius købendø, nø treeg kuagucha,

Tiusba lataig kønrrab inchimuíg køn, treeg kurmaptø elachimønrrab.

⁷ Masken treeg inchimøtø,

nø treeg kuigwane mendamara pasrøb,

kan karuindiig megabig lataig kønrrab treeg misra,

møguelø mailø køben treetøwein kørrømisra,

⁸ yandø møg lataitøwei misra pasrøwabe,

nuig kurmab inchimøtø,

nøasiitø chigucha kømíig lataig misra,

maig taigwan mørøbig køptø,

kwamnegatig maig taigwan marig køn,

trurriugu kurusyu mesraig kwamig.

⁹ Inchawei treekkurri Tiusbe nune purø nuig kønrrai mara,

maya munchimeraim pala, nui munchiwane mu kui nebua asig kønrrai tranig køn,

¹⁰ Jesúswei munchiwan wamindi møra, mutøgucha tømønøsrøamig kønrrai,

sømbalasrøm pønrrabelø lata, yu piraueelø lata, pirø umbuelø lata.

¹¹ Mu misaameratøgucha Jesucristobe Señor tru Mayeelaim Pala Nø Ashib Pasrabig køn chib waminchain kuig køn,

Tius Møskawan maya nuguen tab indig kønrrai.

Tiuswei ureemerabe yu pirau kan tør latailø kømig køn

¹² Inchawei ñim nai undaarailø, na ñimba pasrøben, chu uratøgucha mørøb melabelø, na mõi ñimba pasrømubene, katøguchinguen mørøb melabeløbe, kaigyugurri wesruigwan ñim tøga pønrraigu nørørørabig nørørøranrrab marøb ambay, køriibala, purø isuptø. ¹³ Kaguende Tius, nø køn, tru maramigwan martrab isunrraimba, katø marøbelø kønrrai ñimuinug tranøb inchiüibe, tru nø maig martrab isuigwan treeg marig kønrrai.

¹⁴ Chiwandøgucha marøppe, ñimuineto chineto chib mulla mørømøwei, chineto aleguiyab pønrrømøtø maray. ¹⁵ Mugøben ñimun 'ñibe øyeeg køn' tainab pønrrømøelø, kørrøteelø, misaamera larrø minchar, purø kaig misaamerai utu, ñimbe Tiuswei ureemera chigucha kaig mara chillig inchar kømeelø, ñimbe truilai utube yu pirau pala pilab pønrrabelø latailø kuy, ¹⁶ Tiuswei wam øsig kømig tranøbigwane elatchab kømø, tab tøga pønrrabelø. Treekkurrimbe Cristo katø arrub kwaløm truba truba tab kui pasramig kønrrautan nane, na larrø muraaraig pasrønrrab luløb lataitøwei, na truba muraaraig marøb megaibe ka yandiig kørrømisrømøwei inchen. ¹⁷ Ñimui isubigwan ñim Jesucristoinuutø pasra tøgagüikkurri marøb

kuibe kan animal kweecha Tiuswan keta tranøb lataig marøb tøgagüig køben, trubala na øsig kuigwan itølusig kønrrai tranamig nebuiguen mayanguen tab kuimørøb tranamørrun, ñim mayeeløba mayanguen kasraaray. ¹⁸ Inchawei ñimgucha treetøwei mayanguen tab kui mørøb, naba mayanguen kasraaray.

Timoteoba, Epafroditoba

¹⁹ Señor Jesús treeg kønrrain købene, Timoteowan petø ørtrab isur, ñimuisrøngurri wam srua arruben nagucha ñim maig waraigwan wammørabe, katøle tab kuimørøb wamig kønrrai. ²⁰ Pøs katøgan munguen nø lataibe tøgagømur, ñimuimburab tab kønrrai inchib, treegwan martrab truba truba isubig, trurrigu ka isatø inchib pasrømig. ²¹ Kaguende mayeeløba nõmuimburab tabig pub attraingøba labelø køn, Cristoimburab tab kønrrain kømøtø. ²² Pøs ñimbe Timoteowane yandø mu kui ashibelø køn, kan nusrkai møkawan lataitøwei Tiuswei tabig srø wamwan wamindamigu naba marøb pasrabig køn. ²³ Inchawei yu naimburab chi pub arrubig maig kørrømisri ashabe, nun ørtrab isur. ²⁴ Inchendø nagucha naashib ñimun ashchab peba arrumigwan isua tøga pasrar, Tius naba pasraikkurrimbe. ²⁵ Treg kuindøgucha namui nuneg Epafroditon ñimuimay katøle øramig truba palai ashar, maramigu nan purugub, kan suldau lataitøwei tru maramigu naba lincha megabig, katø ñimuisrøngurri naimay wam srua arrubig, na chi palai megaben nan ashchai ñim ørigwandøwei.

²⁶ Nøbe ñimune asinrrabna kui truba isui inchib unig kuig køn, kaguende nø kwanrrø tsuin kui ñimbe wammøra kuimba trurrewei isub. ²⁷ Isa kømøtø, yandø ke kwamdø palabig tsubwei indig kuig køn. Inchendø Tiusbe Epafroditon lastima asig køn. Katø nundø kømøtø, nangucha lastima asig køn, na yeeg isuig megamne, srøitø srøitø isuig megamig arrumørrai. ²⁸ Inchawei nabe nune mas peba ørtrab isur, ñim katøle Epafroditon ashabe truba kasraaraben, na chi isumø tab wamig kønrrai. ²⁹ Señorgurri nune truba kasraatø utay. Katø Epafroditø lataitøwei melab møguelane truba tab inchib tøgagømig køn. ³⁰ Kaguende Cristoi maramelan marøb megaikkurri nõbe yandø ke patsørraptiig tsuig kuig køn, ñim ñimashib trugatig nan purugunrrab kaimailøyu kwam lab nøguen purugub.

3

Ka namuimburab isuitøgatø Tiuswan neburnrab inchimumig

¹ Møimbe trube, nai nunelø, Señorweinug truba kasraaray. Nane chigucha chi pesriig kømøtan, na ñimun pørigwan katøle trunundøwei pøramibe, øyamaybe ñimuiguen chi isub kørrømisramig kaanrrai tabguen køn.

² Tru wera lataig inchib misaamera, chi tabigwan kømø, kaigwan marøb amøñibelø, tru asrwan parøb mindishibelan ñimbe purø ashiptø kuy. ³ Kaguende tru treeg circuncidailøbe nam ker, Tiuswei Espiritutøga køriibala tabig waminchibelø, Cristo Jesúsweinug purø tab kui mørøb kasraabelø, asru chi mariitøga 'øyangurrimesin' chib pønrrømeelø. ⁴ Kaguende naimburabgucha asru treeg mariitøga 'øyangurrimesin' chib pasramig tøgagur. Pøs asru treeg mariitøga 'øyangurrimesin' chib møg inchib pasrønrraptiig mube købwei inditarru køben, nabesi katøguchinguen 'treeg kur' tabig tøgagur. ⁵ Naneaguende kal-laig trune kwalømyube circuncidaig købig køn. Nabe katø israelitasmerai misagugurri arrubig, tru Benjaminwei misag karrabigugurri arrubig køb, hebreo, trendø hebreomerai anin nusrkain køb, katø tru maig maramigwan martrai Moisés pørig maig chibig køben trunun purab punømo marøb pasrabig, katøgucha fariseo købig kur. ⁶ Inchen na maig chull isuigwan ke chinchimmøro inchib maramibe, tru iglesiayuelan kaig maramig naimbe truiig købig køn. Inchen tru maig maramigwan martrai Moisés pørig maig chibig køben truiigwan na sølgandø tabig kuigube 'kalø maran' chib muguen chi tainamø møg købig kur.

⁷ Merrappe øyeeløbe naimbe truba truba nørriig tabig købig kuig, Criston nebua asikkurrimbe mõimbe truiløbe chigucha kømig købig kuin kui mara tøgagur. ⁸ Inchagucha treetøguen kømø, Cristo Jesús nai Señorwan na nebua asiibe, kan chibaguen øyeeg køn cha, kemesra eshkamgaig purø nuig purab tabig køben, tru na tøgagüigwane chigucha komeelø mara tøgagur. Inchawei nõgurri nabe kerrigu trunene chi asamig kaanrrai, wendøbasra øyeegwane chigucha kømig kan køsøngømdø shau lataig mara tøgagur, Criston na nebua tøga pasramisra, ⁹ nuinug na pasramig kønrrai. Tru na naashib tabig sølgandø marøb taig tru maig maramigwan martrai pørigugurri arrubiitøga inchimøtø, tru isubigwan Jesu-cristoinuutø pasra tøgagüikkurri arrubigwan tøgagørrab inchar, tru tabig sølgandø marig Tiusweinukkurriigwan. ¹⁰ Nane Criston mas nebua ashib, nø kwawa, katøle øsiiranrrai maramburab marøbigwan nebua ashib indinrrabna køtan, katø nø chine isumdig punab megamigu treetøwei punab megawa, kwamigugucha nø lataitøwein kømig nebuben, ¹¹ nagucha mumay køben kwailai utugurri øsiirawa kurraramigwan nebua tøgagømig kønrrai.

Nabe tru pumsrø pumigwandø asha yar

¹² Nabe øyeeg chippe, 'kerrigu newan yandø nebua tōga pasrar' cha, kabe 'yandø chigucha palømiig newan tabig kur' cha trenchimur. Inchendø nabe ibig ibig yamønrnun tru nebumigwan nebuinatashchab, kaguende Cristo Jesús nømerrig nan nebua tōga pasramisrig kōbig kōn. ¹³ Nai nunelø, kabe nabe 'iigwan yandø nebuaugen pasrar' chimur. Inchendø nabe iigwan marinabig kōn: yandø wendau kōrrømisrø arrubigwane pesanawa, nai pumsrø pumigwan neburnrab tranrrab megar. ¹⁴ Incha nabe chu pumsrø pumigwan punrrab isua luløb megar, tru lulimburo na kanaigwan utamig kōnrrai, tru treegwan utamig kōnrraiwei Tius nan Cristo Jesús kurri srømbalasarø may wamisrø may.

¹⁵ Nam mayeeløba Tiusweimburabelø yu newan nørørowarbe øyamay isumig kōn. Inchen ñim chigøben peemay isua kuin kōbene, trube, Tiusbe ñimune trunungucha tømaraøb ke-namartrun. ¹⁶ Inchen nam yandø nebua tōga pønrramisrigwane truig maig kōben trunun tarømismø, amøñibig amøñigun.

¹⁷ Nai nunelø, na maig uñibig kōben, treetøwei amøñib, katø nam maig amøñibelø kōben treetøwei amøñibelane asha kuy. ¹⁸ Nabe mōindø kōmøtø, ñimune katøle, katøle eshkaig kuig kōn, mōimbe kappin kōrrøgøbguen eshkar, Cristo kurusyua kwaigwan tsaleelø ashig kōmui inçhibelø truba nu amønaimba. ¹⁹ Nømuimbe pønrrønrrab ambamibe, pinab pinønrrab ambamsrø may ambamig pasrar. Nømuimbe mab muchib waramibe kan tius lataig kōben, kōrikken kōnrraptiig mariitøga nømbe purø nørreelø misrøb pønrrabelø, nømbe ka yu pirauig-wandø isua pønrrabelø kōn. ²⁰ Trune tru nam purramibe srømbalasarøn kōn, tru Kaigyurri Wesrabig, Señor Jesucristo, trusrøngurri tru nø arrumigwan nam truba truba munig melaig nø waisrø. ²¹ Nøbe namui asr trengatig kōmiigwan peemayelø kōnrrai yunømara, nui asr tøguegwalmabig lataitøwein kōnrrai martrun, tru chiwandøgucha nø ashib karub wamig kōnrrai tru nui maramburab marøbig truitøga.

4

¹ Inchawei, nai nunelø, truba undaarilø, na truba asinrrabna kui inçhib isub uniilø, ñimgurri na truba kasrag kui indiilø, katø ñimbe naimbe kan corona lataig tøgagüilø, øyeetø Señorweinug tarømismø melabig melønrrigay.

'Øyeeg melønrrigay' chib wamindiilø

² Evodianba, Sintiquenba Cristogurri numøsralan peg peg isub pønrrømtø, Señorgurri kandø isua pønrrønrrigay chinrrab inchar. ³ Katø nai maramigu elachimø maram purugub megabigwan ñungucha purugurrunrrig chinrrab inchar, tru iig ishumbermeran ñui nuchalan, na Tiuswei tabig srø wamwan waminçhib uñen, nømbe nai mendig lata tranrrab lincha lirab melaig kōbig kōn, katø Clemente kōben, katøganelø naba lincha marøb melabelø kōbengue. Truilai munchimerabe tru managatig øsig purrønrrabelai munchimeran pøri libroyu pørig pønrran.

⁴ ¡Chu uraskucha Señorba pønrraikkurri kasraaray! Katøyug trendamønrrun: ¡Kasraaray! cha. ⁵ Ñimbe truba tab inçhibelø kuigwane mayeelø nebua asig kōnrrai inday. Señor arrumibe lutau kōn.

⁶ Ke ka yandø chinsraatø inçhib, ke chab pureb kui lataig inçhimøtay. Masken treeg inçhimøtø, chiyutøgucha Tiuswei merrab, 'øyeeg palai meler' chib, nøba waminçhib, 'øyeeg purugurrunrrig' chib miamig kōn, trurrigu 'ungwa, ungwa' chib. ⁷ Inchen Tius tru chi isumgaig tab kōbig chi isulan purab nuibe tru ñimui manrrømeranba, ñimui turyu isubigwanba Cristo Jesúsweinug pønrrønrrai tōga pasrønrrun.

⁸ Trube, mōimbe yandø, ñim nai undaarilø, chiyutøgucha ciertonigwanba, chiyutøgucha maig kōbash inçhimumigwanba, chiyutøgucha sølgandø tabigwanba, chiyutøgucha newan tabig chishigwanba, chiyutøgucha larrø tammayig kōmigwanba, chiyutøgucha yeeg tabig kōnrrab chib wamindigwanba isumig kōn. Katø chigøben purø tabig tøgagüin kui, kabe tabig wamindig kōnrraptiig treeg kōbene, trunungucha, trube, tōga isuy.

⁹ Na chigurrimbunø kusrenaniilanba, na chi marigwan ñim uta, na maig kuigwan, na maig mariilan ñim ashib, ñim mørøb indiilanba, ilane marøb ambamig kōn. Inchen Tius tru chi isumgaig tab kōbiibe ñimba pasrønrrun.

Filiposrø Cristogurri nunelø Pabloyasig an purugüig

¹⁰ Nabe Señorweinug truba kasraaray, ñim katøle nan isunrrab indin kōben. Pøs ñimbe isuppe, isubwei inçhendø, tru øyeeg maramibe pumø srø kuig kuinrrun. ¹¹ Nabe øyeeg chippe, palain pasraptø trenchimur. Kaguende nabe nan maig pub arrindøgucha treegu kasraatø purayam kusrewa kur. ¹² Chi palaim pasramig maig kui mørøb, chigucha palømø uncha tōga pasramig maig kuig mørøb inçhibig kur. Maig pub arrindøgucha kerrigu treegu purayamigwan kusreweig kur: patsau chi palønrraingay tōga wamig nebui lata, parø purayamig nebui lata, uncha tōga wamig nebui lata, chugurringuen kōmui wamig nebui lata. ¹³ Cristo naba pasrøbene, chiwandøgucha kaimamø maramønrrun, kaguende nø nan

purugub pasraikkurri. ¹⁴ Inchendøgucha na truba isui megaben, ñimgucha treetøwei lata naimburab isub purugub melaibe mayanguen tabig køn.

¹⁵ Katø ñim filipossreelø isua kuinrrun, Tiuswei tabig srø wam ke srø kebyaindø køben, tru Macedoniasrøngurri na yandø inrrab inchen, mu katøgan iglesiabe purugumuben, ñimbeguende nan an purugub, nagurri purugúigwan utab indamig kønrai marig købig køn.

¹⁶ Incha trutø kømøtø, na Tesalónicasrø uñenguen, ñimbe pamayguen purugua ørig købig køn, nai chi palabeløyu nan purugunrrab. ¹⁷ Kabe ñim nan ke ka tranraindø isua trenchimøtø, tru ñim mariiløbe katøguchinguen ñimuindøwei nurab inrraimab isua trenchar. ¹⁸ Inchendø nabe chi palabigwan kerriguh uta tøgagur, unchaguengue. Tru ñim nan keta trana øriilø Epafrodito srua arrua traniløbabe, ¡katø! chigucha palømøzhig tøgagur. Tru ñim keta traniiibe kan animal kweecha Tiuswan tranig, purø may irrabzhig lataig køn, Tius truba truba tabig kui asha utamdiig. ¹⁹ Inchawei nai Tiusbe ñimune chi palabigwan lutøgurrih tranrrun, nui tru chigurrimbunø chigucha palømíg tørguegwalmabigu maya købigwan Cristo Jesúsukurri. ²⁰ Namui Tius Møskawan managatig tørguegwalmabig kønrrun. Treeg kønrrun.

Wamindiilø srabeig

²¹ Cristo Jesúsukurri Tiuswei misaamera mayeelanba 'ka amøñigüeh' chirrunrrig. Katø namui nunelø naba amøñibelø chigucha 'ka amøñigüeh' cha øran. ²² Katø Tiuswei misaamera katøganeløgucha ñimun 'ka amøñigüeh' cha øran, trugurri katø mas 'ka amøñigüeh' cha ørøppe, tru Roma maya misagwan ashib karub wabig Césarwei yau purrabelø, truilø øran.

²³ Namui Señor Jesucristoi ka yandø tab indiibe ñim mayeeløba pasrønrrun. Treeg kønrrun.

Colosenses

Pablo 'ka amõñiguh' chib pørig

¹ Tius trendø treeg kõnrrain køben na Pablo Jesucristo nõashib karua ørig nai nuneg Timoteoba misra, i kilgawan pørar, ² ñim Tiuswei misaamera chu uragucha tarømisrmø melab nunelø Cristo Jesúsba kanbalatø pønrrabelø Colosassrø warabelan. Namui Møskai Tiuswei ka yandø tab indiiba, chi isumgaig tab købiiba ñimba kõnrrai inchar.

Pablo Tiuswan 'ungwa, ungwa' chib

³ Chu uraskucha nambe ñimuyasig Tiusba waminchippe, nun 'ungwa, ungwa' chibelø ker Señor Jesucristoi Møskawan. ⁴ Kaguende ñim ñimui isubigwan Cristo Jesúsweing pasra tøgagúigwanba, katø Tiuswei misaameran mayamba ñimbe truba undaguelø kuigwanba wammører, ⁵ tru ñimuyasig srømbalasrø esegaig pasrabigwan ñim muniirabelø kuikkurri treeg kuigwan. Truigwane Tiuswei tabig srø wam newan ciertonigwan waminchen, ñimbe mørig købig køn, ⁶ tru ñimuisrø kebiben. Inchawei yu pirau chutøgucha tru tabig srø wambe truba truba nurab, kan yell larrøbichib ib lataitøwei, ñimui utugucha treetøwei larrøbichib arrun, tru ñim Tiuswei wamwan mørøb, katø Tiuswei tru ka yandø tab indigwan maig kuigwan ñim tab chigúi mørøb indin kwalømgurrimbunø. ⁷ Epafra maig kusrenanig køben, trunun ñim kusreig køn. Truibe namui undaaraig, tru marameløyu namba lincha marøb megabig, Cristoiwan maizhikken elachimø, ñimuyasig tab kõnrrai marøb megabig køn. ⁸ Katø, Espiritu Santo gurri ñim undag købig tøgagúigwan nøgucha namun eshkatan.

⁹ Incha treekkurri namgucha trunun wammørin kwalømgurrimbunø chu urastøgucha ñimuyasig elachimø, Tiusba waminchib miabelø ker, Tius tru nõ maig martrai palai waigwan ñim nebua asamburab nebua ashibelø kõnrrai Tiusweimburabigu, newan nebua asamig kusreitøgaba, katø tab chigúi møriitøgaba. ¹⁰ Amõñippe, Señorweylø kui asamdeelø amõñinrrai miabelø ker, chiyutøgucha nõ tab kui mørøb wamig kõnrrai marøbelø, ñimui chigøben tabig mariiløbe, yell larrøbichib ib, katø Tiusweimburabigwan nebua asamigu nõrrørab ambamig kõnrrai. ¹¹ Nui mayanguen tabig maramburab marig kerrigu maya tøgagúig, truitøga kullaaramø, ka melamig kõnrrai martrai miabelø ker, maig pub arindøgucha mur isua melaptø melamigweyasiiba, maig indindøgucha tammay melabig melamigweyasiiba. ¹² Tius Møskawan 'maya nuguen kasraatø ungwa' tay, tru nõ ashib karub waisrø tørguegwalmabnug nui misaamera ketig utamigwan ñim tøgatø utønrrabelø kõnrrai tamara pønsraigwan. ¹³ Kaguende nugwaimandzig løstiigu nõ karub pasrabigugurri Tiusbe wesrawa, namune nui undaaraig Nusrkai nõ ashib karub waisrø purøørig køn. ¹⁴ Nø nuielø kõnrrai nambe kaigyugurri wesrailø ker, namui kaig mariilan yandø pesannab chi ulø payimeelø.

Cristo tru chiwandøgucha purab nuig

¹⁵ Tius, tru namui kaptøgabe asiimigwan øyeeg kuitamab asamig, Cristobe truing køn, chigurrimbunø pønrrabigwan marmøwatøsrøwei tru srøsrø nõmerrig pasrabig. ¹⁶ Kaguende Tiusbe Nusrkaingurri mara pønsraig køn tru srømbalasrø chi købigwan lata, pirau chi købigwan lata, kaptøga asigwan lata, asiimigwan lata, reymera purramisra karub purraigwan lata, kerriguwan nõm merrarrowa karuigwan lata, katø nõm asha karuigwan lata, katø mugucha manchinrraigaig karuigwan lata, kerriguba nøgurri mara pønsraig køn, trurriigu nuyasig kõnrrai. ¹⁷ Nøbe chiwangucha marig kaabenbatøsrøwei manawei købig kua, chigurrimbunø pønrrabiibe pinømø, nøgurri pønrrabig pønrran. ¹⁸ Inchagucha nõbe asrwei tru tur køn, tru iglesia. Nusrkaimbe manawei nõmerrig købig, kwaitai utugurri katø nõmerrig øsirraig køn, chiyutøgucha nõ purab nuig kømig kõnrrai. ¹⁹ Kaguende Møskawane mayanguen tabig asønaig køn, nõ maya nu kømburab kuigwan Nusrkaweinug pasrønrrai pasramig. ²⁰ Incha nui Nusrkaingurri Tiusbe pirau chigurrimbunø købigwan lata, srømbalasrø chi købigwan lata katøle nõba katø tab kõrrømisrtrai martrab isuig køn, nui Nusrkai kususyu kwawa ani lusiitøga ambugurri igurri tab kõnrrai marøb.

²¹ Pøs ñimbe merrabsrømbe Tiusweinukkurrimbe nõørø pønrrabelø tarømisrar, ñimui isubigwane ke kaig marameløyugøba pasra tøgara kua, Tiuswane ashig kømui inchibelø købig køn. ²² Treeg købig kuigwan mømibe katøle ñim nõba tab kõrrømisrtrai kõrrømarig køn, Nusrkai nui asru kwaitøga nui merrab tabigweindø tarømariilø, kaig mariitøga chillig incha kømeeelø, ñimbe øyeeg køn tainanrrabgailø pønrramig kõnrrai martrab. ²³ Pøs øyeeg kõnrraimbe, tru isubigwan ñim Cristoinuutø pasra tøgagúigu truyutø pønrrabig pønrrab, katø mumaygucha kõrrønrrabgailø tru Tiuswei tabig srø wamwan ñim mørigu tru munig melaig pasrabigugurri tarømisrmø, melabig meløwabe kõnrrun. Tru srø wamwane yu pirau

maya misaameran mundøgucha eshkab kusrenanig køn. Inchen na Pablobe tru wamwan waminchib meganrrai pasrig kur.

Pablo Tiuswei tabig srø wamwan waminchai wesrawa pasrig

²⁴ Na ñimuimburab chine kaig nebuinab megaigwan mõimbe nane kasrag køtan, Cristo nui asr, tru iglesiayasig chine kaig nebuinab megaigu tru palabigwan nai asrutøwei kaig indinab megaitøga nemarøb ya. ²⁵ Nabe tru mayeelø nun kørebelayasig tru chiwandøgucha marøb meganrrai wesrawa pasrig kur, ñimuimburab tab kønrrai Tius nø karuig, nui wamwan maig kuigwan newan waminchib pasrønrai, ²⁶ tru manasrøngurri maya misagwan mungucha Tius kenamariimig tøgagúigwan. Inchendø truigwane mõi ysrømbe nui misaameran kenamaran. ²⁷ Tru judios kømø misaamerai utu tru mungucha kenamariimig tøgagúigu tru tørguegwalmabigwei chigurrimbunø palømig pønrrabigwan Tiusbe nõmune asingarunrab isuig kuig køn. Truibe Cristo yandø ñimuinug pasraig, truig køn, ñim munig melaig tørguegwalmabig.

²⁸ Nambe tru Criston eshkab kusrenanøbelø ker, mundøgucha øyamay melønrrigay chib, kusrenanøb, maig kuigwan tab chigúi mørague, mu misaamerandøgucha Cristo Jesúsweinig newan tabig pønrrønrai Tiuswan kenamarab. ²⁹ Treeg kønrraiwei na maya nebumburab truba truba mur tranrrab marøb megar, Cristoi maramburab marig tru nainug marøb pasrabiitøga.

2

¹ Pøs nabe ñimuimburappa, laodiceasreelaimburappa, katø mayeelø nan malaugue nebua ashmeelaimburappa, truba truba mur tranrrab marøb megaigwan ñim nebua asimbe-mab isutan. ² Undag købigu kanbalatø pønrramisra, nõmui manrømerayu tab kui mørøb kørrømistrai inchib megabig kur, tru chigurrimbunø palømig pasrabig tabigwan chigúi nebua mørøb ambamnegatig, tru mungucha kenamariimig Tiuswei pasrabigwan ashmø kømø nebua ashchai, truibe tru Criston. ³ Kaguende chigúi mørøb kusrebig kømiba, chigúi nebua asamiba, tru iig purø tabiibe kerriguba Cristoinuutø sørig pønrran. ⁴ Nabe øyegwan øyeg chippe, ñimun may wamincha mugucha kegørrøsrkømonrrai waminchar. ⁵ Nabe ñimui utu pasrømuingucha, nai isuigube ñimba pasrar, ñim maig købendiig kømø, maig amønarnigwan amønñib, ñimui isubigwan Cristoinug pasra tøgagúigwane elachimø, tøga pønrrøben, nabe truigwan ashib, truba truba kasraarab.

Cristoba pønrraikkurri yandø chigucha iløsrkaig kømumig

⁶ Ñim Cristo Jesúswan ñimun nø asha karub pasrabig kui asha utamma, utig kuibe, nuinug treeg amønay, ⁷ umbusrø srøl keyatab lataitøwei, nuinug põlbasra kusrub marøb, ñimun maig kusrenanig køben, ñimui isubigwan Cristoinug pasra tøgagúigwane trubmaytø tøgagøbig tøgagøb ambamigwan tøga, tru ungwa tamigwane katøguchinguen nuramburab nurab inrrai marøb. ⁸ Isua tab ashiptø melay, møguelø nõrøø kusreelø chi purugunrrabgailø ka kegørrøsrkamitø marøbiitøga, ñimun srua ambinab melønrrab kømø, tru kusreeløbe chi purugunrrabgailø, ka kegørrøsrkamitø marøbigwan. Truiløbe misaamera nõm merrabsrøngurri trendø isub amruiløyugurrimba, katø chinetø yu pirau muba kuimburab mandø isua marøb kømig tøgagúiløyugurrimba arrubig køn, Cristoinug maig køben, treeg kømøtø.

⁹ Kaguen Tius maya nu nø kømburab kuibe, Cristoi asru pasran. ¹⁰ Inchawei ñimbe chigucha palømig kerriguwan neilø pønrran, Cristoinuube. Tru nõm asha karuigu lata, katø mugucha manchinrraingag karuigu lata Cristobe nø pasrabig, chiyutøgucha nø asha karubig nø tur køn. ¹¹ Katø trendø trømbøig marøg kui inchib pasrabigwan ñimui asrugurri kerrab ñimbe nuinug mu kui asiilø kønrrai mariilø køn, tru møguelø tasiitøga asru circuncisión marig tøgagømøtø, tru mu kui ashchai kørrømariibe Cristoinukkurri arrubiitøga. ¹² Ñimun piu umbu ulsrøben, Cristoba kegøtø soriilø lataig kuig køn. Incha tru piu umbu ulsraigurri kurrappe, ñimbe nõba kegøtø øsiirawa kurrig køn, Criston kwailai utugurri kusrubig Tiuswei maramburab marøbigu ñimui isubigwan truyu pasrikkurri.

¹³ Tru ñimui chigurrimbunø kaig mariiløyuba, ñimuinug trendø trømbøig marøg kui inchib pasrabigwan kerrab tru asru circuncisiónwan marøb lataitøwei chi mariimeelø ñim kwailø srø købenbatøwei, Tiusbe Cristoba kanbalatø øsig kømigwan ñimune tranig køn; namui kaig mariilan ulø paymø, kerriguwan pesannab. ¹⁴ Tru nam øyeg, øyeg ulø køn' cha kan kilgayu pøri lataitøwei købigwanba, katø truyutøwei øyeg maramig køn' chib pøri latailø pønrrabigwanba, Criston tru kuryusu mesrøben tøgatø mesrøb lataig mara, Tiusbe chi asamig kaanrrai kerraig køn. ¹⁵ Incha katø tru kailø nõm asha karuigwanba, katø mugucha manchinrraingag karuigwanba yandø truilane chigucha martrabgailø misrtrai kørrømara, nõmune mayeelø ashig kui ashchai marig køn, tru kuryusu kwawa, yandø nø kanawa pasramisra.

¹⁶ Inchawei chigøben mamimeran mutsamelan, chigøben fiesta marin kwalømmeran, srø pøl tsumisrin kwalømmeran, isrin kwalømmeran, øyeebe maig marøbelø køgue chib ñimun mugucha wamincha ashmønrrai maray. ¹⁷ Inchen øyeeb mariiløbe kerriguba tru wendøsrø attrabigwan øyeeb kønrrabig kuitamab asamig, iibe ka treetø køn. Inchen tru cierton maig kønrrabiibe, Cristo, nø køn. ¹⁸ Ñim ketig utamigwan mugøben utøbashmuinab pønrrønrrab kømø. Nømbe ka isatø, purø tabzhig misrøb, ångelesmeran køriibala tabig waminchib tømønrsrøb, truiløbe 'piab lataig kenamisrigu chigøben aser' chib wamin-damburab waminchib, nømui trendø kaig isub turyu ke purab nørreelø isumuinguenig isubelø køn, ¹⁹ tru asru Cristo turwane trag pulu trakkandø pønrrømøtø, ka nørøtø misra ambul. Kagen tru turwein køn, tru asr ørøba truba tabig chishmisrøb, katø asru tuørø kønab pønrrabelanba, truyu ambumay imay kandø kønrrai merrarrab srølmeranba asrwan kandø misrøb inrrai marøbiibe. Treebe Tius maig nurab inrrai inchen, trumay nurab yan.

Cristoba pønrraikurri srøig peemay amønamiig tøgagøb

²⁰ Tru chinetø marøb kømig yu pirau muba kuimburab mandø isua marøb kømig tøgagüilan marøb kømønrrab, ñim Cristoba yandø kwawarbe, katøgucha yu piraelø kua lata tru maig martrai wesrawa pønrrailan, çchindimba tru kuindø marøb pønrrabelø køgue ²¹ tru øyeeb tallan: "Øigwane kusrawa ashmøta" tamba: "figwane mamøta" tamba: "Katøramøta" tamba indiilan? ²² Truiløbe ka katørab, srua kuinuutø pinønrrai mariilø køn, pøs øyeeb marameløbe møguelø nøm karua pønrrailø yugurribah, katø nøm isua kusrenanigugurribatø arrubig kua. ²³ Inchawei øyeeelan marøb kuibe, ciertonwei purø may isua mari latailø asønnan, tru nøm Tiuswan yangucha isub chib pønrraiba, chigucha kømeeelø misrøb pønrraiba, nømui asrwardøweinguen murigu puraambingarub pønrraibabe. Inchendø tru nøm øyeeb marøb pønrrailøbe nømui asru tru kaig marøg købig arrubigwan kerramibe chiweingucha chi purugumig køn.

3

¹ Inchawei yandø ñimbe Cristoba øsiirawar kuig køppe, ñimbe srømbalatsriigwan lamig køn, Cristo tru Tiuswei kusrmay waisreelan. ² Ñimbe isuppe, srømbalatsreelan isuy, yu piraelan kømøtø. ³ Kaguende ñimbe yandø kwaig latailø kua, mømibe ñimui øsig kømibe Cristoba Tiusweinug søra tøgagüig pønrran. ⁴ Inchen Cristo tru ñim øsig pønrraig kenamisrene, ñimgucha nøba tørguegwalmabigu tøgatø kenamisrtrun.

Møin kwaløm amønaiibe merrabsrø amønaiig lataig kømøn

⁵ Inchawei ñim trendø kaig marøb kuig yu pirauig ñimuinug pasrabigwane patsøga pasray: ishuuba, mømøba trømbøig kaig maramelanba, køsøngønrratiig maramelanba, ke chinsraatø inchib trømbøig marøg købigwanba, chigøben kaig maramig isumelanba, parø indamigwanba (tru parø indiibe tius mara tøgagüi lataig køn). ⁶ Øyeeelan marikkurriwei tru mørmeelaim pala arrubig køn Tiuswei namig købiibe. ⁷ Ñimgucha merrabsrømbe øyeeelanøwei marøb amøñibelø købig køn. ⁸ Ñimbe mømibe ilane kerriguh elatsay: trømbøig namig købig pasrabigwanba, ke chab srurrab namig købigwanba, katøganun kaig maramigwangøba isumigwanba, trømbøig wamamelanba, chine møranguengaig trømbøig wamamelanba elatsamig køn. ⁹ Ñimbe kanikkurri kanikkurri isa waminchimøtay. Tru køllig ñim trendø kaigwan tøgä kal-laig ñimui umbu pasrabigwan treetø treetø marøb tøgagüilanbañau ñimbe wesrua kutsig køn. ¹⁰ Incha ñimbe tru srøigwan kewa pønrran. Tius nø marøbig maig køben treetøwein kønrrai marigwan, tru srøibe kerriguwan tab nebua asamnegatig srøitø srøitø yunømarøb arrun. ¹¹ Trube, mømibe, griego køn tamig kawei, judío køn tamig kawei, asru circuncidaweig køn tamig kawei, circuncidamüg køn tamig kawei, peg pirausrig køn tamig kawei, escitamera køn tamig kawei, karuindiig megabig køn tamig kawei, mu karuimig nuimburab uñibig køn tamig kawein køn. Treeg kømøtø, Cristobe chiyutøgucha kerriguwan nøtø køb, katø mayeelainug nø pasran.

¹² Inchawei Tius lawa wesruilø, ñim newan tabig chishelø, trurrigu undaarailøbe igwan kewa lataig pønrray: lastima ashibig kømigwan køben, larrø tab inchibelø kømigwan køben, kørøteelø kømigwan køben, larrø tammayig kømigwan køben, maig køben kuingucha tammay megabig kømigwan køben, ¹³ kanikkurri kanikkurri chigüingucha lata inchimugwan køben, møikkøben 'øig øyeeb inndan' chib pønrramig tøgaguabe, kanikkurri kanikkurri chi ulø paymø, pesannab inchibelø kømigwan købengue. Señor ñimun ulø paymø, mandø pesannaig køben, ñimbe treetøwei maray. ¹⁴ Inchen køben iilø kerrigu kømønø tru palabe, undag købigwan itøguewa pønrramig køn, tru undag købiibe mumaytøgucha kanbalatø newan purø tabig pønrramig kønrrai marøbig køn. ¹⁵ Inchen Cristo tru chi isumgaig tab købiibe ñimui manrrau maig maramigwan nø karub pasrønrrai inday. Kaguende ñim kan asrtø kuig køben, øyeegunay wamig køn. Ñimbe 'mayanguen ungwa, ungwa' chibelø kønrrigay.

¹⁶ Cristoi wambe ñimuinuube maya nu pasramburab pasrønrrai inday, purø tab isua asha, kanikkurri kanikkurri kusrenanøb 'øyeeg, øyeeg marøb melay' chib waminchib. Tiuswan ñimui manrraugurri 'mayanguen unywa, unywa' chib nuyasig salmoswan, himnoswan, nuimburab cantailan cantab inchigay. ¹⁷ Inchawei chigøben marøppe, wamindigu lata, chigøben mariiløyu lata, Señor Jesúswei munchiyu maray, nøgurri Tius Møskawan 'ungwa, unywa' chib.

Tiuswei ureemera nømui yau maig kømigwan waminchibig

¹⁸ Sraløbe, kelø maig chiben treeg mørøb melamig køn, Señor nø maig martrai indig køben, trumay. ¹⁹ Keløbe, ñimui sralane undaguelø kømig køn, namikkølig inchib tsag inchimøtø.

²⁰ Ureemerabe, chiyutøgucha nømui møskalane maig chiben møramig køn. Kaguende øyeeg mariibe Señorwane truba tabig asønnan. ²¹ Møskaløbe, ñimui uregwane purø trømbøig inchib namig kui inchai marmøtay, chine isub kullaarai inchimønrrai.

²² Ñim karuindiig melabeløbe, yu piraelø ñimun karub pera købelane chiyutøgucha møramig køn. Møgeløba ka tab kørømmistraptø marøbelø latawei nøm ñimun ashib pønrrøbendø martrab kømøtø, ñimui manrraugue tabigwan isua, Tiuswan køriibala maramig køn. ²³ Chiwandøgucha marøppe, martrab isua maramig køn, møgeluyasig kømøtø, Señorweyasig lataig marøb, ²⁴ truburø ketig uta tøgagømigwan tranrrabiibe Señor nø tranrrab kui ashibeløbe. Kaguen ñim chi marøb pønrraibe Cristo tru Señorweiwan marøb pønrran. ²⁵ Inchen møikkøben maig maramigwan marmøtø, kalø marøbigwane nui kalø marig maig køben truburø nøgucha treetøwei kaigwan utønrrun. Kaguende Tiusbe møigwane purømisrøb kandarøtø inchimig køn.

4

¹ Ñim karub pera købeløgucha ñimui karuindiig melabelane sølgandø tabig marøb tøgaguy, ñimgucha srømbalarømbe ñimun Ashib Karub wabig tøgar kua mørabe.

² Chu urastøgucha Tiusba wamindamigwane maikken elachimø melønrrigay, trunune marøppe, nøørøtø isub palabino kømø, tab isua marøb, Tiuswan 'ungwa, unywa' chib. ³ Katø namuimburabgucha Tiuswan tøgatø miarrunrrigay, nui wamwan wamindamig nø kan yaskab kurtrai, Cristo, tru asiimig sørig pasrabigwan eshkaib wamindamig kønrrai. Pø nabe tranun wamindikkurri kailan keeri yau pasar. ⁴ Katø Tiuswan miarrunrrigay, nui wamwan waminchipe, na maig wamindamig køben tørgandø treeg waminchab.

⁵ Tiuswan ashmø misaamerai utube purø tab isua purø ashiptø amønarnig køn, tabigwan maramdiig pubene, treegwan ka purainrraindø ashatø pønrrømøtø. ⁶ Ñim waminchibgucha tabig mørøptø purramdiig waminchibelø kømig køn, kan mamigu tre may larri lataig, chull møramdiikke, mundøgucha mandø løtamigwan tab løtabelø kønrrab ñim tøgagømig kønrrai.

Pablobe Tiquiconba, Onésimonba karua ørøb

⁷ Tiquico, namui undaarraig nuneg, Tiusweiwan maizhikken elachimø marøbig, Señorwei marameløyu naba lincha marøb megabig, naimburab chitø wamindamelane nø waminchun. ⁸ Nabe nune ñimuisrømay ørøppe, treeg isua ørar: namuimburab maitø pub arrigwan ñimun wammørøsrkønrraimba, katø ñimui manrrømeran chi isumø tab kønrrai martraimba. ⁹ Tiquicobe inrrab køn tru Onésimo namui undaarraig nuneg, maikkucha elachimø megabig, tru ñimui utuiba. Nømbe yu chitø pub arrigwan kerrigu waminchun.

'Ka amøñigueh' chib Pablo wam øriilø

¹⁰ Aristarco, tru kailan keeri yau naba lincha pasrabikkucha, ñimun 'tab ka amøñigueh' tan; katø Marcos Bernabèwei lenunekkucha. (Marcosweimburab na maig martrai eshkaigwan ñimbe wammøra kuinrrun, ñimuisrømay ibene, tab utønrrigay.) ¹¹ Katø Jesús, tru Justo cha wamig, truiikkucha 'ka amøñigueh' tan. Tius nø ashib karub waigweimburabeløyu nan maram purugub melabelø, judiøsmara kørebeløbe i pøneløtø kuig køn, nayasiibe truba truba tab kønrrai marøbelø. ¹² Katø Epafaskucha ñimun 'ka amøñigueh' tan, tru ñimui utuig Cristoi marøb megabig. Nøbe chu uraskucha ñimuyasig Tiuswan truba truba miab megabig køn, ñim kørønrrabgaig tabig melabelø, Tiusweimburabeløyu newan nørørawar, Tius kerriguwan maig palai waben, chiyutøgucha palømig, newanelø kønrrai. ¹³ Nøbe ñimuimburab maramigwan truba truba isuaiig kui nabe ñimun eshkamønrrun, ñimuimburappa, laodiceas-reelaimburappa, katø hierápolisreelaimburappa purø isua marøb megaigwan. ¹⁴ Lucas, tru mø marøbig undaarraig, truiikkucha 'ka amøñigueh' tan, katø Demaskucha.

¹⁵ Katø namui nunelø Laodiceasrø warabelan chigucha 'ka warøgue' tan chirrunrrigay, Nifaswanba, katø tru iglesia nui yau tulundzunabelanba. ¹⁶ I kilga pørigwan ñimui utu chab lebene, Laodiceasrø iglesiangucha lenrrai inchigay. Katø Laodicea iglesiasrøngurri kilga pørig pubigwan ñimgucha lenrrigay. ¹⁷ Ñim Arquipone trenchinrrigay: "Señor ñun

chi martrai karua pasrigwane isuptø marøb megau tan cha, maig maramigwan mara kørømartrab.”

¹⁸ Iig ‘ka amøñiguh’ chib pøriibe, na Pablo nai taska pørig køn. Ñimbe pesannamø, isua kuy nabe kailan keeri yau pasrar. Tiuswei ka yandø tab indiibe ñimba pasrønrrun.

1 Tesalonicenses

Pablo 'ka amõñiguch' chib pørig

¹ Na Pabloba, Silasba, Timoteoba kanbalatø misra, Tesalónicasø iglesian i kilgawan pørar, Tius Møskaimba, Señor Jesucristoba kanbalatø pønrabelan. Tius nui ka yandø tab indiiba, chi isumgaig tab købiiba ñimba pasrønrnun.

Tiuswei ureemasun Tiuswan 'ungwa' taig

² Chu uraskucha nambe Tiuswan 'ungwa, ungwa' chibelø ker ñim mayeelayasig. Katø chu uraskucha nam Tiusba wamindigube ñimuimburab tøgã isuppatø melabelø ker. ³ Chu uraskucha nambe Tius namui Møskawei merrab maikken pesannamø isubelø ker, tru ñimui isubigwan Jesucristoinug pasra tøgãgũkkurri chigøben marigwanba, tru undag købigwan tøgã pønrãikkurri marigwanba, katø namui Señor Jesucristoinug muniiraikkurri maikken elachimø, melabig melaigwanba. ⁴ Namui nunelø, Tiuswei undaarailø, ñimune Tius lawa wesruilø kuin kui aser. ⁵ Pøs tru Tiuswei tabig srø wam ñimuinug pub urasma ka wamindiitø kømøtø, maramburab mariitøgãba, Espiritu Santotøgãba puig købig køn. Katø tru wamindiibe treeg kømønrrab kømøtø, nambe treeg kui ashawei wamindig købig køn. Ñimuyasiitøwei tab kønrrai, ñimui utu nam amønammay amønaig købigwan ñimbe ashibelø køn.

⁶ Ñimbe ñimuimburappe nam lataitøwei, katø Señor lataitøwei mandø amønãnamigwan treeg amøñibelø misrin køn, Espiritu Santogurri Tiuswei wamwan tranigwan truba kasraatø utab, chine purø trømbøig isuig melamig nebuingucha. ⁷ Øyamay ñimbe Macedonia pirauba, Acaya pirauba mayeelø Criston kørebelaimbe, truiløguen asha kusremdiig ñimbe treelø misrin køn. ⁸ Tru Señorwei wam ñimuinukkurri larrøbichib ibiibe, Macedonia pirautø kømøwei, Acaya pirautø kømøwei, chusrøndøgucha larrøbitsin køn. Katø trutø kømøtø, ñim isubigwan Tiusweinug pasra tøgãgũgwan chigucha nebua asig misrin køn. Treekkurri namune yandø mas chi tamig palønrrabga lataig køtan. ⁹ Inchawei trusreeløtøweinguen nam ñimuinug kebamben, mandø tab wamab utig købigwan waminchibelø køn, katø tru øsig wab Tius ciertonigweiwan marøb pønrrønrrab, tru taska mari tiusmeran wendøbasra, Tiusweimay ñim mandø lliraigwanba, ¹⁰ katø Tius tru kwailai utugurri øsirangaruig tru srømbalarøngurri nui Nusrkai arrumigwan muniiranrrab pønrramisrigwanba, tru Tiuswei purø trømbøig namig købig attrab pasrabigwan Jesús namun chi treeg kømønrrai marøbigwan.

2

Pablo Tesalónicasø marøb uniilø

¹ Namui nunelø, ñimðweinguen ashibelø køn, nam ñimuisrømay amrruibe, ka amrruitø webimuigwan. ² Pøs ñimbe yandø ashibelø køn tru Filipossrømbe merrabwane chine purø trømbøig nebuinab, tsalø waminab melaig købigwan. Inchendø treeg kuingucha, namui Tius puruguitøgãba nui tabig srø wamwan chigucha chi korig kuin kømø, eshkanrrab pønrramisrig købig køn, marmønrrai namun yeeg trømbøig katingucha. ³ Kaguen nam ñimun 'øyeeg marøb meløgun' chib wamindiibe, peemaytø pella kusrenaniiløygurri arrubig kømøwei, kabe chigøben trømbøig martrab isua wamindigugurri arrubig kømøwei, kabe nam chiyugøben isatø kegørrøsrkønrrab wamindigurri arrubig kømøwein kuig køn. ⁴ Treeg kømøtø, tru Tiuswei srø wamwan namun waminchãi pønrsøppe, maig wamin-damigwan waminchibelø kui Tius treelø kui asiilø købelø ker nambe. Inchawei nambe waminchippe, mu misaamera tab kui mørtraï tabzhig inçhib pønrrønrrab kømøtø, Tiuswan tab kui mørøb wanrrai marøbelø ker, nø namui manrrømeran mailø kõtashchab ashibigwan. ⁵ Pøs ñimbe ashibelø køn, nambe managen chull mørtraï isatø tabzhig waminchimøwei, kabe chiwan køben parøgøb, chine isab truba tabzheelø misrøb amrrumøwei indigwan. Tiusbe iigwan asha pasran. ⁶ Nambe Cristo nøashib karua øriilø køppe, ñim namun tab inçhai indamdiigwein købendø, nambe managen misaamera tabelø kømnbã asha tab inçhai lamuig køn, ñim lata, katøganelø lata.

⁷ Masken treeg inçhimøtø, nambe purø tammay inçhibelø købig ker, kan usri nui shush uregwan maig køben inçhimø ashib nørøranøb lataitøweingue. ⁸ Namui undag købigwan ñimuyasig purø nuig tøgãgøptø, Tiuswei tabig srø wamwandø ñimun tranrrab inçhimøtø, nam namashibguen øsig kuigwan tranamdiig kuig køn, kaguende ñimbe namuimbe purø undag kømdeelø misrin køben. ⁹ Namui nunelø, ñimbe isua kuinrrun, nam øbøøba muraara, muraara marøb melailan, ñimui utu møikkøben namun chi palabigwan ka tranrraindø purrømønrrab, yem, kwaløm truba marøb melaig købig køn, Tiuswei tabig srø wamwan ñimun eshkab kusrenanøb amøñippe.

¹⁰ Ñimbe ñimashib ashibelø køben, katø Tiuskucha asha pasran, nambe chishig newan tabig, sølgandø maig maramigwan marøb, katø muguen chi tamgaig amønaig købigwan, ñim Criston kørebelai utu. ¹¹ Pøs ñimbe ashibelø køn, nambe ñimun møigwandøgucha kan møsikai nui uregwan waminchib lataitøwei, ¹² 'øyeeg marøb melamig køn' chib, 'chigüingucha ka meløgun' chib, 'Tius wamabigwei ureesun amønay' chib, Tius nø ashib karub waisrømayba nui tørguegwalmabiisrømayba ñimun nø wamab wan.

Tiuswei ureemeran kaig martrab kurrig

¹³ Inchawei nambe chu urastøgucha Tiuswan 'ungwa, ungwa' chibelø ker. Kaguen tru Tiuswei wamwan nam waminchen ñim mørøb uras, ka møguelø wamindig kui lataitø mara utømøtø, Tiuswei wam ciertonig kuitamab isua utig køn ñimbe. Truibe tru ñim kørebelainuube ka pasrømøtø, marig misrøb pasran. ¹⁴ Kagunde ñim, nai nunelø, tru Judea pirausrø Tiuswei iglesiamera tru Cristo Jesúsweinug kanbalatø pønrrabelø lataitøwei nebuinab melaig køn. Ñimungucha ñimuim piraui misaameratøwei truba truba kaig indinab melamig nebuig køn, tru Judea pirauelan nøm judiosmera kaig indinab melab lataitøweingue. ¹⁵ Tru judiosmerabe Señor Jesúswan kweetsamba, tru Tius maig karuigwan eshkabelan kweetsamba, namune nømuiinukkurri webetamba indig købig køn. Incha truiløbe Tiuswane tab kui wanrrai marmeelø, maya misaameran ashig kømuingøba inchibelø køn, ¹⁶ tru judios kømø misaameran kaigyugurri wesrailø kønrrai waminchab inchen, waminchamamønrrab namun merab. Øyamay nømui kaig mariilane katøguchinguen katøguchinguen nemarøb ambubelø køn. Inchendø Tiuswei namig købig aruppe, nømuiim pala purab nuig attrab køn.

Pablo tesalónicasreelan katø ashchab inrrab isub

¹⁷ Namui nunelø, nam ñimba maya yana køsrøn tarømisra, ashippe, ashmubendø, namui manrraube chu uraskucha ñimune pesannamø tøga pønrrøwa, ñimun malaugue ashchab amrrug købiitø truba truba inchib melaig køn. ¹⁸ Incha nambe amrrunrrab inchib melaig køn. Na Pablobe, katø katø attrab inchib megaben, Satanásbe namun chigøben iløsrka pønrsøbig køn. ¹⁹ Pøs tru nam tøgagønrrurmab isua munig melamiba, namui kasrag købiiba, katø Señor Jesucristo arruben, nui merrab nam kan corona lataig kanawa nam uta, purø tab kui mørøb pønrramiba, nam kasrag kui pønrramibabe.

3

Timoteowan ashchab inrrai karua ørig

¹ Inchawei treeg isuptø, treeg isuptø melømønrrab, Atenassrømbe trembe namdøgucha ka kørrømisrtrab isuer. ² Incha namui nuneg Timoteo Jesucristoi tabig srø wamwan larrøbichib inrrai wamindameløyu Tiusweimburabelan marøb, namba lincha marøb megabigwan nambe ñimun ashchai ører, tru ñim kørrønrrabgaig mur isua melønrraimba, ñimui isubigwan Jesucristoinug pønrsra tøgagüigwan elachimø, tøgagøbig tøgagønrrab isunrrai martraimba. ³ Øyeeg ñimun chine isumdeelø puben, ñim møitøgucha mandøguen kømuilø melømønrrai isuer. Pøs ñimbe yandø ashibelø køn, namune øyeeløyu puraambub melønrraiwei marigwan. ⁴ Inchawei nambe ñimba amønñipatøwei, øyeeg chine isumdiig puig melamig kønrrun cha, kanmaytø eshkaig købig køn, truibe mømibe ñimguen ahen treeg purebweindan. ⁵ Inchawei treeg isuptø, treeg isuptø megamønrrab ñimui isubigwan Jesucristoinuutø pasra pønrraigwan maig melaitashchab ashchai ørar. Inchippa Satanás, tru kebenøsrkønrrab inchibig ñimun kaigu kegørrøsrkøben, nam ñimuyasig chigøben mariibe ka yandiig chi mariimig kui lataig kørrømisrtraitamab isua.

⁶ Inchendø katøle Timoteobe ñimuisrø uña, puppe, namuyasig tru tab wam wammøsrkønrrab srua arrin køn ñimui isubigwan Jesucristoinuutø pasra amønraigwanba, truba undaguelø kuigwanba. Katø ñimbe chu uraskucha namune pesannamø, tabig isub tøgagøbelø kuin køn chib, namgurri ñimun asinrrabna kui melab lataitøwei ñimgucha treeg isub melabelø kuin køn chib wamindan. ⁷ Inchawei treekkurri, namui nunelø, namun purø kaig nebuinab purø isuig melamig nebuingucha, ñimui isubigwan Jesucristoinug pasra amønraigu treeg tabig melan taig nam wammøriibe, namuimbe truibe purø nu tab køtan. ⁸ Ñim Señorweinug tarømisrmø melan tai wammørene, namune ke kan øsiirab lataig køtan. ⁹ Tiuswei merrab ñimgurri nam øyeeg kasrag pønrramig kuigwan, ¿nambe nun mandø incha ungwa tamburab newan ungwa chinrrab køh?

Tiusba wamindig

¹⁰ Nambe yem kwaløm Tiuswan miab melabelø ker, katøle ñimun malaugue ashchab amrrua, ñimui isubigwan Cristoinug pasra tøgagügu ñim ke truburab nebuimig palabigwan nemartrab isua. ¹¹ Inchawei nam ñimun katøle ashchab amrrumig kønrrai, namui

Møskai Tiusba, Señor Jesúsba namui maywan kura trattraimab isuer. ¹² Ñimui undag købig tøgagúigwan Señorbe truba nemarøb nurab inrrai martrun, ñim kangurrin kangurri undaarayamigwanba, katø mayeelan undaaramigwan chigucha, namgurri ñimun undaarab lataitøweingue. ¹³ Ñimui manrrømeran nõbe tab mur isua pønrrabelø kønrrai martrun tru newan tabigu, ñimun 'øyeeg marøbelø køn' tainanrrabgailø, Tius namui Møskawei merrab pønrramig kønrrai, tru namui Señor Jesús nuyasiitø tarømarilø mayeeløba arrub uras.

4

Tiuswei merrab kasrag kømdiig amøñib

¹ Møimbe yandø, namui nunelø, Tius tab kui wanrrai marøb llirab amønami nam mandø kusrenanig køben, ñim treeg marøb amøñibeløbe, treegwane katøguchinguen katøguchinguen marøb melønrrai ñigwan Señor Jesúswei munchiyu øyeeg melønrrigay chib, tiusmanda øyeeg martrurrinrrigay chinrrab inder. ² Ñimbe ashibelø køn, Señor Jesús treeg martrai karua pasriitøga maytø marøb kømigwan nam ñimun eshkaigwan. ³ Tiusbe treeg isua wan, ñim newan tabigweindø tarømisrar kønrrai: peg ishuuba, peg møøba trømbøig marmeelø. ⁴ Katø ñim møitøgucha ñimui asrwane isua møra tøgagøm kusremig køn, newan tabig, trømbøig marøb maig købash kømøtø. ⁵ Judíos kømeelø Tiuswan ashmø misaamera latawei trømbøig marøg købiitø ke chinchimmøro inchib, truitø srua ambiilø pønrramig kømøn. ⁶ Inchawei øyeeløyube nui nuneweivan nuin kui lataig merrarrowa marmøwei, ke chi chinmíg kønmaptø marmøwei indamiig køn, Señorbe kerrigu øyeeg trømbøig mariiløgurri nõmune møra melønrrai martrun. Nambe kanmaytø ñimun eshkaig købig kuig køn, isuptø kønrrigay cha. ⁷ Kaguende Tiusbe namune wamappe, køsongønrrapteeø marøbelø kønrrai wamøtø, masken newan tabig amøñibelø kønrrai wamig kuig køn. ⁸ Inchawei i kusrenaniilan kaashibiibe, mu møywan kashmøtø, Tiuswan kaasan, nui Espiritu Santon ñimun tranøbigwan.

⁹ Ñim nunelan tru undaguelø kømigweimburappe undaguelø kømig køn chib, ñimun pøramibe chi palømøn. Kaguende Tius kusrenanin køn, kangurrin kangurri ñim undaguelø kønrrai. ¹⁰ Masken ñimbe Macedonia pirau muba kuimburab nunelø warabelan mayeelanba undaguelø køn. Inchen køben, nambe, ñim Cristogurri nunelan 'øyeeg melønrrigay' chib wamindamønrrun, katøguchinguen undag købig nurab inrrai. ¹¹ Warappe, ñimuimburab wasrøndaa tab waramigwan isumig køn, mu mendaigweiwan kømø, ñimuimburabigwan isub, ñimui taska ñimui maramelan marøb, nam ñimun maig martrain karuig treekke, ¹² ñim treeg waraigwan menda misaamera tabikken kui asig kønrrai, mun chi miab warømønrrab.

Señor katø arrumig

¹³ Ñim, namui nunelan, tru kwawa ka kib lataitø warabelaimburabigwan mandø inchab kuinguen mørmeelø kørørmismønrrai nambe eshkanrrab inder, katøganelø tru isua muniiramigwan chigar lata ke chinsraatø isui inchimønrrai. ¹⁴ Jesucristo kwawa, katø øsiiraiwanma nam køreibe, treetøwei tru Criston kørewa, kwawa, ka kib lataitø warabelane Tiusbe Jesucristoba pera attrab kui nambe kørewa ker.

¹⁵ Señor nõ maig taig, nambe nõ arrumnegatig nam ka øsig amøñibeløbe kwabeløguen ammøwatø nammerrig ambamibe kaanrrun cha trendamønrrun. ¹⁶ Kaguende Señorbe srømbalarøngurri wamab kørraaruppe, nõ wamigwane mørtrai kandø wamab kørratrrun, kan arcángel tru ángelesmeran nõ karub pera pasrabigwei wamdøgaba, Tiuswei trompeta wanrrøbitøgaba. Inchen Criston kørewa kwabeløbe nõmmerrig øsiirawa, katøle chab kurrønrrun. ¹⁷ Inchen nam ka øsig amøñibeløbe tru kwaig warøwa kiagasabeløba kanbalatø wañiyu srua ambiilø kømønrrun Señorwan palasrø katønrrab. Øyamay nambe managatig Señorba purramig kønrrun. ¹⁸ Inchawei kangurrin kangurri øyeeg wamindiiløtøga waminchib puruguyay

5

Señor arrumigwane isuptø melamig køn

¹ Inchen Señor chiwei arrumigwanba, katø mana arrumigwanbabe ñim, namui nunelan, na chi pøramig palømøn. ² Tru Señor arrum kwalømbe kan niliig yem arrub lataitøwei punrrab kui ñimbe tab ashibelø køn. ³ Misaamerabe 'ambumay imay tab waramdiig køb, møyimesi yandø chi isub melamikkaig tab waramdiig køn' chib købene, kagøppa, møyi møyi nõmum palabe pinisailø kømig attrab køn, kan ishuumisag patsø kwanrriigwan kagøb, møyi møyi unø tammisrtrab pusrkwab arrub lataitøweingue. Inchen truyugurrimbe mumaygucha wegørramibe kaanrrun.

⁴ Inchendø ñim, namui nuneløbe, løstøyu pønrrømøn, tru kwaløm ñimun kan nillig arrub lataitøwei, ke chi isumø køben arrinab pønrrørrrain kømø. ⁵ Kaguende ñimbe mayeeløba tørwei ureemera, kwalømyuelø køn. Nambe løstigiwei ureemera kømøwei, yemyuelø kømøwein ker. ⁶ Inchawei treekkurri, nambe katøganelø lataitøwei kib lataig amøñimøtø, pesannamø purø isuptø meløgun, trurriugu tab isuamørague. ⁷ Kaguende tru kibeløbe yem kian. Inchen mutsiirabeløbe yem mutsiiran. ⁸ Inchen tru nam kwalømyueløbe, tab isuamøra amøñigun, isubigwan Jesucristoinug pasra tøgagúitøgaba, undag købiitøgaba, truiwane pechoburab chinchimønrrai katabiitøga kasra lataig. Inchen nam kaigyugurri wesrailø kømig munig melaitøgabe petsamig kan tsandzøn casco lataig mara tøga pønrramig køn. ⁹ Kaguende Tiusbe namune nui purø trømbøig kørig kømðiiig namig købigwan utønrrai mara pønrsømøtø, kaigyugurri wesraig kømigwan nebua utønrrain kuig køn, namui Señor Jesucristogurri. ¹⁰ Nøbe namuyasig purøbasramisra kwaig kuig køn, nam øsig amønai lata, kabe nam kwaimbala lata nøba kanbalatø purramig kønrrai. ¹¹ Inchawei kangurrin kangurri masken treeg melamigwan isunrraimba, katøguchinguen tab mur isua pønrramisrøb amrraimba kangurrin kangurri puruguyay, ñim chabguen yandø treeg marøb melaig køppe.

Pablo Cristoielan øyeeg martrigay cha waminchib

¹² Katø ñim namui nunelan trenchinrrab inder, ñimui utu marøb, katø karub pønrrabelane maig købash inchimø, tiusmanda tab inchunrrigay cha, Señorweimburabeløyu tru pera marøb, maig maramigwan treeg marøb melamig køn chib waminchibelane. ¹³ Nømune maya nuguen tab inchib, undaguelø kømig køn, nømui maramelan marøb melaimburø. Kangurrin kangurri tab amønay.

¹⁴ Katø ñim, namui nunelan, trenchinrrab inder, chigøben marøg kømui inchib pøilane murba waminchigay cha, katø køriiteelane treetø melømønrrai waminchib, katø chiyugøben purø kullaguelane purugub, mayeelanba larrø tammay inchunrrigay cha.

¹⁵ Møikkøben chigøben kaig marene, katøburø nungucha treetøwei marøb kømønrrab isuptø kuy. Masken chu uragucha ñimui utube kangurrin kangurri tab inchibelø kønrrab inday, katø mendailø mayeeløba chigucha.

¹⁶ Chu urastøgucha ñimbe kasraatø amøñib, ¹⁷ chu urastøgucha Tiusba wamindamigwane elachimø, nøba waminchib, ¹⁸ chi pub arrindøgucha, Tiuswane 'ungwa, unywa' tamig køn; kaguende Tiusbe ñim øyeeg marøbelø kønrraiwei isua køn, Cristo Jesúskurri.

¹⁹ Espíritu Santoi marøb pasraig kan nag lataitøwei ñimuinug pilab pasrabigwane kwabashmøtay. ²⁰ Katø 'chigøben pub attrun' chib Tius maig karuigwan waminchen kashmumig køn. ²¹ Chiwandøgucha maig køtashchab isua ashibmerrig asamig køn. Incha chi tabigwane elachimø, marøb tøgagørrømisrøppe, ²² chigurrimbunø kaigwane marmumig køn.

²³ Inchen Tius tru chi isumgaig tab kønrrai marøbig, nøtøwei ñimune newan nuindø kønrrai tarømartrun. Ñimun kerrigu newan ñimui espíritun, ñimui møsigwan, ñimui asrwan kaig mariitøga chigucha chillig inchar kømeeelø, chishcheelø tøga pasrønrrun, tru namui Señor Jesucristo arrumigweyasig. ²⁴ Tru ñimun wamabiibe, nøbe maig taigwan treeg marøbig køn. Incha nøbe treegwan martrab kuinrrun.

'Ka amøñiguel' taiba, 'mayanguen tab kønrrain' taiba sraibeig

²⁵ Namui nunelø, namuyasig Tiuswan tøga miarrunrrigay.

²⁶ Ñimbe namui nunelan mayeelan purø tab wamab, Tiuswei undag købiitøga tasig tranøb 'ka amøñiguel' chinrrigay.

²⁷ Señorwei merrab nabe ñimun karua pasramønrrun, i kilgayu na pørigwan namui maya nunelan lemønrrab kømø, lenrrai.

²⁸ Namui Señor Jesucristoi ka yandø tab indiibe ñimba pasrønrrun.

2 Tesalonicenses

Pablo 'ka amõñiqueh' chib pørig

¹ Na Pabloba, Silasba, Timoteoba kanbalatø misra, Tesalónicasrø iglesian i kilgawan pørar, namui Tius Møskaimba, Señor Jesucristoba kanbalatø pønrrabelan, ² Tius Møskaweinukkurrimba, Señor Jesucristoinukkurrimba tru ka yandø tab indiiba, chi isumgaig tab køibiiba ñimba pasrønrrun.

Cristo katø arruben Tiusbe maig kønrrabigwan asha martrun

³ Chu uraskucha ñimuimburab Tiuswan 'ungwa' chib kømig køtan, namui nunelø, nam treeg marambuawei maramig søl kuimba. Kaguende ñimui isubigwan Jesucristoinug pasriibe maramburab katøguchinguen nurab iben, katø ñim mõitøgucha kanikkurri kanikkurri undag købig tøgagúikkucha nurab yain køn. ⁴ Inchawei treekkurri nambe Tiuswei iglesiamerayu ñimuimburab truba tab kui waminchibøl ker, ñim melabig melaigwanba, isubigwan Jesucristoinug pasra melaigwanba, chine kaig indinab melamig arrubigu, ñim truba isuig puraambub melamig nebuindøgucha. ⁵ Pøs kerrigu iibe tru maig kønrrabigwan Tius nø asha mariibe, sølgandø maig maramigwan marøbig kui ashchai kenamaran, Tius nø ashib karub waisrø ñim kebamrrabgailø købigwan kebambamig kønrrai marøb. Treekkurri ñimbe truigweimburab mõi ya yeeg kaig indinab melan.

⁶ Tiusbe sølgandø tab asha marøbiibe ñimun kaig nebunrrai marøbelane, nømungucha treetøwei møra melønrrai martrun. ⁷ Incha ñim chine kaig nebul melabelan lata, katø namun lata isramig kønrrai tranrrun. Øyee puppe, Señor Jesús nui ånglesmera maramburab marøbeløba, srømbalasrøngurri naabaig arrua, kenamisrøb kwaløm treeg punrrun. ⁸ Tiuswan ashmeelanba, katø namui Señor Jesucristoi tabig srø wamwan mørøg kømui inchibelanba Tiusbe maig kønrrabigwan møra melønrrai martrab attrun. ⁹ Truilane tru managatig pinisainug møra pønrrønrrai pønrsailø kønrrun. Incha Señorwei merrabgurrimba, tru nui maramburab marigwei tørguegwalmabigugurrimba webusrilø kønrrun, ¹⁰ tru nui misaamera nun maya nuguen tab indig kønrrappa, tru mayeelø nun kørebelø yeekkuha kønrrabab kwaara asig kønrrappa arrub kwaløm. Inchen ñimgucha tru utu tøga pønrrønrrun, kaguende nam maig eshka wamindigwan ñim køreikkurri.

¹¹ Øyee punrraiwei nambe chu uraskucha ñimuyasig Tiuswan 'purugurra' cha miabelø ker, ñim treeg kønrrabgailø kuigwan Señor wamigwane nø wamiilø kui treeg mara tøgagønrrai. Incha nui maramburab mariitøga ñim chigøben tabig martrab isua tøgagúilanba, katø isubigwan Jesucristoinug pasra chigøben marøb kuigwanba newan treeg marig kørrømsrtrai, ¹² namui Señor Jesúswei munchiwan øyamaybe ñimgurri maya nuguen tab indig køben, ñimbe nøgurri maya nuguen tab indiilø kønrrai miabelø ker, tru ka yandø tab indig namui Tiusweimba, Señor Jesucristoimba maig kønrrain køben treeg.

2

Señor katø arrumigwan tab eshka

¹ Pøs trube, Señor Jesucristo katø arrumigweimburappa, katø nam nøba tulundzuanamigweimburappa, ñim namui nunelan, ² tiusmanda ñim maig isua pønrraigwan ke mõi mõi peetø isub yunømarøb, ke chinsraatø inchib pønrrønrrai kwaarøsrainab pønrrønrrab kømø chinnrab inder. 'Tru arrum kwalømbe yandø pun' chib, 'Tius treeg wamindingarutan' chib wamindi lata, kabe 'treeg køn' chib eshkaig lata, kabe 'treeg kønrrun' chib 'nam kilga pørig køn' chib waminchib kui lata mørmørrigay. ³ Ñimbe mumaygucha kegørrøsrkainab pønrrønrrab kømø, melay. Kaguende tru Señor arrum kwaløm pumøwatø, misaamera Tiusweimburabelan elacha, yandø wendøbasrøb, katø tru newan larrø kaig, tru managatig pinisaig kønrrabigu pasrønrrai pasrig kenamisrmøwatøbe treeg pumønrrun. ⁴ Tru møøbe tru chimerandøgucha 'tius køn' chib tøgagúilanba, katø chiwan køben køriibala tabig waminchib tøgagúilanba, ashig kømui inchib sètø pasramisrøb, purab nuig misrøb pasrønrrun. Incha treetø kønrrab kuindø, Tiuswei yauguen kebya wamisra, nøashibguen 'Tius kur' chib wanrrun.

⁵ ¿Na ñimba uñib uraswei na ñimun iigwan wamindigwan isumuitarru? ⁶ Tru kaig martrab møg treeg maramig puben tru uras kenamisrtrai tru merrarrab sètø pasrabiibe chi sètø pasrain kui ñimbe ashibelø køn. ⁷ Kaguende tru mu asiimig purø kaig pasrabiibe chabguen marøbguen pasran. Inchendø tru treeg marmønrrai mõi ya merrarrab sètø pasrabiibe, sètø katab pasrabig pasrønrrun tru utugurri wesramnegatig. ⁸ Inchen yandø tru newan larrø kaibe kenamisrtrun. Inchen truigwan Señor Jesúsbe nui trigugurri urriitøgatø kweecha, tru nø tørguegwalmabig arriitøga pinishinrrun. ⁹ Tru larrø kaig arrua

mariibe, Satanás purugúitøga marøb attrun, marøppe, Satanás maramburab mariiløtøgaba, nø pasrain kui ashchái mariilan mariitøgaba, tabig kómítøga kwaara asha kónrrai marøb pasrailøtøgaba. ¹⁰ Incha tru kaigyu pønrramsrømay amrrabelan kegørrøsrkamig nøbe chigur-rimbunø sölwan kømø, kaløwan marøb kaig martrai pønrsønrrun, kaguende tru kaigygurri wesrailø kónrrab tru newan ciertonigwan undaaramø, kaashibeløgurri. ¹¹ Inchawei Tiusbe tru peløsrkøb kegørrøsrkøbigwan maramburab martrai ørtrun, isa wamindiilan kørenrrai, ¹² katø tru newan ciertonigwan køremøtø, sølgandø tabigwan mariimeeløyu truba tab kui inchib marøb pønrrabelane mayeelanba kaigyu pønrrønrrai pønrsramig kónrrai.

Kaigyugurri wesrailø kónrrai lawa wesrailø

¹³ Inchendø nambe chu uraskucha Tiuswan ñimuimburab ‘ungwa, ungwa’ chib kómig kótan, Señor undaaraig nunelø. Kaguende srøsrøgurri kaigyugurri wesrailø kómig kónrrai Tiusbe ñimune lawa wesraig købig kón, Espíritu Santogurri tabig chishmarikkurrimba, katø ñimui isubigwan newan ciertonigu pasra tøgagúikkurrimba. ¹⁴ Tru øyeeg kónrrai isuawei, Tiusbe ñimun wamig kón, tru tabig srø wamwan nam eshkab wamindiitøga, tru namui Señor Jesucristoi tørguegwalmabigwan ñimgucha nebua tøgagønrrai.

¹⁵ Treeg købene, namui nunelø, maig pønrrabeløbe truyutø tarømisrømø melay, namashib pønrrøwa kusrenaniilan lata, kabe kilgayu pørigwan kusrenaniilan lata truigwane elatchab kømø, tab tøga pønrray. ¹⁶ Namui Señor Jesucristo nøtøwei, namui Tius Møskaimba tru nø namun undaara, tru nui ka yandø tab inditøga managatig chi isumig kónn koonrraimba, munig melamig truba tabigwan tranøbiibe, ¹⁷ ñimui manrrømerayu purø tab kui pønrrønrraimab isub, ñimui chigurrimbunø tabig marigu lata, tabig wamindigu lata tabig marig kørømisrøtraig treeg martrun.

3

‘Tiuswan namuyasig tøga miab kørørunrigay’ cha Pablo miaig

¹ Pøs treeg købene, yandø mømibe, namui nunelø, namuyasig Tiuswan miab melørrunrigay chinrrab, Señorwei wam petø truøro larrøbichib inrrai, trurrigu tru wambe maya nuguen tabig kui mörøb utig kónrrai, tru ñimui utusrø puben, utab lataitøweingue. ² Katø trømbøig marøptø yandø mindiilø, larrø kaig møguelai tasku nam kegørrab melamig kømønrrai tøga miarunrigay. Kaguende isubigwan Jesucristoinug pasra tøgagømigwane mayeeløbabe tøgagømøn. ³ Inchendø Señorbe chu uraskucha tarømisrømig kua, nøbe ñimun kørømø, mur pønrrønrrai purugub, Satanás, tru larrø kaigwei tasku kegørrømeray kónrrai ashib tøga pasrønrrun. ⁴ Nambe Señorøgabe treeg kuitamab isua pønrrer, martrai nam karua pønrsraigwan ñim mõi ya marøb melaigwan lata, katø maramigwan ñimbe marøbig martrab kui. ⁵ Tiuswei undag købigwanba, maig kuingucha yaandø, yaandø melamig Cristo tøgagúigwanba, Señorbe ñimui manrrømeran trunun nebua tøgagønrrai martraimab isur.

Maramigwane martrai waminchib

⁶ Namui nunelø, maramigwan treeg marøb melønrrigay chib, Señor Jesucristoi munchiyu, marmø kømø, treeg martrai ñimun karumønrrun, tru Cristogurri ñimui nunelø møikkøben ke chigucha chi marmø, ka uñchabgøba inchib, nam ñimun maig kusrenanig køben treegwan møra marmiibabe linchimøtay cha. ⁷ Pøs ñimbe yandø ashibelø kón, nam mandø waraig købigwan ñimgucha treetøwei waramig kónrrai. Nambe ñimui utu warappe, chi marmø ka warønrrabgøba inchimøwei, ⁸ kabe namma møigweiwan køben mappe, chi marmø ka purrøwatø mamøwei indig kón. Masken treeg kømøtø, namma maramigwane isua møra, muraara muraara yem kwaløm marøbelø ker, ñimun møilan køben kagatø ka tranraindø munig purrømønrrappe. ⁹ Nambe mu mandamgaig maramig chigar kuagurri ñimun ‘purugurra’ chinrrab kaima pønrrømøtø, ñimguen namun asha kusrenrai isua, øyeeg muraara marig købig kón. ¹⁰ Nambe ñimba amøñib urassrøweinguen øyeeg kónrrain cha iigwan karua pasrig købig kón: møikkøben maramigwan chi marøb kømui inchibiibe, trube, mabgucha mamumig kón cha. ¹¹ Nambe wammøra ker, møiløgøben ñimui utuelø ke chigucha chi marmø ka amøñinrrabgøba inchibelø kuin kui, nømuiimburab kømubendø, mendailaisrø ke ka neesha mörøb. ¹² Treeg inchib misaamerane nambe Señor Jesucristoi munchiyu marmø kømø, martrai karua pasrer, maig maramigwan treeg marøb melønrrain cha, nambe nømun waminder: warappe, nømuiwan marøb wasrøndaa marøb kuy cha; mappe, nømuiwan manrrab.

¹³ Inchen ñim, namui nuneløbe, chigøben tabig maramigwane muraarab melønrrab kømø, maray. ¹⁴ Møikkøben tru i kilgayu maig martrain cha trendaigwan mørmøigwane ñimbe trunune trendø treeg kui yandø asha tøgaguy. Incha truibabe linchibgucha linchimumig kón, treenchene kwartrai. ¹⁵ Inchendø kaig kónmab ashiptø ashig kømui inchib treeg inchib tøgagømøtø, nuneg kui ashabe, ‘ashiptø megau cha; øyeebe marmumig kón’ chib, eshkab wamindamig kón.

Tabig wamindiilø srabeig

¹⁶ Señor tru chi isumgaig tab købigwan tranøbig, nøtøwei manatøgucha maig kuindøgucha ñimun tru chi isumgaig tab købigwan tranrrun. Señorbe ñim mayeeløba pasrønrrun.

¹⁷ Na Pablo nai taska iigwan pørar, ñimun 'ka amøñiguh' chib. Kilgamera møitøgucha na pøriiløbe na pørig kønmab asamdeelø kønrrai, øyamay pørøbig kur. ¹⁸ Namui Señor Jesucristoi ka yandø tab indiibe ñim mayeeløba kønrraimab isur.

1 Timoteo

'Ka amõñigeh' chib pørig

¹ Na Pablo Jesucristo nõashib karua ørig, Tius namui Kaigyugurri Wesrabiiba, Cristo Jesús, tru nam nundø isua munig melaig truiiba karua pasrig, ² nui isubigwan Jesucristoinug pasra tøgag, tru cierton nai nusrkai lataig ñi Timoteowan i kilgawan pørar. Tius Møskaimba, Cristo Jesús namui Señorba nui ka yandø tab indigwan køben, lastima asigwan køben, chi isumgaig tab købigwan køben ørtrainab isua inchar.

Ashiptø kønrrai wamindig

³ Na Macedonia pirausrømay inrrab pasramisra, 'tiusmanda ñune Efeso kørømisrtra' cha eshkaig købig kuig køn, tru mõiøgøsrøn sølwan kømø, ke peemaytø kusrenaniiløtøga kusrenanøbelan treegwan kusrenanmønrrai merab ashib pasrønrraimba, ⁴ katø chi treeg kømubendø nõmdø isua wamindiilanba, katø nõmbe 'i misaamerainukkurri amrrubelø ker' chib, tru munchimera kan managuen patsønrrabgaig arrubigwanba, ⁷ Tru kuindø mørøb pønrrømønrrai ashib pasrønrraimba. Treeløbe ka kwayab waramigweindø køn, tru isubigwan Jesucristoinuutø pasra tru Tiusweimburabelan marøbig marøb ambamigwan purugunrrab kømøtø.

⁵ Inchen na iigwan martrai karua pasriibe iig køn: tru manrrau chishchigugurrimba, isub kebachib pasrabigu chi kalø køn chibig chigaig, tabigugurrimba, katø isubigwan Jesucristoinuutø ka inchib kømø, cierton pasra tøgagüigugurrimba undag købig arrubiitøga undaaramig. ⁶ Inchawei mõiøgøben truiløma øyeeg kømigwan yandø pella tarømisra, nõmuimburab ke ka chine wamincha mørøb kuiløyutø chab tarømisrin køn. ⁷ Tru maig maramigwan martrai Moisés pørigwane ke nõm kusrenanøbelø køg kui inchibelø køn, nõm wamindigwane nõmðweinguen ni chigüinguen mørømøwei, katø 'iibe treeg kømønrrab kømø, treeg køn' chib wamindiilan chigucha chigüinguen mørømøwei inchendø.

⁸ Pøs tru maig maramigwan martrai Moisés pøriibe tabigwein kui ashibwei inchibelø ker, tru chiyuwei maramigwan treegweyasig merrarrawa marene. ⁹ Inchawei tru maig maramigwan pøra warøppe, tru tabig sølwan marøbelain kømøtø pøra warig kui nambe ashibelø ker. Treeg kømøtø, tru larrø kailaimba, mørmeelaimba, chigucha Tiuska misaameraimba, kaig marøbelaimba, kaig maramigwane chi kørikkegaig marøb misaameraimba, Tiusweimburabelane ke ka kaigwan lataig inchibelaimba, usri møskalan kweechibelaimba, ka kweecha petaptø amõñibelaimba, ¹⁰ møguelø ishumburba nõmui asrtøga trømbøig marøbelaimba, katø møgueløbe møgueløasiyitø trømbøig marøbelaimba, misagwan karuindig melønrrai nila yanøbelaimba, isa waminchiptelaimba: 'nabe si, isatø waminchimur' chibendø, isapteelaimba, tru tabig sølwan kusrenanigwan chigurrimbunø kaitøga itøra pønrsøbelaimba køn, ¹¹ Tius mayanguen tabigwei tru tørbilabig tabig srø wam maig køben treetøwei kusrenanigwan. Truigwane na waminchib tøga pasrønrrai Tius nan tranig køn.

Tiuswan 'maya nuguen ungwa' chib

¹² Cristo Jesús namui Señorwan na 'mayanguen ungwa, ungwa' chinrrab, muraaramø marøb megamig kønrrai tranøbigwan, kaguende tru nui marameløyu chi isumgaig marøb meganrraptiig kui asha nan pasrigwan. ¹³ Nabe merrabsrømbe nun purø trømbøig wamap-tiig, katø Tiuswei ureemeran kaig maramigwangøba lab, larrø namiguig maig købash inchiptiig købig kuingucha, nane lastima asig køn, kaguende nabe chigüinguen ashmüig køremig kua, øyeeg marig kuikkurri. ¹⁴ Inchendø namui Señorwei tru ka yandø tab indiibe naim pala purab nuikken arrig køn, tru isubigwan nuinuutø pasra tøgagømiba, undag købiiba kanbalatø Cristo Jesúsweing pasrabig.

¹⁵ Inchawei i trendaibe chi isumgaig isig kømøtø køn, mayeeløba chi kashmø, ka utamig: Cristo Jesúsbe piraumay arruppe, kaig marøbelan kaigyugurri wesranrrab arrig køben, tru truilai utu purab kaibe na kur. ¹⁶ Incha Tiusbe treeg køptøwei nane lastima asig køn, tru kaig marøbelai utu na mas larrø kaigwan Jesucristobe chugatikkucha nõ nan tammay ka awentab wabig kuin kui kenamartrab, tru managatig øsig kømigwan tøgagønrrab, tru wendøsrø nun kørenrrabelø nan øyeeg marigwan asha kønrrai. ¹⁷ Inchawei managurri managatig mayeelaim pala nõ ashib wabigwan, managatig øsig wabigwan, kaptøgabe asiimüigwan, Tius nõ kandø wabigwan managatig nun purø tab indig kønrraimba, maya nuguen tabig kønrraimba inchar. Treeg kønrrun.

¹⁸ Timoteo, nai nusrkai lataig, 'i maramigwan martrunrrig' cha na ñun karua pasrar. Tru ñi maig kønrrabig kuigwan merrabsrøwei ñuimburab Tius maig karuben eshkailan, trulan isua pasramisra, Señorweimburabelan elatchab kømø, may kwayanrrig, ¹⁹ isubigwan

Jesucristoinug pasra tɔgagúigwanba, isub kebachib pasrabigu ‘chi kalø køn’ chibig chigaig kømigwanbabe tindɔgague. Pɔs mɔilɔma nɔmui isub kebachib pasrabigu ‘kalø køn’ chib kebati mɔrendɔgucha mɔrmɔwa, tru nɔmui isubigwan Jesucristoinug pasra tɔgagúigwane kan nubi itɔgasrai lataig kɔrrɔmisra, yandø trubisan. ²⁰ Truilai utube, Himeneoba, Alejandroba treeg melan. Inchawei nabe truilane Satanás nɔ asha martrai nui tasku pɔnsrar, Tiuswan purø trɔmbøig wamumum kusrenrai.

2

Tiusba mandø wamindamig

¹ Inchawei iilanmerrig marøb kønrai eshkawa pasramønrrun: ‘øyeeg, øyeeg palai meler’ chib Tiuswan miab, katø Tiusba waminchib, katøganelayasig Tiuswan ‘purugurra’ cha miab, katø mu mɔguelayasitɔgucha Tiuswan ‘ungwa, ungwa’ tamig køn, ² reymerain køben, katø nørreelø misagwan ashib karub purrabelain køben. Masken chi isumø tab waramdiig, ambumay imay chigucha chi kuin kømø, Tiusweimburabelan tabig marøb, chiyutɔgucha mu chi tamgaig waramig kønrai. ³ Kaguende øyeebe tabig køn. Tius namui Kaigyugurri Wesrabiibe tab kuinguen asig. ⁴ Kaguende nøbe maya misaamera kaigyugurri wesrailø kønrai indan, tru nui newan ciertonigwan nebua ashchai. ⁵ Kaguende Tiusbe kandø nøtø køben, katø Tiusba misaameraimba tɔbɔtag pasramisra purø waminchibikkucha kandø køn, Jesucristo mɔg. ⁶ Truibe nøashib maya misagwan kaigyugurri wesranrrab nø kwaitɔga pagaraig køn. Incha iigwane yandø ke treeg maramig puben, eshka wamindig købig køn. ⁷ Inchawei øyeegweyasig nabe Señorwei wamwan waminchib kusrenanrrai wesrawa pasrig, katø Jesucristo nøashib karua ørig kur, judíos kømø misaameran tru isubigwan Jesucristoinug pasra tɔgagømigwanba, newan ciertonigwanba kusrenanrrai. Iigwan nabe isa waminchimur.

⁸ Inchawei chutɔgucha mɔgueløbe Tiusba waminchippe, chi kaig marig chigaig tasigwan chishig kusrub pønrramig køn, truba namig kuim palatø kømøwei, muba aleguiyawa kømøwingue. ⁹ Katø ishumburmeragucha asru keppe, chull ashchai purab tabig kemumig køn, maig kemigwan treetɔgue. Pusrugwangucha tamarøppe, ke purø tabig tamarmøwei indamig køn, orotøga, kabe tab sruuzheeløtøga. Katø keilɔgucha ke purab nørroweyelø kemøwei indamig køn. ¹⁰ Treeg kømøtø, chigøben tabig mariiløyu tabig kønrrab indamig køn, ishumburmera Tiusweyasig tabitø martrab pønrramisrøbelø maig kømig køben treekke. ¹¹ Ishuumisaabe kusreb wappe, niløtø wamig køn, trurrigu maig købendiig inchimø nɔmun mørøb. ¹² Kaguende nabe kan ishuumisaabe kusrenanmønrrai inchar, katø mowan ke nø karunrrain kømøwingue. Treeg kømøtø, niløtø wamig køn. ¹³ Kaguende Tiusbe srøsrø marøppe, Adánwanmerrig marig køn, trugurrimbe Evan. ¹⁴ Inchagucha isa waminchen truyu kebefippe, Adán kømøtø, Eva kebenig køn. Incha yandø kaig srua irramaikkurrimbe, yandø kaigyu kebenig køn. ¹⁵ Inchendɔgucha ishuube ureg tɔgagua, kaigyugurri wesraig kønrrun, tru isubigwan Jesucristoinuutø pasra tɔgagøbig tɔgagøb, undag købigwan tɔgagøb, Tiusweyasitø tarømarig, trurrigu maig kømigwan tɔga uñabe.

3

Tiuswei ureemeran mandø pera pasramigwan wamindig

¹ Inchawei i trendaibe chi isumgaig isig kømøtø køn. Møikkøben Tiusweimburabelan ashib pera pasrønrrab isubiibe, tabigwan marøb meganrrab isun. ² Trube treeg købene, tru Tiusweimburabelan ashib pera pasrabiibe, mugøben ‘ñibe øyeeg køn’ tainanrrabgaig kømig køn. Kan sraindø tɔgaig, chigøbendø incha ashmøtø, maig pasramigwan pasrabig, maig unamigwan tab isua mɔra uñibig, katøganelø ‘øyeeg køn’ cha, chi tainanrrabgaig, katø mugøben nui yau pubelane, yaambumay wamønrrab muniitø wabig. Katø kusrenanrrab kaimabig kømø, kusrennøbig, ³ vino menrra mucha mutsiiraptiig kømøwei, kwayam lamig larrø chullig kømøwei, treeg kømøtø, purø tab inchibig, kwayamigwan kømø, tab kømigwangøba labig, anwan larrø chullig kømøwei, treeg kømig køn. ⁴ Katø nui yaambu mandø maramigwan asam kusreb, nui ureemeragucha nø maig taigwan mørøbelø tɔgaig kømig køn, maig købash inchimeeløgue. ⁵ Kaguende nui yaambuguen mandø maramigwan asam kusremiibe, ¿Tiuswei iglesiayuelane kan mandø asha marøb pasraiasamø? ⁶ Tru Tiusweimburabelan asha marøb pasrabiibe, Tiusweiwan ke mɔi srø nebua ashib megabigwan pasramig kømøn, ke purab nuig kurnab inchib kebya, inchippa tru nugwaimandzigwan mɔra pasrønrrai pasrinuutøwei kebefiib megamønrrai. ⁷ Katø nøbe Tiuswan ashmø misaamera mendailø chi tamgaig chiyutɔgucha sɔlwan uñibig kømig køn, nɔguen treeg kømubendø, ka isatø inchib pasran tainab pasrømøwei, katø nugwaimandzig chiyugøben kebefichai pasrigu, truyu kebefiib megamøwei inchai.

Iglesiyu purugub pønrrønrrai pønrsailan maig kømigwan wamindig

⁸ Katø diáconosmera, tru iglesiayu purugunrrai wesrawa pønrsrailø chigucha, mugøben chine cha asinamø møguelø kømig køn, chigøben martrab chippe, ka wamindiitø kømø, martrab waminchibelø, katø vinon menrra mucha mutsiirapteelø kønrrab kømøweingue, maramgaigwan mara, ke chincha køben an nørøø katøramigwangøba lamøwei inchibelø. ⁹ Tru isubigwan Cristoinug pasra tøgagúigwei sorig pasrabigwane tin tøga pønrramig køn, nømui isub kebachib pasrabigu chi kalø køn chibig chigaig, chishchig tøgague. ¹⁰ Tru iglesiayu purugub pønrrønrrabelane maig kõtashchab ashibmerrig asiilø kømig køn. Inchen yandø 'chi køn' tamgailø kuikkurrimbe, iglesiayu purugunrrab diáconosmera pønrramistrun. ¹¹ Katø ishumburmera chigucha, mugøben chine cha asinameelø kømig køn, ambumay imay wam kusrab, wam niga llliramøwei, ka chigøbendø incha ashmøtø, maig pønrramigwan pønrrabelø, katø chiyutøgucha chi isumgaig pønrrabelø, treelø kømig køn. ¹² Iglesiayu tru diáconosmerabe kan sraindø tøgar kømig køn, katø nømui ureemeran tab asam kusreb, nømui yaambu chitø maramigwan asam kusreb inchibelø. ¹³ Kaguende tru diáconosmera nømui maramigwan tabig marøb pønrrabeløbe truba tab pera marøbølø kui asiilø køb, katø tru nømui isubigwan Cristo Jesúsweinug pasra tøgagúigwane masken chigucha chi korig isumø eshkab pønrrønrrun.

Purø nuig tabigwan mu nebua asiimíg pasrabig

¹⁴ Na iigwan ñun pørar, petø ñun ashchab attrab isua. ¹⁵ Inchippa nan petø arrum nebumub chi inchene, trube, Tiuswei yaelai utu ñi mandø megamigwan tab isua pasramig kønrrai inchar. Truibe Øsig wab Tiuswei iglesia, tru newan ciertonigweyasiibe pilar lataig, merrarrab pasrabig, truig køn. ¹⁶ Inchawei mu 'treeg kømøn' chib pønrramga, nam Tiusweimburabelan marøb pønrraig mu nebua asiimíg pasrabiibe, purø nuig køn:

Cristobe kan møg lataig asrbaig kenamistrøb,

Espíritu nune chigucha kalø marmíg,

tabig kui kenamarig køb,

katø nøbe ánglesmera asig køb,

judíos kømø misaamera wammøra kønrrai wamindig køb,

yu pirau misaamera nune kørewa pønrramistrig køb,

katø nune srømbalasø tørguegwalmabiisø utig køb køn.

4

Tiusweimburabigwan elacha kaigwan marøb kurrabelan wamindig

¹ Pøs Espíritu Santobe tørgandø kelarrab eshkan, srabe kwalømmerawane møiløgøben nømui isubigwan Jesucristoinuutø pasra meløwa truyutø melømøtø, chab tarømsira, kwaimandziimera kegørrøsrkøbelan tru kuindø mørøb, katø kusrenaniilø kwaimandziimeraimburabigugurri arrubigwan mørøb kebamrrun cha. ² Treeg kusrenaniiløbe tru purø trømbøig isa waminchibelø ka palatø tab inchib misaamerainukkurri arrubig køn, korig tøgagørrai tru nømui isub kebachib pasrabiibe yandø nasrkwailø tøgar, kan tsandzøn pachibiitøga parri latalilø. ³ Tru misaamerabe kasharamønrrai meramba, katø mø mamimerane mamønrrai meramba inchnun, tru newan ciertonigwan nebua asha kørebelø, 'truba ungua' chib manrrai Tius mara pønrsrailan. ⁴ Kaguende chiwandøgucha, Tius nø mara pønrsraibe kaig kømø, tabig køn. Inchawei Tiuswan 'mayanguen ungua, ungua' chib utigwane nambe chiwangucha kashmumig køn. ⁵ Kaguende Tiuswei wamgurrimba, Tiusba wamindikkurrimba tabig chishig kønrrai marig køn.

Jesucristo karua pasrigwan purø tab marøb megabig

⁶ Inchawei namui nunelan iilan kusrenanøb, katø tru isubigwan Cristo Jesúsweinug pasra tøgagøm wamdøgaba, purø tabig kusrenanigu treegwan marøb arriitøgaba chishkandø pasramig kønrrai marig pasrøwabe, ñibe Cristo Jesúswei truba tab marøb megabig kønrrabguen.

⁷ Chi treeg kømubendø, nømdø isua chugúinguen mørmubendø wamindiilanba, ishumburmera køllizheølø kagatø ka wamincha møriilanba, mørøb pasrømumig køn.

Ñibe masken Tiuswei tabigutø marøbíg marøb meganrrab isu. ⁸ Asr chishtø kønrrai eshegøb luliima, maitøguen purugúibe, tru mas Tiusweimburabelan maikken elachimø marøb megaig truibeguende, chiyutøgucha lutøgurri tab kønrrai purugubig køn. Kaguende yu mõi øsig waraigu lata, katø wendø attrabigu lata, tabigwan tranrrab misrig tøgaig køn. ⁹ I trendaibe chi isumgaig isig kømøtø køn, mayeelø treeg kuitamab isua chi kashmø utamig. ¹⁰ Incha øyeekkurriwei nambe i maramigwane ¡katø! martrab isua marøb, maig kuingucha kullaarab elachimø marøb melabelø ker, kaguende nambe Øsig wab Tiuswan muniirab melabelø kuikkurri, tru mayeelan kaigyugurri Wesrabigwan, nun kørebelaneguende wesrabwei inchibigwan.

¹¹ Ililane ñibe maringarub kusrenanrrig. ¹² Ñi unõtiiig kuikkurri mugucha kaasiinab pasrønrrab kòmõtø, tab isua unigu lata, undag købigwan tøgagúigu lata, ñui isubigwan Jesucristoinug pasra tøgagúigu lata, kaig marmø chishig unigu lata, nømguen ñun asha kusrenrrai megamig kòn. ¹³ Na arrumnegatiibe mayeelai merrab, Tiuswei wamwan pørigwan leb, 'maig melamigwan treeg marøb melay' chib, kusrenanrrab indamig kòn. ¹⁴ Nun Tius keta traniiitøga chigøben marøbig kuigwane pesannab elachib pasrønrrab kòmø, Tiusweimburabelan pera marøb pønrrabelø nøm mayeelø misra nømui tasiimeran ñuin pala estsara, ñi chigøben marøbig kònrrun cha Tius maig karuben ñun eshkaig købigwan.

¹⁵ Ililandø ñiguen tab isub kebya, truigwandø martrab pasramisr, Tiusweiwan ñi katøguchinguen nebua ashib megaigwan mayeelø nebua ashchai. ¹⁶ Pøs maig kømigwan ñiasiiitø ñuimburaptøwei tab ashiptø megau, katø tru ñi kusrennøb megaigwan chigucha. Truigwane elachib pasrønrrab kòmø, kerriguba marøbig marøb megau. Ñi treeg marøb megawabe, ñiasiiitøwei kaigyurri webib, katø tru katøganelø ñun mørøbelan chigucha kaigyurri wesrab inchabguen.

5

Tiuswei ureemeraba mandø kømigwan waminchib

¹ Kølli misagwane tsakkandø namig wamømõtø, masken tammaytø, wamindamig kòn, maig melamigwan treeg marøb megamig kòn chib, kan møkawan lataitøweingue. Inchen ureeteelane ñui trag nunelø kui lataig indamig kòn. ² Inchen ishumbur køllizheelane ñui usrin kui lataig inchippe, srusralmerane ñui trag nuchalø kui lataig indamig kòn, chigøben kaig isua kòmõtø, tabig chishigwan isuague.

³ Inchen piudamera kerriguan nømdø kørømisrar kerrigu mugucha ashchaptiig chigarwane tabig purugunrrig. ⁴ Inchen kan piuda nusrkalø kui, kabe awelumera kui tøgag købene, trube, tru ureemerabe Tiusweimburabigu maig maramig køben treeg marøb, trube, tru nusrkaløbe nømui yauelai chi palabigwane nømwei ashib purrønrrabelø kòn, nømunma maig tabig marig købig køben, kølleelan treetøwei marøb. Kaguende øyebe Tiuswei merrab truba tab kui asig kòn. ⁵ Inchen piuda tru kerriguan nõtøzhig, yandø nõtø kørømisraibe, Tiustøwei purugunrraitamab isua pasramisra, yem kwaløm Tiusba waminchib, purugunrrig chib miab megabig megan. ⁶ Trune piuda tru nõtø kørømisrøbig nun maig marøg købendø marøb pasrabiibe, øsig uningucha nøbe kwaig lataig kòn. ⁷ Øyeeeg maramelangucha marmø kømø, martrain karunrrig, mugøben 'kailø kòn' tainab pønrramig chigagønrrai. ⁸ Pøs møikkøben nui nømmissagwan lata, katø nui naachaguelandøweinguen isua ashmibe nui isubigwan Jesucristoinuuto pasra tøgagúigwan wendøbasraig, katøganelø Tiuswan køremeelø lataguen kømø, purab kaikken kòn.

⁹ Tru munchimeran pøra tøgagúigu kan piudai munchiwan keerøppe, sesenta añoskurrimbuniigwandø pøra keeramig kòn, trurrigu nui keebatø megabig købigwan. ¹⁰ Truibe chigøben tabig mariiløyu mu kui asig kømig kòn: nui uregwan nørøranøbig, katø mugøben nui yau pubelan, yaambumay tab wamab wabig, katø Tiuswei misaamera yau puben, srøbmeran kwallibig, katø chine kaig nebuilø melabelan purugub megabig, katø chine tabigwane marøb megabig treekke.

¹¹ Inchendø tru piudamera ureeteelø nømdø kørømisrøbelane, tru munchimeran pøra tøgagúigu nømungucha tøga kerbasamig kømøn. Kaguende nømui asru kaig marøg købig arrubiitø, Cristoinukkurri tarømarene, katø kasharag kui inchib mendabelø kòn. ¹² Inchabe tru Criston srøtø nebua asha tru nøba pønrrønrrab misrig købigwan treeg martrab kaima, kaigyu pønrrailø kònrrab pønrramisrøbelø kòn. ¹³ Inchagucha ke yamørig, yamørig llirab pønrraptø, yandø pøiløguen misrøbelø kòn. Trurrigu pøiløtø misrmøtø, katø ambumay imay wamigna lliramba, katø chiyugøben kegalamøøb, chi wamindamgailan wamincha møramba inchibelø kòn. ¹⁴ Inchawei treekkurri piudamera ureeteelø nømdø kørømisrarbe nabe ka kasharanrrai inchar. Ureemera tøgagøb, katø nømui yaambu mandø purramigwan asam kusreb inchai, Satanás, tru ashig kømui inchibig, chinetø tainab pønrramig chigagønrrab. ¹⁵ Inchawei piudamera møiløma, pella chab tarømisra, Satanáswei maywan wendautø chab ambubguen indin kòn. ¹⁶ Kan ishug Jesucriston kørebeg nui yau piudamera tøgaguabe, purugub nø asamig kòn, iglesia ke tranrraindø muniirab kømig kømønrrai. Øyamaybe tru piudamera kerriguan mugucha ashchaptiig chigarwan, maig palabigwan ashib tøgagømig chi palømønrrun.

¹⁷ Iglesiayu maig køben kømønrrai truba tab ashib, Tiusweimburabelan pera marøb pønrrabelane nøm mandø tabig indig kønrrabelø køben treegwandø tab inchimøtø, maya nuguen tab inchib tøgagømig kòn. Tru Tiuswei wamwan waminchib eshkamiguba, kusrennamiguba, truigwandø truba martrab isua merrarawa pønrramisrøbelan. ¹⁸ Kaguende

Tiuswei wamwan pørigube trenchibig kòn: “Kan wey, tirigun kwattrai itøbunab megabigwane, mabashig kømub pusalgutsamig kømøn” cha. Incha katø trenchibig kòn: “Chi maramigwan marøb megabiibe tru nø marøb megaimburø pagar utamigwein kòn” cha.

¹⁹ Tiusweimburabigwan pera marøb pasrabigwane kaig kòn tainab kemesrøb srua kønrrai inchimumig kòn, tru treeg marigwan kan pailø kui, pønølo kui nømashib ashibelø treeg kòn chib eshkanrrabelø kaabene.

²⁰ Inchendø kaig maramigwan elachimø marøbig marøbelane ‘øyeeg marmumig kòn’ cha, mayeelai merrab mur alegamig kòn, katøganeløgucha treegwei marmønrrab kõiimatønrrai.

²¹ Tiuswei merrappa, Jesucristoi merrappa, katø ángelesmeran Tius lawa wesrailai merrappa, iig øyeeg maramelan marmø kømø, ñi martrai karua pasrar, kabe møigwane purømistrøb trugatøtø inchab kømøwei, møigwandøgucha lata asha maramig kòn. ²² Chigøben marøb pasrønrrai wesrawa pasrtrab, ke møi møi tab ashmubendøbe, møigweim pala køben, ñui tasiimeran estsarmøta, nømui kaig mariilan ñigucha tøgato marøb pasraig wemibønrraimbe. Chigucha kaig martrab kømø, tabig chishig pasrønrrig.

²³ Møingurrimbunøbe, tsøobitø, tsøobitø muchimøtø, katø lamøzhig vinogucha mutchig. Kaguende ñibe patsø tre tab kømuinab, kwanrrømeragucha chi kwanrrø køben katø katø webarrinabig kòn.

²⁴ Kaig mariilø kan utu møguelaimbe maig køtashchab asamig pumøwatø tørgandø kenamisrøbguen indan. Inchen kaig mariilø katøganelaiwane tsøndatøsrø treeg kuin kui nebua asiilø kòn. ²⁵ Katø treetøwei chigøben tabig mariiløgucha tru urastø tørgandø asamdiig kenamisran. Inchen tabig mariilø katø møi møi kenamismø pønrrabikkucha, asiimig treetø kørømisrmøtø, kenamisrøbig kòn.

6

¹ Ñim møitøgucha ka karua srua kuindiig melabeløbe ñimun karub pera købelane ka palabinø inchib maig købash inchimø, tab indamig kòn. Tiuswei munchiwanba, katø tru tabig kusrenaniilanba purø trømbøig wamindig kømønrrai. ² Inchen ñim møiløgøben, ñimun karub pera købelø Jesucriston kørebeløtøwein tøgarbe, Cristogurri nunelø kønmaptø, maig køben palabinøtø indamig kømøn. Masken treeg kømøtø, purø tabguen mara tranøb melamig kòn, kaguende nømui maramelan ñim mara traninabeløbe Jesucriston kørebelø undaaraig nunelø kuimba. Iigwane kusrenanøb, øyeeg marøb kømig kòn chib waminchig.

Chigurrimbunø palømig purø tabig ciertonig

³ Namui Señor Jesucristoi chigucha chi kalø kusrenaniimig tabiiba, katø Tiusweimburabelan nam marøb kømig kusrenaniiba truig maig køben treetøwein kømøtø, møikkøben ka peemaytø chi tabig kømig kusrenanøbiibe, ⁴ nøasiitø purø kusrebisg kurmb indan, chigucha chi kusremig købendø. Incha maig kø chib payib aleguiyamig, chigøben wamindilan kwayam lab wamindamibe, kan kwanrrø lataig nigaig kòn. Incha øyeekkurrindøwei truygurri arruppe, katøgan chigøben tøgagøben puskrwai asamig arrumba, kwayam lamig arrumba, katøganun trømbøig marøb tsalø wamamig arrumba, chigøben kemesra trømbøig isub amønønamig arrumba, ⁵ katø tru kaig maramig isubiitø nømui turmera mindiilø tōga misaameraba ke chi kømubendø ka kwayab kømig arrumba indan. Truiløbe tru newan ciertonigwane kerraig chiga misaamera, Tiusweimburabelan marøb tøgagüigwane nømbe trutōga an marøb pønrramigweyasig tōgar kòn.

⁶ Inchen nam maig tøgagüizhiitøgatø kasraatø melabelaimbe tru Tiusweimburabelan marøb tøgagüigurri, chigurrimbunø tøgagømig arrubwei inchibig kòn. ⁷ Kaguende nambe yu piraumayma, chigucha chigar yandiig amrruig kōppe, katø treetøwei chigucha chigar ambamig kønrrun. ⁸ Inchawei nam mamig tøgagøb, asru kemig tøgagøb indinukkurrimbe, trutōgabe kasraatø amønønamig kòn. ⁹ Kaguende pua misrøg kui inchibeløbe, chine tabig lataig kenamisrøb arruben, treegwan chull asha kegørran. Incha chine chine nebunrrab isuptø maramgaigwan mariiløyuba, katø ka trømbøig mincha pønrramig kønrrai mariiløyuba kegørra pønrramisren, truiløbe møguelane yandø chindamikkuchagaig misra pønrrønrrai kegørrørkøb, managatig kaigu kegørra pønrramig kønrrai mara pønnsran. ¹⁰ Kaguende chigurrimbunø kaig maramig arrubiibe, anwan ¡katø! ke kan chinchimmøø inchib chull indiiiløyugurri arrubig kòn. Inchawei møiløgøbenma an tøgagug kōbiitø yandø pella, nømui isubigwan Jesucristoinuutø pasra tøgagüigurri tarømisra, nømasiitøwei chine chine purø isumdiig puig melønrrab tōga pønrramisran.

Kørømismø ibig inrrai wamindig

¹¹ Trune ñi Tiusweyasiitø pasrab møøbe treeg indameløyugurrimbe tarømisramig kòn. Sølğandø tabig kømigwanba, Tiusweimburabeløyu tabig kømigwanba, isubigwan Jesucristoinug pasra tøgagømigwanba, undag kōbig tøgagømigwanba elachimø marøbig marøb megamigwanba, katø maig købendø inchimø, purø tammay megamigwanba, ilan martrig.

¹² Ñui isubigwan Jesucristoinuutø pasra tøgagúigwane ñi tōga pasrønrrab isua kwayab, tru managatig øsig kōmig tøgagúigwane pachamørtrab kōmø tab tōga pasrau, Tius trunun tøgagønrrai wamøben, tru ñi truba yamelai merrab, purø tabig pasrønrrab waminchib pasraig kōbigwan. ¹³ Katø chigurrimbunø pønrrabigwan øsig kōnrrai tranøb Tiuswei merrappa, katø Poncio Pilatoi merrab, purø tabig nō maig kuigwan ‘nabe treeg kur’ chib, waminchib eshkab pasrabig Cristo Jesúswei merrappa, nabe ñune karua pasrar: ¹⁴ tru martrai ñun karua pasrigwane kaig mariitōga chillig indig chigaig, katø chigøben ‘kailø kōn’ tainab pasramig chigaig, treeg tøgagønrrai namui Señor Jesucristo kenamisramnegatig. ¹⁵ Yandø tru treeg maram kwalømmerra puben, trunun nō kenamartrab kuinrrun, tru nō mayanguen tab indig, tru nōtø Mayeelaim Pala Pasrabig trurrigu maya reymerraim pala nō Rey, katø maya misagwan ashib karub pønrrabelaim pala Nø Karub Ashib Pasrabig. ¹⁶ Managuen kwanrrabig kōmfig, muguen kemalamgaigu tōrguegwalmabigu wabig, nune mu mōkkucha asiimfig, katø mugucha nune ashchab kaimaig, Tius nōtø kōn. Treegwan purø tab indiiba, managatig mayeelaim pala karub wamibabe nuyasig kōnrrai inchar. Treeg kōnrrun.

¹⁷ Møin kwaløm yu pirau pua misaamerane puarmera kermaptø, purab nørreelø kermab inchib, tru chigurrimbunø tøgagúilø treetø kōnrraitamab isungailøyu ke truyutø isua pønrrømønrrain karunrrig. Masken treeg inchimøtø, nam kasraatø tab kui warønrrai Tius tru chigucha palønrraingaug tøgagømburab tøgagønrrai namun tranøbigweinug isua pønrrønrrai inchig. ¹⁸ Tabigwan marøbelø kōnrrain karunrrig, truba puarmera misrøppe, nōmui chigøben tabig mariiløyu puarmera misrtrai. Tøgagúigwane chigucha merø kui inchimø, lata pirishib purugunrrab muniitø kōbelø kōnrrai. ¹⁹ Øyamaybe tru wendøsrø attrabigweyasig, tabig pølbasa marøb esegab kebamrrun, øsig kōmig, tru managatig cierton øsig kōmigwan nebua tøgagømig kōnrrai.

Timoteowan wamindiilø srabeig

²⁰ ¡Aul! Timoteo, ñun chi martrai trana pasrigwane tabig isua mōra tōgagu, Tiuswane chigucha kōmfig marøb wamindiilanba, ke ka wamincha mōriilanba, katø tru nōmui nørro nebua ashib kusreb taig chi cierton kōmfigwanba, treelan mørøb pasrønrrab kōmø meganrrig. ²¹ Pøs mōiløgøbenma trunun marøb kebamba, nōmui isubigwan Jesucristoinuutø pasra tøgagúigugurrimbe yandø pella, chab tarømisran.

Tiuswei ka yandø tab indiibe ñimba pasrønrrun.

2 Timoteo

Timoteowan 'ka uñguh' cha, Pablo pørig

¹ Na Pablo, Tius nan trendø treeg kønrrain kuikkurri Jesucristo nøashib karua ørig, øsig kømigwan Cristo Jesúsweinug tranrrrab misra kørrømisrigwan eshkanrrai ørig, ² nai undaaraig nusrkai lataig, ñi Timoteowan i kilgawan pørar. Tius Møskaweimba, namui Señor Cristo Jesúsweimba tru ka yandø tab indigwan køben, lastima asigwan køben, chi isumgaig tab købigwan køben ñuim pala kønrrai isur.

Cristoimburabigwan kørmø waminchib

³ Chu uraskucha pesannab elachimøtø nabe truigwan, yem kwaløm ñiune tøga tøga isua miab megappe, Tiuswan 'mayanguen ungwa, ungwa' chibig kur, nai isub kebachib pasrabigu 'chi kalø køn' cha kebachibig chigaig, na treeg marøb pasraig Tiuswan, tru merrabsrø nai kølli misaamera Tiusweyasig maig marøb melabelø køben treetøwei. ⁴ Ñi kappin kørrøgaigwan isubene, nane katø malaugue asinrrabna køtan, na purø tab kui mørøb truba truba kasrag pasramig kønrrai. ⁵ Nabe katø katø isuinabig køn, ñi ka isatø inchib kømø, ñui isubigwan Jesucristoinug cierton pasra tøgagúigwan. Truigwane ñui awela Loidaba, ñui usri Euniceba truilømerrig pølbasa tøgagúig købig køn. Incha møimbe ñuinukkucha trube pasrømø kømø, pasraitamab isua pasrar.

⁶ Treekkurri na nai tasigwan ñuim pala estsaren, ñi chigøben marøbig kønrrai, Tius keta tranig tøgagúigwane pesannab elachib imønrrai, katøyug isunanrrab inchar. ⁷ Kaguende Tiusbe namune køriiteelø kønrrain kømøtø, chishkandø marøbig kønrrain tranig køn, undag købigwan tøgær kønrraimba, asr mumay srua itanmaptø pønrrømeelø kønrraimba. ⁸ Inchawei Señor Jesucristoimburabelan wamindamigwan kørig kui inchib pasrømøwei, namui Señorgurri kailan keeri yau na pasranmaptø kørig kui inchimøwei inchig. Masken treeg kørig kui inchimøtø, Tiuswei tabig srø wamgurri na maig kaig nebuig megaben, treetøwei meganrrab inchi, Tiuswei maramburab marøbig truig maig køben treeg. ⁹ Kaguende namun kaigyugurri wesrawa, newan tabig chishig amøñinrrai wamabiibe nøwein køn, kabe nam chigøben mariiløgurriin kømøtø, nø trendø treeg martrab isuitøgaba, nui ka yandø tab inditøgaba køn. Tru iig ka yandø tab indigwane Tiusbe Cristo Jesúskurri tranig købig køn, chigurrimbunø pønrrabikken kaabenbatøsrøwei. ¹⁰ Inchen møimbe Cristo Jesús namui Kaigyugurri Wesrabig yandø kenamisren, tru ka yandø tab indig pasrabig købiibe kenamisran. Incha tru managatig kerriguwan kwamig kønrrai marøb pasrabigwane nøbe kerrigu pinisha, tru Tiuswei tabig srø wamgurri tru øsig kømig managuen patsømønrrabigwan tøryu wesrawa pasran.

¹¹ Inchen nabe truigwan eshka waminchibig kønrraimba, Jesucristo nøashib karua ørig kønrraimba, kusrenanøbig kønrraimba wesrawa pasrig kur. ¹² Incha øyeekkurri nabe øyeeg kaigu pureb megar. Treeg kuingucha øyeeg pasrarmaptø chi kørig kuiim pasrømur. Kaguende nabe mun kørewa pasrarmab isua pasrar. Na tru srabe kwalømweyasig na nuinug esegawa tøgagúigwane chi puraimønrrai ashib tøga pasramig, nøbe maramburab maramigwan tøgagig kui, nabe ashmø kømø, asha pasrar.

¹³ Tru chi kalø kømø tabig kusrenaniilø na wamindigwan ñi mørigwane, trunun merrarrawa treetøwei marøb yamig tøgagørrig, isubigwan tru Cristoinug pasriguba, undag købigwan Cristo Jesúsweinug pasra tøgagúiguba. ¹⁴ Tru purø tabigwan ñun marøb tøgagønrrai tranigwane, tru namuinug pasrabig Espiritu Santo purugúitøga tab asha tøga pasrau.

¹⁵ Pøs ñibe asha kuinrrun mayeelø Asia pirausreeløma nan chab tarømisrigwan, truilai utube Figelo køben, Hermógenes køben tarømisrig køn. ¹⁶ Onesiforoí yauelan Tius lastima tøgagønrraimab isur. Kaguende Onesiforobe katø katø nan chi isumø pishindø pasrønrrai purugubig køn, katø nan kailan keeri yau pasranmaptø kørig kui inchimøweingue. ¹⁷ Masken treeg inchimøtø, Romasrøma pub latatø, nan wetørramnegatig lawa, wetørrabig køn. ¹⁸ Señor Onesiforoí tru lastima asig kømigwan nebua tøgagønrrai tranrrai isua inchar, tru srabe kwaløm puben. Ñibe yandø tsabø ashibig køn Efesosrøma nøbe namun yeeg purugub megaig købigwan.

2

Jesucristoi kan tab suldau kømig

¹ Ñi nai nusrkai lataibe, tru ka yandø tab indig Cristo Jesúsweinug pasrabigu mur isua pasrau. ² Truba yamelai malau na waminchen, ñui kalutøga ñi mørig købigwane katøganelan

chi isumgaig martraptø møguelan martrai karua pønsrø, nømgurringucha katøganelan kusrenanrrapteelan.

³ Chine isuig megamig pub arrubigu, ñibe namba treegu pureb meganrrab isu, Cristo Jesúswei kan purø tab suldau lataig. ⁴ Kan suldauma chi maramelan marøb meganrrab, truyu kebyaikkurrimbe, katøgan nøørø peg marameløyube kebya megamøn, nun suldau kønrrai pasrøbigwan purø tab kui mørtrai martrab. ⁵ Katø møig kanab luldashchab kan luløbig chigucha lulrrab pasramisra, luløbelø chitø maramig køben treegwan marmøwabe, tru lulimburø coronan utønrrab kaimanrrun. ⁶ Katø kan kwallibig chigucha pøsa, pøsa kwallabe, ellmarig misrøbigwane nømerrig tulishinrrabigwein køn. ⁷ Inchawei iig na ñun trendailane ñiguen chi chibig kuitashchab tab isu, pøs Señorbe chiwandøgucha ñi tab chigüi møramigwan tranrrun.

⁸ Jesucristo rey Davidwei misagugurri arrubiibe kwawa, kwailai utugurri katøle kurigwan ñibe pesannamønrrai isuagu, tru Tiuswei tabig srø wamwan na maig eshka kusrenanig, treegwan. ⁹ Inchawei tru wamgurri chineto kaig nebuinab, kailan keeri yau pasramig nebutan, kan larrø kaig lataikke. Inchendø Tiuswei wambe merrarraig kømøtø pasran. ¹⁰ Inchawei treekkurri chineto kaig nebub arrubigwan treegwan kerriku ka pureb megar, Tius nø lawa wesrailayasig tab kønrrai isua, tru kaigyugurri wesrailø kømig Cristo Jesúsweinug pasrøbigwanba, tru managuen patsønrrabgaig tørguegwalmabigwanba nømgucha nebua tøgagønrrai.

¹¹ Iig trendaibe chi isumgaig, isig kømøtø køn:

Nam nøba kwawabe,

katø nøba øsig purramig kønrrun.

¹² Maya kaig nebub arringucha, melabig meløwabe,

katø nø ashib karub waisrøn chigucha nøba ashib karub purramig kønrrun.

Nam nun ‘ashmeelø ker’ chibene,

namungucha nøbe ‘ashmíig kur’ chinrrun.

¹³ Namba maig pønrramigwan treeg pønrrømuingucha,

nøbe namba maig pasrabiibe chu uragucha treetø pasrabig køn,

kaguende nøbe maig køppe, managucha treetø kua.

Sølwan marøbig kui asig kønrrab inchi

¹⁴ Iilane pesannamønrrai isunanøppatø, isunanøppatø meganrrig, ‘øyeeg martrigay’ chib Tiuswei merrab karua pasrøb, ke kan chi wamindamgaigwan treetøgatø ke larrøbitsamburab larrøbichib, ambugurri igurri aleguiyab kømønrrai. Treeg mariiibe chi tabig purugumøtø, tru wamindigwan mørøbelane ka trømbøig mindishatø kørrømarøbig køn.

¹⁵ Ñibe ñuimburappe Tiuswei merrab søl marøbig kui asig pasrønrrab, purø tab asha isuptø marøb meganrrig. Chi maramigwan marøb pasrabig, chiyugucha køriimisra pasrønrrabgaig tru wam newan ciertonigwane, maig kønrrabigwan sølgandø kusrenanøb pasrabig treeg kønrrab. ¹⁶ Tiuswane chigucha kømíig marøb wamindiilanba, ke ka wamincha möríilanba, treegwan martrab kømø isua pasrønrrig. Kaguen treeg waminchibeløbe nømui kaig mariiløyu mas kegørrab ambubelø køn. ¹⁷ Inchen nømui treeg wamindiiløbe kan pill-llab pisrø asrwan trerangarub larrøbichib ib lataitøwei martrun. Treeg marøb pønrrabelai utube Hime-neoba, Filetoba køn. ¹⁸ Pøs truiløma tru newan ciertonigugurri pella tarømisra, tru kwailø øsiiranrrun taibe yandø chab øsiirabguen indin køn chib, trumay waminchib kebamba, møilanma tru nømui isubigwan Jesucristoinug pasra tøga melaigwane yandø mumaygucha kømuielel melønrrai mindisha kørrømarøb kebambin køn. ¹⁹ Inchendø treeg kuingucha, Tius purø may tamara pølbasa pasriibe muguen kønøgamgaig pasran. Truyube øyeeg chibig pørig tøgag: “Señorbe møiløtø nuielø kuigwan ashibig køn” chibiiba; katø: “Møitøgucha ‘Señorwei munchiyu uñibig kur’ chib waminchibiibe kaig marigugurri tarømisramig køn” chibiiba.

²⁰ Kan nu yauma pasumera, køtsømera pønrrappe, orotøga mariiløtø pønrrømøwei, andøga mariiløtø pønrrømøwei indan. Treeg kømøtø, tsiitøga mariilø køben, pirøtøga mariilø køben pønrran. Møiløbe purø tabig marøbyutø katørab srua kømig køben, møiløbe ka chi marøbyu køben katørab srua kømeelel køn. ²¹ Inchawei møikkøben øyeeg kaig mariiløyugurri chish misrabe, purø tabig maramigweyasig kan pasun lataig tøgagømig kønrrun, tabigweyasiitø tarømarig, chiyutøgucha Señorweimbe tabig martrabig, chigøben tabig maramigweyasiibe kaima pasrønrrabgaikke.

²² Matsørelø chineto kaig marøg kui indiiløyugurrimbe ñibe tarømisr. Incha tru sølgandø tabigwanba, isubigwan Cristoinuutø pasra tøgagømigwanba, undag købigwanba, ambugurri igurri tab unamigwanba ñibe tøga uñ, tru nømui manrrømeran chishchitøga Señorwan ‘purugurra’ chib wamab tabig waminchibeløba kanbalatø. ²³ Ke chi wamindamgailan aleguiyam lailøyugurrimba, chugüinguen mørmubendø chineto cha

møriløygurrimba tarømisr. Kaguende treeg indiibe ka kwayab kōmigweyasiitø marig kørømisrøbig kui ñibe ashibig kōn. ²⁴ Kaguende Señorweiwan marøb megabiibe kwayam laptiig kōmøtø, masken mayeelan larrø tab inchibig, trurrigu may kusrenanøbig, chigøben pusrkwanrraptiig taingucha namig mōrmiiig kōmig kōn. ²⁵ Katø mōrøg kōmub chinetø cha mōrøbelane, mōi mōi tsag wamømøtø, tammaytø sōlwan isunrrai purugumig kōn. Nōmui kaig marilian isua mōra, Tiusweimay lliramigwan inchippa Tius tranøbgunmab isua, tru newan ciertonigwan nōm tab chigúu mōrtraí. ²⁶ Incha katøle tab isua mōra, tru nugwaimandzig chinetø mara pōnsra nōmun kegørrøsrka, nø maig martrain køben, treeg marøb melønrrai merrarrawa tøgagúigugurri wegørrønrrai.

3

Srabe kwalømmerawan misamera mailø kōnrrabelan waminchib

¹ Katø ñibe iigwangucha isua asha kōmig kōn, srabe kwalømmerawane tabguen waramga kwalømmera attrab kui. ² Møguelø ka nōmuimburaptø tabig kōnrrai inchibelø, anwane ke chinchimmørø inchib chull inchibelø, purø nørreelø misrøb waminchibelø, purab nørreelø misrøb katøganelane keeshaguen ashmeelø, trømbøig tsalø wamamba inchibelø, nōmui mōskalan larrø mōrmeelø, chiwangucha ungwaguengar, Tius kaagúu lataig inchib misaamera kōnrrun. ³ Ka trendø treeg undaguelø kōmigwane chigucha chiga misaamera, namappe, chinchaguen tamaramgaig namabelø, wam kusrupteelø, trømbøig maramigwane ke treeg maratøweim puraambubelø, nōmun kōmøbashtø trømbøig mara petab misaamera, chigurrimbunø tabigwane larrø tsaleelø. ⁴ Chi kōmubendø tabelan kailai tasku purøra pōnsrøbelø, chi maramigwan tabguen isumubendø mōi mōi marøbelø, nørreelø kermab isubiitø ke chinsraatø inchibelø, chine tab kuimørøb maramigwangøba undaarabelø kōnrrun, Tiuswan kōmøtø. ⁵ Tiusweimburabigu truba tabig amøñib lataig inchendø, tru maramburab marøbig Tiusweiwane chigucha kōmiiig mara tōgar kōn. Øyeeg misaamerane tarømisr. ⁶ Kaguende tru treeg marøb møguelai utuelø mōiløgøben kōn, ishumburmera chiyu køben mur isua pōnrrømowa, chigurrimbunø kaig marøg kōbig arrubig srua ambiilø, kaig mariitø netsailai yamerayu kebamba, tru ishumburmeran kegørrøsrka treetø treetø melønrrai srua købelø. ⁷ Inchen tru ishumburmerabe chu uraskucha kusreb chib meløbendø, tru newan ciertonigwane managuen nebua ashchab kaiman. ⁸ Tru Janesba, Jambresba Moiséswan chi marmønrrai sötøluløbelø latawei, tru møgueløbe tru newan ciertonigwane treetøwei sötøluløbelø kōn. Truiløbe nōmui turyube trømbøig maramig isubiitø netsailø, isubigwan Jesucristoinug pasra tøgagúigugurri tarømisra misaamera kōn. ⁹ Inchendø ke øyeetø, øyeetø kuimbe martrab kaimanrrun. Kaguende nōm chigúinguen mōrmubendørre marøb kuigwane mayeelai malau tōrgandø tōrmarig kōnrrun, tru pailø Janeswanba, Jambreswanba maig purayag treetøweingue.

Timoteowan chi maramigwan Pablo karua pasrig

¹⁰ Inchendø ñibe ñuimburappe na maig kusrenaniilan tab ashibig kōn, na mandø unigwan, na maig martrab isuigwan, nai isubigwan Jesucristoinuutø pasra tøgagúigwan, maya chindingucha tammay megaigwan, undag købig tøgagúigwan, chine pub arringucha tarømisrø, megabig megaigwan. ¹¹ Katø chine chine nan kaig marinab megaigwan chigucha, purø isuig megamig chinetø puigwan, Antioquiasrø Iconiosrø, Listrasrø nan yeeg trømbøig pui megaigwan. Øyeeg chine trømbøig puig isuig megaben, kerrigu øyeelø chine pub arrubigugurri Señorbe nan chi kōmø ka purayamig kōnrrai marig kōn. ¹² Inchawei nutøgucha Cristo Jesúsweimburabeløyu tabig amøñinrab inchibeløbe, isa kōmøtø, kaig indinab melamig kōnrrun. ¹³ Trune tru larrø kaig møgueløba, katø tabzhig wamincha kaigyu kegørrøsrkøbeløbabe treetøguen kōmø, purø kailøguen misrøb amrrun, nōmguen may wamincha kegørrøsrkailøtøwein købendø, may wamincha katøganelan kegørrøsrkøb.

¹⁴ Trune ñibe tru ñi kusrewa tøgagúigu, truyutø megabig megau, tru ñi trunun treeg kuitamab kørewa tøgagúigwan. Pøs ñibe isua kuinrrun ñun truigwan mumeru kusrenanig købigwan. ¹⁵ Inchagucha ñibe unøgurri Tiuswei tru newan tab wam pøriilan yandø ashibig kōn, truiløbe ñune kusrebig kōnrrai martrun, tru isubigwan Cristo Jesúsweinug pasrikkurri kaigyugurri wesraig kōmig kōnrrai. ¹⁶ Pøs Tiuswei wamwan pøriibe kerriguba Tius nui wamwan øyamay chinrrai isungaruben treeg pøriilø kōn, trurrigu kusrenanamibe purø tabig, kalø marigwan nebua ashchai wamindamig lata, kalø maren sōlwan martrai watsamig lata, tru sōlgandø maramig kōnrrai kusrenanamig lata, ¹⁷ Tiuswei mōøbe chigurrimbunø tabig maramigweyasiibe chigucha palømiiig newanig kōnrraingue.

4

Ñun maig martrai karua pasrigwane martrig

¹ Tiuswei merrappa, katø Cristo Jesús, katøle kenamisra arrua, tru nõ ashib karub wamigwan nõ tōga pasramisra, tru øsiguelanba, kwaig warabelanba, maig kõnrrabigwan nõ asha martrabigwei merrappa, marmø kõmø martrai ñun karua pasrar: ² Tiuswei wamwan eshkab kusrenanrig. Wamindamdiig kui lata, wamindamdiig kõmui lata nui wamwane waminchab muniitø pasrabig kõnrrig. Katø øyeeg maramig kõbig kuin kui nebua ashchai waminchib, kalø marmønrriai wachib, kullaaramø tranrønrriai purugub, trurrigu tsag inchimø, tammay Tiuswei wamwan kusrenanø pasrønrriai pasrar, ñune. ³ Kaguende tru chi kalø kõmø tabig kusrenanig Tiuswei wamwan misaamerabe mørøg kõmui inchib pønrram kwalømmæra punrrab køn. Nømbe ke chine peetø mørøg køb mendindø kuig kõppe, nõmui trømbøig isuiløyu maig køben treegwan marøb kõmig, kusrenanøbelø srøitø srøitø tulishib truba nõrrø pera kõnrrun, nõm chi mørøg kuin køben treegwan waminchabelø. ⁴ Incha tru newan ciertonigwane mørøg kõmub tarømisra, chi treeg kõmubendø nõmuinetø isua wamindiilan mørøb kõnrrab chab lliiranrrun. ⁵ Trune ñibe ñuimburappe chiyutøgucha maig pasramigwan tab asha pasrau, maya kaig pub arringucha treegu ka megab, Tiuswei tabig srø wam kaigygurri wesrabigwan trusrøn trusrø waminchib lirab, Tiusweiwan ñi maig maramig tøgagúigwane newan martrig.

⁶ Kaguende nabe yandø naimburappe na øsig kuigwan Tiusweyasig keta tranrrab kweetsig kõmig yandø ke lutau pasrøben, yandø na kwawa webya yamibe puim pasran. ⁷ Nabe nai kwayamigwane purø may kwayawa pasrar. Katø chu pumsrøngatig lulamigwane trusrøngatig lula, isubigwan Jesucristoinuutø pasra tøgagúigwane maig tōga pasrabig kuig treetø ka tōga pasrar. ⁸ Inchawei maig kõnrrabigwan sølgandø tabig marimburø utam corona esegaig tøgagur. Truigwane Señor, tru maig kõnrrabigwan sølgandø tabig marøbig, tru kwaløm nan tranrrun. Tranøbgucha nandø tranmøtø, katø mayeelø tru nõ arrunigwan truba truba tab kui isub muniirabelane, mayeeelanba tranrrab kuinrrun.

Timoteowan nunashib wamindiilø

⁹ Timoteo, petø nan ashchab attrab inchunrrig. ¹⁰ Kaguende Demasbe i pirauig-wangøba undaarab kebya, yandø nane elachippa, Tesalønicasrømay yaig køn. Inchen Crescentebe Galacia pirasrømay iben, Titobe Dalmacia pirasrømay yaig køn. ¹¹ Yube ke Lucastøwei naba kõrrømisran. Marcoswane lawa, ñi pera attrunrrig. Kaguende nõbe tru nai marameløyu truba nu purugunrrautan. ¹² Inchen Tíquicone nabe Efeso ciudadsrømay ørig køn. ¹³ Incha ñi arrupe, Troassrø Carpoi yau tru na kõrrømarig, nai pala itøgueigwanba, kilgamera pøriilanba srua attrunrrig, katø trugurri tru katøgan kilgamera mas palønrabelane pesannanrrab kõmø.

¹⁴ Alejandro, tru tsandzøndøga chigøben marøbiibe, nane chinetø truba truba kaig marig køn, nõ maig marigwan Señorbe truburø maig tranamigwan tranrrab kuinrrun. ¹⁵ Tru møwane ñigucha isuatø ashiptø uñchig. Kaguende Tiuswei wamwan nam waminchimønrriai truba truba sètøluløb kurrig køn.

¹⁶ Tru maig maramigwan asha marøb purrabelai merrab ke srøsrø nan payib srua kõnrrab pølbaserendø, tru naimburab 'na treeg mara pasrømur' chib, megabenma, nane mugucha purugumøtø, masken nandø elacha, mayeeløba ke chab tarømisrøptindig købig køn. Nøm øyeeg marigwan Tius isua ulø paymuimbe køn. ¹⁷ Treeg kuindøgucha, Señorbeguende naba pasrøwa, chigüingucha kullaaramø, mur pasrønrriai purugúig køn, Tiuswei wamwan nagurri eshkab kusrenanig kõrrømisren, mayeelø judíos kõmø misaamæra truigwan truyu nebua mørig kõnrrai. Incha nane Señorbe león lataigwein trigugurri kerraig køn. ¹⁸ Katø Señorbe nane chine kaig nebunrrab pønrrabigugurri chi kõmø, ka purayamig kõnrrai, chi indiimig ashib tøgagønrrautan, srømbalasrø nõ ashib karub waisrø tōga wamigweyasig. Tørguegwalmabiibe Tiuswein kõnrrun managatig. Treeg kõnrrun.

Tabig wamindiilø srabeig

¹⁹ Priscilanba, Aquilaswanba, Onesiforoi yuelanba 'tab ka amøñigueh' tan chirrunrrig. ²⁰ Erastobe Corintosrø kõrrømisren, Trøfimone Miletosrø kwanrrø kõrrømarar. ²¹ Pishim pølmera kebimøwatø ñibe petø attrab inchig. Eubulo køben, Pudente køben, Lino køben, Claudia køben, katø nunelø mayeelø truilø chigucha ñun 'ka uñguh' chirrunrrig cha, øran.

²² Señor Jesucristobe ñiba pasrøben, nõ ka yandø tab indikkucha ñimba pasrønrriaimab isur.

Tito

Pablo Titon pørøb

¹ Na Pablo Tiusweiwan marøb megabig, Jesucristo nõashib karua ørig kur, Tius nõ lawa wesruilan, tru isubigwan Jesucristoinuutø pasra põnrraigwanba, katø tru newan ciertonigwan nebua asamigwanba na purugub pasrønrrai, tru Tiusweimburab tabig amønami gumay amrrai marøb pasrabigwan. ² Tru isubigwan Jesucristoinug pasra tøgagúiba, tru maig kuigwan nebua ashib ambiibabe, tru managatig øsig kømigwan tøgagønrrurmab isua munig melaigu truyu pasran, Tius tru mana isa waminchimig, chigurimbunø købigwan marmøwatøsrøwei tru nõ tranrrab misra kørørmisrigu. ³ Inchen mõimbe yandø truigwan maram kwalømmera pubene, Tius namui Kaigyugurri Wesrabig nan martrai karua pasren, trunun na eshkab kusrennen, nui wambe yandø truyu kenamisan. ⁴ I kilgawan ñi Titon pørar, nam pailøba namui isubigwan kanguelarrøtø Jesucristoinug pasra tøgag, ñi nai trag nusrkai lataigwan. Namui Tius Møskaimba, Cristo Jesús namui Kaigyugurri Wesrabiiba, nui ka yandø tab indigwan køben, chi isumgaig tab købigwan køben ñun tranrraimab isur.

Cretasrø chitø maramelø

⁵ Na ñun tru Cretasrø kørømarøppe, trusrø tru chi maramelø lutø kørømsiriilan lutøgurri tab tamarøb kerrigu chab patsø kønrraimba, katø pueblomørig iglesiamerayu Tiusweiwan pera marøb põnrønrrabelø wesrawa põnsrønrrai, ñune trusrø treeg kørømarig køn, na ñun maig martrai karuigwan treeg martrai. ⁶ Tiusweiwan pera marøb pasrabiibe mugøben 'chi køn' tainanrrabgaig, kan sraindø tøgag, katø ureemeragucha Jesucriston kørøbelø tøgag kømig køn, nõmun 'maig marøb amøñig køben amøñibelø køn' chib waminidabelø, kabe 'mørmeelø larrø kailø køn' chib waminidabelø treeg ureg kømøtø. ⁷ Kaguende Tiusweimburabelan ashib pera pasrabiibe 'øyeeg køn' tainanrrabgaig kømig køn. Ke nõ maig taigwandø, martrai inçhibig kømøwei, kuchigurrindø ke chinsraatø inçhib namabig kømøwei, mutsiiraptiig kømøwei, kwayam lamig larrø chullig kømøwei, ke maramgailan marøb, an nu katøramigwangøba chullig kømøwein kømig køn. ⁸ Masken treeg kømøtø, mugøben nui yau pubelane yaambumay wamønrrab muniitø wabig kømig køn. Tabigwane undaguig, maig unamigwan isua mōra uñibig, sølgandø tabig marøbig, Tiusweimburabeløyu newan tabig uñibig, asr mumay srua itanmaptø uñimig kømig køn. ⁹ Tiuswei wamwan chi isumgaig ciertonigwan maig kusrenanigwane, tindøga pasrabig kømig køn, chi kalø kømø tabig kusrenaniitøga katøganelan 'maig maramigwan treeg maray' chib waminidamiba, katø 'kalø maran' chibgøba waminchibelan, nõmguen kalø marøbelø kuin kui nebua ashchai waminidamiba.

Tru peemaytø yunømara kusrenanøbelø

¹⁰ Kaguende nõm maig martrab chippe, ke purab purab põnrramisrøbelø køben, wamdø nigarmøba køben, katø may wamincha ka kegørrøsrkøbelø køben truba nõnø køn. Tru treeg inçhibeløbe judiosmera tru asru circuncidawarmera, truilørre mas inçhibelø køn. ¹¹ Inçhawei treelane waminchib kømønrrai mera, nõmui trigwane kandø kasra pasramig søl køn. Kaguende chi maramig mara an nõrrø tøgamisrøg køb, ke yaba, yaba yandø mandøgucha kømuielø melønrrai mara kørømarøb amrrun, chi kusrenanamgailan kusrennøb.

¹² Tru Cretasrø kan møg nõmui utuig nõmui tiusmeraiwan waminchibiitøwei nõm tøgagúima trendaig købig køn: "Cretasrø misaamerabe chu uraskucha isa waminchiptø warabelø, animal lataitøguen kømø purab kailø, kan mabgucha jkatø! mamburab mabelø, trurrigu pøgølelø køn" cha. ¹³ Truig trencha waminðiibe isa kømø, sølwei waminðig køn. Inçhawei nõmune waminchippe mørømø kømø, mørtraï mur waminchig, tru isubigwan Jesucristoinug pasra tøgagømigwan chi kaiba lindiimig chishig tabig tøgagúigwane, ¹⁴ judiosmera ka nõmdø isua waminðiilø tøgagúilan tru kuindø mørøb põnrørmøwei, katø møguelø tru newan ciertonigugurri tarømisra chi maramigwan nõmdø põnsrailan tru kuindø marøb põnrørmøwei inçhai. ¹⁵ Chi trømbøig isumeelø chishig tabig isubelaimbe chitøgucha tabig chishig køn. Trune Tiuswan chigucha kørømeelø, larrø trømbøig isubelaimbe chigucha chi tabig chishiibe chi kaagøn. Kaguende nõmui turyu isubiiba, isub kebachi pasrabiiba truiløbaguen larrø trømbøig mindiilø tøgar køn. ¹⁶ Tiuswei mayu amøñibelø ker chibendø, nõmui chigøben marøb amønaitøgabe chi ashmeelø kui lataitøweih marøbelø køn, ashikken kønrrabgaig køsøngønrraptiig marøbelø, larrø mørømø misaamera, chigøben tabig maramigwane martrabga misaamera køn.

2

Chi kalø kømø tabig kusrenanigwan waminchib

¹ Trune ñibe waminchippe, tru chi kalø kømø tabig kusrenanig, truig maig køben treegwan waminchig. ² Møguelø kølleeløbe chigøben incha ashmø, maig pønrramigwan pønrrabelø kønrraimba, mugøben chine cha asinab pønrrømeelø kønrraimba, isua mōra misaasun amøñibelø kønrraimba, isubigwan Jesucristoinug pasra tøgagüigwane chi kaiba lindiimig chishig tabig tøgagønrraimba, undag købigwan tøgær kønrraimba, chine pub arringucha melabig melønrraimba waminchig.

³ Katø treetøwei ishumburmera kølleeløbe, Tiuswei ureemerasun maig amønnamigwan amøñibelø kønrraimba, wam kusrab wamniga llirapteelø, vino mutsamigwan larrø chulleelø kømønrraimba, tabigwane katøganelanguen kusrenanøbelø kønrraimba waminchig. ⁴ Øyamay nømbe tru keløbar ureetø ishumburmeran: isua mōra misaasun amønnamigwan, nømui kelan, nømui uregwan undaguelø kømigwan, ⁵ tab isua mōra amønnamigwan, chi kaig marmø chishig amønnamigwan, nømui yaambu chi maramelan asha marøb purrabelø kømigwan, tab inchibelø kømigwan, nømui kelø maig chiben treeg melamigwan waminchibelø kønrrai, 'Tiuswei wamwan chi tabig kømøn' chib kaig wamindig kømønrraingue.

⁶ Katø matsørelan chigucha 'øyeeg, øyeeg marøb kømig køn' chib, isua mōra amøñibelø kønrrai waminchig. ⁷ Ñi chiyutøgucha tabig mariløyu nømguen trunun asha kusrenrai marøb kenamar. Incha ñui kusrenanamigu ñibe kusrenanøppe, maig kusrenanamigwan isa kømø sølwan kusrenanøb, ka indzab marøb lataig kømøtø tab kusrenanøb, ⁸ katø waminchibgucha wamindamgailan waminchimøwei, mu 'øyeeg kalø køn' tamgaig waminchib kusrenanrrig. Tru namun tsalø kuin pønrrabeløguen namun møigwandøgucha chi chaguen kaig waminchab kaima, kørig misraguen kørømisrtrai.

⁹ Katø tru karuindiig melabeløbe, nømun karub pera købelø nøm maig karuben, 'chiyutøgucha treeg marøb melamig køn' chib waminchig, karub pera købelø tab kui mørøb purrønrrai marøbelø kønrraimba, katø trigu trigu løtapteelø kømønrraimba, ¹⁰ katø chigøben tsøgøl inchipteelø kømø, masken newan chi isumgaig tabig marøbelø kui asiilø kønrraimba, Tius namun Kaigyugurri Wesrabigwei tabig kusrenanigwan nøm chi marigutøgucha purø tab kui asig kørømisrtrai. ¹¹ Kaguende tru Tiuswei ka yandø tab indiibe maya misaamera ashchai kenamisrin køn, tru kaigyugurri webambamig kønrrai.

¹² Inchen tru ka yandø tab indiibe mõi ya nam øsig warain kwaløm, isua mōra misaasun amønnamig kønrraimba, maig kønrrabigwan tabig sølgandø maramig kønrraimba, Tiuswan maikkucha pesannamø tabig amønnamig kønrraimba kusrenanøbig køn, Tiusweimburab trømbøig kaig maramelanba, chigøben ke trømbøig marøg kōtanmaptø marmumigwanbabe yandø elachar kømig kønrrai, ¹³ tru nam isua munig melaig mayanguen tabigwan muniirab melappe, Jesucristo tru namui purø nu Tius namun Kaigyugurri Wesrabigwei törguegwalmabig kenamisramigwan muniirab. ¹⁴ Kaguen nøbe nøashib namuyasig kwaig køn, chigurrimbunø purø trømbøigugurri wesranrrappa, katø kerrigu newan chishelø, nui misag sötømera nuyasiitø kønrrai martrappa, katø tabig maramigwane marmø kømø martrab inchibelø kønrrai. ¹⁵ Ñibe illan waminchig 'øyeeg, øyeeg marøb kømig køn' chib; 'øyeeg maramibe kalø køn chib; marmøtay' chib. Waminchippe, mu mandamgaig waminchig; ñun mu kaashib kønrrain kømøtøgue.

3

Jesucriston kørebelan mandø amønnamigwan waminchibig

¹ Misagwan ashib karub purrabelan lata, katø chi maramigwan martrai karub purrabelan lata, truilø maig chiben treeg melabelø kønrrai, isunanøb waminchig, chi karuben mørøbelø kønrraimba, chigøben tabig maramigwane martraptø pønrrabelø kønrraimba, ² mugøben katøganun chi kaig waminchimeelø kønrraimba, kwayam lapteelø kømøtø, masken tab inchibelø kønrraimba, maig købash inchimø, mu misaamerandøgucha tabig marøbelø kønrraimba. ³ Kaguende merrabsrømbe namgucha Tiusweimburabelan larrø chugüi mørmeelø, Tiuswan mørøg kømui inchibelø, pella amøñibelø, chigurrimbunø trømbøig marøg købiiba kaig mara tab kui mørøb waramibatø srua ambiilø, kaig maramigwangøba isubelø, chigurrin køben katøganun pusrkwai ashib, namun katøganelø larrø tsalø asiilø, katøganelan namgurrin treetøwei tsalø ashib nambe treeg amøñibelø købig ker. ⁴ Inchen Tius namun Kaigyugurri Wesrabigwei tru ka yandø tab indiiba, nui undag købiiba maya misagweyasig yandø kenamisren, ⁵ nam chigøben sølgandø tabig marøbelø kuimba kømøtø, nøbe lastima asig maig køben, namun kaigyugurri wesraig køn. Treeg marøppe, srøilø kønrrai pillmaikkurrimba, Espiritu Santo namun peemayelø kønrrai srøig yunømarikkurrimba køn. ⁶ Nøbe Espiritu Santon tøgagømburab tøgagønrrai namuim pala ørig køn, namui Kaigyugurri Wesrabig Jesucristogurri. ⁷ Nui ka yandø tab indiitøga namune

chi kaig komeelø lataig tabig korrømara, ketigwan utørrab ureemera kōnrai korrømarig kōn, nam tru managatig øsig kōmigwan tōgagørrurmab isua munig melaig truiig maig kōben treeg.
 8 I trendaibe chi isumgaig isig kōmøtø kōn. Inchawei iigwan waminchippe marmø kōmø, treeg martrai waminchig Tiuswan kōrewa pōnrrabeløbe chigøben tabig maramelangøba marøb melønrrab inchai. Kaguende tru iig tabig mariiløbe misagwan truba tabig purugunrrabig kōn.

9 Inchen ke ka yandø kwayam lailanba, katø nambe i misaamerainukkurri amrrubelø ker chib wamindiilanba, kangurrin kangurri ke chab kemøriyab katø tru aleguiyam lailanba, maig maramigwan martrai Moisés pōriiløyu, øyeeg chibig kōn chatø ambugurri igurri tru wamindiilanba, treelan tru kuindø mōrøb pasrønrrab kōmø. Øyeebe chi purugunrrabgailø waminchimuinguen wamindiilø kōn.

10 Mōikkøben Tiuswei ureemeran nōrøø katōgan sōtø marøb uñibigwane 'øyeebe maramig kōmøn' chib kan pamaygatig wama wamincha, wamindigwan mōrøg kōmui inchene, yandø treeg mōwane chi asamig kaanrrai tarømisramig kōn.

11 Kaguende øyeeg mōøbe yandø nōasiitø tsabø minchaig, kaig marøbig, nui kaig mariitøgatøwei kaigu kebefiaig kōn.

Nunashib wamindiilø srabeig

12 Artemaswan kui, kabe Tíquicon kui ñuimay na ørene, Nicópolisrømay nan ashchab, petø attrab inchunrrig. Kaguende nabe tru pishim pølmerawane trusrø tsunrrab inrrab isur.

13 Tru maig maramigwan martrai romasreelai pōriilan ne ashibig kusreb mōg, Zenaswanba, Apoloswanba, nōmui ambamigwan amrrai, chigucha palab punrrain kōmø, purugunrrig.

14 Pøs chigøben ke purugumdiig pub arruben treegu purugunrrab, namuieløgucha tabig maramigwane kusreb ambamig kōn, ke chigucha marmeelø kōnrrab kōmøtø.

Wamindiilø srabeig

15 Mayeeløba naba amøñibeløbe 'tab ka amøñigüeh' cha wam øran. Nam lataitøwei nōmui isubigwan Jesucristoinuutø pasra pōnrrøwa namun undaarabelan 'ka amøñigüeh' tan chirrunrrig.

Tius nui ka yandø tab indiibe ñim mayeeløba pasrønrrun.

Filemón

Pablo Filemónwan pørøb

¹ Na Pablo Cristo Jesúsweimburabelan marøb megaikkurri kailan keeri yau pasrabiibe, namui nuneg Timoteoba misra, ñi nai undaraig namui maramigu lincha marøbig, Filemónwan køben, ² katø namui nuchag Apian køben, trugurri Arquipo tru namui marmeløyu, marig kørrømisrtrai tranrrab megabigwan køben, katø tru iglesia ñui yau tulundzunabelan køben pørar. ³ Tius namui Møskaimba, Señor Jesucristoba nui ka yandø tab indigwan køben, chi isumgaig tab købigwan køben, ñimun tranrraimab isur.

Jesucristoinuutø pasra tøgagúiba, undag købiiba tøgagúig

⁴ Tiusba waminchippe, chu urastøgucha ‘ungwa, ungwa’ chibig kur ñun isub. ⁵ Kaguende ñui isubigwan Señor Jesúsweinug pasra tøga megaigwanba, katø Tiuswei misaameran ñibe truba undaguig køn taigwanba wammørikkurri. ⁶ Inchawei tru ñui isubigwan Jesucristoinug namba lata tøgagúig, truibe truba tabig purugub pasrønrrai Tiuswan miabig kur, tru Cristo Jesúsweinug nam chigurrimbunø purø tabig tøgagúigwan nebua ashchai. ⁷ Kaguende nane truba truba kasrag køb, truba tab kuig kuig køn, tru ñui undag købikkurri. Kaguende Tiuswei misaamerai manrrømerabe, ñigurri pishindø tab kuig kasraatø pønrrønrrai marin køn, ñi nai nuneg.

Pablo Onésimoyasig purøwaminchib

⁸ Inchawei nabe Cristogurri mu chi chinraingaig, ñi maig maramigwan treegwan martrai karua pasramig tøgagøbendø, ⁹ treeg inchibgunrriibe tammay undag købiitøga tiusmanda treeg martrurunrigg cha, ñun miawa pasrar, na Pablo, yandø køllig, na moi ya Cristo Jesúsweiwan marøbig kuikkurri kailan keeri yau pasrabig. ¹⁰ Nai nusrkai lataig Onésimoyasig ñui merrab purøwaminchab inchar, na kailan keeri yau pasrøwa, nai unø lataig misra pasrabigweyasig.

¹¹ Onésimobe merrappe chigucha kømíig købig kuig, mømibe ñuyasig lata, nayasig lata, chiyutøgucha ke nø purugub megabig misrin køn. ¹² Incha nabe katøle nune ñuimay ørar, tru nai manrraugurri undaraigwan. ¹³ Pøs naba kørrømisrtrai nune, nabe kørrømarømmøø isuig køn, Tiuswei tabig srø wamgurri nan merrarrowa keerig pasrøben, ñi purugub megab lataitøwei nan purugub meganrrai. ¹⁴ Inchendø ñimerrig maig tainguen ashmøwatøbe, nabe ke treeg martrab inchimuig køn. Tru na ñun øyeeg martrunrigg taigwane, ke na ñun treeg maramne indig kømøtø, uyube ñi maig maramdiig køben treeg asha martrai inchar. ¹⁵ Onésimo kan maya yanagatig ñun øyeeg tarømisrøppe, katøle managatig ñi nun yandø tøgagørrømisramig kønrrab kua, øyeeg tarømisrigg kuitamab isur. ¹⁶ Mømibe yandø nune karuindiig megabig kui lataig kømøtø, katøguchinguen tøgagømmay tøgagørrunrigg, kan undaraig nunewan lataikke, nøbe naimbe truba undaraig køn. Trune ñibe treetøguen kømø, katøguchinguen isua undaaramig køn, nø misag pasraigu lata, Señorweinug pasraigu lata.

¹⁷ Inchawei ñi naba lincha marøbig kuabe, trube, nune nan utab lataig uta tøgagørrunrigg. ¹⁸ Inchippa ñun chigøben kalø mara kuin kui, kabe chigøben ulø misra kuin køb chigøbene, trube, trunun na ashchab, nan ulø payrrunrigg. ¹⁹ Na Pablo naashib nai tasiitøga iigwan pørar: ‘Ulø chigúin købene, trube, na purø waramønrrun’ chib, ñuimburab ñitøweinguen Tiusweimburabeløyu nan truba nørø ulø kuigwan truigwanguen chi kebachimøtø. ²⁰ Trube, nai nuneg, ñi Señorgurri øyeeg tabig nayasig marimbe køtan, nai manrrau chi isumø, tab kui pasramig kønrrai Cristoinug.

²¹ Na pørøppe, na maig taigwan møra martraitamab isua pørar, katø na maig taigwandø kømøtø, katøguchinguen tabig martraitamab isuague. ²² Tru kømnetø katø na ñimuisrømay arrua, na chu pua kørrømisramigwangucha tamarøb megarrunrigg chinrrab inchar, na ñun ashchab arrumig kønrrai, ñim Tiuswan miab melaiig treeg pubene, katøle ñimun ashchab arrumuitamab isua.

Wamindiilø srabeig

²³ Cristo Jesúskurri tru kailan keeri yau naba pasrabig Epafraskucha ñimun ‘tab ka amøñigueh’ cha øran. ²⁴ Katø Marcos køben, Aristarco køben, Demas køben, Lucas køben nai maramigu maram purugub melabelø, truiløgucha ‘tab ka amøñigueh’ cha øran.

²⁵ Namui Señor Jesucristoi ka yandø tab indiibe ñimba kønrraimab isur.

Hebreos

Tius Nusrkaingurri waminding

¹ Merrabsrømbe Tiusbe namu kōlli misaamerane Tius maig karuigwan eshkabeløgurri, mumay køben, katø katø waminding købig køn. ² Incha mōi i srabe kwalømmerawane nui Nusrkaingurri namun wamindan. Tru pirøwanba, katø srømbalasrø kerrigu chigur-rimbunø købigwanbañau Tiusbe nøgurri mara pasrøb, katø nundøwei tru chigurrimbunø pønrrabigwan kerrigu keta, nø ashib tøgagønrrai kørømarig købig køn. ³ Nusrkaimbe Tius maig törguegwalmabig køben, treetøwei tørig törguegwalmabig køn, chiyutøgucha Tius maig køben nø treetøweingue. Katø nøbe tru chigurrimbunø pønrrabigwane nui maramburab mari wamdøga trunun nø ashib tøga pasran. Incha nøbe misaamerai kaig mariilan chab chishmarabe, yandø srømbalasrø Tørbilabig Purø Nu Tiuswei kusrmaygatø wanrrab wamisrig køn.

Tiuswei Nusrkaimbe ángelesmera lataguen kømø, purab nuig køn

⁴ Pøs øyamay Nusrkaimbe ángelesmera lataguen kømø, purab nuig misrig køn, “Tiuswei Nusrkain” cha, wami munchin nø uta tøgagüibe, “ángeles” cha wami munchi lataitøguen kømø, purab nuig utig køb lataitøwei. ⁵ Pøs Tiusbe kan mō ángelwan køben managuen øyeebe chimuig køn:

“Ñibe nai Nusrkain køn cha;
nabe mōi ñui Møskai misrar” cha.

Katø mō ángelwangucha øyeeb chimuig køn:

“Nabe nui Møskain køben,
nøgurrimbe nai Nusrkain kønrrun” cha.

⁶ Incha Tiusbe nui kandø Nusrkawan yu pirau kebattrai ørøb uration katø trendaig købig køn:

“Tiuswei ángelesmerabe mayeeløba nun køriibala tabig wamindamig køn” cha.

⁷ Inchen tru ángelesmeraimburappe Tiusbe trenchibig køn:

“Nui ángelesmerane kan isig ichibig latailø kønrrai maran cha,
katø nuiwan marøb melabelane nag pilabelø latailø kønrraingue.”

⁸ Trune Tius Møskaimbe tru Nusrkaweimburappe trenchibig køn:

“Ñi, Tius, ñi ashib karub wamisra waibe
managatig pasrabig pasrøben,
tru tabig sølgandø marøb tøgaweim pøøtsiibe
ñi ashib karub wainug sølgandø marøb waig,
truig kønrrun cha.

⁹ Sølgandø tabigwane ñibe undaarawa,
kaigwane ashig kømui indig køn cha.

Incha treekkurri Tius, tru ñui Tiusbe,
tru ñui linchibelan lataguen kømø,
purab nuig kønrrai mara,

ñiune aceite srølig køn cha
maya nuguen kasraaranrrai.”

¹⁰ Katø Tiusbe Nusrkawan trenchibig køn:

“Ñi Señorbe srøsrøzhiitø pirøwane
ñi mara pasrig køben,
srømbalamerabe kerriguba ñui tasiitøga mara
pønrrailø køn cha.

¹¹ Inchen truiløbe kerriguba chab pinøben,
ñibe wabig wanrrun cha.

Srømbalamerabe kerriguba asru kewagüilø lataitøwei
chab kølliranrrun cha.

¹² Ñibe tru srømbalamerane kan pala itø tsinigwan welan kitishib lataitøwei kirra,
kewagüilan lataitøwei katøle peemay
srøig yunømartrun cha.

Trune ñibe chu uraskucha yunømarmø,
treetø treetø køben,

ñi øsig wamig pilamerabe managuen patsønrraamøn” cha.

¹³ Tiusbe mō ángelwan køben managuen trendaig kaagøn:

“Nai kusrmaygatø wamisr cha,

ñun ashig kòmui inchib tsalø inchibelan
ñi ñui srøbmeran truilaim pala nebuna
wamig kònrri pònsramnegatig.⁷

¹⁴ ¿Ángelesmerabe mayamba espíritumera, Tius karuigwan marøb pònrabelø, kaigyugurri wesraig kòmigwan ketig uta tøgagònrrelaban purugub pònrònrri karua øriilø treelø kòmuitarru?

2

Kaigyugurri wesraig tøga pònrraigwan chinchaindø elatsamig kòmøn

¹ Inchawei treeg købene, nam wamindi mørigwane mas tab møramig palan, nam amønaig mayugurri inchipa pella ambinabgunmab. ² Kaguende Tius ángelesmeragurri wamindikken maig chippe, treeg kònrriin kuig kua, tru maig taigwan mørøg kòmub itøbunabelanba, møra marmeelanba truburø møra melamigwan maig utamigwan utònrri pònsraig købig kòn. ³ ¿Namun kaigyugurri wesraig yeeg nuig tøga pònrraigwan nam chinchaindø elacha, amøñabe, trube, nambe tru møra melamigugurrimbe, mandø incha wegòrrònrab? Kaguende kaigyugurri wesraig kòmig purø nuigwane Señor Jesús nøashib nømerrig eshkaben, trugurrimbe tru nø wamindigwan møøbelø, truigwane 'øyeeg kòn' cha, namun eshkaig købig kòn. ⁴ Katø Tiusbe nø pasrain kui ashchai mariiløtøgaba, kwaara asha kònrri mariiløtøgaba, maramburab mariiløtøgaba, Espiritu Santogurri peg, peg marøbelø kònrri nun maig tranamdiig køben pirisha keta traniitøgaba, tru wamindigwan Tiusbe treeg kuin kui ashchai kenamarøb pasraig kòn.

Jesucristo kòn nam kaigyugurri webamba pònrriamibe

⁵ Nam mõi tru waminchib amruigwan, waramig katøgan tru wendøsrø srøig attrabigwane ángelesmera nøm karub tøgagònrri, Tiusbe treeg marig kòmøn. ⁶ Treeg kòmøtø, kanbaløsrø Tiuswei wamwan pøriguma møikkøsrøn Tiuswan trencha payig kòn:

“¿Misaabe ñuimbe chi kònrrib køh cha,

ñi ya isunrraimbe?

¿Ka møwandø ñi truba isua ashib attraimbe,
nøbe chi køh cha?

⁷ Pøs kan maya yanagatiitø ángelesmera lataitøguen kòmø,

møwane katøguchindø lamíig kònrri mara,

nune maya nugen tabig indiitøgaba,

purø tab indiitøgaba,

treetøga corona petsøsrøb lataig purø nuig kònrri marig kòn cha.

⁸ Incha kerriguba nui srøb umbu pònsraig kòn” cha.

Incha kerriguba nui srøb umbu pònsrøppe, Tiusbe chiwan kørømara kòmøtø, kerriguba nø ashchai pònsraig kòn. Treeg kuingucha, mõi yambatøbe kerrigubabe møg nø ashib tøgagømuin kui aser. ⁹ Inchendø Jesús wane, kan maya yanatø ángelesmera lataguen kòmø, katøguchindø lamíig kònrri marin kui aser, Tius tru ka yandø tab indikkurri mayeelayasig kwamigwan maig kuig mørøb pasramig kònrri. Møimbe tru nø kwaikkurri tørguegwalmabiitøgaba, purø tab indiitøgaba, treetøga kan corona petsøsrøb lataig marig kòn.

¹⁰ Pøs tru chigurrimbunø pònrraigwan marøb, katø truilan nuyasiitøwei pònrònrri marøb inchib Tiusbe nui ureemeran truba nørøwan nui tørguegwalmabiisømay pera ippe, Tiusbe tru Jesucristo nømerrig nømun kaigyugurri pera webibigwan tru chine kaig indinab pureb megaitøga chi palømiig newanig kònrri maramig, Tiusbe søl kui asig kòn. ¹¹ Kaguende Cristo tru Tiusweindø kònrri tarømarøbíg lata, katø Tiusweindø kònrri tarømariilø lata, mayeeløba kan Møskaweyeløtø kòn. Inchawei treekkurri Jesúsbe nømune, “nai nunelø” cha, wamamig chi køríg kuim pasrømøn. ¹² Tiuswei wamwan pøriguma Cristobe Tius Møskawan trenchibíg kòn:

“Ñui munchiwan nabe nai nunelan wamindamònrriin cha.

Incha ñuielø tulundzuna kuinug mayanguen tabig waminchib cantamònrriin” cha.

¹³ Katø Cristobe treekkucha chibíg kòn:

“Nabe ke Tiuswandø isua pasramònrriin” cha.

Incha katø trendaig kòn:

“Tius nan trani ureemeraba nabe yu pasar” cha.

¹⁴ Pøs ureemerama asr tøggar, animbar kuig købene, Jesucristogucha treeg asrtøwei tøgag kørømisrig kòn, nø kwaitøga tru kwamig kònrri nugwaimandzig mu chindamgaig marøb pasrabigwan pinishib, ¹⁵ katø nømui øsig amønaigu chu urastøgucha tru kwamigwan køríg kuindø, køríg kuindø melabelan truyugurri wesrailø kònrri marøb inchab. ¹⁶ Pøs

nøbe purugumma, ángelesmeran purugumøtø, tru Abrahamweinukkurri amrrub misaameran purugun. ¹⁷ Inchawei treekkurri chiyutøgucha nui nunelø Tiuswei misaamera lataitøwein kømig kuig køn, kan maya Sacerdotesmeran Nø karub Sacerdote lastima ashibig kømigwanba, katø Tiuswei merrab maig maramigwan elachimø marøb pasrabig kømigwanba, treeg kønrrab, incha tru maya misagwei kaig mariilan chi ulø payamig kømønrrai kweetsigwan tranrrab. ¹⁸ Pøs chiyugøben kebenøsrkønrrab indinab nøtøweinguen yeeg chine kaig indinab megabikkurri, chiyugøben kegørrønrrai indinab melabelan purugumig nøbe maramburab marøbig køn.

3

Jesucristobe Moisés lataitøguen kømø, mas nuig køn

¹ Inchawei treeg købene, ñim, nai nunelø, Tiusweindø tarømariilø, nø srømbalarøngurri wamigwan ñimgucha lata tøgagønrrai wamiiløbe, Jesúswan, Tius tru Nøashib Karua Ørig, katø tru Maya Sacerdotesmeran Nø Karub Sacerdoten tab isua asay, tru nam nun kørewa pønrrer taigu truyutø pønrraigwan. ² Pøs Jesúsbe nun wesra pasrøbig Tiuswan kerriguba maig taigwan møra marig køn, Tiuswei misag israelitasweimburab Moisés kerriguba chi maramelan elachimø, marøb pasrab lataitøweingue. ³ Inchendø Jesúsbe purabguen tab indig køn, Moisés lataguen kømø, kan ya marøbigwan mas tab indig køn, tru yawan lataguen kømø. ⁴ Pøs chi yatøgucha pasrappe, mugøben marigweim pasrainrrun. Inchendø lutøgurri chiwandøgucha mara pønrsrøbiibe, Tius køn. ⁵ Pøs Moisésbe maramigu marøb megabig køppe, israelitasmera Tiuswei misagweimburab kerriguba chi maramelan elachimø, marøb pasraig købig køn. Incha wendøsrø Tius wamindig kønrrabigwan nøbe kenamarøbig køn. ⁶ Trune Cristobe, nø Nusrkain kua, Tiuswei yau chi maramelan elachimø marøb pasran, kerriguwan nø ashib. Inchen tru yabe namdøwein ker, treetøgucha nam kullaaramø mur pønrramigwanba, nam truba tab kui mørøb isua munig melaignwanba elachimø, nam tøgga pønrrabig pønrrøwabe kønrrun.

Tiuswei ureemerabe israb purramig tøggar køn

⁷ Inchawei Tiuswei wamwan pørigu Espiritu Santobe øyeeg taig køn:

“Ñim møin kwaløm Tius maig taigwan mørabe,

⁸ mørøg kømui inchib ñimui manrrømeran mur marmøtay cha, tru mu misag warab waraimønug Tius maig taigwan ñim mørøg kømub namig inchib kurrab uras,

Tiuswan ke chinchibig køtashchab inchib lataitøwei,

⁹ tru ñimui merrabsrø kølli misaamera nan truyu ke chinchibig køtashchab lataig inchib namisainug,

tru cuarenta años ørøba na yeeg chigøben mariilan ashatøgucha.

¹⁰ Inchawei treekkurri tru uras misaameran nan namig køben, na trendaig købig køn: ‘Nømui manrraube chu uraskucha ka pellatø, pellatø pønrrabelø kua,

nai maymeran ashmeelø kuig køn’ cha.

¹¹ Inchawei nabe nømun namig køben,

¡katø! treeg kønrrun cha, trendaig kuig køn:

‘Isramig na tøgagüinug nømbe managuen kebamraamøn’ ” cha.

¹² ¡Au, nai nunelø, ashiptø kuy! Ñimui utu møikkøben Tiuswan køremø kaig manrrø tøggaig kua, Øsig Wab Tiuswan tarømisrøb megabgunmab. ¹³ Masken treeg kømøtø, kangurri kangurri øyamay meløgun chib kwalømmørig puruguyay, Tiuswei wamwan pørigu tru “Møin Kwaløm køn” taig truig pasrøbenbatø, pøs kaig maramibe ñimun truba tabig asøaben, ñim møitøgucha larrø mørmiig misra pasrømonrrappe. ¹⁴ Kaguende Cristoba namgucha tøgatø melamigwan tøgga pønrrer, treetøgucha tru srøtø ke truyu isua pønrraigwan srbegatig tøgga pønrrøwabe kønrrun.

¹⁵ Inchawei Tiuswei wamwan pøriguma trendan:

“Ñim møin kwaløm Tiuswei wamwan mørabe,

ñimui manrrømeran mur marmøtay cha,

Tius maig taigwan mørøg kømub itøbunab uras lataitøwei.”

¹⁶ ¿Inchen tru Tiuswei wamwan mörøndø, Tius maig taigwan mørøg kømub itøbunabeløbe numera kuig køh? ¿Moisés tru Egipto piraugurri mayeelan pera webarrig, truilø kømuitarru? ¹⁷ ¿Inchen tru cuarenta años ørøba Tiusbe numeranre tab kømui waig køh? ¿Tru kaig marøbelø mu misag warab waraimøsrø kwabelø, truilørrer namisaig kømuitarru?

¹⁸ Incha Tiusbe tru isramig nø tøgga wainug, “¡Katø! kebamraamøn” cha. Trenchippe, pøs ¿mumeran kui trenchinrrab kø? Pøs tru mørmeelan nømunwein kuig køn. ¹⁹ Inchawei nømbe kebamrrab kaimaig kuin kui aser, kaguende kørenrrab inchimeelø kuikkurri.

4

¹ Pøs treeg købene, tru isramig Tius nò tøgagúinug nam kebambamigwan tøgagønrrun cha tranrrrab misra kørørmisrig pasrøbenbatø, trunune purø isuptø tøga amønamiig køn, inchippa ñim mõiikkøben kebammubgunmab. ² Kaguende tru misag warab waraimøsrø mørøg kømui inchibelan lataitøwei namungucha Tiuswei tabig srø wamwan wammørøsrkaig købig køn. Inchendø tru wamwan nøm wamindi mørribe chiweingucha chi purugumiig køn, kaguende tru mørøbeløbe isubigwan Tiusweinug pasra mørmuikkurri. ³ Inchendø tru nam kørebelaimbeguende tru isramig Tius nò tøgagúinug kebambubwei indamønrrun. Incha kua, Tiusbe trendaig køn:

“Nabe namig køben, ¡katø! treeg kønrrun cha,
trendaig kuig køn cha:

‘Isramig na tøgagúinuube nømbe managuen kebamrraamøn’ ” cha,

nui chi marameløbe pirøwan chi købigwanbañau chab mara, tru isramigwane tru urasrøngurri pasrig kuindøgucha. ⁴ Pøs Tiuswei wamwan pørigu kanbaløsrø tru kwalømmera siete nemisrøbigweimburab trendaig køn:

“Nui chi maramelan chab mara, kwalømmera siete nemisren Tiusbe isrig køn” cha.

⁵ Mira chab trendainuuma katø trenchibig køn:

“Isramig na tøgagúinuube nømbe managuen kebamrraamøn” cha.

⁶ Inchen truilø kømøtø, katøganeløbe katøgucha isramig tru nò tøgagúinug kebambamig palab melan. Tru tab wamwan tru srøsrø nømunnerrig wammørøsrkainabeløbe møra marmeelø kuikkurri kebammuiig køn. ⁷ Incha treekkurri Moisés tsub uraskurri yandø yeeg yana purøguchen, Tiusbe katøle katøgan srøig “Møin Kwaløm” cha pasrig køn. Tiusbe Davidgurri øyeg taig køn cha, tru mirawei na chab trendaim pala:

“Møin kwaløm ñim Tiuswei wamwan mørabe,
mørøg kømui inchib ñimui manrrømeran

mur marmøtay” cha.

⁸ Kaguende Josué tru israelitasmeran Canaan pirausrø pera kebya, Tiuswei tru isramigwan tranig købig kuig kuimbe, trube, Tiusbe Josué uñib uras mas wendøsrø tru isramig Tius tøga waig katøgan kwalømigwan waminchimubsruig kuinrrun. ⁹ Inchawei treeg købene, tru kwalømmera siete nemisren, Tius tru isrin kwaløm lataitøwei isramig nui misaameraimbe katøgucha truike ka pasran. ¹⁰ Kaguende isramig Tius nò tøgagúinug møitøgucha kebibiibe nui chi maramelan israb wamisran, Tius nui chi maramelan chab mara israb wamisrøb lataitøwei. ¹¹ Inchawei treeg købene, isramig Tius nò tøgagúinug kebamrrab tranrrørrab inchigun, inchippa mõiikkøben tru mørmeelø marigwan asha, treegwandøwei marøb pønrrøwa, tru isramigu kebambamigwan kaimamønrrai.

¹² Pøs kaguende Tiuswei wambe øsiguig kømba, ka pasrømo, marøb pasrabig kømba, treeg køn. Kan espada pinrrøba katsig lataitøguen kømø, purø trøsrig lataikke, namui møsiba, namui espírituba pønrraisrøngatig kebibig køn; namui asru kønabimørig, tsutsigu tutanumerasrønguen kelarrabue. Incha chitø isua tøgagúilanba, katø manrrau chitø, chitø martrab isua tøgagúilanba tørgandø kelarrab kenamara pønrrøbig køn. ¹³ Chigurrimbunø kerrigu mara pønrrailø pønrrabiibe Tiuswei merrappe chigucha soriibe pønrrømøn. Treeg kømøtø, tru nam chigøben marilan eshkaib pønrramig Tiuswein kabyube chitøgucha kuragutsiilø tørguelarrø kena pønrran.

Jesucristo, tru Maya Sacerdotesmeran Nø Karub Sacerdote

¹⁴ Pøs treeg købene, Jesús Tiuswei Nusrkai, tru Maya Sacerdotesmeran Nø Karub Sacerdote tru srømbalameranguen puraibig namuyasig purøwaminchibigwan nam tøgaguen pønrraig køppe, tru nam nuimburabigwan kørewa pønrrer taigu, truyutø tarømisrtrab kømø, meløgun.

¹⁵ Pøs namui tru Maya Sacerdotesmeran Nø Karub Sacerdotebe nam kullaguelø kuigwan namun lastima ashibig køn. Kaguende namun lataitøwei chiyugøben kebenøsrkønrrab indinab megaig købig kua. Inchendø nøbe managuen kaig marmuig køn. ¹⁶ Inchawei treeg købene, Tius nò ka yandø tab inchib wainug chi kørig isumøtø kemallgun, tru nò namun lastima asigwan nebua tøgagønrrappa, katø nam chigøben ke palaig meløben tru nui ka yandø tab indiitøga purugumdiig kui asiilø kønrrappa.

5

¹ Mø sacerdotetøgucha maya sacerdotesperan nò karub sacerdote yu pirauigwane møguelai utugurri wesrawa pasrig køn, Tiusweimburabeløyu misagweimburø nò marøb pasrønrrai, Tiuswan keta tranøb, katø misaamerai kaig mariilaimburø animal kweecha tranøb, treeg martrai. ² Inchen tru sacerdotebe mayeelø lataitøwei chine nebuinabig kullaguig kuig køppe, chugú mørmeelø pella amøñibelan maig købash kømø, tab inchun. ³ Incha nøgucha treetøwei kullaguig kuikkurri animal kweecha Tiuswan tranamiig købig

køn, misaamerai kaig mariilaimburøtø kømøtø, tru kaig mariilø nuimburabigweiwan chigucha. ⁴ Pøs øyeeq purø nuig tabig indig sacerdote kømigwane mugøben ka yandø nøasiitøbe tøgagønrreamøn, treeg kømøtø, tru Aarón latawei Tius wamitøwei trunune tøgagønrrun. ⁵ Katø treetøwei Cristogucha tru Maya Sacerdotesmeran Nø Karub Sacerdote kønrrab nøasiitø purø nuig misrmøtø, nøbe Tius øyeeq chibigweinukkurringuen utig køn:

“Ñibe nai Nusrkain køben,

møin kwaløm nabe ñui Møskai misrar” chibigwan.

⁶ Katø katøganbaløsrøngucha Tiuswei wamwan pørigu nøbe Criston trendaig køn:

“Ñibeguende managatigwei sacerdote køn cha,

Melquisedec maig køben, treetøweingue.”

⁷ Cristobe yu pirau nø uñiipato Tiusba waminchib kappin kørøgøb, isuig trashib truba miabig køn, Tius tru kwamigugurri wesramø kømø, wesrabigwan. Inchen nune Tiusbe mørig kuig køn, maig taigwan nø kørribala mørøbig kuikkurri. ⁸ Cristo ya Tiuswei Nusrkain købenguen, chine, chine nebuinab purayaigu maig karuigwan møramig købig kuin kui tregagwan kusreig køn. ⁹ Incha kerrigu newanig misrabe, tru mayeelø nun mørøbelaimbe managatigwei kaigyugurri wesraig kømigwane nøgurriin kønrrai, treeg misra pasramisrig køn. ¹⁰ Inchen Tiusbe nune maya sacerdotesmeran nø karub sacerdote kønrrai wesrawa pasrig købig køn, tru Melquisedec maig køben treetøweingue.

Isubigwan Jesucristoinug pasra tøgagúigwan elachib melønrrab kømø, isuptø tøgaguy

¹¹ Pøs øyeeqweimburab wamindamibe truba truba nu tøgaguer. Inchendø ñimun ni kan mandø chaguen øyeeq køn tamgailø køn, pøs ñim chi taig møramigwane purø tsøndailø kuikkurri. ¹² Pøs ñim kusreb melaibe yeeg yanaguen køben, ashene, ñimbe manawei kusrenanøbeløguen kønrrapteelø købendø, katøgucha ñimbe Tiuswei wamwan srøsø mandø pølbasa kusrenanigwan katøle møikkøben trunundøwei srøig kusrenanamig palain køn. Ñimbe palain køppe, tranrø mamiig kømøtø, katøgucha pitsøbe palain køn. ¹³ Inchen møitøgucha pitsøtø muchibiibe katøgucha tru sølgandø tabig maram wamwane ni mandø kuinguen mørtrab kaimabig køn, katøgucha unøzhig lataig srø kua. ¹⁴ Inchen tru tranrø mamibe tru Tiusweimburabigu yandø ne nørørawarwein køn, tru chi maramigwan yandø trendø mara ashibelø tru tabigwanba, kaigwanba maig kuigwan tab chigúi mørøbelai.

6

¹ Inchawei ke ne nørøramnegatig ambugun, tru Cristoimburabig ke srøsø pølbasa kusrenanig købelane nørø wemalsrøppa pønsra. Incha tru pølbasa kusrenanilø: tru kaig marmønrrab isua møramigwanba, kwamigumay srua inrrabig kaig mariilan elachib amrruigwanba, isubigwan Tiusweinug pasra tøgagúigwanba, treeg kusrenanigutø katøle trugwandøwein kusreptø warø mugun, ² katø pitøga chishmarøb kømeeelan kusrenanigwanba, Tiuswei ureemeraim pala tasiimeran estsaramigwanba, kwabelø katøle øsiiramigwanba, kaig marimburø tru managatig maig kønrrabigwan kørøramamigwanba, katøle truilandøweih, truilandøweih waminchib. ³ Pøs Tius treeg kønrrain købene, trube, nørøram maywan amrrab inchab.

⁴ Kaguende yandø tru Tiuswei tørtrawa tørt mariilø, srømbalarøngurri ketigwan tab kui mørøb utarmera, katø Espiritu Santoiwan utarmera, ⁵ katø Tiuswei wamyu tabigwanba, tru wendøsrø attrabigu maramburab marøbelø truilanba nømbe purø tab kui mørøb inchibelø købendø, ⁶ Criston kerriguwan wendøbasa katøle kørøbene, nømune katøyuube nømui kaig mariilan isua møra, Tiusweimay lliiranrai indamibe kaimamdig køn, kaguende nømødøwei Tiuswei Nusrkawan katøle kurusu mesrøb lataig maramba, misaamera nune kan chigucha kømig kui lataig inchib ka indzatø mørtrai maramba inchibelø kua. ⁷ Kaguende sre puimørig tru pirø sre piwan muchibiima tru kwallib melabelai tab kønrrai mamig tusrchig kønrrai tranene, Tiusbe tru pirøzhigwane mayanguen tab inchun. ⁸ Inchen kal tusrmerabah, ka kaig kaubatø misrøb pirø tru ellmarig chi misrmíibe, ke kaig puindø mørtrabig køn. Incha yandø srabebe parrig kønrrun.

⁹ Pøs nambe øyamay wamindøgucha, nai undaarailø, ñimuimburappe mas tabig munig pasrain kui nambe asha pønrrer, tru kaigyugurri wesraig pønrrabigugurri arrubig. ¹⁰ Pøs kaguende Tiusbe kalø marøptiig kømøtø, sølgandø tabig køppe, ñim chigøben marigwan pesannanrrab kømøwei, katø nui munchiwan ñim undatøga kenamarigwan pesannanrrab kømøwein køn, Tiuswei misaameran ñim purugua, katøgucha purugubig purugub kuimba. ¹¹ Ñim møitøgucha maig marøb melaigwan srabegatig treetø treetø kenamarøb melaimbemab isuer, tru ñim Cristoba tørguegwalmabigu purrønrrab isua munig melaigwan ke treeg kømnegatikke. ¹² Pøs nambe ñimun pøilø misrtrain kømøtø, tru nømui isubigwan Jesucristoinug pasra tøgagúitøgaba, tammay melabig melaitøgaba Tius tru tranrrab kørømisrigwan utab pønrrabelø laititøwein kønrrai inder.

Tius tranrrab misrig chi isumgaig

¹³ Kaguende Tius tru Abrahamwan 'øyeeg martrab' cha korrømisrøb urasma, katøgan mas nuigwei merrab 'jkatø! marmø kømø, nabe maramønrrun' cha, trendamdiig mu katøgan kaabene, pøs Tiusbe nõasiitøwei pasramisra, ¹⁴ trendaig købig køn: "Isa kømø, cierton nabe ñun mayanguen tabig kønrrai marøb, katø ñuinukkurri maya nu misag larrøbichib kønrrai maramønrrun" cha. ¹⁵ Inchen Abrahambe tammay muniirabig muniirab megawa, Tius tru tranrrab misrigwan utig købig køn.

¹⁶ Pøs møgueløbe nõm lataguen kømø, mas nuigwei merrab pønrramisrabe, martrai indigwan 'jkatø! marmø kømø, nabe maramønrrun' chib pønrrabelø køn. Inchen tru nuigwei merrab nõm trenchib pønrraigwane nõm trenchib pønrraitøwei treeg marig korrømisrtrai marøbig køn, yandø mas wamindamikkaikke. ¹⁷ Inchawei tru tranrrab korrømisrigwan ketig utønrrabelan Tiusbe nui isuigwane yunømartrab wamig kuin kui ashchai tørgandø kenamartrappe, nõbe, 'jkatø! marmø kømø, nabe maramønrrun' cha korrømisriitøga treeg kønrrai mara pasrig køn. ¹⁸ Inchawei iig tru pabaløwane chinchaguen yunømaramgaig, tru tranrrab korrømisriitøgaba, tru 'jkatø! marmø kømø, nabe maramønrrun' taitøgaba marig kua, Tiusbe chinchia isønrraamøn. Treeg købene, nambe kullaaramø, mas mur pønrrønrrab inchigun, tru Cristoba tørguegwalmabigu purramigwan nam isua munig melamig namui merrab pasrabigwan ke tab tøga pønrramisra, Tius purømisrøb wainug nam kemendønrrab luløbeløbe. ¹⁹ Iig tru tørguegwalmabiisrø purramigwan isub munig melaiibe kan ancla piumbu ellgwawa barcon merrarrab pasrabig lataitøwei namui mõsiizhigwan yandø chi isumikkaig treeg pasrønrrai merrarrabigwan tøgaguer. Tru muniirab melaiibe, tru "Ker-riguba Tiusweindiig Kønrrain" cha pasrinug tru tab llensuzhig kelarrab megai wendausrøngatig kebya pasran, ²⁰ tru yandø managatigweyasig, tru Melquisedec maig køben treetøwei Jesúsbe Maya Sacerdotesmeran Nø Karub Sacerdote misra, tru namuyasig may kura trarrøb nõmerrig kebyaisrø.

7

Melquisedec tru sacerdote

¹ Iig tru Melquisedecbe tru Salem ciudayu rey køb, Tius Mayeelaim Pala Pasrabigwei sacerdote kuig køn. Incha Abraham tru kwayabyu reymeran nõ kanawa arruben, truiibe katønrrab webya, Abrahamwan 'mayanguen tab kønrrun' chibig køn. ² Inchen Abrahamgucha tru kwayabyu kanawa chitø srua arrigwan cienyu diez wesrawa, nun tranøbig køn. Tru Melquisedec munchibe: "Tabig sølgandø marøb rey køn" cha wamig køn. Katø nõbe Salem ciudayu rey kuig kua, tru Salem chippe: "Ambumay imay tab kønrrai marøbig køn" chibig kua, nõbe: "Chi isumgaig tab kønrrai maramigwan tøga rey køn" cha treeg munchigucha wamig købig køn. ³ Melquisedecbe mõskai usringawei, kølli misaamerai munchi pøra wariløyu pørig kawei, nõ kal-laigwan wamindig kawei, katø kwaigwan wamindig kawayig køn. Kan managatigwei sacerdote købig kønrrabig kua, nõbe Tiuswei Nusrkai maig køben, treeg lataitøwein køn.

⁴ Pøs ñimguen isua asay, Melquisedecbe purø nuig køptø, tru namui merrabsrø kølli misag Abrahamguen tru kwayabyu kanawa chitø srua arrigwan cienyu diez wesrawa, nun tranig købig køn. ⁵ Pøs tru maig maramigwan martrai Moisés pøriibe treeg kønrrain købig køn, tru Leviwei misagugurri amrrubelø sacerdotes kømigwan utabelaimbe tru cienyu diez wesraigwan israelitasmeran utamig, tru nõmui nunelandøwei, truiløbe Abrahamwei mis-agurgurrindøwei amrrubelø kuindøgucha. ⁶ Inchendø Melquisedecbe Leviwei misagugurri arrumikken, Abraham Tiusweyasig cienyu diez wesruigwan uta, Abraham Tius tru 'øyeelø maramønrrun' cha korrømisriilan uta tøgawanguen tru Melquisedecbe 'mayanguen tab kønrrun' cha trendaig køn. ⁷ Pøs kan muguen treeg kømøn tamgaig køn, tru 'mayanguen tab kønrrun' cha, trenchibiibe, tru 'mayanguen tab kønrrun' tainabig lata kømø, mas nuig kui. ⁸ Tru Leviweinukkurri amrrub sacerdotesmeraimburappe, tru cienyu diez wesruigwan utabeløbe møguelø ka pinønrrabelø køben, trune tru utabig Melquisedecweimburappe, Tiuswei wamyube ka øsig wabig kui lataig, treeg waminchibig køn. ⁹ Pøs, øyeekken isumdiig kørre, tru Levi tru cienyu diez wesruilan nõ utabig købenguen, tru cienyu diez wesruilan Melquisedecwan Abrahamgurri tru Levi mu kaabenbatøsrøwei traniibe, tru Levi nõguen trani lataig købig kuin kui tru Melquisedecwan. ¹⁰ Pøs kaguende tru Melquisedec Abrahamwan katønrrab webrub urasbe, Levi tru srøig kurrønrrabiibe nui kølli misag Abrahamwei asrugurri attrab srø købig køn.

¹¹ Inchawei misaamera Tiusba newan tabelø kømigwan tru levitas sacerdotesmera Tiusweimburabigu marøb pønrraitøga nebua tøgagømig kønrrai marig kuig kuumbe, trube, chiwei sacerdote katøgan, tru Melquisedec maig køben, treeg tøgagømig srøig palømubsruinrrun, tru Aarøngurri amrrub sacerdotesmerayugurri arruaig kømliig. (Pøs tru

israelitasmerayasis maig maramigwan martrai Moisés pøriibe tru levitasmera Tiusweian wan marøb pønrraigurri arrubig købig kuindøgucha).¹² Kaguende tru sacerdotessera truyugurri amrrubelan yunømarene, trube, tru maig maramigwan martrai karuigwangucha srøig katøgan peemaytø yunømaramig køn.¹³ Pøs tru Tiuswei wamyu Cristo øyeelan wamindinabiibe tru Leviwei misag sötømerayugurrin kømøtø, katøgan misag sötøyuig køben, tru misagugurrimbe muguen trunune tru altaryube marøb pasrømuig køn.¹⁴ Kaguende trendø asig køn, namui Señor Jesucristobe Judáwei misag sötømerayugurrin kal-lawa arrig kui. Tru misaameraimburappe sacerdotessera kønrrun cha Moisésbe treebe chigucha waminchimuig køn.

¹⁵ Inchen iibe mas tørgandø asamdiikken køn, tru sacerdotē katøgan kenamisrøbig, Cristobe, tru Melquisedec lataitøwein kui.¹⁶ Truibe tru nø sacerdotē kømigwan tøgagøppe, tru karua pøra pasrig, 'ø misaamerainukkurri arrubiibe sacerdotē kønrrun' cha, trendaitøga kømøtø, tru maramburab marig øsig kømig mana pinønrrabig kømmitøga kuig køn.¹⁷ Kaguende nuimburappe Tiuswei wamyu øyeegein chibig køn:

“Ñibe managatig sacerdotē køn cha,

Melquisedec maig køben, treetøweingue.”

¹⁸ Pøs tru maig maramigwan martrai pasrig merrabsriibe misaameran tabelø kønrrai chi martrabgawei, chi purugunrrabgaweyig køben, yandø menda mara pasrøppa, kagøbashiitindig køn,¹⁹ kaguende tru maig maramigwan martrai Moisés pøriibe chiwangucha newanig kønrrai marmuig kua. Inchendø mømibe nam isua munig melamig katøgan mas tabig tøgawgan Tius namun tranen, truikkurri nambe nun kemaler.

Jesúsuan Maya Sacerdotemeran Nø Karub Sacerdotē kønrrai wamig

²⁰ Inchen iigwan treg kønrrai marøppe, 'jkatø! marmø kømø, nabe maramønrrun' cha, Tius trendaitøga marig køn. Inchen merrabsrø katøgan sacerdotesserane 'jkatø! marmø kømø, nabe maramønrrun' cha, trendaitøga kømøtø, mariilø købig køn.²¹ Trune Jesúsuanē sacerdotē kønrrai neera wannøppe, 'jkatø! marmø kømø, nabe maramønrrun' taitøga tregg mara wannig køn, tru øyeege chib uras:

“Señor Tiusbe 'jkatø! marmø kømø,

nabe maramønrrun' cha,

Tius nø tregg isuigwane yunømarig kønrraamøn cha:

“Ñibe managatigwei sacerdotē køn' ” chib.

²² Incha øyeege taikkurri, tru srøsrø acuerdo lataig kømøtø, mas purab tabig marigwan tregg kønrrai, Jesús nø purøbasramisrig køn.²³ Pøs tru merrab katøgan sacerdotesserabe nørro nemisrøb ambubig køn, kaguende nømuimbe tru nøm marøb amrruigwan chu uraskatig marøbig marøb purrømøtø kwamig kuikkurri.²⁴ Trune Jesúsbe managatig øsig wabig køppe, tru sacerdotessera marøb amrruigwan nøbe managatig marøbig marøb wamig tøgagøn.²⁵ Inchawei treekkurri katø nøgurri Tiusweimay kemallibelane nøbe managatigwei kaigyugurri wesrabig køn, kaguende nøbe nømuimbura purøwaminchib managatig øsig wabikkurri.

²⁶ Kaguende Maya Sacerdotesseran Nø Karub Sacerdotē nambe øyeegeim palai melaig kuig køn, newan tabig kui asig, chigucha kaig marig chigaig, newan chishchig, kaig marøbelainukkurri tarømarig, purø pala srømbalerasrønguen puraya wanrrai kusruig.²⁷ Tru katøganēlø maya sacerdotesseran nøm karub sacerdotessera pønrrabeløbe møitøgucha nømui kaig mariilaimburabigwanmerrig trana, trugurrimbe tru maya misagweyasig kaig marimburo kwalømmørig animalmera kweecha, Tiuswan tranøb pasramig, nøm lata Cristobe tregg maramig palain kømøn; kaguende nøbe nøasiitøwei tranøppe, kan pijitø managatigweyasig tranig køn.²⁸ Tru maig maramigwan martrai Moisés pøriibe tru maya sacerdotesseran nøm karub sacerdotesseranē møguelø newan tabig kømeelan neera purrøniiilø køben, trune tru Moisés pørigwei wendau arrubig, Tius 'jkatø! marmø kømø, nabe maramønrrun' taig wambe, newan tabig kønrrai kørrømari Nusrkawan managatigweyasig neera wannig køn.

8

Jesús namuyasig tru Maya Sacerdotesseran Nø Karub Sacerdotē

¹ Tru nam møi waminchib amrruppe, øyeege chibrrø amrruer: Maya Sacerdotesseran Nø Karub Sacerdotē nambe tøgauer cha, tru srømbalasarø Tørbilabig Tius Purø Nuig wainug kusrmaygatø wamisrøbigwan,² tru santuario, tru ciertonig mu møg kusrua pasrig carpa ya kømøtø, Tius nø kusrua pasrigu marøb pasrabigwan.

³ Kaguende tru maya sacerdotesseran nø karub sacerdotēbe møitøgucha Tiuswan ketiilø tranøb, animalmera kweecha tranøb indamig købig køben, tru sacerdotē, Cristogucha chigøben tranamig købig køn.⁴ Nø yu pirau unimbe, sacerdoteguen kømubsruinrrun.

Kaguende Tiuswan ketamelan tru maig maramigwan Moisés pørigu maig tailan treeg marøb sacerdotemerabe købguen indan. ⁵ Inchen tru sacerdotemera nøm marøb pønrrainuube tru srømbalasrø maig kuigwan øyeeg lataitøwein kuitamab asamibah, ka øyeeg kuitamab isumibatø køn. Moisés yandø tru Tiuswei carpa ya tabzhigwan pølbarrab inchib megabenma, Tiusbe trendaig køn: ¡Au! Tru tunbalasrø maig martrai eshkaigwan trunin asha maramig køn cha, kerriguba treezhigweingue. ⁶ Inchen Jesúbe sacerdotemera marøb amrruig mas purø tabigwan nebuin køn. Kaguende tru purab nuig tranrrab misriilø purab nørreeløyugurri wesrawa, pønsrai tru srø acuerdoon Jesúbe misaamerai nø pasramisra marøb pasran.

⁷ Pøs tru srøsrø acuerdo Tius marig chi maramigwan newan martraptiig kuig kuimbe, truigwan kørømara, katøgan srøig mara tøgagømig palømubsruinrrun. ⁸ Inchendø Tiusbe nui misagu kalø mariilø køn tamig wetørrawa, trendaig købig køn:

“Señor Tiusbe trendan cha: Kwalømmera attrun cha,

Israelwei misaameraba, Judáwei misaameraba,
na nomba katøgan srøig acuerdo maramig.

⁹ Tru Egipto piraugurri nømun kwalyu kemøra wesrunrrab kwaløm,

tru na nømui møskaløba acuerdo marig lataig kømøtø maramønrrun cha.

Kaguende truiløma na acuerdo marigu pønrrømuikkurri,
nabe nømunne isua ashmuptindig køn” cha,

Señorbe trendaig køn.

¹⁰ “Pøs na Israelwei misaameraba acuerdo maramibe
iig køn cha, tru kwalømmerawangurrimbunøbe,

Señorbe trendan cha.

Na maig martrai karua pønsrailane

nømui isuiløyu na pønsrøb,

na nømui manrrømerayu pørøb inchen,

nagurri nømuimbe Tius køben,

nømgurrimbe naimbe nai misaamera kønrrun cha.

¹¹ Mugucha chi kusrenanamig palømønrrun

nui mendaigwan lata,

nui nunewan lata: ‘Señorwan nebua ash’ chib,

kaguende mutøgucha nane nebua ashchun,

chigucha kømøzhikkurrimbunø mas nuikkatikke.

¹² Kaguende nabe nøm sølgandø tabig marøb amrrumuilan lastima tøgagøb,

katø nømui kaig mariilan katøle isua wanrrab kømøwein kur” cha.

¹³ Inchawei iig tru srø acuerdoon, “srøizhig” cha wamappe, tru srøtø marig købigwane, “køllig køn” cha trendan. Inchen yandø tru køllirab tru patsab arrubiibe yandø ke pinamitø palab arrun.

9

Srømbalasrø santuariobe yu piraug lataig kømøn

¹ Pøs trube, tru srøtø acuerdo mariibe Tiuswan køriibala tabig waminchib mandø maramelan nøørø wesruigwanba, katø tru pirau Tiuswei carpa ya tabzhigwanba waminchibig treeg tøgäig købig køn. ² Tru carpa yabe øyeeg marig købig køn: tru umbu kebibyuø, tru “Tiusweindiig Kønrrain” tain kwartuyube, kandileruba, mishatsiiba, Tiusweyasiitø tarømarim pirrimeraba tøgäig. ³ Inchen tru katøgan tab llensuzhig mesraig wendau trusrømbe, tru “Kerriguwan Tiusweindiig Kønrrain” tain kwartu wamig, truig pasrabig køn. ⁴ Inchen tru umbube incienso parri altar orotøga mariiba, tru acuerdo mara kørømarin caja kerriguba orotøga pinøbulig truiba pønrrabig køn. Inchen tru cajayube tru køtsø orotøga marigu tru mamig maná taigwan pusriiba, Aarønwei pørøtsig tru ishiizhig weguchibig købiiba, katø Tius tru acuerdo marigwan pørig tøgäig tru tambal sruuzheelø køben tøgäig treeg pasrabig køn. ⁵ Inchen tru caja palabø querubinmera Tiuswei tru torguegwalmbig pasrai asamig treeg pønrrabelø køn, tru israelitasmera kaig mariilan Tius nø ulø payiimig kønrrai marinug nømui kwaldzariimeran trubalawan larrøbicha. Kerrigu øyeelane mømbe lutøgurrimbe wamindamgaig køn.

⁶ Mira maig taig tru øyamay tamara pasrabe, sacerdotemerabe Tiusweimburabelan maramigwan martrab katø katø kebambubelø køn, tru “Tiusweindiig Kønrrain” cha marin kwartuyu kebambubyutøbe. ⁷ Trune tru umbusrø tru “Kerriguwan Tiusweindiig Kønrrain” cha marin kwartuyube pilayutø kebyamig køn, tru maya sacerdotemera nø karub sacerdotø nøtø aningaig kømøtø, ani srua, trutøga nuyasiitøwei tranamiba, katø chugúi mørmøwa misaamera kaig mariilaimburø tranamibague. ⁸ Incha Espiritu Santobe namune øyamay

kuitamb isumig t̄or maran, tru santuario sr̄otiig ka pasr̄obenbat̄obe, tru “Kerriguwan Tiusweindiig K̄onrrain” cha pasrinuumay misag umbusr̄o kebambam maybe kuriimig sr̄o k̄on cha. ⁹ Iig ōyeeeg marig pasrabiibe tru m̄oi ōyan kwal̄omwei ōyan k̄onrrabig k̄on cha eshkanrrabig kuig k̄on, Tiuswan tru keta tran̄ob, kat̄o animal kweecha Tiuswan tran̄ob, ōyamay nun k̄oriibala tabig waminchib mar̄obelane n̄omui isub kebachib pasrabigwan newan chish martrab kaimabig kuin kui ashchai. ¹⁰ Tru mamimeran, mutsamelan, pit̄oga peemay peemay chish maramelan tru ōyeel̄o karua p̄onsrail̄obe asru ka palaweindiig k̄obig kua, sr̄oig mand̄o maramigwan mara pasramnegatiit̄o kuig k̄on.

Cristo n̄o kwait̄oga purab nuig marig

¹¹ Inchen tru chin̄et̄o pur̄o tabig p̄onrrabigwei Cristo, tru Maya Sacerdotesmeran N̄o Karub Sacerdote arruppe, tru merrab carpa ya lata k̄om̄o, pur̄o nuig, trurrigu newan tabigu kebyaig k̄on, mu taska marig, yu pirauig k̄om̄igu. ¹² N̄obe tru “Kerriguwan Tiusweindiig K̄onrrain” cha marin kwartuyu kebippe, kan pijit̄o managatigweyasig kebyaig k̄on, m̄og cabramerai aniwan srua k̄om̄owei, toro-ureemerai aniwan srua k̄om̄oweingue. Treeg k̄om̄ot̄o, nui anind̄ogat̄owei kebya, ōyamay nuiel̄o k̄onrrai misagwan managatig kaigyugurri wesrabig k̄on. ¹³ Tru m̄og cabramerai aniwan kui, tru toro-ureemerai aniwan kui, ishug waara-un̄ozhigwan parri usr̄owan kui, tru chish misramigweimburab Moisés maig martrai p̄origwan trumay treeg chish misrmeelaim pala trunun wiitikken, tru n̄omui asru pala chish k̄orr̄omistraina treeg mar̄obig kuibe ¹⁴ treet̄oguen k̄om̄ot̄o j̄tru Esp̄iritu Santo managatig pasrabig, truiukurri Cristo Tiuswei merrab newan chishchig n̄oashib tran̄obigwei animbe namui isub kebachib pasrabigu kaig mariil̄o kwamyumay srua ibig p̄onrrabigwan chish-marm̄onrraitarru, nam ōsig Wab Tiusweyasig mar̄ob p̄onrramig k̄onrrai!

M̄oimbe ōyeeeg martrab cha wamindiig sr̄oig

¹⁵ Inchawei ōyeeekkurri Jesucristobe tru sr̄o acuerdo marigwan misagweimbur̄o tru pur̄obasramisra mar̄obiibe n̄o k̄on, tru keta tranrrab misrig managatigweyigwan tru wamiil̄obe ut̄onrrai, tru merrab sr̄osr̄o acuerdo marigu p̄onrr̄owa, tru n̄o kwaikkurri kaig mariil̄oyu melabelan nuiel̄o k̄onrrai wesranrrab.

¹⁶ P̄os m̄oikk̄oben kan testamento marigweimburabma, truiowan mar̄obig kwan cha kil-gameryau yand̄o treeg eshkaend̄owei truyu p̄oriibe maig taig treeg pub attrun. ¹⁷ Inchawei yand̄o tru testamento mara k̄orr̄omariibe trunun mara k̄orr̄omar̄obig kwabend̄owei tru p̄oriibe maig taig treeg pub attrun, tru kwam̄owat̄o k̄om̄ot̄o. ¹⁸ P̄os tru sr̄osr̄o marig acuerdoguen anind̄oga treeg k̄onrrai mara k̄orr̄omarig k̄on, aningaig marig k̄onrrab k̄om̄ot̄o. ¹⁹ Inchawei Moisésma tru maig maramigwan martrai maig karua p̄onsrailan trum̄orig tru maya misaameran waminchib chab eshkaabwe, toro-ureemerai aniwanba, m̄og cabramerai aniwanba, piba lindisha, trugurrimbe hisopo tusr̄chiiba, piḡo isiizhiibamara, tru lindisait̄oga tru maig martrai p̄orig kilga welan kirrigwanba, kat̄o nui maya misaameranba it̄osur̄ob, ²⁰ trenchibig k̄on: “I anin k̄on cha, tru acuerdo marigwan yand̄o treeg marig k̄orr̄omistr̄ai mar̄obiibe, ñim martrai Tius n̄o karua pasrig.” ²¹ Incha kat̄o treet̄owei tru carpa yawan lata, Tiusweimburab mar̄ob p̄onrraigu n̄om chiḡoben mar̄ob lut̄ogurri srua p̄onrrailan lata, tru anind̄oga it̄o tsur̄obig k̄on. ²² Kaguende tru maig maramigwan martrai Moisés p̄oriibe kerrigu lutauba anind̄oga chish marig k̄onrrain kua, chi ani lusha k̄om̄iibe tru kaig marigwan ul̄o paym̄o, ka k̄orr̄omarig k̄omibe kaaḡon.

Cristo kwawa tran̄iibe kaig marigwan kerrabig k̄on

²³ Inchawei iil̄o, tru sr̄ombalasr̄o p̄onrrabel̄o lataig as̄onabelanma animal kweecha trani anind̄oga chish maramig palaig kuibe, trune tru sr̄ombalasr̄ongue trend̄o truyu p̄onrrabelane tru purab nuig tabig kweecha keta tran̄iil̄ot̄oga chish mariil̄o k̄om̄ig kuig k̄on, tru animal kweecha keta trani latait̄oguen k̄om̄o. ²⁴ Kaguende Cristobe tru santuario cietonig maig k̄oben m̄oguel̄o ka tre lataig as̄onabig mara pasrinuut̄o kebim̄ot̄o, n̄obe sr̄ombalasr̄ongue kebyaig k̄on, m̄oi ya namuyasig Tiuswei merrab pur̄owaminchib wanrrab. ²⁵ Tru maya sacerdotesmeran n̄o karub sacerdot̄e yu pirauibe pilayu kan pijit̄o tru “Kerriguwan Tiusweindiig K̄onrrain” cha marin kwartuyu ani nuin k̄om̄igwan tranrrab srua kebiben, trune Cristobe kat̄o kat̄o n̄oasiit̄o tranrrab k̄om̄ot̄o kebyaig k̄on. ²⁶ Incha Cristo tru sacerdotesmera latait̄owei maramig kui kuimbe, tru pir̄owan mara pasrinukkurrimbun̄o kat̄o kat̄o kwamig nebusruig kuinrrun. Incha m̄oi ya kerriguwan srabe kwal̄om̄merawan n̄obe kan pijit̄o managatigwei kenamisrin k̄on, tru n̄oashib kwait̄oga kaig mariilan pats̄oga pasrtrab. ²⁷ Misaamerane kan pijit̄o kwamig k̄onrrai mara pasrig k̄on. Inchen tru wendaube yand̄o maig k̄onrrabigwan asha k̄orr̄omarig k̄om̄ig, truig attrun. ²⁸ Kat̄o treet̄owei Cristogucha kwappe, n̄o pur̄obasramisra kan pijit̄o kweetsig kwaig k̄on, truba nu misagwei kaig mariilan n̄o kerranrrab. Incha kat̄ole arruppe, chiḡoben kaig mariilan n̄o niirrab

kòmõtø, nõ arrumigwan truba truba munig melabelane kaigyugurri wesranrrab attrab køn.

10

Maig maramigwan martrai Moisés pøriibe newan marmuig

¹ Tru maig maramigwan martrai Moisés pøriibe tru wendøsrø ciertonig attrabigwan øyee kuitamab asamig ka tre lataig asønabiitø kuig køn, ke truiløbe kømuindøgucha. Incha øyee kurri chu urastøgucha katø pilamørig, pilamørig animal kweecha traniilø trutø trutø marøb melaitøgabe newan tabelø kønrraimbe managuen treeg martrab kaimabig køn, tru Tiuswan tabig waminchib øyamay mariiløtøga kemallibelane. ² Inchawei øyee mariitøga tru newan tabelø kønrrai marøbig kui kuimbe, tru kweecha tranamelan øyangatiitø tranøbsruig kuinrrun. Pøs tru øyamay Tiuswan køriibala tabig waminchibelø tru nõmui kaig mariilan kan pijitø kerriguweyasig chish mariilø kui kuimbe, trube, tru kaig marigwan tøga pønrrermab isub pønrramig chigagøbsruig kuinrrun. ³ Inchendø tru animalmera kweecha pilayu pilayu tranøb kuiløbe kaig marigwan katøgucha tøgar kermab isungarubig køn. ⁴ Kaguende torø-ureemerai animba, møg cabramerai animbabe tru kaig mariilan chi kerranrrab kaimabig køn.

Cristo nõ kwaitøga kanmaytø newanig marig

⁵ Inchawei Cristo yu pirau arruabe, Tiuswan trenchibig køn:

“Ñibe ketig traniilan lata, kweecha traniilan lata utag kømui indig køn cha.

Inchendø kan asr tøgagønrrai, ñibe nayasig tamarig køn cha.

⁶ Parra keta traniilanba, kaig mariilaimburø traniilanba chigucha chi tabig asønamuig køn cha.

⁷ Inchen nabe ñun trendaig køn cha:

‘Nabe yu pasrar cha, nai Tius,

ñi maig maramig palai waben, na trunun martrab, tru libroyu naimburab maig pørig pasrøben, treeg.’”

⁸ Tru srøtø yu wendau chibgunrrig: “Ñibe kweecha traniilan lata, ketig traniilan lata, parra keta traniilan lata, kaig mariilaimburø traniilan lata utag kømui inchib, ñune chigucha chi tabig asønamuig køn” cha, (tru øyeelan traniiløbe tru maig maramigwan martrai Moisés pørig maig køben treeg traniilø kuingucha). ⁹ Inchabe katø trendaig køn: “Nabe yu pasrar cha, ñi maig maramig palai waben, na trunun martrab”. Tru animal kweecha tranøb kuig merrabsriigwane Tiusbe tarømara pasrig køn, Cristo kwaitøga tru wendau srøig arrubigwan mara pasrtrab. ¹⁰ Tius tru maig kønrrain køben treegu nambe nuindø kønrrai tarømariilø ker, Jesucristo nui asrwan keta trana, treeg marikkurri, tru kan pijitø managatigweyasig kwaitøga.

¹¹ Chi sacerdotetøgucha kwalømmørig, kwalømmørig Tiusweimburabelan marøb pasrappe, kweecha traniilø katø, katø, treetøweih, treetøwein tranøbig køn, tru kaig mariilan managuen kerranrrabgailan. ¹² Trune Jesucristobe kaig mariilaimburø nõ kwawa, kan pijitø managatigweyasig nui asrwan trana, Tiuswei kusrmaygatømay wamisrig køn. ¹³ Incha trugurrimbunøbe nui ashig kømui inchibelan nui srøbmeran truilaim pala nebuna wamig kønrrai Tius treeg maramnegatig, truigwan muniirab wan. ¹⁴ Kaguende Cristobe kan pijitø keta traniitøgatø managatigwei newan tabelø marig køn tru Tiusweindø kønrrai tarømariilane. ¹⁵ Katø Espiritu Santogucha ‘treeg køn’ cha namun truigweimburab eshkawabe, øyeemerrig chibig køn:

¹⁶ Señorbe trendan cha:

“Tru na nõmba acuerdo maramibe iig køn cha:

Tru kwalømmerrawangurrimbe na maig martrai karua pønrrailane nõmui manrrømerayu pønrrøb,

nõmui isuiløyu trunun na pørøb indamønrrun” cha.

¹⁷ Incha katøgucha trenchibig køn:

“Nõmui kaig mariilanba, larrø trømbøig mariilanba nabe managuen katøle isub wanrrab kømur” cha.

¹⁸ Inchawei iilan yandø chi ulø payamig kømiig kørømarene, tru ka i mariilaimburøbe keta tranamig yandø chi palømøn.

Tiusweimay kemallgun

¹⁹ Inchawei, nai nunelø, santuario marinug srømbalasrø Señor Jesúswei aningurri chigucha chi korig isumø kebambamig tøgaguer, ²⁰ srø may tru managatig øsig køm maywan, tru tab llensuzhig kelarrab mesraiwan nø namuyasig kura trarrøb keyaiwan. Tru tab llensuzhiibe nui asr køn. ²¹ Inchawei kan sacerdote purø nuig Tiuswei misaameran kerriguwan nø ashib pasrabig nam tøgar kuig køppe, ²² nambe namui manrraube chi søra kømø kandø isub Tiuswan kemallug, isubigwan Cristoinug pasrigwan chi kømø tøga, kaig isub kebachib pasrabig tøga manrrømeran chishmartrab anindøga itøtsura, chish pizhiitøga namui asrwan chish marague. ²³ Tru nam munig melaigwan treeg kørewa tøgagúigwane tab tøga pønrrøgun, ambumay imay srua ambinab kømøtø, kaguende tranamigwan Tius tranrrab misra kørømisrøbiibe maig taigwan tranmø kømø, tranøbig køn. ²⁴ Inchawei kanikkurri kanikkurri puruguyamigwan isua asiyagun, undag købigwan tøgagømig kønrrai martrappa, chigøben tabig maramig kønrrai martrappa. ²⁵ Nambe kanbalatø linchib Tiusweiwan marøb tulundzunamigwane elachimugun, tru møiløgøben amrrug kømub elachib kebambubelø latawei. Treeg inchimøtø, kangurri kangurri øyamay meløgun chib puruguyagun tru Cristo Arrum kwaløm yandø pub arri ashabe, masken traatø melab.

²⁶ Pøs Cristoimburab tru newan ciertonig maig kuigwan nam nebua asigwan utappe, utøbendø, kaigwan ke ka marøg køppa marøb uñene, tru kaig mariilaimburø chiwan kweecha Tiuswan keta tranøptamibe yandø chigagøn. ²⁷ Treeg kømøtø, tru korig kømðiig maig kønrrabigwan Tius asha marinab pønrramiba, katø tru Tiuswan ashig kømui inchibeløbe nag purø trømbøig naarabiitøga pinisailø kømiba, treegwandø muniirab pønrran. ²⁸ Tru maig maramigwan martrai Moisés karua pasrigwan mømø, kaashibigwanma pailø kui, pønølo kui 'kalø maran' chibelø weerrubene, chigucha lastima asiimig truike kwamig købig køn. ²⁹ Inchawei Tiuswei Nusrkawan chi kømíig kui lataig itøbunab, katø tru acuerdo marigwan Tiusweindø kønrrai nømun tarømarøb aniwan larrø trømbøig kui lataig mara tøgagøb, tru ka yandø tab inchib Espiritun tsalø wamamba inchibigwane kan treetøguen kømø, purø trømbøig møra meganrrai marøbwei inchimønrraitarru. ³⁰ Kaguende nambe øyeeg chib Tiuswan ashibelø ker: "Kaig marøbigwan møra meganrrai maramigwane na maramig køben, truburø pagarwane na pagaramønrrun" chibigwan. Katø treekkucha taig køn: "Nui misagwan maig maramigwan asha kørømarøppe, Señor nø asha kørømartrun" cha. ³¹ Øsig wab Tiuswei tasku kebenamibe si, ipurø trømbøig korig kømðiig køn!

³² Ñinguen tru merrab kwalømmerasriigwan katøle isumbala, Cristoi tru srø wam tabig ñimun kebiløbengurrimbunø, kwayamigu lataitøwei purø trømbøig nebuinab, isui pønrramig arruben, tru uras ñimbe ka melaig købigwan. ³³ Ñimune kanmaymerawane maya misaamerai merrab indza asamig chine marinab, kaig indinab, katøganelan katø øyeetøwei marøb srua køben, ñimgucha treegütøwei tøga puraambub lincha pønrrabelø køn. ³⁴ Katø kailan keeri yau pønrrabelø lastima isuim pønrrøbene, ñimbe ñimun kui lataitøwei isub, ñimui chi tøgagúilan kerrailø melamig nebuingucha, treegu kasraatø ka melab inchibelø køn, kaguende mas purø tabig mana patsønrrabig kømíigwan tøgar kermab isua ñimbe asha melabelø kuikkurri. ³⁵ Inchawei ñim ke Tiusweinuutø kemenda pønrraigwane elachippa amrrab kømø, kaguende truike purø nuig tabig utamig kønrrabigwan tøgagig køn. ³⁶ Pøs ñimbe chi isumø tammay melabig melay, Tius maig maramig palai waben trunun ñim chab marikkurrimbe, nø tranrrab misra kørømisrigwan utamig kønrrai. ³⁷ Kaguende Tiuswei wamwan pørigube trenchibig køn, pøs kan maya yanazhigutø, "tru attrabiibe attrun cha. Chi srarrønrraamøn cha.

³⁸ Inchendø tru sølgandø tabig naimbe
nui isubigwan nainuutø pasra tøgagúikkurri øsig uñchun cha.

Inchen nø kørriimata wendømay yabe,
trube, nøbe nane tab kui wanrrai martraamøn" cha.

³⁹ Inchendø nambe tru pinisailø kønrrab kørriimata tru wendømay ambupteeløgucha kømøtø, isubigwan Cristoinuutø pasra tøgarmara kaigyurri wesrailø, truilø ker.

11

Merrab misaamera nømui isubigwan Tiusweinuutø pasra tøgagúig

¹ Pøs isubigwan Tiusweinug pasra tøgagúibe tru munig melaigwan ke treeg kønrraitamab isua pønrramig køb, katø nam chi asiimigwan chabguen ke asha lataig pønrraig, treeg køn. ² Pøs isubigwan Tiusweinug pasra tøgagúikkurri namui merrabsrø misaamerabe Tius nømun tabig wamindinabelø køn.

³ Pøs isubigwan Tiusweinug pasra tøgagúikkurri kerrigu chi købigwane Tius nui wamdøga mara pasrig købig kuin kui wetøgørra pønrrer. Inchawei kaptøga asiibe chi asiimígurri mara pasrig køn.

⁴ Isubigwan Tiusweinug pasra tögagúikkurri Abelbe animal kweecha Tiuswan purø tabig tranig kòn, Cain trani lataitøguen kòmø. Abel nui isubigwan Tiusweinug pasra tögagúikkurri nøbe sølgandø marøb møg kòn cha Tius wamandinabig kòn, tru nø keta tranigwan Tius kashmø utab uras. Isubigwan Tiusweinug pasra tögagúikkurri Abelbe kwaig mu kaabendø, katøgucha nøbe wamindan.

⁵ Isubigwan Tiusweinug pasra tögagúikkurri Enocwane yu piraugurri Tius srua iben, nøbe tru kwab tamigwane maig købig kui mormuig kòn. Incha nune wetørranrrab kaimaig købig kòn, kaguende Tius srua yaig kua. Pøs nun srua yaig kòmøwatø, nøbe wamandinabig kòn, Tiuswan tab kui wanrrai marøb møg kòn cha. ⁶ Inchawei isubigwan Tiusweinug pasra tögagømøwabe, Tiuswane ni chinchaguen tab kui møtraï maramgaig kòn. Kaguende Tiusweimay møikkøben kemallibiibe, Tiusbe øsig wabig kuin kui køreb, katø nun labelane nøbe tranamigwan tranøb inchibig kuin kui køreb indamig kòn.

⁷ Isubigwan Tiusweinug pasra tögagúikkurri Noëma chi asiimig attrabigwan isua kønrrai Tius eshkabenma, nun truba køriitøga arcan marøbig kòn, nu yaelø kwamø, øsig webam-rrai. Nøbe tru øyeeq mariitøga pirau maya misagwan kailøgurri Tius mōra pønrrønrrai mariilø købash cha kørromara, chi kaig kømlig lataig Tius tabig kørromarig kømigwan nøbe utig kòn, tru isubigwan nuinug pasra tögagúigugurri arrubigwan.

⁸ Abrahamma isubigwan Tiusweinug pasra tögagúikkurri tru ketigwan wendø utam-srømay webya inrrai wamøben, nøbe mōra, webya yaig købig kòn, chumay yam kuinguen mørmubendø. ⁹ Nøbe isubigwan Tiusweinug pasra tögagúikkurri nuin kønrrai tru tranrrab misrim pirau Abrahambe ka peesrøngurri arruatø lataig, kan peg pirau lataitø tšuiq købig kòn, nun keta tranigwandøwei utabelø tru Isaacba, Jacobpa, truilø lataitøwei kan carpa yamerayu. ¹⁰ Kaguende Abrahambe tru ciuda katsigwan niga pasrønrrabig tögag tru srømbalasriigwan muniirabig købig kua. Inchen tru ciuda maig kønrrabigwan treegwei unaasha wesrab, truigwan marøb inchibiibe, Tius nø kòn.

¹¹ Abrahambe nøbe yandø maya køllig kuatøgucha isubigwan Tiusweinug pasra tögagúikkurri unøtiig latawei chish kømigwan utig købig kòn unø moskain kønrrab, (Sarabe ureg tögagønrrab kaimabig kuindøgucha), kaguende tru tranrrab misrøbig Tiusbe tru tranrrab misrigwane tranmø kømø, tranrrab kui, Abrahambe treeg isua tōga pas-raig kua. ¹² Inchawei tru unø tögagømigweimburappe yandø kwaig lataig kuig, tru kan mōweinukurrindø ureemera srøg larrøbichib mendappe, nu køptø srømbalasrø estrellamera lataig, pi menda pisrum lataig købig kòn, mu nebua mundzamgaig.

¹³ Inchen i misaamerabe mayeeløba isubigwan Tiusweinug pasra tögagúigutø amønaiq kòn nømui kwam kwalømgatig. Tius tru nømum tranrrab misra kørromisriilane utømuindøgucha, Tius tranrrab misrig nuisrø pønrrabelan yabsrøngurrindø ke kan asha lataig kasraarabelø kòn, 'nambe srømbalasreelø, peesreelø kua, yu pirauke ka petøweindø warer' chib, törgandø trenchib waminchib. ¹⁴ Inchen øyamay waminchibeløbe tru katøgan pirø nømuiin kønrrabigwan lab ambubelø kui, nømbe törgandø asamig kenamaran. ¹⁵ Pøs tru nøm werrua amrruin pirøwan isub pønrraig kui kumble, katøle trusrømaytøwei llirawa ambimbe, ka ambandiig købsruinrun. ¹⁶ Inchendø nømbe treeg marmøtø, waramig katøgan pirø mas purø tabigwan tögagønrrab isub pønrraig kòn, truiibe tru srømbalasriigwan. Treekkurri Tiusbe chi korig kuin kømøn 'nømui Tius kòn' taig kømig, pøs nøbe nømuyasig kan ciuda tamarig kua.

¹⁷ Abrahambe isubigwan Tiusweinug pasra tögagúikkurri Tius Abrahamwan maig inchibig køtashchab marenma, nøbe Isaacwan tranig kòn. Tius tru 'tranrrumøn' cha kørromisriilan utabig, tru Abrahambe, nui kandø nusrkai Isaacwan Tiuswan yandø ke kweecha tranamitø palabig kòn ¹⁸ Abrahamwane: "Tru ñuinukkurri amrrub misaamerane Isaacurrin kønrrabelø kòn" cha, Tiusbe øyeeq taig købig kuindøgucha. ¹⁹ Kaguende Abrahambe isua pasrabig kòn, Tiusbe kwailai utugurringuen katøle kusrumig maramburab marøbig kui. Pøs kwailai utugurri katøle øsiiraig lataig kui mara Isaacwane treeg utig kòn.

²⁰ Isaacbe isubigwan Tiusweinug pasra tögagúikkurri Jacobwanba, Esaúwanba nømune mayanguen tabig pub attraï marig kòn tru wendøsrø attrabigwan.

²¹ Jacobma isubigwan Tiusweinug pasra tögagúikkurri yandø kwanrrab wawa, Joséwei uregwan kanun kanun mayanguen tabig nebunrrai mara, nui pøtønain tšigwan pøtønawa pasramisra, Tiuswan køriibala tabig waminchibig kòn.

²² Joséma isubigwan Tiusweinug pasra tögagúikkurri yandø kwamig lutaurab arruben, israelitasmera mayeeløba Egiptogurri wendøsrø webambamigwan wamincha, nui tsutsi-imeran mandø indamigwan eshkaq karua pasrig kòn.

²³ Isubigwan Tiusweinug pasra tögagúikkurri Moiséswei mōskaløma Moiséswane larrø tab unøzhig kui asha, pøn pøl ørøba nun sōra tögagúig kòn, tru Faraón Egipto pirau rey tru kwetchai karua pasrigwan chi køriimatømøtø.

²⁴ Moisésma isubigwan Tiusweinug pasra tógagúikkurri yandø kólig misrabe, tru Faraónwei nimbarwei nusrkain kón cha wamig kómigwan kaasig kón. ²⁵ Moisésbe Tiuswei misaameraba larrø kaig indinab megamigwan isuig kón, tru kaig mariiløyu tab kui mørøb kan maya yanagatiitø kasraarabgunrriibe. ²⁶ Wendøsrø attrabig Cristoyasig chine trømbøig waminab megaibe, egipciosmera chigurribunø tógagúilan kerriгу tógagúí latakken kømø, purø nuig kui isua pasrabig kón, kaguende nõbe tru wendøsrø truburø ketig utamigwan, trunun ashib pasrabig kua.

²⁷ Isubigwan Tiusweinug pasra tógagúikkurri Moisésbe Egipto piraugurri webyaig kón, rey maya namikkølig waingucha. Inchen trunun kormøtø, nõbe webya inrrab kandø isua pasraig kón, kaguende tru kaptøgabe nebua asiimø Tiuswan yandø ke asha latakken pasraig køppe. ²⁸ Isubigwan Tiusweinug pasra tógagúikkurri tru Pascua Fiesta taigwan mara, katø tru yaskappalamerawan aniwan srølig kón, tru kwangarub ángel israelitasmerai mayor nusrkalane kweechimønrrai.

²⁹ Isubigwan Tiusweinug pasra tógagúikkurri israelitasmerabe Mar Rojoyu kan trendø puryu latak larraambig kón. Inchen egipciosmeragucha larramrrab inchen, pi katøle itøgasrøben, chab kwaig kón.

³⁰ Israelitasmera isubigwan Tiusweinug pasra tógagúikkurri tru Jericó ciuda pøtøgatan sruubirøbanrimerabe chab kegørrig kón, nõm tru pøtøgatanwan kwalømmera siete nemisramne lirabren. ³¹ Isubigwan Tiusweinug pasra tógagúikkurri tru Rahab, kui asrwan anwei yanøb ishuuma, tru mørømø misaameraba kanbalatø nõgucha kwamuig kón, kaguende tru pailø israelitasmera maisrøn køtashchab nilø ashchab amrrubelan tab wamab utikkurri.

³² ¿Masbe chiwan waminchab køh? Pøs nane Gedeønweimburab køben, Baracweimburab køben, Sansønweimburab køben, Jeptøweimburab køben, Davidweimburab køben, Samuelweimburab køben, katø Tius maig karuigwan eshkabelaimburab køben wamindamikken nebumøtan. ³³ Isubigwan Tiusweinug pasra tógagúikkurri katøganelø nõm ashib karub tógagúigwan nõm kanab, tabig sølgandø maig maramigwan marøb, Tius tranrrab misra kørømmisriilan nebua utab, leønmerai triimeran kasrøb indig kón. ³⁴ Nag kørig kømðieg naarabelan naaramønrrai kweechib, espadatøga kweetsiilø kómigugurri wegørra ambub, truburab chi martrab kaimabelø købig kuig chisheelø misrøb, katø kwayabyugucha kwayamburab kwayabelø misra, peg pirausrøngurri amrrub suldaumerane luløsrkøb inchibølø kón. ³⁵ Isubigwan Tiusweinug pasra tógagúikkurri ishumburmera nõmui kwa-belan katøle øsiiraniilø utabelø kuig kón. Inchen mõiløbe kwamnegatig purø trømbøig marøb srua kuinabelø kón, elatchab indingucha, elatchamamøtø, kaguende nõmbe katøle øsiirawa srømbalasø purø tabigwan nebunrrab isubelø kua. ³⁶ Inchen katøganeløbe kaig marøb indza ashib srua kuinab, ichabetinab, cadenastøga lusrinab, kailan keeri yau merrarawa keerinab melabelø kón. ³⁷ Inchen kaneløbe sruutøga peta kweetsinab, serruchotøga sølbinab para kweetsinab, espadatøga kweetsinab, amburab iburab ubisha kaluschibah cabra kaluschibatø kewar amøñibelø kón, larrø waachamera kømig nebuilø, isubiitø kappinbalatø amønamiq nebuilø, katø larrø kaig indinab melamig nebuilø. ³⁸ Øyeeg tab misaameran yu pirau misaamera nõmun tógagømibe nõmbe purø nu palabelø købig kón. Nõmbe mu misag warab waraimøsrø, nõrrø tunmerawansrø chu pumgúinguen mørmeelø amøñibelø kón, nõrrø srug yaambumerasrø, lendegørrab pirørrabmerasrø, øyeesrø kebamba warab.

³⁹ Inchen nõmbe isubigwan Tiusweinuutø pasra tógagúigube tabig wamindiilø købendø, tru Tius tranrrab misra kørømmisriilane mõikkucha tranig utømuig kón. ⁴⁰ Kaguende Tiusbe nõmui lata kømø, namuyasiibe purø tabig tógagúig kua, tru nõmbe namba kanbalatø misratøwei tru newan tabig kønrrai indig kuig kón.

12

Maramga murelø amrruben, chi isumø, namgucha mur pønrramig

¹ Inchawei øyeeg købene, tru isubigwan Tiusweinug pasra tógargøbelø nõrrø køptø kan wafi latak namuim pøtøgatan namun ashib purrabelan namgucha tógagúig køppe, namun chiguen tab ambamgaig chigøben kwatsiiranøbelanba, tru kaig marøbig namun iløsrkøptø iløsrkønrrai marøb pasrabigwanba webetøgun. Incha tru nam luløb ambamig Tius namui merrab may trarrig tsubig nam tøga pønrraiwan maikkucha kørømmisrømø, luløbig luglun, ² namui kaptøgabe Jesúswan ashib, tru nõmerrig treegwan pera marøb, katø tru namui isubigwan nuinug pasra tógagúigwan newanig kønrrai marøb inchibigwan. Pøs Jesúsbe nõ pumsrø kasrag kømðieg pasrabigwan asha pasraikkurri kurusyu mesraig kweetsig kwamigwan awentawa, tru kørig marinab pasramigwan chi trunun isua ashmøtø, truyu puraya, Tius wamisra wainug kusrmaygatømay wamisrig kón.

³ Incha tru kaig marøb misaamera Jesúswan chine kaig maren, treegu ka awentab purayaigwan, trunun ñimnguen isuy, ñim chi muraaramøwei, chi kaima kørromismøwei indamig kørnrai. ⁴ Pøs tru kaig mariiba ñim kwayab melaigu, ñimbe katøgucha ñimui aniwan lusamnegatiibe mara pønrrømøn. ⁵ ¿Tius nui ureg kuimba tab wamdøga waminchib purugúigwan ñimbe yandø pesannabguen inda chindah?

“Nai nusrkai, ñi mur pasram kusenrrai Señor ñun murelan kusrennene,
kagatørre inditamab treeg isua tøgagømøwei,
Señor ñun isua mørtraí marene,
truyutø kørromismøwei indamig kòn.

⁶ Kaguende tru nui undaaraigwane

Señorbe nune mur pasram kusenrrai kusrennøb,
mundøgucha nui nusrkain kuitamab isua tøgagúigwane
nøbe kalø marigwan ølmartrab murba tranøbig kòn” cha, trenchibig kòn.

⁷ Maramga murig latailø Señor ñun maringaruigwane mur pasram kusenrrai kusrenrrab inditamab isua awentau. Kaguende Tiusbe ñimune nui nusrkain kuimba øyee maran. ¿Kan nusrkawan møskai mur pasram kusenrrai kusrenniimíg mu treeg nusrkai kø chinderah? ⁸ Inchen tru kanelø mayeelø mur pønrram kusenrrai kusrenniilø latawei ñimun kusrenniimeelø kuisruandøbe, trube, Tiuswei trag nusrkalø kømøtø, ka menda uremera kuin kørnrun. ⁹ Inchagucha namma yu pirau namui møskalø namun mur pasram kusenrrai kusrennøbelø nambe tøgara kua, truilanma maig købash inchimøtø, tab inchib tøgagøbelø kuibe, ¿tru namui espiritumerai Møskai Tiuswane treetøguen kømø, masken maig taigwan tru kuindø mørøb meløwa, øsig kømigwan tøgagømig kømønrraitarru? ¹⁰ Namui møskaløma nam mur pønrram kusenrrai nømbe kan maya yanagatiitø namun kusrenanøb tøgagøbelø købig kòn, nømun maig maramdiig køben, treeg. Trune Tiusbe nam mur pønrram kusenrrai kusrennøppe namunguen tab kørnrai maran, nø newan tabig kuigwan namgucha tøgagørrai. ¹¹ Tru mur pønrram kusenrrai murigwan kusrenanene, ke kan tru urastøbe chiguen chi kasrag kømdiig kømøtø, mur kui mørøb pasramibe købig kòn. Inchendø tru øyawan kusrenaninab puraambubelaimbe tsøndatøbe sølgandø tabig amønamiba, chi isumgaig tab amønamiba tøgag arrubig kòn.

Tius wamindigwan kaasamibe kørig kømdiig kòn

¹² Inchawei ñimui kwalmera kullaarailan chishmistrái kønøgøb, ñimui tømmera itønapteelan katøle mur misrtrai maray. ¹³ Katø ñim tab punab ambamig kørnrai putur maymeran ølmaray, tru ñimui kørriindi srøb wetunshimø, tammistrái. ¹⁴ Ñimbe maya misaameraba ambugurri igurri lata tab kømigwanba, katø Tiusweyasiitø tarømisra tabig amønamiigwanba martrab inchib kuy. Kaguende Tiusweyasiitø tarømisra tabig amønamiigwabe, muguen Señorwane ashchaamøn. ¹⁵ Ñimbe purø tab isua ashib amønay Tiuswei tru ka yandø tab indigwan ñim møikkøben wendøbasrøb pønrrabgunmab, inchippa ñim møigwan køben kan møb srølgølig lataig kal-lawa nurab ya, truig pesriig iløsrkønrrai maren, misag purø nuwan tru kaitøga mindisailø kømønrrai. ¹⁶ Mugucha møg lata ishug lata trømbøig marøb uñchab kømøwei, kabe Tiusweimburabigwane chigucha kømui lataig inchibig kømøwein kuy, tru Esaú latawei. Truima kan mamig nindagweindø kan mayor nusrkai maig tøgagømigwan yanig kòn. ¹⁷ Kaguende ñimbe yandø asiinrrun, Esaúbe mas wendøbe tru mayanguen tab indig kørnrai keta tranigwan katøle møskawan utønrrab inchen, nune yandø ka taig købigwan. Tru mayanguen tab indig kørnrai tranigwan tøgagørrab kappin kørøgøb lawa, yandø treeg kørnrai chab marigwane ñi chinchaguen lliskamgaig kuig kòn.

¹⁸ Pøs ñimbe, israelitamera Sinaí Tunyu kemalla pønrrab latawei, kan nu tun kætøramdiigu nagurømera naarabig tøgagø kemalla kømøwei, kabe løstiig, tru purø trømbø løstiigu kemalla kømøwei, kabe kørig kømdiig isig ichibigu kemalla kømøwein kòn. ¹⁹ Katø ñimbe tru trompeta mur wanrrøbigø kemalla kømøwei, kan wam wamindiilan mørtrab kemallmøwei indig kòn. Inchen tru wam wamindiilan mørøbeløma: “Tiusmanda yandø wamincha” chibelø kòn, ²⁰ kaguende yandø mas awentawa pønrramgaig køben, Tius tru øyee karua pasren: “Kan animaldøguen tru tunwan kebachiibe sruutøga peta kweetsig kørnraig kòn cha” trenchiben. ²¹ Inchen tru treeg pureb pasrabiibe purø trømbøig kørig kømdiig køben, Moisésbe trenchibig kòn: “Kwaarøsrøig kørig købiitø ke itønab pasrar” cha.

²² Ñimbe treegu kemalla pønrrømøtø, mømbe ñimuimburappe tru Sion Tun tainug, Øsig wab Tiuswei ciudadsrø, srømbala Jerusalénsrø, muguen mundzamgaig ångelesmera tulundzuna kasrag purraisrø, treegu kemalla pønrran. ²³ Katø Tiuswei tru srøsrø kal-lawa uremera nømui munchimeran srømbalærø pørig tøgarmera kanbalatø purraisrø, katø Tius tru maya misagwan maig maramigwan asha marøbig waisrø ñimbe kemalla pønrrab, katø mayeelø sølgandø tabig misaamerai espiritumera yandø newan tabelø kørnrai kørromariilø purraisrø

kemalla pønrran. ²⁴ Katø tru srø acuerdo marigwan misagweimburo purøbasramisrøbig Jesúswangucha kemalla pønrrab, katø tru Abelwei ani 'tru kaig marøbigwan ñi, Tius, ulø pay' chib, ani lataikken kømøtø, Jesúswai tru ani itøtsurig mas purø tabig 'tru kaig marøbigwan ulø paymø, ñi, Tius, pesannau' chib waminchib aniyu kemalla pønrran ñimbe.

²⁵ Inchawei tru waminchibigwan kaashib kønrrab kømø ashiptø kuy. Kaguende Tius Moiséskurri isuptø kønrrai wamindigwan kaashibeløma yu pirauguen chi indimig ka yandø wegørrømuibe, trube, tru srømbalaserurri isuptø kønrrai waminchibigwan tarømisrabe, nambe truyugurrimbe ni chinchaugen wegørramgaig kønrrun. ²⁶ Tru Moisés tsub urassrøma Tiuswei wamdøgabe pirøwane kønøgagutsig kuibe, mømibe øyamay maramønrrun cha kørørrømisrig køn: "Nabe katøle pirøwane kønøgagutsamønrrun cha, trurriugu pirøwandø kømøtø, srømbalameranbañau." ²⁷ Tru, "katøle kønøgagutsamønrrun" cha, tru trendaibe, tru ka mara pønrsraindeleø kønøgagutsilane kerranrrab kui tøgandø eshkan, tru kønøgagutsamgailø, truiløtø pønrrabig pønrrønrrai. ²⁸ Inchawei tru nam ashib tøga purramig tru kønøgagutsamgaigwan nambe utab kuig købene, nambe 'mayanguen ungwa, ungwa' chigun, Tiuswan tab kui wanrrai marøppe, nun kørriibala tabig waminchib, kan yeeg tabig kønrrabmab isub. ²⁹ Kaguende namui Tiusbe kan nag lataig køn, chigucha kørørrømisraingaug parrøbig.

13

Cristoieløbe mandø amønami

¹ Ambugurri igurri undaarbig undaaray, kan trag nunelø lataitøwei. ² Ñimui yau asiimeelø pubelan tab wamab ya pebamigwane pesannamøtay. Kaguende møiløma øyamay marøb meløwa, angelesmeraugen ya pebøbelø køn, chi truilø kuitamab isumøtø.

³ Katø kailan keeri yau purrabelane ñimbe nømbe kanbalatø keerig purrøwa lataitøwei isub, katø kaig indinab melabelane ñimun treeg indi lataig isumig køn.

⁴ Kasharamibe purø tabig købig kui mayeeløba treeg isua tøgagøb, katø kasharawarmerabe nømui kiainuube mu pegwan pera kiamig kømøtø køn. Kaguende møg lata, ishug lata trømbøig marøbelanba, katø itøluløpteelanba, Tiusbe nømun maig kønrrabigwan asha martrab køn.

⁵ Ñim amønñippe, anwane ke chinchimmøro chull inchib amønñimøtø, ñim møi maig tøgaguitøgatø tab kui mørøb kasraatø amønami køn. Kaguende Tiusbe trendaig kuig køn:

"Manaugen ñundø elachimøwei,

chinchibgucha tsunrrai manaugen ñun tarømisrmøwei indamønrrun" cha.

⁶ Inchawei øyeeg taig købene, nambe treeg kønrraitamab isua, chi isumø trenchinrrun:

"Nan purugubiibe Señor nø køben,

nabe chigucha kørmmønrrun cha.

¿Møbbe nane chigui martrautah?" cha.

⁷ Tiuswei wamwan ñimun waminchib, ñimun pera marøb pønrrabelane isua kømig køn. Nømui tru tabig amønnaigu asha kusrenrrai mandø tabig kørørrømarig købigwan tab isua asha, tru nøm isubigwan Jesucristoinug pasra mandø tøgaguitøwane treetøweih tøgaguy.

⁸ Jesucristobe merrabsrø lata, møyian kwaløm lata, katø managatig nøbe yunømarmig, treetø køn. ⁹ Chigøben peemaytø kusrenaniilø pesrøteeløtøga amburab iburab srua ambiilø kønrrab kømøtø kuy. Pøs namui manrømera Tiuswei tru ka yandø tab indiitøga mur pønrramigwan utiibe tabig køn, tru chi mamimeran manrrai karua pønrsrailan marøb megaig lata kømøtø, tru øyeelan mariibe chiweingucha chi purugumeelan.

¹⁰ Nambe kan altar tøgaguer tru Tiuswei carpa ya tabzhigu marøb pønrrab sacerdotesserabe tru altaryuigwane mamig kømig. ¹¹ Pøs tru maya sacerdotesseran nø karub sacerdote tru, "Kerriguwan Tiusweindiig Kønrrain" tannug tru animal kweetsiilai aniwane tru kaig mariilaimburø tranrrab umbusrø srua kebyaindøgucha, tru animal kwaigwei asrmerane nøm warainukkurri nøørsrø srua webamba, parrilø købig køn. ¹² Inchawei treetøwei Jesúskucha ciuda yaskabyugurri wambig nøørsrø kwaig købig køn, nui anindøga Tiusweindø kønrrai misaameran chish martrab. ¹³ Inchawei namgucha nuimay nun katønrrab webamgun ciudayugurri wambig nøørsrø, nun maig trømbøig indinab megaigwan namgucha treetøwei kaig marinab melønrrab. ¹⁴ Kaguende nambe yu piraube kan ciuda managatig pasrab pasrønrrabig chigar kua, nambe tru attrabrigwan lab ker. ¹⁵ Inchawei Señor Jesucristogurri chu urastøgucha Tiuswan nam animal kweecha lataig tranøppe, purø tabzhig wamindiilø trangun, nui munchiwan tabig wamindi wam tru trigugurri webarruiitøga. ¹⁶ Ñimbe tabig maramigwanba, ñim chi tøgaguitøgan pirishib kømigwanbabe pesannanrrab kømø melay. Kaguende kweecha tranøb lataitøwei Tiuswan keta tranilø øyeeg traniiiløbe nø purø tab kui wanrrai marøbig, treeg køn.

¹⁷ Ñimun pera marøb pønrrabelane maig karuigwan mørøb, nøm maig chiben treegwan melay. Kaguende ñimun chi kømønrrai chu uraskucha ashibeløbe nømwein køn, nømui chi mariilan nøm Tiuswan eshkaab pønrrønrrabelø kua. Nøm maramigwan marøb melappe, kasraatø, chi isuin kømøtø, marøb kønrrai inchigay. Kaguen trengømuisruandøbe, ñimune chiguen chi tabig kønrraamøn.

¹⁸ Namuimburaab ñim Tiuswan miarrunrrigay. Pøs nambe namui isub kebachib pasrabigu chi 'kalø køn' chibig chigar pønrrab, katø chiyutøgucha nambe tabig marøb melønrrab isua meler. ¹⁹ Nabe ke tiusmanda Tiuswan miab kørnunrrigay chinrrab inchar, na peba ñimuisrømay katøle arrumig kønrrai.

Patsøgønrrab srabe wamindiilø

²⁰ Tru chi isungaig tab købigwan tøga Tius, tru managatigwei acuerdo mari anindøga tru Ubishameran Ashibig purø nuig, namui Señor Jesúsuan kwailai utugurri kusrubiiibe ²¹ tru nø maig maramig palai waigwan martrai chigurrimbunø tabig palabigwan ñimun tranrrun, Tius nø purø tab kui ashib wamig kønrrai Jesucristogurri namuinug nø marøb pasraitøga. Jesucristone managatig tøgüegwalmabig kønrrun. Treeg kønrrun.

²² Na øyamay melamig køn chib wamindi wamwane, nai nunelan, tiusmanda tammau utørrunrrigay chinrrab, pøs nabe landøtiig pørar. ²³ Namui nuneg Timoteobe kailan keeri yaugurri webyain kui ñim wammøra kønrrai inchar. Incha nø petø arrubene, nabe nøba ñimun ashchab arrumønrrun.

²⁴ Ñimun ashib pera pønrrabelø mayeelanba, katø mayeelø Tiuswei misaameranba 'tab ka amøñigüeh' tan chirrunrrigay. Katø italiasreeløgucha ñimune 'tab ka amøñigüeh' cha øran.

²⁵ Tiuswei tru ka yandø tab indiibe ñim mayeeløba pasrønrrun.

Santiago

Israelwei misag truøø amba warabelan Santiago pørøb

¹ Na Santiago Tiusweimba, Señor Jesucristoimba marøb megabig Israelwei doce nus-
kalo gurri misag norrø larrøbicha, pirau kan ørøtø amba warabelan 'ka amøñiguh' chinrrab
inchar.

Tiuskurri kusrebig kømig

² Nai nunelø, chigøben, chigøben puig meløwabe, truba tab kui inchib, kasraaray,
³ kaguende ñimui isubigwan Jesucristoinuutø pasra tøgagúigwan maig køtashchab
marigugurrimbe masken tammay melamig arrubig kui ñim ashibeløbe. ⁴ Inchendø
ñim tru treeg tammay kullaaramø, ka melaiibe, newanig kønrrai inday, chiyugucha neilo,
chi isumgaig newan pønrrabelø, yandø chiyugucha palømø newanelø.

⁵ Ñimun møigwan køben øyeeløyu tab asha maramigwan kusrebig kømig paløbene, Tiuswan
miau, nøbe tranrrun. Kaguende nøbe mayeelan tranøppe, merøbalatø tranmøwei, katø chi
miabene, namømtø, tammay tranøbig køn. ⁶ Inchendø miappe, ke Tiusbe tranrraitamab
isua miamig køn, treeg kømuptinçhaitamab maizhikken chi treeg isumøtøgue. Kaguende chi
treeg kømønrrab kø chindermab isubiibe kan maryu pi welarwan isig ichibig amburab,
iburab srua yaig lataig køn. ⁷ Møikkøben treebe Señorwan chigøben utamuitamappe isumøta.
⁸ Kan møg møindø øyeeg martrab isub, katøguen srønabe peetø isubiibe, chiyutøgucha
mumayguen kømig unan.

⁹ Kan truburab chiga nuneezhigwan Tius nune truba nuig marene, purø tab kui møramig
køn. ¹⁰ Inchen puaiibe purø tab kui møramig køn, Tius nune chigucha kømig lataig marene.
Kaguende puaiibe kaumerayu u lataig kua, pasrabig pasrønrrab kaiman. ¹¹ Pøs pør
webarrua, purø mur pachene, kaube mul-laben, ube peñen, tru tabzhiibe yandø pinan.
Øyeetøwei puaiikkucha nui chigøben penab, yanøb uniløyu pinønrrun.

Chinetø kaig pub arringucha treegu ka megab

¹² Chigøben pub arruben, tammay megabig megabiibe mayanguen tab kuig køn.
Kaguende treegu puraya pasramisrøppe, nun undaguelan Tius keta tranrrab kørrømisrig
tru øsig køm coronan utønrrun. ¹³ Møigwan køben chiyugøben kaigyu kebenamdiig
mørørabene, Tius treeg isunandan chimøta. Kaguende Tiusbe mana kaigu kebenamdiig
kuig mørørai wamøwei, ni katø mun kaigu kebenørkønrrab inchimøwei inchibig køn.
¹⁴ Treeg kømøtø, møigwandøgucha nui kaig isubeløtøwei srua iben, truiløtø yandø tabig
lataig asønangarua kebenørkaim pasran. ¹⁵ Inchen tru trømbøig isuilø yandø umbu ke-
bya, pasramisrikkurrimbe, kaig maramig kal-lan. Inchen tru kaibe yandø ne nurappe,
kwamigwan kal-lanrrai mara pasran.

¹⁶ Nai undaaraig nunelø, ñimguen pella peemaytø isub pønrrømtøay, ¹⁷ chitøgucha tabig
ketiiba, katø chigøben tabig newan marøbelø kønrrai ketiibabe srømbalarøngurri arrubig
køn, tru srømbalarø chine pilab pønrrabigwan marøbig Tiusweinukkurri. Nøbe nø maig
køppe, manatøgucha treetø kua, nuinuube løstørab lata inchib, tørmisrøb lata inchib, inchibi-
ibe chigagøn. ¹⁸ Nun trendø treeg marøg kuikkurri, nui newan cierton wamdøga namune
katøyug srøig kal-langarui køn, nø kerrigu misagwan ellmara pønrrailai utu namnrig ke
srøsrø ellmarig misrig latailø kønrrai.

Kalutøga møriitø kømø, maramig køn

¹⁹ Nai undaaraig nunelø, igwan isuy: ñim mayeeløba møramigwane muniitø purramig
køn. Inchen wamindamigwanba, namamigwanbabe tsøndatø isuptø maramig køn.
²⁰ Kaguende kan møg namig køtanmaptø mariibe Tiuswei sølgandø tabigwan marmøn.
²¹ Inchawei treeg købene, ñimbe ashikken kønrrabgaig marigwanba, chigøben kaig mariilø
trutø netsaig tøgagülanba webeta elacha, Tiuswei wamwan ñimui manrrau ellgwaigwane
mur kurrashmø, tammay utay. Kaguende tru wam wamindiibe maramburab marøbig køn,
ñimui møsigwan wesrig.

²² Pøs Tiuswei wamwane maig martrain taigwan ñimbe marøbelø kømig køn, ka møratø,
møratø kønrrab kømøtø. Trengømuisruandøbe, chi mørmui lataitøwei ñimasiitø ka kegørrab
pønrraig webinrrun. ²³ Kaguende møikkøben Tiuswei wamwan mørøptø møra, tru maig
taigwan møra marmife, kan møg nui maløwan espejoyu ashibig lataig køn, ²⁴ nui malø maig
kuigwan asha, katøllirawa, ippe, pesannab lataitøweingue. ²⁵ Inchen møikkøben Cristo maig
martrai karua pasrig newan sølgandiig, tru chi ilørkaimig kønrrai marøbigwan ke tab asha,
truyu megabig megawa, tru martrai karuigwan pesannaptinchimøtø marøbigweimbe, nui
mariiløyu mayanguen tab kuig kønrrun.

²⁶ Ñim mōikkōben, Tius martrai karua pōnsrailōyu maizhikken purō punōmō marōbig kurmba isubendō, nui nilōtōgabe maig kurrōbashtō waminchibiibe nōasiitō kebeñib pasran. Inchen tru nō Tiusweiwan maizhikken purō punōmō marōb pasrab taibe chi marmui lataitōwei webyan. ²⁷ Tius Mōskawei merrab tru nō karuulan maizhikken pinab marmō, chillig indiimūg mariibe, iig kōn: usri mōskai, peta kwailanba, kelō peta kwailanba chigōben isuig melōben isua ashchab ambub, katō yu pirau kaig trōmbōig arrubiitōga chillig incha pōnrrōmōwei indamig.

2

Misaameran mōilandōgucha lata wamamig

¹ Ñim nai nunelō, ñimui isubigwan namui Señor Jesucristo tōrguegwalmabigweinuutō tōga pōnrrōwabe kanundō tab wamab inchimō, mundōgucha lata kōmig kōn. ²⁻³ Ñim tulundzuna purrōbenma, kan truba pua mōg oro surtīgastiig, truba tabig keweig pubene, truba tabzhig wamab, ñimbe trenchinrrun: “Yu katōguchi tab wamdōnug warra” cha. Inchen trunetō katōgan, kwa waacha, truba shautōzhig chilliguig keweig pubene, ñimbe trunune trenchinrrun: “Ñibe ōsrōndō, ka pasrau” cha; kabe: “Uyu pirau wamisr” cha. ⁴ ζTreeg marōppe, ñimui utu ñimdōweinguen kanune yandō nōrō marōbguen pōnrrōmōtirru? ζÑimbe kaig isuaguen treeg inchib pōnrrōmōtirru?

⁵ Nai undaraig nunelō iigwan mōray: ζTiusbe yamba yu pirau waachameranwei lawa wesruig kōmuitarru? ζNōmbe isubigwan Jesucristoinuutō pasra pōnrraigwan tōgagōmburab tōgagōb, katō nun undaguelan tru nō ashib karub waigwan Tius tranrrab misra kōrrōmisrigwan chigucha utōnrrabelōbe nōmwein kōnrrai marig kōmuitarru? ⁶ Trune ñimbe waachamerane chigucha kōmūg marōb ka kōrig maran. ζTru puarmerawein kōmuitarru ñimune mōra melōnrrai marōb, katō misagwan ashib karub purrabelaimay ñimun uñchib waram srua ambubelōbe? ⁷ ζTru Cristoi purō tab munchiwan ñimun pasra wamigwan nōmweinre purō trōmbōig wamabelō kōmuitarru?

⁸ Tius tru martrai karua pasrig purō nuig, nui wam pōrigu pasrabigwan, maig chibig kōben ñim treeg mōra marōb pōnrrōwabe, sōl marōb pōnrrōnrrabguen: “Tru mendaigwangucha, ñiasig lataitōwei undarau” cha trendaigwan. ⁹ Inchen ñim kanune tab inchib, kanune maig kōbash inchib pōnrrappe, ñimbe kaig marōb pōnrran. Inchen tru maig maramigwan martrai pōra trarriitōwei ñimune ‘kalō marōb itōbunab pōnrran’ cha ñimundōwei itōra pasrrun. ¹⁰ Kaguende tru maig maramigwan martrai Moisés pōrigwan mōikkōben kerriguh mōra marōppe, marendō, tru utu kanundōguen kalō marōb itōbunikurrimbe mayamba kalō mara pasraig kōrrōmisran. ¹¹ Kaguende: “Itōlulamig kōmōn” chibiitōwei, treekkucha taig kōn: “Kweetsamig kōmōn” cha. Inchawei mōikkōben itōlulmuingucha, kweechibiibe, tru maig maramigwan martrai Moisés pōrigwane itōbunan. ¹² Ñimbe wamindiilōyu lata, amōnailōyu lata tru maig maramig chi ilōsrkaimūg kōnrrai marōbig nōmun maig asha maramigwan marig kōmig, ke yandō treeg maramig puim pōnrrab misamera lataig kōmig kōn. ¹³ Katōganelan lastimaguengaig marōbelane, nōmungucha treetōwei lastimagaig marōb asha kōrrōmariilō kōnrrun. Trune, tru lastimabaig marōbelōbe, kōrmō, tab kui webamba pōnrrōnrrun, tru maig kōnrrabigwan asha maren.

Isubigwan Jesucristoinuutō pasra kuiba, chigōben tabig mariilōba

¹⁴ Nai nunelō, ñim mōikkōben ‘isubigwan ke Jesucristoinuutō tōga pasrabig kur’ chibendō, chigucha tabig marōb kenamarmubene, tru ‘isubigwan pasra tōgagur’ taibe, ζchiweñin kuin purugunrrab kō? ζKabe tru isubigwan Jesucristoinuutō tōga pasrab taig, truitō ñun kaigyugurri wesranrrautah? ¹⁵ Kan nunewan kui, kabe kan nuchawan kui kemig truburab chigawei, kwalōmmerawan chi mamig chigawei megamne, ¹⁶ ñimma mōikkōben trendaimbeh: “Chi isumō, tab inrrig chib. Pachitō kōnrrai tsitō keb, ōska mab, muchib uñchig” cha. Inchendō asru maig palain pasrōben chi tranmubendōbe, nilōtō pasrainguen kōnrrun. ¹⁷ Inchawei ōyeetōwein kōn, ‘isubigwan Jesucristoinuutō pasra tōgagur’ taig, chigōben mariilō chigaibe, nōasiitō kwaig kōn.

¹⁸ Inchendōgucha mōibe trenchinrrun: “Isubigwan Jesucristoinuutō ñibe tōga pasrōben, nabe chigōben tabig mariilō tōgagur cha. Ñui isubigwan Jesucristoinuutō pasra tōgagūigwan chigucha tabig mariilō chigaig nan kenamartra cha. Inchen nai isubigwan Jesucristoinuutō pasra tōgagūigwane nabe chigōben tabig mariilōtōga ñun kenamartrun” cha. ¹⁹ Pōs Tiusbe kandō kōnmab isub, ñi kōrewa pasraibe, trumaybe sōlwein kōn. Inchendō kwaimandziimeragucha Tiusbe kandō kōnmab kōrewa, katō kōrig kōb itōnab inchibelō kōn. ²⁰ Au, ñi chugūi mōrmūg, nebua ashchab inchi, isubigwan Jesucristoinuutō pasra tōgagūig, chi tabig mariilō chigaig, ka yandiibe chigucha kōmūg kuin kui. ²¹ ζNamui merrabsrō mōskai Abrahamma nui nusrkai Isaacwan tru altar marinug truyu Tiuswan trana, kwetchab

trarren, nune chi kaig kómíig lataig tabig kórrómarig kómuitarru? ²² Inchawei, ¿Abrahamwe-imbura bma ashmórru, nui isubigwan Tiusweinuutó pasra tógagúibe tru chigóben mariilóba truíba misra kanbalató maró b pónrrabig kui? ¿Inchen nui isubigwan Tiusweinuutó pasra tógagúibe tru mariilógurri kerrigu newan marig kórrómismuitarru? ²³ Inchen Tiuswei wamwan pórígu óyeeg taibe nebuig kón: “Abrahambe Tiuswan kóreikkurri Tiusbe nune sólgandó tabig kui asha tógagúig kón” taig. Incha nune “Tiusba truba tab linchibig” cha, wamig kóbig kón.

²⁴ Inchawei ñimguen ashen, Tiusbe kan mówane nui tabig mariilógurrimba chi kaig kómíig lataig tabig kórrómaran, isubigwan Jesucristoinug pasriitógató kómóto. ²⁵ Kató treetówein kuig kón, ¿tru Rahab, nui asrwan anwei yanó ishuma, tru maig kótasha asha wam sru-arrunrrab ambubelan nóbe ya pebamba, katógan peg maywan amrrai eshkamba, óyeeg tabig marikkurri nune chi kaig kómíig lataig tabig kórrómarig kómuitarru? ²⁶ Kan asrma chi espíritugaibe kwaig kón; kató treetówei isubigwan Jesucristoinuutó pasra tógagóppe, tógagó bendó, chi tabig mariiló chigaibe kwaitówein kón.

3

Nilóbe truba kaig maróbig kón

¹ Nai nuneló, ñimui utube mayeeló babe kusrenanóbelotó kónrrab isumótay, nam kusrenanóbelane maig kónrrabigwan asha maróppe, ka palatiig kómó, martrab kui ashibeló kuig kóppe. ² Kaguende nabe mayeelóba chiyugóben kaló maró b pellibeló ker. Inchen móikkóben nui wamindígu pellmíibe, tabigwan newan sólgandó maró b móg kón. Treebe nui asrwangucha kerriguba maig kóbash kómónrrab isua móra tógagón.

³ Kaullimeranma nam trigu tsi muusróppe, muwan inrrain kesruben mórrai muusróbeló ker, asr óróa kónórramamó merrarramig. ⁴ Kató barcomeran chigucha asay. Yeeg nórreeló puró mur isig ichibig srua ambiló kuingucha, barcon muba inrrai inchib pasrabig kan lamóttiitógató truyu purrabelóbe nó mwan ambug kóben truwan óran. ⁵ Kató nilógucha óyeetówein kón: Asru puró lamíig kó bendó puró nuig misró b, chigóben puró nórreeló martrab waminchibig kón. ¿Kan lamó naazhikkurrindó kan srónó tsibwan muba kuimbura b parróbig kón! ⁶ Inchawei nilóbe kan nag lataig kón, namui asru kaitó netsaig, asr óróa trómbóig maró b mindishibig pasrig tru nilóbe. Tru móra melamnug naarab pasrabiitógatówei pilóga pasrig kón. Incha nam ósig kuingurrimbunó kwamnégatig pilab pasrabig pasrónrrun.

⁷ Móobe chigurrimbunó namig animalmeran kóben, illimeran kóben, ulmeran kóben, maryu purrabelan kóben kusrenanamdíig kón. Inchawei misaamerabe merrarrawa kusreezheeló maróbeló kón. ⁸ Inchendó nilówan kuimbe mugucha kusrenanrrab kaiman. Puró kaig kua, chinchaguen treeg marmónrrai merrarrawa tógagónrrab kaimaig, kweechib larró trómbó móto netsaig kón.

⁹ Nabe nilótógabe namui Tius Móskawan tabig wamindamba, kató Tius nó lataitówein kónrrai mari misaameran tru nilótógatówei trómbóig nebunrrai wamindamba inchibeló ker. ¹⁰ Tru trigugurrindówei mayanguen tabig kónrrai wamindamba, trómbóig nebunrrain chib wamamba indan. Nai nuneló óyeebe maramig kómón. ¹¹ ¿Kan pigabyugurrindówei chish pi webarrumba, kaig pi webarrumba inchaudah? ¹² Nai nuneló, ¿kan higuera tusr kó bendó, aceitunas níguen, kató kan uvas tusr kó bendó, higos niirraudah? Kató treetówei kan tre pigabma truyutówei tab pi weguchimón.

Kusrebig kómigwane Tius tranóbig kón

¹³ Móikkóben ñimui utu truba kusrebig, trurrígu chiwan kóben tab chigúí móróbig kuabe, maig kóbash kómó, tammayig kuitóga kenamar; nuig kurbam inchimótó, larró tammay maró b unígu, truba kusrebig kuyugurri arrubiitóga. ¹⁴ Inchen treeg kómóto, katóganweimburab ñimui manrrau ke chinchimmóro inchib pusrkwai asiibah, chiyutógucha ke nó merrig kónrrab indiibató tóga pónrrówabe, ñimbe truba nórreeló kusrebeló kermab inchimówei, tru newan ciertoníganw isab pónrrómówei inday. ¹⁵ Kaguende kusrebig kuig óyeebe Tiusweinuukkurri arrumótó, ka i piraugurrindó arrubig ka mówei isuilóyugurrimba, nugwaimandzigweinukkurrimbe arrubig kón. ¹⁶ Kaguende ke chinchimmóro inchib pusrkwai asiibah, chiyutógucha móig kanab maróbig kótashchab indiibató pónrrabnuube, ambumay imay ke mumay kóbashtiibah, kató chigurrimbunó ka trómbóig mariilóbató pónrran. ¹⁷ Trune tru kusrebig kómig Tiusweinuukkurri arrub iimerrig kón, chishig. Trugurrimbe ambugurri igurri tab kónrrai indamig, katóganeló chigóben indingucha tammayig kómig, tab kui móró b kasraató pónrrónrrai maróbig kómig, katóganun chigóben nebui megaben, truba truba lastima ashibig kómig, tabig maróbig kómig, kanelane óro mara, kanelandó tab inchimíig kómig, ka treeg kónnab ashchaindó kómó, maig maramíigwan maróbig kómig,

treeg kòn. ¹⁸ Inchen ambumay imay tab kòmigwan tøgagønrrab tru ambumay imay tab kòbitøga ellmaròbeløbe, sòlgandø tabig ellmariilø tulishinrrun.

4

Pirauigwan tab kui inçhib pønrròmumig

¹ Trømbøig kwayam lailøba, namishib chineto cha møriløbabe ñimui utube çhugurrinre arrubig køh? çÑimui umbu trømbøig kaig isubelø ni kan mandøguen kømíig pønrraptø pønrrøwa, truyugurrinre arrubig kømuitarru? ² Ñimbe chigøben tøgagønrrab inçhendø, tøgagønrrab kaiman. Kweetsamba, katøgane chi tøgagømønrrai ke çhinsraatø indamba indan. Inçhendø chinchagucha tøgagønrrab kaiman. Incha ñimbe chineto chib menda, trømbøig kwayam. Ñimbe chi tøgagønrrab isuigwan tøgagønrrab kaiman, kaguende Tiuswan miameeløgurri. ³ Kabe miappe, miabendøgucha, utønrrab kaiman, kaguende sòl isua miamøtø, ka ñimui asrwan tab kønrrai kasraarab kømigwayasiitø miabelø kuikkurri. ⁴ çÑim, Tiuswan itøluløptø misaamera! çI pirauigwan tab inçhib chull inçhibiibe Tiuswane ashig kømui inçhibelø kui ashmeelø kòtirru? Inçhawei møikkøben i pirauigwangøba tab kui mørøb llirabiibe, Tiuswane ashig kømui inçhibig misran. ⁵ Kabe Tiuswei wamwan pøriiløyu øyah chippe, çka trenchig kòptø trendaitamab isutirru 'tru espíritun Tius namui umbu pasrønrrai traniiibe namune çkatø! nuyasiitø kønrraimab undaaran' chibigwan? ⁶ Inchen Tiusbe nui ka yandø tab indiitøgabe namune katøguchinguen tranøbig kòn. Incha nui wambe trenchibig kòn:

“Nuinetø nuig mørørai inçhibelane

Tiusbe sètøbasramisrøb kurrappe,

trune chigucha kømeeelø tammayelane

nui ka yandø tab indigwan Tiusbe tranøbig kòn” cha.

⁷ Ñimbe Tius maig chiben nune tru kuindø møyay. Trune nugwaimandzigwane mørømønrrab mur isua pønrrai, treeg pønrrøbene, ñimuinukkurrimbe lulrrun. ⁸ Ñim Tiusweimay kemallene, nøbe ñimuimay kemallchun. çKaig marøbelø, ñimui tasigwan chish maray! çÑim Tiuswan undaaranrrab indamba, katø tru urastø yu pirau chi købigwan undaaranrrab indamba inçhib misaamerabe ñimui manrømeran newan chish maray! ⁹ çÑimbe truba isui inçhib, çhindimbarre nambe øyeeeg kailø kermab truba isub, katø kishib inday! Ñimbe indzabgunriibe kishib; kasraarabgunriibe truba isui inday. ¹⁰ Ñim Tiuswei merrab utsøbasrene, nøbe ñimune nørreelø kønrrai martrun.

Maig maramigwan nai nunewan ke na asha marmumig

¹¹ Nai nunelø, kangurriin kangurri katøganun chigøben kaig wamincha ashmøtay. Møikkøben kan maramigan kaig waminchib, kabe 'øyeeg sòl marmíig kòn' chib, waminchibiibe, tru maig maramigwan martrai Moisés pørigwan kaig waminchib 'sòl marmøn' chib pasran. Inchen ñi tru Moisés pørigwan kaig kui marøb pasrøwabe, ñibe trunun møra marøbig kømøtø, ñiguen 'øyeeg kòn' chib asha marøb pasran. ¹² Inçhawei mu katøgane kaaben, Tius nøtø kòn tru maig maramigwan martrai pøriilan tranøb, katø nøtøwei maig maramigwan sòlgandø asha marøb inçhibiibe. Truiibe nø kaigyugurri wesruin kui, kabe kaigyu pasrin kui nø ashchabig kòn. çÑibe chigugu, katøganun 'øyeeg sòl marmíig kòn' chib marøb pasrønrrappe?

Srøna kwalømbe chi punrrab kui asamgaig kòn

¹³ Inchen ñim: “Møin kui, srøna kui, chugøben ciudasrømay amba, trusrø pila ørøba warøwa penamba, yanamba, an nørø maramba inçhib warønrrab” chibeløbe, mømibe iigwan mørtrai: ¹⁴ Ñimbe srøna trumar ñimui øsig amønamigu ni chi punrrab kuinguen mørnubendø treendan. Ñimbe ka wañi lataitø kòn, møindø kenagútø, katø yanayube kenamuptinçhibig lataløgue. ¹⁵ Trembe ñim øyah tamikken sòl kønrrun: “Señor treeg kønrrain købene, øsig warøwa, iilan marøb, øilan marøb waramønrrun” tamig. ¹⁶ Trune ñimbe nørreelø kermab isub, treetø isumøtø, truba nørreelø wamindan. Kan çhiyutøgucha øyeeg nørreelø kermab isub wamindiiløbe purø kaig kòn. ¹⁷ Møikkøben tabigwan maramig kui ashendø, marmuibe, yandø nuimbe kaig marig kørømisran.

5

Puarmeran kaig attrabigwan isua kønrrai waminchib

¹ çAu, ñim puarmera, iigwan møyay! Chigøben yeeg trømbøig ñimun nebub attrab pasrøben, kishib, trashib inday. ² Ñimui chigurrimbunø pua misrøb tøgagüiløbe treerailø køben, ñimui keilane pullilla mailø kòn. ³ Ñimui oroba, anbabe, mugusiain kòn. Incha tru i

mugusiaitøwei ñimune ‘øyeeg marøbelø køn’ chib, chi marmeelø kui kenamartrun. Tru tsamdzurabe kan nag lataitøwei ñimui asrwan pinishinrrun. Truba truba chigurrimbunø tulishib tunbønsrain køn ñimbe, mõi ya srabe kwalømmerawan. ⁴ Ñimui ellmariilan tulishib melabelan tru tulisaimburø ñim anwan pagaramø nili andøwei ñimune ‘øyeelø kømøgue’ chib, wamab trasan. Inchen Tius maramburab marøbiibe tru uløwan tranmuinabelø trashib wamigwan mörin køn. ⁵ Ñimbe yu piraube purø tabig warab, asr maig palai inchen, ñimuimbe treeg marøb waramig tøga, ñimbe waarameran lataig tsal-lana køn ñimui manrrømeran, kweetsam kwalømbe yandø punrrabguen køn. ⁶ Ñimbe tru sølgandø tabigwane kaig nebunrrai kørømara, pasra, kweetsig køn, nøm maig martraindø nõbe chigucha inchimuiig køn.

Tiusba wamindamiba, Señorwan munig megabig megamiba

⁷ Trune ñim nuneløbe namui Señor arrumnegatig tammay muniirab melamig køn. Kan ellmarøb kwallibiima ellmarabe, tru srø sre attrabzhigwanba, srabe sre attrabzhigwanba yaandø, yaandø, munig megan, tru pirau ellmarig misrizhigwan tulishinrrappe. ⁸ Ñimgucha treetøwei truba tammay muniirab, katø kørønrrab kømø, mur pønrray. Kaguende Señor arrumibe laturab pasran. ⁹ Nai nunelø, kangurrin kangurri chigøben ‘øyan køtan’ chib; ‘treeg inndan’ chib, waminchimøtay, ñimun marigwan asha, kaigy kørømara pønsrainab pønrrømønrrappe. ¡Aul! Tru ñimun maig maramigwan asha martrabiibe yandø yaskabuguen pasran.

¹⁰ Au, nai nunelø, ñimgucha asha kusrewa tøga pønrrai tru merrabsreelø Tius maig karuigwan tru Señor Tiuswei munchiyu eshkabelø chigøben isumdiig nebuinabendø, yaandø, yaandø tammay melaigwan.

¹¹ Pøs nambe mayanguen tab kuilø kui aser chigøben isumdiig puingucha, tru kul-laaramø melaptø melabelane. Jobwanma chigøben yeeg isumdiig nebuingucha, tammay ka megaptø megaigwan ñimbe wammørøbelø kuinrrun, katø srabebe Señorbe Jobwane maig indigwan chigucha. Kaguende Señorbe lastima ashib, trurrigu tammay purugub inçhibig køn. ¹² Nai nunelø, iigwane masken isua kuy: ñimbe srømbalawan, kabe pirøwan kabe katøgan chigøben, pegwan truilai merrab pasramisra, ‘jkatø! marmø kømø, nabe maramønrrun’ chib, pønrrømøtø, ñimbe ‘treeg martrab’ chippe, treeg maramig køn. Inchen ‘marmønrrab’ chippe, marmumig køn, Tius kaigy pønrrailø kømønrrappe. ¹³ Møikkøben ñimui utu chigøben puben, isuig megawabe, Tiusba waminchi. Inchen mõikkøben tab kasraatø wappe, Tiuswan tabig waminchib cantau.

¹⁴ Inchen mõikkøben kwanrrø tsuabe, iglesiayu Tiusweimburabelan pera marøb pønrrabelan wamø, Señorwei munchiyu aceite srøla, nuyasig Tiuswan ‘purugurra’ chib mianrrai.

¹⁵ Inchen nõmbe Tiusbe ke tamartraitamab isub, Señorba waminchene, kwanrrøbe puraiiben, Señorbe tab uñchai kusranrrun. Inchen chigøben kalø marin købene, Señorbe trugwan pesannab ulø paymønrrun.

¹⁶ Inçhawei kangurrin kangurri ñimui kalø mariilan eshkayab, katø kangurrin kangurri katøganweimburab Tiusba waminday, ñim tammisriilø kønrrappe. Kan sølgandø marøb møg Tiusba wamindiibe truba nõrreelø marøbig køn.

¹⁷ Tru Elías, Tius maig karuigwan eshkabiima, kan møg ka nam lataitøwein købig køn, tru sre pumønrraima, Tiuswan ‘sre pumønrrai martrunrrig’ chib nõba wamindiibe, pøn pila y tøbø pilaba srebe pirau pumuig købig køn.

¹⁸ Incha katø sre punrrai Tiusba katøle waminchen, srebe puben, piraube ellmariilø misrig købig køn. ¹⁹ Nai nunelø, ñimui utu ñim mõikkøben Tiuswei newan ciertonigugurri pella, tarømisra iben, ²⁰ katø kalø marøbigwan nui pella yainukkurri lliskøbiibe nui mõsig yandø kwanrrab pasraigwan truyugurri wesrub, katø truba nõrrø kaig mariilan kasrøb inçhun.

1 San Pedro

'Ka amõñiguh' chib pørig

¹ Na Pedro Jesucristo nan nõashib karua ørig i kilgawan pørar misag nõmuim pirau kòmøtø, peesrø tru ørø amba warabelan, Ponto pirausrøn køben, Galacia pirausrøn køben, Capadocia pirausrøn køben, Asia pirausrøn køben, Bitinia pirausrøn køben, ² Tius Møskai tru manasrøwei nebua asha, nõ lawa wesrailan, tru Espiritu Santogurri ñimune tabigwei tarømarøb, Jesucristo karuilan møra marøb, katø Jesucristoi anindøga chishmarøb indilian. Tius ka yandø tab indigwanba, chi isumgaig tab købigwanba uñcha tøgagønrraimab isur.

Tiuswan kasrag køb wamindig

³ Namui Señor Jesucristoi Tius Møskaimbe mayanguen tab indig kønrrain køn. Nøbe purø nu lastima tøgagua, namun katøyug srøig kal-langaruig køn, tru treeg kønrraitamab isua munig melamig managucha patsønrrabig kømigwan nam tøgagønrrai, tru Jesucristo kwabelai utugurri katøle øsiraikkurri. ⁴ Tru patsønrrab kømíig Tius namun keta tranamig tøgagúibe pinønrrabig kømøwei, chigøben kaiba lynchabig kømøwei, merguranrrabig kømøwein køn, tru ñim tøgagønrrai srømbalarø ñimuyasig esegaig pasrabig. ⁵ Ñim isubigwan Jesucristoinuutø pasra tøgagúikkurri Tiusbe nui maramburab mariitøga chinchimørrai ashib tøga kuilø køn, yandø kerriguwan tru kaigyurri wesraig kømig tamara pasrig tru srabe kwaløm kenamarig kønrrabigweyasig.

⁶ Øyeekkurri ñimbe truba kasrag kuilø køn, inchippa kan maya yanatø chigøben, chigøben nebuig isuig melamig punrraptiig kuindøgucha. ⁷ Kaguende isubigwan ñim Jesucristoinuutø pasra pønrraibe kan oro lataitøguen kømø, purø tabig køn. Tru oronna managatig kønrrabig kømíigwanguen maig kətashchab ashchappe, nagu parramig køn. Inchawei ñimui isubigwan Jesucristoinuutø pasra pønrraigwan maig kətashchab asha kørrømarikkurrimbe Jesucristo kenamisrøb kwalømbe ñimune søl marig kui asamba, maya nuguen tabig indamba, katø tabig kui asha tab indamba indiilø kønrrun.

⁸ Ñimbe Jesucristone ashmuindøgucha, undaarabelø køn. Katø møimbe nun kaptøga ashippe, ashmubendø, nun kørewa, purø nuig purø tabig kui møra, truba kasraaran, tab købiitø ni manchaguen chi tamgaikke, ⁹ pøs tru ñimui isubigwan Jesucristoinuutø pasra tøgagúig yandø tru nebumigwan nebuben, tru ñimui mõiimera kaigyurri wesrailø kørrømisrig.

¹⁰ I kaigyurri wesraig kømigweimburappe Tius tru maig karuigwan eshkabelø Tius tru ka yandø tab indigwan ñimuin kønrrai nõm waminchibeløbe manasrøwei maig kətashchab ashchab, truba truba tab ashib, payib laig købig køn. ¹¹ Cristoi Espiritube truilan manawei eshkaig købig køn, tru Cristobe truba kaig indinab megamigwanba, katø tru wendaube tørguegwalmabig kønrrabigwanba. Inchen nõmbe mu kətashchab ke ashimmøø inchib, katø treebe mana kønrrermab indig købig køn, tru Espiritu nõmuinug pasrøwa eshkaigwan. ¹² Inchen tru nõm eshkab wamindigwane nõmuyasig kønrrain kømøtø, ñimuin kønrrai, Tiusbe nõmun kenamarig køn. Tru srømbalarøngurri Espiritu Santon ørig treeg maringaruitøga tru moin kwaløm srøig purø tabigwan ñimun eshkabelø kusrenaniibe, tru merrabsrø Tiuswei tabig srø wamwan waminchibelø wamindigwandøwei ñimune eshkan. Pøs tru øyeelane ángelesmeratøweinguen nebua asinrrabna kui indan. ¹³ Inchawei treeg købene, chi maramigwane kanmaytø tab isua, tab asha maray, tru Jesucristo kenamisrøb kwaløm Tius ka yandø tab indigwan keta tranamigwane ¡katø! truigwandø muniirab.

Tius namun wamappe, tabigweyasig tarømariilø kønrrai wamig

¹⁴ Maig karuigwan møra marøb nusrkalø latailø amønay, Tiuswan ashmeelø køb uras maig amõñig køben amõñib lataig kømøtø. ¹⁵ Treeg kømøtø, kaiba lindiimíig chishig newan tabig amønay. Kaguende Tius nõ wamabiima newan tabig køn. ¹⁶ Inchawei nui wamwan pøriiløyuma Tiusbe trenchibig køn: “Ñimbe newan tabelø kuy cha; nama newan tabig kur” cha.

¹⁷ Møigwandøgucha atsi marmøtø, nõm maig mariilan maig kønrrabigwan marøb Tiuswan ñim: “Namui Møskain” cha, wamabeløbe, chu urastøgucha yu pirau managatig kømø, ka petø warabeløbe, nune køriibala amønarnamig køn. ¹⁸ Kaguende Tiusbe ñimune chi tabig marig kørrømisrøtrabgaigwan marøb amønagurri wesraig køn, tru treegwane ñimui merrabsrø kølli misamera marøb amønagwan ñim tøga kørrarnamisrig købigwan. Inchawei ñimbe tru øyeegurri wesranrrab purø pagaragwane tsabøtø ashibelø køn. Truigwane mana pinønrrabgaitøga purø tranig køn, kan oro lataitøga kømøwei, kabe an lataitøga kømøwei, treeg kømøtø. ¹⁹ Cristobe kwawa, nui purø tab anindøga ñimuyasig treeg marig køn, kan

ubisha-unø chishchig, newan tabzhigwan kweetsi lataitøwei. ²⁰ I pirøwan marmøwatø Cristone manawei wesrua pasrig købig køn øyegweyasig. Incha mõin kwalømmerawan kenamisran, ñimuyasig tab kønrrai. ²¹ Inchawei ñimbe nõgurri Tiuswan kørewa põnrramisran, tru Criston kwailai utugurri øsirangarua, katø nune tøgüegwalmabig kønrrai marøbigwan. Inchawei treeg købene, ñimui isubigwan Cristoinug pasra tøgagüigwanba, truba truba munig melamigwanba Tiusweinuutø põnsra kønrrain køn.

²² Incha mõimbe, tru newan ciertonigwan ñimbe mõra marikkurri ñimui mõsiimeran chish marin køn, nunelan ka undaaranmab ashchaidø kømøtø, undaaranrrab isua, undaarebelø kønrrab. Inchawei kangurri kangurri manrraugurri newan isua undaaramburab undaaray. ²³ Pøs ñimbe katøyug kal-lawar køn, mõskalø pinønrabelainukkurri kømøtø, Tiuswei wam øsiguig, managun pinønrabikkaig pasrabig pasrabigugurri. ²⁴ Kaguende Tiuswei wamwan põriiløyube trenchibig køn:

“Maya misaabe kan kau lataig køben,
nøm purø nõrreelø tabig kuibe
kauyu kan u lataitø køn cha.

Tru kaube mul-laben, ube peñen,

²⁵ Trune Señorwei wambe managatig kønrrabig køn” cha.
Inchawei i tru wam ñimun eshkaiabe tru tabig srø wam truig køn.

2

Tiuswei misaamera

¹ Inchawei treeg købene, chigurrimbunø kailan køben, katø chine may wamincha isiilan køben, ka palatø tab indiiilan køben, mendaigwan chigurrin køben pusrkwai asiilan køben, chigurrimbunø wam kusrub indiiilan køben elatsay. ² Kan srø kal-laig ureezheelø pitsø muchig kuinchib lataitøwei, tru Tiusweimbuburabig pitsø chi peeba lindisaimig lataigwan ñimbe ke chindamdø kui inchib lay, truikkurri nõrrørawa, kaigyugurri wesraig kømigwan tøgagønrab. ³ Kaguende ñimbe yandø Señorwane purø tabig kuin kui tsabø ashibelø køn.

Cristobe tru ya marøbelø põlbasrtrab katsigu wayi srug lataig

⁴ Ñimbe Señorwan kemalay, tru Øsig Srugwan. Truigwane misaamera kaashippe, kaasig købendø, Tiusweimbe lawa wesruig, purø tab sruuzhig køn. ⁵ Inchawei ñim øsig sruumeru Tiuswei yayu ñimgucha marøb kusrunrrain kuy, sacerdotespera Tiusweindø tarømariilø kua, Tiusweimbuburab maramigu keta tranøb põnrramig kønrrai, Jesucristogurri Tiusweyasig chull indamdeelø. ⁶ Inchawei Tiuswei wamwan põrigube trenchibig køn:

“Sionsrø kan srug trarrar cha.

Truibe katsigu põlbasrtrab wayi srug,
lawa wesruig, purø tabzhig køn cha.

Trunundø isua pasramisrøbiibe
køriimisra kørrømisrtraamøn” cha.

⁷ Ñim nundø kørebelaimbe tru sruube purø nuig tabig køn. Inchen tru nundø køremeelaimburappe Tiuswei wamwan põriiløyu øyah taibe nebun:

“Tru ya marøbelø kaasig sruube
niga pasrønrrai katsigu põlbasrtrab
wayig srukken misrig køn” taig.

⁸ Katø øyeekkucha chibig køn:

“Kan srug srurrengwangerumba,
katø penøsrkamba inchib srug køn” taig.

Pøs nõmbe Tiuswei wamwan maig taigwan mõrmeeløgurri srurrengwan. Nømunne trendø øyeg nebuig melønrrai marig købig køn.

⁹ Trune ñimbe Tius lawa wesruig misaamera, reywei sacerdotespera, newan tab misag purø nõrrø, Tius tru nui truba tabig mariilan eshkab misaamera kønrrai mariilø køn, tru ñimun purø løstøygurri nui purø tørigu põnrramig kønrrai wamabigweiwana. ¹⁰ Ñimbe merrappe Tiuswei misaamera kømuig køn. Trune mõimbe si, nui misaamera køn. Merrappe ñimbe Tiuswei lastima asigwan utønrrab kaima kuig, mõimbe lastima asigwan yandø ñimbe nebua uta põnrran.

Tiuswei karuig melabeløsun amønay

¹¹ Nai undaarailø, yu piraube kan peg pirausrøngurri ka petø amrruatø latalilan ñimun waminchar, ñimui mõsigwan kwayab pasrabig tru ñimui asru kaig marøg købig arrubigwan tuismanda marmøtay cha. ¹² Judios kømø misaamera Tiuswan ashmeelai utube nõmguen ñimun asha kusrenrrai amønay, ñimune ke larrø kailø kui lataig wamindindøgucha, ñim tabig

mariilan ashabe, mayeelan maig mariilan Tius payib kwalom truiløbe Tiuswan truba tabig waminchai.

Misagwan asha karub purrabelan mōramig

¹³ Ashib karub purrōnrrai mōguelø purrōnnilane nōm maig chiben mōray, namui Señorweyasig. Tru maya misagwan ashib karub wabig, reywan lata, ¹⁴ katø kube-nadurmeran lata, kaguen truiløbe kailane mōrøsrkøb, katø sōlgandø marøbelane nōmdøwei tabig waminchai Tius øriilø kuimba, treetøwei nōmune mōramig kōn. ¹⁵ Kaguende Tiusbe ñimune sōlgandø martraiwei isun. Trumay marene, tru chugūnguen mōrmubendø waminchibelø chinetø wamindiilane ñimbe mu mandamgaig kasra pōnsrōnrrun.

¹⁶ Ñimbe amōñippe, chi iløsrkøbig chigaig ñimuimburab amōñibeløsun amōnay. Inchendø ‘chi iløsrkaimig namuimburab amōñibelø ker’ chiptø, trunune kaig maramigweyasig merrarrowa, marøb kōmumig kōn. Treeg kōmøtø, Tiuswei maramigu marøb melabelø latailø tab isua amōnay. ¹⁷ Mundøgucha maig kōbash inchimø, tab indamigwan treeg tab inchib, nunelan undaarab, Tiuswane kōriibala amōñib inday. Katø tru reywan chigucha maig kōbash inchimub tab indamig kōn.

Cristo maig kōbash indinab megaigwan nam asha kusrenrrai kōrrōmarig

¹⁸ Karuindiig melabelø, ñimun karub pera kōbelane maig kōbendø inchimø, kōriibala mōramig kōn. Tabelø chinchimealandø kōmøtø, martrain chippe, ke kandø kandø wamabelan chigucha treetøwei mōramig kōn. ¹⁹ Kaguende øyeebe tabig kōn, mōigwan kōben isumdiig arruben treegu ka awentab, chi kaig marmubendø, maig kōbash puinab megamig kuindøgucha Tiuswan isua pasrabig kuikkurri. ²⁰ Inchen ñimun chigōben kaig marikkurri ichabetøbene, ñim tammay ka melaptø melaindøgucha, ¿ñim treeg melaigwane Tiusbe chincha tabig kui ashchab kø? Inchen ñim sōlgandø marikkurri maig kōbash indinab tammay melaptø melaibe, treebeguendø Tiusweimbe truba tabig kōn. ²¹ Tiusbe ñimun wamappe, øyeeb nebunrraiwei wamig kōn. Kaguende Cristogucha ñimuyasig truba kaig indinab megaig kōbig kōn. Nōma maig uñibig kōben, ñim treetøwei asha kusrenrrain kuig kōn, ñim truwandøwei amōñibelø kōnrrai.

²² “Nōma chigucha chi kaig marmøwei,

ni mana kwalom mungucha may wamincha isōmøwei inchibig kōn.”

²³ Chigōben tsalø wamab trōmbøig wamōbene, Cristobe treetøwei lōtømuig kōn. Nun chigōben truba isumdiig maringucha, nøgucha ‘chigōben maramōnrrun’ chimøtø, maig kōnrrabigwan Tius sōlgandø asha marøbigwan nø asha martrain pasrøbig kōn. ²⁴ Namui kaig mariilane Cristo nōtøwei nui asru niga yaig kōn, kurusyu mesrøb uras, kaig maramigweimburappe nambe yandø kwailø latailø kōrrōmisra, sōlgandø tabig amōnamigu øsiguelø kōnrrai. Ñimbe Cristoi kōrriindiløtøga tamarilø kuig kōn. ²⁵ Kaguende ñimbe merrabsrømbø kan ubisham-era pella, nōrøtø amōñib latailø kuig, mōimbe katøle Ubisha Ashibigweimay amrruin kōn, tru ñimui mōsimeran chu uragucha chinchimōnrrai Ashibigweimay.

3

Kasharawamera mandø amōnamig

¹ Inchawei treetøwei ñim sraløgucha ñimui kelan maig chiben tammay mōrøb melay. Kelø mōiløgōben Tiuswei wamwan kōremeeløguen, kan tritøguen wamindamig palain kōmø, ñim maig kōbash kōmø, mandø tab melaigwan ashatø, Tiuswei mayu punrrai, ² tru ñim chishig tabig amōnraigwanba, kōriibala melaigwanba nōm nebua asha. ³ Ñimui tabzhüibe asru pala tamarikkurriin kōnrrain kōmøtø kuy, pusrugwan purø tabig tamarøb, oromera tabzheelø pōnsrøb, purø nōrrøweyelø keb indiiløyu. ⁴ Treeg kōmøtø, ñimui manrrau kōnrrai inday; mana patsab minchabgaig, larrø kōrrøtig kuiguba, larrø tammayig kuiguba kōnrrai. Inchen øyeebe si, Tiuswein kabyube purø tabzhig kui asig kōn. ⁵ Pøs merrabsrøngucha øyeegwein kōbig kōn, ishumburmera Tiusweyasig tarømarilø tru tabzhig nōm tøgagüibe. Nōmbe Tiuswandø muniirabelø kua, nōmui kelø maig chiben treeg melabelø kōbig kōn. ⁶ Inchawei Sarama treeg kuig kōn. Abrahamwan mōrøbig kōptø: “Ñi, nai ashib karub” cha wamabig kōn. Inchawei ñimbe Sarai nimbasrmera lataig misrin kōn, ñim treeg sōlgandø marabe, chiwangucha chi kōrig kui pōnrrabig chigar.

⁷ Katø ñim keløgucha treetøwei ñimui sralane chugüi mōrmig lataig kōmøtø, tab isua mōra pera kuy, nōmun maig tab tøgagømig kōben, trumaygue, ishuumisaabe møg lata kōmø, mas kullaguig kuimba, kaguende nōmgucha ñimba kanguelarrøtø øsig amōnamigwan Tius keta tranig tøggar kuikkurri. Øyeeb maray, ñim Tiusba waminchen, chiyugucha iløsrkaimig kōnrraimbe.

Tabig marendø chinetø puinab

⁸ Trube, m̄imbe ñim mayeel̄oba kand̄o lataig isua lincha p̄onrray. Chiḡoben kanelan nehubene, nan kui lataig isub, nunel̄o lataig undaarab, tab inchibel̄o k̄ob, k̄oramgail̄o tam-mayel̄o kuy. ⁹ Muḡoben chiḡoben kaig marene, lata treet̄owei marm̄owei, tsal̄o wam̄obene, lata treet̄owei l̄ot̄om̄owei inday ñimbe. Treeg k̄om̄ot̄o, ñimgurrimbe ‘mayanguen tabig k̄onrrun’ chinrrigay. Kaguende Tius wamappe, ñimun tabigwan ut̄onrrai wamig k̄on. ¹⁰ Kaguende:

“M̄oikk̄oben nui øsig tsumigwan tabig t̄ogaḡob,

tab kwal̄ommera t̄ogagug k̄obene,

nui nil̄owane isua m̄ora t̄ogaḡomig k̄on,

kaig waminchim̄onrrab,

nui triit̄oga isa may wamincha keḡorr̄srk̄om̄oweingue.

¹¹ Kaigyugurri wemallib, tabig s̄olwan maramig k̄on.

Ambugurri igurri tab k̄onrrabigwan lab, truwan unamig k̄on.

¹² Kaguende Señor Tiuswei kabmerabe s̄ol̄gand̄o tabelaim pala ashib pasr̄oben, nui kalumerabe n̄oba wamin̄diilan m̄otr̄ab muniit̄o pasrabig k̄on.

Trune Señor Tiusbe kaig mar̄obelane n̄omuingat̄o pasr̄om̄on.”

¹³ Ñim chu uragucha tabigwand̄o martrab inchib mel̄obene, ÷ñimune mu kui kaig martrautah? ¹⁴ Inchend̄o treeg s̄ol̄gand̄o tabig maramigwan mar̄ob melain̄d̄ogucha, isum̄diig nehubene, ñimbe mayanguen tab kuil̄o k̄on. Tru kaig inchibel̄o k̄orig kui inchim̄owei, kwarm̄owei inday. ¹⁵ Masken treeg k̄om̄ot̄o, Cristone ñimui manrraube n̄o ashib karub pasrabig mara t̄oga p̄onrray. Tru ñim Tiusweimburabigwan muniirab melaigwan muḡoben: “¿Treebe maig k̄o?” cha ñimun payene, mand̄o l̄ot̄amigwan chu urast̄ogucha isua pusra am̄onay. Inchend̄o treeg mar̄oppe, n̄omune maig k̄obash inchim̄ot̄o, kwa tammay maray.

¹⁶ Ñimbe ñimui isub kebachib pasrabigube chi ‘kal̄o k̄on’ chibig chigar k̄omig k̄on, ñim Cristoinug tabig am̄onaigwan ke ka indzat̄o ashibel̄o n̄omguen k̄oriimisa k̄orr̄omistraingue.

¹⁷ Tius trend̄o treeg k̄onrrain k̄obene, s̄ol̄gand̄o mar̄ob megawa, kaig indinab megamikken s̄ol̄ k̄on, kaig mara k̄om̄ot̄o. ¹⁸ Kaguende Cristot̄oweinguen, n̄obe s̄ol̄gand̄o tabig kuagucha, tru s̄ol̄gand̄o tabig k̄omeelayisig kaig indinab megawa, kaig maril̄ogurri kwaig k̄on, kanmayt̄o managatigweyasikke, kat̄o, kat̄o kwanrrab k̄om̄ot̄o, namun Tiusweimay pera inrrab. Nui asrwane kwangaruind̄ogucha, nui esp̄iritune øsig kungaruig k̄on. ¹⁹ Incha n̄obe esp̄iritu kuig k̄oppe, tru esp̄iritumera merrarrawa, keeriil̄o p̄onrrabelan Tiusweimburabigwan eshkab kusrenanig k̄on. ²⁰ Tru esp̄iritumera trusr̄o p̄onrrabel̄obe, merrabsr̄o tru Noé tsub kwal̄ommerawan m̄or̄og k̄omui inchibel̄o esp̄iritumera k̄obig k̄on. Tiusbe tru uras n̄omune truba tammay muniiraig k̄obig k̄on, tru nu barcon mar̄ob k̄omne. Tru barcoyu kebamba, piugurri øsig webambubel̄obe mam̄d̄zhiit̄o kuig k̄on, ochoel̄ot̄o. ²¹ Inchen tru pibe tru m̄oi ya piu umbu ulsra kaigyugurri wesrail̄o k̄omigwan eshkabig k̄on, Jesucristo kwawa, kat̄ole øsiiraikkurri. Tru piu umbu ulsraibe asrwan chillig k̄om̄onrrai ‘chishmar̄obig k̄on’ cha eshkabig k̄om̄ot̄o, Tiusweimburab namui isub kebachib pasrabigu chi ‘kal̄o k̄on’ chibig chigaig m̄oingurrimbe n̄obat̄o pasramigwan eshkabig kuig k̄on. ²² Incha n̄obe m̄imbe sr̄ombalasar̄omay ya, Tius M̄oskawei kursmay waben, kat̄o ångesmera lata, n̄om ashib karub p̄onrrabel̄o lata, maramburab mar̄obel̄o lata n̄o maig chiben m̄or̄obel̄o k̄on.

4

Tius ñimun maig martrai tranil̄obe trunun maray

¹ Inchawei Cristoma nui asru kaig indinab megaig k̄obene, ñimungucha n̄o mariimayt̄owei martrab tamara p̄onrray. Kaguende m̄oikk̄oben asru maig k̄obash indinabiibe tru kaig maramigwane yand̄o n̄or̄o mara pasran, ² kat̄oguchi øsig unamig arrubigube yand̄o asr mumay srwa iben, treeg uñchab k̄om̄ot̄o, Tius maig uñchain k̄oben, treeg uñchab. ³ Tru judios k̄om̄o misaamera Tiuswan ashmeel̄o maig mar̄obel̄o k̄oben, merrabsr̄o ñim treegwei mar̄ob am̄onaibe yand̄o trut̄o tsab̄o k̄on. P̄os tr̄omb̄oig kaig indil̄oyu am̄oñib, tr̄omb̄oig kail̄o martrab isub, mutsiirab, kaig fiestamerayu am̄oñib, kat̄o tulundzuna mutsiiramburab mutsiirab, kat̄o chiwanḡoben kan tius kui lataig inchibel̄o larr̄o kail̄o k̄on, n̄ombe. ⁴ Inchawei n̄omune m̄imbe pesriig asonan yand̄o n̄omun ñim treet̄owei n̄om tr̄omb̄oig mar̄ob lliirab p̄onrrainug lincha mar̄ob p̄onrr̄omubene. Incha treekkurri ñimune tr̄omb̄oig waminchibel̄o k̄on. ⁵ Inchend̄o n̄ombe Tius tru øsiguelan lata, kwabelan lata maig kuigwan paya ashib martrab tamara wabigwei merrab kemalla, chi mariilan eshkabig k̄onrrun. ⁶ Inchawei treekkurri kwabelanguen Tiuswei tabig sr̄o wamwan eshkaig k̄obig k̄on, Tius øsig k̄ob latait̄owei n̄omui esp̄irituyu øsiguel̄o k̄onrrai, n̄omui asrwane misagwan maig asha maramig k̄oben yu piraube treeg asha mara, k̄orr̄omarig kuind̄ogucha.

Misaameran mand̄o purugub k̄omig

⁷ Chit̄ogucha yand̄o pats̄onrrabig pumibe lutaurab arrun. Inchawei ke tab asha, tab isua p̄onrray, Tiusba tab wamin̄damig k̄onrraimbe. ⁸ Ñimui utube undag k̄obigwanmerrig masken

tøgagømig køn. Kaguende undag købiibe purø nørro kalø mariilan chishtø kasrøbig køn. ⁹ Kangurrin kangurri ya pebay, chigøben cha mormøtø. ¹⁰ Ñim møitøgucha Tiusweyasig marøbelø kønrrai ñimun Tius ketig utiitøgabe katøganelan tab kønrrai puruguy, Tius ka yandø tab indikkurri ñimun tru peg peg ketigwane kan chigøben købigwan tab asha marøb tøgagøbelø lataitøwei maray. ¹¹ Møikkøben waminchippe, tru wamindiibe Tius wamindig-wandøwei waminchi. Møikkøben chiyu køben mara tranøppe, ñui asrwan Tius maya fuerzas tranitøga mara tranø. Chiwandøgucha marøppe, Jesucristogurri Tiusbe maya nuguen tabig indig kønrrai maray. Tørguegwalmabiiba, maramburab mariiba managatig nuiwein køn. Treeg kønrrai.

Chine puindøgucha ka pønrrab

¹² Nai undaarailø, kan maig inchibig køtashchab purø murig nag lataigu ñimun puraam-bamig nebubene, chindimbarre øyeeeg kermab isumøwei, katø kan managuen treeg pumig kui lataig isumøwei inday. ¹³ Treeg kømøtø, masken Cristoimburab nøba treetøwei kaig nebuinab puraambub ambamig tøgaguabe, kasraaray, Cristo tørguegwalmabig kenamisren, ñim truba kasraaramig kønrraimbe. ¹⁴ Ñimbe mayanguen tab kuilø køn, ñimun Cristogur-rindø mugøben tsalø wamøbene. Kaguende tørguegwalmab Espiritu, tru Tiuswei Espiritube ñimuim pala pasran. ¹⁵ Ñim møikkøben kweecha kui, kabe nila kui, kabe larrø kaig kua kui, kabe nuimburab kømubendø, marøb kegala kui, treekkurri kaig nebuinab megabgun. ¹⁶ Treeg kømøtø, møikkøben Cristoin kua kaig nebuig megawabe, kørig kui inchimøta. Cristoi munchiwan ñimun pasra wamikkurri masken Tiuswan truba tabig wamindamig køn.

¹⁷ Pøs kaguende yandø treeg kønrrabiibe pubguen inchen, Tiuswei yaelainuutøwei maig kønrrabigwan Tius nø asha martrab pølbarrun. Tru namunmerrikken maig kønrrabigwan asha marøb pølbarruibe, trube, ¿tru Tiuswei tabig srø wamwan mørøg kømui inchibelane mas maig martrerah? ¹⁸ Inchen,

“Sølgandø tabig pasrab møwanguen

kaigyugurri wesraig kømibe truba murig kuibe,

¿Tiuswan køriibala pønrrømeelaimba,

kaig marøbelaimbabe mas maig kønrrerah?”

¹⁹ Inchawei Tius maig kønrrain køben kaigyu puraambub melabeløbe sølgandø tabigwan marøbig marøb melamig køn, nømui mõiimeran Tius tru Chiwandøgucha Marøbigwei tasku pønrrøb. Pøs nøbe managucha elachimig køn.

5

Cristoielø mandø amønarnamigwan waminchib

¹ Møimbe ñimui utu Tiusweimburabelan pera marøb pønrrabelan nabe mandø amønarnamigwan waminchab inchar, nagucha nøm lataitøwei Tiusweimburabelan pera marøb pasrabig, katø Jesucristo maig købash indinaben ashib, katø Cristo tørguegwalmabig kenamisren, nagucha truyu tøgatø pasønrrabig. ² Tius nui ubishameran ñim ashib tøgagønrrai nø ñimun tranuilane tab ashib tøgaguy, ke martrai inchendø kømøtø, ñimashib treeg martrab isua marøb, Tius maig palain køben, treeg. Katø ke anwandø chull inchimø, ñimui maramigwan marøppe, palabino kømø, tab maramig køn. ³ Ñim ashib tøgagønrrai ñimun tranuilane ñimuielø kui lata, ke ñim karua srua kømøtø, ñim mandø amønaitøga nømguen asha kusrenrrai maray. ⁴ Treeg marabe, tru Maya Ubisha Ashibelaim Pala Pasrabig kenamisrene, ñimbe corona tørguegwalmabzhig managuen minchabgaigwan utønrrun.

⁵ Katø treetøwei ñim matsøreløgucha tru Tiusweimburabelan pera marøb pønrrabelane maig chiben trunun møray. Søteeløba kangurrin kangurri maig køben inchimøtø, tru tammayig kønrrai marøbiitøga truitø pinøgasrailø amønay. Kaguende:

“Nuietø nuig mørørai inchibelane

Tiusbe søtøbasramisrøb kurrappe,
truene chigucha kømeelø tammayelane

nui ka yandø tab indigwan Tiusbe tranøbig køn” cha.

⁶ Tiuswei maramburab marøb tasig umbu nørreelø misrøb pønrrømø, utsøbasray, yandø nø treeg maramig puben, ñimun nørreelø martraimbe. ⁷ Ñim chigøben truba isub tøgø pønrrailane Tiuswandø pønrray. Kaguende nøbe ñimuimburab tab kønrrai isua martrab wabig køn.

⁸ Mumaygucha srua irramamø isuamøra amønib, chu uragucha pesannamø, isu-atø amønay, kaguende ñimun ashig kømui inchibig, tru nugwaimandziibe kan león pøtøgatanwan namig mullib uñib lataig unan, møigwan køben manrrab lab. ⁹ Inchawei

ñimui isubigwan Jesucristoinuutø pasra pønrraitøga truigwane kørtrab kømø, ñimbe mur isua pønrray, yu pirau chusrøndøgucha ñimui nuneløgucha treetøwei kaig nebuinab puraambub melai ashabe. ¹⁰ Inchendø kan maya yana køsrøndø ñim treeg kaig puraambub melaikkurrimbe tru chiyutøgucha ka yandø tab inchib Tius managuen patsønrrabgaig tørguegwalmabiisrø Cristoba kanbalatø purramig kønrrai wamabiibe, nõtøwei ñimune katøle tamara pønrsøb, chiyugucha kørønrrabgailø marøb, katø trurriгу kullaaramø murelø kønrrai marøb, yandø treeg pønrrønrrai kørømarøb inchun. ¹¹ Tius nø ashib karub tøga pasraibe managatig nuin kønrrun. Treeg kønrrun.

Srabe wamindiilø

¹² Silas, nai nuneg, chi isumgaig na tabig kui asigwan nabe nun landøtiig pøringarur, øyeeg, øyeeg amønay chinrappa, Tius tru ka yandø tab indig ciertonibe, iig køn cha, eshkanrappa. Inchawei truyu mur pønrray.

¹³ Tru iglesia Babiloniasrø ñimun latawei lawa wesruig pasrabiibe ñimun 'ka warøgueh' cha øran, katø Marcos nai nusrkai lataikkucha. ¹⁴ Katø kangurrin kangurri undag købitøga muchab 'manguen ka amønigueh' tay.

Ñim Jesucristoieeløbe mayeeløba chi isumgaig tab købigwan tøgagønrraimab isur.

2 San Pedro

'Ka amõñiguh' chib pörar

¹ Na Simón Pedro, Jesucristoi marøb megabig, katø nøashib karua øriibe, tru namui Tius Kaigyugurri Wesrabig Jesucristo newan sølgandø tabig marikkurri, ñimui isubigwan Jesucristoinuutø purø tabzhig tøgagømigwan nam tøgagúigwandøwei nebua tøga pønrrabelan iigwan pørar. ² Tiuswanba, namui Señor Jesucristonba nebua asikkurri nui ka yandø tab indig tranigwanba, chi isumgaig tab købigwanba ñim uñcha tøgagønrraimab isur.

Tiuswei ureg kømibe øyamayelø kømig køn

³ Tius nui maramburab mariitøga namun øsig waramigweyasig lutøgurri chi palabigwanba, nuyasiitø tabig amønami kønrraimba namun tranig køn, nø trendø tørguegwalmabig kuitøgaba, nø purø tab indiitøgaba nø namun nebua asingarua. ⁴ Tru øyeeløgurri Tiusbe truba nørreelø, trurriгу purø tabelø namun tranrrab misriilan tranig køn. Incha tru traniløgurri ñimune Tiusbe, nø maig køben, treeløwein kømigwan tøgagønrrai tranig køn, yu pirau tru køsøngønrraptiig purø trømbøig marøg købig mindishib treeranøb pasrabigugurri wegørrønrrai. ⁵ Inchawei treeg købene, iilan tøgagønrrab truba tranrramig køn: Tru isubigwan Jesucristoinuutø pasra tøgagúigwane iigwan nemaramig køn, maig køben inchimø, tabig amønaitøga. Tru tabig amønaiwane Tiuswan nebua asiitøga nemaray. ⁶ Tiuswan nebua asigwane asr maig miaben tru kuindø marmuitøga nemaray. Asr maig miaben tru kuindø marmuigwane chigúingucha tammay yandø, yandø melamitøga nemaray. Tru tammay yandø, yandø melaigwane Tiuswan maikken tarømisrmø tabig amønaitøga nemaray. ⁷ Tiuswan tarømisrmø amønaiwane trag nunelø lataig tab indiitøga nemaray. Inchen yandø tru trag nunelø lataig tab indigwane undag købiitøga nemaray.

⁸ Iilø ñimuinug kerrigu pønrrøwa larrøbichib nurabene, namui Señor Jesucriston ñim nebua asha tøgagúigube ñime chi marmø, ka amøñinrrab kømøwei, ke ka nebua asiitø kønrrain kømøwein kønrrabguen. ⁹ Inchen iilan chigaibe kan kabgaig lataig, kabe kan yab nebua ashchab kaimabig lataig køn, merrabsrø nui kaig mariilan chish marigwane yandø chab pesannaweig. ¹⁰ Inchawei treeg købene, nai nunelø, ñimun Tius wamigwanba, lawa wesrub indigwanbabe, ñimuinug tab pasrønrrai katøguchinguen kønrrab inday, kaguende iilan marabe, managuen srurrengwamønrrabguen. ¹¹ Trumaybe si, namui Señor Jesucristo tru Kaigyugurri Wesrabigwei managuen patsønrrabgaig ashib karub wainug ñimuimbe kebambamiг yaskabmerabe ke lendø kurim pønrrønrrun.

Mugucha mandamgaig kusrenaniilø

¹² Tru iilan nabe ñimun chu uragucha isungaruppatø, isungaruppatø megamønrrun, tru newan ciertonigwan yandø ñimbe ashib elatchabgaig tøga pønrraindøgucha tru ñimun kusrenanig købigwan. ¹³ Na pirau øsig uñippatøbe øyeelø wamindiitøga isuptø melønrrai kuñappatø megamiг søl kuitamab isur. ¹⁴ Namui Señor Jesucristo nane tøgandø eshkaben, nabe petø kwam kui mørar. ¹⁵ Katø nabe mumaytøgucha ñimuyasig maramdiigwane martrab inchar, na kwaimbala ñim chu uragucha iilan isub marøb kønrrai.

Nømui kaptøga ashibelø

¹⁶ Señor Jesucristoi maramburab marøbigwanba, nø arrumigwanba nam kusrenanøppe, misaamera ka nõmdø isua wesrua wamindiilan kusrenanmuig køn. Treeg kømøtø, nambe namui Señorwei purø nuig tabig purayaigwan namashib namui kaptøga asigwan eshkab waminder. ¹⁷ Kaguende Tius Møskai nun truba tab indigwanba, tørguegwalmabigwanba utøben, tru Purø Nuig Tørguegwalmabiisrøngurrimbe kan wam arruppe: "Iibe nai undaaraiг Nusrkain køn cha. Nabe nøgurri truba kasrag war" cha, trenchiben, ¹⁸ nambe mørøbelø ker tru wam srømbalasarøngurri nun øyeeg waminchen, Tius tru nuindø tarømara pasrin tunsrø Señorba nam pønrrøwa. ¹⁹ Inchen katø Tius maig karuigwan eshkabelø wamindiibe treetøguen kømø, maig taibe treeg kønrrabigwan tøgaguer. Ñim trunun tab asha pønrraibe tab køn, kan løstøyu tør kønrrai tør-rramnegatig pilabigwan lataig, katø tru løstøzhig yemø kal-lab estrella ñimui manrrømerayu kal-lanrrai. ²⁰ Trurriгу iigwane purø tab isua tøgagømig køn: Tius maig karuigwan eshkanrrai Tiuswei wam pørigu pønrrabelane ni mõnundøgucha mugøben ka nuinetø isua, 'øyamay køn' chib pasramig kømig kuin kui. ²¹ Kaguende Tius maig karuigwan eshkabeløma managuen ka nõmuimburaпtø isuabe waminchimuig køn. Treeg kømøtø, møguelø waminchippe, Espíritu Santo maig wamindingaruben, treeg waminchibelø købig køn.

2

Maig kuigwan kòmõtø, peetø kusrenanøbelø

¹ israelita misaamerai utuma 'Tius maig karuigwan eshkabelø ker' chibelø isapteelø kuig køn. Katø ñimui utugucha treetøwei isatø peemaytø kusrenanøbelø kønrrun, lliska nòmui isuitøga kusrenaniilø pinishinrrabigwan mu ashmøwatø treeg kusrenaniilø keera pønsrønrrabelø. Katø treetø kòmõtø, Señor tru nòmun kaigyugurri wesranrrab penabigwanguen chigucha kòmigi kui lataig mara kørømaran, nòmuyasiitøwei møi møi pinisaig kòmigwan lab. ² Inchen mõiiløgøben truba nu treetøwei truilø nòmui køsøngønrraptiig marøb amønauigu marøb amøñinrrab kebamba, nøm treeg marikkurri tru newan ciertonig, Tiuswei maywane misaamerabe kaig waminchun. ³ An pareelø køptø, nømdø isua, purø may isa wamincha, ñimune an wesrab srua kønrrun. Inchendø nòmun kaigyu pønrrønrrai manasrøwei pønsraibe mu katamgaig petø punrrun, kaguende nòmune pinisailø kønrrai pønrsrailø kua.

⁴ Tiusbe tru ángelesmeran købenguen kaig marigwane ulø paymø kòmø, ulø paya, tru møra melamnug kebeta, larrø løstøyu pønrrønrrai cadenastøga merrarrawa, keerøppa pønsraig køn, Tius tru maig maramigwan asha marøb kwalømweyaisig. ⁵ Katø merrabsrø yu pirau misaameran chigucha Tiusbe kaig marigwan treetø kørømisstrain kòmø, ulø payig købig køn. Inchendø tru sølgandø tabigwan eshkab waminchibig Noéwanba, katøgan sieteeelanbatø chinchimuiig købig køn, yu pirau kaig misaameraim pala pi pulabigwan arringarub uras. ⁶ Katø Tiusbe Sodoma ciudawan lata, Gomorra ciudawan lata pinisaig kønrrai marig købig køn, usrø tuindø misramnegatig parra kørømarøb. Øyeeg marigwane wendøsrø kaig misamera øsig warønrrabelø trunundøguen isua asha kønrrai marig købig køn. ⁷ Inchendø Lotwan, tru sølgandø tabigwane wesraig køn. Tru Lotbe chu uragucha larrø kaig misamera ashikken kørørbøgaig trømbøig marøb amøñiben asha, truba isui inchib tab kòmui megabig køn. ⁸ Inchen Lot, tru sølgandø tabig, nòmui utu tsubiibe yeeg kaig maren, kwalømmørig, kwalømmørig nui sølgandø tab møsigube purø trømbøig kui megabig køn, tru nøm treeg trømbøig mari ashiptø.

⁹ Inchawei Señorbe nuyasiitø kønrrab pønrramisra pønrrabelane, maig inchibig køtashchab asamig puin pønrrøben, truyugurri wesrappe, sølgandø tabig marmeelane esegappa pønsrøbig køn, tru maig kønrrabigwan asha marøb kwaløm møra melønrrai maramig. ¹⁰ Asr purø trømbøigwan marøg kui inchen tru kuindø marøb, katø ashib karub pønrrabelan mundøgucha mørmø kaashib, øyeeg inchibelanwei treeg martrab køn. Iiløbe chine maram patsiilø, purø nørreelø kømmøø inchib, srømbalasrø ashib karub pønrrabelan nørreelanguen chigøben tsalø wamamig kørikkengar køn. ¹¹ Trune ángelesmera murelø kuigu lata, nòmui maramburab maramig tøgagüigu lata, tru møguelø lataguen kòmø, mas nørreelø købenguen truiløbe, tru srømbalasrø nørreelø karubelan Señorwei merrab tsalø wamømeelø køn, kaig nebuig møra pønrrøbash chib.

¹² Trune tru i møgueløbe chigüinguen mørmubendø, chigøben tsalø wamabelø køn. Kan animalmera købgunrriguelø, chugüinguen mørmeelø, ka merrarrawa tøgagønrraimba, pinisailø kòmigweyasiibatø kal-lawar køn, nòmui kaig marøb pønrrainuutø chab pinønrrabelø. ¹³ Nømbe sølgandø tabig marmuimburøbe nømbe sølgandø tabig mariimøitøwei utønrrun. Kaguende nømbe kwalømguen nòmui asr maig miaben, kaig maramelane, purø tabig mørørai inchib, kasrag marøbelø køn. Truiløbe køsøngønrrapteelø, chillig inchib mindishibelø treelø køn. Nøm ñimba lincha mab warainug, kaig kegørrøsrkøbigu purø tab kui mørøb nømbe warabelø køn.

¹⁴ Kan mun køben ashippe, ka yandø ashmøtø, truib a itølulrrab isua ashib, katø chigøben kaig maramigwane muraaraig mørmø marøbelø køn. Katø Tiusweimburabeløyu kullaateelane chull asingarua purø may kegørrøsrkøb, katø parø indamigwangucha neyu kusrebelø køn. Truiløbe kaig nebuig pønrrønrrai pønsraig misamera køn. ¹⁵ Sølgandø tabig amønauig mayugurri tarømisra, tru Beorwei nusrkai Balaam taig maig marøb unigwan merrarrawa amba pelig køn. Tru Balaamma kaig mara an pagaraig utamigwan undaaraben, ¹⁶ tru nø treeg marigwane nune mur namig køn. Kan mula waminchimig købendø, møwei wamdøga wamincha, Tius tru maig karuigwan eshkabig chugüinguen mørmø marigwan pasram merrarraig køn.

¹⁷ Tru treeg misaamerabe kan kølømmø piguamera chi pigaiig, purgølig latailø køn, kan wañimera mur isig icha srua ambi latailø. Truilane purø trømbø løstøyu pønrrønrrai pønrsrailø køn. ¹⁸ Nòmui wambe ke purab nørreelø ke ka waminchig køptø wamincha, asr maig marøg kui inchen, tru kuindø trømbøig treeg mariiløtøga kegørrøsrkøbelø køn, kailai utu meløwa, ke kaimabsrua tru kaig mayugurri wegørrarwan. ¹⁹ Nømbe katøganelan 'chi iløsrkaimig elatsiilø kønrrai martrumøn' chibelø køn, nømdøweinguen trømbøig asamguengaig køsøngønrraptiig mariiløyu truitø srua ambiilø købendø. Kaguende møitøgucha nø chi marøb pasrailø

kanarramabiibe, yandø truitø srua yaim pasran. ²⁰ Kaguende namui Señor Jesucristo tru Kaigyugurri Wesrabigwan nebua asha, i pirau kōsōngōmdiiḡ maramigurri yandø wegōrra, katōyug ōyeeg kaig mariilōyutōwei ilōsrka, truitø srua irramabelōbe, katōbe srōsrō lataguen kōmō, purō kailōguen kōrrōmisran. ²¹ Trembe tru sōlgandō tabig amōnam maywan nebua ashmuig kuinguen sōl kōbsruinrrun nōmuimbe, yandø truigwan nebua asha, tru maig maramigwan martrai pasrig newan tabigugurri katōle tarōmisra ibgunrriibe. ²² Inchendō nōmune misaamera ōyan taibe ciertonwei nebuin kōn: “Werabe nuña, katōle trunundōwei man” taig. Inchen: “Kuchibe chab pirendø, katōle chilligutōwei latōgusan” taig.

3

Señor katø arrumig

¹ Nai undaarailō, na ñimun srōsrō pōrig kōmnetō katōgan na ñimun pōrtrab inchar. Srōsrō pōrigu lata, mōim pōrigu lata, ōyeeg, ōyeeg melōnrrigay chib watchab inchar. ñimui tabig chishchig isuilōyu. ² Katō Tiusweindō tarōmariilō Tius maig karuigwan eshkalabelō merrabsrōwei wamingdigwanba, Jesucristo tru nōashib karua ōriilō ñimun kusrenanig, Señor tru Kaigyugurri Wesrabig martrai karua pasrigwanba, ñim pesannamō isua kōnrrai ñimun pōrar.

³ Incha iigwanmerrig isua kuy: srabe kwalōmmerawane misaamera Tiusweimbura-bigwane ka indzatō ashib, chigōben cha mōrōbelō treeg inchib amrrunrrun, nōmui asr maig palai inchen treeg marōbelō. ⁴ Inchabe trenchinrrun: “Cristo tru katō attrab cha kōrrōmisriibe ħmandiindah? cha. Chima tru merrabsrō namui kōlli misaamera kwaikkurrimbunō, katō srōsrō pirōwan marikkurrimbunō maig kōbiibe trubatō kagōn” cha. ⁵ Kaguende i misaamerabe iigwan nebua ashibelō kōbendō, ashmeelō misrōbelō kōn, tru srōmbalaba, pirōbabe treeg kōnrrai Tius trendaikkurri merrab manasrōwei pōnrrabig kui. Inchen tru pirō pimerayugurri webarrubiibe, katō pitōgatōweim pasrabig kui. ⁶ Inchawei tru urassrō pirōwanma sre pua pi pulingarua, chab pinisaig kōbig kōn. ⁷ Inchen srōmbalameraba, pirōba Tius treeg kōnrrai nō trendaikkurrindōwei mōin kwalōm pōnrrabelōbe, naatōga parramig kōnrrai esegain pōnrran tru maig maramigwan Tius asha maram kwalōmwēimba, katō tru kaig misaameran pinisailō kōm kwalōmwēimba.

⁸ Katōgucha iigwan isua kuy, nai undaarailō: Señorweimbe kan kwalōmdō mil años lataig kōben, mil añosbe kan kwalōmdō lataig kōn. ⁹ Señorbe nō treeg martrab misra kōrrōmisrigwane, peguen marmō ka pinaptinchab kōmōtō kōn, mōilōbe treeg martrab taigwan peguen marmōnmab isua tōgagūindōgucha. Treeg kōmōtō, nōbe ñimun tammay muniitō, muniitō wabig kōptō, mugucha ka pinōnrrain kōmōtō, mayeelōba nōmui kaig mariilan isua mōra, Tiusweimay lliiranrrai indan.

¹⁰ Pōs tru Señor arrum kwalōmbe kan nilliig arrub lataitōwei chi isumō kōben attrun. Inchen srōmbalamerabe purō trōmbōig kōrig kōmdiiḡ wanrōb nōrōtō misren, katō truyu chine pōnrrabelōbe naarab pill-llanrrun. Inchen pirōba, truyu chigurrimbunō pōnrrabelane kerrigu parra, pinisaig kōnrrun.

¹¹ Inchawei kerriguba ōyeeg kenaguen kōmīḡ chab mindishib pinisaig kōnrrabig kōbene, ħTiusweyasiitō tarōmisra amōñib, katō ke nundō isub tabig lliirab amōnamig truren palan! ¹² Tius tru arrum kwalōmwan muniirab, ke petō punrraimab inday. Tru kwalōmbe srōmbalamerabe naarawa, chab pinōben, chigōben truyu pōnrrabiibe tru naarabig chab piranrrun. ¹³ Tius tru tranrrab misra kōrrōmisrigwan nambe munig meler, tru srōmbala srōigwanba, srō pirōwanba truilōyube tru sōlgandō tabig marig tōgaigwan.

¹⁴ Inchawei nai undaarailō, tru iilan munig kōppatō, chishchig, ñimbe mu mandamgailō, nōba chi isumgaig nai merrab treeg pōnrramigwandō truba truba tranrrab muniiray. ¹⁵ Ñimbe iigwan isua asha tōgaguy, namui Señor truba tammay muniitō, muniitō waibe, nam kaigyugurri wesrailō kōmigweyasig kui. Iigwandōwei namui undaraig nuneg Pablogucha pōrin kōn ñimun, Tius nun maig kusrebig kōnrrai traniiitōga. ¹⁶ Nui pōriilōyu trumōrig iilan nōbe ñimun wamindan, truilōyu kanbalōmerabe tab chigūinguen mōramgailō kōben, truburab nebua ashmeelōba, tab pōnrrōmeelōbabe Pabloi pōriilan ke ka kalō marōb, peemaytō kusrenanan, Tiuswei wam pōriilan katōganbalōmerasrō lataitōwei. Nōm treeg marōppe, nōmdōwei pinisailō kōmigwan lab pōnrran. ¹⁷ Inchawei nai undaarailō, iigwan yandø kanmaytō chab wammōrabe, tab asha amōnay, tru larrō kailō may wamindiitōga ñimun pelōsrka, ñim tabig mur pōnrrainukkurri kōrrōsrkainab pōnrrōmōnrrappe.

¹⁸ Masken ñimbe namui Señor Jesucristo tru Kaigyugurri Wesrabigwan katōguchinguen tab nebua ashib, katō nui ka yandø tab indigu nōrrōrab inday. Purō nuig, purō tōriibe, mōiya lata, managatig nuyasiitō kōnrrun. Treeg kōnrrun.

1 San Juan

Øsig kømigwan tranøb wam

¹ Nabe ñimun iigwan pørøppe, tru srøsrøgurri købigwan tru nam mørigwan, namashib namui kaptøga asigwan; maig kətashchab nam tab asigwan, namui tasiimeratøga katørab indigwan, tru Øsig køm wamweimburab pører. ² Tru øsig kømibe yandø ashchai kenamisren, nabe trunun asig køn. Incha nabe trunun øyee chib wammørørskøb eshker, tru managatig øsig kømigwan. Truibe Møskaimba pasrøwa, namun kenamisrig køn. ³ Nam ashib, nam mørøb indigwan, trunun nabe ñimungucha wammørørsker, ñimungucha namba kandø lataig kandø isua pønrrønrrai. Inchen tru nam kandø lataig kandø isua pønrraibe, Møskaimba, nui Nusrkai Jesucristoba pønrraig, truiig køn. ⁴ Iilan nabe ñimun pører, namui kasrag købigwan newan tøgagønrrab.

Tøryu amøñib

⁵ Jesucristo namun wammørørskøb kusrenanigwan mõi ñimun nam eshkaibe iig køn: Tiusbe tør køben, nuinuube chigucha løstiibe kaagøn cha trendaig. ⁶ Nabe nøba kanbalatø tab lincha pønrrer chibendø, nam løstøyutøwei amøñibene, nabe ka isatø indig webiben, tru newan ciertonig maig køben treeg amønaig kømøtø webinrrun. ⁷ Tius tøryu pasrab lataitøwei nam tøryu amøñibene, trumaybe nabe kangurri kangurri kandø isua lincha pønrrer. Inchen Tiuswei Nusrkai Jesucristoi animbe chigurrimbunø namui kaig marigwan chish maran.

⁸ Nabe 'chi kaig marig chigar ker' chib pønrrøwabe, namasiitøwei kegørrab pønrrøben, tru newan ciertoniiibe namuinug pasrømøn. ⁹ Nam chigøben kaig mariilan 'treeg marøbwei inchar' cha Tiuswan eshkaibene, nøbe namui kaig mariilan ulø paymø pesannab, chigurrimbunø namui kaigwan chish marøb indamig nøbe chi isumgaig sølgandø marøbig køn. ¹⁰ Inchen nam 'chigucha kaig mara kømeelø ker' chib pønrrøwabe, trube, nabe Tiuswane ka isaptiig kui mara tøgagøben, nui wambe namuinug pasrømøn.

2

Namuimburo purøwaminchibig Jesucristo

¹ Nai ureezheelo, iigwan ñimun pørar ñim chigøben kaig marmønrrai. Møikkøben kaig marindøgucha, namuimburo Møskawei merrab kan purøwaminchibig tøgaguer, Jesucristo tru sølgandø tabigwan. ² Namui kaig mariiløgurri Tiuswei namig købigwan nø uta pasramisra namuyasig nø kwaig køn, trurrigu namuiwandø kømøtø, yu pirau maya misaamerai kerriguelaimba.

³ Tius maig maramigwan martrai pønrrailan nam møra marabe si, trube, nam nun nebua ashibelø kermab asamig kønrrun. ⁴ Inchen møikkøben: "Nabe Tiuswan ashibig kur" chibendø, nø maig maramig martrai karuilan møra marmubene, trube isaptiig kui webiben, tru newan ciertoniiibe nuinuube pasrømøn. ⁵ Trune Tiuswei wam maig karuigwan møra marøbig, trube si, Tiuswan kerrigu newan tabig undaarabig misrin køn. Trumaybe nabe nøba kanbalatø lincha pønrrermab aser. ⁶ Møikkøben Tiusba kanbalatø lincha pasrab chibiibe, Jesucristo nø maig uñibig køben, treetøwei unamig køn.

Kan srøig martrai karua pasrig

⁷ Nai undaarailø, i maramigwan martrai karua pasrigwan na ñimun pøriibe srøig kømøtø, tru ñim merrabsrøngurri trendø tøgagüig truitøwein køn, tru martrai karua pasrig tru trendø merrabsrøngurri tøgagüig tru wamwan ñimbe møra køn. ⁸ Inchen køben nabe ñimun martrai karua pasrig ñimun srøig pørar, nuinug lata, ñimuinug lata ciertonig. Kaguende tru løstiibe yandø pureb iben, tru tør newan ciertoniiibe yandø pilabguen pasran.

⁹ Møikkøben 'tøryu pasrar' chibendø, nui nunewan tsalø inchibiibe katøgucha løstøyu srø pasran. ¹⁰ Inchen nui nunewan undaarabiibe tøryu pasran. Incha nuinuube srørrængwangerubiibe chigagøn. ¹¹ Inchen nui nunewan ashig kømui inchibiibe løstøyu pasrab, katø løstøyu unan. Incha nøtøwei chumay ib pasrarmabguen ashmøn, kaguende løstiibe nui kabmeran ashmønrrai kasrøben.

¹² Ñim ureezheelan, na ñimun pørar.

Kaguende Jesucristoi munchigurri ñimui kaig mariilan ulø paymønrrab pesannaig køn.

¹³ Na ñim mōskalan pørar,

kaguende srøsrøgurri manawei nø pasrabigwan ñim nebua ashibelø kuimba.

Na ñim matsørelan pørar,

kaguende Satanás, tru larrø kaigwan ñim kanaig kuimba.

Na ñimun ureezheelan pørig køn,

kaguende Møskawan ñim nebua ashibelø kuimba.

¹⁴ Na ñim mōskalan pōrar,
kaguende nun srōsrōgurri manawei pasrabigwan ñim nebua ashibelø kuimba.

Na ñim matsōrelan pōrig kōn,
kaguende ñimbe kōrrōmō,
mur pōnrrabelø kuikkurri,
katø Tiuswei wam ñimui manrrau pasrōben,

Satanás, tru larrø kaigwan kanaig kuimba.

¹⁵ Yu pirauigwan purø undaaramōwei, katø yu pirau chi kōbigwangōba undaaramōwei indamig kōn. Mōikkōben yu pirauigwangōba undaarabene, Tius Mōskawei undag kōbiibe nuinuube kaagōn. ¹⁶ Kaguende yu piraugurri arrubiibe, øyeeg kōn: asr maig marōg kōben mariilø, kaptōga chigōben chull asiilø, katø namui chigōben kōbitōga truba nōrreelø kōmmōrø indilø. Øyeelōbe Tius Mōskaweinukkurri arrumtø, yu piraugurrindōwei arrubig kōn. ¹⁷ Inchendø pirōbe, katø truyu chigurrimbunø chull indilōbañau patsab iben, trune Tius maig kōnrrain kōben treegwan marōbiibe managatig øsig kōnrrun.

Criston ashig kōmui inchibelø

¹⁸ Ureezheelø, yandø srabe kwalōmmera puin kōn. Tru Criston ashig kōmui inchibig attrab kui ñimbe wammōrōbelø kōn. Inchawei mōi yangucha tru ‘Cristo ker’ chibelø truba truba amrruin kōn. Treekkurri nabe yandø srabe kwalōmmera kui aser. ¹⁹ Truilōbe namui utugurri webambuppe, webambubwei inchendø, namuielø kōmuig kōn. Pōs namuielø kui kuimbe, namba pōnrrabig pōnrrabsruig kuinrrun. Inchendø webambuppe, ke mayeelōbabe kerrigu namui utuelø kōmuin kui tōrgandø ashchain kuig kōn.

²⁰ Inchendø ñimbe Espiritu Santoiwan itōlusig tōgar kua, treekkurri ñimbe chiwandōgucha ashibelø kōn. ²¹ Nabe ñimun pōrōppe, newan ciertonigwan ashmeelø kuimba kōmōtø, ñim ashibelø kuimba pōrar. Katø ñimbe ashibelø kōn, chitōgucha isatø indiibe tru newan ciertonigugurri arrumig kuin kui. ²² ¿Tru isaptiibe mu kerah? ¿Tru isaptiibe Jesúswan ‘Cristo kōmōn’ chibig kōmuitarru? Iig kōn tru Criston ashig kōmui inchibiibe, tru Mōskawan lata, Nusrkawan lata ‘Tius kōmōn’ chibig, truig. ²³ Mutōgucha Nusrkawan ‘ashmīg kur’ chibiibe Mōskawangucha chigaig kōn. Inchen mōikkōben Nusrkaweimburab ‘nōbe mu kui ashig kur’ chibiibe, truibe Mōskawangucha treetōwei tōga pasran.

²⁴ Inchawei ñim srōsrōgurri wamindi mōrigwane truyutø pōnrrabig pōnrrōnrrab inday. Tru ñim srōsrōgurri wamindi mōrōb amrruig ñimuinug pasrabig pasrōbene, trube, ñimgucha Nusrkaweinuuba, Mōskaweinuuba pōnrrabig pōnrrōnrrabguen. ²⁵ Inchen Jesucristo tru namun tranrrab misra kōrrōmisriibe iig kōn, tru managatig øsig kōmig.

²⁶ Na ñimun iigwan pōrōppe, isatø may wamincha ñimun kegōrrōsrkōnrrab inchibelaimburab pōrar. ²⁷ Pōs ñimuimburappe, tru Espiritu Santoi itōlusigwan ñim nun uta tōgagūig ñimui manrrau pasrabig pasraikkurri, ñimbe mu katōgane chi kusrennamig palain kōmōn. Kaguende tru itōlusiitōwei ñimune chiwandōgucha kerriguh kusrenanen, tru kusrenaniibe ciertonig, ka isatø indig kōmōwein kōben, nui Espiritu ñimun maig kusrenanen, trumay Cristoinug pōnrrabig pōnrray.

²⁸ Inchawei ureezheelø, mōimbe nuinug kanbalatø pōnrrabig pōnrray, nō kenamisren, chi isumø, nui merrab pōnrrab, katø, nō arruben, nui merrab kōrig misra kōrrōmisramig kaanrrai. ²⁹ Jesucristobe sōlgandø tabig kui ñim ashibelø kuabe, trube, mutōgucha sōlgandø marōbelane Cristoinug kal-lawar kuin kui asamig kōn.

3

Tiuswei ureemera

¹ ¡Au ñimguen asay! Tius nui undag kōbig namun yeeg nuig tranigwan, Tiuswei ureemera kōn chaguen wamiielø kōmnegatig. Pōs nabe treelōwein ker. Treekkurri pirau misaamerabe namune ashmeelø kōn, kaguende nōmbe Tiuswan ashmeelø kua. ² Nai undaarailø, yandø nabe Tiuswei ureemera ker. Incha namune mōimbatōbe tru wendōsrø nam maig kōmigwane kenamarmø srø kuindōgucha, yandø Jesucristo kenamisrene, nō lataitōwein kōmig kōnrrab kui nabe asha ker. Kaguende nō kaig kuigwan yandø truyube nam nebua asam kōnrrab kōn. ³ Mōitōgucha nuinuube treeg punrraitamab isua munig megamig tōgaibe nōasiitø nui manrrōwan chishchig tōgagōn, Jesucristo chishchig kōb lataitōwei.

⁴ Mutōgucha kaig marōbiibe tru maig maramigwan martrai Moisés pōrigwane kalø marōb itōbunan. Kaguende tru kaig mariibe tru pōrigwane itōbunig, treeg kōn. ⁵ Ñimbe yandø ashibelø kōn, Jesucristobe yu piraumay arruppe, namui kaig mariilan kerranrrab arrig kui. Katø nuinuube chigucha chi kaig mariibe kaagōn. ⁶ Mutōgucha nuinuutø pasrabig pasrabiibe kaigwan marōbig marmuben, katø mutōgucha kaigwan marōb uñibiibe nune

ashmøwei, katø mu kui nebua ashmüg køn. ⁷ Ureezheelø, mugøben ñimun peløsrkainab pørrønrabb kømø. Sølgandø marøb uñibiibe, sølgandø tabig køn, Cristo nø newan sølgandø tabig køb lataitøwei. ⁸ Kaigwan marøb uñibiibe nugwaimandzigwein køn. Kaguende nugwaimandziima srøsrøgurri kaigwan marøbig køn. Inchawei Tiuswei Nusrkai kenamisrøppe, tru nugwaimandzig kaig marillan pinishinrabbwein kenamisrig køn.

⁹ Mutøgucha Tiusweinug kal-labiibe kaigwane marøb uñmøn, kaguende tru øsig kømig Tiusweinug pasrabig nuinug pasrøben. Treekkurri kaigwane marøbig martrab kaiman, kaguende nøbe Tiusweinug kal-laweig kuikkurri. ¹⁰ Møilø Tiuswei uremera kuin kui, katø møilø nugwaimandzigwei uremera kuin kui, øyeegu nebua asamdiig køn: mutøgucha maig kønrrabigwan sølgandø tabigwan marøb uñmøwei, katø nui nunewan undaaramøwei inchiibiibe Tiuswein kømøn.

Kangurrin kangurri undaarayagun

¹¹ Kaguende Tiuswei wamwan srøsrøgurri ñim wamindi møriibe iig køn: nam kangurrin kangurri undaarayamig. ¹² Cain lataitøwein kømugun. Truima tru kwaimandzig, larrø kaigwein kua, nui nunewan kweetsig køn. ¿Nøbe chigurriin kweetsig køh? Kaguende Cain nø mariiløbe kaig mariilø køben, nuneg mariiløbe sølgandø tabig mariiløgurriin kuig køn.

¹³ Nai nunelø, kan ¿øyebe chincharre? treeg kermab isumøtay, pirau misaamera ñimun ashig kømui inchene. ¹⁴ Nambe kwamigugurri øsig pønrramnuumay puraamba pønrrabrain kui, asha pønrrer, kaguende namui nunelan nam undaarabelø kuikkurri. Nunewan undaaramibe kwamigugurri webimø, srø pasran. ¹⁵ Mutøgucha nui nunewan ashig kømui inchiigøba uñibiibe kweechiptiig køn. Ñimbe ashibelø kuinrrun kan kweechiptiibe tru managatig øsig kømigwane chigaig kui. ¹⁶ Jesucristobe nui øsig kuigwan namuyasig trana, kwaben, øyeeg marigu nui undag købigwan nambe truyu nebua aser. Inchawei namgucha treetøwei namui nunelayasig nam øsig pønrraigwan tranamig køn. ¹⁷ Inchen møikkøben yu pirau chi palømig tøgag købendø, nui nuneebe palaig megamne trunun ashatøgucha merø kui inchiib, purugumubene, trube ¿Tiuswei undag købiibe nuinuube chinha pasrønrabb kø? ¹⁸ Nai ureezheelø, undaarappe, ka wamdøgatø kømøwei, ka wamincha møriitøgatø kømøwei, ñimui mariiløtøga kenamarøb, cierton undaarayagun.

Tiuswei merrab chi isumø pønrramig

¹⁹ Nam øyamay marøb pønrrøwabe, newan ciertonigweimburabeløyu pønrrabelø købrain kui møra, yandø namui manrrømeran Tiuswei merrab chi isumø tøgga pønrramig kønrrun. ²⁰ Namui manrrøguen namun chiwan køben kalø køn chib kebachib pasrøbene, Tiusbe namui manrrø lataitøguen kømø, purø nuig kui køppe, nøbe chiwandøgucha kerrigu ashibig køn. ²¹ Undaarailø, namui manrrø chiyu køben 'kalø køn' chib namun kebachimubene, nambe Tiuswei merrab chi isumø pønrramig tøgaguer. ²² Incha katø nam chigøben nun miawabe, nun utønrrun, kaguende marmø kømø, nui maig maramigwan martrai pønrrailan nambe møra marøb, katø chiwan køben nui merrab marøppe, nun kasrag kømdiig marøbelø kuikkurri. ²³ Inchen martrai tru nø karua pønrraibe iig køn: nui Nusrkai Jesucristoi munchiyu køreb, katø kangurrin kangurri nø maig karuig køben treeg undaarab indamig. ²⁴ Nui maig maramigwan martrain pønrrailan møra marøbeløbe Tiusweinutø pønrrabig pønrrøben, katø treetøwei Tiusbe nømuiinug pasrabig pasran. Øyeekkurri Tiusbe namuinug pasrai asha ker, tru Espiritu Santon namun tranig truikkurri.

4

Espiritumeran Tiuswei Espiritu køtashchab tab asamig

¹ Nai undaarailø 'nambe Tiuswei Espiritutøga waminchibelø ker' chibelan mundøgucha ke chi tain kuindø køreb pønrrømtøyt. Treeg kømøtø, nøm espiritu tøgagüigwan maig køtashchab ashimerrig asamig køn. Tiuswei Espiritu kuin kui, kabe peg espiritu kuin kui. Kaguende yu piraube webambin køn ka isatø 'Tius maig karuigwan eshkabelø ker' chibelø.

² Ñimbe Tiuswei Espiritun øyeegu ashchun: chi espiritutøgucha 'Jesucristobe møg misra arrig køn' chibiibe si, trube Tiusweinukkurri arrubig kuin kui. ³ Inchen chi espiritutøgucha 'Jesucristobe møg misra arrumuig køn' chibiibe, trube Tiusweinukkurri arrubig kømøtø køn. Trube tru Jesucriston ashig kømui inchiib tsalø inchiibigwei espiritu køn, tru attrab køn taigwan ñim wammøra kuig. Incha mømibe yandø chabguen yu pirau pasrabguen indan.

⁴ Nai ureezheelø, ñimbe Tiusweyelø kua, tru isa waminchipteelan ñimbe chinchamamø, kanawa puraambin køn. Kaguende ñimuinug pasrabiibe, pirau pasrabig lataig kømø, mas purø nuig køn. ⁵ Nømbe yu piraeløtø kua, yu pirau chi købigwan nøm waminchen, yu piraeløbe nømune ke tru kuindø møran. ⁶ Inchen nambe Tiusweyelø ker. Inchawei mutøgucha Tiuswan nebua ashibiibe namune møren, Tiuswan ashmübe namune mørmøn. Øyeegu nambe aser, tru newan cierton Espiritunba, katø tru isa peløsrkøptø espiritunba.

Tiusbe tru undag købig køn

⁷ Nai undaarailø, kangurrin kangurri undaarayagun. Kaguende undag købiibe Tiusweinukkurri arrubig køn. Inchen mutøgucha undaguibe Tiusweinug kal-laweig køb, katø Tiuswan nebua ashib inchibig køn. ⁸ Undag købigwan chigaibe Tiuswan nebua ashmig køn, kaguende Tiusbe tru undag købig køben. ⁹ Tius nui undag købigwan namun kenamarøppe, øyamay kenamarig køn: tru nui kandø Nusrkawan yu piraumay øra, nøgurri nam srøig øsig kømigwan tøgagønrri. ¹⁰ Tru undag købiibe øyeeg marigu pasran: Tiuswan nam undaguelø kuig kuimba kømøtø, nø namun undaarawa, nui Nusrkawan nam kaig mariilaimburø Tiuswei namig købigwan nø utab namuyasig kwanrrai ørigu.

¹¹ Nai undaarailø, Tiusma namune øyamay undaaraiw købene, namgucha treetøwei kangurrin kangurri undaarayamig køn. ¹² Mugucha Tiuswane managen asiibe kaagøn. Inchendø nam kangurrin kangurri undaarayabene, Tiusbe namuinug pasrabig pasrøben, nui undag købiibe namuinug kerrigu newan tabig pasramisrin køn. ¹³ Nambe nuinug nøba pønrrabig pønrrab, katø nøbe namba pasrabig pasranmab asamig kønrraimbe, nø namun nui Espiritun tranikkurrin køn. ¹⁴ Incha nambe namashib asha, maig kuigwan eshker, Tius Møskai nui Nusrkawan yu pirau misagwan Kaigyugurri Wesrabig kønrrai ørigwan. ¹⁵ Møikkøben 'Jesúsbe Tiuswei Nusrkain køn' chibiibe Tiusweinuutø pasrabig pasrøben, katø Tiusbe nuinug pasrabig pasran.

¹⁶ Tius nui undag købigwan namuimburab tøga pasraigwan nambe nebua ashib, køreb inder. Tiusbe tru undag købig køn. Inchen møikkøben undag købigwan tøga pasrabiibe Tiusweinug pasrøben, katø Tiusbe nuinug pasran. ¹⁷ Øyamaybe Tiuswei undag købiibe namuinug kerrigu newan tabig kørrømisran, Tius tru maig kuigwan asha marøb kwalø m nambe nun chi kørmø pønrramig kønrrai. Kaguende Jesucristo maig køben, nambe yu pirau treelø ker. ¹⁸ Inchawei undag købig pasrøbene, kørig købiibe chigagøn. Masken treeg kømøtø, undag købig kerrigu newan tabiibe kørig købigwane kerrigu tarømaran. Kaguende kørig købiibe tru purø trømbøig attrabigwan utam kønrrab kuimba køriiran. Møikkøben kørig købigwan tøgaiibe katøgucha tru undag købigwan kerrigu newan tøgagø mø, palab pasran.

¹⁹ Nambe undaarabelø ker, kaguende Tius nømerrig namun undaaraiw kua. ²⁰ Møikkøben: "Nabe Tiuswan undaguig kur" chibendø, nui nunewan tsalø ashibiibe, truiibe treeg kømubendø, isaptiig køn. Kaguende nui nunewan nui kaptøga asigwanguen undaaramiibe mas Tiuswan kaptøga mana asiimigwane ¿chinchin undaarannrab kø? ²¹ Katø tru martrai Tius nø karua pasrig iigwan tøgaguer: Tiuswan undaguibe katø nui nunewangucha undaarau taigwan.

5

Isubigwan Jesucristoinuutø pasra tøgagütøga chi arrubigutøgucha puraambub

¹ Mutøgucha Jesúsbe Cristo kuitamab kørebiibe Tiusweinug kal-laweig køn. Incha mutøgucha Møskawan undaarabiibe katø truiigwei uregwangucha undaarann. ² Nambe øyamay tru Tiuswei uremeran undaguelø kermab wetøgørrer, Tiuswan nam undaarakkurrimba, katø nui tru maig maramigwan martrai pønrrailan møra marikkurrimba. ³ Tiuswan nam undaaraiibe nui tru maig maramigwan martrai pønrrailan nam møra marig, truiig køn. Inchen tru martrai nø karua pønrrailøbe ke martrab kaimamdiibe kømøn. ⁴ Mutøgucha Tiusweinug srøig kal-lawaiibe yu pirau chine pureb arrubigu kebeñmø, purayan. Tru namun pirau treegu kebeñmø, kanawa purainrrai marøbiibe tru namui isubigwan Jesucristoinuutø pasra tøgagüig, truiig køn. ⁵ ¿Yu pirau chine pureb arrubigu kebeñmø, kanawa puraibiibe mu køh? Jesúsbe tru Tiuswei Nusrkain kuitamab kørebig, truitøwein køn.

Tiuswei Nusrkaweimburab maig kuigwan eshkab

⁶ Tru pitøgaba, anindøgaba arrubiibe, tru i Jesucristo køn, pitøgatø kømøtø, pitøgaba, anindøgaba arrubig. Tru treeg arrigwane Espiritu Santo eshkan, kaguende tru Espiritube tru newan ciertonig kua. ⁷ Inchawei pøn køn, tru 'treeg køn' cha eshkabeløbe. ⁸ Truiløbe Espiritu Santoba, piba, animba køn. Inchen tru pønbe chi pegwan waminchimøtø, trunundøwei wamindan. ⁹ Møguelø 'treeg køn' cha, eshkaigwanguen nam ka utiibe, Tius namun 'treeg køn' cha, eshkawa pasriibe treetøguen kømø, purø nuikken køn. Kaguende Tius 'treeg køn' cha, nø eshkawa pasrøppe, nui Nusrkaweimburab wamindig køn. ¹⁰ Tiuswei Nusrkawan kørebiibe, Tius nui Nusrkaweimburab 'treeg køn' cha, eshkaigwane nøasiitø nui manrrau tøga pasran. Trune Tius maig taigwan køremiibe Tiuswane ka isaptiig kui lataig maran, kaguende Tius tru nui Nusrkaweimburab 'treeg køn' cha, wamindigwane treeg kuitamab køremuikkurri. ¹¹ Inchen Tius tru 'treeg køn' cha, wamindiibe iig køn: 'Tru managatig øsig kømigwan Tius nø namun tranen, tru øsig kømibe nui Nusrkaweinug pasran' taig.

¹² Inchawei Nusrkawan tōgaibe tru øsig kōmigwan tōgagøben, Tiuswei Nusrkawan chigaibe tru øsig kōmigwan chigaig kōn.

Maig kōmigwan srabe wamindilø

¹³ Ñim Tiuswei Nusrkawei munchiyu kōrewa pōnrrabelan nabe ñimun iigwan pōrar, managatig øsig kōmigwan ñim tōgar kui ashchai.

¹⁴ Inchawei nambe Tiuswane chi kōrmø kemalla miamdiig kui aser, kaguende nam nun chigøben miappe, nø maig kōnrrain køben nam trumay miabene, nøbe namune mōrøbig kuimba. ¹⁵ Trube, nam chigøben miailan nø mōrøbig kui ashibelø kuig kōppe, namun chigøben paløtan cha, nam miawa pōnsrailane, trube, utabgwen indermab isumig kōn.

¹⁶ Møikkøben ñui nunewan kaig marøb pasrai asig, tru managatig mōra pasramsromay srua inrrabgaig kōbene, nuyasig Tiuswan 'purugurra' cha miamig kōn. Inchen trui gwane Tiusbe nui øsig kuigwan tōgagønrrai tranrrun. Iibe kalø marig ke kwamigugatig srua inrrabgaigwan marøbelayasig kōn. Kaig marig kwamigugatig srua inrrai marøbikkucha kōn. Trui gweweimburappe, Tiuswan 'purugurra' cha, nabe miay chimur. ¹⁷ Chigurrimbunø sølgandø tabig mariimibe kaig marig kōrrømisran. Inchendøgucha tru kaig mariilø mōiløbe tru managatig mōra pasramsromay srua inrrabgailø kōn.

¹⁸ Mutøgucha Tiusweinug kal-lawaiibe kaig maramigwan marøbig marøb uñmuin kui aser. Kaguende tru Tiuswei Nusrkai nune ashib tōga pasrøben, tru kwaimandzig, larrø kaiibe nune chinchab kaiman. ¹⁹ Nambe Tiusweyelø kermab asha pōnrrer. Inchen yu pirauigwane kerrigu mayamba tru kwaimandzig, larrø kaiibe nø merrarrowa, nø ashib karub pasran. ²⁰ Katø Tiuswei Nusrkaimbe arrua, namune chigúi mōramigwan tranin kui aser, tru newan ciertonigwan nebua ashchai. Incha nambe kanbalatø pōnrrer tru newan ciertoniguba, tru nui Nusrkai Jesucristoinuuba. Truibe tru cierton Tius køb, katø managatig øsiguig køb kōn. ²¹ Nai ureezheelø, tru taska mari tiusmerane mendamisray.

2 San Juan

Ciertoniiba, undag køibiiba

¹ Na, Tiusweimburabelan pera marøb pasrabig i kilgawan pørar, Tius lawa wesrua tøgagúig ishuumisagwan nui ureemeranba, tru na newan ciertonigu undaarailan. Katø natø kømøtø, mayeeløba tru newan ciertonigwan nebua ashibeløbe truiløgucha ñimune undaaran. ² Nabe ñimun undaarappe, tru newan ciertonig namui manrrau pasraikkurrin køn. Inchen tru ciertoniibe namba managatig pasrønrrun. ³ Tius Møskaweimba, katø Señor Jesucristo, tru Møskawei Nusrkaweimba, nui ka yandø tab indig køben, namun lastima asig køben, chi isumgaig tab købig køben namuim pala pønrrørrun, tru newan ciertoniguba, undag købiguba.

Undaguelø kømigwan karua pasrig

⁴ Nabe truba truba kasraarar ñimui ureemerai utu møiløgøben Tiuswei newan ciertonigu amønain kuimba, Tius Møskai namun maig karua pasrig køben, treekke. ⁵ Ñi, ishug misagwan, na mõi ñun pørigwan, martrai kan srøig karua pasra pørig kuig lataig inchimørrunrig chinrrainchar. Treeg kømøtø, tru srøsrøgurri namun maig karua pasrigwan trunundøweim pørar, tru kangurrin kangurri undaarayagun taigwan. ⁶ Iig køn nam tru undag købigwan tōga pønrramibe, Tius tru maig maramigwan martrai pønrrailan trunun mōra marøb amønaimig. Inchen tru martrai karua pasrigwan ñim srøsrøgurri mōriibe undag købigu amōñinrrain taig, truig kuig køn.

Namui isubigwan Cristoinug pōnsra amōnaig

⁷ Pøs yu piraube isa may wamincha kegørrøsrkøbelø truba truba webambin køn 'Jesucristobe yu piraumay mōg lataig misra arrumuig køn' chibelø. Øyeeg inchibiibe tru may wamincha kegørrøsrkøbig, tru Criston ashig kømui inchib tsalø ashibig, truig kønrrun. ⁸ Ñimasiitøwei tab asha melay, ñim chigøben tabig marøb melailan kaptøasha pønrrømønrrappe. Treeg kømøtø, ñimui utamigwan kerrigu newan utamig kønrrai melay.

⁹ Møikkøben Cristo kusrenanigutø pasrønrrab inchimøtø, nuinetø nemarøb purab kusrenrrab inchibiibe, Tiuswane chigaig køn. Trune Cristo maig kusrenanigutø pasrabig pasrabiibe, truiibe si, Møskawanba, Nusrkawanba tōgaig køn. ¹⁰ Møikkøben ñimuinug arrua, tru treeg kusrenanigwan kømø kusrenanene, ñimui yau 'amø' cha, kebermøwei, ni katø 'manguen arrin køn' tamig kømøwein køn. ¹¹ Kaguende 'manguen arrin køn' chibiibe tru nø kaig mariiløyu nōgucha tōgatø marøb pasran.

Srabe wamindiilø

¹² Nabe ñimun truba truba pøramig tøgagøbendø, kilgayu tintatōga pørmøtø, nabe ñimuimay attrab isur, malaugue ñimba waminchab namui kasrag købigwan newan tøgagørrab.

¹³ Tru ñui lawa wesruig numøsrawei ureemerabe ñun 'tab ka uñguh' chib wam øran.

3 San Juan

Gayoimburab tab waminchib

¹ Na, Tiusweimburabelan pera marøb pasrabig, nai tab linchibig Gayon pørar, newan ciertonigu na undaaraigwan. ² Nai undaaraig, nabe ñuyasig Tiuswan miappe, ñui møsig Tiusweimburab tab køb lataitøwei, chiyutøgucha tab pub attraimba, katø ñui asrugucha kwanrrø kømø, tab unamig kønrraimba miabig kur. ³ Nabe truba truba kasraarar møiløgsrøn namui nunelø amrrua, tru newan ciertonig maig køben ñibe truyutø pasrab, katø treegutø ñi maig unigwan nan eshkaben. ⁴ Tru newan ciertonig maig køben, nai ureemera treeg amønan taig wammøramibe, katøgan chi peg wammøri lataitøguen kømø, purø nu tab køtan.

⁵ Nai undaaraig, namui nunelan ñi tabig purugub pasraibe, ñi purø tabig marig køn, ñuimbe asiimeelø kuingucha katøguchinguen tabig marøb. ⁶ Truiløbe iglesiyuelai merrab ñi treeg undaguig køn cha wamindan. Ñi nømui ambamigwan ambub amrrai puruguabe, Tiuswan kasrag kømdiig kønrrai, tabig martrabguen. ⁷ Kaguende nømbe Jesucristoi munchin undag køb webambamig køn, Tiuswan ashmø misaamerane chigucha chi purugúig utømø. ⁸ Inchawei treekkurri nambe treeg marøb møguelane purugub asamig nebunrrun, Tiuswei tru newan ciertonigweimburab namgucha purugúig kørrømisrtra.

Diótrefes søl marmø kaig marøb

⁹ Nabe iglesian kan kilga pørig kuig køn. Inchendø Diótrefesbe na karuilan mørmíig køn, kaguende nømui utu chiyutøgucha ke nø karub pasrønrrab inchibig kua. ¹⁰ Inchawei treekkurri nabe ippe, nø chi mariilan ñim isunrrai wamindamønrrun, tru nø namun isa wamincha wam kusruigwan. Incha trutø kømøtø, nøbe nunelan utømøwei, katø utønrrab inchibelan meramba, iglesiyugurri webetamba inchibig køn.

¹¹ Nai undaaraig, kaig mariilan asha marmøtø, tabigwan asha mar. Tabig marøbiibe Tiuswein køn. Inchen kaig marøbiibe Tiuswane ashmíig køn.

¹² Mayeeløba Demetrioimburappe tabig waminchibelø køn. Tiuswei tru newan ciertonitøweinguen nune treeg marøbig køn cha eshkan. Inchen namgucha truigweimburappe 'treegwein køn' chib eshkan waminder. Inchen nam 'treeg køn' cha wamindiibe, isa kømø trendaig kuig ñibe ashibig køn.

Srabe wamindiilø

¹³ Nabe ñun eshkamig truba truba tøgagøbendø kilgayu tintatøga pørog kømøtan. ¹⁴⁻¹⁵ Nabe maya yanayutø ñun ashchab attrab isur malaugue waminchab.

Chi isumgaig tab købiibe ñiba pasrønrrai isur. Tru tab lincha amøñibeløbe ñune 'ka uñgu' tan. Katø ñigucha namui asiilan kanun kanun nømunashib treetøweih chirrunrig.

San Judas

¹ Na Judas, Santiagoi nuneg, Jesucristoi marøb megabiibe Tius Møskai wamiilø undaarailan, Jesucristobe chi kømønrrai ashib tøga pasrailan na pørar. ² Purø lastima asigwanba, chi isumgaig tab købigwanba, undag købigwanba ñim uncha tøgagønrraimab isur.

Isa peetø kusrenanøbelø

³ Nai undaarailø, ñim lata, na lata kanguelarrøtø tru nam kaigyugurri wesraig pønrraigweimburab ñimun pørrab truba truba isuig kuig køn. Inchendø truburab pørmøtø, 'øyeeg, øyeeg melay' chib waminchib pøramig truba palai ashar, tru Tiuswei misaameran Tiuswei tru tabig srø wamwan Jesucristoimburab managatigweyasig treetø kønrrai kanmaytø tranig købigwane mur tranrrab pønrrai chinrrab. ⁴ Kaguende mõiløgøben mu ashmøwatø ñimui utu nilø kebambin køn. Truiløbe kaigyu pønrramig kønrrai manasrøwei treg mariilø købig køn. Tru Tiuswan ashmeelø kaig mõgueløbe namui Tiuswei ka yandø tab indigwane nømun maig marøg køben maramigweyasig merrarrawa tøgagøn. Katø, tru nøtø kandø Mayeclaim Pala Pasrabig, namui Señor Jesucristone nømbe 'ashmeelø ker' chibelø køn.

⁵ Ñimbe yandø ashibelø kuindøgucha, nabe katø isungarunrrab inchar, Israel misaameranma Egipto piraugurri Señorbe wesrappe, wesrabendø, wendøsrømbe nun tru køremeelane pinisaig købigwan. ⁶ Katø ángelesmeran chigucha nømune srøsrø chiyu pønrrønrrai pønrsøben, truyutø pønrrømøtø, trunun elachippa, tarømisrøbelane purø trømbø løstiigu pønrrønrrai Tiusbe managatig cadenastøgø merrarrawa pønrsraig køn, tru maig maramigwan asha maramig purø nu kwalømweyasig. ⁷ Katø Sodoma misaameraba, Gomorra misaameraba, tru puluwan ciudameraba treetøwei, ishumburba, mõgueløba trømbøig kaig marøb, katø mõgueløbe nøm mõgueløasiyitø trømbøig marøb kømig, trutø srua ambilan managuen kwamø nagu møra melønrrai kebeta, pønrsraig køn, trunun katøganelø isua asha kømig kønrrai.

⁸ Katø øyeeg købenguen tru mõguelø piaig lataigutø amøñibeløbe nømui asrwan kaig kønrrai marøb, katø ashib karub purrabelane mõrmø, kaashib, katø tru srømbalasreelø truba nørreelanguen tsalø wamab inchibelø køn. ⁹ Trune tru arcángel Miguel købenguen, tru nugwaimandziiba Moiséswei asr cha aleguiyab kua, truikken tsalø wamab kaig nebubash chinrrab inchimøtø: "Øyeebe maramig kømøn chib, Señor ñun namubash" cha. Trutøh taig købig køn. ¹⁰ Trune tru i mõgueløbe nøm chigúinguen mõrmubendø, tsalø wamabelø køn. Nømun tre lataig asønaiigutø nøm chigúí mørigwane, animalmera chugúí mõrmeelø lataig trømbøig marøbelø køn, nømasiitø minchib treramig.

¹¹ ¡Ay, nømuiimbe maig kønrrerah! Kaguende nømbe Caínwei maywan merrarrawa amban. Nømbe an kanag købiitø Balaam kebeninuutøwei kegørra, katø mõrmuikkurri Coréwan pinisailø lataitøwei pinisailø køn. ¹² Ñim Tiuswei undag købigwan tøga kasraatø lincha mab waramig tøgagúiløyube, nømbe ke ka trømbøig mindishibelø treelø køn. Nømbe chigucha kørrikkar ka nømuiimburab øska mab, øska muchibashtø inchibelø. Nømbe wañimera chi pigarwan ambumay imay isig srua ambig latailø køn. Katø mamig nigamig puben, niimø tusrmera latailø, srøbañau kitiilø, pamay kwailø køn. ¹³ Nømbe maryu pi welarmera namig latøgushib kurrab arrubigu, kan pichall weguchib latailø køn, tru nømui trømbøig ashikken kønrrabgaig mariiløbe. Estrellasmera nømui ambamwan kømø, pella ambub latailø køn. Truilaimbe purø trømbøig løstøyu managatig pønrrønrrai pønrsramig tamarilø pønrran.

¹⁴ Adánweinukkurrimbunø misaamera srøig, srøig kurrab arrubig siete nemisren arrubig tru Enochucha, tru i kaig misagweimburab manawei trencha eshkawa pasrig købig køn: "Au, Señorbe nui tarømari ángelesmeran purø nørro sötø peraig arrun cha, ¹⁵ maya misaameran maig kønrrabigwan asha marøb, nøm chu pønrramigwan pønrrønrrai pønrsønrrab, tru larrø kailane nøm kailø kuimaytø larrø kaig mariilan mundøgucha treg martrab. Katø tru larrø kailø chigurrimbunø mõrøbguen mõram kaig wamindi wammeratøga nun waminchibelan treg kørromartrappa arrun taig køn." ¹⁶ Nømbe chiwandøgucha kaig køtangøba chib, chiwandøgucha søl marmø, kalø marangøba chib waminchibelø køn, nømui kaig isuilø maig køben, nømbe treg amøñibelø kua. Katø nømui trititøgabe nømasiitø purø nørreelø misrøb wamindamba, katøganelane truba tabzhig misrøb wamindamba inchibelø køn, nømuyasig chigøben tøgagug købiitø.

Tiuswei misaameran isuatø amøñinrrai waminchib

¹⁷ Trune ñim, nai undaarailøbe, namui Señor Jesucristo nøashib karua øriilø merrabsrøwei wamindigwan isua kuy. ¹⁸ Kaguende truiløbe ñimune øyeeg taig købig køn: "Yandø srabe kwalømmerrawane misaamera tabigwane ke ka indzatø mõrøbelø, nømun maig amøñig køben

treeg trømbøig marøb amøñibelø kønrrun” taigwan. ¹⁹ Iiløwein køn, tru misaameran ka nøørotø marøb pirisha pønrsøbelø. Nømbe nømui asr maig palai inchen, treeg marøbelø, Tiuswei Espiritune chigar køn.

²⁰ Trune ñim, nai undaarailøbe, ñimui isubig newan chishchig Tiusweinuutø tōga pønrraigu katøguchinguen nørrørab ambay, Espiritu Santo maig wamindingaruben trumay Tiusba waminchib. ²¹ Ñimbe Tiuswei undag kōbigutø amøñippe, truyutø amønay, namui Señor Jesucristoi lastima asiitōga managatig øsig kōmigwan tranrraitamab isua muniirab.

²² Møiløgøben treeg kuitamab isumba, katø treeg kōmuitamab isumba inchibelane ñimbe lastima tōgaguy. ²³ Katøganelane nagugurri wesrui, trumay kaigyugurri wesrub. Inchen katøganelane lastima tōgagømig køn. Inchendø purø ashiptø maray, trømbøig marøg kōbigu nøm trømbøig mariløtōga chillig inchib kewa llirab pønrrailanguen ashikken kømui inchib.

Tiuswan tabig wamindiilø srabeig

²⁴ Tru ñim kaigyu kørøømønrrai asamig maramburab maramig tōgaig, katø truba truba kasrag nui tōrguegwalmabiisrø chigucha chi tamgailø chishchig ñim kemalla pønrramig kønrrai tōga pasrabig, ²⁵ Tius kandø wabig, namun Kaigyugurri Wesrabigwan namui Señor Jesucristogurri tōrguegwalmabiiba, purø nuig muguen nebua isumgaiba, mayeelaim pala asamburab ashib pasraiba, mugucha manchinraingaig karuiba, iilan nuin kønrrai inder, manasrøngurri, møyia lata, katø managatig. Treeg kønrrun.

El Apocalipsis

Jesucristo San Juanwan torgandø ashchai kenamarig

¹ Iibe Jesucriston Tius torgandø kenamarig køn, nø nui karuig melabelan kenamartra, tru maya yanayutø purainrrabigwan. Jesucristobe nui marøb megabig Juanwan kan ángelwan øra, kenamarig køn. ² Inchen Juanbe nø maig asigwan kerrigu isa kømø, maig kuigwan wamindan, Tiuswei wamwanba, Jesucristo maig eshkaigwanba.

³ Mayanguen tab kuig køn, tru chinetø pub attrabig ørigwan lebigweimbe. Katø trunun leben møra, tru maig taigwan marøbelø chigucha maya nuguen tab kuilø køn. Kaguende yandø tru pub attrabiibe pub pasran.

Juan siete iglesiameran pøøb

⁴ Na, Juanbe, Asia pirau siete iglesiameran pørar. Ka yandø tab indigwanba, katø tru chi isumgaig tab købigwanba ñimuin kønrraimab isur, Tius tru mõi ya køb, merrabsrø køb, attrabig køb, truigweinukkurrimba, katø siete espíritumera, tru Tius wamisra karub waigwei merrab pønrrabelainukkurrimba, ⁵ katø Jesucristoinukkurrimba arrubigwan. Nøbe waminchippe, maig kuigwan eshkabig køb, katø tru maya kwabelai utu nømerrig øsiirabig køb, katø nøbe pirau maya reymeraim pala nø karub pasrabig køb indan. Truibe namune undaarab, nambe kaig mariiøyu lusri latailø kuigwan nui anindøga elatsørka, ⁶ katø namune reymera latawei ashib karub pønrrønrrai mara pønsraig køn, sacerdotsmera Tius nui Møskaweyasig. ¡Tørguegwalmabiiba, maramburab mariibabe nuin kønrrai managatig! Treg kønrrai.

⁷ ¡Au! Cristobe wañiyu arrun.

Inchen mayeelø ashen,

katø nun tru kelarrab kwanøbeløguen ashchun.

Inchen pirau maya misaamerabe

truba truba isui inchib kishchun nun ashippe.

Øø, øyeeg kønrrun.

⁸ Tru Señor Tius, Newan Maramburab Marøbiibe trendan: “Srøsiiba, Srabeibabe na kur cha, Aba, Zetaba latawei, tru mõi ya køb, merrabsrø køb, katø attrabig.”

Juan kan piab lataigu Criston asig

⁹ Na Juan, ñimui nuneg, chigøben purø trømbøig puben isumdiigu lata, katø Tius nø ashib karub wainug lata, chigüindøgucha ñimba, Jesucristoba kanbalatø pasrabig pasrabig kur. Nan kan pi tøbøtag pirø pasrabig, Patmos tainug wanrrai kegutsig wabig kur, Tiuswei wamgurrimba, katø Jesucristoimburabigwan eshkaikkurrimba. ¹⁰ Kan isrin kwaløm Espiritu nan tøga pasramisren, nai wendaube kan wam kan trompeta wanrrøb lataig nan truba mur trenchibig køn:

¹¹ —Ñi chi asigwan kan kilgayu pøra, tru siete iglesiameran ør cha, Efesomayba, Esmirnamayba, Pergamomayba, Tiatiramayba, Sardismayba, Filadelfiamayba, katø Laodiceamayba.—

¹² Inchen tru wam nan waminchibiibe muin køtashchab keesha ashene, truyube oro kandilerumera sietø nørreelø pønrraptinchibig køn. ¹³ Inchene tru siete kandilerumerai tøbøtaabe kan mugøsrøn møg lataig pasraptinchibig køn, nui kewagüibe katsig søchi kørrig keweikke. Inchen nui pechoyu pøsrønaibe oro købig køn. ¹⁴ Turyu pusruube kan pulø isig lataig, wañi lataig puløzhig, nui kabmerabe kan nagurø lataig køben, ¹⁵ nui srøbmerabe broncen nagu pill-llanen tørbilabig lataig pilabig køben, nui wambe kan nu pi mullib wanrrøb lataig købig køn. ¹⁶ Nui kusrmay taskube estrellamera sietø sruaig, nui trigugurrimbe kan espada pinrrøba purø trøsrig tøgäig webarrubig køn; nui maløbe nøsig tør køptø pilamburab pilab lataikke.

¹⁷ Inchen nabe nun ashippe, nui katsigu kwaig lataig peninabig køn. Inchen nøbe nui kusrmay tasiitøga nan trenchib estsarøbig køn:

—Chi kørig kui inchimøta cha. Nabe Srøsiiba, Srabeiba, ¹⁸ tru Øsig Wabig kur cha, kwain tsubig kua. Inchendø ash, chibig køn, øsiguig war cha, managatig. Nabe kwamigwei llavimeranba, katø tru kwabelø pønrrainug llavimeranba tøgagur cha.

¹⁹ Inchawei ñi chi asigwane pørr chibig køn, mõi ya maig kuigwanba, katø wendøsrø maig kønrrabigwanba. ²⁰ Inchen tru estrellamera sietø nai kusrmay tasigu ñi asigweimburappa, katø tru sietø oro kandilerumeraimburappa tru mu asiimig pasrabiibe øyeegwan eshkabig køn: tru sietø estrellamerabe sietø iglesiamerayu ángelesmera køben, tru sietø kandilerumerabe tru sietø iglesiameran eshkabig køn.

2

Efeso iglesian wam ørøb

¹ Efeso iglesiai ángelwan iigwan pør:

Tru siete estrellameran kusrmay tasigu srua pasrab, katø tru siete oro kandilerumerai utu uñib inchibiibe øyah tan cha: ² Nabe ñui chi mariilan ashar cha, ñui maramelan mur tranrrab megaigwanba, megabig megaigwanba. Katø ñibe kaig marøbelane ka tøgagømig awentanrrab kaimab, katø truilø kømubendø, 'Cristo nõashib karua øriilø ker' chibelan, nõm treeløwein kuitashchab ñi asha, ka isapteelø kuin kui merrarrab indi ashar. ³ Katø maya kaig nebuindøgucha ñibe megabig megab, nagurrindø treegu kørrømisrmø megain kui ashar.

⁴ Inchendø nabe ñun chiyu køsrøn kalø køn tamig tøgagur: ñibe srøsrøbe truba undaguig kuig, mømibe trunun elatsin køn. ⁵ Inchawei mandøgurri peñibrermab isu, tru srøsrø undag købigwan, ñui kaig mariilan isua møra, Tiusweimay llirawa, srøsrø marigwan mar. Treeg inchimuisruandøbe, nabe ñuimay arrua, ñui kandilerune pasrainukkurri kusramønrrun, ñi isua mørmubene. ⁶ Treeg kuindøgucha, ñibe ñuimburappe iigwan tøgagøn: Nicolaítasmera marigwane tsaliig køben, naguacha truilø marigwane tsaliig kur.

⁷ Kalubaibe mør Espiritu iglesiameran wamindigwan. Maig kuindøgucha truyu pureb ibigwane tru øsig køm tusryu mamigwan manrrai nabe tranamønrrun, Tius nõ waisrø purø tabzhiisrø tru tøbøtag pasrabigwan.

Esmirna iglesian wam ørøb

⁸ Esmirna iglesiai ángelwan iigwan pør:

Tru Srøsrøig køb katø Srabeig køb, tru kwawa, katøyug øsiirab inchibiibe øyah tan cha: ⁹ Nabe ñi truba truba chigøben kaig nebuinab megaigwanba, ñi waacha kuigwanba ashar cha. Inchendø ñibe waacha kømøtø, puaiig køn. Katø tru 'judíos ker' chibelø ñuimburab truba truba chigøben kaig waminchen ashar cha. Inchendø nõmbe treelø kømøn, nõmui tulundzuni yaeløbe mayamba nõmbe Satanáswein køn. ¹⁰ Ñimbe kørig kui inchimøtay, maya yana kømøwatø chigøben nebuinab pønrramigwan. Au, nugwaimandziibe mõilan køben ñimui utugurri kailan keeri yau kebetønrrun, maig inchibelø køtashchab ashchab. Inchen ñimbe kwalømmera diez nemisramne truba kaig indinab melamig neburrun. Kwamnegatig megabig megau, nabe øsig køm coronan tranamønrrun cha.

¹¹ Kalubaibe mør Espiritu iglesiameran wamindigwan. Maig kuindøgucha truyu pureb ibiibe katøle kwangarunrrabig mindisaig kønrramøn cha.

Pergamo iglesian wam ørøb

¹² Pergamo iglesiai ángelwan iigwan pør:

Tru espada pinrrøba purø trøsrøigwan srua pasrabiibe øyah tan cha: ¹³ Satanás nõ wamisra merrarrawa karub wainug ñibe truyu pasrabig kui nabe ashar cha. Inchendø ñibe nai munchiwan pesannamø, tøgagøbig tøgagøb, ñui isubigwan nainuutø pasra tøgagüigwan elachib 'trugatiig kømur' chib pasrømøwei indig køn, tru Antipas nan elachimø pasrabig naimburab waminchibigwan kweechib kwalømmerawanguen Satanás nõ marøb uninug.

¹⁴ Inchendø kan chigøsrøndø ñun kalø køn tamig tøgagur: mõiløgøsrøn tru Balaam kusrenanigwan marøbelan ñibe truyu tøgagøn cha. Tru Balaambe Balacwan øyamay martraí kusrenanig køn, Israelwei misaameran srurrengwangerub taska mari tiusmerayasiig kweetsi mamimeran mangarumba, katø mõgueløba, ishumburmeraba trømbøig martraí karumba inchib. ¹⁵ Katø treetøwei ñigucha ñuinug tøgagøn mõiløgøsrøn Nicolaítasmerai kusrenaniilan elachig kømui inchibelan. ¹⁶ Treeg købene, ñui kaig mariilan isua møra, Tiusweimay llirau. Treeg marmøwabe, nabe petø ñuimay arrua, nai trigu espatatøga truiløba kwayamønrrun.

¹⁷ Kalubaibe mør Espiritu iglesiameran wamindigwan. Maig kuindøgucha truyu pureb ibigwane nabe tru mamig maná taig sørig pasrabigwan manrrai tranøb, katø kan pulø sruuzhig tranøb indamønrrun. Incha tru sruuzhigube kan munchi srøig pørig pasrønrrun, truigwane mugucha asiimig tru utabiitøwei nebua ashchun.

Tiatira iglesian wam ørøb

¹⁸ Katø Tiatira iglesiai ángelwan iigwan pør:

Tiuswei Nusrkai, tru nui kabmerabe kan nagurø latailø tøgai, katø nui srøbmerabe kan broncen chishtø pinømøren, tørbilabig lataig tøgai øyah tan cha: ¹⁹ Nabe ñui chi mariilan ashar cha, ñui undag købigwan køben, ñui isubigwan nainuutø pasra tøgagüigwan køben, ñi marøb megaigwan køben, katø chigüingucha tammay megaigwan købengue. Incha katø mõimbe srøsrø lata kømø, katøguchinguen marøb megai ashar.

²⁰ Inchendø kan chigøsrøn ñun kalø køn tamig tøgagur: isatø ‘Tius maig karuigwan eshkabig kur’ chibig, tru ishug Jezabelwan ñibe tøgagømgagig kuingucha ka tøgagøn cha, nõbe kusrenniitøgaba, katø chull asøska trømbøig isungaruitøgaba, tru nai marøb melabelan ishumburmeranba, møguelanba trømbøig maringarub, katø taska mari tiusmerayasig kweetsi mamimeran mangarub inchibigwan. ²¹ Nabe nune maya yana kørørøn muniirraig køn, nui kaig mariilan isua møra, Tiusweimay lliranrai. Inchen nõbe nui trømbøig maramigwane treeg marmønrrab katøyg isua mørøg kømuidan. ²² Au, nabe nune camayu tsunrrai kwanrrø kutsamønrrun. Katø nõba itøløløpτεelane nabe truba truba trømbøig nebuilø kønrrai maramønrrun, tru ishuubamisra nõmui kaig mariilan nõm isua mørmuisruandøbe. ²³ Incha katø tru mendig amøñib ureemerane nabe purø isumdiig mara, kweetsamønrrun. Nabe isuigwan lata, manrrøwan lata nabe tørguelarrab ashibig kuin kui maya iglesiamera nebua ashchun. Incha nabe ñimun møigwandøgucha ñimui mariilø maig køben, kanun kanun treeg tranamønrrun. ²⁴ Trune ñim katøgan sətø Tiতিরসø warabelø tru kaig kusrenaniilan marmøwei, Satanåskurri purø nõrrø kusreb chib tøgagúilan nebua ashmøwei inchibelane nabe ñimune trenchar: Katøgan chi peg maramibe maskucha negwanmumønrrun cha. ²⁵ Inchendø ñim tøgagøbguen indigwane na arrumnegatig elachimø, isua møra tøgaguy.

²⁶ Maig kuindøgucha truyu pureb ibiibe, na maig martrai karuig køben trunun srabegatig marøbigwane chu pirausrøn køben misag nõrrø pønrrabelan truilaime pala mugucha mandamgaig karumigwan tøgagønrrai tranamønrrun, ²⁷ nan nai Møskai martrai tranøb lataitøwei.

‘Inchen tru treeg karumigwan utabiibe

tru misag nõrrø pønrrabelane

kan tsandzøn pørøtsiitøga mu kurraasamgaig karub martrun,

nømunne kan pirø køtsømeran lataitø pusha petab.’

²⁸ Incha katø tru r-rab arruben webarrub estrellan tranamønrrun. ²⁹ Espiritu iglesiameran wamindigwan, kalubaiibe mør.

3

Sardis iglesian wam ørøb

¹ Katø Sardis iglesiai ångelwan iigwan pør:

Tru Tiuswei siete espíritumeranba, siete estrellameranba tøgaiibe øyah tan cha: Nabe ñui mariilan ashar cha. Ñibe øsiguig køn chib waminabig købendø, kwaig køn. ² ¡Kiagasrø! Chiwan køben ke pinamitø palab pønrrabelane tamar. Kaguende nai Tiuswein kabyu ñui mariiløbe newan tabig kømui ashar. ³ Inchawei kusrenaniilan ñi møra utigwane møra marøb, ñui kaig mariilan isua møra, Tiusweimay llirab inchi. Ñi kiagasrø muisruandøbe, kan niliig lataig nabe ñuimay arrumønrrun, ñi chu yra atrab kuinguen mørmøwatø.

⁴ Inchen køben misaamera Sardissrø kan mamdø køn nõmui kewagúilan chillig incha kømeeleø. Truiløbe naba amøñinrrun puløzheelan kewar, kaguende nõmbe øyegwanwei kenrrabelø køn. ⁵ Maig kuindøgucha truyu pureb ibiibe puløzheelø kenanig kønrrun. Incha nabe managatig øsig purrønrrabelai munchimeran pørig libroygurri nui munchiwan kerramumønrrun. Incha nabe nai Møskawei merrappa, nui ångelesmerai merrappa, øibe nain køn cha, nui munchiwan eshkamønrrun. ⁶ Kalubaiibe mør Espiritu iglesiameran wamindigwan.

Filadelfia iglesian wam ørøb

⁷ Katø Filadelfia iglesiai ångelwan iigwan pør:

Tru Newan Tabig, Newan Ciertonig, tru rey Davidwei llaviwan sruaig, tru nõ kurene, mugucha kasrønrrab kaimab, katø nõ kasrøbene, mugucha kurtrab kaimab inchai marøbiibe, øyah tan cha: ⁸ Ñi chi mariilan kerrigu nabe ashar cha. Au, nabe ñui merrab kan yaskab kura pasrar, truigwane mugucha kasramgaig. Ke trengatig nebua marøppe, marmubendø, nai wamwan møra marøb, ñibe nai munchiwan ‘ashmøig kur’ chib isømøn. ⁹ Au, nabe Satanåswei tulundzuni yaueleø ‘Judiosmera ker’ chibendø, judios kømeeleø, ka isatø inchibelan, ñui merrab tømønrrønrrai indamønrrun. Incha nabe ñune undaguig kui nebua ashchun. ¹⁰ Kaguende na karuilan tammay marøbig marøb megaikkurri nagucha ñun asamønrrun chi kømønrrai pirau muba kuimburab warab misaameran maig inchibelø køtashchab asamig pirau ørøba yandø purø trømbøig puben.

¹¹ Nabe petø arrumønrrun. Ñi tabig tøgagúigwane elachimøta, ñui coronan mu katøgan merrarramønrraimbe. ¹² Maig kuindøgucha truyu pureb ibigwane nai Tiuswei yau kan pilar lataig maramønrrun. Inchen managuen nõbe truyugurrimbe webinrraamøn. Inchen nabe nuinuube nai Tiuswei munchiwan pørøb, nai Tiuswei ciuda, tru srø Jerusálén,

nai Tiuswei srømbalarøngurri kørraarrubigwei munchiwan pørøb, nai srø munchin pørøb indamønrrun. ¹³ Kalubaibe mør Espiritu iglesiameran wamindigwan.

Laodicea iglesian wam ørøb

¹⁴ Katø Laodicea iglesiai ångelwan iigwan pør:

Tru Amen, tru treeg køppe treeg, tru newan ciertonigwan eshkabig, tru Tius chiwandøgucha pølasra maren, nømerrig trendø pasrabiibe iilan øyah tan cha: ¹⁵ Nui chi mariilan ashar cha. Nibe pishin kømøwei, pachibig kømøwein køn. Pishin kui, kabe pachibig kui, treeg kuikken søl købsruinrrun. ¹⁶ Inchawei pishin kømøwei, pachibig kømøwei, mørøtø kurag kuikkurri, nabe nai trigugurri wennamønrrun. ¹⁷ Nibe trendan: “Nabe puaign, truba tøgga misraig, chigucha yandø palaimíig kur” cha. Inchendø nibe uñmuinguen uñib waacha, ñiguen øyeezhig misrin køn nab asamdiig, katø waacha chiguchagaig, ashchab kaimabig, kòsaatiig, øyeeg købendø, ñibe ashmøn. ¹⁸ Inchawei nabe ñun øyeeg mar tamønrrun. Nagu parra purøørig oro chishchigwan naiwan penø cha, trutøgabe puaign kønrrig cha. Katø kemeløgucha naiwan puløzheelø penø cha, ñui asr køsaatiig kørig kømndigwan kasrønrrappe. Katø ñi ashibig misramig kabyu srølamig møgucha naiwan penø.

¹⁹ Mayeelan na undaarailane øyeeg marmøta chib nabe namab, katø ichaguchib inchibig kur, søl martrai. Maig isuppe, treegwan martrab kandø isua, ñui kaig mariilan isua møra, Tiusweimay lirau. ²⁰ Au, nabe yaskabu wamab pasrar. Møikkøben nai wamwan møra, yaskabwan kurene, nuinug kebya, nabe nøba maben, nøbe naba manrrun.

²¹ Maig kuindøgucha truyu pureb ibigwane na wamisra karub wainug naba wanrrai tranamønrrun, maig kuindøgucha na truyu puraarrub arrua, nai Møskaimba nø wainug wamisrøb lataitøwei wamig kønrrai. ²² Kalubaibe mør Espiritu iglesiameran wamindigwan.—

4

Tiuswan srømbalarøelø truba truba tabig waminchib

¹ Øyeeelø chab puraiiben, na ashene, kan yaskab srømbalarø kurig pasraptinchibig køn. Inchen kan wam trompeta wanrøb lataig srøtø tru na møriibe nan øyah waminchib trenchibig køn:

—Yusrø nebamø cha; iilai wendau purainrrabigwan na ñun kenamartrumøn— cha.

² Inchen tru urastø Espiritu nø nan tøgga pasramisren, srømbalarømba tru karub wamisra wamig kan pasrig pasrai nabe ashibig kur. Inchen truyube kan mugøsrøn wabig køn. ³ Inchen truyu wabiibe kan jaspe sruuba, cornalina sruuba lataig købig køn. Inchen tru nø waim pøtøgatanbe kan køshømbøtø kan esmeralda srug latazhig pasrabig køn. ⁴ Tru wamisra karub waim pøtøgatanbe wamisra karub purrailø katøgan veinticuatro pønrrai ashibig kur. Truiløyube kølli misaamera veinticuatro purrabelø køn, puløzheelø kewar, nømui turyube corona orotøga marilø petsargue. ⁵ Inchen tru nø wamisra karub wainug truyugurrimbe sre pilabelø køben, wammera køben, palaig trashibelø køben webambubig køn. Katø tru karub waig merrappe lãmparamera nag pilabelø siete pilab pønrrabig køn, truiløbe tru Tiuswei siete espíritumera køn. ⁶ Inchen tru karub waig merrappe kan mar wabig køn, pigriu tørguelarøzhig lataig.

Tru karub wainug pøtøgatanbe merrabmayba, wendaumayba, pinrø mendamayba pibgatø øsiguelø pønrrabelø køn, truiløbe merrabmayba, wendaumayba kabmeratø netseelø. ⁷ Inchen tru øsiguig srøsriibe kan león lataig køben, tru wendauiibe kan toro lataig køben, katø tru wendauiibe kan møwei malø lataig køben, tru pib kønrrabyuibe kan wasrø pala uñib lataig købig køn. ⁸ Inchen tru pibgatø øsigueløbe møitøgucha kwaldzariimera seisbatø tøgar, truiløbe wambiimay, umbumay kabmeratø netseelø, yem kwaløim øyah tamigwane pinømø, trenchibelø køn:

“Newan tabig, newan tabig, newan tabig

Señor Tius Newan Maramburab Marøbig;

tru købig, mõi ya wabig, tru attrabig” chib.

⁹ Tru managatig øsig wanrrabig, tru karub wainug wabigwan, tru pibgatø øsiguelø maya nuguen tab kønrrun chib, tabig kui asha tab inchib, ungua, ungua chibelø køn. ¹⁰ Incha trendaimørig tru kølli misaamera veinticuatroeløbe nui merrab tømønrsrøb sraløptø sraløbelø køn køriibala tabig waminchab tru managatig øsig wabigwan. Incha nømui coronameran tru nø karub wainug merrab trenchib petabelø køn:

¹¹ “Señor namui Tius,

ñibe maya nuguen tabigwanba,

tabig kui asha tab indigwanba,

maramburab maramigwanba
 utambuawei utønrabiibe ñi køn chib,
 kaguende chiwandøgucha kerrigu ñi marig kuimba,
 Ñi treeg kønrrai isuikkurri treeg mariiø,
 treeg pønrran” chib.

5

Ubisha-unø kilgawan kurøb

¹ Incha tru wamisra karub wainug wabigwei kusrmay taskube kan libro palamay umbumay pørigwan nabe srua wai ashibig kur, truibe siete selløstøga melsra kasraig.
² Inchen kan ángel maramburab maramig tøgaig truba mur trenchib payibig køn:

—Sellomeran kølsrøb, kilgawan kurøb, ¿treegwan martraptiig tabiibe mu kerah?— cha.

³ Inchendø ni srømbalasrø lata, pirau lata, pirø umbu lata tru libron kurtraptiibe mu kawei, katø tru umbu pørigwan maig køtashchab trawashchaptiibe mu kawein købig køn. ⁴ Inchen nabe truba kishibig kur, kaguende tru libron kurtraptiibe mu kawei, katø tru umbumay pørigwan maig køtashchab trawashchaptiibe mu kawein køben. ⁵ Inchen møikkørøn tru utuig kan kølli misaabe nane trenchibig køn:

—¡Kishmøta! cha. ¡Ash! cha. Tru León Judáwei misag sətøygurriig, tru Davidwei misagurri arrubiibe nun tru ashig kømui inchibelan nømun kerriguwan chi inchaingai kanawa kørømarøb pureb yaig køn cha, sellomeran kølsrøb, kilgawan kurøb inchabig.—

⁶ Inchen tru karub wainuube kan ubisha-unø kweetsig købig lataig asønabendø, katøle kurra pasrai ashibig kur, tru pibgatø øsiguelaimba, kølli misaameraimba tøbøtaabe. Tru Ubisha-unøbe siete kigulmeraba, siete kabmeraba tøgaig købig køn. Inchen tru kabmerabe tru Tiuswei siete espíritumera købig køn, tru pirau ørøba trawørø øriiø. ⁷ Inchen nøbe arrua, tru karub wainug wabigwei kusrmay taskugurri libron utabig køn. ⁸ Inchen nø libron utøbene, tru pibgatø øsigueløba, tru veinticuatro kølli misaamerababe tru Ubisha-unai merrab tømønrsrøb sraløptinchibelø køn. Møitøgucha arpa sruartø, katø oro copamera may irrabzhiitø netsig sruar købig køn. Tru may irrabzhiibe Tiuswei misaamera Tiusba wamindiilø truig købig køn. ⁹ Katø kan cantaig srøig øyeeeg cantabelø køn trenchib: “Libron uta, sellomeran kølsrøb inchabiibe

ñitøwein køn chib.

Kaguende ñibe kweetsig kua,

ñui anindøga namune Tiusweyasig ñi penig køn chib,

chi misaamerandøgucha,

chi wam waminchibelandøgucha,

chi misag sətømerandøgucha,

misaamera nørrø pønrrabelø

chu pirausreelandøgucha.

¹⁰ Incha ñibe nømunne namui Tiusweyasig reymera latawei karub purrabelø kønrraimba, sacerdotemera kønrraimba mara purrønnen, nømbe pirau karumburab karunrrun” chib.

¹¹ Incha katø na ashene, tru karub waim pøtøgatanbe ángelesmera truba nørrø pasrabigwei wamwanba, tru øsiguelai wamwanba, tru kølli misaamerai wamwanba mørøbig kur. Tru- iløbe purø nørrø køptø, millones y millones købig køn. ¹² Incha truba truba mur trenchibelø køn:

“Tru Ubisha-unø kweetsig købiibe

tru maramburab maramigwan køben,

chiwandøgucha palømø, tøgagúigwan køben,

muguen nebua kusremgaigwan køben,

maramburab maramigwan køben,

tabig kui asha tab indigwan køben,

tørguegwalmabigwan køben,

purø tabig wamindigwan køben,

utambuawei utønrabiibe ñitøwein køn” cha.

¹³ Incha katø tru srømbalasrø lata, pirau lata, pirø umbu lata, maryu lata tru chigurrim-bunø Tius marig øsiguig pønrrabeløbe øyah taig mørøbig kur:

“Tru wamisra karub wainug wabigwanba,

katø tru Ubisha-unanbabe,

tru purø tabig wamindiiba,

tabig kui asha tab indiiba,

tørbilabiiba, maramburab maramibabe,

managatig patsømfig nuin kønrrain” chib.

¹⁴ Inchen tru pibgatø øsigueløbe trenchibelø køn: “¡Treeg kønrrun!” chib. Inchen tru kølli misaamerabe tømboñsrøb srala, kørriibala Tiuswan tabig waminchibelø køn.

6

Tru siete sellosmera

¹ Inchen tru srøsrø sellon Ubisha-unø kølsra, kuren, na ashene, tru pibgatø øsiguelai utuig, møikkøsrøn kan wam palaig trashib lataig truba mur trendaig mørøbig kur:

—¡Amø!— chib.

² Inchen na ashene, kan pulø kaulli pasraptinchibig køn. Inchen truigwan itøgwana wabiibe nui taskube kan arco sruaig købig køn. Inchen nune petsamig kan corona tranen, nun ashig kømui inchibelan kerriguwan chinchangaig kanawa kørømarøb pureb yaig køn, katø kanabig kananrrab.

³ Inchen Ubisha-unø tru pamay kønrrabyu sellon kølsra, kurene, tru øsiguig srøsrøigwei wendauiibe nane:

—¡Amø!— chibig køn.

⁴ Inchen katøgan kaulli webptinchibig køn, piguiig. Inchen truyu itøgwana wabigwane pirau muba kuimburab ambumay, imay tab waramigwan kerranrrai nune mu katønrraingaig treegwan martrai tranig køn, kangurrin kangurri kwetchai. Katø nune kan truba nu espadagucha tranig køn.

⁵ Inchen Ubisha-unø tru pøn kønrrabyu sellon kølsra, kurene, tru pøn kønrrabyu øsiguiibe trendaig mørøbig kur:

—¡Amø!— cha.

Inchen na ashene, kan yalø kaulli pasraptinchibig køn. Inchen truyu itøgwana wabiibe tasigube palansa sruaig købig køn. ⁶ Inchen tru øsiguelai utube kan wam øyah taig nabe mørøbig kur: “Mawa, mawa marøb megaig anbe tirigu pa libra penam netø køben, katø mawa, mawa marøb megaig anbe cebada seis libras penam netø kønrrun cha. Inchendø aceitenba, vinonbabe mindishinrrab kømø” cha.

⁷ Inchen Ubisha-unø tru pib kønrrabyu sellon kølsra, kurene, tru pib kønrrabyu øsiguiibe trendaig mørøbig kur:

—¡Amø!— cha.

⁸ Inchen na ashene, kan pulø øskø kaulli pasraptinchibig køn. Inchen truyu itøgwana wabiibe, “Kwamig” cha wamig køben, tru wendaube, tru kwabelø pønrraig, “Hades” cha wamig, truig arrubig køn. Inchen tru i parwane maramburab marøb kweechib martrai traniilø købig køn espadatøga køben, parøtøga køben, kaig kwanrrømeratøga køben, kau umbu namig animalmeratøga køben pirø muba kuimburab pib millonesyube millonbatø, pib milyube milbatø, kwetchai.

Tratørgatø kønrrabyu selloba, seis kønrrabyu selloba

⁹ Inchen Ubisha-unø tru tratørgatø kønrrabyu sellon kølsra kuren, na ashene, tru Tiuswei wamgurrimba, Tiusweimburab øshkaikkurrimba kweetsiilai møsiimerane altar umbu ashibig kur. ¹⁰ Inchen truiløbe mur trashib trenchibelø køn: “Señor, Mayeelaim Pala Pasrabig, newan tabig, newan ciertonig, ¿tru pirau warab misaameran maig maramigwan asha marøb, namui ani lusigwan ulø payib indamigwane, chu uraskatig munugunrrab?” cha.

¹¹ Inchen nømune kanun kanun kemig puløzheelø tranabe: “Maya yanatø katøguchi ka israb munuguy chibig køn, ñimui nunelø Cristoiwana ñim lataitøwei marøb melabelan treetøwei kweetsiilø nemisramnegatig.”

¹² Inchen Ubisha-unø tru seis kønrrabyu sellon kølsra kuren, na ashene, purø trømbøig mur pirø kønøben, pørrbe ¡katø! yaliig misrøbig køn, kan yalø llensu lataikke. Inchen pølbe kerriguba ani lataig misrøbig køn. ¹³ Inchen estrellamerabe srømbalærøngurri pirausrø kørrelø køn, kan higuera tusr nui srabe higos niguiizheelan mur isig icha kørøsrkøb lataitøweingue. ¹⁴ Inchen srømbalabe kan kilga kirrøb lataitø pinøben, nørø tunmeraba, katø pi tøbøtag pønrrab pirømeraba truiløbe mayamba nøm pønrrainukkurri nørøsrø mal-srailø købig køn. ¹⁵ Inchen pirau reymera køben, nørø kusreb møguelø køben, maya suldaumeraim pala ashib karub pønrrabelø køben, puarmera køben, mas nørriig marøbelø køben, karuindiig melabelø køben, karuindiig melømeelø køben, søteeløba pirø trabmer-ayuba, nørø tunmerayu tru nørø srug utuwanba trubabelø køn. ¹⁶ Incha tunmeranba, peñameranba trenchib trashibelø køn:

—¡Namuim pala itøgørrørray! cha. Tru karub wainug wamisra wabigwei maløwanba, tru Ubisha-unai purø trømbøig namig købigwanba ashmønrrab sørrørray chib. ¹⁷ Kaguende tru

purø trømbøig kørig kømddiig nø namig wam kwaløm puin køn cha. ¿Kan treegube mu kuim pasramisra pasramddiig kønrrab kø?— chibelø køn.

7

Israel misaameran 144.000-wan Tiuswein kui asamddiig kønrrai marcailø

¹ Øyeeg chab puraiben, nabe piggatø ángelesmera pørr kal-labgatømay køben, pørr kebibgatømay køben, kandarøgatømaystrøn køben, imaygatømaystrøn køben, pirau pib palø pønrrai ashibig kur, tru pib paløyyugurri isig ichib webarrubigwan pirau lata, maryu lata, chi tusrmerandøgucha isig ichimønrrai katab. ² Inchen katøgan ángel, pørr kal-labgatøsrøngurri nebarri ashibig kur. Truibe Øsig Wab Tiuswei marcan sruaig tru piggatø ángelesmera pirøwanba, marwanba mindishinrrab maramburab maramigwan utabelan mur trashib trenchibig køn: ³—Pirøwan lata, marwan lata, tusrmeran lata mindishimøtay cha, namui Tius tru marøb melabelan nuielø kui asamddiig kønrrai nømui kappalømerayu chab marcamnegatig.—

⁴ Inchen tru marcailø mam køn chitamørtrab na mørenne, 144.000 mil køn, chibig køn, tru doce nusrkalø Israelweinukkurri nørrø karrab misaamera,

⁵ Judáweinukkurri karrab misaamera 12.000 køben,

Rubénweinukkurri karrab misaamera 12.000 køben,

Gadweinukkurri karrab misaamera 12.000 køben,

⁶ Aserweinukkurri karrab misaamera 12.000 køben,

Neftaliweinukkurri karrab misaamera 12.000 køben,

Manasésweinukkurri karrab misaamera 12.000 køben,

⁷ Simeónweinukkurri karrab misaamera 12.000 køben,

Levíweinukkurri karrab misaamera 12.000 køben,

Isacarweinukkurri karrab misaamera 12.000 køben,

⁸ Zabulónweinukkurri karrab misaamera 12.000 køben,

Joséweinukkurri karrab misaamera 12.000 køben,

Benjaminweinukkurri karrab misaamera 12.000 køn taig mørøbig kur.

Truba truba nu misag sötø puliig kewar

⁹ Øyeeg chab puraiben, na ashene, møimbe tru wamisra karub waigwei merrappa, tru Ubisha-unai merrappabe misag purø nu, muguen mundzamgaig pønrrabelø køn, misaamera nørrø pønrrabig chu pirausreelø køben, nørrø kanbalatø warabelø chi misaamera køben, peg peg misag sötømera køben, peg peg wam waminchib misaamera købengue. Truiløbe puløzheelø kewar, tasigube palma ishiimera sruar, ¹⁰ mayeeløba trenchib mur trashibelø køn:

“Kaigyugurri wesraibe namui Tius,

tru wamisra karub wainug wabigweinukkurrimba,

tru Ubisha-unainukkurrimba arrubig køn” chib.

¹¹ Inchen maya ángelesmerabe tru karub wainuuba, kølli misaameraimba, tru piggatø øsiguelaimba, truilaim pøtøgatan pønrrøwa, tru karub waigwei merrab piraugatig tømboñsrøb srala, Tiuswan køriibala tabig waminchib, ¹² trenchibelø køn:

“¡Treeg kønrrun! cha.

Purø tabig wamindiiba,

tørguegwalmabiiba,

muguen nebua kusremgaiba,

maya nuguen ungwa, ungwa taiba,

tabig kui asha tab indiiba,

maramburab mariiba,

mugucha chindamgaiba,

iiløbe managatig namui Tiuswein kønrrain chibelø køn.

Treeg kønrrun.”

¹³ Inchene møikkøsrøn kan kølli misag nan payibig køn:

—¿I puløzhig kewarbe mumera køh? cha. ¿Chugurri amrruh?— cha.

¹⁴ Inchene nabe:

—Nai Señor, ñibe asha pasrainrrabguen— chibene, nøbe nan trenchibig køn:

—Iiløbe tru purø trømbøig isumddiigugurri purørruwar køn cha. Nømbde nømui keilan tsarar, Ubisha-unai anindøga puløzhig marar køn cha.

¹⁵ Treekkurri nømbe Tius tru wamisra karub wainug merrab pønrran cha.

Yem, kwaløm nui tab yau nuyasig marøb pønrran cha.

Inchen tru karub wainug wabiibe,
nømuim pala nø sötø pasraitøga

nømun chinchimønrrai ashchun cha.

¹⁶ Yandø nømbe parøgwai mørmøwei,
pimulgwai mørmøwei, pørr pati mørmøwei,
kabe katøgan pekkurri pachig kui mørmøwei inchun cha.

¹⁷ Kaguende tru wamisra karub wain tøbøtag Ubisha-unø pasrabiibe
nømun kan ubishameran lataig ashib pera pasrøwa,

tru øsig kømigwan tranøb pigabmerasrømay pera inrrun cha.

Inchen Tiusbe nømui kabmerayu kappiwan pinømørtrun— cha, trenchibig køn.

8

Tru siete kønrrabyu sellø

¹ Ubisha-unø tru siete kønrrabyu sellon kølsra kurene, srømbalarømbø kan media ura wasrønzhig kørrømsrøbig køn.

² Inchene ångelesmera sieteelø Tiuswei merrab pønrrai ashibig kur. Inchen nømun siete trompetas tranøbig køn. ³ Inchen katøgan ångel arruabe, tru altar keta pasramsrøbig køn, trube may irrabzheelø pusramig, orotøga marigwan mutaig. Inchen nune may irrabzheelø truba nu tranøbig køn, tru mayeelø Tiuswei misaamera Tiusba wamindiilan tru may irrabzhiibamara, tru wamisra karub waigwei merrab tru altar orotøga marig pasrabiibala tranrrai. ⁴ Inchen tru may irrabig patig naguishba, Tiuswei misaamera tru nøba wamindiiløbabe Tiuswei merrab nebibig køn tru ångelwei tasigugurri. ⁵ Inchen tru ångelbe tru may irrabzhig pusrigwan muta, tru altaryugurri trøsr naarrøsrwan netsøgana, pirausrø pinøguchene, palaig trasamba, chi wanringuen møramgaig wanrramba, sre pilamba, pirø kønamba inchibig køn.

Trompetamera siete

⁶ Inchen tru ångelesmera sieteelø tru siete trompetameran sruarbe urrønrrab yandø tamara pønrramisrøbelø køn.

⁷ Inchen tru srøsrø ångel nui trompetan urrøbene, sre srug naaba, animba lindisaig arruben, pirau trunun kørrøbetig købig køn. Inchen truørø pirøbe muba kuimburab tøbøtag lutau pachen, katø tusrmera treetøwei pirø muba kuimburab tøbøtag lutau pachen, katø mayam pumera pillizheelø chigucha chishtø pachibig køn.

⁸ Inchen tru ångel pagatø kønrrabyuig nui trompetan urrøbene, kan purø nu tun ørøba naarab lataigwan maryu keguchene, marbe tøbøtag lutau ani misren, ⁹ truyu øsig purrabeløbe tøbøtag lutau chab kwaben, katø tru maryu barcomera maya købiibe tøbøtag lutau chab pinabig køn.

¹⁰ Inchen tru ångel pøn kønrrabyuig nui trompetan urrøbene, kan truba nu estrella srømbalarøngurri nu nag tulu lataig naarab peñippe, pimera kuimørig nørø pimeran køben, katø kølømø pi kal-labzheelan køben, mayamba pøngatøyu partø, partø ka kørrømsren, kane itøbenig kørrømsrøbig køn. ¹¹ Tru estrellabe Ajenjo munchi købig køn. Inchen pimera tru pønyu kanun itøbenimburappe, larrø trømbø møbgølig misren, misaamerabe tru møb pimeragurri truba truba nørø kwabelø køn.

¹² Inchen tru ångel pib kønrrabyuig nui trompetan urrøbene, nøsig lata, katø pøl lata tøbøtag lutau mindisailø kørrømsren, katø estrellamera chigucha maya købig tøbøtag lutau mindisaig pilømeelø kørrømsrøbig køn, yem lata, kwaløm lata pib urabatø purø løstiig kønrrai.

¹³ Inchen na nømibe ashene, kan wasrø srømbalawan llirab arri mørøbig kur, mur trashib, øyah chib: “¡Ay karrengucha kuita! ¡Ay karrengucha kuita! ¡Ay karrengucha kuita! ¡Pirau warab misag waachameran maig kønrrer! chib, tru katøgan pøngatø ångelesmera trompetan urrøbene.”

9

Tru tratrøgatø kønrrabyu trompeta

¹ Inchen tru ångel tratrøgatø kønrrabyuig nui trompetan urrøbene, kan estrella srømbalarøngurri pirausrø peni ashibig kur. Inchen tru estrellane tru purø trømbø umbu trabyu llaviwan tranig køn. ² Tru purø trømbø umbu trabwan kurene, truyugurrimbe naguish kan nu hornoyugurri lataig nebarrubig køn. Inchen nøsiiba, pala srønzhig chishchig pasrabiibabe tru trabyu naguishkurri løstørabig køn. ³ Inchen tru naguishyugurrimbe chapullmera piraumay werruben, truilane pirau alacránmera lataitøwei mu chindamgaig martrai tranig køn. ⁴ Incha truilane pirau puwan lata, kauwan lata, chi tusrwandøgucha mindishimønrrain karuig køn, tru Tiuswei sellon kappaløyu chiga misaamerandø mindishinrraingue. ⁵ Inchendø kweechippe, kweechimøtø, tratrø pøl ørøba purø

trømbøig pusrkwaiḡ melønrain købig køn. Inchen tru pusrkwabiibe misagwan kan alacrán kwanen pusrkwabig lataig købig køn.

⁶Inchen tru kwalømmerrwane misaamerabe kwamigwane labendø, chinchagucha kwanrrab kaimanrrun. Kwag kuimbe inchendø, kwamibe nømuinukkurrimbe tarømisrrun.

⁷Tru chapullmerabe kaullimera guerrayu kwayamig tamariilø lataig asønabelø købig køn. Nømui turyube orotøga marig latailø corona petsar købig køn. Inchen nømui maløbe kan misag malø latailøgue. ⁸Inchen nømui pusruube isheweilataig køben, nømui trugulmerabe kan leónwein trugul lataig tōgar købig køn. ⁹Nømui asrwan merrammay chinchimønrrai katabig kan tsandzøn lataig tōgar, katø nømui kwaldzarig ichen wanrrøbiibe, kan guerrayu kwayanrrab carretillameran kaulli sətø srua lulen wanrrab lataig trømbøig wanrrabig køn. ¹⁰Inchen tru mørmerabe kan alacránwei lataig køben, katø kalmera kwanøbig tōgar købig køn. Inchen nømui mørmerayube misaameran trattø pøl ørøba maramburab marøb mindisamig tōgar købig køn. ¹¹Inchen nømun ashib karub pera pasrabiibe, tru purø trømbø iguambu trabyu ángel købig køn, hebreomaybe Abadon munchi køben, griegomaybe Apolión munchi.

¹²Tru i trømbøig kørig køndiig srøsriibe chab puraiben, katøgucha trømbøig kørig køndiig attrabig par palabig køn.

Seis kønrrabyu trompeta

¹³Inchen tru ángel seis kønrrabyuig nui trompetan urrabig køn. Inchen Tiuswei merrab pasrabig orotøga mari altaryu, tru pibgatø kigulmerayugurrimbe kan wam webarri mørøbig kur; ¹⁴tru seis kønrrabyuig trompeta srua ángelwane trenchib:

—Tru pibgatø ángelesmera Eufrates nu pi menda lusrig pønrrabelan lelachi— cha.

¹⁵Inchen tru pibgatø ángelesmeran ke yandø treeg pumweimba, tru kwalømwweimba, tru pølweimba, tru pilaweimba treeg martrai tamariilø pønrrabelan pirau muba kuimburab maya misag pasrabigwan tres milyu milbatø kwetchai, tru ángelesmerane elatsiilø købelø køn. ¹⁶Inchen tru suldaumera kaulli palartø doscientos millones køn taig mørøbig kur.

¹⁷Pøs øyamay nan piab lataigu øyeeg kenamisren kaullimeran øyeeg ashar: tru itøgwanarbe nømui asrwan merrammay chinchimønrrai katabiibe, nag lata piguig køben, pillizhig køben, øskøig azufre lataig køben tōgar købig køn. Tru kaullimera turmerabe leónmerain tur latailø køben, nømui trigugurrimbe naaba, naguishba, azufreba webarrubig køn. ¹⁸Inchen pirau muba kuimburab misaamera pøn millonyube millonbatø kwaben, pøn milyube milbatø kwabig køn, tru i pøngatø trømbøig naaba, naguishba, azufreba kaullimera trigugurri webarruben. ¹⁹Pøs tru kaullimera mu chindamgaig maramig tōgagúibe nømui triguba, mørnyuba pasrabig køn. Kaguene nømui mørmerabe ulmera latailø turmera tōgar købig køn, truiløtøga misaameran mindishibelø.

²⁰Inchen misaamera tru i øyeeg trømbøig chab puraiben, kwamø kørrømisrøbeløbe øyeeg puraibenguen nømui taska mariilan treeg marmønrrab isua mørøb elachimeelø køn, tru kwaimandziimeran kōriibala tabig wamindamigwan lata, nømui taska mari tiusmeran lata, tru nøm orotøga mariilan lata, tsandzøn andøga mariilan lata, broncetøga mariilan lata, sruutøga mariilan lata, tsitøga mariilan lata, truilan elachig kōmub, truiløbe ashmøwei, mørøwei, ammøwei inchibelan. ²¹Katø kweetsamigwan lata, misag wanna trømbø maramelan lata, mōgueløba, ishumburmeraba trømbøig maramigwan lata, nilamigwan lata treeg marmønrrab isua mōra, Tiusweimay lirameelø køn.

10

Ángel kan libro-unan sruaig

¹Inchen katøgan ángel maramburab marøbig srømbalásrøngurri kōrraarubig køn. Truiibe wañindøga pinøgasraig, tur palabe kan kōshømbøtø tōgaig, nui maløbe kan nøsig lataig pilabig køben, nui srøbmerabe øneb kan nag pilabig lataig købig køn. ²Taskube kan libro-unan kura sruaig pasrabig køn. Incha kusrmay srøbwane mar pala punappe, atsimay srøbwane pirau puna pasramisrøbig køn. ³Inchabe truba mur trashibig køn, kan león trashib lataikke. Inchen tru trashibene, siete palaig trashibeløbe tru trasaigwan treetøweih trashib lötabelø køn. ⁴Inchen tru siete palaig trashibelø chab waminchen, nabe pørrab inchene, srømbalásrøngurri nane kan wam treeg mørø waminchibig køn:

—Tru siete palaig trashibelø wamindigwane pørmøtø, ñuinetø esegau— cha.

⁵Inchen tru ángel mar palaba, pirø palaba na pasrai asiibe kusrmay tasigwan srømbalaneb kusrawabe, trenchibig køn:

⁶“Srømbalawan lata, truyu pønrrabelan lata, pirøwan lata, tru pirau pønrrabelan lata, marwan lata, truyu chine purrabelan lata marøbig, tru managatig øsig wabikken ashen, trugwei merrab trendamønrrun cha: Yandø mas srørrønraamøn cha. ⁷Pøs tru ángel siete kønrrabyuig trompetan urram kwalømmera puben, urrab pølbarsene, Tiuswei chigøben

maramig sóriilo pønnrabeløbe yandø marig kørromistrun cha, tru nui marøb melabelø tru nø maig karuigwan eshkabelø maig eshkaig, treeg.”

⁸ Tru srømbalasrø wam na møriibe nan katøyg waminchib trenchibig køn:

—Inrøø cha. Incha tru ángel mar palaba, pirø palaba puna pasrabig tasku libro-unø kura srua pasraigwan utø— cha.

⁹ Inchen nabe ángelweimay ya, tru libro-unan tranrrra chibene:

—¡Cha! chibig køn. Inchabe, ¡Ma! chibig køn. Nui trigube kuizhig miel lataig kua, ñui patsaube møbig misrtrun— cha.

¹⁰ Inchen nabe tru libro-unan ángelwan uta, mabene, nai trigube kan miel lataig kuizhig købendø, na chab mabene, nai patsaube larrø møbgølig misrøbig køn. ¹¹ Inchabe nane trenchibelø køn:

—Ñibe misaamera nørøø kanbalatø warabelanba, misag nørøø pønnrabelanba, peg peg wam waminchib misaameranba, reymeranba Tius maig eshkanrrai karuigwan treeg kønrrun chib katøyg eshkamig nebunrrun— cha.

11

Tiusweimburab maig kuigwan eshkabelø pailø

¹ Incha nane kan caña, unaasin tsig lataig tranabe, trenchibig køn:

—Kurra, Tiuswei yawanba, tru altarwanba unaasha, katø truyu Tiuswan køriibala tabig waminchibelan munchi cha. ² Inchendø Tiuswei yau, tru yawambigwane unashmøta cha. Kaguende judíos kømø misaamera Tiuswan ashmeelan tranig pasran cha. Truiløbe tru Tiusweindø tarømarø ciudadwane pøn pila y tøbø pilaba itølullrab køn cha. ³ Inchen nabe pailø naimburab maig kuigwan waminchibelan øramønrrun cha, eshkanrrab amrrai. Truiløbe yaliig trøsrkøleelø kewar kwalømmera mil doscientos sesenta nemisramne naimburab eshka waminchun— cha.

⁴ I tru pailø naimburab maig kuigwan waminchibeløbe, tru pagatø olivo tusrmera køb, tru pagatø kandilerumera køb køn, Tius pirøwan nø ashib karub pasrabigwei merrab pønnrabelø. ⁵ Møikkøben chigøben nømun kaig martrab inchene, nømui trigugurrimbe nag webarringarua, nømune kerrigu chishtø parrøbelø køn. Møikkøben nømun mindishinrrab inchibeløbe øyeeg kwamig nebunrrun. ⁶ Tru Tiusweimburabigwan eshkabeløbe srømbalawan kasramig maramburab martrabelø køn, nøm Tiusweimburabigwan eshka amøñib kwalømmerawan sre pumønrrai. Katø treetøwei pimerangucha anim pimera misrtra marøg købene, anim pimera martrabelø køn. Katø pirøwangucha kaig nebunrrai, kaig kwanrrømera køben, kaig pølømmera mindishinrrabelø ørtrun, nømun mammay mindishig køben mindishinrrai.

⁷ Yandø tru Tiusweimburabigwan maig kuigwan nøm chab eshkabene, tru purø trømbø umbu trabyugurri animal purø trømbøgølig nebarrua nømbe kwayam lawa, nø kanawa, truilane kwetchun. ⁸ Inchen kwailai asrmerabe ciudadu mayeelø llirai mayu waramisrtrun tru nømui Señorwan kurusyu mesraig nu ciudadu, truike Sodomaba, Egiptoba lataig asønabig køn cha waminug. ⁹ Inchen misag nørøø kanbalatø warabeløba, peg peg misag sötømeraba, peg peg wam waminchibeløba, chu pirausreelø køben misag nørøø pønnrabeløba, truiløbe pøn kwaløm menrra tru kwailai asrmerane ashib kønrrun. Incha truilai asrmerane sörinrrabmerayu sörøbashmønrrun. ¹⁰ Inchen misaamera pirau warabeløbe tru kwaig warabelaimburab truba truba kasraarawa, kasrag købiitø kangurri kangurri ketiilø ørtrun, kaguende tru pailø Tius maig karuigwan eshkabeløbe tru nømun mamaygucha kømigi jkatø! isua møra melønrrai marøbelø kuikkurri.

¹¹ Indiibe pøn kwaløm menrrayube øsig kømig Tiusweinukkurri arrubig nømuinug kebiben øsiiranrrai Tius nømun urrøben, katø kurra, pønramisrøptinchen, mayeelø ashibelane purø trømbøig kørig købig arrubig køn. ¹² Inchene tru pailøbe srømbalasrøngurri kan wam truba mur wamindi mørøbelø køn, trenchibig: “Yusø nerruy” cha. Inchen nømun ashig kømui inchibeløbe ashibelø køn, nømbe kan wañiyu srømbalasrømay nebamben. ¹³ Inchen treeg puraibendø, kan truba mur pirø kønabig arruben, tru pirø kønabikkurri ciudadu yamerabe milmørig cienbatø kegørrabig køn. Inchen treegu misaamera siete mil kwabelø køn. Inchen kwamø kørømisrøbeløbe truba trømbøig kørig kuilø, Tius srømbalasrø wabigwan truba truba tabig waminchibelø køn.

¹⁴ Srøsiigwei wendauig trømbøig chab puraibendø, tru kørig kømdiig pøn kønrrabyuibe petø atrrun.

Tru siete kønrrabyu trompeta

¹⁵ Inchen tru ángel siete kønrrabyuig nui trompetan urrøbene, srømbalasrømbe wammera purø mur trenchibelø køn:

“Pirau reymera nòm ashib karub tøgagúiløbe namui Señorweimba, nui Cristoimba misran cha.

Inchen nøbe managatig ashib karub wanrrun” cha.

¹⁶ Inchen tru kólí misamera veinticuatroelø tru nòm karub purrainug Tiuswei merrab purrabeløbe pirau tømbeñsrøb srala, Tiuswan kóriibala tabig waminchib, ¹⁷ trenchibelø kòn:

“Mayanguen ungwa,

Señor Tius Newan Maramburab Marøbig,

møi ya pasrabig, katø manawei købig.

Kaguende ñui purø nuig maramburab mariitøga

ñibe ashib karub pølbasran cha.

¹⁸ Misamera nørø pønrrabeløbe truba truba namig kurrig kòn cha.

Inchendø ñui purø trømbøig namig købig pub,

katø tru kwabelan maig kønrrabigwan asha maramikkucha yandø pub indin kòn cha.

Inchen ñui marøb melabelø

tru ñi maig karuigwan eshkabelanba,

katø tru ñui misaameranba,

ñui munchiwan kaig kui lataig maramigwan koriguelanba,

nørø kusrebelanba, treeg kømeealanba,

truilan truburø ketamikkucha puin kòn cha.

Trugurri pirøwan mindishib pinishibelangucha pinisamig puin kòn” cha, trenchibelø kòn.

¹⁹ Inchen Tiuswei ya tru srømbalasrø pasrabig kurene, tru israelitasmeraba Tius acuerdo marig, tru arcabe, truyu kena pasrabig kòn. Inchen palaig pilabelø køben, wammera køben, palaig trashibelø køben, katø kan truba mur pirø kønabig køben, purø trømbøig sre srug pubig køben arrubig kòn.

12

Ishuuba, dragonba

¹ Inchene srømbalasrømbe kan truba nuig chigøben kønrrab kuitamab asha kømig kenamisrøbig kòn. Kan ishug nui asrwan pøsrøga pinøbuli lataig, srøb umbube pølwán tøgag, turyu corona estrellamera doce tøgag petsaig købig kòn. ² Tru ishube kwanrriig kua, yandø unø tammisrøbig trømbøig pusrkwai inchib, truba trashibig kòn.

³ Inchene srømbalasrømbe katøgan chigøben kønrrab kuitamab asha kømig kenamisrøbig kòn. Kan dragon piguiig purø nuig, turmerabe siete tøgag, katø kigulmera diez tøgag, turmørig tabzheelø petsartø købig kòn. ⁴ Incha srømbalasrø estrellamerane kanbalø ørøba nui mørtrøga srua, tøbøtag lutau pirau pinøbetabig kòn. Incha tru dragonbe tru unø tammisrøbig trømbøig pinrøgaie pasramisrøbig kòn, tammisren latatø unan manrrab. ⁵ Inchen tru ishube kan møg-unø tammisren, truike misag nørø pønrrabelan chuelandøgucha ashib karuppe, kan tsandzøn pørøtsigwan srua pasramisra mu kurraasamgaig karub martrabig købig kòn. Inchendø nui nusrkawane kerrappa, Tiusweimayba, nø wamisra karub wainuumayba nune srua yaig kòn. ⁶ Inchen ishube mu misag warab waraimøsrømay luløbig kòn, tru ishug tsumig Tius tamara pasriisrømay, kwalømmerra mil doscientos sesenta nemisramne trusrø mannøb tøgagønrrai.

⁷ Inchen trugurrimbe srømbalasrømbe Miguel nui ángelesmeraba purø trømbøig kwayabelø kòn tru dragonba. Inchen dragonbe nui kaig ángelesmeraba kwayabendø, ⁸ chinchaguen kanab kwayanrrab kaimaben, yandø trugurri srømbalasrømbe nømuimbe yandø chu pønrramikkaig patsabig kòn. ⁹ Inchen tru purø nu dragon, tru merrasrø ulwane pinøgutsig kòn, truigwane nugwaimandzig cha wamamba, Satanás cha wamamba indigwan, tru pirau maya misagwan kegørrøsrkøbigwan. Truigwane nui kaig ángelesmeranbañau pirau pinøbusrig kòn.

¹⁰ Inchen nabe srømbalasrø kan wam truba mur trendaig mørøbig kur:

“Mømbe yandø kaigyurri wesraiba,

katø maramburab maramiba,

namui Tius nø ashib karub wamiba,

katø nui Cristo mu mandamgaig karub marøb wamiba puin kòn cha.

Kaguende Satanás Tiuswei merrab yem, kwaløm

namui nunelan ‘yeeg kailø kòn’ chib,

‘øyeeg marøbelø kòn’ chib pasrabigwane pinøgutsin kòn cha.

¹¹ Namui nuneløbe tru Ubisha-unai aningurrimba,

nòm Tiuswei wamwan wamindikkurrimba

kanawa pønrramisran cha.

Kwamig nebubene, kwanrraptø pønrraig køn cha,
nømbe øsig kømigwangøba isumøtø.

¹² Inchawei treekkurri, srømbalameraba,
katø kerrigu truyu pønrrabelø
chigucha truba kasraaray cha.

Inchendø jnusiamus, pirau chi øsig købelø lata,
marmerayu lata øsigueløbe chincer! cha.

Kaguende nugwaimandzig ñimuiamay
ke ne namig kuin kørrayan cha,
nui llirab unamibe yana unamig kømønrrab kuimba.”

¹³ Inchen dragon nune pirausrø pinøgutsi mørabe, tru ishug møg-unø tøgagøbigwane pasraarøb mendøben, ¹⁴ tru ishuwane purø nu wasrøwei pagatø kwaldzariimeran tranig køn, ulweim pulugurri purø yabsrø nø tsumsrømay pala kurra inrrai tru mu misag warab waraimørømay. Tru pøn pila y tøbø pilaba nun mannøb tøgagømsrømay. ¹⁵ Inchen ulbe ishuwan pasraarøb ya, nui triimay pi weguchibig køn, kan nu piiburabig, tru ishuwan pi srua yaig kønrrai. ¹⁶ Inchendø pirøbe tru dragon trigugurri nu pi wegutsigwane anchippa kerrigu piñiptinchibig køn, tru ishuwan purugunrrab. ¹⁷⁻¹⁸ Treenchene, dragonbe ishuwan purø trømbøig namaptø, tru ishuweinukkurri katøburø amrrub misaameraba kwayam lanrrab ibig køn, Tius tru maig maramigwan martrai karuigwan møra marøbelø, Jesucristoimburabigwan tabigwan elachimø marøb tøgä pønrrabig pønrrabeløba. Incha tru dragonbe tru mar menda pisrumyu pasramisrøbig køn.

13

Pagatø animal trømbøgøleelø

¹ Inchen maryugurrimbe kan animal purø trømbøgølig webarrubig køn, turmera siete, kigulmera diez tøgäig, kigulmørig purø tabzhig petsargue. Inchen turmørig munchi pøriibe Tiuswan purø trømbøig wamabig pørig tøgä købig køn. ² Inchen tru trømbøgøligwan na asiibe kan tiiri lataig købig køn, srøbmerabe wig srøb lataig køben, nui triibe leønwein trig lataikke. Trunun tru dragonbe nui maramburab maramigwanba, nø wamisra karub waigwanba, mu mandamgaig mayangatikkucha karug køben karub martrai tru animal trømbøgøligwan tranøbig køn. ³ Inchen tru trømbøgøligwei turmerabe, mø tur køsrønbe purø trømbøig kørrindig kwanrraptiig lataig købendø, tru treeg kørrindiibe tammisrin køben, mayeelø yu piraueløbe truba kwaara ashib, tru wendautø ambubelø køn. ⁴ Incha misaamerabe tru dragonwan køriibala tabig waminchibølø køn, kaguende dragonbe tru trømbøgøligwan nui karumrab karumigwan martrai tranikkurri. Katø tru trømbøgøligwangucha treetøwei køriibala tabig waminchib trenchibølø køn:

—¿Kan i trømbøgølig lataibe katøgane mu kuin kønrrab kø? chib. ¿Kan nøbabe mu kuin kwayam lanrrautah?— chib.

⁵ Incha tru animal trømbøgøligwane katø kan trig tranig køn purab nuig misrøb wamin-damba, purø trømbøig wamamba inchai, katø pøn pila y tøbø pilaba mu mandamgaig mar-traimba. ⁶ Inchen tru animal trømbøgøliibe nui trigwan kurøbig køn, Tiuswan purø trømbøig waminchab. Incha Tiuswei munchiwanba, nø pasraigwanba, srømbalasrø purrabelanba purø trømbøig wamabig køn. ⁷ Incha tru Tiuswei misaameraba kwayabasha, nø ka kan-abasig køn. Incha chi misag sötømeran køben, kanbalatø warabelø chi misaameran køben, peg peg wam waminchib misaameran køben, nørrø misag pønrrabig chu pirausreelan køben, truilaim pala mu manchinrraingaig karumigwan tøgagønrraingaucha tranig køn. ⁸ Tru animal trømbøgøligwane tru maya misag pirau warabeløbe køriibala tabig waminchibølø køn, tru chiwangurrimbunø marøb urassrøwei Ubisha-unø kweetsig kønrrabigwei libroyu tru managatig øsig purrønrrabelan pørigu nømui munchimeran truyu chigarbe.

⁹ Møikkøben kalubaiibe mør.

¹⁰ Merrarrawa srua ambinanrrabelane,
merrarrawa srua amben,
espatatøga kweetsinanrrabelane,
espatatøga kwetchun.

Øyeelø pubene, tru Tiuswei misaamerabe chi arringucha ka melaptø melamiguba, katø isubigwan Jesucristoinuutø pasra tøgä pønrramiguba masken treegutø melabig melamitøwein kønrrun.

Tru animal purø trømbøgølig

¹¹ Inchen katøgan animal trømbøgølig piraugurri nebarri ashar. Truibe pagatø kigulmera ubisha-unai lataig asønabig tøgäig købendø, waminchippe, dragon lataig waminchibig køn. ¹² Truibe tru animal trømbøgølig srøsriigwei mu manchinrraingaig marøb karuigwan nø

tøga pasramisra, nui merrab treetøweih marøb karubig køn. Incha pirøwanba, pirau warab misaameranbabe tru animal trømbøgølig srøtiig tru purø trømbøig køriibala tabig waminchai inchibig køn. ¹³ Incha katø nøgucha misaamera nui maramburab marigwan asha kønrrai chigøben truba nørreelø marøbig køn, misaamera ashen srømbalasarøngurringuen piraumay nag kørraarringarub. ¹⁴ Tru treetøga kømig tru animal trømbøgølig srøriigwei merrab marbasikkurri, nõbe pirau warabelan peløsrka chab kegørrøsrkøbig køn. Incha tru trømbøgølig srøsrribe tru espadatøga truba kørrø køriindig købendø, kwamø, øsig købigwan tab inchab, trunun asha, treetøwei mara pasrtrai pirau misaameran karubig køn. ¹⁵ Incha tru trømbøgølig srøtiigwan treetøwei mara pasrigwane øsig kømigwan nõbe tranøbig køn, tru mara pasriibe waminchibig misra, nun køriibala tabig waminchimeelane mayeelan kwanrrai martrai. ¹⁶ Incha trutø kømøtø, nørø kusreb møguelan køben, treetøweielan køben, puarmeran køben, waachameran køben, karuindiig melabelan køben, karuindiig melømeelan køben mayeelanba kusrmay tasigu kui, kappaløyu kui marcangarubig køn, ¹⁷ tru trømbøgøligwei munchin kui, numeron kui marcaig chigaibe mugucha yanmøwei, penømøwei inchai.

¹⁸ Yubesi chigú ashchappe, purø nu isumig pasran. Tab chigú mørøbiibe, tru trømbøgøligwei numeron maya trandashchab ash. Kaguende kan møwei numero køn. Tru numerobe 666 køn.

14

144.000-elø cantaig

¹ Inchen na ashene, Ubisha-unøbe Sion taig Tun pala pasrai ashibig kur. Inchen 144.000 tru nõba pønrrabeløbe Ubisha-unai munchiwanba, Møskawei munchiwanba nõmui kappaløyu pørig tøgø pønrrabelø køn. ² Inchen srømbalasarøngurrimbe kan wanrøbig mørøbig kur, kan truba truba nu pi wanrøbig lataig, kabe kan palaig mur trashib mullib lataig, truba yamelø arpas kønabelø kønøben wanrøbig lataig wanrøbig køn, trube. ³ Incha tru wamisra karub waigwei merrappa, tru pigbatø øsiguelai merrappa, kølli misaamerai merrappa tru 144.000-eløbe kerrigu srøig mana møriimøzhig cantabelø køn. Tru cantaigwane mugucha cantam kusrenrrab kaimaben, pirau tru misaamerai utugurri 144.000 tru Tiuswein kønrrai wesruiløtøwei cantabelø køn, trunune. ⁴ Iiløbe ishumbermeraba trømbøig marmøwar, nõmui asrwan trømbøig marøb mun katørameelø, chishelø køn. Iiløbe Ubisha-unø chu iben, chu uragucha elachimø, mendig amøfiibelø køn. Iiløbe maya misagwei utugurri nõmune nun kønrrai wesruilø køn, Tiusweyasiiba, Ubisha-unayasiiba nõmunmerrig pølbasa traniilø. ⁵ Nõmui trigube chigucha isa wamindiibe chigar købig køn, mu mandamgaig chishelø.

Pøngatø ångelesmera eshkan wamindiilø

⁶ Inchen katøgan ångel srømbalawan pala arri ashibig kur, Tiuswei tabig srø wam mana patsømigwan pirau warabelan eshkanrrab: chu pirausrøn køben misag nørø pønrrabelanba, chi misag sötømera køben warabelanba, peg peg waminchib misaameranba, kanbalatø warabelø chi misaameran køben truilanba. ⁷ Inchabe truba mur waminchib øyah chibig køn: “Tiuswane køriibala marøb, truba truba tabig wamindamig køn chib. Kaguende tru maig kønrrabigwan asha maramig yandø pun chib. Srømbalawanba, pirøwanba, marwanba, kømø pimeranba marøbigwane køriibala tabig waminday” chib.

⁸ Inchen katøgan ångel tru wendau øyah chib, ibig køn: “jBabilonia truba truba nuibe yandø penan, yandø penan! chib, truørø tru misag nørø pønrrabelan kerriguba nui trømbøig marøg købiitø keerøba chinchimmørø indi vinon mutsamne incha, mutsiiranøbig.”

⁹ Inchen tru wendau katøgan ångel tru pøn kønrrabyuibe truba mur øyah trenchib ibig køn: “Møikkøben tru trømbøgøligwanba, tru nõ maig kuiig treetøwei asha marigwanba køriibala tabig waminchib, katø nui marcan kappaløyu kui, tasku kui utab inchibiibe ¹⁰ nøgucha tru mumaygucha kømui møra melønrrai mari vinon Tiusweinukkurri arrubigwan mutchun cha, Tiuswei namig købigwan truigwandø tamara copayu usrigwan. Katø Tiusweindø tarø mari ångelesmerai merrappa, Ubisha-unai merrappa naaba, azufrebaigu mumaygucha kømui purø trømbøig kui meganrrun. ¹¹ Tru purø trømbøig kui melønrrai marøb naguishbe managatig nebarrub pasrøben, nõmuimbe yem kwaløm pishindø tab purramibe managuen kaagøn, tru trømbøgøligwanba, katø nundøwei asha treezhigwei marigwanba køriibala tabig waminchibelaimba, katø tru nui munchitøga marcarramabelaimba.” ¹² Incha øyeekkurriwei melabig melamig palan, tru Tiuswei misaamera Tius tru maig maramigwan martrai karuigwan møra marøb, Jesúswan tarø mismø trag pulu melabelaimbe.

¹³ Inchen nabe srømbalasarøngurri kan wam trendaig mørøbig kur:

—ligwan pør cha: “Møingurrimbunøbe mayanguen tab kuilø køn cha, Señorwan kørewa kwabelaimbe.”—

“Øø, treegwein køn tan, Espiritu Santobe. Nømbe nømui muraara, muraara marøb melailøyugurri isrønrrun. Kaguende nømui mariiløbe nømba lincha pasrabig pasrønrrun” cha.

Pirau ellmarilan tulishib

¹⁴ Inchen, na ashene, kan pulø wañi kenamisren, tru wañim palabe Møg Misra Arrubig lataig wamisra wabig køn, turyube orotøga marig kan corona petsaig, tasigube kan uses purø trøsrig sruaig. ¹⁵ Inchen katøgan ángel Tiuswei yaugurri webarrua, truba mur trashib, tru wañim pala wabigwane trenchibig køn: “Ñui usestøga parøb tulishi cha. Kaguende piraube paramig yandø srønø køben, parøb tulisamig nebun” cha.

¹⁶ Trenchibene, tru wañim pala wabiibe pirau ellmarigu nui usestøga parøb puraibene, tru pirau ellmariibe tulisaið kørørmisrøbig køn.

¹⁷ Inchen katøgan ángel srømbalarø Tiuswei yaugurri webarruppe, truikkucha kan uses truba trøsrig sruaig købig køn. ¹⁸ Inchen katøgan ángel webarrubig køn, altaryugurri truiibe nag piløgamigwan nø ashibig. Incha tru trøsr uses sruaigwane truba mur trenchib wamabig køn: “Ñui trøsr useswan srua, pirau uvas traamerayu, uvas lusrømeran parøb tulishi cha. Kaguende uvasmerabe yandø srønø køn” cha.

¹⁹ Inchen ángelbe useswan pirø palawan parøb, puraya, pirau tru uvas tusryu uvas lusrømeran parabe, tru uvas kwaramig marig pasrabigu kebusrøbig køn, uvas piwan wesraig kønrrai. Truiibe Tiuswei tru purø trømbøbig kørig kømdiig namig købigwan eshkabig køn. ²⁰ Tru uvas pi wesraibe ciudayu kømøtø, wambig nøørøsrøn pasrøben truyu piwan wesraben, truyugurri ani webarruppe, kaullimeran frenossrøngatig neguchibig webarrubig køn, trescientos kilómetros ørøba ani luløbikke.

15

Angelesmera tru srabe siete plagaswan sruar

¹ Srømbalarømbe katøgan chigøben kønrrab kuitamab asha kømig truba nuig ashibig kur kwaara asamdiig, siete ángelesmera siete chine kaig nebunrrai marøb amrrunrrabelø yandø srabeelan tøgar. Truiløtøga yandø tru Tiuswei namig købiibe truyu yandø newan patsøgaig kørørmisrøbig køn. ² Katø kan mar pigriu lataig naaba lindisaig ashibig kur. Tru animal trømbøgøligwanba, nundøwei tru treetøwei asha marigwanba, nui munchi numeronba utømø, treegu chinchamamø webambarbe tru mar tørguelarrøzhig pala Tius arpas traniiilan srua pønrrabelø køn. ³ Nømbe tru Moisés Tiuswei marøb megabig cantaigwanba, katø Ubisha-unø cantaigwanba trenchib cantabelø køn:

“Señor, purø nørreelø ñi chigøben mariiløbe,

kwaara asamdeelø mariilø køn chib,

Señor Tius Newan Maramburab Marøbig.

Ñui maymerabe tabig sølgandeelø,

newan ciertonelø køn chib.

¡Chusrøn køben misag purø nørø pønrrabelai

ñi Rey køn! chib.

⁴ ¡Ay Señor! ¿Ñun kørmiibe mu kuaasamø? chib.

¿Ñui munchiwan tabig waminchimiibe mu kua asamø? chib.

Newan tabig chishiibe ñitøwein køben,

truøø tru misag nørø pønrrabelø kerriguba

ñui merrab amrrua køriibala tabig waminchun chib.

Kaguende mumaytøgucha ñui sølgandø tabig mariilø kenamisran” chib cantabelø køn.

⁵ Øyeelø chab puraiben, na ashene, srømbalarø Tiuswei yaambusrø tru Tius nø pasramig nuyasiitø tarømarig pasrabiibe kuri ashibig kur. ⁶ Inchen truyugurrimbe tru siete ángelesmera tru siete chine kaig nebunrrai marøb amrrunrrabelan sruar werrui ashibig kur. Truiløbe linotøga marig chishcheelø, tørbilabzheelø kewar, pørønaig orotøga marig pechoburab pørønawar købig køn. ⁷ Inchen møikkøsrøn tru piðgatø øsiguelai utuibe tru siete ángelesmeran oro copamera siete tranøbig køn, Tius tru managatig øsig wabig, nui namig købigwan truyu netsøganiilan. ⁸ Inchen Tiuswei tru tab yaube Tiuswei tørguegwalmabikkurrimba, maramburab marig pasraikkurrimba naguishtø tinbuløben, mugucha kebamrrab kaimabelø køn truyube, tru ángelesmera siete tru chine kaig nebunrrai marøb amrrunrrabelan ángelesmera kan kan srua ambiilø maig punrrabig chab purayamnegatig.

16

Copamera tiuswei namig købiitø netsailø

¹ Inchen kan wam truba mur wamindi mørøbig kur, Tiuswei purø tab yaugurri tru siete ánglesmeran trenchib:

“Ambay cha. Incha tru siete copas Tiusweinukkurri purø trømbøig kørig kòmdiig namig købig tøgag arrubigwan pirau lushchigay” cha.

² Inchen tru srøsrø ángelbe ya, nui copan pirø palawan lushene, tru animal trømbøgøligwei marcan tōgarwanba, nun tru treetøwei asha marigwan kørribala tabig waminchibelanba kan pisrø purø trømbøig pusrkwab pill-llabig webarrubig køn.

³ Inchen tru ángel par kønrrabyuig nui copan mar pala lushene, maryu pibe kan kwaigwei ani lataig misrøbig køn. Inchen maryu chine øsiguig purrabeløbe mayamba chab kwabig køn.

⁴ Inchen tru ángel pøn kønrrabyuig nui copan nørro pimerayuba, pigabmerayuba lushene, kerriguba anindø misrøbig køn. ⁵ Inchen tru pimeran ani misrtrai marøb pasrab ángelbe trendaig mørøbig kur:

“Ñi, Señor, tabig sølgandø marøbig,
møi ya køb, katø manasrøngurri købig,

Tius Newan Tabig ñibe treeg køn cha.

Kaguende ñibe iilan maig kønrrabigwan asha maran cha.

⁶ Pøs tru pirau misaamerabe tru ñui misaameranba,

Tius maig karuigwan eshkabelanba
kweecha aniwan lusikkurri,

møimbe nømungucha ñibe ani mutsøsrain køn cha.

Kaguende nømune øyeeg maramigweim palaig kuig køn” cha.

⁷ Inchen tru altaryugurri trendaig mørøbig kur:

“¡Øø, treegwein køn cha,

kan ñi Señor Tius Newan Maramburab Marøbig.

Ñui maig maramigwan ñi asha mariibe,
ciertonig, sølgandø tabig mariilø køn!” chib.

⁸ Inchen tru ángel pib kønrrabyuig nui copan nøsig pala itølushene, tru nøsiibe nui pachibitøga misagwan parrøbig køn. ⁹ Inchen misaamerabe tru purø trømbøig pachibiitøga parrig kørømisra, Tiuswei munchiwan tsalø wamabelø køn, tru øyeeg chine kaig nebub attrai arringarub maram purab marøbigwan. Treeg kuindøgucha nømbe isua møra, Tiusweimay llirameelø køn, nun truba tabig waminchab.

¹⁰ Inchen tru ángel trattrøgatø kønrrabyuig nui copan tru animal trømbøgølig wamisra karub waigwan itølushene, nø ashib karub tōga waibe kerriguba løstiiig kørømisrøbig køn. Inchen misaamerabe pusrkwabiitø nilømeran ke tsachatø mørøbelø køn. ¹¹ Incha tru srømbalasarø wab Tiuswan tsalø wamabelø køn, tru chine nømun pusrkwabeløgurrimba, katø trømbøig pill-llab pisrømeragurrimba. Treeg indingucha, nømui kaig mariilan isua møra Tiusweimay llirameelø køn.

¹² Inchen tru ángel seis kønrrabyuig nui copan tru Eufrates purø nu pi pala kelushene, tru pimerabe kølaptinchibig køn, pørr kal-labsrøngurri amrrub reymera puraambamig kønrrai may kura kørømartrab.

¹³ Inchen dragonwei trigugurrimba, tru animal trømbøgøligwei trigugurrimba, tru ka isatø “Tius maig karuigwan eshkabig kur” chibigwei trigugurrimba pøngatø trømbøig marøb kwaimandziimera urututuimera lataig asønabelø werrubelø køn. ¹⁴ Iiløbe kwaimandziimeraim øsiimera købig køn, nui maramburab marigwan kenamarøbelø. Truiløbe pirø ørøba maya reymeraisrømay webambubelø køn, kwayamig truilan tulundzuningarunrrab, Tius Newan Maramburab Marøbigwei tru purø nu kwaløm kwayamig.

¹⁵ “Au, nabe kan nilliig lataig arrumønrrun. Mayanguen tab kuig køn pesannamø, ashiptø megabigweimbe, nui keigwan tab asha tøgagøb, katø ñi køsaatiig uñen, ñui køsagwan misagasinab, kørig puraimønrrappe.”

¹⁶ Incha truiløbe tru reymeran tru hebreomaybe Armagedón tainug tulundzuningarubelø køn.

¹⁷ Inchen tru ángel siete kønrrabyuig nui copan tru chiguchagayu srønzhig pala lushene, srømbalasarø tru Tiuswei yau tru wamisra karub wainukkurrimbe kan wam truba mur trenchibig webarrubig køn:

—Yandø chab patsøgaig kørømisran— cha. ¹⁸ Inchen palaig pilabelø køben, sre mullibelø køben, palaig trashibelø køben arruben, pirøbe purø trømbøig kønabig køn, misaamera yu pirau srøtø warab urassrøngurri øyeeg lataibe managuen kønømuinrrunikke. ¹⁹ Inchen tru purø nu ciudadabe pønbaliig misrøb lanrra, pirisaig kørømisren, yu pirau ciudadamera pønrrabeløbe kerrigu tuin pitis kegørrabelø køn. Inchen Tiusbe tru Babilonia purø nu ciudadawan isua, tru nui copayu purø trømbøig namig købig tøgagwan mutsøsrøbig køn.

²⁰Inchen tru piro pi tøbtag pønrrabeløbe mayamba trubab chab lulen, katø nørro tunnera chigucha chab trubabelø køn. ²¹Inchen srømbalarøngurrimbe misaameraim pala sre srug ibig køn, truba nørreelø, pib arroba lutau kuatsiguelø. Inchen møgueløbe tru treeg trømbøig srug kørroben, Tiuswan tsalø wamabelø køn. Kaguende tru treeg kaig nebub arrubiibe jkatø! purø trømbøig købig køn.

17

Tru trømbøig marøb ishuwan nø chu pasramnug pasrønrai pasrøb

¹Inchen tru siete ángelesmera tru copas siete srua pønrrabelai utuig kan ángel arruabe, nan trenchibig køn:

—Amø cha. Tru nørro pi palamerawan wabig tru nui asrwan møguelan anwei yanøb ishuwan nun chu pasrønrai pasramigwan eshkarrumøn cha. ²Pirau reymerabe tru ishuuba purø trømbøig maren, katø pirau warab misaamerabe mutsiirain køn cha, nø tru treeg trømbøig mariibe vino lataig køben trunun mucha.—

³Inchen Espiritu nø nan tøga pasramisren, tru ángelbe mu misag warab waraimøsrømay nan srua iben, trusrømbe kan ishug kan animal piguiig trømbøigligu itøgwana wai ashibig kur. Tru animalbe Tiuswan purø trømbøig wamabig munchimera pøriitø netsaig, trube turmera siete, kigulmera diez tøgag købig køn. ⁴Tru ishuube piguiiba, yalø piguiiba keweig købig køn, orotøgagøben, tab sruuzheeløtøgagøben, perlastøgagøben tabzhig tamarai. Tasigube kan oro copa mutaig købig køn, tru møgueløba trømbøig marøptø køsøngømdiig mariiba, ashikken kønrrabgaig mariibatø netsiigwan. ⁵Katø nui kappaløyube kan munchi øyeebe mandø termab muguen nebua isumgaig pørig tøgag købig køn: Babilonia purø nuig,

møgueløba kaig marøptø warab ishumburweimba, pirau trømbøig køsøngønrraptiig mariilaimba usrin køn.

⁶Tru ishuwane mutsiiguig wai ashibig kur, Tiuswei misaamera kweetsiilai aniwanba, katø Jesúsweimburab waminchibelan kweetsiilai aniwanba mucha.

Inchen nabe ashippe, truba kørro kwaarig kørromisrinaben, ⁷tru ángelbe nan trenchibig køn:

—¿Chindimbarre kwargu? cha. Nabe ñune tru ishuweimburappa, tru animal trømbøiglig ishuwan niga pasrabig turmera siete, kigulmera diez tøgagweimburappa, øyeebe mandø chibig kermab mu nebua isumgaigwan chi chibig kui eshkarrumøn cha. ⁸Tru animal trømbøiglig ñi asiibe merrabsrømbe øsig købig yandø treeg kømøn cha. Inchendø tru purø trømbø umbu trabyugurri nebatrun cha, tru managatig møra pasramnuumay inrrab. Inchen chiwangurrimbunø marøb urassrøwei yu pirau warab misaamera nømui munchimeran tru managatig øsig purrønrrabelai pørig libroyu pørig chigarbe, tru animal trømbøigligwan ke kwaara ashchun cha, srøtøbe øsig kua, møi yambe pinig mu kaagua, katøyug attrabig kui ashippe.

⁹Igwan tab maig kətashchab ashchappe, yube purø may isubig kømig palønrrun: Tru siete turmerabe tru siete tunnera køn, tru ishug pøtø waig. Katø tru turmeratøwei siete reymerangucha eshkabig køn. ¹⁰Tru siete reymerai utu trattrøgatøbe chab kørwabgwen inchen, kan møikkøsrøn truiløyube møin kwaløm ashib karub pasrøben, kane katøgucha arrumø, srø køn cha. Inchendø yandø truig arruabe, nune maya yanatø kørromisramig nebunrrun. ¹¹Tru animal trømbøiglig, merrabsrømbe øsig pasrabig købig, møi yambe øsig pasrømiibe, tru ocho kønrrabyu rey køn, tru sietelai utugurri webarrub reytwøwei, trube tru managatig møra pasramnuumay inrrabig.

¹²Tru diez kigulmera ñi asiibe ashib karub purramigwan utømø srø pønrrab reymera køn cha. Inchendø tru animal trømbøigligiiba kegøtø, truiløbe reymera lataitøwei mugucha manchinraingaig karumigwan kan uratø tøgagømig utønrrun cha. ¹³I tru reymera diezeløbe ke kandø isua pønrramisra, nømui maramburab maramig tøgagúigwanba, mugucha manchinraingaig karumig tøgagúigwanba tru animal trømbøigligwan tranrrun cha. ¹⁴Inchen nømbe Ubisha-unøba kwayaben, Ubisha-unøbe nømune kananrrun. Kaguende nøbe Maya Misagwan Karub Ashib Pønrrabelaim Pala Nø Karub Ashib Pasrabig, katø Maya Reymerai Nø Rey kua. Inchen nøba pønrrabeløbe Tius wamiilø, lawa wesruilø, nun elachimø melabelø købig køn— cha.

¹⁵Katø ángelbe nane trenchibig køn:

—Møgueløba kaig marøptø tsub ishug wamisra wainug, tru pimera ñi asiibe, tru chi misaamera køben, misaamera purø nørro pønrrabelø køben, misag nørro pønrrabig køben, peg peg wam waminchibelø køben, truilø køn cha. ¹⁶Inchen diez tru kigulmera ñi asiiba, tru animal trømbøigligiibe tru ishug nui asrwan møguelan anwei yanøbigwane ashig kømui inchib tsalø asha, nundø mu keesha asiimfig tsunrrai mara, kəsaaftig yandiig kørromarabe,

tru ishüwei yauwane ma, naatøga patrun chibig køn. ¹⁷ Kaguende Tiusbe nø maig martrab isuigwan trunun nøm isua martrai nømüi manrrømerayu pasrin køn cha. Treeg punrraimbe nømbe kandø isua põnrramisra, tru animal trømbøgøligwan nømüi ashib karub purraigwan tranøb inchai, Tius nø mandø wamindig treeg nebumnegatig. ¹⁸ Tru ishug ñi asiibe tru purø nu ciuda køn cha, pirau reymeran nø merrarrowa karumburab karub tøga pasrabig.

18

Babilonia purø nu ciuda yandø pinab

¹ Øyeeg chab puraibene, katøgan ångel srømbalårøngurri kørarri ashibig kur, mu mandamgaig karub maramigwan purø nuig tøgaig. Inchen pirøbe tru ångelwei tørguegwalmabiitøga tørgwaløm kørømisrøbig køn. ² Incha truba mur wamab trashib trenchibig køn:

“¡Tru purø nu ciuda Babiloniabe

yandø penan, yandø penan! chib.

Møimbe kwaimandziimera yandø nøm waramig nømüi misrøb,

chigurrimbunø kaig mõsiimerai warain trab misrøb,

kaig illimera køsøngømdiig asamguengailai kanbalatø waraig le misrøb indin køn chib.

³ Kaguende misaamera nørrø põnrrabelø mayamba,

nø ke chinchimmørø inchib, mõgueløba trømbøig maringarub vinon mucha, mutsiirain køn cha.

Inchen pirau reymerabe tru ishuuba trømbøig maren,

pirau yanøb, penab inchibeløbe puarmera misrin køn cha,

tru nun maig marøg køben trømbøig marøb pasrai anmeratøga.”

⁴ Inchen srømbalårøngurri katøgan wam trendaig mørøbig kur:

—Ñim nai misaamerabe tru ciudadugurri webambay cha,

nø kaig mariiløyu ñimgucha treetøwei tøgatø marøb melømøwei,

katø chine kaig nebunrrai marøb arrubig nebumøvei inchain chib.

⁵ Kaguende nui kaig mariiløtø srømbalårøngatig tunbasrig pasrøben,

Tiusbe tru ishug sølgandø tabig marmuulan isua pasran cha.

⁶ Nø kanelan maig tranig,

nungucha truburø treetøwei pamay tranay chib.

Mutsamig nø katøganelai tamarin copayutøwei

nuimbe pamay mutsamigwan kandiig lindisha tamaray chib.

⁷ Nøbe maya nuguen tabigu wag køben wab,

katø nø maig isuigwan maig købash tsuig købene,

møimbe treetøwei mandøguen kømüi møra meganrraimba,

kishib meganrraimba maray chib.

Kaguende nøbe nui manrraube trenchibig køn:

“Nabe yube kan reina lataig wamisra war cha.

Nabe keg kucha kwaitøguen kømøwei,

katø managuen isub kisamig chigawein kømønrrun” cha.

⁸ Inchawei treekkurri ke kan kwalømyutø chine kaig nebunrrai marøb amrrunrrabeløbe itømaytø attrun cha:

kwamig køben, kisamig køben, parø arrubig købengue.

Nun naatøga patrun.

Kaguende Señor Tius Newan Maramburab Marøbiibe maig maramigwan truig nø asha maran cha, nune.

⁹ Inchen pirau reymera tru ishuuba larrø trømbøig marøb, chull køtanmaptø chine palømiig purø tabigu nøba warabeløbe nun isub, truba truba wamab kishchun nun tru parrig naguishwan ashippe. ¹⁰ Nun øyeekkatig nebui meganrrai maren, nømbe trunun kørig køb yabsrøndø põnrrabelø køn trenchib:

“¡Karrengucha kuita! ¡Karrengucha kuita!

¡Babilonia, kan yeeg purø nu ciuda,

chigøben nørriig marøbig!

¡Ke kagøppa, ke kan urayutø ñune øyeeg pinisainab pasramig nebuita!” chib.

¹¹ Inchen pirau yanøb, penab inchibeløbe nun isub wamab kisan, kaguende yandø nømüi yanamelan mugucha penønrrabig kaaben. ¹² Nømüi chine nørrø yanamelø, oro køben, an køben, tab sruuzheelø køben, perlas køben, linotøga marig purø tab llensuzheelø køben, yalø pigøzheelø køben, seda llensumera køben, pigø llensuzheelø køben, chine tsiimera may irrabzheelø køben, marfildøga mariilø køben, tab tsiizheeløtøga mariilø køben, broncetøga

mariilø køben, hierrotøga køben, marmoldøga mariilø køben, ¹³ canela køben, chigøben may irrabzheelø køben, inciense køben, mirra køben, asru srøliilø may irrabzheelø køben, vino køben, aceite køben, purø tab harina køben, tirigu køben, niisrai animalmera køben, ubishamera køben, kaullimera køben, kaulli sruig karrumera køben, karuindiig melabelan køben, misaameran køben, øyeelan yandø mu penørrabig kaaben.

¹⁴ Incha ciudawane trenchinrun cha: “¡Ñi purø chull inchib lurra maig mamimerabe ñuyasiibe kaanrrai chab pinøben, katø ñi chull inchib mailø mayzheelø trurrigu tabzheeløbe ñuyasiibe kaanrrai chab pinin køn chib, yandø managuen katøbe asamikkaikke!” ¹⁵ Inchen penab, yanøb inchibelø tru ciudayugurri pua misra købeløbe, ciudawan øyeekkatig trømbøig nebunrrai maren, kørig købitø yabsrøndøø pønrrønrun cha, truba truba wamab, kishib, ¹⁶ trenchib:

“¡Karrengucha kuita! ¡Karrengucha kuita!

¡Kan yeeg purø nu ciuda,

kemig lino llensu purø tabiitøga marig,

yalø pigøzheelø køben, pigøzheelø køben,

orotøgaba, tab sruuzheeløtøgaba, perlastøgaba

tabzhig tamarigwan keweig købig!

¹⁷ ¡Ke kagøppa, kan urayutø chigurrimbunø nørrø købig yeekkucha chab pinita!” chib.

‘Inchen mayeelø tru barcomeran srubeløba, mayeelø maryu amburab iburab misag llirabeløba, barcon ashib truyu purugub llirabeløba, tru maryu llirab an marøbeløba, truilø kerriguelø yabsrøndøø pønrrabelø køn cha. ¹⁸ Incha tru Babilonia ciuda parrig naguishwan ashabe, trenchib trashibelø køn cha: “¡Øyeeg nu ciudatøweimbe katøgane chuguen kaagüig køn!” chib. ¹⁹ Incha nømui tur pala usrø pusrøb, trenchib wamab kishibelø køn cha:

“¡Karrengucha kuita! ¡Karrengucha kuita!

¡kan yeeg purø nu ciuda chib,

mayeelø maryu barcos tøgarmarabe truyu yeeg chine købitøga puarmera misrig!

¡Møimbe ke kan urayutø chab pinisaig kørrømisrin køn! chib.

²⁰ Inchen ñi, srømbalabe, tru ciuda øyeeg pinøben kasraarau! chib.

¡Ñim Tiuswei misaameraba,

katø Cristo nøashib karua øriiløba,

Tius maig karuigwan eshkabeløba kasraaray! chib.

Kaguende Tiusbe ciudawan øyeeg nebunrrai marøppe, ñimgurri øyeeg maramigwan asha mara pasrin køn.”—

²¹ Inchen kan ångel purø murig, kan tirigu kichib srug lataig, purø nuigwan kusrawa, muta, maryu trenchib keguchibig køn:

“Babilonia nu ciudawane øyeetøwei tsakkandø tranrra keguchen,

katøbe managuen asamig kaanrrun cha.

²² Yandø ñuinuube arpas kønabelø kønøben møramig kawei,

chigøben kønabelan tabzhig køni møramig kawei,

lus urrabelø urri møramig kawei,

trompetas urrabelø urri møramig kawei,

katø taska chigøben tabzhig marøbelø mu kawei,

tirigu kichib srug tirigun kichen

katøbe managuen wanrri møramig kawein kønrun chib.

²³ Katøbe managuen ñuinuube lámpara piløben,

tru tørwan asamig kawei,

katø kasharabyu keg misrtrabiiba,

srai misrtrabiiba kasrag waminchen,

trunun møramig kawein kønrun cha.

Kaguende ñuinug penab, yanøb inchibeløbe

yu pirau purø nørreelø købig køn chib.

Katø ñibe trømbø marøb piimailøtøga

pirau misag nørrø pønrrabelan mayamba

chab kegørrøsrkaig køn cha.

²⁴ Babilonia ciudayube

Tius maig karuigwan eshkabelan kweetsilai aniwamba,

Tiuswei misaameran kweetsilai aniwamba,

katø yu pirau mayeelan kweetsilai aniwamba

wetørraig køn.”

19

Srømbalasrø cantailø

¹ Øyeelø chab puraiben, srømbalasrømbe kan wam purø nu soteelai lataig øyah chib kui mørøbig kur:

“¡Kan øyeebe maya nuguen tab køn! chib.

¡Kaigyugurri wesraiba, tørguegwalmabiiba,
maramburab maramibabe namui Tiuswein køn! chib.

² Kaguende maig maramigwan nø asha mariibe,
ciertonig, sølgandø tabig mariilø køn chib.

Kaguen nøbe tru møgueløba purø trømbøig marøb ishug
tru nui trømbøig mariiløtøga pirau mindishibigwan
møra pasrønrrai pasrin køn chib.

Katø Tiuswei karuindiig melabelan
nø ani lusingaruigwan
nungucha ulø payib treetøwei maran” chib.

³ Incha katøyug trenchibelø køn:

“¡Kan øyeebe maya nuguen tab køn! chib.

Tru ishuwei parrig naguishbe
managatig nebib pasrabig pasrønrrun” chib.

⁴ Inchen tru veinticuatro kølli misaameraba, tru pibgatø øsig purrabeløbabe pi-
rausrøngatig tømboñsrøb srala, tru wamisra karub wainug wabig, Tiuswan køriibala tabig
waminchib trenchibelø køn:

“¡Treeg kønrrun! chib.

¡Kan øyeebe maya nuguen tab køn!” chib.

⁵ Inchen tru wamisra karub wainukkurrimbe kan wam mørø trenchibig køn:

—¡Ñim Tiusweiwan marøb melabelø mayeeløba,

katø Tiuswan køriibala pønrrabeløba,

tru nørreelø kusrebelø køben,

katø treeg kømeelø køben,

namui Tiuswane purø tabig waminday!— chib.

Ubisha-unø kasharam kwalø

⁶ Inchen kan truba nu soteelai wammera lataig, kabe kan truba nu pi wanrøb lataig, kabe
kan palaig trashibelø lataig trendaig mørøbig kur:

—¡Kan øyeebe maya nuguen tab køn! chib.

Kaguende namui Tius Newan Maramburab Marøbiibe nø ashib karub pasran chib.

⁷ Kasraarab, katø truba tab kui mørøb,

katø nune maya nuguen tabig waminchigun chib.

Kaguende mømbe Ubisha-unø kasharab kasraaramig pun cha.

Nui srain kønrrabiibe tamara pasran cha.

⁸ Incha srain kønrrabigwane lino llensu,

chishig tørbilabigwan kenrrai tranig køn— chib.

(Pøø tru lino purø tab llensuzhiibe tru Tiuswei misaamera nøm sølgandø tabig mariilan
eshkabig køn.)

⁹ Inchen ángelbe nan trenchibig køn:

—Iigwan pør cha: “Tru Ubisha-unai kasharab yaumay manrrab linchab amrrunrrai
eshkailøbe mayanguen tab kuilø køn”— cha.

Inchabe nane treekkucha chibig køn:

—Iiløbe Tius nø newan ciertonig wamindiilø køn— chib.

¹⁰ Inchen nabe ángelwei merrab tømboñsra køriibala tabig waminchab inchene, ángelbe
nane trenchiptinchibig køn:

—¡Au, øyeeg marmøta! cha. Ñiba, ñui nuneløba tru ciertonigwan Jesús kenamarigwan
treetøwei elachimø, pønrrabelø lataitøwei, nagucha Tiuswei marøb megabiitøwein kur cha.

¡Tiuswane køriibala tabig waminchi! cha. Kaguende tru ciertonigwan Jesús kenamariibe
Tius maig karuigwan eshkabelan Tius maig tamigwan isungarub pasrabig, truitøwein
køn— cha.

Pulø kaulli itøgwanaig

¹¹ Inchen srømbalabe kurig pasrai ashiptindinaben, truyube kan kaulli puliig ke-
namisrøbig køn. Inchen truyu tru itøgwana wabigwane trencha wamig købig køn: “Nø
maig køppe, Managucha Treetø Tabig, katø Newan Ciertonig” cha, treeg wamig, kaguende
nøbe sølgandø tabig mariitøga maig maramigwan asha marøb, katø kwayab inchibig køn.

¹² Nui kabmerabe kan naguro pilab lataig pilabelø køben, nui turyube coronamera truba yam petsaig, kan munchi pørig tøgag købig køn, trunune chi chibig kuigwane nøtøwei asha købig køn. ¹³ Nui kewagúibe anindøga pisig keweig købig køn. Inchen nui munchibe “Tiuswei Wam” cha wamig købig køn. ¹⁴ Inchen tru nørrø sətø srømbalareelø mayamba pasrabiibe lino llensuzheelø puløzhig chishcheelø kewar, pulø kaulli itøgwanar nui wendautø amrrubelø køn. ¹⁵ Inchen nui trigugurrimbe kan trøsr espada webarrubig køn, trutøga misaamera nørrø pønrrabelan kørrinchab. “Incha nøbe ashib karuppe, kan tsandzøn pørtsiitøga karub lataig ashib karunrrun.” Incha katø nøbe tru uvaswan pi wesrunrrab kwarainug kebusra, Tius Newan Maramburab Marøbigwei purø trømbøig namig købiitøga tru uvas piwan wesrunrrab pusøbunørrun. ¹⁶ Incha nui kewagúiguba, srøptsimburappa øyeeg munchi pørig tøgag købig køn:
 Maya Reymeraim Pala Nø Rey;
 Maya Misagwan Ashib Karub Pønrrabelaim Pala
 Nø Karub Ashib Pasrabig, chibig.

Tru animal trømbøgøligwan chinchamamub

¹⁷ Inchen kan ángel nøsigu pasramisrabe, maya illimera srømbalawan llirab amøñibelan mur wamab trendai ashibig kur: “Amrrua, tulundzunay cha, mamig purø nørrø, Tius tamarigwan manrrab. ¹⁸ Reymerai yauwan køben, maya suldaumeran ashib pønrrabelai yauwan køben, chiwangucha kørmø kwayam møguelai yauwan køben, kaullimerai yauwan køben, tru itøgwanabelai yauwan køben, mayeelai yauwan, tru karuindiig melabelai yauwan køben, karuindiig melømeelai yauwan køben, kusreb møguelai yauwan køben, katø treeg kømeeelaiwan købengue.”

¹⁹ Inchen tru animal trømbøgøligwanba, pirau reymeranba, nømui suldau sətømeranba tulundzunin kui ashibig kur, truiløbe tru pulø kaulli itøgwanaiba, truigwei suldaumeraba kwayanrrab. ²⁰ Inchen tru animal trømbøgøligwane merrarraig købig køn, tru isatø Tius maig karuigwan eshkabig kur’ chibigwanbañau. Truiibe tru trømbøgøligwei merrab tru maramburab mariilan asha kønrrai marøbig købig køn. Tru treeg mariitøga peløsrka chab kegørrøsrkaig købig køn, tru trømbøgøligwei marcatøga marcarramabelanba, katø tru trømbøgøligwan treezhigwei asha marigwan køriibala tabig waminchibelanba. Inchen tru animal trømbøgøligwanba, tru Tiusweinukkurri arrubig lataig marendø, peemaytø marøbøligwanba tru nag pisu lataig azufreba, naarabigu øsiiba kebusriilø købig køn. ²¹ Inchen tru katøganelø kørrømisrøbelane tru kaulli palaigwei trigugurri espada webarrubig chab kweecheen, maya illimerabe truilai yaumeran ke kaasha mabelø køn.

20

Tru mil años

¹ Inchen kan ángel tru purø trømbø umbu trabyu llaviwanba, truba nu cadenanba tasku sruaig srømbalarengurri kørraarri ashibig kur. ² Incha tru ángelbe tru dragon trømbøgølig, tru ul merrabsriig, tru nugwaimandzig, Satanás taigwane cadenatøga mil añoswei merrarrawa, lusra pasrøbig køn. ³ Incha tru purø trømbø umbu trabyu kegucha, yaskabwane muguen kurtraingaig kasra pasrøbig køn, misaamera nørrø pønrrabelan peløsrkøb kegørrøsrkømonrrai tru mil años nebumnegatig. Yandø treeg chab puraiben, katø kan maya yanatø picha, elatsamig kømig palønrrun.

⁴ Katø purramisra karub purrailø ashibig kur. Inchen truyube maig maramigwan asha marøb purramigwan utabeløbe purramisrøbelø køn. Katø Jesúsweimburabigwan eshkaikkurrimba, Tiuswei wangurrimba nømui turmeran pariilø købelai mōsiimerangucha ashibig kur. Truiløbe tru trømbøgøligwanba, tru nun treetøwei asha marigwanba køriibala tabig waminchimøwei, katø kappaløyu lata, tasigu lata, marcarramamøwei inchar købig køn. Incha truiløbe katøle øsiirawa, Cristoba mil años ashib karub purrabelø køn. ⁵ Inchen tru kwabelø katøganeløbe tru mil años purayamnegatig øsiirameelø køn. Iig køn, tru kwawa katøyug srøsrø øsiiraibe. ⁶ Mayanguen tab kuilø køn trurriig Tiusweindø tarømariilø, tru kwawa katøyug srøsrø øsiirabelai utu øsiirabelaimbe. Yandø tru kwab kwanrrai katøle kwanagarub arrubiibe nømune chigucha chi martrab kaimanrrun, nømbe masken Tiusweimba, Cristoimba sacerdotessmera kua, nøba mil años ashib karub purrønrrun.

Nugwaimandzigwan yandø kerriguwan kanawa kørrømarøb

⁷ Incha yandø tru mil años nebusen, tru Satanáswane tru merrarrawa keera waninukkurri elachen, ⁸ nøbe pirau misaamera nørrø pønrrabelan kegørrøsrkønrrab webinrrun, yu pirau walligurri, wagurri, ambugurri, igurri misag warabelan —tru Gog taigwanba, Magog taigwanba — kwayamig tulundzunønrrab. Inchen tru kwayanrrabeløbe nu køptø mar mendawan kan pisrum lataig købig køn. ⁹ Incha Tiuswei misaamera warainug tru pøtøgatanba, Tiuswei undaaraig ciuda pøtøgatanba pirau ørøba nømbe algønab

amrrua tulsruben, nag srømbalærøngurri kørarruppe, chishtë parrøbig køn. ¹⁰ Inchen tru nugwaimandzig chine mara peløsrka nømun kegørrøsrkøbigwane tru nag pisu lataig azufreba naarabigu kegutsig købig køn, tru animal trømbøgøligwanba, tru isatø ‘Tius maig karuigwan eshkabig kur’ chibigwanba kebetinug. Inchen truyube nømunne yem, kwaløm managatig purø trømbøig kui mōra melønrrai martrun.

Wamisra karub waig purø nuig køræmtig

¹¹ Inchen kan wamisra karub waig puliig purø nuig pasrai ashibig kur, truyu wabigwanba. Inchen nui merrabgurrimbe pirøba, srømbalababe yandø kerrigu trubab chab lulen, nømuimbe chuguen pønrramig kaabig køn. ¹² Katø truyube tru kwabelø nørøø kusreb misaamera køben, treeg kømø misaamera køben, Tiuswei merrab pønrrai ashibig kur. Inchen libromeran kuren, katøgan libro, tru managatig øsig purrønrrabelai munchimeran pøri librongucha kurøbig køn. Inchen tru kwabelane tru libromerayu maig pørig pønrrøben truyu asha, maig maramigwan treeg asha marøbig køn, nøm maig mariilø køben treekke. ¹³ Inchen marbe tru piyu kwaig purrabelø købelan tranen, katø tru kwangarubig taiba, tru kwabelø pønrraig “Hades” taiba, truilø chigucha nømuinug tru kwabelø pønrrabelan tranen, nømunne møigwandøgucha maig maramigwan treeg asha mariilø købig køn, nøm maig mariilø køben treekke. ¹⁴ Inchen tru kwangarubigwanba, tru kwabelø pønrraigwanbabe tru nag pisu lataigu kebetiilø købig køn. Inchen tru nag pisu lataibe tru srøsrø kwaig kømnetø katøyug kwamig, truiig køn. ¹⁵ Inchen tru managatig øsig purrønrrabelai munchimeran pøri libroyu nømui munchimeran truyu wetørramuinabeløbe mutøgucha tru nag pisu lataigu kebetiilø købig køn.

21

Srømbalaba, pirøba srøizheelø

¹ Incha katø kan srømbala srøiba, srø pirøba ashibig kur. Kaguende yandø srømbalaba, pirøba srøteelø købeløbe yandø chab pinøben, yandø mar chigucha pinin købig køn. ² Inchen nabe tru ciuda Tiusweindø tarømarig, tru Jerusalén srøigwane srømbalærøngurri kørarrai ashibig kur, Tiuswei merrabgurrri. Tru ciudabe kan srai misrtrabig tabzhig keweig tamara pasrab lataig pasrabig køn nui keg kønrrabigweyasig. ³ Inchen tru wamisra karub wainukkurrimbe kan wam truba mur waminchib øyag taig mørøbig kur: “iAul! mōimbe Tius nø pasraig yabe yandø misaameraba pasran cha.

Tiusbe nømbe pasrønrrab pasrøben, nømgurrimbe nui misaamera kønrrun cha.

Inchen Tiustøwei nøashib truyu nømbe pasrøwa, nømui Tius kønrrun chib.

⁴ Incha nøbe nømui kappimeran kerrigu pinømørtrun cha. Inchen yandø kwamig kawei, kisamig kawei, wamab trasamig kawei, pusrkwabig kawein kønrrun chib.

Kaguende merrab chi købiibe chab purayan” cha.

⁵ Inchen tru wamisra karub wainug wabiibe trenchibig køn: “Nabe chiwangurrimbunø srøitø maramønrrun” cha. Inchabe katø nane trenchibig køn:

—Pør cha. Kaguende i wambe maig taibe treeg køb, katø ciertonig køb køn— cha.

⁶ Inchabe katø nan trenchibig køn:

—Yandø chab marig kørørrisran cha. Nabe Aba, Zetaba latawei, Srøsrriiba, Srabeiba kur cha. Møikkøben pimulgwaigwane øsig kønrrai tranøb pi, tru kølømo pigabyu piwan, ka yandø ketig mutcham tranamønrrun cha. ⁷ Møikkøben chine nebuingucha truyu pureb iibiibe ilan keta tranamig tøgægüigwan ketig utønrrun chibig køn. Inchen nabe nui Tius køben, nøgurrimbe nai nusrkain kønrrun cha. ⁸ Inchen chigøben kaig puben kørab lli-rawa ambubeløba, chiweingucha kørømeeløba, ashikken kønrrabgaig trømbøig marøbeløba, kweechipteeløba, møguelø ishumburba trømbøig marøbeløba, kwaimandzigweimbura-belan marøb, trømbø marøb piimabeløba, chiwangøben kan tius kui lataig inchibeløba, mayeelø isapteeløba, mayamba iiløbe nømuimburappe tru nag pisu lataig azufreba naara-bigumay ambamig kønrrun cha. Truiibe tru srøsrø kwaig kømnetø tru katøyug kwamig truiig køn— cha.

Tru srø Jerusalén

⁹ Inchen kan ångel tru sieteealai utuig tru srabeig chine kaig nebunrrai marøb amrrunrra-belan tru sietø copas netsiig mutarwei utuig arruabe, nan trenchibig køn:

—Yusrø amø cha. Ubisha-unai srai misrtrabig, tru srawan eshkarrumøn— cha.

¹⁰ Inchen Espiritu nø nan tøga pasramisren ångelbe kan truba nu tun trurrigu pala tunsrømay pera ya, nane Jerusalén, tru ciuda Tiusweindø tarømarigwan kena-marøbig køn, srømbalærøngurri, Tiusweinukkurri kørarrubigwan. ¹¹ Tru ciudabe Tiuswei

tørguegwalmabigwan tøgäig tøbilibig kørraarrubig køn, kan purø tab sruuzhig, kan jaspe srug tøbilibzhig lataig, kabe kan pigriu tøguelarrøzhig lataikke. ¹² Tru ciuda pøtøgatanbe srug pusrig lendiig trurrigu palaig kusraig købig køn, yaskabmera doce tøgäig. Tru yaskabmørig kan ängel pønrrøben, tru yaskabmerayube munchimera pøriilø pønrrabig køn, Israelweinukkurri karrab misaamerai tru doceelai munchimeran. ¹³ Ciudadu tru yaskabmerabe pørr kal-labgatømay pøn, kandarøgatømay pøn, katøgandarøgatømay sro pøn, pørr pinebgatømay pøn købig køn. ¹⁴ Inchen tru ciudadu pøtøgatan tru srug pusrig palaig kusruigwan niga pasrønrrabig pølsrugu pøtøburab doce warig tøgäig købig køn. Inchen trumørig tru Ubisha-unai tru doce nøashib karua øriilai munchimeran pøriilø købig køn.

¹⁵ Incha tru naba waminchibiibe ciudawan køben, truyu yaskabmeran køben, tru sruutøga pusrig palaig marigwan køben unaasamig kan oro caña tsig sruaig købig køn. ¹⁶ Tru ciudabe mumaytøgucha atsi kømig latazhig købig køn, lendømay lata, yamay lata. Ängelbe tru ciudawan cañatøga unaashene, 2.200 kilómetros købig køn. Yamay lata, lendømay lata, mumaytøgucha latazhig købig køn. ¹⁷ Incha tru pøtøburab palaig marigwan palamay mayan køtashchab unaashene, 75 metrosig købig køn, tru ängel misag unaasimay unaashen.

¹⁸ Tru pøtøburab palaig kusrub mariibe jaspe sruutøga marig køben, ciudabe orotøgatø marig kan pigriu tøguelarrøzhig lataig købig køn. ¹⁹ Inchen tru ciudadu palaig marigwan niga pasrønrrabig katsigwan pusriiløbe chi sruutøgagøben tabzheeløtøga purø tabzhig kønrrai marig købig køn:

Srøsrüibe jaspetøga marig køben,
 tru wendauibe zafrotøga marig køben,
 pøn kønrrabyuibe ägatatøga marig køben,
 piib kønrrabyuibe esmeraldatøga marig køben,
²⁰ trattrogatø kønrrabyuibe ónicetøga marig købig køn.
 Inchen seis kønrrabyuibe cornalinatøga marig køben,
 siete kønrrabyuibe crisólitotøga marig køben,
 ocho kønrrabyuibe berilotøga marig køben,
 nueve kønrrabyuibe topasiotøga marig køben,
 diez kønrrabyuibe crisoprasatøga marig køben,
 once kønrrabyuibe jacinto taig sruutøga marig køben,
 srabeig doce kønrrabyuibe amatistatøga. Øyeeg sruumeratøga marig købig køn.

²¹ Tru doce yaskabmerabe doce perlas købig køn, yaskabmørig kan perlatøgatø marig kandiig kemesraimøzhikke. Inchen tru ciudadu mas lendiig llirainuube orotøgatø marig købig køn, ¡katø! kan pigriu tøguelarrøzhig lataikke.

²² Tru ciudaduibe Tiuswei yawane ashmur; kaguende Señor Tius Newan Maramburab Marøbiiba, Ubisha-unøba, nømashib tru ya købig køn. ²³ Tru ciudabe tør kønrrai pørr pilamig palain kømøwei, pøl pilamig palain kømøwein køn; kaguende Tiuswei tøguegwalmabiibe tru ciudawan kebiløben, tru ciudadu pilab pasrabiibe Ubisha-unø køn. ²⁴ Inchen misaamera purø nørø pønrrabelø tru kaigyugurri wesailøbe tru ciudawei tøryu amøñiben, pirau reymerabe nømui chigurrimbunø purø tabzheelø tøgagüilane srua amba, tranrrun. ²⁵ Kwalømbø chu uraskucha yaskabmerabe kurindø pønrrønrrun. Kaguende truyube yem misrøbiibe kaanrrun. ²⁶ Misag nørø pønrrabelø nømui chigurrimbunø purø tabzheelø tøgagüigwanba, maya nuguen tab indigwanba ciudadumay srua amrrunrrun. ²⁷ Truyube chishig kømig kaiba, katø ashikken kønrrabgaig marøbeløba, katø isapteeløbabe managuen kebamrraamøn. Truyu kebambuppe, tru Ubisha-unai libroyu managatig øsig purrønrrabelai munchimeran pørig tøgatøwei kebamrrun.

22

¹ Incha ängelbe kan nu pi chishchig, tru øsig kømig tranøb piwan nan eshkabig køn. Truibe tøguegwalmabzhig kan pigriu lataig, tru Tiusweimba, Ubisha-unaimba wamisra karub wainukkurri webarrubig køn. ² Tru ciuda tøbøtagwan mas lendiig llirainuube, tru nu pi mendabe øsig kømigwan tranøb tusr ambumay imay pinøgasrøbig pasrabig køn, truiibe mamimera peg, peezhig doce nigabig køn, pølmørig, pølmørig lurramig. Inchen tru tusryu ishiimerabe misag nørø pønrrabelai kwanrømeran tamaramigweyasig købig køn. ³ Tru ciudaduibe Tius kaig nebu warønrrun tainamig kaanrrun. Inchen Tiusweimba, Ubisha-unaimba wamisra karub waibe tru ciudadu pasrøben, nuiwan marøb melabeløbe truyu køriibala tabig waminchun. ⁴ Malaugue nun ashib, nui munchiwan nømui kappalømerayu pørig tøgagøb inchen. ⁵ Truyube yandø yem misrtrabig kawei, truyube tør kønrrai piløgamig palain kømøwei, nøsig palain kømøweim purrønrrun. Kaguende Tius Señorbe nømune nø pilønrrun. Inchen nømbe managatig ashib karub purrønrrun.

Cristo arrumibe lutau køn

⁶ Angelbe katø nan trenchibig køn:

—I wamindiiløbe maig taibe treeg køb, katø ciertonig køb køn cha. Señor, tru nø maig karuigwan eshkabelan nø maig tamigwan isungarub pasrab Tiusbe, nui ángelwan ørin køn cha, tru petø chigøben pureb attrabigwan nuiwan marøb melabelan eshkanrrai.—

⁷ “¡Au! Nabe petø arrumønrrun tan. Chi pureb attrabigwan i libroyu pøriilan møra marøbigweimbe mayanguen tab kuig køn” tan.

⁸ Iigwan ashib, mørøb inchibiibe, Juan, na kur. Incha yandø tru chab ashib, chab mørabe, tru ángel nan kenamarøbigwei merrab nun køriibala tabig waminchab tømønnsrøb sralene, ⁹ nøbe nane trenchiptinchibig køn:

—jØyeeg marmøta! cha. Nagucha Tiuswei marøb megabiitøwein kur cha, ñiba, ñui nunelø, tru Tius maig karuigwan eshkabeløba, katø mayeelø i libroyu wamindiilan møra marøbeløba, truilø lataitøweingue. jTiuswane køriibala tabig waminchi!— chibig køn.

¹⁰ Inchabe katø nane trenchibig køn:

—Chi pureb attrabigwan i kilgayu wamindig pønrrabelane kasrøppa, esegamøta cha. Kaguende tru treeg nebunrrabiibe yandø lutau pasran cha. ¹¹ Sølgandø tabig marmíibe, trube, katøgucha treegwan ka marøb uñ cha. Trømbøig ashikken kønrrabaig marøbiibe, trube, katøgucha treeg ka marøb uñ cha. Inchen sølgandø tabig marøbig kuabe, trube, katøgucha treeg marøbig marøb uñ cha. Inchen Tiusweyasiitø tarømarig kuabe, treetø pasrabig pasrau— cha.

¹² “Au, na, Jesúsbe, petø arrumønrrun cha, nøm møitøgucha maig marig køben, truburø na tranamig tøgagúigwan tranrrab srua. ¹³ Nabe Aba, Zetaba lataig, Srøsrriiba, Srabeiba, katø Pølbaserøbiiba, Patsabiiba, truiibe na kur cha.

¹⁴ Mayanguen tab kuilø køn, nømui keilan tsarøbeløbe, tru øsig kømig tranøb tusryuigwan mu merønrraingaig mamig tøgagøb, tru ciudayu yaskabmerawan kebambub indamig. ¹⁵ Trune tru wera lataig inchibeløba, trømbø marøb piimabeløba, møgueløba, ishumburba trømbøig marøbeløba, kweechipteeløba, chiwangøben kan tius kui lataig inchibeløba, mutøgucha isa wamindamigwane larrø chullelø ke chi tabig kui lataig isa waminchibeløba, iiløbe wambig kørrømisrtrun.

¹⁶ “Na, Jesúsbe, nai ángelwan iigwan ñimun eshkanrrai ørar tru iglesiamerayasig. David kønrrai tru srøl namerrig pasrabig kua, katø nabe Davidweinukkurrindøwei larrøbicha arrubig kur, tru løtsø tøm-rram uras tørguegwalmab estrella.”

¹⁷ Inchen Espíritu Santøba, Ubisha-unai Sraimbabe: “¡Amø!” tan. Iigwan mørøbikkucha: “¡Amø!” chi. Inchen møikkøben pimulgwaibe, amø. Katø møikkøben mutchappe, tru øsig kømig tranøb piwan, ka yandø ketig, muchi.

¹⁸ Maig pub attrabigwan i libroyu pørigwan wamindi mørøbelane mundøgucha, isuptø martrai, nabe eshkar: Møikkøben iilan ka yandø nemarøbigwane chine kaig nebub amr-runrrabigwan nune Tiusbe nemartrun tru i libroyu pørig pønrrabelan. ¹⁹ Katø møikkøben i libroyu maig pub attrabigwan wamindiilan kerrabigwane tru øsig kømigwan tranøb tuswanba, tru Tius nuindø tarømari ciudawanba, Tiusbe nungucha kerranrrun, i libroyu truilaimburab chi pørig pønrrabigwan.

²⁰ Iilan maig kønrrabigwan waminchib eshkabiibe trendan: “Arrumø kømø, nabe petø arrumønrrun” cha.

Treeg kønrrun. Amø pøs, Señor Jesús.

²¹ Namui Señor Jesucristøi tru ka yandø tab indiibe mayeeløba pasrønrrun. Treeg kønrrun.